


Quiarinio pueyaso rupaa pa jiyaniijia

Jesucristojiniji pueyano rupaaajinia



New Testament in Arabela (PE:arl:Arabela)

# **Quiarinio pueyaso rupaa pa jiyaniijia Jesucristojiniji pueyano rupaajinia**

## **New Testament in Arabela (PE:arl:Arabela)**

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

### **Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Arabela

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 11 Nov 2022 from source files dated 29 Jan 2022  
90034700-94c6-5f48-ae9c-2383843fed68

## Contents

MATEO . . . . .	1
MARCO . . . . .	80
LUCAS . . . . .	129
JUAN . . . . .	210
MIISHANO . . . . .	270
ROMA . . . . .	350
1 CORINTO . . . . .	386
2 CORINTO . . . . .	425
GÁLATA . . . . .	449
ÉFESO . . . . .	464
FILIPO . . . . .	477
COLOSA . . . . .	486
1 TESALÓNICA . . . . .	493
1 TESALÓNICA . . . . .	500
1 TIMOTEO . . . . .	504
2 TIMOTEO . . . . .	514
TITO . . . . .	521
FILEMÓN . . . . .	525
HEBREO . . . . .	527
SANTIAGO . . . . .	556
1 PEDRO . . . . .	565
2 PEDRO . . . . .	575
1 JUAN . . . . .	581
2 JUAN . . . . .	589
3 JUAN . . . . .	591
JUDAS . . . . .	593
NIQUISHANO . . . . .	596

## MATEO NAAJIOTASANO JESUCRISTOJINIJI

### *Jesucristo supuetanaajiniji pohuatasano* (Lc 3.23-38)

<sup>1</sup> Jesucristoori supuetana Abraham jiuhuacuajinio supueno quiquiaari, supuetana David niquiohuacuajinionio. Nioori Jesucristo supuetanaa sesaca. Naa quiquiaaritij:

<sup>2</sup> Abrahamri Isaac que quiquiaari. Isaacri Jacobo que quiquiaari. Jacoboori Judá que quiquiaari, tapueyocuaca quejuhuaj. <sup>3</sup> Judaari Fares que quiquiaari, Zara quejuhuaj. Cuno pojori nucuaari quiquiaari Tamar, Judá niquiocua. Faresri Esrom que quiquiaari. Esromri Aram que quiquiaari. <sup>4</sup> Aramri Aminadab que quiquiaari. Aminadabri Naasón que quiquiaari. Naasónri Salmón que quiquiaari. <sup>5</sup> Salmónri Booz que quiquiaari. Booz nucuaari quiquiaari Rahab. Boozri Obed que quiquiaari. Obed nucuaari quiquiaari Rut. Obedri Isaí que quiquiaari. <sup>6</sup> Isairi David que quiquiaari. Davidri Israel pueya jiyaniijia quiquiaari. Davidri Salomón que quiquiaari. Salomón nucuaari coteenu quiquiaari Urías niquiocua.

<sup>7</sup> Salomónri Roboam que quiquiaari. Roboamri Abías que quiquiaari. Abíasri Asa que quiquiaari. <sup>8</sup> Asaari Josafat que quiquiaari. Josafatri Joram que quiquiaari. Joramri Uzías que quiquiaari. <sup>9</sup> Uzíasri Jotam que quiquiaari. Jotamri Acáz que quiquiaari. Acázri Ezequías que quiquiaari. <sup>10</sup> Ezequíasri Manasés que quiquiaari. Manasésri Amón que quiquiaari. Amónri Josías que quiquiaari. <sup>11</sup> Josíasri Jeconías que quiquiaari, tapueyocuaca quejuhuaj. Jiyacaritij, Israel pueyapueeri quioosaaquiaari Babilonia jiyajiniara. <sup>12</sup> Babilonia jiyajinia, Jeconíasri tii mueratequiaari Salatiel. Salatielri Zorobabel que quiquiaari. <sup>13</sup> Zorobabelri Abiud que quiquiaari. Abiudri Eliaquim que quiquiaari. Eliaquimri Azor que quiquiaari. <sup>14</sup> Azorri Sadoc que quiquiaari. Sadocri Aquim que quiquiaari. Aquimri Eliud que quiquiaari. <sup>15</sup> Eliudri Eleazar que quiquiaari. Eleazarri Matán que quiquiaari. Matánri Jacobo que quiquiaari. <sup>16</sup> Jacoboori José que quiquiaari. Joseeri María niyaca quiquiaari. Cuno Maríari Jesu nucua quiquiaari. Jesu sesa tarajanuuri quiquiaari Cristo. Nioori pueyano rupaaajinia sequeya “Pueyaso jiyarosano jiyaniijiarano”.

<sup>17</sup> Naacuajitij, Abrahamjiniji, catorce supuetanaari quiquiaari Davidta. David nuhuaji, socua catorce supuetanaari quiquiaari. Jiyacaritij, Israel pueyapueeri quioosaaquiaari Babilonia jiyajiniara. Babilonia jiyajiniara nojori quioosaanu nuhuaji, socua catorce supuetanaari quiquiaari Cristo jaara rasaaquiaari.

### *Jesucristo rasacari pohuatasano* (Lc 2.1-7)

<sup>18</sup> Naa quiquiaariti Jesucristo rasacari: na nucuarano Maríari tari Joseeta camiriquiano quiquiaari. José numuetuqueyaquishacarijia María, Maríari tariucua manajaraca quiriquiaa. Pueyaso Sohuanucuaajaari na manajetequiaari. <sup>19</sup> Neyacarano José jaara niishiquiaari necorano tariucua manajaraca quiya, nojuajaari jiyanohua niishiriojoriquiaa na cartenura jiyasohuaja. Nojuajaari jiyaniquiaari tamonu jiyoteeri na manajoree. Joseeri maninia pueyano quiquiaari. Majaari María na cararonu paniniu quiquiaari pueya niquiara. <sup>20</sup> Naa José niishiriojosacari na cartenura

juucuatej, Pueyaso seruuri nocua muetaquiaari na maquenujina. José sequereeri:

—Supuetana jiyaniijia David niqiuohuacuajinio supueno Joseenaa, María quia camiri naajaa. Maja quia puerenu. Pueyaso Sohuanucuaajaari na manajorucuaa. <sup>21</sup> Maríari neyanu ranutaniya. Quiocua na sesojore “Jesu”. Sesa na pueya miijiosano tujunutaniya nojori jiuujiajinijiiri. Naaratej, na sesaari quiniutianiya “Jesu”.

<sup>22</sup> Jesu rasaanuuri naa quiquiaariti, tariucuacaanu pueyara Pueyaso sequesano caminiujiunia pohuatasano tohuateenura. Pueyasoori naa na pohuataniquiaari jiyanoehua tarijiatej:

<sup>23</sup> “Nia tojiri. Niyacoori manajenutaniya. Neyanu ranutaniyari. Na sesonutaniyari ‘Emanuel’ ”.

Nioori pueyano rupaajinia sequeya “Pueyaso pata quiyani”.

<sup>24</sup> José niucuasacari, nojuajaari naa miiquiaariti taa Pueyaso seru sequiquiaari nojuacuajani. María riquiaariiri na tiajinia necocuara. <sup>25</sup> Nojoriiri maja na quiniu quiquiaari juhua seetanujuanaa camitioono, María jaara raquiaari neyanujuaatijia. Jaara na raquiaari, na sesojoreeri “Jesu”.

## 2

### *Niishijiaca tiuquiiijosacari conaajaacua*

<sup>1</sup> Jesuuri rasaquiaari Belén tiacajinia, Judea jiyajinia. Cuno quishacari, Herodesri jiyaniijia quiquiaari Judea jiyajinia. Jesu rasaanu nuhuaji, niishijiacaari tiuquiiioquiaari Jerusalén tiacajinia. Nojoriiri Jesu niqiniuria tiuquiiioquiaari jiya pajamaji. <sup>2</sup> Nojori tiuquiiijosacari, nojoriiri pueya nequesoreetaquiaari:

—¿Tee Judiocuaca jiyaniijiarano rasaanucuaani? Canaari niishiyani nojuajaari tari rasaanucuaa. Canaari na rijia niquiquianu jiya pajamajini, canaa jiyajinia canaa quishacarijia. Canaari nocua niyareeni canaa shuquiritianura nojuaja, jiyaniijiarano na quiniuucua.

<sup>3</sup> Jiyaniijia Herodes tojishacari naa niishijiaca sequesantej, jiyanoehua tacaquiaariiri. Puetunu Jerusalén tiacajinia quiniaajanaari tacaquiaarijihuaj. <sup>4</sup> Nocuai, Herodesri Judiocuacaacuara secojona sequequiaari nocua nojori nijionura, Moisés Rootasanojiniji niishitiojonaanio. Nojori tiuquiiijosacari nocua, Herodesri naa nequesoreetaquiaari nojori:

—¿Tee Cristo rasaanutaniyani, Judiocuaca jiyaniijiarantej?

<sup>5</sup> Nojoriiri na riucuaquiaari:

—Belén tiacajinia rasaanutaniyano, niya Judea jiyajiniani. Naa naajiotasano quiyacuajaari Pueyaso sequesano caminiujiunia sequesano. Cuno tariucuacaanu naajiotasanocuajaari naa sequeyatej:

<sup>6</sup> “Belén tiacajinia quiniaanaa, nia tiacaari maja najuhua shiitianiyojua tiaca Judea jiyajinia. Cuno nia tiacajiniani, Jiyaniijiajanaa cutaraari supenutaniya. Nojuajaari socua cutara Jiyaniijiajanaa quiniutianiya tamasa jiyaniijiacajiniji Judea jiyajinijinio. Cunoori maninia jitianutaniya cua pueya, Israel pueya”.

<sup>7</sup> Naa pueya sequesano na tojinu nuhuajiti, Herodesri cuno jiya pajamaji nijiono niishijiaca nequesoreetaquiaari jiyasohuaja:

—¿Taacari rijia niquishaacanu seetanujuanaani?

<sup>8</sup> Nojori riucuanu nuhuaji, Herodesri na sapojonuta nojori sequequiaari:

—Nia quiaare Belén tiacajinia. Niocua jacaria nequesoretasee cuno mueyajiniji. Naa jaara na riuriatare, niocua cua numootecuhua. Janiyacua nocua quiaarejaaniuhua cua shuquiritianura nojuaja.

<sup>9</sup> Niishijiaca tojiniu nuhuaji naa jiyaniijia Herodes sequesantej, nojoriiri quiojiyareecuhaj. Jiya pajamaji na niquitiushano rijia niquitiuriiri nojori puetaano. Rijiaari pootia tiuushii tia caco, tee mueya quiriqiaacuajani. <sup>10</sup> Nojori niquishacari rijia, niishijiacaari jiyanojua timitiucuaari. <sup>11</sup> Tiacu tiuquitiaseeri. Conaaja niquitiushii na nucua Mariataari. Conaajaacuara mojuetacoquiaariiri. Na shuquiriatureeri. Na nuhuaji, niishijiacaari na patootasano casaa riataquequiaari, nareya na niquitiosocoriquiano conaaja. Nojoriiri na niquitioquiaari oro, shanohua jaanutaja catijiasocoriquianojuhuj, tamaatiucua shanohua jaanutajanio. Na sesaari tahue rupaajinia “mirra”. <sup>12</sup> Na nuhuaji, Pueyasoori cuno niishijiaca sequequiaari na maquenujia, maja Herodescua nojori tacatenuhuara Herodes nojori pohuatanuhua conaajajiniji. Naacuajitij, niishijiacaari tamonu nucuacuhua tacatequiaariuhua na jiyajiniohuara.

*Egipto jiyajiniara Jesu mashitiasaanujiniji pohuatasano*

<sup>13</sup> Niishijiaca jaara quiaquiaariuhua, Pueyaso seruuri Josecua muetaquiaari na maquenujia. José sequereeri:

—¡Quia sanere! ¡Conaaja quia mashitiare na nucua Egipto jiyajiniara! Quiniqui nia quishii, janiya cuara sequerohua quiajanijaaatijia. Herodesri Belén tiacajinia na pueya pajetenutaniya conaaja, na motesocoriquiano.

<sup>14</sup> Joseeri sanequiaari. Cuno niucuaaja, conaaja mashitiaree na nucuaajaari Egipto jiyajiniara. <sup>15</sup> Nojori tiuquishacari Egipto jiyajinia, tii quishi-iquiaariiri, Herodes cuara cusoorajaatijia. Nojoriiri naa Egipto jiyajinia quiquiaaritij, tariucuaaanu Pueyaso sequesano tohuateenura maninia, Herodes cusonu nuhuaji. Pueyasoori naa pohuatequiaari na sequenu panishano caminiujiuniacuaja:

“Cua niyanu piiriinijia, Egipto jiyajiniji na tacatenuhuara”.

*Herodes puecootesacari muerasu*

<sup>16</sup> Jiyaniijia Herodes jaara niishiquiaari cuno niishijiacaari na ruuretaquiaari saaja, Herodesri jiyanojua juaquiaari. Na pueya jiyaroquiaari puetunu naatujoori canuuniyojuajanaa nojori puecoonura Belén tiacajinia, na shocuaqueya tiacajinia quiniaa muerasunio. Naa miiquiaariiri Jesu na monura juucua. Herodesri na pueya sequequiaari cuara puecoosaaria puetunu shusha roosanojuanaa, mariyata canapuate caapiqui marijia shocoteo quiquiaarijiani. Herodesri naa sequequiaari niishijiaca pohuatanuucua nojuaja, Jesu rijiaari tarijia niquishaquiaari. Juhuanojuaajaari maja caapiqui marijia shocojonu quiquiaari rijia niquishaanujiniji. <sup>17</sup> Naacuajitij, tariucuaaanu Pueyaso sequesano caminiujunia Jeremías sequesanoori tohuateequiaari. Jeremías sequesanoori naa naajiotasaaquiaar-  
itij:

<sup>18</sup> “Sapuenuri tojishiya Ramá tiacajinia. Jiyanojua taraatia. Raquelri necohuacua sariyacojiya. Majaari na paniniu na cumaniijasaaanura. Necohuari tari puecoosaarucuaa”.

<sup>19</sup> Na nuhuaji, Herodes jaara cusocuaari, Pueyaso seruuri Josecua muetaquiaariuhua na maquenujia, Egipto jiyajinia nojori quishacarijia. <sup>20</sup> Na sequereeri:

—Quia sanere. Mueya quia tacaretaarohua Israel jiyajiniohuara na nucuaaja. Mueya monu panijiaari tari cusonuucuaa.

<sup>21</sup> Joseeri sanequiaari. Mueya tacaretaquiaariuhua Israel jiyajiniohuara na nucuaajaari. <sup>22</sup> Israel jiyajinia na tiuquishacari, Joseeri numootesaaquiaari Herodes niyanu Arquelaori jiyaniijia quiriqiaa jiyacari, na

que niti Judea jiyajinia. Nocuaji, Joseeri puerequiaari quiniuri na quiniuria. Jiyacarijiuhuj, Pueyasoori na niishitioquiaari na maquenujinia, tamocora na quianura. Naaratej, Joseeri mueya nucua pacuquiaari Galilea jiyajiniara. <sup>23</sup> Galilea jiyajinia nojori tiuquiiijosacari, Nazaret tiacajinia quishiiri. Naacuajitij, tariucuacaanu Pueyaso sequesano caminiujunaa sequesanoori tohuateequiaari nojori jaara naa naajiotaquiaaritij: “Jiyaniquishaanutaniyari Nazaret tiacajinijinio pueyano”.

### 3

#### *Tiuquinijiona Juan pohuatasacari cariiquia jiyajinia* (Mr 1.1-8; Lc 3.1-9, 15-17; Jn 1.19-28)

<sup>1</sup> Na nuhuaji, tamonu pueyanoori cariiquia jiyajinia quiquiaari Judea jiyajinia, Jordán moo shuriucua. Nojuajaari sesojosaaquiaari Tiuquinijiona Juan. Nojuajaari Pueyaso sequenu panishano poojotaquiaari pueya niquiara. <sup>2</sup> Naa pohuataquiaaritij:

—¡Nioojia nia tacatore sesa nia miiniujiniji! Pueyasoori tari nia jiyanoonu paniya, na muerasu nia quiniuria seetanujuanaa.

<sup>3</sup> Jiyanhua tarijia, Pueyasoori na pueyano Isaías pohuataniquiaari miriqui na sequenu panishano pueyara. Isaíasri naa na pohuataquiaaritij: “Pueyano rupaari tojishaaree cariiquia jiyajinia. Naa nacajoriquiaari: ‘Nia jeeccanamitiri Jiyaniijia nuu, maja mojoquetunu na quiniuria’ ”.

Tiuquinijiona Juanjanaacuajaari nio tariucuacaanu pohuatasano tohuateequiaari, pueya na niishitiojosacari nojori jeenucuanura nojori jiuujia Jesuucujia.

<sup>4</sup> Cuno Juan toqueeri camello cajacajiniji shitiasano quiquiaari. Na cajiniocua camarucutequiaari shoque sacuanijiasanoori. Na miaquesanoori quiquiaari cariiquia jiyajinia na riuriatasano sequeru, samiyatunio.

<sup>5</sup> Pueyari Juancua quiojoquiaari na tojtianura. Queraatia pueyari nocua quiojoquiaari Jerusalén tiacajinijinio, Judea jiyajinijiniojuhuaj, puetunu Jordán moo shocuaqueyajinijiniojuanaano. <sup>6</sup> Pueya jaara pohuataquiaari Juan niquiara sesa nojori miijosano, Juanri nojori tiuquinijioquiaari Jordán moojinia, Pueyaso tojjiara nojori quiniu panishacari.

<sup>7</sup> Na tiuquinijosacari pueya, Juanri queraatia Fariseocuaca niquiquiaari nocua nijiyano, Saduceocuacanio. (Nojoriiri Moisés Rootasanojiniji niishitiojonaa quiquiaari.) Tiuquinijiona Juanri nojori sequequiaari:

—¡Niaquiiri sesa pueya, juhua sacocua! ¿Cante nia numooteree nia mashiniuria Pueyaso saniitionuucujia nijaniyani? Nio pa quishacarini, quera Pueyaso saniitiosacari jiyanhua na ruuretajaca pueya. <sup>8</sup> Naa jaara seetanujuanaa nioojia tacatore sesa nia miiniujiniji, ¡saaja maninia nia miiri, maja sesa! <sup>9</sup> Majaari nia jiyaniniu niaari Pueyaso muerasu, Abraham niquiohuacuajinio supueno nia quiniuucua. Cua tojiri, Pueyaso jaara paniri, nojuajaari na naata Abraham niquiohuara shipininiu nio saijinijijiuhuaj.

<sup>10</sup> Nio miriqui sequesano nia tojirijiuhuaj pueyanaa. Naana jaara maninia jajau muetuyaquiri, na camaruuri na nuya na catijasocoriquiano. Naajuhuj, Pueyasoori quera saniitionutaniya nijaniya, na tojiyashijiaca nia quiniuucua.

Tiuquinijiona Juanri pueya sequequiaari socua:

<sup>11</sup> —Janiyari moojinia nia tiuquinijiyani, nioojia nia tacatosacari sesa nia miishanojiniji. Cua nuhuaji, tamonuuri niriqiano cutara. Nojuajaari jiyanhua socua jiyaniijiajanaa janiyajiniji. Janiya maara jiyanhua shuquiriaatia quirini, nojuaja jaara cua sequere na seru cua quiniuria

quenaaja na sapatu cua jocuanura nera. ¡Nojuajaari jiyaniijajanaa cutara! Nojuajaari Pueyaso Sohuanu tiuquinijionutaniya nioojiajinia, cumaacaraca nia quiniuria, seetanu Pueyaso muerasujanaa nia quiniuria. Nia jee-  
 quenutaniyajaariuhua juhua manitia, sesa nia miishanojiniji. <sup>12</sup>Nia tojitiare miriqui cua sequesano. Trigo jaara rapijiosaare maninia, na camaruuri na queyaroojua, jiyocuacaanuji na totinijasocoriquiano. Naa miiquiaari paratu cuaara paara na cocua, na sucuanio, na jajau na racatanura tia-  
 jiniaaco. Naajuhuj, cua nuhuaji niniaari tariucua pueca, na tojitianaa na rijionura na quiquiojiniaara, saniniuujia na tojiyashijiaca na quejoonura manijinia na saniitionura, tee mani maquesaaquiyacuajani.

### *Jesu tiuquinishacari moojinia*

*(Mr 1.9-11; Lc 3.21-22)*

<sup>13</sup> Na nuhuaji, Jesuuri tiuquiquiaari Galilea jiyajiniji Tiuquinijiona Juan-  
 cua, Jordán moojinia. Tiuquinijiona Juan sequeseeeri:

—Cua tiuquinirijia.

<sup>14</sup> Juanri saaja na sequeree:

—Maja Jiyaniijianaa. ¡Quiaa cutaraari maninia pueyano! ¿Casaara cucua quia nimiaa cua tiuquininiuria quiajaninya moojiniani? ¡Cua tiuquiniri juhuari cutara!

<sup>15</sup> Jesuuri saa sequereejaa:

—Quiarijia quia miiri cua panishano. Cua tiuquiniri naajaa. Maniniaari pa miiniuria puetunu Pueyaso panishanojuanaa.

Naacuajitij, Juanri na tiuquiniquiaari. <sup>16</sup> Jesu jaara tiuquinishaaquiaari, nojuajaari ritia tacaquiaari moojiniji. ¡Jiyacaritij, jiya cajiniocuaari riatequee! Jesuuri Pueyaso Sohuanu niquiquiaari nocua roseyano juhua mococoonu niquishano. Nocua tiuushiiri. <sup>17</sup> Jiyacaritij, jiyocuacaanuji Pueyaso rupaari tojishaaree naa sequeseyano:

—Nioori cua Niyanuniyojua. ¡Na shuquiritiaa jiyanoahuanijia!

## 4

### *Samaruhua jiyaniijia saniniujiushacari Jesu*

*(Mr 1.12-13; Lc 4.1-13)*

<sup>1</sup> Na nuhuaji, Pueyaso Sohuanuuri Jesu jiyataquiaari cariiquia jiyajiniara, Sesaaca saniniujiushocoriquiano cuniqui.

<sup>2</sup> Majaari quenaaja Jesu miaquenu quiquiaari. Cuarenta juuca, cuarenta niucua na shoconujuquiaari na miaqueyaquishacari. Na nuhuaji miaajequiaariiri. <sup>3</sup> Sesaacaari jiyacari nocua niquiaari na saniniujiuniuria. Jesu sequeseeeri:

—Quiaa jaara seetanujuanaa Pueyaso Niyanu quiri, nio sai quia jataniri panra. Quiocua na sarohua.

<sup>4</sup> Jesuuri saaja na riucuaaree:

—Maja. Pueyaso Rupaajiniacuajaari naa naajiotasano quiyatej: “Pueyanoori maja na naatanu saa miaquesanoocua. Seetanujuanaa saminio quiya cutaraari na tojishacari puetunu Pueyaso Rupaajanaa”.

<sup>5</sup> Na nuhuaji, Sesaacaari Jesu jiyataquiaari Jerusalén tiacajinia. Na nujuatequiaari jiyocuacaanuuri, Pueyaso Secojoua tia cacojiria. <sup>6</sup> Na sequereeri:

—Quiaa jaara seetanujuanaa Pueyaso Niyanu quiri, niiquiji quia jaataare jiyocua. Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaninya. Nojoriiri quia quianutaniya, maja quenaaja saajiaacua quia jiriataaquiniuucujia”.

<sup>7</sup> Jesuuri na riucuaaree:



—¡Maja! Pueyaso Rupaajinia, naa naajiotasanoori quiyajuhujaj:  
“Maja quia saniniuuniu quia Jiyaniijia Pueyaso”.

<sup>8</sup> Na nuhuaji, Sesaacaari Jesu tacaniquiaari socua jiyanoehua jiyaconaja tuhananuucua. Cuniqiji na niquitirii puetunu jiya jiyaniijiacajanaari. Jiyanoehua cumaacaraca quijiaca. Jiyanoehua queraatia casamiriaca quijiaca. Jiyanoehua maninia niquishano. <sup>9</sup> Jesu sequereeri:

—Janiyacua quia jiyatere jiyaniijajanaara nojori nitini, quiaa jaara cua cariquimiaji mojoquetare quia shuquiritianura janiya, quia jiyaniijia cua quiniuria.

<sup>10</sup> Jesuuri na sequeree:

—¡Niiqiji quia quiaare Satanásnaa! Naa naajiotasano quiyacuajaari Pueyaso Rupaajinia:

“Saaja quia Jiyaniijia Pueyaso quia shuquiritiare cutara. Saaja nojuaja quia tojiri”.

<sup>11</sup> Na nuhuaji, Sesaacaari na tarinitiaquiaari. Jiyacaritij, Pueyaso seyari Jesuucua niquiaari na mianuutenura.

*Jesu coteesacari poonijionu Galilea jiyajinia*

*(Mr 1.14-15; Lc 4.14-15)*

<sup>12</sup> Jesu niishishacari Tiuquinijiona Juan nujuatesaarucuaa nujuatejojua-jinia, nojuajaari Galilea jiyajinia quiaquiaariuhua. <sup>13</sup> Jesuuri Nazaret tiacajiniji pacuquiaari Capernaum tiacajinia na quiniuria, caminia shuriucua. Cuno jiya quiquiaari Zabulón niquiohuacuajinio supueno pueya jiya, Neftalí niquiohuacuajinio supueno pueya jiyanio. Zabulón, Neftalínio, nojoriiri supuetana Jacobo niquiohua quiquiaari. <sup>14</sup> Jesu quishacari cuno jiyajinia, naa tohuateequiaariiri taa tariucuacaanu Pueyaso sequesano caminiuujunia Isaías pohuataquiaari cuno jiyajinijicujani. Nojuajaari naa pohuataquiaari Pueyaso niishitiosano nojuaja taa na nuhuaji na sequesano tohuateenu-taniyani:

<sup>15</sup> “Zabulón pueya jiya, Neftalí pueya jiyanio, cunoori caminia shuriuquiumia neteja nucuama quia, mariyata Jordán moo tamajiria. Cunoori mariyata Galilea jiya, tee taucuaca quiyacuajani. <sup>16</sup> Cuno jiyajinia quiniaari ninishiqui quijiaca quiquiaari. Quiarijia saniniuujia, nojoriiri jiuujia Cuhuatana niquiriucuaa. Nojoriiri cusun pueretujuaca quiquiaari tarijia. Quiarijia cutara nojoriiri cuhuatasaaree nojori puereyaquiniucujaj”.

<sup>17</sup> Jiyacaritij, Jesuuri Pueyaso rupaa pohuatanu coteequiaari. Naa sequiquiaariiri:

—Nioojia nia tacatore sesa nia miiniuujiniji. Pueyasoori nia paniya na pueya nia quiniuria.

*Jesu saquirojosacari sapitiaaja ritianaa*

*(Mr 1.16-20; Lc 5.1-11)*

<sup>18</sup> Jesuuri Galilea caminia shuriuquioco rucuanajoriquiaa. Jiyacaritij, Pedro niquiriiri, tarajanu Andrésnio. Pedro sesa quiquiaarijuhuaj Simón. Nojoriiri sapitiaaja ritianaa quiquiaari shiyaruta. Nojoriiri jiyacari shiyaru jaqueroortariquiaa. <sup>19</sup> Jesuuri nojori sequeree:

—¡Miji! Cua tarajare. Cua pueyara nia quiri. Janiyacua nia jiyatere pueya quioojuara saniniuujia, juhua sapitiaaja quioonaa.

<sup>20</sup> Nojoriiri na shiyaru tiujiaquiaari ritia. Jesuta quiojijareeri.

<sup>21</sup> Jesuuri shiitianiyojua socua rucuanequiaari na tacoji. Socua caapiqui pueya riuriataseeri. Nojoriiri quiquiaari Santiago, tarajanu Juannio. Cuno pojori queeri quiquiaari Zebedeo. Nojoriiri na queta quiriquiaa botejinia.

Na shiyaru cushipirijionuuriquiaari. Jesuuri Santiago sequeree Juannio, na pueyara nojori quiniuriajuhuaj. <sup>22</sup>Nojoriiri ritia bote tiujiaquiaari na queta, Jesuta na quiojonura.

*Jesu niishitijosacari queraatia pueya*

*(Lc 6.17-19)*

<sup>23</sup> Jesuuri puetunu Galilea jiyajiniajanaa rucuanajoquiaari na saquiriojosano pueyata. Pueyaso secojojua tiacajiniaqueya niishitiojoriquiaari. Pueyaso rupaa pohuatariquiaari taa Pueyaso jiitianu paniya maninia na pueyani. Puetunu tamaatia cusonuunu jiitiacojuajanaa naatanijioquiaariiri. Puetunu nootunejaca pueyajanaa shaataquiaarijiaariuhuj. <sup>24</sup> Naa maninia na miishanoori poojotasaquiaari puetunu Siria jiyajiniajanaa. Naaratej, pueyari Jesuucua patootaquiaari puetunu cusosuhujanaa, puetunu tamaatia cusonu jiitiajacajanaanio, cumatacuruhuana cusosuhujuhuj, nootunejacanio. Nocua jiyatasaquiaarijuhuaj samaruhuaraca quijiaca, canashiyaquiji cusojonuujuacanio. Jesuuri nojori naatanijioquiaari puetunujuanaa. <sup>25</sup> Jiyanojua queraatia pueyari Jesu nuhuajiquiaari Galilea jiyajiniji, Decápolis tiacajinijinio. Na nuhuajiquiaarijuhua Jerusalén tiacajinijinio, Judea jiyajinijiniojuhuaj, mariyata Jordán moo taquijiria jiyajinijinionio.

## 5

*Jesu pohuatasacari Pueyaso rupaa tuhuananujiniji*

*(Lc 6.20-23)*

<sup>1</sup> Jesu niquishacari jiyanojua queraatia pueya nocua niyano, nojuajaari tuhuananuucua tacaquiaari tiji na cajiniuria. Na saquiriojosano pueyari nocua catecanoquiaari. <sup>2</sup> Jesuuri nojori niishitiojonu coteequiaari. Naa na pueya sequereeri:

<sup>3</sup>—Shuquiriaatia quijiaca cutaraari noo pojori, canapuate niishiyani noojia sesa quiya. Nojoriiri Pueyaso pueyara quiriqiano, pueyaracaanu na jiitianura nojori.

<sup>4</sup> 'Shuquiriaatia quijiaca cutaraari noo pojori canapuate taraatia quiyani sesa na miiniuucua. Pueyasoori nojori cumanjianutaniya.

<sup>5</sup> 'Shuquiriaatia quijiaca cutaraari noo pojori, canapuate maja tama nerajaaja niishiriojuacani. Nojoriiri nio jiya camaruhua quiniutianiya, taa Pueyaso sequequiaaricujani.

<sup>6</sup> 'Shuquiriaatia quijiaca cutaraari noo pojori, canapuate maninia quiniuucua jiaatiaa jiyanojua, taa pa jiaatiaacuaa miaquenuucuanu. Pueyasoori maninia quijiacara nojori jiyatenutaniya.

<sup>7</sup> 'Shuquiriaatia quijiaca cutaraari noo pojori, canapuate naquiya miishanoocua taraajejani. Pueyasoori nojoriicua taraajenutaniyajaacuhuj.

<sup>8</sup> 'Shuquiriaatia quijiaca cutaraari noo pojori canapuate maninia jiuujiaracani. Nojoriiri Pueyaso niquiniutianiya cutara.

<sup>9</sup> 'Shuquiriaatia quijiaca cutaraari noo pojori, canapuate pueya jiyanootiootajani. Nojoricuajaari Pueyaso muerasu quiniutianiya.

<sup>10</sup> 'Shuquiriaatia quijiaca cutaraari noo pojori, canapuate naquiya miishanoni, Pueyaso panishano nojori miiniuucua. Pueyasoori nojori jiitianutaniya pueyaracaanu shuquiriaatia, na muerasu nojori quishacari.

<sup>11</sup> 'Shuquiriaatia quijiaca niajaniya, tamasaca jaara nia macaatiri cua tojitajaca nia quishacari, naajuhuj, nojori jaara miya naquiya niajaniya. Naajuhuj, niaari shuquiriaatia quijiaca, nojori jaara saquiriojotare niaacuara na sapojonuta, maninia nia tojinuuucua janiya. <sup>12</sup> Niaa jaara

naa miishaaretej, jiyano hua nia timiquiore. ¡Shuquiriaatia nia quirijiuhuaaj! Pueyasoori cunora jiyano hua maninia nia miiniutianiya jiyocuacaanu nia quishacari nata. Tariucuacaanu Pueyaso sequesano caminiujiuniaacuajaari naa naquiya miishaaquiaarijiuhuaaj, nia supueyaquishaacarijiyojua.

*Pueyaso muerasuuri juhua shoni quiya mijiria, juhua ninishiqui cuhuatanaajuhuaaj*

*(Mr 9.50; Lc 14.34-35)*

<sup>13</sup> 'Mijiria, niaari juhua shoni quiya, mijiria quiniaa mariqui socua sese-yareeri. Shoni jaara na tiquiriiquia jatama, ¿maatucua taa tiquiriiquiara quiriuhuani? Maja na naata. Shoni jaara naa quiritij, najuhuana quiyari, shaaca. Jiyano shoni cuara jataaaria nuujinia, pueya rapijosocoriquiano.

<sup>14</sup> 'Naajuhuaaj, niaari juhua ninishiqui cuhuatana mijiria quiniaara. Tiaca jaara tuhananuucua quiri, majaari na naata na jamaaniu. <sup>15</sup> Naajuhuaaj, pueya jaara samaritiu noshitiri, jiyocuacaanu morotashiyari, tiaco na cuhuatanura maninia, pueya niquiniuria maninia nocuaji. Majaari samaritiu niataaanu conatu cariquiaco. <sup>16</sup> Naajuhuaaj, nijaniya cuara maninia miiria pueya niquiara. Maninia nia miishacari, niaari pueya cuhuataa juhua samaritiu. Naa maninia miihia nia quishacaritij, pueyari Jiyocuacaanu Quijia nia Que Pueyaso maniniuhuaqueetanutaniya.

*Jesu niishitiojosanoori tariucuacaanu Moisés Rootasanojiniji*

<sup>17</sup> 'Majaari nia jiyaniniu janiyari niquiaarini Moisés Rootasano cua tarinitiniuria nijaniya, Pueyaso sequesano caminiujiuniaa rootasanonio. Maja. Niquiaari cutaranijia puetunu cuno rootasanojuanaa cua tojiniuria, cua tohuateenurajuhuaaj. <sup>18</sup> Pueyanaa, seetanujuanaa nia sequeyanijia. Nio jiya quishacarijia, jiya cajiniocuanio, majaari quenaaja niquiriyatu naashanoniyojua Pueyaso Rupaajiniji shaajetesaanu quiniutianiya. Majaari na shaajetesaanu quiniutianiya puetunu Pueyaso naajiotesanajuanaa cuara tohuateerejaatijia. <sup>19</sup> Naaratej, tamonu pueyano jaara jiyaniri tamonu rootasano tariucuacaanu Pueyaso Rupaajiniji najuhuana sequesano, nojuajaari cocuaatia miya. Nojuaja jaara cuno tariucuacaanu rootasano tojiyaquiri, cuno pueyanoori socua rerequetesano quiniutianiya narta Pueyaso muerasujinijinio. Naajuhuaaj, nojuaja jaara pueya niishitiojore nojori tojiyaquiniuria cuno rootasano, cuno pueyanoori socua rerequetesano quiniutianiya puetunu narta Pueyaso muerasujinijijianaa. Saniniuujia, cante tariucuacaanu Pueyaso rootasano tojiquiaanijia, na niishitiojoquiaa tamasaajaariuhuaaj, cuno pueyanoori socua tojishano pueyano quiniutianiya Pueyaso shuriucua jiyocuacaanu. <sup>20</sup> Nia numooteyanijia, niaa jaara quiyaquiri socua maninia quijiaca Fariseocuacajiniji, Moisés Rootasano niishitiojonaajinijinio, majaari Pueyaso muerasu nia quiniu quiniutianiya.

*Jesu niishitiojosano maja pa juaaniuria*

*(Lc 12.57-59)*

<sup>21</sup> 'Niaacuajaari tojiquiaari taa pa supuetanaa sequesaaquiaaricuajani: "Maja monu. Cante pueyano monani, nojuajaari nequesoreesaanutaniya".

<sup>22</sup> Janiyari saniniuujia nia niishitiojiyani, cante narta pueyanota juaajiani, cunoori nequesoreesaanutaniya. Naajuhuaaj, cante narta pueyano saarijiojuani, cunoori nequesoreesaanutaniya jiyaniijianucua niquiara. Naajuhuaaj, cante narta pueyano sesacareeni, cunoori quera jatashiya mani quiquiojinia, pueyaracaanu saniitiosocoriquiano.

<sup>23</sup> 'Naacuajitij, nia niquitionu panishacari Pueyasora nia casaa, niaa jaara jiyacari niishiqui, quiaari quiarta pueyano juaatiriucuaa quiocuara, ritia

quia tiujiare cuniqui quia niqutiosocoriquiano Pueyasora, catijiaja shuriucuan. <sup>24</sup> Quiarta pueyanota quia jiyanoootioocoocua coteenu. Na nuhuaji cutara quia naata niqutionu quia casaa Pueyasora.

<sup>25</sup> 'Tamonu jaara quia jiyataa nequesoreenaacua, sesa quia miiniuucua nojuaja, maninia quia pohuatate ritia nojuaja, taa quia miiniutianiyani na jiyanooniuria quiajaniya. Ritia nia jecatoore nucuaco nia quiasacarijia, quiaa mariqui nequesoreena niqutiosaareeri. Nequesoreena naasucuaari quia niqutionutaniya nujuatejojua camarnu saniniuujia. Nojuajaari quia nujuatenutaniya nujuatejojuaajinia. <sup>26</sup> Seetanujuanaa nia sequeyanijia, majaari quia tohuatanu quiniutianiya, quiaa cuaara niqutiorejaatijia puetunu na sequesano cumaneecajanaa quia cumaneecajiniji.

*Jesu niishitiojosano, maja pa camishoo maajiicua pa jiaatiaaquiniuria*

<sup>27</sup> 'Niaacuajaari tari tojiquiaari nio tariucuacaanu rootasano: "Maja tamonu niqutocua numuetucunu". <sup>28</sup> Janiya cutaraari nia sequeyani, pueyano jaara na camishoo maaji niquri nocua na jiaatianuta, cunoori juhua na numuetucuree tari noojiajinia.

<sup>29</sup> Na nuhuaji, Jesuuri nio miriqui sequesano sequequiaari pueyara, jiyanoohua na niishitiojonura nojori:

—Naaratej, quia miaquetajara quia namijia jaara sesa miitiri quiajaniya, quia namijia quia jiatere. Tamocora quia jatate. Quiajanijara socua maninia cutaraari namijijiu quia quiniuria, maja quia jataaanura maniquiujinia puetunu quia cuaqueyatajanaa. <sup>30</sup> Naajuhuaaj, quia miaquetajara quia numatu jaara quia miitiri sesa, quia jiyatarenaj. Tucuacaanu quia jatate. Socua maninia cutaraari quiara quia jiyatanura quia numatu, maja puetunu quia cuaqueyatajanaa quia jataaanura manijinia, pueyaracaanu quia miiniuria naquiya tii.

Naa na pohuatasacaritij, Jesuuri pa niishitiojiya maja pa tojiniuria poojia panishano, sesa na miitiniuria pa cuaqueya.

*Jesu niishitiojosano maja pueya cartenura necocua*  
(Mt 19.9; Mr 10.11-12; Lc 16.18)

<sup>31</sup> Jesuuri naa niishitiojoquiaarijuhuaj:

—Pa supuetanaari naa rootasaaquiaarijuhuaj: "Pueyano jaara necocua cartere, maaji cuaara niqutiosaaria naajionee, pueya niishiniuria neyacaqui na carteree". <sup>32</sup> Janiyari saniniuujia nia sequeyanijia, pueyano jaara necocua cartere, sesa miya Pueyaso niqiuaraari. Naacuajitij, na cartesano maajiiri tamonuta quiniutianiya na nuhuaji. Cunoori sesa Pueyaso niqiuara. Pueyano jaara niishiri necocuaari tamonu caya numuetucujutequiaa, saa cunoraja cutara na naata na cartenu. Pueyanoori sesa miyajuhuaaj, jaara cartesano maaji camiri.

*Jesu niishitiojosano maja pa sapojonura*

<sup>33</sup> 'Niaari tarijia tojtiaquiaari taa pa supuetanaa rootasaaquiaarini. Naa rootasaaquiaariiri: "Majaari nia jatanu nia sequesano, niaa jaara sequere: 'Seetanujuanaari cua sequesano. Pueyasocuaajaari niishiya majaari cua sapojonu' ". <sup>34</sup> Janiya cutaraari nia sequeyani, nia sequesano jaara seetanujuanaa sequesano quiri, saaja nia sequere "jaa". Jaara seetanujuaanaa quiaquiri nia sequesano, saaja nia sequere "maja". Majaari nia sequesano nia maateni najuhuaana naatej: "¿Janiyate sapojuani? Cua rupaari juhua jiya cajiniocua. Maja na jatanu quiniutianiya". Majaari naa sequenutej pueyanaa. ¿Majateeri nia niishiniu, jiya cajiniocuaari Pueyaso

quiquio? <sup>35</sup> Naajuhuaaj, ¿casaara nia sequequiaa najuhuanani: “Cua sequesanoori juhua pa jiya? Majaari na shaajenu quiniutianiya”. Maja naa sequenutej. Pa jiya, cunoori Pueyaso niaja na niohuaca. Naajuhuaaj, ¿casaara nia sequequiaani: “Cua sequesanoori juhua Jerusalén tiaca? Pueyaracaanu quiniutianiyari”. Maja naa sequenutej. Jerusalén tiacaari pa Jiyaniijia Pueyaso tiaca. <sup>36</sup> Naajuhuaaj, ¿casaara nia sequequiaa naa najuhuanani: “Quia naataari cua sequesanoocua tiuuniu, cua naca quishacarijia”? Majaari naa sequenutej pueyanaa. Niaa jaara naa sequeretej, nia niishiri, majaari nia naata quenaaja niquimi nia muesujinijinio nia jiyatenu taariuria, mueru-muecaranio. <sup>37</sup> Naaratej, pueyaracaanu saaja seetanujuanaa nia sequere “jaa”, “maja”. Cante na sequesano maatejani, cunoori Sesaaca niishitiojosano niajaniya.

*Jesu niishitiojosano maja pa naminiuria*  
(Lc 6.29-30)

<sup>38</sup> 'Niaacuaajaari tari rootasaaquiaari: “Pueyano jaara tamonu pueyano namijia cocuartare, na namijia cuaara cocuartasaariajuhuaaj, pueya nequesoreenaa niquiara. Naajuhuaaj, pueyano jaara tamonu pueyano quiaja shaatare na pishacari, na quiaja cuaara shaatasaariajuhuaaj”. <sup>39</sup> Janiyari saniniuuujia nia sequeyani, pueyano jaara quia miiniu paniri sesa, quia cuaqueya quia tarinitiare nera. Majaari na nujuatanu. Naacuajitij, pueyano jaara quia maseca piri, majaari juaaniu. Quia jiyanoori. Nojuaja jaara socua quia piriohua, quia jiyanoori. Majaari na naminiu. <sup>40</sup> Pueyano jaara quia toque jaariutianu paniri, nera quia tarinitiare. Cuaara na paara. Mariyata quia cushishano shiniquiaacuaji quia niquitiore nareja. Majaari jamueja quia quiniu. <sup>41</sup> Tamonu camarnu jaara quia sequere na naacutanura na casami quia jatanura nuu cajiniocua, majaari na tarijonu. Saniniuuujia, shuquiriaatia quia naacutare na casami jatanura socua tucuaaanu na sequesanojiniji. <sup>42</sup> Tamonu pueyano jaara quia casami masenu paniya nera, quia niquitiore nareja. Naajuhuaaj, tamonu pueyano jaara quia casaa panu paniya nareja rupaquiijara, quia niquitiore. Majaari na ruuretanu. Capora quia quiri.

*Jesu niishitiojosano pa paraca pa paniniuria*  
(Lc 6.27-28, 32-36)

<sup>43</sup> 'Niaacuaajaari nio tariucuacaanu sequesano tojitiaquiaarijuhuaaj: “Quia shuriucua quinia quia paniri. Saniniuuujia, majaari quia paraca quia niquiniu”. <sup>44</sup> Janiya cutaraari nia sequeyani, nia paraa nia paniri. Nia sesacaja pueya nia maniniuhuaqueetare pueya niquiara. Pueyano jaara niaacuara saquiriojotare na sapojonuta, nocuara nia secojore Pueyaso. Sesa nia miiniaacuara nia secojorejuhuaaj. <sup>45</sup> Naa maninia nia miishacaritij, niaari seetanujuanaa jiyocuacaanu Quijia nia Que Pueyaso muerasu quiniutianiya. Nia niishiri, Pueyasoori pananu muetaniquiaa sesa pueyara na janura, maninia pueyara na janurajuhuaaj. Pueyasoori maru nitiquiaa maninia miijica pueyara, sesa miijicarajuhuaaj, maninia nojori nataacuaca moritianura. <sup>46</sup> Niaa jaara saaja nia panijica pueya panijia quiriquia, ¿Pueyasoteeri cunora nia shuquiritianutaniya, socua na casaajiniji na niquitionura niajaniya? Maja. Sesa miijica pueyani, noo pojori canapuete cumaneeca masejoquiaa na sapojonutani, nojoriiri maninia miiquiaa na panishano pueyajuhuaaj. <sup>47</sup> Niaa jaara saaja nia panishano pueya saruhuataquiaa, ¿niaateeri cunora maninia miijica quiya Pueyaso niquiara? Maja. Pueyaso niishiyashijica pueyari naa maninia miiquiaa na panishano pueyajuhuaaj. <sup>48</sup> Naaratej, maninia miijica nia quiri juhua jiyocuacaanu Quijia nia Que



Pueyaso. Nojuajaari seetanujuanaa maninia miijia. Rimiajata miyashijia cutara.

## 6

### *Jesu niishitiojosano saaja maninia pa miiniuria Pueyaso niquiara*

<sup>1</sup> Tama nia cuaqueyajaaja nia cojuare maja maninia nia miiniuria saaja pueya niquiara, pueya maniniuhuaqueetanura nijaniya. Pueya jaara nia maniniuhuaqueetare maninia nia miiniuucua, nia Que Pueyasoori maja na niquitionu quiniutianiya nijaniya socua, maninia nia miiniuucua. <sup>2</sup> Naaratej, niaa jaara casamijiuniucua pueya niquitionu paniri nareja nia casamijiniji, majaari juhua sesa jiuujiaraca pueya nia miiniu. Cuno pojoriiri pueya numootequiaa na niquitionu panishacari na casaa, puetunu pueyajanaa shootianura nojori. Cuno pojoriiri naa miiquiaaqui Pueyaso secojojua tiacajinia, tiacaacacajuhuaaj, pueya maniniuhuaqueetanura nojori. Seetanujuanaa nia sequeyanijia, cuno pojoriiri tari maseree narta pueya maniniuhuaqueetanu. Majaari nojori masenu quiniutianiya socua Pueyasojiniji naa maninia nojori miiniuucua. <sup>3</sup> Saniniuujia, niaa jaara nia casaajiniji casamijiuniucua niquitionu paniri nareja, quia mueneca cuara niishiyaquiiria quia niquitiosano quia miaquetajata. <sup>4</sup> Naa miriqui sequeree nijaniyanijia cua niishitiojonura nijaniya, jiyasohuaja nia miiniuria puetunu maninia nia miiniu panishanojuanaa. Naacuajitij, saaja nia Que Pueyasoori jiyasohuaja maninia nia miishano niishiniutianiya. Naaratej, nojuacuajaari nia niquitionutaniya na casamijiniji, na shuquiriti-asacari nijaniya.

### *Jesu niishitiojosano naa pa secojonura Pueyaso (Lc 11.2-4)*

<sup>5</sup> Nia secojosacari Pueyaso, majaari juhua sesa jiuujiaraca pueya nia miiniu. Cuno pojoriiri Pueyaso secojonu maniniucuaquiaa na nujuanuta pueya niquiara, saaja pueya shootianura nojori. Nojoriiri naa secojonuquiaa Pueyaso secojojua tiacajinatej, tiaca nuucujiniajuhuaaj, tee queraatia pueya quiyacuajani. Seetanujuanaa nia sequeyanijia, cuno pojoriiri tari maniniuhuaqueetasaareecuaja. Jiyano pueyatej, majaari nojori masenu quiniutianiya socua Pueyasojiniji. <sup>6</sup> Nijaniya saniniuujia, nia secojosacari Pueyaso, nia sohuacamara nia tiuquiri. Nia tiootiu nia tiore. Na nuhuaji, cuniqui nia Que Pueyaso nia secojore jiyasohuaja tamajaaja. Nia Que Pueyaso niquishacari naa jiyasohuaja nia miishanotej, nojuaja cutaraari nia niquitionutaniya na casamijiniji, na shuquiritiasacari nijaniya.

<sup>7</sup> Nia secojosacari Pueyaso, majaari nia sequesano pacutejojua nia quiniu puera, juhua Pueyaso niishiyashijiaca. Cuno pojoriiri jiyaniya Pueyasoori nojori tojiniutianiya pueyaracaanu na pacutejosacari tariucua na sequesano. <sup>8</sup> Majaari juhua nojori nia miiniu. Pa secojiyaquishaacarijijojua, pa Que Pueyasocujaari tari niishiya casaa pa paniyani. <sup>9</sup> Naaratej, naate nia secojore:

“Canaa Quenaa, quiaa cutaraari jiyocuacaanu Quijia. Pueya cuara niishiiria quiaari saaja maninia quijia. <sup>10</sup> Quia quiri canaa Jiyaniijia, canaa quia jiitianura. Quia panishano cuara miishaaria mijiria, taa jiyocuacaanu na miishaaquiaacuaani. <sup>11</sup> Canaa quia niquitiore canaa miaquesocoriquiano quiarijiani. <sup>12</sup> Canaa quia jiyanoori sesa canaa miishanojiniji, taa canaa jiyanooquiaa tamasacacuaani, sesa nojori miishacari canaa. <sup>13</sup> Majaari canaa quia shanacunu canaa saniniuujishaanura sesa canaa miiniuria. Saaja canaa quia cojuare

cutara Sesaacaacuaji. Saaja quiajaniya cutaraari seetanujuanaa Jiyanijiajanaa. Quiaa cutaraari puetunu cumaacaracajanaa. Quiaari shanohua shacantuuca quijia cutara. Quiaari naa quijia pueyara-caanutej. Tariucuaja”.

<sup>14</sup> 'Naatej, niaa jaara jiyanoori tamasaca, sesa na miishacari niajaniya, nia Que Pueyasoori nia jiyanooniutianiyajuhuj. <sup>15</sup> Saniniuujia, niaa jaara tamasaca jianoyaquiri, nia Que Pueyasoori maja na jiyanooniu quiniutianiya niajanijajuhuj sesa nia miishanojiniji.

*Jesu niishitiojosano taate pa naata miaqueyaquiniuni Pueyaso pa secojonura*

<sup>16</sup> 'Niaa jaara miaqueyaquiya Pueyaso nia secojonura, majaari macuhua-jeconu pueya niquiara, taa sesa jiuujiaraca pueya miiquiaacuaani. Nojoriiri naa miiquiaatej, pueya niishishocoriquiano nojori miaajeya. Naa pueya shootiasacari nojoritij, seetanujuanaa nia sequeya cutaranijia, narta pueyari tari nojori maniniuhuaqueetareecuaja. Majaari Pueyasojiniji nojori masenu quiniutianiya socua. <sup>17</sup> Niajaniya saniniuujia, nia miaqueyaquishacari Pueyaso nia secojonura, nia jiquioco nia jeequere. Nia canuure nia muesu, taa nia miiquiaa pueyaracaanucujani. <sup>18</sup> Naa nia miiri Pueyaso nia secojosacari, maja pueya niishiniuria cunoqui miaajeya. Saaja pa Que Pueyaso cutara cuaara niishiiria nia miishano. Naacuajitij, nojuajaari nia niquisitionutaniya na casamijiniji na shuquiritianuucua niajaniya.

*Pa casami pa racatare jiyocuacaanu Pueyaso shuriucua (Lc 12.33-34)*

<sup>19</sup> 'Pueyanaa, maja mijiria nia racatanu nia casami najuhuanaj. Saaja capora nia quiri cutara. Mijiria pa racatasacari pa casami, surequeyari nia miaquenutaniya. Tiyarashiniutianiyajariuhuj. Nohuasenuujuacaari nocua tiuquiniutianiya na nohuasenura. <sup>20</sup> Nia racatare cutara nia casami Pueyaso shuriucua jiyocuacaanu. Tii cutaraari shaaqui surequeya, shaaqui tiyara. Naajuhuj, nohuasejojuuari maja na naata nocua tiuquiniu tii, jiyocuacaanuji nia casami na nohuasenura. <sup>21</sup> Niaa jaara nia casami racatare mijiria, niaari nocua niishiriojonutaniya pueyaracaanu. Nia casami jaara racatasano quiri Pueyaso shuriucua saniniuujia, niaari Pueyasocua niishiriojonutaniya. Majaari nia tacaaniu quiniutianiya mijiria casaacua tari.

*Pa cuaqueyajinia cuhuatanajiniji pohuatasano (Lc 11.34-36)*

<sup>22</sup> 'Pa namijiaari juhua poojia cuhuatana. Naacuajitij, paa jaara sesa casaacua jiaatiaashijia quirini, poojiaari juhua cuhuashiqui quiya maninia. <sup>23</sup> Niaa jaara sesa casaacua jiaatiajaca quiri saniniuujia, nioojiaari juhua ninishiqui quiya. Nioojia jaara sesa casaacua jiaatiaja quiri, nioojiaari socua ninishiqui quiya cariyojuaru pueyanojiniji.

*Pueyaso panijia pa quiri, maja cumaneeca panijia (Lc 16.13)*

<sup>24</sup> 'Maja nia naata poonijionu maninia caapiqui camarnura. Niaa jaara caapiqui camarnuraca quiri, niaari tamonu paniniutianiya, niaari saniniuujia tamonu niquiniu paniyaquiniutianiyacujua. Naacuajitij, niaari shuquiriaatia poonijionutaniya nia panishano camarnura. Niaari tamonu sojotanutaniyacujua. Naajuhuj pueyanaa, majaari nia naata Pueyasora poonijionu maninia, cumaneecaacua nia jiaatiasacarijuhuaj.

*Pueyaso na muerasu cojuaja (Lc 12.22-31)*

<sup>25</sup> 'Naaratej, nia sequeyanijia, maja puera nia niishiriojonu casaa nia miaquenutaniyani, casaa nia ratunutaniyani, casaa nia cushiniutianiyani. Pueyaso jaara pa shipiniquiaari pueyano pa quiniuria, ¿majateeri na niq-  
uitionsu quiniutianiya pa miaquenu panishano, pa cushiniu panishanonio,  
maninia pa rishiniuria? Taaquiririni. <sup>26</sup> Jiyocuacaanu jaacuatujuaca nia  
niquiricuaa. Nojoriiri maja na natanu. Majaari na senoonu. Majaari  
nojori mishinijionu tiaco na miajajaura. Naajaa, pa Que Pueyasoori nojori  
niquitioquiaa na panishano. Nia niishiri. Njaa cutaraari socua Pueyaso  
panishano cuno jiyocuacaanu jaacuatujuacajiniji. <sup>27</sup> ¿Nia naatate socua  
jiyaconajara maashiniu, jiyanojua nia tacaaniutia? Maja.

<sup>28</sup> 'Naajuhuj, ¿casaara nia tacaquiaarini nia niishiriojosacari casaa nia  
cushiniutianiyani? Naana shuucua nia niquiriquiacuaa. Nojoriiri maja  
na niishiniu poonijionu. Majaari na niishiniu na maniniushitajara shi-  
tianojuhuj. <sup>29</sup> Seetanujuaana nia sequeyanijia, pa supuetanaa jiyaniijia  
Salomónri jiyanojua shanohua toqueya cushijia quiquiaari. Naajaa, na  
toqueeri maja socua shanohua niquishano quiquiaari cuno naana shuu-  
cuacajiniji. <sup>30</sup> Naana shuuri saaja rupaquijia shanohua niquishano. Jaara  
sorere, namitiashiyari catijasocoriquiano. Pueyasoori naana shuu ship-  
iniquiaari saaja rupaquijia shanohua niquishocoriquiano, na nuhuaji cati-  
jasocoriquianonio. Nojuaja jaara naa shanohua naana shuucua ship-  
iniquiaari, ¿majateeri socua maninia na miiniu quiniutianiya niaara? ¿Casaara  
nia tiuyaquiya nia Que Pueyasocuaarini? <sup>31</sup> Naaratej pueyanaa, maja  
nia tacaaniu. Majaari nia sequenu: ¿casaa pa miaquenutaniyani?, ¿casaa  
pa ratunutaniyani?, ¿casaa pa cushiniutianiyani? <sup>32</sup> Pueyaso niishiyashiji-  
acaari naa sequejatej, puera nojori tacaashacari puetunu na panishano  
casaacuaana. Njaa cutaraari jiyocuacaanu quijia Queraca. Nojuacuaari  
tari niishiya puetunu nia panishanojuaana. <sup>33</sup> Naaratej, coteenu nia ni-  
ishiriojore Pueyaso tojijara nia quiniuria cutara. Pueyasocua nia niquitio-  
retunu nia panishanojuaana. <sup>34</sup> Naajuhuj, majaari tariquiria nia taca-  
niu. Saaja nia niishiriojore cutara, taa nia miiniutianiya maninia quiarijiani.  
Tariqui cutara niocua niishiriojore taa nia miiniutianiya maniniani. Tari-  
cuaja quiarijia nia niishiriojosano nio juucara. Majaari socua tariquiria nia  
tacaaniu. Saaja nia Que Pueyasocua nia tiuuri, juhuajaniya nia quiniuria.

## 7

### *Majaari quiarta pueyanoocuaara soqueto nia quiniu (Lc 6.37-38, 41-42)*

<sup>1</sup> 'Maja niarta pueyano nia soquenu najuhuanaj, Pueyaso mariqui nia  
jiyanoyaquirijaariuhuj. <sup>2</sup> Taa nia sesacaquiaa tamacacuaani, niaari  
naa sesacasaanutaniyajuhuj. Naatej, taa nia miiquiaa tamacacuaani,  
Pueyasoori mariyata naa miiniutianiya nijaniyajuhuj. <sup>3</sup> Nio miriqui cua  
sequesano nia tojiri. ¿Casaara nia niquiya rucucua nia tarajanu namijia-  
jiniani, niaa jaara puereetua maca jitiiaa tama nia namijiajiniajaaja cu-  
tara? <sup>4</sup> Maca nia jitiiasacari tama nia namijiajiniajaaja, ¿casaara nia sequeya  
niarta pueyanoni: "Cuno rucucua pa taquiri quia namijiajiniji"? <sup>5</sup> Sesa  
jiuujaracanaa, coteenu nia pare cuno maca nia namijiajiniji cutara. Na  
nuhuaji niocua maninia niquiri cutara, nia tarajanu rucucua nia taquiniuria  
na namijiajiniji. Nio miriqui cua sequesanoori nio sequeya: nioojia seque  
nia jecare coteenu, na nuhuaji cutara niocua maninia nacasure niarta  
pueyano.



<sup>6</sup> Majaari Pueyaso ruuretajaca nia niishitiojonu Pueyaso rupaa najuhua-naj. Cuno tojiyashijiacaari nia tojiyaquiniutianiya, naatej taa tamonu pueyano sare tojiyaquiquiaa niajaninyacuaani. Majaari Pueyaso soojeaca nia pohuatanu Pueyaso miishano shanohua niajaninyara. Nojoriiri saaja rerequetenutaniya Pueyasojiniji nia pohuatasano, naatej taa cushiya rapi-jioquiaa marajinia juhuajaniya na niishishoo maninia casaacuaani.

*Pueyaso pa secojorej*  
(Lc 11.9-13; 6.31)

<sup>7</sup> Pueyaso nia secojore. Nojuajaari nia niqutionutaniya nia masesano. Niaa jaara pajere, niaari nia pajesano riuriatanutaniya. Tohuateyaji nia piquiri, niaacuajiiri riataaanutaniya. <sup>8</sup> Cante Pueyaso maseya na pan-ishanoni, seetanujuanaa na masenutaniyari. Naajuhuaaj, cante pajejani, na panishano riuriatanutaniyari. Cante tohuateyaji piquijiani, nocuajiiri riataaanutaniyajuhuaaj.

<sup>9</sup> Mueya jaara na que nenecojore neecaruura, ¿na queteeri na niqutionu-taniya saajia? ¡Maja! <sup>10</sup> Mueya jaara na que nenecojore sapitiaajara, ¿na queteeri na niqutionutaniya soconu? ¡Maja! <sup>11</sup> Niajaninyari sesa miiniu niishijiaca. Naajaa, niaacuajaari maninia casaa niqutionu niishijia, nia mueya jaara nia nenecojore. Nia Que Pueyaso cutaraari jiyanohua socua maninia niqutionu niishijia, na muerasu secojosacari nojuaja.

<sup>12</sup> Pueyaracaanu maninia nia miiri tamasaca, taa nia paniquiaa pueya mi-iniuria niajaninyacuajani. Niaa jaara maninia miiriquia nio cua sequesano, niaari tari tojitiaa maninia puetunu tariucuacaanu Moisés Rootasanojuanaa, tariucuacaanu Pueyaso sequesano caminiujiuniaa rootasanonio.

*Pueyasooocua nuuri secanuniyojua*  
(Lc 13.24)

<sup>13</sup> Pueyasooocua neteja nuu nia pajere, shiitianiyojua nuuri tuneja. Sanini-uujia, puereetuuca nuuri neteya mani quiquiojiniara. Puereetuuca na tuneja. Puereetuucaari neteya, carianujuhuaaj. Naaratej, queraatia pueyari juhuajaniya cuno nucuaco quiojiya saniitiosocoriquiano. <sup>14</sup> Saniniuujia, shiitianiyojua nuuri maninia cutara. Cuno nucuaco quiojonaari pueyara-caanu quiniutianiya Pueyasota cutara. Jiyanohua shiitianiyojuaari cuno nuu tuneja. Secaja pueyari na riuriataa, cami na quiojonura.

*Naanaari niishishano na jajaujiniji*  
(Lc 6.43-44)

<sup>15</sup> Tama nia cuaqueyajaaja nia cojuare sapojonuujuaacuajaji, noo pojori-icuaaji canapuate najuhuaana sequejacuajani: “Pueyaso Rupaa pohuatanani-jia”. Nojoriiri sapuenu juhua maninia pueya niquishano, nojori sapojonura niajaninya. Nojoriiri sapuenu juhua borregoniyojua niquishano, seetanujua-naa juhua puereeta sare nojori quishacari, sayoru. <sup>16</sup> Niocua nojori niishiri, sesa nojori miiniuucua. Nojoriiri maja na naata miiniu maninia, naatej taa cohuatucuaani, majaari na naata muetunu marijiaca. ¿Shuuniateeri na naata muetunu cohujaru? Maja. Naajuhuaaj, cuno sesa jiuujiaraca pueyari maja na naata maninia miiniu. <sup>17</sup> Maninia naanaari, maninia jajau muetujua cutara. Saniniuujia, sesa naanaari, sesa jajau muetujuaaja. <sup>18</sup> Maninia naanaari maja na naata sesa jajau muetunu. Naajuhuaaj, sesa naanaari maja na naata maninia jajau muetunu. <sup>19</sup> Naana jaara sesa jajau muetujua quiri, nushiyari, manijinia catijasocoriquiano. <sup>20</sup> Naacuajitij, niocua cuno sapojonuujua pueya niishiri nojori miishanojiniji sesa.

*Saaja noojiaqueya pueyari Pueyaso muerasura quiniutianiya  
(Lc 13.25-27)*

<sup>21</sup> Cuno pojori canapuete cua sequejacani: “Cua Jiyaniijianaa, cua Jiyaniijianaa”, noojiaqueya nojorijinijinioori maja nojori tiuquitianu quiniutianiya cua Que Pueyaso quiquiojinia. Saaja seetanujuanaa cua Que tojtiajaca cutaraari nocua tiuquitianutaniya. <sup>22</sup> Cua nequesoreesacari pueya nio jiya puequesacari, queraatia pueyari cua sequenutaniya: “Cua Jiyaniijianaa, cua Jiyaniijianaa, canacuajaari quia rupaa pohuataquiaari pueya niquiarani. Canaa sequesacari quia sesa, canaari samaruhua tohuatanijioquiaari quia cumaacatani. Naajuhuj, canaari cusosuhua naatanijioquiaarini quia sesa canaa jiyaniquishacari”. <sup>23</sup> Janiyari saniniuujia naa sequejaca riucuanutaniyani: “Maja cua niishiniu niajaniya. ¡Nia quiojorohua! Niaari saaja sesa miijiaa quiquiaari”.

*Jesu tojtiajaca miishanoori pueyaracaanu rishiniutianiya cutara  
(Mr 1.22; Lc 6.47-49)*

<sup>24</sup> Naacuajitij, cante cua sequesano tojjiani, cuno pueyanoori shuquiriaatia quiniutianiya juhua niishijia pueyano. Niishijia pueyanoori tiaquiaari cumueeca jiyajinia. <sup>25</sup> Na nuhuaji, maruuri jiyanoehua niquiaari. Moori pajaashiquiaari. Paratuuri jiyanoehua piyarojoquiaari cuno tiaacuara. Naajaa, majaari na pojoretanu quiquiaari, cumueeca jiyajinia na nujuatasacari. <sup>26</sup> Cante cua sequesano tojijashijia saniniunijia, cunoori moseeca. Cua sequesano ruuretajaari taraatia quiniutianiya juhua moseeca pueyano. Moseeca pueyanoori jaaquiaajinia tiaquiaari. <sup>27</sup> Maruuri jiyanoehua niquiaari. Moori pajaashiquiaari. Paratuuri jiyanoehua piyarojoquiaari cuno tiaacuara. Cuno pueyano tiaari pojotaquiaari. Na camaruuri jiyanoehua taraatia quiquiaari na tia pojotasacari.

<sup>28</sup> Jesu jaara niishitiojonu puecaquiaari, pueyari jiyanoehua jiuujia-teriquiaa na niishitiojosano nojori tojishacari. <sup>29</sup> Pueyari naa jiuujiatequiaari seetanu cumaacatajanaa Jesu niishitiojosacari juhua jiyaniijiajanaa, maja juhua Moisés Rootasanojiniji niishitiojonaa. Cuno pojoriiri nareja tariucuacaanu rootasano caminiuuiuquiaari pueyaracaanu.

## 8

*Jesu naatanishacari sesa cusonu jiitiaja  
(Mr 1.40-45; Lc 5.12-16)*

<sup>1</sup> Jesu jaara tuhuananujiniji rosequiaariuhua na cojiniaata, jiyanoehua queraatia pueyari na nuhuajiriquiaa. <sup>2</sup> Tamonu pueyano cusosuuri jiyacari Jesuucua catecanoquiaari. Jiyanoehua sesa cusonu jiitiaquiaariiri. Tahue rupaaajinia, cuno cusonu sesaari quiquiaari “lepra”. Pueyano shuuri juhua miaquesano quijia na cuaqueyajinia cuno cusonu na jiitiasacari. Cusosuuri Jesu cariquimiaaji mojuquetaquiaari Jesu na sequenura na panishano. Naa na sequereeri:

—Jiyaniijianaa, quia jaara paniri, niishiyacuajanijia quia naata cua cusonu cushiriitiniu.

<sup>3</sup> Jesuuri nocua taraajequiaari. Nocua niaree na juaashiquiaari. Na sequereeri:

—Jaa, paniyanijia. Cuaara cushiriiria quia cusonu.

¡Jiyacaritij, ritia cushiriiquiri! Jeequerohuari. <sup>4</sup> Na nuhuaji, Jesuuri naa na rootaquiaari:

—Cua tojiri. Maja tamasaca niqiuara quia pohuatanu cua miishano quiajaniya. Saaja Pueyaso secojonaa jiyaniijia quia cuaqueya quia niqitiri, na cartenura quiajaniya, pueya tajinia quia rucuanefonuhara juhua-janiya. Na nuhuaji, ritia quia niqitiora quia seru Pueyasooacara catijiaso-coriqiano. Naa quia miiritij taa Moisés niishitiojoquiaari tarijiacuajani, juhua jeequesano quia quiniuria Pueyasora. Naacuajitij, pueyari niishiniutianiya quiaari tari jeequerohua quia cusonujiniji.

*Jesu naatanishacari Romano capitán seru  
(Lc 7.1-10)*

<sup>5</sup> Jesu jaara tiuquiquiaariuhua na pueyata Capernaum tiacajinohua, Romano soldadohua jiyaniijiaari Jesuucua niqiuara na secojonura Jesu. <sup>6</sup> Naa na sequequiaariiri:

—Jiyaniijianaa, cua seruuri cusosu mataa maquetujinia. Majaari na naata pooniniu quenaaja. Jiyanohua naquiya miya na noonutaari.

<sup>7</sup> Jesuuri na sequequiaari:

—Janiyacuaajaari nocua quianutaniyani na cusonu cua shaatanura.

<sup>8</sup> Soldadohua jiyaniijiaari na rucuaaree:

—¡Maja jiyaniijianaa! Janiyari maja pueyano maniniuni, cua tiajinia quia tiuquiniuria. Nareja quia sequere, cua seru cusonu cuaara shaateera tamajaaja. Niishiyacuajanijia, quiaari na shaatanutaniya saa quia rupaataja. <sup>9</sup> Janiyari jiyaniijiaracajaniuhuaaj. Na tojiquiaanijia. Naajuhuaaj, cua soldadohuari cua tojitiaquiaajuhuaaj cua sequesacari nojori. Naacuajitij, janiya jaara tamonu sequereni: “Quia quiaare”, cunoori ritia quiaquiaa. Naajuhuaaj, janiya jaara tamonu sequereni cuaara niiria, cunoori ritia niya cucua. Janiya jaara cua pataaco seru sequereni cuaara miiria cua panishano, na miiquiaari. Cua sequesano jaara naa tojishaaquiaacuaa, quia sequesano cutaraari tojishaanutaniya.

<sup>10</sup> Jesu jaara tojiquiaari naa cuno tahue sequesanootej, jiuujiatequiaariiri. Na cojiniaa sequereeri:

—¡Seetanujuanaa nia sequeyanijia, majaari quenaaja parta Israel pueyajinijinio cua niqiniu quiquiaa Pueyasooacara tiuujia cutara, juhua nio tahue! <sup>11</sup> Seetanujuanaa nia sequeyanijia, queraatia taucuaacari Pueyasooacara tiuujiaa quiniutianiya juhua nio tahue. Nojoriiri tucuaaanuji nijionutaniya pananu muetasamaji, pananu tiuquishocojijihuaaj. Nojoriiri pa supuetanaata cajitiuniutianiya na miaquenuunura Pueyaso shuriucua. Tii quiniutianiya shuquiriaatiaari pa supuetanaata: Abrahamta, Isaactajuhuaaj, Jacobotanio. <sup>12</sup> Parta Israel pueya, canapuate Abraham jinianuucujinio supuenoni, nojoriiri saniniuujia tamocora quejoosaanutaniya ninishiqui, nojori tojitiaaquiniuucua Pueyaso. Nojoriiri tii sariyocuatunutaniya naquiya na miishacari. Na quiaa miaquenuunutanitari na noonuta. Nojoriiri juucua saquiriojosaaquiaari Pueyaso muerasu nojori quiniuria. Nojoriiri jiyaniya nojoriiri Pueyaso muerasu cutara Abraham jinianuucujinio nojori quishacari.

<sup>13</sup> Na nuhuaji, Jesuuri cuno soldadohua camarnu sequequiaari:

—Quia tiajinia quia quiaarohuaqui. Cuaara quiiriaqui taa quia sequereecuajani.

Jiyacaritij, na seruuri ritia naataquiaariuhua.

*Jesu naatanishacari Pedro reyarucua  
(Mr 1.29-31; Lc 4.38-39)*

<sup>14</sup> Jesuuri quiaaree Pedro tiajinia. Tii Pedro reyarucua niqishiiri cusosu mataano na maquetujinia. Naseeca matariquiaari. <sup>15</sup> Jesuuri na juaashiquia

quiasee. Na naseeca cusonuuri ritia na tajiquiaari. Ritia sanequiaariiri Jesu na mianuutenura.

*Jesu naatanijosacari queraatia pueya*  
(Mr 1.32-34; Lc 4.40-41)

<sup>16</sup> Shusha ninishacari cuno juucaja, cuno tiacajinijinio pueyari queraatia samaruhuaraca pueya jaatucunuquiaari Jesuucua. Jesuuri cuno samaruhua tohuatanijioquiaari saa na rupaataja. Puetunu cusosuhujanaa naatanijioreejaariuhuaaj. <sup>17</sup> Naa tohuateequiaariti supuetana Isaías naajiotasano, Pueyaso niishitishacari nojuaja Jesujiniji. Naa naajiotasano quiyari: “Nojuajaari taraatia pa miiniu jaariutiaree pajaniyajiniji. Pa niti cusoyareeri puetunu pa cusonujanaa na jatanura”.

*Tamasaca pueya quiniu panishacari Jesu pueyara juucua*  
(Lc 9.57-62)

<sup>18</sup> Jesu jaara jiyanoehua queraatia pueya niquiquiaari na shocua maano, na pueya sequereeri:

—Caminiya taquijiria pa niuutiaare.

<sup>19</sup> Jiyacaritij, Moisés Rootasanojiniji niishitiojona pueyanoori Jesu sequereeri:

—Niishitiojonanaa, janiyari quiata quianu paniyani. Janiyacua quia tarajareni puetunu tiqiyocujanaa quia rucuanijosacari.

<sup>20</sup> Jesuuri na riucuaaree:

—Quioojuapue cutaraari na raa jiiitiaa. Shuhuari na jesuhua jiiitiaajuhuaaj. Saniniuujia, pueyano cua quishacari mijiria, majaari cua maquejara cua jiiitianu quenaaja, taa cuno casami jiiitiaacuaa na maquetujarani.

<sup>21</sup> Tamonu Jesu pueyajinijinoori Jesu sequereeri:

—Cua jiyaniijianaa, cua tarinitiare, cua que niquirijiaara. Janiya jaara na shaajareni, janiyacua quia tarajare cutarani.

<sup>22</sup> Jesuuri na riucuaaree:

—Naajaa, cuata quia quiaare cutara. Quia tarinitiare nojuaja. Macunucua cuara jamoora tama narta macujuaaja. Naatej, cante Pueyaso tojitiaashijiacani, nojoriiri tariucua juhua macunucua quiya Pueyasora.

*Jesu suraajasacari paratu, mohuacanio*  
(Mr 4.35-41; Lc 8.22-25)

<sup>23</sup> Na nuhuaji, Jesuuri botejina tacaquiaari. Na saquiriojosano pueyari nata quiojoquiaari. <sup>24</sup> Paratuuri senota piyarojonu coteequiaari nojori niuutiasacari. Jiyanoehua piyarojoriquiaari. Caminiaari jiyanoehua queyocuariquiaa paratu piyarojosacari. Mohuacaari bote jiniacuma mishiriquiaa. Jesuuri jiyacari maqueriquiaa. <sup>25</sup> Na pueyari cunora na niucujasee. Jesu sequetureeri:

—¡Jiyaniijianaa, canaa quia naacutare! ¡Paa tari tiuquitiaareeni!

<sup>26</sup> Nojori riucuaareeri:

—¿Casaara nia pueretiuyani? ¿Majateeri nia niishiniu Pueyasocua tiuuniu? Jesuuri saneree. Paratu sequereeri, mohuacanio:

—¡Niaaj, nia suraajere!

Paratu, mohuacaari ritia suraajequiaari. <sup>27</sup> Jesu pueyari jiuujiatequee. Tama nojoriijaarija sequequiaari:

—¡Juhuej! ¿Taamueca pueyanotucuaanojoni? ¡Paratuuri na tojiya, mohuacajuhuaaj!

*Jesu tohuatanishacari samaruhua, caapiqui pueyajiniji Gadara jiyajinia*  
(Mr 5.1-20; Lc 8.26-39)

<sup>28</sup> Jesuuri na saquiriojosano pueyata tiuquiiijioquiaari caminia taquijiria Gadara jiyajinia. Jiyacaritij, caapiqui pueyanoori Jesuucua tohareetaquiaari raacajiniji, macunucua nuchua paaquiosaquiji. Nojori-iri samaruhuaraca quiquiaari. ¡Jiyanohua pueya pueresano! Cuno nucuaco, majaari pueya rucuanenu quijia, cuno pojori na puerenuucua. <sup>29</sup> Samaruhuaraca caapiqui pueyanoori Jesuucua nacaturee:

—¿Casaacua miji quia niyani, Pueyaso Niyanunaa? ¿Quiaate juhuacarijia niyaree canaa quia saniitionura Jesunaa?

<sup>30</sup> Jiyacaritij, cushiyari cateca naataja miaquenuuriquiaa. Jiyanohua queraatia cushiyari quiquiaari. <sup>31</sup> Samaruhuari cuno caapiqui pueya pocuatequiaari. Naa Jesu secjoreeri:

—¡Quiaa jaara canaa tohuatanijiore nio caapiqui pueyanojiniji, canaa quia jiyarore cuno cushiyacua canaa tiuquitianura!

<sup>32</sup> Jesuuri cuno samaruhua sequeree:

—¡Nia quiaare!

Samaruhuari cuno caapiqui pueyajiniji tohareetaquiaari. Cushiyacua tiuquitiaseri. ¡Cushiyari cocuatequee! Saaja caminiajinia totesee tacojiniji-iri. Cushiyari tii shushiniuushii.

<sup>33</sup> Cushiya cojuanaari netecuatuquiaariuhua na shiriiquiniutia na tiacajiniara. Nojori tiuquiiijosacariuhua, pueya niqiara pohuatatuquiaari cushiyajinijiiri, samaruhuaraca pueyajinijinio. <sup>34</sup> Naaratej puetunu pueyajanaari cuno tiacajiniji nijioquiaari Jesuucua. Nojori niquishacari Jesu, na sequetureeri nojori jiyajiniji na quianura tamaqui.

## 9

### *Jesu naatanishacari cumatacuruhuana cusosu* (Mr 2.1-12; Lc 5.17-26)

<sup>1</sup> Na nuhuaji, Jesuuri botejinia rosetaquiaari na saquiriojosano pueyata. Caminia taquijiria niuutiaquiaariuhuari tama na tiacajinarajaaja. <sup>2</sup> Tii nojori tiuquiiijosacari, Jesuucua patasaaquiaariiri cumatacuruhuana cusosu pueyano. Patasaaquiaariiri na matujinia. Jesu niquishacari taa na patanaa tiuquiaari jiyanohua nocuani, cusosu sequereeri:

—¡Quia shuquiriri sanajanaa! Quiaacuajaari tari jiyanooshaaree sesa quia miishanojiniji.

<sup>3</sup> Noojiaqueya Moisés Rootasanojiniji niishitiojonaari Jesu sequesano tojitiariquiaa. Nojoriiri tama noojiajiniajaaja niishiriojonuquiaari: “¡Nio pueyanoori tama na cuaqueyajaaja jiyateya juhua Pueyaso na quiniuria naa na sequesacari! ¡Cunoori jiyanohua sacuaraatia!” <sup>4</sup> Jesuuri cuno pueya niishiriojosano niishiquiaari. Nojori sequereeri:

—¿Casaara sesa nia niishiriojiyani? <sup>5</sup> Seetanujuanaa, pueyano maja na naata jiyanooniu pueya miishano sesa. Naajuhuj, majaari na naata tamajaaja pueya na naataniniu. <sup>6</sup> Naajaa, janiyari nia niishitiniutianiyani janiyari mijiria jiyarosaaquiaarini cua jiyanooniuria pueya, sesa nojori miishanojiniji.

Jiyacaritij, Jesuuri cusosu sequequiaari cuno pueya niqiara:

—¡Quia sanere! Quia matu quia pataarohua quia tijinia.

<sup>7</sup> Cusosuuri sanequiaari. Na tijinia quiaarohuari. <sup>8</sup> Na niqutiushacari Jesu miishano, puetunu pueyajanaari shiriiquitiuquiaari. Nojoriiri Pueyaso maniniuuaqueetaquiaari pueya na niqutionuucua na cumaaca, naa Jesu miiniuriatej.

*Jesu sequesacari Mateo na pueyano na quiniuria  
(Mr 2.13-17; Lc 5.27-32)*

<sup>9</sup> Jesu quiasacari cuno tiacajiniji, tamonu pueyano niquiquiaari cajiyanoori cumaneeca masejojuajinia Romano jiyaniijiara. Na sesa quiquiaari Mateo. Nojuacuajaari janiya; nio naajionani. Jesuuri cua sequequiaari:

—Cua nuhuajiyare cua pueyano quia quiniuria.

Janiyari ritia sanequiaarini. Janiyari nata quiaareeni.

<sup>10</sup> Na nuhuaji, janiyari Jesu masuuquiaarini cua tiajinia na miaquenura, na pueyajuhuj. Naacujitij Jesuuri cua tiajinia tiuquitiaquiaari miaquenura. Queraatia cuarta cumaneeca masejonaari canaa cojiriquiaajuhuj, queraatia noo pojorijuhuj, Fariseocuaca jiyaniqutiushano sesoriquia pueyatatej. Puetunu canaajanaari Jesuta miaquenuuriquiaani. <sup>11</sup> Fariseocuaca jaara Jesu niquiquiaari miaqueyano canaata, nojori soosano pueyani, nojoriiri naa Jesu saquiriojosano pueya nequesotaree:

—¿Casaara nia niishitiojona miaqueya cuno sacuaraatia cumaneeca masejonaatani, sesoriquia pueyatano?

<sup>12</sup> Jesuuri naa nojori sequesano tojirii. Nojori sequeree miriquiiri:

—Cante na cuaqueya jiyaniyani maja cusosu na quiniu, nojuajaari maja naarajona na paniniu. Cusosuhua cutaraari naarajona panijia. Naajuhuj, sesa mijiaca pueyari cua paniya nojori cua jiyanooniuria sesa nojori mijiosanojiniji. <sup>13</sup> Niaa cuara niishitiojosuhuara socua, maninia nia niishiniuria casaa tariucuacaanu Pueyaso sequesano niishitiojiyani naa na sequesacaritij:

“Niaacuajaari nia seya catijiaquiaa cucuara. Maninia juhuari nia taraa-jenura tamasaacua. Cuno cutaraari cua shuquiritiasano”.

Naara niquiaarinijia nia sequesano sesa mijiaca cua jiyanooniuria sesa nojori miishanojiniji. Maja cutaraari mijiria cua niniu quiquiaari maninia pueyacua.

*Pueya nequesotasano casaara Jesu pueya tarinitiaaquiQUIIAA quenaaja mi-  
aquenuni*

*(Mr 2.18-22; Lc 5.33-39)*

<sup>14</sup> Tiuquinijona Juan pueyari Jesuucua niquiaari naa na nequesotanura:

—¿Casaara quia pueya tarinitiaaquiQUIIAA quenaaja miaquenuni, nojori secojonura Pueyasoni? Canaacuajaari miaquenu cartequiaani Pueyaso canaa secojonura taa Fariseocuaca miquiaacuaani.

<sup>15</sup> Jesuuri nojori riucuaaree miriqui:

—Pueyano camishacari, ¿na masuusano pueyatucua taraatia quiriiri, camiriquiano pueyano jaara nojoritia quiyajaa? Maja. Tamacari cutara, camiriquiano pueyanoori nojori tajiniji rishaanutaniya. Jiyacari cutara maja cua pueya miaquenu quiniutianiya, janiya jaara nojori tajiniji rishaareni.

<sup>16</sup> Socua cua tojitiare pueyanaa. Pueyano jaara cushipirijionu paniri na toque mocua, maja na naata quiarinio toquerau ruposaanu toque mocua cuhuocojinia, jeequesoojua na quishacari. Quiarinio toquerau jaara ruposaaare toque mocua cuhuocojinia, na jeequesacari, posequenutaniyari. Cunota, toque mocua cuhuoocori socua sutenutaniya. <sup>17</sup> Naajuhuj, majaari pa naata uva caaca racatanu shoque tariucuacojinia. Uva quiariniacu jaara racatasaare juucua shoque tariucuacojinia, jaara jerema vinora na quiniuria, shoque tariucuaco surtanutaniyari. Vinoori niitiasaanutaniya najuhuanaj. Shoque tariucuacoori maja na naata tooniu, uva caaca jaara



jerema. Naaratej, uva caaca nia shuujiore shoque quiariquiojinia, maja najuhuana nia niitianura uva caaca. Naajuhuj, majaari na naata cua niishitiojosano cojitishaanu tariucuacaanu niishitiojosanota. Cua niishitiojosano nia tojitiare cutara.

*Caapiqui maajipohua naatanijosacari*  
(Mr 5.21-43; Lc 8.40-56)

<sup>18</sup> Jesu pocuasacarijia, nocua niqiaariiri Pueyaso secojojua tia camarnu. Jesu cariquimiaji mojuquetaquiaariiri. Na sequereeri:

—¡Quiyatuuri shusha cusoquee! Naajaa, miji, cuata quia quiaare. Niishiyaniija quiaa jaara niare nocua quia juaashiquia, samiitianutaniuhuari.

<sup>19</sup> Jesuuri saneree. Nata quiaareeri. Canaa, Jesu saquiriojosano pueyani, canaari nata quiaareejuhuj. <sup>20-21</sup> Canaa quiasacari, tamonu maaji cuso-suuri Jesuucua catecanoquiaari jiyasohujaja na paramaji. Cuno maajiiri pueyaracaanu naatequiaari. Doce marijiaari tari na shoconujuquiaari pueyaracaanu na naatesacari. Tama niishiriojoriquiaajaarijia: “Janiya jaara Jesu toque quiareni, cua nanacaari curetanutaniya”. Cunora, maajiiri Jesu toque casaca quiaasee jiyasohujaja. <sup>22</sup> Jesuuri na nijiniara tacatequee. Cuno maaji niqiriiri. Na sequereeri:

—Shuquiriaatia quia quiri, sanauna. Cucua quia tiuushacari, quia nanacaari tari curetaquee.

Jiyacaritij, cuno maaji jiniacumaari ritia sacuantaquee.

<sup>23</sup> Jesuta canaa tiuquishacari Pueyaso secojojua tia camarnu tiajinia, canaari pueya niquishiini macura naajua joneneniuyano taraatia, sapiyoniu-yanonio. <sup>24</sup> Jesuuri cuno pojori sequereeri:

—¡Niiquiji nia tohuareetare! Nio maaji samiriuuri maja macu. Nareja maqueyaño.

Pueyari Jesu saroojotaree saaja, naa na sequesacaritij. <sup>25</sup> Jesuuri cuno pojori tohuatanijioree saaja. Na nuhuaji, sohuacamara tiuquimiaari macu-ucua. Na juaashiquiajiniji na quiaaseeri. ¡Maaji samiriuuri sanemaa! <sup>26</sup> Naa Jesu miishanojinijiiri pahuatasaaquiaari puetunu cuno jiyajiniajanaa.

*Jesu jeecasacari caapiqui cariyujuaru namijiaa*

<sup>27</sup> Canaa jaara tohuareetaquiaari cuno tiajinijini, caapiqui cariyujuaruuri Jesu nuhuajiquiaari. Canaa nuhuaji nacariquiaari nojori niishishacari Jesu-ururi seetanujuanaa Pueyaso Jiyarosano. Naaratej, Jesu sequeturiquiaari:

—¡Supuetana David niquihuacuajinio supueno pueyanonaa, canaacua quia taraajere quenaaja!

<sup>28</sup> Canaa tiuquishacariuhua canaa quijia tiajinia, cariyujuarujuriiri Jesuucua catecanoquiaari. Jesuuri nojori nequesotaree:

—¿Niaate cucua tiuya nia namijiaa cua jeecanura?

Jesu riucuatereeri:

—Jaa, jiyaniijianaa. ¡Quia naatacuaaquiniatejaj!

<sup>29</sup> Jesuuri na juaashiquia niaree nojori namijiaacua. Jesuuri cariyujuaru-juri sequereeri:

—Cucua nia tiuuniucua, cuaara quiiria taa nia sequereecuajani,

<sup>30</sup> Cuno pojori namijiaari maniniuajiacara quiquiaariuhua. Jesuuri jiyanojua nojori rootaree:

—¡Majaari tamasaca niqiuara nia pahuatanu cua miishano!

<sup>31</sup> Na tohuareetasacari, cuno cariyujuarujuriiri ritia pahuatanu cotequiaari Jesu miishanojiniji. Naacuajitij, Jesujiniji niishishaaquiaariiri puetunu cuno jiyajiniajanaa.

*Jesu pocuatesacari tiquia pueyano*

<sup>32</sup> Cariyojuarujuri tohuareetanu nuhuaji, tamasaca pueyari Jesuucua jaatucuquiaari samaruraca pueyano. Cuno pueyanoori maja na naata pocuanu quijia. Tiquiatuhuj. <sup>33</sup> Jesuuri samaru tohuatanirii cuno pueyano-jiniji. Na nuhuaji, cuno pueyanoori ritia pocuanu coteequiaari. Naa pueya niquishacaritij, nojoriiri jiyanoohua jiuujiatequiaari. Sequetureeri:

—¡Naa miishanoori maja na niquishaanu quiquiaari Israel jiyajinia!

<sup>34</sup> Fariseocuacaari saaja Jesu macaatiquiaari pueya niquiara. Naa seque-  
tureeri:

—Cuno Jesuni, nojuajaari samaruhua jiyaniiija cumaacaraca. Naacuajitij, na naata samaruhua tohuatanijionu.

*Jesu taraajesacari pueyacua*

<sup>35</sup> Jesuuri puetunu tiacajiniajanaa rucuanejoquiaari Pueyaso rupaa na pohuatanura, puereetuca tiacajinia, shiitianiyojua tiacajinianio. Maninia rupaa pohuataquiaariiri Pueyaso secojojua tiacajiniaqueya, pueya niishini-  
uria taa Pueyaso jiyanooni paniya nojorini. Naajuhuj, nojuajaari queraa-  
tia tamaatia cusonu naatanijioquiaari puetunujuaanaa, nootunejacanio.

<sup>36</sup> Jesu shootiasacari pueya, nojoriicua taraajequiaari jiyanohuari. Pueyari taraatia niquishano quiquiaari, juhua tashuquioonoo pueya. Nojoriiri taraatia quijiaca quiquiaari juhua cojuasoo borregohua. Shaaqui na camaru. <sup>37</sup> Cunora, Jesuuri canaa na saquiriojosano pueya sequequiaari:

—¡Nia niquiri! Jiyanoohua queraatia pueya. Cuno pojoriiri juhua puereetu-  
uca sucohua. Saniniuujia, secajaari na senoonaa. <sup>38</sup> Nocuaji nia sequeyani-  
jia, na Camaru nia secojore, nojuaja cuara jiyaroora queraatia poonijionaa  
na senooriquiano nera.

## 10

*Jesu saquiriojosacari doce pueya na jiyaramiquishocoriquiano*

(Mr 3.13-19; Lc 6.12-16)

<sup>1</sup> Jesuuri canaa na doce saquiriojosano pueya sequequiaari na rootasano canaa tojiniuria, canaa na jiyaramiquiyaquishacarijia. Jesuuri canaa niq-  
uitioquiaari na cumaaca, samaruhua canaa tohuatanijionura, cusosuhua  
canaa naatanijionura, puetunu noonujuaanaa canaa shaatanurajuhuj.

<sup>2</sup> Nioori canaa sesaca, na jiyaramiquishocoriquiano pueya sesacani: co-  
teenuuri quiquiaari Simón. Pedroori na sesa quiquiaarijuhuaj. Pedro  
tarajanu Andrésri quiquiaarijuhuaj. Quiriquiaajaariuhua Santiago, tara-  
janu Juannio. Cuno pojoriiri Zebedeo niquiohua quiquiaari. <sup>3</sup> Felipeeri  
quiriquiaajuhuj, Bartolomé, Tomásnio. Quiriquiaajaariuhua janiya Ma-  
teoni. Janiyari tarijia quiquiaarini cumaneeca masejojua Romano jiyani-  
ijia. Quiriquiaajaariuhua socua tamonu Santiago. Cuno Santiagoori  
Alfeo niyanu quiquiaari. Quiriquiaajaariuhua Lebeo. Na sesa tarajanuuri  
quiquiaari Tadeo. <sup>4</sup> Quiriquiaajaariuhua Simón. Nojuajaari Cananeo pueya  
maanujinijinio quiquiaari. Judas Iscarioteeri quiriquiaajuhuj. Nojuajaari  
Jesu quiateriquiano quiquiaari mosocoriquiano.

*Jesu rootasano na pueya na jiyaramiquiyaquishacarijia*

(Mr 6.7-13; Lc 9.1-6)

<sup>5</sup> Jesuuri nio na doce pueya jiyaramiquiquiaari Pueyaso rupaa  
canaa pohuatanura. Coteenu, canaa rootaquiaariiri, canaa na  
jiyaramiquiyaquishacarijia. Naa canaa sequequiaariiri:

—Majaari taucuacaacua nia quiojonu. Naajuhuj, majaari nia tiuquiniu  
Samaria pueya tiacajinia. <sup>6</sup> Saaja parta Israel pueyacua nia quiaare cutara.



Nojoriiri juhua borregohua tashuquioono quiya. <sup>7</sup> Nojori niquiara nia pohuatare puetunu tiacajiniajanaa. Nojori nia sequere: “Pueyasoori quiarijia nia jiitianu paniya, niaa jaara na rupaa tojitiajacara quiri”. <sup>8</sup> Cusosuhua nia naatanijiore. Macunucua nia samiitianijiore. Canapuate lepra cusonu jiitiaani, cuno cusonu nia shaajare pueya cuaqueyajiniji. Samaruhua nia tohuatanijiore pueyajiniji. Niaacuajaari nio cumaaca maseree nareja. Naaratej, nareja nia naatanijiorejuhuaj. Majaari cua cumaaca nia jamuenu.

<sup>9</sup> Majaari cumaneeca nia panu. <sup>10</sup> Majaari nia caashoque nia panu. Majaari socua toqueya nia panu, sapatunio. Saa nia cushishanotaja nia quiaare. Majaari nia panu nia miojotu. Nia naacutasano pueya cuara niquitioora saniniuujia nia panishano.

<sup>11</sup> Nia rucuanesacari, niaa jaara tamonu tiacajinia tiuquishii, nia nequesotare tee maninia pueyano quiyani. Cuno pueyano tiajinia nia jiyojetare, niaa cuara cuniquiji quiaarejaatijia. <sup>12</sup> Niaa jaara tamonu tiajinia tiuquishiiquia, pueya nia sequere naatej: “Pueyaso cuara nioojia cajitiiria”. <sup>13</sup> Cuno tiajinia quiniaa jaara maninia pueya quiri, juhuajaniya quiniutianiyari taa nia sequerecuajani. Nojori jaara Pueyaso tojiyashijiaca quiri saniniuujia, nojori jiuujiacaari cajitiyaquishaanutaniya. <sup>14</sup> Tamonutia camaru jaara nia tiuquinitianu paniyaquiri na tiajinia, Pueyaso Rupaa ruuretajaca nojori quiniuucua, nojori niquiara nia niohuacaacuaji nia rapijotare jiya jooqua. Naacuajitij, cuno pueyari niishiniutianiya Pueyasoori nojori jiyanoaquiniutianiya, nojori maseyaquiniuucua na rupaa pohuatanaa. Naa nia miirijihuaaj cuno tiaca pueya niquiara, cuno pojori jaara Pueyaso rupaa tojiniu paniyaquiri nia pohuatasacari. <sup>15</sup> Seetanujuanaa nia sequeyanijia, jiya puequesacari, cua nequesoreesacari pueya, cuno pueyari jiyanohua saniitiosaanutaniya socua Sodoma tiaca pueyajiniji, Gomorra tiaca pueyajinijinio.

### *Pueyaso rupaa pohuatanaari naquiya miishaanutaniya*

<sup>16</sup> Socua cua tojitiare. Janiyari nia jiyaroya Pueyaso tojitiaashijiaca niquiara nia pohuatanura cua rupaani. Niaari nojori tajinia puereeta quiniutianiya, naatej, taa borregohua quiya sayoru tajiniacuaani. Nojoriiri sesa miiniutianiya niajaniya. Nocuaji jiyanohua niishijiaca nia quiri, tama nia cuaqueyajaaja nia cojuanura. Naajaa, majaari nojori naminiu. Saaja maninia nia quiri juhua noseja, pueyano porocua. <sup>17</sup> Tama nia cuaqueyajaaja nia cojuare tamasaca pueyacuaji. Cuno pojoriiri nia jiyatanutaniya tiaca jiyaniijianucuaacua nia saniitiosaanura, nojori tojiniu paniyaquishacari cua rupaa. Niaari Pueyaso secojojua tiacajinia piquishaanutaniya. <sup>18</sup> Cua rupaa nia pohuatanuucua, niaari quioosaanutaniya tiaca jiyaniijianucuaacuara, nojori nequesoreenura niajaniya. Niaari jiyaca jiyaniijianucua niquitiosaanutaniyajuhuaaj. Naajaa, naacuajitij, niaari nojori niquiara pohuatanutaniya janiyajiniji, taucuaca jiyaniijianucua niquiaranio. <sup>19</sup> Niaa jaara jiyaniijianucua tacoji nujuatesaare nequesoreesocoriquiano, majaari nia niishiriojonu taa nia riucuanutaniyani. Nia riucuanu panishacari, niaari jiyacari niishitiosaanutaniyacujaja maninia nia riucuanura. <sup>20</sup> Naacuajitij, nia riucuasanoori maja tama niajaniyajinijiaaja quiniutianiya. Pueyaso Sohanu cutaraari nia pohuatenutaniya jiyaniijianucua niquiara.

<sup>21</sup> Pueyari tama tarajanujuaaja niquitionutaniya mosocoriquiano, tarajanu tiuushacari cucua. Pueyanoori neyanu niquitionutaniya mosocoriquiano, cucua neyanu tiuuniuucua. Mueraasapueeri tama na queya tacartanutaniyajaacujua na motenura, na queya tiuushacari

cucua. <sup>22</sup> Puetunu pueyajanaari nia niquniu paniyaquiniutianiya, cucua nia tiuushacari. Naajaa, cante seetanujuanaa cucua tiuujia quiya pueyaracaanuni, nojuaja cutaraari jatanishaanutaniya pueyaracaanu shacantuuca quiija na quiniuria. <sup>23</sup> Pueya jaara naquiya nia miiri Pueyaso rupaa nia pohuatasacari nojori tiacajinia, cuno tiacajiniji nia mashiri tamonu tiacajiniara tii nia pohuatanura. Seetanujuanaa nia sequeyanijia, juhuanojuaja nia tucuataaquishacarijia pohuatanu Pueyaso rupaa puetunu Israel pueya tiacajiniajanaa, janiyari jiyocuacaanuji tacatenutaniuhuani.

<sup>24</sup> 'Nio nia niishirijihuaj. Pueyanoori maja socua tojishano na niishitiojonajiniji. Naajuhuj, seruuri maja socua tojishano na camarnujiniji. <sup>25</sup> Pueyano jaara maninia tojiriquia na niishitiojona, maniniacuaajaari nojuaja jaara na nuhuaji juhua na niishitiojonara quirijihuaj. Maniniacuaajaari, seru jaara juhua na camarnura quirijihuaj. Naaratej, nia Jiyaniijia jaara jiyaniquishiyacuaa "Sesaacata", ¿taariquitijia socua na muerasu sesacasaanutaniyatej?

### *Cante socua pa pueresanoni*

*(Lc 12.2-7)*

<sup>26</sup> 'Naaratej, majaari nia puerenu niarta pueya. Puetunu jiyasohuaja pueya miishanojuanaari niishishano quiniutianiya. Puetunu pueya seetasanojuanaari niishishaanutaniyajuhuj. <sup>27</sup> Jiyasohuaja cua niishitiojosano niajaniani, cuno nia pohuatare puetunu pueya niqiarajanaa. Cua sasacojosano nia numaa pajamani, cuno nia nacatare puetunu pueya niqiarajanaa. <sup>28</sup> Majaari nia puerenu pa puecojuaca. Nojoriiri maja na naata pa sohuanu monu. Saaja nia puerere cutara nooj, cante cumaacacacuajani mani quiquojinia nia sohuanu na quejoonura, nia cuaqueyanio.

<sup>29</sup> 'Pa naata saaja niquiriyatu cumaneeniyojuata caapiqui shiyojuanijua masenu pa miaquesocoriquiano. Naajaa, pa Que Pueyasoori puetunu cuno shuhua niishiyajanaa. Naacuajitij, majaari quenaaja niquiriyatujua shiyojua cusonu Pueyaso paniyaquishacari. <sup>30</sup> Naajuhuj, Pueyasoori puetunu nia naca cajasu niishiyajanaa. Puetunujuanaari na serojosano quiya. <sup>31</sup> Naacuajitij, maja nia puerenu. Niaari jiyanohua socua Pueyaso panishano queraatia shuhujiniji.

### *Maja cumaati Jesucristojiniji pa caririquiniu*

*(Lc 12.8-9)*

<sup>32</sup> 'Niaa jaara tamasaca pueya niqiuara sequere niaari cucua tiuujiaa cutara, janiyacua jiyocuacaanu quiija cua Que niqiuara sequerejanihuaj, niaari cua muerasu. <sup>33</sup> Cante saniniujia cucuaji seetaja tamasaca niqiarani, janiyari cua Que niqiuara na tamacanutaniyajaacuhuj.

### *Jesuucua tiuujia pueyari narta pueya juaashano*

*(Lc 12.51-53; 14.26-27)*

<sup>34</sup> 'Majaari nia jyaniniu janiya mijiria niqiuarini pueya quiniuria juhujaniya. Maja. Mijiria cua niniuucua, pueyari juayonuujutanutaniya. <sup>35</sup> Niquiaari cutaranijia pueya tiuniuria cucua. Naacuajitij, pueya tiuushacari cucua, cucua tiuyashijia pueyari nojori niquniu paniyaquiniutianiya. Naacuajitij, pueyanoori na que paracaaniutianiya, cucua tiuujia na que quiniuucua. Maajiiri na nucua paracaaniutaniyajuhuj, na nucua tiuniuucua cucua. Pueyano niqiuocuaari na reyarucua paracaaniutianijuhuj, cucua tiuujia na reyarucua quiniuucua. <sup>36</sup> Naacuajitij, tama pueya panishano pueyajaajaari na paracara quiniutianiya, cucua nojori tiuniuucua.

<sup>37</sup> 'Cante na queya panijia socua janiyajinijini, jiyano pueyanoori maja maninia cua pueyano na quiniuria. Cante necohua panijia socua janiyajinijini, jiyano pueyanoori maja maninia cua pueyano na quiniuriajuhuj.  
<sup>38</sup> Cante tama na cuaqueyajaaja panitiaaquijia na tojiniuria janiyani, cunoori maja maninia quiria. <sup>39</sup> Cante saaja tama na cuaqueyajaaja cojuanu paniya shuquiriaatia na quiniuria mijiriani, jiyano pueyanotej, nojuaja cutaraari shaajasaanutaniya, pueyaracaanu taraatia na miitiasaanura. Saniniuujia, cante tama na cuaqueyajaaja panitiaa naquiya na miishaanura cua tojjia na quiniuucuan, nojuaja cutaraari rishijara jatanishaanutaniya. Seetanujuanaa cuata shuquiriaatia quiniutianiya pueyaracaanuuri.

*Pueyasoori maninia miijiacu niqutionutaniya na jiitiasanojiniji*  
*(Mr 9.41)*

<sup>40</sup> 'Cante na tiaco nia tiuquinitiaja cua rupaaajiniji nia pohuatasano na tojiniuriani, cuno pueyanoori cua tojiyajuhuj. Cuno, cante cua tojjiani, nojuajaari cua Jiyarona tojjiajuhuj. <sup>41</sup> Naajuhuj, cante Pueyaso rupaa pohuatana tiuquinitiaja na tiaconi, Pueyaso rupaa pohuatana na quiniuucuan, Pueyasoori cuno pueyano niqutionutaniya maninia na casaajiniji. Nojuajaari niqutiosaanutaniya mariyata taa Pueyaso rupaa pohuatana niqutiosaanutaniyacuaani, Pueyasojiniji na pohuatanu sami. Cante maninia miijia pueyano tiuquinitiaja na tiaconi, maninia pueyano na quiniuucua, na tiaco tiuquinitiaja pueyanoori maninia casaa niqutiosaanutaniya mariyata taa maninia miijia pueyano niqutiosaanutaniyacuaani. <sup>42</sup> Naajuhuj, cante quenaaja shiniitiuniacu mohuaca raateya tamonuni, cua mueyaniyojua na quiniuucua, Pueyasoori seetanujuanaa na jiitiasanojiniji na niqutionutaniya na raatenu sami.

## 11

*Tiuquinijiona Juanri na pueya jiyaroquiaari Jesu nequesotanura*  
*(Lc 7.18-35)*

<sup>1</sup> Jesu jaara canaa na doce saquiriojosano pueya rootanu tucuatquiaari tii, nojuajaari tiji quiaquiaari cuno jiya tiacajinia quiniaa na niishitiojonura Pueyaso rupaa.

<sup>2</sup> Tiuquinijiona Juan quishacari nujuatejojuajinia, nojuajaari jiyacari niishiquiaari Jesucristo miishanojiniji. Cunora, nojuajaari na pueya jiyaroquiaari Jesuucua naa na nequesotanura:

<sup>3</sup> —¿Quiaate seetanujuanaa Cristo, tariucuacaanu Pueyaso sequesano canaacua niriquianotej? ¿Canaate tamonu sashiya soj?

<sup>4</sup> Jesuuri nojori riucuaaree:

—Nia quiaarohua. Tiuquinijiona Juan nia pohuatasuhua puetunu cua miishanojuanaa nia niquishano, nia tojishanojuhuj. <sup>5</sup> Naa nia pohuatasuhua: “Cariyojuarujuriiri tari niqutiarohua. Shipiiniquiuniuujiaaari maninia rucoorohua. Shu miaqueja cusonu jiitajacaari tari jeequerohua. Numueejunucuaari tari tojitarohua maninia. Macunucuaari samiitiacorohua. Casamijiuniucua pueyari Pueyaso rupaa pohuatasaaaree, Pueyaso muerasura nojori quiniuria”. <sup>6</sup> Shuquiriaatia quijia cutaraari noo pueyano, cante cucuaji taacanuyaquijiani.

<sup>7</sup> Tiuquinijiona Juan pueya jaara quiojoquiaariuhua Juancua, Jesuuri Tiuquinijiona Juanjiniji naa pohuatanu coteequiaari pueya niquiaratej:

—¿Casaa niquiniuucua nia quiojocanu cariquia jiyajiniani? ¿Niaateeri paratu piyarojosano naajua niquiniuucua quiacanu? Maja. ¿Tiuquinijiona

Juanteeri noojia niquijoteja? Maja. <sup>8</sup> Cua sequeture, ¿casaa niquini-uucua nia quiojocanuni? ¿Niaateeri pueyano niquiquianu maniniuqui toque cushiyano? Maja. Cuno pojori cante maniniuqui toque cushijiani, nojoriiri jiyaniijianucua tiajinia quijiaca cutara, maja cariiquia jiyajinia. <sup>9</sup> ¿Taateerinitioj? ¿Casaacua nia quiojocanuuri? ¿Pueyaso sequenu panishano caminiujiunia niquiniuucuatee? Jaa. Seetanujuanaa nia sequeyanijia, Tiuquinijiona Juanri jyanohua socua cutara pueyano tamasa Pueyaso sequesano caminiujiuniaajiniji. <sup>10</sup> Cuno Juanjinijicuaajaari tariucuacaanu Pueyaso Rupaaajinia pohuatasaaquiaari. Naa naajiotasaaquiaari miriquiiri Pueyaso sequesano janiya nojuajiniji:

“Janiyari cua pueyano jiyaronutaniya quiocuajini. Nojuajaari quia puetanutaniya, quia nuu jeecariquiano quiocuaji”.

Juanri naa maninia miiquiaari cucuaji, pueya tojiniuria janiya cua tiuquishacari.

<sup>11</sup> 'Seetanujuanaa nia sequeyanijia. Majaari tamonu pueyano quiniu quiquiaari socua cutara pueyano Tiuquinijiona Juanjiniji. Naajaa, cante Pueyaso muerasuniyojua quiya cucua na tiuushacarini, cunoori socua cutara pueyano Tiuquinijiona Juanjiniji.

<sup>12</sup> 'Tiuquinijiona Juan jaara coteequiaari Pueyaso rupaa pohuatanu, pueyari jyanohua saniniujiuriquiaa Pueyaso muerasu nojori quiniuria. Pueyari naa saniniujiya quiarijiajuhuaj. Cante jyanohua saniniujiya Pueyaso muerasu na quiniuriani, naa quiniutianiyari. <sup>13</sup> Supuetana Moisés, mariyata puetunu Pueyaso sequesano caminiujiuniaajanaari tariucuacaanu pohuataquiaari taa Pueyaso jitianutaniya pueyani. Naa poojotasaquiaariiri Tiuquinijiona Juan jaara tiuquiquiaarijiaatijia. Quiarijiani, Tiuquinijiona Juanta, nojori pohuatasanoori tari tohuateenu coteya. <sup>14</sup> Nia jaara nio cua pohuatasanoocua tiuuniu paniri, nia tojiri nio: Tiuquinijiona Juancuaajaari tariucuacaanu pueyara Pueyaso sequesano caminiujiunia Elíascaaja. Elíascaajaari sequesaaquiaari niriqiano. <sup>15</sup> Cante numaaracani, cuaara tojiiria cua sequesano.

<sup>16</sup> 'Nia pohuatareera taamuecate nio pa quishacari pueyani, quiarijiani paa na quiyani. Nio pueyari juhua naatujoori, canapuate carijiniacuma tacuarishijionu paniya juucuan. Nojoriiri narta naatujooriicua naca, nojori tacuarishijionu panishacari juucua. <sup>17</sup> Naa nacaari: “Canaari juucua naajua jonenejiani. Majaari nia nianujunu paniniu. Canaa jaaquequejosacari taraatia saniniuujia, majaari nia sapuenu”. <sup>18</sup> Naajuhuj pueyanaa, Tiuquinijiona Juan quishacari, nojuajaari mashaca ratuyashijia quiquiaari, sumatuu miaqueyashijiajuhuaj. Pueyari saaja na sequequiaari samaruraca pueyanota. <sup>19</sup> Na nuhuaji, janiyari tiuquiquiaarini. Janiya cutaraari sumatuucua miaquejani, mashaca ratujuajuhuj. Pueyari cua sequequiaa: “Miaquejoru cuno, ratunu porocuanio. Sesa pueya cojjia, pa soosano Romano jiyaniijia seya cojjia sacuaratiajuhuaj”. Naa nia soosacari janiya, Tiuquinijiona Juannio, niaari puetunu Pueyaso niishitiojosanojuanaa ruuretaa. Naajaa, pueyari na naata niishiniu maninia canaa miishanojiniji, janiya, Tiuquinijiona Juannio, canaari mariyata Pueyaso jiyaramiquishano cutarani.

*Jesu piriyojosacari tojiyashijianucua pueya  
(Lc 10.13-15)*

<sup>20</sup> Corazín tiacajinia, mariyata Betsaida tiacajinia, Jesuuri tii socua pueya naatanijioquiaari tamasa tiacajiniji. Jiyajeneta casaa miiquiaari tii Pueyaso cumaacataari. Pueyari saaja nocua tiyaaquiquiaari. Nojoriiri maja

noojia na tacatonu quiquiaari sesa nojori miiniujiniji. Cunora, Jesuuri nojori priyojoquiaari. Naa sequequiaari nio caapiqui tiacajinia quiniaa pueyari:

<sup>21</sup> —¡Niaari taraatia saniitiosaanutaniya, nioojia nia tacatoyaquiniuucua sesa nia miishanojiniji! Janiya jaara Pueyaso cumaacata miiquiaari Tiro tiacajiniani, mariyata Sidón tiacajinianio, taa cua miiquiaari nia tiacajiniacuaani, cuno taucuaca maara Pueyasocua tari noojia tacatocanu cutara. Nojori maara ritia cocuaque toqueya cushiyonuuquiaari nojori tacaaniu niishishaanura sesa nojori miishanojiniji. Naajuhuaaj, nojori maara juaca quejooquiaari na nacaacua, noojia nojori tacatosacari Pueyasocua, sesa nojori miiniuucua. <sup>22</sup> Naaratej, janiyari nia numooteyani: jiya puequesacari, niaari socua jiyanhuaa saniitiosaanutaniya Tiro tiacajinia quiniaa pueyajiniji, Sidón tiaca pueyajinijinio. <sup>23</sup> Capernaum tiacajinia quiniaanaa, ¿niaateeri jiyaniya niaari tamasaca tiaca shocotanutaniya nia jiyanihacari niaari socua maninia cutara? ¡Maja! Niaari mani quiquiojinia quejoosaanutaniya. Janiya jaara cua cumaacata cutara casaa miiquiaari Sodoma pueya tiacajiniani, taa cua miiquianu nia tajiniacuaani, Sodoma tiaca maara quiriquiaaj. <sup>24</sup> Nocuaaji nia sequeya cutaranijia: jiya puequesacari, niaari socua jiyanhuaa saniitiosaanutaniya Sodoma tiaca pueyajiniji.

*Jesuucua tiuuniaari samaateriquiano cutara  
(Lc 10.21-22)*

<sup>25</sup> Jiyacaritij, Jesuuri na Que Pueyaso sequequiaari:

—Quia shuquiritiaanijia cua Quenaa. Quiaari jiya camarnu, jiyocuacaanu camarnunio. ¡Quiaari maninia! Quiaari niishiyashijiaca pueya maninia casaa niishitirii, niishijiaca pueyacuaji quia jamosanoni. Niishijiaca pueyari saaja tama nojori niishishanoocuaajaaja tiuujiaca. <sup>26</sup> Naacuajitij cua Quenaa, quiaari maninia niishitirii niishiyashijiaca pueya, taa quia paniquiaaricua-jani.

<sup>27</sup> Cua tojitiare pueyanaa, cua Queeri cua niquitioquiaari puetunu casaa-janaa cua jiiiasocoriquiano. Majaari seetanujuanaa tamasaca niishiniu janiya. Saa cua Queja cutaraari cua niishiya. Naajuhuaaj, majaari seetanujuanaa tamasaca niishiniu cua Que. Saaja janiya, Neyanuni, na niishiya cutaranijia, naajuhuaaj canapue cua niishitiniu paniya cua Quecua-jani. <sup>28</sup> Cucua nia nijiore, puetunu niajanijajanaa, canapuate tacaquioyoni, canapuate puera niishiriojonuujuacani. Naa jaara cucua nimia, janiyari nia samaraatanutaniyani. <sup>29</sup> Cua niishitiojosano nia tojiri. Janiyajiniji nia niishiri taamuecatucuaa janiyani. Janiyari ritia juayashijiani. Janiyari pueya shocoteyaquijiani. Naacuajitij, nioojiaari maja na tacaaniu quiniutianiya nia rupuesacari janiya. <sup>30</sup> Naa tojishacari janiya, nioojiaari juhuajaniya quiniutianiya. Cua poonitijosacari niajaniya, majaari jiyajeneta na quini quiniutianiya niaara, cua cumaquishacari niajaniya.

## 12

*Jesu pueya carojotasacari trigo samaatenu juuca  
(Mr 2.23-28; Lc 6.1-5)*

<sup>1</sup> Jiyacaritij, Jesuuri canaa na saquiriojosano pueyata cuhuariquia jiuujiaaco tajiriquiaa samaatenu juuca. Canaari jiyacari miaajeriquiaani canaa quiasacari nucuaco. Canaari secaja trigo jajau carojotanu coteequiaarini. Canaari na miojonuuriquiaani. <sup>2</sup> Fariseocuaca jaara canaa niquiquiaari naa miyanotej, Jesu sequetureeri:



—¡Quia niquiri! ¡Quia pueya trigo shuniitiaa! ¡Na shuquiuquiojoniuyari! ¡Naa nojori miishacaritij, poonijioniuyari! Cuno maja panishano samaatenu juuca miiniuria. ¡Pa supuetana Moisés cuajaari naa pa rootaquiaaritij!

<sup>3</sup> Jesuuri cuno pojori riucuaaree:

—¿Majateeri nia serojonu quiquiaari Pueyaso Rupaajinia taa pa supuetana David miiquiaari na miaajesacarini, na pueyano? <sup>4</sup> Nojoriiri Pueyaso Secojoua tiajinia tiuquitiaquiaari. Pueyasora niqutiojosano pan satureeri. Cuno panri saaja pueyacuara secojonaa sasocoriquiano quiquiaari, maja socua tamonu pueyano sasocoriquiano. Naajaa, Davidri na saquiaari. Na miishanoori maninia quiquiaari Pueyaso niqiuara. <sup>5</sup> Naajuhuj, ¿majateeri nia serojonu quiquiaari tariucuacaanu Moisés naajiosanojinia, taa pueyacuara secojonaa pueyaracaanu poonijioquiaa Pueyaso Secojoua tiajini-ani? Nojoriiri naa poonijionuquiaa samaatenu juucajuhuj. Naa nojori poonijosacari Pueyaso Secojoua tiajinia samaatenu juucatej, cunoori maja sesa. <sup>6</sup> Moisés cuajaari pa rootaquiaari maja pa poonijionura samaatenu juuca. Naajaa, cuno rootasanoori seetanujuanaa maja na quiniu Pueyaso Niyanura, jaara Pueyaso Secojoua tiajinia poonijionaara quiyaquirijiuhuj. <sup>7</sup> Maja naasucuaari nia niishiniu quiquiaari casaa nio tariucuacaanu naajiotasano niishitiojiya niajaniya juucuan. Naa sequeyari: “Janiya cutaraari socua nia panitiaani niarta pueyacuara nia taraajenura, maja saaja nia niqutiojonura nia seya cucuara catijasocoriquiano”. Naa jaara nio naajiotasano niishijia quiriquia, niaa maara sesa miyashijia pueyacuara tonujiaquiriquiaj. <sup>8</sup> Cua tojitiare quiaritia. Janiyacuajaari Pueyaso Niyanuni. Naacuajitij, mijiria cua quishacari cua naata sequenu casaate samaatenu juuca miishiyani.

*Jesu jeecasacari pueyano juaashiquia cuseetucoujara joojequetano*

*(Mr 3.1-6; Lc 6.6-11)*

<sup>9</sup> Na nuhuj, canaari Jesuta quiojoquiaari quiniquijini. Canaari Pueyaso Secojoua tiajinia tiuquishiini. <sup>10</sup> Pueyanoori tii quiriquiaa cuseetucoujara joojequetano na juaashiquia. Taa canaa Judiocuaca camarucua Jesuucua saquiriojotanu paniriquiaa juucuacuajani, jiyacaritij, na sapojonuta Jesu nequesotaturee naari.

—¿Maniateeri samaatenu juuca cusosu naataniniuria? Paacuajaruhua niishitiojosaaquiaarini maja pa poonijionura samaatenu juuca.

<sup>11</sup> Jesuuri cuno pojori riucuaaree:

—Naa jaara niquiriyatujua borregoniyojua jiitiare, cuno jaara tiyare raama samaatenu juuca, ¿majateeri nocua nia quianu, raamaji nia panura nia seruniyojua? ¡Taaquiririnij! <sup>12</sup> ¿Majateeri pueyano socua jiyanohua panishano borregonijini? Taaquiririnij. Naaratej, maja pa tarinitianu maninia pa miiniuria pueyaracaanu, samaatenu juucajuhuj.

<sup>13</sup> Na nuhuj, sesarucouja sequereeri:

—Quia juaashiquia quia shiitiore.

Na juaashiquia shiitioreeri. Ritia jeequequeeri juhua tanecaraja. <sup>14</sup> Naa Fariseocuaca niquishacari Jesu miishanotej, tohuareetaqueeri. Tama nojori-jiaritia roojotooquiaari nojori motenura Jesu.

*Jesujini pohuatasano tariucuacaanu naajiotasanojinia*

<sup>15</sup> Jesu jaara niishiquiaari Fariseocuaca miiniu panishano nojuaja, quiniquiji quiaqueeri. Queraatia pueyari na nuhujiquiaari canaata. Jesuuri puetunu cusosuhujanaa naatanijioquiaari. <sup>16</sup> Jesuuri na naatanijosano pueya rootaquiaari maja tamasa niqiuara nojori pohuatanura cante nojuajani. <sup>17</sup> Naacuajitij, tariucuacaanu Pueyaso

sequesano caminiujiunia Isaías pohuatasanoori tohuateequiaari. Nojuajaari juhuacarijia naa pohuataquiaari Jesujiniji Pueyaso sequesano miriquitij:

18 “Niocujaari cua seru, cua saquiriojosano. Na timitiaanijia. Nojuajaari jiyanoohua cua panishano. Janiyari cua Sohuanu jiyaronutaniya nocuani. Nojuajaari tamasa pueyapue pohuatanutaniya janiyajiniji, nojori quiniuria cua muerasura pueyaracaanu. 19 Majaari pueyata juaajia na quiniu quiniutianiya. Majaari nacojojua na quiniu quiniutianiya. Majaari na rupaa tojishano quiniutianiya tiacaacaco. 20 Majaari quenaaja shuniitiasano naajua na shutianu quiniutianiya puetunujuanaa. Naajuhuj, majaari na maquishajanu quiniutianiya jatarinitiaja nojiyano samaritiu. Nojuajaari naa sesa miijiaca jiyanooniutianiya, nojuaja jaara tiuquiriohuajaatijaj, puetunu sesa miiniujiana na puecanura, Jiyaniijajanaa na quiniuhuara pueyaracaanu. 21 Puetunu tiquiyocuacajinijinio quijiaca pueyajanaari nocua tiuuniutianiya”.

*Pueya sequesacari Jesu samaru cumaacaracana*  
(Mr 3.20-30; Lc 11.14-23; 12.10)

22 Tiquiaari Jesuucua jaatucusaquiaari. Cariyojuaru quiriquiaajaariuhuj. Naa quiquiaariiri samaruraca na quiniuucua. Jesuuri na jecaree. Naacuajitij, tiquiaari pocujara quiquiaari, niquijiarajuhuj. 23 Cunora, puetunu pueyajanaari nocuaji jiuujiatequiaari. Sequetureeri:

—¡Nio jiyoteeri pa supuetana David niquiohuacuajinio supueno pueyano, tariucuaanu sequesano pa jiyaniijara quiriquianotej!

24 Fariseocuaca jaara tojiquiaari naa pueya sequesacari Jesujinijitij, nojoriiri na juaaniutia sequequiaari saaja:

—¡Cuno pueyanoori samaruhua tohuatanijiya Satanás cumaacata!

Satanásri samaruhua jiyaniijia. 25 Jesuuri cuno pueya niishiriojosano niishiquiaari. Cunora, nojori sequereeri:

—Jiya camarucua jaara juayonuujutare tama nojorijiaaja, majaari pueyaracaanu na naata quiniu camarnura. Ritia jatashiyari. Naajuhuj, tiacajinia quinia jaara juayonuutare jiyareta tama nojorijiaaja, cuno pueyari maja na naata quiniu jatiqi. Naajaariuhuj, pueyano jaara juayonuujutare tapueyocuacata tama na tiajiniaaja, majaari nojori naata jatiqi quiniu. 26 Jaara naa quiritij, samaruhua jaara tohuatanijiosaare Sesaaca cumaacata, tama na cuaqueya paracayajaarijia. Naacuajitij, majaari na naata na cumaaca rishiniu. 27 Janiya jaara samaruhua tohuatanijiya Satanás cumaacatani, taa nia sequeya janiyacujani, cua sequeretoj, ¿cante nia niishitiojosano pueya cumaquia samaruhua nojori tohuataniniuriani? ¿Satanástee? Majaruhua. Nojoricujaari samaruhua tohuataniquiaa Pueyaso cumaacata. Naacuajitij, nojori tohuatanijosacari samaruhua Pueyaso cumaacata, niaari jiyanoohua jiyajeneya nia sequesacari janiya samaruhua tohuatanijiya Sesaaca cumaacatani. 28 Seetanujuanaa Pueyaso Sohuanu cumaquishacari janiya, samaruhua cua tohuatanijionura, niaa cumaati cua sequesano tojirii. Naa cua tohuatanijosacari samaruhuatej, niaacuajaari niishiya Pueyasoori tari poonijia juhua Jiyaniijia, mijiria nia tajinia.

29 ‘¿Pueyanote na naata cumueeca pueyano tiajinia tiuquiniu na casami na jaariutianura? Maja na naata na jaariutianu, jaara coteenu na morojiaquiri. Jaara na morojore coteenu, na nuhuaji cutara na naata na casami

panu. Naajuhuaaj, janiyari Pueyaso cumaacata jaariuutiaa Sesaaca jiiťiasano pueyani.

<sup>30</sup> 'Cante cua jiyano quiyaquiyani, cunoori cua paraca. Cante cua naacutaquiya pueya rerecojonura Pueyasarani, nojoriiri saaja pueya cocuataa Pueyasooquaji.

<sup>31</sup> 'Naarate nia sequeyanijia: puetunu pueya miishano sesajanaari na naata jiyanooshaanu. Sesacojojua pueyanoori na naata jiyanooshaanujuhuaaj. Saniniuujia, cante Pueyaso Sohuanu miishano sesacajani, cunoori maja na jiyanooshaanu quiniutianiya cutara. <sup>32</sup> Cante Pueyaso Niyanu sesacajani, nojuajaari na naata jiyanooshaanujuhuaaj. Saniniuujia, cante Pueyaso Sohuanu sesacajani, nojuaja cutaraari jiyanoyaquishaanutaniya pueyaracaanu. Na ruuretanuucua Pueyaso Sohuanu, majaari na jiyanooshaanu quiniutianiya mijiria, jiyocuacaanujuhuaaj.

*Naanaari niishishano na jajaujiniji*

*(Lc 6.43-45)*

<sup>33</sup> 'Naana jaara maninia naana quiri, maninia jajau muetuyari. Naana jaara sesarunaja quiri, sesa jajau muetuyari. Naacuajitij, na jajaujiniji paari niishiyani taamueca naanatenojoni. <sup>34</sup> Niaari juhua sacocua. ¿Niaatucua taa maninia pocuajaca quirini, niaa jaara pueyaracaanu sesa miijiaca quiyajaa? Paari poojiajiniji pa niishiriojosano pocuaquiaani. <sup>35</sup> Naacuajitij, maninia jiuujiaraca pueyanoori saaja maninia casaa pocuaja. Sesa jiuujiaraca pueyano saniniuujia, sacuaraatia casaa pocuajari. <sup>36</sup> Nia sequeya cutaranijia, Pueyaso saniitionu juuca, pueyari puetunu najuhuaana sesa na pocuasanoinijianaa nequesoreesanutaniya. <sup>37</sup> Cante maninia casaa pocuaja quiquiaarini, cunoori sequesaanutaniya "maninia pueyanota". Naajuhuaaj, cante sesa casaa pocuaja quiquiaarini, nojoriiri saniitiosaanutaniya saniniuujia. Naaratej, majaari nia niti nia taquiriocuatenu sacuaraatia casaa nia pocuanura.

*Fariseocuaca niquiniu panishacari Jesu miishano Pueyaso cumaacata*

*(Mr 8.12; Lc 11.29-32)*

<sup>38</sup> Noojiaqueya Moisés Rootasanojiniji niishitiojonaari tii quiriquiaa Fariseocuacata. Nojoriiri Jesu sequequiaari:

—Niishitiojonanaa, jiyajeneta casaa quia miiri Pueyaso cumaacata canaa niquishocoriquiano.

<sup>39</sup> Jesuuri nojori riucuaree:

—Niaari sesoriquia pueya, Pueyaso tojiyashijiaca. Majaari nia niquiara casaa cua miiniu quiniutianiya Pueyaso cumaacata. Niaari saaja niquiriyaatu cutara miishano niquiniutianiya taa supuetana Jonás miishaaquiaaricuaani. Cuno Jonásri Pueyaso sequesano caminiujiunia quiquiaari.

<sup>40</sup> Nojuajaari puereetuca sapitiaaja seecojinia shocojotequiaari jiuujianaraca juuca, jiuujianaraca niucuanio. Naajuhuaaj, janiyari raaco macu niojosaqui camueenujunutaniya jiuujianaraca juucani, jiuujianaraca niucuanio. <sup>41</sup> Jonás pohuatasacari Pueyaso rupaa Nínive tiacajinia, cuno tariucuacaanu taucuacaari noojia tacatoquiaari sesa nojori miishanojiniji.

Cunora, Pueyaso nequesoreenu juuca quishacari, Nínive pueyari saneeccatunutaniya nojori tonujunura nio pa quishacari pueyacuara. Nojoriiri Pueyaso saquiriojotanutaniya nio pa quishacari pueyacuara, nojori ruuretanuucua tamonu Pueyaso sequesano caminiujiunia socua jiyaniijiajanaa cutara Jonásjiniji. <sup>42</sup> Naajuhuaaj, tariucuacaanu jiyaniijia maajiiri niquiaari tucuacaanuji pa supuetanaa jiyaniijia Salomón tojinuucua. Cunoori quiquiaari jiyanohua niishijia Salomón quiniuucua. Cuno maajiiri



pananu shuucuaji niqiaari Salomón na tojiniuria, jiyanoehua tucuacaanu na jiyajiniji. Naaratej, Pueyaso nequesoreenu juuca quishacari, cuno maajiri sanenutaniya na saquiriojotanura nio pa quishacari pueyacuara. Nojoricuara saquiriojotanutaniyari nojori ruuretanuucua tamonu niishijia, socua niishijia Salomónjiniji cutara.

*Samaruuri na tohuatanishaquiji tacatejohua*  
(Lc 11.24-26)

<sup>43</sup> Samaru jaara tohuatare pueyanojiniji, joojuashiquio rucuaneyiyari na samaatejara na pajesacari. <sup>44</sup> Jaara riuriataaquiri na samaatejara, naa niishiriojiyari: “Tacateyarohuaraqui tariucua cua quiquiojiniohua”. Jaara tacatemohua, cuno na pueyano riuriasuhuari juhua camaruuju tia, netoosano, maninia jeenucuasano. <sup>45</sup> Naaratej, samaruuri socua tamasaca narta samaruhua pajeya. Socua siete narta samaruhua riuriataari socua jiyanoehua sesa nojuajiniji. Puetunu nojorijianaa jaara tiuquitiare cuno pueyanoocua tii na quiniuria, cuno pueyanoori na nuhuaji socua jiyanoehua sesa quijiara jiyacateja.

Naa quiniutianiyajaariuhua nio pa quishacari pueyara na tojitiaaquiniucua janiya. Nojoriiri socua sesa quijiacara jiyacatenutaniuhua taa cua niyacarijia quijiaca nojori quiquiaaricujani.

*Cante seetanujuanaa Jesu nucuani, tapueyocuacajuhuj*  
(Mr 3.31-35; Lc 8.19-21)

<sup>46</sup> Jesu pohuatasacarijia pueya niqiara, na nucuuari tiuquijioquiaari Jesu tapueyocuacata Jesuucua. Carijiniacuma quituriquiaari. Jesuta pocoojonu paniriquiaa juucuaari. <sup>47</sup> Tamonu pueyanoori Jesu sequeree:

—¡Niishitiojonanaa! Quia nucuaqui quia tapueyocuacata carijiniacuma quiya. Quiata pocoojonu paniyaquinaari.

<sup>48</sup> Jesuuri saaja na numootena pueyano riucuaaree:

—¿Cante cua nucuani? ¿Cante cua tapueyocuacani?

<sup>49</sup> Jiyacaritij, Jesuuri canaa na tojitianaa pueya shishirii. Tii quiniaa pueya sequereeri:

—Nio cua tojitianaani, nojori cutaraari juhua cua nucu, juhua cua tapueyocuaca cutara. <sup>50</sup> Naacuajitij, cante cua Que Pueyaso panishano miqiaa cutarani, nojuaja cutaraari cua tarajanu, cua rimiatu, cua nucuanio.

## 13

*Natoojojua pueyanojiniji pohuatasano*  
(Mr 4.1-9; Lc 8.4-8)

<sup>1</sup> Cuno juucaja, Jesuuri tohuataquiaari tiajiniji. Caminia casaqueyaji cajishiiri. Canaari nata quiriquiaani. <sup>2</sup> Jiyanoehua queraatia pueyari nocua rerequeejoquiaari. Puera pueya quiniucua, Jesuuri botejinia tacaquiaari. Tii cajishiiri. Puetunujuanaa pueyari jaaquiajinia jateequiaari, tiji na tojitianura Jesu canaata. <sup>3</sup> Jesuuri queraatia casaa pueya maanu niishitiojoriquiaa miriqui. Naa pohuataquiaari puetunu canaajanaari:

—Pueyanoori natoojonura quiaquiaari na cuhuariquiajinia. <sup>4</sup> Na jacuatasacari, secajaari nucuaco totequiaari. Shuhuari nocua rosetaquiaari. Puetunujuanaa nucuacaji na natau miojoquiaariiri. <sup>5</sup> Tajaacaari totequiaari tamaqui sai tajiniaqueya. Majaari puera jiya quiniu quiquiaari tii. Naaratej, cuno natauri ritia moritiaquiaari. <sup>6</sup> Pananu jaara tacaquiaari, cuno natauri ritia sorequiaari maja puera nujuacaraca na quishacari. <sup>7</sup> Tajaacaari totequiaarijuhua riyocuaca tajinia. Riyocuaca maashishacari, majaari cuno natau maashiniu quiquiaari maninia. Majaari na muetunu quiquiaari.

<sup>8</sup> Maninia jiyajinia totequiaariiri tajaaca saniniuujia. Tii moritiaquiaari maninia cutaraari. Maninia muetuquiaari cutaraari. Puetunu cuno jiyoneejinijijianaani, noojiaqueyari muetuquiaari cien jajau niquiriyatu jiyonaacua. Tamonu jiyoneeri muetuquiaari sesenta jajau niquiriyatu jiyonaacuajuhuaaj. Socua tamonu jiyoneeri muetuquiaari treinta jajau. <sup>9</sup> Niaa jaara numaaraca quiri, nia tojitiare cua pohuatasano.

*Casaara Jesu niishitiojiya miriquini*  
(Mr 4.10-12; Lc 8.9-10)

<sup>10</sup> Jesuuri naa pohuataquiaari miriqui pueya niquiaratej. Na nuhuaji, canaa, Jesu saquiriojosano pueyani, canaari nocua catecanoquiaarini. Canaari na nequesotaquiaarini:

—Jiyaniijianaa, ¿casaara pueya quia niishitiojoriquiaa miriquini?

<sup>11</sup> Jesuuri canaa riucuaaree:

—Pueyasoori nia saquiriojoquiaari, nia niishishoo casaa Pueyasojiniji nia niishiniuria, taa Pueyaso poonijia pueya jiuujiajiniani, na muerasura nojori quiniuria shuquiriaatia. Tamasacara saniniuujia, majaari nio jiyasohuaja Pueyasojiniji niishishano nojori niishishocoriguiano. <sup>12</sup> Cante Pueyaso rupaa tojijia cutarani, nojuajaari socua niishitiojosaanutaniya, Pueyasojiniji jiyanoahua na niishiniuria. Cante Pueyaso tojiyashijiani, shiitaniyojua Pueyasojiniji nojori niishishanoori puetunu jaariuutiasaanutaniyajanaa nojorijiniji. <sup>13</sup> Cunora, janiyari miriqui pohuatariquiaa nojori niquiarani. Naacuajitij, nojoriiri najuhuana niquiquiaa cua miishano na niishiyaquiniutia. Nojori tojishacari cua pohuatasano, na numaa shama tojitiuquiaa saajaari. Majaari quenaaja nojori niishiniu na tojishano. <sup>14</sup> Naa nojori quiniuucuatej, tari tohuateereeri juhuacarijia supuetana Isaías sequesano nojorijiniji. Pueyara Pueyaso sequesano caminiujiunia na quiniuucua, nojuajaari naa sequequiaari pueyatej:

“Niaari seetanujuanaa Pueyaso rupaa tojiniutianiya najuhuanaj. Majaari nia niishiniu quiniutianiya. Niaari Pueyaso miishano niquiniutianiya najuhuanaj. Majaari nia niishiniu quiniutianiya nia niquishano.

<sup>15</sup> Nojoriiri cumajiuujiaaca quia. Nojoriiri juhua numueeju, tojiyashijiaca. Nojoriiri juhua nimishitiu quiyajuhuaaj. Naa juhua nimishitiu quituyari nojori niquiyaquiniuucuaaji. Nojoriiri naa juhua numueejunucuaajuhuaaj, nojori tojitiaaquiniuucuaaji noojiata. Naa quituyari nojori niishiyaquiniuucuaaji noojiata, cucua nojori tacatenuhuara cua jeeanura nojori jiuujia seque”.

<sup>16</sup> 'Cua pueyanaa, niaari saniniuujia shuquiriaatia quia maninia nia niishishacari cua miishano, nia tojishacari cua pohuatasanojuhuaaj.

<sup>17</sup> Seetanujuanaa nia sequeyanijia, queraatia tariucuacaanu pueyari quiarijia nia niquishano niquiniuucua jiaatiaquiaari juucua. Naa nio niquiniuucua jiaatiaquiaariiri tariucuacaanu Pueyaso sequesano caminiujiuniaa, queraatia maninia pueyano. Majaari nojori niquiniu quiquiaari saaja. Nojoriiri nia tojishano tojiniuucua jiaatiaquiaari juucuaajuhuaaj. Majaari nojori tojiniu quiquiaari saaja.

*Jesu niishitiojosacari miriqui na pohuatasano natojojuajiniji*  
(Mr 4.13-20; Lc 8.11-15)

<sup>18</sup> 'Nia pohuatareera nia niishiniuria cua pohuatasano natojojuajiniji. <sup>19</sup> Canapuete Pueyasojiniji cua pohuatasano niishiyaquiyani, nojoriiri juhua nucuaco toteno jajau. Sesaacaari niquiaa. Pueyaso Rupaa jaariutiaa noojiajinijiiri. <sup>20</sup> Noojiaqueya pueyari juhua sai tajiniaqueya jacutasano jajau quiquiaa. Naaratej, nojori jaara shuquiriaatia tojiri Pueyaso Rupaa,

nojoriiri ritia shitimia nocua tiuquuaa. <sup>21</sup> Nojoriiri juhua nujuacaaju. Majaari cumaatia na nujuatunu. Naaratej, nojori jaara naquiya miishaare Pueyaso Rupaa tojijiaca nojori quiniuucua, nojoriiri ritia Pueyaso tojiniu tarinitiaquiaa. <sup>22</sup> Noojiaqueya pueyari juhua riyocuaca tajinia toteno jajau quiquiaa. Nojoriiri Pueyaso Rupaa tojirii. Na nuhuaji, nojoriiri saaja puera tacaquiaa nio jiya casamiicua. Naajuhuj, nojoriiri sapojosaaquiaa nojori jiyanihacari nojori jaara queraatia casamiriaca quiriquia, nojori maara shuquiriaatia quiriquiaj. Cunora, Pueyaso Rupaari maja na naata poonijionu nojori jiuujiajinia. Naacujitij, cuno pueyari juhua natau muetuhuo quiquiaa. <sup>23</sup> Saniniuujia, cante maninia tojijia Pueyaso Rupaani, maninia na niishiyari. Cunoori juhua jiya maniniuujinia jacutasano jajau. Naacujitij, cuno pueyari juhua maninia natau, maninia muetuna cutara. Jiyanojia maninia pueyari quiquiaa na tojishacari Pueyaso Rupaa. Naaratej, tamonuuri juhua cien jajau muetujua. Tamonuuri juhua sesenta jajau muetujua. Tamonuuri juhua treinta jajau muetujajuhuj.

*Jesu pohuatasano miriqui trigo tajinia moritiaja sesa jiyasocujiniji*

<sup>24</sup> Jesuuri tamonu miriqui pohuatasano pohuataquiaari pueya niquiara, nojori na niishitijonura taa Pueyaso tojitiaashijiaca pueya quiniutianiya Pueyaso muerasu tajiniani. Jesuuri naa pueya pohuataquiaari:

—Tamonu pueyanoori maninia jajau nataquiaari na cuhuariquiajinia.

<sup>25</sup> Puetunu pueyajanaa jaara niucua maqueturiquiaa, na paracaari jiyacari niquiaari. Sesa jiyasocua jajau jaquerooquiaari trigo natasano cuhuariquiajiniaari. Na natanu nuhuaji, tacateyarohuari. <sup>26</sup> Trigo jajauri maashiquiaari. Na nuhuaji, na jajau mueratuusacari shusha, sesa jiyasocuaari mariyata niquishaquiaari maashiyano. <sup>27</sup> Cuhuariquia camaru seyari quiaquiaari na camarujanaa nojori sequenura: “Jiyaniijianaa, ¿majateeri maninia saquiriojosano jajau quiquianucuaaja quia natasano cuhuariquiajiniani? ¿Teje cuno sesa jiyasocua moritiarucuaa quia natau tajiniacuaraarini?”

<sup>28</sup> Cuhuariquia camaruuri nojori riuquaree: “Pa paracaari cunohuj, naa pa miiriucuaani”. Na seyari na nequesotaree: “¿Quiaate paniya canaa quianura cuno jiyasocua jayotanura trigo tajiniaqueyajiniji?” <sup>29</sup> Na seya sequeree saajaari: “Maja. Maja nia jayotanu jiyasocua, niaa mariqui trigo na cojiritiareeri. <sup>30</sup> Naajaa, nia tarinitiare cuaara maashiiria, mariyata cuaara noshiiriajaara trigo jajau. Na nuhuaji cutara janiyari senoonaa jiyaronutaniyani, cuaara coteenu jiyasocua namirioora, nojori jiunioconura jiyasocua catijasocoriquiano. Na nuhuaji cutara, cuaara trigo jajau racatatuura nataco”.

*Jesu pohuatasano miriqui mostaza jajaujini*  
(Mr 4.30-32; Lc 13.18-19)

<sup>31</sup> Jesuuri socua miriqui pohuataquiaari pueya niquiara, na niishitijonura taa Pueyaso poonijiya pueya jiuujiajiniani, nocua nojori tiuushacari. Naa sequereeri:

—Tamonu pueyanoori mostaza jajau nataquiaari na cuhuariquiajinia.

<sup>32</sup> Seetanujanaa mostaza jajauri socua jiyanojia shiitianiyojua puetunu tamonu jajaujinijianaa. Naajaa, cuno mostaza jaara maashiri, socua puereetucara maashijaari narta nataacuacujiniji. Naacujitij, shuhuari na cashacucuaacia jesuya. Naajuhuj, pueyano tojishacari Pueyaso rupaa, seetanujanaa maninia Pueyaso muerasura jatanishiyari.

*Jesu pohuatasano miriqui pan poreetajiniji*  
(Lc 13.20-21)

<sup>33</sup> Jesuuri nio miriqui pohuatasano pohuatarohuacuhua pueya niquiara, taa Pueyaso Rupaa poonijiya mijiriani. Nojori sequereeri:

—Pueyaso rupaari jiyanoehua cumaacaraca na poonijionura juhua pan poreetaja. Maaji jaara pan poreetaja cojitiri jiuujianaraca shiitianiyojua tohuatashi mishaja trigo cashojuata, puetunujuanaa na poreeteyari. Pueyaso rupaari naa cumaacaracajuhua, pueya na jataniniuria quiariniora.

*Casaara saaja miriqui sequesano pohuatasaaquiaa pueya niquiarani*  
(Mr 4.33-34)

<sup>34</sup> Puetunu Jesu pohuatasanojuanaa pueya niquiarani, miriqui sequesanoori quiquiaari. Puetunu na pohuatasanojuanaari naa quiquiaariti.

<sup>35</sup> Naacuajitij, maninia tohuateequiaariiri tariucuacaanu pueyara Pueyaso sequesano caminiujiunia sequesano, jaara nio naajiotaquiaari:

“Pueyasoori naa sequeyaquij: ‘Janiyari pueya niishitiojonutaniyani saaja miriqui cua pohuatasano. Naacuajitij, janiyari pueya pohuatanutaniya pueyaracaanu nojori niishishoo casaani, shusha jiya shipin-ishaanujiniji’ ”.

*Jesu niishitiojosacariuhua miriqui na pohuatasano sesa jiyasocuaijiniji*

<sup>36</sup> Na nuhuaji, Jesuuri pueya maanu sequeree:

—Tariucuaja pueyanaa. Nia quiojorohua.

Na nuhuaji, nojuajaari na quijia tiajinia tacaarohua. Jiyacaritij, canaa, na saquiriojosano pueyani, canaari nocua catecanoquiaarini. Canaari Jesu sequereeni:

—Canaa quia niishitirijia miriqui quia pohuatasano cuno sesa jiyasocuaijiniji.

<sup>37</sup> Jesuuri canaa sequeree:

—Janiyacuaajaari cunoni, maninia jajau natojojuani. <sup>38</sup> Nio jiyari juhua cuno cuhuariquia. Pueyaso muerasuuri juhua cuno maninia jajau, cuhuariquiajinia natasanoni. Tamasacaari saniniuujia Sesaaca muerasu quia. Nojoriiri juhua cuno sesa jiyasocua, cuhuariquiajinia natau tajinia maashinioni. <sup>39</sup> Sesaacaari juhua cuno cuhuariquia camaru paraca. Nojuajaari cuno sesa jiyasocua nataquiaari. Nio jiya puequesacariiri juhua cuhuariquia senosacari quiniutianiya. Jiyocuacaanuji Pueyaso seyari juhua cuhuariquia senoonaa quiniutianiya. <sup>40</sup> Naatej, taa sesa jiyasocua namitiashiya catijasocoriquianocuaani, naa quiniutianiyajaariuhua nio jiya puequesacari. <sup>41</sup> Janiyari cua seya jiyaronutaniya jiyocuacaanujini. Nojoriiri sesa miijiaca quioonutaniya, mariyata canapete tamasaca miitiquiaa sesani. <sup>42</sup> Nojoriiri quejoosaanutaniya mani quiquiojinia. Nojoriiri tii sapuenutaniya pueyaracaanu. Naquiya na miishacari, na quiaa miaquenutaniyari. <sup>43</sup> Na nuhuaji, Pueyaso tojitiajaara jiyanoehua shacantuucara quiniutianiya juhua pananu, na Que Pueyaso jiiitasacari nojori pueyaracaanu. Cante numaacani, cuara tojitiaara cua sequesano.

*Jesu pohuatasano miriqui jiyanoehua panishano casaajiniji*

<sup>44</sup> Jesuuri canaa na pueya pohuataquiaari miriqui, Pueyaso muerasu pa quiniuni, cunoori jiyanoehua panishano. Nojuajaari naa sequequiaariti:

—Tamonu pueyanoori tamasaca cuhuariquia tajiriquiaa juucua. Casaa riuriatamaari, jiyanoehua panishano casaa. Tiihia na jamorohuari tee na quiriquiaacuajani. Jiyanoehua na shuquiritiasacari na riuriatasano casaa, puetunujuanaa tama na casamijiaaja niqutiojoreeri queraatia cumaneeca na jiiitanura. Na nuhuaji, puetunu na cumaneecajanaa pataareeri cuno cuhuariquia camaruucua, cuno cuhuariquia na masenura. Naacuajitij,

cuno jiyano hua na panishano casaari tama na casaara quiquiaarijiaaja. Naajuhuaaj, socua jiyano hua panishano cutaraari, Pueyaso pueyanora nia quiniuria. Cunoori jiyano hua socua panishano puetunu pa panishano casaajiniijianaa.

<sup>45</sup> Socua nia tojiri nio pahuatasano. Casami niqutiojonaari pueyaracaanu rucuaneriquiaa shanohua cohuajaaca tiujiau na pajenura. Cunoori noturu shipinijosano sai quiquiaari. <sup>46</sup> Tamonu juuca, jiyano hua shanohua noturu saajia niqutishaaquiariiri. Jiyano hua na panishano. Naaratej, puetunu na jiitiasanojuanaa niqutiojoquiariiri, cumaneeca na jiitianura, cuno na panishano casaa na masetajara. Na nuhuaji, puetunujuanaa na casami samitia masequiari cuno noturu saajiaari, jiyano hua na panishanoni. Naajuhuaaj, nia tarinitiare puetunu nia panishano casaajanaa, Pueyaso pueyara nia quiniuria seetanujuanaa.

### *Jesu pahuatasano miriqui shiyarujiniji*

<sup>47</sup> Pueyaso Rupaari juhua puereetuuca shiyaru na camaru jartasano caminiajinia. <sup>48</sup> Jaara mishaja quiquiaari sapitiaajata, pueyari na jayotaquiari jaaquiainiara. Queraatia tamaatiuniucua sapitiaajaari tii quiriqiaa. Pueyari jaaquiainia cajitiuquiari saaja maninia sapitiaaja nojori saquiriojonura. Canaasatujinia na niojotureeri racatasocoriquiano. Sesa sapitiaajaari saniniuujia jacutasaquiari. <sup>49</sup> Naa quiniutianiyajaariuhuaaj jiya puequesacari. Naacuajitij, Pueyaso seyari rosetanutaniya, sesa miijiaca na saquiriojonura maninia pueya tajiniji. <sup>50</sup> Na nuhuaji, sesa pueyari quejoosaanutaniya mani quiquiojinia, taa sesa sapitiaaja jacutasaquiariicuaani. Nojoriiri tii sapuenutaniya. Na quiaca miaquenu-taniyajaariuhua naquiya na miiniutia.

### *Pueyaso Rupaari jiyano hua panishano: tariucuacaanu naajiotasano, quiari naataja naajiotasanonio*

<sup>51</sup> Jesu pahuatanu puecasacari, canaa na pueya nequesotaquiariiri:

—¿Niaate maninia niishirii puetunu cua pahuatasanojuanaacuaaja?

Canaari Jesu riucuaareni:

—Taaquiriirinij Jiyaniijianaa.

<sup>52</sup> Jesuuri canaa sequeree:

—Maniniacuajaqui. Tariucuacaanu Pueyaso Rupaajiniji niishitiojona jaara quiarinio cua niishitijosano Pueyasojiniji niishirijiuhuaaj, nojuaja cutaraari Pueyaso Rupaa niishijia seetanujuanaa. Nojuajaari juhua tia camaru, cante tariucuacaanu shanohua casamiriacacuajani, quiarinio casamiriacajuhuaaj, na tiajiniaaco racatasano. Na panishacari, na camaruuri na racatasanojiniji na panishano rijia.

### *Jesu quishacari Nazaret tiacajinia*

*(Mr 6.1-6; Lc 4.16-30)*

<sup>53</sup> Jesu jaara puecaquiari miriqui pahuatanu, tiji quiaquiariuhuari. Canaari na nuhuajiriquiaani. <sup>54</sup> Canaari na maashijia tiacajinia tiuquiquiaariuhuani. Canaa tiuquijiosacari, canaari Pueyaso secojoja tiajinia tiuquiquiaarini. Jesuuri tii pueya niishitiojonu coteequiaari. Pueyari jiuujiatequiari na niishitijosano nojori tojishacari. Nojoriiri tama sequequiarijiaaja:

—¿Taa nio pueyano niishiya puerajaarani? ¿Tejenotejaara na cumaacani, cusosuhua na naatanijionurani? <sup>55</sup> Na shipininiocuaajaari suruhuatujiniji casaa shipinijiona quijia. Na nucuacuajaari María. Na tapueyocuacaari



Santiago, José, Simón, Judasno. <sup>56</sup> Na rimiatuhuari mariyata niya pa tajinia quiya. ¿Taa na niishiya pueraarini?

<sup>57</sup> Naaratej, pueyari na ruuretaquiaari saaja. Naa na tiacajinijinio pueya tojitiaaquishacari nojuajatej, Jesuuri nojori sequequiaari:

—Puetunu tiqiyocua pueyajanaari maninia tojitiaquiaa cutara Pueyaso sequenu panishano caminiujiunia. Saaja narta pueya tama na jiyajinijiniojuaarijia na tojitianu paniyaquiya, tama na tiajinijiniojuaaja pueyano.

<sup>58</sup> Naa nojori ruuretanuucua Jesutej, majaari puera na cumaacata na miiniu quiquiaari tii, nojori tiuyaquiniuucua nocua.

## 14

### *Herodes motesacari Tiuquinijiona Juan*

(Mr 6.14-29; Lc 9.7-9)

<sup>1</sup> Cuno quishacari, Galilea jiya jiyaniiija Herodesri pohuatasaaquiaari Jesu miishanojiniji na cumaacata. <sup>2</sup> Herodesri na seya sequequiaari Jesujiniji:

—¡Nojuacuajaari cua mosano Tiuquinijiona Juan! ¡Samiitiarohuacuaaqui! Naacuajitij, jiyanohua cumaaca jiitiaari, jiyajeneta casaa na miiniuria Pueyaso cumaacata.

<sup>3</sup> Herodesri naa sequequiaariti na monuucua Tiuquinijiona Juan. Nojuajaari naa miiquiaari Juantej: coteenu na quiatequiaariiri. Na mo-rojoquiaariiri cumayocua shipinishano jiyocuata. Na nuhuaji, na nujuatequiaari nujuatejojuajiniaari. Herodesri naa miiquiaari na juaaniutia Juantej, Juan nacasunuucua nojuaja, Herodes quiniuucua tarajanu Felipe niquiocuata. <sup>4</sup> Tiuquinijiona Juanri naa Herodes sequequiaari quiasano na quiyaquishacarijia:

—¡Quiaari Pueyaso tojijashijia! ¡Majaari maninia quia quiniuria Herodíasta! ¡Nojuacuajaari quia tarajanu Felipe niquiocua!

<sup>5</sup> Herodesri cunora Juan monu paniriquiaa juucua. Judiocuaca puereriquiaa saajaari. Judiocuacaari niishiquiaari cutara, Juanri seetanujuanaa Pueyaso sequenu panishano caminiujiunia quiquiaari.

<sup>6</sup> Tiuquinijiona Juan nujuasacarijia nujuatejojuajinia, Herodesri na rasaanu juucajinia queranacuquiaari na masuusano pueyata. Jiyacaritij, cuno maaji Herodías niyatuuri nianujuquiaari Herodes masuusano pueya niquiara. Jiyaniiija Herodesri jiyanohua na shuquiritiaquiaari. <sup>7</sup> Naaratej, Herodesri necanuru sequequiaari puetunu pueya niquiarajanaa:

—Sanaunaa, cua sequere casaa quia paniyani. Janiyacua quia niquitiore quia panishanoni. ¡Seetanujuanaa quia sequeyanijia! Majaari cua rupaa cua jatanu quiniutianiya. ¿Casaa quia paniniutianiyani?

<sup>8</sup> Jiyacaritij, niyacoo nucua Herodíasri neyatu rootaquiaari jiyasohuaja, casaa na masenutaniyani. Naaratej, niyacoori jiyaniiija Herodes sequesee:

—Cua quenunaa, cua niquitiore Tiuquinijiona Juan naca miacojuajinia.

<sup>9</sup> Jiyaniiija Herodesri taraajequee niyacoo sequesano na tojishacari. Naajaa, majaari na naata na rupaa jatanu quiquiaari, seetanujuanaa na sequenuucua na masuusano pueya niquiara. Naacuajitij, Herodesri na seya sequequiaari cuara niquitiosaarianoj. <sup>10</sup> Naaratej, na pueyano jiyarokuvaari nujuatejojuajiniaari, Tiuquinijiona Juan na nacatanura. <sup>11</sup> Na nuhuaji, Juan nacaari patasaaquiaarihua miacojuajinia. Niyacoo niquitiosaasuhuari. Niyacoori saniniuujia na nucuaacua na pataquiaari.

<sup>12</sup> Na nuhuaji, Tiuquinijiona Juan pueyari quiojoquiaari na quete na panura. Na jamotuquiaariiri. Na nuhuaji, nojoriiri nijioquiaari Jesu pohuatanuucua Tiuquinijiona Juanjiniji.

*Jesu mianuutesacari cinco mil pueya*  
(Mr 6.30-44; Lc 9.10-17; Jn 6.1-14)

<sup>13</sup> Jesu tojishacari Tiuquinijiona Juan tari mosaarucuaa, nojuajaari canaa jiyataquiaari botejinia tamaquiria, pueya quiyaquishaquiria. Pueya jaara niishiquiaari tee Jesu quiaareeni, queraatia pueyari cuno jiya tiacajiniji quiojoquiaari tiriarajuhuj. Nojoriiri na neteyotaquiaari nucuaco caminia shuriuquioco. Cuno pueyari canacuaji cutesee. <sup>14</sup> Naacuajitij, Jesu rosesacari botejiniji, jiyanohua queraatia pueya niquishii saajaari. Nojoricua taraajereeri. Cuno pueya patootasano cusosuhua naatanijioreeri. <sup>15</sup> Tariucua tenacari, canaa, Jesu saquiriojosano pueyani, canaari nocua niquiaarini. Canaari na sequereeni:

—Canaa Jiyaniijianaa, paa niya quiya pueya quiyaquishaquini. Paari nininiutianiyani. Juhuacarijia pueya quia sequere nojori cuaara quiojohuara tiacajinia, na miaquesocoriquiano nojori masenura.

<sup>16</sup> Jesuuri canaa sequeree saaja:

—¿Maatucua casaara quiojiyarohuani? Niaa mariqui nojori mianuutere saniya.

<sup>17</sup> Canaari Jesu sequereeni:

—Maja canaa jiitanu miaquesano. Niya quiya saajaari cinco pan, caapiqui sapitiaajanio.

<sup>18</sup> Jesuuri canaa sequeree:

—Miji nia patare.

<sup>19</sup> Jesuuri sequeree pueya cuaara cajitiuuria jiyasocujinia. Na nuhuaji, Jesuuri cuno pan pataree, sapitiaajanio. Jiyocuacaanu maureeri na Queecuara, miaquesanoocuara na secojonura. Na nuhuaji, Jesuuri pan neecasequiaari queraatiara. Canaa na niquitiojoreeri puetunu pueyajanaa canaa niquitiojosocoriquiano. <sup>20</sup> Puetunu pueyajanaari miaquenuquiaari. Maninia tooquioreeri. Nojori puecasacari miaquenu, canaari pan neecareratequiaariuhuani, sapitiaaja raquiquiano. Doce canaasatuuri mishinijiosaaquiaari na raacuata. <sup>21</sup> Jiyanohua queraatia pueyari miaquenuquiaari; cinco mil quiquiaari saa canuujua. Majaari maajipohua serojosaanu quiquiaari, naatujoorinio.

*Jesu rucuanesacari mohuaca caco*  
(Mr 6.45-52; Jn 6.16-21)

<sup>22</sup> Na nuhuaji, Jesuuri canaa na saquiriojosano pueya secootequiaari botejinia canaa tacatanura, canaa puetanuracuaa nojuaja caminia taquijiria. Jesuuri jiyacari pueya maanu sequeriquiaa nojori quiojonuhua. <sup>23</sup> Pueya jaara tari quiojoquiaariuhua, Jesuuri tuhananuucua tacaquiaari tamajaaja, na Que Pueyaso na secojonura. Jaara niniquiaari, Jesuuri tii quiriquiaa tamajaaja. <sup>24</sup> Canaari saniniuujia caminia jiuujiajinia tari jaaretariquiaacuani. Mohuacaari saaja canacuara cajiniuucuariquiaa, paratu piyarojosacari canacuara. <sup>25</sup> Juhuaquenu panishacari, Jesuuri canaa rupuesee mohuaca caco na rucuanenuta. <sup>26</sup> ¡Canaa niquishacari casaa mohuaca caco rucuaneyano, canaari jiyanohua shiriiquitiuriini! Canaari sariyocuatereeni.

—¡Yae! ¡Samaruruhua!

<sup>27</sup> Jesuuri ritia pocuaree. Canaa sequereeri:

—¡Nioojia nia cumaquiri! Janiyacuajanjia. Maja nia puerenu.

<sup>28</sup> Canaa tojishacari Jesu, Pedroori Jesu sequeree:

—¡Jaara seetanujuanaa quiajaniya quiri Jiyaniijianaa, cua sequere quiocua cua quianura mohuaca caco!

<sup>29</sup> Pedro sequereeri:

—Mijicuarajaj.

Pedroori ritia rosequiaari botejiniji. Mohuaca caco rucuanenu coteequiaariiri Jesuucua na quianura. <sup>30</sup> Na niquishacari paratu jiyanohua piyarojiyano, Pedroori puerequiaari. Na pueresacari, moo cariquimia tiuquiniu coteequiaariiri. Nacareeri:

—¡Jiyaniijianaa cua quiare!

<sup>31</sup> Jesuuri ritia Pedro juaashiquiajiniji quiaree. Na sequereeri:

—Pedronaa, majaqui puera quia tiuuniu cucua. ¿Casaara cua sequesanooquaji quia taacanuureeni?

<sup>32</sup> ¡Nojori jaara botejinia tacataquiaariuhua, paratuuri jiyacari pueyaje-quee! <sup>33</sup> Canaa niquishacari naa Jesu miishano na cumaacatatej, canaari Jesuucua mojuquetacoquiaarini. Canaari na sequereeni:

—¡Quiaaqui seetanujuanaa Pueyaso Niyanu!

*Jesu naatanijosacari cusosuhua Genesaret jiyajinia*  
(Mr 6.53-56)

<sup>34</sup> Canaa jaara caminia taquijiria niuutiaquiaarini, canaari Genesaret jiyajinia shiitiaseeni. <sup>35</sup> Genesaret pueya jaara niishiquiaari Jesu tiuquirii, nojoriiri puetunu na jiyajiniajanaa pueya numootequiaari, cuara patootasaaria cusosuhua Jesuucua. Naacuajitij, Jesuucua patootasaaquiaariiri puetunu cusosuhujanaa. <sup>36</sup> Pueyari Jesu sequetuquiaari:

—Nareja quia shanacure cusosuhua quiocua, nojori cuara quia tucuaque toque quiaara quenaaja, nojori naataconuhuara.

Jesuuri naa miirii. Puetunu na toque quianaajanaari naatacoquiaariuhua na cusonujiniji.

## 15

*Casaate sesa miitijia pueyanoni*  
(Mr 7.1-23)

<sup>1</sup> Na nuhuaji, Jerusalén tiacajininio pueyari canaacua tiuquiiioquiaari Jesuta pocoojonura. Nojoriiri quiquiaari Fariseocuaca, Moisés Naajioneejiniji niishitiojonaanio. Jesu sequetureeri:

<sup>2</sup> —Quia pueyari shuquitioojua miaquenuuquiaa. ¿Casaara nojori tojtiaaquiquiaa canaa niishitiojosano pa supuetanaajininiji? ¡Nojori cuara miiria taa pa supuetanaa miiquiaaricuaani!

<sup>3</sup> Jesuuri nojori nequesotaree saniniuujia:

—¿Niajanियariuhuj? ¿Casaara nia tojtiaaquiquiaa saniniuujia Pueyaso Rupaani, nia supuetanaa jiiitishano miiniu nia miiniuriani? <sup>4</sup> Pueyasocuajaari sequequiaari: “Quia que tojijia quia quiri, quia nucua tojijiano. Majaari nojori rerequetenu”. Naacuajitij, maninia pa cojuare pa queya. Pueyasoori sequequiaarijuhuaj: “Cuaara mosaaria cante na que sesacajani, na nucua sesacajano”. <sup>5</sup> Niaari saniniuujia sequequiaacujua, maniniacuajaari pueyano jaara na queya sequere: “Cua quena, cua nucuaana, janiyari Pueyasora niqutionutaniya cua casamini. Naacuajiti majaari cua naata nia naacunu cua jiiitiasano casamitia”. <sup>6</sup> Naa nia niishitiojosacari pueyatej, niaari pueya tarinitiya na queya nojori cartenura, naacuso nojori quiniuria. Naa nia tojishacari tama nia niishitiojosanojuaaja juhua nia supuetanaa nia miiniuriatej, niaari Pueyaso Rupaa jiyateya najuhuanara. <sup>7</sup> ¡Sapueno Pueyaso Rupaa tojtiajacanaa! Supuetana Isaíasquiiri maninia naajiotaquiaaricujaja niajanijajininiji, na caminiuujishacari nio rupaa Pueyasojiniji:



<sup>8</sup> “Nio pueyari saa na rupaataja cua maniniuhuaqueetaquiaa. Nojori jiuujiaari saniniuujia tucuacaanu quiya janiyajiniji. <sup>9</sup> Nojoriiri najuhuana rerejoquiaa na maniniuhuaqueetanura janiya. Nojori niishitiosanoori tama nojori niishishanojuaaja, maja cua rupaa”.

<sup>10</sup> Na nuhuaji, Jesuuri puetunu pueyajanaa sequeree:

—Miji, niya cua tojitiaseecuarajaj maninia nia niishiniuria. <sup>11</sup> Pa miasanoni, cunoori maja sesara na jiyatenu poojia. Pa rupaata pa pocuasano sesani, cuno cutaraari poojia sesojua.

<sup>12</sup> Jiyacaritij, canaa, Jesu saquiriojosano pueyani, canaari nocua catecanoquiaarini naa canaa sequenura nojuaja:

—Jiyaniiijanaa, ¿quiaate niishiya Fariseocuacaari juaaquioree naa quia sequesacaritij?

<sup>13</sup> Jesuuri canaa riucuarree:

—Naajaa. Cuaara juaaquiorea. Cuno pojoriiri juhua sesa jiyasocua, Sesaaca natasano cua Que cuhuariquiajina. Nojoriiri juhua sesa jiyasocua jayotasaanutaniya. <sup>14</sup> Seetanujuanaa Pueyaso niishiyashijiaca nojori quishacari, nojoriiri juhua cariyujuaru quiya. Narta cariyujuaru jaatucuyari. Cariyujuaru jaara narta cariyujuaru jaatucure juucua, nojoriiri mariyata raama totenutaniya.

<sup>15</sup> Pedroori Jesu sequeree:

—Jiyaniiijanaa, canaa quia niishitiojoreja casaa quia sequenu paniriquiaa quia pohuatasacari pa miasanojinijini.

<sup>16</sup> Pedro riucuarree:

—¿Niaateeri na niishiyaquiyajuhujaj? <sup>17</sup> ¿Majateeri nia niishiniu, pa mi-aquesano pa rupaataari pa seecojinia tiuquiya saaja? Na nuhuaji, pa marecuhuacuma tajimiaari. <sup>18</sup> Saniniuujia, pa rupaata pa pocuasano sesani, cunoori poojiajiniji tohuataa cutara. Naacuajitij, pueyanoori sesa quiya Pueyaso niqiuara, sesa casaa na pocuanuucua. <sup>19</sup> Pueyano jiuujiajina coretaari puetunu sesa niishiriojosanojuanaa: monu paniniu; na camishoo maajipohua numuetucunu paniniu; saaja numuetucunuucua jiaatianu; nohuasejonu paniniu; sapojonuta saquiriojotanu paniniu; sacuaraatia coriaacojonu paniniu. <sup>20</sup> Puetunu naa sesa pueya niishiriojosanojuanaa cutaraari pueyano sesojua. Saniniuujia, pueyano jaara miaquere shuquitiojua, naajaa. Cunoori maja na sesonu pueyano Pueyasora.

### *Taatu tiuushacari Jesuucua*

*(Mr 7.24-30)*

<sup>21</sup> Jesuuri Genesaret jiyajiniji quiaquiaari canaa na pueyata. Canaari quiojoquiaari tamonu taucuaca jiyajinarani. Cuno jiyajinia quiquiaariiri Tiro tiaca, Sidón tiacajuhujaj. <sup>22</sup> Canaa rucuanajosacari tii, cuno jiyajinijinio taatuuri Jesuucua niqiuari. Nojuajaari Cananeo pueyajinijinio maaji quiquiaari. Jesu nuhuaji nacariquiaari:

—¡Jiyaniiijanaa, cucua quia taraajere! ¡Pueyaso Jiyarosananaa, cucua quia taraajere quenaaja! Quiyatu samaru jiiitiaa. Jiyanohua taraatia na mi-iquiaari.

<sup>23</sup> Jesuuri maja na riucuanu quiquiaari. Sanaa canujuriquiaa saajaari. Naaratej, canaari Jesu catecanoquiaarini canaa sequenura nojuaja:

—¡Jiyaniiijanaa, na panishano quia miiri cuaara quiohuara! ¡Taajeta naca pa nuhuajini!

<sup>24</sup> Jesuuri canaa riucuarree:

—Janiyari saaja Israel pueyacua jiyarosaaquiaarini. Nojoriiri juhua borregohua tashuquiono. Nojoriicua taraajeyanijia.

<sup>25</sup> Cuno maajiiri Jesu sequesano tojirii. Naajaa, Jesu cariquimiaaji mojoque-taseeri. Na sequereeri:

—¡Jiyaniijianaa, cua naacutare!

<sup>26</sup> Jesuuri na riucuaaree:

—Majaari maninia pa jaariutianura pa niquiohua miaquesano, sare niquiohua niquitiosocoriquiano saniniuujia.

<sup>27</sup> Maajiiri saaja na sequeree:

—Maniniacuaja quia sequesano Jiyaniijianaa. Naajaa, sareyaniyojuacua-jaari miaquesano shiriya miaquenuuquiaa, na camaru totinijosano na miaquejajiniji.

<sup>28</sup> Jesuuri maaji sequeree:

—Maniniacuaja quia sequesano maajiniaa. Quiaaqui jiyanoehua cucua tiuya. Cuaara quiiriaqui taa quia paniyacuajani.

Jiyacaritij, neyatuuri naataquiaariuhua.

### *Jesu naatanijosacari queraatia cusosuhua*

<sup>29</sup> Canaari Jesuta cuniquiji quiaquiaariuhua. Canaari Galilea caminia shuriuquioco tajimiaani. Canaari tuhananuucua tacatamaani. Jesu-  
uri tii cajishii. <sup>30</sup> Queraatia pueyari nocua nijioquiaari. Nojoriiri quera-  
aatia cusosuhua niojotaquiaari Jesu shuriucua, nojori tiacajiniji nojori  
patootasano. Cusosuhuari quiquiaari shipiiniquiujiuniaa pueya, cariy-  
ojuarujurinio, tiquianucujuhua, sesarunecatohuanio, socua queraatia  
tamaatia cusosuhuanio. Jesuuri nojori naatanijioquiaari puetunujuanaa.

<sup>31</sup> Pueyari jiuujiatequiaari nojori niquishacari tiquianucua pocoyano, shipi-  
iniquiujiuniaa rucuaneyano maninia, cariyjuarujuri niquishacari manini-  
ajuhua. Naajuhua, sesarunecatohuari maninia numatucuaraca quiquiaar-  
iuhua. Naa pueya niquishacari Jesu miishanotej, nojoriiri Pueyaso manini-  
uhuaqueetaree. Sequetureeri:

—¡Jiyanoehua maninia Israel pueya Pueyaso!

### *Jesu mianuutesacari cuatro mil pueya*

*(Mr 8.1-10)*

<sup>32</sup> Na nuhuaji, Jesuuri canaa na saquiriojosano pueya sequeree:

—Miji pueyanaa. Nio pueyacua taraajeyanijia. Nojoriiri tari jiuujianaraca  
juuca camueenujiya niya pata. Majaari nojori jiitiatunu quenaaja casaa na  
miaquetusocoriquiano. Majaari cua jiyaronu paniniu miaqueyojua nojori,  
nojori mariqui na miaajenuta cusojoniyarohua nucuacoori.

<sup>33</sup> Canaari Jesu nequesotareeni:

—¿Canaatucua tee riuriatare queraatia miaquesano nio queraatia  
pueyarani? Niya, majaari pueya quiniu quenaaja.

<sup>34</sup> Jesuuri canaa nequesotaree:

—¿Taa pan nia jiitiaani?

Canaari na riucuaareeni:

—Canaa saaja siete pan jiitiaani, secaja sapitiaajaniyojuanio.

<sup>35</sup> Jesuuri pueya sequeree na cajitiuniuria. <sup>36</sup> Na nuhuaji, Jesuuri cuno  
siete pan pataree, sapitiaajanio. Jesu jaara na Que secojoquiaari co-  
teenu miaquesanoocua, na nuhuaji na neecasequiaariiri canaa niqui-  
tioonura pueya. <sup>37</sup> ¡Puetunu pueyajanaari maninia miaquenuuquiaari!  
Tooquioreeri. ¡Canaari miaquesano cureenota mishinijioquiaari siete  
canaasatuni! <sup>38</sup> Queraatia pueyari na miaquenuuquiaari. ¡Saaja canu-  
uri serojosaaquiaari cuatro mil pueya! Majaari maajipohua serojosaanu  
quiquiaari, naatujoorinio. <sup>39</sup> Na nuhuaji, Jesuuri pueya sequequiaari nojori

quiojonuhuara. Na nuhuaji, Jesuuri canaa jiyataquiaari botejinia Magdala jiyajiniara.

## 16

*Fariseocuaca, Saduceocuaca niqiniu panishacari Jesu miishano Pueyaso cumaacata*

*(Mr 8.11-13; Lc 12.54-56)*

<sup>1</sup> Fariseocuacaari Saduceocuacata Jesuucua nijioquiaari nojori saniniuuniuria nojuaja. Nojoriiri Jesu sequequiaari:

—Casaa quia miiri quia cumaacata canaa niquishocoriquiano, canaa niishiniuria quiaate seetanujuanaa Pueyaso jiyarosano.

<sup>2</sup> Jesuuri nojori sequeree saaja:

—Jiya jaara naatuuca quiri pananu tiuquishacari, niaari sequequiaa: “Maninia juucaqui tariqui quiniutianiya”. <sup>3</sup> Naajuhuj, pananu jaara tariquicuaji jama, niqutioocua jaara niquishaarejuhuaj, niaari sequequiaa: “Maruqui niniutianiya”. Niaari naa niishiquiaa taamueca juucate quiniutianiyan ni jiya nia niquishacari. ¡Mosanucuaanaa! ¿Casaara saniniuujia nia niishiyaquiya casaa Pueyaso niishitiojiya juucua niajaniyani? Nojuacua-jaari juucua na cumaacata na miishano miiquiaa nia niquiara najuhuanaj.

<sup>4</sup> Jesuuri nojori niquiara sequereejuhuj:

—Nio sesoriquia pueya, Pueyaso tojitiaashijiacani, nojoriiri Pueyaso cumaacata cua miishano niqiniu paniya juucua. Majaari nojori niq-uitishaanu quiniutianiya socua. Nojoriiri saaja nio niquiriyatu Pueyaso cumaacata miishocoriquiano niqiniutianiya: janiyari miishaanutaniyani taa supuetana Jonás miishaaquiaraaricuaani.

Naa Jesu sequenu nuhuajitij, nojori tarinitiaqueeri. Canaari quiaqueeni.

*Jesu numootesacari na pueya Fariseocuaca niishitiojosanoocuaji*

*(Mr 8.14-21)*

<sup>5</sup> Canaa niuutiasacari caminia taquijiria, canaari canaa coseyaca panu niyajetaquiaari canaa sasocoriquianoni. <sup>6</sup> Jiyacaritij, Jesuuri canaa sequeree:

—Niishijia nia quiri. Tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

<sup>7</sup> Cunora, canaari tama sequetooreejaanijia:

—¿Casaa na sequeyani? Pan pa paaquiniuucua naa pa sequeya jiyoteeri.

<sup>8</sup> Jesu niishishacari naa canaa sequesantej, canaa sequereeri:

—¿Majateeri juhuanajuaja cucua nia tiuuniu maninia? ¿Casaara tama nia pocoojiyajaaja panjinijini? <sup>9</sup> ¿Majateeri juhuanajuaja nia niishiniu tari cua miishanojiniji? ¿Niaateeri tari niyajetarucuaa taa canaasatu mishajate curecanuni, cinco mil canuu jaara miaquenuucanu cinco panjinijitij?

<sup>10</sup> Niaa jiyoteeri niyajetarucuaajuhuj taa canaasatu mishajate curecanuni, cuatro mil canuu jaara miaquenuucanu siete panjinijitij. <sup>11</sup> ¿Casaara nia jiyaniirini janiya miaquesanojiniji sequeriquiaani? Maja cua sequenu panjiniji. Nia sequeriquiaanijia tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

<sup>12</sup> Naa na sequesacaritij, canaari jiyacari niishiuiini majaari Jesu sequenu quiriquiaa pan poreetajajiniji. Canaari shusha niishiuiini Jesuuri miriqui canaa numooteriquiaa tama canaa cuaqueyajaaja canaa cojuanura Fariseocuaca niishitiojosanoocuaji, Saduceocuaca niishitiojosanoocuajinio.

*Pedro sequesacari Jesuuri seetanujuanaa Pueyaso Jiyarosano*

*(Mr 8.27-30; Lc 9.18-21)*

<sup>13</sup> Canaa tiuquiiijosacari Cesareya Filipino tiaca jiyajinia, Jesuuri canaa nequesotaree:

—¿Taa pueya sequequiaa janiyajinijini, cantena janiyani?

<sup>14</sup> Canaari Jesu riucuaareni:

—Noojiaqueya pueyari sequequiaa, quiaanaari Tiuquinijona Juan. Herodes motesano naasucuaanaari samiitiarohuacuaa. Tamasacaari sequequiaacujua, quiaanaari Elías, tariucuacaanu pueyara Pueyaso sequesano caminiujiunia. Tamasacaari saniniuujia quia sequequiaacujua, quiaanaari supuetana Jeremías, pueyara Pueyaso sequesano caminiujiuniajuhuaj, tamonu Pueyaso sequesano caminiujiunia soj.

<sup>15</sup> Jesuuri canaa nequesotarohua socua:

¿Niajanियariuhuaaj? ¿Taa nia sequeyanijia? ¿Cante janiyani?

<sup>16</sup> Simón Pedroori na riucuaaree:

—¡Quiaacuajaari Pueyaso Jiyarosano! Quiaari Cristo, Pueyaso Niyanu.

<sup>17</sup> Jesuuri Simón Pedro sequerohua:

—Quiaacuajaari Pueyaso shuquiritiasano pueyano, Jonás niyanunaa. Jiyocuacaanu Quijia cua Quecuajaari quia niishitirii cante janiyani. Janiyajiniji quia niishishanoori maja pueya niishitishano quiajaniya. <sup>18</sup> Janiyari socua sequenu paniya quiajaniyani Pedronaa. Quia sesaari Pedro. Nioori pueyano rupaaajinia sequeya “saajia”. Naatej, taa saajiacuaani jataniyaquishoo, quiaari cumaatia nujuataja quiniutianiya, seetanujuanaa cucua quia tiuushacari, quia niishishacari janiyari Pueyaso Niyanuni. Naajuhuaaj, puetunu pueyajanaa cante cucua tiuuriini taa cucua quia tiuyacuaani, janiyari nojori jiyatenutaniya cua muerasurani. Puetunu cua saquiriojosano pueyajanaari cumaatia nujuatunutaniya, nojori niishishacari janiyari Pueyaso Niyanuni. Naacuajitij, nojoriiri juhua puereetuuca saajiaacua tiasano quiniutianiya. Puetunu cua muerasujuanaari juhua cua tia quiniutianiya, cua quiquio nojori quishacari. Sesaacaari maja na naata cua tia pojoretanu quiniutianiya. Majaari na naata na tarinitiniu quenaaja janiya, cua tiasacari cua quiquiora. <sup>19</sup> Naajuhuaaj Pedronaa, quiaari juhua cua quiquio tiootiu riatataja jiiitiana quiniutianiya. Naacuajitij, quiaari coteenu pohuatantaniya pueya niquiara janiyajiniji, nojori tiuuniuria cucua, juhua Pueyasocua nojori tiuquiniuria na muerasura nojori quiniuria. Naajuhuaaj, quiaa jaara rootare taate Pueyaso muerasu naata miiniu maniniani, Pueyasoori sequenutaniya cuara naa quiiriatej. Naajuhuaaj, quiaa jaara casaa tenujure, maja naa pueya miiniuriatej, Pueyasoori naa sequenutaniyajuhuaaj.

<sup>20</sup> Na nuhuaji, Jesuuri canaa na pueya rootaree maja canaa pohuatanura tamasa niquiara nojuacuajaari Pueyaso Niyanu.

*Jesu numootesacari na pueya, nojuajaari mosaanutaniya  
(Mr 8.31–9.1; Lc 9.22-27)*

<sup>21</sup> Jiyacaritij, Jesuuri canaa pohuatanu coteequiaari taa nojuaja miishaanutaniyani. Canaa sequereeri:

—Janiyari Jerusalén tiacajinia quiariquianoni. Parta Judiocuaca jiyaniijianucuaari tii cua miiniutianiya naquiya jiyanoahua. Pueyacuara secojonaa jiyaniijianucuaari nojori rupuenutaniya naa cua paracaashaanurajuhuaaj, mariyata tariucuacaanu Moisés Naajioneejiniji niishitiojonaanio. Naacuajitij janiyari mosaanutaniyani. Jiuujianaraca juucajinia, janiyari samiitianutaniuhuani.

<sup>22</sup> Naa Jesu sequesacaritij, Pedroori Jesu jaatucuree tamocora na naca-sunura tamajaaja. Jiyanoahua Jesu sequereeri:

—¡Maja naa pocuanutej! ¡Pueyaso cuara cojuara quiajaniya maja naa quia miishaanuratej!

<sup>23</sup> Jesuuri saaja Pedro nijiniaquequee. Na sequereeri:

—¡Niiquiji quia quiaare Satanásnaa! ¡Quia sanaajere! Sesaacaari naa quia pocuateree Pedronaa. Quia sequesanoori maja Pueyasojiniji. Quia niishiriojosanoori juhua mijiria pueya niishiriojosano saaja. Naa quia sequesacaritij, quiaari cua Que sequesanoocuaaji cua tarinitiniu paniya juucua.

<sup>24</sup> Na nuhuaji, Jesuuri canaa na pueya sequequiaari:

—Pueya jaara cua tojjiara quiniu paniya, nojori cuaara carteera tama nojori panishanojuaaja. Na nuhuaji cutara, cuaara miiria cua panishano, tama na cuaqueya na panitianutajaaja cucuara. <sup>25</sup> Naatej, pueyano jaara tama na cuaqueyajaaja shuquiritiniu paniya mijiria, cuno pueyanoori na nuhuaji jiyanhua taraatia quiniutianiya. Saniniuujia, cante tama na cuaqueyajaaja panitiaa cucuara mijiriani, cuno pueyanoori na nuhuaji pueyaracaanu shuquiriaatia quiniutianiya cutara. <sup>26</sup> Naajuhuj, pueyano jaara masere puetunu nio jiya casamijanaa, na casamiiri najuhuaana quiniutianiya nera, na camaru jaara jataaare mani quiquojinia na shaajesacari. Nojuajaari maja na naata Pueyaso jiyanoonitiniu tama na cuaqueyajaaja, naajaa, nojuaja jaara puetunu na casamijanaa niqutiore Pueyaso, Pueyaso samiitianinihuara nojuaja.

<sup>27</sup> 'Janiyacuaajaari jiyanhua shacantuuca quijiara quiniutianiyani, cua Que jiyatesacari janiya Jiyaniijiarajanaa. Na nuhuaji, janiyari mijiria niniutianiuhua jiyocuacaanuji cua Que seyatani, puetunu pueyajanaa cua nequesoreenura. Jiyacaritij, pueyari maninia casaa niqutiosaanutaniya maninia nojori miiniuucua. Pueyaso tojtiaashijiacaari saniniuujia naquiya miishaanutaniya, sesa nojori miiniuucua. <sup>28</sup> Seetanujuanaa nia sequeyanijia, noojiaqueya nijaniyajinijinio niya cuata quiyani, majaari nia shaajenu quiniutianiya juhuanajuaja, niaa cuaara niquirijiaatijia Pueyaso cumaaca cucua tiuquiyano, cucua tiuujiaa jiiitariquiano.

## 17

### *Jesu jatasacari shacantuucara* (Mr 9.2-13; Lc 9.28-36)

<sup>1</sup> Seis juuca nuhuaji, Jesuuri nio pojori jiyataquiaari jiyaconaja tuhuanuucua. Nojoriiri quiquiaari Pedro, Santiago, Santiago tarajanu Juannio. Jiyareta tama nojorijiaarijia quiaquiaari. <sup>2</sup> Jesuuri tii tamaatiara jataquiaari nojori niqiiara. Na jiquicoori jiyanhua shacantuucara jataquee, juhua pananu. Na toqueeri mariyata jiyanhua cohuajara jataquiaarijuhuaj, juhua cuhuatana. <sup>3</sup> Jiyacaritij, nojoriiri caapiqui supuetanaa niquirii, Moisés, Elíasnio. Jesuta pocoojoriquiaari. <sup>4</sup> Cunora, Pedroori Jesu sequereeri:

—¡Jiyaniijianaa, canaqui namitia niya quiyani! Quiaa jaara paniri, canaa quiocuaji suhuoronutaniyani, Moisésrajuhuaj, Elíasranio.

<sup>5</sup> Pedro pocuasacarijia, shacantuuca najacaari nojori mishiQuiomaa. Najacajiniji, rupaari tojishaaquiaari naa sequeyano:

—¡Niioori cua Niyanuniyojua, cua shuquiritiasano! ¡Saaja nojuaja nia tojitiare!

<sup>6</sup> Naa nojori tojishacari Pueyaso pocuaanotej, nojoriiri jacamatuquiaari jiyanhua na puerenuta. <sup>7</sup> Jesuuri nojoriicua nimiaa. Nojori quiaseeri na juaashiquiata. Nojori sequereeri:

—Nia saneecuaturohua. Maja puerenu.

<sup>8</sup> Nojori jaara niquinijionuuquiaari, majaari tari na niqutiuniu quiquiaari cuno supuetanaa. Saaja Jesuuri quiriquiaa.

9 Nojori rosetasacariuhua tuhuananujiniji, Jesuuri naa nojori rootaquiaari:

—¡Majaari nia pohuatanu pueya niquiara tuhuananujiniji nia niquishano! Niocua na pohuatarohua cutara janiya jaara samiitiarohuani.

<sup>10</sup> Na pueyari Jesu nequesotaree:

—¿Casaara tariucuacaanu Pueyaso Rupaajiniji niishitiojonaa sequequiaacuararini, supuetana Elíasnaari quiocuaijij miriria niniutianihua coteenu, pueya na jiyanoootootenuhuara necohuata?

<sup>11</sup> Jesuuri riucuaaree:

—Elíasri seetanujuanaa coteenu niriquiano quiquiaari, puetunu pueya jiuujiaajanaa na jeenucuanura. <sup>12</sup> Janiya cutaraari nia sequeyani, Elíascuajaari tari niquiaari. Majaari pueya niishiniu quiquiaari cante nojuajani. Naaratej, pueyari taraatia na miiquiaari taa nojori paniquiaaricujani. Nojoriiri naa cua miiniutianiya naquiyajuhuj.

<sup>13</sup> Naa Jesu pohuatasacari Elíasjinijitij, na pueyari niishiquii nojuajaari Tiuquiniijona Juanjiniji pohuatariquiaa miriqui.

*Jesu naatanishacari samaruraca caya samijia*  
(Mr 9.14-29; Lc 9.37-43)

<sup>14</sup> Jesu jaara tuhuananujiniji tiuquiiioquiaari canaacua, tamonu pueyanoori nocua catecanoquiaari canaata quiniaa maanujiniji. Jesuucuaara mojuquetaseeri na sequenura neyanuucua. <sup>15</sup> Jesu sequereeri:

—¡Jiyaniijianaa, cua niyanuucua quia taraajere quenaaja! ¡Nojuajaari pueyaracaanu cusojuquiaa! Na jiiitasano cusuunuri na taquiriocatequiaa. Na cusojosacari miiquiaa naquiyari. Naacujitij, sequeyarucua manijinia tiquiaari, moojiniano. <sup>16</sup> Janiyari quia pueyacua na tiuquitiasee na naataniniuria juucua. Nojoriiri maja na naata na naataniniu.

<sup>17</sup> Jesuuri cunora sequeree:

—¡Niaaqui Pueyasocua tiuyashijiaca, na tojiyashijiacanio! ¿Janiyateeri nia rejeretanutaniya pueyaracaanuni? ¿Taacari nia niishiniutianiya Pueyaso tamajaajarini? Miji nia jaatucuma cuno mueya.

<sup>18</sup> Mueya tiuquishacari nocua, Jesuuri samaru juaarii. ¡Na tohuatereeri! Jiyacaritij, caya samijiaari maninia quiquihua.

<sup>19</sup> Na nuhuaji, tamajaaja canaa quishacari Jesuta, canaari na nequesotareeni:

—Jiyaniijianaa, ¿casaara maja canaa naata cuno samaru tohuatenu quiriquiaani?

<sup>20</sup> Jesuuri canaa riucuaaree:

—Maja puera maninia nia tiuuniu juhuanajuaja Pueyasocua. Seetanujuanaa nia sequeyanijia, nia tiuuniu Pueyasocua jaara quiriquia shiitianiyojua juhua mostaza jajau quenaaja, jiyacari cutaraari nia naata miiniu puetunu nia panishanojuanaa. Naacujitij, nio tuhuananu maara nia tojiri, niaa jaara na sequere: “Tuhuananunaa, niiquiji quia quiaare tamaqui”.

<sup>21</sup> Saniniuujia, jiyano samarutej, na naata tohuatanishano cutara saaja Pueyaso nia secojosacari nia miaqueyaquiniutia.

*Jesu pacutesacari pohuatanu nojuajaari mosaanutaniya*  
(Mr 9.30-32; Lc 9.43-45)

<sup>22</sup> Tamonu juuca Jesu rucoojosacari canaa na pueyata Galilea jiyajinia, Jesuuri canaa sequeree:

—Janiyari sapojonuta niqutiosaanutaniya taucuaani. <sup>23</sup> Nojoriiri cua monutaniya. Jiuujianaraca juucajia, janiyari samiitianutaniuhua.

Naa Jesu sequesacari canatej, canaari jiyanohua taraajequiaarini.



*Cumaneeca niqutiosacari Pueyaso Secojoua tiaacuara*

<sup>24</sup> Canaa jaara tiuquiiioquiaari Capernaum tiacajinia Jesutani, tamonu pueyanoori Pedroocua catecanoquiaari. Nojuajaari cumaneeca masejona quiquiaari Pueyaso Secojoua tiaacuara. Cuno pueyanoori Pedro nequesotaree:

—¿Majate nia niishitiojona niqutionu na cumaneeca Pueyaso Secojoua tiaacuara, taa pa jiyaniijianucua sequequiaaricujani?

<sup>25</sup> Pedroori na riucuaaree:

—Na niqutioquiaanocujaja.

Na nuhuaji, Pedro tiuquishacariuhua na tiajinia, Jesuuri na nequesotaree:

—¿Taa quia sequeyani Simónnaa? Mijiria jiyaniijianucua jaara cumaneeca paniri, ¿teyano pueyajiniji cumaneeca maseshiyani? ¿Tama na pueyajinijitii, taucuacajiniji soj?

<sup>26</sup> Pedroori Jesu riucuaaree:

—Taucuaca niqutiojoteshiyanocujaja nojori jiya jiiitiana sequesano.

Jesuuri na sequeree:

—Naacuaaquinatejaj. Naacujitij, tama na pueyajaarijia maja na niqutionu. Pueyaso Secojoua tiacujajaari cua Que tia. Naaratej, maja cumaati Neyanu sequesaanu na niqutionura na cumaneeca. <sup>27</sup> Naajaa, pa niqutiore juhuari nojori sequesano, paa mariqui nojori juaatiriiri. Nocujaja quia rioosee caminiajinia. Quiocua coteenu quia jatasano sapitiaaja rupaama niquiri. Quiaari tii cumanee riuriatanutaniya. Quiocua cuno cumanee niqutiosuhua nojori, quiria, quiarajuhujaj.

## 18

*Cante jiyaniijajanaa cutarani*

(Mr 9.33-37; Lc 9.46-48)

<sup>1</sup> Jiyacaritij, canaa, Jesu saquiriojosano pueyani, canaari Jesuucua catecanoquiaarini naa canaa nequesotanura nojuaja:

—Jiyaniijajanaa, canaa quia sequeretoj, puetunu quia pueyajinijiniojuanaani, ¿cante jiyaniijajanaa cutarani?

<sup>2</sup> Jesuuri naatujua piirii. Canaa tajinia na nuuatereeri.

<sup>3</sup> Na nuhuaji, Jesuuri canaa sequeree:

—Nia niyajetare socua tojishano pueyano nia quiniu paniniu tamasacajiniji. Seetanujanaa nia sequeyanijia, nia jataniyaquishacari tama nia cuaqueyajaaja juhua nio naatujoori nia quiniuria, majaari Pueyaso muerasura nia quiniu quiniutianiya quenaaja. <sup>4</sup> Naacujitij, cante tama na cuaqueyajaaja jiyateya pueya shocoteyashijia na quiniuria juhua naatujuaani, nojuajaari socua jiyaniijajanaa quiniutianiya cutara narta Pueyaso muerasujinijinio. <sup>5</sup> Naajuhujaj, cante naatujua maseja maninia na paniniucua janiyani, nojuajaari cua maseyajuhujaj.

*Paari cocuaatia miyani sesa pa miishacari*

(Mr 9.42-48; Lc 17.1-2)

<sup>6</sup> 'Sesa cutaraari, sesa nia miitiniuria cucua tiuujia naatujua. Socua maninia cutaraari sesa miitiriquiano pueyanora, nojuaja jaara juhuacarijia caminia queronijinia jartasaare puereetujajau saajia na riquiajiniji morotasano. <sup>7</sup> ¡Mijiria quiniaari jiyanoehua cocuaatia miiquiaa sesa na miitishacari tamasaca! Mijiria, pueyari pueyaracaanu sesa miitishaaquiaajuhuanajaj. ¡Taraatia quiniutianiya cutaraari noo pueyanora, cante sesa miitirii tamonuni!

<sup>8</sup> Nio miriqui cua niishitiojosano nia tojiri: nia juaashiquia, nia niohuaca jaara sesa miitiya niajaniya, nia rashiquiarenoj, tucuacaanu jatasocoriquiano. Naa nia miiri niaa mariqui mani quiquiojinia jatsaareeri puetunu nia cuaqueyatajanaa. Socua maninia cutaraari juaashiquiaaju, niohuacaaju nia tiuquitianura Pueyaso quiquiojinia jiyocuacaanu. Niaari tii quiniutianiya shuquiriaatia pueyaracaanu. <sup>9</sup> Naajuhuj, nia namijia jaara nia miitiri sesa, nia jiatere. Tucuacaanu nia jatarenoj. Jiyanohua socua maninia cutaraari niaara, jiyocuacaanu nia tiuquiniuria namijijiu, maja nia jataaanura mani quiquiojinia, saniitiosocoriquiano puetunu nia namijiaatajanaa.

Naa Jesu niishitiojosacari miriquitij, nojuajaari canaa niishitiojoriquiaa canaa tarinitianura jiyanohua canaa miiniu panishano, cuno jaara sesa miijara jiyateriquia canaa.

*Jesu pahuatasano miriqui borrego tashucuanojiniji*  
(Lc 15.3-7)

<sup>10</sup> Jesuuri naa canaa niishitiojorohua socua:

—Tama nia cuaqueyajaaja nia cojuare nia soyaquiniuucujaji tamonu muerasuniyujua, juhua nio mueyaja. Cua tojitiare. Pueyasocuaajaari na seya seerataquiaa nojori cojuanura muerasu. Cuno na seyari pueyaracaanu cua Que Pueyaso jiquioco shootiaquiaa. Naajuhuj, Pueyasocuaajaari na muerasuranocua niishiriojoquiaa. <sup>11</sup> Naaratej, janiyari mijiria niquiaarini tashucuanu pueya cua pajenura, nojori cua jaariuutianura Sesaaca.

<sup>12</sup> ¿Taa nia sequeyani pueyanaa? Tamonu pueyano jaara cien borregohua jiitiare, niquiriyatujua jaara tashucuaru tapueyocucujajiniji, ¿maja-teeri na camaru na borregohua cureeno tiujianu rupaquijia, tashucuanu na pajenura? Taaquiriirinij. <sup>13</sup> Jaara na riuriatare, seetanujuanaa socua jiyanohua cuno borrego tashucuanu shuquiritiaari tamasaca na borregohujajiniji. <sup>14</sup> Naajuhuj, jiyocuacaanu quijia nia Queeri maja na paniniu que-naaja niquiriyatujua nio muerasujinijinio tashucuanura puetunurajanaa.

*Taa pa jiyanoya pa tarajanuni*  
(Lc 17.3)

<sup>15</sup> 'Quarta Pueyaso pueyano jaara sesa miiri quiajaniya, nocua quia quiaare na nacasunura tamajaaja nia quishacari. Nojuaja jaara tojiri quiajaniya, maniniacuajaari. Niaari maninia rupuetoojuacara quiniutianihuacuahuaj. <sup>16</sup> Nojuaja jaara tojiaquiri quiajaniya saniniuujia, nocua quia quiaare socua tamonu pueyanota, caapiqui pueyata soj. Nojori niquiara quia nacasure cuno sesa miinia. Niaa jaara naa miiritij, naa quiniutianiyari taa tariucuaacaanu Pueyaso Rupaajinia niishitiojosaaquiaaricujajani: "Querajaa pueya jaara mariyata pahuatare na niquishano, na tojishanojuhuj, cunoori maja sapojonu". Naacuajitij, nojori saquiriojotasanoori seetanujua-naa quiniutianiya. <sup>17</sup> Cuno sesa quia miinia jaara nia tojinu paniyaquiya saaja, puetunu niarta Pueyaso pueya niquiarajanaa quia pahuatare sesa na miishano. Cuno pueyano jaara tojinu paniyaquiri puetunu Pueyaso pueyajanaa, nojuaja cuara quiria juhua Pueyaso niishiyashijia niaara. Naacuajitij, majaari socua nia rupuenunoj.

<sup>18</sup> 'Seetanujuanaa nia sequeyanijia, cana nia jiyanoyaquirii mijiriani, na tojinu paniyaquishacari niajaniya, cunoori jiyanoyaquishano quiniutianiya jiyocuacaanu cua Que Pueyasorajuhuj. Naajuhuj, cana nia jiyanooriij mijiria na tojishacari niajaniyani, cunoori jiyanooshano quiniutianiya jiyocuacaanu cua Que Pueyasorajuhuj.

<sup>19</sup> 'Naajuhuaaj, janiyari seetanujuanaa sequeya niajaniyani. Caapiqui niajanijajinijinio jaara mariyata niishiriojore nia panishanoocuara nia sec-  
 ojonura Pueyaso, cua Queeri nia tojiniutianiya. Nojuajaari jiyocuacaanu  
 naa maninia miiniutianiya niaara, taa nia secojosacari nia sequereecua-  
 janoj. <sup>20</sup> Querajaa niajanijajinijinio jaara rerejore, cucua tiuujiaca nia  
 quishacari, janiyari tii niaata quiyajaaniuhuaaj. Naacujitij, cua Queeri nia  
 secojosano tojiniutianiya cutara.

<sup>21</sup> Jiyacaritij, Pedroori Jesu nequesotasee:

—Jiyaniijianaa, tamonu pueyano jaara sesa miiniu pacutejore janiya,  
 ¿janiyatucua pueyaracaanu na jiyanoorini? ¿Majateeri tariucuaaja, janiya jaara  
 na jiyanoori siete sesa na miishanojiniji janiyani?

<sup>22</sup> Jesuuri Pedro riucuaaree:

—Maja naatej Pedronaa. Maja quia tarinitianu na jiyanooniu. Pueyara-  
 caanu sesa na miishacari quiajaniya, pueyaracaanu quia jiyanoori quiarta  
 pueyano. Majaari quia serojonu sesa na miishano quiajaniya. Pueyara-  
 caanu quia jiyanoori saaja.

### *Jesu pohuatasano jiyanoashijia serujiniji*

<sup>23</sup> 'Naaratej, cua tojiri pueyanaa. Nia pohuatareera nia niishiniuria taa  
 Pueyaso paniya jiyanoootiojuaca na muerasu nia quiniuriani. Tamonu jiya  
 jiyaniijiaari nera poonijionaa pueya sequequiaari nojori cuaara tari niq-  
 uitiojora nojuaja na cumaneeca, nojori na niqutiojosanojiniji na casami.  
<sup>24</sup> Noojiaqueya nera poonijionaa pueya jaara tari nojori pasano casamijiniji  
 niqutiojoriquiacuaa tama nojori cumaneecajinijijiaaja, jiyacaritij, tamonu-  
 uri tiuquinishaarejhuaj. Nojuajaari jiyanohua queraatia casami masejo-  
 quiaari na jiyaniijajiniji, queraatia millón cumaneeca. <sup>25</sup> Nojuajaari maja  
 na jiitianu quiquiaari na cumaneeca, na jiyaniijia na niqutionuhuaa. Na  
 jiyaniijiaari cunora na pueya sequeree: “Tamonu camarnu nia niqutiore  
 nio cua seru, necocuataja, cua cumaneecara, necohuajuhuaaj, puetunu na  
 casamijianaanio. Naacujitij, na cuentaari puequenutaniya”. <sup>26</sup> Cuno na  
 seru tojishacari naa na jiyaniijia sequesantej, nocuara jacamaquiaariiri.  
 Na jiyaniijia sequereeri: “¡Cua tarinitiare quenaaja cua jiyaniijianaa! ¡Ru-  
 paquijiaara cua tarinitiarejaara! Janiyacuajaari quia cumaneeca niqutionu-  
 taniya puetunujuanaani”. <sup>27</sup> Na jiyaniijiaari nocua taraajeree. ¡Na cartero-  
 hua puetunujuanaari! Naa na jiyanooriiri, nocua na taraajenuucua.

<sup>28</sup> 'Cuno seru tohuatasacari jiyaniijia tiajiniji, narta seruta naacunee-  
 tooreeri. Cuno narta seruuri tarijia masequiaari shiitianiyojua casami cuno  
 jiyanooshano serujiniji. Secaja cumaneecaari quiquiaari na cuenta. Naajaa,  
 cuno jiyanooshano seruuri narta seru quiaaree. Cumaatia na riquiajinia  
 na miniriiri. Na sequereeri: “¡Ritia cua niqutiore cumaneeca, tarijia quia  
 masesano janiyajiniji!” <sup>29</sup> Narta seruuri na riquiajinia mininia cariquimiaji  
 mojuquetaree. Na sequereeri: “¡Cua tarinitiarecuaraja quenaaja! ¡Janiy-  
 acuajaari quia cumaneeca quia niqutionutaniyani!” <sup>30</sup> Majaari na sashiniu  
 paniniu quiquiaari. Saaja na nujuatequiaari nujuatejojuajiniaari cuaara  
 na cumaneeca na niqutiorejaatijia. <sup>31</sup> Narta seya niquishacari naa cuno  
 jiyanooshano seru miishanotej, nojoriiri jiyanohua taraajequiaari. Nojoriiri  
 jiyaniijiaacua quiojoquiaari puetunu sesa narta seru miishanojuanaa nojori  
 pohuatanura. <sup>32</sup> Naaratej, jiyaniijiaari tamonu na seru jiyaroree cuno  
 jiyanooshano seru riniuucua. Na tiuquishacari, jiyaniijiaari na juaarii. Na  
 sequereeri: “¡Quiaaqui jiyanohua sesajuhuanajaj! Quia sequesacari janiya,  
 janiyari quia jiyanooriicuaani, maja quia naata niqutionu quishacari quia

cumaneeca. <sup>33</sup> ¿Majateeri quia naata quiriquiaa taraajenu quiarta seruu-cua, taa cua taraajeree quiocuacuaani?” <sup>34</sup> Jiyaniijaari jiyanoehua juaarii. Cunora, cuno sesa miiija seru jiyarotareeri nujuatejojuajinia na nujuatesaanura. Sequereajaariuhuaaj cuaara naquiya miishaaria tii, cuaara puetunujuanaa na cumaneeca niqutiorejaatijia, casami na pasanojiniji.

<sup>35</sup> 'Nia Que Pueyasoori naa miiniutianiya nijaniyajuhuaaj, niaa jaara seetanujuanaa jiyanoyaquiri niarta Pueyaso muerasu.

## 19

### *Jesu niishitiojosano maja pa niquiocua pa cartenura* (Mr 10.1-12; Lc 16.18)

<sup>1</sup> Jesu jaara naa pohuatanu puecaquiaaritij, canaa na pueyata quiaquiaari Galilea jiyajiniijiiri. Canaari Judea jiya shuriucua tiuquishii Jordán moo taquijiriani. <sup>2</sup> Jiyanoehua queraatia pueyari Jesu nuhuajiyaree. Quiniqui canaa quishacari, Jesuuri cusosuhua naatanijioree.

<sup>3</sup> Jiyacaritij, noojiaqueya Fariseocuacajiniinioori Jesuucua nijioquiaari sesa na pocuatenura Jesu juucua nocuara nojori tonujunura. Naaratej, nojoriiri Jesu nequesotaree:

—¿Maniniate pa cartenura pa niquiocua, jaara pa juaatiri?

<sup>4</sup> Jesuuri nojori riucuaaree:

—¿Majate nia serojonu quiquiaacuaja Pueyaso Rupaajinia? Coteenujuanaa Pueyaso shipinishacari pueyano, Pueyasoori shipiniquiaari caya, maajinio.

<sup>5</sup> Naaratej, nojori shipininiiaari sequequiaari: “Caya cuaara tiujiaara na que, na nucuanio, necocuata na quiniuria. Nojoriiri juhua niquiriyatu pueyanora quiniutianiya na camitioosacari”. <sup>6</sup> Naaratej, caya, maaji jaara camitioore, majaari tari na quiniu caapiqui pueyano. Juhua niquiriyatu pueyanojuaari quiquii. Naacuajitij, majaari maninia Pueyaso rupuetotesano rupartanura.

<sup>7</sup> Nojoriiri Jesu sequeree:

—Jaara naa quiriritij, ¿casaara supuetana Moisés rootaquiaaricuaraarini caya cuaara naajionee niqutiorea necocua, na cartenu panishacari?

<sup>8</sup> Jesuuri nojori riucuaaree:

—Moiséscaajaari niishiquiaari niaari puera cumajiuujiaaca. Naaratej Moisésri nia tarinitiaquiaari nia niquiocua nia cartenura. Coteenujuanaa, Pueyaso jaara shipiniquiaari caya, maajinio, majaari naa na quiniu quiquiaari. <sup>9</sup> Cua tojitiare pueyanaa. Janiyari nia sequeya cutarani. Cante necocua carteree najuhuanani, tamonu maajitia na caminiuria, coteenu necocua jaara tamonu cayata quiyaquiri, neyacaari jiyanoehua sesa miya Pueyaso niquiara. Jaara naa miiritij, Pueyasora, nojuajaari sesoriquia pueyano. Nojuacuajaari juhua pueyano, cante narta pueyano niquiocua numuetucujuani. Naajuhuaaj, cante cartesano maaji camiyani, naa sesa miyajaariuhuaaj.

<sup>10</sup> Canaa, Jesu saquiriojosano pueyani, canaa tojishacari naa Jesu sequesantej, canaari na sequereeni:

—Jaara naa quiriritij taa quia sequeriquiaacuajani, maninia naasucuaari maja mashaja caminiuria. ¿Naatejaaratej?

<sup>11</sup> Jesuuri canaa riucuaaree:

—Maja na naata puetunu pueyajanaa nio cua niishitiojosano tojiniu. Saaja noojiaqueya pueya cutaraari na tojiniutianiya, noo pojori canapuate jiyocuacaanuji cumaaca niqutiosaareeni na tojiniuria. <sup>12</sup> Naajuhuaaj, noojiaqueya canuuri maja na naata caminiu, riyacajajaaju nojori quishacari.

Nojoriiri naa rasanøjuhuanajaj. Tamasaca canuuri maja na caminiu sanini-uujia, jiatejosano nojori riyacajajau quishacari. Tamasacaari maja na caminiujuhuaj tama nojori paniyaquishacarijiaaja, saaja Pueyasora nojori poonijionu panishacari. Cante na naata naa miiniuni, cuaara naa miiriatej.

*Naatujooriicuaa Jesu secojosacari Pueyaso*  
(Mr 10.13-16; Lc 18.15-17)

<sup>13</sup> Na nuhuaji, pueyari Jesuucua nitiaquiaari necohua juucua, Jesu nianura nojoriicua na juaashiquia, nocuara na secojonura Pueyaso. Canaa, Jesu saquiriojosano pueyani, canaari saaja nojori tenujuree canaa juaaniutiani.

<sup>14</sup> Jesuuri saniniuujia canaa sequeree:

—iMaja nojori tenujunu! Nia tarinitiare naatujoori cuaara cucua ni-jioora. Nia tojiri, canapuate seetanujuanaa juhua nio naatujoorini, nojoriiri Pueyaso muerasu quiriquiano.

<sup>15</sup> Na nuhuaji, Jesuuri na juaashiquia niaquiaari naatujooriicua, nojori-icuaara na secojonura, Pueyaso miiniuria maninia nojori. Na nuhuaji, Jesuuri quiniquiji quiaquiaariuhua.

*Jiyanohua casamiriaca mashaja pocoojosacari Jesuta*  
(Mr 10.17-31; Lc 18.18-30)

<sup>16</sup> Tamonu mashajaari Jesuucua niquiaari. Na nequesotaseeri:

—Niishitiojonanaa. Quiaari maninia pueyano. Cua sequere, ¿taa cua miiniutianiyani maninia cua quiniuria Pueyaso niquiara, pueyaracaanu quijiara cua quiniuriani?

<sup>17</sup> Jesuuri na riucuaaree:

—¿Casaara quia sequeya janiya maninia pueyanotani? Saaja niquiriyatu-juaari maninia quiija cutara. Nojuacuajaari Pueyaso. Naajaa, quiaa jaara maninia quiniuucua jiaatiaa Pueyaso pueyano quia quiniuria, quia tojiri tariucuaaanu Moisés Rootasano Pueyasojiniji.

<sup>18</sup> Jesu riucuaareeri:

—¿Teyano rootasanoteni?

Jesuuri na sequeree:

—Maja quia monu. Maja quiarta pueyano niquiucua quia numuetucunu. Maja quia nohuasenu. Maja quia saquiriojotanu tamonuucua quia sapo-jonuta. <sup>19</sup> Quia que, quia nucua tojijia quia quiriquia. Maja nojori quia rerequetenu. Mariyata quiarta pueyano quia paniri taa quia paniyacuaa tama quia cuaqueyajaajani.

<sup>20</sup> Mashajaari Jesu sequeree:

—Janiyacuaajaari puetunjuanaa nio tojijia quiquiaari cua naatujuajini-jini. ¿Casaa cua miiniutianiya socuani?

<sup>21</sup> Jesuuri na sequeree:

—Quiaa jaara seetanujuanaa maninia quiniuucua jiaatiaa Pueyaso niquiara, quia quiaarohua quia tiajinia. Quia niqutiojore puetunu quia casamijianaa cumaneecara. Na nuhuaji, casamijiuniucua quia niqutiojore nareja quia cumaneeca. Naacuajitij, quiaari queraatia casami jitianutaniya jiyocuacaanu. Na nuhuaji, quiocua nimiohua cutara, cua tojijia quia quiniuria.

<sup>22</sup> Na tojishacari naa Jesu sequesantej, mashajaari taraatia quiaarohua jiyanohua casamiriaca na quiniuucua.

<sup>23</sup> Jiyacaritij, Jesuuri canaa sequeree:

—Seetanujuanaa nia sequyanijia, jiyanohua jiyajenetaari pueyano to-jiniuria Pueyaso, na pueyano na quiniuria, cuno pueyano jaara puera jiyanohua casamiriaca quiri. <sup>24</sup> Pueyanaa, ¿camelloteeri na naata cusupuetaja

cuhuoco tamajiria tajiniu? Maja na naata. Cua tojitiare. ¡Socua jiyanoehua jiyajenetaari casamiriaca pueyanora, Pueyaso pueyanora na jatanishaa-nura!

<sup>25</sup> Canaa tojishacari naa Jesu sequesantej, canaari jiyanoehua jiuuji-ateereeni. Canaari na nequesotareeni:

—¿Canteeri Pueyaso pueyanora jiyatesaanutaniya socuanitioj?

<sup>26</sup> Jesuuri canaa shootiaree tacuriitia. Canaa sequereeri:

—Pueyari maja na naata tama na cuaqueyajaaja jiyatenu Pueyaso muerasu nojori quiniuria. Pueyaso cutaraari na naata na miiniu. Nojuajaari cumaacaraca puetunu na panishanojuanaa na miiniuria.

<sup>27</sup> Pedroori Jesu sequereeri:

—¿Canaarijataj? Canaari puetunu canaa casamijanaa tiujiaquiaarini canaa rupenura quiajaniya. ¿Casaa canaa masenutaniyariniija?

<sup>28</sup> Jesuuri canaa riucuaereeri:

—Seetanujuanaa nia sequeyanijia. Nio jiya maniniushitishacariuhua, janiyari cajiniutianiyani jiyaniija cajitiujinia puetunu cua Quejinijishanohua cua cumacatajanaa. Jiyacaritij cua pueyanaa, niaari mariyata cajitijiosaanutaniya doce jiyaniija cajitiucujinia. Niaari pa supuetana Israel doce niqiuohuacuajinio caneno pueya nequesoreena quiniutianiya.

<sup>29</sup> Cua pueya tojiniuria janiya, nojiaqueya nojorijiniiniori na tia tiujanutaniya, tapueyocuaca, na rimiatahua, na que, na nucua, necohua, na cuhuariquiano. Canapuate naa tiujiaquiaa na tojiniuria janiyani, cuno pojori Pueyasojinijia socua jiyanoehua queraatia masenutaniya nojori tiujiasanojinijia. Nojori pueyaracaanu shuquiriaatia quijia quiniutianiyajuhua, shaajeyashijia. <sup>30</sup> Saniniuujia, queraatia tojishano pueyari Pueyaso shocotasano quiniutianiya na tojitiaashijia nojori quiniucua. Naajuhua, mijiria, queraatia pueyari juhua shocotasano pueya quia Pueyaso niishiyashijia pueyara. Cuno pojori jiyaniushano najuhua quijiacani, nojori Pueyaso shuquiritiasano pueya quiniutianiya cutara.

## 20

### *Jesu pohuatasano cuhuariquiajina poonitijosano pueyajinijia*

<sup>1</sup> Socua cua tojiri taa Pueyaso miiquiaa na pueyani. Nojuajaari na pueya miiquiaa taa tamonu cuhuariquia camaru miiquiaari na poonitijosano pueyacuaani. Cuno cuhuariquia camaruuri quiaquiaari tariquiicuaaji pueya na pajenura na uva cuhuariquiajina nojori poonijionura. <sup>2</sup> Cuhuariquia camaruuri pueyata pocoojoquiaari taa cumaneeca na niqutionutaniya cuno juuca nojori poonijosanojinijini. Poonijionaa pueyari na sequereeri: “Maniniacuajaari taa quia sequereecuajani”. Na nuhuaji, cuno pueya jiyaroreeri uva cuhuariquiajina nojori poonijionura. <sup>3</sup> Pananu tacasacari, cuhuariquia camaruuri tohuataquiaariuhua na tiajinijia. Jiyacaritij, socua tamasa pueya niqishiiri juhuajaniya quiyano tiaca jiuujiajina curotasano cajitiucujinia. <sup>4</sup> Cuhuariquia camaruuri nojori sequereeri: “Nia quiaarejuhua, cua uva cuhuariquiajina nia poonijionura. Janiyacua cumaneeca nia niqitiorohua nia poonijionu samini”. <sup>5</sup> Naacuajitij, nojori quiojoquiaari cuno cuhuariquiajina poonijionurajuhua. Na camaruuri socua tohuataquiaariuhua panacari. Socua tamasa pueya niqishiiri juhuajaniya quiyano tiaca jiuujiajina curotasano cajitiucujinia. Nojori sequereeriuhua nera nojori poonijionura cuno juuca. Pananu mueecosacari, socua pueya riuriataquiaariiri. Nojori jiyaroreeri poonijionucuaariuhua. <sup>6</sup> Tariucua pananu piriushacari, na camaruuri socua



tohuataquiaariuhua. Socua tamasaca pueya niqushiiri tiaca jiuujiajinia curotasano cajitiucujinia najuhuana quiyano. Nojori sequereeri: “¿Casaara nia quiojiyaquiyaree poonijionuucuaní? ¿Casaa nia miya niyani? Niaa mariqui poonijiore”. <sup>7</sup> Nojoriiri na riucaaree: “¿Canaatucua taa poonijioreni, canaa jaara pajeshiyaquiri poonijionurani?” Cuhuariquia camaruuri nojori sequeree: “Nia quiaarequi cua cuhuariquiajinia nia poonijionura. Janiyacua nia poonijionu sami cumaneeca nia niqutiorohuani”. <sup>8</sup> Pananu tiuquishacari, cuhuariquia camaruuri na casami cojuana sequeree: “Cua poonitijosano pueya quia piiri miji, nojori rerejonura. Na nuhuaji, cua sequesano cumaneeca quia niqutiojore puetunu nojorijianaa taa cua sequeree coteenujuanaa quiria poonijionaacuajani. Majaari rimiajata nojori niqutiojonu. Coteenu quia niqutiojore tariucua pananu piriushacari cua jiyaramiquishano. Naa quia niqutiojore puetunujuanaa. Quiocua naa tucuatere niqutiojonu noo pojoriujiuhaj, canapuate tariquicuaji coteeree poonijionuacuajani”.

<sup>9</sup> Jiyacaritij, tariucua pananu piriushacari poonitijosano pueyari ni-jiomaa. Puetunu nojorijianaari cumaneeca niqutiosaaree taa cuhuariquia camaru coteenujuanaa tariquicuaji poonijiona pueya sequequiaaricua-jani. Majaari rimiajata nojori niqutiosaanu quiquiaari cumaneeca, nojori poonijionu sami. <sup>10</sup> Na nuhuaji, coteenujuanaa poonijiona pueyari sequesaaquiaari na cumaneeca nojori masenura. Nojoriiri jiyaniquiaari nojori naasucuaari socua cumaneeca niqutiosaanutaniya rupaquijia poonitijosano pueyajiniji. Nojoriiri saaja niqutiosaaree taa cuhuariquia camaru sequeree nojori cuno juucacuajani. <sup>11</sup> Nojori masesacari na cumaneeca, nojoriiri cuhuariquia camaruta juaaquioree. <sup>12</sup> Na sequetereeri: “Cuno pueyari saaja rupaquijia poonijioree. Quiaari nojori niqutioree taa quia niqutioree canaacuaani. Canaari pananucari cateree cutarani, pueyara-caanu canaa poonijosacari”. <sup>13</sup> Cuhuariquia camaruuri tamonu nojorijinijinio sequeree saaja: “Sanajanaa, maja sesa cua miiniu quirii quia-janiya. ¿Majateeri quia niishiniu, paa jaara tariquicuaji pocoojoriquiaatej, janiyari juhuacarijia quia sequereeni janiyari naa cumaneeca quia niqutitionutaniyani? Quiaari cua riucaaree: ‘Maniniacuaja’. <sup>14</sup> Naaratej, quia jiyataarohua quia cumaneeca quia tiajiniohua. Janiyacuajaari naa niqutionu paniriquiaa tariucua pananu piriushacari cua poonitijosano pueyani, taa cua niqutioree quiajanuyacuani. <sup>15</sup> ¿Majateeri cua naata miiniu tama cua panishanojuaaja tama cua cumaneecatajaaja? ¿Quiaateeri socua cumaneecaacua jiaatiajara quiqui, capora cua quiniuucua?”

<sup>16</sup> Na nuhuaji, Jesuuri naa sequequiaarijiuhaj, na pohuatasanojiniji na niishitiojonura:

—Naa quiniutianiyari taa cua sequeriquiaacuajani: canapuate nuhuajishanaani, nojoriiri coteetanaa quiniutianiya. Naajuhaj, cante coteetanaani, nojoriiri nuhuajishanaa quiniutianiya saniniuujia. Queraatia masuusano pueyari quiya. Saniniuujia, secajaari saquiriojosano quiya nojorijinijinio.

*Jesu camishacariuhua pohuatanu taa na mosaanutaniyani*  
(Mr 10.32-34; Lc 18.31-34)

<sup>17</sup> Tari Jesu quiasacari Jerusalén tiacajiniara, Jesuuri canaa na doce saquiriojosano pueya piirii tamocora nuu shuriuquicora, tamajaaja canaata na pocoojonura. Canaa sequereeri:

<sup>18</sup> —Cua tojiri. Niaacuajaari niquiya paa tari Jerusalén tiacajiniara tacataani. Janiyari tii niqutiosaanutaniya pueyacuara secojonaa jiyani-ijianucuaní, Moisés Naajioneejiniji niishitiojonaanio. Nojoriiri cucuara

saquiriojotanutaniya nojori sapojonuta cua mosaanura. <sup>19</sup> Nojoriiri cua niquitionutaniya taucuaca. Cuno pojoriiri cua rerequetenutaniya. Cua majacutunutaniyari. Na nuhuaji, niyacutesanojinia cua teetetunutaniyari tii cua cusonura. Jiuujianaraca juucajinia janiyari macujiniji samiitianutaniuhuni.

*Santiago, Juan nucua sequesacari Jesu, maninia na miiniuria necohua*  
(Mr 10.35-45)

<sup>20</sup> Jiyacaritij, Zebedeo niquiocuaari Jesuucua catecanoquiaari necohuata. Jesuucua mojoquetaseeri Jesu na sequenura nera na miiniuria na panishano. <sup>21</sup> Jesuuri na sequeree:

—¿Casaa quia paniyani?

Jesu riucuaareeri:

—Quiaa jaara Jiyaniijia jiyatesaare, quiocua cua niquiohua cajitijiore quia shuriucua, Santiago, Juannio. Tamonu cuaara cajiiria quia miaquetajara, tamonu quia muenecara, quia naacunaa nojori quiniuria, juhua jiyaniijianucujuhuj.

<sup>22</sup> Jesuuri Santiago sequeree, Juannio:

—Majaari nia niishiniu casaa nia maseyani. ¿Nia naatateeri rejeretanu naquiya miiniu taa cua miishaanutaniyacuaani?

Nojoriiri saaja Jesu riucuaaree:

—Taaquiriirinij. Canaa naatacuaaquinatejaj.

<sup>23</sup> Jesuuri nojori sequeree:

—Seetanujuanaa, niaari naquiya miishaanutaniya taa cua miishaanutaniyacuaani. Janiya cutaraari maja cua naata sequenu niajaniya, cante cua miaquetajara cajiniutianiyani, cua muenecarano, Jiyaniijia cua quishacari. Saaja cua Que cutaraari tari na saquiriojosano pueya sequenutaniya cua shuriucua nojori cajitiuniuria, teyano pojoriicuaaji na jeenucuaquiaaricuaani.

<sup>24</sup> Canaa, narta saquiriojosano pueyani, canaari Juan juaariini, Santiagnio, canaa tojishacari nojori masesano juucua. <sup>25</sup> Jesuuri saniniuujia canaa sequeree:

—Miji pueyanaa. Niya cua tojitiasee. Niaacuajaari niishiya, mijiria jiyaniijianucuaari na pueya poonitijioquiaa juhua tama na seyajaaja. Mijiria camarucuaari taraatia miiquiaa na pueya, nojori na miitishacari puetunu na panishanojuanaa. <sup>26</sup> Niajaniya saniniuujia, majaari naa nia quiniu quiniutaniya. Naacuajitij, cante tojishano pueyano quiniu panija niajanijajinijioni, cuno cuaara quiiria narta Pueyaso pueya cumaquinia. <sup>27</sup> Cante nia jiyaniijia quiniu paniyani, cuno cuaara quiiria juhua nia seru, maninia na miiniuria niajaniya, naatej, taa cua miiquiaa niajanijacuaani. <sup>28</sup> Janiya cutaraari Jiyaniijiani. Naajaa, majaari mijiria cua ninu quiquiaari pueya cua poonitijionura quiria, shuquiriaatia cua quiniuria tamajaaja. Niquiaari cutaranijia pueya cua naacunura, tama janiyajaaja mosaanura pueya niti, queraatia pueyacuaji cua ritianura Sesaaca.

*Jesu jeecasacari caapiqui cariojuaru namijiaa*  
(Mr 10.46-52; Lc 18.35-43)

<sup>29</sup> Jesuta canaa quiasacari Jericó tiacajiniji, jyanohua queraatia pueyari Jesu nuhuajiriquiaa. <sup>30</sup> Jiyacaritij, caapiqui cariojuaruuri nuu shuucuaaji cajitiriquiaa. Nojori niishishacari Jesuuri nojori tajiriquiaa, nojoriiri nacanu coteequiaari:

—¡Jiyaniijianaa! ¡Canaacua quia taraajere! Quiaacuajaari Pueyaso Jiyarosano, Jiyaniijia quia quiniuria pa supuetanaa jiyaniijia David niti.

<sup>31</sup> Pueyari nojori juaarii nojori sanaajetanura juucua. Nojoriiri saaja jiyacatequee nacanura:

—¡Jiyaniijianaa, canaacua quia taraajere, Pueyaso Jiyarosanonaa!

<sup>32</sup> Jesuuri socua nujuasee. Nojori sequereeri:

—¡Miji! ¿Casaa nia paniya cua miiniuria niajanियarani?

<sup>33</sup> Jesu riucatureeri:

—¡Jiyaniijianaa, canaa namijiaa quia jecare!

<sup>34</sup> Jesuuri nojoriicua taraajeree. Nojori namijiaa quiareeri. ¡Nojoriiri niquijiacara quiqiii! Na nuhuaji, Jesuucua sacuaaree canaataari.

## 21

### *Jesu tiuquishacari Jerusalén tiacajinia*

*(Mr 11.1-11; Lc 19.28-40; Jn 12.12-19)*

<sup>1</sup> Canaa quiojosacari, canaari socua tiuquiiijioosee Betfagé tiacajiniani, Olivo nacuhua tuhuananu shuriucua. Cuniqiii, majaari puera tucuaaanu quiquiaari Jerusalén tiacajiniara. Jiyacaritij, Jesuuri caapiqui canaa na pueyajinijinio sequequiaari:

<sup>2</sup> —Cuno tiacajinia nia quiaare, noj pocuaji niquishiyatej. Niaari tii riuriatanutaniya niqiuojuaraca burro morotasano. Niocua na samaacartasee. Niocua miji na jaatucuyarohuanoj, necojuataja. <sup>3</sup> Pueya jaara nia tenujunu paniri nocuaji, niocua na sequere: “Jiyaniijia na paniya. Ritia na tacatonutaniuhuacujaja”.

<sup>4</sup> Naa tohuateequiaariiri tariucuacaanu Pueyaso sequesano caminiujiunia sequesano, nojuaja jaara naa naajiotaquiaari Jerusalén tiacajinia quiniaa pueyara:

<sup>5</sup> “Sión tiacajinia quiniaa pueya nia sequere: ‘¡Nia niquiri! Nia Jiyaniijiaari burrojinia niaacua niya. Maninia pueyanoori, juayashijia. Burro nijinia cajiyano, necojuaacuanio’ ”.

<sup>6</sup> Jiyacaritij, cuarta Jesu pueyari quiaquiaari. Nojoriiri naa miiquiaari taa Jesu sequequiaari nojoricuajani. <sup>7</sup> Nocua jaatucutuquiaariuhua burroori, necojuataja. Na nuhuaji, Jesu cajijiaara, canaari canaa tucuaque toqueya niojoquiaari burro nijiniani, necojua nijinianio. Na nuhuaji, Jesuuri na nijinia cajirii. <sup>8</sup> Jiyanhua queraatia pueyari tii quiiriquiaa. Nojoriiri na tucuaque toqueya muevoquiaari nucuaco Jesuucujaji. Tamasacaari jaamasucua piyotaquiaari Jesuucujaji niojotasocoriquiano nucuaco, nuu niquishaanura shanhua, juhua cutara jiyaniijiaacuaji maniniushitishano. <sup>9</sup> Jesu puetanaa, mariyata na nuhuaji nijionajuhuj, nojoriiri naa coteequiaari nacojonura: “¡Pueyanaa, nioori pocuaji Tacuna! ¡Nojuacuajaari pa Jiyaniijia, pa supuetanaa jiyaniijia David niti! ¡Cuaara quiiria shuquiriaatia pa Pueyaso jiyarosano! ¡Jiyanhua maniniaari pa Pueyaso! ¡Cuaara shuquiritasano quiiria!”

<sup>10</sup> Jesu tiuquishacari Jerusalén tiacajinia, puetunu tii quiniaa pueyajanaari jiuujiatecoquiaari. Sequetureeri:

—¿Cantejaara cunoni, tiuquiyani?

<sup>11</sup> Jesuta tiuquiiijionaari nojori riucuaaree:

—Nojuacuajaari Jesu, Pueyaso sequenu panishano caminiujiunia, Nazaret tiacajinijinio pueyano, Galilea jiyajinijinio.

### *Jesu jaacasacari seya niqutiojonaa Pueyaso Secojoua tiacariji*

*(Mr 11.15-19; Lc 19.45-48; Jn 2.13-22)*

<sup>12</sup> Na nuhuaji, Jesuuri Pueyaso Secojoua tiacari matacajinia tiuquiquiaari. Tii pueya niquishiiiri seya niqutiojiyano. Jesuuri puetunu nojorijianaa

tohuatanijioree. Cumaneeca tacatojuuaca juhuacutucua caponeetareeri, tee pueya niqutiojoriquiaa taucua cumaneeca, Pueyaso Secojoua tiajinia niqutiojosocoriquiano cumaneecaracuajani. Mococoonu niqutiojonaa cajitiucua caponeetareejaariuhaj, tee mococoonu niqutiojosaariquiaacua-jani Pueyasocucara catijasocoriquiano. <sup>13</sup> Jesuuri nojori sequere:

—Pueyaso sequesano cuajaari naa naajiotasaaquiaari tarijia:

“Cua quiquoori sesojosaanutaniya Pueyaso Secojoua tia”.

¡Niaari saniniuujia na jiyatecanu nohuasenuujuaca quiquiora!

<sup>14</sup> Secojoua tiajinia na quishacarijia, cariojuarujuri pueya, mariyata shipiiniquiujiunaa pueyari nocua nijioquiaari. Jesuuri nojori naatani-jioree. <sup>15</sup> Pueyacuara secojonaa jiyaniijianucuaari Moisés Naajioneejiniji niishitiojonaata Jesu shootiariquiaa cusosuhua naatanijiyano. Jiyacaritij, naatujoori Secojoua tiajinia naa nacooriaquiaa Jesujiniji: “¡Pa supuetanaa jiyaniijia David niqiuohuacuajinio supueno pueyano! ¡Nojuajaari pa Jiyani-ijia!” Canaa Judiocuaca jiyaniijianucua niquishacari naa Jesu miishanotej, mariyata nojori tojishacari naatujoori, nojoriiri juaaquioree. <sup>16</sup> Nojoriiri Jesu nequesotaree:

—¿Quiaate naatujoori tojiya casaa nojori sequeyani? ¡Nojoriiri jiyaniya quiaari Pueyaso Jiyarosano!

Jesuuri nojori riucuaaree:

—¡Taaquiririnij! Na tojiyacujaniijia. Maniniacuajaari nojori sequesano. ¿Majateeri nia serojonu quiquiaacuaja tariucuacaanu Pueyaso Rupaajinia naa sequesano te j:

“Quiaari naatujoori niishitirii conaajanio, seetanujuanaa nojori manini-uhuaqueetanura quia Jiyarosano”?

<sup>17</sup> Naa nojori na sequenu nuhajitij, Jesuuri nojori tiujiaquee. Jerusalén tiacajiniji quiaqueeri canaata Betania tiacajinia. Canaari tii maqueseeni.

### *Jesu sesacasacari higo naana, muetuhuo na quiniuucua*

*(Mr 11.12-14, 20-26)*

<sup>18</sup> Tariquicuaji, Jesuuri Jerusalén tiacajiniara tacateriquiohua canaa na saquiriojosano pueyata. Jesuuri miaajeriquiaa. <sup>19</sup> Higo naana niquiriiri nuu shuriucua nujuaano. Nocua canujiyareeri. Shaanoori quiriquiaa, saa na jaamasucuaaja. Cunora, Jesuuri naana sequere:

—Majaari socua quia jajau sanishaanu quiniutianiya.

¡Naanaari ritia sorequee! <sup>20</sup> Naa canaa niquishacaritij, canaari jiuuji-atereni. Canaari Jesu nequesotareeni:

—¿Taateni? ¿Casaara higo naana sorequee ritiani?

<sup>21</sup> Jesuuri canaa riucuaaree:

—Seetanujuanaa nia sequeyanijia, niaa jaara Pueyasocua tiuujiaa quiri nioojia nia niqijioteyaquiniutia nocuaji, niaa maara socua cutara miishano miiri, socua jiyajeneta cua miishanojiniji. Naacuajitij, niaa maara nia sequesano niquiri niaa jaara nio tuhuananu sequere: “Quia jaataare shoniniacu caminiajinia”. <sup>22</sup> Puetunujuanaa nia masesano nia secojosacari Pueyaso, niaa jaara seetanujuanaa nocua tiuuri, niaari nia masesano masenutaniya.

### *Judiocuaca jiyaniijianucua nequesoresacari Jesu, cante na jiyaronani*

*(Mr 11.27-33; Lc 20.1-8)*

<sup>23</sup> Jesuuri Pueyaso Secojoua tiajinia tiuquiquiaari. Tii pueya niishitiojoriquiaari. Jiyacaritij, canaa Judiocuaca jiyaniijianucuaari nocua cate-canoquiaari. Nojoriiri pueyacuara secojonaa jiyaniijianucua quiquiaari, canaa Judiocuaca camarucuanio. Nojoriiri Jesu nequesotaree:

—¿Canteeri quiajaniyani, naa quia miiniuriatej? ¿Canteeri quia jiyatecanu juhua canaa jiyaniijia quia quiniuriani?

<sup>24</sup> Jesuuri nojori sequeree saniniuujia:

—Janiyari nia nequesotanutaniya saniniunijia. Niaa jaara cua riucua, janiyacua nia sequerohua saniniunijia cante cua jiyaroquiaari naa cua miiniuriani. <sup>25</sup> Naacuaajitij, cua riucuaure coteenu. ¿Cante Tiuquinijiona Juan jiyaroquiaari pueya na tiuquinijionurani? ¿Pueyasotee? ¿Tama pueyajaaja soj?

Jiyacaritij, tama nojoriijaarijia juayonuutunu coteequiaari jiyasohuaja. Tama sequetooreejaarijia:

—Paa jaara na riucuaeni: “Pueyaso na jiyaroquiaari”, pa sequerucua: “¿Naatee? ¿Casaara na niishitiojosanoocua nia tiuyaquiuanucuaarini?”

<sup>26</sup> Saniniuujia, paa jaara sequereni: “Nojuajaari nareja pueya jiyarosano quiquiaari”, ¡puereeta quiniutianiyari pajaniyara! Paacuaajaari niishiyani puetunu pueyajanaari sequequiaa Tiuquinijiona Juanna seetanujuanaa Pueyaso sequesano caminiuujia quiquiaari.

<sup>27</sup> Naaratej canaa Judiocuaca jiyaniijianucuaari Jesu riucuaere:

—Maja canaa niishiniu canariquitijia na jiyaroquiaaritijaj.

Jesuuri nojori sequeree:

—Janiyajuhuj, majaari cua sequenu quiniutianiya niajaniya cante cua Jiyaronani, naa cua miiniuriatej.

### *Jesu pohuatasano pueyano niquiohuajiniji*

<sup>28</sup> Jesuuri naa nojori sequerohuacuhuj:

—¡Cua tojitiare! Tamonu pueyanoori caapiqui niyanuraca quiquiaari. Nojuajaari jiyapueranu jiyaroree: “Quiyanunaa, quiria quia poonijiosee uva cuhuariquiajinia quiarijia”. <sup>29</sup> Neyanuuri saaja na riucuaere: “Maja cua quianu paniniu”. Na nuhuaji, niishiriojorohuari. Quiaqueeri. Poonijioseeri. <sup>30</sup> Na queeri naa na nuhuajishana sequerejuhuaj. Neyanuuri na riucuaere: “Maniniacuaja, cua quenea. Janiya quianutaniyani”. Na nuhuaji, majaari na quianu quiquiaari saaja. <sup>31</sup> ¿Taa nia sequeyani pueyanaa? ¿Teyano cuno caapiqui necohuajinijiniote na que tojijia quiquiaarini?

Nojoriiri Jesu riucuaere:

—Na jiyapueranucuaaja.

Naaratej, Jesuuri nojori sequeree:

—Seetanujuanaa nia sequeyanijia. Cumaneece masejona pa pueyajiniji Roma tiacajinia quijia jiyaniijiarani, mariyata paanatujurinio, cuno nia soosano pueyari nia shocotanutaniya Pueyaso muerasura nojori quiniuria. <sup>32</sup> Cua tojitiare casaara naa cua sequeree niajaniyani. Tiuquinijiona Juanri niquiaari na niishitiojonura juucua niajaniya, maninia nia quiniuria Pueyaso niquiara. Majaari nia tiuuniu quiquianu nocua. Niaari saaja na tojiyaquiuanu. Cumaneece masejona nia soosano pueya cutaraari nocua tiuquianu, paanatujurinio. Nojoriiri na tojitiajara quiquianu. Niaacuajaari na niquiquianu taa cuno sesa miijiaca pueya maninia pueyara jatacanuni. ¡Niajanijataj, majaari nia tacatonu quiquianu nioojia sesa nia quiniujiniji! Niaari saaja Tiuquinijiona Juancua tiuyashijaca quiquianu.

### *Jesu niishitiojosano cuhuariquia cojuanaa sesa miijiacajiniji*

(Mr 12.1-12; Lc 20.9-19)

<sup>33</sup> Socua tamonu cua pohuatasano nia tojiri. Tamonu pueyanoori cuhuariquiajinia uva natoocuaari. Maninia matacoquiaari puetunu na shuriuquiocojuanaari maja casaa tiuquitianura nocua. Saajia quejaquiaarijiaarihuaj uva rapijiojuara, na caaca reratesaanura.



Jiyaconajara tiaquiaarijiaariuhuj, cojuana niquijiara tiji nohuasejo-  
juaacuaji. Na nuhuaji, na camaruuri tamasaca pueya niquitioquiaari na  
cuhuariquia, nera nojori cojuasocoriquiano. Na nuhuaji, na camaruuri  
tucuacaanu quiaquiaari pueyaracaanu camueenujunura. <sup>34</sup> Jaara tari  
quiquiaari uva carojotasacari, saniya cuhuariquia camarujuanaari  
na seya jiyaramiquiquiaari na cuhuariquia cojuanaa pueyacua.  
Nojori jiyaramiquiquiaariiri nojori masenura cuhuariquia cojuanaa  
carojotasanojiniji, taa nojori pocoojoquiaari taricuajani. <sup>35</sup> Cuhuariquia  
cojuanaari cuhuariquia camarujuanaa jiyaramiquishano seya quiooree.  
Niquiriyatu majacutureeri. Tamonu moturee cutaraari. Tamonu  
jacuturee saitiaari. <sup>36</sup> Na nuhuaji, na camaruuri socua queraatia seya  
jiyaramiquiquiaariuhuj. Nojoriiri naquiya miishaaquiaarijiuhuj.

<sup>37</sup> 'Na nuhuaji, na camarujuanaari tama sequerejaaja: "Jiyaroreera  
cua niyanu. Maja cutara nojori rerequetenu quiniutianiya cua niyanu".  
<sup>38</sup> Cuhuariquia cojuanaa jaara niquiquiaari camarnujuanaa niyanu nojori-  
icua niyano, nojoriiri tama sequetoorejaaja: "¡Cunocuaajaqui cuhuariquia  
camaru quiriquiano na que niti, na que jaara shaajequee! ¡Pa morej!  
Naacuajitij, pocua nio cuhuariquia camaruhuara quiquiini". <sup>39</sup> Naaratej,  
camarnujuanaa niyanu tiuquishacari, cuhuariquia cojuanaari na quiaree.  
Na jaatucutureeri cuhuariquiajiniji tamama. ¡Cuniqui na motureeri!

<sup>40</sup> Naa Jesu pohuatanu nuhuajitij, nojuajaari cuno canaa Judiocuaca ca-  
marucua nequesotaree:

—¿Taa nia sequeyani pueyanaa? Cuhuariquia camaru jaara tiuquiriohua  
na cuhuariquiajinia, ¿taa na miiniutianiya cuno cuhuariquia cojuanaani?

<sup>41</sup> Jesu tojitianaari na riucaturee:

—¡Cuno cuhuariquia camaruuri nojori puecoonutaniya, nojoriicua na  
taraajeyaquiniutia! Na nuhuaji, tamasaca pueya sequenutaniya cutaraari,  
nojori cojuanura nera na cuhuariquia. Nojori cutaraari cuhuariquia camaru  
panishano niquitionutaniya nojori carojotasanojiniji.

<sup>42</sup> Jesuuri nojori sequeree:

—Jaa, naa miiniutianiyari. ¿Majate nia serojonu quiquiaaricuaja nio,  
tariucuaaanu Pueyaso Rupaajiniani?:

"Pueyari saitia tiariquiaa. Nojoriiri tamonu saajia jiyaniquiaari saajia  
sesarujuaajau naasucua. Cuno saajiacuajaari socua panishano saajia  
quiquiaari. Jiyaniijiajanaari naa na jiyatequiaari. Cuno saajiaata tiaree  
maninia cutaraari. Pueya niquishacari, jiuujiatecoreeri".

Naa naajiotasano quiyacuajaari.

<sup>43</sup> 'Camarucuaanaa, nocuaji nia numooteyanijia, Pueyasoori nia ruuretanu-  
taniya maja tari nia quiniuria na muerasu jiiitianaa. Tamasaca pueyari nia  
niti jiyatesaanutaniya cutara, nojori jiiitianura maninia Pueyaso muerasur-  
ano. Nojoriiri maninia Pueyaso tojitianaa quiniutianiya cutara, Pueyaso  
muerasu canenura jiyanohua nera, juhua cuhuariquiajiniji senoosano quer-  
aatia. <sup>44</sup> Cuno saajiajiniji saniniuujia, pueyano jaara cuno saajiaacua  
tiyare, nojuajaari juhua rashiquijiniutianiya. Cuno saajia jaara tiyare  
pueyanoocua, jacaanura na miiniutianiyari.

<sup>45</sup> Pueyacuara secojonaa jiyaniijianucua, mariyata Fariseocuaca tojiti-  
asacari naa Jesu pohuatasantej, nojoriiri niishiquii Jesuuri nojoriijiniji  
pohuatariquiaa miriqui. <sup>46</sup> Naaratej, nojoriiri Jesu quianu panirii juucua,  
nojori juaaniutia. Nojoriiri saaja puereriquiaa pueya. Pueyacuajaari se-  
queriquiaa Jesuuri seetanujuanaa Pueyaso sequenu panishano caminiuju-  
nia quiquiaari. Naaratej, jiyaniijianucuaari jiyamitia puerecoriquiaa Jesu  
nojori quianura.



## 22

### *Jesu pohuatasano miriqui camishacari queranacunujiniji* (Lc 14.15-24)

<sup>1</sup> Na nuhuaji, Jesuuri socua niishitiojoquiaari miriqui pohuatasanota. Naa pohuataquiaaritij:

<sup>2</sup> —Pueyasoori pueya masuya nojoritia na quiniuria shuquiriaatia, taa tamonu cutara jiyaniijia miiquiaari mijiriacuaani. Cuno jiyaniijiaari shuquiriaatia quiniu paniriquiaa queraatia pueyata, neyanu camishacari. Naaratej, jiyaniijiaari queraatia sumatutequiaari, queraatia pueya miaquesocoriquiano. <sup>3</sup> Na nuhuaji, na seya jiyaramiquiriiri na masuusano pueya numootenura nojori niniuria queranacunura. Masuusano pueyari maja na ninu paniniu quiquiaari saaja. <sup>4</sup> Jiyaniijiaari socua tamasaca na seya sequeree: “Cua masuusano pueya nia numootejocoo. Nia sequeese: ‘Jiyaniijia nia sashiya. Puetunujuanaari tari jeenucuasano nia queranacunura. Tari puecoosaaree na juyaca, na shiyoshitishano seyano. Tariucua rariyosanoori quiya. Ritia nia nimia. Nia miaquenuusee’ ”. Naa na seya na rootanu nuhuajitij, jiyaniijiaari nojori jiyaramiquirii. <sup>5</sup> Masuusano pueyari saaja tojitiaaquirii. Puetunujuanaari tama na panishanojuaaja miiriquiaa saaja. Tamonuuri na cuhuariquiajania quiaaree. Tamonuuri na casami niquitiojosaqui quiaareecujua. <sup>6</sup> Tamasacaari saniniuujia jiyaniijia seya quiooree. Jiyanoehua naquiya nojori miiriiri. Na nuhuaji, nojori puecootureeri. <sup>7</sup> Jiyaniijia niishishacari, jiyanoehua juaariiri. Nocuaji na soldadoehua jiyaramiquiriiri cuno monaa nojori naminiuria saniniuujia, nojori tiaca na catijiatanurajuhuj. <sup>8</sup> Na nuhuaji, jiyaniijiaari na seya sequeree: “Puetunujuanaari tari jeenucuasano pa queranacunura cua niyanu camishacari. Cua masuusano pueyacuajaari saaja cua ruuretareeni. Namitia majaari nojori nijionu quimiasa, saaja cua rerequetejaca nojori quiniuucua. <sup>9</sup> Quiarijia cutara, nia quiaare nuu tuneequetajajinia, tee queraatia pueya tajiniuucutaquiaacuajani. Nia masuure puetunu nia niquishano pueyajanaa”.

<sup>10</sup> 'Na seyari quiojoquiaari tiaca nucuaco. Nojoriiri puetunu na riuriatasano pueyajanaa rerejoteree, maninia pueya, sesa pueyano. Queranacunusaquiiri mishiquiaari masuusano pueyata. Camarnu seyari puetunu pueyajanaa cushiyotequiaari camishacari cushiyosano toqueya, nojori tiuquitasacari tiaco queranacunura.

<sup>11</sup> 'Na nuhuaji, jiyaniijiajanaari tiuquiquiaari masuusano pueya na niquiniuria. Tamonu pueyano niquishiiri camishacari cushiyosano toqueeju. <sup>12</sup> Jiyaniijiaari na sequeree: “Pueyanonaa, ¿taa quia tiuquimiasa camishacari cushishano toqueejuni?” Pueyanoori sanaa na tojiriquiaa. Majaari na riucuanu quirii. <sup>13</sup> Cunora, jiyaniijiaari na seya sequeree: “¡Nia morojore na cashacucua, na numatucuanio! ¡Niocua na jartarohua carijiniacuma ninishiqui! Tii sapuenutaniyari. Na quiaca miaquenutaniyajaariuhua na noonuta, naquiya na miishacari”.

<sup>14</sup> 'Naajuhuj pueyanaa, Pueyasoori queraatia pueya masuya quiarijia na muerasu nojori quiniuria. Saniniuujia, secajaari saquiriojosaanutaniya nojorijinijinio seetanujuanaa na muerasura nojori quiniuria.

### *Jiya jiyaniijia cuara niquitiojosaaria na sequesano cumaneeca* (Mr 12.13-17; Lc 20.20-26)

<sup>15</sup> Na nuhuaji, Fariseocuacaari quiojoquiaari Jesu shuriucujia tama nojori niishitiojotoonurajaaja. Nojoriiri Jesu pocuatenu paniquiaari sesa juucua, nocuara nojori saquiriojotanura. <sup>16</sup> Na nuhuaji, Fariseocuacaari na niishitiojosano pueya jiyaramiquirii Jesuucua, jiyaniijia Herodes panijaca pueyata.

Herodesri jiyaniijia César jiyatesano quiquiaari Judea jiyajinia jiyaniijia na quiniuria. Fariseocuaca jiyaramiquishano pueyari Jesu sequesee:

—Niishitiojonanaa, canaari niishiyani quiaari maninia pueyano. Majaari quia cuaracashijionu. Quiaari seetanujuanaa casaa niishitiojoquiaa cutara taate canaa naata maninia quiniu Pueyaso niquiarani. Majaari quia puerenu quiquiaa, pueya niquiara quia pohuatanura quia niishishano. Majaari rimiajata quia niquiniu pueya. <sup>17</sup> Naaratej, canaa quia sequere taa canaa miiniutianiyani. Paari sequesaaquiaarini pa cumaneeca pa niquitiojonura jiyaniijiajanaa Césarra, taa cuno tahue César sequequiaaricujani. Quiajanियariuhuj, ¿taa quia sequeya saniniunijia?

<sup>18</sup> Jesuuri ritia niishiquii, nojoriiri naa na nequesotariquiaa na sapojonuta. Nocuaji nojori sequereeri:

—Sapueno maninia quijiacanaa, ¿casaara nia saniniujiya naa janiyani?

<sup>19</sup> Cua niquitiri nia cumaneetoj, cuno, jiyaniijia César sequesano pa niquitiojonura nojuajani.

Nojoriiri Jesu niquitirii cumanee. <sup>20</sup> Jesu niquishacari cuno cumanee, nojori nequesotareeri:

—¿Cana naaquiti nio nocuani? ¿Cana sesate nocua naajiotasanojanuihuaj?

<sup>21</sup> Nojoriiri na riucuarree:

—Jiyaniijia César naaquicujaja, na sesajuhuj.

Jesuuri nojori sequereeri:

—Jaara naa quiritij, César nia niquitiojore tama na casaajaaja. Nojuacuaajaari na camaru. Saniniuuja, Pueyaso nia niquitiojore nerano tama na casaajaaja. Nojuaja cutaraari pa camarnu.

<sup>22</sup> Nojori tojishacari naa Jesu sequesano teje, jiuujiatecoreeri. Na tarinitia-tureeri. Quiojyarohuari.

*¿Macunucuate samiitiaconutaniuhua?  
(Mr 12.18-27; Lc 20.27-40)*

<sup>23</sup> Cuno juucaja, Saduceocuacaari Jesuucua nijioquiaari. Nojoriiri jiyaniquiaari macunucua maja na samiitiaconu quiniutianihua. Naaratej, nojoriiri Jesu sequesee:

<sup>24</sup> —Niishitiojonanaa, supuetana Moisésri pa sequequiaari na naajiotasanojinia, pueyano jaara cusoyare mueyaju, na tarajanu cuaara camiria mashiquio, mueya na mueratenura tarajanu niti. <sup>25</sup> Tarijia, tamonu pueyanoori niya quiquiaari. Siete niquiohwaraca quiquiaariiri, saa canuuja. Jiyapueranuuri camiquiaari. Na nuhuaji, shaajequiaariiri muetuhuojua. Naaratej, na mashiquioori camitishaaquiaari neyaca tarajanuta. <sup>26</sup> Nojuajaari muetuhuojua shaajequiaarijiuhuj. Naaratej, neyaca tarajanuuri mashiquio camiquiaarijiuhuj. Nojuajaari mueyaju cusoquiaarijiuhuj. Naa cusonuquiaariiri puetunu cuno siete canujuanaa. <sup>27</sup> Na nuhuaji, mashiquioori cusoquiaarijiuhuj. <sup>28</sup> Saniniuuja, macunucua jaara samiitiacorohua, ¿teyano cuno siete neyacaajinijiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

<sup>29</sup> Jesuuri nojori riucuarree:

—¡Niaari jiyano hua jiyajeneya nia niishiyaquishacari Pueyaso Rupaajinia naajiotasano, Pueyaso cumaacanio! <sup>30</sup> Macunucua samiitiacosacariuhua, majaari canuu camiyonu quiniutianiya maaji. Naajuhuj, maajipohuari maja na camiyonu quiniutianiya neyacaara. Caya, maajinio, nojoriiri juhujaniya quijiaca quiniutianiya juhua jiyocuacaanu quijiaca Pueyaso seya, maja camiyosano. <sup>31</sup> Socua cua tojitiare. Macunucuaari seetanujuanaa

samiitacoriqüianohua. ¿Majateeri nia serojonu quiquiaacuaja taa Pueyaso sequequiaari niajanियacuajani? Naa sequequiaariiri:

<sup>32</sup> “Janियari nia supuetana Abraham Jiyaniijiani, nia supuetana Isaac Jiyani-  
ijiajuhuaj, nia supuetana Jacobo Jiyaniijianio”.

Naaratej, nia sequeyanijia, Pueyaso muerasu shaajecononi, nojoriiri maja macunucua na quiniu. Canapüete seetanujuanaa Pueyaso muerasuni, nojori cutaraari pueyaracaanu quijiaca.

<sup>33</sup> Pueya tojishacari naa Jesu niishitiojosanotej, nojoriiri jiyanoehua jiuuji-  
ateree.

*Puetunu Pueyaso rootasanojinijijianaani, teyanote socua na pueya to-  
jishocoriqüianoni*

*(Mr 12.28-34)*

<sup>34</sup> Fariseocuaca jaara niishiquiaari Jesu Saduceocuaca sanaajaree, no-  
joriiri Jesuucua nijioquiaari nojori saniniujiuniuria nojuaja, nojori neque-  
soreenuta. <sup>35</sup> Nojoriiri jaarajaaja Jesu pocuatenu paniriquiaa sesa juucua.  
Tamonu nojorijinijinioori Moisés Rootasanojiniji niishitiojona quiquiaari.  
Na saniniujiuniuria, nojuajaari Jesu nequesotaree:

<sup>36</sup> —Niishitiojonanaa, ¿Pueyaso rootasanojinijini, teyanote socua pa to-  
jishocoriqüianoni?

<sup>37</sup> Jesuuri na riucuaaree:

—Naa naajiosano quiyacuajaari:

“Quia Jiyaniijia Pueyaso quia paniri puetunu quioojiatajanaa, puetunu quia  
sohuanutajanaa, puetunu quia niishitijatajanaanio”.

<sup>38</sup> Niocuajaari socua na pueya tojishocoriqüiano Pueyaso rootasano.

<sup>39</sup> Tamonu na sequesanoori quera juhua niojuhuaj. Naa sequeyari:

“Quiarta pueyano quia paniri taa quia paniyacuaja tama quia cuaqueyajaa-  
jani”.

<sup>40</sup> Puetunu Moisés rootasanojuanaa, mariyata puetunu tariucuaaanu  
Pueyaso sequesano caminiujiuniaa rootasanojuanaari nio caapiqui  
rootasanojinijicuaaja.

*¿Cante Cristo supuetanani?*

*(Mr 12.35-37; Lc 20.41-44)*

<sup>41</sup> Fariseocuaca quishacarijia cuniqui, Jesuuri nojori nequesotaree:

<sup>42</sup> —¿Taa nia niishiriojiya Cristojinijini? ¿Cante na supuetanani?

Nojoriiri Jesu riucuaaree:

—Pa jiyaniijiarano Cristoni, nojuajaari pa supuetana David niqüiohuacua-  
jinio supuenutaniya.

<sup>43</sup> Jesuuri nojori sequerohuacuhuj:

—Taaquiririnij. Jaara naa quiriritij, ¿niaateeri niishiyacuaja casaara David  
sequequiaari “cua Jiyaniijiaata” Cristocuaraarini, Pueyaso Sohuanu jaara na  
pocuatequiaari? Naa sequequiaariiri:

<sup>44</sup> “Jiyaniijia Pueyasoori cua Jiyaniijia Cristo sequequiaari: ‘Cua miaqueta-  
jara quia cajirijaara, janiya cuara quia paraa shocojotare quiocuaji-  
jiaatijia’ ”.

<sup>45</sup> ¿Cristotucua taa David niqüiohuacuj supuereni, David jaara Cristo  
jiyaniquiya na jiyaniijiaata?

<sup>46</sup> Nojoriiri Jesu niqütiaaree sanaa. Nojoriiri maja na naata na riucuanu  
quiaquiaari. Cuno nuhuaji, pueyari maja socua na nequesoreenu paniniu  
quiaquiaari Jesu.

## 23

*Jesu juaashacari Fariseocuaca, Moisés Rootasano niishitiojonaanio  
(Mr 12.38-40; Lc 11.37-54; 20.45-47)*

<sup>1</sup> Na nuhuaji, Jesuuri tii quiniaa pueya sequeree, canaa na saquiriojosano pueyano:

<sup>2</sup> —Moisés Rootasanojiniji niishitiojona, mariyata Fariseocuacaari supuetana Moisés niti quiya, tariucuacaanu Pueyaso Rupaa nojori niishitiojonura. <sup>3</sup> Naaratej, nia tojitiare puetunu nojori sequesanojuanaa niajaniya. Saniniuujia, maja cutaraari nia miiniu taa nojori miiquiaacuaani. Nojoriiri najuhuana niishitiojoquiaa taa pueya miiniutianiyani. Majaari saniniuujia nojori miiniu tama nojori niishitiojosanojuaaja. <sup>4</sup> Nojoriiri tama nojori niishishanojuaaja rootaquiaa, maja saaja tariucuacaanu Pueyaso niishitiojosano pa supuetanaa. Nojori rootasano pueya miishocoriquianoni, cunoori juhua jiyanohua niiquia casaa pueya nitiasocoriquiano. Nojoriiri maja quenaaja na naacutanu quiquiaa na juaashiquia sacasaruta. <sup>5</sup> Nojoriiri puetunu na miishanojuanaa miiquiaa saaja pueya niquishocoriquiano, pueya shuquiritianura nojori. Nojoriiri Pueyaso Rupaajiniji naajiotasano cushitiaquiaa na jiniji morotasano, na numatucuaacuanio. Nojoriiri naa miiquiaa taa pa supuetanaa miiquiaaricuaani. Saniniuujia, nojoriiri najuhuana socua puereetucara na quiquiora cusupuequiaa pueya shootiasocoriquiano. Naajuhuj, nojoriiri na toqueecuaji sohuatacojua tunujutaquiaa taa pa supuetanaa Pueyaso tojitiajaca miiquiaaricuaani. Saniniuujia, nojoriiri puera tucuacujuara na tunujutaquiaa saaja pueya niquishocoriquiano, pueya shootianura nojori. <sup>6</sup> Nojori jaara masuusaare tamonu tiajinia queranacunura, nojoriiri secooquiaa socua panishano cajitiujinia nojori cajitiuniuria tia camaru shuriucua. Naajuhuj, Pueyaso secojojua tiacajinia pueya rerejosacari, nojoriiri cajitiuniu paniquiaa camarucua cajitiucuaajinia pueya shootianura nojori. <sup>7</sup> Nojori rucuanijosacari tiacajinia, nojoriiri paniquiaa pueya saruhwatanura nojori. Panitiquiaajaariuhua pueya jiyaniquiniuria nojori “niishitiojonaata”.

<sup>8</sup> Niajaniya saniniuujia cua pueyanaa, majaari pueya shanacunu niaacua, nojori jiyaniquiniuria niajaniya “niishitiojonaata”. Niajaniya cutaraari niquiriyatujua Niishitiojonaraca. Puetunu niajanijajanaari niarta Pueyaso pueya tapueyocuaca. <sup>9</sup> Naajuhuj, majaari tamonu pueyano mijiria nia jiyaniquiniu “cua queta”. Niaacuajaari niquiriyatu Queraca. Nojuajaari jiyocuacaanu Quinia. <sup>10</sup> Naajuhuj, majaari pueya nia shanacunu niaacua, nojori jiyaniquiniuria niajaniya “cua jiyaniijata”. Niaari niquiriyatujua Jiyaniijiaracacuaaja. Nojuacuajaari Pueyaso jiyarosano nia Jiyaniijiaranoni. <sup>11</sup> Cante jiyaniijajanaa cutara niajanijajinijinioni, cuno cuaara jiyateera tama na cuaqueyajaaja nia cumaquinia na quiniuria. <sup>12</sup> Cante tama na cuaqueyajaaja jiyateja pueya shocotaja na quiniuriani, narta pueya jiyaramiquijia na quiniurijuhuj, jiyano pueyano cutaraari cararosaanutaniya. Cante saniniuujia juhua narta pueya serura jiyateja tama na cuaqueyajaajani, cunoori jiyaniijiarara jiyatesaanutaniya cutara.

<sup>13</sup> ¡Cua tojitiare, Moisés Rootasanojiniji niishitiojonaanaa, niajaniya Fariseocuacajuhuj, niaari cocuaatia miiquiaa! ¡Niaari sapuenu juhua maninia quiijaca niquishano! Niaari pueya tarinitiaaquiquiaa nojori rupuenura Pueyaso. Niaari maja nia tiuuniu Pueyasocua. Naajuhuj, majaari pueya nia tarinitianu nojori tiuuniuria Pueyasocua, na muerasura nojori quiniuria.

<sup>14</sup> ¡Niaari taraatia miishaanutaniya, Moisés Rootasanojiniji niishitiojon-  
aanaa, niajaniya Fariseocuacajuhuj! Niaari sapuenu juhua maninia mi-  
ijiaca niquishano. Niaari mashiquiopue tiaca masequiaa secaja nia cuma-  
neecata, nia sapojonuta nojori. Naacuajitij, niaari nojori tiaca masequiaa  
tama niajanijarajaaja. Naa nia miiniu nuhuajitij, niaari shitiarayocua  
secojoquiaa najuhuana Pueyaso, pueya niquiara, maninia pueya nia jian-  
ishaanura. Naaratej, niaari socua jianohua saniitiosaanutaniya tamasa  
pueyajiniji.

<sup>15</sup> ¡Niaari puereeta miishaanutaniya Moisés Rootasanojiniji niishitiojon-  
aanaa, niajanijajuhuj Fariseocucanaa! Niaari sapuenu juhua maninia  
mijiaca niquishano. Niaari tucuaaanu rucanejoquiaa jiya caco, shonini-  
acu caminia taquijiriano, tamonu nia niishitiojonura najuhuana Pueyaso  
tojijara na quiniuria juucua, juhua tama niajanijajaaja. Nia niishitiojosano  
pueyano jaara nia tojijara quiri, nojuajaari socua jianohua saniitioso-  
coriquiano quiya niajanijajiniji, sesa nia rootasano tojijia na quiniucua.

<sup>16</sup> ¡Niaari taraatia miishaanutaniya mosanucuaanaa! Niajanijari  
juhua cariojuaru, cante tamonu pueyano jaatucuya juucuan, nuu nia  
niishiyaquishacari. Naacuajitij, niaari capa niishitiojoquiaa. Niaari  
rootaquiaa, pueyano panishacari tamonu tiuniuria na sequesanoocua,  
nojuaja cuara sequeera: “Taa oro Pueyaso Secojoua tiajinia pueyaracaanu  
quiyacuaani, naajuhuj, cua sequesano quiajanijari seetanujanaa  
tohuatenutaniya quiara”. Saniniuujia, niaari sequequiaa, Pueyaso  
Secojoua tiajinia oro jaara sequeyaquishaare, majaari na sequesanoocua  
tiuushaanu. Naacuajitij, niaari sequequiaa, pueyano sequesanoori nareja  
sequesano, nojuaja jaara sequere: “Taa Pueyaso Secojoua tia pueyaracaanu  
quiyacuaani, naajuhuj, cua sequesano quiajanijari seetanujanaa  
tohuatenutaniya quiara”. Niaari sequequiaa cuno sequesanoocuaari  
maja tiuushaanu. <sup>17</sup> ¡Mosanucuaanaa, niaari juhua cariojuaru! ¿Teyanote  
socua pueresanoni, cuno orotee, Pueyaso Secojoua tia soj? Cuno oroori  
naa pueresanora jiyatesaaquiaari saaja Pueyaso Secojoua tiajinia na  
quiniucua. <sup>18</sup> Niaari rootaquiaajuhuj, pa sequesacari parta pueyano,  
casaa pa miiniutianiya nerani, pocua na tiuniuria paa cuara sequeera  
naatej: “Seetanujanaa quia sequeyanijia. Naatej, taa casaa Pueyasocua  
catijiaja juhuacutuucua niasano jianohua maninia quiyacuaa Pueyasorani,  
naajuhuj, cua sequesanoori saaja manijajuhuj. Majaari cua sapojonu”.

Naacuajitij, niaari sequequiaa, paa jaara naa sequereni, paa cuara miiria  
pa sequesano. Saniniuujia, niaari sequequiaa: “Pa sequesanoori najuhuana  
sequesano, paa jaara saaja Pueyasocua catijiaja juhuacutu sequereni.  
Majaari nocua tiuushaanu”. <sup>19</sup> ¡Cariojuarujurinia! ¿Majateeri nia niishiniu?  
¿Teyanote socua maniniani, Pueyasocua catijasocoriquiano casaate,  
Pueyasocua catijiaja juhuacutu soj? Catijasocoriquiano casaari  
narejajuhuanajaj, jaara Pueyasocua catijiajaacua niasoo quiyacuari.

<sup>20</sup> Naaratej, cante Pueyasocua catijiaja sequere seetanujanaani,  
nojuajaari maja saaja Pueyasocua catijiaja na sequenu quirii. Nojuaja  
cutaraari na caco niasano sequerejuhuj. <sup>21</sup> Naajuhuj, cante Pueyaso  
Secojoua tia sequere najuhuanani, cunoori maja saaja Pueyaso Secojoua  
tia na sequenu quirii. Nojuajaari Pueyaso sequereecuaja, Pueyaso Secojoua  
tia na sequesacari. ¡Pueyasocuaari na Secojoua tiajinia quijia! <sup>22</sup> Naajuhuj,  
pueyano jaara sequere na sequesano seetanujanaa juhua jiya cajiniocua,  
nocua tiuushaanura, cunoori maja saaja jiya cajiniocua na sequenu quirii.  
¡Pueyaso cajishaqui sequerejaariuhuj, Pueyasojanaa sequerejaariuhuj,  
jiyocuaaanu casaa na sequesacari!



<sup>23</sup> '¡Niaari taraatia miishaanutaniya, Moisés Rootasanojiniji niishitiojonaanaa, niajanijajuhuj Fariseocuacanaa! Niaari sapuenu juhua maninia miijiaca niquishano. Niaari Pueyaso niqutiojoquiaa maninia puetunu nio nia nataujinijijianaa, shanohua jaanujua jaamasucua, miaquesanojinia jatasano casaa: menta, anis, cominonio. Niaari jacaria serojoquiaa diez casaa puetunu cuno cien casaajinijijianaa, Pueyasora nia niqutiojocoriquiano taa supuetana Moisés sequequiaaricujani. ¡Niaari saniniuujia socua pa tojishocoriquiano Moisés rootasano tojitiaaquiquiaa! ¡Naacujitij, majaari maninia pueyano nia quiniu taa Moisés rootaquiiaaricujani! ¡Majaari nia taraajenu quiquiaa niarta pueyanocua! ¡Majaari nia tiuuni Pueyasocua! Niaari maninia niqutiojoquiaa nia nataacuacajiniji. Taa nia niqutiojoquiaa nia nataacuacajinijicuaani, ¡naa nia tojitiarejuhua socua pa tojishocoriquiano rootasano Moisés Naajiotasanojiniji! <sup>24</sup> Pueya nia niishitiosacari Moisés Rootasanojiniji juucua, niaari juhua cariyujuaru cante narta cariyujuaru jaatucuya juucua. Niaari juhua tamonu pueyanohuj. Na ratusacari, nujujua taquirii na mashacajiniiri. Socua na ratusacariuhua, ¡saaja cuartia miataaree juhujaniyari!

<sup>25</sup> '¡Niaari cocuaatia miiquiaa, Moisés Rootasanojiniji niishitiojonaanaa, niajanijajuhuj Fariseocuacanaa! Niaari sapuenu juhua maninia miijiaca niquishano. Niaari juhua noo pueyajuhuj, cante nareja na ratujua cuaqueya jeequejoquiaani, na miacajua cuaqueyano. Na jiniacumaari saniniuujia jiyanoahua curuutuua quiyajaa. Nio miriqui cua sequesano nia niishiri. Nioojiaari naa quiyajuhuj. Niaari nohuasenujuaca, jamuejancano. <sup>26</sup> ¡Cariyujuaru Fariseocuacanaa, nia ratujua jiniacuma nia jeequere coteenu, nia miacajua jiniacumano! Naacujitij, na cuaqueyari maninia jeequesano quiniutianijajuhuj.

<sup>27</sup> '¡Niaari taraatia miishaanutaniya, Moisés Rootasanojiniji niishitiojonaanaa, niajanijajuhuj Fariseocuacanaa! Puetunu niajanijajanaari sapuenu juhua maninia miijiaca niquishano, juhua macunucua quiquio shanohua niquishano, cohujata noshijosano. Saniniuujia na jiniacuma quiyari sacuaatia jaanujua pueya nucuhua mocuaca. <sup>28</sup> Niaari naajuhuj. Niaari sapuenu juhua maninia pueya niquishano. Saniniuujia nioojiaari jiyanoahua sesa, jiyanoahua sapojonu niishijia.

<sup>29</sup> '¡Niaari taraatia miishaanutaniya, Moisés Rootasanojiniji niishitiojonaanaa, niajanijajuhuj Fariseocuacanaa! Niaari sapuenu juhua maninia miijiaca niquishano. Niaari macunucua niojotajara shanohua niquishano shipinijioquiaa, tariucuaaanu pueyara Pueyaso sequesano caminiujunianaa nucuhuacujia. Naajuhuj, niaari tariucuaaanu Pueyaso tojitajaca puecosano quiquio maniniushitijia. <sup>30</sup> Naa nia miishacaritij, niaari juhua sequequiaaruhua: “Paa jaara shipinijosaaquiaari pa supuetanaa quishacarijia tariucuaaanuni, paa maara nojori cojiyaquiquiaari cutarani, nojori puecosacari Pueyaso sequesano caminiujunianaa”. <sup>31</sup> Saniniuujia, naa nia sequesacaritij, niaari tama niaacuara toreejacujua. Naaquiiri cuno tariucuaaanu Pueyaso sequesano caminiujunianaa puecoonaacujinino supuenocujia. <sup>32</sup> Naa Pueyaso sequesano caminiujunianaa puecoonaacujinino supueno nia quishacaritij, Pueyaso Jiyarosano nia morejuhuj, nia tucuatana nia supuetanaa coteesano.

<sup>33</sup> '¡Sesa miijiaca pueyanaa, niaari noonacuraca, juhua sacocua! ¿Ni-aateeri jiyaniya niaari saniitioyaquishaanutaniya mani quiquiojinia nia supuetanaata? <sup>34</sup> ¡Cua tojitiare! Janiyari Pueyaso rupaa caminiujunianaa jiyaramiquiniutianiya niaacuani, Pueyaso Rupaa niishijiacajuhuj,



Pueyaso rupaa niishitiojonaanio. Nojoriiri nia pohuatanutaniya Pueyaso-jiniji. Niaari noojiaqueya nojorijinijinio puecoonutaniya. Niaari tamasaca teetejonutaniya niyacutesanojinia nojori nia monura. Niaari tamasaca majacunutaniya Pueyaso secojojua tiacajinia. Niaari tamasaca neteyojotanutaniya puetunu tiacajinijijianaa, naquiya nia miiniuria nojori.<sup>35</sup> Niaacuajaari niishiya, coteenujuanaa mosaaquiaariiri Abel, maninia mijia pueyano. Naa puecoosaaquiaariiri queraatia Pueyaso tojitiajaca pueya. Na nuhuaji, socua jaatesaaquiaari monuuri Zacarías, Berequías niyanu. Cuno maninia pueyanoori mosaaquiaari Pueyaso Secojojua tiajinia, Pueyasooacara catijiasaqui shuriucua. Monu porocua nia quiniuucua taa nia supuetanaa quiquiaaricuaani, niaari saniniuujia nocua namishaanutaniyacujua puetunu tariucuacaanu Pueyaso tojitianaa puecoosaanuucujanaa.<sup>36</sup> Seetanujuanaa nia sequeyanijia, nio pa quishacari pueyani, nojoriiri saniitiosaanutaniya puetunu cuno pueya puecoosaanuucujanaa.

*Jesu nujuquesacari Jerusalén tiacajinia quiniaa pueyacua*  
(Lc 13.34-35)

<sup>37</sup> ¡Jerusalén tiacajinia quiniaa pueyanaa, jiyanoohua taraajeya niaacuani-  
jia! Niaari Pueyaso sequesano caminiujiuniaa pueya puecoojuaca. Niaari  
Pueyaso jiyaramiquishano pueya jacujuaca saitia nojori pohuatanuucua  
Pueyaso rupaa nia niquiara juucua. Janiyari cucua nia nijionura panijia ju-  
ucua nia taraatia nia miyaquishaanuucujia cua tacunura niaacuaji, naate taa  
caacaraja rijioquiaacuaa necohua na nesu cariquiacorani, na cojuanura no-  
jori. Niaari saaja cua paniyaquijia cua cojuanura niajaniya.<sup>38</sup> Cua tojitiare.  
¡Niaari nia quiquiojiniji sanaajasaanutaniya niiquiji! <sup>39</sup> Seetanujuanaa nia  
sequeyanijia, majaari socua nia niqiniu quiniutianiya janiya, niaa cuara  
cua tiuquishacariuhua sequerejaatijia: “Pueyaso cuara shuquiritiiria pa  
Jiyaniijia quiriquiano na jiyarosano.”

## 24

*Jesu pohuatasacari, Pueyaso Secojojua tia niyartasaanutaniya*  
(Mr 13.1-2; Lc 21.5-6)

<sup>1</sup> Jesuuri Pueyaso Secojojua tiajiniji tohuataarohua. Nata canaa  
quiojosacari nucuaco, canaa, na saquiriojosano pueyani, canaari nocua  
catecanoquiaarini. Canaari Jesu niqitiriquiaa Pueyaso Secojojua tiani,  
shanohua niquishano tia. <sup>2</sup> Jesuuri saa canaa riucuaareejaa:

—Jaa, na niquiyacuajaniijia. Niaa cumaati maninia na niquiyacujua.  
¡Seetanujuanaa nia sequeyanijia, cuno tia niaa na niquiyani, cunoori ni-  
yartasaanutaniya puetunujuanaa! ¡Majaari quenaaja tamonu saajia manu  
quiniutianiya tamonu caco!

*Taa pa niishiniutianiyani quera jiya puequesacari*  
(Mr 13.3-23; Lc 21.7-24; 17.22-24)

<sup>3</sup> Na nuhuaji, canaari Olivo cuhuariquia tuhananuucua quiojoquiaarini.  
Jesu cajishacari tii, canaa na saquiriojosano pueyani, canaari nocua cate-  
canoquiaarini. Tama canaa quishacarijaaja, canaari na nequesotareeni:

—Canaa quia sequere ¿taacari Pueyaso Secojojua tia niyartasaanu-  
taniyani? Naajuhua, ¿taa canaa niishiniutianiyarini taacari quia  
tacatenutaniuhua mijiriani? Canaa quia sequerejuhuaj, ¿taacari jiya  
puequenutaniyani?

<sup>4</sup> Jesuuri canaa riucuaaree:

—Tama nia cuaqueyajaaja nia cojuare tamasaca mariqui nia sapojoreeri.  
<sup>5</sup> Queraatia sapojonuujacaari supuenutaniya. Nojoriiri tama na cuaqueyajaaja sequenutaniya: “Janiyacuaaja Cristoni, Pueyaso Jiyarosano”. Naa nojori sequesacartij, queraatia pueya sapojonutaniyari. <sup>6</sup> Naajuhuaaj, niaari pueyapue miaquetoojonujini tojiniuuniutianiya, niya, tamonu jiyacajiniano. Niaari miaquetoojonura miananajotoonujini tojiniuuniutianiya-juhuaaj. Naa jaara naa tojiniuuritij, majaari puerenu. Naa quiniutianiyaari mijiria. Naajaa, juhuanojuajaari maja jiya puequesacari quiniutianiya. <sup>7</sup> Tamonu pueyari tamasaca pueyata miaquetoojonutaniya. Tamonu jiya-jini tojiniuuniutianiyaari tamonu jiyaniijata miaquetoojonutaniyajuhuaaj. Jiyacartij, jiyanojua miaajenuuri quiniutianiya queraatia jiyacajinia, cusonunujuhuaaj. Rijaari queraatia jiyacajinia jiuuquiujutianutaniya. <sup>8</sup> Naa naquiya miishacari mijiriatej, cunoori juhua manajaraca cotesacari noonu. Na nuhuaji, socua jiyacatenutaniyari naquiya miishacari, mijiria cua tiuquiyaquishacarijia.

<sup>9</sup> Jiyacartij, niaari jiya camarucua niquitiojosaanutaniya cua muerasu nia quiniuucua, naquiya nojori miitianura niajaniya. Niaari puecoosaanutaniya. Puetunu jiyacajinijinio pueyajanaari nia niquiniu paniyaquiniutianiya, cua muerasu nia quiniuucua. <sup>10</sup> Jiyacartij, queraatia cucua tiuunia pueyari cucua tiuuni tarinitianutaniya nojori jaara naquiya miishaare. Nojoriiri narta Pueyaso muerasu tacartanutaniya. Majaari nojori niquiniu paniniu quiniutianiya tarijia narta Pueyaso muerasu. <sup>11</sup> Queraatia sapojonuujaca Pueyaso rupaa pohuatanaari supuenutaniya. Nojoriiri queraatia pueya sapojonutaniya. <sup>12</sup> Jiyacartij, sesa miiniuuri socua jiyanojua jiyacatenutaniya mijiria. Cunora, queraatia pueyari narta pueya paniniu tarinitianutaniya. <sup>13</sup> Saniniuujia, cucua tiuujia jaara rejeretare pueyara-caanu cuno naquiya miishacari jiya cuara puequerejaatijia, nojuaja cutaraari shacantuuca quiijara jatanishaanutaniya, pueyaracaanu na rishiniuria. <sup>14</sup> Pueyaso rupaa jaara pohuataasaare janiyajini pueyapue niquiara puetunu jiyacajiniajanaa, nojori niishiniuria taate nojori naata cua muerasura quiniuni, jiyacartij, jiyari shusha puequenutaniya cutara.

<sup>15</sup> Pueyaso sequesano caminiuujunia Danielri tariucuaaanu pohuataquiaari sacuaraatia casaanaari supuenutaniya, puereeta niquishano. Cunoori Pueyaso pueya shaajariquiano. (Cante nio serojiyani, cuara niishiiria casaa na sequeyani.) Naa jaara cuno sacuaraatia casaa niquiri Pueyaso Secojoua tiajinia nujuatesano, niocua mashiri. <sup>16</sup> Jiyacartij, canapuate Judea jiyajinia quiyani, nojori cuara mashiiria tuhuananuhuacua. <sup>17</sup> Canapuate na tia cacojiria quiyani, nojori cuara tiuquiyaquiiria na tiajiniaaco maja na tarishiniuria na casamiicua. <sup>18</sup> Canapuate cuhuariquiajinia quiyani, cuara tacateyaquiuhuara na tiajiniohua na toqueyacua. <sup>19</sup> Jiyacartij, jiyanojua taraatia quiniutianiyaari maajipohuara, canapuate manajaatohua quiyani, mariyata canapuate supuejaca muerasu jiiitiani. <sup>20</sup> Juhucarijia Pueyaso nia secojoriquia nia mashiyocuatunu panishacari quiyaquiniuria shuniyara, samaatenu juucanio. <sup>21</sup> Cuno quishacari, jiyanojua naquiya miiniuuri quiniutianiya seetanujanaa. Jiya coteenujini, jiyano naquiya miiniuuri maja na niquishaanu quiquiaari tari. Naajuhuaaj, naa naquiya pueya miiniu nuhuajitij, majaari socua na caminiu quiniutianiuhua juhua nio naquiya miiniu. <sup>22</sup> Cuno naquiya miishacari jaara tajiyaquiri ritia, pueya maara cureyaquirij. Pueyaso cutaraari na tajitiniutianiya ritia, na saquiriojosano pueyacua na taraajesacari.

<sup>23</sup> 'Jiyacaritij, majaari nia tojiniu, tamonu jaara sequere niajaniya: “¡Cua tarajanunaa, Cristoqui tari tiuquiriohua! Niya quiyano”. Naajuhuj, majaari nia tojiniu tamonu jaara nia sequere: “Nooj, jati quiyatej”. <sup>24</sup> Queraatia sapojonuujuacaari supuenutaniya. Nojoriiri tama na cuaqueyajaaja jiyatenutaniya juhua Pueyaso jiyarosanora. Tamasacaari sequenutaniyacujua: “Janiyari Pueyaso sequenu panishano caminiujiuniani”. Nojoriiri pueya sapojonutaniya jiyajeneta nojori miishanota. Naa nojori miishacaritij, mijiria quiniaa pueyari jiyaniutianiya nojoriqui seetanujuaana Pueyaso jiyaramiquishano. Jaara na naata quiri, Pueyaso saquiriojosano pueya sapojonutaniyajaariuhuj. <sup>25</sup> Pueyanaa, naa cua sequesacari niajaniatej, janiyacuaajaari juhuacarijia nia numootereeni. <sup>26</sup> Naaratej, majaari nia quianu cua pajenuucua, pueya jaara sequere niajaniya: “Cristo jati cariquia jiyajinia quiya”. Naajuhuj, majaari pueya nia tojiniu nojori jaara sequere niajaniya: “Miji, Cristo sohuacamara cajiya. Nia niquishijia”. Majaari nia shanacunu naa nia sapojosaanuratej. <sup>27</sup> Mijiria cua tiuquishacariuhua, majaari jiyasohua cua tiuquiniu quiniutianihua. Naatej, taa pueya niquiquiaa miacana nunujiyano pananu muetasamajicuaani, pananu tiuquishocorano, pueyari naa cua niquiniutianiya cua tiuquishacariuhua. <sup>28</sup> Tee casaa mocua quiyani, mohuari tii rerequeejonutaniya.

Jesuuri naa niishitiojoriquiaa miriqui, mijiria quiniaa pueya jaara sesere puera, nojoriiri saniitiosaanutaniya.

*Taa na quiniutianiyanu Cristo tiuquishacariuhua  
(Mr 13.24-37; Lc 21.25-33; 17.26-30, 34-36)*

<sup>29</sup> Jesuuri naa canaa pohuataquiaari socuatej:

—Ritia naquiya miishaanu nuhuajijia, pananuuri ninishiquiria quiniutianiya. Racaari maja na cuhuatanu quiniutianiya. Riyari totenutaniya. Jiya cajiniocua cumaaca jiitiajacaari tetecatunutaniya. <sup>30</sup> Jiyacaritij, puereeta casaari jiya cajiniocua niquishaanutaniya, mijiria quiniaa niishiniuria janiyari quera roseyani. Puetunu nio jiyajinia pueyapuejanaari sapiyonunutaniya, jyanohua nojori taraajenuta. Na nuhuaji, cua niquitiuniutianiyari cohujaja najacajinia roseyano, jyanohua cua cumaacata, jyanohua shacantuca. <sup>31</sup> Janiyari jiyocuaaanuji cua seyata tiuquiniutianihua, cua jiyaramiquiniuria nojori puetunu cua saquiriojosano pueyacujanaa. Nojori tojtiasacari trompeta jonenenu jyanohua, nojoriiri cua saquiriojosano pueya rerejotenutaniya cucua, puetunu nio jiyajinijijianaa.

<sup>32</sup> 'Nia pohuatareera higo naanajiniji, socua maninia nia niishiniuria taacari jiya puequenutaniyani. Higo naana cashacucua jaara macumaaca quiri, na jaamasucuaari mueratiuya. Naa nia niquishacaritij, niaari niishiya tacareejonuqui quera quiniutianiya. <sup>33</sup> Naajuhuj, niaa jaara puetunu cua sequesanojuanaa niquiri tari tohuateyano, niocua niishiri janiyari quera tiuquiuhua. Tari jiya puequesacari quera. <sup>34</sup> Seetanujuaana nia sequesanijia, nio pa quishacari pueyani, majaari nojori shaajenu quiniutianiya juhuanojuaja, nojori cuara puetunujuaana cua pohuatasano niquirijaatijia. <sup>35</sup> Jiya, jiya cajiniocuanio, cunoori shaajenutaniya. Cua sequesano cutaraari tohuateenutaniyacujua. Cua rupaari pueyaracaanu seetanu rupaajanaa quiniutianiya.

<sup>36</sup> 'Maja cutaraari quenaaja tamonu pueyano niishiniu taacari jiya puequenutaniyani, mariyata taacari cua niniutianihua. Jiyocuaaanu quiniaa Pueyaso seyari maja na niishiniujihua. Majaari quenaaja cua niishiniujihua. Saaja cua Queeri tamajaaja na niishiya cutara.

<sup>37</sup> 'Quera cua tiuquiniu panishacariuhua, mijiria pueyari juhuajaniya quiniutianiya taa Noé quishacari mijiria tariucuacaanu pueya quiquiaaricuaani. <sup>38</sup> Jiyacaritij, nio jiya pajaashitiaaquishacarijia, supuetanaari juhuajaniya miaquenuujua quiquiaari. Juhuajaniya queranacunuuriquiaajaariuhua. Juhuajaniya necohua camiyoteriquiaajaariuhua Noé jaara tiuquitiaquiaarijiaatijia na puereetuca buquejiniacuma. <sup>39</sup> Nojoriiri saaja juhuajaniya quiriquiaa pajaa jaara nojori pajaashitiaquiaarijiaatijia. Puetunu pueyajanaari canashiyaquiji netasaaquiaari. Mariyata naa quiniutianiyari cua tiuquishacariuhua. <sup>40</sup> Jiyacaritij, caapiqui pueya quishacari cuhuariquiajinia, niquiriyatuuri rishaanutaniya, Pueyaso pueyano na quiniucua. Tamonuuri jateenutaniya saniitiosocoriquiano saniniuujia. <sup>41</sup> Naajuhua, caapiqui maajipohua riiquiniuushacari tunanajiniacuma, niquiriyatuuri rishaanutaniya. Tamonuuri jateenutaniya. <sup>42</sup> Nocuaji juhua sutejaca nia quiriquia. Majaari nia niishiniu taacari nia Jiyaniijia tiuquiniu-tianihuani. <sup>43</sup> Nio nia niishiri. Tia camaru jaara niishiriquia taacari nohuasejovia niniutianiya nocuani, nojuaja maara nocuaji sutere maja nohuasejovia tiuquiniuria na casami nohuasenura. <sup>44</sup> Naaratej pueyanaa, niaa cumaati cua sashiya, janiya mariqui nia jiyajenetemohuarini.

*Jesu pohuatasano maninia serujiniji, sesoriquia serujinijinio*  
(Lc 12.41-48)

<sup>45</sup> Socua cua pohuatasano nia tojitiare pueyanaa. Jiyanoehua casamiriaca pueyanoori queraatia seyaraca quiquiaari. Cuno jiyaniijiaari tucuacaanu quianu paniquiaari tamonu jiyajinia. Naaratej, na nuhuajiria, nojuajaari niquiriyatu na seyajinijinio jiyatequiaari juhua na tia camarura, narta seya na mianuutenura maninia, puetunu juucajanaa. Cuno seruuri niishijia quiquiaari, na camarnu tojijiajuhuaj. <sup>46</sup> Cuno seruuri shuquiriaatia quiniutianiya na camarnu jaara na riuriasuhua maninia poonijiyano taa na camarnu sequequiaari na nuhuajiriacuajani. <sup>47</sup> Naaratej, seetanujua-naa nia sequeyanijia, na camarnuuri na jiyatenutaniya puetunu na jiiti-asanojuanaa cojuanara. <sup>48</sup> Saniniuujia, cuno seru jaara sesa miijia quiri, nojuajaari tama sequenutaniyajaacujua: "Cua jiyaniijiaari jiyanoehua tarishiniutianiya". <sup>49</sup> Jaara naa niishiriojore, nojuajaari narta seya piquiniu coteenutaniya. Mashaasequenuujua cojiniutianiyajaariuhua queranacunuunura. <sup>50</sup> Naa juhuajaniya na quishacaritij, na jiyaniijiaari jiyacari na jiyajenetenutaniya. <sup>51</sup> Naa sesa na quiniucuatej, na jiyaniijiaari jiyanoehua na saniitionutaniya. Na nuhuaji, na jatanutaniyari na cojiritiasocoriquiano saniitionu sapuenu juhua maninia niquishano miijia pueyata. Nojoriiri tii nujuquetunutaniya. Na quiaa miaquenuunutaniyari, naquiya na mi-iquiosacari.

## 25

*Jesu pohuatasano diez niyacoojorijiniji*

<sup>1</sup> 'Nia pohuatareera taa Pueyaso shuriucua tiuquitianu panijiaa quiniutianiya cua tiuquishacariuhua. Nojoriiri juhua diez niyacoojori quiniutianiya, canapuate camiriquiano pueyano sashiriquiaacuajani. Cuno niyacoojoriiri quiojoquiaari camiriquiano pueyano sashiniuria, na tiuquishacari nojori tiuquitianura nata tiaco. Nojoriiri samaritiu patootaquiaari. <sup>2</sup> Cinco cuno niyacoojorijinijiiri mosanucua quiquiaari. Tamasacaari saniniuujia niishijiaa quiquiaari cutara. <sup>3</sup> Mosanucuaari saaja niquiriyatu samaritiu patootaquiaari. Majaari socua samaritiu nojori panu quiquiaari. <sup>4</sup> Niishijiaa cutaraari socua samaritiu pooquiaari, nojori

samaritiu puequesacari na noshitishocoriquiano. <sup>5</sup> Camiriquiano pueyano tarishishacari, puetunu nojorijianaari maquenuujuquiaari. Nojoriiri socua maquetuquee. <sup>6</sup> Shiyaqueya, tamonu pueyanoori nacaquiaari: “¡Camiriquiano pueyano cumaji tari! ¡Nia naacusee!” <sup>7</sup> Puetunu cuno niyacoojorijianaari ritia saneecuatuquiaari. Quera pueetacoyano na samaritiu nishiriiniuuriiri. Nocuaji niishijiaca niyacoojoriiri socua na pootusano samari noshitirii. <sup>8</sup> Jiyacaritij, mosanucua niyacoojoriiri narta niyacoojori sequeree: “Canaara nia rashiquiojoreja nia samaritiujiniji. Canaa samaritiu tari pueetaareeni”. <sup>9</sup> Cuno cinco niishijiaca niyacoojoriiri nojori riucuaaree: “Maja. Maja maninia canaa niqutionura nijaniya, puetunu pa samaritiujianaacua senota pueetama. Ritia nia quiaare juhuari na masejosaqui, socua nia masenura tiji”. <sup>10</sup> Cuno mosanucua niyacoojori quiojosacari samari masenuucua, camiriquiano pueyanoori nojori niyacari tiuquishii. Cuno samaritiuriaca niyacoojori cutaraari camiriquiano pueyanota tiuquitiaguaari camishaqui tiaco queranacunura. Tia tiotiuuri mishiquiosaaree. <sup>11</sup> Na nuhuaji, mosanucua niyacoojoriiri tiuquiiioquiaariuhua. Tia tohuateyaji jiiquioonuusuhuari. Sequetureeri: “¡Jiyaniijianaa, jiyaniijianaa, canaacuaji quia riatareja tiotiu!” <sup>12</sup> Jiyaniijiaari saa sequereeja: “Seetanujuanaa nia sequeyanijia, maja cua niishiniu nijaniya”.

<sup>13</sup> Naa na pohuatanu nuhuajitij, Jesuuri canaa na saquiriojosano pueya sequeree:

—Pueyanaa, nia quiri juhua sutejaca, nia niishiyaquishacari taacari cua tiuquiniutianiuhuani, casaa juucatej.

*Miriqui Jesu pohuatasano cumaneeca poonitijionaajiniji*  
(Lc 19.11-27)

<sup>14</sup> Na nuhuaji, Jesuuri socua miriqui pohuataquiaari canaa na niishitiojonura taa Pueyaso muerasu miishaanutaniya jiya puequesacarini. Jesuuri naa canaa pohuataquiaaritij:

—Tamonu jiyaniijiaari tucuacaanu quianu paniquiaari tamonu jiyajinia. Na nuhuajiria, na seya niqutiojoquiaari na racatasano cumaneecaari, nojori cuara poonitijioora cuno cumaneeca na canijasocoriquiano. <sup>15</sup> Naacuajitij, coteenu seru niqutiooree cinco mil cumaneecaari. Tamonuuri niqutiosaaree dos mil. Tamonuuri niqutiosaaree mil cumaneeca. Na jiyaniijiaari naa nojori niqutiojoquiaari na niishishacari nojoriiri rimiajata niishijiaca quiquiaari, socua cuno cumaneeca nojori canijanura. Na nuhuaji, nojori jiyaniijiaari quiaquiaari. <sup>16</sup> Cinco mil cumaneeca jiiitianaari ritia coteequiaari casami masenura na niqutiojosocoriquiano socua cumaneecara, na reratenura na jiyaniijiaara. Naacuajitij, cuno seruuri socua cinco mil cumaneeca reratequiaari coteenu na jiiitiasanojiniji. <sup>17</sup> Naajuhuaaj, dos mil cumaneeca jiiitianaari socua dos mil cumaneeca reratequiaari na jiiitiasanojiniji. <sup>18</sup> Mil cumaneeca masenaari saniniuujia maja na poonitijionu quiquiaari na jiyaniijia niqutiosano cumaneeca. Nojuajaari saaja jiyajinia jiuutiaquiaari na jamojuara na jiyaniijia cumaneeca. <sup>19</sup> Seya jiyaniijiaari camueenujuquiaari jiyanohua. Socua tiuquiquiaariuhuari na cumaneeca na masejonuhua na seyajiniji. <sup>20</sup> Coteenu nocua tiuquiquiaariiri cante cinco mil cumaneeca niqutiosaaquiaaricuaajani. Nojuajaari na jiyaniijia sequeree: “Jiyaniijianaa, quiaari cua niqutioicanu cinco mil cumaneeca. Niya quiyari socua cinco mil cumaneeca quiaara, cua poonijosanojiniji cua reratesano”. <sup>21</sup> Na jiyaniijiaari na sequeree: “Maniniacuaja. Quiaacuajaari maninia cua seru. Majaqui najuhuaa cua



tiuuniu quiquianu quiocua. Quiaacuajaqui maninia miiquianu secaja cua niqutiosanota quiajaniya. Janiyari quia jiyatenutaniya queraatia jitianarani. Miji quia tiuquimia. Niya cuata quia quishii shuquiriaatia".<sup>22</sup> Na nuhuaji, tamonu seruuri na jiyaniijiaacua tiuquishiijuhuaj, nooj, cante dos mil cumaneeca niqutiosaaquiaaricujani. Na jiyaniijia sequereeri: "Jiyaniijianaa, quiaari cua niqutiocanu dos mil cumaneeca. Niya quiyari socua dos mil cumaneeca quiara, cua reratesano cua poonijosanojiniji".<sup>23</sup> Na jiyaniijiaari na sequeree: "Maniniacuaja. Quiaacuajaari maninia cua seru. Majaqui najuhuana cua tiuuniu quiquianu quiocua. Quiaacuajaqui maninia miiquianu secaja cua niqutiosanota quiajaniya. Janiyari quia jiyatenutaniya queraatia jitianarani. Miji quia tiuquimia. Shuquiriaatia niya quia quishii cuata".<sup>24</sup> Na nuhuaji, tamonu seruuri tiuquishiijuhuaj cante mil cumaneeca niqutiosaaquiaaricujani. Na jiyaniijia sequereeri: "Jiyaniijianaa, janiyari niishiyani quiaacuajaari quiarta pueyacuata taraajeyashijia. Quiaari tamasaca natoosanojiniji senoojua. Quiaari tamasaca poonijosanojiniji miajajuhuaaj.<sup>25</sup> Naaratej, janiyari quia cumaneeca pueretacanu nohuasenuujuacani. Cunora janiyari quia cumaneeca jamocanu raamani. Quia niquiri. Niya quiyacuaja quia cumaneeca puetunujuanaa".<sup>26</sup> Na jiyaniijiaari na juaarii: "¡Quiaaqui sesoriquia pueyano! ¡Taajeca seque! ¿Quiaateeri niishiquianu janiyari tamasaca natoosanojiniji senoojuani, tamasaca poonijosanojiniji miajajuhuaaj?<sup>27</sup> Quiaa jaara cua jiyaniquianu naa quiijatej, ¿casaara cua cumaneeca quia niqutioyaquiquianu cumaneeca cojuanaarini? Nojori jaara cua cumaneeca poonijiotecanu, nojori maara socua na canijiacanu quiria".<sup>28</sup> Jiyacaritij, jiyaniijiaari tamasaca na seya sequeree: "Nio sesa cua serujiniji nia jaariutiare cua mil cumaneeca. Nia niqutiore cutara cua maninia seru, cante diez mil jiiitaa tariucujani.<sup>29</sup> Naacuajitij, cante casaa jiiitaaacuaani, nojuajaari socua niqutiosaanutaniya, queraatia jiiitaja na quiniuria. Saniniuujia, cante secaja jiiitaa najuhuanani, nojuajaari secaja na jiiitiasano jaariutiasaanutaniya puetunujuanaa.<sup>30</sup> Nio najuhuana quiija seru saniniuujia, nia jatare carijiniacuma ninishiqui. Tii sapuenutaniyari. Na quiaa miaquenutaniyari na noonuta, naquiya na miishacari".

*Jiya puequesacari, puetunu pueyapuejanaari nequesoreesaanutaniya sanitiiosocoriquiano*

<sup>31</sup> Puetunu cua seyajanaari jiyocuacaanuji cua cojiniutianiya janiya jaara tiuquiriohuani Pueyaso shacantuuca cumaacata, Jiyaniijiajanaa cua quiniuria mijiria. Janiyari shanohua puereeta jiyaniijia cajitiujinia cajiniutianiya, pueya cua nequesoreesacari.<sup>32</sup> Puetunu pueyapuejanaari cu-cua rerejotesaanutaniya puetunu nio jiyajinijiniojuanaa. Janiyari maninia pueya saquiriojonutaniya sesoriquia pueya tajinijini, taa borrego cojuana na borregohua saquiriojoquiaa cabraacuaca tajinijicuaani.<sup>33</sup> Janiyari maninia pueya nujuatejonutaniya cua miaquetajarani. Saniniuujia, janiyari sesoriquia pueya nujuatejonutaniya cua muenecarani.<sup>34</sup> Na nuhuaji, janiyari cua miaquetajara nujuatiuyano sequenutaniyani: "Miji, cua Que shuquiritasano pueyanaa. Shusha jiya shipinishacari niaarano cua Que riuriotaca nia masere.<sup>35</sup> Cunoori niajaniyara, maninia miijica nia quini-uucua. Cua miaajesacari, niaari cua miaqueteja. Cua jiyamuesacari, niaari cua raateja. Tucuacaanu cua rucuanesacari, niaari nia tiaco cua tiuquinijia.<sup>36</sup> Toqueeju cua quishacari, niaari cua niqutioquiaari. Cusosu cua quishacari, niaari cua niquniuucua quiaja. Nujuatejojuajinia cua quishacari taraatia, niaari cucua quiojojua cua cumanjianuucua".<sup>37</sup> Na



nuhuaji, maninia pueyari cua nequesotanutaniya: “Jiyaniijianaa, ¿taacari canaa niquiquiaari quiajaniya miaajeyanoni? ¿Canaateeri quia miaquetequiaarini? Majaruhua. ¿Taacari canaa niquiquiaari quiajaniya jiyamueyanoni? ¿Canaateeri quia raatequiaarini? <sup>38</sup> ¿Taacari canaa niquiquiaari quiajaniya canaa jiyajinia rucuaneyanoni? ¿Canaateeri canaa tiajinia quia tiuquiniquiaarini? Majaruhua naa canaa miiniu quiquiaari quiajaniya. ¿Naajuhuj, taacari canaa niquiquiaari quiajaniya toqueejuni? ¿Canaateeri quia niquitioquiaari toqueni? Maja. <sup>39</sup> ¿Taacari canaa niquiquiaari quiajaniya cusosuni, nujuatejojuajinianio? ¿Canaateeri quiocua quiojoquiaari canaa niquiniuria quiajaniyani? Maja”.

<sup>40</sup> Janiyari cuno maninia pueya riucuanutaniyani: “Seetanujuanaa nia sequeyanijia. Niaa jaara naa maninia miiquiaari tamonu cua muerasuniyojuajinijinio, niaari maninia cua miiquiaarijiuhuj”.

<sup>41</sup> Na nuhuaji, janiyari cua muenecara nujuatiuano sequenutaniyani: “¡Cua shuriucuaaji niiquiji nia quiaare, sesoriquia pueyanaa! ¡Niaari cua Que sesacasano! Niaari mani quiquiojinia quejoosaanutaniya. Cuno mani quiquioori maquesaashijia. Shipinishaaquiaariiri samaruhua jiyaniijaacuaji, na seya samaruhuacuajinio. <sup>42</sup> Niaari naa miishaanutaniyaqui nia taraajeyaquiniucua cucua. Cua miaajesacari, majaari nia miaquetenu quijia janiya. Cua jiyamuesacari, majaari quenaaja nia raatonu quijia janiya. <sup>43</sup> Cua rucuanesacari nia jiyajinia, majaari nia tiajinia nia tiuquininiu quijia janiya. Toqueeju cua quishacarijiuhuj, majaari toque nia niquitionu quijia janiya. Nujuatejojuajinia cua quishacari, cusosu cua quishacarijiuhuj, majaari nia quianu quijia cua niquiniucua quenaaja”.

<sup>44</sup> Jiyacaritij, cuno pueyari cua nequesotanutaniya: “Jiyaniijianaa, ¿taacari canaa niquiquiaari quiajaniya miaajeyanoni, jiyamueyanujuhuaj? Majaari canaa niquiniu quijia quiajaniya canaa jiyajinia rucuaneyiano tiaaju, toqueeju quiyano, cusosu quiyano, nujuatejojuajinia quiyanojuhuaj. Canaa jaara naa quiyano quia niquiquiaarini, canaa maara quiocua taraajequiaarini”. <sup>45</sup> Janiyari nojori riucuanutaniyani: “Seetanujuanaa nia sequeyanijia, nia taraajeyaquiniucua tamonu cua muerasuniyojuaacua, niaari seetanujuanaa cucua taraajeyaquiquiaari”. <sup>46</sup> Jiyacaritij, maninia miyashijia pueyari quejoosaanutaniya pueyaracaanu saniitiosocoriquiano. Saniniuujia maninia miihia pueyari Pueyaso shuriucua quianutaniya, pueyaracaanu shuquiriaatia nojori quiniuria.

## 26

### *Judiocuaca camarucua roojotoosacari Jesu nojori quianura (Mr 14.1-2; Lc 22.1-2; Jn 11.45-53)*

<sup>1</sup> Jesu jaara puetunu nio pohuatasanojuanaa pohuatanu puecaquiaari, canaa na saquiriojosano pueya sequereeri:

<sup>2</sup> —Niaacuajaari niishiya, tama tariquiiri Pascua juucara queranacusacari. Janiyari jiyacari taucuaca niquitiosaanutaniyani, mosocoriquiano niyacutesanojinia teetesano.

<sup>3</sup> Jiyacarijiuhuj, canaa Judiocuaca camarucuaari rerejoquiaari Caifás tiajinia. Caifásri pueyacuara secojonaa jiyaniijiajanaa quiquiaari. Cuno pueya rerejoquiaarini, nojoriiri quiquiaari pueyacuara secojonaa camarucua, canaa Judiocuaca camarucuanio. <sup>4</sup> Nojoriiri cuno tiajinia pocoojoquiaari taa nojori sapojonutaniya Jesu na quiatusocoriquianoni, nojori mosocoriquiano. <sup>5</sup> Nojoriiri tama sequetooquiaarijiaaja: “Maja pa monu Pascuara queranacusacari, paa mariqui pueya juaatiriiri”.

*Tamonu maaji totasacari na shanohua jaanutaja Jesuucua  
(Mr 14.3-9; Jn 12.1-8)*

<sup>6</sup> Tamonu juuca, Jesuta canaa quishacari Betania tiacajinia, canaari Simón tiajinia miaquenuuriquiaani. Cuno Simónri tarijia lepra cusunujiniji Jesu naatanishano quiquiaari. <sup>7</sup> Miaquejajinia Jesu cajishacari, tamonu maajiiri nocua catecanoquiaari. Shiitaniyoyua shucuariquiaja pataconiyoyua cacatariquiaari, cohujaja saajiajiniji quejasano. Tii quiriquiaari shanohua jaanutaja. Cuno jaanutajaari jiyanoahua queraatia cumaneecata masesano quiquiaari. Cuno maajiiri Jesu nacaacua na totaree puetunujuanaa. <sup>8</sup> Canaa jaara niqiquiaari naa cuno maaji miishanotej, canaari juaaquioreeni. Noo-jiagueya canaajininioori naa sequeturee:

—¿Casaara cuno maaji niitiaree najuhuana shanohua jaanutajani? <sup>9</sup> ¡Cuno jaanutaja maara queraatia cumaneecara niqutiosaare, casamiijiuniucua niqutiosocoriquiano!

<sup>10</sup> Jesu tojishacari taa canaa sequeriquiaa cuno maajini, canaa sequereeri:

—¿Casaara nio maaji nia taroojiyani? ¡Na miishano janiyani, cunoori jiyanoahua maninia quiria! <sup>11</sup> Casamiijiuniucuaari niaata quiriqiano pueyaracaanu cutara. Janiya saniniuujia, majaari cua quiniu quiniutianiya pueyaracaanu niaata. <sup>12</sup> Nio maaji totasacari cucua na shanohua jaanutajani, juhuacarijia cua cuaqueya jeecaari, raaco cua niasaanura janiya jaara mosaareni. <sup>13</sup> Seetanujuanaa nia sequeyanijia, pueyaracaanu pueya pohu-atasacari Pueyaso rupaa janiyajiniji, nio maaji miishanoori pohuatasaanu-taniyajuhua puetunu jiyacajiniajanaa. Naa na miishano janiyani, majaari na niyajetasaanu quiniutianiya pueyaracaanu.

*Judas tacartasacari Jesu, na quiatenura  
(Mr 14.10-11; Lc 22.3-6)*

<sup>14</sup> Jiyacaritij, Judasri pueyacuara secojonaa jiyaniijianucuaacua quiaquiaari. Nojuajaari niquiriyatu canaajininio Jesu doce saquiriojosano pueyano quiquiaari. Na sesaari quiquiaari Judas Iscariote. <sup>15</sup> Secojonaa jiyaniijianucua sequeeseeri:

—¿Taa cumaneeca nia niqutionutaniya janiyani, janiya jaara nia quiatere Jesuni?

Nojoriiri ritia treinta cumaneeca niqutioquiaari Judas. <sup>16</sup> Na nuhuaji, Judasri pueyaracaanu niishiriojoriquiaa maatucua taacari quiatere Jesuni.

*Jesu miaquesacari na nuhuajiria na pueyata  
(Mr 14.12-25; Lc 22.7-23; Jn 13.21-30; 1 Co 11.23-26)*

<sup>17</sup> Puetunu marijiajanaa, canaa Judiocuacani, canaari poreetesoo pan miaquenuquiaari puetunu siete juucajanaani. Coteenu juucaari sesojosaaquiaari Pascua juuca. Naaratej, Pascua juuca, canaa, Jesu saquiriojosano pueyani, canaari nocua catecanoquiaarini naa canaa nequesotanura nojuaja:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiarjia Pascuarani?

<sup>18</sup> Jesuuri canaa riucuaaree:

—Paacuajaari miaquenutaniyani tari cua sequesano pueyano tiajinia Jerusalén tiacajinia. Tii nia quiaare. Tia camaru nia sequeese: “Canaa niishitiojonaari naa quia sequeya: ‘Quera cua cusosacari. Janiyari cua nuhuajiria cua pueyata miaquenutaniya Pascua borrego quia tiajiniani’ ”.

<sup>19</sup> Canaari naa miiquiaarini taa Jesu sequequiaari canacuajani. Canaari tii majeetequiaari borregoni, Pascua juuca miaquesocoriquiano.

<sup>20</sup> Jaara niniquiaari, Jesuuri canaa na doce pueyata miaquejajinia caji-tiuriquiaa. <sup>21</sup> Canaa miaquenuusacari, Jesuuri canaa sequeree:

—Seetanujuanaa nia sequeyanijia, tamonu nijaniyajinijioori cua tacar-tanutaniya, cua paraa na quietenura janiya, nojori monura janiya.

<sup>22</sup> Canaari jiyanoehua taraajequeeni naa Jesu sequesacaritij. Puetunu canaajanaari Jesu nequesotareeni:

—¿Janiya jiyoteeri Jiyaniijianaa?

<sup>23</sup> Jesuuri canaa riucuaaree:

—Cante cuata tureneetaa pa miacojuajinijini, nojuacuajaari cua quietenu-taniya mosocoriquiano. <sup>24</sup> Janiyacuajaari mosaanutaniyani taa janiyajiniji naajiotasaaquiaaricuaajani tariucuacaanu Pueyaso Rupaajinia. Saniniuujia, jiyanoehua taraatia miishaanutaniyari cua quiateriquiano pueyano. Maara socua maninia quiquiaari cuno pueyanora jaara raaquishaaquiaari.

<sup>25</sup> Na quiateriquiano Judasri socua Jesu nequesotareejuhuj:

—¿Janiya jiyoteeri Niishitiojonanaa?

Judas riucuaareeri:

—Taaquiririnij. Quiajanuyacuaaquiniatejaj.

<sup>26</sup> Canaa miaquesacari, Jesuuri pan ririi. Na Que Pueyaso secojoree nocuaraari.

Na nuhuaji, na neecasereeri puetunu canaarajanaa, canaa miaqueso-coriquiano. Canaa sequereeri:

—Jajaa, nia masere. Nia miaquere. Nio panri cua cuaqueya.

<sup>27</sup> Na nuhuaji, Jesuuri raatonuque pataree. Pueyaso na secojonu nuhuaji nocuara, Jesuuri canaa na niqutioree. Canaa sequereeri:

—Niojiniji nia rature puetunu nijaniyajanaa. <sup>28</sup> Nioori cua nanaca, Pueyaso jiyanooniuria nijaniya. Cua nanacaari queraatia pueyacuara shoonutaniya, nojori jiyanooshaanura sesa nojori miishanojiniji. <sup>29</sup> Seetanujuanaa, majaari socua cua ratunu quiniutianiya niaata mijiria nio uva caacajiniji. Janiyari niaata na ratunutaniya cutarani janiya jaara tacatemohuani, pueyaracaanu Jiyaniijajanaa cua quiniuria. Jiyacaritij, jiyanoehua maninia quiniutianiyari cuno quishacari. Paari mariyata jiyanoehua shuquiriaatia quiniutianiya pueyaracaanuni.

*Jesu sequesacari Pedro, nojuaja nocuaji seetanutaniya  
(Mr 14.26-31; Lc 22.31-34; Jn 13.36-38)*

<sup>30</sup> Canaa jaara jaaquequejoquiaari supuetana David naajioneejinijini, na nuhuaji canaari quiojoquiaarini Olivo cuhuariquia tuhuananuucua.

<sup>31</sup> Jesuuri jiyacari canaa sequeree:

—Puetunu nijaniyajanaari cucua tiuuniu tarinitianutaniya quiari niu-cuaja. Naa naajiotasano quiyacuajaari Pueyaso sequesano tarijia: “Jan-yari borrego cojuana monutaniyani. Na borregohuari niyaquejonutaniya tamajaaja”. <sup>32</sup> Naajaa, janiya jaara samiitiarohua macujinijini, janiyari nia puetanutaniya Galilea jiyajiniani.

<sup>33</sup> Pedroori Jesu sequeree:

—Puetunu quia pueyajanaa jaara quiocua tiuuniu tarinitiare, janiya cu-taraari maja cua catenu quiniutianiya quiocuaji.

<sup>34</sup> Jesuuri Pedro sequeree saaja:

—Seetanujuanaa nio niucujani, caacaraja niunijiyaquishacarijia, quiaari naa pacutejonutaniya seetanu cucuaji: “Maja cua niishiniu cuno pueyano”.

<sup>35</sup> Pedroori Jesu sequeree:

—¡Pueya cuara moora janiyaqui, naajaa, majaari cua seetanu quiniutianiya quiocujaji!

Puetunu canaa Jesu pueyajanaari mariyata naa sequequiaaritij, taa Pedro sequeriquiaacuaani.

*Jesu secojosacari Getsemani cuhuariquiajania*  
(Mr 14.32-42; Lc 22.39-46)

<sup>36</sup> Na nuhuaji, Jesuuri tamonu cuhuariquiajania tiuquiiioquiaari canaa na saquiriojosano pueyata. Cuno cuhuariquia sesaari quiquiaari Getsemani. Jesuuri canaa sequeree:

—Niyaja nia cajitiuri cua secojosacari cua Que jati socua nia tacoji.

<sup>37</sup> Jesuuri Pedro jiyataquiaari, caapiqui Zebedeo niquiohuanio. Jesuuri juhuacatecara taraajequiaari. Jiyanhua tacaariquiaajaarihuaj.

<sup>38</sup> Jiyacaritij, Jesuuri nojori sequeree:

—¡Coojia quera jiaqueya jiyanhua cua taraajenuta! ¡Quera cusoyanijia! Niyaja cua sashitiuri. Nia sutere nia tarajanura janiya quenaaja.

<sup>39</sup> Jesuuri nojori shuriucujaji canujiyaree tamajaaja socua nojori tacoji. Jiyocuara jacamaseeri Pueyaso na secojonura. Naa sequereeri:

—¡Cua Quenaa, jaara na naata quiri, maja quenaaja cua cartenu naquiya cua miishaanura! Naajaa, janiya cuara miishaariaqui taa quia paniyacujani, maja juhua cua panishano.

<sup>40</sup> Na nuhuaji, Jesuuri na pueya niquishuhua. Nojoriiri saaja maqueturiquiaa. Pedro sequereeri:

—Pedronaa, ¿majate nia naata cuata sutenu quenaaja rupaquijia? <sup>41</sup> Nia sutere Pueyaso nia secojonura, niaa mariqui sesa miiriiri niaa jaara saniniujiushaare. Seetanujuanaa, poojiaari maninia miiniu panijia. Pa cuaqueyari saniniujia sasaca quiyacujua. Naacujitij, majaari pa naata maninia miiniu Pueyaso cumaquiyaquishacari pajaniya.

<sup>42</sup> Jesuuri socua tacatequiaariuhua tamajaaja Pueyaso secojonuhua. Naa sequereeri:

—Cua Quenaa, janiya jaara naquiya miishaareni, janiya cuara miishaariaqui taa quia paniyacujani.

<sup>43</sup> Jesuuri na pueyacia tacateyarohuacuahuaj. Maquetiuyano nojori riuritasuhuarihuaj. Nojori namijiaari saaja seecutayariquiaa jiyanhua nojori maquenu paniniutia. <sup>44</sup> Jesuuri nojori tarinitiaquiaari socua. Quiaquiaariuhuari na Que secojonuhua. Secojonu pacutequiaariiri taa na secojoriquiaa coteenucujani. <sup>45</sup> Na nuhuaji, na pueyacia nimiohuarihuaj. Nojori sequesuhuari:

—Quiarjia cutara nia maquetiuyare. Nia paniyatere cutara maquetunu. ¡Juaj! ¡Nia tojiri! ¡Janiyari tari quiatesaanutaniya sesa miijiaca pueyani! Nojoriiri cua miiniutianiya taa na panitiuyacujani. <sup>46</sup> ¡Nia saneeature! Pa quiaare. Cumaji tari cua quiateriquiano.

*Moronucua na paraa jaatucutasacari Jesu*  
(Mr 14.43-50; Lc 22.47-53; Jn 18.2-11)

<sup>47</sup> Jesu pocuasacarijia, Judasri jiyacari tiuquishii. Nio Judascuajaari niquiriyatu canaajinijinio Jesu doce saquiriojosano pueyajiniji quiquiaari. ¡Queraatia pueyari Judasta nijioquiaari! Nojoriiri secojonaa jiyaniijianucua jiyaramiquishano pueya quiquiaari, canaa Judiocuaca camarucua jiyaramiquishano pueyajuhua. Nojoriiri nijinaquetucujaja mueruu pooriquiaa, macacanio. <sup>48</sup> Judasri tari niishitioquiaari Jesu quiaturiquiano pueya taa nojori niishiniutianiyani teyanote Jesuni. Nojuajaquiiri tari nojori sequequiaari: “Teyano pueyano cua nujiya pa tiuquishacarini, cunocujajari

nojuaja. Niocua na quiasee ritia”. <sup>49</sup> Naacuajitij, Judas tiuquishacari Jesuucua, na sequeeseeri:

—Quiocua tiuquiyanijia Niishitiojonanaa.

Jiyacarijia na nujuureeri. <sup>50</sup> Jesuuri na sequeree:

—Cua rupuenanaa, ¿casaacua quia niyareerini?

Jiyacaritij, Judasta nijionaa pueyari Jesu quiatusee. <sup>51</sup> Jiyacaritij, tamonu canaajinijinio pueyanoori ritia shitiaree na nijiniaquetucua mueruu na shuucua. Nata jaateree secojonaa jiyaniijia seru numocoori. <sup>52</sup> Jesuuri na sequeree:

—¡Na co jiniacuma quia shiriohua quia mueruu! ¿Majate quia niishiniu, cante mueruuta miaqueja pueyanoni, mueruuta mosaanutaniyajaariuhuj? <sup>53</sup> ¿Quiaate niishiyaquiyajuhuj, janiya jaara cua Que sequereni cucua na jiyaramiquiniuria na seya jiyocuacaanuji na cojuanura janiya, cua Que maara ritia cucua jiyaramiquiri cincuenta mil na seyajinijinio? <sup>54</sup> Naajuhuj, janiya jaara naa cua Que sequere na cojuatenura janiyani, ¿tariucuacaanu Pueyaso Rupaajinia janiyajiniji naajiotasanotucua taa tohuateereni?

<sup>55</sup> Jiyacaritij, Jesuuri na paraa sequeree:

—¿Taateni? ¿Janiyateeri nohuasejojuani, naa nia tiuquitianura cua quia-nura mueruuta, macacatanio? Niaacuajaari juucua cua niqijia puetunu juucajanaa Pueyaso Secojojuu tiajinia cajiyano, pueya cua niishitiojosacari. ¿Casaara tii nia quiaaquiquianu janiyani? <sup>56</sup> Naajaa, naacuajitij puetunu nia miishanojuanaari tohuateenutaniya, taa tariucuacaanu Pueyaso Rupaajinia naajiotasaaquiaari janiyajinijicuaajani.

Jiyacaritij, canaa, na saquiriojosano pueyani, canaari Jesu tiujiaquiaari niquiriyatuni. Puetunu canaajanaari mashiyocuatereeni.

### *Judiocuaca camarucua nequesoreesacari Jesu*

(Mr 14.53-65; Lc 22.54-55, 63-71; Jn 18.12-14, 19-24)

<sup>57</sup> Jesu quianaari na jaatucuquiaari jiyaniijia Caifáscua. Caifásri pueyacuara secojonaa jiyaniijia quiquiaari. Judiocuaca camarucuaari tari Jesuucuaari rerejoquiaari Caifás tiajinia. Nojoriiri quiquiaari Moisés Rootasanojiniji niishitiojonaa, canaa Judiocuaca camarucuanio. <sup>58</sup> Pedroori Jesu nuhuajiquiaari tucuacaanuji secojonaa jiyaniijia tiajinia. Cuno puereetuuca tia shocuaari mataca quiquiaari. Pedroori tii carijiniacuma tiuquiquiaarijuhuj. Jiyaniijia Caifás seya tajinia cajishiiri, na niqiniuria taa nojori miiniutianiya Jesuni.

<sup>59</sup> Pueyacuara secojonaa jiyaniijianucuaari puetunu canaa Judiocuaca camarucuatanaa pajeriquiaa pueya, nojori saquiriojotanura na sapojonuta Jesuucua, na mosaanura. <sup>60</sup> Queraatia pueyari najuhuaana Jesuucua saquiriojotaree juucua. Nojori sequesanoori rimiajata quiquiaari tamasa sequesanojiniji. Na nuhuaji, socua caapiqui pueyari mariyata sesa saquiriojotaree Jesuucua. <sup>61</sup> Nojoriiri naa sequeree:

—Cuno pueyano naa sequecanutej: “Janiya jaara Pueyaso Secojojuu tia niyartareni, janiyari na tianu tucuatanutaniuhua jiuujianaraca juucajiniani”.

<sup>62</sup> Jesuuri sanaa nujuariquiaa saaja. Nocua, secojonaa jiyaniijiaari nujaree. Jesu sequereeri:

—¿Majate quenaaja quia riucuanuujua? ¿Quiaate pueya tojirii quiocuara saquiriojotaano? ¿Seetanutejanaa nojori sequesano?

<sup>63</sup> Jesuuri saaja sanaa na tojiriquiaa. Nocua, secojonaa jiyaniijiaari Jesu sequeree:

—¡Cua tojiri! Paa niya quiya Pueyaso niquiarani. ¡Cua riucua! ¡Majaari sapojonu! ¿Quiaate Cristo, Pueyaso Niyanu?

<sup>64</sup> Jesuuri na riucuaaree:

—Jaa. Nojuacuajanijia taa quia sequereecuajani. Cua tojitiare. Na nuhuaji, niaari cua niqiniutianiya Pueyaso miaquetajara cajiyano. Niaari cua niqiniutianiyajuhuaaj jiyocuacaanuji tacateyanohua cohuajajinia.

<sup>65</sup> Pueyacuara secojonaa jiyaniijia jaara tojiqiaari naa Jesu sequesantej, tama na toque sutareejaarijia na juaaniutia. Nata quiniaa sequereeri:

—¡Juhuej! ¡Nia tojishuriucuaara na sequesano! ¡Nojuajaari tama na cuaqueyajaaja jiyateya juhua Pueyaso na quiniuria! ¡Jiyanohua sacuaraatiaari na sequesano Pueyaso niqiuara! ¿Paatucua casaara sashiri socua tamonu saquiriojotanura nocuaraarini? Niaacuaja shusha tojitiaree tama na sequesanojuaaja sacuaraatia Pueyaso niqiuara. <sup>66</sup> ¿Taa pa miiniutianiyanoj? ¿Taa nia sequeyani?

Nojoriiri pueyacuara secojonaa jiyaniijia riucuaaree:

—¡Cuaara mosaaria!

<sup>67</sup> Jiyacaritij, tamasaari Jesu jiquioco riocjoree. Na jiquioco na masetejotureejaariuhuaaj. Tamasaca saniniuujia, Jesu namijia na morotunu nuhuaji, na mcoritia na piquitiuriiri. <sup>68</sup> Na nuhuaji Jesu nequesotatureeri:

—Quiaa jaara Cristo quiri, Pueyaso jiyarosano, quia niishiritioj, ¿cante quia piriini?

*Pedro seetasacari Jesuucuaaji*

*(Mr 14.66-72; Lc 22.56-62; Jn 18.15-18, 25-27)*

<sup>69</sup> Pedroori jiyacari tii cajiriquiaajaa carijiniacuma. Jiyacaritij, secojonaa jiyaniijia seruuri Pedro niqishii. Nojuajaari niyacoo quiquiaari. Pedro sequereeri:

—¡Jaj, quiaacuaja cuno Jesuta rucuaanejua, cuno Galilea jiyajinijinio pueyanotani!

<sup>70</sup> Pedroori jiyacari seetaree puetunu pueya niquiarajanaa. Naa sapojoreeri:

—¡Maja cua niishiniu casaa quia sequeyani!

<sup>71</sup> Pedroori tohuateyajiria canujiyaree. Jati, tamonu niyacoori na niquiri-ijuhuaaj. Cuno seruuri jiyacari tii quiniaa sequeree:

—¡Nio pueyanoori cuno Jesuta quijiajuhuaaj, cuno Jesu, Nazaret tiacajini-  
jiniio pueyanoni!

<sup>72</sup> Pedroori Jesujiniji socua seetanu camiriohuacuuhuaaj:

—¡Maja cua niishiniu cuno pueyano! ¡Pueyasocuajaari niishiya, seetanujua-  
naa nia sequeyanijia!

<sup>73</sup> Pasaja na tarishiniu nuhuaji, quiniqui quiniaari Pedro sequetusee:

—¡Quiaaqui seetanujuaanaa cuno Jesu pueyajinijinio! ¡Quiaari juhua nojori  
pocuaajuhuaaj!

<sup>74</sup> Jiyacaritij, Pedroori socua jiyacaterree sapojonura. Naa cuno pueya sequereeri:

—¡Pueyasocuajaari niishiya maja cua niishiniu cuno pueyano, niaa na sequeyani! ¡Pueyasocuajaari cua sequesano tojiya! ¡Majaari cua sapojonu  
niajaniya!

Caacarajaari canashiyaquiji niunijioquee. <sup>75</sup> Jiyacaritij, Pedroori naa cuno niucuaaja Jesu sequesano niishiquii: “Pedronaa, caacaraja niuni-  
jiaquishacarijia, quiaari tari janiyajiniji seetanu pacutejonutaniya”. Pedroori tia shocua matacainiji tohuataquiaari ritia. ¡Jiyanohua nujuquequeeri na taraajenuta!



## 27

### *Judiocuaca camarucua niqutiosacari Jesu jiyaniijia Pilato* (Mr 15.1; Lc 23.1-2; Jn 18.28-32)

<sup>1</sup> Tariquicuaji, puetunu pueyacuara secojona jiyaniijianucujanaari rerejoree narta Judiocuaca camarucuata. Nojoriiri roojotooree taa na miitiuniutianiya Jesu na motenurani. <sup>2</sup> Na nuhuaji, Jesu morotureeri na jaatucutunura jiyaniijia Pilatoocua. Pilatoori jiyaniijia Césarjanaa jiyatesano quiquiaari Judiocuaca jiyaniijia na quiniuria Judea jiyajinia.

### *Judas Iscariote cusosacari*

<sup>3</sup> Judasri jiyano hua macuhuajequiaari na niquishacari Jesuuri mosaanutaniya na quiatenuucua nojuaja. Na tacaaniutia, Judasri quiaquiaari secojona jiyaniijianucuaacua, canaa Judiocuaca camarucuaacuanio, nojori na niqutionuhuara cuno treinta cumaneeca. <sup>4</sup> Judasri nojori sequeese:

—janiyaqui sesa miiriucuaani, najuhuana cua quiatenuucua maninia pueyano nijaniya!

Nojoriiri saa na riucuaareejaa:

—Naajaa. Maja canaa miishano. Cunocujajaari tama quia miishanojuaja.

<sup>5</sup> Judasri nojori cari cuno treinta cumaneeca jatatee Pueyaso Secojoua tijajinia. Tiji quiacuhuari. Na riquiajiniji morotaquiaari sohuaneyocuaari. Naa cusoquiaariiri. Sohuaneyocuaacujaja jaasutaari. <sup>6</sup> Secojona jiyaniijianucuaari Judas jatasano cumaneeca reratequiaari. Nojoriiri tama seque-tooquiaarijiaaja:

—Nio cumaneecaari maja na naata Pueyasora racatajajinia niasocoriquiano. Nio cumaneecaari pueyano monu sami.

<sup>7</sup> Puetunu nojorijianaa jaara niishiriojoquiaari taa na miitiuniutianiya cuno cumaneecani, nojoriiri marau paniyoru pueyano cuhuariquia masequiaari cuno cumaneecata. Cuno cuhuariquiaari jiyatesaaquiaari ruconaa jamojuara, nojori jaara cusoyare Jerusalén tiacajinia nojori quishacari. <sup>8</sup> Pueyano monu samitia cuno cuhuariquia masesaanucua, cuno cuhuariquiaari sesojosaaquiaari “Nanaca samitia masesano cuhuariquia”. Naa quiyajaari na sesa. <sup>9-10</sup> Naacujitij, Pueyaso sequenu panishano caminiujiunia supuetana Jeremías sequesanoori maninia tohuatequiaari. Nojuajaari naa sequequiaaritij:

“Nojoriiri na treinta cumaneeca pataquiaari cuhuariquia masenura marau paniyoru pueyanojiniji, taa cua jiyaniijia Pueyaso sequequiaari janiyacujani. Tarijia, cuno treinta cumaneecata, maninia pueyanoori nata masesaaquiaari. Israel pueyari naa sequequiaaritij: ‘Cuaara treinta cumaneecata masesaaria cuno pueyano’ ”.

### *Pilato nequesoreesacari Jesu* (Mr 15.2-5; Lc 23.3-5; Jn 18.33-38)

<sup>11</sup> Jesuuri jaatucusaquiaari jiyaniijia Pilatoocua. Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Jaa. Naacuaaquinatejaj, taa quia sequereecuajani.

<sup>12</sup> Secojona jiyaniijianucua, canaa Judiocuaca camarucuanio, nojori jaara Jesuucua saquiriojotariquiaa, Jesuuri sanaa tojiriquiaa nojori.

<sup>13</sup> Naaratej, jiyaniijia Pilatoori Jesu sequere:

—¿Majate quia tojinu nojori, quicuara tonujiyano queraatia?

<sup>14</sup> Majaari Jesu riucuanu quirii quenaaja. Pilatoori nocujaja jiuujiateree, casaara na riucuaaquia quenaajani.

*Pilato sequesacari Jesuuri mosaanutaniya*  
(Mr 15.6-20; Lc 23.13-25; Jn 18.38–19.16)

<sup>15</sup> Puetunu Pascua juucarajanaa, Pilatoori nujuatejojuajinia nujuatesano pueyano cartenu jiitiquiaari. Judiocuaca panishano pueyanoori cartesaquiaari pueyaracaanu. <sup>16</sup> Cuno quishacari, tamonu pueyanoori nujuatejojuajinia nujuatesano quiriquiaa, Barrabás jiyanishano. Puetunu pueyajanaari na niishijia sesa na miiniuucua. <sup>17</sup> Pueya rerejosacari Jesu na nacojotasacari Pilato niquiara, Pilatoori nojori nequesotaquiaari:

—Judiocuacanaa, ¿teyano pueyano nia paniya cua cartenurani, Barrabáste, Jesu soj? Nojuajaari pueya sequesano, Pueyaso jiyarosanona.

<sup>18</sup> Pilatoori naa nojori nequesotaree na niishishacari casaara canaa Judiocuaca camarucua monu paniriquiaa Jesuni. Puetunu pueyajanaari tari canaa camarucua tojitiaquiriquiaa, nojori tojitianura Jesu. Cunora, camarucuaari Jesu monu paniriquiaa.

<sup>19</sup> Pilato cajishacari na nequesoreesaqui, necocuaari nocua jiyaroquiaari tamonu na seru, naa na numootenuratej: “¡Narejatejataj, nareja! ¡Janiyari niucua maquiyojoree puereeta cuno pueyanoocujini!”

<sup>20</sup> Jiyacaritij, secojonaa jiyaniijianucuaari, canaa Judiocuaca camarucuata pueya niishitiojoriquiaa nojori sequenura, Barrabás cuaara cartesaaria, Jesu cuaara mosaaria saniniuujia. <sup>21</sup> Naacuajitij, jiyaniijia Pilato jaara pueya nequesotaquiaariuhua teyano nojori paniya na cartenurani, nojoriiri na riucuaaree:

—¡Barrabás quia cartere!

<sup>22</sup> Pilatoori nojori nequesotaree:

—¿Naatee? ¿Taa cua miiniutianiya Jesuurinitioj, pueya sequesano “Pueyaso jiyarosanoni?”

Puetunu pueyajanaari ritia na riucuaaree:

—¡Cuaara teetsaaria niyacutesanojinia!

<sup>23</sup> Pilatoori nojori nequesotarohuacuhuj:

—¿Casaarateni? ¿Sesa miiriitijiaara?

Pueyari saaja socua jiyanohua nacaree:

—¡Cuaara mosaaria niyacutesanojinia teetesano!

<sup>24</sup> Pilato cartenu saniniujiushacari Jesu juucua, pueyari saaja socua jiyanohua nacooriguiaa. ¡Socua jiyanohua juaaquiriquiaari! Pilato niishishacari maja na naata quiniutianiya Jesu cartenu, taa na paniriquiaa juucuaajani, nojuajaari mohuaca maseree. Pueya niquiara shuquitiareeri. Na shuquitiasacari, Judiocuaca sequereeri:

—¡Majaari cucua na tiutiasaanu quiniutianiya nia mosacari nio maninia pueyano! Cunoori maja cua miishano quiniutianiya. ¡Cunoori tama nia miishanojuaaja!

<sup>25</sup> Puetunu pueyajanaari na riucuaaree:

—Naajaa. ¡Jaara mosaare, cuaara tiutiasaaria canaacua, canaa niquiohuacuanio!

<sup>26</sup> Na nuhuaji, Pilatoori Barrabás tohuateree nujuatejojuajiniji. Saniniuujia Jesu majacutereeri. Na nuhuaji, na soldadohua na niquitioreeri niyacutesanojinia nojori teetesocoriquiano.

<sup>27</sup> Jiyaniijia Pilato soldadohuari jiyacari Jesu jaatucuree Pilato tiajiniaaco. Nojoriiri puetunu narta soldadohuajanaa rerejoteree Jesu shocuaqueya.

<sup>28</sup> Na nuhuaji, nojoriiri Jesu toque jocuaturee. Tamonu tucuaque toque

cushitishaareeri, shaaruque, juhua jiyaniijajanaa cushishano. Naa na miitiuriiri na macaatiniuria. <sup>29</sup>Nojoriiri juhuacontucua maaturee na nacaquerajuhuj. Na nuhuaji, na cushititiurii Jesuuri. Naajua niqutiosaareejaariuhuj, juhua na macara, na miaquetajata na muetunura juhua jiyaniijia. Na nuhuaji, soldadohuari Jesuucara mojuquetacoquiaari. Nojoriiri naa na macaatirii:

—¡Jejee, Judiocuaca jiyaniijianaa!

<sup>30</sup>Nojoriiri Jesu riocojoree. Na naajua na jaariutiatureeri. Nataja na naca piquitiuriiri. <sup>31</sup>Naa nojori macaatiniu nuhuaji Jesutej, nojoriiri cuno tucuaque toque jocuaquiaariuhua nocuaji. Tama na toquejaaja cushitishaaruari. Na nuhuaji, nojoriiri na jiyataquiaari na teetenura niyacutesanojinia.

*Jesu teetesacari niyacutesanojinia*  
(Mr 15.21-32; Lc 23.26-43; Jn 19.17-27)

<sup>32</sup>Nojori tohuareetasacari tiacajiniji puecoosaquiria nojori quiojosacari, nojoriiri tamonu pueyano naacumaa. Nojuajaari Cirene jiyajinijinio pueyano quiquiaari. Simónri na sesa quijia. Soldadohuari cuno Simón pateree Jesu teetejara niyacutesano. <sup>33</sup>Nojoriiri tiuquiiijiosee sesa miijiaca puecoosaqui. Pueya puecoosaquini, na sesa quiquiaari “Gólgota”. Nioori pueyano rupaaajinia sequeya “Pueyano nacaco”. <sup>34</sup>Quiniqui, soldadohuari Jesu raateree vino juucua, casaa piajata cojitishano. Jesu jaara na saniquiaari, majaari na ratunu quirii.

<sup>35</sup>Jesu jaara niyacutesanojinia teetesaaquiaari tari, soldadohuari saitia tacuarishijioree nojori niishiniuria cante Jesu toque poonutaniya nerani. Naacuajitij, tama nojoriijaarijia Jesu toque seraatiaquiaari. Naa tohuateequiaariiri tariucuaaanu Pueyaso sequesano caminiujiunia sequesano, nojuaja jaara naa naajiotaquiaari:

“Pueyari saitia tacuarishijioree cua toque nojori seraatianura”.

<sup>36</sup>Na nuhuaji, cuno soldadohuari cajitiuquiaari Jesu na cojuanura.

<sup>37</sup>Jesu nacaacuma, naajioneeri rupotasaquiaari. Tii naajiosano quiriquiaari casaara na teetesareeni. Naa naajiosano quiriquiaari: “Nioori Jesu, Judiocuaca Jiyaniijia”.

<sup>38</sup>Caapiqui nohuasenuujuacaari Jesu shuriucua teetesaaquiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara. <sup>39</sup>Tamasaca pueya tajishacari nucuaco Jesu shuriuquico, nojoriiri Jesu macaatiquiaari. Na maanuquenuta, nojoriiri Jesu sequetuquiaari:

<sup>40</sup>—¡Jaj! ¡Cumaacaraca quijia naatiijia! Quiaacuajaari sequeja quiaa jaara Pueyaso Secojoua tia niyartare, quia naata na tianu tucuatunuhua jiuujianaraca juucajinia. ¿Naatee? ¡Quiaa jaara naa cumaacaraca quiriritij, canaa niquiara quia roserecuarajaj, quiaa jaara Pueyaso Niyanu quiri seetanujanaa!

<sup>41</sup>Secojonaa jiyaniijianucuaari tii quiriquiaajuhua Moisés Rootasanojiniji niishitiojonaata, canaa Judiocuaca camarucuanio. Nojoriiri Jesu macaatiriquiaajuhuj. Tama sequetooriquiaajaarijia:

<sup>42</sup>—Saaja tamasa naatanijiojuaquiri. Maja cutaraari na naata tama nocuajijiaaja tacunu. Jaara seetanujuanaa pa Israel pueya jiyaniijia quiri, cuara roseera quiarijia pa niquiara niyacutesanojiniji, nocua pa tiuuniuria.

<sup>43</sup>¡Pueyasocua tiuujia naatiijia! Jaara naa quiriritij, Pueyaso cuara na roshiniria, nojuaja jaara seetanujuanaa Pueyaso panishano quiri. Nojuacuajaari pa sequeja: “Janiyari Pueyaso Niyanuni”.

<sup>44</sup> Cuno caapiqui nohuasenuujuaca Jesu shuriucua teetejosano quiriquiaani, nojoriiri Jesu macatiriquiaajuhuj.

*Jesu cusosacari*

(Mr 15.33-41; Lc 23.44-49; Jn 19.28-30)

<sup>45</sup> ¡Panacari, mijiriaari ninishiquiria quiquii! Pananu mueecosacari cuhuatemohuari. <sup>46</sup> ¡Jiyacaritij, Jesuuri jiyanoehua nacaquiaari naatej:

—¡Elí, Eliinaa! ¿lama sabactani?

Nioori pueyano rupaaajinia sequeya: “¡Cua Pueyasonaa, cua Pueyasonaa!, ¿casaara quia carteree janiyani?” <sup>47</sup> Tamasaca na shuriucua nujuatunaari na tojitiariquiaa. Nojoriiri sequeree:

—¡Nia tojiri! ¡Supuetana Elías jiiquioonuyano! Noo Elías, tariucuacaanu pueyara Pueyaso sequesano caminiujiunia quiquiaaritij.

<sup>48</sup> Tamonuuri ritia netequee namasu casaa na riniuria. Naajuaacua na morotanu nuhuaji, jereeca vinojinia na shiriiri. Na nuhuaji, Jesuucua na shiitioreeri na raatenura. <sup>49</sup> Tamasacaari sequeree:

—¡Pa shanacure! ¡Elías jiyoteeri nocua niniutianiya na roshininiuria niyacutesanojiniji!

<sup>50</sup> ¡Jiyacaritij, Jesuuri jiyanoehua nacarohua! ¡Na nuhuaji na sohanu tohuataniriiri! ¡Cusoqueeri! <sup>51</sup> Pueyaso Secojojua tiajinia, shiquiaruque toquejiniji sohuacaari quiquiaari Pueyaso Quishaqui mishiquiotaja. ¡Jesu cusosacari, cuno toqueeri sutequee jiyocuacaanuji jiyocuara puetunujuaanaa! ¡Rijiaari jiya jiuuquiutiaquiaari jiyanoehua! ¡Sairi jiaquetacoquiaari noojiaacoji! <sup>52</sup> ¡Macunucua raacaari riatequequiaari! ¡Queraatia tariucuacaanu Pueyasoocua tiuuniaari samiiticoquee na raacajinia! <sup>53</sup> Jesu jaara samiitiaquiaariuhua, cuno samiitiaconohua pueyari tohuareetaquiaari na raacajiniji. Nojoriiri Jerusalén tiacajinia tiuquitiaquiaari. Nojoriiri queraatia pueyacua muetaquiaari tii, Pueyaso panishano tiacajiniani. <sup>54</sup> Soldadoehua capitánri na pueyata Jesu cojuariquiaa, Jesu cuara cusoyarejaatijia nojori niqiuara. Nojori jaara jiya niqiuquiaari jiuuquiutiaano, socua puetunu nojori niquishanojuanaano, nojoriiri jiyanoehua puereturee. Sequetureeri:

—¡Nio pueyanoqui seetanujuanaa Pueyaso Niyanu quiquianu!

<sup>55</sup> Queraatia maajipohuari tii quiriquiaajuhuj. Nojoriiri tucuacaanuji shootiaturiquiaa Jesu. Nojoriiri Jesu nuhuajiquiaari Galilea jiyajiniji, Jesura pueraquenuuriquiano. <sup>56</sup> Cuno maajipohua tajinia quiriquiaari María Magdalena, Santiago nucua Maríajuhuj, José nucua Maríano, mariyata Zebedeo niquiohua nucuanio.

*Jesu quete niasacari raaco*

(Mr 15.42-47; Lc 23.50-56; Jn 19.38-42)

<sup>57</sup> Tamonu pueyanoori quiquiaari Arimatea tiacajinijinio. Jiyanoehua casamiriaca quijiaari. Na sesa quiquiaari José. Nojuajaari tarijia Jesu tojijiaara quiquiaari. Joseeri Jesu cusu juucaja tiuquiquiaari cuno tenacari. <sup>58</sup> Joseeri Pilatoocua quiaquiaari Jesu quete na masenura. Pilatoori na pueya sequeree cuara na niqutiosarianoj. <sup>59</sup> Joseeri Jesu quete paquiaari na jeenucuanura raaco na niasocoriquiano. Na jiuniooreeri quenaaruque cohuaaque toquejinia. <sup>60</sup> Na nuhuaji na niaquiaari tama na raacojaarijia. Quiarinio raa quiquiaariiri, José jiuutianishano saajiajinia. Na nuhuaji, Joseeri puereetuca saajia saquitiniquiaari raa tiootiuria. Quiacuhuari. <sup>61</sup> María Magdalenaari na sesaanucua cajitiriquiaa raa caneja taquijiria.

*Soldadoehua cojuasacari Jesu raa*

<sup>62</sup> Pascuara jeenucuanu juuca nuhuaji, secojonaa jiyaniijianucuaari Pila-toocua quiojoquiaari Fariseocuacata. <sup>63</sup> Naa na sequetuseeri:

—Jiyaniijianaa, canaari cuno sapojoua pueyano sequesano niishiquini, na sequesano saminio na quishacarijia. Nojuajaari sequeja: “Janiyari jiuujianaraca juucajinia samiitianutaniuhuani”. <sup>64</sup> Nocuaji na raa quia cojuatere maninia tiosano, jiuujianaraca juuca cuaara shocorejaatijia, na pueya mariqui niucua macu nohuasequeeri. Nojori jaara na nohuasere, nojoriiri sequenutaniya Jesu samiitiarohuacuaa. Nojori jaara na sapojore pueyatej, socua jiyacatenutaniyari Jesu sequesano, nojuaja jaara sequecanu: “Janiyari Pueyaso Jiyarosani”.

<sup>65</sup> Pilatoori nojori sequeree:

—Niya quiyacuaja cua soldadohua. Nojori nia cojuatere maninia cuno raa, taa nia paniyacuajani.

<sup>66</sup> Nojoriiri soldadohua nujuatejoquiaari raa nojori cojuanura. Raa tiotiuuri rupanacusaquiaarijuhuaj jiyaniijia Pilato sesa naajiotajata.

## 28

### *Jesu samiitiasacariuhua*

(*Mr 16.1-8; Lc 24.1-12; Jn 20.1-10*)

<sup>1</sup> Samaatenu juuca jaara shocoquiaari, coteenu juuca semaanajinijinio juhuaquesacari, shusha cuhuatesacari, María Magdalenaari raa niquiniucua quiariquiaa na sesaanucuata. <sup>2</sup> ¡Canashiyaquiji, rijiaari jiyanhua jiuuquiutiaree! Cunoori quiquiaari Pueyaso seru rosenuucua jiyocuacaanuji raacua. Raa tiotiu saajia saquitinishiiri. Na nuhuaji, saajiaacua cajiriohuari. <sup>3</sup> ¡Pueyaso seruuri niquishaaquiaari shacantuuca juhua miacana! Na toqueeri jiyanhua cohujaque quiquiaari, juhua sohanatuu. <sup>4</sup> Raa cojuatunaari jiyanhua shiriiquitiuquiaari nojori niquishacari Pueyaso seru. Jiyanhua tetecatureeri. Na puerenuta socua cusojonuureeri. <sup>5</sup> Maajipohua jaara tiuquiquiaari raajinia, Pueyaso seruuri nojori sequeree:

—Maja nia shiriiquiniu. Janiyacuajaari niishiyani niaari Jesu pajeya, niyacutesanojinia mosanotej. <sup>6</sup> Maja niya na quiniu. Tari samiitiarohuano, taa nojuaja sequequiaari nijaniyacujani. Miji. Nia niquishushiiria na masaqui. Shaaqui. <sup>7</sup> Ritia nia quiaarohua. Na saquiriojosano pueya nia sequesuhua: “Jesu tari samiitiarohua. Nojuajaari nia puetanutaniya Galilea jiyajinia. Niaari jati na niquiniutianiya”. Janiyacuajaari tari nia sequereeni. Naa nia pohuatasuhua na pueya.

<sup>8</sup> Maajipohuari masaacujatanuuriquihua raajiniji na puerenuta, na shuquiriniutiajuhuaj. Nojoriiri socua netecuatiuyarohuaquij, canaa na pohuatanuhua Pueyaso seru sequesano nojori. <sup>9</sup> ¡Jiyacaritij, Jesujuanaari canashiyaquiji nojoriicua muetaquee nuujinia! Nojori saruhuatareeri. Maajipohuari nocua catecanoree. Na cariquimiaji mojuquetacoreeri. Jesu niuhuaca quiatureeri. Jesu shootiatureeri na jiuujiatenuta. <sup>10</sup> Jesuuri nojori sequeree:

—Maja nia puerenu. Nia quiaarohua. Cua pueya nia sequesuhua nojori cuaara quiojora Galilea jiyajinia. Nojoriiri seetanujuanaa cua tapueycuaca. Nojoriiri jati cua niquitiuniutianiya.

### *Raa cojuanaa pohuatasano*

<sup>11</sup> Maajipohua quiojosacariuhua, noojiaqueya raa cojuanaajinijinioori tiacajinia quiojoquiaariuhua pueyacuara secojonaa jiyaniijianucua nojori pohuatanura nojori niquishano. <sup>12</sup> Pueyacuara secojonaa jiyaniijianucuaari

canaa Judiocuaca camarucuata rerejoree na roojotoonura taa na miitiuniutianiyani. Na nuhuaji, nojoriiri queraatia cumaneeca niqutioquiaari raa cojuanaa, pueya niqiara nojori pohuatanura tamaatia nojori niquishanojiniji. <sup>13</sup> Soldadohuari naa rootasaquiaaritij:

—Niocua naa sequere pueyatej: “Canaa maquesacari, Jesu pueyaqui-iri niucua nohuasequee Jesu quete raajiniji”. Niocua naa sequeretej. <sup>14</sup> Jiyaniijia Pilato jaara niishiri naa nia pohuatasacaritij, majaari nia puerenu. Canacuajaari na shiniajanutaniyani jaara juaari. Naacuajitij, majaari na juaaniu quiniutianiya niajaniya.

<sup>15</sup> Jiyacaritij, soldadohuari cumaneeca maseree. Nojoriiri naa pohuatanu coteequiaari taa nojori rootasaareecuajani. Nojori cuaracashishanoori ritia caminiujiushaaquiaari canaa Judiocuacara. Naacuajitij, canaa Judiocuacaari naa sequeyajaa quiarijia.

*Jesu rootasacari na pueya na jiyaramiquiyaquishacarijia nojori*  
(Mr 16.14-18; Lc 24.36-49; Jn 20.19-23)

<sup>16</sup> Canaa, Jesu once saquiriojosano pueyani, canaari Galilea jiyajinia quiojoquiaari tamonu tuhuananuucuanu. Jesuuri canaa sequequiaari canaa quiojonura tiriara, tii canaa coquetonura nata. <sup>17</sup> Canaa niquishacari Jesu quiyano tii, canaari nocuara mojuquetacoquiaari canaa shuquiritianura nojuajani. Tamasaca canaajinijiniori jyaniriquiaa maja naasucuaari Jesu.

<sup>18</sup> Jesuuri canacua catecanoree. Canaa sequereeri:

—Janiyari puetunu cumaacajanaa niqutiosaareeni, Jiyaniijiajanaa cua quiniuria jiyocuacaanu, mijirianio. <sup>19</sup> ¡Naaratej, nia quiojore! ¡Puetunu pueya-puejanaa nia pohuatare cua rupaa, cua tojitiajacara nojori quiniuria! Moojinia nia tiuquinijiore cua tojitiajaca Pueyaso sesajinia, nojori rupuesacari pa Que Pueyaso, janiya, na Sohuanunio. <sup>20</sup> Nojori nia niishitiojore puetunu cua rootasanojuanaa niajaniya, nojori tojishocoriquiano. Nia niishiri nio: jjanuyacuajaari niaata quiniutianiya pueyaracaanuni, jiya cuara puequerejaatijia!



## MARCO NAAJIOTASANO JESUCRISTOJINIJI

*Cariiquia jiyajinia Tiuquinijiona Juan poojotasacari Pueyaso rupaa*  
(Mt 3.1-12; Lc 3.1-9, 15-17; Jn 1.19-28)

<sup>1</sup> Pueyaso Niyanu Jesucristojiniiri naa coteetasaquiaari pohuatanutej.  
<sup>2</sup> Tariucuacaanu pueyara Pueyaso sequesano caminiujiunia Isaíasri Pueyaso Niyanu niyacari naajiotaquiaari. Naajiotaquiaariiri taa Tiuquinijiona Juan poojotanutaniya pueya jeenucuanura nojori jiuujiani, niriqiano Jesu tojjia nojori quiniuria. Isaíasri naa naajiotaquiaari Pueyaso sequesano miriqui Neyanutej:

“Janiyari quiocuaji jiyaronutaniya tamonuni, quiocuaji quia nuu jeenucuariquiano. <sup>3</sup> Na nacanuari tojishaanutaniya cariiquia jiyajinia. Naa pueya sequeyari: ‘¡Nia jeenucuare Jiyaniijia nuu! ¡Nia nuunore maninia, maja shuutiuniu!’ ”

<sup>4</sup> Quiari naataja, Tiuquinijiona Juanri seetanujuanaa naa miiquiaari cariiquia jiyajinatej. Nocua nijionaa pueya tiuquinijioriquiaa moojiniaari. Tiuquinijiona Juanri cuno pueya sequequiaari:

—¡Nioojia nia tacatore sesa nia miiniujiniji, moojinia cua tiuquinijionura nijaniya! ¡Pueyasocua sesa nia miishanojiniji nia jiyanoori puetunujuanaa!

<sup>5</sup> Puetunu Judea jiyajinijinio pueyajanaari nocua nijioquiaari nojori tojtianura nojuaja, Jerusalén tiacajinijinio pueyanio. Cuno pueya jaara sesa na miishano pohuataquiaari Juan niqiuara, Pueyaso niqiuarajuhuj, Juanri nojori tiuquinijioquiaari Jordán moojinia.

<sup>6</sup> Tiuquinijiona Juan toqueeri camello cajacajiniji shitiasano quiquiaari. Na cajiniocua na camarucutesanoori quiquiaari shoque sacuanijiasano. Na miaquesanoori quiquiaari sequeru, samiyatunio, cariiquia jiyajinia na riuriatasano. <sup>7</sup> Juanri pueya niqiuara pohuataquiaari naatej:

—Tamonuuri cua nuhuaji niniutianiya. Nojuajaari socua cumaacaraca janiyajiniji. Janiya maara shuquiriaatia quirini, nojuaja jaara quenaaja cua sequere cua naacutanura nojuaja, juhua na seru, na sapatu neyocua cua samaacatanura. Nojuajaari Jiyaniijiajanaa cutara janiyajiniji. <sup>8</sup> Janiyari nia tiuquinijiya moojiniani, juhua jeequejosano nia quiniuria sesa nia miishanojiniji. Cua nuhuaji ninia cutaraari Pueyaso Sohuanu tiuquinijionutaniya nioojiajinia, na cumaaca nia jiitianura, seetanujuanaa maninia mijiaca nia quiniuria.

*Jesu tiuquinishacari moojinia*  
(Mt 3.13-17; Lc 3.21-22)

<sup>9</sup> Jesuuri jiyacari Nazaret tiacajiniji quiaquiaari Tiuquinijiona Juan-cua. Nazaret tiacaari Galilea jiyajinia quijia. Tiuquinijiona Juanri Jesu tiuquiniquiaari Jordán moojinia. <sup>10</sup> Jesu tacasacari moojiniji na tiuquinishaanu nuhuaji, jiyacaritij, nojuajaari jiya cajiniocua niqiuquiaari ri-ateyano. Pueyaso Sohuanu niqiriiri nocua roseyano juhua mococoonu. Nocua tiuushiiri. <sup>11</sup> Jiyacaritij, jiyocuacaanuji tojishaquiaariiri Pueyaso pocuaano. Naa Jesu sequequiaariiri:

—¡Quiaari Quiyanuniyojua, cua panishano! ¡Jiyanojua quia timitiaanjia!

*Samaruhua jiyaniijia saniniujiushacari Jesu*  
(Mt 4.1-11; Lc 4.1-13)

<sup>12</sup> Na nuhuaji, Pueyaso Sohuanuuri Jesu jiyatequiaari ritia cariiquia jiya-jiniara. <sup>13</sup> Jesuuri cuarenta juuca shocojotequiaari tii tamajaaja, puereeta

jiya camaruhua casami quishaqui. Tii na quishacari, Satanásri Jesu sanini-  
ujiuriquiaa na tojijiara Jesu quiniuria juucua. Na nuhuaji, Pueyaso seyari  
nocua nijioquiaari na naacunura, na mianuutenurajuhuj.

*Jesu coteesacari poonijionu Galilea jiyajinia*  
(Mt 4.12-17; Lc 4.14-15)

<sup>14</sup> Jiyaniijia Herodes jaara Tiuquinijiona Juan nujuatequiaari nujuatejo-  
juajinia, na nuhuaji, Jesuuri Galilea jiyajinia quiaquiaariuhua. Nojuajaari  
pueya niquiara poojotaquiaari tii, maninia pohuatasano Pueyasojiniji, taa  
Pueyaso jitianutaniya na muerasuni. <sup>15</sup> Jesuuri naa sequequiaari pueyatej:  
—Nia sequeyanijia, nio pa quishacarini, quiarijiaari Pueyaso  
jiyanooshacari pueya, na muerasura nia quiniuria. Cunora, Pueyasojiniji  
cua pohuatasanoocua nia tiuuri. Nioojia nia tacatore sesa nia miiniuujiniji,  
Pueyaso tojitiajaca nia quiniuria.

*Jesu saquiriojosacari pueya, na tarajariquiano*  
(Mt 4.18-22; Lc 5.1-11)

<sup>16</sup> Galilea caminia shuriuquioco Jesu rucuanijosacari, nojuajaari Pe-  
dro niquiquiaari, tarajanu Andrésnio. Nojoriiri shiyaru jaquerootanaa  
quiquiaari. Jiyacaritij, nojoriiri shiyaru jaquerootariquiaa caminiajinia.  
<sup>17</sup> Jesuuri nojori sequesee:

—¡Miji, cua nuhuajitiuyare! Janiyari nia jiyatenutaniya pueya quiojuara  
saniniunijia, juhua sapitiaaja.

<sup>18</sup> Nojoriiri ritia na shiyaru tiujiaquiaari. Jesuta quiojiyareeri.

<sup>19</sup> Socua shiitianiyojua na taccoji Jesu canujusacari, Santiago niquishiiri,  
tarajanu Juannio. Nojoriiri na shiyaru cushipirijionuuriquiaa botejinia. No-  
joriiri Zebedeo niquiohua quiquiaari. <sup>20</sup> Jesuuri jiyacari nojori sequequiaari  
nata nojori quianurajuhuj. Nojoriiri na que Zebedeo tiujiaquiaari botejinia  
na naacunaata. Nojoriiri Jesuta quiojoquee.

*Samaruraca pueyanojiniji pohuatasano*  
(Lc 4.31-37)

<sup>21</sup> Nojoriiri Capernaum tiacajinia tiuquishii. Samaatenu juuca, Jesuuri  
tiuquiquiaari Pueyaso secojojua tiajinia. Tii pueya niishitiojonu cotee-  
quiaariiri. <sup>22</sup> Pueyari jiyanohua jiuujiatequiaari na rootasano nojori to-  
jishacari. Jesuuri juhua jiyaniijiajanaa niishitiojoriquiaa. Majaari na ni-  
ishitiojonu quiquiaari taa Moisés Rootasanojiniji niishitiojonaa niishitiojo-  
quiaaricuaani. Nojoriiri saaja Moisés pohuatasanojiniji caminiujuquiaari,  
pueya niquiara nojori pohuatasacari Pueyaso Rupaa. <sup>23</sup> Samaruraca  
pueyanoori Pueyaso secojojua tiajinia quiriquiaa tiijihuj. Nojuajaari  
nacaquiaari:

<sup>24</sup> —¡Nazaret tiacajinijinio Jesunaa!, ¿quiaateeri tari canaacua nimiaa, canaa  
quia shaajanura? Janiyari quia niishiyani. ¡Quiaacuajaari Pueyaso Niyanu!

<sup>25</sup> Jesuuri cuno samaru juaarii. Na sequereeri:

—¡Quia sanaajere! ¡Quia tohuatare nio pueyanojiniji!

<sup>26</sup> Jiyacaritij, samaruuri jiyanohua taraatia miirii cuno pueyano.  
Jiyanohua na sariyotequiaariiri na tohuatasacari nojuajiniji. Juhua macu  
tiujiaquee pueyanoori. <sup>27</sup> Puetunu pueyajanaari shiriiquitiquiaari. Tama  
nojoriijaarjia nequesoreetooquiaari:

—¿Casaatucuaa nioni? ¡Nioruhua quiarinio niishitiojosano! ¡Nio pueyanoqui  
cumaacaraca! ¡Taa samaruhua tojitiaa nojori na jiyarosacariiri!

<sup>28</sup> Pueyari ritia caminiujuquiaari Jesujiniji puetunu Galilea jiyajiniajanaa.

*Jesu naatanishacari Simón Pedro reyarucua*  
(Mt 8.14-15; Lc 4.38-39)

<sup>29</sup> Jaara tohuareetaquiaariuhua Pueyaso secojojua tiajiniji, Jesuuri Simón, Andrés tiajinia quiaquiaari Santiagota, Juantano. <sup>30</sup> Simón reyarucuaari naseeca matariquiaa maquetujinia. Cusosutuhua. Tiajinia quini-aari Jesu sequeturee nojuaja cusosu mataa. <sup>31</sup> Jesuuri nocua canujiyaree. Na juaashiquiajiniji cusosu sanaseeri. Na cusunuuri seetanujuanaa ritia tajiquiaari nocuaji. Naacuajitij, nojuajaari pueya mianuutenu coteequiaari ritia.

*Jesu naatanijosacari queraatia cusosuhua*  
(Mt 8.16-17; Lc 4.40-41)

<sup>32</sup> Shusha ninishacari, Jesuucua patootasaaquiaariiri puetunu cusosuhua-janaa, samaruharaca cusosu pueyano. <sup>33</sup> Puetunu cuno tiacajiniji pueyajanaari tia tohuatayaji rerequeequiaari tee Jesu quiriquiaacuajani. <sup>34</sup> Jesuuri queraatia puetunu tamaatia cusonujuanaa naatanijioquiaari na rupaa cumaacata. Queraatia samaruhua tohuatanijioquiaari tamasaca pueyajinijiaariuhua. Samaruhuari niishiquiaari cante Jesuni. Nocuaji, majaari Jesu shanacunu quiquiaari samaruhua pocuanura quenaaja.

*Jesu pohuatasacari Pueyaso rupaa Galilea jiyajinia*  
(Lc 4.42-44)

<sup>35</sup> Jesuuri jiyanohua tariquicuaji sanequiaari, ninishiqui quishacarijia. Tiacajiniji quiaquiaari tamaquiriaari, tii Pueyaso na secojonura tamajaaja. <sup>36</sup> Na nuhuaji, Simónri Jesu pajenuucua quiojoquiaari, nata quiniaata. <sup>37</sup> Jaara na riuriatatuquiaari, na sequetuseeri:

—¡Puetunu pueyajanaa quia juuretaa!

<sup>38</sup> Jesuuri saaja nojori sequere:

—Pa quiaare juhuari catecanaataja tiacajinia. Tii pa pohuatarehua Pueyaso rupaa pueya niqiuara. Janiyacuajaari cunora jiyasohuaja tohuataareeni.

<sup>39</sup> Naacuajitij, Jesuuri puetunu Galilea jiyajiniajanaa rucuanajoquiaari. Pueyaso rupaa pohuataquiaariiri Pueyaso secojojua tiacajiniaqueya puetunu Galilea jiya tiacajiniajanaa. Nojuajaari samaruhua tohuatanijioquiaarijuhuaj.

*Jesu naatanishacari lepraraca pueyano*  
(Mt 8.1-4; Lc 5.12-16)

<sup>40</sup> Lepraraca cusosu pueyanoori Jesuucua catecanoquiaari. Jesu cariquimiaji mojuquetaseeri. Na sequereeri:

—Quiaa jaara paniri, quia naata cua naataniniu cua cusonujiniji.

<sup>41</sup> Jesuuri nocua taraajequiaari. Na juaashiquia niaree nocuare. Na sequereeri:

—Taaquiririnij. Quia naataniniu paniyanijia. Quia cuaqueya cuara jeequehuara.

<sup>42</sup> Jesu jaara naa na sequequiaaritij, na lepraari ritia cushiriquii. Na cuaqueyajiniji shaajequiaariiri na csonu. Na cuaqueyari maniniara quiquiaariuhua. <sup>43</sup> Na jiyaroyaquishacarijia na naatanishano pueyano, Jesuuri jiyanohua na rootaquiaari. Na sequereeri:

<sup>44</sup> —¡Cua tojiri, majaari pueya quia pohuatanu cua miishano! Saaja pueyacuara secojonaa jiyaniijia quia cuaqueya quia niquitishii, na cartenuhuara quiajaniya, pueya tajinia quia rucuanenohuara juhuajaniya. Mariyata ritia quia niquitiore quia seru Pueyasocuara catijasocoriquiano. Naa quia

miiri taa Moisés niishitiojoquiaaricuajani, puetunu pueyajanaa niishiniuria quiaa tari naatarohua quia cusonujiniji.

<sup>45</sup> Cuno pueyano jaara quiaquiaari, juhuacatecara pohuataquiaari puetunu pueyajanaari taa na naatanishaarohuani. Naaratej, puetunu pueyajanaari Jesu niqiniu panijia. Cunora, Jesuuri maja tari na naata tiuquiniu quiquiaari juhuajaniya tamonu tiacajinia. Nocuaji Jesuuri pueya quiyaquishaqui rucuanejoua. Naajaa, puetunu cuno jiyajiniji pueyajanaari saaja nocua nijioquiaari na niqiniuria.

## 2

### *Jesu naatanishacari cumatacuruhuana cusosu* (Mt 9.1-8; Lc 5.17-26)

<sup>1</sup> Na rucuanefonu nuhuaji, Jesuuri Capernaum tiacajinia tiuquiquiaariuhua na saquiriojosano pueyata. Pueya jaara niishiquiaari Jesu tari na quijia tiajinia tiuquiriohua, <sup>2</sup> queraatia pueyari nocua nijioquiaari cuno tiajinia. Nojoriiri tiaco mishiquiaari, tohuateyajijihua. Jesuuri cuno pueya niqiuara pohuataquiaari Pueyaso rupaa. <sup>3</sup> Jesu quishacari tii, nocua patasaaquiaariiri pueyano cusosu na matujinia. Cuatro pueyari na patamaa. Cuno cusosuuri pootia mataja quiquiaari pueyaracaanu, cumatacuruhuana na quiniuucua. <sup>4</sup> Cusosu patanaari maja na naata tiaco tiuquitianu quiquiaari Jesuucua, puera pueya rerequesacari tohuateyaji. Nocuaji nojoriiri tia cacojiria cusosu tacataquiaari tacatuhuoco. Nojoriiri tia nijinia cuhuataquiaari. Namitia Jesu nujuasaquijianaa cuhuataturee tiaari. Na nuhuaji, tia cuhuocojiniji, Jesuucua roshinitiasaareeri cusosu na matujinia. <sup>5</sup> Jesuuri cusosu patanaa pueya niquirii seetanujuanaa nocua tiuyano. Naaratej, Jesuuri cusosu sequeree:

—Quiyanunaa, sesa quia miishanojiniji quia jiyanoorii taricuajanijia.

<sup>6</sup> Moisés Rootasanojiniji niishitiojonaari tii cajituriquiaa. <sup>7</sup> Nojori tojishacari Jesu jiyanoano cuno pueyano, nojoriiri niishiriojonuuree: “¿Casaara nio pueyano pocuaa naani? Majaari quenaaja pueyano naata pa jiyanoonu sesa pa miishanojiniji. ¡Nojuajaari tama na cuaqueyajaaja jiyateya juhua Pueyaso na quiniuria! ¡Cunoori jiyanohua sacuaraatia! ¡Saaja Pueyaso cutaraari na naata pa jiyanoonu!” <sup>8</sup> Jesuuri tamajaaja ritia niishiquiaari noojiajinia naa cuno pueya niishiriojonuusano. Jesuuri cunora nojori sequeree:

—¿Casaara naa nia niishiriojijiani? <sup>9</sup> ¿Casaate jiyajenetashiya sequenurani: “Sesa quia miishano tari jiyanooshaaree”? ¿Mariyata jiyajenetateeri sequenurajuhua: “Quia sanere. Quia matu quia pataarohua”? <sup>10</sup> Seetanujuanaa nia sequyanijia, janiyari quiarjia nia niishitiniutianiyani, pueyano cua quishacari mijiria, naajaa, janiyari Pueyaso cumaaca jitiiaa sesa miijiaca cua jiyanooniuriani.

Jiyacaritij, Jesuuri cumatacuruhuana cusosu sequeree:

<sup>11</sup> —Cua tojiri. ¡Quia sanere! Quia matu quia patare. Quia tiajinia quia quiaarohua.

<sup>12</sup> Cusosuuri ritia sanequee. Pueya niqiuara na matu pataarohuari. Naaratej, pueyari jiuujiatequiaari. Pueyaso maniniuhuaqueetatureeri. Cuno pueyari naa sequetuquiaaritij, na shuquiritiasacari Pueyaso:

—¡Majaari quenaaja pa niqiniu quiquiaari naa miishanotej!

### *Jesu sequesacari Leví na nuhuajiniuria* (Mt 9.9-13; Lc 5.27-32)

<sup>13</sup> Na nuhuaji, Jesuuri na saquiriojosano pueyata tacatequiaariuhua caminia casaqueyajiria. Queraatia pueyari nocua nijioquiaari. Jesuuri cuniqui nojori niishitiojoquiaari Pueyaso rupaa. <sup>14</sup> Na nuhuaji, Jesu quiojosacari na saquiriojosano pueyata cuniquiji, Jesuuri Leví niquimiaa cajiyanano Roma tiacajinia quijia jiyaniijara cumaneeca masejojuajinia. Nojuajaari Alfeo niyanu quiquiaari. Jesuuri na sequeree:

—Miji. Cua nuhuajiyare.

Jiyacaritij, Leviiri sanequiaari. Jesu pueyanora quiaquiaariiri.

<sup>15</sup> Cuno niucujaja, Jesuuri Leví tiajinia miaqueriquiaa. Leví tiajinia miacquenuuriquiaajaariuhua queraatia narta cumaneeca masejonaa. Queraatia tamasaca pueyari nojoritia miacquenuuriquiaajuhuaaj, canapue Judocuaca camarucua sequequiaari sesa pueyatacuajani. Nojoriiri Jesuta miacquenuuriquiaa, Jesu saquiriojosano pueyatano. Jiyanohua queraatia pueyari Jesu rupuenaa quiriquiaa. <sup>16</sup> Moisés Naajioneejiniji niishitiojonaa, mariyata Fariseocuaca jaara Jesu niquirii cuno pueyata miaqueyano, nojoriiri Jesu saquiriojosano pueya nequesotaquiaari:

—¿Casaara nia niishitiojona miaqueya cuno cumaneeca masejonaatani, mariyata cuno sesa miijiacatani? ¿Casaara cuno pojoritia na ratuyajaaniuhuaaj?

<sup>17</sup> Jesuuri cuno pueya sequesano tojirii. Nojori sequeree miriquiiri:

—Jiyotuucari maja na paniniu naarajona. Cante cusosuni, cuno cutaraari naarajona paniya. Majaari cua niniu quiquiaari maninia miijiacacua. Niquiaari cutaranijia nia sequesano sesa miijiacacua jiyanooniuria sesa nojori miijiosanojiniji.

*Pueya nequesotasacari Jesu, casaara na pueya miacquenu carteyaquiiani, nojori shuquiritiniuria Pueyaso*

*(Mt 9.14-17; Lc 5.33-39)*

<sup>18</sup> Tamacari, Tiuquinijona Juan tojitiajaca, mariyata Fariseocuaca miagueyaquishacari, tamasaca pueyari Jesuucua nijioquiaari. Na sequetuseeri:

—¿Casaara quia saquiriojosano pueya carteyaquiya miacquenu quenaa-jani? Tiuquinijona Juan pueya cutaraari miaajecoquiaa Pueyaso nojori shuquiritiniuria. Fariseocuacaari naa miiquiaajuhuaaj. ¿Casaara naa quia pueya miyaquiyaaniuhuaaj?

<sup>19</sup> Jesuuri nojori riucuarere miriqui:

—¿Masuusano pueyateeri miaajenutaniya nojori jaara queranacusaqui quia, pueyano camishacari maaji? Camiriquiano pueyano jaara nojoritia quiyajaa, maja na naata nojori miaajenu, shuquiriaatia nojori quishacari. <sup>20</sup> Tamacari cutara, cuno camiriquiano pueyanoori nojori tajiniji rishaanutaniya. Cua pueyari jiyacari miagueyaquiniutaniya cutara.

<sup>21</sup> 'Seetanujuanaa nia sequeya cutaranijia, toque mocua cuhuocoori maja na naata cushipirijiosaanu quiariqui toquerauta. Jaara jeequesaare, quiarinio toquerauri posequeja. Naacuajitij, toque mocua cuhuocoori socua queraaquetaaree. <sup>22</sup> Naajuhuaaj, quiariniacu uva caacaari maja na naata racatasaanu shoque tariucuacojinia. Quiariniacu uva caaca jaara jerema, shoque tariucuaco pojuaretaari. Naacuajitij, paari najuhuaana niitiaa uva caacani, shoqueno. Cunora, maninia cutaraari quiariniacu uva caaca shuujionu shoque quiariquiojinia, maja vino niitiasaanura najuhuanaj, shoqueno.

Jesuuri naa pohuataquiaaritij, pueya na niishitiojonura quiarinio na niishitiojosanoori maja na naata cojitishaanu tariucuacaanu niishitiojosano.

*Jesu pueya carojotasacari trigo samaatenu juuca*  
(Mt 12.1-8; Lc 6.1-5)

<sup>23</sup> Jesuuri samaatenu juuca quiojoquiaari cuhuariquiajiniaaco na saquiriojosano pueyata. Na pueyari jiyacari trigo carojotanu coteequiaari na miaajenuta. <sup>24</sup> Fariseocuaca jaara na niquiquiaari, Jesu sequetureeri:

—¡Quia niquiri! ¿Casaara quia saquiriojosano pueya poonijiya samaatenu juucani? ¡Pueyaso Rupaajinia, paari piriyojoshiyacujani maja samaatenu juuca pa poonijionura!

<sup>25</sup> Jesuuri nojori sequeree:

—¿Majateeri nia serojonu quiquiaari Pueyaso Rupaajinia pa supuetanaa jiyaniijia David miishanojiniji, nojuaja jaara miaajequiaari na cojiniaata, nojori jiiitaaquishacari na coseyaca? <sup>26</sup> Cuno quishacari, supuetana Abiatar pueyacuara secojonaa jiyaniijia quiquiaari. Davidri tiuquiquiaari Pueyaso Secojoua tiajinia. Nojuajaari Pueyasora niquitiosano panjiniji saquiaari. Cuno panri saaja Pueyaso Secojoua tia cojuanaa sasocoriquiano quiquiaari. Naajaa, Davidri na saquiaari. Na neecasequiaarijiaariuhua nata quiniaa pueyara.

<sup>27</sup> Jesuuri nojori sequequiaarijuhuaj:

—Pueyasoori samaatenu juuca shipiniquiaari pueyara. Maja cutaraari Pueyaso shipininiu quiquiaari pueya, samaatenu juucara. <sup>28</sup> Naaratej, pueyano cua quishacari mijiria, janiyari cumaacaraca cua Quejinijini cua sequenura casaa pa miiniutianiya samaatenu juucani. Janiyacuajaari samaatenu juuca camarnuni.

### 3

*Jesu jeecasacari pueyano juaashiquia cuseetucojuara joojequetano*  
(Mt 12.9-14; Lc 6.6-11)

<sup>1</sup> Jesuuri Pueyaso secojojua tiajinia tiuquiquiaariuhua na saquiriojosano pueyata. Tii quiriqiaari pueyano, cuseetucojuara joojequetano juaashiquiaraca. <sup>2</sup> Cuniqii quiniaa Fariseocuacaari shanacutariquiaa na niquiniuria taa Jesu miiniutianiyanoj. Nojoriiri tama sequetooreejaaja:

—¿Jesuteeri sesarucoua pueyano juaashiquia jeecanutaniya samaatenu juucani?

Nojoriiri Jesuucua saquiriojotanu paniriquiaa, nojuaja jaara samaatenu juuca poonijiore. <sup>3</sup> Jesuuri jiyacari sesarucoua pueyano sequeree:

—Quia sanere. Niya quia nujuasee canaa tajinia pueya niquiara.

<sup>4</sup> Na nuhuaji, Jesuuri pueya nequesotaree:

—¿Casaate samaatenu juuca miishiyani? ¿Paate maninia miyani, paate sesa miya soj? ¿Pueyanote naatanishiya, moshijajanaa soj?

Nojoriiri sanaa niquitiariquiaa saaja, Jesu sequesacari naatej. <sup>5</sup> Jesuuri na shocuaqueya nujuatiuyano pueya niquinijiore na juaaniutia. Nojoriicua taraajeriquiaajaariuhuj, cumajiuujiaaca nojori quiniuucua. Majaari nojori niishiniu paniniu quiquiaari taa Pueyaso paniya pueyacuara taraajeja pa quiniuriani. Jesuuri sesarucoua pueyano sequeree:

—¡Quia juaashiquia quia shiitiore!

Na juaashiquia shiitioreeri. ¡Jiyacaritij, na juaashiquiaari ritia jeequequee!  
<sup>6</sup> Fariseocuaca niquishacari naa Jesu miishanotej, nojoriiri tohuareetaquee na juaaniutia. Nojoriiri Herodes panijica pueyata pocoojoquiaari ritia, taa nojori monutaniya Jesuni.

*Queraatia pueya rerequeejosacari caminia casaqueyaji*



<sup>7</sup> Na nuhuaji, Jesuuri quiojoquiaari caminiajinia na saquiriojosano puey-ata. Queraatia pueyari na nuhuajiquiaarijuhua Galilea jiyajiniji. <sup>8</sup> Pueya ni-ishishacari puetunu Jesu maninia miishanojinijianaa na cumaacata, queraatia pueyari nocua nijioquiaari na niquniuria. Nojoriiri nocua nijioquiaari puetunu jiyacajinijinojuanaa: Judea jiyajinijinio pueya, Jerusalén tiacajinijinio pueyajuhua, Idumea jiyajinijinio pueyano. Nijioquiaarijuhua Jordán moo taquijirajiniji pananu muetasamaji pueya, Tiro tiacajinijinio pueyano. Sidón tiacajinijinio pueyari nijioquiaarijuhua na niquniuria Jesu. <sup>9</sup> Nocuaji Jesuuri na saquiriojosano pueya sequequiaari:

—Niocua juhuacarjia bote cojuare quiria, cua tacajara pueyacuaaji, maja pueya tanuujunura janiya.

<sup>10</sup> Jesuuri jiyacari jiyanojua queraatia pueya naatanijioriquiaa. Nocuaji cusosuhuari Jesuucua riutioconeetariquiaa na quianura Jesu, nojori cusonujiniji nojori naataconuhua.

<sup>11</sup> Samaruhuaraca pueya jaara Jesu niqutiuhua, nojoriiri nocuara mojuquetacoquiaari. Naa nacatuquiaariiri:

—¡Quiaacuajaari Pueyaso Niyanu!

<sup>12</sup> Nocuaji Jesuuri nojori sequequiaari na juaaniutia, maja nojori sequenura pueya niquiara cante nojuajani.

*Jesu saquiriojosacari doce pueya na pueyajinijinio, na rupaa pohuatariquiano*

*(Mt 10.1-4; Lc 6.12-16)*

<sup>13</sup> Na nuhuaji, Jesuuri tacaquiaari tuhananuucua. Nojuajaari tiji sequequiaari cana na paniquiaaricujani. Nocua nijioquiaariiri na jiyaniquis-hano pueya. <sup>14</sup> Jesuuri doce pueya saquiriojoquiaari nata nojori quiniuria. Nojori jiyatereeri na jiyaramiquishocoriquiano, Pueyaso rupaa nojori pohuatanura. <sup>15</sup> Nojori niqutioree na cumaacaari, cusosuhua nojori naatanijionura, samaruhua nojori tohuatejonurajuhua. <sup>16</sup> Nioori na saquiriojosano doce pueya sesaca: Simón, Jesuuri na sesojoquiaari Pedro; Santiago, tarajanu Juannio. <sup>17</sup> Jesuuri nojori sesojoquiaari “Boanerges”. Naa sequenu paniyari nio, “Ritia juaajia, juhua miacana”. Nojoriiri Zebedeo niqiuohua quiquiaari. <sup>18</sup> Socua quiquiaariiri Andrés, Felipe, Bartolomé, Mateo, Tomás, Santiagonio. Nojuajaari Alfeo niyanu quiquiaari. Socua quiquiaari Tadeo, Simónnio. Nojuajaari Romano pueya jatanu panijaca pueya maanujinijinio quiquiaari. <sup>19</sup> Quiquiaarijuhua Judas Iscariote, Jesu quiatequiaari mosocoriquianoni.

*Judiocuaca camarucua sapojosacari, Jesu samaruhua cumaaca jiitiaa*

*(Mt 12.22-32; Lc 11.14-23; 12.10)*

<sup>20</sup> Na nuhuaji, Jesuuri na saquiriojosano pueyata tamonu tiajinia tiuquiti- aquiaari tamonu tiacajinia. Queraatia pueyari tiuquiti aquiaarijuhua cuno tiajinia Jesuucua. Naacuajitij, majaari nojori naata miaquenu quiquiaari.

<sup>21</sup> Jesu tapueyocuaca jaara niishiquiaari naa nocuajitij, nojoriiri nocua nijioquiaari na riniuucua juucua. Tama sequetooriquiaajaarijia:

—¡Jesuqui tari paatecara quirijuhuanajaj!

<sup>22</sup> Moisés Rootasanojiniji niishitiojonaa Jerusalén tiacajiniji nijiono pueyari saniniuujia naa sequetuhua Jesujiniji:

—Samaruhua jiyaniijia Satanás cuajaari cumaaca niqutiorucuaa cuno pueyano. Cunora, samaruhua tohuatanijiya pueyajinijiiri.

<sup>23</sup> Naaratej, Jesuuri cuno pojori sequequiaari nojori na niishiriojotenura:

—Miji, niya cua tojitiasee. ¿Pueyanoteeri na naata Satanás tohuatenu pueyanojiniji tama Satanás cumaacatajaaja? Maja na naata. <sup>24</sup> Naajuhua,

mijiria jiya jiyaniijia jaara juayonuutaa tama na pueyatajaaja, nojuajaari maja na naata nujuatanu na paraa, jaara nocua niijoma. Nojuajaari shocotasaanutaniya. <sup>25</sup> Naajaariuhuj, pueyano jaara tapueyocuacata juayonuutare, majaari nojori naata jatiqiu quiniu nojori tiajinia. <sup>26</sup> Niaari saniniuujia cua sequeree, janiyana Satanás cumaacata tohuatanijioquiaa samaruhani. Satanás jaara naa miiritij, cuno maara tari quiri na shaajasaa-nurajanaa.

<sup>27</sup> 'Naajuhuj, pueyano maja na naata tiuquiniu cumueeca pueyano casamiriaca tiajinia, na casami na jaariuutianura, jaara coteenu na camaru morojiyaquiri. Pueyano jaara coteenu na camaru morojorejaatijia, naa cutara na naata na casami jaariuutianu.

<sup>28</sup> 'Seetanujuanaa nia sequeya cutaranijia, pueyano sesa miishanoori na naata jiyanooshaanu. Janiyajiniji sesa na pocuasanoori jiyanooshiyajuhuj. <sup>29</sup> Saniniuujia, cante sesa rimiaaqueja Pueyaso Sohuanuucuarani, cuno cutaraari maja na jiyanooshaanu quiniutianiya quenaaja. Jiyano pueyanotej, nojuajaari pueyaracaanu saniitiosaanutaniya.

<sup>30</sup> Jesuuri naa nojori sequequiaaritij, pueya sequesacari, nojuajana samaruraca quijia, Pueyaso Sohuanu cumaacata na tohuatejosacari samaruhua.

*Jesu nucuajiniji pohuatasano, Jesu tapueyocuacajinijinio*  
(Mt 12.46-50; Lc 8.19-21)

<sup>31</sup> Jiyacaritij, Jesu nucuajari tiuquijioquiaari, Jesu tapueyocuacanio. Majaari tiajiniaaco na tiuquitianu quiquiaari Jesuucua. Saaja carijiniacumaji tamonu pueyano sequetureeri na numootenura Jesu nojoriicua. <sup>32</sup> Jesu shocuaqueya cajitiuniaari Jesu sequeturee:

—Quia nucuana quia tapueyocuacata jati carijiniacuma nujuatiuya. Quia pajenuyaquinia.

<sup>33</sup> Jesuuri saaja nojori sequeree:

—¿Cante cua nucuani, cua tapueyocuacajuhuj?

<sup>34</sup> Na nuhuaji, na shocuaqueya cajitiuniaa niquinijioreeri. Sequereeri:

—Nio pueyari cua nucuana, cua tapueyocuacanio. <sup>35</sup> Cante cua Que panishano miijiani, nojuaja cutaraari cua tarajanu, cua rimiata, cua nucuanio.

## 4

*Miriqui pohuatasano natoojojua pueyanojiniji*  
(Mt 13.1-9; Lc 8.4-8)

<sup>1</sup> Jesuuri socua Pueyaso rupaa niishitiojonu coteequiaariuhua caminia casaqueyaji. Jiyanoohua queraatia pueyari rerequeejoquiaari nojori tojitanura nojuaja. Boteeri tii cuatariquiaa caminiajinia. Naacujitij, Jesuuri botejinia tacaquiaari. Tii cajishiiri, caminia casaqueyaji rerequeejono pueya na niishitiojonura tiji. <sup>2</sup> Cuno pueya niishitiojoreeri queraatia miriqui pohuatasana. Na niishitiojosacari pueya, Jesuuri naa sequequiaaritij:

<sup>3</sup> —Nia tojitiare nio sequesano. Tamonu juuca, pueyano na cuhاريquiajinia natoojonuucua quiaquiaari. <sup>4</sup> Na jacutasacari, nucuaco totequiaariiri tajaaca. Shuhuari na miojoree. Majaari na moritianu quiquiaari. <sup>5</sup> Tajaacaari totequiaari sai tajiniaqueyajuhuj. Majaari cuniqui puera jiya quiniu quiquiaari na maashiniuria. Naacujitij, najuhuaana ritia moritiquiaariiri. <sup>6</sup> Pananu jaara jaquiaari, na catijiareeri. Maja puera nujuacaraca na quishacari, ritia sorequeeri. <sup>7</sup> Tajaacaari totequiaarijihua riyocuaca tajinia. Jiohuacacaari socua ritia maashiquiaari. Natauri tarini-tiucua quiquiaari saniniuujia. Naaratej, majaari na muetunu quirii.

<sup>8</sup>Tajaacaari saniniuujia totequiaari maninia jiyajinia cutara. Cuno cutaraari maninia maashiquiaari cuno jiyajinia. Senoosaareeri queraatia. Niquiriyaatu jiyonajiniji carojosaaquiaariiri treinta jajau. Tanajajiniji socua sesenta jajau, naajuhuaaj socua cien jajau tanajajiniji.

<sup>9</sup>Jesuuri nojori sequeree:

—Cante numaaracani, cuaara cua sequesano tojitiaara.

*Casaarate miriqui pohuatasanoni*

(Mt 13.10-17; Lc 8.9-10)

<sup>10</sup>Na nuhuaji, Jesu quishacari tamajaaja, na saquiriojosano doce pueyari na nequesotaquiaari, tamasaca pueyano. Cuno pojoricuajaari Jesu shuriucua quiriquiaa. Nojoriiri Jesu sequeree:

—¿Casaa miriqui quia pohuatasano sequenu paniyani?

<sup>11</sup>Jesuuri nojori sequeree:

—Pueyasoori nia niishitiojiya jiyasohua na miiniu panishano, taa na muerasu na jiitianutaniya pueyaracaanu cutarani. Tamasacara saniniuujia, canapuate Pueyaso ruuretajacani, nojoririaari miriqui pohuatashiyacujua.

<sup>12</sup>Naacuajitij, nojoriiri cua cumaacata cua miishano niquitiuquiaa pueyaracaanu najuhuanaj. Majaari nojori niishiniu na niquishano. Naajuhuaaj, nojori jaara Pueyaso Rupaa tojitiare, majaari na niishiniu na tojishano. Nojori jaara niishiri, nojori mariqui noojia tacatorohuari sesa nojori miishanojiniji nojori jiyanooshaanura.

*Jesu niishitiojosacari miriqui na pohuatasano natoojonajiniji*

(Mt 13.18-23; Lc 8.11-15)

<sup>13</sup>Jesuuri nojori sequequiaarijiuhuaaj:

—¿Majateeri nia niishiniu miriqui cua pohuatasano? ¿Niaatucua taa niishiriquia socua tamonu cua pohuatasanoni? <sup>14</sup>Cua pohuatasano

cuhuariquiajinia natoojonajinijini, nojuajaari juhua Pueyaso Rupaa pohuatana. <sup>15</sup>Noojiaqueya pueyari juhua nucuaco toteno jajau. Najuhua

Pueyaso Rupaa tojiyari. Na tojiniu nuhuaji, Satanásri nimiaa. Nojuajaari puetunu Pueyaso Rupaa jaanaa noojiajinia natasano jaariutiaquiaa.

<sup>16</sup>Tamasaca pueyari juhua noo jajau saniniuujia, sai tajiniaqueya jacutasanotej. Nojori jaara Pueyaso Rupaa tojiri, jiyanohua na timitiaari. <sup>17</sup>Cunoori

juhua secaja nujuacaraca moritiano jajau, sai tajinia na moritianuucua. Majaari na rishiniu. Naajuhuaaj, cuno pueya jaara saniniuujishaa taa taratia,

jaara naquiya miishaarejuhuaaj Pueyaso Rupaa tojijia nojori quiniuucua, nojoriiri ritia Pueyasocua tiuuniu tarinitiaja. <sup>18</sup>Noojiaqueya pueyari

juhua noo jajau, jiuhuaaca tajiniaqueya jacutasanotej. Pueyaso Rupaa tojiyari. <sup>19</sup>Na nuhuaji, nojoriiri puera niishiriojiya taa nojori quiniutianiya

maninia mijiriani. Nojoriiri sapojosaaquiaa puera na shuquiritasacari mijiria casami. Nio jiya casamiicua jiaatiaquiaajaariuhuaaj. Puetunu cuno-

rajananaa, nojoriiri Pueyaso rupaa tojitiaquiaa na numaa shama. Naacuajitij, nojoriiri juhua muetuhuo quia. <sup>20</sup>Noojiaqueya pueya saniniuujia,

nojori cutaraari maninia tojitiaja Pueyaso Rupaa. Cuno pueyari juhua cuhuariquiajinia natau, queraatia muetujua, maninia jiyajinia natasano.

Cuno maninia nataujinijinioni, noojiaqueyari maja puera na muetunu. Tarajanuuri maninia muetuna. Naajuhuaaj, tarajanuuri jiyanohua queraatia

muetujua. Naajuhuaaj, cante Pueyaso Rupaa tojijia cutarani, nojuajaari juhua maninia muetujua natau.

*Pueyaso muerasuuri juhua samari*

(Lc 8.16-18)

<sup>21</sup> Jesuuri nojori sequereejuhuaaj:

—¿Samaritiutiiri noshitishano, conatu cariquiaco jamotasocoriquiano, maquetu cariquiacojuhuaaj? Maja. Samaritiu jaara noshitishaare, morijiucua morotashiyari, tiajiniaaco na cuhuatanura maninia. <sup>22</sup> Naajuhuaaj, jiyasohua nia miishanoori puetunujuanaa niishishaanutaniya. Cua pohuatasanoori juhua samaritiu, puetunu pueya jiuujiaajanaa na cuhuatanura. Naajuhuaaj, Pueyaso Rupaa jaara nioojiajania jamosaare, juhua muetunutaniyari puetunu pueya niquishocoriquianojuanaa. <sup>23</sup> Niajaniya, canapuete numaa jiitiaani, nia tojitiare cua pohuatasano.

<sup>24</sup> Jesuuri naa nojori sequequiaarijiuhuaaj:

—Nia niishiri nia tojishano. Nia shanacutajataja, teyanota nia shanacujuquiaa nia niquitiosocoriquianocujani, Pueyasoori cunotaja niaara shanacunutaniyajuhuaaj. Naacuajitij, niaa jaara capora quiriquia tamasacata, Pueyasoori socua capora quiniutianiya niaarajuhuaaj. <sup>25</sup> Cante na rupaa tojjiani, socua na niishitiojonutaniyari. Saniniuujia, canapuete na rupaa tojitiaaquiyani, secaja na niishishanoori puetunu jaariutiasaanutaniyajanaa.

### *Miriqui pohuatasano natau moritianojiniji*

<sup>26</sup> Jesuuri nojori sequequiaarijiuhuaaj:

—Nia niishitiojonu saniriiria taa Pueyaso muerasu supuequiaani, Pueyaso jiitiasano nojori quiniuria. Tamonu pueyanoori na cuhuariquiajania nataquiaari jajau. Na nuhuaji, majaari na tacatenu quiquiaariuhua pueyaracaanu na natasano na niquiniuria. <sup>27</sup> Cuno pueyanoori na natanu nuhuaji camueenujuquiaari. Cuno jajauri moritiaquiaari juuca, niucuanio. Maashiquiaariiri na camaru maquesacari, na niquishacarijiuhuaaj. Tamonu juuca, na camaru tacatesacariuhua na natasano na niquiniuria, tariucua puereetuucari quiquiaari. Majaari na camaru niishiniu quiquiaari taa na moritiareeni. <sup>28</sup> Jiyari tamajaaja moritianijia natau. Coteenu moritiaari na jiyona. Na nuhuaji, na jajau coori supueya. Na nuhuaji, na jajauri querasapijiaacara quimiaa na noshiniuria. <sup>29</sup> Na natau jaara noshimia, na senonaari na senoojua na racatasocoriquiano. Pueyaso muerasuuri naa miishaanutaniyajuhuaaj.

### *Miriqui pohuatasano mostaza jajaujiniji* (Mt 13.31-32; Lc 13.18-19)

<sup>30</sup> Jesuuri socua sequequiaari:

—¿Juhua casaa niquishanote Pueyaso cumaacani? ¿Casaatate pa naata na saniniujiuniuni, taa Pueyaso Rupaa poonijiya pueya jiuujiajiniani? Quiar-ijia nia pohuatareeraj. <sup>31</sup> Pueyaso Rupaari pueya jiuujiajania quiya juhua mostaza jajau. Mostaza jajauri jiyanojua socua shiitianiyojua puetunu tamasaca jajaujinijijianaa, majaari puera maatia na niquishaanu. Pueyaso Rupaari naajuhua pueya jiuujiajania, nocua nojori tiuushacari. <sup>32</sup> Mostaza jajau jaara natasaaare, maashiyari socua puereetuucara tamasaca natau-jiniji. Na cashacucuaari maashiya puereetucucua. Shuhuari na cashacucua cariquiaco nujuatujua shinishiqui.

Pueyaso Rupaari pueyano jiuujiajania naa cumaacaracajuhuaaj, na jataniniuria na tojjia, maninia miijia na quiniuria.

### *Jesu niishitiojosacari pueya saa na miriqui pohuatasanotaja* (Mt 13.34-35)

<sup>33</sup> Jesuuri naa queraatia miriqui pohuatasanota niishitiojoquiaari Pueyaso rupaa saaja pueya niishishano casaata. Majaari socua jiyajeneta casaa na pohuatanu quiquiaari. <sup>34</sup> Naacuajitij, nojuaja jaara casaa

niishitiojonu paniquiaari pueya niquiara, nojuajaari puetunujuanaa naa niishitiojoquiaari miriqui na pohuatasanta. Tamajaaja nojori quishacari saniniujia, Jesuuri na saquiriojosano pueya niishitiojoquiaari maatia, casaa miriqui na pohuatasano sequenu paniriquiaani.

*Jesu pueyajetesacari paratu, mohuaca cajiniucuanunio*  
(Mt 8.23-27; Lc 8.22-25)

<sup>35</sup> Cuno juuca jaara niniquiaari, Jesuuri na saquiriojosano pueya sequeriquiaari:

—Camina taquijiria pa quiaare.

<sup>36</sup> Cuniqijia pueya tiujiatiuyareeri, nojori quianura camina taquijiria. Na pueyari Jesuta quiojiyaree cuno botejiniaja, tee nojuaja quiriquiaacua-jani. Jesu quiasacari camina taquijiria, tamasa boteeri nata jaate-quetariquiaajuhua. <sup>37</sup> Maja puera na quenaacoyaquishacarija, maru-uriparatuta canashiyaquiji jiyanojua niquiaari nojoriicua nojori niuuti-asacari. Paratuuri jiyanojua cajiniucuatequiaari mohuaca nojori bote-jiniacumara. Nocuaa na boteeri tari quera tiuquitiariquiaa mohuacata. <sup>38</sup> Jesuuri jiyacari bote pajamaji maqueriquiaa juhuajaniya. Na nacaacuaa mataja caco maqueriquiaari. Na pueya niucujatusacari nojuaja, Jesu sequetureeri:

—¡Niishitiojonanaa!, ¿majateeri quia puerenujua paa tari tiuquitiareeni?

<sup>39</sup> Jesuuri sanemaa. Paratu sequereeri, caminiano:

—¡Quia suraajere! ¡Tariucuaa!

Paratuuri tajimiohua. Caminiaari pootia maquee. <sup>40</sup> Jesuuri na saquirio-josano pueya sequereeri:

—¿Casaara nia puereya puerani? ¿Niaateeri Pueyasocua tiuyashijiaa quiyajaaruahua?

<sup>41</sup> Nojoriiri jiyanojua shiriiquitiuri. Tama nojorijiaarija sequetooquiaari:

—¿Cantejaaranononi? ¡Paratu, caminiaari na tojirii!

## 5

*Gerasa jiyajinijinio samaruhuaraca pueyanojiniji pohuatasano*  
(Mt 8.28-34; Lc 8.26-39)

<sup>1</sup> Na nuhuaji, nojoriiri camina taquijiria tiuquijioquiaari, Gerasa jiyajinia. <sup>2</sup> Jesu tacasacari botejiniji, nocua niquiaariiri tamonu pueyano raacajiniji, macunucua nucuhua paaquiosaquiji. Cuno pueyanoori samaruraca quiquiaari. <sup>3</sup> Raacajinia quijia quiquiaariiri. Majaari na naata moronu quishaaquiaari quenaaja cumayocua shipinishano casaata. <sup>4</sup> Pueyari juucua na morojoua, na cashacucua, na juaashiquiacanio. Saaja na turojotajaari. Majaari quenaaja na nujuataja pueyano quiniu quijia. <sup>5</sup> Pueyaracaanu tuhuananuhucua rucanejoquiaariiri, raacajiniano. Na rucanejosacari sariyacojuaari, juuca, niucuanio. Tama na cuaqueyajaaja piquijia saitiaari. <sup>6</sup> Nojuaja jaara Jesu niquiquiaari tucuaaanuji, nocua netequiaariiri. Jesu cariquimiaa mojuquetaseeri. <sup>7</sup> Jesuucuaa nacareeri:

—¿Casaacua miji quia niyani, Jesunaa, jiyocuaaanu Quijia Pueyaso Niyanunaa? ¡Quia secojijianijia maja naquiya quia miiniuria janiya!

<sup>8</sup> Samaruhuaraca pueyanoori naa sequereeri Jesutej, tari Jesu sequenuucua samaru nojuajiniji na tohuatanura.

<sup>9</sup> Jesuuri na nequesotaree:

—¿Taa sesanaacatequia?

Na riucuaareeri:



—Canaa jiyanoehua queraatiani, cunora cua sesa “Queraatia”.

<sup>10</sup> Cuno samaruuri jiyanoehua Jesu secojoriquiaa maja nojori na taanuunura cuno jiyajiniji. <sup>11</sup> Cushiyari jiyacari cateca naataja miaquenuuriquiaa tuhuananucari. Jiyanoehua queraatia cushiyari quiriquiaa. <sup>12</sup> Samaruhuari Jesu secojoree naatej:

—¡Canaa quia jiyarore canaa tiuquitianura cuno cushiyacua!

<sup>13</sup> Jesuuri samaruhua jiyaroree. Samaruhuari pueyanojiniji tohuareetaquee. Cushiyacua tiuquitiaseri. Dos mil cushiya naasucuaari quiriquiaa. Cuno cushiyari cocuatequiaari, samaruhuaraca nojori quiniuucua. Tacojiniji totesee caminiajiniaari. Puetunujuanaari tii shushiniuuquiaari.

<sup>14</sup> Cushiya cojuanaari jiyacari netecuaturohua na shiriiquiniutia. Na tiacajinia pueya poojotanuusuhua nojori niquishanoori, cuhuariquiaajinia quiniaa pueyano. Nocuaji pueyari nijioquiaari nojori niquiniuria casaate quiquiaarini. <sup>15</sup> Cuno pueya jaara tiuquiiioquiaari Jesu quishaqui, cuno tarijia samaruhuaraca quijia pueyano niqutiushiiri panaatia cajiyano, toqueraca. Naa nojori niquishacari nojuajatej, pueyari pueretuquiaari. <sup>16</sup> Jesu miishano niqutiuniaari cuno pueya pohuataquiaari taa samaruhuaraca pueyano miishaareeni, mariyata cushiyajinijinio. <sup>17</sup> Cunora, cuno pueyari Jesu secoteree na quianuhua cuniquiji, nojori jiyajiniji.

<sup>18</sup> Jesu jaara tacaquiaariuhua na botejina, cuno tarijia samaruhuaraca quijia pueyanoori nata quianu paniquiaari juucua. <sup>19</sup> Majaari Jesu paniniu quiquiaari. Na sequeree saajaari:

—Quia quiaarohua quia tiajina quia pueyacua. Quia pohuatasuhua nojori taa Pueyaso miirii quiajaniani, quiocua na taraajenuucua.

<sup>20</sup> Pueyanoori quiaarohua. Nojuajaari pohuatanu coteequiaari cuno na jiya diez tiacajinia taa Jesu miiquiaari maninia nojuajani. Puetunu pueyajanaari jiuujiatequiaari nojori tojishacari nojuaja. Cuno diez tiaca sesa quiquiaari “Decápolis”.

*Jairo niyatujiniji pohuatasano, Jesu toque quiana maajjinijihuaj*  
(Mt 9.18-26; Lc 8.40-56)

<sup>21</sup> Jesu jaara niuutiaquiaariuhua botejina caminia taquijiriohua, queraatia pueyari nocua tiuquiiioquiaari na quishaqui. <sup>22</sup> Jesu quishacarijia caminia casaqueyaji, nocua tiuquiquiaariiri tamonu pueyano, Pueyaso sec-ojojua tia jiyaniijia. Na sesa quiquiaari Jairo. Jaara Jesu niquiquiaari, na cariquimiaji mojuquetaseeri. <sup>23</sup> Naa Jesu secojoree jiyanoehuari:

—¡Quiyatu quera cusoya! ¡Miji, quia juaashiquia nocua quia niaquee na naatanuhua!

<sup>24</sup> Jesuuri jiyacari nata quiaaree, na saquiriojosano pueyano. Puera jiyanoehua queraatia pueyari na nuhuajiriquiaa. Jesu tanuujuturiquiaari.

<sup>25</sup> Cuno pueya tajinia quiriquiaajaariuhua tamonu cusosu maaji. Doce mar-ijiaari tari na shoconujuquiaari pueyaracaanu na naatesacari. <sup>26</sup> Queraatia naarajonaari nareja naquiya na miiquiaari. Socua na jiyacatojoquiaari saajaari. Najuhuaana na cumaneeca puecaquiaariiri na naarajosaanura juucua. <sup>27</sup> Cuno maaji jaara Jesujiniji tojiquiaari, na nijiniji na nuhuajiquiaari jiyasohuari. Na tucuaque toque quiasee pueya tajiniaari. <sup>28</sup> Cuno maajiiri tama sequequiaariijaaja: “Janiya jaara quenaaja na toque quiareni, janiyari naatanutaniuhuaani”. <sup>29</sup> Naacujitij, na quiasacari Jesu toque, na nanacaari ritia curetaquee. Jiyacari na niishiquiiri. Tama sequequiaariijaarija: “¡Cua cusonu tari tajiyatema!” <sup>30</sup> Jesuuri jiyacari niishiquii nojuaja na cumaacata cusosu naatanirii. Cunora, nojuajaari tacareecuaree na niquiniuria pueya. Pueya nequesotareeri:



—¿Cante cua toque quiareeni?

<sup>31</sup> Na saquiriojosano pueyari na sequeree:

—Quiaacuajaari queraatia pueya niquiya quia tanuujiano. Quiaari najuhuana nequesotaariquiohua saajuhuj: “¿Cante cua quiareeni?”

<sup>32</sup> Jesuuri saaja na shocuaqueya niqunijioriquiaa, na niquniuria cante na toque quiareeni. <sup>33</sup> Maajiiri jiyacari tetecariquiaa na puerenuta. Jesu cariquimiaji mojuquetasee ritiaari. Nojuajaari niishiquiaari Jesu cumaaca na naataniriohua. Cunora, Jesu sequeree puetunu seetanujuanaari. <sup>34</sup> Na nuhuaji, Jesuuri na sequeree:

—Sanaunaa, cucua quia tiuuniucua, quiaacuaja tari quia cusonujiniji naatarohua. Juhujaniya quia quiaarohua. Quia cusonucua tari tajiyate-mohua quiocuaji.

<sup>35</sup> Jesuuri cuno maajiicua pocuariquiaajaa pueya tiuquiiijosacari Jairo tiajiniji. Cuno pojoriiri maaji samiriu que sequetusee:

—¡Quia niyatu tari cusoquee! Maja najuhuana Niishitiojona riniu quia tiajinia.

<sup>36</sup> Jesuuri nojori sequesano tojirii. Naaratej, maaji samiriu que sequereeri:

—¡Maja puerenu! ¡Cucua quia tiuuri saaja!

<sup>37</sup> Majaari Jesu paniniu quiquiaari tamasa quiojonura nata. Saaja nata quiojoquiaari cutaraari Pedro, Santiago, Santiago tarajanu Juanio. <sup>38</sup> Nojori jaara tiuquiiioquiaari Jairo tiajinia, pueya niquishii nujuquetiuyanoori, sariyocuatuiyanonio. <sup>39</sup> Jesu jaara tiajiniaaco tiuquiquiaari, cuno pojori sequereeri:

—¿Casaara puera nia cojuatuneyani? ¿Casaara naa nia nujuqueyani? Maaji samiriu maja macu. Nareja maqueyano.

<sup>40</sup> Pueyari saaja Jesu saroojotaquiaari nojuaja na rerequetenuta, naa nojori na sequenuucuatej. Jesuuri cunora nojori tohuatanijioree tiajiniaacoji. Jesuuri macuucua sohuacamara tiuquinitiaquiaari Jairo necocuata, tama na pueyajaajanio, cuniqui tii nata quiutiuriquiaani. <sup>41</sup> Macu juaashiquiajiniji quiaaseeri. Na sequereeri:

—Talita, cumi.

Nioori pueyano rupaajinia sequeya: “¡Maaji samiriunaa, quia sequeyani-jia, quia sanere!”

<sup>42</sup> Jiyacaritij, maaji samiriuuri ritia sanequee. Juhucatecara rucuanereeri. Doce marijaari tari cuno maaji samiriu shocojoquiaari na queyata na quishacari. Pueya niquishacari naa Jesu miishanotej, nojoriiri jiyanohua jiuujiatequiaari. <sup>43</sup> Jesuuri jiyanohua nojori rootaree maja nojori pohuatanura pueya niqiara na miishano. Saaja sequeree cutaraari maaji samiriu cuara mianuutesaaria.

## 6

### *Jesu quishacari Nazaret tiacajinia* (Mt 13.53-58; Lc 4.16-30)

<sup>1</sup> Jesuuri cuniquiji quiaquiaarihua tama na jiyajiniohuajaaja. Na saquiriojosano pueyari nata quiojoquiaarijuhuaj. <sup>2</sup> Jaara quiquiaari samaatenu juuca, Jesuuri tii niishitiojonu coteequiaari Pueyaso secojojua tiajinia. Queraatia pueyari na tojitariquiaa. Nojoriiri jiuujiatequiaari. Tamajaaja seque-tooquiaariiri:

—¿Tee nio pueyano niishitiojosaaquiaari puetunu niojuanaani? ¿Teje na masecanu puetunu na niishishanojuanaani, cuno cumaacanio, jiyajeneta miishano na miiniuriani? <sup>3</sup> Nojuacuajaari suruhuatujiniji casaa shipinijona

tiajiniaacora, niya pa tiacajiniani. Nojuajaari pa tiacajinia quinia María niyanu. Niya quiyajaariuhua na tapueyocuaca: Santiago, José, Judas, Simónnio. Na rimiatuhuari niya quiyajuhua pa tiacajiniani.

Cunora, majaari nojori tojtianu paniniu quiquiaari Jesu. <sup>4</sup> Naaratej, Jesuuri nojori sequeree:

—Pueyari tiqiyocua Pueyaso sequenu panishano caminiujiunia tojiniu paniquiaa cutara. Saaja tama na tiacajinijinio pueya cutaraari maja na tojitiuniu paniniu, na jiyasojinijinio supueno pueyajuhua, tama na tiajinia quiniaajaajanio.

<sup>5</sup> Naacuajitij, nocua nojori tiuyaquiniucua, majaari na naata na cumaacata na miiniu quiquiaari. Saaja secaja cusosuhuacua niojoquiaari na juaashiquiaari, nojori na naatanijionura. <sup>6</sup> Jesuuri jiuujiatequiaari nojori tiuyaquishacari nocua. Na nuhuaji, Jesuuri rucanejoquiaari pueya na niishitijonura, queraatia shiitianiyojua tiacajinia catecaja na tiaca shocua.

*Jesu jiyaramiquishacari na saquiriojosano pueya Pueyaso rupaa pohuata-nura*

*(Mt 10.5-15; Lc 9.1-6)*

<sup>7</sup> Na nuhuaji, Jesuuri na saquiriojosano doce pueya sequequiaari nocua nojori niniuria. Nojori jiyaramiquiniu coteereeri, nojori quiojonura caapiqui, caapiqui, Pueyaso rupaa nojori pohuatanura. Nojori niquitioree na cumaacari samaruhua nojori tohuatanijionura pueyajiniji. <sup>8</sup> Nojori sequereeri maja nojori panura nojori panishano, saaja nojori miojotu cutara. Nojori sequerejaariuhua, maja nojori panura caashoque, coseyaca, cumaneecanio. <sup>9</sup> Nojori sequereeri saaja nojori cushiniuria na sapatu cutara, maja socua toque nojori panura na cushishocoriquiano. <sup>10</sup> Nojori sequerejaariuhua:

—Niaa jaara tiuquishiiquia tamonu tiajinia, cuniquijia nia jiyojetare, niaa jaara cuniquiji quiaarejaatijia. <sup>11</sup> Pueya jaara nia tiuquinitianu paniyaquiri na tiajinia, nia pohuatasano nojori tojiniu paniyaquishacarijiuhua, niocua cuniquiji quiaare. Niocua nia nioluacaacuaji jiya joocua piitiare nojori niquiara, nojori niishiniuria Pueyasoori nojori saniitionutaniya, na rupaa tojiyashijianucua nojori quiniucua.

<sup>12</sup> Na nuhuaji, Jesu jiyaramiquishano pueyari quiojoquiaari. Nojori-iri Pueyaso rupaa pohuatanuuquiaari pueya tacatonuhua nojori jiuujia Pueyasoocua. <sup>13</sup> Nojoriiri queraatia samaruhua tohuatanijioquiaari. Naajuhua, nojoriiri cusosuhuacua tarooquiaari naana jajau shiyocua, nojori naatanijosacari queraatia pueya.

*Tiuquinijiona Juan mosacari*

*(Mt 14.1-12; Lc 9.7-9)*

<sup>14</sup> Jesu miishanojinijiiri caminiujiushaaquiaari puetunu cuno jiyajini-ajanaa. Naacuajitij, Galilea jiya jiyaniijia Herodesri Jesujiniji pohu-atasaaquiaarijiuhua. Herodesri cunora sequequiaari:

—¡Tiuquinijiona Juanqui samiitiarohuacuaa, cua mosano pueyanotej! Naaratej, cuno Jesuuri cuno cumaacaraca, jiyajeneta casaa na miiniuria na cumaacata. Nojuacuajaari cua mosano Juan samiitianohua.

Jiyaniijia Herodesri na jiyajenetaquiaari jiyanojua cumaacaraca Jesu quiniucua. <sup>15</sup> Tamasaca pueyari Jesujiniji sequequiaari tamaatia saniniuu-ji, nojori jiyajenesacarijiuhua. Naa sequetuquiaariiri:

—¡Nojuacuajaari tariucuacaanu pueyara Pueyaso sequesano caminiujiunia Elías!

Tamasaca pueyari saniniuujia naa sequequiaari, nojori jiyajenesacariji-uhuj:

—Nojuacuajaari quiarijia nio pa quishacari Pueyaso sequesano caminiu-jiunia pajaniyara, juhua tariucuacaanu pueyara Pueyaso sequesano caminiu-jiuniaajuhuj.

<sup>16</sup> Herodes jaara pueya sequesano tojiquiaari, nojuajaari saa sequequiaar-ijia:

—Nojuacuaja Tiuquinijiona Juan, cana cua nacataniquianucujani. Sami-tiarohuacuaaquiiri.

<sup>17</sup> Tiuquinijiona Juan moyaquishacarijia, nojuajaari Herodías rupaa-jinia nujuatesaaquiaari. Cuno maaji Herodíasni, nojuajaari Herodes tarajanu Felipe niquiocua quiquiaari coteenu. Herodesri tarajanu Felipe niquiocua jaariutiaquiaari necocuara. <sup>18</sup> Nocuaji, Tiuquinijiona Juanri Herodes naca-sujujua. Naa na sequejaari:

—¡Pueyasora, majaari maninia quia jiiitianura quia tarajanu niquiocua!

<sup>19</sup> Cunora, cuno maaji Herodíasri maja na niquiniu paniniu quijia Tiuquini-jiona Juan. Na monu panijiaari. Majaari na naata quiquiaari saaja.

<sup>20</sup> Herodesri Tiuquinijiona Juan puereja. Nojuajaari niishiquiaari Tiuquini-jiona Juanri maninia pueyano, Pueyaso tojjia pueyano, maja sesa mi-ijia. Naaratej, Herodesri maninia na cojuateja nujuatejojuajinia. Ma-jaari na shanacunu quiquiaari sesa na miishaanura. Herodesri Tiuquini-jiona Juan pohuatasano tojiniu maniniucujaja. Nojuajaari saaja noo-jia niquijoteja quiquiaari. Majaari na niishiniu quijia taa na miiniu-tianiyani. <sup>21</sup> Saniniuujia, cuno maaji Herodíasri pueyaracaanu niishiri-ojoriquiaa, Tiuquinijiona Juan na motenura. Jiyacaritij, namitia nera, Herodes rasaanu juuca quiquiaari. Cuno juuca, jiyaniijia Herodesri quer-aatia pueyata queranacuree. Na queranacunura, nojuajaari Galilea jiya-jiniijinio jiyaniijianucua masuuquiaari, tama na soldadohua jiyaniijianucua-jaajanio. <sup>22</sup> Jiyacaritij, Herodías niyatuuri tiuquiquiaari queranacusaqui, tii na nianujunura puetunu pueya niquiarajanaa. Herodesri niyacoo nianu-junu shuquiritiaquiaari jiyano-hua. Nata miaquenaa pueyari jiyano-hua na shuquiritiaquiaarijuhuaj. Naaratej, jiyaniijia Herodesri niyacoo sequeree:

—Cua masere quia panishano. Janiyacua quia niquitioreni.

<sup>23</sup> Herodesri socua puetunu pueya niquiarajanaa na sequerohuacuhuj:

—¡Seetanujuanaa quia sequeyanijia, maja cua sapojonu! Janiyari quia niquitionutaniya quia masesanoni. Quiaa jaara cua masere cua jii-tiasano cajiniocua, naajaa, janiyari quia niquitionutaniyani.

<sup>24</sup> Niyacoori tohuataquee na nucua Herodías na nequesotanura. Na seque-seeri:

—Cua nucuaanaa, ¿casaa cua masenutaniya cua quenuni?

Na nucuaari na sequeree:

—¡Quia masere Tiuquinijiona Juan naca!

<sup>25</sup> Cuno niyacoori ritia tiuquiquiuhua jiyaniijia Herodes quishaqui. Na sequereeri:

—¡Quiarijia cua niquitiore Tiuquinijiona Juan naca miacojuajinia!

<sup>26</sup> Naa jiyaniijia Herodes tojishacaritij, jiyano-hua taraajequeeri. Naajaa, seetanujuanaa na sequenuucua na masuusano pueya niquiara, majaari tari na naata ruuretano quiquiaari cuno niyacoo masesano. <sup>27</sup> Naaratej, jiyaniijiaari ritia jiyaroree na soldado, Juan naca na niquitionura cuno niyacoo. <sup>28</sup> Soldadoori quiaaree nujuatejojuajinia. Juan nacataseeri. Na naca patamohua miacojuajiniaari. Soldadoori niyacoo na niquitiosuhua. Nojuajaari na nucua na niquitiose saniniuujia.

<sup>29</sup> Tiuquinijiona Juan pueya jaara na niishiquiaari, na maanu patuquiaari-iri, na jamotusocoriquiano.

*Jesu mianuutesacari cinco mil pueya*  
(Mt 14.13-21; Lc 9.10-17; Jn 6.1-14)

<sup>30</sup> Jesu jiyaramiquishano pueyari tiuquiiioquiaariuhua Jesuucua nojori rucuanajonu nuhuaji Pueyaso rupaa nojori pohuatanura. Nojoriiri Jesu pohuataquiaari puetunu nojori miitiushanojuanaa, nojori niishitiojosano-jinijinio. <sup>31</sup> Na nuhuaji, Jesuuri nojori sequeree:

—Miji, pueya quiyaquishaqui pa quiaare tamaqui, tii pa samaatenura rupaquijia quenaaja.

Jiyanohua queraatia pueyari pueyaracaanu nojoriicua nijioriquiaa. Tamasacaari quiojoriqiuohuacuaa. Tamasacaari saniniuujia shusha tiuquiiioriquiaacujua. Naaratej, majaari jeya nojori quiniu quiquiaari na miaquenura quenaaja. <sup>32</sup> Jiyacaritij, Jesuuri saaja na jiyaramiquishano pueyata quiaquiaari botejina, pueya quiyaquishaqui. <sup>33</sup> Queraatia pueyari saaja nojori niquitiurii quiaano. Cuno pojoriiri Jesu niishitiuquiaari. Naaratej, puetunu caminia shuriuquioco tiacajinijijianaa pueyari netecuatuquiaari. Nojoriiri Jesuucuaaji cutesee. <sup>34</sup> Jesu rosesacari botejiniji, saaja queraatia pueya niquiriiri. Nojori na niquishacari, cuno pojoriicua taraajequiaariiri. Nojoriiri juhua cojuanaaju borregohua quiriquiaa. Naaratej, Jesuuri nojori niishitiojonu coteeree queraatia casaa Pueyasojiniji. <sup>35</sup> Jaara quiquiaari tari tenacari, na saquiriojosano pueyari nocua nijioquiaari. Na sequetuseeri:

—Tari tenacari. Paa tiajiyaqui quiyani. <sup>36</sup> Pueya quia sequere, nojori cuara quiojora cateca naataja tiacajinia, na miaquesocoriquiano nojori masenura tii.

<sup>37</sup> Jesuuri nojori riucuaaree saaja:

—Niaa mariqui nojori miaqueterēja saniya.

Nojoriiri na sequeree:

—¿Quiaateeri paniya queraatia pan masenuucua canaa quianura puetunu cuno pojoririjanaa? ¡Pa mianuutenura nojori, panishiyari dosciento cuma-neeca! Majaari pa jiitianu.

<sup>38</sup> Jesuuri nojori nequesotaree:

—¿Taa pan nia jiitiaani? Nia niquishiitioj.

Nojori jaara niishiquiaari taa pante quiyani, na sequetusuhuari:

—Cinco pan quiya, caapiqui sapitiaajanio.

<sup>39</sup> Jesuuri jiyacari na pueya sequeree nojori cajitijionura pueya jiyasocujinia, na mianuutesocoriquiano. <sup>40</sup> Pueyari cajitiurii cien, tamocora cincuenta, tamaqui socua cien, camiria cincuenta. Pueyari naa queraatia maapuera raquiriojotasaaree nojori mianuutesaanura. <sup>41</sup> Jesuuri cuno pan pataree, sapitiaajanio. Na nuhuaji, jiyocuacaanu maureeri Pueyaso na secojonura nocuara. Na nuhuaji pan neecasequiaari na saquiriojosano pueyaraari, nojori serotasocoriquiano pueya. Cuno caapiqui sapitiaaja shiquioreerejaariuhua puetunu pueyarajanaa. <sup>42</sup> Puetunu pueyajanaari maninia miaquenuquiaari. Maninia tooquioreerejaariuhua. <sup>43</sup> Na nuhuaji, doce canaasatuuri mishinijosaaquiaari pan raacuata, sapitiaaja raquiquiatanio. <sup>44</sup> Cinco mil pueyari cuno panjiniji miaquenuunaa quiquiaari.

*Mohuaca caco Jesu rucuanenujiniji pohuatasano*  
(Mt 14.22-27; Jn 6.16-21)

<sup>45</sup> Nio nuhuaji, Jesuuri na saquiriojosano pueya tacanitiaquiaari botejinia, nojori puetanura nojuaja caminia taquijiria Betsaida tiacajiniara. Jiyacaritij, Jesuuri pueya sequeriquiaa nojori quiojonuhua na tiacajiniohua. <sup>46</sup> Pueya jaara tari quiojoquiaariuhua, Jesuuri tuhananuucua tacaquiaari tii na secojonura na Que Pueyaso. <sup>47</sup> Jaara niniquiaari, boteeri tari caminia jiuujiajinia jaaretariquiaa. Jesuuri juhuanujuaja na jateesaqui quiriquiaa-jaa. <sup>48</sup> Jesuuri nojori niqiquiaari najuhuaana juaarioconuyano. Majaari nojori naata jaaretanu quiriquiaa, puera paratu piyarojosacari nojoriicuara. Quera juhuaquenu panishacari, Jesuuri nojori rupuesee. Mohuaca caco canujuriquiaari. Quera nojori tajiriquiaari. <sup>49</sup> Nojori jaara na niqitiquiaari mohuaca caco canujiyano, nojoriiri na jyanitiquiaari samaru. Nocuaji sariyocuatereeri. <sup>50</sup> Puetunu nojorijianaari na niqitiurii. Shiriiq-uitiuriiri. Jesuuri ritia pocuaree. Nojori sequereeri:

—¿Casaara nia puereyani? ¡Nioojia nia cumaquiri! ¡Maja pueretunu! Janiy-acuajanjia.

<sup>51</sup> Botejinia tacasee nojoriicuara. Paratuuri jiyacari pueyajee. Nojoriiri na shootariquiaa tacuriitia, jyanohua na jiuujiatenuta. <sup>52</sup> Nojoriiri juhuanujuaja maja na niishiniu quiquiaari Jesu miishano, queraatiara na jiyatesacari pan, pueya miaquesocoriquiano. Nojori jiuujiaacari juhua ninishiqui quiquiaarijia.

*Jesu naatanijosacari cusosuhua Genesaret jiyajinia*  
(Mt 14.34-36)

<sup>53</sup> Jesuuri na pueyata caminia niutiaquiaari. Tiuquiiioseeri Genesaret jiyajinia. Nojoriiri tii morotasee na bote. <sup>54</sup> Nojori jaara tohuareetaquiaari botejiniji, cuniquijinio pueyari ritia Jesu niishiquiaari. <sup>55</sup> Pueyari jiyacari netecuatuquiaari, Jesujiniji nojori pohuatanura puetunu cuno jiyajinia-janaa. Cusosuhuari juhuacatecara patootasaaquiaari na matucuajinia tee Jesu quiriquiaa na rucuanijosacari nojori jiyajiniacuajani. <sup>56</sup> Tiquiyocua Jesu rucuanijosacari, cusosuhuari nocuaji niojotasaaquiaari nucuaco, tuhuaqui tiacajinia, queraatia shiitianiyojua tiacajiniajuhuj, cuhuariquiacajinianio. Pueyari Jesu secojoree cusosuhua na quiatenura quenaaja na toque casaca. Canapuate na toque quiaquiaarini, puetunu nojorijianaari na cusunujiniji naatacoquiaariuhua.

## 7

*Casaate sesoriquiara pa jiyateja Pueyasorani*  
(Mt 15.1-20)

<sup>1</sup> Jesuucua catecanoquiaariiri Fariseocuaca, Moisés Rootasanojiniji ni-ishitiojonaanio, canapuate Jerusalén tiacajiniji nijioquiaaricuajani. <sup>2</sup> Cuno pojori quishacari tii, nojoriiri noojiaqueya Jesu pueyajinijinio niqiquiaari shuquitioojua miaqueyano. Nojoriiri jyanijia, nojori rucuanijosacari sesa miijiaca pueya tajinia, sesa nojori quiniu na naata nojoriicua pacunu. Nojoriiri cunora shuquitianu jitiqiaari, nojori jyanishacari nojori jiuujia naasucua curuushiniutianiya, shuquitioojua nojori miaquesacari. Naaratej, cuno pueyari Jesu pueya pocuanu coteequiaari. <sup>3</sup> Cuno Fariseocuaca, puetunu narta Judiocuacajanaanio, nojoriiri maja na cartenu quijia tari-ucuaaanu nojori supuetanaa niishitiojosano. Naaratej, majaari nojori miaquenu quijia shuquitioo. <sup>4</sup> Naacuajitij, nojori jaara miaquesano niqitiojosaquiji tacatequiohua, majaari nojori miaquenu shuquitioojua. Socua queraatia quiyari cuno pojori niishishano. Naacuajitij, nojoriiri jyaniquiaa, sesa nojori quiyaquiniucujia Pueyaso niqiara, nojori cuara na ratujua

jeequejoora, pataco, coshi, na maquetucuanio. <sup>5</sup> Naaratej, Fariseocuaca, Moisés Rootasanojiniji niishitiojonaanio, nojoriiri Jesu nequesotaquiaari:

—¿Casaara quia pueya tojitiaaquiya pa supuetanaa niishitiojosanoni? Nojoriiri maja na shuquitianu quiquiaa na miaquenuunura.

<sup>6</sup> Jesuuri cuno pojori riucuaaree:

—¡Niaari sapuenu juhua maninia pueya niquishano! ¡Niaacuajaari seetanujuanaa sesa miijiaca! Pueyaso sequesano caminiujiunia Isaíasri maninia sequequiaari niajaniyajinijicuaaja, naa na naajiotasacari Pueyaso sequesano:

“Nio pueyari saaja na rupaata shuquiritiaa janiya. Nojori jiuujiaari saniniuujia tucuacaanu quiya janiyajiniji. <sup>7</sup> Nojori miishano quiriani, cunoori najuhuanaj. Naa nojori miishanoni, majaari na shuquiritiniu janiya. Nojori niishitiojosanoni, cunoori tama pueya niishitiojosanojuaaja, maja cua sequesano”.

<sup>8</sup> Niaari cua pueya pocuariquiaa. ¿Niajaniyariuhuj? ¿Casaara Pueyaso sequesano nia tojiyaquiuaanijia? Niaacuajaari Pueyaso sequesano tojiyaquiya, tama nia supuetanaa niishishanojuaaja nia miiniuria najuhuanaj.

<sup>9</sup> Jesuuri socua naa sequequiaari cuno pojoritij:

—Tama nia miiniu jiidishanoocua nia miiniuriajaaja, ¡niaari Pueyaso sequesano shocortaa saaja! <sup>10</sup> Moisés cuajaari naa rootaquiaari: “Maninia quia miiri quia que, quia nucuanio. Majaari nojori rerequetenu. Cante na que, na nucua sesacajani, cuno pueyano cuaara mosaaria”. <sup>11</sup> Niaari sequeya saniniuujia, maniniacuaja, pueyano jaara na que, na nucua sequere: “Maja cua naata naacutanu niajaniya cua casamitia. Janiya tari Pueyasora jiyateree puetunu cua jiidiasanojuanaani”. <sup>12</sup> Niaari sequequiaajuhuj, pueyano jaara naa sequeretej, maniniacuaja maja na naacutanura na que, na nucuanio. <sup>13</sup> Naacuajitij, niaari Pueyaso sequesano shocortaa saaja, tama nia niishishanojuaaja nia miiniuria najuhuanaj. Cuno nia niishishanocuajaari saaja nia supuetanaajiniji caminiujiushano. Niaari socua queraatia casaa miiquiaa juhua cunojuhuj.

<sup>14</sup> Naa na nacasunu nuhuaji cuno pojoritij, Jesuuri pueya rerejoterohua na shocua. Nojori sequereeri:

—Cua tojitiare puetunu niajaniyajanaa, maninia nia niishiniuria. <sup>15</sup> Casaa pa miaqueyani, Pueyasora naajaa. Cunoori maja na naata pueyano jiyatenu sesa miijiara. Poojiajinia pa niishiriojosano cutaraari sesara pa jiyateya Pueyasora. <sup>16</sup> Cante numaacani, nojuaja cuaara tojitiaara cua sequesano.

<sup>17</sup> Jesu jaara tiujiaquiaari cuno pueya, tiajiniaaco tiuquiyarohuari. Na saquiriojosano pueyari tii na nequesotaree pueya na niishitiojosanojiniji. <sup>18</sup> Jesuuri nojori sequeree:

—¿Niaateeri cua sequesano niishiyaquiyajuhuj? ¿Majateeri nia niishiniu? Puetunu pa jiniacuma tiuquijiajanaani, cunoori maja na jiyatenu sesa miijiara pajaniya. <sup>19</sup> Pa miasanoni, majaari na tiuquiniu poojiajinia, saaja pa seecojinia mishiya cutaraari. Na nuhuaji pocoma tajiyari pa marecuhucuma.

Nio sequesanota, pueya niishitiojoriquiaari, puetunu miaquesanojuanaari maniniacuaja pa miaquesocoriquiano. Maja cutaraari na naata na jiyatenu pajaniya juhua curuutuucara Pueyasora. <sup>20</sup> Jesuuri sequereejuhuj:

—Pueyano niishiriojosano sesa noojiajiniani, cuno cutaraari sesara na jiyatequiaa. <sup>21</sup> Pueyano jiuujiajiniji supueya cutaraari sesa niishiriojosano,



sesa na miiniuria. Naacujitij, pueyanoori na camishoo maajipohua numuetucujua, seya numuetucujua juhuj. Tamonu pueyano casami nohuasejoquiaari. Pueya moquiaajaariuhuj. <sup>22</sup> Narta pueyano niqiuocua numuetucujuaari. Tamonu pueyano casamiicua jiaatiaquiaari. Jiyano hua sesa miiquiaari. Cuaracashijionu niishiyari. Tama na cuaqueyajaaja shuquiritiqiaari na miiniu jiiitishanota. Narta pueyano miananajoquiaari. Tamonuucua tonujuquiaari. Naajuhuj, saaja tama na cuaqueyajaaja shuquiritiaja quiquiaari. Juhujaniya sesa miiquiaajaariuhuj, moseeca na quiniuucua. <sup>23</sup> Puetunu nio sesa miishanojuanaari pueya jiuujiajiniji supuequiaa. Cuno cutaraari sesa quijiara pueya jiyateja Pueyaso niquiara.

*Taatu tiuushacari Jesuucua*  
(Mt 15.21-28)

<sup>24</sup> Jesuuri cuniquiji quiaaree Tiro tiaca shocua jiyajiniara. Tii tiuquishii tamonu tiajiniaari. Majaari na paniniu quiquiaari pueya niishiniuria nojuajiniji, tee na quiyani. Naajaa, majaari na naata jamaaniu quiriquiaa. <sup>25</sup> Tamonu maajiiri ritia Jesujiniji niishiquiaari. Neyatuuri samaruraca quiriquiaa. Naaratej, maajiiri Jesuucua niqiaari. Na cariquimiaaji mojuquetaseeri. <sup>26</sup> Cuno maajiiri Sirofenicia jiyajinijinio taatu quijia. Jesu secoseeri samaru na tohuataniniuria neyatujiniji. <sup>27</sup> Jesuuri maaji sequeree miriqui:

—Quia tarinitiare, muerasu cuara coteenu miaquenuura. Majaari maninia muerasu pa jaariutianura na miaquesano, sareyacari jatasocoriquiano.

<sup>28</sup> Maajiiri Jesu riuquaree:

—Jaa, Jiyaniijianaa. Naajaa, sareyacuaajaari miaqueja cariquiacoji tatucaja, muerasu totinijosano miaquesano shiriya.

<sup>29</sup> Jesuuri na sequeree:

—¡Quiaacuaja maninia cua riuquaree! Quia tacateyarohua. Samarucuaajaari tari tohuataree quia niyatujiniji.

<sup>30</sup> Maaji tiuquishacariuhua na tiajiniohua, neyatu riuriatasuhuari na maquetujinia mataano. Samaruuri tari tohuatano quiriquiaa nocuaji.

*Jesu jeecasacari numueeju, tiquia pueyano*

<sup>31</sup> Jesuuri tacatequiaariuhua Tiro tiaca shocua jiyajiniji. Na tacatesacariuhua, Sidón tiaca shocojoquiaariuhuari, Decápolis jiya tiacanio. Galilea caminiajinia tiuquishuhuari. <sup>32</sup> Tii na quishacari, nocua jaatucusaquiaariiri numueeju, tiquia pueyano. Na jaatucunaari Jesu secototuquiaari na juaashiquia na nianura nocua, na jeecanura cuno pueyano. <sup>33</sup> Jesuuri pueyano numueeju jaatucuree tamocora pueyacuaji. Na numaama shirii na juaashiquiaari. Na nuhuaji, tama na juaashiquiajiniaajaaja riocoreeri. Na riacau cojuata pocuaashijia niti quiareeri. <sup>34</sup> Jiyacaritij, jiyocuacaanu maureeri. Noojia niareeri. Na nuhuaji, cusosu numaa sequereeri:

—¡Efata!

Nioori pueyano rupaajinia sequeya: “¡Quia riatere!”

<sup>35</sup> Jiyacaritij, numueeju numaari riatequequee. Na nitiiri jeequequeejuhuj. Ritia pocuaquee maniniaari. <sup>36</sup> Jesuuri cuno pojori rootaree maja nojori pohuatanura na jeecasano pueyanojiniji tamasaca niquiara. Nojoriiri saaja tiqiyocua pohuatanuquiaari. Naa Jesu rootasacari na naataniijosano pueyatej, maja nojori pohuatanura na miishanojiniji, nojoriiri saaja socua jiyacatequiaari pohuatanura. <sup>37</sup> Pueyari jiyano hua jiuujiatequiaari Jesu miishano na niqutiushacari. Tama nojorijiaarijia sequetooquiaari:

—¡Puetunujuanaa miya maniniaari! Numueejunucua jiyateya tojitiajacaraari. Tiquianucua pohuateyajaariuhuj.

## 8

*Jesu mianuutesacari cuatro mil pueya*  
(Mt 15.32-39)

<sup>1</sup> Jiyacaritij, jiyano hua queraatia pueyari rerejoquiaari Jesu na tojitianura. Majaari nojori jiiitanu quiquiaari casaa quenaaja na miaquetusocoriquiano. Jesuuri na saquiriojosano pueya piirii. Nojori sequereeri:

<sup>2</sup>—Nio pueyacua taraajeyanijia. Nojori tari jiuujianaraca juuca quiya niya cuata. Majaari quenaaja nojori jiiatunu miaquesano. <sup>3</sup> Janiya jaara nojori jiyaramiquiriohua na tiajinia miaqueyojuani, nucuaco cusojoniu yarohuacua. Noojiaqueya nojorijinijinioori niyara nijiorucuaa tucuacaanuji.

<sup>4</sup> Na saquiriojosano pueyari na riucuaaree:

—¿Paatucua taa miaquetere nojori niyani, pueya quiyaquishaquini?

<sup>5</sup> Jesuuri nojori nequesotaree:

—¿Taa pan nia jiiitiaani?

Nojoriiri na sequereeri:

—Nareja siete.

<sup>6</sup> Jesuuri na pueya sequereeri, nojori cuaara sequeera puetunu pueyajanaa nojori cajitiuniuria. Na nuhuaji, Jesuuri cuno siete pan pataree. Pueyaso secjoree nocuaraari. Na nuhuaji, na saquiriojosano pueyara na neecasereeri. Nojoriiri saniniuujia pueya na serotaree puetunujuanaa. <sup>7</sup> Secaja sapitiaaja jiiatuniquiaajaariuhuj. Jesuuri socua nocuara secjorohuacuhuj. Na nuhuaji, na pueya sequereeri nojori niqutiojonura pueya. <sup>8</sup> Puetunu pueyajanaari maninia miaquenuuree. Tooquioreejaariuhuj. Miaquesano cureenota mishinijosaaquiaariiri siete canaasatu. <sup>9</sup> Na miaquenaa pueyari quiquiaari cuatro mil pueya. Na nuhuaji, Jesuuri nojori sequereeri nojori quiojonuhua. <sup>10</sup> Na nuhuaji, Jesuuri botejinia tacataquiaari na saquiriojosano pueyata. Quiaareeri Dalmanuta jiyajiniara.

*Fariseocuaca niqiniu panishacari Jesu miishano Pueyaso cumaacata*  
(Mt 16.1-4; Lc 12.54-56)

<sup>11</sup> Fariseocuacaari Jesuucua tiuquiiijiosee. Nata juayonuutaseeri. Nojori saniniuujuniuria Jesu, nojoriiri na sequereeri juucua cuaara nojori niqishocoriquiano casaa miiria Pueyaso cumaacata. Nojoriiri naa na sequeturee, nojori niishiniuria Jesute seetanujuanaa Pueyaso Jiyarosano.

<sup>12</sup> Jesuuri noojia niaree na taraajenuta. Sequereeri:

—¿Casaara nio pueya niqiniu paniya Pueyaso cumaacata miishanoni? Seetanujuanaa nia sequeyanijia, majaari cua niqitiniu quiniutianiya nianianiya cua cumaacata cua miishano.

<sup>13</sup> Jiyacaritij, cuno pojori tiujiaqueeri. Na pueyata botejinia tacataaru huari. Caminia taquijiria niuutiaareeri.

*Jesu numootesacari na pueya Fariseocuaca niishitiojosanoocuaji*  
(Mt 16.5-12)

<sup>14</sup> Jesu pueyari na coseyaca niyajetatuquiaari. Nareja niquiriyatujua pan niyojua jiiatuniquiaa botejiniaari. <sup>15</sup> Jiyacaritij, Jesuuri nojori sequeriquiaa miriqui:

—Cua tojitiare. Niocua tama nia cuaqueyajaaja cojuariquia Fariseocuaca pan poreetajaacuaji, Herodes pan poreetajaacuajijiuhuaj.

<sup>16</sup> Majaari na pueya niishiniu quiriqiaa naa Jesu sequesacaritij. Nojoriiri cunora tama sequetooriquiaajaaja:

—Pa jiyaniijia jiyoteeri naa pa sequeya, coseyaca pa paaquiniucua pa sasocoriquiano.

17 Jesuuri na saquiriojosano pueya niishiriojosano niishiquii. Nojori sequereeri:

—¿Casaara naa nia niishiriojiya pan nia jiitiaaquishacarini? ¿Majateeri juhuanojuaja nia niishiniu tamonu juuca cua miishanojiniji? ¿Niaateeri cumajiuujiaacato, maja nia niishiniuria? 18 ¿Majateeri cua miishano nia niquiniu quiquiaacuaja nia namijiata? ¿Majateeri nia tojiniu quiquiaa nia numatajuhuaj? ¿Niaateeri ritia niyajetarucuaa cua miishano? 19 Janiya jaara cinco pan neecasecanu cinco mil pueyaratej, ¿taa canaasatu nia mishinijio-canu miaquesano cureenotani?

Nojoriiri na riucuaaree:

—Doce.

20 —Naajuhuaaj, janiya jaara siete pan neecaserucuaa cuatro mil pueyaratej, ¿taa canaasatu nia mishinijiorucuaani?

Nojoriiri na riucuaaree:

—Siete.

21 Naaratej, Jesuuri nojori sequereeri:

—¿Majateeri juhuanojuaja nia niishiniu naa cua miishanojinijitij?

Jiyacariti nojoriiri Jesu sequesano niishiquii.

### *Jesu jeecasacari cariojuaru pueyano, Betsaida tiacajinia*

22 Na nuhuaji, Jesuuri Betsaida tiacajinia tiuquiiioquiaari na pueyata. Tii na quishacari, Jesuucua jaatucusaaquiaariiri cariojuaru pueyano. Pueyari Jesu secojotuquiaari cuno cariojuaru namijia na quianura quenaaja.

23 Jesuuri cariojuaru quiaaree na juaashiquiajiniji. Tiaca jiaquiria na jaatucuyareeri. Cariojuaru namijia piquiojoree na riacautaari. Na nuhuaji, na juaashiquia niaree nocuaari. Na nequesotareeri:

—¿Quia naatate niquiniu shiitianiyojua quenaaja?

24 Cariojuaruuri niquiniu sanirii. Jesu sequereeri:

—¡Jaa! ¡Pueya niquiyaniya, juhua nacuhua rucoyano!

25 Jesuuri socua pacuterohua na juaashiquia nianu cariojuaru namijiaacua. Cariojuaruuri niquiniu saniriohuacuhuaaj. Jiyacaritij, tojetaarucua-janaa maninia niquijiara quiquiiri. 26 Jesuuri na tiajinia na jiyarorohua. Cariojuaru rootaree naari:

—Majaari tiacajinia quia quianuhua pueya quia pohuatanura cua miishanojiniji quiajaniya.

### *Pedro sequesacari, Jesu seetanujuanaa Pueyaso Jiyarosano (Mt 16.13-20; Lc 9.18-21)*

27 Na nuhuaji, Jesuuri quiojoquiaari na saquiriojosano pueyata tucuaqui tiacajiniara Cesareya Filipino tiaca shocuaqueya. Na quiasacari nucuaco, na pueya nequesotareeri:

—¿Taa pueya sequequiaa janiyani, cantena janiyani?

28 Nojoriiri na riucuaaree:

—Noojiaqueya pueyari quia sequequiaa, quiaanaari Tiuquinijiona Juan. Tamasacaari saniniuujia quia sequequiaacuaja quiaanaari supuetana Elías. Naajuhuaaj, tamasaari quia sequequiaa, quiaa naasucuaanaari tariucua-caanu pueyara Pueyaso sequesano caminiujunia, samiitianohuatuhuaaj.

29 Na nuhuaji, Jesuuri nojori nequesotaree:

—¿Niajanijarijataj, taa nia sequeyani, cante janiyani?

Pedroori na sequereeri:

—Quiajanijacuaja Cristo, Pueyaso Jiyarosano.

30 Jesuuri nojori rootaree maja nojori pohuatanura tamasa niquiara nojuajiniji Pedro niishishano.

*Jesu numootesacari na pueya, nojuaja mosaanutaniya*  
(Mt 16.21-28; Lc 9.22-27)

<sup>31</sup> Jiyacaritij, Jesuuri na pueya niishitiojonu coteequiaari tama nojuajini-jijiaaja, taa Pueyaso Niyanu miishaanutaniya jiyanoehua naquiya taraatiani. Naa na pueya sequereeri:

—Parta Israel pueya jiyaniijianucuaari cua tojitiaaquiniutianiya, pueyacuaara Pueyaso secojonaa jiyaniijianucuaajuhuj. Naajuhuj, Moisés Rootasanojiniji niishitiojonaari cua rerequetejaca quiniutianiya. Janiyari mosaanutaniyani. Na nuhuaji, janiyari jiuujianaraca juucajinia samiitianutaniuhuani.

<sup>32</sup> Jesuuri naa seetanujuanaa nojori sequequiaari. Na pohuatasanoori maja miriqui na quiniu quiquiaari. Jesu jaara naa sequequiaari, Pedroori tamocora na jaatucuree. Cuniqum na nacasureeri maja naa na pocuanuratej. <sup>33</sup> Jesuuri na nijiniara tacatequee saaja. Na saquiriojosano pueya na niquiniutia, Pedro sequereeri:

—¡Cua shuriucuaaji quia quiaare, Satanásnaa! Quia niishiriojosanoori maja Pueyasojiniji. Majaari quia niishiriojonu juhua Pueyaso panishano. Quiaari saaja juhua nio jiyajinijinio pueya niishiriojiya.

<sup>34</sup> Naa na sequenu nuhuajitij, Jesuuri na saquiriojosano pueya piirii, puetunu cuniqum quiniaa pueyajanaano. Nojori sequereeri:

—Pueyano jaara cua tojijiaa quiniu paniri, nojuaja cuaara niiria cucua, seetanujuanaa noojiata na panishacari janiya. Nojuaja cuaara niyajetaara tama na cuaqueya na cojuanurajaaja. Cuaara cucua panitiaara tama na cuaqueyajaaja. <sup>35</sup> Saniniuujia, cante tama na cuaqueyajaaja shuquiritiniu panijiani, na nuhuaji, nojuajaari jiyanoehua taraatia quiniutianiya pueyaracaanu. Saniniuujia, cante tama na cuaqueya panitiaa cua panishano na miiniuriani, na pohuatanura janiyajinijijiuhuaj, cuno pueyano cutaraari pueyaracaanu quiniutianiya shuquiriaatia. <sup>36</sup> ¿Niaarate maninia, pueyano jaara puetunu nio jiya casamijianaa jiitiare, na nuhuaji na sohanu jaara jataaare mani quiquiojinia pueyaracaanura? <sup>37</sup> ¿Pueyanote na naata Pueyaso niquitio queraatia na casamijinijinio, Pueyaso jiyatenuhuara nojuaja pueyaracaanu rishijia na quiniuria nata? Maja na naata. <sup>38</sup> Cante cua rupaa pohuatanu caririquiia sesa miijica pueya niquiara nio jiyajiniani, janiyari nojori caririquiniutianiyajaacuhuj. Naajuhuj, cante caririquiia mijiria quiniaa niquiara sequenurani, janiya nojori jiyaniijiani, janiyari cua tacatesacariuhua nojori caririquiniutianiyajuhuj. Janiyari jiyacari cua Que cumaacata jiyocuacaanuji tacatenutaniuhuani, maninia miijica cua Que seyatajuhuj.

## 9

<sup>1</sup> Jesuuri nojori sequequiaarijuhuaj:

—Seetanujuanaa nia sequeyanijia pueyanaa. Noojiaqueya niya quini-aajinijinio quiarijiani, majaari nojori cusonuunu quiniutianiya juhuanujuaja, nojori cuaara niquirijiaatijia Pueyaso cumaaca tiuquiyano cucua, na muerasu jiitiariquianoni.

*Jesu jatasacari shacantuucara*  
(Mt 17.1-13; Lc 9.28-36)

<sup>2</sup> Seis juuca nuhuaji, Jesuuri jiyaconaja tuhuananuucua tacaquiaari. Saaja nata quiojoquiaari Pedro, Santiago, Juannio. Jesu quishacari tuhuananujiniji, na cuaqueyari tamaatiuucua jataquiaari nojori niquiara. <sup>3</sup> Na

toqueeri shacantuquera jataquiaari, socua jiyanoehua cohujara sohuanatu-ujiniiji. Nio jiyajinia toqueya jeequejonaari maja na naata jiyanoehua cohujquera toque na jiyatenu, taa Jesu toque jataquiaaricuaani. <sup>4</sup> Jiyacaritij, nojoriiri supuetana Elías niquitiuquiaari, supuetana Moisésjuhuj, Jesuta pocoojiyano tii. <sup>5</sup> Jiyacaritij, Pedroori Jesu sequeree:

—Niishitiojonanaa, ¡canaa namitia niya quiyani! ¡Canaacua niaacuaji suhuorojoreni: quiara, Moisésra, Elíasranio!

<sup>6</sup> Jesu pueyari shiriqutiuriquiaa. Nocuaji Pedroori naa juhujaniya pocuariquiaa. Majaari na niishiniu quiriquiaa casaa na pocuariquiaani. <sup>7</sup> Jiyacaritij, jiyocuacaanuji cohujara najacaari nojoriicua rosequiaari. Cohujara nojori mishiquioma. Cohujara najacajiniiji, Pueyasoori tojishaaree pocuaano. Naa sequequiaaritij:

—¡Niocuaja cua Niyanuniyujua, cua shuquiritiasano! ¡Saaja nojuaja nia tojiri!

<sup>8</sup> Jiyacaritij, nojori jaara ritia niqunijionuuquiaari na shocuaqueya, majaari quenaaja tamonu na niquitiuniu quiquiaari socua. Saaja Jesuuri tamajaaja quiriquiaa.

<sup>9</sup> Nojori rosetasacariuhua tuhuananuucocoji, Jesuuri nojori rootaquiaari maja nojori pohuatanuhua tamasaca niquiara nojori niquishano. Jesuuri nojori sequequiaari cuara noojiajinia racatatuura, nojuaja jaara samitiarohujajaatijia. <sup>10</sup> Cunora, tama nojorijiaarijia maninia racataquiaari noojiajinia nojori niquitiushano. Maja cutaraari nojori niishituniu quiquiaari, casaara naa Jesu sequeree nojorini “cua samitiasacariuhua”. <sup>11</sup> Cunora, nojoriiri Jesu nequesotaquiaari:

—¿Casaara Moisés Rootasanojiniji niishitiojonaa sequequiaacuaarini, Elíasna coteenu tiuquiniutianuhua Pueyaso Jiyarosocoriquianoocuaaji?

<sup>12</sup> Jesuuri nojori riucuaaree:

—Seetanujuaanaacuaaquinatejaj, Elíasri coteenu tiuquiriquiano quiquiaari, puetunu cucuaji jeenucuariquianojuanaa. ¿Niaate niishiya casaara tariucuaaanu Pueyaso Rupaajinia naa naajiotasaaquiaari janiyajiniini: “Pueyaso Jiyarosanoori naquiya miishaanutaniya? Pueyari na soonutanijajuhuj”. <sup>13</sup> Janiyari seetanujuaana nia sequeyani, Elíascuajaari tari niquiaari. Pueyari naquiya na miiquiaari taa nojori paniquiaaricujani. Pueyaso Rupaajiniacuajaari naajiotasaaquiaari nojuajaari naa miishaanutaniyaquij. Seetanujuaana tari naa miishaaquiaariiri.

*Jesu tohuatesacari samaru, caya samijajiniiji*  
(Mt 17.14-21; Lc 9.37-43)

<sup>14</sup> Na nuhujaj, Jesu jaara tacatequiaariuhua na saquiriojosano pueya quishaqui, queraatia pueya niquishuhuari nojori shocua maano. Tii quitiuriquiaajaariuhua Moisés Rootasanojiniji niishitiojonaa. Nojoriiri Jesu pueyata juayonuutariquiaa. <sup>15</sup> Pueya jaara Jesu niquitiuquiaari, puetunu pueyajanaari nocuaji jiuujiatequiaari. Nojoriiri nocua netecuatuquiaari na saruhatanura. <sup>16</sup> Jesuuri na saquiriojosano pueya nequesotaree:

—¿Casaajiniiji nia juayonuutariquiaa cuno pojoritiani?

<sup>17</sup> Tamonu cuno pueyajiniinioori Jesu riucuaaree:

—¡Niishitiojonanaa, quiocua nitiaaree quiyanunijia! ¡Samaru jiiitiaano! ¡Samaruuri na jiyatequiaari tiqiuara! <sup>18</sup> Tiquiyocua na quishaqui, samaruuri na pojotequiaa. Naa na cusojosacaritij, cushau jataquiaa na rupaamajiiri. Na quiaca miquequiaajaariuhuj. Na nuhujaj, pootia maquiaari juhua macu. Quiyanuuri cunora sasacara quiyaree. ¡Socua piriuquiniutianiyari!

Janiyacujaari tari sequeree quia pueyani, nojori tohuatenura cuno samaru nojuajiniji. Nojoriiri maja na naata na tohuatenu quiriquiaa.

<sup>19</sup> Jiyacaritij, Jesuuri naa sequeree:

—¡Niaaqui Pueyasocua tiuyashijiacaja! ¿Janiyatucua pueyaracaanu nia jiitariquiani? ¿Janiyateeri pueyaracaanu nia rejeretanutaniyajaaniuhuj? ¡Miji nia jaatucure cuno caya samijia!

<sup>20</sup> Nocua jaatucusaareeri caya samijia. Samaru niquishacari Jesu, caya samijia miirii taraatiaari. Caya samijiaari pojoquee Jesu niquiara. Tii taquiriocuariquiaari. Na rupaamajiiri cushaariquiaa. <sup>21</sup> Jesuuri caya samijia que nequesotaree:

—¿Taacari na coteecanu naa na quiniuria juhuacatecarani?

Na queeri Jesu riucuaaree:

—Na naatujuajiniji naa quijiajuhuanajaj. <sup>22</sup> Na cusojuanura juucua, cuno samaruuri sequeyarucua na pojotequiaa manijinia, moojiniajuhuaj. Naaratej, jaaara quia naata quiri, canaacua quia taraajere quenaaja! ¡Canaa quia naacure!

<sup>23</sup> Jesuuri na sequeree:

—¿Casaara naa quia sequeree janiyani, “jaara quia naata quiri”? Cante Pueyasocua tiuya noojiata seetanujuanaani, nera miishiyari puetunu na panishanojuanaa.

<sup>24</sup> Jiyacaritij, caya samijia queeri nacaree:

—¡Jaa, quiocua tiuyanijia! ¡Cua naacure socua cua tiuuniuria quiocua!

<sup>25</sup> Jesuuri niquishacari queraatia pueya nocua rerequeejiano, ritia samaru sequereeri:

—¡Tojiyashijia, tiquia samarunaa, janiya quia sequeyani, quia tohuatare nio caya samijiajiniji! ¡Puetunu quia tohuatarejanaa! ¡Majaari socua quia tacatenuhua, nocua quia tiuquiniuhua!

<sup>26</sup> Samaruuri sariyocuaquee. Caya samijia taquiriocuaterohuariuhuj. Na tohuatesacari caya samijiajiniji, juhua macu na tiujiaqueeri. Nocujaj, queraatia na niquitianaa pueyari sequequiaari:

—¡Juaj! ¡Tari cusoquee cutaratej!

<sup>27</sup> Jesuuri na juaashiquiajiniji na quiaree. Na sanareeri. Caya samijiaari juhuajaniya nujaquiaariuhua.

<sup>28</sup> Na nuhuajaj, Jesuuri tiaco tiuquitiaquiaari na pueyataja. Tamajaaja nojori quishacari tii, na saquiriojosano pueyari na nequesotaree:

—¿Casaara maja canaa naata cuno samaru tohuatenu quiriquiaani?

<sup>29</sup> Jesuuri nojori riucuaaree:

—Jiyano samaruuri na naata tohuatanishaanu cutara saaja jiyanohua Pueyaso nia secojonuta nia miaqueyaquiniutia.

*Jesu pohuatanu pacutesacariuhua nojuaja mosaanutaniya*  
(Mt 17.22-23; Lc 9.43-45)

<sup>30</sup> Nojori jaara quiojoquiaariuhua tiji, Galilea jiya tajimiaari. Majaari Jesu paniniu quiquiaari pueya niishiniuria tee na quiyani. <sup>31</sup> Jesuuri jiyacari saaja na saquiriojosano pueyata quiniu paniriquiaa. Jiyacari, nojori niishitiojoriquiaari. Naa nojori sequereeri:

—Janiyari pueya niquitiosaanutaniyani, nojori miiniuria janiya taa nojori paniyacuajani. Nojoriiri cua monutaniya. Jiuujianaraca juucajinia, janiyari samiitianutaniuhua.

<sup>32</sup> Majaari quenaaja na pueya niishiniu quiriquiaa Jesu sequesano. Nojoriiri saaja puereriquiaa maninia na nequesoreenura casaa naa na sequenu paniriquiaani.



*¿Cante jiyaniijajanaa cutarani?  
(Mt 18.1-5; Lc 9.46-48)*

<sup>33</sup> Nojoriiri Capernaum tiacajinia tiuquiiijoosee. Tari nojori quishacari tiajinia, Jesuuri nojori nequesotaree:

—¿Casaajiniji nia juayonuutariquiaa nucuamajini?

<sup>34</sup> Nojoriiri saaja sanaajetaquee. Na juayonuutanujiniji niishi-tiuriquiaacuajaari. Nucuamaji, nojoriiri riutioconeetariquiaa teyano nojorijinijiniote socua tojishano pueyanoni. <sup>35</sup> Jesuuri jiyacari cajirii nojori na rootanura. Na doce pueya piiriiri. Nojori sequereeri:

—Cante socua tojishano pueyanora quiniu paniyani, nojuaja cuara quiria juhua serura, narta pueya na naacunura puetunujuanaa.

<sup>36</sup> Na nuhuaji, Jesuuri mueya nujuatequiaari nojori tajinia. Cuno mueya paree nojori niquiaraari. Na pueya sequereeri:

<sup>37</sup> —Cante jiyano mueya maseja na paniniutia janiyani, nojuajaari cua maseyajaacuhuj. Cante cua maseyani, majaari saaja na masenu janiya. Jiyocuacaanu Quijia cua Jiyarona maseyajaariuhuj.

*Tamonu pueyano tohuatanijosacari samaruhua Jesu cumaacata  
(Mt 10.42; Lc 9.49-50)*

<sup>38</sup> Tamacari, Juanri Jesu sequereeri:

—iNiishitiojonanaa, canaari tamonu pueyano niquiriini quia sesa jiyaniquiyano samaruhua na tohuatanijionura pueyajiniji! Nojuajaari maja pajaniyajinijinio. Nocuaji, icanaari na tenujureeni maja socua naa na miiniuriatej!

<sup>39</sup> Jesuuri nojori sequereeri:

—¿Casaara nia tenujureeni? Pueyano jaara maninia miishano miiri cua sesa cumaacata, na nuhuaji, nojuaja maja na naata sesa pocuanu janiyajiniji. <sup>40</sup> Nia niishiri, cante maja pa paracani, nojuajaari pa jiyano. <sup>41</sup> Nia rucuanijosacari, cante nia raateya mohuacaniyoyua na paniniutia janiyani, cua pueya nia quiniuucujuhuj, Pueyasoori saniniuujia maninia casaa na niqutionutaniya na jiiitasanojiniji.

*Puereeta quiniutianiyari sesa miijacara  
(Mt 18.6-9; Lc 17.1-2)*

<sup>42</sup> 'Nio mueyari cucua tiuujia. Cante jiyano mueya miitirii sesani, nera maara socua maninia quiri, puereetujajau saajia jaara morotasaare na riquiajiniji, caminia queronijinia jartasocoriquiano. <sup>43-44</sup> Nio miriqui cua niishitiojosano nia tojiri: tama nia juaashiquiajaaja jaara nia jiyatere sesa miijara, nia juaashiquia nia rashiquiare juhuari niaa mariqui mani quiquiojinia jatasaareeri, sesa miijia nia quiniuucua. Cuno mani quiquiojiniani, majaari mani maquesanu. ¿Niaateeri paniya tii nia jatasaanura caapiquiquiojuata? Jiyano socua maninia cutaraari niaara, juaashiquiaaju nia tiuquinishaanura Pueyaso shuriucua, pueyaracaanu shuquiriaatia nia quiniuria nata. <sup>45-46</sup> Naajuhuj, nia niohuaca jaara nia jiyatere sesa miijara, nia rashiquiarenoj maja nia jatasaanura mani quiquiojinia. ¿Niaateeri paniya tii nia jatasaanura caapiquiniocuata, pueyaracaanu tii nia saniitiosaanura? Jiyano socua maniniaari niqiniocuata Pueyasocua nia tiuquiniuria, pueyaracaanu nata nia quiniuria shuquiriaatia. <sup>47-48</sup> Naajuhuj, nia namijia jaara sesa miitiriquia nijaniya, nia jiaterejoj. Naa nia tarinitiare sesa nia miiniu, maja nia jatasaanura caapiqui namijiata pueyaracaanu mani noshishaqui. Sesa miijacaari cuno mani quiquiojinia quejoosaanutaniya, pueyaracaanu nojori saniitiosaanura. Cuno manijinia, majaari porohua cusonuunu. Maniiri tii pueyaracaanu noshiya. Majaari na maquesanu.

Jiyanohua socua maniniaari nia tiuquiniuria Pueyasocua niquiriyatujua namijiata pueyaracaanu shuquiriaatia nia shootianura nojuaja.

Naa Jesu niishitiojosacari miriquitij, nojuajaari pueya niishitiojoriquiaa nojori tarinitianura jiyanohua na miiniu panishano, cuno jaara sesa miijara jiyateriquia nojori.

<sup>49</sup> Jesuuri socua niishitiojorohua:

—Puetunu Pueyaso muerasujuanaari saniniujiushaanutaniya juhua manitia, taa shu caquishiyacuaani na moqueyaquiniuucujaji. <sup>50</sup> Naajuhuaaj, shoniiri jiyanohua maninia, shu moqueyaquiniuucujaji. Saniniuujia, shoni jaara shaacara quiri, ¿maatucua taa tiquiriiquiara quiriohua saajaniuhuaaj? Maja na naata. Naajuhuaaj, Pueyaso cumaaca nia jiitiare nioojiajinia, nia mariqui najuhuana quijia quiriiri juhua Pueyaso niishiyashijia pueya. Naajuhuaaj, jiyanoojiaca nia quiri, jatiqui nia quiniuria shuquiriaatia.

## 10

*Jesu niishitiojosano maja pueya cartenura necocua*  
(Mt 19.1-12; Lc 16.18)

<sup>1</sup> Na nuhuaji, Jesuuri Capernaum tiacajiniji quiaquiaari na saquiriojosano pueyata. Judea jiyajinia quiojiyareeri, Jordán moo taquijirijuhuaaj, pananu muetasamaji jiyajinia. Pueyari jati nocua rerejoquiaariuhua Jesu quishaqui. Jesuuri nojori niishitiojonu coteeree socua, taa na niishitiojoquiaari tariji-acuajani. <sup>2</sup> Jiyacaritij, noojiaqueya Fariseocuacaari Jesuucua nijioquiaari na saniniujiuniuria nojori nequesotanuta, nocuara nojori saquiriojotanura juucua. Cunora, cuno pojoriiri Jesu nequesotaree:

—¿Maninate pueyano cartenura necocua?

<sup>3</sup> Jesuuri nojori nequesotaree saniniuujia:

—Cua sequeretoj, ¿taa Moisés sequequiaari nijajaniyani?

<sup>4</sup> Cuno pueyari Jesu riucuaaree:

—Moisésri pa sequequiaaricuaaja, pueyanoori na naata necocua cartenu. Neyaca cuaara coteenu na niquitioora na cartetaja naajionee, necocua na cartenura. Moisés cuajaari naa pa sequequiaaritij.

<sup>5</sup> Jesuuri cuno pojori sequeree:

—Moisésri naa sequequiaari nijajaniyatej, pueyaracaanu cumajiuujiaaca nia quiniuucua, nia niquiocuaacua taraajeyashijia nia quiniuucujuhuaaj.

<sup>6</sup> Saniniuujia, Moisésri naa naajiotaquiaari pueyajiniji:

“Pueyaso jaara puetunu casaajanaa shipiniquiaari, nojuajaari niquiriyatu caya shipiniquiaari, niquiriyatu maajinio”.

<sup>7</sup> Naaratej, pueyanoori na queya tiujianutaniya necocuara na caminiuria.

<sup>8</sup> Nojori jaara camitioore, nojoriiri juhua niquiriyatujua pueyanora quiquii. Naacuajitij, nojoriiri maja juhua caapiqui pueya na quiniu tari. Saaja juhua niquiriyatujua pueyano quiyari. <sup>9</sup> Cunora, pueyano cuaara necocua carteyaquiiria, Pueyaso rupuetootesano nojori quiniuucua.

<sup>10</sup> Majaari Jesu saquiriojosano pueya niishitiuniu quiquiaari naa Jesu sequesano. Na nuhuaji, tijajinia nojori quishacariuhua, na saquiriojosano pueyari Jesu nequesotaquiaari casaa na sequenu paniriquiaa naani.

<sup>11</sup> Jesuuri nojori sequeree:

—Cante necocua carteya tamonu maajitia na caminiuriani, cuno pueyanoori jiyanohua sesa miya coteenu necocua. Pueyasora, naa na miishacaritij, nojuajaari juhua narta pueyano niquiocuata quijia.

<sup>12</sup> Naajuhuaaj, maaji jaara cartere neyaca tamonuta na caminiuria, cuno maajiiri sesa miya Pueyaso niquiarajuhuaaj.

*Jesu niasacari na juaashiquia naatujooriicua*  
(Mt 19.13-15; Lc 18.15-17)

<sup>13</sup> Na nuhuaji, Jesuucua jaatucunuusaaquiaariiri naatujoori, Jesu nianura na juaashiquia nojori nacaacua. Na saquiriojosano pueyari naatujoori jaatucunaa tenujuriquiaa saaja. <sup>14</sup> Jesu jaara na niqiuquiaari, juaaquiiri. Nojori sequereeri:

—¡Nia tarinitiare naatujoori cuara niiria cucua! ¡Maja na tenujunu! Canapue te Pueyaso muerasura quiniu paniyani, nojori cuara juhua nio naatujooriria jataara. <sup>15</sup> Seetanujuanaa nia sequeyanijia, Pueyasocua nia tiuuri seetanujuanaa, taa naatujoori tiuya cucuacuaani na taacanuyaquiniutia. Saaja naacuajiti niaari Pueyaso pueyara jiyatesaanutaniya cutara, pueyaraanu Pueyaso jiiitasano nia quiniuria.

<sup>16</sup> Jesuuri jiyacari cuno naatujooriniyoyua pooree. Nojori nacaacua niojoree na juaashiquiaari Pueyaso na secojonuta, Pueyaso miiniuria maninia nojori.

*Jiyanohua casamiriaca mashaja pocoojosacari Jesuta*  
(Mt 19.16-30; Lc 18.18-30)

<sup>17</sup> Quera Jesu quianu panishacari quiniquiji, nocua netequiaariiri tamonu pueyano. Jesu cariquimiaji mojuquetaseeri. Na nequesotareeri:

—Maninia niishitiojonanaa, ¿taa cua miiniutianiyani, seetanujuanaa Pueyaso pueyanora cua quiniuriani?

<sup>18</sup> Jesuuri na sequeree:

—¿Casaara quia sequeya janiya maninia pueyanotani, quia niishiyaquishacari janiyani? Saaja Pueyaso cutaraari seetanujuanaa maninia. <sup>19</sup> Quiaacuajaari Pueyaso niishitiojosano niishiya. Moisés cuajaari naa na naajiotaquiaari:

“Maja quia camishoo maaji quia numuetucunu. Maja monu. Maja nohuasenu. Maja tamonuucua tonujunu sapojonuta. Maja cuaracashijionu. Quia queya tojijia quia quiriquia”.

<sup>20</sup> Pueyanoori Jesu riucuaaree:

—Niishitiojonanaa, janiyacuaajaari puetunu cuno rootasanojuanaa tojijia pueyaracaanu cua naatujuajinijini.

<sup>21</sup> Jesuuri na paniniutia na niqiriri. Na sequereeri:

—Juhuanoyuaja niqiriyatu casaari quiyajaa quia miishoo. Quia quiaarohua. Puetunu quia casamijanaa quia niqitiojocoo. Na nuhuaji, casamijiuniucua nareja quia niqitioie quia masesano cumaneeca quia casami sami. Naacuajitij, quiaari quia casami jiiitianutaniya jiyocuacaanu Pueyaso shuriucua. Na nuhuaji cutara, quiocua nimiohua cua nuhuajiriquiano.

<sup>22</sup> Cuno pueyano jaara tojiquiaari naa Jesu sequesantej, jiyanohua taraajequeeri. Na taraajenuta quiacuhua na tiajiniaari. Nojuajaari jiyanohua casamiriaca pueyano quiquiaari. <sup>23</sup> Na nuhuaji, Jesuuri na shocuaqueya niqinijioree. Na saquiriojosano pueya sequereeri:

—¡Jiyanohua jiyajeneta cutaraari casamiriaca pueyano quiniuria Pueyaso pueyanora!

<sup>24</sup> Na saquiriojosano pueyari shiriiquituuquiaari naa na sequesacaritij. Na nuhuaji, Jesuuri nojori sequenu pacutequiaari:

—Sanajooriniaa, seetanujuanaa nia sequeyanijia. Jiyanohua jiyajenetaari casamiriaca pueyano quiniuria Pueyaso pueyanora. <sup>25</sup> Taa camello maja na naata cusupuetaja cuhuoco tamajiria tajiniucuaani, naajuhuj, casamiriaca pueyanoori maja na naata tama na cuaqueyajaaja jiyatenu Pueyaso pueyano na quiniuria.

<sup>26</sup> Na saquiriojosano pueya jaara na tojitiaquiaari, nojoriiri socua jiyanohua jiuujiateree. Naaratej, tama nojorijaarijia nequesoree-tooquiaari:

—¿Canteeri Pueyaso pueyanora jiyatesaanutaniya socuanitioj?

<sup>27</sup> Jesuuri nojori niquirii. Naa sequereeri:

—Pueyano maja na naata tamajaaja Pueyaso pueyanora quiniu. Pueyaso cutaraari na naata na jiyatenu na muerasura. Pueyasora, maja jiyajeneta casaa quiniu.

<sup>28</sup> Pedroori Jesu sequereeri:

—Jiyaniijianaa, canaari puetunu canaa jiiitasanojuanaa tiujiaquiaarini quia pueya canaa quiniuria.

<sup>29-30</sup> Jesuuri nojori riucuarere:

—Seetanujuanaa nia sequeyanijia, shuquiriaatia quijia quiniutianiya cutaraari noo pueyano cante na jiiitasano tiujiaja cua tojijia na quiniuucuan, janiyajiniji pohuatana na quiniuucujuhuaaj. Cante na tia tiujiajani, tapuey-ocuaca, na rimiatuhua, na queya, necohua, na cuhuariquiano, nojuajaari maninia miishaanutaniya quiarijia mijiria na quishacarijia. Nojuajaari socua jiyanohua queraatia niqutiosaanutaniuhua na tiujiasanojiniji. Niqutiosaanutaniyari tiaca, tapueyocuaca, na rimiatuhua, na nucua, necohua, cuhuariquiano. Naajuhuaaj, naquiya miishano quiniutianiyari cua tojijia na quiniuucua. Naajaa, na nuhuaji, pueyaracaanu Pueyasota shuquiriaatia quiniutianiyari quiarinio jiyajinia. <sup>31</sup> Saniniuujia, queraatia tojishano pueyari najuhuaana quiijaca quiniutianiya Pueyasora, nojori tojiyaquiniucua nojuaja. Saniniuujia, Pueyaso ruuretajacara, queraatia Pueyaso pueyari quiarijia juhua najuhuaana quiijaca niqushano quiquiaa. Naajaa, nojoriiri na nuhuaji seetanujuanaa juhua jiyaniijianucua quiniutianiya Pueyasora, na tojitiajaca nojori quiniuucua.

*Jesu pacutesacariuhua pohuatana nojuaja mosaanutaniya  
(Mt 20.17-19; Lc 18.31-34)*

<sup>32</sup> Jerusalén tiacajiniara nucuamaji nojori quiasacari, Jesuuri na saquiriojosano pueya puetariquiaa. Nojoriiri na nuhuaji sacuariquiaa na puerenuta. Socua pueyari na nuhuajitiuriquiaa nojori puerenutajuhuaaj. Nuu cajiniocua, Jesuuri na doce saquiriojosano pueya jaatiaree tamocora tamajaaja. Tii nojori sequeriquiaari taa nojuaja miishaanutaniyani, nojori tiuquishacari Jerusalén tiacajinia.

<sup>33</sup> Nojori sequereeri:

—Niaacuajaari niishiya, paa tari Jerusalén tiacajinia quiaani, tee cuniqui Pueyaso Nyanu niqutiosaanutaniya pueyacuara secojonaa jiyaniijianucuan, Moisés Rootasanojiniji niishitiojonaanio. Cuno pojoriiri cucuara tonujunutaniya jiyaniijianucua na sapojonuta, cua mosaanura. Janiyari taucuaca niqutiosaanutaniyani. Janiyari jiyanohua naquiya miishaanutaniyani. <sup>34</sup> Nojoriiri cua rerequetenutaniya. Cua riocojotunutaniyari. Cua piquitiuniutianiyajaariuhuaaj. Naa cua miishaanu nuhuajitij, nojoriiri socua cua monutaniya. Naajaa, jiuujianaraca juucajinia, janiyari seetanujuanaa samiitianutaniuhuan.

*Santiago, tarajanu Juanta, nojori sequesacari Jesu, maninia nojori na miiniuria  
(Mt 20.20-28)*

<sup>35</sup> Na nuhuaji, Santiagoori, tarajanu Juanta Jesuucua catecanoquiaari. Nojoriiri Zebedeo niquiohua quiquiaari. Jesu sequetuseeri:

—Niishitiojonanaa, canaara quia miiri canaa masenu panishano quia-janiya.

<sup>36</sup> Jesuuri nojori nequesotaree:

—¿Casaa nia paniya cua miiniuria niaarani?

<sup>37</sup> Nojoriiri Jesu riucuaaree:

—Pueyaso jaara quia jiyatere pueya jiyaniijiara, quiocua canaa cajitijiore quia shuriucua, tamonu quia miaquetajara, tamonu quia muenecara, quia naacunaa canaa quiniuria.

<sup>38</sup> Jesuuri nojori sequereee:

—Majaari nia niishiniu nia masesano. ¿Nia naatateeri rejeretanu naquiya miiniu taa cua miishaanutaniyacuaani? Naquiya cua miiniuuri jiyanohua noonu quiniutianiya juhua pueyano jaara mani noshiyanojinia tiuquinishaare.

<sup>39</sup> Nojoriiri na riucuaaree:

—Taaquiriirinij, canaa naatacuaaquiniateja naquiya miiniu rejeretanu juhua quiajaniya.

Jesuuri nojori sequereee:

—Seetanjuanaa, niaari na nuhuaji cua ratusano raturiquianojuhuaj. Niaari juhua manijinia tiuquinishaariquianojuhuaj, taa cua tiuquinishaanutaniyacuaani.

Jesuuri naa nojori sequeriquiaa miriqui, taa jiyanohua naquiya na miishaanutaniyani, na cusosacari pueyacuara. Jesuuri naa nojori sequereee socuatej:

<sup>40</sup> —Maja cutara cua naata niqutionu niajaniya nia masesano, cua cajitiniuria niajaniya cua miaquetajara, cua muenecarano. Cunoori noo pojori niqitiosaanutaniya cutara, canra tari na jeenucuasaaquiaaricujani.

<sup>41</sup> Narta saquiriojosano pueya jaara tojiquiaari nojori masesano Jesu juucua, nojoriiri juaaquioquiaari. <sup>42</sup> Jesuuri nojori piirii. Nojori sequereeri:

—Niaacuajaari niishiya, mijiria jiya jiyaniijianucuaari na pueya jiitiaquiaa juhua na seya, tama nojori panishano na miiniurijaaja nojoritia. Naajuhuaaj, pueya jiyaniijianucuaari na jiitiasano pueyacua paaretaquiaa na cumaaca, tojishano pueya nojori quiniuria. <sup>43</sup> Niajaniya saniniuu-jia, majaari naa nia quiniu quiniutianiya. Cante tojishano pueyanora quiniu paniya niajanijajinijinioni, cuno cuara jiyateera tama na cuaqueyajaaja juhua narta Pueyaso pueya serura na quiniuria. <sup>44</sup> Cante nia jiyaniijia quiniu paniyani, nojuaja cuara quiiria narta Pueyaso muerasu cumaquinia. <sup>45</sup> Janiyajuhuaaj, majaari mijiria cua niniu quiquiaari pueya cua poonijiotenura quiria, tama cua cuaqueya cua shuquiritiniurijaaja. Janiya cutaraari niqiaarini pueya cua naacutanura, tama janiyajaaja mosaanura pueya niti, queraatia pueyacuaji cua ritianura Sesaaca.

### *Jesu jeecasacari Bartimeo namijia*

*(Mt 20.29-34; Lc 18.35-43)*

<sup>46</sup> Nojoriiri jiyacari tiuquiiioquiaari Jericó tiacajinia. Jesuuri cuno tiacajiniji quiariquiaa na saquiriojosano pueyata. Queraatia pueyari nata quiariquiaajuhuaaj. Jiyacaritij, tamonu cariyojuaru pueyanoori tii cajiriquiaa nuu shuucuara. Na sesa quiquiaari Bartimeo, Timeo niyanu. Nojuajaari cumaneeca mashiniquijiona quiquiaari, cariyojuaru na quiniuu-cua. Nojuajaari maja na naata poonijionu quijia tamajaaja. <sup>47</sup> Nojuaja jaara tojiquiaari cuno tajiyano pueyano quiquiaari Jesu, Nazaret tiacajinijinio, nojuajaari naa nakanu coteeree:

—¡Jesunaa, Pueyaso Jiyarosananaa, cucua quenaaja quia taraajereja!

<sup>48</sup> Queraatia pueyari na tenujuriquiaa na sanaajanura juucua. Saaja socua nacaree jiyanoahuari:

—¡Pueyaso Jiyarosanonaa, cucua quia taraajere!

<sup>49</sup> Jiyacaritij, Jesuuri socua nujuasee. Pueya sequereeri:

—Miji nia sequere cuno nacaani.

Cariyojuaruuri naa sequesaaere:

—¡Quia sanere! ¡Quia shuquiriri! ¡Quia sequeyacuaja! ¡Nocua quia canujiyare!

<sup>50</sup> Naa na tojishacaritij, cariyojuaruuri na tucuaque toque jataquee. Ritia jaaqueeri Jesuucua na catecanonura. <sup>51</sup> Jesuuri na nequesotaree:

—¿Casaa quia paniya cua miiniuria quiajaniani?

Cariyojuaruuri na riucuaere:

—¡Niishitiojonanaa, niqijiara quiniu paniuhanijia! ¡Cua namijia quia jeececarohua quiria!

<sup>52</sup> Jesuuri na sequere:

—Quia quiaarohua. Quia namijiaacuaja tari jeequerohua cucua quia tiuuniucua.

Jiyacaritij, cariyojuaruuri tari na naata niqiniu quiriquiaa. Nucuaco Jesu nuhuajiyareeri.

## 11

### *Jesu tiuquishacari Jerusalén tiacajinia*

(Mt 21.1-11; Lc 19.28-40; Jn 12.12-19)

<sup>1</sup> Nojoriiri tari catecanoriquiaa Jerusalén tiacaacua. Jiyacaritij, nojoriiri tiuquiiijiosee Olivo cuhuariquia tuhuananuucua. Cunoori Betfagé tiaca shuriucua, Betania tiaca shuriucuanio. Jesuuri caapiqui na saquiriojosano pueya jiyaroree tiji. <sup>2</sup> Nojori sequereeri:

—Cuno tiacajinia nia quiaare, pa tacoji niquishiyani. Niaa jaara tiuquishii tii, niaari burro riuriantanuniya morotasano, pueyano cajishoojua na nijinia. Niaa jaara niquishiinioj, niocua na samaacartasee. Niocua na jaatucumohua miji. <sup>3</sup> Pueya jaara naa nequesotare niajaniani: “¿Casaara nia samaacartaanoj?”, niocua na sequere: “Jiyaniijia na paniya rupaquijia. Ritia na niqutionutaniuhuacuaja”.

<sup>4</sup> Nojoriiri quiojoquiaari. Burro riuriatatuseri morotasano nuujinia, tamonu tia tohuateya shuriucua. Nojoriiri na samaacartasee.

<sup>5</sup> Tamasaca tii quiniaari nojori sequere:

—¿Casaa nia miyani? ¿Casaara nia samaacartaa cuno burroni?

<sup>6</sup> Nojoriiri na riucuaquiaari taa Jesu rootaquiaari nojoricuajani. Naaratej, cuno pueyari nojoriria na tarinitiaquiaari. <sup>7</sup> Na nuhuaji, Jesuucua jaatucutumohua cuno burroori. Pueyari na toqueya niojoquiaari burro nijinia, Jesu cajijia. Na nuhuaji, Jesuuri nocua cajirii. <sup>8</sup> Queraatia pueyari na toqueya muevoquiaari nucuaco, Jesuucua nojori maniniushitiniuria nuu. Tamasacaari jaamasucua piyotaquiaari cuhuariquiacajiniji, Jesuucua nojori niojotasocoriquiano na nucuacohuaj. <sup>9</sup> Jesu puetanaa, mariyata na nuhuaji nijionaari jiyanohua nacojonu coteequiaari nojori shuquiriniutia. Naa sequeturiquiaari:

—¡Pa shuquiritiare pa Jiyaniijia Pueyaso! ¡Jiyanohua maniniacuaja pa Jiyaniijia, cuno, Pueyaso cumaacata tiuquiyani! <sup>10</sup> ¡Pueyaso cuara na jiya-teera maninia Jiyaniijia na quiniuria pajaniyara! ¡Nojuajaari pa supuetanaa jiyaniijia David niti pa jitianuniya maninia cutara! ¡Jiyocuacaanu Quijia pa Pueyasocuaari pa shuqiritiasano!



<sup>11</sup> Jesuuri naa tiuquiquiaari Jerusalén tiacajiniatej. Pueyaso Secojoju tiajinia tiuquishiiri. Na niqunijionu nuhuaji puetunu casaajanaa, Betania tiacajiniara quiaquiaari ritiaari na doce saquiriojosano pueyata. Jiyacaritij, tari tenacariiri quiriquiaa.

*Jesu sesacasari jajauju higo naana*  
(Mt 21.18-19)

<sup>12</sup> Tariqui, nojori quiojosacari Betania tiacajiniji, Jesuuri miaajeriquiaa. <sup>13</sup> Tucuacaanuji niquirii higo naanaari queraatia jaamasucuaraca. Nocua canujiyareeri na niquniuria seetanujuanaa jajauracate quiriquiaa. Saaja queraatia jaamasucuaari quiriquiaa. Maja higo muetusacari quiquiaari jiyacari. <sup>14</sup> Jesuuri naa sesacaree higo naana:

—Maja quiocuaji socua quia jajau miasaanu quiniutianiya.

Na saquiriojosano pueyari na tojitiariquiaa naa na sequesacaritij.

*Jesu jaacasacari seya niqutiojonaa Pueyaso Secojoju tiajiniji*  
(Mt 21.12-17; Lc 19.45-48; Jn 2.13-22)

<sup>15</sup> Nojori jaara tiuquijioquiaari Jerusalén tiacajinia, Jesuuri tiuquiquiaari Pueyaso Secojoju tiajinia. Tiji pueya tohuatanijionu coteereeri, cuno pojori, canapuate Pueyasoocua puecosocoriquiano seya niqutiojoriquiaa cumaneecaracuajani. Na masejonaa tohuatanijioreejaarihuaj. Cumaneeca tacatojojuaca juhuacutucua caponeetareeri, tee pueya tacatojoriquiaa taucuaca cumaneecacuajani, Pueyaso Secojoju tiajinia niqutiojosocoriquiano cumaneecaracuajani. Naajuhuj, Jesuuri mococoonu niqutiojonaa cajitiucua caponeetaree. <sup>16</sup> Naajuhuj, majaari na shanacunu quiquiaari pueya niyacunura najuhuana Pueyaso Secojoju tia, na nitiootasano casamitia. <sup>17</sup> Na nuhuaji, pueya niqiuara niishitiojonu coteereeri. Naa sequereeri:

—Tariucuacaanu Pueyaso Rupaajinia naa naajiotasanocuaajaari quiya: “Cua tia sesaari quiniutianiya, Pueyaso Secojoju tia. Puetunu jiyacajinijionujuanaa pueya secojonuujuara quiniutianiyari”.

Niaari saniniuujia na jiyatequiaari nohuasenuujuaca quiqiora.

<sup>18</sup> Pueyacuara secojonaa jiyaniijianucua, mariyata Moisés Rootasanojiniji niishitiojonaari niishiquiaari naa Jesu miishanojiniji. Cunora, nojoriiri roojotooquiaari taa na motunutaniya Jesuni. Saniniuujia, puetunu pueyajanaari jiuujiateriquiaa Jesu niishitiojosano nojori tojishacari. Cunora, Judiocuaca jiyaniijianucuaari Jesu puereturiquiaa, puetunu pueyajanaa tojishacari na niishitiojosano. <sup>19</sup> Jaara niniquiaari, Jesuuri Jerusalén tiacajiniji quiacuhua na saquiriojosano pueyata.

*Higo naana sorenojiniji pahuatasano*  
(Mt 21.20-22)

<sup>20</sup> Tariquiicuaji, nojori shocosacari higo naana, na niqutiuquiaariiri tariucua soreno, puetunu na nujuacatajanaa. <sup>21</sup> Pedroori jiyacari Jesu sequesano niishiquii. Jesu sequereeri:

—Niishitiojonanaa, ¡quia niquiri! ¡Quia sesacasano higo naanaqui tari soreree!

<sup>22</sup> Jesuuri nojori riuuaree:

—Pueyasocua nia tiuuri. <sup>23</sup> Seetanujuanaa nia sequeyanijia, nia jaara Pueyasocua tiuuriquia nia taacanuyaquiniutia, nia naata nio tuhuananu sequenu: “Shiiquia niqijiji. Quia jaataare shoniniacu caminiajinia”. Niaa jaara naa sequere seetanujuanaa Pueyasocua nia tiuuniutia, niaari nia sequesano niquniutianiya. Naacuajitij, Pueyasocuaaji nia taacanuyaquishacari, nia sequesanoocuaajaari tohuateenutaniya taa nia

sequerecuajani. <sup>24</sup> Janiyari cunora nia sequeyani, puetunujuanaa nia masesano nia secojosacari Pueyasoni, nia niishiri niaa na jiitiaa tari. Na nuhuaji, niaari seetanujuanaa na masenutaniya. <sup>25</sup> Nia secojosacari, niaa jaara niishiquii niaa sesa quiya tamonu pueyanota, sesa na miini-uucua niajaniya, nojuaja nia jiyanoori. Naacujitij, jiyocuacaanu Quijia nia Queeri nia jiyanooniutianiya sesa nia miishanojinijijiuhuaj. <sup>26</sup> Niaa jaara jiyanooyashijia quiriquia, jiyocuacaanu Quinia nia Queeri nia jiyanooy-aquniutianiya, sesa nia miishanojinijijiuhuaj.

*Pueya nequesotasacari Jesu, cante na jiyaronani*  
(Mt 21.23-27; Lc 20.1-8)

<sup>27</sup> Na nuhuaji, nojoriiri quiaquiaariuhua Jerusalén tiacajiniohua. Jesu rucuanijosacari Pueyaso Secojojua tiajinia, nocua catecanoquiaariiri puey-acuara secojonaa jiyaniijianucua, Moisés Rootasanojiniji niishitiojonaajuhuj, narta Judiocuaca camarucuanio.

<sup>28</sup> Nojoriiri Jesu nequesotaree:

—¿Cante quia sequecanu naa quia miiniuriani? ¿Cante quia jiyatecanu Pueyaso Secojojua tia jiyaniijia quia quiniuriani?

<sup>29</sup> Jesuuri nojori riucaaree:

—Janiya nia nequesotanutaniya saniniunijia. Niaa jaara cua nequeso-tasano riucaare coteenucuaa, janiyari nia sequenutaniyajuhuj cante cua jiyaroquiaari naa cua miiniuriani. <sup>30</sup> Cua riucaaturetoj, ¿cante Tiuquinijiona Juan jiyaroquiaari pueya na tiuquinijionura moojiniani? ¿Narejaca pueyatee, Pueyaso soj? Cua riucaature.

<sup>31</sup> Jiyacaritij, cuno pueyari jiyasohuaja tama juayonuutanu coteequiaariijaaja. Naa sequetooquiaariiri:

—Paa jaara na sequereni Pueyaso na jiyaroquiaari, pa riucaarucua: “¿Casaara nocua nia tiuyaquiuanucuararini?” <sup>32</sup> ¿Paatucua taa sequereeri, nojuaja nareja pueya jiyarosano quiquiaari?

Cuno pojoriiri narta Israel pueya puereturiquiaa sequenura, Tiuquinijiona Juanri nareja pueya jiyarosano quiquiaari. Nojoricuajaari niishiriquiaa puetunu pueyajanaari niishiquiaari Tiuquinijiona Juanri seetanujuanaa Pueyaso sequesano caminiujiunia quiquiaari. Cunora, nojoriiri Tiuquinijiona Juan rerequetenu pueretuquiaari, pueya quishacari tii.

<sup>33</sup> Naacujitij, maja na naata na riucaatunu quishacari, Jesu sequetureeri:

—Maja canaa niishiniu.

Jesuuri nojori sequeree:

—Janiyajuhuj, maja cua sequenu quiniutianiya niajaniya, cante cua jiyaroquiaari naa cua miiniuriani.

## 12

*Miriqui pohuatasano sesa miijiaca poonijionaajiniji*  
(Mt 21.33-46; Lc 20.9-19)

<sup>1</sup> Jiyacaritij, Jesuuri miriqui pohuatanu coteequiaari cuno pojori niqiuara. Cuno camarucua sequereeri:

—Tamonu pueyanoori cuhuariquiajinia uva natoocuaari. Na nuhuaji, na shuriuquioco matacoreeri. Naajuhuj, saajia quejaquiaariiri uva rapijiojuara, na caaca reratesaanura. Jiyaconajara tiarejaariuhuj, tiji na cuhuariquia na cojuajara nohuasejojuaacuaji.

’Na nuhuaji, tamasaca poonijionaa pueya na niqutioreeri nojori cojuasocoriquiano nera. Naacujitij, uva carojotasacari, nojoriiri nojuaja niqutionutaniya tijijiuhuaj, na camarujanaa na quiniuucua. Na nuhuaji,

nojuajaari tucuacaanu quiaquiaari, tii marijia na shocotejonura. <sup>2</sup> Jaara tari quiquiaari uva carojotasacari, saniya cuhuariquia camarujuanaari na seru jiyaroquiaari cuhuariquia cojuanaa pueyacia. Na jiyaroquiaariiri cuhuariquia cojuanaa niqutionura nojori carojotasanojiniji, taa na camarujuanaa pocoojoquiaaricuaaja nojoritia tarijiani. <sup>3</sup> Cuhuariquia cojuanaa pueyari saaja jiyarosano seru quiaturee. Na piquitiuriiri. Na nuhuaji, juhuasu na jiyaroturohua na camarnuucuaari. <sup>4</sup> Na camaruri socua jiyaroquiaari tamonu na seru. Cuno seruuri jacusaaree saitia. Na nacaari surtasaaree saajiata jasano. Na sesacatureejaariuhuj. <sup>5</sup> Na camaruri socua jiyaroquiaari tamonu na seru. Cuno na seru cutaraari mosaquiaari. Na nuhuaji, socua jiyaramiquiquiaari queraatia na seyari. Puetunu nojorijinijiniojuanaani, tamasaari piquishaaquiaari. Tamasacaari puecoosaaquiaari cutara.

<sup>6</sup> 'Cuhuariquia camaruri saaja niquiriyatujua niyanuniyojua jiitiaquiaari, jiyanohua na panishano. Cunora, nojuajaari socua cuno neyanuniyojua jiyaroquiaari. Na queeri tama sequequiaarijaaja: "Cuno pueya jaara niqiri cua niyanu, nojoriiri na tojiniutianiya cutara". <sup>7</sup> Cuno cuhuariquiajinia poonijionaa niquishacari nojori camarnu niyanu nojoriicua niyano, nojoriiri saaja tamajaaja niishitiojotooquiaari:

—¡Niiori pa camarnu niyanu! Nio cuhuariquiaari tama nerajaaja quiniutianiya, na que jaara cusoyare. ¡Pa morej! ¡Pocua nio cuhuariquia camaruhuara quiquii tamajaajani!

<sup>8</sup> 'Cunora, na quiatureeri. Na motureeri. Na motunu nuhuaji, nojoriiri macu jataree cuhuariquiajiniji tamama.

<sup>9</sup> Jiyacaritij, Jesuuri cuno pojori nequesotaree:

—¿Taa cuhuariquia camaru miiniutianiya socuani? Nia sequereera pueyanaa. Nojuajaari cuhuariquia cojuanaa puecoonutaniya. Na nuhuaji, tamasa pueya niqutionutaniya cuno cuhuariquiaari, nera nojori cojuana.

<sup>10</sup> '¿Majateeri tariucuacaanu Pueyaso Rupaajinia nia serojonu quiquianucuaaja nio? Naa sequeyari:

"Tiajona pueyari tamaatiujiajau saajia jataree nojori tiasacari saijiniji tia. Na nuhuaji, cuno jatasano saajiaari socua cutara saajiaara jiyatesarohua tamasa saijiniji. <sup>11</sup> Cunoori pa Jiyaniijia miishano. Pajaniyara, na miishanoori jiyanohua maninia. Nocuaji jiuujiatesano".

<sup>12</sup> Jiyacaritij, cuno Judiocuaca camarucuaari niishiriicuaaja miriqui Jesu pohuatasanoori tama nojorijinijijiaaja quiriquiaa. Naaratej, nojoriiri Jesu quiatunu panirii juucua, nojori nujuatesocoriquiano. Nojoriiri pueya puereriquiaa saaja, naa nojori miiniuria Jesutej. Naacuajitij, nojoriiri nareja quiojoquiaariuhua. Naa Jesu pohuatasacari miriqui cuno saajiajinijitij, nojuajaari tama na cuaqueyajinijijiaaja pohuatariquiaa.

*Jiya jiyaniijia cuara pueyaracaanu niqitiosaaria na sequesano cumaneeca*

(Mt 22.15-22; Lc 20.20-26)

<sup>13</sup> Na nuhuaji, Jesuucua jiyaramiquishaaquiaariiri noojiaqueya Fariseocuacajinijinio, Herodes panijiaa pueyajinijiniojuhuj. Cuno pojoriiri Jesu pocuatenu paniquiaari sesa juucua, jiyaniijia nojori saquiriojotanura nocuara. <sup>14</sup> Naaratej, cuno pojoriiri Jesuucua nijioquiaari. Na sequetuseeri:

—Niishitiojonanaa, canaari niishiyani quiaa cutaraari sapojiyashijia. Quiaari seetanujuanaa sequeja. Majaari rimiajata quia niqiniu pueyajuhuj. Majaari pueya naata sapojonu quiajaniya. Quiaari seetanujuanaa

pueya jiuujia niquijia. Quiaa cutaraari seetanujuanaa Pueyasojiniji niishitiojojua, taate pa naata maninia quiniu Pueyaso niquiarani. Naaratej, canaa quia sequere, ¿maninate pa niqutiojonura pa cumaneecajiniji jiyaniijia Césarra, taa cuno tahue sequequiaari pajaniyacujani? ¿Taa quia sequeyani, niqutiojoshiyatee, maja soj?

<sup>15</sup> Jesuuri ritia niishiquii, naa nojori nequesotasacari nojuajatej, cuno pojoriiri na saniniujiuriquiaa sesa na pohuatenura najuhuanaj. Naaratej, Jesuuri nojori sequeree:

—¿Casaara nia saniniujiya janiyani? Miji nia riri cumanee cua niquishocoriquiano.

<sup>16</sup> Nera rishaareeri cumanee. Jaara na niqiquiaari, Jesuuri nojori nequesotaree:

—¿Cana naaquiti nocuani? ¿Cana sesateeri nocua naajiotasanojaniuhuj?

Nojoriiri na riucuarree:

—Jiyaniijia César naaquicujaja, na sesajuhuj.

<sup>17</sup> Jesuuri jiyacari nojori sequeree:

—Jaara tama César casaajaaja quiri, tama na casaajaaja nia niqutiore na camaru. Saniniuujia, Pueyaso nia niqutiore nerano tama na casaajaaja.

Jesu jaara naa nojori riucuaquiaariti, nojoriiri jiyanojua jiuujiatequiaari.

*¿Macunucuate samiitiaconutaniuhua?*

*(Mt 22.23-33; Lc 20.27-40)*

<sup>18</sup> Fariseocuaca nuhuaji, noojiaqueya Saduceocuacajinijiniori Jesuucua nijioquiaari. Saduceocuacaari jiyaniya macunucua maja na samiitiaconu quiniutianihua. Naaratej, nojoriiri Jesu nequesotasee nojori niishiniuria taa na sequenutaniya macunucujinijini. Na sequetuseeri:

<sup>19</sup> —Niishitiojonanaa, supuetana Moiséscajajaari pa rootaa na naajioneejinia, pueyano jaara cusoyare mueyaju, tarajanu cuaara camiria mashiquio, mueya na mueratenura tarajanu niti. <sup>20</sup> Tarjia, tamonu pueyanoori niya quiquiaari. Siete niquiohwaraca quiquiaariiri, saa canuujua. Jiyapueranuri camiquiaari. Na nuhuaji, shaajequiaariiri muetuhuoju. <sup>21</sup> Naaratej, na nuhuajishanaari tarajanu mashiquio camiquiaari. Nojuajaari muetuhuoju cusoquiaarijuhuaj. Naajuhuj, jiyareta na nuhuajishanaari na camiquiaari. Nojuajaari juhua tapueyocuaca cusoquiaari mueyajujuhuj.

<sup>22</sup> Cuno siete canuuri naa camiyoquiaari cuno maaji. Puetunu nojorijianaari cusonuquiaari. Majaari quenaaja niqiriyatujua mueya nojori mueratenu quiquiaari. Na nuhuaji, cuno maajiiri cusoquiaarijuhuaj. <sup>23</sup> Naacuajitij, macunucua jaara samiitiacorohua, ¿teyano cuno siete neyacaajinijiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

<sup>24</sup> Jesuuri nojori riucuarree:

—Niaari jiyanojua jiyajeneya Pueyaso Rupaajinia naajiotasano nia niishiyaquishacari, Pueyaso cumaacanio. <sup>25</sup> Macunucua samiitiacosacariuhua, majaari canuu camiyonu quiniutianiya maaji. Naajuhuj, maajipohuari maja na camiyonu quiniutianiya neyacaara. Canuu, maajipohua, nojoriiri mariyata quiniutianiya juhua jiyocuacaanu quiijaca Pueyaso seya, maja camiyosano. <sup>26</sup> Niaa macunucua samiitianijionujiniji nequesoreetaate. ¿Majateeri nia serojonu quiquiaacuaja supuetana Moisés naajioneejinia, taa Pueyaso sequequiaari Moiséscajaja nequeru casaja noshiyanojinijini? Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiajuhuaj, quia supuetana Jacobo Jiyaniijiano”.

<sup>27</sup> Naacuajitij, paari niishiyani Pueyaso pueya shaajeconoori saminiucua quiya Pueyasora cutara. Pueyasoori maja macunucua Jiyaniijia, saaja saminiucua pueya Jiyaniijia cutaraari. Janiyari cunora nia sequeyani, niaari jiyanoehua jiyajeneya nia niishiyaquiniucua Pueyaso Rupaa.

*Puetunu Pueyaso Rootasanojinijianaani, teyanote socua pa tojishocoriquianoni*  
(Mt 22.34-40)

<sup>28</sup> Tamonu pueyanoori Jesu tojiriquiaa Saduceocuaca riuhaneyano maninia saaja. Cuno pueyanoori Moisés Rootasanojiniji niishitiojona quiquiaari. Nojuajaari Jesuucua catecanoquiaari. Jesu nequesotareeri:

—¿Teyano tariucuacaanu Pueyaso Rootasanojinijiniote socua pa tojishocoriquianoni?

<sup>29</sup> Jesuuri na riucuaaree:

—Pueyaso sequesano socua na pueya tojishocoriquianoori nio: “Nia tojitiare Israel pueyanaa, pa Jiyaniijia Pueyasoni, nojuacuajaari pa Jiyaniijiajanaa. Majaari tamonu quiniu socua. <sup>30</sup> Nia Jiyaniijia Pueyaso nia paniri puetunu nioojiatajanaa, puetunu nia sohuanutajanaa, puetunujanaa nia niishitiajata, puetunu nia cumaacatajanaano”. Nio rootasanoori socua pa tojishocoriquiano puetunu Pueyaso rootasanojinijianaa. <sup>31</sup> Socua tarajanu na rootasano pa tojishocoriquianoori quera juhua coteenu na rootasanojuhuj. Naa sequeyari: “Quiarta pueyano quia paniri taa quia paniyacuaa tama quia cuaqueyajaajani”. Puetunu Pueyaso rootasanojinijianaani, majaari socua tamonu rootasano quiniu socua tojishocoriquiano nio caapiqui na rootasanojiniji.

<sup>32</sup> Jiyacaritij, cuno Moisés Rootasanojiniji niishitiojonaari na sequeree:

—Quiaacuaja maninia sequeree, niishitiojonaana. Seetanujanaari quia sequesano: quiyacuaaquiniateja niquiriyatujua Pueyaso. Majaari socua tamonu quiniu juhua nojuaja. <sup>33</sup> Seetanujanaa jiyanoehua maninia cutaraari Pueyaso pa paniniuria puetunu poojiatajanaa, puetunujanaa pa niishitiajata, puetunu pa sohuanutajanaa, puetunujanaa pa cumaacatano. Naajuhuj, jiyanoehua maniniaari parta pueyano pa paniniu, juhua tama pa cuaqueyajaaja. Paa jaara nio sequesano tojijica quirini, cunoori jiyanoehua socua maninia Pueyasora, puetunu seya catijasanojinijianaa nocuara, mariyata puetunu pueya niquitiojosano na casamijinijianaa nera.

<sup>34</sup> Jesu jaara tojiquiaari naa cuno pueyano riucuasano maniniatej, na sequereeri:

—Quiaaqui quera Pueyaso pueyanora quiya.

Na nuhuaji, majaari socua pueya nequesoreetanu paniniu quiriquiaa Jesu.

*¿Canaacuajinio supuenote Cristoni?*  
(Mt 22.41-46; Lc 20.41-44)

<sup>35</sup> Jesuuri Pueyaso Secojoua tiajinia niishitiojoriquiaa pueya. Jiyacaritij, nojuajaari na tojitianaa pueya nequesotaree:

—¿Casaara Moisés Rootasanojiniji niishitiojonaa sequequiaacuararini: “Cristonaari supuetana David niquiohuacuajinio supuenutaniya”?

<sup>36</sup> Pueyaso Sohuanu pohuatesacari supuetana David, nojuacuajaari sequequiaari:

“Jiyaniijia Pueyasoori cua Jiyaniijia Cristo sequeree: ‘Quia cajirijiaara cua miaquetajara, janiya cuara quia paraa shocojotare quiocuajijiaatijia, Jiyaniijiajanaa quia quiniuria pueyaracaanu cutara’ ”.

<sup>37</sup>Supuetana David jiyaniijiacasacari Cristo, ¿Cristotucua taa supuetana David niquiohuacuajinio supueno quirini? Davidcuajaari na jiyaniquiia “cua Jiyaniijata”.

Queraatia pueyari shanohua tojitiariquiaa Jesu pohuatasano.

*Jesu sequesano Moisés Rootasano niishitiojonaajiniji*

*(Mt 23.1-36; Lc 11.37-54; 20.45-47)*

<sup>38</sup>Jesuuri nojori na niishitiojosacari sequeriquiaa:

—Tama nia cuaqueyajaaja nia cojuare Moisés Rootasano niishitiojonacuajiji. Cuno pojoriiri puera tucuaque toque cushiyonu maniniucuaaja nojori rucuanejotajara, pueya shootianura nojori. Nojoriiri timiquiaa pueya saruhuatasacari nojori, nojori quishacari tiaca jiuujiajinia curotasano cajitiucuaajinia. <sup>39</sup>Nojori jaara masuusaare tamonu tiajinia queranacunura, nojoriiri ritia secooquiaa socua panishano cajitiujinia nojori cajitiuniuria tia camaru shuriucua. Naajuhuaaj, Pueyaso secojojua tiacajini-aqueya pueya rerejosacari, nojoriiri camarucua cajitiucuaajinia cajitiuni paniquiaa, pueya shootianura nojori. <sup>40</sup>Nojoriiri mashiquiopue tiaca masequiaa secaja cumaneecata nojori na sapojonuta. Naa nojori miiniu nuhujitij, nojoriiri Pueyaso secojoquiaa shitiarayocua pueya niquiara, maninia pueya nojori jyanishaanura. Naaratej, Pueyaso saniitiosacari maninia miyashijiaca pueya, nojoriiri socua jyanohua naquiya miishaanutaniya tamasaajiniji.

*Casamijiu mashiquio niqutiosacari na cumanee juurane Pueyasora*

*(Lc 21.1-4)*

<sup>41</sup>Tamacari, Jesuuri cajiriquiaa Pueyaso Secojojua tiajinia cumaneeca niqutiojojua tacoji, tee pueya niojoriquiaa na cumaneeca Pueyasoracuajani. Jesuuri tiji pueya shootiariquiaa na cumaneeca niqutiojijano. Queraatia casamiriaca pueyari queraatia cumaneeca niqutiojoriquiaa. <sup>42</sup>Jiyacari tiuquishijiaariuhua casamijiu mashiquio. Caapiqui cumaneeniyojua niasee cumaneeca niojojuajiniaari. Cuno cumaneeca na niasanoori maja puera cumaneeca na quiniu quiriquiaa. Saaja cobrejiniji shipinishano quiquiaariiri. <sup>43</sup>Jesuuri jiyacari na saquiriojosano pueya piirii. Nojori sequereeri:

—Seetanujuanaa nia sequeyanijia, nio casamijiu mashiquio cutaraari socua queraatia niqutiooree puetunu tamasaajinijijianaa. <sup>44</sup>Puetunu pueyajanaari na cumaneeca cureenoiniji niqutiojoriquiaa. Saniniuujia, nio maajiiri puetunujuanaa na miaquesocoriquiano na masetajarano niqutiooree cutara.

## 13

*Jesu sequesacari Pueyaso Secojojua tia niyartasaanutaniya*

*(Mt 24.1-2; Lc 21.5-6)*

<sup>1</sup>Jesu tohuareetasacari Pueyaso Secojojua tiajiniji, tamonu na saquiriojosano pueyajinijiniori na sequereeri:

—Niishitiojonanaa, quia niquiri Pueyaso Secojojua tia, puereetujuaaca saitia tiasano. ¡Jyanohua shanohua tia!

<sup>2</sup>Jesuuri na riucuaree:

—¿Quiaateeri cuno shanohua tia niquiia, saijiniji tiasano jyaconajani? Cuni-  
niqui, majaari saajia cureenu quiniutianiya tamonu caco maano quenaaja. Puetunu niyartasanojuanaa quiniutianiyari.

*Taa pa niishiniutianiyani jiya puequesacari quera*

*(Mt 24.3-28; Lc 21.7-24; 17.22-24)*



<sup>3</sup> Na nuhuaji, nojoriiri quiojoquiaari olivo cuhuariquia tuhuananuucua. Cuniqiji, maja puera tucuacaanu quiquiaari Pueyaso Secojoua tia. Na taquijiriaja quiquiaariiri. Jesu cajishacari tii, nocua catecanoquiaariiri Pedro, Santiago, Juan, Andrésnio. Nojoriiri na sequetuquiaari jiyasohuaja:

<sup>4</sup> —Canaa quia sequere taacari Pueyaso Secojoua tia niyartasaanutaniyani. ¿Casaa Pueyaso miiniutianiyani canaa niishiniuria quia sequesano quera tohuateya?

<sup>5</sup> Jesuuri nojori riucuaaree:

—Tama nia cuaqueyajaaja nia cojuare tamasaca sapojiyaquiniuucuaaji niajaniya. <sup>6</sup> Nia numooteyacuajanijia, queraatia sapojonuujacaari nijionutaniya nojori sequenura niajaniya: “Janiya Cristoni”. Naa sapojotunutaniya queraatia pueyari.

<sup>7</sup> Naa jaara tojiniuuri miaquetoojonujiniji niya, tucuacaanujuhuj, majaari najuhuaana nia shiriqitiuniu. Seetanujuanaa naa quiniutianiyari. Naajaa, jiyacari, majaari jiya puequesacari quiniutianiya juhuanouaja. <sup>8</sup> Tamonu rupaa pocuajacaari miaquetoojonutaniya tamaatiuucua rupaa pocuajacata. Pueyari tamonu jiyajiniji miaquetoojonutaniya tamonu jiyajinijinio pueyata. Naajuhuj, rijiaari jiuuquiujutianutaniya queraatia tiqiyocua tiacajinia. Jiyanohua miaajesacariiri quiniutianiya jiyacari. Naajaa, puetunu niojuanaari saaja shusha naquiya miiniu coteesacari quiniutianiya.

<sup>9</sup> Tama nia cuaqueyajaaja nia cojuare. Niaari tama nia tiacajinia jiyaniijianucuaajaaja niquitiosaanutaniya saniitiosocoriquiano. Naajuhuj, niaari Pueyaso Secojoua tiacajiniajanaa majacusaanutaniya. Niaari jiyatasaanutaniyajuhua tiaca jiyaniijiaacua, jiya jiyaniijianucuaacuanio, nojori nequesoreenura niajaniya, janiyajiniji pohuatanaa nia quiniuucua. Naacuajitij, niocua janiyajiniji pohuatate nojori niquiarajuhuj. <sup>10</sup> Jiya puequeyaquishacarijia, Pueyaso rupaari tari pohuatasano quiniutianiya puetunu jiyacajiniajanaa. <sup>11</sup> Cua tojiri, niaa jaara jiyatashiyare jiyaniijianucuaacua nequesoreesocoriquiano, majaari nia tacaaniu taa nia sequenutaniyani, taa nia pocuanutaniyani. Majaari quenaaja nia niishiriojonu naatej. Saaja nia sequere nojori niquiara jiyacari Pueyaso Sohuanu niishitiojosano niajaniya. Nia pocuasanoori maja niajaniyajiniji quiniutianiya, nia pocuasacari nojori niquiara. Cunocuaajaari Pueyaso Sohuanu niishitishano quiniutianiya, na pocuatesacari niajaniya. <sup>12</sup> Jiyacarijuhuaj, pueyanoori sesa miiniutianiya tama tarajanujuaaja, cua tojijia tarajanu quiniuucua. Tama tarajanujuaarijia na niqutionutaniya mosocoriquiano. Jiyacaritij, pueyari tama necohuajaaja miiniutianiya sesa, cucua tiuujiaa necohua quiniuucua. Naajuhuj, necohuari tama na queya tacartanutaniya monujuaaja, na queya tojiniuucua Pueyaso rupaa. <sup>13</sup> Puetunu nio jiyajinijinio pueyajaanaari maja na niquiniu paniniu quiniutianiya niajaniya, cua tojitiajaca nia quishacari. Naajaa, cante seetanujuanaa pueyaracaanu cucua tiuyajaani nio jiya jaara puequerejaatijia, nojuaja cutaraari shacantuuca quiijara jatanishaanutaniya, pueyaracaanu cuata na quiniuria shuquiriaatia.

<sup>14</sup> Naa jaara cuno jiyanojua sacuaraatia casaa niquiri Pueyaso Secojoua tiajinia nujuatesano, taa supuetana Daniel sequeya na naajioneejiniacua-jani, niocua ritia mashiri. (Cante nio serojiyani, nojuaja cuara niishiiria casaa na sequyani.) Judea jiyajinia quiniaa cuara mashiiria ritia tuhuananuhuacua, cuno sacuaraatia casaa jaara nujuatesaare Pueyaso Secojoua tiajinia. <sup>15</sup> Canapuate jiyacari quiya na tia cacojiriani, nojori cuara tiuquiti-aaquiria tiajiniaaco na casaa na riniuria juucua. <sup>16</sup> Canapuate jiyacari

quiya na cuhuariquiajiniani, nojori cuaara tacateyaquiuhuara na toqueya na poonuhuara. <sup>17</sup> Jiyacaritij, jiyanohua taraatia quiniutianiyari maajipohuara, nojori jaara manajaatohua quiya, jaara jiyacari jiitiare supuejaca conaajajuhuj. <sup>18</sup> Nia secojosacari, Pueyaso nia maseriquia juhuacarijia, nia mashiyocuatusacari cuaara quiyaquiiria shiniquia quishacari. <sup>19</sup> Cuno quishacari, jiyanohua naquiya miiniuuri quiniutianiya. Tariucuacaanu, majaari naa naquiya miiniu quiquiaari Pueyaso shipininiu nuhuaji nio jiya. Naajuhuj, cuno naquiya miiniu nuhuaji, majaari jiyano naquiya miiniu quiniutianihua socua, juhua nio. <sup>20</sup> Pueyaso jaara ritia tajitiyaquiri cuno naquiya miiquiosacari, pueya maara mijiria cureyaquirij. Pueyasocujaari ritia tajitiniutianiya cuno naquiya miiniu, na saquiriojosano pueyacu na taraajenuuca.

<sup>21</sup> 'Jiyacaritij, tamasaca jaara nia sequere: "Nia niquiri, Cristo tari niya quiya", jaara sequerejuhuj: "Nooj, jati quiyatej", majaari na tojitianunoj. <sup>22</sup> Jiyacaritij, queraatia sapojonuujuaari supuentaniya. Nojoriiri sequentaniya: "Janiyacuja Cristoni". Tamasacaari sequentaniyajuhuj: "Janiya Pueyaso sequenu panishano caminiujiuniani". Nojoriiri pueya niquishoo casaa miiniutianiya na cumaacata, Pueyaso saquiriojosano pueya na sapojonura juucua. Jiyacaritij, queraatia pueya cutaraari sapojosaanutaniya. <sup>23</sup> Cunora pueyanaa, tama nia cuaqueyajaaja nia cojuare. Janiyacuajaari tari juhuacarijia nia numooteyani. Majaari cua sequesano nia niyajetanu.

*Pueyaso Niyanu tacatenujiniji pohuatasano*  
(Mt 24.29-35, 42, 44; Lc 21.25-36)

<sup>24</sup> 'Naa naquiya pueya miiniu nuhuajitij, pananuuri ninishiquiria quiniutianiya. Naajuhuj, racaari maja na cuhuatanu quiniutianiya mijiria. <sup>25</sup> Riyari totentaniya. Jiyocuacaanu cumaacaraca quijiacaari tetecatunutaniyajuhuj. <sup>26</sup> Jiyacari, janiya Pueyaso Niyanuuri niquishaanutaniya jiyocuacaanuji roseyano cohujajiniani, jiyanohua shacantuuca cua cumaacata. <sup>27</sup> Jiyacaritij, janiyari cua seya jiyaramiquiniutianiyani nojori rerejotenura puetunu cua saquiriojosano pueyajanaa. Nojoriiri puetunu nio jiyajinijiniujuanaa rerejotesaanutaniya, socua jiyanohua tucuacaanu jiya cajiniocua puequetujinijinio.

<sup>28</sup> 'Quiarijia cutara nia niishiri higo naanajiniji. Shuniyara, na jaamasucuaari totequiaa jaranacujua na quiniuria. Na nuhuaji, na cashacucua jaara macumaaca quiri, quiarinio jaamasucuaari mueratumohua. Niaa jaara naa niquiritij, niaari niishiquiaa tacareejonuqui quiniutianiya. <sup>29</sup> Quiarijia saniniuujia, naatej taa nia niishiquiaa higo naanacuaani, niocua naa niishirijiuhuj janiya quera tiuquiuhuani, niaa jaara puetunu cua pohuatasanojuanaa niquiri tohuateyano. <sup>30</sup> Seetanujuanaa nia sequeyanijia, puetunu cua pohuatasanojuanaari niquishaanutaniya nio pa quishacari quiniaa pueya cusonuyaquishacarijia. <sup>31</sup> Jiya cajiniocuaari shaajenutaniya, nio jiyajuhuj. Cua Rupaa cutaraari maja na jatanu quiniutianiya. Cua sequesanoori puetunujuanaa tohuateenutaniya.

<sup>32</sup> 'Maja cutaraari nia niishiniu taacari cua tiuquiniutianihuanu, casaa juucatej. Majaari jiyocuacaanu quijiaca Pueyaso seya niishiniuujihuj. Janiyajanaari maja cua niishiniu. Saaja cua que Pueyaso cutaraari tamajaaja na niishiya.

<sup>33</sup> 'Cunora, janiyari nia sequeya cutarani, maja juhua maquenuujujuaca nia quiniu. Pueyaracaanu nia niqutiare cucuaji, juhua sutejaca. Tamajaaja nia soquere. Saaja pueyaracaanu nia secojoriquia Pueyaso. Majacuajaari

nia niishiniu taacari cua tiuquiniutianihuani. <sup>34</sup> Cunoori quiniutianiya juhua tamonu pueyano quianu panishacari tamonu jiyajiniara tucuacaanu. Na quianura, nojuajaari na seya seerataaree maninia nojori cojuanura na tia. Tamasaca niqutiyaree na poonijosanoori, nojori poonijosocoriquiano. Tamonu sequereeri, tohuateyaji na cojuanura pueyaracaanu, nojuaja cuaara tiuquihuaraaatijia. <sup>35</sup> Naaratej, nia sutere. Maja maquenuunu. Majaari nia niishiniucuaaja taacari tia camaru tiuquiniutianihuani, shusha ninishacari, shiyaqueya, caacaraja niunijosacari, tariquicuaji soj. ¿Taacari cua tiuquiniutianihuani? Johuaj, maja pa niishiniu. <sup>36</sup> Cunora, juhua sutejaca nia quiriquia, janiya mariqui nia jiyajenete-suhuari, canashiyaquiji cua tiuquishacariuhua niaacua. <sup>37</sup> Cua sequesano niajaniani, cunoori puetunu pueyarajanaa: “¡Nia sutereja! ¡Maja maquenu!”

## 14

### *Judiocuaca camarucua roojotoosacari nojori quianura Jesu* (Mt 26.1-5; Lc 22.1-2; Jn 11.45-53)

<sup>1</sup> Jiyacari, juhuanojuaja querajaa juuca quiriquiaajaari Pascua juucara queranacunura. Pascua juucajuhuj, poreetajaaju shipinishano pan miaquenu coteesaaquiaari siete juucara. Pueyacuara secojonaa jiyaniijianucuaari jiyacari Moisés Rootasanojiniji niishitiojonaata roojotooriquiaa Jesuucua. Nojoriiri roojotooriquiaa taa nojori sapojonuta nojori quiatunutaniya Jesu jiyasohujani, na motusocoriquiano. <sup>2</sup> Nojoriiri naa sequetooriquiaa:

—Maja queranacusacari naa pa miiniutij, paa mariqui puetunu pueyajanaa juaatiriiri.

### *Tamону maaji totasacari na shanohua jaanutaja Jesuucua* (Mt 26.6-13; Jn 12.1-8)

<sup>3</sup> Jesuuri Betania tiacajinia quiriquiaa Simón tiajinia na saquirojosano pueyataja. Cuno Simónri tarijia lepra cusotaja quiquiaari. Jesu caji-shacari tii miaquejajinia, tamonu maajiiri tiuquiquiaari. Shiitaniyojua shucuariquiaaja pataconiyojua cacatariquiaari, shanohua cohujaja saajiajiniji quejasano. Mishaja quiriquiaari shanohua jaanutajata, nardo jaamasucujiniji shipinishano. Jiyanojua queraatia cumaneecata masesano quiquiaariiri. Jiyacariitij, cuno maajiiri na shucuariquiaaja pataconiyojua cocuataree, na totanura Jesu nacaacua. <sup>4</sup> Tamasaca tii quiniaa pueyari juaari naa cuno shanohua jaanutaja niitiasaanuucua. Tama nojorijiaarija sequetooriquiaa:

—¿Casaara cuno shanohua jaanutaja niitiasaaree najuhuanani? <sup>5</sup> ¡Cuno jaanutaja maara niqutiosaacanu queraatia cumaneecara, casamiijiuniucua niqutiosocoriquiano!

Nojoriiri juhuacatecara cuno maaji juaarii.

<sup>6</sup> Jesuuri nojori sequere saaja:

—¡Nia tarinitiare! ¿Casaara nia rimiaaqueya nio maajiicuarani? Naa na miishano janiyani, cunoori jiyanojua maninia quiria. <sup>7</sup> Casamiijiuniucua pueyacuajaari pueyaracaanu quiriquiano niaata. Nia naatacuajaari maninia miiniu nojori nia panishacari. Janiya saniniujia, maja cutaraari cua quiniu quiniutianiya pueyaracaanu niaata. <sup>8</sup> Nio maajiiri maninia miirii. Majaari na naata miiniu quiriquiaa socua maninia nio na miishanojiniji. Na totasacari cucua na shanohua jaanutajani, nojuajaari juhuacarijia cua cuaqueya jeenucuaa, raaco cua niasaanura

janiya jaara mosaareni. <sup>9</sup> Seetanujuanaa nia sequeyanijia, puetunu jiyacajiniajanaa tee Pueyaso rupaa pohuatasaanutaniyani, nio maaji miishanoori pueyaracaanu pohuatasaanutaniyajuhuj. Naa na miishano janiyatej, majaari na niyajetasaanu quiniutianiya.

*Judas tacartasacari Jesu, na quiatenura*  
(Mt 26.14-16; Lc 22.3-6)

<sup>10</sup> Jiyacaritij, Judas Iscarioteeri quiaquiaari pueyacuara secojonaa jiyani-ijianucuata rojotoonura taa nojori na quiatenutaniya Jesuni. Nojuajaari Jesu saquiriojosano pueyajinijinio quiquiaarijuhuaj. <sup>11</sup> Jiyaniijianucua jaara tojiquiaari, Judas nojori quiatenu paniya Jesu, nojoriiri jiyano- hua shuquiririi. Nojoriiri Judas sequeree:

—Canaa quia niquitionutaniya cumaneecani, canaa quia quiatenu sami Jesu.

Cunora, Judasri niishiriojonu coteequiaari taacari nojori na quiatenu- taniya Jesuni.

*Jesu miaquesacari na nuhuajiria na pueyata*  
(Mt 26.17-29; Lc 22.7-23; Jn 13.21-30; 1 Co 11.23-26)

<sup>12</sup> Puetunu marijarajanaa, Judiocuacaari Jerusalén tiacajinia rerejo- quiaari poreetesoo pan nojori miaquenuunura siete juuca. Coteenu juuca sesaari quiquiaari “Pascua”. Cuno juuca puecoosaaquiaariiri Pascuara ri- uriotaca borregohua, Pueyaso niquiara miaquenuusocoriquiano. Naaratej, Pascua juuca quishacari, Jesu saquiriojosano pueyari Jesu nequesotaree:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiarijia Pascuarani?

<sup>13</sup> Jiyacaritij, Jesuuri caapiqui na saquiriojosano pueyajinijinio sequeree:

—Nia quiaare Jerusalén tiacajinia. Niaari tii riuriatanutaniya tamonu pueyano, na mohuaca pataano na patacojinia. Niaa jaara na riuriatasee, niocua na nuhuajimia. <sup>14</sup> Jaara tiuquishii tijinia, niocua cuno tia camaru se- quesee: “Niishitiojona naa quia sequeya: ‘¿Tee cuniqui cua miaquenutaniya cua saquiriojosano pueyata quiarijia Pascua niucuan?’ ” <sup>15</sup> Jiyacaritij, no- juajaari nia niquitiniutianiya puereetuuca sohuaca, jiyocuacaanu nataco, tariucua maninia jeenucuasano. Niocua cuniqui borrego majeetesee, niu- cua pa miaquesocoriquiano.

<sup>16</sup> Na saquiriojosano pueyari quiojoquiaari. Tiacajinia tiuquiiijioseeri. Nojori tiuquiiijosacari, nojoriiri puetunujuanaa riuriatasee taa Jesu se- queree nojoricuajani. Nojoriiri tii majeetesee borrego, Pascuara miaqueso- coriquiano.

<sup>17</sup> Jaara niniquiaari, Jesuuri tiuquiiijiosee na saquiriojosano doce pueyata.

<sup>18</sup> Nojori miaquenuusacari, Jesuuri nojori sequeree:

—Seetanujuanaa nia sequeyanijia, tamonu nijaniyajinijinio niya cuata miaqueyani, nojuajaari cua tacartanutaniya na quiatenura janiya, naquiya cua miishaanura.

<sup>19</sup> Jesu sequesacari naatej, nojoriiri jiyano- hua taraajequee. Jiyacaritij, tama nojoriijaari na nequesoreetanu coteeree:

—¿Janiya jiyoteeri quia quiatenutaniyani Jiyaniijianaa?

Puetunu nojoriijianaari naa na nequesotaree.

<sup>20</sup> Jesuuri nojori riucuaaree:

—Niquiriyatujua doce nijaniyajinijiniocuaja, nojuacuajaari nio, shusha pan shiya miacojuajiniani, nojuajaari cua quiatenutaniya. <sup>21</sup> Janiyacuajaari maninia tohuateenutaniya puetunujuanaani, taa tariucuacaanu Pueyaso Rupaa- jinia janiyajiniji naajiotasaaquiaaricuajani. Saniniuujia, jiyano- hua

taraatia quiniutianiyari cuno pueyanora, cantucuaaja cua quiatenutaniya mosocoriquianoni. Maara socua maninia quiquiaari cuno pueyanora, nojuaja jaara raaquishaaquiaari.

<sup>22</sup> Nojori miaquenuusacari, Jesuuri pan ririi. Na Que Pueyaso secojoree nocuaraari. Na neecasenu nuhuaji, nojori niqutiojoreeri. Na niqutiojosacari, naa miriqui sequequiaariiri:

—Jajaa. Nia miaquere. Nioori cua cuaqueya.

<sup>23</sup> Na nuhuaji, Jesuuri ratujua pataree. Na Que Pueyaso secojoreeri nojori ratusocoriquianoocuara. Na secojonu nuhuaji, na saquiriojosano pueya niqutiojoreeri nojori ratunura tiji. Puetunu nojorijianaari ratujuajiniji raturee. <sup>24</sup> Nojori sequere miriquiiri:

—Nioori cua nanaca. Cua nanacaari queraatia pueyacuara shoonutaniya. Naacuajitij, Pueyasoori seetanujuanaa jiyanooniutianiya pueya, saaja nojori tiuuniucua cucua, taa Pueyaso sequequiaaricuaajani. <sup>25</sup> Seetanujuanaa nia sequeyanijia, maja socua cua ratunu quiniutianihua uva caacajiniji, janiya cuara tacatemohuajaatijia pueyaracaanu Jiyaniijajanaa cua quiniuria. Jiyacaritij, janiyari shusha niaata na ratunutaniuhua.

*Jesu sequesacari Pedro, nojuaja nocuaji seetanutaniya*  
(Mt 26.30-35; Lc 22.31-34; Jn 13.36-38)

<sup>26</sup> Pueyasora na jaaquequenuunu nuhuaji, nojoriiri quiojoquiaari olivo cuhuariquia tuhananuucua. <sup>27</sup> Na quiojosacari, Jesuuri nojori sequere:

—Nio niucuajani, puetunu nijaniyajanaari cucua tiuuniu tarinitianutaniya. Naa naajiotasano quiyacuajaari nijaniyajiniji tariucuacaanu Pueyaso Rupaajinia. Naa sequeyari:

“Janiyari borrego Cojuana monutaniyani. Na borregohuari na camaru nuhuaji niyaquejonutaniya tamajaaja”.

<sup>28</sup> Na nuhuaji, janiya jaara samiitiarohua macujinijini, janiyari nia puetanutaniya Galilea jiyajiniani.

<sup>29</sup> Pedroori jiyacari Jesu sequere:

—Niya cuata quiniaa naasucua quiocuaji carajenutaniya. ¡Janiya cutara maja cua catenu quiniutianiya quiocuaji!

<sup>30</sup> Jesuuri saaja na sequere:

—Pedronaa, janiya seetanujuanaa quia sequeyani, nio niucuajani, quiaari janiyajiniji naa seetanutaniya pueya niquiara: “¡Maja cua niishiniu Jesu!” Quiaari naa pacutejonutaniya sequenutej, caacaraja caminiujiyaquishacarijia niunijionu.

<sup>31</sup> Pedroori saaja na pataariquiaa naa Jesu sequesacari nojuajatej. Socua sequerohuari:

—¡Janiya cuara mosaaria quiataqui, naajaa, majaari cua seetanu quiniutianiya quiocuaji!

Narta saquiriojosano pueyari naa sequetureejuhuaj.

*Taraatia Jesu secojosacari Getsemani cuhuariquiaajinia*  
(Mt 26.36-46; Lc 22.39-46)

<sup>32</sup> Nojoriiri jiyacari tiuquiiioquiaari tamonu cuhuariquiaajinia. Cuno cuhuariquia sesa quiquiaari Getsemani. Jesuuri na saquiriojosano pueya sequere:

—Niyaja nia cajituri, cua secojosacari cua Que socua nia tajoji.

<sup>33</sup> Nojuajaari saaja nocua rupojyaree jiuujianaraca na pueya: Pedro, Santiago, Juannio. Jesuuri juhuacatecara shiriiquiriquiaa. Tacaariquiaajaarihuaj. <sup>34</sup> Nojori sequereeri:

—¡Coojjajinia taraajeya jiyanohuanijia, quera cusoyanijia! Niyaja nia jiyo-jetare. ¡Niocua niqutiareja! ¡Majaari maquenu!

<sup>35</sup> Jesuuri socua shiitaniyoyua quiaaree nojori tacoji. Na secojonura Pueyaso, mojoquetaseeri. Jiyocuara jacamaquiaariiri. Pueyaso masereeri, maja naquiya na miishaanura juucua. <sup>36</sup> Na secojosacari, nojuajaari naa sequequiaaritij:

—Cua Quenaa, quiara maja jiyajeneta quia panishano quia miiniuria. Naaratej, janiya quia secojiyani, nio raatonuque cucuaji quia tajitiri. Naajaa, cuara quiyacuiiria juhua cua panishano. Saaja cuara quiiiria cutara taa quia paniyacuajani.

“Nio raatonuque” na sequesacari, Jesuuri miriqui sequeriquiaa naquiya na miishocoriquiano.

<sup>37</sup> Na secojonu nuhuaji, na saquiriojosano pueyacuatacategyarohuari. Nojori riuriatasuhua maquetiuyanoori. Jesuuri Pedro sequereeri:

—Simónnaa, ¿quiaate maqueya? ¿Majateeri quenaaja quia naata rejeretanu rupaquijia quia maquenu? <sup>38</sup> Nia sutere. Maja maquenu. Pueyaso nia sec-  
ojore niaa mariqui sesa miitishaareeri. Seetanujuanaa, poojiaari maninia miiniu panijia. Pa cuaqueyari saniniuujia sasaca quiyacujua. Majaari pa naata maninia miiniu pa panishano tamajaaja. Cunora, Pueyaso nia sec-  
ojore na cumaquiniuria nijaniya maninia nia miiniuria.

<sup>39</sup> Jesuuri quiaquiaariuhua socua secojonuhua. Na secojosacari, socua sequenu pacutequiaariiri juhua coteenu na sequesano. <sup>40</sup> Na nuhuaji, socua tacatequiaariuhua na saquiriojosano pueyacuatacategyarohuari. Nojori riuriata-  
suhuariuhua maquetiuyano. Nojori namijiaari saaja seecutayariquiaa na maquenuujunuta. Jiyacaritij, nojoriiri maja na niishiniu quiriquiaa taa na riucuatunutaniyanoj. <sup>41</sup> Jesuuri socua quiaquiaariuhua na Que secojonura. Na tacatesacariuhua secojonujiniji, nojori sequesuhuari:

—¿Niaate maquetiuyajaa? ¿Niaate samaateyajaa? ¡Tariucuaja! ¡Quiarijia cutara janiyari sesa miijiaca pueya quiatesaanutaniyani, nojori miiniuria janiya taa nojori panitiuyacuajani! <sup>42</sup> Nia saneecuatere. Pa quiaare. Cua quiateriquiano tari cumaji.

### *Na paraa quiasacari Jesu*

*(Mt 26.47-56; Lc 22.47-53; Jn 18.2-11)*

<sup>43</sup> Jesuuri pocuariquiaajaa Judas tiuquishacari nojoriicua. Cuno Judasri, Jesu saquiriojosano doce pueyajinijinio quiquiaarijiuhua. Queraa-  
tia pueyari Judasta nijioquiaari. Cuno pueyari nijiniaquetucuaja mueruu pooriquiaa, macacanio. Cuno pojoriiri pueyacuara secojonaa jiyaniijianu-  
cua jiyaramiquishano pueya quiquiaari, Moisés Rootasanojiniji niishitio-  
jonaa jiyaniijianucua jiyaramiquishanojuhua, Judiocuaca camarucua ji-  
yaramiquishanonio. <sup>44</sup> Judas, Jesu quiateriquianoni, nojuajaari juhuacarijia nata quiniaa pueya rootaquiaari, nojori niishiniuria teyanote Jesuni. Naa nojori sequequiaariiri:

—Teyano pueyano cua nujuya pa tiuquishacarini, cunocuajaari nojuaja. Niocua na quiaasee. ¡Niaari maninia morojosano jaatucutaarohuaquinioj!

<sup>45</sup> Naacujatij, Judas jaara tiuquiquiaari Jesuucua, nocua catecanoquiaari-  
iri. Na sequereeri:

—¡Niishitiojonanaa!

Jiyacari na nujuureeri. <sup>46</sup> Judasta nijionaa pueyari jiyacari Jesu quiaasee. Morojosanoori jaatucutashiyarohua.



<sup>47</sup> Cuniqui Jesuta quiniaa pueyajiniinioni, niquiriyatu nojorijinijinioori na shuucuaji shitiaquiaari nijiniaquetucuaaja mueruu. Nata jaateree pueyacuara secojonaa jiyaniijia seru numocoori. <sup>48</sup> Jesuuri nocua nijionaa pueya sequeree:

—¿Casaara cucua nia nijioree nijiniaquetucuaaja mueruutani, macacatano, morojosano nia riniuria janiya juhua nohuasejojuani? <sup>49</sup> Janiyacuajaari puetunu juucajanaa nia tajinia quiquiaani, Pueyaso Secojoua tiajinia cua niishitiojosacari pueya niquiara. Majaari tii cua quishacari nia quianu quiquianu janiya. Naajaa, naa nia miiriqui, tariucuacaanu janiyajiniji Pueyaso Rupaajinia naajiotasano tohuateenura.

<sup>50</sup> Jiyacaritij, puetunu Jesu saquiriojosano pueyajanaari na shuriucuaji mashiyocuatuquiaari. Tamajaaja Jesu tiujiatuqueeri. <sup>51</sup> Saaja tamonu mashajaari Jesu nuhuaji sacuariquiaa cutara. Cuno mashaja sesaari Marco. Nojuajaari saaja puereetunque lino toquerauta cuhuajaatiariquiaa. Jesu quiatunaa niquishacari nojuaja, na quiatureejaariuhuj. <sup>52</sup> Nojuajaari saaja na toque tiujiaquee nojori juaashiquiajinia. Juhuasuuri ritia netequee. Mashimiaari. Janiyacuajaari cuno pueyano quiquiaarini, nio naajiona-juhuaj.

*Judiocuaca camarucua nequesoreesacari Jesu*  
(Mt 26.57-68; Lc 22.54-55, 63-71; Jn 18.12-14, 19-24)

<sup>53</sup> Jesu quiatunaari Jesu jaatucuquiaari pueyacuara secojonaa jiyaniijia tiajinia. Puetunu nio pojorijianaari tii rerejoquiaari: pueyacuara secojonaa jiyaniijianucua, Judiocuaca camarucujuhuj, Moisés Rootasanojiniji niishitiojonaanio. <sup>54</sup> Pedroori Jesu nuhuajiquiaari tucuacaanuji. Jateeseeri pueyacuara secojonaa jiyaniijia tia carijiniacuma. Cuno jiyaniijiajanaa seya tajinia cajishiiri. Mani jitiuriquiaa nojoritia cuniquiiri.

<sup>55</sup> Pueyacuara secojonaa jiyaniijianucua, puetunu Judiocuaca camarucujanaari niishiriojonuuriquiaa nojori saquiriojotanura Jesuucua. Jesuucua tonujuriquianoori pajesaquiaari juucua, na motenura. Saaja shaaqui quiquiaariiri sesa casaa, nocuara tonujusocoriquiano. <sup>56</sup> Queraatia pueyari nocuara tonujuriquiaa juucua, nojori sapojonuta. Nojori saquiriojotasanoori saaja rimiajata quiriquiaa puetunujuanaa. <sup>57</sup> Na nuhuaji, tamasaari sanetaquiaari nocuara nojori tonujunura na sapojonutajuhuj. Nojoriiri naa sequetuquiaaritij:

<sup>58</sup> —Canaa na tojiquianu sesa sequeyanoni. Naa sequecanuuri: “Janiya nio Pueyaso Secojoua tia niyartanutaniyani, pueya tiasanoni. Jiuujianaraca juucajinia, janiyari tamajaaja na tianu tucuatanutaniuhuan. Cunoori maja pueyata tiasano na quiniu quiniutianiya”.

<sup>59</sup> Nojori saquiriojotasanoori saaja rimiajata quiquiaari jiyaniijianucua niquiara.

<sup>60</sup> Jiyacaritij, pueyacuara secojonaa jiyaniijiaari nujuaree pocuanura. Jesu nequesotareeri:

—¿Majate quenaaja quia riucuanuujua? ¡Quia tojiri, pueyaruhua quiocuara tonujiya!

<sup>61</sup> Jesuuri saaja sanaa nujuariquiaa. Majaari na riucuanu quiriquiaa quenaaja. Pueyacuara secojonaa jiyaniijiaari socua na nequesotaquiaariuhua:

—¿Quiaate Cristo, jiyocuacaanuji Pueyaso Jiyarosano?

<sup>62</sup> Jesuuri na riucuaaree:

—Jaa, nojuacuajanijia. Niaari cua niquiniutianiya jiyocuacaanu cumaaca Jiitiana miaquetajara cajiyano. Na nuhuaji, niaari cua niquiniutianiya tacatehuano cohujajinia jiyocuacaanuji.

<sup>63</sup> Pueyacuara secojonaa jiyaniijia jaara tojiquiaari naa Jesu sequesantej, tama na toquejaaja sutaree na juaaniutiaari. Sequereeri:

—¿Casaara pa sashiya tamasaca saquiriojotanura saa nocuarajaarani-uhuaj? <sup>64</sup> Niaacuaja shusha tojirii Pueyasocuara na sequesano sacuaraatia. ¿Niajanijarijataj, taa nia niishiriojiyani?

Puetunu pueyajanaari sequequiaari:

—¡Cuaara mosaaria!

<sup>65</sup> Jiyacaritij, tamasacaari Jesu riocojonu coteequiaari. Na jiquioco motoreejaariuhua maja na niquniuria. Na nuhuaji, pueyari na piquiniu coteequiaari. Na piniu nuhuaji, na nequesotaturiquiohuari:

—Quia niishiritioj, ¿cante quia piriini?

Secojoua tia cojuanaa pueyari na jiquioco piquitiuriijiuhuaj.

### *Pedro seetasacari Jesujiniji*

*(Mt 26.69-75; Lc 22.56-62; Jn 18.15-18, 25-29)*

<sup>66</sup> Pedroori jiyaniijia tia carijiniacuma quiriquiaa. Jiyacaritij, tamonu niy-acoori rucuaneriquiaa carijiniacuma. Nojuajaari pueyacuara secojonaa jiyaniijia seru quiquiaari. <sup>67</sup> Pedro niquishii cajianoori, mani jitiuyano. Tacuriitia na shootariquiaari. Na nuhuaji na sequereeri:

—Jaj, quiaacuajaruhua Jesuta rucuanerijouajuhuj, cuno Nazaret tiacajini-jinio pueyanotani.

<sup>68</sup> Pedroori na seetaree. Na sequereeri:

—¡Cuno pueyano maja cua niishishano! ¡Majaari quenaaja cua niishiniu casaa quia sequeyani!

Pedroori canujiyaree. Mataca tohuateyaji nujuaseeri. Caacarajaari jiy-acari niunijioree. <sup>69</sup> Cuno niyacoo jaara Pedro niquiquiaariuhua socua, juhuacatecara nata quiniaa sequereeri:

—¡Nio pueyanoori cuno Jesu pueyajinijiniojuhuaj!

<sup>70</sup> Pedroori socua na seetaquiaari. Pasaja na tarishishacari, cuniqui nata quiniaari Pedro sequeree socua:

—Seetanujuanaa, quiaari cuno pueyajinijinio. Quiaacuajaari Galilea jiya-jinijinio pueyano. Canaa tojishacari quiajaniya, quia pocuanuuri juhua nojori pocuanujua.

<sup>71</sup> Pedroori socua jiyanoohua sapojonu coteequiaari. Naa sequereeri:

—¡Pueyaso cuara saniitioora janiyaqui, janiya jaara sapojiyani! ¡Seetanujuanaa, maja cua niishiniu cuno pueyano, canajiniji nia nequesoreetaacua-jani!

<sup>72</sup> Jiyacaritij, caacarajaari niunijionu pacuterohuacuhuj. Pedroori jiy-acari niishiquii naa Jesu sequesano nojuajatej: “Jhuanouaja caacaraja niunijionu pacutejiyaquishacarijia juhuaquenu panishacari, quiaari janiya-jiniji tari seetanu pacutejonutaniya”. Pedro jaara niishiquii naa Jesu sequesano nojuajatej, jiyanoohua nujuquequeeri.

## 15

### *Jesuucuaara pueya saquiriojotasacari Pilato*

*(Mt 27.1-2, 11-14; Lc 23.1-5; Jn 18.28-38)*

<sup>1</sup> Tariquicuaji, pueyacuara secojonaa jiyaniijianucuaari rerejoquiaari Judiocuaca camarucuata, Moisés Rootasanojiniji niishitiojonaatajuhuaj, Sane-drín maanutanio. Nojoriiri moronucua Jesu jaatucutaquiaari Pilatoocua. Cuno Pilatocuaajaari Judea jiya jiyaniijia quiquiaari. <sup>2</sup> Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Jaa. Naacuaaquiniatejaj, taa quia sequereecuajani.

<sup>3</sup> Pueyacuara secojonaa jiyaniijianucuaari Jesuucuaara tonujuriquiaa queraatia sesa casaa. <sup>4</sup> Pilatoori Jesu nequesotarohuacuhuaaj:

—¿Majateeri quenaaja quia riucuanuujua? Quia tojiri taa cuno pojori saquiriojotaa quiocuarani.

<sup>5</sup> Jesuuri maja na riucuanu quiriquiaa quenaaja. Cunora, Pilatoori jiyanoehua jiuujiatequiaari.

*Na paraa sequesacari Jesu cuaara mosaaria  
(Mt 27.15-31; Lc 23.13-25; Jn 18.38-19.16)*

<sup>6</sup> Puetunu marijiajananaa, Pascuara queranacunu juuca, Pilatoori nujuatesano pueyano tohuataniniu jiitiquiaari nujuatejojuajiniji, cana pueya paniquiaari na cartesaanuracuajani. <sup>7</sup> Jiyacaritij, tamonu pueyanoori nujuatejojuajinia nujuariquiaa. Na sesa quiquiaari Barrabás. Nojuajaari tamasaca pueyata pueyano moquiaari. Cunoori quiquiaari nojori juaashacari, Romano taucuaca jiyaniijia jiitianuucua Judiocuaca. <sup>8</sup> Pilato nequesoreesacari Jesu, jiyacaritij, queraatia pueyari Pilatoocua nijioquiaari naa nojori secojonura nojuaja:

—Pueyano quia carterohua nujuatejojuajiniji, taa quia miiquiaacuaja puetunu marijiajananaani.

<sup>9</sup> Pilatoori nojori riucuaaree:

—¿Cana nia paniya cua cartenurani? ¿Niaate niarta Judiocuaca jiyaniijia paniya cua cartenura?

<sup>10</sup> Nojuajaari tama niishiquiaarijiaaja, pueyacuara secojonaa jiyaniijianucuaari Jesu niquniu paniyaquiquiaari pueya shocotenuucua nojori saniniuujia Jesuucuaara. <sup>11</sup> Pilato nequesotasacari nojori, pueyacuara secojonaa jiyaniijianucuaari jiyacari pueya shiniuuiuquiaari nojori sequenura Pilato, nojuaja cuaara carteera Barrabás. <sup>12</sup> Naarate Pilatoori nojori nequesotarohua socua:

—¿Taa nia paniya cua miiniuria nio pueyanoni, nia sequesano niarta Judiocuaca jiyaniijiani?

<sup>13</sup> Nojoriiri naa nacaree jiyanoehua:

—¡Cuaara mosaaria niyacutesanojinia teetesano!

<sup>14</sup> Pilatoori nojori riucuaaree:

—¿Casaarateni? ¿Casaa na miiquianu sesajaarani?

Nojoriiri saaja jiyanoehua nacaree:

—¡Niyacutesanojinia quia teetere!

<sup>15</sup> Pilatoori socua tariniquiaari. Nojuajaari maninia quiniu paniquiaari Judiocuacata. Cunora, Barrabás cartereeri. Saniniuujia, Jesu majacuteree cutaraari. Na nuhuaji, na soldadoehua na niqutioreeri, niyacutesanojinia na teetsaanura.

<sup>16</sup> Jiyacaritij, soldadohuari Jesu jaatucuquiaari jiyaniijia Pilato tiajiniaaco. Nojoriiri puetunu narta soldadohujanaa rerejoteree Jesu shocua.

<sup>17</sup> Soldadohuari Jesu cushitiquiaari shaaruque toque, juhua jiyaniijiajananaa cushishano. Juhuacontucua maatusano cushitishaareejaariuhua na nacaquera. <sup>18</sup> Na nuhuaji, nojoriiri na rupaa paaretanu cotequiaari Jesu na macaatinuria:

—¡Jejee, Judiocuaca camarnuna nooj!

<sup>19</sup> Nojoriiri na naca piquirii naajuata. Na riocojotureejaariuhuaaj. Nocuara mojoquetacoreeri juhua jiyaniijiajananaa cariquimiaaji, nojori sapojonuta na macaatinuria nojuaja. <sup>20</sup> Naa na rerequetesaanu nuhuajitij, toque

naatuqueeri nocuaji jocuasaquiaari. Tama na toquejaaja cushitishaarohuari. Na nuhuaji, soldadohuari na tohuataniquiaari. Na jiyatatuquiaariiri niyacutesanojinia na teetsaanura.

*Jesu teetesacari niyacutesanojinia*

(Mt 27.32-44; Lc 23.26-43; Jn 19.17-27)

<sup>21</sup> Soldadohua jiyatasacari Jesu, tamonu pueyanoori jiyacari tacateriquiohua na cuhuariquiajiniji. Cuno pueyano sesa quiquiaari Simón. Soldadohuari Jesu teetejarano niyacutesano patanirii nojuaja. Nojuacuajaari Alejandro que, Rufo quenio.

<sup>22</sup> Jesuuri shiitianiyojua tuhuananuucua jiyatasaaquiaari. Cuno tuhuananu sesa quiquiaari Gólgota. Nioori pueyano rupaajinia sequeya, “Pueyano nacaco”. <sup>23</sup> Soldadohuari Jesu raatequiaari vino juucua, mirrata cojitiyhano. Saaja na ratuyaquiriiri. <sup>24</sup> Jiyacaritij, nojoriiri Jesu teetequiaari niyacutesanojinia. Na nuhuaji, soldadohuari saitia tacuarishijioquiaari, nojori niishiniuria cantucua Jesu toque poore nerani. Naacujitij, nojoriiri Jesu toqueya seraatiaquiaari tama nojoririjaaja.

<sup>25</sup> Jiyacaritij, niyacutesanojinia na teetesacari, shusha pananu tacasacariiri quiquiaari. <sup>26</sup> Naajioneeri na nacaacuma rupotasano quiquiaarijuhuaj. Tii sequequiaariiri casaara na mosaareeni. Naa naajiosano quiquiaariiri cuno rupotasanojinia: “Nioori Judiocuaca jiyaniijia”. <sup>27</sup> Jiyacaritij, caapiqui nohuasenuujuacaari Jesu shuriucua teetejosaaquiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara. <sup>28</sup> Naa tohuateequiaariiri taa tariucuaaanu Pueyaso Rupaajinia na naajiotasaaquiaaricujani. Naa sequeyari:

“Na sesaari sesa miijiaca pueya sesacata cojiritiasaaquiaari naajiotasaanujuhuj”.

<sup>29</sup> Pueya tajishacari nucuaco Jesu shuriuquioco, nojoriiri na macaatiquiaari. Na maanuquenuta naa na sequetuquiaariiri:

—¡Jaj! ¿Majateeri quiajaniya cumaacaracuaja? ¿Quiaateeri jiyaniriquiaa, quiaa jaara Pueyaso Secojoua tia niyartare, quia naata na tianu tucatanuhua jiuujianaraca juucujinia? <sup>30</sup> Quiaa jaara naa cumaacaraca quiriritij, niyacutesanojiniji quia roserecuarajaj.

<sup>31</sup> Pueyacuara secojonaa jiyaniijianucua, Moisés Rootasanojiniji niishitiojonaari na macaatiquiaarijuhuaj. Tama nojorijaarija naa seque-tooquiaari:

—¿Maatucua saa tamasaca naatanijioriquiaajaari? Tama nojuaja cutaraari maja na naata niyacutesanojiniji rosenu. <sup>32</sup> Jaara seetanujanaa quiri Pueyaso Jiyarosano, pa jiyaniijia na quiniuria, cuara roseera niyacutesanojiniji pa niquiara. Pocua jiyacari nocua tiuuri cutarani.

Cuno nohuasenuujuaca Jesu shuriucua teetejosano quiriquiaani, nojoriiri na sesacariquiaajuhuj.

*Jesu cusosacari*

(Mt 27.45-56; Lc 23.44-49; Jn 19.28-30)

<sup>33</sup> Panacari, jiyari ninishiquiria quiquiaari puetunujanaa. Tarishiquiaariiri. Shusha tenacariishacari cuhuatemohuari. <sup>34</sup> Jiyacaritij, Jesuuri jiyanohua na rupaa paaretaquiaari:

—Eloi, Eloi, ¿lama sabactani?

Nioori sequeya: “Cua Pueyasonaa, cua Pueyasonaa, ¿casaara quia carteree janiyani?”

<sup>35</sup> Na shuriucua nujuatunaa tojitiasacari naa Jesu paaretasacari na ru-paatej, nojoriiri sequeturee:

—¡Nia tojiri, supuetana Elías jiiquioonuyano, nocua na niniuria!

<sup>36</sup> Tamonu pueyanoori ritia netequiaari namasu casaa na shiniuria jereeca vinojinia. Na nuhuaji, na morotaree naajuaacuaari, na shitiastico-ricoriquiano Jesu rupaama. Na raatereeri. Na nuhuaji, nojuajaari sequequiaari:

—¡Pa shanacure! ¡Supuetana Elías jiyoteeri nocua niniutianiya na roshininiuria niyacutesanojiniji!

<sup>37</sup> Jiyacaritij, Jesuuri jiyanoohua na rupaa paaretarohuacuhuj. Cusoqueeri. <sup>38</sup> Jiyacaritij, Pueyaso Secojoua tiajiniaacuma, shiquiquia toquejiniji sohuacaari sutequee tamajaaja, jiyocuacaanuji jiyocua. Cunoori pueya pueresano quiquio mishiquietaja quiquiaari, pueya mariqui cusoqueeri Pueyasocua nojori tiuquishacari juucua, jiyanooshoojua nojori quishacari. <sup>39</sup> Cuno Romano soldadohua jiyaniijiaari Jesu tacoji nujuariquiaa. Na niquishacari taa Jesu nacaquiaarini, naajuhuj, taa Jesu cusoquiaari na rupaa na paaretanutani, jiyacariti nojuajaari naa sequeree:

—¡Nio pueyanoqui seetanujuaanaa Pueyaso niyanu!

<sup>40</sup> Maajipohuari tii quiriqiaajuhuj. Tucuacaanuji Jesu shootia-turiquiaari. María Magdalenaari nojoritia quiriqiaajuhuj, socua narta maajipohuanio. Cuno maajipohuani, nojoriiri quiquiaari Salomé, Maríano, cante Santiago, José nucua quiquiaaricujani. Nio Santiagoni, nojuajaari socua naatujua na sesaanucua Santiagojiniji. <sup>41</sup> Puetunu nio maajipohujanaari Jesu nuhuajinia quiquiaari. Nojoriiri nera pueraquenuuna quiquiaari, Galilea jiyajinia na quishacari. Socua queraatia maajipohuari tii quiriqiaajuhuj, canapute Jerusalén tiacajiniara nijioquiaari Jesutacujani.

### *Jesu quete niasacari raaco*

*(Mt 27.57-61; Lc 23.50-56; Jn 19.38-42)*

<sup>42</sup> Jesu cusonu juucani, cuno juuca sesa quiquiaari “Jeenucuanu juuca”, maja samaatenu juuca poonijionura. Saniniuujia, tariqui quiquiaariiri samaatenu juuca. Cunora, pueyari juhuacarijia jeenucuaquiaari puetunujuaana. <sup>43</sup> Cuno juucajani, jeenucuanu juuca ninishacari quera, tamonu pueyanoori Pilatoocua quiaquiaari. Nojuajaari José, Arimatea tiacajini-jinio pueyano. Cuno Joseeri tojishano pueyano quiquiaari narta Sanedrín pueyara. Joseeri mijiria Pueyaso Jiyarosocoriquiano niquniuucua jiaatiaja quiquiaarijuhuj, canaa Jiyaniijiajanaa na quiniuria. Nojuajaari maja na puereu quiquiaari Pilatoocua na tiuquiniuria, Jesu quete na masenura. <sup>44</sup> Pilatoori jiyanoohua jiuujiatequiaari na tojishacari Jesu tari cusoquee. Pilatoori soldadohua jiyaniijia sequeree nocua na niniuria. Nocua na tiuquishacari, na nequesotareeri:

—¿Taacari Jesu cusoqueeni?

<sup>45</sup> Soldadohua jiyaniijia jaara na riucuaquiaari taacari na cusoqueeni, Pilatoori jiyamitia José sequeree Jesu quete na panura. <sup>46</sup> Joseeri jiyacari shanoohua quenaaruque toque masequiaari tama na cumaneecatajaaja. Na nuhuaji, macu roshiniriiri niyacutesanojiniji. Cuno toquejinia na jiu-niocreeri. Na nuhuaji, na niaquiaari raacoori. Cuno raari jiuutiasano quiquiaari saajajinia. Joseeri raa tioree jiyanoohua puereetuuca quejasano saajjata. <sup>47</sup> María Magdalena, José nucua Maríano, nojoriiri na niqutiariquiaa tee na niasaareeni.

## 16

### *Jesu samiitiasacariuhua*

*(Mt 28.1-10; Lc 24.1-12; Jn 20.1-10)*

<sup>1</sup> Samaatenu juuca jaara shocoquiaari, María Magdalena, Santiago nucua Maríajuhuaaj, Salomeenio, nojoriiri shanohua jaanutaja masequiaari macucua na tuujutasocoriquiano. <sup>2</sup> Jiyanohua tariquiicuaaji Domingo juuca, shusha pananu muetasacari, nojoriiri raajinia quiojoquiaari. <sup>3</sup> Nucua na quiojosacari, tama nojorijiaarjia sequetooriquiaa:

—¿Canteeri pocuaji shuquitiniutianiya tamocora raa tiotiuni?

<sup>4</sup> Nojori jaara niqiquiaari raa, saajia niqitiuriiri tariucua tamocora shuquitishano. Puereetucua saajiaari quiquiaari raa tiotiu. <sup>5</sup> Nojoriiri raaco tiuquitiamaa. Mashaja niqitiushiiri tii cajiyano nojori miaquetajara, cohuaja tucuaque toque cajitiaano. Nojoriiri jiyanohua shiriiquitiuquiaari na niqitiushacari nojuaja. Cuno mashajaari Pueyaso seru quiriquiaa.

<sup>6</sup> Maajipohua sequereeri:

—¡Maja nia shiriiquiniu! Janiyari niishiyacuajani, niaari Jesu pajeya, Nazaret tiacajinijinio pueyano, niyacutesanojinia teetsaarucuaani. ¡Nojuacuaja tari samiitiarohua! Maja niya na quiniu. Nia niquishuriiria na maja, tee na niasaarucuaacuajani, shaaqui. <sup>7</sup> Na saquiriojosano pueya nia sequesuhua, Pedrojaajanio: “Nojuajaari nia puetanutaniya Galilea jiyajiniara. Niaari tii na niqiniutianiya, taa na sequecanu nijaniyacujani”.

<sup>8</sup> Maajipohuari netecuatuquiaariuhua raajiniji. Nojoriiri tetecaturiquiaa na shiriiquiniutia. Majaari quenaaja tamasaca pueya na sequetunu quiquiaari na puerenuta.

### *Jesu muetasacari María Magdalenaacua*

*(Jn 20.11-18)*

<sup>9</sup> Jesu samiitianu nuhuaji, cuno Domingo juucaja, shusha semaana co-teenu juucani, Jesuuri coteenujuanaa muetaquiaari María Magdalenaacua. Jesucuaajaari tarijia siete samaruhua tohuatanijioquiaari cuno Maríajiniji.

<sup>10</sup> María Magdalena niquiniu nuhuaji Jesu, nojuajaari quiaquiaari Jesu cojiniaa na numootenura. Cuno pojoriiri jiyacari taraajecoriquiaa. Nujuqueturiquiaari Jesu mosaanuucua. <sup>11</sup> María Magdalenaari nojori sequesee:

—Pueyanaa, ¡Jesu tari samiitiarohua! ¡Janiya na niquiriini!

Nojoriiri María sequesano cuaracashitirii saaja.

### *Jesu muetasacari caapiqui na saquiriojosano pueyacua*

*(Lc 24.13-35)*

<sup>12</sup> Na nuhuaji, Jesuuri socua caapiqui na pueyacua muetaquiaari nojori quiojosacari tamocora. Nojuajaari tamaatia niquishano quiriquiaa nojoriria. <sup>13</sup> Nojori niishishacari nojuacuaja Jesu quiquiaari, nojoriiri ritia riujuuquiaariuhua tamasaca nojorijinijinio nojori numootenuhuara. Naa-juhuaaj, Jesu saquiriojosano pueyari nojori pohuatasano cuaracashitiriijuhuaaj.

### *Jesu rootasacari na jiyaramiquishocoriquiano pueya*

*(Mt 28.16-20; Lc 24.36-49; Jn 20.19-23)*

<sup>14</sup> Tamacari, Jesuuri na once saquiriojosano pueyacua muetaquiaari. Nojoriiri miaquejajinia cajitiuriquiaa jiyacari. Jesuuri jiyacari nojori juaarii cumajiuujiaaca nojori quiniuucujaja. Majaari quenaaja nojori tiuuni quiquiaari nojorijinijinio pueyacua, nojori sequesacari: “Canaa Jesu niquiriini, samiitiarohuacuaaqui”. <sup>15</sup> Na nuhuaji, Jesuuri nojori sequereeri:



—Nia quiaare puetunu jiyacajiniajanaa, janiyajiniji Pueyaso rupaa nia pohuatanura, puetunu nia pohuatasanoocua tiuujica pueyapuejanaa jiyanooshaanura. <sup>16</sup> Cante moojinia tiuquinishiya Pueyaso rupaacua na tiuuniuucuan, Pueyasoori na jiyatenutaniya na pueyanora. Saniniujia, cante Pueyaso rupaacua tiuyaquiyan, nojuajaari saniitiosano quiniutianiya. <sup>17</sup> Cucua tiuujicaari nocuaji pueya jiuujiatesano casaa miiniutianiya cua cumaacata, pueya niishiniuria Pueyaso rupaaqui seetanu rupaajanaa. Naacuajitij, cucua tiuuniaa pueya nia quiniuucua, niaari samaruhua tohuatanijionutaniya cua cumaacata, nia jiyaniquishacari cua sesa. Niaari nia niishiyaquishoo rupaaca pocujaca quiniutianiyajuhua. <sup>18</sup> Naajuhua, niaa jaara soconu sajitishaare, niaa jaara casaa raatesaarejuhua nia cusojusaanura juucua, majaari nia cusonu quiniutianiya. Naajuhua, cusosuhua nia niasacari nia juaashiquia, cusosuhuari naataconutaniuhua.

*Jesu tacasacariuhua jiyocuacaanu na Queecua*  
(Lc 24.50-53)

<sup>19</sup> Na pocuanu nuhuaji, Jiyaniijia Jesuuri tacanishaaquiaariuhua jiyocuacaanu. Nojuajaari Pueyaso miaquetajara cajiquiaariuhua. <sup>20</sup> Na nuhuaji, na saquiriojosano pueyari quiojoquiaari Pueyaso rupaa nojori pohuatanura puetunu jiyacajiniajanaa. Jiyaniijia Jesuuri pueyaracaanu nojori cumaquiriqiaa. Pueya niquitiriijaariuhua na cumaacata na pueya miijosano, pueya niishiniuria maatia, Jesu jiyaramiquishano pueya pohuatasanoori seetanu rupaajanaa.

## LUCAS NAAJIOTASANO JESUCRISTOJINIJI

### *Niya pohuatashiyari casaara Lucas naajioaquiaari nioni*

<sup>1</sup> Queraatia pueyari suraattia naajionu saniniujuquiaari puetunu canaa tajinia miishanojuanaa. <sup>2</sup> Nojoriiri naajioquiaari taa Jesu jiyaramiquishano pueya pohuataquiaari Jesujiniji pajaniyani. Cuno pojoriiri Jesu niquiniaa quiquiaari, shusha poonijionu na cotelesacari. Nojoriiri na nuhuaji na rupaa pohuatanaara jiyatesaaquiaari. <sup>3</sup> Janiyari niishiriojoriquiaani, maniniaruhua quiocuara cua naajionurajuhuj cua panishano Teófilonaa. Naaratej, janiyari pueyaracaanu jacaria nequesoreeriquiaa puetunu Jesu miishanojuanaani, na coteejajiniji. <sup>4</sup> Naacuajitij, quiocuara naajianijia na coteenujiniji, seetanujuanaa quia niishiniuria puetunujuanaa, taa quia niishitiojosaacanucujani.

### *Pueyaso seru pohuatasacari Tiuquinijiona Juan rasaanutaniya*

<sup>5</sup> Herodes jaara jiyaniijia quiquiaari Judea jiyajinia, Zacaríasri jiyacari pueyacuara secojona quiquiaari. Nojuajaari supuetana Abías niquiohuacuajinio supueno quiquiaari. Necocua sesa quiquiaari Isabel. Cuno maajiiri supuetana Aarón niquiohuacuajinio supueno quiquiaari. Nojori supuetanaari mariyata tariucuacaanu pueyacuara secojona quiquiaari. <sup>6</sup> Zacaríasri necocua Isabelta maninia miijica quiquiaari Pueyaso niquiara. Nojoriiri puetunu Pueyaso rootasanojuanaa tojtiajaca quiquiaari, taa Pueyasojiniji caminiujiuniaa naajionuutaquiaaricujani. Nojoriicuara maja na naata sesa casaa tonujusaanu quiquiaari, saaja maninia miijica nojori quishacari. <sup>7</sup> Nojoriiri maja na muetunu quijia, niyajaru Isabel quiniuucua. Naajuhuj, nojoriiri maja tari na naata muetunu quiquiaari, saaquiapue nojori quishacari.

<sup>8</sup> Tamacari, Zacaríasri narta pueyacuara secojonaata poonijioriquiaa Pueyaso Secojoua tiajinia Pueyaso niquiara Jerusalén tiacajinia. Jiyacari saniniuujia nojori poonijosacariiri quiquiaari. <sup>9</sup> Shanohua jaanutajaari catijiasaaquiaari puetunu juucajanaa Pueyaso Shuriucua Quiquiojinia, Secojoua tiajinia. Pueyacuara secojo naari jiitiquiaari saajia naajiosano jacutanura juhua tacuarishijosacari, nojori niishiniuria teyano nojorijinijiniote Pueyaso Shuriucua Quiquio tiuquiniutianiyani, shanohua jaanutaja na catijianura tii. Cuno juuca saniniuujia, saajiaari Zacaríascuara tacatequiaari. Naacuajitij Zacaríasri seeratasaaquiaari tii na tiuquiniuria shanohua jaanutaja na catijianura. <sup>10</sup> Na catijasacari, puetunu pueyajanaari Pueyaso secojonuuriquiaa Secojoua tia carijiniacuma. <sup>11</sup> Jiyacaritij, Pueyaso seruuri Zacaríasqua muetaquiaari. Nujuariquiaari shanohua jaanutaja catijiasaqui miaquetajara. <sup>12</sup> Zacaríasri shiriiquirii na niquishacari Pueyaso seru. Jiyano hua na puerereeri. <sup>13</sup> Pueyaso seruuri na sequeree:

—Maja puerenu Zacaríasnaa. Pueyasocuajaari quia secojosano tojiquiaari. Quia niquiocua Isabelri quiara muetunutaniya. Quiocua na sesojore “Juan”. <sup>14</sup> Quiaari shuquiriaatia quiniutianiya. Quiaari quia mueya timitianutaniya. Queraatia pueyari na shuqiritianutaniya na rasacari. <sup>15</sup> Quia niyanuuri cutara pueyano quiniutianiya Pueyaso niquiara. Nojuajaari vino ratuyashijia quiniutianiya, najatunacunio. Pueyaso Sohuanuraca pueyano quiniutianiyari na rasaacarijijoua. <sup>16</sup> Nojuajaari queraatia Israel pueya tacatonutaniuhua nojori Jiyaniijia Pueyasocua. <sup>17</sup> Nio Juanri pa Jiyaniijia

puetana quiniutianiya. Nojuajaari pueyara Pueyaso sequesano caminiujunia supuetana Elías sohuanu jiitianutaniya, na cumaacanio. Naacujitij, pueya jiuujia taraajonutaniyari, nojori jiyanooniuria necohua. Naajuhuj, nojuajaari tojitiaashijiaca pueya rootanutaniya maninia, Pueyaso tojitiajaca nojori quiniuria. Naacujitij, pueya jiuujiacaari jeenucuasano quiniutianiya pa Jiyaniijiaacuaji.

<sup>18</sup> Zacaríasri Pueyaso seru nequesotaree:

—¿Taa cua niishiniutianiyarini quia sequesano seetanujuanaa tohua-teenutaniya quiria? Janiyari tari saaquianoni. Cua niquiocuaari motajajuhuj.

<sup>19</sup> Pueyaso seruuri na riucuaaree:

—Janiyacuajaari Gabrielni, Pueyaso tacoji nujuana, na sequesano cua miiniuria. Nojuajaari cua jiyaroree cua pohuatanura quiajaniya nio maninia casaa Pueyasojiniji. <sup>20</sup> Quiarijia saniniuujia, cua sequesanoocua quia tiyaquiniuucua, quiaari tiquia quiniutianiya. Majaari quia pocuanu quiniutianiya cuara rasaarejaatijia quia niyanu. Naajaa, puetunu cua sequesanojuanaari naa quiniutianiya taa Pueyaso paniyacuajani.

<sup>21</sup> Jiyacaritij, pueyari Pueyaso quiquio carijiniacuma sashiriquiaa, Zacarías cuara tohuatohuara. Nojoriiri shiriiquitiurii pueyaracaanu Zacarías tarishishacari Pueyaso Shuriucua Quiquiojinia. <sup>22</sup> Zacaríasri socua tohuatamohua. Majaari na naata pocuanu quiriquiaa. Nareja shishinioriquiaari. Naacujitij, pueyari niishirii Pueyasoqui casaa niquitirii Zacarías, Pueyaso Shuriucua Quiquiojinia na quishacari.

<sup>23</sup> Zacarías jaara puecaquiaari puetunu na poonijionu juucajanaa taa na sequesaaquiaaricuajani, na tiajinia quiaarohuari. <sup>24</sup> Na nuhuaji, necocua Isabelri manajeree. Na manaja jamaatiaquiaariiri. Majaari na muetanu quiquiaari na tiajiniji cuara na shocojoquiaarijiaatijia cinco raca. Nojuajaari tama sequequiaarijiaaja: <sup>25</sup> “Quiarijiani, cua Jiyaniijiaari maninia mirii janiya. Majaari socua pueya rerequetenu quiniutianiya janiya, muetujua cua quishacari tari”.

### *Pueyaso seru sequesacari Jesu rasanutaniya*

<sup>26</sup> Seis raca jaara shocojoquiaari Isabel manajesacaricuaa, Pueyasoori na seru Gabriel jiyaroree Nazaret tiacajinia, Galilea jiyajinia. <sup>27</sup> Tamonu niyacoocua na jiyaroreeri, cante tari sequesaaquiaaricuajani José jiyaniishano pueyanota na caminiuria. Na camiriquianoori supuetana jiyaniijia David niquiohuacuajinio supueno pueyano quiquiaari. Niyacoo sesa quiquiaari María. <sup>28</sup> Pueyaso seruuri nocua tiuquimiaa. Na sequereeri:

—Janiyari quiocua jiyarosaareeni, Pueyaso shuquiritasano niyacoona. Jiyaniijia Pueyasoori quiata quiya, socua shuquiriaatia quia quiniuria tamasaca maajipohuajiniji.

<sup>29</sup> Maríari jiyanhua tacaquiaari naa Pueyaso seru sequesacari nojuaja. Nojuajaari tamajaaja niishiriojoriquiaa: “¿Casaara naa na sequeree janiyani?” <sup>30</sup> Na nuhuaji, Pueyaso seruuri na sequeree:

—Maríanaa, maja puerenu. Pueyasoori quia shuquiritiniutianiya. Quiaacuajaari na timitiasano. <sup>31</sup> Quiarijiani, quiaari manajenutaniya. Quiaari cayaniyosua ranutaniya. Quiocua na sesojore “Jesu”. <sup>32</sup> Nojuajaari cutara pueyano quiniutianiya. Sesojosaanutaniyari “Pueyaso Niyanu”, jiyocuacaanu Quijia Niyanu. Pa Jiyaniijia Pueyasoori na jiyatenutaniya Jiyaniijiarajanaa na quiniuria na supuetana David niti. <sup>33</sup> Israel pueya jiyaniijia quiniutianiyari. Pueyaracaanu jiitianutaniya na pueyari. Majaari na shaajenu quiniutianiya Jiyaniijia na quishacari.

<sup>34</sup> Maríari Pueyaso seru nequesotaree:

—¿Taa cua manajenutaniyari, niyacaaju cua quishacari?

<sup>35</sup> Pueyaso seruuri na sequeree:

—Pueyaso Sohuanuuri quiocua niniutianiya. Na cumaaca naaquiiri quiocua pacunutaniya. Naacuajitij, quia niyanuranoni, cunoori Pueyaso Niyanu quiniutianiya. Nojuajaari seetanujuanaa Pueyaso tojijia quiniutianiya. <sup>36</sup> Naajuhuaaj, quia supuetanajinijinio motaja Isabelri neyanu ranutaniyajuhuaaj. Cuno maajiiri sequesaaquiaari “niyajaru maajitia”. Naajaa, seis racaari tari na shocojiya na manajesacari. <sup>37</sup> Pueyasora, majaari jiyajeneta casaa quiniu. Nojuajaari cumaacaraca na miiniuria puetunu na panishanojuanaa.

<sup>38</sup> Maríari sequeree:

—Maniniacuajaqui. Janiyacuajaari cua Jiyaniijia Pueyaso seruni. Pueyaso cuaara miiria janiya taa quia sequereecuajani.

Na nuhuaaji, Pueyaso seruuri quiacuhua.

### *María quiasacari Isabel niqiniuucua*

<sup>39</sup> Maríari jiyacari quiaquiaari na secoonuta Judea jiyajinia, Zacarías tiajiniara tamonu tiacajinia. Cuno jiyari tuhuananuhuaraca. <sup>40</sup> Zacarías tiajinia María tiuquishacari, Isabel sequereeri. <sup>41</sup> Isabel tojishacari María sequesano nojuaja, ¡conajaari na jiniacuma nujuanequequee! Pueyaso Sohuanuuri Isabelcua tiuquiquii na cumaaca na jitianura. <sup>42</sup> Naacuajitij, Isabelri jiyacari na rupaa paaretaree. Naa María sequereeri:

—¡Pueyasocuajaari socua maninia miiriucuaa quiajaniya tamasaca maa-jipohuaajiniji! ¡Maninia miiniutianiya quia niyanujaariuhuaaj! <sup>43</sup> ¿Janiateeri pueya tojishano maajini, cua Jiyaniijia nucua tiuquiniuria cua tiajinia, na niqiniuria janiya? ¡Maja! Naajaa, jiyanohua timiyaniijia! <sup>44</sup> Shusha cua tojishacari quiajaniya cua sequeyano, cua mueyari cua jiniacuma nujuanequequee na shuquiriniutia. <sup>45</sup> Shuquiriaatia quia quiri, quia tiuuniuucua Pueyaso sequesanoocua quiajaniya.

<sup>46</sup> Maríari sequeree:

—¡Coojia jiyanohua shuquiritiaa cua Jiyaniijia Pueyaso! <sup>47</sup> ¡Cua sohuanuuri cua Jiyanoonia Pueyaso timitiaani! <sup>48</sup> Juhua najuhuaana quijianijia. Naajaa, Pueyasoori cua jiyanoorii. Cua saquiriojorucuaari na tojijia cua quishacari. Quiarijiani, pueyari pueyaracaanu cua sequenutaniya: “Pueyaso shuquiritiasano María”. <sup>49</sup> ¡Pueyasoori jiyanohua maninia miirii janiya! Nojuajaari puetunu cumaacaracajanaa. Nojuajaari tojetaarucujanaa maninia quijia. <sup>50</sup> Nojuajaari pueyaracaanu jiyanooquiaa na tojtianaa, canapuate na rerequeteyaquiicacuajani. <sup>51</sup> ¡Nojuajaari jiyanohua maninia miiquiaa na cumaacata! Nojuajaari niishijiaca pueya shocotequiaari, canapuate tama na cuaqueyajaaja jiyatequiaari juhua niishijiacaracuajani. <sup>52</sup> Nojuajaari cutara jiyaniijianucua jatatee, cuno pojori jiyanishano niishiyashijiaca pueya jiyatesaanura jiyaniijiaara nojori niti saniniuujia. <sup>53</sup> Miaajeejunucua tootijioreeri maninia sumatuuta. Puera casamiriaca pueya taanuquiaariiri, casaaju nojori quiojonura. <sup>54</sup> Na pueya Israel naacureeri. Majaari na niyjetanu quiquiaari nojoriicua na taraajenu. <sup>55</sup> Naa miiquiaariiri taa na sequequiaari pa supuetanaacuajani. Pueyasoori naa pa supuetana Abraham sequesaaquiaari: “Seetanujuanaa quiocua taraajenutaniyanijia, quiocuaajinio supueriquiano pueyacuanio”.

<sup>56</sup> Na nuhuaji, Maríari queraatia tarishiquiaari Isabel tiajinia. Jiuujia-naraca raca nuhuaji, Maríari tacatequiaariuhua na tiajiniohua.

### *Tiuquinijiona Juan rasacari*

<sup>57</sup> Na nuhuaji, Isabel rasacari quiquiaari. Jiyapueratereeri. <sup>58</sup> Na shuriucua quiniaa, mariyata na jiyasoocujainio supueno pueyajuhuaaj, nojoriiri jiyanohua shuquiriquiaari nojori tojishacari taa Pueyaso jiyanohua taraajequiaari Isabelcuani, na shuqiritiniuria neyanuta. Nojoriiri Isabelta shuquiriquiaarijuhuaj. <sup>59</sup> Nojoriiri Zacarías tiajinia rerejoquiaari conaaja jiiitasacari ocho juuca, na cararaatiuuquia co miatesaanura, taa Moisés rootaquiaaricujani. Nojoriiri na sesojonu paniriquiaa juucua Zacarías, na que sesaanucua na quiniuria. <sup>60</sup> Na nucuaari saaja sequeree:

—¡Maja! Sesojosaanutaniyano “Juan”.

<sup>61</sup> Pueyari saaja sequeree:

—¿Casaarateni? ¡Majaari quenaaja tamonu quia pueyajinijinio cuno sesaraca na quiniu quiquiaari! ¿Casaara naa quia sesojonu paniyarini?

<sup>62</sup> Cunora, pueyari na que Zacarías shishinioree na nequesotanura taa na sesojonu paniriquiaa neyanuni. <sup>63</sup> Zacaríasri naajiooju casaa maseree na naajionura tii neyanu sesarano. Naajioreeri: “Na sesa, Juan”. ¡Pueyari jiuujiatequee! <sup>64</sup> Jiyacaritij, Zacarías nitiiri sasaquitiaacuhua. Juhucatecara pocuarohuari. Pueyaso miishano pohuataree pueya niquiaraari, na shuqiritiasacari Pueyaso. <sup>65</sup> Cunora, na tia shuriucua quiniaa pueyari jiuujiateree. Puetunu niojuanaari caminiujiushaaquiaari puetunujuanaa cuno Judea tuhuananuhucua quijiaca pueyara. <sup>66</sup> Puetunu nio tojitianaa pueyajanaari niishiriojonuuquiaari. Tama nojorijiaarjia nequesoreetooquiaari:

—¿Casaaquitijia cuno mueya quiniutianiya na nuhuajitijiaj?

Pueyari niishiquiaari Pueyasoori seetanujuanaa cuno mueyata quiriquiaa, na cumaquiniuria.

### *Zacarías sequesano na shuqiritiasacari Pueyaso*

<sup>67</sup> Na que Zacarías jiuujiaari jiyanohua mishaja quiriquiaa Pueyaso Sohuanuta. Pueyaso Sohuanuuri na pohuataree. Naaratej, Zacaríasri naa sequequiaari:

<sup>68</sup> —¡Jiyanohua maninia pa Jiyaniijia Pueyaso, pa supuetana Israel Jiyaniijia! ¡Cuaara jiyanohua shuqiritiasaaría mijiria na niniuucua na pueyacua, pocuaji na tacunura! <sup>69</sup> Pocua jiyaroree cumaacaraca pocuaji Tacuriquianoori. Pa Jiyaniijiaranoori Pueyaso seru David niquiohuacuajainio rasaanutaniya, taa Pueyaso sequequiaari tariucuaaanucujani. <sup>70-71</sup> Tariucuaaanu na sequenu panishano caminiujiuniaacuajaari naa pohuataquiaari pa supuetanaa niquiaratej, taa pa paraa na ritianutaniya pocujini, pa niquiniu paniyaquijia pueyanio. <sup>72</sup> Nojuajaari sequequiaarijuhuaj, majaari na niyajetanu quiniutianiya na sequesano pa supuetanaa, pocua na taraajenura. <sup>73-74</sup> Pueyasoori pa supuetana Abraham sequequiaari seetanujuanaa, nojuajanaari pocuaji ritianutaniya pa paraa, pa puereyaquiniutia nera pa poonijionura shitimia. <sup>75</sup> Nojuajaari Abraham sequequiaarijuhuaj maninia quijara pa jataniniutianiyaquiniaari, saaja nera pa quiniuria pueyaracaanu. <sup>76</sup> Quiajaniya saniniuujia, quiyanuniyojuanaa, quiaari sesojosaanutaniya Jiyocuaaanu Quinia sequenu panishano caminiujiunia. ¡Quiaari pa Jiyaniijiaranojuanaa puetanutaniya, juhua na nuu jeenucuariquiano! <sup>77</sup> Quiocua Pueyaso saquirojosano

pueya niishitiojore, nojoriiri na naata jiyanooshano quiniu sesa nojori miishanojiniji Pueyaso pueya nojori quiniuria. <sup>78</sup> ¡Pa Pueyasoori jiyanoohua jiyanoojia! Pocua taraajeja. Na jiyarosacari poojia Cuhuatariquiiano, nojuajaari pa cuhuatanutaniya, maja ninishiqui pa quiniuria socua. <sup>79</sup> Maninia pa cuhuatanutaniyari, maninia pa rucuanenonura Pueyaso niquiara, panaatia poojiacata. Naacuajitij, majaari socua pa cajitiuniu quiniutianiya taraatia ninishiqui, juhua pa jamaca shuriucua.

<sup>80</sup> Conajaari maashiquiaari. Nojuajaari tama na cuaqueyajaaja cumaquiquiaari socua seetanujuanaa Pueyasoocua tiuujia na quiniuria. Nojuajaari pueyaracaanu cariquia jiyajinia quijia quiquiaari nojuaja jaara Pueyaso sequenu panishano caminiujiuniu coteequiaarijiaatijia narta Israel pueya niquiara.

## 2

### *Jesu rasacari* (Mt 1.18-25)

<sup>1</sup> Tiuquinijiona Juan rasaanu nuhuaji, jiyaca jiyaniijiajanaa César Augustoori Roma tiacajiniji sequequiaari puetunu na jiiitasano pueyapuejanaa cuara serojosaaria puetunu nojori jiyacajiniajanaa. <sup>2</sup> Pueya jaara co-teenujuanaa serojosaquiaari, Cirenio jiyaniishano pueyanoori jiyacari Siria jiyajinia jiyaniijia quiquiaari. Nojuajaari jiyaniijiaara César Augusto jiyatesano quiquiaari. <sup>3</sup> Puetunu pueyajanaari sequesaaquiaari nojori cuara quiojohuara na raja tiacajinia, na sesaca naajiotasaanura tii.

<sup>4</sup> Joseeri jiyacari Nazaret tiacajinia quiriquiaa, Galilea jiyajinia. Na raja cutaraari quiquiaari Belén tiacajinia, Judea jiyajinia, tee na supuetana David rasaquiaaricuaani. Naaratej, Joseeri Belén tiacajinia quiaquiaariuhua. <sup>5</sup> Maríari tari sequesaaquiaari nojuaja Joseeta caminiutianiya. Naaratej, Maríari nata quiaquiaarijihuahua Belén tiacajinia, nojori sesaca naajiotasaanura tii. José niquiocuaranoori tariucua manajaraca quiriquiaa. <sup>6</sup> Belén tiacajinia nojori quishacari, jiyacari tari quiquiaari María ranu juuca. <sup>7</sup> Tii jiyapueratereeri. Conaja jiuniocoquiaari toqueraacuacajiniaari. Na nu-cuaari na niaquiaari juyaca miaquejajinia. Maríari naa raquiaari cuniqui maja quiquio quishacari nojoriria rucoonaa tiuquijia tiajinia.

### *Pueyaso seya muetasacari borrego cojuanaa pueyacua*

<sup>8</sup> Belén tiaca shuriucua cuno niucuaaja, borregohua cojuanaari suteriquiaa cuhuariquiajinia, na seya nojori cojuasacari. <sup>9</sup> Canashiyaquiji Pueyaso seruuri nojoriicua muetaquiaari. Jiyaniijia Pueyaso shacantuuca cumaacaari nojori cuhuataquiaari. ¡Nojoriiri jiyanoohua shiriiquitiurii! <sup>10</sup> Pueyaso seruuri nojori sequeree:

—¡Maja nia puerenu! Niaacua nimiaanijia, jiyanoohua maninia casaa cua pohuatanura nijaniya. Cunora, puetunu pueyajanaari shuquiriniutianiya. <sup>11</sup> ¡Niaacuaji Tacunaari tari rasaaree supuetana David tiacajinia! Nojuajaari Pueyaso Jiyarosano, pa Jiyaniijia Cristotuhuj. <sup>12</sup> Njaa jaara nocua quiaare, niaari conaja riuritanutaniya toqueraacuacajinia jiuniocosano, juyaca miaquejajinia maano. Naacuajitij, niaari niishiniutianiya, seetanujuanaari cua pohuatasano nijaniya.

<sup>13</sup> Jiyacaritij, narta Pueyaso seyari na cojishii. Jiyanoohua queraatia quiriquiaari. Nojoriiri naa maniniuhuaqueetariquiaa Pueyaso:

<sup>14</sup> —¡Jiyanoohua maninia pa Pueyaso, jiyocuacaanu Quijia! ¡Nojuajaari jiyanoohua pa shuquiritasano, na jiyaronuucua jiyacua quiniaa



Jiyanoonia! Naacuaajitij, cana Pueyaso shuquiritiaani, nojoriiri jiyanoootioonutaniya narta pueyata.

<sup>15</sup> Pueyaso seya jaara tacataquiaariuhua jiyocuacaanu na quiquiojiniohua, borregohua cojuanaari tama sequetooquiaarijiaaja:

—¡Belén tiacajinia pa quiaarequij! ¡Pa niqishii cuno, casaajiniji pa Jiyaniijia numooteree pajaniyacuaajani!

<sup>16</sup> Nojoriiri ritia quiojoquiaari. Conaaja riuriatatuseri, María, Josénio. Conaajaari juyaca miaquejajinia niasano mariquiaa. <sup>17</sup> Nojori niqishacari conaaja, nojoriiri ritia tii quiniaa pueya caminiujiurii conaajajiniji Pueyaso seru pohuatasano nojori. <sup>18</sup> Puetunu pueyajanaa, cante nojori pohuatasano tojiriquiaani, nojoriiri jiuujiateree. <sup>19</sup> Majaari María niyajetanu quiquiaari puetunu nojori pohuatasanojuanaa. Noojiajinia na niishiriojoriquiaa pueyaracaanuuri. <sup>20</sup> Borregohua cojuanaari quiojoquiaariuhua. Nojoriiri Pueyaso maniniuhuaqueetariquiaa nojori tojishanojiniji, nojori niqishanojinijinio. Puetunujuanaari naa quiquiaari taa cuno niucua Pueyaso seru pohuataree nojoricuaajani.

*Conaaja Jesu pasacari Pueyaso Secojoua tiajinia, Pueyasora jiyateso-coriqiano*

<sup>21</sup> María conaaja jaara ocho juuca jiitiaquiaari, na cararaatiuuquia coori miatesaaquiaari, taa Moisés rootaquiaaricuaajani. Na miatesaanu nuhuaji, nojuajaari sesojosaaquiaari “Jesu”, taa Pueyaso seru sequequiaari Mariacuajani, na manajeyaquishacarijia.

<sup>22</sup> Na nuhuaji, Moisés sequesano juucaari quiquiaari na nucua neyacata cuara juhua tuteera, jeequesano nojori quiniuria Pueyaso niqiara, mueya rasaanu nuhuaji. Naaratej, nojoriiri conaaja Jesu paquiaari Jerusalén tiacajinia, Pueyasora na jiyatesaanura, Pueyasora na quiniuria. <sup>23</sup> Na queyari naa miiquiaaritij, tariucuacaanu Pueyaso Rupaajinia naajiotasano tojitiajaca nojori quiniucua. Naajiotasanoori naa quiyatej: “Puetunu nia jiyapueranuhajanaa cuara Pueyasora jiyatesaaria”. <sup>24</sup> Naaratej nojoriiri quiaaree na seru mosaanura nojoriicuaa Pueyaso Secojoua tiajinia, juhua jeequesano nojori quiniuria Pueyaso niqiara, taa pueya rootasaaquiaari Moisés naajiotasanojinijicuaajani. Pueyasoori naa sequequiaari Moisés tarijiatej: “Cuaara puecoosaaria caapiqui mococoonu. Mococoonu jaara quiyaquiri, cuara puecoosaaria caapiqui shinijia”.

<sup>25</sup> Jiyacaritij, tamonu pueyanoori Jerusalén tiacajinia quijia quiriquiaa. Na sesa quiquiaari Simeón. Nojuajaari maninia miihia quiquiaari Pueyaso niqiara. Pueyaracaanu Pueyaso shuquiritiaja quiquiaariiri. Nojuajaari pueyaracaanu sashijia Pueyaso cuara jiyarooro Israel pueyacuaji Tacuriquiano. Nojuajaari Pueyaso Sohuanu jiitiaja. <sup>26</sup> Pueyaso Sohuanuuri na niishitiquiaari majaari na shaajenu quiniutianiya nojuaja cuara niquiri Cristoaatijia, Pueyaso jiyarosaariquiano. <sup>27</sup> Pueyaso Sohuanuuri na jiyatequiaari namitia cuno juuca Pueyaso Secojoua tiajinia. Naacuaajitij, Jesu jaara pasaaquiaari Secojoua tiajinia, nera na miishaanura puetunu tariucuacaanu rootasanojuanaa, Simeónri jiyacari tii na niquirii. <sup>28</sup> Simeónri Jesu paree. Na cacanuureeri. Naa Pueyaso sequeree jiyanoohua na shuquiriniuti-aari:

<sup>29</sup> —¡Cua Jiyaniijianaa, tariucuaja! ¡Quiarijia cutara cua naata cusonu juhuajaniya, shuquiriaatia cua quishacari! Quiaacuajaari tari cua niquitirii tarijia quia sequesano janiya, quia seru cua quiniucua.

<sup>30</sup> Tari niquirii quia Jiyarosanocuaajanijia, canaacuaji Tacuriquianoni.

<sup>31</sup> Nojuajaari quia niquitiosano puetunu jiyacajinia quinia pueya-pueecuarajanaa. <sup>32</sup> Nojuajaari puetunu taucuaca jiuujiajanaa cuhutanutaniya, maninia nojori niishiniuria quiajaniya. Naajuhuj, quia pueya Israelni, nojoriiri tamasa pueya shuquiritiasano quiniutianiya na seera.

<sup>33</sup> Jesu que, na nucujuhuj, nojoriiri jiuujiateree naa Simeón sequesacari conaajajiniji. <sup>34</sup> Na nuhuaji, Simeónri nojoriicua niaree na juaashiquia. Naa sequereeri:

—Pueyaso cuaara jiiitaara maninia niajaniya.

Jesu nucua María sequereeaariuhuj:

—¡Cua tojiri! ¡Nio conaajaari cutara pueyano quiniutianiya! Querata Israel pueyari juhua tiuriiniutianiya nojori ruuretasacari nojuaja. Saniniuujia, queraatia Israel pueyari cumaatia nujuatujuaca quiniutianiya, nocua nojori tiushacari. Na cumaacata na miiniuucua, pueyari na naata Pueyaso niishiniu maninia. Naajaa, queraatia pueyari na ruuretanutaniya saaja. <sup>35</sup> Naacuajitij, tama pueya niishiriojosano nojiacajiniajaarijia niishishaanutaniya. Quiara saniniuujia, jyanohua taraatiaari quiniutianiya. Quioojaari juhua mueruuta tohuariquiiitishaanutaniya quia mueyacua quia miishacari.

<sup>36</sup> Cuniqijia, Pueyaso Secojoua tiajiniani, tamonu motajaari tii quiriqiaajuhuj. Cuno motajaari Pueyaso sequesano caminiujiunia quiquiaari. Na sesa quiquiaari Ana, Fanuel niyatu. Nojuajaari supuetana Israel niyanu Aser niquiohuacuajinio supueno maaji quiquiaari. Jyanohua motaja quiquiaariiri. Shusha niyaco na quishacari, nojuajaari camiquiaari. Na nuhuaji, siete marijiaari na shocojoquiaari neyacata na quishacari. <sup>37</sup> Neyaca cusonu nuhuaji, socua ochenta y cuatro marijia na shocojoquiaari mashiquio na quishacari. Nojuajaari pueyaracaanu quiquiaari Pueyaso Secojoua tiajinia, Pueyaso na shuquiritiasacari juuca, niucuanio. Nojuajaari sequerucua miaqueyaquiquiaari Pueyaso na secojosacari pueyaracaanu. <sup>38</sup> Simeón pocuasacarijia, jiyacaritij, Anaari nocua nimiaa. Na niquishacari conaaja Jesu, Anaari nojiajinia niishiquiaari cante nojuajani. Cunora, Pueyaso sequeree na shuquiriniutiaari: “¡Paacarasho!” Na nuhuaji, nojuajaari juhuacatecara Jesujiniji pohuataree Pueyaso Jiyarosocoriquiano sashijaca pueya niquiara. Nojori sequereeri:

—¡Niocujaari pa sashishano pa pueyacuaji Tacuriquiano!

*Na queya tacartasacariuhua conaaja Nazaret tiacajiniohua*

<sup>39</sup> Jesu queyari puetunu Moisés naajioneejinia Pueyaso rootasanojuanaa tucuataquiaari na conajara. Na nuhuaji, nojoriiri Galilea jiyajiniara tacatequiaariuhua tama nojori tiacajiniohuajaaja, Nazaret tiacajinia. <sup>40</sup> Naatujua Jesuuri maashiquiaari. Socua cumueecara quiquiaariiri, maninia niishijarianio. Pueyasoori jyanohua na naacujua.

*Mashajaniyoyua Jesu quishacari Pueyaso Secojoua tiajinia*

<sup>41</sup> Puetunu marijiajanaa, Jesu queyari quiojoquiaari Nazaret tiacajiniji, Jerusalén tiacajiniara, Pascua juucajinia nojori queranacunura. <sup>42</sup> Doce marijia jaara Jesu shocojoquiaari tari, Jesuuri nojoritia jiyacari quiaquiaari shushajanaa, taa nojori quianu jiiitiquiaaricujani puetunu marijiajanaa. <sup>43</sup> Queranacunuunu jaara puequequiaari, Jesu queyari quiojoriquiohua juhuajaniya. Jesuuri jiyacari Jerusalén tiacajinia jiyojequiaari. Majaari na queya niishiniu quiriqiaa. <sup>44</sup> Nojoriiri jyaniquiaari Jesu naasucua narta quiojonaa tajinia quiariquiohuajuhuj. Naacuajitij, nojoriiri juhuajaniya

rucuaneree puetunu cuno juucajanaa. Cuno niucujaja, nojoriiri Jesu paje-  
quiaari nojori pueya tajinia, nojori niishishano pueya tajinianio. <sup>45</sup> Shaaqui  
quiriquiaari. Cunora, nojoriiri Jerusalén tiacajinia tacatequiaariuhua, tii na  
pajenuhuara.

<sup>46</sup> Jiuujianaraca juuca nuhuaji, nojoriiri socua Jesu riuriataquiaari  
Pueyaso Secojoua tiajinia, Moisés Rootasanojiniji niishitiojonaa pueya  
tajinia cajiyano. Nojori tojiriquiaari. Nojori nequesoreetariquiaajaari-  
uhuj. <sup>47</sup> Puetunu pueyajanaa, canapuate na tojitiariquiaani, nojoriiri jiuuji-  
atequiaari niishijia Jesu quishacari. Jesuuri maninia nojori rihuaneriquiaa  
saaja, nojori jaara na nequesoreeriquiaa. <sup>48</sup> Na queya jaara na niquiquiaari,  
nojoriiri shiriiquitiuquiaari. Na nucuaari na sequeree:

—Quiyanunaa, ¿casaara naa quia miirii canaani? ¡Janiyari quia queta quia  
pajeriquiaani jiyanohua canaa tacaaniutia quiocua!

<sup>49</sup> Jesuuri na riucuaaree:

—¿Casaara nia pajeriquiaa janiyani? ¿Majateeri nia niishiniu, janiyari cua  
Que Secojoua tiajinia quiniuucua jiaatiaani?

<sup>50</sup> Majaari nojori niishiniu quiquiaari Jesu sequesano.

<sup>51</sup> Jesuuri na queyata quiaarohua nojori tiajiniohua Nazaret tiacajinia.  
Na queya tojijia quiquiaariiri. Na nucuaari pueyaracaanu noojiajinia  
racataja puetunu na niishishanojuanaa neyanu Jesujiniji. <sup>52</sup> Jesuuri socua  
maashiquiaari, socua niishijia quiquiaarijiaariuhuj. Pueyaso shuquiriti-  
asano quiquiaariiri. Puetunu pueyajanaari na shuquiritiaquiaarijihuaj.

### 3

#### *Tiuquinijiona Juan pohuatasacari Pueyaso rupaa cariquia jiyajinia (Mt 3.1-12; Mr 1.1-8; Jn 1.19-28)*

<sup>1</sup> Na nuhuaji, Tiuquinijiona Juanri Pueyaso rupaa pohuatanu cotee-  
quiaari. Jiyacaritij, quince marijaari tari shocojoquiaari César Tiberio,  
jiyaniijiajanaa na quishacari Roma tiacajinia, puetunu jiyaca pueyapue-  
janaa camarnu na quishacari. Jiyacaritij, Poncio Pilatoori jiyaniijia  
quiriquiaa Judea jiyajinia. Herodesri saniniuujia jiyaniijia quiriquiaa  
Galilea jiyajinia. Tarajanu Felipeeri jiyaniijia quiriquiaajuhua Iturea jiya-  
jinia, Traconite jiyajinianio. Lisanasri jiyaniijia quiriquiaa Abilinia jiya-  
jinia. Puetunu cuno jiyaniijianucujanaani, nojoriiri jiyaniijianucuaara César  
Tiberio jiyatesano quiquiaari cuno jiyacajinia. <sup>2</sup> Jiyacaritij, Anásri Caifásta  
Judocuacaacuara secojonaa jiyaniijianucua quiriquiaa. Jiyacaritij, Zacarías  
niyanu Juanri cariquia jiyajinia quiriquiaa. Tii na quishacari, Pueya-  
soori na rupaa na niishitiquiaari. <sup>3</sup> Naaratej, Juanri puetunu Jordán moo  
shuriuquioco jiyacajanaa tajiquiaari na poojotasacari Pueyaso rupaa pueya  
niquiara. Nojuajaari naa pohuataquiaaritij:

—¡Nioojia nia tacatore maja socua sesa nia miiniuria, moojinia cua  
tiuquinijionura niajaniya, Pueyaso jiyanooniuria niajaniya sesa nia miis-  
hanojiniji!

<sup>4</sup> Naacujitij, supuetana Isaías naajiotasanoori tohuateequiaari. Pueyaso  
sequenu panishano caminiujiunia na quiniuucua, nojuajaari naa miriqui  
naajiotaquiaari supueriquiano Juanjiniji:

“Pueyano rupaari tojishiya cariquia jiyajinia nacaano. Sequeyari: ‘¡Jiyani-  
ijia nuura nia jeenucuare! ¡Puetunu maniniajanaa nia nuunure,  
maja shuutiuniu na quiniuria! <sup>5</sup> ¡Puetunu tacocujanaa cuara  
mishiquiojosaaria maninia jamatunu na nuu quiniuria! ¡Puetunu

tuhuananuhuaajanaa cuaara jiuurioosaaria jacananu na nuu quiniuria! ¡Shuyorocotunu nuu cuaara pocuareesaaria! ¡Puetunu suro-coshiquiajanaa cuaara mishiquiojosaaria jacananu na nuu quiniuria!  
<sup>6</sup> Naacuajitij, puetunu jiyacajinia pueyajanaari Pueyaso Jiyarosano niishiniutianiya, Pueyaso jiyanootiriquiano pueyani' ”.

Naa miriqui Isaías naajiotasanoni, cunoori pueya numooteriquiaa juhuacarijia nojori jeenucuanura noojiaca, Jiyaniijia Jesu tojtiajaca nojori quiniuria.

<sup>7</sup> Pueya jaara quiojoquiaari na tiacajiniji Tiuquinijiona Juancua, Juan tiuquinijionura nojori, Juanri naa nojori juuajiaari:

—¡Niaacuajaari juhua sacocua! ¿Cante nia numooteree nia mashiniuria jiyanohua Pueyaso saniitionu panishacari niajaniyani? <sup>8</sup> ¡Maninia miijia nia quiri, canaa niishiniuria niaari seetanujuanaa nioojiaca tacateree sesa nia miiniujiniji! ¡Majaari najuhuaa tama nia cuaqueyajaaja nia sequenu: “Pueyaso pueyanonijia, supuetana Abrahamjinijinio cua supenuucua!” ¡Nia niishiri, Pueyaso jaara paniri, nojuajaari na naata nio saijiniji shipininiu Abraham niqiuohuarajuhuaaj! <sup>9</sup> ¡Pueyaso cajiiri tari mataa naana pajama, sesa naana nuujutajara! Naana jaara sesa jajau muetujua quiri, nushiyari catijasocoriquiano. Naajuhuaaj, niajaniyari juhua sesa muetuna naana, maninia miyashijia nia quishacari. ¡Niaari quera saniitioshiyacujaja!

<sup>10</sup> Naaratej, pueyari Tiuquinijiona Juan nequesotaree:

—¿Taa canaa miyarinitioj?

<sup>11</sup> Juanri nojori riucuarere:

—Cante querajaqueya toqueracani, nojuaja cuaara niqutioora taque cante toqueejuni. Naajuhuaaj, cante miaquesanoracani, nojuaja cuaara niqutioora miaquesanoojunucua.

<sup>12</sup> Roma tiacajinia quijia jiyaniijiajanaa Césarra cumaneeca masejonaari Tiuquinijiona Juancua nijioquiaarijuhuaaj. Nojoriiri tiuquinijosano quini paniriquiaajuhuaaj. Naaratej, nojoriiri Juan nequesotaree:

—Niishitiojonanaa, ¿canaarijataj, casaa canaa miyarinijia?

<sup>13</sup> Juanri nojori riucuarere:

—Maja puera cumaneeca nia masenu pueyajiniji. Saaja nia jiyaniijia sequesano nia masejore.

<sup>14</sup> Naajuhuaaj, soldadohuari Tiuquinijiona Juan nequesotaree:

—¿Canaarijataj? ¿Casaa canaa miiniutianiyarinijia?

Juanri nojori riucuarere:

—Niaacuajaari puecootajaraca. Naajaa, majaari pueya casami nia jaar-iutianu, nojori nia miananajonuta, nojoriicua nia tonujusacarijuhua nia sapojonuta. Juhuaianiya nia quiri saaja nia jiyaniijia niqutiosano cumaneecata.

<sup>15</sup> Pueyari jiyanohua niishiriojoriquiaa Tiuquinijiona Juanjiniji. Nojoriiri Pueyaso sequesano na Jiyarosocoriquiano niquniuucua jiaatiaja. Naaratej, nojoriiri jyaniriquiaa Tiuquinijiona Juan naasucua Cristo, tariucuaaanu Pueyaso sequesano na Jiyarosocoriquianotej. <sup>16</sup> Nocujaji, Tiuquinijiona Juanri puetunu pueyajanaa sequere:

—Janiya nareja nia tiuquinijiya moojiniani, juhua jeequejosano nia quiniuria sesa nia miishanojiniji. Tamonu cutaraari cua nuhuaji niniutianiya. ¡Nojuajaari Pueyaso Sohuanu tiuquinijionutaniya nioojiainia, na cumaaca nia jiitianura, seetanujuanaa maninia miijia nia quiniuria! ¡Nojuajaari juhua manitia nia saniniujiuniutianiyajuhuaaj, maninia jiuujiaraca nia quiniuria! ¡Nojuajaari socua jiyanohua cumaacaraca janiyajiniji! Janiya maara shuquiri-aaia quirini, nojuaja jaara cua sequere cua naacutanura nojuaja juhua na

seru, quenaaja na sapatu neyocua cua saacatanura. <sup>17</sup> Niaari niishiyacuaja taa pueyano miiquiaa na trigoni paratu panura na cocua, na sucuanio, saniniuujia na jajau na racatasocoriquiano tiajiniaaco. Naajuhuj, cuno pueyanoori tari niya quiya na pueya na saquiriojonura na tojiyashijiaca pueya tajiniji, na rijiosocoriquiano nata nojori quiniuria. ¡Sesa pueyari juhua trigo sucua catijiasaanutaniya saniniuujia! ¡Nojoriiri jatasaanutaniya manijinia! ¡Cuno maniiri maja na maquesanu quiniutianiya!

<sup>18</sup> Tiuquinijiona Juanri naa pohuataquiaari Pueyaso rupaa pueya niquiara. Maninia rupaari, na tojitiajaca pueya quiniuria shuquiriaatia. Socua queraatia quiquiaariiri na pohuatasano na numootenura pueya. <sup>19</sup> Jiyaniijia Herodesri jiyacari tarajanu Felipe niquiocua jiitariquiaa necocuara. Cuno maaji sesa quiquiaari Herodías. Tiuquinijiona Juanri jiyaniijia Herodes piriyojoquiaari sesa na miishanojiniji. Herodesri maja na tojinu quiquiaari saaja. Jiyaniijia Herodesri socua queraatia sesa casaa miiijia quiquiaari. <sup>20</sup> Na nuhuaji, jiyaniijia Herodesri socua sesa miiquiaari: Tiuquinijiona Juan nujuatequiaari nujuatejojuajiniaari.

*Jesu tiuquinishacari moojinia*

*(Mt 3.13-17; Mr 1.9-11)*

<sup>21</sup> Tiuquinijiona Juan jaara puetunu pueyajanaa tiuquinijioriquiaajaa, nojuajaari Jesu tiuquiniquiaarijuhuaj. Jesu tohuatasacari moojiniji, na que Pueyaso secojoriquiaari. Jiyacaritij, jiya cajiniocuaari riatequee. <sup>22</sup> Pueyaso Sohuanuuri Jesuucua roseyaree juhua mococoonu niquishano. Jiyocua-caanuji, Pueyaso rupaari tojishaaree sequeyano:

—¡Quiaacujaari cua panishano quianuniyojua! ¡Jiyanohua quia shuquiritiaanjia!

*Jesu supuetanaa sesaca*

*(Mt 1.1-17)*

<sup>23</sup> Treinta marijia jaara na shoconujuquiaari, Jesuuri na Que Pueyasa poonijionu coteequiaari. Pueyari jiyaniquiaari José naasucua seetanujuanaa na que quiquiaari. Joseeri Elí niyanu quiquiaari. <sup>24</sup> Eliiri Matat niyanu quiquiaari. Matatri Leví niyanu quiquiaari. Leviiri Melqui niyanu quiquiaari. Melquiiri Jana niyanu quiquiaari. Janaari José niyanu quiquiaari. <sup>25</sup> Joseeri Matatías niyanu quiquiaari. Matatíasri Amós niyanu quiquiaari. Amósri Nahúm niyanu quiquiaari. Nahúmri Esli niyanu quiquiaari. Esliiri Nagai niyanu quiquiaari. <sup>26</sup> Nagairi Maat niyanu quiquiaari. Maatri Matatías niyanu quiquiaari. Matatíasri Semei niyanu quiquiaari. Semeiri Josec niyanu quiquiaari. Josecri Judá niyanu quiquiaari. <sup>27</sup> Judaari Joanán niyanu quiquiaari. Joanánri Resa niyanu quiquiaari. Resaari Zorobabel niyanu quiquiaari. Zorobabelri Salatiel niyanu quiquiaari. Salatielri Neri niyanu quiquiaari. <sup>28</sup> Neriiri Melqui niyanu quiquiaari. Melquiiri Adi niyanu quiquiaari. Adiiri Cosam niyanu quiquiaari. Cosamri Elmadam niyanu quiquiaari. Elmadamri Er niyanu quiquiaari. <sup>29</sup> Erri Jesús niyanu quiquiaari. Jesúsri Eliezer niyanu quiquiaari. Eliezerri Jorim niyanu quiquiaari. Jorimri Matat niyanu quiquiaari. <sup>30</sup> Matatri Leví niyanu quiquiaari. Leviiri Simeón niyanu quiquiaari. Simeónri Judá niyanu quiquiaari. Judaari José niyanu quiquiaari. Joseeri Jonam niyanu quiquiaari. Jonamri Eliaquim niyanu quiquiaari. <sup>31</sup> Eliaquimri Melea niyanu quiquiaari. Meleari Mena niyanu quiquiaari. Menaari Matata niyanu quiquiaari. Matataari Natán niyanu quiquiaari. <sup>32</sup> Natánri David niyanu quiquiaari. Davidri Isaí niyanu quiquiaari. Isaiiri Obed niyanu quiquiaari. Obedri Booz niyanu quiquiaari. Boozri Sala niyanu quiquiaari.



Salaari Naasón niyanu quiquiaari. <sup>33</sup> Naasónri Aminadab niyanu quiquiaari. Aminadabri Admin niyanu quiquiaari. Adminri Arni niyanu quiquiaari. Arniiri Esrom niyanu quiquiaari. Esromri Fares niyanu quiquiaari. Faresri Judá niyanu quiquiaari. <sup>34</sup> Judaari Jacobo niyanu quiquiaari. Jacoboori Isaac niyanu quiquiaari. Isaacri Abraham niyanu quiquiaari. Abrahamri Taré niyanu quiquiaari. Tareeri Nacor niyanu quiquiaari. <sup>35</sup> Nacorri Serug niyanu quiquiaari. Serugri Ragau niyanu quiquiaari. Ragauri Peleg niyanu quiquiaari. Pelegri Heber niyanu quiquiaari. Heberri Sala niyanu quiquiaari. <sup>36</sup> Salaari Cainán niyanu quiquiaari. Cainánri Arfaxad niyanu quiquiaari. Arfaxadri Sem niyanu quiquiaari. Semri Noé niyanu quiquiaari. Noeeri Lamec niyanu quiquiaari. <sup>37</sup> Lamecri Matusalén niyanu quiquiaari. Matusalénri Enoc niyanu quiquiaari. Enocri Jared niyanu quiquiaari. Jaredri Mahalaleel niyanu quiquiaari. Mahalaleelri Cainán niyanu quiquiaari. <sup>38</sup> Cainánri Enós niyanu quiquiaari. Enósri Set niyanu quiquiaari. Setri Adán niyanu quiquiaari. Adánri Pueyaso niyanu quiquiaari.

## 4

### *Samaruhua jiyaniijia saniniujiushacari Jesu (Mt 4.1-11; Mr 1.12-13)*

<sup>1</sup> Jesu quiasacariuhua Jordán moojiniji, Pueyaso Sohuanuuri noojiajinia quiriquiaa puetunu na cumaacajanaa na jiitianura. Pueyaso Sohuanuuri na jiyatequiaari pueya jiyaqui cariquia jiyajiniara. <sup>2</sup> Tii camueenujuquiaariiri cuarenta juuca. Sesaacaari tii na saniniujiuriquiaa. Majaari quenaaja casaa na miaquenu quiquiaari tii na quishacari. Na nuhuaji miaajequiaariiri. <sup>3</sup> Jiyacaritij, Sesaacaari na sequeree:

—Quiaa jaara seetanujuanaa Pueyaso Niyanu quiri, nio saajia quia jataniri neecaruura na quiniuria.

<sup>4</sup> Jesuuri saaja na riucuarree:

—Pueyaso Rupaajiniacuajaari naa naajiotasano quiya:

“Pueyanoori maja saminio na quiniu saa miaquesanotaja. Seetanujuanaa saminio quiyari na tojishacari puetunu Pueyaso Rupaajanaa”.

<sup>5</sup> Na nuhuaji, Sesaacaari Jesu jiyataaree jiyanoohua jiyaconaja tuhananucua. Sesaacaari ritia niqutirii Jesu puetunu mijiria jiyacajanaa. <sup>6</sup> Jesu sequereeri:

—Janiya quia niqutionutaniya puetunu nio jiyaca jiyaniijianucua cumaacajanaani, maninia jiyaniijiajanaa quia quiniuria mijiria. Janiyari puetunu nio jiyacajanaa niqutiosaaquiaarini. Naacuajitij, janiyari cumaaca niq-uitioquiaani cana cua niqutionu paniyacuajani, jiyaniijiaara na quiniuria. <sup>7</sup> Puetunujuanaari quiara quiniutianiya, quiaa jaara cucuara mojoquetare quia shuquiritianura janiya.

<sup>8</sup> Jesuuri saaja na sequeree:

—Pueyaso Rupaajiniacuajaari naa naajiotasano quiya:

“¡Quia Jiyaniijia Pueyaso quia shuquiritiare! ¡Saaja nojuaja quia tojiri!”

<sup>9</sup> Na nuhuaji, Sesaacaari Jesu jiyataaree Jerusalén tiacajinia. Na tacaniriiri Pueyaso Secojoju tía cacojiria, jiyocuacaanu. Jesu sequereeri:

—Niiquiji quia jaataare jiyocua, quiaa jaara seetanujuanaa Pueyaso Niyanu quiri. <sup>10</sup> Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaniya. <sup>11</sup> Nojoriiri quia quianutaniya, saajiaacua quia jiriataaquiniuucujaji”.

<sup>12</sup> Jesuuri na riucuarree saaja:



—Naa naajiotasano quiyajaariuhua Pueyaso Rupaajinia:  
 “Maja quia Jiyaniijia Pueyaso quia saniniujiuniu”.

<sup>13</sup> Sesaacaari naa Jesu saniniujiuniu puecaquiaari puetunujuanaa. Majaari quenaaja na naata quiriquiaa sesa na miitiniuria. Naaratej, rupaquijia na tarinitiaquiaari tamacaririaari.

*Jesu coteesacari na poonijosano miiniu Galilea jiyajinia*  
 (Mt 4.12-17; Mr 1.14-15)

<sup>14</sup> Na nuhuaji, Jesuuri tacatequiaariuhua Galilea jiyajinia puetunu Pueyaso Sohuanu cumaacatajanaa. Puetunu cuno jiyajiniajanaa pueyari Jesujiniji caminiujiutiooquiaari. <sup>15</sup> Jesuuri Pueyaso secojojua tiajiniaqueya niishitiojoquiaari puetunu tiacajiniajanaa cuno jiyajinia. Puetunu pueyajanaari na timitiaja.

*Jesu quishacari Nazaret tiacajinia*  
 (Mt 13.53-58; Mr 6.1-6)

<sup>16</sup> Jiyacaritij, Jesuuri quiaquiaari Nazaret tiacajinia, tee na canashitishaaquiaaricuajani. Samaatenu juuca, Jesuuri Pueyaso secojojua tiajinia tiuquiquiaari taa na jiitiquiaari miiniucuajani. Nojuajaari nujuaquiaari Pueyaso Rupaa serojonura pueya niquiara. <sup>17</sup> Pueyari na niquitioree tariucuacaanu Pueyaso sequesano caminiujiunia Isaías naajionee jiuniososano, pueya niquiara na serojosocoriquiano. Jesuuri na saacartaree. Serjonu coteereeri tee nio naajiotasano quiyacuajani:

<sup>18</sup> “Pueyaso Sohuanuuri coojiajinia quiyani, na cumaaca cua jiitianura. Naacuajitij, Pueyasoori cua seeratarucuaa maninia rupaa cua pohuatanura casamiijiuniucua pueya niquiara. Cua jiyaroreejaariuhua Sesaaca quioosano pueya cua pohuatanura maninia rupaa Pueyaso-jiniji. Naacuajitij, nojoriiri cartesano quiriohua Sesaaca sapejosano-jiniji. Cua jiyaroreejaariuhua cariyojuarujuri pueya namijiaa cua jeecanura, maninia niquijiara nojori quiniuhua. Cua jiyaroreejaariuhua taraatia miitiasusano pueya cua jiyatenura shuquiriaatia quijacara. <sup>19</sup> Cua jiyaroreejaariuhua cua pohuatanura pueya niquiara, quiarijiaari Jiyaniijia Pueyaso jiyanooshacari pueya”.

<sup>20</sup> Na serjonu nuhuaji, Jesuuri naajionee jiuniorohua. Na niquitiorohua na cojuanaari. Jesuuri cajiriohua. Puetunu pueyajanaari tacuriitia na shootiatuquiquiaa. <sup>21</sup> Jesuuri juhuacatecara pocuarohua. Naa sequereeri:

—Quiarijiani, Pueyaso Rupaajinia nio naajiotasanoori tari tohuateereenia niquiara.

<sup>22</sup> Puetunu pueyajanaari jiuujiatere shanohua Jesu pohuatasano nojori tojishacari. Naaratej, nojoriiri maninia pocoojoriquiaa Jesujiniji. Tama nojorijiaarjia nequesoreetooriquiaa:

—¿Majate nio pueyano José niyanucuaaja, niya pa tiacajinia maashiniotej?

<sup>23</sup> Jesuuri nojori sequereeri:

—Niaa jiyoteeri cua sequenu paniya nio tariucuacaanu sequesano: “Naarajonanaa, tama quia cuaqueyajaaja quia naarajore”. Niaari naa cua sequenu paniya jiyajeneta casaa cua miiniuria cua cumaacata niya tama cua tiacajiniaajani, taa nia tojiquianucuaaja cua miishanojiniji Capernaum tiacajiniacuaani.

<sup>24</sup> Jesuuri socua sequereeri:

—Seetanujuanaa nia sequenianijia, puetunu Pueyaso sequenu panishano caminiujiuniaajanaari tojishoo quijia, tama nojori tiacajiniaajaaja.

<sup>25</sup> Supuetana Elías quishacari, queraatia mashiopueeri quiquiaari Israel jiyajinia. Jiyanohua miaajesacari quiquiaariiri maru niyaquishacari

pueyaracaanu. Jiuujianaraca marijiaari shocojoquiaari socua seis racanio, maru niaquishacari. <sup>26</sup> Naajaa, majaari Pueyaso jiyaronu quiquiaari Elías narta Israel jiyajinia quiniaa mashiquioocua. Pueyaso cutaraari na jiyaroquiaari taatu mashiquioocua Sarepta tiacajinia, Sidón tiaca shuriucua. Naacuajitij, cuno taatu mashiquioori miaquesano jiiatiaquiaari pueyaracaanu cutara, Elías na mianuutesacari miaajenu quishacari pueyaracaanu. Elías quiniuucua Pueyasoocua tiuujia, cuno taatu miaquesanoori maja na pueetanu quiquiaari nojoriria. <sup>27</sup> Naajuhuj, supuetana Eliseo quishacari, queraatia leprata cusosuhuari quiquiaari Israel jiyajinia. Majaari quenaaja tamonu nojorijinijinio naatanishaanu quiquiaari Eliseo jiiitasano Pueyaso cumaacata. Saaja cuno tahue Naamánri naatanishaaquiaari cutara, Siria jiyajinijinio pueyanoni.

<sup>28</sup> Pueyaso secojojua tiajinia quiniaa pueya tojishacari naa Jesu pohu-  
 atasanotej, puetunu nojorijianaari jiyanoohua juaaquioree. <sup>29</sup> Nojoriiri sa-  
 neecuatuquee. Jesu caponeeturee nojori tiacajinijiiri. Nojoriiri Jesu jaatu-  
 cuquiaari socua jiyocuacaanu nojori quijia tuhuananujinijiria, teyanooocua  
 nojori tiaca tiasano quiquiaaricuajani. Nojoriiri na capotunu paniriquiaa  
 juucua tacojiyaji naa na monura. <sup>30</sup> Jesuuri saaja nojori tajiniaaco canu-  
 juquiaari juhujaniya. Quiniquiji tamocora quiaareeri.

*Samaruraca pueyanojiniji pohuatasano*  
 (Mr 1.21-28)

<sup>31</sup> Jesuuri Capernaum tiacajinia quiaquiaari, Galilea jiyajinia tiaca. Samaatenu juuca, Jesuuri pueya niishitiojoriquiaa. <sup>32</sup> Nojoriiri jiuujiateree na niishitiojosano nojori tojishacari. Na niishitiojosanoori seetanujuanaa cumaacaraca quiquiaari juhua jiyaniijia niishitiojosano, maja juhua nareja rootasano caminiujiunia.

<sup>33</sup> Pueyaso secojojua tiajinia, samaruraca pueyanoori jiyacari tii quiriquiaa. Na niquishacari Jesu, naa jiyanoohua nacareeri:

<sup>34</sup> —¡Nazaret tiacajinijinio Jesunaa! ¿Taa quia miiniu paniya canaani? ¡Canaa quia niquiri nareja! ¿Quiaate tari niyaree canaa saniitionuucua? ¡Quia niishiyacuajaniija, cante quiajaniyani! ¡Quiaacuajaari sesa miyashijia Pueyaso Niyanu!

<sup>35</sup> Jesuuri samaru sequeree:

—¡Quia sanaajere! ¡Quia tohuatare nio pueyanojiniji!

Samaruuri pueyano pojotequee puetunu pueya niquiarajanaa. Pueyanojiniji tohuataqueeri. Majaari na nuhuajiria sesa na miiniu quirii pueyano.

<sup>36</sup> Puetunu pueyajanaari shiriiquitiurii. Tama Jesujiniji sequetooreejaariija:

—¡Nia tojiri! ¿Taamueca rupaatucuaanojoni? ¡Nio pueyanoori samaruhua jiyaronu niishiya juhua jiyaniijia! ¡Na rupaari jiyanoohua cumaacaraca! ¡Cunora samaruhua tohuataniriiri!

<sup>37</sup> Puetunu cuno jiyajiniajanaa, Jesu miishanojinijiiri caminiujiushaaquiaari pueya niquiara.

*Jesu naatanishacari Simón Pedro reyarucua*  
 (Mt 8.14-15; Mr 1.29-31)

<sup>38</sup> Jesuuri Pueyaso secojojua tiajiniji tohuareetaquiaari na pueyata. Quiojiyareeri. Simón tiajinia tiuquitiushiiri. Simón reyarucuaari jiyacari jiyanoohua naseeca matariquiaa. Pueyari Jesu sequeree na naataniniuria.

<sup>39</sup> Jesuuri cusosu caco nujuasee. Jesuuri na naseeca cusonu jiyaroree. ¡Na naseecaari ritia shinitiaquee! Tariucua jiyotuucuaari jiyacari sanemaa, na tiajinia quiniaa pueya na mianuutenura.

*Jesu naatanijosacari queraatia cusosuhua*  
(Mt 8.16-17; Mr 1.32-34)

<sup>40</sup> Pananu tiuquishacari, puetunu pueyajanaa, cante cusosuhua jiitiaaquiaarini, nojoriiri na jiyataquiaari Jesuucua. Jesuuri na juaashiquia niaquiaari puetunu cusosuhuacuajanaa. Nojoriiri queraatia tamaatia cusonu jiitiaquiaari. Jiyacari na naatanijioree puetunujuanaari. <sup>41</sup> Naajuhuaaj, queraatia samaruhuari tohuareetaquiaari cusosuhuaajiniji. Samaruhuari naa nacaquiaari Jesuucua:

—¡Quiaacuaja Pueyaso Niyanu!

Jesuuri nojori juaarii. Majaari na shanacunu quirii nojori pocuanura, nojori mariqui pueya niquiara pohuatareeri, nojuajaari Pueyaso Jiyarosano.

*Jesu pohuatasacari Pueyaso rupaa Pueyaso secojonuujua tiajiniaqueya*  
(Mr 1.35-39)

<sup>42</sup> Tariquicuaji, Jesuuri tiacajiniji quiaquiaari tamaquiicua tamajaaja. Pueyari na pajequiaari. Nojoriiri socua nocua tiuquijioquiaari na pajenuusacari. Majaari nojori cartenu paniniu quiquiaari Jesu quianura cuniquiji.

<sup>43</sup> Jesuuri nojori sequeree saaja:

—Janiyari jiyarosaaquiaarini pueyapue niquiara cua pohuatanura quiarinio Pueyaso Rupaa. Quiarijiani, Pueyasoori pueya jiyanooniu paniya, nojori quiniuria na pueya, nojori tiuushacari nocua. Naaratej, janiyari na rupaa pohuatanura quianu paniya tamonu tiacajiniajaniuhuaaj. Janiyacuajaari cunora jiyarosaaquiaarini.

<sup>44</sup> Naacuajitij, Jesuuri puetunu Judiocuaca jiyajiniajanaa rucuanajoquiaari Pueyaso rupaa pohuatanura puetunu Pueyaso secojonuujua tiajiniaqueyajanaa.

## 5

*Sapitiaajara jaquerootanaa shiriiquitiushacari*  
(Mt 4.18-22; Mr 1.16-20)

<sup>1</sup> Tamacari, Jesuuri caminia casaqueyaji quiriquiaa na pueyata. Jesuuri Pueyaso rupaa pohuatariquiaa. Puera jiyanohua pueyari nocua catecanoquiaari catecaji na tojitanura nojuaja. Nojoriiri Jesu tanuujuriquiaa puera. <sup>2</sup> Jesuuri caapiqui bote niquirii caminia casaqueyaji. Shaama quiriquiaari. Na camaruhuari na shuriucua jeequejonuuriquiaa na shiyaruhua. <sup>3</sup> Jesuuri Simón botejinia tacaquiaari. Simón sequereeri cuara bote juaariocotaara caminia jiuujiajinia naata. Na nuhuaji, Jesuuri cajirii. Quiniquiji pueya niishitiojonu coteequiaariiri. <sup>4</sup> Jesu jaara niishitiojonu puecaquiaari, Simón sequereeri:

—Queronijinia pa jaaretaare. Niocua tii jartasee nia shiyaruhua sapitiaajara.

<sup>5</sup> Simónri na riucuaaree:

—Niishitiojonanaa, canaacuajaari tari jaquerootariquiaa najuhuanani. Canaari naajaa nocua juhuaquemaani. ¡Saa shaa quiriquiaanojua! Naajaa, quiaacuaja na sequeya, socua canaa jaquerootarohuacuaraquij.

<sup>6</sup> Nojori jaara socua na shiyaruhua jartaquiaariuhua, jiyanohua queraatia sapitiaaja ritiatureeri! Shiyaruhuari sureequetanu coteequiaari. <sup>7</sup> Nojoriiri jatiqui nata poonijionaa piinioree bote tarajanujinia quiyano, nojori niniuria na naacutanura. Nojoriiri ritia nimiaa. Cuno caapiqui bote mishinijioturee sapitiaajataari. ¡Quera tiuquitiariquiaari queraatia sapitiaajata!

<sup>8</sup> Simón Pedro niquishacari naa Jesu miishano nojoriratej, Jesuucua mojoquetareeri. Jesu sequereeri:

—Jiyaniijianaa, maja cua rupuenu socua! Janiya puera sesa pueyanoni quia rupuena cua quiniuria.

<sup>9</sup> Simónri shiriiquirii, jiyanoehua queraatia sapitiaaja nojori quiasacari. Nata quiniaa pueyari shiriiquitiuriijihuaaj. <sup>10</sup> Cuno pojoritia quiriquiaajaariuhua Zebedeo niquiohua, Santiago, Juannio. Nojoriiri Simón cojiniaa quiquiaari. Jesuuri Simón sequeree miriqui:

—Maja puerenu. Quiaari saniniuujia pueya quioojua quiniutianiya juhua sapitiaaja.

<sup>11</sup> Nojori shiitiasacari, nojoriiri puetunu na casaajanaa tiujiaquiaari Jesuta nojori quiojonura.

*Jesu naatanishacari lepraraca cusosu*

*(Mt 8.1-4; Mr 1.40-45)*

<sup>12</sup> Tamonu tiacajinia Jesu quishacari, lepraraca cusosu pueyanoori tii quiquiaari. Na niquishacari Jesu, nocuara jacamareeri. Jesu sequereeri:

—Jiyaniijianaa, quiaa jaara paniri, quia naata cua naataniniu cua cusonujiniji.

<sup>13</sup> Jesuuri na quiaree. Na sequereeri:

—Taaquiririnij. Quia naataniniu paniyanijia. Quia cuaqueya cuara jeequehuara.

Naa na sequesacaritij, na lepraari shaajequee na cuaqueyajiniji. <sup>14</sup> Jesuuri na rootaree maja na pohuatanura na miishano tamasaca niquiara. Na sequereeri:

—Saaja pueyacuara secojonaa jiyaniijia quia niquitishii quia cuaqueya, na cartenuhuara quiajaniya, pueya tajinia quia rucuanefonuhua juhua-janiya. Naajuhuaaj, quia seru quia niquitiose Pueyasooacara catijiasocoriquiano. Naa quia miiri taa Moisés rootaquiaaricuajani, puetunu pueyanaa niishiniuria quiaa tari jeequerohua quia cusonujiniji.

<sup>15</sup> Maninia Jesu miishanojinijiiri jiyanoehua socua tamaquicua caminiujiushaquiaari pueya niquiara. Naaratej, jiyanoehua queraatia pueyari nocua nijioquiaari na tojiniuria, mariyata Jesu naatanijionura nojori, nojori cusonujiniji. <sup>16</sup> Jesuuri saaja pueya quiaquishaqui quiaquiaari na Que Pueyaso na secojonura. Nojuajaari naa pueyaracaanu miiquiaari.

*Jesu naatanishacari cumatacuruhuana cusosu*

*(Mt 9.1-8; Mr 2.1-12)*

<sup>17</sup> Tamonu juuca, Jesuuri pueya niquiara niishitiojoriquiaa. Na tojitianaa tajinia cajitiuriquiaajaariuhua Fariseocuaca, Moisés Rootasanojiniji niishitiojonaano. Nojoriiri nijioquiaari puetunu Galilea jiya tiacajiniijianaa, Judea jiya tiacajiniji, Jerusalén tiacajininio. Jesuuri jiyanoehua Pueyaso cumaaca jiiitariquiaa cusosuhua na naatanijionura. <sup>18</sup> Jiyacaritij, socua pueyari tiuquiiijioquiaari. Nojoriiri cumatacuruhuana cusosu patariquiaa na matujinia. Nojoriiri juucua na tiuquitianu paniriquiaa tiajiniaaco Jesuucua. <sup>19</sup> Puera queraatia pueya rerejosacari tohuateyaji, majaari na naata cusosu tiuquinitiasaanu quiquiaari. Nocuaji, nojoriiri tia cacojiria tacanitiaquiaari cusosu. Cuno pueya tiaca tucuruuri quiquiaari marauneeca majeetejosano. Nojoriiri tia nijinia papataquiaari. Na nuhuaji, nojoriiri cusosu roshinitiaree cuhuocojiniji na matujinia, Jesu nujuasaqui pueya tajinia. <sup>20</sup> Jesu niquishacari taa nojori tiuuriquiaa nocuani, cunora Jesuuri cusosu sequeree:

—Pueyanonaa, quiaacuaja tari jiyanooshaaree sesa quia miishanojiniji.

<sup>21</sup> Naa Jesu sequesacaritij, Moisés Rootasanojiniji niishitiojonaa, mariyata Fariseocuacaari naa niishiriojonuuriquiaa: “¿Cantejaara cuno pueyanoni?

¡Nojuajaari tama na cuaqueyajaaja jiyateya juhua Pueyaso na quiniuria!  
 ¡Pueyanoori maja na naata tamonu pueyano jiyanooniú sesa na miishano-  
 jiniji! ¡Saaja Pueyaso cutaraari na naata pa jiyanooniú!”

<sup>22</sup> Jesuuri naa nojori niishiriojosano niishiriquiaa. Cunora, nojori se-  
 quereeri:

—¿Casaara naa nia niishiriojiyani? ¿Niaateeri cucuaji taacanuyajaa?

<sup>23</sup> Janiyara, maja jiyajeneta cua sequenura: “Quiaari tari jiyanooshaaree  
 sesa quia miishanojiniji”. ¿Jiyajenetatejaariuhua sequenura: “Quia sanere.  
 Quia rucuanere”? <sup>24</sup> Cunora, janiyari quiarijia nia niishitiniutianiyani,  
 janiyari mijiria jiyarosaaquiaarini pueya cua jiyanooniuria sesa nojori mi-  
 ishanojiniji.

Naacuaajitij, Jesuuri cumatacuruhuana pueyano sequeree:

—Cua tojiri. ¡Quia sanere! ¡Quia matu quia pataarohua quia tiajinia!

<sup>25</sup> Jiyacaritij, pueyanoori sanequee nojori niquiara. Na tiajinia pataaro-  
 hua na matuuri. Shuquiriaatia quiariquiohua na tiajiniohuari Pueyaso na  
 maniniuhuaqueetanuta. <sup>26</sup> Puetunu pueyajanaari shiriiquitiurii. Nojoriiri  
 Pueyaso maniniuhuaqueetariquiaa cuno maninia casaa nojori niquiniuu-  
 cua. Nojoriiri na puerenuta naa sequetuquiaarijihuaaj:

—¡Paari quiarijia jiyanoohua maninia miishano niquiriini! ¡Nocuaaji jiuuji-  
 atesano!

*Jesu sequesacari Leví, na pueyano na quiniuria*

*(Mt 9.9-13; Mr 2.13-17)*

<sup>27</sup> Nio nuhuaji, Jesuuri tohuataquiaari. Tamonu pueyano niquiriiri jiyani-  
 ijajanaa Césarra cumaneeca masejosaqui cajiyanu. Na sesa quiquiaari Leví.  
 Jesuuri na sequeree:

—¡Cua nuhuajiri, cua pueyano quia quiniuria!

<sup>28</sup> Jiyacaritij, Leviiri ritia sanequiaari. Puetunu na jiitiasanojuanaa tiuji-  
 aqueeri. Jesuta quiaqueeri.

<sup>29</sup> Na nuhuaji, Leviiri jiyanoohua queraatia sumatuquiaari na tiajinia,  
 Jesu na queranacutanura. Queraatia narta cumaneeca masejonaari  
 tii quiriquiaajaacuhuaaj. Nojoritia miaquejajinia cajitiuriquiaari, socua  
 tamasaca pueyano. <sup>30</sup> Moisés Rootasanojiniji niishitiojonaa, mariyata narta  
 Fariseocuacaari juhuacatecara Jesu pueyacuara rimiaaquenu coteequiaari.  
 Nojoriiri naa Jesu pueya sequeturee:

—¿Casaara cuno sesa pueyata nia miaqueyani, nia ratuyani, tama parta  
 pueya tacartajacatajaajanio? Nojoriiri pa paraa sequera cumaneeca mase-  
 jonaa.

<sup>31</sup> Jesuuri nojori riucuaaree:

—Cante na cuaqueya jiyaniyani nojuaja maja cusosu na quiniu, nojua-  
 jaari maja naarajona na paniniu. Cusosuhua cutaraari naarajona paniya.

<sup>32</sup> Naajuhuaaj, majaari mijiria cua niniu quiquiaari maninia miijia puey-  
 acua. Niquiaari cutaranijia sesa miijiacua cua tacatonuhuaara Pueyasocua,  
 maninia miijia nojori quiniuria.

*Pueya nequesotasacari Jesu, casaara na pueya carteyaquiya miaquenu  
 quenaajani Pueyaso nojori secojonura*

*(Mt 9.14-17; Mr 2.18-22)*

<sup>33</sup> Pueyari Jesu sequeree:

—Tiuquinijiona Juan pueya cutaraari sequeyarucua miaqueyaquiquiaa.  
 Nojoriiri naa Pueyaso secojoquiaa pueyaracaanu. Fariseocuacaari naa  
 miiquiaajuhuaaj. Quia pueya saniniuujia, saaja miaquequiaari, ratuquiaari.  
 ¿Casaarateni?

<sup>34</sup> Jesuuri nojori riucuaaree:

—Pueyano camishacari maaji, majaari masuusano pueya miaajenu, camiriquiano pueyano jaara nojoritia quiyajaa. <sup>35</sup> Tamacari, camiriquiano pueyano jaara jaariutiasaare nojori tajiniji, jiyacariti nojori cutaraari mi-  
aqueyaquiniutianiya. Naajuhuj, janiyari cua pueya tajiniji jaariutiasaanu-  
taniyani. Jiyacariti nojori cutaraari mi-  
aqueyaquiniutianiya.

<sup>36</sup> Jesuuri socua nojori niquiara pohuataquiaari nio miriqui sequesano:

—Majaari pueyano miatenu quijia na toque quiariquijiniji, na toque mocua cuhuoco na cushipirijiotajara. Saniniuuja, jaara naa miiritij, na toque quiariqui sesoyari. Quiarinio toquerauri sesoshiyajuhuj, toque mocujinia na posequesacari. Cua rupaari naajuhuj, juhua quiarinio toque. <sup>37</sup> Naajuhuj, majaari na naata quiariniaacu uva caaca mishinishaanu shoque tariucuacojinia, tariucuaco shoque mariqui pojuaretareeri, uva caaca jaara jerema vino na quiniuria. Jaara naa miishaaretej, vinoori najuhuana niitashiya. Shoqueeri najuhuana sesoshiyajuhuj. <sup>38</sup> Naaratej, maninia cutaraari quiariniaacu uva caaca shuujionu shoque quiariquiojinia, maja vino niitiasaanuucuj, na quiquio shoqueno. Naajuhuj, nia niishitiojosanoori juhua tariucuaco shoque. <sup>39</sup> Naajuhuj, pueyano jaara vino tariucuanacu ratujua quiri, majaari na paniniu quiariniaacu vino. Sequeyari: “Tariucuanacuuri maniniacuaja”. Naajuhuj, majaari cua niishitiojosano nia paniniu, quiarinio na quiniucua.

*Jesu pueya carojotasacari trigo samaatenu juuca*  
(Mt 12.1-8; Mr 2.23-28)

## 6

<sup>1</sup> Tamonu samaatenu juuca, Jesuuri trigo cuhuariquiajiniaaco quiojoriquiaa na pueyata. Na pueyari trigo carojotariquiaa. Nojoriiri na juaashiquiajinia na shuquiojoriquiaa na corequetanura. Na nuhuaji, na jajau miojonuuriquiaari. <sup>2</sup> Fariseocuacaari na niqutiariquiaa. Nojoriiri Jesu pueya juaarii:

—¿Casaara nia tojitiaaquiya Moisés Rootasanoni, taa na sequequiaaricua-jani maja pa poonijionura samaatenu juuca?

<sup>3</sup> Jesuuri nojori riucuaaree:

—¿Majateeri nia serojonu quiquiaacuaja casaa supuetana David mi-  
iquiaari na miaajesacarini, mariyata na cojiniaa miaajesacarijuhuj?

<sup>4</sup> Nojuajaari Pueyaso Secojoua tiajinia tiuquiquiaari. Pueyasora niojosano pan pooquiaariiri. Na sareeri. Mariyata nata quiniaa niqutiojoreeri nojori sanurajuhuj. Cuno panri sequesaaquiaari saaja pueyacuara secojonaa sasocoriquiano. Naajaa, Davidri na saquiaari. Majaari Pueyaso juaaniu quiquiaari naa David miiniucua.

<sup>5</sup> Jesuuri socua cuno Fariseocuaca sequequiaari:

—Janiyacujaari Pueyaso Jiyarosanoni. Jiyaniijiara jiyatesaaquiaarinijia cua sequenura casaate samaatenu juuca miishiyani, Pueyaso pa shuquiri-tiniuria.

*Jesu jeecasacari pueyano juaashiquia, cuseetucojuara joojequetano*  
(Mt 12.9-14; Mr 3.1-6)

<sup>6</sup> Tamonu samaatenu juuca, Jesuuri Pueyaso Secojoua tiajinia tiuquiquiaari. Tii niishitiojoriquiaari. Quiniqui quiriquiaari pueyano, cuseetucojuara joojequetano na juaashiquia miaquetajara.

<sup>7</sup> Moisés Rootasanojiniji niishitiojonaa, mariyata Fariseocuacaari Jesu shanacutariquiaa. Nocuara tonujunu paniriquiaari Jesu jaara



cuseetucojuara joojequetano juaashiquiaraca pueyano jecare samaatenu juuca. <sup>8</sup> Jesuuri tari niishiriquiaa taa nojori niishiriojoriqiaani. Jesuuri cuno rimiajatucojua pueyano sequere:

—¡Quia sanere! ¡Niya quia nujuasee pueya tajinia!

Pueyanoori sanequee. Nujuaseeri tee Jesu sequequiaari na nujuanuracujani. <sup>9</sup> Jesuuri nocuara tonujunu panijiaca pueya sequere:

—Nia nequesotareeraj. Cua sequere, ¿taa pa niishitiojosaaquiaari Moisés Rootasanojinijini? ¿Paate maninia miya samaatenu juucani? ¿Paate sesa miya soj? ¿Cusosuhuate naatanijioshiya, puetushiyajanaa monu soj? ¿Taa nia sequeyani?

<sup>10</sup> Jesuuri puetunu na shocuaqueya quiniaajanaa niquinijioore. Na nuhuaji cusosu sequereeri:

—¡Quia juaashiquia quia shiitiore!

Pueyanoori na juaashiquia shiitiore. ¡Na juaashiquiaari ritia jeequequee!

<sup>11</sup> Cuno pueyari jiyanojua juaaquioree naa Jesu miishacaritij. Nojoriiri naa pocoojoquiaari tamajaaja: “¿Taa pa miiniutianiya socua cuno Jesuurini?”

*Jesu saquiriojosacari doce pueya na jiyaramiquishocoriquiano*  
(Mt 10.1-4; Mr 3.13-19)

<sup>12</sup> Jiyacaritij, Jesuuri tamonu tuhuananuucua quiaquiaari, Pueyaso na seccionura. Puetunu niucujanaa secojoriqiaa Pueyasoori. <sup>13</sup> Jaara juhuaquequiaari, Jesuuri na tojtiajaca pueya sequequiaari nocua nojori nijionura. Puetunu nojorijinijiniojuanaa, Jesuuri nareja doce pueya saquiriojoquiaari. Nojori sesojoreeri, “cua jiyaramiquishocoriquiano pueya”. <sup>14-15</sup> Nioori Jesu saquiriojosano pueya sesaca: Simón. Jesuuri na sesojoquiaarijuhua “Pedro”. Simón tarajanu Andrésri saquiriojosaaquiaarijuhuaj, mariyata Santiago, Juan, Felipe, Bartolomé, Mateo, Tomás, Alfeo niyanu Santiago, socua tamonu Simónnio. Nojuajaari Celote maanujiniji pueyano quiquiaari. <sup>16</sup> Santiago niyanu Judasri saquiriojosaaquiaarijuhuaj, Judas Iscarioteno. Nojuajaari quiquiaari Jesu quiateriquiano mosocoriquiano.

*Jesu niishitiojosacari queraatia pueya*  
(Mt 4.23-25)

<sup>17</sup> Na nuhuaji, Jesuuri tuhuananujiniji rosetaquiariuhua na saquiriojosano pueyata, jamatujiniara. Cuno jamatujinia, queraatia na nuhujinia pueyari tari nocuaji quiriquiaa. Mariyata jiyanojua queraatia pueyari tii quiriquiaa puetunu Judea jiyajinijinio, Jerusalén tiacajinijiojuhuaj, shoniniacu caminia shuriuquiumia quiijacajinijinio pueyano. Saaja nio pojoriiri quiquiaari Tiro tiacajinijinio, mariyata Sidón tiacajiniji pueyano. Puetunu cuno pueyajanaari cuniquiria nijioquiaari nojori tojiniuria Jesu, na cusonujiniji nojori naatanijosaanurajuhuj. Jesuuri nojori naatanijioore. <sup>18</sup> Naajuhuj, taraatia samaruhua miishano pueyari naatanijosaaquiaarijuhuaj. <sup>19</sup> Puetunu cusosuhujanaari Jesu quianu paniriquiaa, naatanijosano nojori quiniuria. Jesu cumaacaari jiyanojua poonijoriqiaa. Naaratej, puetunu pueyajanaari naatanijosariquiaa, saaja nojori quiasacari nojuaja.

*Jesu pohuatasano shuquiriaatia quiijajiniji, taraatia quiijajinijinio*  
(Mt 5.1-12)

<sup>20</sup> Na nuhuaji, Jesuuri na pueya niquirii na pocuanura. Naa sequereeri:

—Niaari Pueyaso shuquiritasano, niaa jaara niishiriquia nioojia saaja sesa miiija. Niaa jaara niishiri nioojia naa quiyatej, niaari Pueyaso jiiitasano pueya quiniutianiya.

<sup>21</sup> 'Niaari Pueyaso shuquiritiasano, niaa jaara maninia miihia quiniucua jiaatiaa, taa miaajeyano pueyano miaquesanoocua jiaatiaacuaani. Niaa jaara naa quiniucua jiaatiaa, Pueyasocuaajaari nia jataniniutianiya maninia quijiara nia quiniuria.

'Niaari Pueyaso shuquiritiasano, niaa jaara sesa nia miiniu nuhuaji taraajequiaa. Niaari na nuhuaji saroojonutaniya nia shuquiriniutia, niaa jaara jiyanooshaarohua.

<sup>22</sup> 'Niaari Pueyaso shuquiritiasano, pueya jaara nia niquniu paniyaquiri, pueya jaara nia taanuure, pueya jaara nia macaatiri, pueya jaara nia soore cua tojijiaca nia quishacari. <sup>23</sup> Niaa jaara naa miishaaretej, jiyanoohua nia timiri. Nia jaacuatatare nia shuquiriniutia. Niaa jaara naa nia miishacari rejeretajaca quiri, Pueyasoori nia niishishoo casaa racatasano jiihia jiyocuacaanu, na niqutiosocoriquiano niajaniya. Nia paraa supuetanaari naa taraatia miiquiaari tariucuacaanu Pueyaso sequenu panishano caminiujiunia pueyajuhuj.

<sup>24</sup> 'Niaari saniniuujia taraatia quijiaca quiniutianiya, jamuejaca casamiriacua pueyanaa. Niaacuajaari tari shuquiriaatia quiquianu, puetunu nia panishanojuanaa nia jiihiasacari.

<sup>25</sup> 'Taraatia quijiacaari niajaniya, cante sequejani: "Janiyacuaaja maninia pueyanoni. ¿Janiyatucua casaara paniri Pueyaso jiyanooniuria janiyani?" Naa sequejaca pueyanaa, na nuhuaji, niaari niishiniutianiya niaari saaja sesoriquia pueya seque.

'Taraatia quijiacaari niajanijuhuj, jeya nia quiyaquishacari Pueyasora, saaja tamajaaja shuquiriaatia nia quiniuria nia cojesacari pueyaracaanu. Niaari na nuhuaji sapuenutaniya Pueyasooju nia quishacari pueyaracaanu.

<sup>26</sup> 'Taraatia quijiacaari niajaniya, puetunu pueyajanaa jaara maninia pohuataquiaa niajanijajiniji, maninia nia cojiniucua cuno pueya, Pueyaso tojiyashijiaca pueyani. Cuno pojori supuetanaacuajaari naa shuquiritaquiaari cuno sapojonuujaca, canapuate maja seetanujuanaa Pueyaso sequesano caminiujiuniaa quiquiaaricujani.

*Pa paraa panijiaca pa quirij*  
(Mt 5.38-48; 7.12)

<sup>27</sup> 'Niajaniya, cante niya cua tojitiaacuajani, cua tojitiuri. ¡Nia paraa nia paniri! Maninia nia miiri nia niquniu paniyashijia pueya. <sup>28</sup> Saaja maninia nia riucua nia juayano pueyano. Sesa nia miihiaca pueyacuara nia secojore Pueyaso. <sup>29</sup> Pueyano jaara quia maseca piri, quia jiyanoori nojuaja. Jaara taquijiria pirijuhuj, socua quia jiyanoori. Majaari na naminiu. Pueyano jaara shiniquiaacuaji quia cushishano toque jaariutiare, quia cacojoqui quia niqutiorejuhuj. <sup>30</sup> Pueyano jaara quia sequere quia casamijiniji quia niqutionura nojuaja, quia niqutiore nareja. Pueyano jaara quia casaa jaariutiare, majaari na sequenu: "Cua niqutiorohua". <sup>31</sup> Maninia nia miiri tamasaca, taa nia paniquiaa tamasaca miiniuria niajaniyacuaani.

<sup>32</sup> 'Niaa jaara saaja nia panijiaca paniriquia, majaari nia jyaniniu Pueyasoori nia shuquiritiaa naa nia miishacari. Sesa miihiaca pueyari naa paniquiaa nojori panijiacajuhuj. <sup>33</sup> Maja puera maninia miihia niajaniya, niaa jaara maninia miiquiaa saaja noo pojori, canapuate maninia miiquiaa niajaniyacuaani. Sesa miihiaca pueyari naa maninia miiniu niishiquiaajuhuj, noo pojori canapuate maninia miiquiaa nojoricuaani. <sup>34</sup> Maja puera maninia miihia niajaniya, niaa jaara nia masena niqutioquiaa na panishano, nia niishishacari nojuaja ritia niqutionutaniuhua niajanijajiniji na masesano casaa. Sesa miihiaca pueyari na casaa rupaquiijara

niquitioquiaa narta sesa miijia pueyajuhuaaj, na niishishacari nojori ritia niquitionutaniuhua nojori masesano casaa rupaquijiara. <sup>35</sup> Nia paniri nia paraa. Maninia nia miiri nojori. Nia casami nia niquitiore nareja, pueya jaara na paniya rupaquijiara. Majaari nia taraajenu cuno pueyano jaara nia niquitioyaquiriohua nia casaa. Naa nia miishacaritij, niaari seetanujuanaa Jiyocuacaanu Quijia muerasu. Pueyasoori socua jiyanohua queraatia nia niquitionutaniya tamasaca nia niquitiosanojiniji. Naaratej, capora nia quiri, taa nia Que Pueyasocuaani. Nojuajaari nareja niquitiojoquiaa sesa miijiaca pueya, mariyata canapuate na sequeyashijiacani “paacarasho”. <sup>36</sup> Naaratej, jiyanootio nia quiri, taa nia Que Pueyasocuaani, jiyanoojia.

*Maja sesa nia niishiriojonu niarta pueyanoocuaara*  
(Mt 7.1-5)

<sup>37</sup> Maja nia rimiaaquenu tamasacaacuaara, Pueyaso mariqui saniniuujia nia jiyanoyaquiriiri. Niaa jaara tamasacaacuaara tonujiyashijia quiri, naajuhuaaj, Pueyasoori maja na saneenu quiniutianiya sesa nia miishanojuhuaaj. Niaa jaara jiyanootio quiri, Pueyasoori nia jiyanooniutianiyajaacuhuaaj. <sup>38</sup> Niaa jaara tamasaca niquitioquiaa na panishano, Pueyasoori naa nia niquitionutaniya nia panishanojuhuaaj, maninia shanacusano, jiuuquiutiasano, maninia quianujusano, mishaja quera niitiyano. Pueyasoori mariyata juhua nia shanacutajajiniaja niquitionutaniya nijaniya, taamueca shanacutajajinia nia niquitioquiaa pueyacuaani.

<sup>39</sup> Jesuuri socua niishitiojoquiaari pueya, nio miriqui sequesano:

—¿Cariyojuarute na naata narta cariyojuaru jaatucunu? Naa na jaatucusacari narta cariyojuarutej, nojoriiri mariyata totenutaniya raama. <sup>40</sup> Pueyanoori maja socua niishijia na niishitiojonajiniji. Jaara puetunu maninia niishitiojosaarejanaa, saaja jiyacariti niishijia quiniutianiyajaariuhuaaj, juhua na niishitiojonaja.

<sup>41</sup> ¿Casaara nia niquiya rucucua maano quia tarajanu namijiajiniani, niaa jaara puereetuca maca jiiitiaa tama nia namijiajiniajaaja? <sup>42</sup> Niaa jaara puereetuca maca shanacuya tama nia namijiajiniajaaja, ¿niaatucua casaara sequere quiarta pueyanoni: “Cua tarajanunaa, cuno rucucua pa taquiri quia namijiajiniji”? Sesa jiuujiaracanaa, tama nia namijiajinijiaaja nia pare coteenu cuno maca. Na nuhuaji cutara nia naata maninia niquiniu, cuno rucucua nia taquiniuria nia tarajanu namijiajiniji. Naaratej, majaari nia rimiaaquenu niarta pueyanoocuaara.

*Naanaari niishishano na jajaujiniji*  
(Mt 7.17-20; 12.34-35)

<sup>43</sup> Maninia naanaari maja na naata piiquia jajau muetunu. Saniniuujia, sesa naanaari maja na naata shoqueeca jajau muetunu. <sup>44</sup> Puetunu naanaajanaari maninia niishishano na muetusanojiniji. Majaari pa naata satuna carojonu shuunajiniji. Naajuhuaaj, majaari pa naata tuhuaracona carojotanu saarianajiniji. <sup>45</sup> Naajuhuaaj, maninia pueyanoori maninia pocuaa cutara, maninia jiuujiaraca na quishacari. Sesa pueyanoori saniniuujia sacuaraatia rimiaaqueja, sesa jiuujiaraca na quishacari. Casaa pa niishiriojoquiaa poojiajiniani, paari cuno pocuaani.

*Miriqui Jesu pohuatasano cumueeca jiyajiniji, sasaca jiyajinijinio*  
(Mt 7.24-27)

<sup>46</sup> ¿Casaara nia sequequiaa janiyani, “Cua jiyaniijianaa, cua jiyaniijianaa”, niaa jaara cua rootasano tojitiaaquiquiaa? <sup>47-48</sup> Cua tojiri. Cante cua rupuenara quirii cua rootasano tojijia na quiniuriani, nojuajaari juhua

tamonu pueyano cante maninia tiaquiaarini. Cuno pueyanoori coteenu tucuaara jiuutiaquiaari cumueeca jiyajinia na morijiuucujaji. Na nuhuaji, moo jaara pajaashiquiaari, pajaacaari jiyanoehua cajiquiaari cuno tiaacua. Naajaa, majaari na mueecurujutanu quiquiaari, maninia nujuatejosano na morijiuucua quishacari cumueeca jiyajinia. <sup>49</sup> Saniniuujia, cante najuhuaana cua niishitiojosano tojiyaquiquiaani, na miyaquishacari cua sequesano, cuno pueyanoori juhua tianu niishiyashijia. Cuno pueyanoori sesa tiaquiaari sasaca jiyajinia. Na nuhuaji, moo pajaashishacari, pajaacaari jiyanoehua cajiquiaari cuno tiaacua. Cuno tia pojoretaquiaariiri. Pajaari cuno tia niyartaquiaari puetunujuanaa.

## 7

### *Jesu naatanishacari Romano capitán seru* (Mt 8.5-13)

<sup>1</sup> Jesu jaara pueya niishitiojonu puecaquiaari, na pueyata quiaaree Capernaum tiacajiniaari. <sup>2</sup> Romano soldadoehua capitánri quiniqui quijia quiquiaari. Jiyanoehua na panishano seruuri cusosu matariquiaa. Quera cusoriquiaari. <sup>3</sup> Capitán jaara tojiquiaari Jesujiniji, nojuajaari Judiocuaca camarucua jiyaramiquiquiaari Jesuucua, nojori sequenura Jesu cuaara niiria nocua na seru na naataniniuria. <sup>4</sup> Judiocuaca camarucuaari Jesuucua quiojoquiaari. Nojoriiri juhuacatecara Jesu secojonu coteequiaari jiyanoehua, nojoritia na quianura. Nojoriiri Jesu sequere:

—Cuno Romano capitánri canaa jiyaroreeni, ¡nojuajaari jiyanoehua maninia pueyano! ¡Quenaaja quia miiri na panishano! <sup>5</sup> Nojuajaari parta Judiocuaca panijia. ¡Nojuacuajaari Pueyaso secojojua tiatequiaari canaara tama na cumaneecatajaaja!

<sup>6</sup> Naacuajitij, Jesuuri nojoritia quiaquiaari capitán tiajiniara. Tari Jesu quishacari cateca na tiaacuara, capitánri na rupuenaa pueya jiyaroquiaari Jesuucua, nojori caminiujiuniuria na sequesano Jesura. Naaratej, nojoriiri naa Jesu caminiujiushii capitán sequesano:

—Jiyaniijianaa, capitán naa sequeya: “Cua Jiyaniijianaa, majaari cua taajetenu paniniu quiajaniya. Janiyari maja maninia pueyanoni cucua quia tiuquiniuria cua tiajinia. <sup>7</sup> Nocujaji, majaari cua quianu quiyaree janiyajanaa, cua pajenura quiajaniya. Nareja cuniquiji quia sequere cua seru naatanura. Janiyari niishiyani, quiaa jaara naa sequere, cua seruuri naatanutaniuhua. <sup>8</sup> Janiyari niishiyajaniuhua, cuno cusonuuri quia tojiniutianiya taa cua tojiquiaa cua jiyaniijianucuaaani. Janiyari cua jiyaramiquishano soldadoehua jiitiaajuhua. Janiya jaara tamonu sequereni, ‘Quia quiaare’, nojuajaari quiaqueequiaa. Janiya jaara tamonu sequereni, ‘Miji’, ritia nimiaquiaari. Janiya jaara cua seru sequereni casaa na miiniuria, ritia na miyari. Niishiyaniija quiaari jiyano cumaacaracajuhua.”

<sup>9</sup> Jesu tojishacari cuno pojori caminiujiushano capitán sequesano, Jesuuri jiuujiateree. Jesuuri na nuhuajiniaa pueya niquinijoree. Nojori sequereeri:

—Seetanujuanaa nia sequeyanijia, puetunu parta Israel pueyajinijiniujuanaani, ¡majaari quenaaja cua niquiniu quiquianu Pueyasocua tiuujia pueyano juhua nio tahue!

<sup>10</sup> Capitán jiyaramiquishano pueya tiuquiiiosacariuhua capitán tiajiniohuan, nojoriiri Capitán seru niquishuhua tariucua naatanohua.

### *Jesu samiitianishacariuhua mashiquio niyanu*

<sup>11</sup> Na nuhuaji, Jesuuri tamonu tiacajinia quiaquiaari. Cuno tiaca sesa quiquiaari Naín. Na pueyari nata quiojoriquiaajuhua, socua queraatia

tamasaca pueyanio. <sup>12</sup> Nojori catecanosacari Naín tiacaacua, Jesuuri pueya niquiquiaari macu pataano jamosocoriquiano. Macuuri jiyacunojuanaa na nucua niyanu quiquiaari. Na nucuaari mashiquio quitiasuquiaari. Queraatia pueyari na nucuata macu nuhuaji sacuariquiaa, jamajiniara nojori quiojosacari. <sup>13</sup> Jesu niquishacari mashiquio, nocua taraajereeri. Na sequereeri:

—Maja nujuquenu.

<sup>14</sup> Jesuuri macuucua catecanoree. Macu quiquio quiatareeri. Na patanaari pootia na nujuataquee. Jesuuri macu sequereeri:

—Mashajanaa, janiya quia sequeyani: “¡Quia sanere!”

<sup>15</sup> ¡Macuuri cajiQUII! Juhuacatecara pocuareeri. Jesuuri na nucuaacua na jaatucuree. <sup>16</sup> Puetunu pueyajanaa jaara naa Jesu miishano niquiquiaari, jiyanohua pueretureeri. Nojoriiri Pueyaso shuquiritiaree jiyanohua. Na puerenuta sequetureeri:

—¡Pueyaso sequenu panishano caminiujiuniaqui niya supueree pa tajinia! ¡Jiyanohua cumaacaraca!

Nojoriiri naa sequetureejuhuj:

—¡Pueyasoori shusha quiaritia na saquiriojosano Israel pueya niishiriohuacuhuj, na cumaquiniuria pajaniya!

<sup>17</sup> Jesujiniji pueya pohuatasanoori caminiujiushaaquiaari puetunu Judiocuaca jiyajiniajanaa, mariyata puetunu na shocuaqueya jiyacajiniajanaano.

*Tiuquinijiona Juan jiyaramiquishano pueya nequesoreesacari Jesu (Mt 11.2-19)*

<sup>18</sup> Tiuquinijiona Juan pueyari puetunu Jesu miishanojuanaa pohuataquiaari Tiuquinijiona Juan. Na nuhuaji, Tiuquinijiona Juanri caapiqui na pueya sequequiaari:

<sup>19</sup> —Jesuucua nia quiaare. Niocua na sequesee: “¿Quiaate seetanujuaana Pueyaso Jiyarosano, tariucuacaanu sequesano niriqianotej, tamonute sashishiyajara soj?”

<sup>20</sup> Naaratej, Tiuquinijiona Juan jiyarosano pueyari Jesuucua quiojoquiaari. Na sequetuseeri:

—Tiuquinijiona Juanri canaa jiyaroree quiocuani, canaa nequesotanura quiajaniya: “¿Quiaatena Cristo, Pueyasojiniji niriqianotej, canaate tamonu sashiyajara soj?”

<sup>21</sup> Nojori tiuquijiosacari Jesuucua, jiyacaritij, Jesuuri queraatia pueya naatanijioree nojori niquiara; cusosuhua, pueyaracaanu nootunejaca, samaruhuaraca pueyanio. Mariyata queraatia cariyojuarujuri jiyaterohua niquijiacaraari. <sup>22</sup> Na nuhuaji, Jesuuri naa Tiuquinijiona Juan pueya sequereeri:

—Nia quiaarohua. Tiuquinijiona Juan nia pohuatasuhua taa nia niquiricuajani, nia tojishanonio. Nia sequesuhuanoj: “Cariyojuarujuriiri niquijiacara quiriohua. Shipiiniuquiuiuniaari maninia rucoorohua. Lepra cusotajacaari cushiritishaarohua juhua juhuanaraja nojori quiniuhua. Numueejunucuaari tojijiacara quiriohua. Macunucuaari samiitianijiosaarohua. Casamijiuniucua pueyari Pueyaso rupaa pohuatasaree, Pueyaso pueyara nojori jiyatesaanura. <sup>23</sup> Shuquiriaatia quijia cutaraari nooj, cante cucua tiuuniu tarinitiaquiyani”.

<sup>24</sup> Tiuquinijiona Juan jiyarosano pueya jaara quiojoquiaariuhua, Jesuuri juhuacatecara pueya pohuataree Tiuquinijiona Juanjiniji. Jesuuri naa nojori nequesotaree:



—¿Casaa niquniuucua nia quiojocanu cariiquia jiyajiniani? ¿Niaate noojia niquijoteja niquniuucua quiojocanu? ¿Tiuquinijiona Juante juhua paratu piyarojosano naajua jiyareta na tacarojosano? Majaruhua. <sup>25</sup> ¿Casaa niquniuucua nia quiojocanunitioj? ¿Niaate maniniuqui toque cushijia niquniuucua quiojocanu? Niaacuajaari niishiya, shanohua toqueya cushiyonuujuacaari saaja jiyaniijianucua tiajinia quiyano niquishano. Nojoriiri tama na panishanojuaaja miijiaca. <sup>26</sup> ¿Taateerinitioj? ¿Casaa niquniuucua nia quiojocanuurini? ¿Pueyaso sequenu panishano caminiujiuniate quiquianu? Taaquiriirinij. Nia niquishano pueyanoori seetanujuanaa socua tojishano pueyano puetunu Pueyaso sequenu panishano caminiujiunijianajianaa. <sup>27</sup> Cuno Juanjinijicuaajaari tariucuacaanu Pueyaso Rupaajinia naajiotasano quiquiaari. Pueyaso sequesano nojuajiniiri naa naajiotasaaquiaaritij: “Cua sequenu panishano caminiujiuriquiano jiyaroyanjia, na puetanura quiajaniya, nuu jeenucuariquiano quocuaji”.

<sup>28</sup> Seetanujuanaa nia sequeyanijia, puetunu Pueyaso sequenu panishano caminiujiunijianajianajianaa, majaari tamonu socua cutara pueyano quiniu quiquiaari Tiuquinijiona Juanjiniji. Naajaa, cante Pueyaso muerasuniyosua quiya cucua na tiuushacarini, Pueyasora, nojuajaari socua cutara pueyano Tiuquinijiona Juanjiniji.

<sup>29</sup> 'Puetunu pueyajanaa, mariyata cumaneeca masejonaa Roma tiacajinia quijia jiyaniijiarani, nojoriiri niishiquianu Tiuquinijiona Juan pohuatasano Pueyasojinijiri seetanu rupaajanaa quiquianu. Naaratej, nojori tacatosacari nojori jiuujia sesa nojori miishanojiniji, nojoriiri moojinia tiuquinijiosaacanu.

<sup>30</sup> 'Saniniuujia, Fariseocuaca, mariyata Moisés Rootasanojiniji niishitiojonaani, nojoriiri Tiuquinijiona Juan pohuatasano ruuretacanu saaja. Naacuajitij, majaari nojori tiuquinijiosaanu quiquianu, nojori seetanuucua nojoriiri sesa miijiacajuhuj. Nojoriiri Pueyaso miiniu panishano nojoriria soocanu saaja. Naacuajitij, majaari nojori jiyanooshaanu quiquianu.

<sup>31</sup> Jesuuri socua sequeree:

—¿Quiarjia nio pa quishacari pueyarijiaataj? <sup>32</sup> Nojoriiri juhua naatujoori, na tacuarishijionu panishacari, na cajitiushacari tiaca jiuujiajinia cajitiucua curotasanojinia. Nojoriiri narta naatujooriicua naca: “Canaari juucua naajua jonenejiyani. Majaari nia nianujunu paniniu. Canaari taraatia jaaquequejosano jaaquequejiyani. Majaari nia sapuenu paniniuujihuaj”. <sup>33</sup> Naajuhuj pueyanaa, niaari Tiuquinijiona Juan tojiyaquiquianu Pueyaso rupaa na pohuatasacari nia niquiara. Nojuaja cutaraari miaquesano miaqueyashijia quijia, vino ratuyashijiano. Naaratej, niaari na sequeja, “samaruraca”. <sup>34</sup> Na nuhuaji, janiyari niquianuni. Janiyari saniniuujia miaquesano miaquejojuani, vino ratujuajuhuj. Cunora niaari cua sequequiaa: “Cunoori sacuaraatia miaquejoru, ratunu porocuanio, sesa miijiaca rupueja sacuaraatia, mariyata pa soosano cumaneeca masejonaa rupuenanio”. Naa nia sequesacaritij, niaari cua tojitiaaquiyaacuhuj. <sup>35</sup> Naajaa, pueya jaara canaa pohuatasano tojiijaca quiri, jiyacari cutara nia naata niishiniu canaa niishitiojosanoori seetanujuanaa Pueyasojiniji, cua tojiijaca jatasacari maninia quijiacara.

### *Jesu miaquesacari Fariseo Simón tiajinia*

<sup>36</sup> Tamonu Fariseo pueyanoori Jesu masuuquiaari na tiajinia na miacquenuura. Jesuuri na tiajinia quiaaree. Miaquenuujua shuriuquiumia roshishiiri. <sup>37</sup> Paanatuuri cuno tiacajinia quijia quiquiaari. Na niishishacari Jesuuri cuno Fariseo tiajinia tiuquirii miacquenuura, nojuajaari



cuno tiajinia quiaquiaarijiuhuj. Shiitaniyujua seesariquiaja pataconiyojua cacatariquiaari, cohuaja saajiajiniji quejasano. Mishaja quiriquiaari shanohua jaanutajata. <sup>38</sup> Maajiiri Jesu cashacuucuma mojuquetasee. Nujuqueriugiaari. Na namijiaacaari Jesu niohuacaacua totejoriquiaa. Naa Jesu niohuaca piquiojoreeri. Na nuhuaji, na muecacata na sacuanijiarohuari. Na niohuaca nujuureeri. Na shanohua jaanutaja totaree Jesu niohuacaacuaari. <sup>39</sup> Cuno Fariseo pueyano niquishacari naa cuno maaji miishanotej, noojiajinia niishiriojoriquiaari: “Jesu jaara seetanujuanaa Pueyaso sequenu panishano caminiujiunia quiri, mariqui niishiri cante na coyani, taamueca maa-jitijianojoni”. <sup>40</sup> Jesuuri cuno Fariseo pueyano niishiriojosano niishiriquiaa. Cunora na sequereeri:

—Simónnaa. Quia sequenu paniyanijia.

Fariseo pueyanoori Jesu riucuaaree:

—Cua sequere, Niishitiojonanaa.

<sup>41</sup> Jesuuri na sequeree:

—Caapiqui pueyanoori cumaneeca masequiaari rupaquijiara tamonu cumaneeca niquitiojonajiniji. Niquiriyatu pueyanoori queraatia cumaneeca masequiaari, juhua quiniento juuca poonijosanojiniji masesano. Tamonu pueyanoori masequiaari nareja juhua cincuenta juuca poonijosanojiniji masesano. <sup>42</sup> Na nuhuaji, nojori sequesano juuca jaara tari quiquiaari na camaru nojori niquitionuhuara na cumaneeca, majaari nojori jitianu quiquiaari cumaneeca. Naaratej, cumaneeca niquitiojonaari nojori sequeree: “Naajaa, maja socua nia niishiriojonu nia niquitionuhuara tarijia cua niquitiosano cumaneeca niajaniya”. Cumaneeca niquitiojonaari naa cuno caapiqui pueya jiyanooquiaari. Simónnaa, cua sequeretoj, ¿teyano cuno caapiqui pueyanoinijiniote socua cuno cumaneeca niquitiojona panijara quiniutianiyani?

<sup>43</sup> Simónri Jesu riucuaaree:

—Cunocujani, cante socua queraatia cumaneeca niquitiosaaquiaaricujani.

Jesuuri na sequeree:

—Taaquiririnij.

<sup>44</sup> Jiyacaritij, Jesuuri cuno maajiicua tacateree. Simón sequereeri:

—¿Quiaate nio maaji niquiya? Cua tiuquishacari quia tiajinia, majaari quenaaja quia niquitionu quirii mohuaca janiya, cua niohuaca cua jeequetajara. Nio maaji cutaraari cua niohuaca jeequeree na namijiaacata. Na sacuanijiarohua na muecacataari. <sup>45</sup> Majaari quenaaja quia nujuunu quirii janiya, quia saruhuatasacari janiya. Nio maaji cutaraari cua niohuaca nuju-unequejoriquiaa pueyaracaanu, niya cua cajishacari. <sup>46</sup> Naajuhuj, majaari quia totanu quirii miesu nunacu cua nacaacua. Nio maaji cutaraari cua niohuacaacua totaree shanohua jaanutaja. <sup>47</sup> Naaratej cua tojiri. Nio maajiiri jiyanohua sesa miijia quiriquiaa. Naaratej, jiyanohua cua paniyari puetunu sesa na miishanojinijijianaa cua jiyanooniucua nojuaja. Saniniuujia, cante secaja sesa na miishanojiniji jiyanooshaareeni, naajuhuj, nojuajaari secaja panijia na jiyanoonia.

<sup>48</sup> Na nuhuaji, Jesuuri cuno maaji sequeree:

—Quiaacuajaari tari jiyanooshaaree sesa quia miishanojiniji.

<sup>49</sup> Narta masuusano pueya nata cajitiuanoori juhuacatecara tama sequetoorejaaja:

—¿Cantucuaa nio pueyanoni, sesa miijia jiyanooriqianoni?

<sup>50</sup> Jesuuri maaji sequeree saaja:

—Cucua quia tiuushacari, quiaacuaajaari tari jiyanooshaaree. Juhuajaniya quia quiaarohua.

## 8

### *Jesura pueraquena maajipohuajiniji pohuatasano*

<sup>1</sup> Na nuhuaji, Jesuuri rucuanajoquiaari queraatia tiacajinia, shiitianiyojua tiacajiniajuhuaj. Nojuajaari tii Pueyaso rupaa pohuatariquiaa, taa Pueyaso jiiitanu paniya na muerasuni. Na doce saquiriojosano pueyari na cojiriquiaajaacuhuj. <sup>2</sup> Noojiaqueya maajipohuari na tarajariquiaajujuhuaj. Cuno maajipohuari tamaatia cusonujiniji Jesu naatanijosano quiquiaari. Tii quiriquiaajaariuhua noo maajipohua, Jesu nojorijiniji tohuatanijioquiaari samaruhatej. Nojorijinijinioori quiquiaari María Magdalena. Jesuuri cuno Maríajiniji tohuatanijioquiaari siete samaruhua. <sup>3</sup> Quiriquiaajaariuhua Juana, Cuza niqiuocuani. Cuzaari jiyaniijia Herodes jiiitasano casami cojuana quiquiaari. Susaanaari nojorijinijinio quiquiaarijiuhuj. Socua queraatia maajipohuari quiriquiaa. Puetunu cuno maajipohuajanaari Jesu naacutaquiaari tama nojori jiiitasano casaatajaaja. Nojoriiri nera pueraquenuunaa quiquiaarijiuhuj, tiqiyocua nojori rucuanesacari Jesuta.

### *Jesu pohuatasano natoojona pueyanojiniji* (Mt 13.1-9; Mr 4.1-9)

<sup>4</sup> Queraatia cuno jiya tiacajinijinio pueyari nijioquiaari nojori niqiniuria Jesu. Jaara nocua rerequeejoquiaari queraatia pueya, Jesuuri nojori niishitiojioquiaari miriqui, nio pohuatasanota. Nojori sequereeri:

<sup>5</sup>—Tamonu pueyanoori na cuhuariquiajinia quiaquiaari natoojonuucua. Na jacutasacari, secajaari totequiaari nucuaco. Tii rapijosaaquiaariiri. Shuhuari na miojoquiaari. <sup>6</sup> Tajaacaari totere sai tajinia. Cuno jajau jaara moritiaquiaari, ritia sorereeri puera joojuashiqui na quishacari. <sup>7</sup> Tajaacaari totere riyocuaca tajinia. Riyocuacaari socua ritia maashiquiaari. Na natanooori tarinitiucua quirii. <sup>8</sup> Socua tajaacaari maninia jiyajinia totere. Tii maashiquiaari maniniaari. Queraatia mueturee cutaraari. Noojiaqueya cuno nataujinijiiri cien jajau quiquiaari niqiriyatu jiyonajiniji.

Nio pohuatasano na puecasacari, Jesuuri na rupaa paaretaree. Naa sequereeri:

—iNiaa jaara numaaraca quiri, nia tojitiare cua pohuatasano!

### *Casaarate miriqui pohuatasanoni* (Mt 13.10-17; Mr 4.10-12)

<sup>9</sup> Na nuhuaji, Jesu pueyari na nequesotaree casaa na miriqui pohuatasano niishitiojonu paniyani. <sup>10</sup> Jesuuri nojori riucuaaree:

—Niaari saquiriojosaaquiaari nia niishiniuria taa Pueyaso poonijiya pueya jiuujiajiniani, na muerasura nojori quiniuria. Cunoori tariucuaaanu pueya niishishoo. Janiyari tamasa pueya niqiara pohuataquiaa miriqui cutarani. Naacujitij, nojoriiri cua pohuatasano niishiyaquiaa na tojiti-asacari. Naajuhuj, cua cumaacata cua miishano cariyoshitiquiaari, nojori niqiara cua miishacari.

### *Jesu niishitiosacari na pueya, miriqui na pohuatasano natoojonajiniji* (Mt 13.18-23; Mr 4.13-20)

<sup>11</sup> 'Nia niishitiojoreera miriqui cua pohuatasano natoojonajiniji. Pueyano natoojosano jajauri juhua Pueyaso rupaa. <sup>12</sup> Pueyano jaara Pueyaso rupaa

tojiri najuhuanaj, nojuajaari juhua nucuaco toteno jajau. Sesaacaari nimiaa. Pueyaso rupaa na tojishano jaariutiarohua noojiajinijiiri, maja nocua na tiuuniuria, nojuaja mariqui jiyanooshaareeri. <sup>13</sup> Sai tajinia toteno jajauri juhua noo pueya, canapuate Pueyaso rupaa tojiriini. Na nuhuaji, rupaquijia Pueyasocua tiuquiaa shuquiriaatiaari. Naa miijiacaari juhua puera shiitianiyojua nujuacaraca. Naacuajitij, nojori jaara saniniujiushaare, nojoriiri ritia Pueyasocuai rupatequiaa. <sup>14</sup> Riyocuaca tajinia toteno jajauri juhua noo pueya, canapuate maninia tojirii Pueyaso rupaani. Na nuhuaji, nojoriiri puera tacaquiaa mijiria casaacua, casamiriaca nojori quiniuria, tama na cuaqueyajaaja nojori shuqiritiniuriajuhuaj. Naaratej, nojoriiri juhua muetuhuo natau quiya, tarinitiucua riyocuaca tariyoshitishano. <sup>15</sup> Maninia jiyajinia toteno jajauri saniniuujia juhua noo pueya, canapuate maninia tojitiareecuaja Pueyaso rupaani. Na racataa maninia noojiajini-aari. Pueyaracaanu na tojtiaquiaari. Majaari na pishiniu Pueyasocuai. Naacuajitij, nojoriiri juhua queraatia muetujua natau.

*Pueyaso muerasuuri juhua samaritiu cuhuataja*  
(Mr 4.21-25)

<sup>16</sup> Majaari pueya noshitiniu quiquiaa samaritiu, na jamotasocoriquiano conatu cariquiaco, maquetu cariquiaconio. Samaritiu jaara noshitishaare, morijiuucua morotashiyari na cuhuatanura, pueya tiuquitasacari tiajiniaaco. Naajuhuj, Pueyaso Rupaari pueya jiuujia cuhuataja. Cunora, Pueyaso Rupaa cuara maatia pohuatasaaaria puetunu pueya niquiarajanaa. <sup>17</sup> Puetunu jamojosano casaajanaari riuriatasaanutaniya. Puetunu jiya-sohuaja nia miijosanojuanaari niishishaanutaniyajuhuj. Cuhuatasaanutaniyari maninia niquishocoriquiano. <sup>18</sup> Cunora, cua sequesano tojitiajaca nia quiri maninia. Cante maninia jiiitiaa cua rupaani, nojuajaari socua na niishijara jiyatesaanutaniya. Saniniuujia, cante cua rupaa tojiyashijiani, se-caja najuhuaana na niishishanoori jaariutiasaanutaniya, puetunu shaaquirijanaa.

*Jesu tapueyocuaca tiuquijiosacari Jesuucua nojori nucuata*  
(Mt 12.46-50; Mr 3.31-35)

<sup>19</sup> Jiyacaritij, Jesu nucua Jesu tapueyocucata tiuquijioquiaari Jesu quishaqui. Majaari nojori naata tiuquitianu quiriquiaa Jesuucua. Jiyanohua queraatia pueyari nocuara ritariquiaa saaja tia tohuateyaji. <sup>20</sup> Tamonuuri Jesu numooteree:

—Quia nucua quia tarajanuhuata jati carijiniacuma quiya. Quia niquitiu-niu paniyaquinia.

<sup>21</sup> Jesuuri tii quiniaa niquiara sequeree saaja:

—Canapuate seetanujuanaa Pueyaso Rupaa tojitiajacani, nojoriiri cua nucua cutara, cua tarajanuhanio.

*Jesu pueyajetesacari paratu, mohuacanio*  
(Mt 8.23-27; Mr 4.35-41)

<sup>22</sup> Tamonu juuca, Jesuuri botejiniacatacaciaari na saquiriojosano puey-ata. Nojori sequereeri:

—Pa niuutiaare caminia taquijiria.

Naaratej, nojoriiri niuutiariquiaa. <sup>23</sup> Nojori niuutiasacari, Jesuuri ma-queriquiaa. Canashiyaquiji paratuuri juhuacatecara piyarojonu coteeree jiyanohua. Mohuaca queyaqueteriquiaa bote jiniacumaraari. Boteeri quera tiuquitiariquiaa tari. <sup>24</sup> Jiyacaritij, na pueyari Jesu niucujasee ritia. Na sequetuseeri:

—¡Niishitiojonanaa! ¡Niishitiojonanaa! ¡Paa tari tiuquitiaani!

Jesuuri sanemaa. Paratu sequereeri, mohuacanio:

—¡Tariucujaja! ¡Nia suraajere!

Paratu, mohuacaari ritia suraajee. Paratu piyarojonuuri tajimaa, caminia queyocuaanonio. <sup>25</sup> Jesuuri na pueya sequerohua:

—Niaacujaja juucua Pueyasocua tiuujia. ¿Casa nia tojetareerini?

Nojoriiri Jesuucujaja jiuujiatecoree. Shiriiqutiuriquiaari Jesu miishano nojori niquishacari. Tama nojorijiaari nequesoreetooriquiaa:

—¿Cantucuaanojoni? ¡Paratu, mohuacaari na tojirii na sequesacari!

*Gerasa jiyajinijinio samaruhuaraca pueyanojiniji pahuatasano*  
(Mt 8.28-34; Mr 5.1-20)

<sup>26</sup> Na nuhuaji, nojoriiri shiitaseequiaari Gerasa jiyajinia, Galilea jiya taquijiria. <sup>27</sup> Jesu jaara rosequiaari botejiniji, jiyacaritij, samaruhuaraca pueyanoori nocua niquiaari, cuno jiya tiacajinijinio pueyano. Cuno pueyanoori pueyaracaanu samaruhuaraca quiquiaari. Majaari toque na cushiniu quijia. Naajuhuj, majaari tiajinia na quiniu quijia. Saaja raacajinia quijiaari, macunucua nuchua paaquiosaqui. <sup>28</sup> Na niquishacari Jesu, na cariquimiaji mojuquetaseeri. Jesuucua nacareeri:

—¿Casaara quia niyaree miji canaa quia cushitionurani Jesunaa? ¡Quia niishiyajinia! ¡Quiaacujajaari Jiyaniijajanaa Pueyaso Niyanu! ¡Cua tarinitiare quenaaja! ¡Maja naquiya cua miiniu!

<sup>29</sup> Samaruhuaraca pueyanoori naa sequeriquiaa Jesutej, Jesu sequesacari tari nojuaja, cuara tohuataara cuno pueyanojiniji. Samaruuri sequerucua cuno pueyano miitiquiaari sesa. Narta pueyari juucua na cashacucua, na numatucua morojuquiaari cumayocua jiyocua shipinishanota, na cojuasaanura maninia. Samaruhuaraca pueyanoori saaja na turojotaquiaari. Samaruuri na mashiquijia tiquiyocua, pueya quiaquishaqui na quiniuria.

<sup>30</sup> Jiyacaritij, Jesuuri na nequesotaree:

—¿Taateja quia sesani?

Samaruuri na riucuarere:

—Cua sesa “Queraatia”.

Naa Jesu sequequiaariiri jiyanoohua queraatia samaruhua na jiiiasacari.

<sup>31</sup> Samaruhuari jiyanoohua secojoree Jesu, maja nojori na jiyaronura puequeetuuju raama saniitiosocoriquiano. <sup>32</sup> Jiyacaritij, queraatia cushiyari miaquenuuriquiaa cateca naataja, tuhananujinia quiniqui. Samaruhuari cunora Jesu secojoree nojori na tiuquitianiniuria cushiyajinia. Jesuuri nojori tarinitiaree. <sup>33</sup> Cunora, samaruhuari pueyanojiniji tohuareetaquee. Cushiyajinia tiuquitiaaseeri. Puetunu cushiyajanaari cocuatere. Tajojiniji totesee caminiaajiniaari. Tii shushiniuriiri.

<sup>34</sup> Cushiya cojuanaa jaara niquiquiaari naa miishanotej, nojoriiri netecuatiquiaari na shiriiquiniutia, Jesu miishano nojori pahuatanura tiacajinia, cuhuariquiacajiniajuhuj, tee pueya quiriquiaacuajani. <sup>35</sup> Puetunu pueyajanaari Jesuucua nijioquiaari na tiacajiniji, pueya pahuatanuusanoiniji nojori niquiniuria. Nojori tiuquijiosacari Jesuucua, nojoriiri cuno pueyano niquishii, canajiniji samaruhua tohuareetareecuajani. Nojuajaari Jesu shuriucua cajiriquiaa toqueraca, panaatia na quishacariuhua. Naa pueya niquishacari nojuajatej, pueretuquiaariiri. <sup>36</sup> Jiyacaritij, Jesu miishano niquitiuniaari shusha nijiono pueya pahuataree taa samaruhuaraca pueyano naatanishaarohuani. <sup>37</sup> Cunora, puetunu Gerasa jiyajinijinio pueyajanaari jiyanoohua puereturiquiaa. Naaratej, ¡Jesu secojotureeri na quianura nojori jiyajiniji! Naaratej, Jesuuri botejinia tacataquiaariuhua na pueyata na

quianuhua. <sup>38</sup> Cuno pueyano, canajiniji samaruhua tohareetareecua-jani, nojuajaari Jesu secojoree juucua nata na quianura. Jesuuri saaja naa na sequeree:

<sup>39</sup> —Quia tiajinia quia quiaarohua. Quia pueya niqiara quia pohuata-suhua taa Pueyaso miirii maninia quiajaniani.

Pueyanoori quiaarohua. Puetunu na tiacajiniajanaa pohuatasuhuari taa Jesu miiriucuaa maninia nojuajani.

*Jesu naatanishacari Jairo niyatu, Jesu toque quiana maajinio*

*(Mt 9.18-26; Mr 5.21-43)*

<sup>40</sup> Jesu jaara niuutiaquiaariuhua caminia taquijiria na pueyata, pueyari na timitiarohua na tiuquishacariuhua. Puetunu nojorijianaari na sashiriquiaa.

<sup>41</sup> Jiyacaritij, tamonu pueyanoori Jesuucua tiuquishii. Na sesaari quijia Jairo. Nojuajaari Pueyaso secojojua tia jiyaniijia quiquiaari cuno tiacajinia. Jesu cariquimiaji mojoquetaseeri na secojonura na tiajinia Jesu quianura.

<sup>42</sup> Neyatuniyojuaari quera cusoriquiaa jiyacari. Majaari socua niquio-huaraca na quiniu quijia. Doce marijiaari tari shocojoquiaari cuno neyatu.

Jesu quiasacari Jairota, jyanohua queraatia pueyari nata quiojoriquiaa-juhuaj. Pueyari jyanohua na tanuujuriquiaa, nata nojori quiojosacari nucuaco.

<sup>43</sup> Tamonu maaji cusosuuri cuno pueya tajinia quiriquiaajuhuj. Doce marijiaari tari na shocojoquiaari pueyaracaanu na naatesacari. Cuno maaj-jiiri puetunu na cumaneeca puecaquiaarijanaa najuhuanaj, na naarajosaa-nura juucua. Naarajonaari maja na naata na naataniniu quiquiaari. <sup>44</sup> Maaji cusosuuri Jesu nijiniji catecanoquiaari nocua. Na tucuaque toque casaca quiasee jiyasohuari. ¡Na nanacaari ritia curetaquee!

<sup>45</sup> Jiyacaritij, Jesuuri pueya nequesotaree:

—¿Cante cua quiareeni?

Puetunu na shocuaqueya pueyajanaari sequeree:

—Maja canaa quianu quirii quiajaninya.

Pedroori Jesu sequeree:

—Niishitiojonanaa, ¿majateeri quia niquniucuaaja? Queraatia pueyacua-jaari quia tanuujiya.

<sup>46</sup> Jesuuri saaja sequeree:

—Maja. Cusosu cua quiareeni. Niishyanijia cua cumaacaari tari na naatanirii.

<sup>47</sup> Maaji niishishacari na miishano jiyasohuaja tari niishishaaree, Jesuu-cua nimiaari. Na puerenuta tetecariquiaari. Jesu cariquimiaji mojoque-taseeri. Puetunu pueya niqiarajanaa pohuatareeri casaara Jesu na quia-reeni. Pohuatareejaariuhuj taa na naataquee ritiani, Jesu na quiasacari.

<sup>48</sup> Jesuuri na sequeree:

—Sanaunaa, cucua quia tiuuniucua, quiaari naatarohua. Quioojia quia cajitiriohua. Juhujaniya quia quiaarohua.

<sup>49</sup> Jesu pocoojosacarijia cuno maajitia, tamonu pueyanoori tiuquiquiaari Jairo tiajiniji. Jairo sequeeseri:

—¡Quia niyatu tari cusoquee! Maja najuhuana riniu paniniu Niishitiojona quia tiajinia.

<sup>50</sup> Jesu tojishacari cuno pueyano sequesano, Jairo sequereeri:

—Maja puerenu. Cucua quia tiuuri saaja. Quia niyatucuaaja naatanutani-uhua.

<sup>51</sup> Jesu tiuquishacari Jairo tiajinia, nojuajaari maja na shanacunu quirii quenaaja tamonu pueyano tiuquiniuria macuucua. Saaja nata tiuquitiamaa cutaraari Pedro, Santiago, Juan, maaji samiriu que, na nucuanio. <sup>52</sup> Puetunu

tii quiniaa pueyajanaari maaji samiriuucua nujuqueturiquiaa. Sapiyonu-  
uriquiaajaariuhuj. Jesuuri nojori sequeree:

—Maja najuhua nia nujuquenu. Maaji samiriu maja macu, nareja  
maqueyano.

<sup>53</sup> Naa Jesu sequesacaritij, pueyari na saroojotaree saaja. Nojoricuajaari  
niishiriquiaa maaji samiriuuri seetanujuanaa macu quiriquiaa.  
<sup>54</sup> Jiyacaritij, Jesuuri macuucua tiuquiquii. Na juaashiquiajiniji na quiaaseeri.  
Jiyanohua na sequereeri:

—Maaji samiriuniaa, ¡quia sanere!

<sup>55</sup> Na sohuanuuri nocua tacatemohua jiyacari. Samiitiamohuari. Ritia  
sanequeeri. Jesuuri na nucua sequeree na mianuutenura. <sup>56</sup> Na queyari  
jiyanohua jiuujiateree. Jesuuri nojori sequeree, maja nojori pohuatanura  
tamasaca niquiara na miishano.

## 9

*Jesu jiyaramiquishacari na doce pueya Pueyaso rupaa nojori pohuatanura  
(Mt 10.5-15; Mr 6.7-13)*

<sup>1</sup> Jesuuri na doce saquiriojosano pueya rerejotequiaari na  
jiyaramiquishocoriquiano. Nojori niquitioree cumaacaari, puetunu  
tamaatia sesa samaruhajanaa nojori tohuatejonura, cusosuhua  
nojori naatanijionurajuhuj. <sup>2</sup> Nojori jiyaramiquiriiri Pueyaso rupaa  
nojori pohuatanura pueya niquiara, pueya niishiniuria taa Pueyaso  
jiyanoonu paniya nojorini, na muerasu nojori quiniuria. Nojori  
jiyaramiquiriijaariuhua cusosuhua nojori naatanijionura. <sup>3</sup> Jesuuri nojori  
sequeree:

—Maja nia panu nia rucuanejotajara nia panishano. Majaari nia mio-  
jotu nia panu, nia caashoque, nia coseyaca, nia cumanecanio. Saa nia  
cushishano toquetaja nia quiaare cutara. Maja socua toque nia panu nia  
cushishocoriquiano. <sup>4</sup> Niaa jaara tamonu tiajinia tiuquishiiquia, niocua  
cuniqui jiyojetaseequiaja, niaa jaara cuno tiacajiniji quiaarejaatijia. <sup>5</sup> Niaa  
jaara tamonu tiacajinia tojinu paniyaquishaare, cuno tiacajiniji nia quiaare.  
Nia nuhuajiria, cuno pueya niquiara niocua nia niohuacajiniji cuno tiaca  
jaaquia nuutare. Naacuajitij, cuno pueyari niishiniutianiya, Pueyasoori  
nojori jiyanoaquiniutianiya, nojori tojitianu paniyaquiniuucua Pueyaso  
rupaa pohuatanaa.

<sup>6</sup> Na nuhuaji, Jesu pueyari quiojoquee puetunu cuno jiyajinia shiitianiyo-  
jua tiacajiniajanaa, Pueyaso rupaa nojori pohuatanura tii. Nojoriiri Pueyaso  
rupaa pohuatanuuquiaari pueya jiyanooshaanura, Pueyaso pueya nojori  
quiniuria. Naajuhuj, cusosuhua naatanijiotuquiaariiri.

*Jiyaniijia Herodes niishiniu panishacari cante Jesuni  
(Mt 14.1-12; Mr 6.14-29)*

<sup>7</sup> Jiyaniijia Herodesri pohuatasaaquiaari puetunu Jesu miishanojiniji-  
janaa. Herodesri saaja jiyajenequiaari cante Jesuni. Jiyacaritij, nooji-  
aqueya pueyari sequeriquiaa: “Jesucuajaari jiyaniijia Herodes nacatanis-  
hano Tiuquinijiona Juan samiitianohua”. <sup>8</sup> Tamasaca pueyari Jesujiniji se-  
queriquiaajuhuj: “Supuetana Eliascuaja tari tiuquiriohua”. Nojuacuajaari  
tariucuacaanu Pueyaso sequenu panishano caminiujiunia quijia. Sanini-  
uujia, tamasa pueyari sequeriquiaajuhuj: “Jesucuajaari tamonu tar-  
iucuacaanu Pueyaso sequenu panishano caminiujiunia samiitianohua”.  
<sup>9</sup> Herodesri saniniuujia sequeree:



—Janiyacuaajaari cua pueyano jiyarocanu Tiuquinijiona Juan na nacata-nurani. ¿Cantejaara cuno Jesuni? Janiyari queraatia nocuaji tojiniuyani.

Cunora, Herodesri jiyanoehua Jesu niquniu paniriquiaa juucua.

*Jesu mianuutesacari cinco mil pueya*

*(Mt 14.13-21; Mr 6.30-44; Jn 6.1-14)*

<sup>10</sup> Jesu jiyaramiquishano pueya tacatesacariuhua, nojoriiri Jesu pohu-ataquiaari puetunu nojori miishanojuanaa. Na nuhuaji, Jesuuri nojori jiyataaree tamaquiria, Betsaida tiaca shuriucua, tii tamajaaja nojoritia na quiniuria. <sup>11</sup> Pueya niishishacari tee Jesu quiriquiaani, nojoriiri saaja nocua quiojoquiaari. Naajaa, Jesuuri maninia nojori maseree saaja. Cuno pueya pohuatareeri taa Pueyaso quiniu paniya nojori jiyaniijiarani. Jesuuri nojori cusosuhua naatanijioreejuhuj.

<sup>12</sup> Tenacariishacari, Jesu doce pueyari nocua catecanoquiaari. Na seque-  
tureeri:

—Pueya quia jiyaramiquiri cateca tiacajinia, nojori cuara cuniqui pa-jenuura na miaquenuusocoriquiano, na maquetuuarajuhuj. Nojori pan-ishanoori shaaqui niya pa quishaquini.

<sup>13</sup> Jesuuri nojori sequeree saaja:

—Niaa mariqui nojori mianuutere saniya.

Nojoriiri Jesu sequeturee:

—¿Canaateeri miaquesanoracajaarani? Canaa saaja cinco panniyojua ji-  
itiaani, caapiquiriyatu sapitiaajanio. ¿Canaateeri secaja pa cumaneecata  
masenutaniya queraatia miaquesano puetunu nio pueyarajanaani?

<sup>14</sup> Cuniqui nojoritia quiriquiaa naasucuaari cinco mil pueya. Jesuuri na  
pueya sequeree:

—Pueya nia raquiriojotare maninia. Cuara cajitiuuria cincuenta jatiqui,  
socua cincuenta tamaqui. Mianuutesocoriquiano puetunu pueyajanaa,  
cuara naa cajitiuuriatej.

<sup>15</sup> Nojoriiri Jesu sequesano miirii. Puetunu pueyajanaari cajitiurii. <sup>16</sup> Na  
nuhuaji, Jesuuri cuno cinco pan pataree, caapiqui sapitiaajanio. Jiyocua-  
caanu maureeri na Que Pueyaso na secojonura miaquesanoocuaara. Na  
nuhuaji na neecasereeri. Na pueya na niqutioreeri puetunu pueyajanaa  
nojori serotasocoriquiano. <sup>17</sup> Puetunu pueyajanaari na miaquenuuree.  
Maninia tooquioreeri. Na nuhuaji, doce canaasatuuri mishinijiosaaquiaari  
pan raacuata, sapitiaaja raquiquiatanio.

*Pedro sequesacari Jesuuri seetanujanaa Cristo*

*(Mt 16.13-19; Mr 8.27-29)*

<sup>18</sup> Tamacari, Jesuuri Pueyaso secojoriquiaa tamajaaja. Na saquiriojosano  
pueyari nata quiriquiaa. Jiyacaritij, Jesuuri nojori nequesotaree:

—¿Taa pueya sequequiaa janiyani, cantena janiyani?

<sup>19</sup> Nojoriiri na riucuaaree:

—Noojiaqueya pueyari quia sequequiaa, quiaana nacatasano  
samiitianohua Tiuquinijiona Juan. Tamasacaari quia sequequiaajuhuj,  
quiaana Elías, tariucuacaanu Pueyaso sequenu panishano caminiujunia.  
Tamasacaari saniniuujia quia sequequiaa, quiaa naasucuaana tamonu  
tariucuacaanu Pueyaso sequenu panishano caminiujunia samiitianohua.

<sup>20</sup> Jesuuri saniniuujia nojori nequesotaree:

—¿Niajanियariuhuj? ¿Taa nia sequeyani, cante janiyani?

Pedroori na sequeree:

—Quiajaniyacuajaari Cristo, Pueyaso Jiyarosano.

<sup>21</sup> Jesuuri jiyano hua nojori rootaree maja nojori pohuatanura tamasaca niquiara cante nojuajani.

*Jesu numootesacari na pueya, nojuaja mosaanutaniya*  
(Mt 16.20-28; Mr 8.30-9.1)

<sup>22</sup> Jesuuri naa nojori sequerohuacuhuj:

—Janiyari jiyano hua naquiya miishaanutaniyani. Pa Judiocuaca camarucuaari cua niquiniu paniyaquiniutianiya, na tojitianu paniyaquishacari janiya. Naajuhuj, pa pueyacuara secojonaa jiyaniijianucuaari cua niquiniu paniyaquiniutianiya, Moisés Rootasanojiniji niishitiojonaanio. Nojoriiri cua monutaniya. Naajaa, jiuujianaraca juucajinia, janiyari samiitianutaniuhuani.

<sup>23</sup> Na nuhuaji, Jesuuri puetunu pueyajanaa sequeree:

—Cante cua nuhuajiniu paniyani, cua pueyano na quiniuria, nojuaja cuara niyajetaara tama na miiniu panishanojuaaja. Cuara panitiaara tama na cuaqueyajaaja puetunu juucajanaa, cua tojijia na quiniuria seetanujuanaa. <sup>24</sup> Saniniuujia, cante tama na cuaqueyajaaja shuquiritiniuria niishiriojoquiaani, nojuajaari jiyano hua taraatia quiniutianiya na nuhuaji. Saniniuujia, cante tama na cuaqueyajaaja panitiaquiaa cua panishano na miiniuriani, nojuaja cutaraari Pueyaso pueyanora jiyatesaanutaniya, pueyaracaanu shuquiriaatia na quiniuria. <sup>25</sup> Pueyano jaara puetunu nio jiya casamijanaa jiiitiana quiri, cuno maara najuhuana quiri, nojuaja jaara na shaajesacari jatasaare mani quiquiojinia Pueyasooju. <sup>26</sup> Cante cua seera caririquiya mijiria quiniaa pueya niquiara sequenurani, janiyari nojori jiyaniijiani, naajuhuj janiyari nojori seera caririquiniutianiyani cua tiuquishacariuhua Jiyaniijia cua quiniuria. Janiyari shano hua niquishano quiniutianiya cua tiuquishacariuhua cua Que shacantuuca cumaacatani, na seya cumaacatajuhuj. Naajuhuj, cante cua rupaa pohuatanu caririquiya sesa miijiaca pueya niquiarani, janiyari nojori seera caririquiniutianiyajuhuj. <sup>27</sup> Seetanujuanaa nia sequeyanijia, noojiaqueya niajaniyajiniijinioori maja nia cusonuunu quiniutianiya juhuanajuaja, niaa cuara niquirijiaatijia Pueyaso cumaaca tiuquiayano cucua, na muerasu jiiitariquianoni.

*Jesu jatasacari shacantuucara*  
(Mt 17.1-8; Mr 9.2-8)

<sup>28</sup> Naa Jesu sequenu nuhuajitij, ocho juuca nuhuaji, nojuajaari tuhuananuucua tacaquiaari na Que Pueyaso na secojonura. Nata quiaareeri Pedro, Santiago, Juannio. <sup>29</sup> Jesu secojosacari Pueyaso, na jiquiocoori tamaatiara jataquiaari. Na toqueeri jiyano hua cohujara jataquiaarijihuj, shacantuquera. <sup>30</sup> Jiyacaritij, caapiqui pueyari nocua muetaquiaari. Jesuta pocoojoriquiaari. Nojoriiri quiri quiaa supuetana Moisés, supuetana Elíasnio. <sup>31</sup> Nojori nujuatusaquiiri shacantuuca quiri quiaa puetunu nojori shocujanaa. Nojoriiri pocoojoriquiaa taa Jesu mosaanutaniya Jerusalén tiacajiniani. <sup>32</sup> Jiyacaritij, Pedroori jiyano hua maquenuujuriquiaa, nata quiniaajuhuj. Naajaa, majaari nojori maquenu quiri quiaa. Naacuajitij, nojoriiri Jesu shacantuuca niquiquiaari. Cuno caapiqui supuetanaa niquitiurijiaariuhuj, Jesuta pocoojiyano. <sup>33</sup> Cuno caapiqui pueya quiojonu panishacariuhua Jesu shuriucujaj, Pedroori Jesu sequeree najuhanaj:

—¡Niishitiojonanaa, canaa namitia niya quiyani! ¡Canaa suhuororeera jiuujianaraca suhuorotucua; quiara, Moisésra, Elíasranio!

Pedroori naa najuhuana pocuariquiaa. Majaari na niishiniu quiquiaari casaa na sequeriquiaani. <sup>34</sup> Pedro pocuasacarijia, cohujara najacaari nojori mishiquioma. Nojoriiri puereturiquiaa cohujara najacajinia nojori

quishacari. <sup>35</sup> Na nuhuaji, nojoriiri Pueyaso tojirii pocuaano cuno cohujaja najacajiniji. Naa sequereeri:

—¡Nioori cua Niyanu, cua saquiriojosano nia Jiyaniijia na quiniuria! ¡Nojuaja nia tojitiare!

<sup>36</sup> Naa nojori tojiniu nuhuaji cuno rupaatej, nojoriiri Jesu niquiriohua. Tari tamajaaja nujuariquiaari. Nojoriiri sanaa na niqutiariquiaa. Na nuhuaji, majaari quenaaja tamonu nojori pohuatanu quiquiaari nojori niquishano, Jesu jaara samiitiaquiaariuhuaajaatijaj.

*Caya samijajiniji Jesu tohuatesacari samaru*

*(Mt 17.14-21; Mr 9.14-29)*

<sup>37</sup> Tariqui, nojori jaara rosetaquiaariuhua tuhuananujiniji, queraatia pueyari Jesuucua nijioquiaari. <sup>38</sup> Cuno pueya tajiniji, tamonu pueyanoori naa nacaquiaari:

—¡Niishitiojonanaa, cucua quia taraajere quenaaja! ¡Cua niyanuniyojua quia niquiri! ¡Jiyanijuanaari quianuniyojua! <sup>39</sup> ¡Samaruuri na miiquiaa taraatia! ¡Na sariyotequiaari! ¡Na taquiriocuatequiaajaariuhua! ¡Na rupaamajiiri cushaaquiaa! ¡Na cuaqueya miiquiaa moqutiuriuriaari! Majaari ritia na cartenu paniniu quiquiaa. <sup>40</sup> Janiyari juucua quia pueya sequereeni, cuno samaru nojori tohuatenura. Majaari nojori naata quiriquiaa na tohuatenura.

<sup>41</sup> Jesuuri sequeree:

—Pueyaso tojtiaashijiacanaa, niaaqui Pueyasoocua tiuyashijiacajuhuanajaj. ¿Janiyateeri pueyaracaanu rejeretanutaniya niajanianiyani? Miji quia niyanu quia jaatucure.

<sup>42</sup> Caya samijia catecanosacari Jesuucua, samaruuri na pojotequee. Na taquiriocuatereeri. Jesuuri samaru sequeree na tohuatanura. Caya samijia naataniriiri. Na niqutiiorohua na queeri. <sup>43</sup> Puetunu pueyajanaari jiyanoehua jiuujiatereeri nojori niquishacari Jesu miishano Pueyaso cumacata.

*Jesu pacutesacari pohuatanu nojuaja mosaanutaniya*

*(Mt 17.22-23; Mr 9.30-32)*

Pueya jiuujiatesacarijia puetunu Jesu miishanojinijijianaa, Jesuuri na pueya sequeree:

<sup>44</sup> —Maninia nia tojiri casaa cua sequenutaniya niajanianiyani. Majaari na niyajetanu. Janiyari niqutiosaanutaniyani pueya miiniuria janiya taa nojori paniyacuajani.

<sup>45</sup> Majaari na pueya niishiniu quiriquiaa Jesu sequesano. Juhua miriqui sequesanoori quiriquiaa nojoriria. Naacujitij, majaari nojori naata niishiniu quiquiaari. Nojoriiri Jesu nequesotanu puereturiquiaajuhuaaj, casaa nojori na pohuatasano sequenu paniriquiaani.

*Cante jiyaniijajanaa cutarani*

*(Mt 18.1-5; Mr 9.33-37)*

<sup>46</sup> Jesu pueyari juhuacatecara juayonuutariquiaa teyano nojorijinijiniote jiyaniijajanaa quiniutianianiyani. <sup>47</sup> Jesuuri nojori niishiriojosano niishirii. Naaratej, Jesuuri naatujua nujuatereeri na shuriucua. <sup>48</sup> Na pueya sequereeri:

—Cante nio mueya rupueya na cumaquiniuria cucua tiuujia cuno mueya quiniuucuanani, nojuajaari cua rupueyajuhuaaj. Cante cua rupueyani, cua Jiyarona rupueyajaariuhuaaj. Naacujitij, cante tama na cuaqueyajaaja jiyateya pueya shocoteyashijia na quiniuria juhua naatujuani, nojuajaari jiyaniijajanaa quiniutianianiyani puetunu narta Pueyaso muerasujinijiniojuanaa.

*Cante maja pa paracani, nojuajaari pa jiyano*  
(Mr 9.38-40)

<sup>49</sup> Juanri Jesu sequere:

—Niishitiojonanaa, canaari pueyano niquiriucuaani samaruhua tohuatanijiyano quia cumaacata. Canaari na tenujurucuaani nojuaja quiyaquiniucua pajaniyajinijinio.

<sup>50</sup> Jesuuri na riucuaare:

—¿Casaara nia tenujurucuaarinioj? ¿Niaateeri niishiyaquiya, cante pa paraca quiyaquiyani, nojuajaari pa jiyano?

*Jesu nacasusacari Santiago, Juannio*

<sup>51</sup> Quera Jesu tacanu panishacari jiyocuacaanu, nojuajaari juhuacate-cara Jerusalén tiacajiniara quiaaree, juhua jiuujiaaju na puereyaquiniutia.

<sup>52</sup> Jerusalén tiacaacuara nuu cajiniocua Samaria jiyajinia Jesu quishacari na pueyata, noojiaqueya na pueyajinijinio puerateree tamonu tiacajinia nojori masenura tia nojoriicuaajiiri. Naacujitij, na pueyari Samaria jiyajinia quijia shiitianiyojua tiacajinia quiojoquiaari tii Jesu maquejara nojori pajenura.

<sup>53</sup> Cuno Samaria pueya jaara niishiquiaari Jesuuri Jerusalén tiacajiniara quiariquiaa, majaari nojori paniniu quirii Jesu maquenura nojori tiacajinia.

<sup>54</sup> Santiago, Juan niishishacari cuno Samaria pueyari nojori sooriquiaa, nojoriiri cunora Jesu nequesotaree:

—Jiyaniijianaa, ¿quiaate paniya canaa tininiuria mani jiyocuacaanuji, cuno pojori na catijianura, taa tariucuacaanu Pueyaso sequenu panishano caminiujiunia Elías miiquiaaricuaani?

<sup>55</sup> Jesuuri nojoriicua tacateree. Nojori nacasureeri naa nojori saniitionu panishacari cuno Samaria pueya. Naa nojori sequereeri:

—Majaari nia niishiniu cana sohuanute naa nia niishiriojoteyani. Nia niishiri, majaari cua ninu quiquiaari mijiria cua puecoonura pueya. Saaja niquiaari cutaranijia, pueyacuaji cua tacunura.

<sup>56</sup> Na nuhuaji, nojoriiri tamonu shiitianiyojua tiacajinia quiojiyaree tii maquenura.

*Tamasaca pueya quiniu panishacari Jesu pueyara juucua*  
(Mt 8.19-22)

<sup>57</sup> Nojori quiojosacari nucuaco, tamonu pueyanoori Jesu sequequiaari:

—Jiyaniijianaa, quia pueyanora quiniu paniyanijia. Janiyacua quia tara-jareni puetunu tiqiyocua quia rucuanijosacarijianaa.

<sup>58</sup> Jesuuri na riucuaare:

—Quioojuapueeri na raaca jiiitaa cutara. Shuhuari na jesuhua jiiitaa-juhuaj. ¿Saniniuuja Pueyaso Niyanuurijataj? Majaari cua jiiitanu tama cua maquejarajaaja.

<sup>59</sup> Jesuuri tamonu pueyano sequere:

—Cua nuhuajiniara quia quiri.

Nojuajaari saa sequereaja:

—Cuaara Jiyaniijianaa. Cua que cuaara cua niqiiara shaajeerajaara. Janiya jaara na jamoreni, janiyacua na nuhuaji quiata rucuanejore cutarani.

<sup>60</sup> Jesuuri na riucuaare:

—Naajaa, quia tarinitiare. Cua tojitiaashijiacaari juhua macunucua. Naaratej, cuno macunucua cuaara jamoora tama narta macujuaaja. Quia rucuanejore cutara Pueyaso rupaa quia pohuatanura.

<sup>61</sup> Na nuhuaji, tamonu pueyanoori Jesu sequere:

—Jiyaniijianaa, janiya cutara quiata quianu paniyani. Coteenu cua tiajinia quiquiooraj, cua pueya cua niqiniuria cua nuhuajiria.

<sup>62</sup> Jesuuri miriqui na riucuaaree:

—Pueyano jaara na juyaca poonitijiya, jiya jiacataja na jayotanura na cuhuariquia na jeenucuanura, maja cumaati na nijiniara na niqiniu. Na camaru jaara na nijiniara niqiri, sesa naaniutianiyari shuyorocotiuyocuara. Naajuhuaaj, cua pueyano jaara na quiquiojina tacatenu panijiohua quiri, nojuajaari maja maninia Pueyasora poonijiona.

## 10

*Jesu jiyaramiquishacari setenta y dos na pueyajinijinio, Pueyaso rupaa nojori pohuatanura*

<sup>1</sup> Nio nuhuaji, Jesuuri socua setenta y dos pueya saquiriojoquiaari, nojori puetanura nojuaja, puetunu Israel pueya tiacajiniajanaa Pueyaso rupaa nojori pohuatanura. Jesuuri nojori nuhuaji tii quianu paniriquiaajuhuaaj. Puetunu nojorijianaa jiyaramiquiriiri caapiqui, caapiqui. <sup>2</sup> Nojori nuhuajiria, Jesuuri nojori rootaree nio miriqui sequesano:

—Queraatia Pueyaso muerasuranoori quiya, juhua senoosocoriquiano. Saniniuujia, secaja na senonaari quiya. Cunora, cuhuariquia camaru nia secojore, socua senonaa na jiyaramiquiniuria puetunujuanaa na senoosaa-nura. <sup>3</sup> Nia quiojiyare pueyanaa. Nia niishiri, janiyari nia jiyaramiquiya juhua borrego niqiuohuani puereeta sareya tajinia. Pueyaso paraari juhua puereeta sareya. <sup>4</sup> Nia quiojosacari, majaari nia caashoque nia patanu, nia cumaneeca quiquiojuhuaaj, nia sapatunio. Majaari nucuaco nia tarishiniu pueya nia saruhuatasacari. <sup>5</sup> Tamonu tiajinia nia tiuquishacari, coteenu nia sarhuatare na camaru nio sequesano: “Juhujaniya nia quiri, nio tiajinia quiniaanaa”. <sup>6</sup> Cuno tiajinia quiniaa pueya jaara jiyanoojiaca quiri, naa nia sequesacaritij, Pueyasoori nojori miiniutianiya maninia. Nojori jaara juaajiaca quiri saniniuujia, Pueyasoori nojori shuquiritiyaquiniutianiya. <sup>7</sup> Tee nia masesaareni, cuno tiajinia nia jiyojere. Nia miaquere, nia rature nojori niqitiosano nijaniya. Nia pohuatanuucua Pueyaso rupaa nojori niqiuara, nijaniya cuara niqitiosaaria nia panishano. Majaari tamasa tiajinia nia pacunujunu tii nia miaquenura. <sup>8</sup> Nia tiuquijiosacari tamonu tiacajinia, pueyano jaara nia masuure na tiajinia nia quiniuria, niocua niaara nojori rupojosano miaquere. Majaari na soonu. <sup>9</sup> Cusosuhua nia naatanijiore cuno tiacajinia. Pueya niqiuara nia sequere: “Pueyasoori quiarijia nia jiyatenu paniya na muerasu nia quiniuria”. <sup>10</sup> Nia tiuquishacari tamonu tiacajinia, pueya jaara tii nia tojiniu paniyaquiri, niocua cuno tiaca nuucujinia naa nacare pueya niqiuara: <sup>11</sup> “Nia tiacajinijinio jaaquiani, canaari canaa niuhuacaacuaji na majiriutiaani. Cunoori nia niishiniuria, Pueyaso jaara nia saniitiore, majaari canacua na tiutiasaanu quiniutianiya. Pueyasocuajaari nia jiyanooni paniriquiaa juucua, na muerasu nia quiniuria”. <sup>12</sup> Seetanujanaa nia sequeyanijia pueyanaa, Pueyaso saniitionu juuca jaara quiri, cuno tiacajinia quiniaari socua jiyanohua saniitiosaanutaniya Sodoma tiacajinia quiniaa pueyajiniji.

*Jesu piriyojosacari Pueyaso tojtiaashijiaca pueya  
(Mt 11.20-24)*

<sup>13</sup> ¡Corazín tiacajinia quiniaa pueyanaa, mariyata Betsaida tiacajinia quiniaa pueyanaa! Cua tojiri. ¡Niaari jiyanohua saniitiosaanutaniya! ¡Ni-aari socua Pueyaso tojyashijiaca quiya cuno tariucuacaanu Tiro tiacajinia quiniaa pueyajiniji, Sidón tiacajinia quiniaa pueyajinijinio! Cuno pueya jaara Pueyaso cumaacata miishano niqiuquiaari, taa cua miiquianu nia

tiacajiniacuaani, nojori maara ritia noojia tacatoquiaari cutara, sesa nojori miishanojiniji. Cuno tiacajinijinio pueya maara cocuaque toqueya cushiyonuquiaari, nojori taraajesacari sesa nojori miiniuucua. Naajuhuj, nojori maara juaca niojoquiaari nojori nacaacua quera nojori macaashacari, sesa miijiaca nojori quiniuucua. <sup>14</sup> Niaa cutaraari cua cumaacata cua miijosano niquijiaca. Naajaa, majaari nioojia nia tacatonu quiquianu Pueyasocua. Naaratej, Pueyaso saniitionu juucajinia, jniaari socua jiyanojia saniitiosaanutaniya Tiro tiaca pueyajiniji, Sidón tiaca pueyajinijinio! <sup>15</sup> Niajanijarijataj, Capernaum tiacajinia quiniaa pueyanaa, ¿niaateeri jiyaniya niaari jiyocuacaanu quiniaara jiyatesaanutaniya? ¡Maja! ¡Niaari puequeetuuj raama quejoosaanutaniya saniya!

<sup>16</sup> 'Cua pueyanaa, cante nia tojtiajacani, nojoriiri cua tojtiajacajuhuj. Naajuhuj, cante nia ruuretaa cua rupaa nia pohuatasacarini, nojoriiri cua ruuretaajuhuj. Cante cua ruuretaani, nojoriiri cua Jiyarona ruuretaajuhuj.

*Jesu jiyaramiquishano setenta y dos pueya tiuquiiijosacariuhua nocua*

<sup>17</sup> Jesu jiyaramiquishano setenta y dos pueyari Jesuucua tiuquiiioquiaariuhua. Nojoriiri jiyanojia shuquiriaatia quiriqiaa. Jesu sequetureeri:

—¡Jiyaniijanaa, samaruhuari canaa tojtiaacanuni canaa tohuatanijosacari nojori, canaa jiyaniquisacari quia sesa!

<sup>18</sup> Jesuuri nojori sequeree:

—Taaquiriirini. Janiyari Sesaaca niquiquianuni juhua niaco tiyano jiyocuacaanuji. <sup>19</sup> Janiyacuajaari cua cumaaca nia niquitioacanuni, juhujaniya nia rucuanenura sacocua caco, turucuaniniu caconio. Cua cumaacata, niaari puetunu Sesaaca cumaacajanaa shocotanutaniya, juhujaniya panaatia nia rucanejonura, cua rupaa nia pohuatanura. Majaari quenaaja tamonu casaa miiniu quiniutianiya naquiya nijaniya. <sup>20</sup> Naajaa, majaari saaja shuquiriaatia nia quiniu samaruhua tojtianuucua nijaniya. Shuquiriaatia nia quiri cutara nia sesaca naajiotasano quishacari jiyocuacaanu, Pueyaso muerasu sesaca naajiotasaqui.

*Jesu shuquirishacari  
(Mt 11.25-27; 13.16-17)*

<sup>21</sup> Jiyaciritij, Pueyaso Sohuanuuri Jesu shuquiritirii jiyanojia. Cunora, Jesuuri na Que Pueyaso sequeree:

—¡Quia shuquiritiaanjia cua Quena! ¡Quiaacuajaari Jiyaniijajanaa quia jiyocuacaanu, mijiriano! ¡Quiaari maninia miirii! Cua pueyari juhua naatujoori, maja puera niishijiaca. Naajaa, quiaari quiarijia nojori niishitirii quia niishishano, quia jamosano mijiria niishijiacaacua. Jaa, cua Quena, quiaacuajaari naa nojori panitaja.

<sup>22</sup> 'Cua Queeri tari cua niquitioquiaari puetunu na jiiitasanojuanaa, Jiyaniijiarano cua quishacari. Majaari tamonu niishiniu quenaaja cante Pueyaso Nijanuni, saaja cua Que cutaraari cua niishiya. Naajuhuj, majaari tamonu niishiniu cutara cante cua Queni. Saaja janiya cutaraari na niishiyani. Naajuhuj, noo pueyari na niishiya, canapue cua niishitiniu paniya cua Quecujani.

<sup>23</sup> Na nuhuaji, Jesuuri na pueyacu tacateree. Saaja nojori sequereeri:

—Shuquiriaatia quijiaca cutaraari nijaniya, nia niquiniuucua puetunu nia niquishanojuanaa nia rupuenuucua janiya. <sup>24</sup> Seetanujuanaa nia sequerianija, queraatia tariucuacaanu Pueyaso sequesano caminiuujunaa



pueya, mariyata jiyaca jiyaniijianucuanio, nojoriiri nia niquishano niquni-uucua jiaatiaquiaari juucua. Majaari na niqutiuniu quiquiaari. Nojori-iri cuata nia quishacari nia tojishano tojitianuucua jiaatiaquiaari juucua-juhuj. Majaari na tojitiuniu quiquiaari.

*Samaria jiyajinijinio maninia miijajiniji pohuatasano*

<sup>25</sup> Na nuhuaji, Moisés Rootasanojiniji niishitiojona pueyanoori Jesuucua niquniaari nata na pocoojonura. Jesu na pocuatenura sesa juucua, naa na nequesotareeri:

—Niishitiojonanaa, ¿taa cua miiniutianiya pueyaracaanu rishijia cua quiniuriani?

<sup>26</sup> Jesuuri na riucuaaree:

—¿Taate Moisés Rootasanojinia naajiotasanoni? ¿Taa quia niishiriojo-quiaani, quiaa jaara na serojoquiaa?

<sup>27</sup> Moisés Rootasanojiniji niishitiojonaari Jesu riucuaaree:

—Naa sequeyano:

“Quia Jiyaniijia Pueyaso quia paniri puetunu quioojiatajanaa, puetunu quia sohuanutajanaa, puetunu quia cumaacatajanaa, puetunu quia niishi-tiajatajanaanio. Naajuhuj, quiarta pueyano quia paniri taa quia paniyacuaa tama quia cuaqueyajaajani”.

<sup>28</sup> Jesuuri na sequeree:

—Quiaacuajaari maninia riucuaaree. Naa quia miishacaritij, quiaari pueyaracaanu rishijia quiniutianiya.

<sup>29</sup> Moisés Rootasanojiniji niishitiojonaari tama nocuaji tacunu paniriquiaajaaja, maninia quijia na quiniuria Pueyaso niqiuara. Naaratej, naa nequesotarohua Jesuuri:

—¿Canteeri cuarta pueyanoni?

<sup>30</sup> Jesuuri nio pohuatasano na pohuataree na niishitiojonura nojuaja. Naa coteereeri:

—Tamonu parta Judio pueyanoori Jericó tiacajiniara quiariquiaa juucua, Jerusalén tiacajiniji. Nohuasenuujuaca pueyari na quiaree. Puetunu na jiitiasanojuanaa na jaariuutiatureeri, na cushishano toquenio. Na piqui-tiuriiri. Quera macu na tiujiatuqueeri. <sup>31</sup> Na nuhuaji, pueyacuara seco-jonaari cuno nucuaco quiariquiaajaacuhuj. Na niquishacari piquishano narta Judio pueyano mataano nuu shuriuquiocora, na shocortamaa saajaari. <sup>32</sup> Na nuhuaji, Levita pueyanoori cuno nucuaco quiariquiaajuhuj. Na niquishacari narta Judio piquishano pueyano, nojuajaari saaja na shocortamaajuhuj. <sup>33</sup> Na nuhuaji, Samaria jiyajinijinio tahueri cuno nucuaco quiariquiaajuhuj. Na niquishacari parta Judio pueyano mataano, Samaria jiyajinijinio tahueri nocua taraajeree. <sup>34</sup> Na cacataseeri. Nohuasenuujuaca piquiyashiquia matejoree shiyocuataari, vinotanio. Na nuhuaji, na piquiyashiquia morojoreeri. Na nuhuaji, na niataree tama na seru nijinia-jaarijia. Ritia na jiyataaree rucoojuaca tiuquiiijiojua tiajiniaraari. Cuniqiu na cojuatareeri. <sup>35</sup> Tariqui, cuno tahue quianu panishacariuhua, nojuajaari caapiqui cumaneeca pueraree. Ruconaa tia camaru na niqutioreeri. Na sequereeri: “Cucua quia jiyanoori. Nio pueyano quia cojuatare quiria. Quiaa jaara socua quia cumaneeca nocua puecare, janiyacua saniniuuja quia niqutiiorohuanijia cua tacatesacariuhua”.

<sup>36</sup> Nio pohuatanu nuhuaji, Jesuuri cuno pueyano nequesotaree:

—Quiarijiani, ¿taa quia sequeyani? Cuno jiuujianaraca ruconaa pueya-jinijinioni, ¿teyano cuno pojorijinijiniote narta pueyanoocua taraajeja cu-tarani?

<sup>37</sup> Moisés Rootasanojiniji niishitiojona pueyanoori Jesu riucuaaree:  
—Cuno Samaria jiyajinininio tahuecuajani, nocua taraajequiaarini.

Jesuuri na sequeree:

—Taaquiriirini. Quia quiaarohua. Naa pueyacua taraajeja quia quiriji-  
uhuj, taa cuno tahue taraajequiaaricuaani.

### *Jesu quishacari Marta, María tiajinia*

<sup>38</sup> Socua na rucuanesacari, Jesuuri tamonu tiacajinia tiuquiquiaari na pueyata. Cuno tiacajinia na quishacari, tamonu maajiiri na masuquuaari. Naaratej, na tiajinia na tiuquinitiareeri. Cuno maaji sesa quiquiaari Marta.

<sup>39</sup> Martaari tarajanu jiitiaja. Na sesaari quiquiaari María. Maríari Jesu nio-  
huaca shuriuquiumia cajiriquiaa, na tojiniuria Jesu pohuatasano. <sup>40</sup> Marta  
cutaraari poonijioriquiaa queraatia na miishocoriquiano na jiitiasacari.  
Cunora, Martaari Jesuucua catecanoree. Na sequereeri:

—Jiyaniijianaa, ¿majate cucua quia taraajenu? Cua tarajanuuri cua tarini-  
tiaquee niquiriyatujua, puetunu nio poonijosanotajanaa. ¡Quia sequere na  
naacutanura janiya!

<sup>41</sup> Jesuuri saaja na sequeree:

—Martanaa, quioojia quia cajitiri sanaunaa. Quiaari puera quia miishano  
tacaatiaa. <sup>42</sup> Saaja niquiriyatu casaa cutaraari jiyanoohua panishano. María  
cutaraari cuno socua panishano casaa saquiriojoree. Tamonuuri maja na  
naata na tojishano jaariutianu noojiajiniji.

## 11

### *Jesu niishitiosacari na pueya nojori secojonura Pueyaso (Mt 6.9-15; 7.7-11)*

<sup>1</sup> Tamacari, Jesuuri Pueyaso secojoriquiaa tamaqui. Na puecasacari seco-  
jonu, tamonu na pueyajininioori na sequeree:

—Jiyaniijianaa, canaa quia niishitiojore canaa secojonura Pueyaso, taa  
Tiuquinijiona Juan niishitiojoquiaari na pueyacuaani.

<sup>2</sup> Jesuuri nojori sequeree:

—Pueyaso nia secojosacari, naa nia sequere:

“Jiyocuacaanu quijia canaa Quenaa, puetunu pueyajanaa cuaara niishiiria  
quiaari tojetaarucujanaa sesa miyashijia. Pueya cuaara seetanu-  
juanaa quia jiyateera nojori jiyaniijia quia quiniuria. Quia pan-  
ishano cuaara miishiiria mijiria, taa jiyocuacaanu miishiyacuaani.

<sup>3</sup> Canaa quia niqutioriquia canaa miaquesocoriquiano canaa panis-  
hano puetunu juucujanaa. <sup>4</sup> Canaa quia jiyanoori sesa canaa miis-  
hanojiniji, taa canaa jiyanooquiaacuaa sesa canaa miiniaani. Naa-  
juhuaj, canaa quia cojuare, maja sesa canaa miitishaanura”.

<sup>5</sup> Jesuuri naa sequerejuhuaj, socua nojori na niishitiojonura:

—Niaa jaara nia rupuenacua quiaare shiyaqueya, casaa nia masenura  
nojuajiniji, ¿nojuajatucua taa quia sequereni?, quiaa jaara na sequere: “Cua  
rupuenanaa, cua niqutiore jiuujianaraca pan. <sup>6</sup> Tamonu cua cojiniaari  
shusha tiuquiriohua tucuaaanuji, miaajeyari. Shaaquiiri cua sumatuu  
cua miaquetesocoriquiano nojuaja”. <sup>7</sup> ¿Quiaatucua taa miirini quia rupuen-  
a jaara na tiajiniaacumaji quia riucuaare?: “Maja cua taajetenu. Cua tia tiootiu  
tioree tarinijia. Tari cua mueya mataa maquetujinianijia. Maja cua naata  
sanenu cua niqutionura quia panishano”. <sup>8</sup> Jaara naa sequeretej, niaa  
jaara na tia tiootiu piquiniu tarinitiaaquiri, janiyari seetanujuanaa nia  
sequyani, nojuajaari sanenutaniya na niqutionura niajaniya puetunu nia  
panishanojuanaa. Majaari na sanenu quiniutianiya saaja nia rupuenaa na

quiniucua. Sanenutaniyari pueyaracaanu taajeta nia piquishacari na tia tiotiu. <sup>9</sup> Naajuhuj, maja nia tarinitianu Pueyaso nia secojonu. Nojuajaari nia panishano nia niqutionutaniya. Cunora, nia panishano nia pajeriquia. Niocua na riuriatare. Tiotiu nia piquiriquia. Niaara riatasaanutaniyari. <sup>10</sup> Naaratej, cante Pueyaso secojoquiaani, nojuajaari na panishano masenutaniya. Cante na pajejani, na panishano riuriatanutaniyari. Cante tiotiu piquiquiaani, nera riatasaanutaniyari.

<sup>11</sup> ¿Niaatucua nia niyanu niqutiore saajia, neecaruu na masesacari nijaniya? Maja. ¿Niaatucua soconu niqutiore nia niyanu, sapitiaaja na masesacari nijaniya? Maja. <sup>12</sup> ¿Niaatucua turucuaniniu niqutiore nia niyanu, caacaraja riuriuquiu na masesacari nijaniya? Maja. <sup>13</sup> Puetunu nijaniyajanaari sesa miiniu niishijia. Naajaa, niaari maninia casaa niqutionu niishiya nia niqiohua. ¿Taaturucua socua jiyocuaaanu Quijia nia Que Pueyasoni, tojetaarucujanaa sesa miyashijiani? Seetanujanaa capora na quishacari, nojuacuajaari na Sohuanu niqutionu niishijia na muerasu, canapuate na masequiaacuajani.

*Pueya sequesacari Jesu, samaru cumaacaracana  
(Mt 12.22-30; Mr 3.20-27)*

<sup>14</sup> Tamacari, Jesuuri samaru tohuataniriquiaa tamonu pueyanojiniji. Cuno pueyanoori tiquia quiquiaari samaru na jiiiasacari. Samaru jaara tohuataquiaari cuno pueyanojiniji, pocujara quiriohuari. Pueya niquishacari naatej, nocuaji jiuujiatereeri. <sup>15</sup> Tamasaca pueyari saa sequesquiaarijia:

—Cuno pueyanoori samaruhua tohuatanijiya samaruhua jiyaniijia Satanás cumaacata.

<sup>16</sup> Tamasaca pueyari Jesu saniniujiuniu paniriquiaa. Naaratej, nojoriiri na sequeturee na cumaacata na miiniuria casaa, na niqitiniuria nojori, nojori niishiniuria nojuajaari seetanujanaa Pueyasojinijinio. <sup>17</sup> Jesuuri nojori niishiriojosano niishiriquiaa. Nocuaji nojori sequereeri:

—Tamonu jiyajinia, cuno pueya jaara miaquetojija tama nojori pueyatajaaja, nojoriiri maja na naata na paraa nujuatanu, na paraa jaara nocua tiuquitiare raquiritano nojori quishacari. Naajuhuj, niquiriyatu tiajinia quinia jaara tama nojorijiaaja juayonuujutaquiaa, nojoriiri maja na naata jatiqui quiniu. <sup>18</sup> Naajuhuj, niaari cua sequeriquiaa, janiyana samaruhua tohuatanijiya Satanás cumaacatani. Jaara naa quirijitij, ¿Satanástucua taa pueyaracaanu quiri jiyaniijiani, nojuaja jaara tama na samaruhuajaaja tohuatanijiya tama na cumaacatajaaja? <sup>19</sup> Naajuhuj, janiya jaara samaruhua tohuatanijiya Satanás cumaacatani, taa nia sequeyacuajani, ¿nia niishitiojosano pueyarihuaj, cana cumaacata nojori tohuatanijioquiaa samarhuani? ¿Taa nia sequeyani? ¿Satanás cumaacataree? Majaruhua. Naacuajitij, tama nijaniyajaaja nia niishiri, niaari jiyajeneya. <sup>20</sup> Naa Pueyaso cumaacata cua tohuatanijosacari samarhuatej, naacuajiti nia niishiri, Pueyasoori tari nia masuya seetanujanaa na muerasu nia quiniuria.

<sup>21</sup> Niojinia nia niishiriojorejuhuj: cumueeca pueyano jaara na tia cojuua queraatia na miaquejotaja casaata, majaari tamonu naata na jiiiasano casami jaariutianu. <sup>22</sup> Saniniujija, socua cumueeca pueyano jaara nocua tiuquiri, na miaquejotaja casaa jaariutiaari, cuno, nocua na tiushano juucuanu. Na nuhuaji, na jaariutiasano casami paari, na pueya na serotacoriquiano. Naajuhuj, janiyari Satanás jiiiasano jaariutiajani.

<sup>23</sup> 'Cante cua jiyano quiyaquiiani, nojuajaari cua paraca. Cante cua naacutaquiya pueya rerecojonura Pueyasorani, nojoriiri saaja pueya cocuataa Pueyasocuaaji. Naaratej, jacaria nia niishiriojore casaa nia niishiriojiya janiyajinijini.

*Samaruhuari riujiuuujia na quiquiojiniohua*  
(Mt 12.43-45)

<sup>24</sup> 'Samaru jaara tohuatare pueyanojiniji, joojuashiquio rucuaneyiyari na samaatejara na pajenura. Jaara na riuriataaquiri, niishiriojiyari: "Cua quiquiojinia riujiuyarohuaraqui teje cua tohuatacanucujani". <sup>25</sup> Samaru tiuquishacariuhua cuno pueyanocua, na riuriatasuhuari shaaco, juhua maninia netoonujusano tia, maninia jeenucuasanojuhuaj. <sup>26</sup> Naaratej, cuno samaruuri socua sesa miijiaca nojuajiniji siete narta samaruhua riquiohua nata na quiniuria. Puetunu nojorijianaari cuno pueyanojinia tiuquitiasuhua. Naacuajitij, cuno pueyanoori socua sesara jiyacateja, tarijia na quiniujiniji.

*Seetanujuanaa shuquiriaatia quiniu cutara*

<sup>27</sup> Jesu pohuatasacari nio, tamonu maajiiri jiyacari pueya tajiniji naacaree:

—iShuquiriaatia quiija cutaraari cuno maaji cante quia raquiaarini, cante quia canashitiquiaarini!

<sup>28</sup> Jesuuri saaja na riucuaree:

—Socua shuquiriaatia quiija saniya sajara cante Pueyaso rupaa tojjijiani, cante Pueyaso panishano miiquiaajaaniuhuj.

*Sesa pueyari saaja Pueyaso cumaacata miishano niquiniu panijiaca*  
(Mt 12.38-42; Mr 8.12)

<sup>29</sup> Socua queraatia pueyari Jesuucua rerejoriquiaa puetunu na shocuaqueyajanaa. Jesuuri juhuacatecara naa pohuataree nojori niquiara:

—Nio pa quishacari pueyari sesa miijiaca. Nojoriiri cua sequequiaa, jiyajeneta casaa cua miiniuria Pueyaso cumaacata, nojori niishiniuria janiyari Pueyaso Jiyarosaroni. Seetanujuanaa majaari socua cua niqitini quiniutianiya nojori, cua cumaacata cua miishano. Nojoriiri saaja niquiniutianiya cutara taa cua miishaanutaniyani, naatej taa supuetana Jonás miishaaquiaaricuaani. <sup>30</sup> Jonás miishaanuuri nocuaji jiuujiatesano quiquiaari cutara. Naacuajitij, Nínive tiacajinia quiniaa pueyari niishiquiaari Jonásri Pueyaso jiyarosano quiquiaari. Janiyari naa miishaanutaniyajaaniuhuj, nio pa quishacari pueya niishiniuria janiyari Pueyaso Jiyarosaroni. <sup>31</sup> Cua supuetana Salomón jaara Israel pueya jiyaniijia quiquiaari, jiyacari tamonu maajiiri pananu shuucuaji jiyajinia jiyaniijia quiquiaari. Nojuajaari jiyanohua tucuacaanuji niquiaari narta jiyaniijia Salomón tojiniucua, jiyanohua niishijia Salomón quishacari. Jiya puequesacari Pueyaso saniniujiushacari pueya, cuno maajiiri jiyacari sanenutaniya nio pa quishacari pueyacuara na tonujunura, nojori ruuretanuucua socua Niishijiajanaa cutara Salomónjiniji. Cuno Niishijiaari niya nia tajinia quiyacuaja. Janiyacuajaari nojuajani. <sup>32</sup> Naajuhuj, cuno tariucuacaanu Nínive tiacajinia quiniaa pueyari saneecuatunutaniya Pueyaso nequesoreesacari nio pa quishacari pueya. Nojoriiri nio pa quishacari pueyacuara tonujunutaniyajuhuj, nojori tacatoyaquiniucua nojori jiuujia sesa nojori miishanojiniji, Pueyaso rupaa nojori tojjiaquiniucua. Nínive pueya cutaraari noojia tacatoquiaari sesa nojori miishanojiniji, Pueyaso sequenu panishano caminiujiunia Jonás jaara

Pueyaso rupaa pohuataquiaari nojori niquiara. Pueyaso sequenu panishano caminiujiunia quiarjia nia tajinia quiyani, nojuajaari socua cutara Jonásjiniji. Janiyacuajaari nojuajani.

*Pueya jiuujia cuhuatanajiniji pohuatasano*  
(Mt 5.15; 6.22-23)

<sup>33</sup> 'Pueya jaara samaritiu noshitiri, majaari na jamotanu. Majaari na niatanu conatu cariquiaco. Maninia cutaraari jiyocuacaanu na morotanu, tiaco tiuquitiana cuhuatariquiano. <sup>34</sup> Pa namijiaari juhua pa cuaqueya cuhuatanajuhua. Naacuajitij, paa jaara Pueyaso casaacua jiaatiaja quirini, paari cuhuashiqui quiya puetunujuanaani. Saniniuujia, pa namijia jaara sesa casaa niquniuucua jiaatiaja quiri, paari ninishiqui quiya puetunujuanaani. <sup>35</sup> Tama nia cuaqueyajaaja nia cojuare, niaa mariqui nioojia cuhuatana maquishajareeri. <sup>36</sup> Niaa jaara puetunujuanaa juhua cuhuashiqui quiya, sesa casaacua jiaatiaashijia nia quishacari, niocua maninia niqijiara quiri puetunujuanaa, juhua samaritiu cuhuatasacari niajaniya. Naacuajitij, niocua niishijia quiri, maninia miijia nia quiniuria.

*Jesu nacasusacari Fariseocuaca, Moisés Rootasanojiniji niishitiojonaanio*  
(Mt 23.1-36; Mr 12.38-40; Lc 20.45-47)

<sup>37</sup> Jesu puecasacari pocuanu, tamonu Fariseo pueyanoori na masuquiaari na tiajinia na miaquenura. Jesuuri na tiajinia quiaquiaari. Na tiuquishacari, miaquejajinia cajishijianaari. <sup>38</sup> Fariseo pueyanoori jiuujiatequiaari na niquishacari Jesuuri shuquitioo tari cajiriquiaa miaquenura. Judiocuacaari jiyanjia, nojori rucojosacari tamasaca pueya tajinia, tamasaca sesa miishanoori na naata nojoriicua pacunu. Nocuaji nojoriiri shuquitianu niishijia, tiajinia nojori tiuquishacariuhua. <sup>39</sup> Naa cuno Fariseo pueyano niishiriojosacaritij, Jesuuri saa na sequerejaa:

—Niajaniya Fariseocuacanaa, niaari juhua noo pueya, canapuate saaja na ratujua cuaqueya jeequejoquiaacuajani, saaja na miacojua cuaqueyano. Majaari na jiniacuma na jeequenu. Niaari naajuhua. Niaari sapuenu maninia pueya niquishano. Saniniuujia nioojiacaari jyanohua sesa quiya, casami nia masejonuucua nia nohuasejonuta, puetunu sesa nia miiniutijanaajuhua. <sup>40</sup> Mosanucanaa, ¿niaateeri niishiyaquiya, pa cuaqueya Shipininaari poojia shipiniquiaarijuhuaj? Naaratej, nioojia nia jeequere cutara, maja saaja nia cuaqueya. <sup>41</sup> Niaa jaara puetunu nioojiajinia nia jiti-asanojuanaa jiyatere Pueyasora na quiniuria, niaa maara juhua jeequesano quiri puetunujuanaa.

<sup>42</sup> 'Niaari taraatia miishaariquiano, Fariseocuacanaa! Niaari miaquesano jaamasucua serojoquiaa jacaria diez jaamasucua, puetunu cien jaamasucuaajiniujiojuanaa, Pueyasora nia niquitiosocoriquiano. Cuno jaamasucuaari culantro, menta, socua tamonu jaamasucuaniojuanio. Niaari naa maninia miiquiaa taa Moisés niishitiojoquiaaricuajani. Naajaa, Moisésri niishitiojoquiaarijuhua maninia pa miiniuria parta pueya, Pueyaso pa paniniuriajuhuaj. Majaari cuno na sequesano nia miiniu quiquiaa. Puetunu na sequesanojuanaa tojijaca nia quiri. Majaari saaja jaamasucua niquitiojuuaca nia quiniu.

<sup>43</sup> 'Niaari taraatia miishaariquiano, Fariseocuacanaa! Niaari jyaniijianucua shuriucua cajiniuucua jiaatiaquiaa, Pueyaso secojojua tiajinia nia quishacari, juhua cutara pueya nia quiniuria pueya niquiara. Naajuhua, niaari pueya paniquiaa nojori saruhuatana niajaniya juhua jyaniijianucua, nia rucuanijosacari tiacajinia.

<sup>44</sup> ¡Niaari taraatia miishaariquiano! Niaacuaajaari juhua niquishoo jamaca. Pueyari juhuajaniya na caco rucooquiaa na niishiyaquishacari. Naajuhuaaj, pueyari juhuajaniya nia rupuequiaa, nojori niishiyaquishacari nioojaari jiyanohua sesa, juhua pueyano mocua jamajinia.

<sup>45</sup> Jiyacaritij, tamonu Moisés Rootasanojiniji niishitiojonaari Jesu sequeeree:

—¡Niishitiojonanaa, naa quia sequesacari Fariseocuacatej, quiaari canaa sequeyajuhuaaj!

<sup>46</sup> Jesuuri na riucuaaree:

—Taaquiriirinij. ¡Niaari taraatia miishaariquianojuhuaaj, Moisés Rootasanojiniji niishitiojonaanaa! Puetunu nia rootasanojuanaari juhua jiyanohua niiquia casaa nitiasocoriquiano. Majaari nia tojitiajaca pueya nia naacunu quiquiaa quenaaja nia juaashiquia sacasaruta, cuno niiquia casaa nitiasaanura. Naacujitij, pueyari maja na naata rejeretanu nia niishitiojosano.

<sup>47</sup> ¡Niaari taraatia miishaariquiano! Niaari macunucua niojotajara shipinijioquiaa shanohuara, tariucuacaanu pueyara Pueyaso sequesano caminiujiuniaa nucuhuacuaji, teyano nia supuetanaa puecooquiaaricujani. <sup>48</sup> Naacujitij, canaari niishiyani, niaari nia supuetanaa miishano shuquiritiaa, nia cojuasacari nojori puecoosano nucuhua.

<sup>49</sup> Naacujitij, Pueyasoori na niishiniutia sequequiaari:

“Janiyari cua sequenu panishano caminiujiuniaa jiyaramiquiniutianiya Israel pueyacuani, cua rupaa niishitiojonaanio. Israel pueyari noojiaqueya puecoonutaniya. Tamasacaari naquiya miishaanutaniyajuhaaj”.

<sup>50</sup> Cunora, Pueyasoori nio pa quishacari pueya naminiutianiya puetunu na sequenu panishano caminiujiuniaa nanacaacujanaa, canapuate nio jiya coteejajiniji puecoosaaquiaaricujani. <sup>51</sup> Coteenujuanaa mosaaquiaariiri Abel. Na nuhuaji, queraatia Pueyaso sequesano caminiujiuniaari puecoosaaquiaari. Na nuhuaji, Zacaríasri socua jaatesaaquiaari monujuhuaaj. Nia supuetanaari na moquiaari Pueyaso Secojojua tiajinia, Pueyaso Shuriucua Quiquio tacoji, Pueyasoocuara catijiasaqui shuriucua. Seetanujuanaa nia sequeyanijia, nio pa quishacari pueyari namishaanutaniya puetunu nojori puecoosaanuucujanaa.

<sup>52</sup> ¡Niaari taraatia miishaariquiano, Moisés Rootasanojiniji niishitiojonaanaa! Niaari najuhuana Pueyaso Rupaa jiitiaa. Majaari nia tojinu paniniu, Pueyaso jiyanooshano pueya nia quiniuria. Saniniuujia, tamasa jaara Pueyaso Rupaa niishiniu paniri, Pueyaso muerasu nojori quiniuria, majaari nojori nia niishitiojonu paniniu quiquiaa.

<sup>53</sup> Jesu jaara nio sequequiaari, Moisés Rootasanojiniji niishitiojonaa, mariyata Fariseocuacaari jiyanohua juaaquioree. Jiyanohua nojori juaaquiiosacari, nojoriiri Jesu nequesoreenu coteeree queraatia. Nojoriiri Jesu pocuatenu paniriquiaa sesa juucua. <sup>54</sup> Nojoriiri nocuara tonujunu paniriquiaa juucua, jaara sesa quiri na sequesano.

## 12

*Jesu niishitiojosano, maja sapuenu maninia pueyano niquishano pa quiniuria*

<sup>1</sup> Jiyacaritij, jiyanohua jiyanohua queraatia pueyari Jesuucua rerejoree. Tama nojorijiaaritia rapijotooriquiaa puera nojori rerequejosacari. Jiyacaritij, Jesuuri saa na pueyaja sequenu coteeree. Naa nojori sequereeri:



—Tama nia cuaqueyajaaja nia cojuare Fariseocuaca pan poreetajaacuaaji. Nojori niishitiojosanoori juhua pan poreetaja. Majaari na jataniniu pueya, sesa nojori miiniuujiniji. Nojoriiri sapuenu maninia miijiaca pueya niquishano tamasa niquiara. Saniniuujia, nojori jiuujiaari saa sesaja pueyaracaanu. <sup>2</sup> Nia niishiri, puetunu jiyasohuaja miishanojuanaari niishishaanutaniya. Puetunu jamosano casaajanaari niquishaanutaniya-juhuj. <sup>3</sup> Puetunu nia sequesanojuanaa ninishiquini, cuhuashiqui camini-ujishaanutaniyari. Naajuhuj, nia sasacojosano tama nia sohuacamara-jaajani, cunoori jiyocuacaanu tia nijiniji nacatasaanutaniya puetunu pueya tojishocoriquianojuanaa.

*Cante puereshiya cutarani*  
(Mt 10.26-31)

<sup>4</sup> Cua rupuenaanaa, majaari nia puerenu canapuate nareja pa cuaqueya mojuani. Nojoriiri maja na naata socua sesa na miiniu pajaniya, paa jaara tariucua macu quiyani. <sup>5</sup> Seetanujuanaa nia sequereeraj, cante puereshiya cutarani. Noo nia puerere cutara, cante cumaacaraca cutara na jatanura ni-ajaniya mani quiquiojiniani, na cusojuanu nuhuaji nijaniya. Saaja nojuaja nia puerere cutara.

<sup>6</sup> Cinco shuhuari saaja caapiqui cumaneecaniyojuata masesano. Pueyara, cunoori najuhuanaj. Naajaa, majaari Pueyaso niyajetanu cuno shuhua jaara puecoosaare. Nojuajaari na niishiya cutara. <sup>7</sup> Naajuhuj, nia muesuuri puetunu serojosanojuanaa. Pueyasoori na niishiya. Naaratej, maja nia puerenu. Niaari socua jiyanohua Pueyaso panishano cutara queraatia na cojuasano shuhujiniji.

*Tamasaca niquiara pa sequere paari Jesucristo pueyani*  
(Mt 10.32-33; 12.32; 10.19-20)

<sup>8</sup> Cua tojitiare. Cante tamasa niquiara sequejani: “Janiya Jesucristo pueyanoni”, naajuhuj, janiyari cua Que Pueyaso seya niquiara sequenutaniyani: “Nojuaja cua pueyano”. <sup>9</sup> Cante saniniuujia tamasa pueya niquiara seetaa janiyajinijini, cua pueyano na quishacarini, janiyari cua Que Pueyaso seya niquiara na tamacanutaniyajuhuj.

<sup>10</sup> Cante cua sesacareeni, nojuaja na naata jiyanooshaanu. Saniniuujia, maja cutaraari na naata jiyanooshaanu cante Pueyaso Sohuanu sesacareeni.

<sup>11</sup> Cua muerasu nia quiniuucua, niaari Pueyaso secojojua tiajiniaqueya jiyatasaanutaniya, nequesoreenaa niquiara, mijiria jiyaniijianucua niquiaranio. Nojori nequesoresacari nijaniya, majaari nia niishiriojonu taa nia riucuanutaniyanoj, casaa nia sequenutaniyajaaniuhuj. <sup>12</sup> Nia riucuanu panishacari, Pueyaso Sohuanuuri jiyacari nia niishitiojonutaniya taa nojori nia riucuanutaniyani.

*Puereetaari casamiriaca pa quishacari*

<sup>13</sup> Tamonu pueyanoori pueya tajiniji naa Jesu sequequiaari:

—Niishitiojonanaa, cua tarajanu quia sequere na niquisitionura janiya canaa shipininio jiiitasanojiniji, taa canaa shipininio sequequiaari canaacuajani, samini na quishacarijia.

<sup>14</sup> Jesuuri saaja na riucuarree:

—Pueyanonaa, ¿janiyateeri pueya nequesoreenara jiyatesaaquiaarini, cua serotanura nijaniya nia shipininio casamini?

<sup>15</sup> Jesuuri naa nojori sequequiaarijuhuaj:

—Jiyanohua nia cojuare tama nia cuaqueyajaaja, maja casamiicua jiaa-tiajaca nia quiniuria. Pa naata shuquiriaatia quiniu casamiiju. Queraatia

casamiiri maja na naata seetanujuanaa shuquiriaatia quijiacara na jiyatenu pajaniya.

<sup>16</sup> Na nuhuaji, Jesuuri pueya niishitioree nio miriqui pohuatasanota. Naa sequereeri:

—Tamonu pueyanoori quiquiaari, jiyanoohua casamiriaca. Na cuhuariquiajinia na natoosanoori jiyanoohua muetuquiaari. Naacuajitij, queraatia miaquesocoriquiano jiiitiaquiaariiri na cuhuariquiajiniji na carojotasano. <sup>17</sup> Tama sequereejariija: “¿Taa cua miiniutianiyani? Cua tiajosano cua racatajara cua carojotasanoori puetunujuanaa tari mishaja quiya. ¿Tee cua racatanutaniya shusha cua carojotasanoorinitioj? <sup>18</sup> ¡Aj, niishiuiinijia! Coteenu cua tiajosano cua casamiicuaji niyaroorohuaraquij. Janiyari socua puereetucocuara tiajonutaniyani. Janiyari cuniqui mishinijionutaniya puetunu cua carojotasano cua cuhuariquiajinijiniojuanaani, puetunu cua jiiitasano casamijianaanio. <sup>19</sup> Na nuhuaji, janiyari tama cua cuaqueyajaaja sequenutaniyani: ‘Pueyanonaa, quiarijia cutara juhuajaniya quia quiri. Quiaari queraatia casamiriaca cuaja, queraatia marijara. Quiaari queraatia quia miaquesocoriquiano jiiitiaacuaja. Quiarijia cutara quia samaatere. Quia miaquere. Quia rature. Tama quia cuaqueyajaaja quia shuquiritiri’ ”. <sup>20</sup> Cuno niucuaja, Pueyasoori na sequequiaari: “Moseecanaa, quiaari quiarijia macu juhuaquenutaniya. ¿Canteeri puetunu quia jamuesano casamijianaa jiiitianutaniya quia nuhuajini? ¿Canra na quiniutianiyarini?” <sup>21</sup> Naa miishaanutaniyari puetunu pueyajanaa, cante saaja tama nerajaaja reratequiaa casamini. Cuno, jamuejaca casamiriaca pueyani, nojoriiri seetanujuanaa casamijiuniucua Pueyasora.

*Pueyasoori na muerasu cojuaja maninia*  
(Mt 6.25-34)

<sup>22</sup> Na nuhuaji, Jesuuri na saquiriojosano pueya sequequiaari:

—Naaratej nia sequeyanijia pueyanaa, majaari nia tacaaniu casaa nia miaquenutaniyani, casaa nia cushiniutianiyani. <sup>23</sup> Pueyaso jaara pa shipiniquiaari saminio pa quiniuria, majaari jiyajeneta nera na rishitiniuria pajaniyajuhuj. Naajaariuhuj, nojuaja jaara pa cuaqueya shipiniquiaari, majaari jiyajeneta na cushitiniuria pajaniyajuhuj. <sup>24</sup> Riquiacujua nia niquiriquia. Majaari nojori natojonu. Majaari nojori carojotanu na racatasocoriquiano, na nuhuaji na miojosocoriquiano. Naajuhuj, majaari nojori jiiitianu na miojosano na racataja. Majaari tiaca nojori jiiitianu na carojotasano nojori racatajarajuhuj. Naajaa, Pueyasoori nojori miojotequiaa. Niaa cutaraari socua jiyanoohua Pueyaso panishano cuno riquiacuhujini. <sup>25</sup> Naajuhuj, nia nequesotaanijia, niaa jaara socua tamonu juucara rishiniu paniriquia quera nia shaajenu panishacari, ¿nia naatateeri socua rishiniu, jiyanoohua nia tacaaniutia? Maja nia naata. <sup>26</sup> Naaratej, nia tacaaniu jaara najuhuaa quiya socua shiitaniyojua nia rishiniuria, ¿niaatucua casaara tacaari tamonu casaacuani?

<sup>27</sup> 'Natau shuucuaca nia niquishurij, taa nojori corequetaani. Majaari nojori poonijionu. Majaari na cusupuenuunujuhuj. Supuetana jiyaniijia Salomónri jiyanoohua shanohua toqueyaraca quiquiaari. Cuno jiyanoohua shanohua niquishano na cushishano toqueni, naajaa, majaari na shocotanu cuno natau shuucuaca. <sup>28</sup> Pueyasoori cuno natau shuucuaca shipiniquiaari rupaquijia naa shanohua niquishocoriquianotej. Jaara sorere, tariqui catijashiya saniniuurijia pan majeetetajara. Pueyaso jaara

naa maniniushitiyacuaa shuucuatej, ¿majateeri na naata cushitiniu nia-janiyajuhuaaj, jatarinitiaja Pueyasooocua tiujujacanaa? <sup>29</sup> Naaratej, nia sequeyanijia, maja nia tacaaniutia nia pajenu casaa nia miaquenutaniyani, casaa nia ratunutaniyani. <sup>30</sup> Pueyaso niishiyashijiaca pueyari pueyara-caanu na panishano casaacua tacaquiaa. Niajaniya cutaraari Queraca. Nojuacuajaari tari niishiya puetunu nia panishanojuanaa. <sup>31</sup> Naaratej, nia niishiriojore Pueyaso panishano nia miiniuria. Nojuajaari saniniuujia nia niqutionutaniya puetunu nia panishanojuanaa.

*Nia casami nia racatare Pueyaso shuriucua  
(Mt 6.19-21)*

<sup>32</sup> 'Maja nia puerenu, cua muerasuniyojuanaa. Niaari secajaniyojua. Naajaa, cua Queeri nia panijia. Capora na quiniuucua, jnia niqutionutaniya puetunu na jiiitasanojuanaari! <sup>33</sup> Nia casami nia niqutiojore cumaneecara. Na nuhuaji, cuno cumaneeca nia niqutiojore nareja casamijiu-niucua pueya. Naa nia miishacaritij, niaari jiyocuacaanu racataa nia jiiitasano. Tee Pueyaso racataa nareja nera nia niqitiosanocuajani, cuniqui, nia cumaneeca quiquioori maja na piquiniu. Niaari tii nia racatasano jiiitianutaniya pueyaracaanu. Majaari nohuasejojua na naata nocua tiuquiniu na nohuasenura. Naajuhuaaj, surequeyari maja na naata miaquenu nia casami tii. <sup>34</sup> Nia casami jaara naa racatasano quiya jiyocuacaanu Pueyaso shuriucuatej, niaari saaja Pueyasooocua niishiriojonutaniya, tee nia casami racatasano quiyacuaani.

*Jeenucuasano nia quiri nia Jiyaniijiaacuaji*

<sup>35</sup> 'Juhuata jeenucuasano nia quiri pueyaracaanu, nia sashishacari nia Jiyaniijia, taa tiajiniaaco maninia seyacuaani. Nojori sashishacari na jiyaniijia, nojoriiri na toqueya cushiyono quiya tari, na samaritiu noshitishanojuhuaj. <sup>36</sup> Naa jeenucuasano nia quiriujuhuaaj, juhua cuno seyaja. Nojoriiri na jiyaniijia sashiya na caminiujiniji na tiuquishacariuhua. Nojuaja jaara tohuateya piquishuhua, nojoriiri ritia nocuaji riatanutaniya tia tohuateya. <sup>37</sup> Shuquiriaatia quijiaca cutaraari cuno seya, canapuate na jiyaniijiaacuaji suteyajaani, na jiyaniijia cuaara tiuquiriohuajaatijia. Seetanujuanaa nia sequeyanijia, nojori jiyaniijiaari nojori cajitijionutaniya miaquejajinia. Na toque maniniuqui jocuanutaniyari na mianuutenura nojori. <sup>38</sup> Nojori jiyaniijia jaara tiuquiriohua shiyaqueya, juhuaquenu panishacari, naajaa, shuquiriaatia quijiaca quiniutianiyari cuno seya, nojori jaara suteyajaa tia tohuateya riatariquiano nojori jiyaniijiaacuaji. <sup>39</sup> Nio nia niishirijuhuaaj, tia camaru jaara niishiri taacari nohuasejojua niniutianiyani, nojuaja maara sutere na tia cojuanura, maja nohuasejojua tiuquiniuria na casami na nohuasenura. <sup>40</sup> Naajuhuaaj, jeenucuasano nia quiri pueyanaa, juhua cuno sutejaca seyaja. Naa jaara jiyaniya juhuanajuaja maja cua tiuquiniu quiniu-tianiuha, janiyari jiyacari nia jiyajenetanutaniyani.

*Jesu pohuatasano maninia serujiniji, sesa serujinijinio  
(Mt 24.45-51)*

<sup>41</sup> Jiyacaritij, Pedroori Jesu nequesotaree:  
—Jiyaniijianaa, ¿quiaate nio pohuataree saa canaaraja, puetunu pueyara-janaa soj?

<sup>42</sup> Jiyaniijiaari na riucuaaree:  
—Tamonu seru jaara maninia seru quiri, nocua tiuushano, niishijajuhuaaj, na jiyaniijiaari cuno na seru jiyatenutaniya narta seya jiiitariquiano na niti na niyacari. Nojori jiyaniijia niyacari, cuno seeratasano seruuri narta

seya mianuutenutaniya maninia, taa nojori jiyaniijiajanaa mianuutequiaa nojoricuaani. <sup>43</sup> Cuno seruuri shuquiriaatia quiniutianiya na jiyaniijia jaara na riuriatasuhua naa maninia miyanojua, taa na sequesaaquiaari na miiniuriacuajani. <sup>44</sup> Seetanujuanaa nia sequeyanijia, na jiyaniijiaari cuno maninia seru jiyatenutaniya puetunu na jiitiasano casamijianaa cojuana na quiniuria. <sup>45</sup> Saniniuujia, cuno seru jaara sesa miiniuria niishiriojore, na jiyanishacari na jiyaniijiaari jyanohua tarishiniutianiya, nojuajaari niishiriojonutaniya nojuaja na naata miiniu na panishano. Cunora, nojuajaari narta seya majoonu coteenutaniya, seya maajipohuanio. Naajuhuaaj nojuajaari saaja miaquejonutaniya. Pueyaracaanu rarujunutaniyari. Mashaasequejonutaniyajaariuhuaaj. <sup>46</sup> Na jyanishacari na jiyaniijia juhuanajuaja maja na tiuquiniu quiniutianihua, jiyacaritij, cuno juucaja, na jiyaniijiaari tiuquiniutianihua canashiyaquiji. Naa cuno seru miiniuucua sesatej, na jiyaniijiaari jyanohua na saniitionutaniya. Na jatanutaniyari Pueyaso tojiyashijiaca pueyata na saniitiosocoriquiano.

<sup>47</sup> Tamonu jiyaniijia jaara na seru rootare maninia, taa nojuaja miiniutianiyani, cuno seru jaara jeenucuaaquiri na jiyaniijiaacuaji, mariyata jaara miyaquiri taa na jiyaniijia sequequiaari na nuhuajiriacuajani, nojuajaari jyanohua majacusaanutaniya cutara. <sup>48</sup> Saniniuujia, tamonu seru jaara sesa miiri na niishiyaquiniuucua na jiyaniijia panishano na miiniuria, nojuajaari saaja secaja majacusaanutaniya. Naajuhuaaj, cante queraatia niquitiosaareeni, cuno serujinijiiri queraatia masenu panishaanutaniya. Naajuhuaaj, cante jiyatesaaree queraatia jiitiana na quiniuriani, na jiyaniijiaari nocua tiuuniutianiya socua jyanohua maninia miijia na quiniuria.

*Jesuucua tiuujiaaari narta pueya panishoo*

*(Mt 10.34-36)*

<sup>49</sup> Mijiria niquiaarinijia, juhua mani cua noshitiniuria pueya tajinia. ¡Seetanujuanaa na noshitiriquia tarinij! Cua rupaari juhua mani quiniutianiya. <sup>50</sup> Coteenu, janiyari jyanohua saniniuujishaanutaniya juhua manitiani. Nocuaji coojiaari tacaya janiya jaara naa miishaarejaatijia. Seetanujuanaa na jiyateriquia tariucua tucuateenonij. <sup>51</sup> ¿Niaateeri jiyaniya janiyari niquiaarini mijiria quinia quiniuria juhujaniya? ¡Maja! Seetanujuanaa nia sequeyanijia, janiyari niquiaarini pueya cua raquiriojotanura. <sup>52</sup> Naaratej, pueyari quiarjia juayonuutanu coteenutaniya. Pueyano jaara necocuata jiitiare jiuujianaraca niquiohua na tiajinia, jiuujianaraca nojorijinijinio jaara cucua tiuuri, cuno caapiqui cucua tiuyashijiacaari saniniuujia nojori juaajiaca quiniutianiya. Naa noojiaqueya pueyajinijinio tiuuniuucua cucuatej, queraatia pueyari naa tama tacaresetanutaniyajaacujua. Naacuajitij, tamonu tiajinia, querajaa pueyari caapiquiriyatu cucua tiuujiaa juaajiaca quiniutianiya. <sup>53</sup> Pueyari necohua paracaajia quiniutianiya, necohua tiushacari cucua. Naajuhuaaj, necohuari na que paracaajia quiniutianiya na que tiushacari cucua. Naajuhuaaj, maajipohuari necojori paracaajia quiniutianiya necojori tiushacari cucua. Naajuhuaaj, necojoriiri na nucua paracaajia quiniutianiya na nucua tiushacari cucua. Naajuhuaaj, maajipohuari necohua niquiocohua paracaajia quiniutianiya, necohua niquiocohua quiniuucua cucua tiuujiaa. Naajuhuaaj, pueya niquiocohuari na quinia paracaajia quiniutianiyajuhuaaj, cucua tiuujiaa na quinia quiniuucua.

*Pueya cuaara niishiiria quiarjia Pueyaso miishanojiniji, casaa na niishitiniu paniyani*

*(Mt 16.1-4; Mr 8.11-13)*

<sup>54</sup> Jesuuri naa sequequiaari pueyajuhuaaj:

—Niaa jaara niqutioocua niqiquiaa pananu tiuquishocora, niaari sequequiaa: “Maruqui niniutianiya”. Seetanujuanaa naa quiquiaari.<sup>55</sup> Naajuhuj, paratu jaara piyarojoquiaa pananu shuucuj, niaari sequequiaa: “Tacareejonuqui quiniutianiya”. Naa quiquiaari.<sup>56</sup> Pueyanaa, ¿niaateeri seetanujuanaa niishijiaca? Niaari maninia niishiquiaa jiya cajiocua nia niquishano, nio jiyajinia nia niquishanonio. Saniniuujia, nia niquishacari quiarjia Pueyaso miishano nia niquiara, majaari cuno nia niishiniu, casaa na sequenu paniani. Naaratej, majaari seetanujuanaa niishijiaca niajaniya.

*Niaacuara tonujunata nia jeecatoore*

*(Mt 5.25-26)*

<sup>57</sup> Niaacuajaari niishiya, sesa miijiacaari saniitiosanutaniya. Naaratej, tama niajanijajaaja nia niishiriojore, casaate maninia nia miiniuriani.<sup>58</sup> Tamonu pueyano jaara quiocuara tonujure quia sesonuucua na casaa, quia saniri juhuata nata pocoojonu maninia, na jaatucusacari quiajaniya nequesoreena pueyanocua. Quia sequerenoj casaa quia miiniutianiya nerani, na jiyanooniuria quiajaniya. Quiaa jaara jeecatoyaquiri nata, nojuajaari quiocuara saquiriojotanutaniya nequesoreena pueyano. Jaara quiocuara saquiriojotare nequesoreena pueyano, nequesoreenaari saniniuujia quia niqutionutaniya na pueya, quia nujuatesaanura nujuatejojuajinia.<sup>59</sup> Seetanujuanaa nia sequeyanijia, majaari nia tohuatanu quiniutianiya nujuatejojuajiniji, niaa jaara puetunu nequesoreena sequesano cumaneecajanaa niqutiojoraatijia niaacuara tonujuna pueyano.

## 13

*Nioojia nia tacatore sesa nia quiniujiniji*

<sup>1</sup> Jiyacari, tamasaca pueyari Jesuucua tiuquijioquiaari. Cuno pueyari naa Jesu pohuataquiaari:

—¡Jiyaniijia Pilatoori Galilea jiyajinijinio pueya puecoorucuaa! ¡Na nuhuaji, nojori nanaca cojitiriiri Pueyasocuaara nojori puecoosano seya nanacata!

<sup>2</sup> Jesuuri nojori sequeree:

—¿Niaateeri jiyaniya cuno Galilea pueyari naa miishaarucuaa socua jiyanohua sesa miijiaca nojori quiniuucua narta Galilea pueyajiniji?

<sup>3</sup> Seetanujuanaa nia sequeya cutaranijia, nojoriiri maja socua sesa miijiaca quiquianu niajanijajiniji. Niajanijajuhuj, niaa jaara tama nioojiaajaaja tacatoyaquiri sesa nia miiniujiniji, niaari taraatia puecoosaariquianojuhuaj.

<sup>4</sup> ¿Cuno dieciocho pueyarihuaj, canapuate cusonuucanu cuno jiyaconajatia jaara nojori shiniacacanu Siloé cuari shuriucuatej? ¿Niaateeri jiyaniya nojori socua sesa miijiaca quiquianu narta Jerusalén tiacajinia quiniaa pueyajiniji? <sup>5</sup> Seetanujuanaa nia sequeyanijia, nojoriiri maja socua sesa miijiaca quiquianu niajanijajiniji. Janiyari quiarjia nia numooteyani, niaa jaara tacatoyaquiri nioojia sesa nia miiniujiniji, niaari taraatia puecoosaanutaniyajuhuj.

*Miriqui Jesu niishitiojosano muetuhuo naanajiniji*

<sup>6</sup> Jesuuri na nuhuaji pueya niishitiojoquiaari nio miriqui pohuatasanta:

—Tamonu pueyanoori higo naana jiitiaquiaari na uva cuhuariquiajia. Tamacari, na camaruuri nocua quiaquiaari na niqiniuria. Na jajau mianu paniriquiaa juucuaari. Shaanoori quiriquiaa. <sup>7</sup> Cunora, na cuhuariquia cojuana sequereeri: “Quia niquiri nio naana. Janiyari pueyaracaanu najuhuana niquiaani na jajau pajenura. Pueyaracaanu muetuyaquiyari. Tari na shocojorucuaari jiuujianaraca marijia. ¡Quia nure! Tamonu cuara na



nuuasaaqui natasaaria, na muetunura cutara”.<sup>8</sup> Cuhuariquia cojuanaari na riucuaaree: “Jiyaniijianaa, quia tarinitiarejaara tamonu marijiara. Janiya na pajama jiya tacarojotanutaniyani na sasetanura. Na nuhuaji, janiyari juunu cueaca na pajama paatiniutianiyani.<sup>9</sup> Janiya jaara naa na miirini, muetunutaniya naasucua. Jaara muetuyaquiri, pocua socua na nureni”. Naajuhuaaj pueyanaa, Pueyasoori sashiya, maninia miijiaca nia quiniuria.

*Jesu jeecasacari porocuatucua samaatenu juuca*

<sup>10</sup> Tamonu samaatenu juuca, Jesuuri tamonu tiacajinia niishitiojoriquiaa Pueyaso secojojua tiajinia. <sup>11</sup> Tamonu maaji cusuuri tii quiriquiaajuhuaaj. Dieciocho marijiaraari na shoconujuquiaari porocuatenu na quishacari. Samaruuri naa na jiyatequiaari. Majaari quenaaja na naata maninia nujuanu quijia. <sup>12</sup> Jesu jaara na niquiquiaari, na sequereeri:

—¡Maajiniaa miji! ¡Quia nijiniacuaa tari jeequerohua!

<sup>13</sup> Jesuuri na juaashiquia niaree maajiicua. Jiyacaritij, maajiiri maninia jeequequee. Nojuajaari Pueyaso maniniuhaqueetanu coteeree naa na miishaanuucuatej. <sup>14</sup> Pueyaso secojojua tiajinia jiyaniijiaari juaarii naa Jesu miiniucua samaatenu juuca. Naaratej, tii quiniaa pueya sequeree Jesu niquiaraari:

—¡Seis juucacuajaari quiya puetunu semaanajiniajanaa pa poonijionura! ¡Niocua cuno juuca nijioriquia nia naatanijiosaanura, maja samaatenu juuca!

<sup>15</sup> Jiyaniijia Jesuuri sequeree:

—¡Sapueno juhua maninia miijiaca niquishano pueyanaa, puetunu nia-janiyajanaari nia juunu, nia burro samaacartaquiaa samaatenu juuca, nia jaatucusocoriquiano mohuaca na raatenura! <sup>16</sup> ¿Nio maajiiriuhuaaj? Nojuaja cutaraari supuetana Abraham niquiohuacuajinio supueno. ¿Majateeri maniniajuhua samaatenu juuca pa samaacatanura Satanás morojosano? Dieciocho marijiaraari tari nio maaji shoconujurucuaa pueyaracaanu porocuatenu na quishacari.

<sup>17</sup> Naa Jesu sequesacaritij, puetunu na paraajanaari caririquitiurii. Saniniuujia, puetunu pueyajanaari shuquiriaatia quiriquiaa nojori niquishacari queraatia maninia Jesu miishano na cumaacata.

*Miriqui Jesu pohuatasano mostaza jajaujiniji*  
(Mt 13.31-32; Mr 4.30-32)

<sup>18</sup> Jesuuri sequequiaari:

—¿Taate cua naata niishitiojonu nijaniyani, nia niishiniuria taa Pueyaso poonijia pueya jiuujiajinia na rupaatani? <sup>19</sup> Na rupaari juhua mostaza jajauniyojua, pueyano natasano na cuhuariquiajinia. Cuno jajau jaara moritiare, puereetucara caneyari. Naacuajitij, shuhuari na cashacucuaacua jesuya. Naajuhuaaj, Pueyaso rupaari caneya pueya jiuujiajinia puetunu nio jiyajiniajanaa maninia miijiaca nojori quiniuria.

*Miriqui Jesu pohuatasano pan poreetajajiniji*  
(Mt 13.33)

<sup>20</sup> Jesuuri nio pohuataquiaari socua:

—¿Casaa cua pohuatanutaniya nia niishiniuria taa Pueyaso poonijia mijiria na rupaatani? <sup>21</sup> Pueyaso rupaari juhua pan poreetaja maaji cojitishano trigo cashojuata, shanacusano jiuujianaraca shiitianiyojua tohuatashijinia. Pan poreetajaari puetunu cuno cashojua miniquiootasanojuanaa poreeteja. Pueyaso rupaari naa poonijiojuajuhuaaj.

*Juhua shiitianiyojua tohuateyari quiya Pueyasocua pa quianura*  
(Mt 7.13-14, 21-23)



<sup>22</sup> Jesuuri Jerusalén tiacajiniara quiariquiaa na pueyata. Nucuaco na quiasacari, pueya niishitiojoriquiaa tiacajiniaari, shiitianiyojua tiacajini-  
anio. <sup>23</sup> Jiyacaritij, tamonu pueyanoori na nequesotaree:

—Jiyaniijianaa, ¿saaja quenaaraqui pueyateeri Pueyaso pueyara jiyate-  
saanutaniya?

Jesuuri nojori riucuaaree miriqui:

<sup>24</sup> —Jiyanohua nia saniniujiuri shiitianiyojua tohuateyaco nia tiuquini-  
uria, Pueyaso nia rupuenura. Juhuacarijia nia numooteyanijia, queraatia  
pueyari nocua tiuquitianu paniniutianiya juucua. Majaari nojori naata  
quiniutianiya saaja. <sup>25</sup> Cua tojitiare. Tia camaru jaara sanere, tohuateya  
tionutaniyari. Niajaniya, cante na tia carijiniacuma quiyajaani, niaari  
tohuateya piquiniuuniutianiya najuhuanaj. Naa jaara naa nacare: “Jiyani-  
ijianaa, canacuaji quia riatare tohuateya!”, nojuajaari nia riucuanutaniya:  
“Maja cua niishiniu tejenote niajaniyani”. <sup>26</sup> Jiyacaritij, niaari juhuacatecara  
sequenutaniya: “¿Majateeri canaa quia niishiniu? Canacuajaari quiata  
miaquenujuani. Canaari quiata ratujua mariyatani. Quiaacuajaari canaa  
tiaca nuucuacajinia niishitiojojua”. <sup>27</sup> Tia camaruuri nia riucuanutaniya:  
“Janiyacujaari tari nia sequereeni, maja cua niishiniu tejenote niajaniyani.  
Nia quiojorohua niiquiji, puetunu niajaniyajanaa sesa miijiacanaa”. <sup>28</sup> Naa  
na taanuusacari niajaniyatej, niaari nujuquetunutaniya. Niaari nia quia  
miaquenutaniya jiyanohua nia taraajenuta, nia niquishacari Abraham,  
Isaac, Jacobo, puetunu pueyara Pueyaso sequesano caminiujiuniaa Pueyaso  
shuriucua quiyanocuaa. <sup>29</sup> Queraatia tamasa pueyapueeri nijionu-  
taniya puetunu jiyacajinijiniojuanaa Pueyaso shuriucua cajitiuniuria, no-  
jori miaquenuunura nata. Nijionutaniyari pananu muetasamaji, pananu  
tiuquishacojinio, pananu shuucuaji jiyacajinijinio, pananu muetasamaji  
miaquetajara jiyacajinijiniojuhaj. <sup>30</sup> Quiarijiani, queraatia pueyari juhua  
tojishoo quiya narta pueyara. Cuno quishacari saniniuuja, nojori cutaraari  
seetanujuanaa tojishano pueya quiniutianiya Pueyasora, Pueyaso tojitiajaca  
nojori quiniucua mijiria. Naajuhuj, quiarijiani, queraatia pueyari juhua  
tojishano pueya quiya narta pueyara. Saniniuuja, jiya puequesacari, nojori-  
iri najuhua quijiaca quiniutianiya Pueyasora, nojori tojitiaaquiniucua  
nojuaja.

*Jesu taraajesacari Jerusalén tiacajinia quiniaa pueyacua*  
(Mt 23.37-39)

<sup>31</sup> Jiyacari noojiaqueya Fariseocuacaari Jesuucua tiuquiiioquiaari. No-  
joriiri Jesu numooteree:

—iNiiquiji quia mashiri! jJiyaniijia Herodes quia monu paniya!

<sup>32</sup> Jesuuri nojori sequeree saaja:

—Cuno pueyanoori niishijia juhua jaami. Naa nia caminiujiushuhua cua  
sequesano cuno jaamiria: “Janiyari samaruhua tohuatanijiyani. Janiyari  
cusosuhua naatanijiyajaaniuhuj. Janiyari naa miya quiarijiani, tariqui-  
juhaj. Janiyari tama tariqui tucuanutaniya puetunu cua miiniu pan-  
ishanojuanaani”. Naa nia sequesuhua cuno pueyano. <sup>33</sup> Cuaara ru-  
paquijia cua sashiiria. Janiya quiarijia rucuanenutaniyajaarani, tariqui,  
tama tariquinio. Janiya cuara mosaaria cutara Jerusalén tiacajinia,  
tee cuniqui puetunu pueyara Pueyaso sequesano caminiujiuniaajanaa  
puecoosaaquiaaricuaani. Majaari tamaqui cua monu quishaanutaniya.

<sup>34</sup> Jerusalén tiacajinia quiniaa pueyanaa, niaacuajaari Pueyaso sequesano  
caminiujiuniaa puecoojuaca. Niaari Pueyaso jiyaramiquishano pueya jacu-  
juaca saitia. Janiyari juucua pueyaracaanu nia rerejonuucua jiaatiajani,

taa caacaraja necohua rijioquiaacuaa na nesu cariquiaconi. Niaari saaja paniyaquiquiaa cua cojuanura niajaniya. <sup>35</sup> ¡Cunora, cua tojitiare! Nia quiquioori tojetaarucujanaa shaaqui quiniutianiya. Naajuhuj, majaari socua nia niqiniu quiniutianiya janiya, niaa jaara nia timítiasacari janiya sequerejaatijia: “¡Cuaara shuquiriaatia quiiria pa Jiyaniijia, Pueyasojiniji tiuquiuhuano!”

## 14

### *Jesu naatanishacari cusosu poreeno pueyano*

<sup>1</sup> Tamonu samaatenu juuca, Jesuuri tamonu Fariseocuaca jiyaniijia tiajinia quiaquiaari miaquenura, socua tamasaca Fariseocuacatanio. Nojoriiri Jesu shootiaturiquiaa nojori niishiniuria casaa na miiniutianiya samaatenu juucani. <sup>2</sup> Jiyacaritij, tamonu pueyanoori Jesu tacoji nujuariquiaa, poreeno cusotaano. <sup>3</sup> Jesuuri Moisés Rootasanojiniji niishitiojonaa nequesotaree, Fariseocuacatanio:

—¿Taa nia serojoquiaa Moisés Rootasanojiniani? ¿Maninate cusosu pa naataniniu samaatenu juuca?

<sup>4</sup> Nojoriiri saaja sanaa na tojitiariquiaa. Jesuuri cusosu quiaree jiyacari. Na naataniriiri. Na jiyarorohua na tiajiniaari. <sup>5</sup> Na nuhuaji, Jesuuri cuno Fariseocuaca sequere:

—Nia burro, nia juunu jaara raama tiyare samaatenu juuca, ¿niaatucua samaatenu juuca shocoterejaara, raamaji nia jaaniuhuara nia seru?

<sup>6</sup> Majaari nojori riucuanu quirii quenaaja.

### *Taa pa miyani queranacunura masuusano pa quishacari, taamueca pueyate masuushiyajaaniuhuj*

<sup>7</sup> Jesuuri shootiariquiaa taa masuusano pueya socua panishano cajitiucujinia nojori cajitiuniuria riutioconeetariquiaani. Jesuuri cunora nojori niqiuara pohuataree nio pohuatasano. Naa sequereeri:

<sup>8</sup> —Quiaa jaara masuusaariquia camishacari queranacunura, maja cumaati quia cajiniu socua tojishano pueyano cajijiaranojinia, tamonu pueyano mariqui tiuquiriiri socua tojishano pueyano quiajanijini.

<sup>9</sup> Socua tojishano pueyano jaara tiuquishii, nia masuuna pueyano naasucuaari quiocua niniutianiya na sequenura quiajaniya: “Shiiquia. Quia sanere nio pueyanoocuaji”. Naacuajitij, quiaari cajitishaanutaniya quia caririquiniutia pueya paniyaquishano cajitiujinia, miaqueja puequeetujinia. <sup>10</sup> Nocuaji nia sequeyanijia, niaa jaara masuusaariquia miaquenura tamonu tiajinia, niocua cajishiiquia socua paniyaquishano cajitiujinia. Naacuajitij, quia masuuna jaara niqiri quiajaniya, nojuajaari quia sequenutaniya: “Cua rupuenanaa, ¡niya quia cajishii socua panishano cajitiujiniani!” Naacuajitij, cuniqui quiata quiniaari niishiniutianiya, quiajanijiaqui nia masuuna panishano pueyano. <sup>11</sup> Naajuhua Pueyasora, cante tama na cuaqueyajaaja jiyateya juhua tojishano pueyano na quiniuriani, nojuajaari cararosaanutaniya. Saniniuujia, cante tama na cuaqueyajaaja jiyateya juhua panishoo pueyanoni, nojuajaari maninia jiyatesaanutaniya juhua tojishano pueyanora.

<sup>12</sup> Jesuuri na masuuna pueyano sequerejuhuaj:

—Quiaa jaara queranacunu paniya, majaari quia masuunu saaja quia rupuenanaa, quia tapueyocuaca, quia panishano pueyanio. Naajuhuj, majaari quia masuunu quia shuriucua quiniaa casamiriaca pueya. Quiaa jaara nojori masuure, nojoriiri quia masuunutaniya saniniuujia. Naacuajitij, quiaari tari namishaarohuacuaja. Cunora, majaari socua quia masenu

quiniutianiya Pueyasojiniji. <sup>13</sup> Naaratej, quiaa jaara queranacunu paniya, quia masuure casamijiuniucua pueya, sesaruneca pueya, sesacujanucua pueya, cariojuarujurinio. <sup>14</sup> Naacuajitij, quiaa jaara naa miiri, quiaari shuquiriaatia quijia quiniutianiya cutara. Majaari nojori naata masuunu quiajaniya saniniuujia. Naaratej, Pueyaso cutaraari maninia miiniutianiya quiajaniya saniniuujia, na samiitianijosacariuhua maninia mijiaca pueya.

*Miriqui Jesu pohuatasano na queranacunujiniji*  
(Mt 22.1-10)

<sup>15</sup> Jesuta cajiyano pueyano tojishacari naa Jesu pohuatasantej, Jesu sequereeri:

—¡Shuquiriaatia quijia cutaraari cuno, cante Pueyaso shuriucua miaquenu-taniya jiyocuacaanuni!

<sup>16</sup> Jesuuri na sequeree:

—Tamonu pueyanoori queraatia sumatuquiaari pueyata na queranacunura. Nojuajaari coteenu queraatia pueya masuquiaari. <sup>17</sup> Quera miaquenuusacari, na seru jiyaroreeri na masuusano pueya na sequenura: “Miji, puetunujuanaa tari jeenucuasaaree niaacuaji. Nia miaquesee”.

<sup>18</sup> Puetunu masuusano pueyajanaari juhuacatecara sequequiaari maja na naata quianu miaquenuucua. Coteenu masuusano pueyanoori cuno seru sequeree: “Janiyari shusha maseree tamonu cuhuariquiani. Janiyari nocua quiaa na niqiniuucuanu. Cua jiyanoori quenaaja. Maja cua naata quianu quiata queranacunuucua”. <sup>19</sup> Tamonu masuusano pueyanoori sequeree: “Janiyari diez poonijiojuaca juyaca masereeni. Na saniniuucua quiaanijia. Quiocua cua jiyanoori cua quiaaquishacari queranacunujinia”. <sup>20</sup> Tamonu masuusano pueyanoori sequerejuhuaj: “Shusha camiriinijia. Cunora, maja cua naata quianu”. <sup>21</sup> Seruuri tamajaaja tacateyarohua na camarnu tijiniohua. Na jiyaniijia pohuatasuhua na masuusano pueya sequesanoori. Na jiyaniijiaari juaaquii. Na seru sequereeri: “Ritia quia quiaare tamasaca pueya masuunuucua tiaca nucuaacaco. Miji quia rijiocoo casamijiuniucua pueya, sesaruneca pueya, sesacujua pueya, cariojuarujuri pueyano”. <sup>22</sup> Seru tiuquishacariuhua, na jiyaniijia sequesuhuari: “Jiyaniijianaa, janiyari tari miiriini taa quia sequeree janiyacujani. Juhuanajuaja maja tia mishiniu”. <sup>23</sup> Na jiyaniijiaari na sequeree: “Socua pueya quia pajecoo tiaca nucuaacaco, tamasaca tiacajiniara nucuaaconio. ¡Socua pueya quia nenecojocoo nojori niniuria, cua tia mishiniuria! <sup>24</sup> Seetanujuanaa nia sequeyanijia, coteenu cua masuusano pueyajinijinioni, majaari quenaaja niquiriyatu nojorijinijinio saniniu quiniutianiya cua sumatusano”.

*Saaja tama na cuaqueya panitiajajaarjia na naata Cristo nuhuajiniu*  
(Mt 10.37-38)

<sup>25</sup> Jiyanoohua queraatia pueyari Jesuta quiojoriquiaa. Jesuuri nojoriicua tacateree. Nojori sequereeri:

<sup>26</sup> —Cante cucua niya cua pueyano na quiniuriani, nojuaja cuara niishi-iria nio. ¡Maja nia naata cua pueyano nia quiniu nia paniyaquishacari janiya socua nia quejiniji, nia nucujinijinio! Nia niquiocua, nia niquiohua, nia tapueyocuaca, nia rimiatuhujahuaj, nia panishacari nojori socua janiyajiniji, ¡majaari nia naata cua pueyara nia quiniu! Naajuhuj, ¡majaari quenaaja nia naata tama nia cuaqueyajaaja panijia nia quiniu socua janiyajiniji! <sup>27</sup> Cante tama na cuaqueyajaaja panitiaaquijia cucuarani, majaari na naata cua pueyanora na quiniu. <sup>28</sup> Niaa jaara jiyaconaja tia tianu paniri, ¿majate coteenu nia cajiniu nia niishiriojonura taa cumaneecate panishaanutaniyani, na tucuatatura puetunujuanaa? Naajuhuj, niaari niishiriojiya, queraatia

quiyacuajate nia cumaneeca. <sup>29</sup> Niaa jaara coteenu naa miyaquiri, niaari najuhuana morijiucua nujuatejonutaniya, na nuhuaji majaari socua nia cumaneeca quiniu nia tucuatana nia tia. Puetunu nia tia niquiniaajanaari juhuacatecara nia macaatinutianiya. <sup>30</sup> Nojoriiri sequenutaniya: “Cuno pueyanoori tianu coteecanu najuhanaj. Majaari na naata na tucuatana quiarijia”. <sup>31</sup> Naajuhuaaj, jiya jiyaniijia jaara quianu paniri narta jiyaniijata miaquetoona, ¿majate coteenu na cajiniu na niishiriojonura, na naatate diez mil na pueyata shocotanu cuno tamonu jiyaniijia, nocua niyano veinte mil na pueyatani? <sup>32</sup> Cuno jiyaniijia jaara niishiri, maja na naata na shocotanu quiniutianiya narta jiyaniijia nocua niyano, majaari na miaquetoona quiniutianiya. Saniniuujia, tucuaaanu narta jiyaniijia quishacarijia, nocua jiyaramiquiniutianiya na pueyari, nata nojori pocoojonura maninia, nojori jiyanoootionura. <sup>33</sup> Naajuhuaaj, niaa jaara carteyaquiri puetunu nia jiiitiasanojuanaa, majaari nia naata cua pueyanora nia quiniu.

### *Miriqui Jesu pohuatasano shonijiniji*

*(Mt 5.13; Mr 9.50)*

<sup>34</sup> 'Shoni jaara tiquiriiquia quiya, maniniaari, pa panishano. Jaara shaacara quiqii, ¿taate na naata tiquiriiquiara na quiniuhuani? Maja na naata. <sup>35</sup> Najuhuana quiyari. Majaari quenaaja maninia na quiniu cuhuariquiajania jatasocoriquiano maninia na moritianiniuria nataacuaca. Majaari quenaaja maniajuhuaaj, na paatishaanura na moquijianura, natau pajama niojosocoriquiano. Jaara naa maninia quiyaquiritij, nareja jatashiyari. Cante numaacani, cuara tojitiaara miriqui cua pohuatasano. Cuaara na niishiiriajuhuaaj. Seetanujuanaa cua tojitiajaca pueyani, nojoriiri juhua shoni mijiria.

## 15

### *Jesu pohuatasano miriqui tashucuanano borregojiniji*

*(Mt 18.10-14)*

<sup>1</sup> Roma tiacajinia quijia jiyaniijiaara cumaneeca masejona, mariyata sesa miijiaca pueyari Jesuucua nijioriquiaa na pohuatasano nojori tojitianura. <sup>2</sup> Cuno pojoriiri Fariseocuaca soosano pueya quiriqiaa, Moisés Rootasanojiniji niishitiojona soosano pueyano. Cunora, Fariseocuacaari, mariyata Moisés Rootasanojiniji niishitiojonaari tama rimiaaqueturiquiaaja Jesuucua. Naa pocuaturiquiaa Jesuuri:

—Cuno pueyanoori sesa miijiaca pueya shanacuquiaa nocua nojori niijonura. ¡Juhuaaniya nojoritia miaquequiaajaariuhuaaj!

<sup>3</sup> Naaratej, Jesuuri nojori niqiiara pohuataree nio miriqui pohuatasano:

<sup>4</sup> —Niaa jaara cien borregohua jiiitariquia, nojorijinijinio niquiriyatunijojua jaara tashucua, ¿taa nia miiquiaani? ¿Niaatucua nia noventa y nueve borregohua cureeno tiujiaaquiri rupaquijia cuhuariquiajania, tashucuanano borrego nia pajenura, niaa cuara na riuriatarohuaajaatijia? Taaquiriirinij. Niaacuajaari naa miiquiaaquij. <sup>5</sup> Niaa jaara na riuriatasee, niaari nia shuquiriniutia na paquiohua nia numueecuaji. <sup>6</sup> Niaa jaara na tiuquitiarohua nia tiajiniohua, niaari nia rupuenaa, mariyata nia shuriucua quiniaa rerejotenutaniya nia sequenura nojori: “¡Cuata nia shuquiriri quiarijia! ¡Tari riuriatarohua cua borregonijojua tashucuanonijia!” <sup>7</sup> Seetanujuanaa nia sequeyanijia, naajaariuhuaaj, jiyocuaaanu quiniaari jiyanohua shuquiritiquiaa niquiriyatu sesa miiji jaara noojia tacatore sesa na miiniujiniji. Cuno pueyanoori socua jiyanohua shuquiritiasano tamasaca noventa y nueve pueyajiniji, canapuetucuaaja tari maninia pueyacuaani.

*Jesu pohuatasano miriqui juurequetesano cumaneejiniji*

<sup>8</sup> Naajuhuj, tamonu maaji jaara diez cumaneecaraca quiri, jaara niquiriyatu juurequetere tiajiniaaco, ¿maatucua taa miirini? Na samaritiu noshitiniutianiyari, na tia na netoonujunura. Pueyaracaanu jacaria na pajenutaniyari cuaara na riuriatatarejaatijia. <sup>9</sup> Na riuriasacari na juurequetesano cumanee, maajiiri na rupuenaa, mariyata na shuriucua quiniaa maajipohua rerejotenutaniya na sequenura nojori: “¡Miji nia nimia! ¡Cua taa nia shuquiriri! ¡Tari riuriatarohua cua juurequetesano cumaneenijia!” <sup>10</sup> Seetanujanaa nia sequeyanijia, jiyocuacaanu Pueyaso seyari naa shuquiriquiaajuhuj sesa miijia jaara noojia tacatore sesa na miiniujiniji.

*Jesu pohuatasano taa tamonu pueyano jiyanooquiaari neyanuni*

<sup>11</sup> Na nuhuaji, Jesuuri nio pohuatareejuhuaj:

—Tamonu pueyanoori caapiqui niyanuraca quiquiaari. <sup>12</sup> Socua naatujuaari na que sequeree: “Cua quena, quiaritia cua niqutiore quia jiiitiasanojiniji, quiria quiriqiano quiaa jaara shaajeyare”. Naacuajitij, na queeri puetunu na jiiitiasanojuanaa niqutiojoree necohua. <sup>13</sup> Socua naatujuaari rupaquijia camueenujuquiaari na que tiajinia. Na nuhuaji, puetunu na que niqutiosanojuanaa nojuajani, nojuajaari saniniuuja tamasa na niqutiojoree na cumaneecara. Na nuhuaji, na cumaneecata quiaquiaari tucuaaanuuri, tamonu jiyajinia. Cuniq, puetunu na cumaneecajanaa puecaquiaariiri sesa na miiniutia. <sup>14</sup> Nojuaja jaara puetunu na cumaneeca puecaquiaarijanaa, cuno jiyajiniaari jiyanohua miaajesacari quiquiaari. Mashajaari juhuacatecara miaajequiaari. <sup>15</sup> Cunora quiaaree tamonu tahuecua cuno jiyajiniaari, nera na poonijionura. Cuno tahueri na jiyaroree na cuhuariquiajinia na cushiya na cojuanura. <sup>16</sup> Mashajaari cushiya miaquesano miaquenu paniriquiaa juucua na miaajenuta. Cunoori tamaatia purootu cocua quiquiaari. Majaari tamonu pueyano niqutionu quijia quenaaja na miaquesocoriquiano. <sup>17</sup> Na nuhuaji, tama sequereejaarijia: “Cua queeri queraatia na tiajiniaaco seyaraca. Nojoriiri maninia miaquenuquiaa taquiya. Nojori sumatuuri cureequiaajuhuj. ¿Janiyaritaj? ¡Janiyari niya quera cusoya cua miaajenutani! <sup>18</sup> ¡Cua queecua tacateyarohuaraj! Janiyacua na sequesuhuani: ‘Cua quena, janiyari Pueyaso miiquianu sesani. Janiyari sesa miiquianu quiajanijuhuj. <sup>19</sup> Majaari socua cua sequenu quia niyanuta. Janiyari puera sesa miijiani. Cua jiyatere juhuari juhua quia seru cua quiniuria, quiara cua poonijionura’ ”. <sup>20</sup> Naa na niishirionu nuhuajitij, mashajaari quiaquiaariuhua na queecua.

“Tucuaaanu na quishacarijia na que tiajiniji, na queeri na niquirii. Nocua taraajereeri. Nocua neteyareeri na naacunura. Na cacaseeri. Na nujuuneequereejaariuhuj. <sup>21</sup> Neyanuuri na que sequeree: “Cua quena, janiyari sesa miiquianu Pueyasoni, quiajanianio. Majaari cua sequenu quia niyanuta”. <sup>22</sup> Na queeri saaja na tiaco seya sequeree: “¡Ritia! ¡Socua maniniuqui toque miji nia riquioo! ¡Niocua quiyanu cushitirinioj! ¡Jaaniisho nia cushitiri! ¡Sapatu nia cushitirijuhuj! <sup>23</sup> Pa riutianishano juunu niqiojua nia quiaaco mosocoriquiano. Quiaritia pa queranacure. Pocua miaquenuureni, quiyanu pa shuquiritiasacari. <sup>24</sup> Nio quiyanuniyojuaari juhua macu quiriqiaa. Quiaritia samiitarohuari. Nojuajaari shaajequiaari. ¡Tari pocua muetarohuari!” Naacuajitij, nojoriiri juhuacatecara queranacuquiaari.

<sup>25</sup> Jiyacaritij, jiyapueranuuri cuhuariquiajinia quiriqiaa. Na tacatecariuhua tiajiniohuara, jaara tari cateca quiriqiaa, saaja pueya tojirii jaaquequenuyanoori, nianujuniuyanonio. <sup>26</sup> Naaratej, na que tiaco seru piiriiri: “Miji, cua sequere, ¿casaara tiajinia cojuatuneshiyani?”



27 Seruuri na riucuaaree: “Quia nuhuajishanacuaja tari tiuquiriohuano. Quia queeri shuquiriaatia quiya maninia na tiuquishacariuhua, maja cusosu. Naaratej, canaa sequereeri querasapiquia juunu niquiojua canaa monura”. 28 Jiyacaritij, jiyapueranuuri jiyanoehua juaaqui. Majaari tiajinia na tiuquiniu paniniu quiriquiaa. Nocuaji na queeri nocua tohuatamaa carijiniacuma, na nenecojonura tiajinia na tiuquiniuria. 29 Na que sequeree saajaari: “Quiaacuajaari niishiya, janiyari pueyaracaanu poonijioquiaa quiarani. Majaari quenaaja cua tarijonu quiquiaa quiajaniya. Naa maninia tojijia cua quishacari quiajaniyatej, ¡majaari quia niqutionu quiquiaari janiya quenaaja niquiriyatu cabraniyojua, cua queranacunura cua rupuenata! 30 Quiaritia saniniuujia, quia niyanu seque tiuquishacariuhua, ¡quiaari querasapiquia juunu niquiojua moree nera! ¡Nojuajaari quia cumaneeca puecacanua paanatujuuricua!” 31 Na queeri na sequeree: “Sana-janaa, quiaari pueyaracaanu cuata quiya. Puetunu cua jiiitasanojuanaari quia casaa. 32 Naajaa, quiarijiani, maninia pa queranacure. Shuquiriaatia pa quirij. Quia tarajanuuri juhua macu quiriquiaa tari. Quiaritia samiitiarohua pajaniyaraari. Nojuajaari juhua tashucucacanu pocuaji. Quiaritia pocua muetarohuari”.

## 16

### *Miriqui Jesu pohuatasano pueyanojiniji, cante na jiyaniiija cumaneeca riutiocojuani*

1 Jesuuri na pueya pohuataquiaari nio miriqui pohuatasanojuhuj, nojori na niishitiojonura:

—Tamonu casamiriaca pueyanoori tamonu pueyano jiiitaja na casami cojuariquiano, na cumaneecanio. Tamasaca pueyari cuno camarnu pohuataree na seruna na cumaneeca riuticoriquiaa jiyasohuaja, tama nerajaaja. 2 Cunora, jiyaniiijaari cuno na seru sequeree: “¿Taa quia miiquiaa janiyani? ¡Quiaana sesa miiquiaa! Quiaritia cua niqutiore quia naajiotasano puetunu quia miishanojinijijianaa. Majaari socua quia quiniu quiniutianiya cua casami cojuana”. 3 Cunora, cumaneeca cojuanaari niishiriojoquee. Tama sequereearijia: “¿Taa cua miiniutianiyarini cua jiyaniiija jaara cua jatara cua poonijiosanojiniji? Janiyari maja cumueecani, cuhuariquiajinia cua poonijionura. Naajuhuj, jiyanoehua cararaatiaari quiria, pueyajiniji nareja cua mashiniquijionura cua panishano. 4 ¡Jaj! Tari niishiQuiinijia taa cua miiniutianiyani tamasaca taraajenura cucua, nojori masuunura janiya nojori tiajinia cua quiniuria, janiya jaara nio poonijiosanojiniji jataaareni”. 5 Naaratej, nojuajaari naa miiquiaari. Juhucatecara sequequiaari pueyari, nojori nijionura nocua, canapue na jiyaniiija niqutiojoquiaari casamicuajani. Coteenu tiuquinia pueyano nequesotareeri: “¿Casaa cua jiyaniiija niqutiojocanu quiajaniyani?” 6 Pueyanoori na riucuaaree: “Cua niqutiojocanu cien patacocua mishaja shiyocuani”. Cumaneeca cojuanaari na sequeree: “Ritia quia cajiri. Niya quiya quia masesano casamijiniji naajiotasano. Tamonu quiarinio quia miiri. Quia naajiotare saaja cincuenta patacocua mishaja shiyocua”. 7 Na nuhuaji, tamonu pueyano nequesotareeri: “¿Quiajaniyariuhuj? ¿Casaa cua jiyaniiija niqutiojocanu quiajaniyani?” Na riucuaareeri: “Cua niqutiojocanu cien canaasatu mishaja trigoni”. Cumaneeca cojuanaari na sequeree: “Niya quiya quia masesano casamijiniji naajiotasano. Tamonu quiarinio quia naajiotare saaja ochenta canaasatu mishaja trigo”. 8 Na jiyaniiija jaara niishiQuiaari sesa na seru miishano, na sequereeri: “¡Quiaaqui jiyanoehua niishijia tama quia cuaqueyajaaja quia cojuanura!”



'Seetanujuanaa pueyanaa, Pueyaso niishiyashijiaca pueyari socua jiyanoehua niishijiaca cuhuashiqui quijiaca pueyajini. Nojori cutaraari niishijia maninia nojori miiniuria narta pueya, pueya paniniuria saniniuujia nojori.

<sup>9</sup> 'Naarate nia nacasuyanijia, naa capora nia quirijiuhuaaj, maninia nia miiniuria pueya. Maja nia casami nia jamuenu. Cunocuajaari nareja Pueyaso niqutiosano niajaniya. Naacujitij, capora nia quishacari mijiria jaara puequema, nia Jiyaniijiaari nia tiuquinitianutaniya pueyaracaanu quishaqui jiyocuacaanu, jiyanoehua na shuquiritiasacari niajaniya.

<sup>10</sup> 'Pueyano jaara jiyatesaare secaja casami cojuana na quiniuria, nojuaja jaara maninia cojuaquiaa cuno secaja casami, na camarnuuri nocua tiuuniutianiya. Naaratej, na camarnuuri queraatia casami cojuanara na jiyatenutaniya. Saniniuujia, cante jiyatesaare secaja casaa cojuana na quiniuriani, cuno pueyano jaara secaja na cojuasanojiniji nohuasejoquiaa jiyasohuaja, majaari tari nocua tiuushaanu. Nojuaja jaara jiyatesaare queraatia casami cojuanara, naa nohuasejonutaniyajaariuhuaaj. <sup>11</sup> Naajuhuaaj, niaa jaara maninia jiiitaaquiquiaa mijiria casami, Pueyasoori niaacua tiuyaquiniutianiya seetanujuanaa maninia jiyocuacaanuji casami nia jiiitiana. <sup>12</sup> Naacujitij, niaa jaara tamonu pueyano casami cojuaaquiquiaa maninia, ¿Pueyasotucua taa niqutiore niaarano na riuriotacani? Maja cutaraari nia niqutiosaanu quiniutianiya.

<sup>13</sup> 'Poonitijosano pueyanoori maja na naata caapiqui jiyaniijiaraca poonijionu. Jaara caapiqui jiyaniijiaraca quiri, tamonu samiritiaari, na panishacari tamonu. Naajuhuaaj, niquiriyatu jiyaniijia tojjia quiniutianiya maniniaari, na soosacari tamonu. Naajuhuaaj pueyanaa, majaari nia naata Pueyasocua jiaatianu, cumaneecaacuanio. Niaa jaara cumaneeca panijia quiri, niaari cumaneecara poonijiotesanutaniya saaja. Naacujitij, Pueyasoori maja na naata nia poonitijionu nera.

<sup>14</sup> Fariseocuacaari jiyanoehua cumaneeca panijiaca quijia. Naaratej, nojori tojishacari Jesu sequesano, nojoriiri saaja na rerequeteree. <sup>15</sup> Jesuuri nojori sequeree:

—Niaacuajaari tama nia cuaqueyajaaja jiyatequiaa sapuenu pueyano maniniu nia niqushaanura. Pueyasocujaari nioojia niishiya. Niaari pueya jiyajenetequiaa nojori jiyaniishacari niaari Pueyaso panishano cutara, queraatia casami nia jiiitiasacari. Saniniuujia, casaa pueya jiyatequiaa socua jiyanoehua na panishanorani, Pueyasoori cuno soya cutara.

*Moisés Rootasanoori coteenu quiquiaari, quiarjia quiya cutaraari quiarinio Pueyaso Rupaa*

<sup>16</sup> 'Moisés Rootasano, mariyata puetunu tariucuacaanu Pueyaso sequenu panishano caminiujiuniaa pohuatasanojuanaari pueya tojitasocoriquiano quiquiaari, Tiuquiniijiona Juan pohuatasanojuhuaaj. Quiarjia saniniuujia, maninia rupaa Pueyasojiniijiri pohuatasaaquiaa, taa Pueyaso jiyanooni paniya pueyani, na muerasu nojori quiniuria. Quiarjiani, puetunu pueyanaari jiyanoehua saniniujiya Pueyaso muerasu nojori quiniuria.

<sup>17</sup> 'Nio jiyari shaajeriquiano, jiya cajiniocuanio. Saniniuujia, tariucuaaanu pueyara Pueyaso sequesano caminiujiuniaa pohuatasano cutaraari maja na shaajenu quiniutianiya quenaaja.

*Jesu niishitijosano, pueyano carteyaquiniuria necocua (Mt 19.1-12; Mr 10.1-12)*

<sup>18</sup> Pueyano jaara necocua cartere tamonu maajitia na caminiuria, cuno pueyanoori jiyanoohua sesa miya Pueyaso niquiara. Naajuhuj, cante cartesano maajitia camiyani, cunoori sesa miyajuhuj.

*Jesu pohuatasano casamiriaca pueyanojiniji, Lázarojinijinio*

<sup>19</sup> Casamiriaca pueyanoori quiquiaari. Jiyanoohua maniniuqui toqueya cushiyojojuaari, juhua jiyaniijianucua toqueya. Jiyanoohua na shuquiriniutia, puetunu juucajanaa queranacujuaari. <sup>20</sup> Jiyacaritij, casamiiju pueyanoori quijiajuhuj. Jiyanoohua sapueyaraca. Nojuajaari cuno casamiriaca pueyano tia tohuateyaji niojotasano puetunu juucajanaa. Na sesaari quijia Lázaro. <sup>21</sup> Nojuajaari casamiriaca miaquejajiniji totinijosano raacua miaquenu panijia juucua. Saaja sareyari na sapueya rimianacunuuja. <sup>22</sup> Na nuhuaji, cuno casamiiju pueyanoori cusoquiaari. Pueyaso seyari na riquiaari supuetana Abrahamta na quiniuria, Pueyaso muerasurano shanoohua quiquiojinia. Cuno casamiriaca pueyanoori cusoquiaarijuhuj. Jamosaaquiaariiri. <sup>23</sup> Sesa miijiacarano quiquiojinia na quishacari, naquiya na miishacari tii, nojuajaari mauquiaari. Cuniqiji tucuaaanu niquirii Lázaroori, shuquiriaatia quiyano supuetana Abrahamta. <sup>24</sup> Casamiriaca pueyanoori nacaree: “¡Cua supuetana Abrahamnaa, cucua quia taraajere quenaaja! ¡Lázaro quia jiyarore cucua! ¡Cuaara na juaashiquia nacatu shiiria mohuacajinia! ¡Cua niti shiniajaquee quenaajacua! ¡Janiyari puera jiyanoohua naquiya miya nio manijiniani!” <sup>25</sup> Abrahamri saaja na riucuarree: “Sanajanaa, quia niishiri taa jiyanoohua maninia quia quiquiaarini, pueyaraaanu jiyocua quia quishacari. Lázaroori saniniuujia jiyanoohua taraatia quiquiaari pueyaracaanu, jiyocua na quishacari. Lázaroori quiaritia niya cumanijiashiya. Quiaari saniniuujia naquiya miishiyacujua. <sup>26</sup> Naajuhuj, jiyanoohua tucuaa tacoori pa tajinia quiya. Cunora, cante niiquiji niuuniu paniya cuniqijiria quiocuani, majaari na naata. Naajuhuj, cante quia quiquiojiniji niuuniu paniya niiquijiriani, majaari na naatajuhuj”. <sup>27</sup> Casamiriaca pueyanoori supuetana Abraham sequerohuacuhuj: “Naa naasucuj cua supuetana Abrahamnaa. Naajaa, quia secojijianijia, Lázaro quia jiyarorohua cua que tiajinia. <sup>28</sup> Tii quiyajaari cua tapueyocuaca. Cinco tarajanuhuaracanjia. Lázaro cuaara nojori numooteera, maja nojori quejoosaanurajuhua nio saniitiosaqi quiquiojinia”. <sup>29</sup> Abrahamri na riucuarree: “Nojoricujajaari Moisés Rootasano jiiitaa, puetunu Pueyaso sequesano caminiujiunaa naajiotasanojuanaanio. Quia tapueyocuaca cuaara tojitiaara cuno”. <sup>30</sup> Casamiriaca pueyanoori riucuarree: “Naa naasucuatuhuj, cua supuetana Abrahamnaa. Naajaa, tamonu pueyano macunucujinijinio jaara muetarohua nojoriicua, nojoriiri noojia tacatonutaniya sesa nojori miniujiniji”. <sup>31</sup> Abrahamri saaja na riucuarree: “Nojori jaara Moisés Rootasano tojitianu paniyaquiquiaa, Pueyaso sequesano caminiujiunaa naajionuutasanonio, majaari nojori tojitianu quiniutianiyajuhuj, macu pueyano jaara samiitarohua”.

## 17

*Puereetaari quiniutianiya sesa miijiacara  
(Mt 18.6-7, 21-22; Mr 9.42)*

<sup>1</sup> Na nuhuaji, Jesuuri na pueya sequequiaari:

—Mijiria, pueyari pueyaracaanu sesa miitishaaquiaa. Jiyanoohua taraatia quijiaari cuno, cante sesa miitirii tamonuni. <sup>2</sup> Jiyano pueyanoratej, maara

socua maninia quiri nera, puereetuuca saajia jaara na riquiajiniji morotasaare, shoniniacu caminia jiuujiajinia jartasocoriquiano. Jaara naa miishaaretej, maara maninia quiri, maja sesa miijiara na jiyatenura niquiriyatu nio muerasuniyojuajinijinio. <sup>3</sup> Cunora, tama nia cuaqueyajaaja nia cojuare maja quenaaja sesa nia miitiniuria pueya.

'Quia tarajanu jaara sesa miiri, quia nacasurenoj. Nojuaja jaara taraajerohua sesa na miiniuucua quiajaniya, quia jiyanoorinijoj. <sup>4</sup> Nojuaja jaara sequeyarucua sesa miya quiajaniya niquiriyatu juuca, naajaa, quia jiyanooriquia, nojuaja jaara quia sequere: "Sesa miirii quiajaniyanijia. Cua jiyanoori quenaaja". Nojuaja jaara quia pacutejore sesa miiniu siete cuno juucaja, naajaa, majaari na tarinitianu jiyanooni.

*Pueyasocua tiuujia pueyanoori jiyanoohua cumaacaraca*

<sup>5</sup> Jesu saquiriojosano pueyari Jesu sequequiaari:

—Jiyaniijianaa, socua jiyanoohua canaa quia tiutiri Pueyasocua, socua cumaaca canaa jiitianura.

<sup>6</sup> Jiyaniijia Jesuuri nojori riucuarere:

—Pueyasocua nia tiuuniu jaara quiri quenaaja juhua mostaza jajauniyोजना, jiyanoohua shiitianiyojuua, niaa jaara nio satuna jiyona sequere: "Niiquiji quia pacure. Moojinia quia nujuasee", maara nia sequesano tojiri.

*Pueyasora poonijionatucua taa miijia quiriquianij*

<sup>7</sup> 'Niaa jaara seruraca quiriquia, nojuaja jaara tijinia tiuquiriohua quia cuhuariquiajiniji tee na namitariquiaacuajani, quia seya cojuanujiniji soj, ¿niaatucua na sequere: "Miji, quia miaquesuhuaaja"? <sup>8</sup> Majaruhua. Niaari saaja na sequenutaniya: "¡Quiria quia sumature! Cua mianuutere coteenu. Cua raaterējuhuaj. Cua miaquenu nuhuaji, quiocua saniniuujia miaquerohua. Quiocua raturohuajuhuj". <sup>9</sup> Na nuhuaji, nia seru jaara puetunu nia sequesanojuanaa miiri, ¿niaateeri na sequequiaa "paacarasho"? ¡Maja! <sup>10</sup> Naajuhuj, niaa jaara puetunu Pueyaso sequesanojuanaa miiri, tama nia sequerejaaja: "Janiyari maja maninia seruni. Majaari tama cua niishitiajajinijiaaja cua miiniu quiquiaa cua Jiyaniijiaara. Janiyari saaja pueyaracaanu paniquiaa cucua na tequejonura juhua naatujuaacuani".

*Jesu naatanijosacari diez pueya, lepraraca cusosuhua*

<sup>11</sup> Jesuuri Jerusalén tiacajiniara na pueyata quiariquiaacuahuaj. Jiyacari, Galilea jiya, Samaria jiya tajiniaaco quiariquiaari. <sup>12</sup> Quera na tiuquishacari shiitianiyojuua tiacajinia, diez pueya lepraraca cusosuhuari na naacuquiaari. Nojoriiri tucuaaanujijia Jesuucujaji nujuatusee. <sup>13</sup> Nojoriiri Jesuucua nacaraa:

—¡Niishitiojona Jesunaa, canaacua quia taraajere!

<sup>14</sup> Jesu niquishacari nojori, nojori sequereeri:

—Nia cuaqueya nia niqitishii pueyacuara secojona, taa supuetana Moisés sequequiaaricuajani.

Nojori canujuucuatúsacarijia, nojori cusonuuri shaajequee. <sup>15</sup> Tamonu nojorijinijinio niquishacari na cuaqueya tari cushiriiquii, nojuajaari Jesuucua tacateyarohua. Nojuajaari na rupaa paaretariquiaa na maniniuhuaqueetasacari Pueyaso. <sup>16</sup> Jesu cariquimiaji mojuquetaseeri. Jiyocuara naniriiri. Jesu sequereeri: "¡Paacarasho Jesunaa!" Cuno pueyanoori Samaria jiyajinijinio tahue quiquiaari. <sup>17</sup> Jesuuri na pueya niquiara naa sequere:

—¿Majateeri diez cusosuhua naatanijosaanu quirii? ¿Teeteeri narta naataconohua nueve pueyani? <sup>18</sup> ¿Saaja nio tahueteeri tacaterohua Pueyaso na maniniuhuaqueetanura?

<sup>19</sup> Na nuhuaji, Jesuuri cuno tahue sequeree:

—Quia sanere. Quia quiaarohua. Quiaacujaja naatarohua cucua quia tiuuniucua.

*Taa na quiniutianiyani, Jiyaniijia Cristo tiuquishacariuhua*  
(Mt 24.23-28, 36-41)

<sup>20</sup> Fariseocuacaari Jesu nequesotaquiaari taacari Pueyaso Jiyaroso-coriquiano niniutianiya jiyaniijiaara na quiniuria mijiriani. Jesuuri nojori riucuaaree saaja:

—Pueyaso Jiyarosano jiiatasacari na muerasu, majaari namijiata niquis-hano. <sup>21</sup> Majaari na naata sequesaanu: “Niya quiya pa Jiyaniijia quiquiao”, “Jati quiyaruhua”. Pueyasocujajaari tari niya jiiitaa na muerasu nia tajinia.

<sup>22</sup> Na nuhuaji, Jesuuri tama na pueyajaaja sequequiaari:

—Na nuhuaji, taraatia quishacariiri quiniutianiya. Niaari cua niquniu-ucua jiaatianutaniya niaata cua quiniuria rupaquijia, taa niaata cua quiya quiarijiacuaani. Majaari nia niquniu quiniutianiya janiya. <sup>23</sup> Tamasacaari nia sequenutaniya: “iNiya quiyacujaja nia Jiyaniijia!” Tamasacaari sanini-uujia sequenutaniyacujaja: “iNooj, jati quiyatej!” Majaari nia tojiniu jiyano pueyatej, nojori jaara naa nia sequeriquia. Majaari nojori netey-otanu najuhuanaj. <sup>24</sup> Mijiria cua tacatesacariuhua, cuno juuca, jani-yari niquishaanutaniyani, naatej, taa miacana puetunu jiya cajiniocua-janaa niquishaacuaacuaani na nunujusacari. <sup>25</sup> Saniniuujia, mijiria cua quishacarijia, janiyari coteenu jiyanohua naquiya miishaanutaniyani. Nio pa quishacari pueyari cua paniyaquiniutianiya. <sup>26</sup> Quera cua tiuquiniu panishacariuhua mijiria, naa quiniutianiyari taa mijiria quiniaa pueya quiquiaaricuaa supuetana Noé quishacarini. <sup>27</sup> Naa quiquiaariiri cuno quishacari. Mijiria quiniaa pueyari juhuajaniya miaquenuujua. Raru-ujuaari. Juhuajaniya maaji camiyojuaari. Pueyari necojori camiyoteja. Pueyari naa juhuajaniya miijioriquiaa Noé jaara tiuquitiacuaari na puereet-uuca buquejinia. Canashiyaquiji, maruuri jiyanohua niquiaari. Puetunu mijiria quiniaajanaari cusonuquiaari pajaacajinia. <sup>28</sup> Naa quiquiaariji-uhua supuetana Lot quishacari Sodoma tiacajinia. Cuno pueyari juhuajaniya miaquenuujua. Raruujuaari. Casami masejojuaari. Juhuajaniya na casami niqutiojojuaari. Na cuhuariquiacu natoojuaari. Na tiacara tiajo-juajaariuhua. <sup>29</sup> Naa juhuajaniya nojori quishacaritij, Lotri tohuataquiaari Sodoma tiacajiniji. Jiyacaritij, maniiri asufreta cojitishano juhua maru niquiaari jiyocuacaanuji. Puetunu cuno sesa miijiacajanaari manijinia cate-quiaari. <sup>30</sup> Naa quiniutianiyajariuhua quera jiya puequesacari. Pueyari juhuajaniya quiniutianiya. Janiyari jiyacari canashiyaquiji tiuquiniutiani-uhuani.

<sup>31</sup> Cuno juuca, pueyano jaara na tia cacojiria quiya, cuara roseyaquiiria na casamiicua tiajiniaaco. Naajuhuaaj, pueyano jaara na cuhuariquiajinia quiya, nojuaja cuara tacateyaquiuhua na tiajinia. <sup>32</sup> Nia niishiriquia supuetana Lot niquiocua. Na mashishacari, nojuajaari ritia cusocuaari na nijiniara na niquniuucua, na casamiicua na taraajesacari. <sup>33</sup> Cante saaja shuquiriaatia mijiria na quiniuria niishiriojojuani, nojuajaari na nuhuaji jiyanohua taraatia quiniutianiya Pueyasooju. Saniniuujia, cante tama na cuaqueyajaaja panitaja cua tojijiara na quiniuriani, nojuajaari pueyara-caanu shuquiriaatia quijiara jiyatesaanutaniya.

<sup>34</sup> Cua tojiri. Cuno niucujuhuaaj, caapiqui pueya jiuriatoosacari ju-ucua na maquetujinia, niquiriyatujuaari rishaanutaniya jiyocuacaanura,

Pueyaso pueyano na quiniucua. Tamonuuri tiujiasaanutaniya saniitiosocoriquiano. <sup>35</sup> Cuno juucajuhuaj, caapiqui maajipohua riiquiniuushacari jatiqiujuucua, cucua tiuujaari tarajanu shuriucujari rishaanutaniya. Tamonuuri tiujiasaanutaniya saniitiosocoriquiano. <sup>36</sup> Caapiqui pueya quishacari cuhuariquijania, cua pueyanoori rishaanutaniya. Tamonuuri tiujiasaanutaniya saniitiosocoriquiano.

<sup>37</sup> Jesu pueya tojishacari naa Jesu sequesantej, nojoriiri na nequesotaree: —¿Tee nio quia pohuatasano niqushaanutaniyarini?

Jesuuri nojori riuquaree miriqui:

—Tee casaa moqueyani, mohuari tii rerejiya.

Naajuhuaaj, majaari quenaaja niquriryatu Pueyaso tojiyashijia cureenu quiniutianiya saniitiosoo.

## 18

### *Jesu pohuatasano mashiquojiniji, pueya nequesoreena pueyanojinijinio*

<sup>1</sup> Jesuuri na pueya pohuataquiaari nio miriqui pohuatasano nojori na niishitiojonura, nojori cuara Pueyaso secojoora pueyaracaanu, nojori taacanuyaquiniutia. <sup>2</sup> Naa nojori sequereeri:

—Tamonu tiacajinia, pueya nequesoreena pueyanoori quijia. Pueyaso puereyashijia quijiaari, pueya rerequetejanio. <sup>3</sup> Cuno tiacajiniaja tamonu mashiquioori quiquiaarijuhuaj. Mashiquioori cuno nequesoreenaacua rucuanesojua pueyaracaanu. Na secojojuuari sesa na miinia pueyano cuara na niqutihuara na casaa saniniuuja, sesa na miishanojiniji nojuaja. <sup>4</sup> Majaari nequesoreena tojiniu paniniu quijia pueyaracaanu cuno mashiquio. Naajaa, pueyaracaanu nocua na rucuanesojacari, cuno nequesoreenaari socua tama sequequiaarijiaaja: “Janiyari maja Pueyaso puerejani. Janiyari pueya tojiyashijia cutarani. <sup>5</sup> Naajaa, naa nio mashiquio taajetesacari janiya pueyaracaanutej, janiyari quiarjia na panishano miiniutianiya nerani, mariqui cua juaatijiore pueyaracaanuuri na nenecojosacari janiya”.

<sup>6</sup> Maninia na pueya niishiniuria na pohuatasano, Jiyanijia Jesuuri naa nojori sequerohuacuhuaaj:

—Naa miiquiaariiri, cuno pueya nequesoreena seque. Jiyanohua pueya rerequeteja quiquiaariiri, naajaa, nojuajaari maninia miiquiaari cuno mashiquiora. <sup>7</sup> ¿Nia que Pueyasoorijataj? ¿Niaateeri jiyaniya maja nojuaja tojiniu quiniutianiya na muerasu, canapete na secojoquiaani juuca, niucuanio? ¿Pueyasoteeri nia sashitiniutianiyajaara? ¡Maja! <sup>8</sup> Nojuajaari maja na tarishiniu quiniutianiya. Ritia nia naacunutaniyari sesa nia miijia pueyacujari. Sesa nia miijiaari namishaanutaniya niaacua. Naaratej, majaari secojonu nia tarinitianu. Mijiria cua tiuquishacariuhua, ¿janiyate Pueyasocua tiuujia riuriatanutaniya naa pueyaracaanu secojonuujacani?

### *Jesu pohuatasano miriqui Fariseo pueyanojiniji, Romano jiyaniijia cumaneeca masejojuajinijinio*

<sup>9</sup> Jesuuri socua nio miriqui pohuatasano pohuataquiaari noo pueya niqiuara, canapete tama na cuaqueyajaaja jiyaniyani nojoriiri maninia pueyano. Naacuajitij, nojoriiri tamasa pueya soojea, nojori jiyaniyacari cuno pueyari socua sesa miijia nojorijiniji. Cunora, Jesuuri nojori niqiuara naa pohuataquiaari:



<sup>10</sup> —Fariseo pueyanoori quiaquiaari Pueyaso Secojojua tiajinia na sec-  
 ojonura Pueyaso. Jiyacaritij, Romano jiyaniijiara cumaneeca masejo-  
 jua pueyanoori quiaquiaari Pueyaso na secojonura tiijuhuaaj. <sup>11</sup> Fariseo  
 pueyanoori nujuariquiaa Pueyaso na secojosacari. Naa sequeriquiaari:  
 “Pueyasonaa, paacarasho janiyari maja juhua tamasaca pueyani. Tamasaca  
 cutaraari nohuasenujuaca, sesa miijiaca, maaji porocujuhuaaj. Naajuhuaaj,  
 shuquiriaatia quiyanijia, janiyari maja sesa miijiani juhua nio pueyano-  
 jua niya cuata secojiyani, cumaneeca masejona pueyanoni. <sup>12</sup> Janiyari  
 caapiqui juuca miaqueyaquiquiaani puetunu semaanajanaa cua shuquir-  
 itiniuria quiajaniya. Naajuhuaaj, janiyari pueyaracaanu puetunu cua  
 masesanojinijianaa niqutioquiaa quiarani, taa Moisés rootaquiaaricua-  
 jani”. <sup>13</sup> Cumaneeca masejonaari saniniuujia tucuacaanu ni nujuasee. Na  
 secojosacari, majaari quenaaja na maunu quiriqiaa jiyocuacaanu. Tama  
 nojuajaari na jiriquia piquiriquiaa na taraajenuta sesa na miishanojiniji.  
 Naa sequereeri: “Pueyasonaa, cucua quia taraajere. ¡Cua jiyanoori! ¡Sesa  
 miijianijia!” Naa secojoquiaariiri. <sup>14</sup> Seetanujuanaa nia sequeyanijia, cuma-  
 neeca masejonaari Pueyaso jiyanooshano tacateyarohua cutara. Fariseo  
 pueyanoori saniniuujia jiyanoyaquishoo tacateyarohuacujua. Naacuajitij,  
 cante tama na cuaqueyajaaja jiyateya juhua maninia pueyano na quiniuria  
 tamajaajani, nojuajaari cararosaanutaniya. Saniniuujia, cante sesa na  
 miishano seetaquijiani Pueyaso jiyanooniuria nojuajani, Pueyasoori cuno  
 pueyano jiyatenutaniya seetanujuanaa sesa miyaquijia na quiniuria.

*Jesu niasacari na juaashiquia conaajaacua*

*(Mt 19.13-15; Mr 10.13-16)*

<sup>15</sup> Jiyacaritij, conaajaari poosaariquiaa Jesuucua, Jesu nianura nojoriicua  
 na juaashiquia, Pueyaso jiitianura maninia nojori. Jesu saquiriojosano  
 pueya jaara niqiuquiaari conaaja pooshiyano Jesuucua, nojoriiri na poonaa  
 juaarii. <sup>16</sup> Jesuuri saaja conaaja poonaa sequeree, conaaja cuara nocua  
 poosaaria. Na nuhuaji, na pueya sequereeri:

—Naatujoori cuara poosaaria cucua. Maja na poonaa tenujunu. Cante  
 Pueyaso muerasura quiniu paniani, nojori cuara jiyateera tama na  
 cuaqueyajaaja juhua nio naatujooriria. <sup>17</sup> Seetanujuanaa nia sequeyanijia,  
 cante tama na cuaqueyajaaja jiyateyaquiya juhua naatujooriria Pueyaso ru-  
 paacua na tiuuniuriani, cuno pueyanoori maja na naata Pueyaso muerasura  
 na quiniu.

*Casamiriaca pueyano pocoojosacari Jesuta*

*(Mt 19.16-30; Mr 10.17-31)*

<sup>18</sup> Tamonu Judiocuaca camarnuuri Jesu nequesotaquiaari:

—Maninia niishitiojonanaa, ¿taa cua miiniutianiyani, jiya puequesacari  
 cua samiitianishaanura, pueyaracaanu quijiaara cua quiniuria Pueyasotani?

<sup>19</sup> Jesuuri na riucuaaree:

—¿Casaara quia sequeya janiya maninia pueyanotani? Saaja  
 Pueyaso cutaraari seetanujuanaa maninia. Majaari socua tamonu  
 quiniu. <sup>20</sup> Pueyanonaa, quiaacuajaari Moisés Rootasano niishijia. Naa  
 naajiotasanocuajaari quiya: “Maja quia camishoo maaji numuetucunu.  
 Maja monu. Maja nohuasenu. Maja tamonuucua saquiriojotanu quia  
 sapojonuta. Quia que, quia nucua tojijia quia quiri”.

<sup>21</sup> Pueyanoori Jesu riucuaaree:

—Janiyacuaajaari cua naatujuajiniji puetunu cuno tojijiajanaani.

<sup>22</sup> Naa na sequesacaritij, Jesuuri na sequeree:



—Quiyajaari niquiriyatu casaa quia miishoojua. Nio quia miiri: puetunu quia jiitiasanojuanaa quia niqutiojore cumaneecara. Na nuhuaji, casami-ijiuniucua pueya cuno cumaneeca quia niqutiojore nareja. Naacuajitij, quiaari jiyanoehua casamiriaca quiniutianiya cutara jiyocuacaanu. Na nuhuaji, quiocua nimiohua cutara, cua pueyano quia quiniuria.

<sup>23</sup> Na tojishacari Jesu sequesano, nojuajaari jiyanoehua taraajequee, jiyanoehua queraatia casamiriaca na quishacari. <sup>24</sup> Jesu niquishacari nojuaja taraajeyano, Jesuuri na pueya sequere:

—Casamiriaca pueyara, jiyanoehua jiyajenetaari Pueyaso muerasu nojori quiniuria. <sup>25</sup> ¿Camelloteeri na naata cusupuetaja cuhuoco tamajiria tajiniu? Maja na naata. Naajuhuj, casamiriaca pueyanora, socua jiyanoehua jiyajenetaari Pueyaso muerasu na jatanishaanura.

<sup>26</sup> Pueya tojishacari naa Jesu sequesantej, nojoriiri naa na nequesotaree:

—¿Canteeri Pueyaso muerasura quiniutianianitioj?

<sup>27</sup> Jesuuri nojori riucua:

—Maja pueya na naata tama na cuaqueyajaaja jiyatenu Pueyaso muerasu nojori quiniuria. Naajaa, Pueyaso cutaraari na naata.

<sup>28</sup> Pedroori Jesu sequere:

—Jiyaniijianaa, ¿canaarijataj? Canaari puetunu canaa jiitiasanojuanaa tiujiaquiaarini canaa nuhuajiniuria quiajaniya.

<sup>29</sup> Jesuuri na riucua:

—Seetanujuanaa nia sequeyanijia, cante na panishano casaa tiujiaquiaari Pueyasora na poonijionurani: na tia, na que, na nucua, tapueyocuaca, necocua, necohua, nojuajaari socua jiyanoehua queraatia masenutaniya mijiria na quishacarijia. <sup>30</sup> Na nuhuaji, samiitianishano quiniutianiyari pueyaracaanu shuquiriaatia na quiniuria Pueyaso shipinishocoriquiano quiarinio jiyajinia.

*Jesu pacutesacari pahuatanu, nojuaja mosaanutaniya*

*(Mt 20.17-19; Mr 10.32-34)*

<sup>31</sup> Jesuuri saaja na doce saquiriojosano pueya jiyataaree tamocora. Naa nojori sequereeri:

—Paari quiarijia Jerusalén tiacajinia quiaani. Janiyari quiniqui puetunujuanaa miishaanutaniyani taa tariucuaacaanu pueyara Pueyaso sequesano caminiujiunaa sequequiaaricuaaja janiyajinijini. <sup>32</sup> Naacuajitij, janiyari tahua niqutiosaanutaniyani. Nojoriiri cua macaatiutianiya. Taraatia cua miitiutianiyari. Cua riocojotunutaniyari. <sup>33</sup> Cua piqutiutianiyajaarihuaj. Na nuhuaji, cua motunutaniyari. Naajaa, jiuujianaraca juucajinia, janiyari samiitianutaniuhuni.

<sup>34</sup> Majaari Jesu pueya niishiniu quiriquiaa quenaaja na sequesano. Majaari nojori niishiniu quiriquiaa casaa Jesu sequeriquiaani. Juhua miriqui sequesanoori quiriquiaa nojoriria.

*Jesu jeecasacari cariojuaru pueyano Jericó tiacajinia*

*(Mt 20.29-34; Mr 10.46-52)*

<sup>35</sup> Na pueyata Jesu quishacari tari cateca Jericó tiacaacuara, cariojuaru pueyanoori nuu shuucuaaji cajiriquiaa, cumaneeca na masejonura pueya tajishacari nucua. <sup>36</sup> Cariojuaru tojishacari queraatia pueya tajiyano, pueya nequesotareeri:

—¿Casaatejanojoni?

<sup>37</sup> Pueyari na sequere:

—Nazaret tiacajinijinio Jesucuaaja tajiya.

<sup>38</sup> Cariojuaruuri nacaquee:

—¡Jesunaa! ¡Supuetana David niquiohuacuajinio supueno pueyanonaa! ¡Cucua quia taraajere quenaaja!

<sup>39</sup> Jesu puetanaa pueyari na juaarii na sanaajanura juucua. Nojuajaari saaja socua jiyanoehua nacaree:

—¡Supuetana David niquiohuacuajinio supueno pueyanonaa! ¡Cucua quia taraajere!

<sup>40</sup> Jesu tojishacari nojuaja, nujuaseeri. Jesuuri pueya sequeree cariyujuaru cuara jaatucusaaria nocua. Cariyujuaru tiuquishacari nocua, Jesuuri na nequesotaree:

<sup>41</sup> —¿Casaa quia paniya cua miiniuria quiajaniani?

Cariyujuaruuri Jesu riucuaaree:

—¡Jiyaniijianaa, niquijia quiniu panihuanijia!

<sup>42</sup> Jesuuri na sequeree:

—¡Niquijia quia quiriohua! Quia namijiacuaja tari jeequerohua cucua quia tiushacari.

<sup>43</sup> Jiyacaritij, cariyujuaruuri maninia niquijia quiqii. Jesu nuhuaji sacuaareeri na shuquiritianuta Pueyaso. Puetunu Jesu miishano niquiniaajanaari Pueyaso maniniuhuaqueetariquiaa.

## 19

### *Jesu pocoojosacari Zaqueota*

<sup>1</sup> Jesuuri Jericó tiacajinia tiuquiiioquiaari na pueyata. Tiaca jiuujiaaco quiariquiaari. <sup>2</sup> Cuno tiacajinia quiquiaariiri casamiriaca pueyano. Na sesa quiquiaari Zaqueo. Zaqueori Roma tiacajinia quijia jiyaniijia cumaneeca masejonaa camarnu quiquiaari. <sup>3</sup> Nojuajaari Jesu niishiniu panijia juucua. Majaari na naata niquiniu quiriquiaa Jesu, puera jiyanoehua pueya quiniucua Jesu shocua. Naajuhuaaj, Zaqueori puera posucuashi quijia. <sup>4</sup> Cunora, Zaqueori netequiaari Jesu tajoji. Nu shuucuaaji sicómoro naanaacua macaseeri, maninia na niquiniuria tiji Jesu, jaara cunoco tajimia. <sup>5</sup> Jesu tajishacari Zaqueo cariquiaco, Jesuuri nocua mauree. Na sequereeri:

—Zaqueonaa, ¡ritia quia rosemohua! Janiya quiarijia quia tiajinia maquenutaniyani.

<sup>6</sup> Zaqueori ritia rosemohua. Jesu tiuquinitiaree na tiajiniaari jiyanoehua na shuquiriniutia. <sup>7</sup> Tamasaca pueya jaara Jesu niquiquiaari Zaqueo tiajinia tiuquiyano, puetunu nojorijianaari Jesu sesacanu coteequiaari. Tama sequeturiquiaajaarijia: “Cuno pueyanoori sesa miijia pueyano tiajinia tiuquishii”. <sup>8</sup> Na nuhuaji, Zaqueori nujuaree. Jesu sequereeri:

—Seetanujuanaa quia sequeyanijia, Jiyaniijianaa, janiyari quiarijia quiocua tiuuriini. Naacuajitij, janiyari casamiijuniucua nareja niquitiojonutaniya puetunu cua jiiitasano cajiniocuajiniijianaani. Naajuhuaaj, janiya jaara puera cumaneeca masecanu tamasaca pueyajiniji cua sapojonutani, janiyari nojori niquitiojonutaniuhua socua jiyanoehua queraatia cumaneecani cua nohuasesanojiniji nojori.

<sup>9</sup> Jesuuri na sequeree pueya niquiara:

—¡Quiarijiani, nio tiajinia quiniaa pueyari tari jiyanooshaaree! Nio pueyanocuaajaari supuetana Abraham niquiohuacuajinio supuenojuhuaaj. Nojuajaari cucua tiuuri taa Abraham tiuquiquiaari Pueyasocuaacuaani.

<sup>10</sup> Janiyacuajaari cunora mijiria niquiaarini, tashucuaano pueya cua panenura, nojori cua jaariutianura Sesaaca.

*Miriqui Jesu pohuatasano diez cumaneecajiniji*  
(Mt 25.14-30)

11 Tii quiniaa pueyari Jesu pohuatasano tojitiariquiaa. Jesuuri tari cateca quiriquiaa Jerusalén tiacajiniji. Pueyari jiyaniriquiaa Jesuuri Israel pueya jiyaniijiaara quiniutianiya tari, Pueyaso muerasu na jiitianura mijiria. Nocuaji, Jesuuri nojori pohuataree nio miriqui pohuatasano, nojori na niishitiojonura. 12 Naa nojori niquiara pohuatareeri:

—Tamonu jiyaniijia niyanuuri quiquiaari. Nojuajaari tucuacaanu tamonu jiyajinia quiaquiaari jiyaniijiaara na jiyatesaanura. Jiyaniijiaara na jiyatesaanu nuhuaji, nojuajaari tacateriquianohua quiriquiaa, narta pueya jiyaniijia na quiniuria. 13 Na nuhuajiria, nojuajaari diez na seya sequeree nocua nojori nijionura. Nojuajaari puetunu nojorijianaa niqutiojoree niquiriyatu cumanee, orojiniji shipinishano. Nojori sequereeri: “Nio cumanee nia poonitijiore, janiya cuara tiuquiriohuajaatiinijiaj”. 14 Na nuhuaji quiaqueeri. Na jiyajinijinio pueyari maja na niqiniu paniniu quijia cuno pueyano. Cunora, nojoriiri pueya jiyaramiquirii na nuhuaji, jiyaniijiajanaa nojori sequenura: “Maja canaa paniniu cuno pueyano, canaa jiyaniijia na quiniuria”.

15 'Naajaa, nojuajaari saaja jiyatesaaree jiyaniijia na quiniuria. Na nuhuaji, na jiyajinia tacateyarohuari. Jaara tiuquishuhua, na cumaneeca na niqutiojosano seya sequereeri, nocua nojori nijionura. Nojuajaari niishiniu paniriquiaa taa cumaneeca socua nojori reratequiaarini, nojori poonitijosacari na niqutiojosano cumaneeca. 16 Coteenu seruuri nocua nimiaa. Na jiyaniijia sequeeseeri: “Cua jiyaniijianaa, cua poonitijosacari quia niquticosano cumanee janiya, janiyari socua diez cumaneeca reratecanuni”. 17 Na jiyaniijiaari na sequeree: “¡Maniniacuaja! ¡Quiaacuajaari maninia cua seru! Quiaari secaja cua niquticosano quiajaniya poonitijioriquiaa shitimia quiria. Naaratej, janiyari quia jiyatenutaniya diez tiaca jiyaniijiaara quia quiniuriani”. 18 Na nuhuaji, tamonu na seruuri nocua nimiaajuhua. Nojuajaari na jiyaniijia sequeree: “Cua jiyaniijianaa, cua poonitijosacari quia niquticosano cumanee janiya, janiyari socua cinco cumaneeca reratecanuni”. 19 Na jiyaniijiaari na sequereejuhua: “Quiaari cinco tiaca jiyaniijiaara quiniutianiya”.

20 'Na nuhuaji, tamonu na seruuri nocua nimiaajuhua. Na jiyaniijia sequeeseeri: “Jiyaniijianaa, niya quia quia cumanee quia niquticosano janiya. Janiyari na cojuacanu maniniani, toqueraujinia jiuniocosano. 21 Janiyari naa miiquianuni cua pueresacari quiajaniya. Janiyari niishiyani, quiaari quiarta pueyacua taraajeyashijia. Quiaari tamasaca racatasanojiniji poojua. Quiaari tamasaca natoosanojiniji senoojuajuhua”. 22 Na jiyaniijiaari na juaarii: “Sesaacanaa, tama quia sequesanojiaa janiyari quia nequesorenutaniyani. ¿Naatee? ¿Quiaateeri niishi-quianu janiyari pueyacua taraajeyashijiani? ¿Janiyateeri tamasaca racatasanojiniji poojuani? ¿Janiyateeri tamasaca natoosanojiniji senoojuajuhua? 23 Quiaa jaara jiyaniquianu janiya naa miijiani, ¿casaara cua cumanee quia niqutioyaquiquianu cumaneeca cojuanaarini? Nojori jaara cua cumanee poonitijiocanu, janiya maara socua queraatia na riuriasuhua, cua tiajinia cua tiuquishacariuhua”. 24 Cunora, na jiyaniijiaari tii quiniaa pueya sequeree: “¡Cua cumanee nia jaariutiare cuno! Nia niqutiojoree cua maninia seru, cante diez cumaneeca jiitiaacuajani”. 25 Nojoriiri na sequeree: “Jiyaniijianaa, ¿casaarateni? Nojuacuaja tari diez cumaneeca jiitiaa”. 26 Jiyaniijiaari saaja nojori riuquaree: “Seetanujanaa nia sequeyanijia, cante tari jiitiaani, nojuajaari socua niquticosaanutaniya. Cante na jiitiaaquiyani, secaja na jiitiasanoori puetunujanaa jaariutiasaanutaniya, cucua tiuyashijia na quiniucua. 27 Quiarijia,

cua paraa saniniuujia, cuno pojori canapuate cua paniyaquiquianu nojori jiyaniijia cua quiniuriani, miji nia jayore nojori. Niya cua niquiara nia puecoore cua ruuretajaca seque”.

*Jesu tiuquishacari Jerusalén tiacajinia*  
(Mt 21.1-11; Mr 11.1-11; Jn 12.12-19)

<sup>28</sup> Nio na pohuatanu nuhuaji, Jesuuri na pueya puetaareecuahuaj Jerusalén tiacajiniara. <sup>29</sup> Jaara cateca quiriquiaa tari Betfagé tiaca, Betania tiacanio, Olivo cuhuariquia tuhuananujuhaj, Jesuuri caapiqui na pueya sequeree:

<sup>30</sup> —Cuno shiitianiyojua tiacajinia nia quiaare, pa tacoji niquishiyani. Niaa jaara tiuquishii, niaari burro riuriatanutaniya morotasano, pueyano cajishoojua na nijinia. Niaa jaara na niquishii, niocua na samaacartasee. Niaari na jaatucumohua miji. <sup>31</sup> Pueya jaara nequesotare nijaniya casaara nia samaacartaanoj, niocua na riucuar: “Jiyaniijia na paniya”.

<sup>32</sup> Jesu pueyari quiaaree. Nojoriiri na riuriatasee taa Jesu sequequiaar-icujani. <sup>33</sup> Nojori samaacartasacari burro, na camaruhuari nojori nequesotaree:

—¿Casaara nia samaacartaa canaa burroni?

<sup>34</sup> Nojoriiri na riucuar:

—Jiyaniijia na paniya.

<sup>35</sup> Na nuhuaji, nojoriiri na jaatucuyarohua Jesuucua. Jesu pueyari na toqueya niojoree burro nijinia Jesu cajijiara. Na nuhuaji, nojoriiri Jesu cajitirii na nijinia. <sup>36</sup> Na quiasacari Jerusalén tiacajiniara, pueyari na toqueya muevoquiaari nucuaco Jesuucujaji. <sup>37</sup> Nojori rosetanu panishacari Olivo cuhuariquia tuhuananujiniji, puetunu Jesu pueyajanaari juhuacatecara nacoquiaari nojori shuquiriniutia. Nojoriiri Jesu maninihuaqueetariquiaa puetunu na cumaacata na miishanojuanaa nojori niquiniuucua. Nojoriiri cunora jiyanhua shuquiritariquiaa Pueyaso. <sup>38</sup> Nojoriiri naa nacooriaquiaa:

—¡Pueyaso cuara shuquiritiiria pa Jiyaniijia, Pueyaso Jiyarosano na quiniuucua! Pueyaso pocua taraajerohuani. Pa jiyanooriohuani. ¡Nojuajaari jiyanhua maninia! ¡Pa shuquiritiarenaj!

<sup>39</sup> Cuniqui pueya tajinia quiniaa Fariseocuaca tojishacari naa nojori sequesanotej, nojoriiri Jesu sequeree:

—¡Niishitiojonanaa, quia pueya quia sanaajare, maja naa nojori sequenura!

<sup>40</sup> Jesuuri saa sequereejaa:

—Seetanujuanaa nia sequeyanijia, nio pojori jaara sanaajetare, ¡sairi saniniuujia nacoanutaniyacujua!

<sup>41</sup> Tari Jesu quishacari Jerusalén tiaca shuriucua, na niquishacari cuno tiaca, Jesuuri cuno tiacajinia quiniaacua nujuqueree. <sup>42</sup> Cunora, juhua pueyano sequeree Jerusalén tiacaari:

—Jerusalén tiacanaa, quia niishitiriquia quiarrijiani, casaa quia paniya jiyanooshano quia quiniuriani, shuquiriaatia quia quiniurijuhaj. Taraatia quijianaa, quia Jiyanooriquianoori juucua niya quia. Majaari quia niishiniu nojuaja, juhua nimishitiu quia quishacari. <sup>43</sup> Cunora, na nuhuajiiri jiyanhua taraatia quiniutianiya quia. Quia paraari quia mataconutaniya quia shocuaqueya, na cosenura maninia quiajaniya quia mashiyaquiniuucujaji. Naacuajitij, quia paraari quiocua juhuacunutaniya na miaquejonura quiajaniya. <sup>44</sup> Quiaari jiyareta sureesaanutaniya. Quia tiacajinia quinaari puecoosaanutaniya. Quia tiacaari puetunu niyartasaanutaniyajanaa. Majaari tamonu saajia cureenu quiniutianiya quenaaja tamonu saajia caco

maano. Quiaari naa miishaanutaniyatej quia niishiyaquiniuucua, Pueyasoori quiocua niqiaari najuhuanaj, quiocuaji na tacunura juucua. Quiaari saaja na ruuretacanu.

*Jesu jaacasacari seya niqutiojonaa Pueyaso Secojoua tiajiniji*

*(Mt 21.12-17; Mr 11.15-19; Jn 2.13-22)*

<sup>45</sup> Na nuhuaji, Jesuuri Pueyaso Secojoua tiajinia tiuquiquiaari na pueyata. Nojuajaari juhuacatecara pueya tohuatanijioree, canapuate na seya niqutiojoriquiaacuajani Pueyasocuara puecoosocoriquiano. <sup>46</sup> Jesuuri nojori sequeree:

—Tariucuacaanu Pueyaso Rupaajinia naa naajiotasaaquiaariti Pueyaso sequesano: “Cua tiaari pueya secojonuujua janiya”. ¡Niaari saniniuujia na jiyatecanu nohuasenuujuaca quiquiora!

<sup>47</sup> Puetunu juucajanaa, Jesuuri jiyacari pueya niishitiojoriquiaa Pueyaso Secojoua tiajinia. Narta Judiocuaca jiyaniijianucuaari saaja na monu paniriquiaa. Pueyacuara secojonaa jiyaniijianucua, Moisés Rootasanojiniji niishitiojonaa, mariyata narta Judiocuaca jiyaniijianucuanio, puetunu nojorijianaari tari roojotooriquiaa juucua taa na motunutaniya Jesuni.

<sup>48</sup> Puetunu pueyajanaari saaja shamaatia tojitiariquiaa puetunu Jesu sequesanojuanaa. Cunora, majaari cuno jiyaniijianucua naata monu quiriquiaa Jesu.

## 20

*Pueya nequesotasacari Jesu, cante na jiyaronani*

*(Mt 21.23-27; Mr 11.27-33)*

<sup>1</sup> Tamonu juuca, Jesuuri Pueyaso Secojoua tiajinia niishitiojoriquiaa. Pueya niqiaara pohuatariquiaari taate nojori naata Pueyaso muerasura quiniuni. Jiyacaritij, pueyacuara secojonaa jiyaniijianucuaari Jesuucua nijiomaa. Moisés Rootasanojiniji niishitiojonaari nojoritia nijiomajuhujaj, narta Judiocuaca camarucuanio. <sup>2</sup> Nojoriiri Jesu nequesotaree:

—¿Cante quia jiyatecanu Pueyaso Secojoua tia jiyaniijia quia quiniuriani? ¡Canaa quia riucuaare! ¿Cante quia jiyaronani?

<sup>3</sup> Jesuuri nojori sequeree saniniuujia:

—Janiya nia nequesotanu panijajuhujaj. Cua riucuaare. <sup>4</sup> ¿Cante Juan jiyaroquiaari na tiuquinijionura pueyani? ¿Pueyasote na jiyaroquiaari, tama narta pueyajaaja soj?

<sup>5</sup> Nojoriiri juhuacatecara tamajaaja pocoojoquiaari. Tama sequetooriquiaajaarjia:

—¿Taa pa riucuanutaniyani? Paa jaara sequereni: “Pueyaso na jiyaroquiaari”, nojuajaari pa sequenutaniya: “¿Casaara nocua nia tiuyaquiquiaari-irini?” <sup>6</sup> Saniniuujia, paa jaara na sequereni: “Juancuaja nareja pueya jiyarosano quiquiaari”, puetunu pueyajanaari pa jacunutaniya saitia na puecoonura pajaniya. Nojoricuajaari sequequiaa: “Juanna seetanujuanaa Pueyaso sequenu panishano caminiujiunia quiquiaari”.

<sup>7</sup> Nojoriiri cunora Jesu riucuaare:

—Johujaj. Maja canaa niishiniu canaquitijia Juan jiyaroquiaari na tiuquinijionura pueyatej.

<sup>8</sup> Naaratej, Jesuuri nojori sequeree:

—Janiyajuhujaj, majaari cua sequenu quiniutaniya niajaniya, cante cua jiyaroquiaarini naa cua miiniuriatej.

*Miriqui Jesu pohuatasano sesa miijiaca poonijionaajiniji*

*(Mt 21.33-44; Mr 12.1-11)*

<sup>9</sup> Na nuhuaji, Jesuuri pueya niishitiojonu coteerohuacuhuj nio miriqui pohuatasanota. Sequereeri:

—Tamonu pueyanoori cuhuariquiajinia uva natoouquiaari. Na nuhuaji, na niqutioquiaari tamasaca pueyari, nojori cojuanura nera. Na camaruuri tu-cuacaanu quiaaree, tii na shocotejonura marijia. <sup>10</sup> Uva quishacari noshuri-ujua, saniya cuhuariquia camarujuaanaari na seru jiyaroree cuhuariquia cojuanaa pueyacu. Jiyarosaareeri tiji na masenura na camarurajanaa, uva carojotasanojiniji. Na camarujuaanaacuajaari tarijia pocoojoquiaari cuhuariquia cojuanaa pueyata, taa nojori niqutionutaniya na carojotasano-jinijini. Cuhuariquia camaru seru tiuquishacari, ¡cuhuariquia cojuanaari na piquitiurii saaja! Na jiyaroturohua juhuasuuri. <sup>11</sup> Cunora, cuhuariquia camarujuaanaari tamonu na seru jiyaroree. Cuhuariquia cojuanaari na miitiurii sesajuhuj. Na saarijiotureeri. Na piquitiuriiri. Na jiyaroturohua juhuasuajaariuhuj. <sup>12</sup> Cuhuariquia camarujuaanaari socua tamonu na seru jiyaroree nojoriicua. Nojoriiri sesa miitiurii nojuajuhuj. Na nuhuaji, nojoriiri na caponeeree cuhuariquiajiniji tariucua naatishano.

<sup>13</sup> 'Naaratej, cuhuariquia camaruuri tama sequereeaaja: “¿Taa cua miiniutianiyarini? Quiyanuniyojua jiyaroreeraquij. Cuno pojori jaara cua panishano niyanu niqutiuri, maja naasucua nojori rerequetenu quiniutianiya nojuaja”. <sup>14</sup> Saniniuujia, cuhuariquia cojuanaa jaara cuhuariquia camaru niyanujuaanaa niquirii nojoriicua niyano, tama nojorijiaarijia sequetooree: “Nojuacuaja cuhuariquia camarura quiniutianiya na que niti, na que jaara shaajeyariquia. ¡Pa morej! Paari nio cuhuariquia camarura quiniutianiya saniniunijia”. <sup>15</sup> Naacuajitij, cuno cuhuariquia cojuanaa pueyari cuhuariquia camaru niyanu jaatiurii cuhuariquiajiniji. ¡Cuniqui na motureeri!

Naa nojori na pohuatanu nuhuajitij, Jesuuri pueya nequesotaree:

—Naa nojori miiniucua neyanutej, ¿taa na que miiniutianiya cuno sesa pueyarini? <sup>16</sup> Seetanujuaanaa nia sequeyanijia, nojuajaari nocua quianutaniya nojori na puecoonura. Na nuhuaji, na cuhuariquia niqutionutaniya tamasaca pueyari, nera nojori cojuanura cutara.

Pueya tojishacari nio, nojoriiri sequequiaari:

—¡Juhuej! ¡Pueyaso cuara naa miyaquiiriatej!

<sup>17</sup> Jesuuri nojori niqinijiooree. Nojori sequereeri:

—¿Naatee? ¿Nio naajiotasanooriuhuj, tariucuacaanu Pueyaso Rupaajiniani? ¿Niaate niishiya casaa na sequeyani? Naa sequeyariquij:

“Saitia tiana pueyari tamonu saajia sojotanutaniya, nojori jiyanihacari cuno saajia sesarujajau. Na nuhuaji, cuno saajiaari socua panishano saajiaara jiyatesaanutaniuhua”.

<sup>18</sup> Cante cuno saajiaacua tiuriyani, nojuajaari juhua rashiquijiniutianiya. Cuno saajia jaara pueyanocua tiyare, cuno pueyano jacanajonutaniyari. Shahuej.

<sup>19</sup> Jiyacaritij, pueyacuara secojonaa jiyaniijianucua, mariyata Moisés Rootasanojiniji niishitiojonaari Jesu quianu panirii juucua. Nojoricuajaari niishirii, Pueyaso saquiriojosano Israel pueya jiiitianaa nojori quiniucua, Jesuuri miriqui pohuatariquiaa nojorijiniji, tianaajiniji na pohuatasacari. Naajaa, jiyacaritij, majaari nojori quiatunu quiquiaari Jesu, nojori puere-sacari Jesu panijiaa pueya.

*Jiya jiyaniijia cuara niqutiosaaria na sequesano cumaneeca  
(Mt 22.15-22; Mr 12.13-17)*



<sup>20</sup> Naaratej, nojoriiri tamasaca pueya jiyaramiquiquiaari Jesuucua, sapuenu juhua maninia pueya niquishano. Cuno pueyari jiyaramiquishaaquiaari Jesu nojori pocuatenura sesa juucua, nocuara tonujusaanura. Jesu jaara nojori riucuaquiaari sesa, maara Romano jiyaniijia niquitiosaaquiaari saniitiosocoriquiano. <sup>21</sup> Naacuajitij, cuno pueyari Jesu nequesotaquiaari:

—Niishitiojonanaa, canaari niishiyani, quiaari maninia niishitiojona. Majaari sesa quia sequesano. Naajuhuj, majaari rimiajata quia niquiniu pueya. Quiaacuajaari seetanujanaa niishitiojoquiaa, taa Pueyaso paniya canaa miiniuriacuajani. <sup>22</sup> Cunora, canaa quia sequere taa canaa miiniutianiyani. Roma tiacajinia quijia jiyaniijiaari pa sequequiaari Judiocuaca cuara cumaneeca niquitiojora nera, na jiiatasano pueya pa quishacari. Naaratej, ¿maninateeri pa miiniuria na sequesano?

<sup>23</sup> Jesuuri niishiquii nojoriiri nojuaja nequesotariquiaa najuhuanaj, nojori sapojonuta. Cunora, nojori sequereeri:

<sup>24</sup> —Cua niquitiri quia cumanee. ¿Niooriuhuj? ¿Cana naaquiti nocuani? ¿Cana sesate nocua naajiotasanoni?

Jesu riucuatereeri:

—Cunocuaja canaa sequesano Roma tiacajinia quijia jiyaniijia César naaqui, na sesajuhuj.

<sup>25</sup> Jesuuri nojori sequeree:

—Jiyaniijia César cuara tama na casaajaaja niquitiosaaria. Nojuacuajaari na camaru. Saniniuujia, Pueyaso nia niquitiore cutara nerano tama na casaajaaja. Nojuajaari pa camaru.

<sup>26</sup> Saaja maninia Jesu riucuasacari pueya niquiara nojori, majaari nojori naata nocuara tonujunu quirii. Nojoriiri saniya jiuujiateree Jesu riucuasacari saaja maninia nojori. Naacuajitij, nojoriiri socua sanaajetaree.

*¿Paate samiitiaconutaniuhuani?  
(Mt 22.23-33; Mr 12.18-27)*

<sup>27</sup> Na nuhuaji, noojiaqueya Saduceocuacajiniijioori Jesuucua niquiaari. Saduceocuacaari jiyaniijia macunucua pueya maja na samiitiaconu quiniutianihua. Naaratej, nojoriiri Jesu sequeree:

<sup>28</sup> —Niishitiojonanaa, supuetana Moisés cuajaari pa rootaa na naajioneejina, pueyano jaara cusoyare mueyaju, tarajanu cuara camiria mashiquio, mueya na mueratenura tarajanu niti. <sup>29</sup> Tamonu mashajaari seis tapueyocuaraca quiquiaari. Nojuajaari jiyapueranu quiquiaari. Coteenu camiquiaariiri. Nojuajaari cusoquiaari muetuhuojua. <sup>30</sup> Cunora, na nuhujishanaari na mashiquio camirii. Nojuajaari muetuhuojua cusoquiaarijiuhuj. <sup>31</sup> Naaratej, neyaca tarajanuuri mashiquio camiquiaarijiuhuj. Nojuajaari muetuhuojua cusoquiaarijiuhuj. Puetunu cuno mashiquiorijianaari naa camioquiaari cuno maajitia. Puetunu nojorijianaari cusonuuquiaari muetuhuojua. <sup>32</sup> Na nuhuaji, pueya mashiquioori shaajequiaarijiuhuj. <sup>33</sup> Naacuajitij, macunucua jaara samiitiacorohua, ¿teyano cuno siete neyacaajiniijiniote seetanu neyacajanaa quiniutianiyani? Cuno mashiquiocuajaari puetunu cuno siete pueya niquiocua quiquiaari.

<sup>34</sup> Jesuuri nojori riucuarere:

—Mijiria pa quishacarijia, canuu, maajipohuari camioquiaa. <sup>35</sup> Saniniuujia, majaari noo pojori camionu quiniutianiya canapuate samiitianiijosaanutaniuhuacuajani, maninia quijia nojori quiniucua Pueyaso niquiara mijiria. <sup>36</sup> Majaari nojori shaajenu quiniutianihua. Nojoriiri shaajeyashijia quiniutianiya juhua Pueyaso seya. Nojori

samiitiaconuucua macujiniji, cunora, nojoriiri Pueyaso muerasujuanaa quiniutianiya cutara. <sup>37</sup> Supuetana Moisés cuajaari pa niishitiquiaari, macunucuaari samiitianijiosaanutaniuhua. Moisésri naa naajiotaquiaari Pueyaso sequesano nojuaja nequeru casaja noshiyanojinijitij. Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiano, quia supuetana Jacobo Jiyaniijiajuhuj”.<sup>38</sup>

<sup>38</sup> Naacuaajitij, paari niishiyani, puetunu Pueyasooocua tiuujica shaajecono pueyajanaani, nojoricuajaari saminiucua quiya Pueyasora. Pueyasoori maja macunucua Jiyaniijia. Na pueya shaajeconocuaajaari saminiucua quiya nera cutara.

<sup>39</sup> Noojiaqueya Moisés Rootasanojiniji niishitiojonaa pueya tojishacari naa Jesu sequesantej, nojoriiri Jesu sequeree:

—Maniniacuaajaari quia sequesano, Niishitiojonanaa.

<sup>40</sup> Naa Jesu riuhanesacari saaja maninia nojoritij, majaari socua pueya nequesoreenu paniniu quiriquiaa nojuaja.

*¿Cante Cristo supuetanani?*

*(Mt 22.41-46; Mr 12.35-37)*

<sup>41</sup> Jesuuri naa nojori nequesotaree saniniuujia:

—¿Casaara na sequesaaquiaacuaraarini, Pueyaso Jiyarosanaari supuetana David niquiohuacuajinio supuenutaniya? <sup>42-43</sup> Supuetana Davidjanaacuaajaari naa naajiotaquiaari na jaaquequejoneejinia:

“Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijiaara, janiya cuara quia paraa shocotare puetunujuanaa-jaatijia’ ”.

<sup>44</sup> ¿Cristotucua taa David niquiohuacuajinio supuereni? Davidcuajaari na sequeya “cua Jiyaniijiaata”.

Cuno pueyari maja na naata na riucuanu quiriquiaa.

*Jesu numootesacari na pueya, Moisés Rootasanojiniji niishitiojonaa pueyacuaji*

*(Mt 23.1-36; Mr 12.38-40; Lc 11.37-54)*

<sup>45</sup> Puetunu pueyajanaa tojitiasacarijia Jesu, Jesuuri naa na saquiriojosano pueya sequeree:

<sup>46</sup> —Tama nia cuaqueyajaaja nia cojuare Moisés Rootasanojiniji niishitiojonaa pueyacuaji, nia miyaquiniuucuaaji taa nojori miiquiaacuaani. Nojoriiri tucuaque toqueya cushiniu maniniucuaquiaa na rucuanejotajara pueya niquiara, pueya shootianura nojori. Nojoriiri paniquiaa pueya saruhuata-nura nojori juhua tojishano pueya, nojori rucuanijosacari tiaca jiuujiajinia curotasano cajitiucuaajinia. Nojoriiri socua panishano cajitiucuaajinia cajiniu maniniucuaquiaa Pueyaso Secojojuatiajinia, tamasa tiajiniajuhuj, nojori jaara masusaare queranacunura. <sup>47</sup> Naajuhuj, nojoriiri mashiquiopue tiaca masequiaa secaja cumaneecata nojori sapojonuta. Naa jiyasohuaja nojori miiniu nuhuajitij, pueya niquiara, nojoriiri najuhua tucuyocua secojoquiaa Pueyaso, pueya jiyaniinuria nojori maninia pueya cutara. Naa nojori miiniuucuatej, nojoriiri jiyanohua saniitiosano quiniutianiya.

## 21

*Casamijiu mashiquio niquitiosacari na cumanee juurane Pueyasora*

*(Mr 12.41-44)*

<sup>1</sup> Pueyaso Secojojuatiajinia, Jesuuri casamiriaca pueya shootiariquiaa na cumaneeca niojijano cumaneeca racataja quiquiojinia, nojori niquitiosano

Pueyasora. <sup>2</sup> Jesuuri tamonu casamiiju mashiquio niquiriijuhua caapiqui cumaneeniyojua niaano tiijuhuaj. Na niasanoori nareja cobrejiniji shipinishano cumaneeca quiquiaari. <sup>3</sup> Jesuuri na pueya sequeree:

—Seetanujuanaa nia sequeyanijia, cuno casamiiju mashiquioori socua queraatia niqutioree Pueyaso, cuno casamiriaca pueyajiniji. <sup>4</sup> Puetunu cuno pojorijianaari saaja na cureeno cumaneecajiniji niqutiojiya puetunu nojori panishanojuanaa nojori masejonu nuhuaji. Cuno mashiquio cutaraari puetunu na miaajaara na masetajara cumaneecajanaa niqutioree.

*Jesu pahuatasacari, Pueyaso Secojoua tia niyartasaanutaniya*  
(Mt 24.1-2; Mr 13.1-2)

<sup>5</sup> Noojiaqueya tii quiniaa pueyari pocoojoriquiaa Pueyaso Secojoua tiajiniji. Jiyanoehua shanohua saitia shipinishano quiriquiaari. Nojoriiri na shootariquiaa, naajuhuj taa na maniniushitishaaquiaari nareja pueya niqutiojosano casamitiani. Jesuuri nojori sequeree:

<sup>6</sup> —Puetunu cunojuanaa niaa na niqiyani, tamacari niyartasaanutaniyari. Majaari quenaaja tamonu saajia cureenu quiniutianiya tamonu caco maano. Puetunu niyartasaanutaniyajanaari.

*Taa nio jiya puequenu panishacari quiniutianiyan*  
(Mt 24.3-28; Mr 13.3-23)

<sup>7</sup> Na pueyari Jesu nequesotaquiaari:

—Niishitiojonanaa, ¿taacari nio tia niyartasaanutaniyarini? ¿Casaa canaa niqiniutianiyarini, canaa niishiniuria quia sequesanoori quera tohuateya?

<sup>8</sup> Jesuuri nojori riucuaaree:

—Tama nia cuaqueyajaaja nia cojuare niaa mariqui sapojosaareeri. Queraatia sapojonuujuaca pueyari supuenutaniya. Nojoriiri sequenutaniya: “¡Janiya Cristoni, Pueyaso Jiyarosano! ¡Nio jiya quera puequeya!” Niaa jaara naa sequesaretej, majaari nia tojiniu cuno sapojonuujuaca. <sup>9</sup> Naajuhuj, majaari nia puerenu niaa jaara tojiri tamonu jiyajinijinio pueyari tamasaca jiyacajiniji pueyata miaquetoojiya, naajuhuj, pueya jaara juaatioquiaa tama nojori jiyaniijia nojori jatanurajaaja. Naa quiniutianiyari coteenu. Naajaa, juhuanouaja maja nio jiya puequesacari.

<sup>10</sup> Jesuuri naa nojori pahuatariquiaa socua:

—Tamonu rupaa pocuajacaari miaquetojonutaniya tamaatia rupaa pocuajacata. Naajuhuj, tamonu jiyajinijinio jiyaniijiaari miaquetojonutaniya tamonu jiyajinijinio narta jiyaniijata. Naa queraatia miaquetojonuuri quiniutianiya. <sup>11</sup> Rijiaari jiyanoehua jiuuquiujutianutaniya queraatia jiyacajinia. Jiyanoehua miaajenuuri quiniutianiya queraatia tamonu jiyacajiniajuhuaj. Paaqueja cusonuuri quiniutianiya niya, tamaquiicujuhuj. Naajuhuj, jiyanoehua puereeta casaari niqishaanutaniya jiyocuacaanu, mijiria quiniaa niishiniuria jiya puequenuraari tari catecanoya.

<sup>12</sup> Cuno puereeta quiyaquishacarijia, niaari quioosaanutaniya naquiya nia miishaanura, cua pueya nia quiniucua. Niaari jaatucusaanutaniya Pueyaso secojonuujuaja tijinaqueya nequesoresocoriquiano. Niaari nujuatejojuacajinia nujuatejosaanutaniya. Niaari nia pueya camarucuaacua, mariyata jiyaca jiyaniijianucuaacua jaatucusaanutaniya nequesoresocoriquiano. Niaari naa miishaanutaniya nia pahuatanuucua janiyajiniji pueya niqiara. <sup>13</sup> Naacuajitij, nia naata cuno jiyaniijianucua niqiara pahuatanu janiyajiniji. <sup>14</sup> Nioojia nia cajitiri, maja juhuacarijia nia niishiriojonura taa nia riucuanutaniya nojorini. <sup>15</sup> Janiyacuajaari jiyacari nia niishitiojonutaniyani taa nia riucuanutaniyanoj, mariyata casaa nia

pohuatanutaniya jiyanoehua cua niishitiajatani. Niaari nojori sanaajanutaniya maninia nia riuhanesacari saaja. Nia paraari maja na naata nia sequesano rerequetenu quiniutianiya. <sup>16</sup> Jiyacarijihuaj, tama nia queya-jaarijia nia tacartanutaniya, cua pueya nia quiniucua. Nia tapueyocua-caari nia tacartanutaniyajuhuaaj, nia jiyasoocuaajinio supueno pueyajuhuaaj, nia rupuenaanio. Nojoriiri noojiaqueya niajanijiniinio puecoonutaniya. <sup>17</sup> Puetunu mijiria quiniaa pueyajanaari nia niqiniu paniyaquiniutianiya cua pueya nia quishacari. <sup>18</sup> Naajaa, majaari nia puerenu. Majaari quenaaja niquiriyatu muesu shaajenu quiniutianiya nia nacajiniji, Pueyaso jaara paniyaquiri. Pueyaso jaara naa nia muesu cojuaacuaa, ¿maatucua casaara cojuaaquiri saniya niajanijani? <sup>19</sup> Naaratej, rejeretajaca nia quiri. Niaa cutaraari shacantuuca quijiacara jatanishaanutaniya pueyaracaanu nia rishiniuria, niaa jaara cumaatia nujuatare pueya miishacari sesa niajanijani.

<sup>20</sup> 'Niocua niishiri Jerusalén tiaca tari niyartasaanutaniya, niaa jaara na paraa niquiri puetunu na shocuaqueyajanaa maano. <sup>21</sup> Jiyacaritij, canapuete Judea jiyajinia quiyani, cuno pojori cuara mashiiria tuhuanahuacua. Canapuete Jerusalén tiacajinia quiyani, nojori cuara ritia mashiiria tiji. Canapuete na cuhuariquiajiniya quiyani, nojori cuara tacateyaquiuhuara Jerusalén tiacajinihua. <sup>22</sup> Cuno quishacari, jiyanoehua saniitiosacariiri quiniutianiya. Jiyacaritij, puetunu Pueyaso Rupaajinia naajiotasanojuanaari tohuateenutaniya. <sup>23</sup> Jiyanoehua taraatia quiniutianiyari noo maajipohuara, canapuete manajaatohua quiya jiyacarini, mariyata canapuete conaaja supueja jiiitiaani. Jiyanoehua naquiya quiniutianiyari cuno quishacari nio jiyajinia. Nio jiya pueyari jiyanoehua saniitiosaanutaniya. <sup>24</sup> Noojiaqueya nojorijinijinioori puecoosaanutaniya tahua miaque-toosacari nojoritia. Tamasaca nojorijinijinioori quioosaanutaniya. Nojoriiri puetunu jiyacajinarajanaa rijiosaanutaniya poonitijosocoriquiano. Tau-cuacaari Jerusalén tiaca jiiitianutaniya tama nojoririjaaaja, Jerusalén tiaca nojori jiiitanu cuara puequerejaatijia, taa Pueyaso sequequiaari tamajacajani.

*Taa na quiniutianiyani Jesu tacatesacariuhua  
(Mt 24.29-35, 42-44; Mr 13.24-37)*

<sup>25</sup> 'Mijiria quiniaa niishiniuria jiya quera puequeya, nojoriiri puereeta casaa niqiniutianiya pananujinia, racajinia, riyajiniajihuaj. Shoniniacu caminiaacuaji shiriiquitiuniutianiyajaariuhuaaj, jiyanoehua na quey-ocuasacari. Nojoriiri cushitiiniutianiya na pueretunutajuhuaaj, jiyanoehua cojuata shoniniacu caminia cajiniuucuasacari. <sup>26</sup> Mijiria quiniaari cu-sojonuunutaniya na puerenuta, nojori niishiriojosacari taa nio jiya miishaanutaniyani. Puetunu jiya cajiniocua Pueyaso shipinishano casaa-janaari jiuuquiutiasaanutaniya jiyanoehua. <sup>27</sup> Jiyacaritij, mijiria quiniaari cua niqitiuniutianiya cohuaja najacajinia niyano, jiyanoehua shacantuuca cua cumaacata. <sup>28</sup> Naaratej, niaa jaara nio cua pohuatasano niquiri tari coteyano, niocua tama cumaquitioorejaaja. ¡Niocua timiri! ¡Niaacuajaari quera rijiosaanutaniya niiquiji, pueyaracaanu cuata nia quiniuria!

<sup>29</sup> Jesuuri nojori pohuataree nio miriqui pohuatasanojihuaj:

—Higo naana nia niquiri, tamonu jaranacujua naananio. <sup>30</sup> Na jaamasucua jaara mueratuure, niaari niishiya, tacareejonuqui quera quiniutianiya. <sup>31</sup> Naajuhuaaj, niaa jaara puetunu cua pohuatasanojuanaa niquiri tari tohuateyano, niocua jiyacari niishiri, janiyari quera tiuquiuhuani, Jiyaniijia-janaa cua quiniuria.

<sup>32</sup> 'Seetanujuanaa nia sequeyanijia, puetunu cua sequesanojuanaari tohu-ateenutaniya Pueyaso tojitiaashijiaca pueya puequeyaquishacarijia. <sup>33</sup> Jiya cajiniocua, mariyata nio jiyari shaajenutaniya. Cua sequesanoori saniniuu-jia puetunu tohuateenutaniyajanaa cutara, taa cua sequeyacuajani.

<sup>34</sup> 'Tama nia cuaqueyajaaja nia cojuare niaa mariqui cua tojiyashiji-acara quiriohuari. Naaratej, majaari shuquiriaatia nia quiniu paniniu juucua nia queranacunuunuta, nia mashaasequejonuta, mijiria casaacua nia niishiriojonutano. Maja naa nia quiniu, janiya mariqui nia cariy-atureeri, jeenucuasoo nia quishacari, canashiyaquiji cua tiuquishacari-uhua. <sup>35</sup> Cua tiuquishacariuhua, juhua norijiotaja quiniutianiyari puetunu mijiria quiniaa pueyarajanaa, taa norijiotaja canashiyaquiji majaacuaani. <sup>36</sup> Cunora, cucuaji jeenucuasano nia quiri juhuacarijia. Pueyaso nia secojore pueyaracaanu, maja naquiya nia miishaanura cuno taraatia quishacari, taa cua sequeyacuajani, mariyata juhuajaniya nia nujuatunura cua tacoji, cua nequesoreesacari puetunu pueyajanaa.

<sup>37</sup> Jesuuri puetunu juucajanaa niishitiojojua Pueyaso Secojojua tiajinia. Saniniuuja, niucua quiojojuaari Olivo cuhuariquia tuhuananujinia tii na quiniuria. <sup>38</sup> Puetunu pueyajanaari tariquicuaji quiojojua Pueyaso Secojojua tiajinia, nojori tojiniuria Jesu pohuatasano.

## 22

### *Judiocuaca camarucua roojotoosacari Jesu nojori quianura* (Mt 26.1-5, 14-16; Mr 14.1-2, 10-11; Jn 11.45-53)

<sup>1</sup> Quera Pascuara queranacunuusacari quiquiaari, pueya miaquesacari pan na poreetajaaju shipinishano. <sup>2</sup> Jiyacari, pueyacuara secojonaa jiyani-ijianucua, mariyata Moisés Rootasanojiniji niishitiojonaari roojotooriquiaa juucua taa nojori motunutaniya Jesuni, nojori juaatiyaquiniutia pueya. Nojoriiri narta pueya pueretujuaca, jyanohua queraatia pueya paniniucua Jesu.

<sup>3</sup> Jiyacaritij, Satanásri Jesu pueyano Judas Iscariote jiuujiajinia tiuquiquiaari. <sup>4</sup> Nojuajaari pueyacuara secojonaa jiyaniijianucuaacua quiaquiaari, Pueyaso Secojojua tia cojuanaa jiyaniijianucuaacuajuhua. Judasri cuno pojoritia pocoojoquiaari. Nojori sequereeri nojuaja na naata nojori quiatenu Jesu. <sup>5</sup> Nojoriiri shuquiririi. Cunora, Judas sequetureeri taa cumaneeca nojori niqutionutaniya nojuajani. <sup>6</sup> Judasri jaarajaaja nojori sequesano tojirii. Jiyacaritij, Judasri juhuacatecara niishiriojoquiaari taa na quiatenutaniya Jesu jiyasohujani.

### *Jesu miaquesacari na nuhuajiria na pueyata* (Mt 26.17-29; Mr 14.12-25; Jn 13.21-30; 1 Co 11.23-26)

<sup>7</sup> Poreetajaaju pan miaquenu juucaari tari quiquiaari. Cuno juucajuhuj, borregoori mosano quijia, Pueyaso niqiara miaquesocoriquiano Pascuara queranacusacari. <sup>8</sup> Cunora, Jesuuri Pedro jiyaroree Juannio, nojori miaquesocoriquiano nojori majeetenura. Nojori sequereeri:

—Nia quiaare. Borrego nia majeeteseecuaa pocuaji, pa miaquesocoriquiano quiarijia Pascuara.

<sup>9</sup> Nojoriiri na nequesotaree:

—¿Tee quia paniya canaa majeetenurani?

<sup>10</sup> Jesuuri nojori riucuarree:

—Niaa jaara Jerusalén tiacajinia tiuquishii, niaari tamonu pueyano riuri-atanutaniya mohuaca taquitiaano patacojinia. Niocua na nuhuaji rupaamia na tiajinia. <sup>11</sup> Cuno tiajinia na tiuquishacari, niocua cuno tia camaru



sequesee: “Canaa niishitiojona naa quia sequeya: ‘¿Teete sohuacani, cua pueyata cua miaquejara quiarijia Pascua niucuani?’ ” <sup>12</sup> Nojuajaari nia niqitiniutianiya puereetuuca sohuaca, nataco na tiajinia, tariucua jeenu-cuasano. Niocua cuniqui miishii puetunujuanaa pa miaquesocoriquiano.

<sup>13</sup> Jesu pueyari quiaaree. Nojoriiri puetunujuanaa riuriataquiaari taa Jesu sequequiaari nojoricuajani. Nojoriiri tii miishii puetunujuanaa, Pascua niucua nojori miaquesocoriquiano.

<sup>14</sup> Jaara tari quiquiaari Pascuara miaquesacari niucua, Jesuuri na saquiri-  
ojosano pueyata cajitiushii miaquejajinia. <sup>15</sup> Jesuuri nojori sequeeree:

—Janiyari jiyanohua niaata miaquenu paniriquiaa nio Pascua niucuani, pueya moyaquishacarijia janiya. <sup>16</sup> Seetanujuanaa nia sequeyanijia, majaari socua cua miaquenu quiniutianiya Pascuara, janiya jaara tiuquiriohuajaatijia puetunu Pueyaso muerasuranotajanaa. Jiyacari cutara, paari jatiqumi aquenutaniyani, Jiyaniijiajanaa cua quishacari.

<sup>17</sup> Na nuhuaji, Jesuuri ratujua pataree. Pueyaso sequereeri:

—Paacarasho nio mashacara.

Na pueya sequereeri:

—Jajaa, nio nia masetare. Nia rature puetunu niajaniyajanaa.

<sup>18</sup> Seetanujuanaa nia sequeyanijia, majaari socua cua ratunu quiniutianiya uva caacajiniji, janiya jaara tiuquiriohuajaatijia, Jiyaniijiajanaa cua quiniuria puetunu Pueyaso muerasurajanaa.

<sup>19</sup> Na nuhuaji, Jesuuri pan ririi. Pueyaso secojoree nocuaraari. Na neecasereeri. Na pueya na niqitiojoreeri. Nojori sequereeri:

—Nioori cua cuaqueya niaacuara mosocoriquiano. Niocua naa miiriquia pueyaracaanutej, nia niishiriojonura janiya.

<sup>20</sup> Nojori miaquenu nuhuaji, Jesuuri ratujua patareejuhuj. Naa sequereeri:

—Cua nanacaari niaacuara shoonutaniya nia jiyanooshaanura seetanujuanaa. Majaari socua seya nanaca panishaanu quiniutianiya. Quiarijiani, saaja cua nanaca shoonuucua, Pueyasoori pueya jiyanooniutianiya.

<sup>21</sup> Cua tojitiare. Quiarijiani, cante cua tacartanutaniya pueya na motenura janiyani, nojuajaari cuata miaqueya. <sup>22</sup> Janiyari naa miishaanutaniyani taa janiyajiniji juhuacarijia pohuatasaaquiaaricuajani tariucuacaanu Pueyaso Rupaajinia. Saniniuujia, cua tacartanaari jiyanohua taraatia quiniutianiya naa na miiniuucua janiya.

<sup>23</sup> Jesu pueyari jiyacari juhuacatecara nequesoreetooree tama nojoriijaaja:

—¿Canteeri na tacartanutaniyani?

### *Cante seetanujuanaa jiyaniijiajanaani*

<sup>24</sup> Jesu pueyari tama juayonuutariquiaajaacujua, teyano nojorijinijiniote jiyaniijiajanaani. <sup>25</sup> Jesuuri nojori sequeeree saaja:

—Mijiria, jiya jiyaniijianucuaari jiyanohua jiyaramiquiniu niishijia nojori jiitiasano pueya, juhua nojori poonitijosano pueya. Nojoriiri tama nojorijinijiaaja sequeja: “Canaari maninia miiquiaa canaa pueyani”. <sup>26</sup> Niajaniya saniniuujia, majaari naa nia quiniu juhua nojorijia. Cante socua tojishano pueyano quiya niajaniyajinijinioni, nojuaja cuara tama na cuaqueyajaaja jiyateyaquiiria na cumaaca paaretaja pueyacia. Cuara quiiria jacaria pocuaja. Naajuhuj, cante jiyaniijiajanaa quiya niajaniyajinijinioni, nojuaja cuara jiyateera tama na cuaqueyajaaja juhua nia serura. <sup>27</sup> ¿Taa nia sequeyani? ¿Cante jiyaniijiajanaani? ¿Miaqueyano pueyanotee? ¿Na mianuutena soj? ¡Miaqueyano pueyanocuaja! Naajaa, janiyari juhua nia



seru quiquiaa niaarani, maninia cua miiniuria niajaniya. Naajuhuj, naa maninia miijiaca nia quiriquia.

<sup>28</sup> 'Niaacuajaari pueyaracaanu cua cojiriquiaa janiya jaara saniniu-jiushaariquiaani. <sup>29</sup> Naaratej, janiyari nia jiyatenutaniya jiyaniijianucua nia quiniuriani, taa cua Que jiyatequiaari janiyacuaani, Jiyaniijia cua quiniuria. <sup>30</sup> Naacuajitij, niaari cua miaquejajinia cajitiuniutianiya cuata nia miaquejonura, cuata nia raruujunurajuhuj, Jiyaniijiajanaa cua quishacari. Naaari mariyata jiyaniijianucua quiniutianiya, supuetana Israel doce niquiohuacuajinio supueno pueyapue nequesoreenaa nia quiniuria.

*Jesu sequesacari Pedro, nojuaja nocuaji seetanutaniya  
(Mt 26.31-35; Mr 14.27-31; Jn 13.36-38)*

<sup>31</sup> Jiyaniijia Jesuuri Pedro sequequiaari:

—Simónnaa, cua tojiri. Satanásri niaacuara sequerucuaa Pueyaso, jiyanojua na saniniujiuniuria niajaniya. Naacuajitij, niaari jiyanojua saniniujiushaanutaniya, naatej, taa trigo quejooshiya jiyocuacaanucuaani, paratu panura na cocua. <sup>32</sup> Janiyari saniniuujia Pueyaso secojoree quiocuara cutarani Simónnaa, cucua tiuuniu quia tarinitiaaquiniucuaaji. Naacuajitij, quiaa jaara quioojia tacatorohua cucua, quiocua quiarta pueya cumaquiri-ohujuhuj, nojori tiuuniuria seetanujuanaa pueyaracaanu cucua.

<sup>33</sup> Simónri Jesu sequeree:

—¡Cua Jiyaniijianaa, quiaa jaara nujuatejojuajinia nujuatesaare, janiya cuaara nujuatesaaria quiatajuhuj! ¡Quiaa jaara mosaare, naajaa, janiya cuaara cojiritiasaaria quiajaniyajuhuj!

<sup>34</sup> Jesuuri na sequeree:

—Pedronaa, seetanujuanaa quia sequeyanijia, caacaraja ni-nijiyaquishacarijia quiarjia, quiaari tari naa cucuaaji seetanu caminiujiuniutianiya pueya niquiara: “¡Maja cua niishiniu Jesu!”

*Quera Jesu miishacari taraatia*

<sup>35</sup> Jesuuri na pueya nequesotaree:

—Janiya jaara nia jiyaramiquiquiaari Pueyaso rupaa nia pohuatanura caashoqueejuni, cumaneeca quiquiooju, sapatuujunio, ¿niaateeri nia panishano casaa niquitioyaquishaaquiaari?

Nojoriiri Jesu riucuaaree:

—Maja. Canaacuajaari puetunu canaa panishanojuanaa niquitiojosaaquiaarini.

<sup>36</sup> Jesuuri nojori sequeree:

—Quiarjia saniniuujia, cante caashoqueracani, cuaara na pataara. Cante cumaneeca quiquioracani, cuaara na pataarajuhuj. Cante nijiniaquetucuaaja mueruu jiiitaaquiyani, cuno cuaara niquitioora na shiniquiaacuaji toque, nijiniaquetucuaaja mueruu na masenura na toque samitia. <sup>37</sup> Seetanujuanaa nia sequeyanijia, tariucuaaanu Pueyaso Rupaajinia janiyajiniji naajiotasanoori tohuateenutaniya. Janiyajiniji naajiotasanoori naa sequeyatej: “Nojuajaari jyanishaaree sesa miiija, sesa miijiacata na teetesacari”. Puetunu janiyajiniji naajiotasanojuanaari tari tohuateya taa na naajiotasaaquiaaricujani.

<sup>38</sup> Nojoriiri Jesu sequeree:

—Jiyaniijianaa, niya quiya caapiqui nijiniaquetucuaaja mueruu.

Nojori riucuaareeri:

—Tariucuaaja.

*Jesu secojosacari Pueyaso, Getsemaní cuhuariquiajini*  
(Mt 26.36-46; Mr 14.32-42)

<sup>39</sup> Na nuhuaji, Jesuuri tohuataquiaari tiajiniji. Olivo cuhuariquia tuhuanujiniara quiaareeri. Nojuajaari cuniqui quianura jitiquiaari. Na saquiriojosano pueyari na nuhuajiyaree. <sup>40</sup> Na tiuquishacari tii, Jesuuri nojori sequeree:

—Pueyaso nia secojore, niaa mariqui sesa miiriiri niaa jaara saniniujiushaare.

<sup>41</sup> Na nuhuaji, Jesuuri tamajaaja quiaaree socua nojori tacoji, juhua saajia tishaqui, pueyano jasacari. Tii mojoquetasee Pueyaso secojonuraari. <sup>42</sup> Naa secojoreeri:

—¡Cua Quenaa, maja cua miiniu paniniu naquiya! Naajaa, janiya cuara miyaquishaaria taa cua paniyani. Janiya cuara miishaaria cutara taa quia paniyacuajani.

<sup>43</sup> Jiyacaritij, Pueyaso seruuri jiyocuacaanuji nocua nimiaa na cumaquiniuria. <sup>44</sup> Jesuuri jiyanoehua naquiya miiriquiaa. Noojiaari quera jiaqueriquiaa na tacaaniutia. ¡Jiyanoehua, jiyanoehua secojoriquiaa Pueyasoori! Cunora, na paneyacaari puereetujuaaca juhua nanaca quiriquiaa, na caatesacari jiyocua. <sup>45</sup> Na secojonu nuhuaji, Jesuuri sanerohua. Na pueyacuatacategyarohuari. Nojori niquishuhua maquetiuyano saajaari, puera nojori taraajenuucua. <sup>46</sup> Jesuuri nojori sequeree:

—¿Casaara nia maquetiuyani? Nia saneecuate. Pueyaso nia secojore na cojuanura niajaniya, maja sesa nia miiniuria niaa jaara saniniujiushaare.

*Judiocuaca camarucua quiasacari Jesu*  
(Mt 26.47-56; Mr 14.43-50; Jn 18.2-11)

<sup>47</sup> Jesu pocuasacarijia na pueyata, queraatia pueyari jiyacari nocua tiuquishii. Judasri cuno pojori puetariquiaa. Nojuajaari Jesu doce saquiriojosano pueyajinijinio quiquiaari. Judasri Jesuucua nimiaajanaa. Na saruhuataseeri na nujuunuta. <sup>48</sup> Jesuuri na sequeree:

—Judasnaa, ¿quiaate tama cua tacartaajaaja, quia nujuunuta sapojonu janiya?

<sup>49</sup> Jesu pueya niquishacari casaa cuno pueya miiniu paniriquiaani, nojoriiri Jesu nequesotaree:

—Jiyaniijianaa, ¿canaate nojori miaqueyani?

<sup>50</sup> Tamonu nojorijinijinioori pueyacuara secojonaa jiyaniijia seru pirii na mueruuta. Saaja na miaquetajara numoco jaatereeri. <sup>51</sup> Jesuuri na sequeree:

—¡Tariucuaja! Maja naa miiniu.

Jesuuri numoco ririi. Na rutorohuari. <sup>52</sup> Judasta quiriquiaari pueyacuara secojonaa jiyaniijianucua, Pueyaso Secojoua tia cojuanana jiyaniijianucua-juhua, Judiocuaca camarucuanio. Nojoriiri Jesuucua nijioquiaari na quianura. Jesuuri cuno pojori sequeree:

—¿Casaara cucua nia nijioree nijiniaquetucujaja mueruutani, macacatanio nia quianura janiyani? ¿Janiyateeri nohuasejojuani, naa nia nijionura cucuatej? <sup>53</sup> Pueyaracaanu cua quishacari niaata Pueyaso Secojoua tiajinia, majaari nia quianu quijia janiya. Naajaa, quiarjia cutaraari niajaniyara, nia panishano nia miiniuria janiya. Quiarjiani, Sesaacaari cumaacaraca na panishano na miiniuria.

*Pedro seetasacari Jesujiniji*

(Mt 26.57-58, 69-75; Mr 14.53-54, 66-72; Jn 18.12-18, 25-27)

<sup>54</sup> Jiyacaritij, nojoriiri Jesu quiaree. Na jaatucutiuyareeri pueyacuara secojonaa jiyaniijia tiajinia. Pedroori tucuacaanuji na nuhuajiriquiaa.

<sup>55</sup> Jiyacaritij, pueyari jiyaniijia tia carijiniacuma mani noshitirii. Na shocua cajitiuriohuari. Pedroori nojori tajinia cajishiijuhuaj. <sup>56</sup> Cuno jiyaniijia serujiniinioni, niyacoori Pedro niquirii mani jitiuyano. Nojuajaari Pedro shootiariquiaa. Na nuhuaji, niyacoori Pedro shishirii. Sequereeri:

—Noo pueyanoori cuno quiasano pueyanota quijiajuhuaj.

<sup>57</sup> Pedroori seetaree. Naa sequereeri:

—Niyacoonaa, ¡majaari quenaaja cua niishishano cuno pueyano!

<sup>58</sup> Na nuhuaji, tamonu pueyanoori Pedro niquiriijuhuaj. Nojuajaari cuno jiyaniijia seru quiriqiaajuhuaaj. Pedro sequereeri:

—¡Quiaaqui cuno pojorijiniinio pueyanojuhuaaj!

Pedroori saa sequereejaa:

—¡Maja, pueyanonaa! ¡Janiya maja nojorijiniinioni!

<sup>59</sup> Pasaja na tarishiniu nuhuaji, tamonu pueyanoori sequenu pacuterohua:

—Nio pueyanocujaari cuno pueyanota quijia. Nojuajaari Galilea jiyajiniiniojuhuaj.

<sup>60</sup> Pedroori saa sequereejaa:

—¡Pueyanonaa, maja cua niishiniu quenaaja casaa quia sequeyani!

Pedro pocuasacarijia, jiyacaritij, caacarajaari niunijioree. <sup>61</sup> Jiyaniijia Jesuuri tacatequee. Na nijinara niquirii Pedroori. Pedroori jiyacari Jiyaniijia sequesano nojuaja niishiquii, naa na sequesantej: “Quiaari tari seetanu caminiujiuniutianiya janiyajiniji pueya niqiuara, caacaraja niunijiaquishacarijia”. <sup>62</sup> Pedroori cuniquiji tohuataquee. Jiyanohua nujuquereeri na taraajenuta, sacuaraatia na seetanuucua.

### *Pueya macaatishacari Jesu*

*(Mt 26.67-68; Mr 14.65)*

<sup>63</sup> Jesu cojuanaa pueyari Jesu macatiriquiaa. Nojoriiri na piquitiuriquiaa. <sup>64</sup> Nojoriiri Jesu namijia morotuquiaari coteenu. Na jiquioco piquitiuriohuari. Na nuhuaji, na sequetureeri:

—¡Quia niishiritioj! ¿Cante quia piriini?

<sup>65</sup> Nojoriiri socua queraatia sesa casaa sequeturiquiaa na macaatiniuria Jesu.

### *Judiocuaca jiyaniijianucua nequesoreesacari Jesu*

*(Mt 26.59-66; Mr 14.55-64; Jn 18.19-24)*

<sup>66</sup> Jaara juhuaquequiaari, Judiocuaca camarucuaari rerejoree pueyacuara secojonaa jiyaniijianucua, mariyata Moisés Rootasanojiniji niishitiojonaatajuhuaj. Nojoriiri Jesu jiyataquiaari Judiocuaca jiyaniijianucua rerejosaquiria. Nojoriiri na nujuatesee jiyaniijianucua tacoji, nojori nequesoreenura tii nojuaja. Nojoriiri naa Jesu nequesoreeree:

<sup>67</sup> —Canaa quia sequere, ¿quiaate Cristo, Pueyaso Jiyarosano?

Jesuuri nojori riucuaaree:

—Janiya jaara nia sequereni: “Taaquiririnij”, niaari saaja cua sequenutaniya: “Quiaa sapojiya”. <sup>68</sup> Saniniuujia, janiya jaara nia nequesoreere Pueyaso Jiyarosanojinijini, majaari nia riucuanu quiniutianiya janiya. <sup>69</sup> Naajaa, quiarijiani, janiyari puetunu cumaacaraca Quijiajanaa miaquetajara cajiniutianiya jiyocuaaanuni.

<sup>70</sup> Naa Jesu sequesacaritij, puetunu nojorijianaari na sequereere:

—¿Quiaateeri tama sequeyajaaja quiaari Pueyaso Niyanu?

Jesuuri nojori riucuaaree:

—Taaquiririnij. Naacuaaquinatejaj, taa nia sequeyacuajani.

<sup>71</sup> Nojoriiri tama sequetooreejaja:

—¿Paatucua casaara socua tamonu pueyano pajere nocuara tonujuriquianoni? Paacuaajaari tari tama pa numaatajaaja sesa na sequesano tojitiareeni.

## 23

### *Pilato nequesoreesacari Jesu*

(Mt 27.1-2, 11-14; Mr 15.1-5; Jn 18.28-38)

<sup>1</sup> Cuno nuhuaji, puetunu nojorijianaari sanetaree. Jesu jiyatatiuyareeri jiyaniijia Pilatoocua. <sup>2</sup> Cuniqúi, nojoriiri juhuacatecara Jesuucua saquiriojotaree na saPONONUTA. Pilato sequetureeri:

—Canaari nio pueyano niishiyani. Nojuajaari canaa Israel pueya nasojoquiaa pocuara. Nojuajaari niishitiojoquiaajuhuaaj, maja canaa Israel pueya niqutiojonura canaa cumaneeca pa jiyaniijiajanaa Césarra, taa César sequequiaaricuaajani. Naajuhuaaj, tama nojuajaari naa sequequiaa: “Janiya Cristoni, Pueyaso Jiyarosano, nia jiyaniijia cua quiniuria”.

<sup>3</sup> Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Taaquiriirinij. Naacuaaj, taa quia sequereecuajani.

<sup>4</sup> Jiyacaritij, Pilatoori pueyacuara secojonaa jiyaniijianucua sequeree, pueya maanunio:

—Nio pueyano nequesoreeree tarinijia. Nojuajaari maja sesa miijia.

<sup>5</sup> Nojoriiri saaja socua jiyacaterree Jesuucua tonujunu. Naa sequetureeri:

—¡Nojuajaari puetunu canaa Judiocuacajanaa sesoya na niishitiojosanota! Nojuajaari Galilea jiyajinia niishitiojonu coteequiaari. Quiarijia, niya niishitiojiyajaariuhua Judea jiyajiniani.

### *Jiyaniijia Herodes nequesoreesacari Jesu*

<sup>6</sup> Pilato tojishacari naa nojori sequesantej, nojori nequesotareeri:

—¿Nio pueyanote Galilea jiyajinijinio?

<sup>7</sup> Nojoriiri na riucuaaree:

—Jaa.

Cunora, Pilatoori pueya jiyarotaree Jesu, Galilea jiya jiyaniijia Herodescua. Herodesri namitia tii Jerusalén tiacajinia quiriquiaa jiyacari.

<sup>8</sup> Nojuajaari pueyaracaanu Jesu niqiniuucua jiaatiaja juucua. Herodesri tari pohuatasaaquiaari Jesujiniji. Naaratej, Herodesri Jesu miishacari na cumaacata niqiniu panijia juucua. Naacuaajitij, na niquishacari Jesu, nojuajaari timirii. <sup>9</sup> Herodesri queraatia nequesoreeree Jesu. Majaari quenaaja Jesu riucuanu quiquiaari nojuaja.

<sup>10</sup> Pueyacuara secojonaa jiyaniijianucuaari tii quiriquiaajuhuaaj, Moisés Rootasanojiniji niishitiojonaanio. Cuno pojoriiri jiyanojua Jesuucua saquiriojotariquiaa queraatia sesa casa. <sup>11</sup> Herodesri na soldadohuata Jesu rerequeteriquiaa. Na macatiriiri. Na cushitirii jiyanojua shanojua toqueeri juhua jiyaniijia cushishano. Na nuhuaji, Herodesri pueya jiyarotarohua Jesu Pilatoocua.

<sup>12</sup> Herodesri cuno juuca Pilato rupuenara quiquiaari. Coteenu, majaari nojori niqutioonu paniniu quijia. Nojoriiri saaja shocotetoojua.

### *Puetunu pueyajanaa sequesacari Jesu cuaara mosaaria*

(Mt 27.15-26; Mr 15.6-15; Jn 18.39-19.16)

<sup>13</sup> Na nuhuaji, Pilatoori pueyacuara secojonaa jiyaniijianucua rerejotequiaari na tacoji, Judiocuaca camarucuaajuhuaaj, tii quiniaa pueyanio.

<sup>14</sup> Nojori sequereeri:

—Niaari nio pueyano jaatucuree cucua najuhuanaj. Niaari cua seque-  
soreeriquiaa nia niquiarani. Niaacuajaari cua tojitiariquiaa cua neque-  
soreesacari nojuaja. Quiarijia niishiya cutaranijia, puetunu nocuara nia  
tonujusanojuanaari maja seetanujuanaa. <sup>15</sup> Jiyaniijia Herodesquiiri tari ni-  
ishiyajuhuaaj, majaari seetanujuanaa nocuara nia saquiriojotasano. Cunora,  
Herodesri pocua na jiyarorohua. Seetanujuanaa, majaari sesa na miiniu  
quiquianu na mosaanura. <sup>16</sup> Janiyari na majacutenutaniya narejani, carte-  
saarohuari.

<sup>17</sup> Pascua juucara queranacusacari, Pilatoori nujuatesano pueyano  
cartenu jiiitiquiaari nujuatejojuajiniji. Nojuajaari naa miiquiaari  
pueyaracaanutej, pueya na shuquiritiniuria. <sup>18</sup> Jiyacaritij, puetunu  
pueyajanaari juhuacatecara jiyanoehua nacaree jatiqui:

—¡Jesu quia more! ¡Barrabás quia cartere saniniuujia!

<sup>19</sup> Tarijia cuno Barrabásri narta nasojosano Judiocuacata Romano pueya  
taanuuquiaari juucua Jerusalén tiacajiniji. Nojuajaari jiyacari pueyano  
moquiaarijuhuaaj. Cunora, nojuajaari nujuatejojuajinia nujuatesano  
quiriquiaa. <sup>20</sup> Pilatoori Jesu cartenu panijia juucua. Naaratej, Pilatoori  
pueyata pocoojorohua socua. <sup>21</sup> Pueyari saaja jiyacaterree jiyanoehua  
nacoonura jatiqui:

—¡Cuaara mosaaria niyacutesanojinia teetesano! ¡Cuaara mosaaria!

<sup>22</sup> Pilatoori pueya sequenu pacuterohuacuhuaaj:

—¿Maatucua casaara mosaarejaarani? ¿Sesa miiritijiaaraj? Janiyacuajaari  
tari na nequesoreereeni. Majaari sesa na miiniu quirii na mosaanura.  
Janiyari na majacutenutaniya narejani. Na nuhuaaj cartesaarohuari.

<sup>23</sup> Pueyari saaja socua jiyanoehua nacooree niyacutesanojinia na  
mosaanura. Pueyacuara secojonaa jiyaniijianucuaari mariyata pueyata  
jiyanoehua nacooriqiaa. Puera jiyanoehua nojori nacoosacari, nojoriiri  
Pilato shocotaree. Cunora, Pilatoori maja na naata cartenu quirii Jesu,  
taa na paniriqiaacuajani. <sup>24</sup> Naaratej, Pilatoori socua tarinirioehua.  
Pueya panishano miiriiri. <sup>25</sup> Pueya sequesano pueyano cartereeri, cante  
nujuatesaaquiaari nujuatejojuajiniacuajani na taanuunu paniniuucua  
Romano pueya, na monuucua pueyanohuaaj. Na nuhuaaj, Pilatoori Jesu  
tarinitariere socua, nojori mosocoriqiano, taa nojori paniriqiaacuajani.

*Niyacutesanojinia Jesu teetesacari*  
(Mt 27.32-44; Mr 15.21-32; Jn 19.17-27)

<sup>26</sup> Pueya jiyatasacari Jesu puecoosacaria, nojoriiri tamonu pueyano quia-  
ree Jerusalén tiacajiniara riujiuyano juucua. Nojuajaari Cirene jiyajinijinio  
pueyano quiquiaari. Na sesa quiquiaari Simón. Nojuajaari niyacutesano  
patesaaree Jesu nuhuaaj.

<sup>27</sup> Queraatia pueyari Jesu nuhuaajiriqiaa, queraatia maajipohuanio. Maa-  
jipohuari Jesuucua nujuqueturiquiaa, na nuhuaaj nojori sacuasacari. Nocua  
sapiyonuuriqiaari, nocua nojori taraajenuta. <sup>28</sup> Jiyacaritij, Jesuuri cuno  
maajipohuacua tacaterree. Nojori sequereeri:

—Jerusalén tiacajiniji maajipohuanaa, maja cucua nujuquetunu. Tama ni-  
aacuajaaja nia nujuqueture, nia niquihuacuano. <sup>29</sup> Na nuhuaaj, jiyanoehua  
taraatia quishacariiri quiniutianiya niaara, jiyanoehua taraatia. Jiyacari-  
tij, pueyari sequenutaniya: “Socua shuquiriaatia quijiaca cutaraari noo

maajipohua cante muetuyashijiani, cante manajeyashijianucuni, mariyata cante mueya supueteyashijianucujaniuhuaaj”. Mueyaraca maajipohuari jiyacari jiyanoehua taraajenutaniya, nojori niquishacari necohua miishacari naquiya. <sup>30</sup> Naquiya miishacari, jiyacaritij, pueyari tuhuananuhua sequenutaniya: “¡Canaacua quia jiyaretaare!” Naajuhuaaj, shiitianiyojua tuhuananuhua sequenutaniyari: “¡Canaacua nia tiyare canaa nia jamonura!” <sup>31</sup> Jiyacariiri jiyanoehua naquiya miishacari quiniutianiya. Quiarijia, janiya jaara naa naquiya miishiyacuaani, ¿taaquitijia Pueyaso tojitiaashijiaca miishaanutaniyatejaj?

<sup>32</sup> Caapiqui sesa miijiacaari jaatucunuusaariquiaajuhuaaj, mariyata teetejosocoriquiano Jesuta. <sup>33</sup> Nojoriiri puecoosaqui tiuquiiijiosee. Cuniqui pueya puecoosaquini, na sesa quiquiaari “Pueyano Nacaco”. Nojoriiri tii Jesu teeteree maca niyacutesanojinia. Cuno caapiqui sesa miijiacaari teetejosaa-reejuhuaaj, niquiriyatu na miaquetajara, tamonu na muenecara. <sup>34</sup> Jesu jaara tari pijiosaariquiaa maca niyacutesanoocua, nojuajaari na Que Pueyaso sequeree:

—¡Cua Quenea, quia jiyanoori nio pojori! Majaari nojori niishiniu casaa na miitiuyani.

Na nuhuaji, soldadohuari saitia tacuarishijioree, nojori niishiniuria taa nojori seraatianutaniya Jesu toqueni. <sup>35</sup> Pueyari Jesu shootiariquiaa. Judiocuaca jiyaniijianucuaari jaarajaaja Jesujiniji naa tama sequetooriquiaajaaja:

—Nojuajaari saaja tamonu pueya naatanijiojua. Quiarijia, nojuaja jaara seetanujuanaa Pueyaso Jiyarosano Cristo quiri, cuara roseera niyacutesanojiniji pa niquiara.

<sup>36</sup> Soldadohuari Jesu macaatiriquiaajuhuaaj. Nojoriiri Jesu raateree piiquia vino juucua. <sup>37</sup> Jesu sequetureeri:

—Quiaa jaara Judiocuaca jiyaniijia quiri, ¡niyacutesanojiniji quia roserecuarajaj!

<sup>38</sup> Jesu nacaacuma, suruhuatuneeri rupertasaaquiaari naajiosano Griego rupaajinia, Romano pueya rupaajinia, Hebreo rupaajinianio. Tii naajiotasano quiriquiaari naa nocuara pueya saquiriojotasano: “Nio pueyanoori Judiocuaca jiyaniijia”.

<sup>39</sup> Tamonu cuno sesa miijiacajinijinio Jesu shuriucua teetesano quiriquiaani, nojuajaari Jesu rerequeteriquiaajuhuaaj. Naa Jesu sequeriquiaari:

—Quiaa jaara Pueyaso jiyarosano Cristo quiri, tama quia roserejaaja cuniquiji. ¡Canaa quia roshinijiorejuhuaaj!

<sup>40</sup> Narta sesa miijiaari na juaarii:

—¿Quiaateeri Pueyaso puereyashijia? Quiaari mosaanutaniyajuhuaaj.

<sup>41</sup> Pajaniya cutaraari sesa pa miiniuucua naquiya miishiyani. Paacuajaari maninia saniitioshiyani sesa pa miiniuucua. Saniniuujia, nio pueyano pa tajinia nujuataani, ¡nojuajaari sesa miyashijia cutara!

<sup>42</sup> Na nuhuaji, narta sesa miijia juaaniaari Jesu sequeree:

—Jesunaa, majaari cua niyajetanuuja, Pueyaso jaara quia jiyatere Jiyaniijajanaa quia quiniuria.

<sup>43</sup> Jesuuri na riucuaaree:

—Seetanujuanaa quia sequeyanijia, quiarijiani, nio juucaja, quiaari cuata quiniutianiya shuquiriaatia quishaqui cutara.

*Jesu cusosacari*

*(Mt 27.45-56; Mr 15.33-41; Jn 19.28-30)*



<sup>44</sup> Panacari, jjiyari ninishiquiria quiquiaari puetunujuanaa, juhua niucua! Pananu piriuushacari, cuhuatemohuari. <sup>45</sup> Jiya quishacarijia ninishiqui, jiyacaritij, Jerusalén tiacajinia Pueyaso Secojojua tiajinia, jiyanojua shiqui-iquia toquejiniji sohuacaari noojiaacoji sutequiaari puetunujuanaa quera-jaquera! <sup>46</sup> Jiyacarijiuhua, Jesuuri nacaree:

—¡Cua Quenaa, cua sohanu quia cojuare!

Naa na sequenu nuhuajitij, Jesuuri cusoquee.

<sup>47</sup> Romano soldadohua jiyaniijia niquishacari puetunu niojuanaa, nojuajaari maninia sequeree:

—¡Seetanujuanaa, nio pueyanoqui sesa miyashijia quiqianu!

Naa na sequesanoori Pueyaso shuquiriritii.

<sup>48</sup> Puetunu pueyajanaa, canapuate Jesu shootiariquiaa cusoyanoni, nojori-iri taraatia na tiajinia quiojoquiaariuhua. Nojoriiri tama na jiriquiajaaja piquiniuquiaariuhua, jiyanojua nojori tacaaniutia naa nojori monuucua Jesu. <sup>49</sup> Saniniuujia, puetunu Jesu niishishano pueyajanaari tii jiyojetaru-hua, maajipohuajuhua, canapuate Jesu nuhuajiquiaari Galilea jiyajini-cuajani. Puetunu nojorijianaari tucuacaanuji niquitiariquiaa Jesu.

### *Jesu quete niasacari raaco*

*(Mt 27.57-61; Mr 15.42-47; Jn 19.38-42)*

<sup>50</sup> Tamonu maninia pueyanoori quiquiaari. Nojuajaari Pueyaso tojijia pueyano quiquiaari Arimatea tiacajinijinio. Cuno tiacaari Judea jiyajiniajuhuaj. Cuno pueyano sesa quiquiaari José. Nojuajaari Judiocuaca jiyaniijianucujinijinio quiquiaari. <sup>51</sup> Cuno Joseeri Pueyasocua tiuujia quiquiaari. Nojuajaari pueyaracaanu sashijia, Pueyaso Jiyarosocoriquiano cuara Jiyaniijia jiyatesaaria cutara. Cunora, majaari José paniniu quiquiaari cutara, narta jiyaniijianucua sequesacari Jesu cuara mosaaria. <sup>52</sup> Naacuajitij, Jesu cusosacari, Joseeri Pilatoocua quiaquiaari, Jesu quete na masenura. <sup>53</sup> Na nuhuaji, Jesu quete roshinirii niyacutesanojinijiri. Na jiunio-coreeri cohuajaque quenaaruque toquejinia. Jesu quete niaree tarijia na jiutianishano saajiajiniaari. Cuno raajinia, juhuanajuaja maja macu niasaanu quiquiaari. <sup>54</sup> Cuno juucaari quiquiaari Judiocuaca jeenucuasacari juhuacarijia samaatenu juucaacuara. Nojori samaatenu juucaari quera coteeriquiaa tari. Judiocuacaa, pananu tiuquishacari, tamonu juucaari tari coteequiaari nojoriria.

<sup>55</sup> Cuno maajipohua, cante Jesuta nijioquiaari Galilea jiyajinicuajani, cuno pojoriiri José nuhuajiquiaari raajinara. Nojoriiri raaco niquishii, taa Jesu quete niasaareeni. <sup>56</sup> Nojori riujiuushacariuhua na tiajiniohua, nojoriiri juhuataja shanohua jaanutaja cojitijosuhua, macuucua nojori niojosocoriquiano. Na nuhuaji, nojoriiri pootia quiriohua samaatenu juuca, taa Moisés rootaquiaaricuajani.

## 24

### *Jesu samiitiasacariuhua*

*(Mt 28.1-10; Mr 16.1-8; Jn 20.1-10)*

<sup>1</sup> Coteenu semaana juucajina, cuno maajipohuari tariquicuaji raajinara quiaquiaari. Nojori cojitijosano shanohua jaanutaja patootaareeri. <sup>2</sup> Nojori tiuquijiosacari raajinia, saajiajiniji quejasano raa tiotiu niquitiushiiri tariucua tamocora shuquitishano. <sup>3</sup> Naaratej, nojoriiri raaco tiuquitiamaa. Shaaqui quiriquiaari Jiyaniijia Jesu quete. <sup>4</sup> Nojoriiri shiriiquirii. Majaari nojori niishiniu quiriquiaa taa nojori miiniutianiyani. Canashiyaquiji

caapiqui pueyari nojori shuriucua nujuatuquee. Nojori toqueeri shacantuque quiriquiaa. <sup>5</sup> Maajipohuari na puerenuta jiyocuara naniquioree. Cuno canuuri nojori sequeree:

—¿Casaara nia pajeya saminio pueyano macu niojosaquini? <sup>6</sup> Maja tari niya na quiniu. ¡Tari samiitiarohuano! ¿Niaateeri tari niyajetaree na sequesano niajaniya, Galilea jiyajinia na quishacarijia? <sup>7</sup> Nojuajaari tari nia sequecanucujaja, nojuaja sesa miijiaca niqutiosaanutaniya. Nojoriiri na monutaniya niyacutesanojinia. Na nuhuaji, nojuajaari samiitianutaniuhua jiuujianaraca juucajinia.

<sup>8</sup> Jiyacaritij, maajipohuari shusha niishiquii tarijia Jesu sequesano nojori. <sup>9</sup> Nojori tacatesacariuhua jamajiniji, nojoriiri Jesu once saquiriojosano pueya caminiujiushuhua puetunu niojuanaa, puetunu Jesuucua tiuuniaa pueyajanaanio. <sup>10</sup> Cuno maajipohua, Jesu saquiriojosano pueya pohuataquiaariuhua, nojoriiri nio maajipohua quiquiaari: María Magdalena, Juana, Santiago nucua Maríajuhua, socua tamasa maajipohua. <sup>11</sup> Jesu once pueyara, maajipohua pohuatasanoori juhua paateca sequesano quiquiaari saaja. Nojoriiri saa cuaracashitirijiaa maajipohua pohuatanuuso.

<sup>12</sup> Naajaa, Pedroori tiajiniji netequiaari raajiniara. Raaco na cuuquesacari, saaja Jesu jiunocotaja cohujaque toque niquiquiaari maanoori. Pedroori juhua jiuujiaaju tacateyarohua na shiriiquiniutia, na niquishanojiniji, maajipohua pohuatasanojinijinio.

*Jesu tojitianaa pueya niquishacari Jesu, nojori quiasacari Emaús tiacajiniara*

*(Mr 16.12-13)*

<sup>13</sup> Cuno domingo juucaja, caapiqui Jesu pueyari Emaús tiacajiniara quiojoriquiaa. Emaús tiacaari querajaa hora quiquiaari Jerusalén tiacajiniji, nioluacata quiasacari tiriara. <sup>14</sup> Nojori quiojosacari nucuaco, nojoriiri Jesujiniji pocoojoriquiaa, mariyata shusha naataja pueya miishanojiniji Jesu. <sup>15</sup> Naa nojori pocoojosacari nucuacotej, Jesujuanaari jiyacari nojori rupuesee. Juhujaniya nojoritia pacutaareeri. <sup>16</sup> Majaari nojori niishiniu quiquiaari cana pueyanote cuno quiquiaarini. Nojori namijiaari tojequiaari, maja nojori niishiniuria Jesu. <sup>17</sup> Jesuuri nojori nequesotaree:

—¿Casaa nia pocoojotaacuaani?

Nojoriiri nujuatuquee. Taraajecoyano niquishaariquiaari.

<sup>18</sup> Cuno caapiqui pueyanojinijini, tamonu sesa quiquiaari Cleofas. Nojuajaari Jesu riucuaaree:

—Puetunu pueyajanaacuajaari niishiya casaate Jerusalén tiacajinia miishaarucuaa taraatiani. Quiaacuajaari Jerusalén tiacajinia quiquianujuhua. ¿Quiaatucua casaara niishiyaquirini casaate miishaarucuaani?

<sup>19</sup> Jesuuri nojori nequesotaree:

—¿Casaate tii miishaarucuaajaarani?

Jesu sequereeri:

—¡Nazaret tiacajinijinio Jesuuri mosaarucuaajaj! Nojuajaari Pueyaso sequesano caminiujiunia quiquianu. ¡Jiyanohua maninia quijiaari na cumaacata na miijosano, na niishitiojosanojuhuj! Pueyaso timitiasano quijiaari, puetunu pueya panishanojuanaanio. <sup>20</sup> Pueyacuara secojonaa jiyaniijianucua, mariyata pa camarucuaari na niqutiorucuaa Romano jiyaniijia na motesocoriquiano. Niyacutesanojinia mosaarucuaari. <sup>21</sup> Canaari juucua jiyaniquianuni, nojuajaari Romano pueya taanuunutaniya, pa Israel pueya

quiniuria juhua janiya tama pajaniyajaaja. Quiarijiani, jiuujianaraca juucaari tari na shoconujiya na mosaanujiniji. <sup>22</sup> Tamasaca maajipohua canaa maanujinijioori canaa shioree nojori pohuatasanta. Nojoriiri quiarijia tariquicuaji quiojoma Jesu raajinia. <sup>23</sup> Nojoriiri maja na riuriatantu quishii na quete. Nojori tacatesacariuhua, nojoriiri canaa pohuatasuhua, nojorinia Pueyaso seya niquirii juhua na maquenujia. ¡Cuno Pueyaso seyanaari nojori sequeree, Jesu tari samiitiarohua! <sup>24</sup> Na nuhuaji, tamasa canaajinijioori raajinia quiojiyareejuhua. Seetanujuanaa naa quiriqiaari, taa maajipohua sequeree canaacuajani. Maja cutaraari nojori niqiniu quiri Jesu.

<sup>25</sup> Jiyacaritij, Jesuuri nojori sequeree:

—Pueyanaa, majaquiiri juhuanojuaja nia niishiniu. Niaari taacanuyajaa puetunu tariucuacaanu Pueyaso sequesano caminiujiuniaa naajiotasanoocuajanaa nia tiuuniuria. <sup>26</sup> ¿Majateeri naa na pohuataa quiquiaaricuaaja: “Cristoori coteenu naa mosaanutaniyaquij. Na nuhuaji cutara, jyanohua cumaacaracara quiijara jiyatesaanutanihuari Jiyaniijajanaa na quiniuria”?

<sup>27</sup> Jesuuri juhuacatecara nojori niishitiojoree puetunu tariucuacaanu Pueyaso Rupaajinijianaa, tee nojuajiniji naajiotasano quiyacuajani. Moisés naajiotasanojiniji pohuatanu coteereeri, na nuhuaji, puetunu Pueyaso sequesano caminiujiuniaa naajiotasanojinijianaanio.

<sup>28</sup> Nojori tiuquishacari cuno tiacajinia, terara nojori quiojoriquiaacuajani, Jesuuri juhua shocoriquiano canujuriquiaa. <sup>29</sup> Nojoriiri nojoritia na jiyojetenu paniriquiaa jyanohua. Nojoriiri na sequeree:

—¡Niyaja canaata quia jiyojere! Paa tari niniyareeni.

Naaratej, Jesuuri nojoritia jiyojese cuniqui. <sup>30</sup> Jesu jaara nojoritia cajiriquiaa tari miaquejajinia, nojuajaari pan ririi. Nocuara Pueyaso secojoreeri. Nojoriria na neecasereeri. Na nuhuaji, nojori serotareeri.

<sup>31</sup> Jiyacaritij, nojori namijiaari juhua riatequequee. Jiyacariqui na niishi-tiuquiiri. Jesuuri saaja shaajequee cuniquijia nojori tajiniji. <sup>32</sup> Nojoriiri sequetooree:

—¡Jesucuaajaquiiri quiriqiaa! ¡Cunora poojiaqui jiyamitia timiriquiaa na pocojosacari pajaniyata nucuamaji, nojuaja jaara niishitiojoriquiaa pajaniya Pueyaso Rupaajinia naajiotasantej!

<sup>33</sup> Jiyacaritij, nojori shuquiriniutia, nojoriiri ritia sanetaquee. Cuniquiji Jerusalén tiacajiniara tacaretaarohuari. Nojori tiuquishacariuhua, nojoriiri puetunu Jesu once saquiriojosano pueyajanaa riuriatasuhua tii tariucua rerejono, mariyata socua narta Jesu pueyata. <sup>34</sup> Tariucua tiajinia quiniaari Emaús tiacajiniji tiuquijionaa sequeree:

—¡Pa Jiyaniijiaqui seetanujuanaa samiitiarohua! ¡Simónri na niquirii!

<sup>35</sup> Na nuhuaji, shusha tiuquijionaari nojori pohuatareejuhuaj, taa Jesu pocojoriquiaa nojoritiani, nucuaco nojori quiasacari, mariyata taa nojori niishirii nojuajani, pan na neecasacari nojoriria.

*Jesu muetasacariuhua na saquiriojosano pueyacua  
(Mt 28.16-20; Mr 16.14-18; Jn 20.19-23)*

<sup>36</sup> Nojori pocojosacarijia nojori niquishanojiniji Jesu, jiyacaritij, Jesujanaari canashiyaquiji nojori tajinia nujaquee. Naa nojori sequereeri:

—¿Niaate quiyajaa? Nioojia nia cajitiri.

<sup>37</sup> Nojoriiri shiriiquitiqui. Jyanohua puereturiquiaari. Nojoriiri Jesu jyaniriquiaa naaqui. <sup>38</sup> Jesuuri nojori sequeree:

—¿Casaara nia pueretiuyani? ¿Casaara nia jiyajenetaa janiyani? <sup>39</sup> Cua juaashiquia nia niquiri, cua niohuacanio, nia niishiniuria janiyacuaajaari quiyani. ¡Cua cootiuri! ¡Cua niqutiuri! Naaquiiri maja cuaqueyaraca, maja nucuhearaca taa nia niquiya janiyacuaajani.

<sup>40</sup> Naa nojori na sequesacaritij, Jesuuri nojori niqutioree na juaashiquia, na niohuacanio. <sup>41</sup> Puera nojori jiuujiatesacari, puera nojori shuquirishacar-ijiuhuaj, nojoriiri taacanuuriquiajaa, maja naasucua Jesu. Cunora, Jesuuri nojori sequere:

—¿Niaate miaquesocoriqiuano jiitiaacuaa?

<sup>42</sup> Nojoriiri Jesu niqutioree sapitiaaja raqui caquishano. <sup>43</sup> Jesuuri na maseree. Nojori niquiara na miaquereeri. <sup>44</sup> Na nuhuaji, nojori sequereeri:

—Janiyari naa miishaarucuaani taa cua pohuataquiaari niajaniyacuaajani, pueyaracaanu niaata cua quishacari tarijia. Nia sequequiaaricuajanijia, janiyari naa miishaanutaniyani, taa Moisés naajiotaquiaari janiyajinijicua-jani. Puetunu Pueyaso sequesano caminiujiuniaajanaari janiyajiniji naa-jionuutaquiaarijiuhuaaj. Supuetana Davidri janiyajiniji naajiotaquiaariji-uhua na jaaquequejoneejinia. Quiarijia tari tohuateerucuaari puetunu janiyajiniji cuno naajionuutasanojuanaa.

<sup>45</sup> Jiyacaritij, Jesuuri nojori niishitirii tariucuacaanu Pueyaso Rupaa naa-jiotasano. <sup>46</sup> Nojori sequereeri:

—Tariucuacaanu naa naajiotasanoori quiya: “Pueyaso Jiyaroso-coriqiuanoori mosaariqiuano, na nuhuaji, jiuujianaraca juucajinia samiitianutaniuhuari”. <sup>47</sup> Naa naajiotasaaquiaarijiuhuaaj, Jerusalén tiacajinia, janiyajinijiiri pohuatasaanutaniya pueya niquiara, na nuhuaji puetunu jiyacajiniajanaanio. Pueya tiuushacari cucua, nojori jaara noojiaca tacatorohua sesa nojori miiniujiniji, sesa nojori miishanoori tuujusaanutaniya, Pueyaso jiyanooshacari nojori. <sup>48</sup> Niaacuajaari puetunu cua miishanojuanaa niquijiaca. <sup>49</sup> Cua tojitiare. Janiya jaara jiyocuacaanu quiaarohua cua Queecuani, janiyari Pueyaso Sohuanu jiyaronutaniya niaacuani, taa cua Que sequequiaaricuajani. Niyaja pootia nia quiri Jerusalén tiacajiniani, niaa jaara jiyocuacaanuji niriqiuano cumaaca maserejaatijia.

*Jiyocuacaanu Jesu tacasacariuhua*  
(Mr 16.19-20)

<sup>50</sup> Na nuhuaji, Jesuuri nojori jiyataquiaari Jerusalén tiacajiniji, Betania tiacajiniara. Cuniqiu nojori quishacarijia, Jesuuri na juaashiquia shiitio-quiaari nojoriicuaara na secojosacari Pueyaso, Pueyaso jiitianura maninia pueyaracaanu nojori. <sup>51</sup> Nojoriicuaara na secojosacarijia, Jesuuri nojori shuriucuaji tacanishaaquiaari jiyocuacaanu. <sup>52</sup> Nojoriiri na shuquiritariere. Na nuhuaji, nojoriiri Jerusalén tiacajinia panaatia tacateyarohua. Nojori-iri jiyanohua shuquiriaatia quiriqiuana. <sup>53</sup> Nojoriiri pueyaracaanu quijia Pueyaso Secojoua tiajinia. Tii Pueyaso maniniuhuaqueetatujua pueyara-caanuuri. Tariucuaja.

## JUAN NAAJIOTASANO JESUCRISTOJINIJI

### *Pueyaso Rupaa jatasacari pueyanora*

<sup>1</sup> Paari Jesucristojiniji niishiyani taamuecateja na Que Pueyasoni. Naaratej, Jesucristoori sesojosaaquiaari “Pueyaso Rupaa”. Nojuajaari tari pueyaracaanu quijia, jiya quiyaquishacarijia. Na Que Pueyasota quijiaari. Pueyaso quijiajaariuhuj. <sup>2</sup> Jiya coteesacari, nojuajaari na Que Pueyasota quiriquiaa. <sup>3</sup> Na Queeri na shipinitiquiaari puetunu casaajanaa. Puetunu casaajanaari na shipinishano. Maja tamonu shipinina quiniu socua. <sup>4</sup> Nojuajaari quijiajuhuanaj. Naaratej, nojuajaari na naata pueya jiuujia cuhuatanu, pueyaracaanu rishijia nojori quiniurajuhuj. <sup>5</sup> Jesucristoori cuhuashiqui quijia. Naaratej, na rupaata poojia cuhuataari. Saniniuujia, Sesaacaari ninishiqui quijia. Naajaa, majaari na naata Pueyaso Rupaa na shocotanu. <sup>6</sup> Pueyasoori quiari naataja tamonu pueyano jiyaroquiaari, Neyanujiniji pahuatariquiano. Na sesa quiquiaari Tiuquinijona Juan. <sup>7</sup> Pueyasoori na jiyaroquiaari pueya na niishitiniuria cante Jesucristoni, pueya tiuuniuria Jesuucua, nojori jiuujia na cuhuatanura. <sup>8</sup> Juanri maja pueya jiuujia cuhuatana. Nojuajaari Jesucristojiniji pahuataquiaari pueya niishiniuria cante saniya poojia cuhuatana cutarani. <sup>9</sup> “Pueyaso Rupaari” seetanu poojia cuhuatanajanaa. Nojuajaari Jesucristo. Jiyocua niquiaariiri puetunu pueyajanaa niishiniuria cante Pueyasoni.

<sup>10</sup> “Pueyaso Rupaari” mijiria rucanejojua quiquiaari. Pueyari tama nojori Shipinijajaaja niishiyaquiquiaari. <sup>11</sup> Tama na saquiriojosano Israel pueyacia niquiaariiri. Nojoriiri na tamacaquiaari saaja. <sup>12</sup> Saaja noojiaqueya pueyari nocua tiuquiquiaari. “Pueyaso Rupaari” cuno pueya jiyatequiaari Pueyaso muerasura nojori quiniuria. <sup>13</sup> Nojoriiri Pueyaso jatanishano, seetanujanaa na muerasu nojori quiniuria. Pueyaso saquiriojosano pueyajiniji pueyano supuesacari, cunoori maja na naata na jiyatenu Pueyaso pueyano na quiniuria. Pueyari maja na naata muetunu tariucua Pueyaso pueya. Naajuhuj, pueyanoori maja na naata tama na cuaqueyajaaja jiyatenu Pueyaso pueyano na quiniuria. Pueya cutaraari Pueyaso muerasura jataquiaa Neyanuucua nojori tiuushacari saaja.

<sup>14</sup> “Pueyaso Rupaari” seetanujanaa pueyanora jataquiaari mijiria na quiniuria. Nojuajaari Jesucristo. Canaata quiquiaariiri. Canaari na cumacata na miijosano niquiquiaarini. Jiyanohua maninia quiquiaariiri. Na Que Pueyasoori na cumaquijia jiyanohua maninia na miiniuria, Neyanuniyojua na quishacari. Nojuajaari saaja seetanu rupajanaa sequeja Pueyasojiniji. Jiyanojia quijiaari. <sup>15</sup> Tiuquinijona Juanri Jesucristojiniji pahuataquiaari pueya niquiara. Jiyanohua na rupaa paaretaquiaariiri pueya tojitanura nojuaja. Naa sequejaari:

—Janiyacujaari nojuajiniji nia pahuatajani, janiya jaara nia sequejani: “Tamonu pueyano cua nuhuaji niniutianiya”. Nojuajaari jiyaniijajanaa cutara janiyajiniji. Nojuajaari tari quijia cua quiyaquishacarijia.

Juanri naa pahuataquiaari Jesucristojiniji.

<sup>16</sup> Jiyaniijajanaa Jesucristo quiniuucua, puetunu pajaniyajanaari na jitasanojiniji masequiaani. Jiyanohua capora na quiniuucua, nojuajaari pueyaracaanu pa cumaquiquiaa. <sup>17</sup> Pueyasoori supuetana Moisés naajotequiaari na rootasano pajaniyara. Cunoori maja na cumaquiniu quiquiaari pajaniya. Quiarjia saniniuujia, pa panijia Pueyaso quiniuucua, nojuajaari

Neyanujuanaa jiyaroquiaari pocua, pa jiyanooshaanura, naajuhuj, seetanu rupaajanaa pa niishiniuria nojuajiniji. <sup>18</sup> Majaari quenaaja tamonu pueyano niqiniu quijia Pueyaso. Neyanu, cante na Que shuriucua quijiacuajani, nojuajaari na Que pa niishitioquiaari.

*Tiuquinijiona Juan pohuatasano Jesucristojiniji*  
(Mt 3.11-12; Mr 1.7-8; Lc 3.15-17)

<sup>19</sup> Jerusalén tiacajinijinio canaa Judiocuaca camarucuaari na pueya jiyaramiquiquiaari Tiuquinijiona Juancua, nojori nequesoreenura Juan cante nojuajani. Nojori jiyaramiquishano pueyari quiquiaari supuetana Leví niqiuohuacuajinio supueno pueya. Nojiaqueya cuno pojorijinijinioori quiquiaarijuhua pueyacuara secojonaa pueya. <sup>20</sup> Nojori nequesotasacari Tiuquinijiona Juan, nojuajaari maja quenaaja na seetanu quiquiaari cante nojuajani. Seetanujuanaa naa nojori sequequiaariiri:

—Janiyari maja Pueyaso Jiyarosano Cristoni.

<sup>21</sup> Cuno pueyari socua na nequesotarohua:

—¿Canteeri quiajanianiyani? ¿Quiaa jiyoteeri Pueyaso sequesano caminiujiunia Elías soj? ¿Quiaa jiyoteeri samiitiarohuacuaa?

Tiuquinijiona Juanri saaja nojori riucuaaree:

—Maja. Janiya maja supuetana Elíasni.

Cuno pueyari socua na nequesotarohuacuhuj:

—¿Quiaa jiyoteeri Pueyaso sequesano caminiujiunia, noj tariucuaaanu sequesaaquiaari niriqianotej?

Juanri saaja nojori riucuaaree:

—Maja.

<sup>22</sup> Cuno pueyari socua na sequeree:

—Canaa quia pohuatareja, ¿cante quiajanianiyani? Canaacua saniniuujia canaa camarucua pohuatasuhuanijia.

<sup>23</sup> Juanri saaja naa nojori riucuaaree:

—Janiyacuaajaari nooni, cariiquia jiyajinia nacajatej, taa supuetana Isaías juhuacarijia naajiotaquiaari janiyajinijicuaajani: “¡Jiyaniijiaacuaji nia nuunore maninia! ¡Maja shuutiuniu!”

<sup>24</sup> Jiyacaritij, Fariseocuaca camarucua jiyaramiquishano pueyari Tiuquinijiona Juan nequesotaree:

<sup>25</sup> —Quiaa jaara quiaquiri Cristo, Elíasjuhuaj, cuno tariucuaaanu sequesaaquiaari niriqiano Pueyaso sequenu panishano caminiujiuniatej, ¿casaara pueya quia tiuquinijiya moojinacuaraarini?

<sup>26</sup> Juanri nojori riucuaaree:

—Janiyari nareja moojinia tiuquinijiya pueyani. Saniniuujia, tamonuuri niya quia, nia niishiyaquishoojua. <sup>27</sup> Nojuajaari cua nuhuaji niniutianiya. Nojuajaari Jiyaniijiajanaa cutara. Majaari quenaaja cua naata na seru quiniu na sapatu neyocua cua saacatanura nera.

<sup>28</sup> Naa cuno pojori nequesoreesacari Tiuquinijiona Juantej, cunoori quiriquiaa Betania jyanishano tiacajinia, Jordán moo taquijiria, tee cuniqui Juan tiuquinijioriquiaa moojinia pueyacuajani.

*Jesu juhua Pueyaso borregoniojua pocuara mosaariquiano*

<sup>29</sup> Tariqui saniniuujia, Tiuquinijiona Juanri Jesu niqirii nocua niyano. Juanri naa sequeree canaa niqiara:

—Paari pueyaracaanu mooquiaa borregohuani Pueyaso jiyanooniuria pajaniya. ¡Nia niqiri! ¡Cuno cumaji canujiyani, cunoori Pueyaso Jiyarosano, juhua borrego puetunu pueyacuara mosocoriquiano, seetanujuanaa sesa pa miishanojiniji pa jiyanooshaanura! <sup>30</sup> Janiyacuajaari nojuajiniji nia



pohuatajani janiya jaara nia sequejani: “Cua nuhuaji niniutianiyari Jiyani-ijiajanaa cutara. Nojuajaari tari rishijia cucuaji cua quiyaquishacarijia”. <sup>31</sup> Janiyari na niishiyaquijiajuhuaj, cante nojuajani. Naajaa, janiyari parta Israel pueya tiuquinijioquiaa moojiniani, noojia nojori jeenucuanura, Pueyaso Jiyarosano nojori niishiniuria cutara.

<sup>32</sup> Tiuquinijiona Juanri pueya sequerejuhuaj:

—Janiyari Pueyaso Sohuanu niquiriucuaani jiyocuacaanuji roseyano nocua juhua mococoonu. Nocua tiuushiiri. <sup>33</sup> Cuno, cua jiyaroquiaari pueya cua tiuquinijionura moojiniani, nojuajaari cua sequequiaari: “Quiaa jaara cua Sohuanu niquiri pueyanocua roseyano, nocua na tiuuniuria, quiocua niishiri, cunocuaajaari cua sequesano quiajaniya. Nojuajaari cua Sohuanu tiuquinijionutaniya pueya jiuujiajinia cutara, seetanujuanaa cua muerasu nojori quiniuria”. Nojuaja jaara naa cua sequeyaquiquiaari, janiya maara na niishiyaquiquianuni. <sup>34</sup> Janiyacuajaari tari na niquiquianuni. Naaratej, janiyari saniniuujia nia pohuataani pueyanaa, ¡nojuajaari seetanujuanaa Cristo, Pueyaso Niyanu!

### *Coteenujuanaa Jesu pueyajiniji pohuatasano*

<sup>35</sup> Tariqui, Tiuquinijiona Juanri tii quishiiquiuhua caapiqui na pueyata. Janiyari niquiriyatu cuno caapiqui pueyanojinijinio quiriquiaani. <sup>36</sup> Tiuquinijiona Juan jaara Jesu niquiquiaari shocoyano, jiyacari canaa sequereeri:

—¡Nia niquiri! Cunoori cua sequesano niajaniya, Pueyaso Jiyarosano pocuara mosocoriquiano juhua borrego, sesa poojia seque jeequesaanura.

<sup>37</sup> Naa canaa tojishacari Juan sequesanotej, canaari Jesu nuhuajiquiaarini. <sup>38</sup> Jesuuri canaacua tacateree. Canaa na niquishacari na nuhuaji sacuaano, canaa sequereeri:

—¿Casaa nia paniyani?

Canaari na sequereeni:

—Niishitiojonanaa, ¿tee quia maquequiaacuaani?

<sup>39</sup> Jesuuri canaa riuquaree:

—Miji. Nia niquiquii.

Canaari nata quiaareeni. Canaari na quijia niquitiushiini. Tari pananu piriushacariiri quiriquiaa jiyacari. Cunora, canaari tii maquetusee Jesutani.

<sup>40</sup> Tiuquinijiona Juan niquitiniucua Jesu canaa, canaari Jesu nuhuajiquiaarini. Andrésri cua cojiriquiaa. Andrésri tarajanu jiitiaja. Na sesaari quijia Simón Pedro. <sup>41</sup> Tariquicuaji, Andrésri ritia tarajanu Simón pajenucua quiaquiaari. Na riuriatasacari, na sequereeri:

—¡Cua tarajanunaa, canaari Cristo niquiriquiacuaani, tariucuaaanu Pueyaso sequesano na jiyarosocoriquianotej!

<sup>42</sup> Na nuhuaji, Andrésri tarajanu Simón jiyataaree Jesuucua. Jesu niquishacari Simón, na sequereeri:

—Quiaacuajaari Simón, Juan niyanu. Quiarijia saniniuujia, quia sesaari quiniutianiya Cefas.

Griego rupaajinia, nioori sequeya Pedro. Pedroori saniniuujia pueyano rupaajinia sequeya “Saajia”.

### *Jesu saquiriojosacari Felipe, Natanaelnio*

<sup>43</sup> Tariqui, Jesuuri Galilea jiyajiniara quiariquiaa. Felipe riuriatamaari. Na sequereeri:

—Cua tarajare cua pueyano quia quiniuria.

<sup>44</sup> Felipeeri nata quiaaree. Nojuajaari Betsaida tiacajinijinio quiquiaari. Andrésri tarajanu Pedrota cuno tiacajinijinio quiquiaarijuhuaj. <sup>45</sup> Na nuhuaji, Felipeeri Natanael pajeree. Na riuriasacari, na sequereeri:

—¡Canaa noo pueyano niquiriini, Moisés nojuajiniji naajiotaquiaari tariucuacaanutej! Tariucuacaanu Pueyaso sequesano caminiujiuniaa pueyari nojuajiniji naajionuutaquiaarijuhuaj. ¡Nojuajaari Nazaret tiacajinijinio Jesu, José niyanu!

<sup>46</sup> Natanaelri saa riucuaareejaa:

—¡Jaj! ¿Na naatate maninia miiija pueyano supenujuaara cuno sesa miijiaca Nazaret tiacajiniji?

Felipeeri na sequeree saaja:

—¡Miji! ¡Pa niquishii!

<sup>47</sup> Jesuuri Natanael niquirii nocua niyano. Na sequereeri:

—Nio pueyanoori seetanu pa supuetana Israel niquiohuacuajinio supuenojuanaa cutara. Majaari na niishiniu sapojonu.

<sup>48</sup> Natanaelri na sequeree:

—¿Taa quia niishiya janiyarini?

Jesuuri na riucuaaree:

—Felipe sequeyaquishacarijia quiajaniya cucua quia niniuria, janiyari tari quia niquirii coojiatani, higo naana pajama tateyano.

<sup>49</sup> Natanaelri shiriiquirii. Jesu sequereeri:

—Niishitiojonanaa, ¡quiaacuajaqui Pueyaso Niyanu! ¡Quiaari parta Israel pueya jiyaniijiaranojuhuaj!

<sup>50</sup> Jesuuri na sequeree:

—¿Quiaateeri cucua tiuquii shusha saaja cua sequesacari quiajaniya: “Quia niquirii higo naana pajama tateyanonijia”? Seetanujuanaa quia sequeyanijia, quiaari na nuhuaji cua cumaacata cua miiijosano niqiniutianiya cutara.

<sup>51</sup> Jesuuri cuniqui quiniaa pueya sequereejuhuj:

—Seetanujuanaa nia sequeyanijia, niaari jiya cajiniocua niqiniutianiya riateno. Pueyano cua quishacari, niaari Pueyaso seya niqiniutianiya cucua roseetaano, cucuaji taqueetaanojuhuaj.

## 2

### *Jesu jatanishacari mohuaca vinora, pueyano camishacari*

<sup>1</sup> Jiuujianaraca juuca nuhuaji, tamonu pueyanoori camiquiaari Caná tiacajinia, Galilea jiyajinia. Masuusano pueyari queranacuriquiaa. Jesu nucuaari tii quiriquiaajuhuj. <sup>2</sup> Jesuuri na saquiriojosano pueyata masusaaquiaarijuhuaj, camishacari queranacunura. Janiyari na saquiriojosano pueyano quiriquiaa jiyacari tarijuhuaj. <sup>3</sup> Jiyacaritij, mashacaari ritia puequemaa. Na nucuaari Jesu sequeree:

—Sanaa, mashaca tari puequemaa.

Mashacaari quiquiaari uva caaca, vinotuhuj. <sup>4</sup> Jesuuri na nucua riucuaaree saaja:

—Maajiniaa, ¿casaara quia sequeya janiyani? Juhuanujuaja maja cua poonijosacari Pueyaso cumaacata.

<sup>5</sup> Na nucuaari pueya raatojonaa sequeree:

—¡Niocua Jesu tojirijia! Jaara nia sequere, niocua puetunu na sequesanojuanaa miiri.

<sup>6</sup> Tii cajitiuriquiaari seis conatu, saajiajiniji quejasano. Canaa Judiocuaari sequeyarucua shuquiriojua tiajinia nojori tiuquishacariuhua, juhua

jeequesano nojori quiniuria Pueyaso niquiara. Nojori mohuaca cajitiacojua quiquiaariiri cuno conaa. Jiyanojua puereetucocua quiijaari. Cuno conatururi setenta tumococua mishaja mohuacata mishinishano quijia. <sup>7</sup> Jesuuri pueya raatojonaa sequere:

—Mohuaca nia taquirioore. Niocua nio conaa mishinijiore.

Pueya raatojonaari conaa mishinijiore. Mohuacaari conaa rupaacuma puecacosee. <sup>8</sup> Jesuuri nojori sequere:

—Quiarijiani, tiji nia shuuri. Queranacunu camaru nia sanitiore coteenu.

Raatojonaari na raatesee. <sup>9</sup> Queranacunu camaruuri vinora jatano mohuaca sanirii. Majaari na niishiniu quiquiaari cuno na ratusanoori mohuacajiniji jatanishaaree vinora. Saaja pueya raatojonaa cutaraari na niishiriquiaa. Nojoricuajaari mohuaca mishinijioree cuno conaajinia. Queranacunu camaru saniniu nuhuaji cuno ratusano, camiyano pueyano piiriiri.

<sup>10</sup> Na sequereeri:

—Pueyaruhuatijia coteenu raateja shocuanacu vinote. Puetunu masuusanu pueya jaara tari raruure queraatia, na nuhuaji raatesano cutaraari shaarunacu vino. ¡Quiarijia saniniuujia, nio cua ratusanoni, cunoori socua maniniuniacu vino coteenu quia raatojotesanojiniji!

<sup>11</sup> Naa Jesu jatanishacari mohuaca vinoratej, cunoori coteenujuanaa na cumaacata na miishano quiquiaari Caná tiacajinia, Galilea jiyajinia. Nojuajaari naa niquitiquiaari Pueyasojiniji na cumaaca. Naacuajitij, canaa na saquiriojosano pueyani, canaari niishiquiaarini Jesuuri seetanujuanaa Pueyaso Jiyarosano.

<sup>12</sup> Na nuhuaji, Jesuuri Capernaum tiacajinia quiaaree na nucuata, tapueyocucatajuhuaj, canaa na saquiriojosano pueyano. Canaari tii camueenujuquiaari pasajani.

*Jesu jaacasacari seya niquitiojonaa Pueyaso Secojoua tiajiniji*

*(Mt 21.12-13; Mr 11.15-18; Lc 19.45-46)*

<sup>13</sup> Quera canaa Judiocuaca queranacusacari Pascua juucara Jerusalén tiacajinia, Jesuuri tii canaa jiyataareejuhuj. <sup>14</sup> Na tiuquishacari, Pueyaso Secojoua tiajinia quiamaari. Tii niquishii pueyari juyaca niquitiojiyano Pueyasooacara puecoosocoriquiano, borregohua, noseyanio. Pueyari tii na juhucutucujinia cajitiuriquiaajuhuj, pueya na tacatojonura taucuaa cumaneeca, Pueyaso Secojoua tiajinia niquitiosocoriquiano cumaneecara.

<sup>15</sup> Naa na niquishacari pueya miyano Pueyaso Secojoua tiajinatej, Jesuuri seya morojotaja jiyocua tatucaree. Na majacutajara na shitiareeri. Cunota, puetunu nojorijianaa jaacaree Pueyaso Secojoua tiajinijiiri, puetunu nojori borregohuatajanaa, mariyata puetunu nojori juyacatajanaano. Cumaneeca rerecojoree jiyocua juhucutucujinijiiri. Naajuhuj, cumaneeca juhucutucua caponeetareeri. Pojotaariquiaacuaari. <sup>16</sup> Noseya niquitiojonaa pueya sequereeri:

—¡Niiquiji nia patootare nio noseya! ¿Casaara nia jiyatecanu juhua casami niquitiosaquiria cua Que tiani?

<sup>17</sup> Jiyacaritij, canaa, Jesu saquiriojosano pueyani, canaari niishiquiini, seetanujuanaa tariucuaaanu Pueyaso Rupaajinia naa naajiotasanoori quiya: “Quia tiaacua juaatishaaree jiyanojua, jiyanojua cua panishacari quia tia”.

<sup>18</sup> Naa Jesu miiniuucuatej, narta Judiocuaca camarucuaari Jesu nequeso-taturee:

—¿Cante quia sequerucuaa naa quia miiniuriani? ¡Canaa quia niquitiricuaraja Pueyaso cumaacata quia miishano, canaa niishiniuria quiaari seetanujuanaa Pueyaso Jiyarosano!

<sup>19</sup> Jesuuri nojori riucuaaree miriqui:

—Pueyaso tia nia niyartare, janiyacua saaja jiuujianaraca juucajinia na tucuatrohua tianu tamajaajani.

<sup>20</sup> Narta Judiocuaca camarucuaari na riucuaaree:

—¡Cuarenta y seis marijiaari shoconujuquiaari pueya tucuatanura nio seco-  
jojua tia! ¿Quiaateeri jiyaniya quia naata na tianuhua ritia, saaja jiuujianaraca  
juucajinia? ¡Maja quia naata!

<sup>21</sup> Jesuuri tama na cuaqueyajaaja pohuatariquiaa, Pueyaso tia na sequesacari. <sup>22</sup> Naacuaajitij, Jesu jaara samiitiaquiaariuhua, canaa na pueyari jiyacari shusha niishiquiaari naa Jesu sequesano miriquini. Naaratej, canaari tariucuacaanu Pueyaso Rupaajinia naajiotasanoocua tiuquiaarini, Jesu sequesanoocuanio.

### *Jesu puetunu jiuujia niishijajanaa cutara*

<sup>23</sup> Canaari ocho juuca camueenujuquiaari Jesuta Jerusalén tiacajiniani, Pascuara queranacunuusacari. Tii canaa quishacari, tii quiniaa pueyari Jesu cumaacata na miijosano niquiquiaari. Naaratej, queraatia pueyari nocua tiuquiaari. <sup>24</sup> Naajaa, majaari Jesu tiuuniu quiriquiaa seetanujuanaa nojoriicua. Nojuajaari nojori niishiriquiaa, taamueca pueyate nojorini. <sup>25</sup> Tamonu pohuataaquishacarijia nojuaja, nojuajaari tari niishiya taamueca jiuujiaracate pueyani.

## 3

### *Nicodemo pocoojosacari Jesuta*

<sup>1</sup> Niucua, tamonu pueyanoori niquiaari Jesuucua. Na sesa quiquiaari Nicodemo. Nojuajaari canaa Judiocuaca camarucuaajinijinio quijia, Fariseocuaca maanujinijiniojuhuj. Tojishano pueyano. <sup>2</sup> Jesuucua na tiuquishacari, naa na sequeeseeri:

—Niishitiojonanaa, quia cumaacata quia miiniuucua canaa niquiara, canaari cunora niishiyani quiaari Pueyaso jiyarosano, canaa niishitiojoriquiano. Seetanujuanaa, Pueyaso jaara pueyano naacuyaquiri na cumaacata, nojuajaari maja na naata cusosuhua naatanijionu taa quia mi-  
iquiaacuaani.

<sup>3</sup> Jesuuri Nicodemo sequere:

—Seetanujuanaa quia sequeyanijia, pueyano jaara juhua conaaja raquishaarohua, majaari na naata Pueyaso pueyanora na quiniu, Pueyaso jitianura nojuaja.

<sup>4</sup> Nicodemoori Jesu nequesotaree:

—¿Pueyanotucua taa rasaanuhua, nojuaja jaara tari cumantumaca quiya? Majaari na naata na nucua saracajinia tiuquiniuhua na rasaanuhua.

<sup>5</sup> Jesuuri na riucuaaree:

—Seetanujuanaari cua sequesano. Cua tojiri. Paari coteenu rasaaquiaari pueyano pa quiniuriani. Saniniuujia, cante quiarinio pueyanora jataniyaquishano Pueyaso Sohuanutani, nojuajaari maja Pueyaso jitianoniyojua na quiniu quiniutianiya. <sup>6</sup> Mijiria pueya muetusanoori saaja pueyano. Saniniuujia, cante Pueyaso Sohuanu jatanishano quiarinio pueyano na quiniuriani, nojuajaari Pueyaso pueyano cutara, pueyaracaanu rishiriquiano. <sup>7</sup> Naaratej, majaari quia shiriquiniu puera, naa cua sequenuucua quiajanijatej, quiaa cuara rasuhua, seetanujuanaa quiarinio pueyano quia quiniuria. <sup>8</sup> Mijiria, paratuuri piyarojoquiaa taa na paniyacuajani. Paari nareja na cojuatunenu tojiquiaani. Majaari pa niishiniu teje na piyarojijani, tee cunocora na quiaajaaniuhuj.

Naajaarihuaj, majaari quia niishiniu taa Pueyaso Sohuanu jataniquiaa pueyanoni, quiarinio pueyano na quiniuria.

<sup>9</sup> Nicodemoori Jesu nequesotarohuacuhuj:

—¿Pueyanotucua taa quiarinio pueyanora jatanishaarejaarani?

<sup>10</sup> Jesuuri na riucuaaree:

—¿Majateeri quia niishiniu cua sequesano quiajaniya? Quiaari Pueyaso Rupaa niishitiojonacuaja Israel pueyara. <sup>11</sup> Canaari seetanujuanaa pohuataquiaa canaa niishishanoni, canaa niquishanojuhuaj. Niaari saniniuujia saaja na cuaracashitiquiaa, canaa pohuatasacari niajaniya seetanu rupaajanaa. <sup>12</sup> Niaa jaara saaja cuaracashitiquiaa cua pohuatasano mijiria casaajiniji, ¿niaatucua taa niishiriquiani, janiya jaara nia pohuatare jiyocuacaanuji casaani? <sup>13</sup> Janiyari jiyocuacaanu quijiani. Majaari quenaaja tamonu pueyano tacanu quiquiaari jiyocuacaanu, saaja tijinio roseno cutara. Nojuacuajaari janiya. <sup>14</sup> Cariiquia jiyajinia pa supuetanaa Israel pueya rucuanijosacari, Moisésri na shipinishano soconu nujuaretaquiaari macaacua, soconu sasuhua niquishocoriquiano. Na niquinia pueyari naatacoquiaarihua. Naajuhuj, janiyari macaacua nujuaretasocoriquianoni. <sup>15</sup> Naacuajitij, puetunu cucua tiunaaajanaari pueyaracaanu quijiaca quiniutianiya.

#### *Pueyasoori puetunu mijiria quiniaa pueyajanaa panijia*

<sup>16</sup> 'Jiyanohua cua Que Pueyaso paniniuucua puetunu mijiria quiniaa pueyajanaa, nojuajaari Neyanujuanaa jiyaroquiaari puetunu pueyapueecuarajanaa mosocoriquiano. Puetunu cucua tiunaa pueyajanaari saniitioyaquishaanutaniya cutara. Nojori cutaraari pueyaracaanu rishijiaca quiniutianiya Pueyaso shuriucua. <sup>17</sup> Pueyasoori maja na jiyaronu quiquiaari janiya pueya cua saniitionura. Seetanujuanaa cua jiyaroquiaari cutaraari pueyacuaji Tacuna cua quiniuria.

<sup>18</sup> 'Cante cucua tiuujiani, majaari na saniitiosaanu quiniutianiya. Saniniuujia, cante cucua tiuyashijiani, nojuajaari tari pueyaracaanu saniitiosocoriquiano jiyatesano quiya. <sup>19</sup> Janiyari mijiria niquiaarini pueya jiuujia cua cuhuatanura Pueyaso Rupaata. Pueyari saaja na ruuretaquiaa, ninishiqui nojori jiuujia quiniuucua. Sesa miijiaca nojori quiniuucua, majaari nojori paniniu cuhuatasano nojori quiniuria. Naaratej, nojoriiri saniitiosaanutaniya. <sup>20</sup> Puetunu sesa miijiacajanaari cua niquiniu paniyashijia, pueya jiuujia cuhuatana cua quishacari. Majaari nojori ninu paniniu cucua, sesa nojori miishano mariqui niishishaareeri. <sup>21</sup> Saniniuujia, cante maninia miiquiaani taa Pueyaso sequeya na Rupaajiniacuajani, nojoriiri cuhuashiqui quiniu panijia cutara. Nojoriiri cucua nijioquiaa na niishishaanura nojori miishano cutaraari puetunu maniniajanaa, taa Pueyaso paniyacuajani.

#### *Tiuquinijiona Juan pohuatasacari socua Jesujiniji*

<sup>22</sup> Na nuhuaji, Jesuuri quiojoquiaari canaata Judea jiyajinia, canaa na saquiriojosano pueyatani. Tii canaa quishacari Jesuta, canaari pueya tiuquinijioriquiaa moojiniani, pueya tacatosacari noojia sesa nojori miishanojiniji. <sup>23</sup> Tiuquinijiona Juanri jiyacari pueya tiuquinijioriquiaajuhua Enón tiacajinia, Salím tiaca shuriucua. Juanri tii tiuquinijioriquiaa pueya, queraatia mohuaca quishacari tii. Pueyari nocua quiojoquiaarijuhuaj tiuquinijosano nojori quiniuria. <sup>24</sup> Juanri jiyacari nujuatejojuajinia nujuatesoo quiriquiaajaa.

<sup>25</sup> Cuno quishacari, Tiuquinijiona Juan pueyari tamonu narta Judio pueyanota pocoojoriquiaa taate pueya naata juhua jeequesano quiniu

Pueyaso niquliarani. <sup>26</sup> Nocuaji nojoriiri Tiuquinijiona Juan sequetusee Jesujiniji:

—Niishitiojonanaa, noo pueyano, quiaa nojuajiniji canaa pohuatacanutej, noo quiata quiqiuianu Jordán moo taquijiriatej, nojuajana pueya tiuquinijiyajuhuj. Puetunu pueyajanaana nocua quiojiya tiuquinijosano nojori quiniuria.

<sup>27</sup> Tiuquinijiona Juanri nojori riucuaaree saaja:

—Saaja Pueyaso cumaquishacari pueyano, pueyano na naata maninia miiniu Pueyasora. <sup>28</sup> Niajanuyacuajaari cua tojiqiuianu sequeyano: “Janiyari maja Pueyaso Jiyarosano Cristoni. Janiyari nareja nocuaji jeenucuariquiano jiyarosaaquiaarini”. <sup>29</sup> Pueyano rupuena jaara camiya necocuaara, quiaritia cutara necocuaari seetanujuanaa saaja nerano. Naajaa, na rupuena quishacari na shuriucua, na timitiaari na tojishacari necota pocoojiyano shuquiriaatia. Naajuhuj, janiyari cunora shuquiriaatia quiaritia quiyani pueya rupuesacari Jesucristo. <sup>30</sup> Janiyari cunora jiyarosaaquiaaricuajani, pueya cua tojitiniuria nojuaja. Naaratej, pueya cuara carteera janiya, Cristoocua nojori pacunura saniniuujia, nojori tojiniuria nojuaja. <sup>31</sup> Cante jiyocuacaanuji niqiaaricuajani, nojuajaari Jiyaniijiajanaa cutara. Janiyari saaja mijiria quiniiani. Cunora, cua pohuatasanoori saaja mijiria cua tojishano. Jesucristo saniniuujia, nojuajaari jiyocuacaanuji ninio cutara. Nojuajaari Jiyaniijiajanaa. <sup>32</sup> Naacuajitij, na pohuatasanoori tama na niquishanojuaaja jiyocuacaanu, na tojishanonio. Pueyari na pohuatasano cuaracashitiquiaa saaja. <sup>33</sup> Canapuate Jesucristo pohuatasanoocua tiuujiacani, nojoriiri sequeya, seetanujuanaaqui Pueyaso sequesano Neyanujiniji. <sup>34</sup> Pueyasoori jiyanohua queraatia na Sohanu niqutioquiaari na Jiyarosano. Naacuajitij, seetanu Pueyaso rupajanaa pohuataari. <sup>35</sup> Pueyasoori jiyanohua panijia Neyanu. Naaratej, nojuajaari na jiyatequiaari puetunu casaa jitianarajanaa na quiniuria. <sup>36</sup> Canapuate Neyanuucua tiuujiacani, nojoriiri tari jatanishano pueyaracaanu rishijia nojori quiniuria Pueyasota. Saniniuujia, canapuate Neyanuucua tiuyashijiacani, nojoriiri tariucua Pueyaso juaashano quiya. Nojoriiri saniitiosaanutaniya Pueyasooju nojori quiniuria pueyaraaanu.

## 4

### *Jesu pocoojosacari Samaria jiyajinijinio maajitia*

<sup>1</sup> Fariseocuacaari pohuatasaaquiaari, jiyanohua queraatia pueya Jesuucua quiojiya na tojitianaa nojori quiniuria. Nojoriiri pohuatasaaquiaarijijuhuj, Jesuuri socua queraatia pueya tiuquinijiya Tiuquinijiona Juanjiniji. <sup>2</sup> Seetanujuanaa majaari Jesujuanaa tiuquinijionu quiriquiaa pueya. Saaja canaa cutaraari pueya tiuquinijioriquiaani. <sup>3</sup> Jesu jaara niishiquiaari Fariseocuaca naa pohuatasaarucuaa nojuajinijitij, nojuajaari Judea jiyajiniji jiyataquiaariuhua canaa Galilea jiyajiniara.

<sup>4</sup> Canaa quiasacari nucuaco, canaari Samaria jiyacuma tajiriquiano quiriquiaani. <sup>5</sup> Naa canaa quiasacari nucuacotej, canaari Sicar tiacajinia tiuquishiini, Samaria jiyajinia. Cuniqiji, cateca quiriquiaari supuetana José cuhuariquia, na que Jacobo niqutiosano nojuaja. <sup>6</sup> Cuno cuhuariquiajia quiriquiaari cuari, supuetana Jacobo jiuutiasano tariucuaaanu. Pueyaraaanu Jesu rucuanenuucua nucuamaji, nojuajaari cuno cuari shuriucua cajishii na samareenuta. Panacariiri quiriquiaa. <sup>7-8</sup> Jiyacaritij, canaari tiacajinia quiamaanu canaa miaquesocoriquiano canaa masenura casaa.



Canaa niyacari, cuno Samaria tiacajinijinio maajiiri cuarimia quiaquiaari mohuaca taquitianura. Jesuuri na sequeree:

—Cua raatere.

<sup>9</sup> Cuno maajiiri Jesu sequeree:

—Pueyanonaa, ¿casaara quia sequeya Samaria jiyajinijinio maaji raatenura quiajaniyani? Quiaacuajaari Judio.

Cuno maajiiri naa sequeree Jesutej, na niishiniuucua Judiocuacacuajaari maja na niquiniu paniniu quijia Samaria jiyajinijinio pueya.

<sup>10</sup> Jesuuri saaja na sequeree:

—Majaari quia niishiniu cante quia sequereeni: “Cua raatere”. Quiaa jaara niishiriquia casaa Pueyaso jiitiaa quiarani, quiaa maara cua sequere cua raatenura quiajaniya. Quiaa jaara cua masere, janiya maara quia raatere pueya samiitianijia mohuacani.

<sup>11</sup> Maajiiri na sequeree:

—Jiyaniijianaa, majaari quenaaja quia jiitianu casaa, mohuaca quia taquiriatajara. Nio cuariiri jiyanohua tucuaa. ¿Quiaatucua teje taquitiare cuno mohuacani, pueya samiitianijiani? <sup>12</sup> ¿Quiaateeri jiyaniijianaa cutara, socua pa supuetana Jacobojiniji? Nojuajaari nio cuari tiujiaquiaari canaara. Nojuajaari niiquiji ratujua quiquiaari necohuata, na seesano seyanio.

<sup>13</sup> Jesuuri na riucuaaree miriqui:

—Puetunu nio cuarijiniji ratujuacajanaari saaja jiyamuecoquiaa.

<sup>14</sup> Saniniuujia, cante cua mohuaca ratunutaniyani, majaari socua na jiyamuenu quiniutianihua. Cua mohuacaari juhua samo naca pacartanutaniya pueyaracaanu noojiajania, shuquiriaatia na rishiniuria pueyaracaanu.

<sup>15</sup> Cuno maajiiri Jesu sequeree:

—¡Pueyanonaa, cuno mohuaca cua niqutiore cua ratusocoriquiano, maja socua cua jiyamuenura, naajuhuj, maja pueyaracaanu cua taquiriojonura nio cuarijiniji!

<sup>16</sup> Jesuuri na sequeree:

—Miji quia niyaca quia sequecoo coteenu.

<sup>17</sup> Maajiiri na riucuaaree:

—¿Janiyate niyacaracajaarani, quiaa jaara naa cua sequere?

Jesuuri na sequeree:

—Quiaacuajaari seetanujuanaa cua sequeree: “Niyacaajunijia”.

<sup>18</sup> Seetanujuanaari. Quiaari tari cinco niyacaaraca quiquiaari. Mariyata cuno, quiarijia quiata quiyani, majaari quia niyacajuhuj.

<sup>19</sup> Naa cuno maaji tojishacari Jesu sequesantej, Jesu sequereeri:

—Jiyaniijianaa, ¡quiaaqui Pueyaso sequenu panishano caminiujiunia!

<sup>20</sup> Canaa supuetanaa pueyari niya nio tuhananuucua Pueyaso secojonuuja tarijia. Niajaniya saniniuujia, Judiocuacani, niaari sequequiaa Pueyaso cuara secojosaaria saaja Jerusalén tiacajinia.

<sup>21</sup> Jesuuri na riucuaaree:

—Seetanujuanaa quia sequereera maajiniaa. Cua sequesanoocua quia tiurii. Quera quiniutianiyari Pueyaso nia secojosacari puetunu tiquiyocua nia quishacarijianaa. Majaari tari Pueyaso secojosaanu quiniutianiya saaja Jerusalén tiacajinia, nio tuhananuucujuhuj, taa quia sequereecuajani.

<sup>22</sup> Niajaniyani maja nia niishiniu cana nia secojoquiaani. Canaa Judiocuacani, canaa cutaraari niishiyani cana cana secojoquiaani. Pueyasocujaari canaa Judiocuaca supuetanaa niishitioquiaari pueyacuaji Tacunaari supuenutaniya tama cana Judiocuacajinijinojuaaja. <sup>23</sup> Quiarijia cutara, cante seetanujuanaa Pueyaso shuqiritiajacani, nojoriiri na Que Pueyaso

secojonutaniya puetunu noojiatajanaa, seetanujuanaa na tojijiaca nojori quishacari. Pueyasoori naa paniya pueya secojonura nojuaja, cante na secojonuujuacacuajani. <sup>24</sup> Pueyasoori sohuanu. Naaratej, cante Pueyaso shuquiritiniu panijiacani, nojori cuara secojoora Pueyaso puetunu noojiatajanaa, Pueyaso Sohuanu tojijiaca nojori quishacari.

<sup>25</sup> Cuno maajiiri Jesu sequeree:

—Janiyacujaari niishiyani Pueyaso sequesano Cristo mijiria na jiyaroso-coriqianoori niniutianiya. Nojuaja jaara tiuquiri, nojuajaari puetunu maninia pa pohuatanutaniyajanaa.

<sup>26</sup> Jiyacaritij, Jesuuri maatia na sequeree:

—Janiyacujaari cunoni, quiata pocoojiyacujani.

<sup>27</sup> Jiyacaritij, canaari Jesuucua tiuquijiorohuani. Canaari jiuujiate-quiaarini canaa niquishacari Jesu pocoojiyano cuno maajitia. Majaari quenaaja canaa nequesotanu quirii Jesu, casaa cuno maaji paniriquiaani, mariyata casaajiniji nojori pocoojoriquiaani. <sup>28</sup> Cuno maajiiri cuniquijia na pataco tiujiaquee. Na tiacajinia quiaarohuari. Na tiuquishacari, na tiacajinia quiniaa pueya sequesuhuari:

<sup>29</sup> —¡Miji pueyanaa, nia niquiquii pueyano! ¡Nojuajaari cua sequeree puetunu cua miishanojuanaa! ¿Majate Cristoni, tariucuacaanu Pueyaso sequesano pocua na jiyarosocoriqianotej?

<sup>30</sup> Pueyari cuno tiacajiniji Jesuucua nijioquiaari. <sup>31</sup> Cuno maaji quiasacari na tiacajiniohua, jiyacaritij, canaari Jesu mianuutenu paniriquiaa juucuni. Canaari na sequeriquiaani:

—¡Niishitiojonanaa, quia miaquere!

<sup>32</sup> Jesuuri saaja canaa sequeree:

—Janiyacuja miaquesanoracani, cuno miaquesanoori nia niishishoo.

<sup>33</sup> Canaa, Jesu saquiriojosano pueyani, canaari naa tama nequesoree-tooreejaanjia:

—Pa niyacari miaquetesaaquee jiyotucuaajaari.

<sup>34</sup> Jesuuri miriqui canaa sequeree:

—Cua miishacari cua Jiyarona panishano, cunoori cua miaquesano, naa-juhuaj, cua tucuatascari na panishano. <sup>35</sup> Niaari sequequiaa: “Cuaara shocojorajaara cuatro raca. Pueyari jiyacari shusha coteenutaniya na nataacuaca carojotanu”. Janiyara, maja naatej. Seetanujuanaa nia sequeya cutaranijia, nia namijia nia riatate maninia nia niquiniuria. Nataacuacuja tari noshiquia, carojotasocoriqiano. <sup>36</sup> Na carojotanaari na poonijionu sami niquitioshiya. Na carojotasanoori pueyaracaanu quiriquiano. Naacuajitij, cuhuariquia natoonaari jatiqui shuquiriniutianiya nataacuaca carojotanaata. <sup>37</sup> Naaratej, seetanujuanaari nio tariucuacaanu sequesano. Naa sequeyari: “Tamonuuri saaja nareja nataja. Na nuhuaji, tamonuuri saniniuujia na carojotaja”. <sup>38</sup> Janiyari saniniuujia nia jiyaramiquiquianuni nataacuaca nia carojotanura quenaaja nia poonijiyaquishoo cuhuariquiajinia. Cunoori tamasaca poonijosano quiquiaari. Niaari juhuajaniya tamasaca poonijosanojiniji carojotaquiaa shuquiriaatia.

<sup>39</sup> Queraatia pueya cuno Samaria tiacajinijinioori Jesuucua tiuquiaari, nojori tojishacari naa cuno maaji sequesanootej: “Cua sequeree puetunu cua miishanojuanaani”. <sup>40</sup> Naaratej, cuno pueya jaara Jesuucua tiuquijioquiaari, nojoriiri na masuquiaari tii na camueenujunura nojori tiacajinia quenaaja. Naaratej, canaari Jesuta tii camueequiaari caapiqui juucani.

<sup>41</sup> Socua queraatia cuno pueyajinijinioori Jesuucua tiuquiaari, nojorijianaa

jaara Jesu tojiquiaari Pueyaso rupaa pohuataano. <sup>42</sup> Naaratej, nojoriiri cuno maaji sequeturee:

—Quiarijiani, majaari canaa tiuuniu Jesuucua, saaja canaa quia pohu-  
atanuucua nojuajiniji. Quiarijia cutara, canaacuajaari tama canaa numaata-  
jaaja tojirii na pohuatasanoni. Naaratej, canaari quiarijia niishiyani, Jesuuri  
seetanujuanaa Pueyaso jiyanootiriquiano pajaniya, puetunu mijiria quiniaa  
pueyajanaanio.

*Jesu naatanishacari jiyaniijia Herodes pueyano niyanu*

<sup>43</sup> Caapiqui juuca Jesu camueetanu nuhuaji canaa, Samaria pueya tia-  
cajinia, nojuajaari cuniquiji canaa na pueya jiyataaree Galilea jiyajiniara.  
<sup>44</sup> Jesuuri tarijia sequequiaari: “Nio tariucuacaanu sequesanoori seetan-  
juanaa sequesano. Naa sequeyari: ‘Pueyaso sequenu panishano caminiu-  
jiuniaari maja tojishano quijia tama na jiyajiniaajaaja’ ”. <sup>45</sup> Naajaa, Jesu jaara  
canaa tiuquitiaseequiaari jiyacari Galilea jiyajinia, cuniquijinio pueyari  
maninia na tiuquitiquiaari saaja. Nojoriiri naa maninia na tiuquitiquiaari  
tari nojori niquiniuucua Jesu miishano na cumaacata Jerusalén tiacajinia,  
Pascuara nojori queranacusacari tii.

<sup>46</sup> Galilea jiyajinia canaa quishacari, Jesuuri canaa jiyataaree Caná tiaca-  
jinia, tee na jataniquiaari mohuaca vinoracuajani. Jiyacaritij, Capernaum  
tiacajinia quiquiaariiri tamonu pueyano, Galilea jiya jiyaniijia jiyatesano ca-  
marnura. Cuno pueyano niyanuuri jiyanohua cusosu matariquiaa. <sup>47</sup> Cuno  
camarnu jaara niishiquiaari Jesu tari tiuquiriohua Judea jiyajiniji, nojua-  
jaari jiyacari niquiaari Capernaum tiacajiniji Jesuucua, Caná tiacajinia. Na  
tiuquishacari Jesuucua, na sequeseeeri:

—¡Jiyaniijianaa, cucua quia taraajere! ¡Cua niyanu quia naataniquii, quera  
cusoyano!

<sup>48</sup> Jesuuri na riucuaaree:

—Niaa jaara cua cumaacata cua miishano niquiyaquiri, niaari cucua  
tiuyaquiquiaa.

<sup>49</sup> Cuno camarnuuri saaja Jesu sequeree:

—¡Jiyaniijianaa, mijijiaj, jati pa quiaare cua tiajinia, quiyanu cusoy-  
aquishacarijia!

<sup>50</sup> Jesuuri na sequeree:

—Quia quiaarohua. Quia niyanucujaja tari naatarohua.

Cuno camarnuuri Jesu sequesanoocua tiuurii. Quiaarohuari. <sup>51</sup> Jiyacari  
na tiajinia, na seyari niquiquiaari camarnu niyanuuri seetanujuanaa  
maninia naatarohua. Naaratej, nojoriiri quiojoquiaari na camarnu nu-  
mootenuucua. Nojori quiojosacari, na camarnu naacuturee saaja nuu  
cajiniocuaari. Nojoriiri na sequeree:

—¡Quia niyanu tari naatarohua!

<sup>52</sup> Nojori camarnuuri nojori nequesotaree:

—¿Taacari na cusonu tajiyaatemohuacuaani?

Nojoriiri na riucuaaree:

—Naseeca nocuaji tajimiohuacuaa shusha pananu mueecosacari nio  
niriniquiacuaani.

<sup>53</sup> Cusosu queeri niishiquii, Jesucujajaari jiyacari na sequeriquiacuaa:  
“Quia niyanu tari naatarohua”. Naaratej, camarnuuri necocuataja Jesuucua  
tiuurii, puetunu necohuatajanaanio.

<sup>54</sup> Judea jiyajiniji Jesu tiuquishacariuhuj, naa na naatanishacari cuno  
cusosutej, cunota tari caapiqui quiquiaariiri na cumaacata na miishano  
Galilea jiyajinia.

## 5

*Jesu naatanishacari cumatacuruhuana cusosu Betzata cuari shuriucua*

<sup>1</sup> Tamacariuhua, socua canaa Judiocuaca queranacusacari quiquiaari Jerusalén tiacajinia. Naaratej, canaari Jesuta nocua quiojoquiaarijuhuaj.

<sup>2</sup> Jerusalén tiacaari puetunujuanaa puereetuuca sohuacajiniacuma quiya. Tohuateyacaari quiya tiuquitiajara. Tamonu tohuateya sesa quiquiaari “Borregohua tiuquitiaja”. Na shuriucua quiyari cuari. Canaa Judiocuaca ru-paajiniani, cuno cuariiri sesojosaaquiaari “Betzata”. Cinco suhuorotucuaari quijia cuno cuari shuriuquioco.

<sup>3</sup> Queraatia cusosuhuari tii matacojua cuno cuari shuriuquioco. Cuno cusosuhuari quiquiaari cariyojuarujuri, shipiiniquiujunaa, cumatacuruhuana cusosuhuanio. Nojoriiri mohuaca sashijia cuaara queyaquetesaaria.

<sup>4</sup> Pueyaso seruuri noojiaqueya rosequiaari mohuaca na queyaquetenura. Cuari queyaquesacari, cante co-teenujuanaa rosequiaari tiini, nojuajaari naataquiaariuhua na cusonujiniji.

<sup>5</sup> Tamonu cusosuuri tii narta cusosuhua tajinia matariquiaajuhuj. Tari na shoconujuquiaariiri treinta y ocho marijia, pueyaracaanu na matasacari.

<sup>6</sup> Jesuuri na niquiquiaari mataano. Noojiajinia niishiriiiaariuhuj cuno pueyano tari shocotejoquiaari queraatia marijia, naa pueyaracaanu na matasacari. Nocuaji Jesuuri na sequeree:

—¿Quiaate naatanu paniya?

<sup>7</sup> Cusosuuri na riucuaaree:

—¿Cantucua cua naacure cuarijinia cua rosenurani, mohuaca jaara queyaquetesaarecuaa? Janiya jaara rosenu paniquiaa juucuan, cuarta cusosuuri saaja cua shocotaquiaani.

<sup>8</sup> Jesuuri na sequeree:

—¡Quia sanere! Quia matu quia pataarohua.

<sup>9</sup> Jiyacaritij, cusosuuri ritia jeequequee. Na matu pataarohuari. Cuno juucaari Sábado quiriquiaa, canaa Judiocuaca samaatenu juuca Pueyaso niquiara. <sup>10</sup> Canaa Judiocuaca camarucua jaara cusosu niquiquiaari na matu pataano, na juaatiuriiri. Naa na sequetureeri:

—¿Majateeri quia niishiniu, quiarijiaari Sábado? ¡Maja quia matu quia patanujuj!

<sup>11</sup> Cusosu naatanohuari nojori riucuaaree:

—Cua naataniniacuaja cua sequereeno: “Quia matu quia pataarohua”. Janiyari cunora na pataani.

<sup>12</sup> Narta Judiocuaca camarucuaari na nequesotaree:

—¿Cantejaara naa quia sequereeni?

<sup>13</sup> Nojori riucuaareeri:

—Johuj. Maja cua niishiniu canaquitijia cua naataniriitij.

Jesu naatanishacari cuno pueyano, queraatia pueyari namitia tii quiriquiaa. Naacuajitij, Jesuuri ritia tajiniocuareequiaari pueya tajinia, na naatanishano pueyanoocuaji. <sup>14</sup> Na nuhuaji, Jesuuri na riuriataquiaari cuno juucaja Pueyaso Secojoua tiajinia. Jiyacari na sequereeri:

—Quiaacuajaari tari naatanishaarohua. Quiarijia cutara tama quia cuaqueyajaaja quia cojuare maja sesa quia miiniuhuara socua, quiaa mariqui socua taraatia miiriiri.

<sup>15</sup> Naacuajitij, cuno pueyanoori Jesu niishirii. Cunora, canaa Judiocuaca camarucuaacua quiaareeri. Nojori sequeseeri:

—Jesuqui cunucaja cua naataniriini.

<sup>16</sup> Naa Jesu miiniuucua samaatenu juucatej, narta Judiocuaca camarucuaari na quiatunu panijia juucua. <sup>17</sup> Jesuuri saaja nojori sequeree:

—Cua Queeri pueyaracaanu poonijiya. Janiyari cunora poonijiya-jaacuhuj.

<sup>18</sup> Naa Jesu sequesacari nojoritij, narta Judiocuaca camarucuaari jiyanoehua na monu paniriquiaa. Nojoriiri maja na monu paniniu quiriquiaa saaja samaatenu juuca na poonijionuucua. Socua jiyanoehua na motunu paniriquiaari Jesu jiyatenuucua tama na cuaqueyajaaja juhua Pueyaso, Pueyaso na jiyaniquishacari na Queta.

*Jesuuri Jiyaniijajanaa, Pueyaso Niyanu na quishacari*

<sup>19</sup> Nocuaji Jesuuri narta Judiocuaca camarucua sequere:

—Seetanujuanaa nia sequeyanijia, Pueyaso Niyanu cua quishacari, maja cua naata casaa miiniu tamajaaja. Janiyari saaja miiquiaani taa cua Que cua niquiquiaa miyanocuaani. Casaa cua Que miiquiaacuaani, janiyari naa miiquiaajaacuhuj. <sup>20</sup> Cua Queeri cua panijia. Cunora, nojuajaari puetunu na miishanojuanaa cua niishitiojoquiaa. Naajuhuj, cua niishitiojonutaniyari socua jiyajeneta casaa tariucua cua miishanojinijicuaa. Niaari nocuaji shiriiquitiuniutianiya. <sup>21</sup> Cua Queeri macunucua samiitianijioquiaa, pueyaracaanu rishijia nojori quiniuria. Naajuhuj, janiyari pueya samiitianijioquiaani, cana cua samiitianiniu paniyacujani. <sup>22</sup> Cua Queeri maja na nequesoreenu quiniutianiya pueya. Nojuacuajaari tari cua niquitiocanu na cumaaca, puetunu pueyajanaa cua nequesoreenura. <sup>23</sup> Nojuajaari naa miiquianu puetunu pueyajanaa quiniuria cua tojitiajaca, naatej, taa cua Que na tojitiatuquiaacuaani. Cante cua ruuretajani, cunoori cua Que ruuretajajuhuj, nooj, cante mijiria cua jiyaroquiaaricujani.

<sup>24</sup> 'Seetanujuanaa nia sequeyanijia, cante cua sequesano tojjiani, mariyata cante cua Jiyaronaacua tiuyajaaniuhuj, nojuajaari pueyaracaanu Pueyasota rishiriquiano cutara. Nojuajaari maja na saniitiosaanu quiniutianiya. Nojuacuajaari tari samiitianishaarohua juhua macu na quiniujiniji Pueyasooju na quishacari. <sup>25</sup> Seetanujuanaa nia sequeyanijia, quera quiniutianiyari juhua macunucua quijiaca samiitiacosacari. Seetanujuanaa quiar-ijiaari, juhua macunucua quijiacaari cua rupaa tojitianutianiya. Cua rupaa tojitiajacaari samiitiaconutianiya, pueyaracaanu rishijia nojori quiniuria. <sup>26</sup> Cua Queeri quijiajuhuanajaj. Majaari na naata shaajenu. Nojuajaari naa quijiara cua jiyatequiaarijiuhuj, juhua nojuarajuhuj. Naacuajitij, cua naata pueya jiyatenu naa quijarajuhuj. <sup>27</sup> Pueyanora cua quiniuucua, na cumaaca cua niquitioreeri cuarta pueya cua nequesoreenura, nojori cua saniitionurajuhuj. <sup>28</sup> Cua tojitiare. Majaari nio sequesanoocuaji nia shiri-iquiniu. Tamacari, puetunu macunucujajanaari cua rupaa tojitiuniutianiya. <sup>29</sup> Macunucua tojitiushacari cua rupaa, nojoriiri samiitiaconutianiya, na jamacajiniji nojori tohuareetanura. Cante maninia miijiaca quiquiaarini, samiitiaconutaniuhuari pueyaracaanu shuquiriaatia quijiaca nojori quiniuria Pueyasota. Saniniuujia, cante sesa miijiaca quiquiaarini, puetunu nojorijianaari quejoosaanutianiya pueyaracaanu saniitiosocoriquiano.

*Jiyaniijajanaa na quiniuucua, Jesu tama nojuajiniji pahuataajaaja*

<sup>30</sup> 'Pueyaso Niyanu cua quishacari, naajaa, majaari cua miiniu tama cua panishanojuaaja. Janiyari sesa miijiaca juaaquiaacujani, saaja cua Que niishitishacari janiya, nojori miishanoori sesa. Tama cua panishanojuaaja miyashijia cua quiniuucua, janiyari namitajanaa nojori juaaquiaani. Janiyari pueyaracaanu miiquiaa saaja cua Jiyarona panishanoni. <sup>31</sup> Pueyano jaara tama nojuajinijiaaja pahuataa narta pueyano, na pahuatasanoocua maja tiushano. Naaratej, janiya jaara tama janiyajiniji pahuatariquia nia niquiarani, tama cua pahuatasanojuaaja maara najuhuaana quiriquiaj.

<sup>32</sup> Naajaa, quiarijia cutara nia naata niishiniu cua pohuatasanoori seetanujuanaa. Tamonucuajaari janiyajiniji pohuataa seetanujuanaa. Nojuajaari cua Que. Cunora, niishiyanjia na pohuatasano janiyajinijiiri maja najuhuanaj.

<sup>33</sup> 'Niaari nia pueya jiyarocanu Tiuquinijiona Juancua, nojori nequesotamura janiyajiniji. Nojuajaari saaja seetanujuanaa nia pohuatacanu janiyajiniji. Majaari na seetanu quiquianu janiyajiniji. <sup>34</sup> Nojuaja jaara seetacanu janiyajiniji niajaniya, quiria, naajaa. Janiyacuajaari niishiyani seetanujuanaari cua pohuatasano niajaniya tama janiyajinijijiaaja. Tiuquinijiona Juanri seetanujuanaa pohuatacanu janiyajiniji niajaniya. Niaa cuaara na pohuatasanoocua tiuuria, Pueyaso jiyanooniuria niajaniya. Janiyari saaja cunora nia pohuataa Tiuquinijiona Juanjinijini. <sup>35</sup> Nojuajaari juhua samaritiu noshitishano nia tajinia na quishacari. Niaari rupaquijia na timitiacanu, juhua na cuhuatasacari niajaniya. Niaari najuhuana tojiquianu na pohuatasano. <sup>36</sup> Tiuquinijiona Juan pohuatasano janiyajinijiiri seetanujuanaa. Niaa jaara na pohuatasanoocua tiuuniu paniyashijica quiyajaa, naajaa. Cua cumaacata cua miishacari, cunora seetanujuanaa nia niishiri, cua Que Pueyasoori cua jiyaroquiaari. Nojuacuajaari cua sequequiaari naa cua miiniuriatej. <sup>37</sup> Cua Quejanaari cua jiyaroquiaari. Nojuajaari janiyajiniji niishitioquiaari pueya. Naajaa, majaari quenaaja nia tojiniu quiquiaari na pocuanu. Nojuajaari nia niquishoojuhuj. <sup>38</sup> Majaari quenaaja na rupaa quiniu nioojiajinia, nia tiuyaquishacari na Jiyarosanoocua. <sup>39</sup> Niaari suraatia serojoquiaa tariucuacaanu naajiosano Pueyaso Rupaa. Niaari jiyaniya niaa jaara Pueyaso Rupaa niishijica quiri, niaari naa pueyaraaanu quiijara quiniutianiya. Seetanujuanaa majaari naatej. Cuno Naajioneejinia, tiiri janiyajiniji naajiotasano quiyacuaja. <sup>40</sup> Niaari saaja cucua ninu paniaquiquiaa cua jiyatenura niajaniya pueyaracaanu quijiacara cutara.

<sup>41</sup> 'Maninia cua miishanoori maja pueya sequenura janiya: "Quiaari maninia pueyano". Janiyari saaja cua Que shuquiritiquiaa cutarani. <sup>42</sup> Janiyari seetanujuanaa nia niishiyani. Niaari Pueyaso shuquiritiaashijica, nia paniaquishacari nojuaja. <sup>43</sup> Cua Quecuajaari cua jiyaroquiaari cua niishitiojonura niajaniya nojuajiniji. Quiarijiani, majaari nia tojiniu paniniu janiya. Saniniuuja, tamonu jaara tama na cuaqueyajaaja jiyateya juhua Pueyaso Jiyarosadora na quiniuria, niaa maara cuno tojiri cutara, nojuaja jaara niaacua nimia na niishitiojonura niajaniya tama na niishishanojuaja. <sup>44</sup> Majaari nia naata cua pohuatasanoocua tiuuniu, niaa jaara saaja niarta pueya shuquiritiasano quiniu paniquiaa, maja Pueyaso shuquiritiasano. <sup>45</sup> Majaari nia jiyaniyu janiya niaacuara tonujunutaniya cua Queni. Tama Moiséscaajaari niaacuara tonujunutaniya, cua tojitiaashijica nia quiniuuca. Niaari jiyaniya niaa Pueyaso muerasu, juhua Moisés tojijica nia quishacari. ¿Niaateeri seetanujuanaa Moisés tojijica? ¡Maja! <sup>46</sup> Nojuacuajaari janiyajiniji naajiotaquiaari. Naacuajitij, niaa jaara seetanujuanaa na naajiotasanoocua tiuuriquia, niaa maara cucua tiuurijuhuj. <sup>47</sup> Nocujaj, niaa jaara Moisés naajiotasanoocua tiuyaquiquiaa, ¿niaatucua taa tiuuri quiarijia cua pohuatasanoocuani?

## 6

*Jesu mianuutesacari cinco mil canuu  
(Mt 14.13-21; Mr 6.30-44; Lc 9.10-17)*



<sup>1</sup> Na nuhuaji, canaari Jesuta niuutiaquiaari Galilea caminia taquijiriani. Galilea caminia sesa quiquiaarijuhua Tiberias caminia. <sup>2</sup> Jiyanohua queraatia pueyari Jesu niquiquiaari tari, cusosuhua na naatanijosacari. Naaratej, nojoriiri Jesu neteyotariquiaa caminia shuriuquioco. <sup>3</sup> Canaa shiitiasacari caminia taquijiria, Jesuuri canaa tacatamaa tuhananuucua. Tii cajitiasee canaari. <sup>4</sup> Jiyacaritij, quera Pascuara queranacusacariiri quiriquiaa. <sup>5</sup> Jesu niquishacari jiyanohua queraatia pueya nocua niyano, canaa cojinia Felipe sequereeri:

—¿Tee pa masenutaniya queraatia pan nio pueyaraarini?

<sup>6</sup> Naa Felipe nequesotareeri nareja na saniniuria. Jesuuri tari niishiriquiaa taa nojuajanaa mianuutenutaniya cuno pueyani. <sup>7</sup> Felipeeri na riucuaere:

—¡Paa jaara cumaneeca jiitiare doscientos juuca pa poonijosanojiniji pan pa masetajarani, cuno maara najuhuana secaja quiri puetunu nojoririjanaa!

<sup>8</sup> Jiyacaritij, canaa cojinia Andrésri Jesuucua nimiaa. Andrésri Simón Pedro tarajanu. Nojuajaari Jesu saquiriojosano pueyanojuhuj. Jesu sequeseeri:

<sup>9</sup> —Jiyaniijianaa, caya samijia niya cinco pan jiitiaa cebada cashojuajiniji shipinishano, caapiqui sapitiaajanio. Naajaa, cunoori najuhuana puetunu cuno pueyarajanaa.

<sup>10</sup> Jesuuri saaja canaa na saquiriojosano pueya sequeree:

—Puetunu pueyajanaa nia sequere cuaara cajitiuuria.

Cuniqui, canaa tii quiriquiaani, shanohua jiyasocuaari quiriquiaa, maninia cajitujia. Naaratej, pueyari cajituri. Puetunu cuno pueya maanujinijiojuanaani, saaja canuuri quiquiaari cinco mil pueya. <sup>11</sup> Jiyacaritij, Jesuuri cuno pan pataree. Pueyaso secojoree nocuaraari. Na nuhuaji, canaa na serotaniriiri. Canaari cajitiuyano pueya puetunu na panishanojuanaa niqutiojoreeni nojori miaquenuusocoriquiano. Jesuuri naa miirii sapitiaajajuhuj. <sup>12</sup> Puetunu pueyajanaa jaara tooquioquiaari, Jesuuri canaa na saquiriojosano pueya sequereeni:

—Puetunu miaquesano raquiquiajanaa nia reraterohua, maja najuhuana na niitiasaanura.

<sup>13</sup> Canaari cuno cinco panjiniji pueya miaquesano raacua reratereeni. Canaa reratesacari, canaari doce canaasatu mishinijioreeni. <sup>14</sup> Pueya niquishacari naa Jesu miishano na cumaacatej, nojoriiri sequeturiquiaa:

—¡Nio pueyanoqui seetanujuanaa Pueyaso sequenu panishano caminiujunia, nooj, tariucuacaanu sequesaaquiaari pocua niriqianotej!

<sup>15</sup> Jesuuri niishirii cuno pueyari na quiyanu paniriquiaa, nojori jiyatenura nojuaja puetunu Israel pueyajanaa jiyaniijia na quiniuria. Nocuaji, Jesuuri tamajaaja tacaquee socua jiyaconaja tuhananuucua.

*Jesu rucuanesacari mohuaca caco*  
(Mt 14.22-27; Mr 6.45-52)

<sup>16</sup> Tariucua pananu tiuquishacari, canaa, Jesu saquiriojosano pueyani, canaari rosetaarohua caminiajiniarani. <sup>17</sup> Canaari botejinia tacataseeni, cuniquiji Capernaum tiacajiniara canaa niuutianura caminia taquijiria. Tariucua ninishiquiiri quiriquiaa. Majaari Jesu tiuquiniu quiriquiohua juhanajuaja canaacua. <sup>18</sup> Tari canaa niuutiasacari, paratuuri jiyanohua piyarojoriquiaa. Caminiaari cunora jiyanohua cajiniuucuariquiaa. <sup>19</sup> Canaari tari caminia jiuujiajinia quiriquiaani, seis kilómetroruhua canaa ruparetasaquiji. ¡Canaari jiyacari casaa niquirii canaacua catecanoyanoni! ¡Mohuaca caco

canujuriquiaari! ¡Canaari nocuaji shiriiquitiurii jiyanoahuani! <sup>20</sup> Jiyacaritij Jesuuri canaa sequereeni:

—¡Maja pueretunu! ¡Janiyacujanijia!

<sup>21</sup> Na rupaa canaa tojishacari, canaari shuquiriaatia na tacanitiurii botejiniani. Canashiyaquiji boteeri ritia shiitiasee terara canaa quiariquiaacuajani.

*Jesu mianuutesano pueya pajesacari nojuaja*

<sup>22</sup> Jaara juhuaquequiaari, Jesu mianuutesano pueyari na pajenuunu co-teequiaari tee canaa quiriquiaa caminia taquijiriacuajani. Nojoricuajaari tenacari niquiriquiaari saaja niquiriyatu boteeri shiitiriquiaa. Saaja canaa, Jesu saquiriojosano pueyani, canaari cuno botejinia quiaquiaariuhua nojori niquiarani. Majaari Jesu quianu quiriquiaa cutara canaata. <sup>23</sup> Jiyacaritij, Tiberias tiacajiniji boteeri tiuquiiioquiaari catecaja nojorijiniji, tee Jesu mianuutequiaari nojoricuajani. <sup>24</sup> Cuno pojori niishishacari maja Jesu quiniu quiriquiaa tari tii, canaa na saquiriojosano pueyajuhuj, nojoriiri cuno boteyajinia tacataquiaari. Nojoriiri Capernaum tiacajinia nijioquiaari cuno boteyajinia, tii nojori pajenura Jesu.

*Jesucristo juhua poojia miaquesano*

<sup>25</sup> Cuno pojori tiuquiiijosacari caminia taquijiria, Jesu riuriatatureeri. Na nequesotatureeri:

—Niishitiojonanaa, ¿taacari quia niyarohuacuarini?

<sup>26</sup> Jesuuri saaja nojori sequere:

—Janiyari seetanujuanaa nia sequeyani, majaari nia pajenu janiya nia niquniuucua cua cumaacata cua miishano. Niaari cua pajenuya saaja cua mianuutenuucua niajaniya, taa nia tooquiorucuaacuajani, cua mianuutesacari niajaniya. <sup>27</sup> Maja saaja miaquesanoocua nia tacaaniu, nia cuaqueya nia cumaquitajara. Cunoori maja na jiyatenu quiniutianiya niajaniya pueyaracaanu rishijara. Saaja nia tacaari cutara nioojia samiitianijia miaquesanoocua, pueyaracaanu rishijia nia quiniuria. Janiyacuajaari cuno nia niqitioriquianoni, pueyano cua quiniuucua. Cua Quecuajaari cunora cua jiyaroquiaari. Cunora, cua Queeri cua miitiquiaa cua miishano na cumaacata, nia niishiniuria janiyari na jiyarosanoni.

<sup>28</sup> Cuno pueyari Jesu nequesotaree:

—¿Casaa canaa miiniutianiyani Pueyaso panishano canaa miiniuria, Pueyaso shuquiritiasano canaa quiniuriajuhuaj?

<sup>29</sup> Jesuuri nojori riucuarree:

—Pueyaso Jiyarosanooocua nia tiuuri. Saaja naa nia miishacaritij, Pueya-soori nia shuquiritianutaniya.

<sup>30</sup> Cuno pueyari Jesu sequeturee:

—Canaa niquiara quia cumaacata casaa quia miiricuarajaj, canaa niishiniuria quiaari seetanujuanaa Pueyaso Jiyarosano. ¿Casaa canaa quia niqitiniutianiya canaa tiuuniuria quiocuani? <sup>31</sup> Canaa quia niqitiricuaraja quia cumaacata quia miishano, taa Moisés niqitiquiaari canaa supuetanaacuaani. Nojuajaari jiyocuacaanuji pan tinqiiaari pueyaracaanu nojoriria, cariiquia jiyajinia nojori rucuanijosacari. Naa naajio-tasano quiyacuajaari tariucuacaanu Pueyaso Rupaaajinia:

“Nojuajaari nojori mianuutequiaari jiyocuacaanuji tinio pan”.

Naacuajitij, canaari niishiyani Moisés cuajaari Pueyaso jiyarosano quiquiaari.

<sup>32</sup> Jesuuri nojori riucuarree:

—Seetanujuanaa nia sequeyanijia, cuno jiyocuacaanuji panni, cunoori maja Moisés tinishano quiquiaari. Majaari seetanujuanaa jiyocuacaanuji

pan na quiniu quiquiaarijiuhuj. Quiarjia cutara, cua Queeri niaacua jiyarorucuaa seetanujuanaa jiyocuacaanuji panjanaa cutara. <sup>33</sup> Cuno, Pueyaso niqutiosano pan jiyocuacaanuji rosenoni, cunoori puetunu mijiria quiniaa pueyajanaa samiitianijiojua cutara.

<sup>34</sup> Naaratej, cuno pueyari Jesu sequeree:

—¡Jiyaniijianaa, quiocua pueyaracaanu canaa niqutioriquia cuno pan!

<sup>35</sup> Jesuuri nojori sequeree:

—Janiyacuaajaari cuno panni, pueya samiitianijiojuani. Cante cucua niyani, majaari na miaajenu quiniutianiya socua. Cante cucua tiuuriijiaani-uhuj, majaari na jiyamuenu quiniutianiyajuhuj. <sup>36</sup> Taa cua sequeree tari niajanuyacuajani, niaari juucua cua niquiya. Majaari quenaaja cucua nia tiuuniu. <sup>37</sup> Naajaa, puetunu cua Que niqutiosanojuanaa janiyani, nojoriiri cucua niya. Cuno pojori, cante cucua nijiyani, majaari cua ruuretanu nojori. <sup>38</sup> Majaari jiyocuacaanuji cua rosenu quiquiaari cua miiniuria tama cua miiniu panishanojuaaja. Mijiria niqiaarinijia saaja cua Que panishano cua miiniuria, cante cua jiyaroquiaaricuajani. <sup>39</sup> Majaari cua Jiyarona paniniu cua juurequetenura quenaaja niquiriyatujua na niqutiosanojiniji janiya. Nojuajaari paniya cutara, nojori cua samiitianijionura jiya puequesacari. <sup>40</sup> Canapute cucua tiuujiacani, nojori niishishacari janiya Pueyaso Niyanuni, cua Queeri puetunu cuno pojorijianaa paniya pueyaracaanu rishijiaca nojori quiniuria. Naacuajitij, janiyari nojori samiitianijionutaniya jiya puequesacarini.

<sup>41</sup> Jesu sequenuucua, “Janiya jiyocuacaanuji roseno panni”, tii quiniaa narta Judiocuacaari cunora juaaquioree. <sup>42</sup> Sequetureeri:

—¿Majate nio pueyano Jesucuaaja, José niyanutej? ¡Paacuajaari na queya niishiyani! ¿Casaara quiarjia na sequeyari: “Jiyocuacaanuji rosenonijia”?

<sup>43</sup> Jesuuri nojori sequeree:

—¡Tariucuaaja! ¡Maja nia juaaquionu! <sup>44</sup> Pueyanoori maja na naata tiuuniu cucua tamajaaja, cua Que jaara noojiajinia poonijiaquiri. Janiyari puetunu cucua tiuuniaajanaa samiitianijionutaniya jiya puequesacarini. <sup>45</sup> Tariucuaacaanu pueyara Pueyaso sequesano caminiujiunia naajiotasanocuajaari naa sequeya: “Pueyasocuajaari puetunu nojorijianaa niishitiojonutaniya”. Naacuajitij, cante cua Que niishitiojosano tojjia seetanujuanaani, nojuajaari cucua tiuya.

<sup>46</sup> ‘Cua Queeri maja pueya niquishano quenaaja. Saaja na niquinia cutaraari janiya cante Pueyasojiniji niqiaaricuajani. <sup>47</sup> Seetanujuanaa nia sequeyanijia, cante cucua tiuujiani, nojuajaari tari pueyaracaanu rishijia jatanishaaree. <sup>48</sup> Janiyacuajaari pueya samiitianijia panni. <sup>49</sup> Cariiquia jiyajinia nia supuetanaa camarucuneejotasacari, nojoriiri cuno jiyocuacaanuji tinio pan miaquenuuquiaari juucua. Naajaa, saaja cusonuquiaariiri. <sup>50</sup> Saniniuujia, cante quiarjia seetanujuanaa jiyocuacaanuji roseno pan miaqueyani, majaari Pueyaso shaajanu quiniutianiya nojuaja. <sup>51</sup> Janiyacuajaari cuno samiitianijia panni, jiyocuacaanuji rosenoni. Cante nio panjiniji miaquejani, nojuajaari pueyaracaanu quijia quiniutianiya. Nio pan, janiya na niqutionutaniya puetunu mijiria quiniaa pueyacuara-janaani, cunoori tama cua cuaqueyajaaja.

<sup>52</sup> Jiyacaritij, tii quiniaa narta Judiocuacaari naa sequetooree tamajaaja na juaaniutia:

—¿Nio pueyanotucua taa miaquetere tama na cuaqueyajaaja pajaniyani?

<sup>53</sup> Jesuuri jiyacari nojori sequeree miriqui:

—Seetanujuanaa nia sequeyanijia, niaa jaara miaqueyaquiri cua shu, niaa jaara ratuyaquiri cua nanacajuhuaaj, majaari samiitianijosano nia quiniu quiniutianiya, pueyaracaanu quijiaca nia quiniuria. <sup>54</sup> Cante cua shu miaquereeni, cante cua nanaca ratureejaaniuhuaaj, nojuajaari tari naatarohua shuquiriaatia na quiniuria pueyaracaanu. Jaara cusoyare, naajaa, janiyari na samiitianiniutianihuaa jiya puequesacarini. <sup>55</sup> Cua shuuri seetanujuanaa miaquesano cutara. Naajuhuaaj, cua nanacaari seetanujuanaa ratusano cutara. Cunoori maja juhua mijiria nia miaquesano. <sup>56</sup> Cante cua shu miaquenani, cante cua nanaca ratunajaniuhuaaj, nojuajaari coojia rupueja. Janiyari noojia rupuejajuhuaaj, pueyaracaanu rupuetootesano canaa quiniuria. <sup>57</sup> Cua Jiyarona cua Queeri seetanujuanaa quijia cutara. Cua Que rupueja cua quishacari, janiyari cunora shaajeyashijiani. Naaratej, cante cua miaquenani, nojuajaari pueyaracaanu quijia quiniutianiyajuhuaaj, na rupuesacari janiya. <sup>58</sup> Janiyari maja juhua nia supuetanaa miaquesano panni. Nia supuetanaari cuno pan miaquenuuquiaari najuhuanaj. Naajaa, saaja cusonuquiaariiri. Janiyari seetanujuanaa jiyocuacaanuji roseno pan cutarani, nia miaquesocoriquiano. Cante cua miaquejani, jaara cusoyare, naajaa, samiitianutaniuhuari pueyaracaanu quijia na quiniuria.

<sup>59</sup> Jesuuri puetunu niojuanaa pohuataquiaari pueya niquiara Pueyaso secojua tiajinia Capernaum tiacajinia.

*Queraatia Jesu nuhuajiniaa pueya cartesacari nojuaja*

<sup>60</sup> Naa pueya tojishacari Jesu niishitiojosanotej, queraatia na nuhuajiniaa pueyari naa sequetooquiaari tamajaaja:

—Cuno na sequesanoori jiyanohua jiyajeneta pa miiniuria puetunujuaanaa. Maja pa naata. ¿Cantucua na tojirijaaraaranijia?

<sup>61</sup> Jesuuri naa nojori sequesano niishirii noojiajinia. Nocuaji nojori sequereeri:

—¿Niaateeri naa cua sequenuucua juaya? <sup>62</sup> ¿Niaatucua taa sequere socuani, niaa jaara cua niquiri tacaano jiyocuacaanuhua, teje cua niquiaaricuajani?

<sup>63</sup> Cua shu maja cumaacaraca pueya na samiitianiniuria. Saaja cua Sohuanu cutaraari pueya samiitianijia, pueyaracaanu rishijiaca nojori quiniuria. Niaa jaara cua sequesanoocua tiuuri, cunoori cumaacaraca cutara na samiitianiniuria niajaniya. <sup>64</sup> Noojiaqueya niajaniyajiniinioori cucuaji taacanuyajaa.

Jesuuri tarijia niishijia cante nocua tiuyashijiacani, mariyata cante na paraa na quiatenutaniyani.

<sup>65</sup> Naa sequeree socua cuno pojoriiri:

—Janiyacujaari cunora nia sequereeni: “Maja pueyano naata cucua tiuuniu, cua Que jaara noojiajinia poonijiaquiri”.

<sup>66</sup> Jiyacaritij, queraatia Jesu nuhuajiniaa pueyari na cartequiaari. Nojoriiri maja tari Jesuta na rucojonu quijia. <sup>67</sup> Nocuaji, Jesuuri jiyacari canaa na saquiriojosano pueya nequesotaree:

—¿Niajaniyariuhuaaj, niaateeri cua cartenutaniyajaacuhuaaj?

<sup>68</sup> Simón Pedroori Jesu riucuarree:

—¡Maja Jiyaniijiajanaa! ¿Canaatucua tamonu jiyaniijiaacua pacureni? Canaa quia pohuatasanoocujaari na naata canaa jataniniu pueyaracaanu rishijia canaa quiniuria. <sup>69</sup> Canaacujaari tari quiocua tiuuquianuni, canaa niishishacari quiaari Pueyaso Niyanu, saa maninia miiijaja.

<sup>70</sup> Jesuuri canaa sequereeri:

—Niaacujaari tama cua saquiriojosano doce pueyajaaja. Saniniuujia, niquiriyatu niajaniyajiniinioori sesaaca.

<sup>71</sup> Naa Jesu sequesacaritij, Judasjiniji sequeriquiaari, Simón Iscariote niyanuni. Nojuajaari seetanujuanaa niquiriyatu canaajininio Jesu doce saquiriojosano pueyajininio quiquiaari. Naajaa, tama na Jiyaniijajaaja tacartariquiano quiriquiaaquiiri.

## 7

### *Tama Jesu tapueyocuacajaaja Jesuucua tiuyashijiaca quiquiaari*

<sup>1</sup> Na nuhuaji, Jesuuri Galilea jiyajinia rucanejoriquiaa. Canaari na cojiriquiaani. Majaari na quiniu paniniu quiriquiaa Judea jiyajinia, tii quiniaa Judiocuaca monu panishacari nojuaja. <sup>2</sup> Jiyacaritij, quera socua canaa Judiocuaca queranacusacariiri quiquiaari Jerusalén tiacajinia. Cuno queranacusacariria pueyari ocho juuca shocotejoquiaari suhuorotucujinia nojori quishacari. Naa miitiuquiaariiri puetunu marijarajanaa canaa niishiriojonura, canaa supuetanaa Israel pueyari saaja suhuorotucujinia quijiaca quiquiaari, pueyaracaanu nojori camarucuneejotasacari cariiquia jiyajinia nojori quishacari. <sup>3</sup> Jiyacaritij, tama Jesu tapueyocuacajaariija naa Jesu sequeturee nojori macatiniuria nojuaja:

—¡Majaari niyaja quia jateenu! Quiocua queranacunuucua Judea jiyajinia quiaarejuhuaj. Quiocua tii miijiosee quia cumaacata, quia jiyopue niqiniuria puetunu quia miishanojuanaa. <sup>4</sup> Pueyano jaara puetunu pueyajanaa tojiniu panishano pueyano quiniu paniri, ¿maatucua casaara jiyasohuaja miijiore na cumaacatani? Naatej, taa niya quia miijioquiaa quia cumaacatacuaani, naa quia miijiosee puetunu pueya niquiarajanaa Jerusalén tiacajiniajuhuaj.

<sup>5</sup> Majaari quenaaja tapueyocuaca tiuuniu quijia Jesuucua. Cunora naa na sequetureeri. <sup>6</sup> Jesuuri saaja nojori riucuaaree:

—Juhuanujuaja maja cua quiasacari cua miiniuria taa nia sequeyacuajani. Niaa jaara quianu paniri, niama juhuajaniya quiaaretej. <sup>7</sup> Niarta mijiria quijiaca pueyari maja na naata juaaniu niajaniya. Janiya cutaraari nojori niqiniu paniyaquishooni. Cua niqitiuniu paniyaquiquiaari, nojori cua niishitishacari nojori miishanoori sesa. <sup>8</sup> Nia quiojiyare queranacunuucua. Janiya cutaraari maja cua quianu quiniutianiya juhuanujuaja. Quiarijiani, puera juhuacarijiaari cua miiniuria taa nia sequeree janiyacujani.

<sup>9</sup> Naa nojori na sequenu nuhuajitij, Jesuuri cuniquijia jiyojeree Galilea jiyajinia.

### *Jesu quishacari cuno queranacunuunujinia*

<sup>10</sup> Na tapueyocuaca jaara quiojoquiaaricuaa Jerusalén tiacajiniara tii queranacunuunura, Jesuuri jiyasohuaja quiaaree nojori nuhuajijihuaj.

<sup>11</sup> Queranacunuusacari, narta Judiocuaca camarucuaari Jesu pajenuuriquiaa. Nojoriiri naa sequeturiquiaa:

—¿Tee cuno pueyano quiyarini?

<sup>12</sup> Puetunu pueyajanaari Jesujiniji sasacojotooriquiaa. Noojiaqueyari sequeriquiaa:

—Jesuuri maninia pueyano.

Tamasacaari saniniuujia sequeriquiaacujua:

—¡Maja maninia pueyano! ¡Pueya sapojoua najuhuanaj!

<sup>13</sup> Puetunu pueyajanaari naa sasacojotooriquiaa jiyasohuaja, nojori pueresacari narta Judiocuaca camarucua.

<sup>14</sup> Jiuujianaraca juuca jaara tari shocojoquiaari nojori queranacunuusacari, Jesuuri jiyacari shusha tiuquiquiaari Pueyaso Secojoua tiajinia. Tii coteeree pueya niishitiojonuuri. <sup>15</sup> Canaa Judiocuaca

camarucuaari jiuujiatequiaari nojori tojishacari Jesu niishitiojosano. Naa sequetureeri:

—¡Cuno pueyanoori maja quenaaja na serojonu quiquiaari! ¿Taa na niishiya pueraarini?

<sup>16</sup> Jesuuri nojori sequeree:

—Cua niishitiojosanoori maja tama cua niishishanojuaaja. Cunoori cua jiyarona niishitishano janiya. <sup>17</sup> Cante Pueyaso panishano miiniu paniyani, nojuaja cuara miiria taa cua niishitiojiyacuaani. Naacujitij, nojuajaari jiyacari niishiniutianiya, cua niishitiojosanocuaajaari Pueyasojiniji seetanujuanaa, maja tama cua niishishanojuaaja. <sup>18</sup> Cante tama na niishiriojosanojuaaja pahuatajani, nojuajaari saaja naa miiquiaa juhua tojishano pueyano na quiniuria. Jiyano pueyano cuara tojiyaquishaaria. Saniniuujia, cante na jiyarona niishitiojosano pahuataa pueyani, pueya tojiniuria na jiyarona, cuno pueyano pahuatasano cutaraari seetanujuanaa. Cuno pueyanoori maja pueya sapojua.

<sup>19</sup> ¿Niaateeri seetanujuanaa supuetana Moisés Rootasano tojitiajaca? Marjuhua. Majaari quenaaja niquiriyatu nijaniyajinijinio na rootasano tojijia. ¿Casaara nia monu paniya janiyani? ¿Supuetana Moiséste naa nia niishitiojiya na naajioneejinia?

<sup>20</sup> Nojoriiri Jesu riucaturee na juaaniutia:

—¡Quiaaqui samaruraca! ¿Cante quia monu paniyani? ¡Canaa quia sequere-toj!

<sup>21</sup> Jesuuri nojori sequeree:

—Puetunu nijaniyajanaari shiriiquitiuquianu samaatenu juuca cua miishacari niquiriyatu casaaniyojua cua cumaacata. <sup>22</sup> Supuetana Moiséscaajaari nia rootaquiaari nia mueya cararaatiuuquia co nia miatenura, ocho juuca jaara na shocojore na rasaanujiniji. Seetanujuanaa, nio niishishanoori maja tama Moisés niishishanojuaaja. Cunoori tariucuacaanu pa supuetanaa niishishano Moisés niyacarijia. Pueyari naa rootasaaquiaari naa nojori miiniuria necohua, seetanujuanaa Pueyaso saquiriojosano Israel pueya nojori quiniuriajuhuj. Naaratej, jaara quiri samaatenu juuca, naajaa, niaari naa nia niquiohua cararaatiuuquia co miatejoquiaa.

<sup>23</sup> Naa nia miishacari samaatenu juucatej Moisés Rootasano nia tojiniuria, ¿casaara nia juaya janiyani, cua naataniniuucua cusosu samaatenu juucani? Niaari saaja shiitianiyojua miatejiya, maninia nia niquiohua quiniuria Pueyaso niquiara. Janiya cutaraari puetunu cuno cusosu cuaqueyajanaa jecacanuni. <sup>24</sup> Naaratej, maja ritia pueya juaaja nia quiniu, nia niishiyaquishacari maninia. Jacaria niishiriojojua nia quiri, niaa mariqui najuhua pueya juaariiri na miishano jaara sesa quiyaquiri.

### *Jesu pahuatasacari tama nojuajinijiaaja*

<sup>25</sup> Jiyacaritij, noojiaqueya Jerusalén tiacajinijinio pueyari tama seque-toorejaaja:

—¿Majate nio pueyano pa camarucua pajesanocuaaja na mosocoriquianotej? <sup>26</sup> ¿Taateni? Noocujaruhua juhujaniya pahuataa pueya niquiaratej. Majaari quenaaja pa camarucua tenujununoj. ¿Pa camarucuate jiyaniya soj, nojuaja seetanujuanaa Cristo, tariucuacaanu sequesano pocua jiyarosaariquianotej? <sup>27</sup> Paacuaajaari nio pueyano niishiyani, tejenote nojuajani. Saniniuujia, Cristojuanaa jaara tiuquiri, majaari quenaaja na niishishaanu quiniutianiya cutara tejenote nojuajani.

<sup>28</sup> Jesuuri jiyacari niishitiojoriquiaa Pueyaso Secojojuajinia. Naa na tojishacari pueya sequesantej, naa na rupaa paaretareeri:



—¿Naatee? ¿Niaateeri cua niishiya? ¿Niaateeri niishiyajuhuaaj, tejenote janiyani? Naajaa, majaari cua niniu quiquiaari tama cua panishacarijiaaja. Janiyari jiyarosanoni. Cua Jiyaronaari seetanujuanaa quiijajuhuanajaj. Nojuajaari nia niishishoo. <sup>29</sup> Janiyari na niishiya cutarani. Janiyacuajaari tiji ninioni. Nojuajaari cua jiyaroquiaari.

<sup>30</sup> Nojoriiri jiyacari Jesu quiatunu panirii. Naajaa, majaari quenaaja tamonu naata quiriquiaa na quianura. Majaari na naata quianu quishaaquiaari, juhuanajuaja na monu juuca quiyaquishacarijia. <sup>31</sup> Saniniuujia, queraatia cuniqui quiniaa pueyari Jesuucua tiuquiaari. Nocua tiuuniaari naa sequetuquiaari:

—¿Cristojuanaa jaara tiuquiri, nojuajatucua socua jiyajeneta casaa miiri na cumaacata nio pueyano miishanojiniji?

### *Fariseocuaca quiatenu panishacari Jesu juucua*

<sup>32</sup> Fariseocuacaari cuno pueya tojiquiaari naa nojori maniniuuaqueetaano Jesu. Naaratej, cuno Fariseocuaca, pueyacuara secojonaa camarucuanio, puetunu nojorijianaari Jesuucua roojotooquiaari. Na nuhuaji, nojoriiri Pueyaso Secojoua tia cojuanaa pueya jiyaramiquiquiaari Pueyaso Secojoua tiajiniara, tii nojori quianura Jesu. <sup>33</sup> Jesuuri jiyacari nojori sequeree:

—Janiyani saaja rupaquijia niaata quiniutianiyani. Na nuhuaji, janiyani cua Jiyaronaacua riujuuniutianihuani. <sup>34</sup> Niaari cua pajenuunutaniya najuhuanaj. Majaari nia riuriatanu quiniutianiya janiya. Majaari nia naata quianu quiniutianiya tee cua quiniutianiyacuaani.

<sup>35</sup> Nocuaji, cuno Judiocuacaari tama sequetoorejaaja:

—¿Tee na quianutaniyajanojoni naa pocuaaniquitij, na riuriataaquishaanurajuhuaaj? ¿Parta Judiocuacaacua quianutaniya soj, noo pojoriicua Griego-hua tajinia niaaquejoquiaaritij? ¿Tii niishitiojonutaniya cuno taucuaca soj? <sup>36</sup> ¿Casaa na sequenu paniya pajaniyarini na sequesacari: “Niaari cua pajenutaniya najuhuanaj. Majaari nia riuriatanu quiniutianiya janiya”, na sequesacarijuhuaj: “Maja nia naata quianu quiniutianiya tee cua quiniutianiyacuaani”?

### *Jesu pohuatasano miriqui Pueyaso Sohuanujiniji*

<sup>37</sup> Siete juuca jaara tari shocojoquiaari, queranacunuunu puequesacari jucajanaari juhuaquequiaari. Cuno juucaari quiquiaari socua Pueyaso timitiasaanu juuca. Jiyacaritij, Jesuuri nujuaquiaari pueya niqiuara. Jiyanohua na rupaa paaretareeri. Naa sequereeri:

—¡Cante jiyamueyani, nojuaja cuara niiria cucua, na ratunura janiyajiniji! <sup>38</sup> Cucua na tiushacari, nera quiniutianiyari taa na naajio-tasaaquiaari tariucuacaanu Pueyaso Rupaaajiniacujani. Naa sequeyari: “Cante cucua tiuyani, pueyano samiitianijiojua mohuacaari noojiajiniji jaatenutaniya”.

<sup>39</sup> Naa Jesu sequesacaritij, nojuajaari Pueyaso Sohuanujiniji pohuatariquiaa miriqui. Jiyacaritij, Pueyaso Sohuanuuri juhuanajuaja maja na quiniu quiriquiaa mijiria, Jesu tacaquishacarijia Jiyaniijajanaa na quiniuria. Naaratej, tii quiniaa pueya sequeriquiaari, cante quiarjia nocua tiuyani, nojoriiri Pueyaso Sohuanu masenutaniya na nuhuaji, nojuaja jaara na jiyarosee jiyocuacaanuji.

### *Pueya juaatioosacari Jesuucua*

<sup>40</sup> Jesu jaara pohuatanu puecaquiaari, tii quiniaa pueyari tama pocoojoriquiaajaaja. Noojiaqueya nojorijinijinioori sequeree:

—¡Nio pueyanoqui seetanujuanaa Pueyaso sequenu panishano caminiujiunia, nooj, tarijia sequesaaquiaari pocua niriqúianotej!

<sup>41</sup> Tamasacaari saniniuujia naa sequeriquiaacujua:

—¡Nojuacuajaari Cristo, Pueyaso Jiyarosano pocua!

Tamasacaari saaja nojori riucuaaree:

—¿Cristoteeri Galilea jiyajiniji supuenutaniya? ¡Maja! <sup>42</sup> Tariucuacaanu Pueyaso Rupaajinia naajiotasanojiniji, paari niishiyani, Cristoori pa supuetanaa jiyaniijia David niquiohuajiniji supuenutaniya. Belén tiacajinia rasaanutaniyari, supuetana David tiacajinia.

<sup>43</sup> Naacuaajitij, puetunu pueyajanaari Jesuucua juayonuutaquiaari.

<sup>44</sup> Tamasacaari saniniuujia Jesu quianu paniriquiaa juucua. Naajaa, majaari na quiatunu quirii.

### *Judiocuaca camarucua tiuyaquishacari Jesuucua*

<sup>45</sup> Pueyaso Secojoua tia cojuanaa pueyari Jesu tojitiariquiaa juhuajaniya. Na nuhuaji, socua quiojiyarohuari na jiyaramiquiniaa pueyacua. Nojori jiyaramiquiniaa pueyari quiquiaari Fariseocuaca, pueyacuara secojonaa camarucuanio. Nojori jiyaramiquiniaari nojori sequeree:

—¿Casaara Jesu nia jaatucuyaquimiohuani?

<sup>46</sup> Nojori jiyaramiquishano pueyari saaja nojori riucuaaree:

—¡Majaari quenaaja tamonu pueyano pocuanu juhua cuno pueyanojua, seetanu rupaajanaa pahuataja cutara!

<sup>47</sup> Fariseocuacaari cunora nojori juaarii:

—¿Niaateeri niaacua na shanacuree na sapojonura niajanijajuhuaaj?

<sup>48</sup> ¿Tamonu pa camarucuaajinijiniote nocua tiuurii, canaa Fariseocuacajinijiniojuhuaj? ¡Maja! <sup>49</sup> ¡Cuno pojori Jesuucua tiuujiacani, nojoriiri Moisés Rootasano niishiyashijiaca! ¡Nojoriiri sesoriquia seque!

<sup>50</sup> Nicodemoori narta Fariseocuacata tii quiriquiaa. Nojuajaari noo Nicodemo quiriquiaa Jesuucua niquiaari niucuatej. Nojuajaari narta Fariseocuaca sequeree:

<sup>51</sup> —Pueyanaa, supuetana Moisés cuajaari pa rootaquiaari maja najuhuana pa sesacanura pueyano, paa jaara coteenu na nequesoreyaquirini casaa na miiriini.

<sup>52</sup> Narta Fariseocuacaari Nicodemo juaarii saaja:

—¿Quiaateeri narta Galilea jiyajinijinio pueyanojuhuaj? ¡Jacaria quia pajere tariucuacaanu Pueyaso Rupaajinia! ¡Quiocua jiyacari niishiri majaari quenaaja niquiriyatu Pueyaso sequesano caminiujiunia pueyano supueni quiniutianiya Galilea jiyajinia!

<sup>53</sup> Na nuhuaji, puetunu cuno pojorijianaari na tiajinia quiojiyarohua.

## 8

### *Jesu jiyanooshacari maaji*

<sup>1</sup> Jesuuri saniniuujia Olivo cuhuariquiaajinia quiaaree. <sup>2</sup> Jesuuri tariquicuajijia tiuquiriohua Pueyaso Secojoua tiajinia. Canaari nata quiriquiaajuhuaaj. Pueyari nocua rerejoquiaari. Nojuajaari cajirii pueya na niishitiojonura juucua.

<sup>3</sup> Moisés Rootasanojiniji niishitiojonaa, mariyata Fariseocuacanio, cuno pojoriiri jiyacari maaji jaatucumaa Jesuucua. Cuno maajiiri riuriatasaaquiaari numuetucushiyano. Nojoriiri cuno maaji nujuateree pueya tajoji. <sup>4</sup> Jiyacari Jesu sequetureeri:

—Niishitiojonanaa, nio maajiiri quiasaaree numuetucushiyano. <sup>5</sup> Moisés Rootasanojiniji paari niishiyani, jiyano maaji cuaara mosaaria saitia jacusano. ¿Quiajanियarijataj, taa quia sequeyanijia?

<sup>6</sup> Judiocuaca camarucuaari naa Jesu nequesotaree najuhuanaj, nojori tojiniuria casaa na sequenutaniyani. Jesu jaara nojori sequere maja nojori miiniuria Moisés Rootasano, nojori maara nocuara saquiriojotare nojori jiyaniijianucua. Jesu cutaraari maja quenaaja nojori na riucuanu quirii. Nojuajaari saaja jojoree, jiyajinia na naajionura na juaashiquiata. <sup>7</sup> Pueyaracaanu nojori nequesoreesacari nojuaja, Jesuuri socua sanerohua. Nojori sequereeri:

—Teyano niajanियajiniote sesa miyashijiani, nojuaja cuaara na coteetaara janu.

<sup>8</sup> Jesuuri jojorohuacuhua socua na naajionura jiyacua. <sup>9</sup> Cuno pojori tojishacari naa Jesu sequesantej, puetunujuaanaari sanaa quiojorohua. Juhucatecara quiojonu coteequiaariiri socua saaquiapue, na nuhuaji, socua naatujoori nojorijiniji. Nojoriiri naa quiojoquiaariuhua puetunujuaanaa. Saaja Jesuuri jateequee cuno maajitia. <sup>10</sup> Jiyacaritij, Jesuuri sanerohua. Maaji sequereeri:

—¿Teete quiocuara saquiriojotanaani? ¿Majate quenaaja tamonu cureenu quirii na jacunura quiajanिया saitia?

<sup>11</sup> Maajiiri Jesu riucuaaree:

—Shaaqui puetunujuaanaa, Jiyaniijianaa.

Jesuuri maaji sequereeri:

—Janियari quia jiyanoya cutarani. Juhujaniya quia quiaarohua. Majaari sesa quia miiniu socua.

### *Jesuuri pueya jiuujia cuhuatana*

<sup>12</sup> Nojori nuhuaji, Jesuuri pueya niishitiojonu coteerohua. Nojori sequereeri:

—Janियari pueya jiuujia cuhuatanani. Cante cucua tiuuriini, majaari tari ninishiqui quijia na quiniu quiniutianiya. Pueyaracaanu cuhuashiqui quijia quiniutianiya cutaraari.

<sup>13</sup> Tii quiniaa Fariseocuacaari naa Jesu juaarii:

—¡Quiaacuajaari tama quia cuaqueyajiniji pahuataa! ¡Puetunu quia pahuatasanojuanaari maja tojishano!

<sup>14</sup> Jesuuri nojori riucuaaree:

—Tama cua cuaqueyajinijiaaja cua pahuatasacari, cunoori maja najuhua pahuatasano. Cua pahuatasanoori seetanujuaanaa cutara. Janiyacuajaari niishiyani teje cua niquiaarini, tee cua quianutaniuhua. Niaari saniniuujia niishiyacuyacujua teje cua niquiaarini, tee cua quianutaniuhua. <sup>15</sup> Niaari pueyacuara saquiriojotaquiaa saaja nia niquishanojiniji, nia tojishanojinijiuhuaj. Janiya cutaraari maja cua saquiriojotanu pueyacuara. <sup>16</sup> Janiya jaara juaari sesa miiija cutarani, cua sequesano cutaraari seetanujuaanaa, niquiriyatujua cua quiaquishacari. Cua Jiyarona cua Quecuajaari cua cojiquiaa cuata na juaaniuria sesa miijiaca. <sup>17</sup> Niaacuajaari Moisés Rootasanojiniji niishitiojoquiaa: “Caapiqui pueyano pahuatasano jaara juhua tarajanu pahuatasano quirijiuhuaj, cuno cutaraari seetanujuaanaa”. <sup>18</sup> Naajuhuaaj, canaari caapiquini. Tama cua cuaqueyajaaja cua pahuatasacari, cunoori seetanujuaanaa, cua Jiyarona cojishacari janiya. Nojuajaari cua Que.

<sup>19</sup> Fariseocuacaari na nequesotaree:

—¿Teeteri quia queni?

Jesuuri nojori riucuaaree:

—Majaari nia niishiniu janiya, cua Quejuhuaj. Niaa jaara cua niishiriquia, niaa maara cua Que niishirijihuaaj.

<sup>20</sup> Jesuuri puetunu nio pohuatariquiaajanaa Pueyasora niquitiojosano cumaneeca racataja shuriucuaaji, Pueyaso Secojoua tiajinia. Naajaa, majaari pueya quianu quiriinquinioj, juhuanojuaja na monu juuca quiyaquishacarijia.

*Jesuucua tiuyashijiacaari jiyanoyaquishaanutaniya*

<sup>21</sup> Jesuuri cuno Fariseocuaca sequerohuacuhuaaj:

—Janiyari quianutaniyani. Niaari cua pajenuunutaniya juucua. Niaari cusununutaniya sesa miijiacaja, jiyanooshoo nia quishacarijia, cucua nia tiuyaquiniucua. Naaratej, majaari nia naata quianu quiniutianiya tee cua quianutaniyacuaani.

<sup>22</sup> Naa Jesu sequesacaritij, cuno narta Judiocuacaari tama sequetooreejaaja:

—¿Casaara na sequereecuaarini: “Maja nia naata quianu quiniutianiya tee cua quianutaniyacuaani”? Tama na cuaqueyajaaja miaquenutaniya jiyoteeri.

<sup>23</sup> Jesuuri nojori sequeree:

—Niaari ninishiqui quiquiojinijinio. Janiya cutaraari jiyocuacaanujini-jinioni. Niaari saaja mijiria quijiaca. Janiya cutaraari maja niiquijinioni.

<sup>24</sup> Janiyacuajaari cunora nia sequereeni, niaari jiyanooshoojua cusununutaniya nia cuaracashitiniucua janiyari maja Pueyaso Niyanuni, taa cua sequequiaa niajanuyacuajani. Cunora niaari jiyanooshoo quiniutianiya, pueyaracaanu saniitiosano nia quiniuria.

<sup>25</sup> Nojoriiri Jesu nequesotaree:

—¿Canteeri quiajanianiyani?

Jesuuri nojori riucuaaree:

—Janiyari najuhuana niaata pocoojiyani. Majaari nia tojiniu janiya. Janiyacuajaari tari nia sequereeni cante janiyani. <sup>26</sup> Janiyari queraatia jiiitiaajaa cua sequesocoriquiano niajanianiyani. Niaa jaara nocua tiuyacquiri, niaari pueyaracaanu saniitiosaanutaniya. Puetunu cua sequesanojuanaa niajanianiyani, cunoori seetanujuanaa. Cua pohuatasano mijiria, cunoori cua Jiyarona sequesano janiya. Na sequesanoori seetanujuanaa cutara.

<sup>27</sup> Majaari nojori niishiniu quiriquiaa Jesuuri na Que Pueyasojiniji pohuatariquiaa na sequesacari “cua Jiyarona”. <sup>28</sup> Jesuuri cunora nojori sequeree:

—Niaa jaara cua teetere, niaari shusha jiyacari niishiniutianiya, janiyari Pueyaso Niyanuni. Niaari niishiniutianiyajuhuaaj, majaari tama cua niishiriojosanojuaja cua miiniu quijia. Janiyari saaja cua Que niishitiojosano pohuatajani. <sup>29</sup> Cua Jiyaronacuajaari cuata quiya. Majaari cua Que cartenu janiya, pueyaracaanu cua miiniucua na panishano.

<sup>30</sup> Naa Jesu pohuatasacari pueya niquiaratej, queraatia pueyari jiyacari nocua tiuurii.

*Pueyaso pueyajiniji pohuatasano, Sesaaca pueyajinijinio*

<sup>31</sup> Jesuuri shusha nocua tiuunias narta Judiocuaca sequeree:

—Niaa jaara seetanujuanaa cua pohuatasano tojijiaca quiri pueyaracaanu, niaari cua pueya quiniutianiya. <sup>32</sup> Niaa jaara naa miiritij, niaari seetanu rupaajanaa niishijiaca quiniutianiya. Naacuajitij, niaari seetanujuanaa juhua cartesano pueya quiniutianiya, juhuajaniya quijiaca nia quiniuria.

<sup>33</sup> Narta Judiocuacaari Jesu riucuaaree:

—Canaacuaruhua supuetana Abraham jihuacuajinio supueno pueyani. Majaari quenaaja canaa quiniu quijia tamasa poonijotesano pueya. ¿Casaara naa quia sequeya canaarini, canaa quiniuria cartesano pueyani?

<sup>34</sup> Jesuuri nojori sequeree:

—Seetanujuanaa nia sequeyanijia, cante sesa miijiacani, nojoriiri juhua poonijotesano pueya quiya. Majaari na naata maninia miijia na quiniu.

<sup>35</sup> Poonijotesano pueyanoori maja seetanujuanaa na quiniu juhua na camarnu niyanu. Maja na naata sequenu: “Janiya pueyaracaanu quiniutianiya cua camarnutani”. Na camarnu jaara na paniyaquiri, na naata na jatanu na panishacari. Camarnu niyanu cutara, na queeri maja na jatanu quijia, neyanu na quiniuucua. <sup>36</sup> Naajuhuaaj, janiya jaara nia jaariuutiare nia poonijotenajinijini, niaari seetanujuanaa cartesano pueya quiniutianiya, Pueyaso muerasura nia quiniuria cutara. <sup>37</sup> Janiyacuajaari niishiyani, niaari seetanujuanaa pa supuetana Abraham jihuacuajinio supueno pueya. Naajaa, niaari cua tojiniu paniyaquiya. Niaari cunora cua monu paniya. <sup>38</sup> Janiyari nia pohuatariquiaa cua Quejiniji cua niquishanoni. Niaari saniniuujia nia que sequesano miiquiaacujua.

<sup>39</sup> Nojoriiri Jesu sequeree:

—¡Abrahamcuajaari canaa shipininio!

Jesuuri nojori riucuarree saaja:

—Abraham jaara seetanujuanaa nia shipininio quiri, niaa mariqui maninia miijiacu quiricuara, taa Abraham quiquiaaricuaani. <sup>40</sup> Saniniuujia, niaari cua monu paniya saaja cua pohuatanuucua seetanu rupaajanaa, cua tojishano Pueyasojiniji. Abrahamri maja naa na miiniu quijia cutara.

<sup>41</sup> Niaari saaja sesa miijiacu taa nia que miiquiaacuaani.

Nojoriiri Jesu juaarii:

—¿Casaa quia sequeyani? ¡Canaari maja saa maaji rasanojuani! ¡Pueyasocuaajaari canaa Que, maja tamonu!

<sup>42</sup> Jesuuri nojori sequeree:

—Pueyaso jaara nia Que quiri seetanujuanaa, niaa mariqui cua paniricuara, Pueyasojiniji ninio cua quishacari. Majaari tamajaaja cua ninu quiquiaari. Cua Que Pueyasocuaajaari cua jiyaroquiaari. <sup>43</sup> Cua rupaa nia tojiniu paniyaquishacari, niaari cunora cua pohuatasano niishiyaquiya.

<sup>44</sup> Seetanujuanaa, nia quecuajaari Sesaaca, samaruhua jiyaniijia. Niaari cunora miiniu paniquiaa na panishano. Nojuaja jaara shushajanaa coteequiaari sesa miiniuria, nojuajaari naajuhuanajaj, mona. Nojuajaari maja na niishiniu sequenu seetanujuanaa. Pueyaracaanu sapojouaari. Na sapojosacari, naa miyari sapojoua na quiniuucua. Sapojonu niishiniuni, cunoori nojuajiniji supuequiaari. Niaari cuno nia que tojijiaca. Nocuaji niaari naa sapojonuujacuajuhuaaj. <sup>45</sup> Saniniuujia, cua pohuatasacari seetanu rupaajanaa niajaniya, majaari cucua nia tiuuniu quiquiaa. <sup>46</sup> ¿Casaa cua miiquianu sesani? Cante na niishiyani cuaara sequeera. Saniniuujia, janiya jaara sesa miyashijia quirini, ¿casaara cucua nia tiuyaquiyacuaraarini, seetanu rupaajanaa cua pohuatasacari niajaniyani? <sup>47</sup> Cante Pueyaso pueyani, nojoriiri Pueyaso rupaa tojiquiaa cutara. Niajaniya saniniuujia, niaari na rupaa tojiyaquiya, na muerasu nia quiyaquishacari.

*Jesucristoori tariucuacaanu quijiajuhanaja Abrahamjiniji*

<sup>48</sup> Narta Judiocuacaari naa Jesu juaarii:

—¡Canaacuaajaquiiri maninia sequeriquiaa quiajaniyajinijini, quiaari Samaria jiyajinijinio tahue, samaruraca pueyanotuhuaaj!

<sup>49</sup> Jesuuri nojori riucuaaree:

—Majaari janiya samaruracani. Janiya cutaraari saaja cua Que tojiquiaani. Niaari saniniuujia cua rerequetequiaacujua. <sup>50</sup> Naajaa, majaari cua tacaaniu naa nia sesacasacari janiya. Tamonu cutaraari quiya, nojuajaari paniya pueya tojiniuria janiya. Nojuajaari cua rerequetejaca sanitiioriquiano. <sup>51</sup> Seetanujuanaa nia sequeyanijia, cante cua rupaa tojijiani, nojoriiri maja na shaajenu quiniutianiya.

<sup>52</sup> Narta Judiocuacaari na sequeree:

—¡Quiarjia cutara canaari niishiyani quiaari seetanujuanaa samaruraca! Canaa supuetana Abrahamri cusoquiaari, mariyata puetunu Pueyaso sequenu panishano caminiujiuniaajanaano. Quiaari saniniuujia quiarjia sequeyacuajua: “Cante cua rupaa tojijiani, majaari na shaajenu quiniutianiya”. <sup>53</sup> ¿Quiaateeri jiyaniya quiaa socua cutara pueyano canaa supuetana Abrahamjiniji? ¡Maja! Nojuajaari shaajequiaari. Mariyata puetunu Pueyaso sequesano caminiujiuniaa pueyajanaari shaajequiaarijihuaaj. ¿Canteeri quiajaniyani naa quia sequenuratej?

<sup>54</sup> Jesuuri nojori riucuaaree:

—Janiya jaara tama cua cuaqueyajaaja jiyatenu paniri juhua jiyaniijiarani, cunoori najuhuanaj. Seetanujuanaa, cua Quecuajaari cua jiyatequiaari Jiyaniijiarajanaa. Nojuajaari nia sequesano nia Pueyasota. <sup>55</sup> Niaari seetanujuanaa na niishiyashijiaca. Janiya cutaraari cua Que Pueyaso niishiyani. Janiya jaara nia sequereni, maja cua niishiniu nojuaja, janiya maara sapojoua quirini taa nia quiyacuaani. Janiya cutaraari na niishiyani. Janiyari cunora na rupaa tojijiani. <sup>56</sup> Nia supuetana Abrahamri timiquiaari na niishishacari janiya mijiria supenutaniyani. Nojuaja jaara cua niqiquiaari mijiria quiyano tari, jyanohua timiquiaariiri.

<sup>57</sup> Narta Judiocuacaari Jesu juaarii. Naa na sequetureeri:

—¡Jaj! Majaruhua juhuanouaja cincuenta marijia shocojonu quiajaniya. ¿Taa quia sequeyarini quiaa canaa supuetana Abraham niqiquiaari?

<sup>58</sup> Jesuuri nojori riucuaaree:

—Janiya nia sequeya seetanujuanaani, Abraham raaquishacarijia, janiyari tari quijiani.

<sup>59</sup> Naa nojori tojishacari Jesu sequesantej, narta Judiocuacaari sai pajenuuree Jesu na jacutajara juucua. Jesuuri nojoriicuaaji jamaarii saaja. Pueyaso Secojoua tiajiniji tohuatamaari.

## 9

### *Jesu jeecasacari cariojuaru namijia, naa rasanojuhuanajaj*

<sup>1</sup> Tamacari Jesu rucuanajosacari canaata, canaari cariojuaru pueyano niquiriini, naa rasanojuhuanajaj. <sup>2</sup> Canaari cunora Jesu nequesotareeni:

—Niishitiojonanaa, ¿casaara naa cuno pueyano rasaaquiaari cariojuaruni, na queya miiniuucua sesatee, tama sesa na miiniuucuaajaaja soj?

<sup>3</sup> Jesuuri canaa riucuaaree:

—Maja. Maja cunora naa na rasaanu quiquiaari. Naa rasaaquiaariiri Pueyaso cumaaca niishishaanura, na namijia jaara jeecasaare niqijiara na quiniuria. <sup>4</sup> Juuca quishacarijia, pa tucuatate miiniu cua Jiyarona sequesano cua miiniuria. Paa quera niniyani. Jaara niniquii, majaari pa naata poonijionu quiniutianiya tari. <sup>5</sup> Mijiria cua quishacarijia, janiyari pueya jiuujia cuhuatanani.

Jesu sequesacari: “Paa quera niniyani”, nojuajaari pa shaajenujiniji sequeriquiaa miriqui.



<sup>6</sup> Naa Jesu sequenu nuhuajitij, nojuajaari jiyocua riocoree. Na riacauta coniquioreeri. Coriyacau mara ruporohua cariyajuaru namijiaacuaari.

<sup>7</sup> Cariyajuaru sequerohuari:

—Siloé cuarimia quia jeequese quia namijia.

Hebreo rupaaajinia, Siloé cuariiri sequeya “Pueyaso Jiyarosano cuari”. Cariyajuaruuri cuarimia quiaaree. Tii na namijia jeequeseeri. Tariucua niquijiaari na tiajinia tiuquiriohua. <sup>8</sup> Cariyajuaru na quishacarijia, nojuajaari na miajajau na masetajara cumaneeca mashiniquijiojua quiquiaari. Puetunu pueyajanaari na niquitiujia naa na mashiniquijiosacari. Naacuaajitij, nojuaja jaara niquijia quiquiaari, tarijia na niquiniaa pueyari, mariyata na shuriucua quiniaa pueyano, nojoriiri tama sequetooquiaarijiaaja:

—¿Cante cuno pueyanojaarani? ¿Majate noocuaaja tarijia cumaneeca mashiniquijiojuatej?

<sup>9</sup> Noojiaqueya pueyari sequeree:

—¡Taaquiririnij, nojuajacuj!

Tamasacaari saniniuujia sequereecujua:

—Nojuajaquinio naasucua. Juhua nojuaja niquishiyacuj, majaari see-tanujuanaa nojuaja.

Tarijia quijia cariyajuaruuri saa sequereejaa:

—Taaquiririnij, janiyacuaaquinatejaj.

<sup>10</sup> Naaratej, pueyari na nequesotaree:

—¡Quiaacuaaja cariyajuaru quijiaruhua! ¿Taa niquijia quia quiriouharini?

<sup>11</sup> Nojuajaari pueya riuquaree:

—Cuno, Jesu jiyanishano pueyanoni, nojuajaari mara coniquioree cu-cuara. Cua namijiaacua na ruporohuari. Na nuhuaji, cua jiyaroreeri Siloé cuarimia cua jeequenura cua namijia. Janiyari quiaareeni. Cua namijia cua jeequesacari, ¡janiyari niquijia quiquiini!

<sup>12</sup> Pueyari na nequesotaree:

—¿Teeteeri quia namijia jeezana pueyanoni?

Nojori riuquareeri:

—Johuaj. Maja cua niishiniu.

### *Fariseocuaca nequesoreesacari na namijia jeeacasano pueyano*

<sup>13</sup> Pueyari Fariseocuacaacua jiyataaree Jesu jeeacasano cariyajuaru pueyano. <sup>14</sup> Jesu jaara mara coniquioquiaari na jeeanura cuno pueyano namijia, cuno juucaari Judiocuaca samaatenu juuca quiquiaari. <sup>15</sup> Nocuaaji Fariseocuacaari tarijia cariyajuaru quijia nequesotaree taa niquijia na quiriini. Nojuajaari nojori riuquaree:

—Jesu cua namijiaacua rupojorucuaa marani. Na nuhuaji, janiyari cua namijia jeequeseeni. Naacuaajitij, janiyari quiaritia niquijia quiyani.

<sup>16</sup> Noojiaqueya cuno Fariseocuacajininioori saa sequereejaa:

—Cuno pueyano, nio pueyano namijia jeeacarucuaani, nojuaja maja Pueyaso Jiyarosano. ¡Nojuajaari Moisés Rootasano tojiyashijia, naa na miini-uucua samaatenu juuca!

Tamasacaari saniniuujia sequeriquiaacujua:

—Jaara sesa miiijia quiri, ¿maatucua casaara poonijiore Pueyaso cumaacat-acuaraarini?

Naa nojori juayonuutanuucuatej, nojoriiri juhua raqutiirii. <sup>17</sup> Nocuaaji tarijia quijia cariyajuaru nequesotaturohuarihuaj:

—Niquijia quia quishacari quiaritia, ¿taa quia sequeya Jesuni? ¿Maninia miiijatej?

Nojuajaari saaja Fariseocuaca riuquaree:

—Janiyara, nojuajaari Pueyaso sequesano caminiujiunia.

<sup>18</sup> Tii quiniaa Judiocuacaari na cuaracashitirii saaja. Nojoriiri jiyaniquiaari maja naasucua seetanujuanaa cariyujuaru cuno pueyano quiniu quijia. Nocuaji nojoriiri na queya sequeturee nojoriicua na niniuria.

<sup>19</sup> Nojori tiuquishacari, cuno Judiocuacaari nojori nequesotaree:

—Canaa nia sequere, ¿nio pueyanote seetanujuanaa nia niyanu, nia sequesano cariyujuaru rasanjuhuanani? ¿Taa quiarjia niqijiaara na quiriohuarini?

<sup>20</sup> Na queyari cuno pojori riucuaaree:

—Taaquiriirini, nojuacuaaquinateja canaa niyanujuaj. Naa cariyujuaru rasaquiaariiri. <sup>21</sup> Majaari canaa niishiniu cutara taa na quiriohua niqijiarani. Majaari canaa niishiniujiuhuj, cante na namijia jeecarucuaani. Nojuaja nia nequesotare, tari cumantumacacuaaja. Nojuajanaa cuaara nia pohuataara cutara.

<sup>22</sup> Na queyari naa riucuaquiaari narta Judiocuaca camarucuatej, na puere-tusacari nojori. Judiocuaca camarucuaari tari sequetuquiaari: “Cante Jesu sequeyani nojuaja seetanujuanaa Pueyaso Jiyarosano, naa sequejaca pueya cuaara tenujusaaria maja Pueyaso secojojua tiajinia na tiuquiniuria socua”.

<sup>23</sup> Naaratej, na queyari naa narta Judiocuaca riucuaquiaari: “Nojuaja nia nequesotare, cumantumacacuaaja”.

<sup>24</sup> Cunora cuno Judiocuacaari socua piiriohua na namijia jeecasano pueyano. Nojoriicua na nishacari, na sequetureeri:

—¡Paacuajaari Pueyaso niqiaara niya quiyani! Naaratej, ¡seetanujuanaa canaa quia pohuatare cuno pueyanojiniji! ¡Canaa cutaraari niishiyani cuno pueyanoori sesa miijia!

<sup>25</sup> Na namijia jeecasano pueyanoori nojori riucuaaree:

—Naajaa, jaara sesa miijia quiri, jaara maninia miijia quiriujuhuj, maja cua niishiniu cuno. Janiya cutaraari niishiyani, ¡janiyari tarijia niqiyashijia quiquiaarini! ¡Janiyari saniniuujia quiarjia niqijia quiya cutarani!

<sup>26</sup> Nojoriiri na nequesotarohuacuhuj:

—¿Taa na miiriucuaa quiajanijaaarani, niqijia quia quiniuriani?

<sup>27</sup> Narta Judiocuaca camarucua sequere saajaari:

—Janiyacuaaja tari nia pohuatareeni. Majaari nia tojiniu paniniu janiya. ¿Casaara nia paniya socua cua pacutenura sequenu niajanianani? ¿Niaate na pueyara quiniu paniya soj?

<sup>28</sup> Naa na sequesacari nojoritij, cuno Judiocuaca camarucuaari na sesacaturee. Naa na sequetureeri:

—¡Quiaari cuno pueyano tojjiaacuaaja! ¡Canaa cutaraari supuetana Moisés Rootasano tojtiajacani! <sup>29</sup> ¡Canaa cutaraari niishiyani Pueyasojuanaari Moisés cua muetaquiaari na rootanura nojuaja! ¡Saniniuujia cuno pueyanoori-jiaataj, majaari quenaaja pa niishiniu teje na supuequiaarini!

<sup>30</sup> Na namijia jeecasano pueyanoori nojori riucuaaree:

—¡Niaaquiiri mosanucua seetanujuanaa! ¿Majateeri nia niishiniu teje na supuequiaarini? ¡Nojuajaari cua namijia jeecarucuaa! <sup>31</sup> ¡Paacuajaari niishiyani Pueyaso maja na tojiniu quijia sesa miijia secojosano! ¡Saaja na timitiajaca secojosano tojiya cutaraari, cante na panishano miiquiaacua-jani! <sup>32</sup> ¡Majaari quenaaja pa tojiniu quijia tamonu pueyanojiniji, cante cariyujuaru namijia jeecajani, naa cariyujuaru rasanjuhuanaj! <sup>33</sup> Cuno pueyano jaara Pueyaso Jiyarosano quiaquiri, ¿taa cua namijia na jeecarucuaacuaaarini?

<sup>34</sup> Cuno pojoriiri na juaaniutia na sequeturee:

—¿Quiaari sesa miihia rasaaquiaari! ¿Quiaateeri jiyanojuua canaa niishitiojonu paniyaruhua?

Naaratej, narta Judiocuaca camarucuaari na tenujuturee maja socua na tiuquiniuria Pueyaso secojojua tiajinia. Naacuajitij, cuno pueyanoori juhua taanuusano pueyano quiquiaari narta Pueyaso timitiajaca pueyajiniji.

*Jesu tojtiaashijiaca pueya juhua cariojuaru*

<sup>35</sup> Jesuuri niishiquiaari cuno pueyanoori tenujusaarucuaa. Jaara na riuritaquiaari, Jesuuri na sequeree:

—¿Quiaate Pueyaso Niyanuucua tiuujia?

<sup>36</sup> Jesu sequereeri:

—Jiyaniijianaa, cua sequere canteeri nojuajani, nojuaja cua niishiniuria nocua cua tiuuniuria.

<sup>37</sup> Jesuuri na sequeree:

—Quiaacuaja na niqiiyaruhua. Nojuajaari cunocuaja, quiata pocoojiyani.

<sup>38</sup> Jiyacaritij, pueyanoori Jesu cariquimiaji mojuquetaree. Na sequereeri:

—¿Quiocua tiuyanijia, cua Jiyaniijianaa!

<sup>39</sup> Na nuhuaji, Jesuuri cuniqui quiniaa pueya niquiara sequeree:

—Janiyari mijiria niquiaarini juhua cua raquiriojotanura mijiria quiniaa. Naacuajitij, cante niishiyani nojuaja juhua cariojuaru quiya, nojuajaari juhua namijiaraca quiniutianiya cucua na tiuushacari. Saniniuujia, cante jiyaniyani nojuaja niqiihia cutara, nojuajaari juhua cariojuarura tari jiyatesaaree, cucua na tiuyaquiniuucua.

<sup>40</sup> Tii quiniaa Fariseocuaca jaara tojiquiaari naa Jesu sequesantej, nojoriiri Jesu sequeree:

—Naa quia sequesacaritij, ¿quiaateeri sequeya canaari cariojuarujurijihuhaj?

<sup>41</sup> Jesuuri nojori riucuaaree:

—Niaa jaara tama nia cuaqueyajaaja jiyatere juhua cariojuarura cucua nia tiuuniuria, Pueyaso maara nia jiyanoori. Quiarijiani, tama nia sequenucuajaaja, “Canaa niqiihia cutarani”, niaari jiyanooshoojua nioojia nia tacatoyaquiniuucua.

## 10

*Jesu pahuatasano miriqui borrego cojuanajiniji*

<sup>1</sup> Jesuuri socua pahuatarohua pueya niquiara. Naa sequereeri:

—Seetanujuanaa nia sequeyanijia, cante borrego mataca tohuateyaco tiuquiyajiniani, nojuaja jaara tamocoji tiuquimia, cunoori nohuasejojua.

<sup>2</sup> Saniniuujia, cante tohuateyaco tiuquijia cutarani, cunoori borregohua camarujuanaa cutara. <sup>3</sup> Tohuateya cojuanaari tiotiu riataquiaa nocuaji. Borregohua camaruuri puetunu na seya sesacajanaa jiyaniquijia. Na borregohuari na rupaa niishijia. Na camaruuri naa na tohuanijiojua puetunujuanaa na matacajiniji. <sup>4</sup> Puetunu na borregohuajanaa jaara tohuareetama, na camaruuri na puetaja. Na seyari na nuhuaji sacujaja, na camaru rupaa nojori niishishacari. <sup>5</sup> Saniniuujia, borregohuari maja na nuhuajiniu quijia na niishiyaquishoo pueyano. Saaja nocuaji cocuatejaari na niishishacari cunoori maja na camaru rupaa.

<sup>6</sup> Jesuuri naa pahuataquiaari miriqui nojori niquiara. Nojoriiri saaja niishiyaquiquiaari casaa na niishitiojonu paniriquiaa nojorini.

*Jesu Cristo, maninia pa cojuana*

<sup>7</sup> Nocuaji Jesuuri naa nojori sequerohua maatia:

—Seetanujuanaa nia sequeyanijia, janiyari juhua tohuateyani, cua borregohua tiuquitianura cua Que Pueyasocua. <sup>8</sup> Cante cua niyacarijia ni-jioquiaari coteenuni, nojoriiri sesa miijiacua quiquiaari, nohuasenuujuaca. Cua borregohuari namitia nojori numueejushiquiaari. <sup>9</sup> Janiyari juhua tohuateyani. Cante janiyajiniji tiuquiya cua Queecuan, nojuajaari Pueyaso pueyanora jiyatesaanutaniya cutara. Cuno pueyanoori maninia cojuasano juhua borrego. Janiyari na tiuquininiutianiyani, tii na quiniuria maninia cojuasano. Janiyari juuca na tohuatenutaniyani, jiyasocua cua miaquetenura carijiniacuma.

<sup>10</sup> 'Nohuasejojuuari saaja tiuquijia borregohuacua na nohuasenuura, na puecoonurajuhua. Naa na shaajaaja puetunujuanaari. Janiyari saniniuujia niqiaarini cua borregohua cua jiyatenura pueyaracaanu quijiacara, seetanujuanaa jiyanoohua shuquiriaatia quijiaca nojori quiniuria. <sup>11</sup> Janiyari maninia cojuanani, maja tamonu. Pueyano jaara maninia na seya cojuana maniniu quiri, tama na cuaqueyajaaja panitiaja na seyacuaari. <sup>12</sup> Saniniuujia, borregohua camarujuanaa jaara tamonu cojuateya na seya, cuno pueyano jaara niquiri sare nocua canujiyano, nojuajaari na puerenuta neteja. Borregohua tiujiaqueeri. Naa miijiaari cuno borregohua quiyaquini-uucua na seyajanaa. Naacuajitij, sareeri borregohua soojua. Naa na cocuatajaari. <sup>13</sup> Cuno borregohua cojuanaari naa neteja sareecuaji na tacayaquishacari seetanujuanaa cuno borregohuacua. Nojuajaari saaja paniya na poonijosano sami na niqitiosaanura.

<sup>14</sup> 'Janiya cutaraari maninia cojuaja borregohuani, na camarujuanaa cua quishacari. Janiyari puetunu cua seyajanaa niishijiani. <sup>15</sup> Nojoriiri cua niishiyajuhua, taa cua Que niishiya janiyacuaani, mariyata taa cua niishiya cua Quejaniuhua. Janiyari tama cua cuaqueyajaaja panitiaja cua borregohuacuarani. <sup>16</sup> Janiyari socua borregohua jiiitiani. Nojoriiri maja nio cua borregohua maanujinijinio. Janiyari nojori rijionutaniya niyarajuhua. Nojoriiri cua tojitiariquiano. Naacuajitij, puetunu cua borregohuajanaari jatiqui quiriquiano, niquiriyatu cojuanaracajuhua.

<sup>17</sup> 'Cua Queeri cua paniya naa cua panitiasacari tama cua cuaqueyajaaja cuno borregohuacuarana. Janiyari tama cua panishacarijaaja mosaanutaniyani, na nuhuaji cua samiitianuhuara, pueyaracaanu quiija cua quiniuhua. <sup>18</sup> Majaari quenaaja tamonu naata monu janiya cua paniyaquishacari. Janiyari cua panishacari cusonutaniya cua borregohuacuarani. Janiyari cumaacaracani nojoriicuara cua cusonura. Janiyari cumaacaracajuhua cua samiitianuhuara. Cua Quecuajaari naa cua miini-uria cua jiyaroquiaari mijiria.

<sup>19</sup> Narta Judiocuaca jaara tojiqiaari naa Jesu sequesantej, nojoriiri socua tama juayonuutaquiaarijaaja Jesuucua. <sup>20</sup> Queraatia pueyari jiyacari sequeere:

—¡Cuno pueyanoori samaruraca! ¡Maja na tojiniu, pueyanaa! ¡Najuhua pocuaano!

<sup>21</sup> Tamasacaari saniniuujia sequeriquiaacujua:

—¿Samaruraca pueyanoteeri maninia casaa pohuatajaara juhua nio pueyanojua? ¡Maja! ¿Pueyanoteeri na naata samaru cumaacata jeeccanucariyojuaru namijiajaara? ¡Maja na naata!

### *Judiocuaca camarucua niqiniu paniyaquishacari Jesu*

<sup>22</sup> Tamacari, Jerusalén tiacajiniaari queranacusaariquiaa. Cunoori quiriquiaa pueya niishiriojonura nojori juhua cuno juucajinia Pueyaso Secojojua tia jiyatequiaariuhua seetanujuanaa juhua Pueyaso quiquiora

na quinihuara. Jiyacariiri shuniya quiriquiaa. <sup>23</sup> Jesuuri tii quiriquiaajuhua. Pueyaso Secojoua tiajina quiriquiaari. Nojuajaari pueya jiyaniquishano tariucuacaanu jiyaniijia Salomón canujuucojojuajinia riujiuuniuquojoriquiaa. <sup>24</sup> Jiyacaritij, canaa Judiocuaca camarucuaari tii na cosesee. Naa na nequesotatureeri:

—¿Taacari canaa quia sequenutaniya socuaari cante quiajaniyani? ¡Quiaa jaara seetanujuanaa Pueyaso Jiyarosano quiri, quiarijia canaa quia sequere!

<sup>25</sup> Jesuuri nojori riucuaree:

—Janiyacuaaja tari nia sequecanuni. Niaari saaja na cuaracashitiquianu. Niaa cuara niishiiria cante janiyani, nia niquishacari cua miishano cua Que sequesano janiya. <sup>26</sup> Niaari saaja cucua tiuyaquiquiaa cua borregohua maanujinijinio nia quiyaquishacari. <sup>27</sup> Cua borregohuari cua rupaa tojijia cutara. Janiyari nojori niishiyajaaniuhua. Nojoriiri cunora cua nuhujiquiaa. <sup>28</sup> Janiyari pueyaracaanu quijiara nojori jiyatequiaani. Majaari nojori juurequenu quiniutianiya. Majaari quenaaja tamonu naata jaariuutianu quiniutianiya nojori janiyajiniji. <sup>29</sup> Cua Queeri cua borregohua cua niquitioquiaari. Nojuajaari socua jiyanohua cumaacaraca tamasaca cumaacaraca quijiacajiniji. Naacujitij, maja quenaaja tamonu naata cua borregohua jaariuutianu cua Quejiniji. <sup>30</sup> Janiya cua Queta, canaari juhua niquiriyatuni.

<sup>31</sup> Jiyacaritij, canaa Judiocuaca camarucuaari sai rijiorohuacuhua, Jesu na jacutajara juucua. <sup>32</sup> Jesuuri saaja nojori sequeree:

—Janiyari queraatia maninia casaa miiquianu saaja cua Que cumaacata nia niquiarani. ¿Teyanoocua nia jacunu paniya janiyani?

<sup>33</sup> Nojoriiri Jesu riucuaree:

—Majaari canaa jacunu quiniutianiya quiajaniya maninia quia miiniuucua. ¡Canaari quia jacunutaniyani sacuaraatia quia pocuanuucua Pueyaso niquiara! ¡Quiaari tama quia cuaqueyajaaja jiyateya juhua Pueyasora! ¡Cunoori jiyanohua sesa! ¡Quiaacuajaari pueyano, juhua canaajuhua!

<sup>34</sup> Jesuuri nojori sequeree:

—Niaacuajaari tariucuacaanu naajiosano Pueyaso Rupaa jiitiaa. Pueyaso sequesanoori naa naajiotasano quiya tii:

“Janiyacuaajaari nia sequequiaarini, niaari pueyasohua”.

<sup>35</sup> Paacuajaari niishiyani, Pueyaso Rupaaajinia naajiotasanoori maja na naata cuaracashitishaanu. Pueyasojuanaari pueya jiyaniquiquiaari “pueyasohuata”, noo pojori, teyano nojuaja jiyatequiaari Israel pueya jiitianaaracuajani. <sup>36</sup> Naajuhua, Pueyasocuajaari cua saquiriojoquiaari mijiria na jiyarosocoriquiano. Naa Pueyasojuanaa Jiyarosano cua quishacaritij, ¿niaatucua casaara sequereni janiya Pueyaso niquiara pocuaree sesani, cua sequesacari janiya Pueyaso Niyanuni? <sup>37</sup> Janiya jaara cua Que panishano miyaquiri na cumaacatani, janiya maara nia juayaquirini cucua nia tiuyaquiniuucua. <sup>38</sup> Niaacuajaari cua Que cumaacata cua miishano niquiquiaa. Niaa jaara cua pohuatasanoocua tiuuniu paniyaquiri, naajaa, cua Que cumaacata cua miishanoocua nia tiuuri quenaaja. Niaa jaara niishiri puetunu cua miishanojuanaari cua Que Pueyaso cumaacata miishano, niaa maara niishiri Pueyasoori coojia rupueja, janiyari noojia rupueyajaaniuhua.

<sup>39</sup> Jiyacaritij, nojoriiri socua Jesu quiatunu paniriohuacuhua. Jesuuri saaja nojoriicuaji mashiquii.

<sup>40</sup> Jesuuri canaa jiyataarohua Jordán moo taquijiria tee Juan tiuquinijioquiaari tarijia pueyacuajani. Canaari tii quishiini. <sup>41</sup> Queraatia pueyari

Jesuucua nijioquiaari tee canaa quiriquiaacuajani. Nojoriiri tama sequequiaarijiaaja Jesujiniji:

—Tiuquinijiona Juanri maja quenaaja na miiniu quijia casaa Pueyaso cumaacata. Naajaa, puetunu nio pueyanojiniji na sequesanojuanaaquiiri seetanujuanaa quijia.

<sup>42</sup> Naacuajitij, queraatia pueyari Jesuucua tiuquiaari tii, tee canaa quiriquiaacuajani.

## 11

### *Lázaro shaajenujiniji pohuatasano*

<sup>1</sup> Jiyacaritij, tamonu pueyanoori cusosu matariquiaa. Na sesa quiquiaari Lázaro. Nojuajaari Betania tiacajinijiniojuanaa quiquiaari, Judea jiyajinia. Na rimiatuhua quiquiaari María, Martanio. Nojoriiri cuno Betania tiacajinijinio quiquiaarijuhuaj. <sup>2</sup> Lázaro rimiatu Maríani, nojuajaari noo maajicuaaja Jesu niohuaca sacuanijiaquiaari na muecacatatej, nocua na totanu nuhuaji na shanohua jaanutaja. <sup>3</sup> Lázaro matasacari cusosu, na rimiatuhuari pueyano jiyarotuquiaari Jesu numootenuucua. Naaratej, cuno pueyano tiuquishacari Jesuucua, nojuajaari naa caminiujuquiaari Lázaro rimiatuhua sequesano nojuaja:

—Jiyaniijianaa, quia panishano pueyanona cusosu mataa.

<sup>4</sup> Jesu tojishacari naa cuno pueyano sequesantej, tii quinia pueya sequereeri, canaajuhuj:

—Nojuajaari maja na cusonu quiniutianiya na shaajenura puetunujuaanaa. Cuno cusonu na jiitiasanojinijini, pueyari Pueyaso cumaacata miishano niqiniutianiya. Pueyari cunora Pueyaso Niyanu maniniuuhuaqueetanutianiya, cua Que Pueyasojuhuaj.

<sup>5</sup> Marta, María, Lázaronio, nojoriiri Jesu panishano pueya quijia. <sup>6</sup> Naajaa, Jesu jaara numootesaaquiaari Lázarojiniji, majaari nocua na quianu quiquiaari ritia. Caapiqui juuca camueeree cuniquijiaaraari, tee canaa quiriquiaacuajani. <sup>7</sup> Na nuhuaji, canaa na saquirojosano pueya sequereeri:

—Judea jiyajinia pa quiaarohuacuara socua.

<sup>8</sup> Canaari Jesu sequereeni:

—Niishitiojonanaa, cuniquijinio Judiocuacacuaajaari shusha naataja tii quia jacunu paniquianu. ¿Casaara socua tii quia quianu paniuhuariniuhuj?

<sup>9</sup> Jesuuri canaa riucuaeree miriqui:

—Janiyara, juuca juhuanojuaja. Juucaari maninia seetanujuanaa pa rucanejonura. Paa jaara pananu tiuquiyaquishacarijia rucanejoreni, paari maninia niquiya pocuajini. Majaari pa tiuriiniu. <sup>10</sup> Paa jaara ninishiqui rucanejore saniniunijia, paari tiurijiani cuhuashiqui na quiyaquishacari.

Jesuuri naa sequeriquiaa miriquitij, nera, maja puereeta na quiniu quiriquiaa Judiocuaca niquiara na rucanejonura, na mosaanu juuca quiyaquishacarijia. <sup>11</sup> Na nuhuaji, Jesuuri naa canaa sequeree socua:

—Pa rupuena Lázaroori tari maquequee. Janiyari na niucujanuucua quianutaniyani.

<sup>12</sup> Canaari Jesu sequereeni:

—Jiyaniijianaa, nojuaja jaara maqueya, maniniacuajaqui. Naacuajiti paari niishiyani naatanutaniuhuacuajaqui. ¿Paatucua casaara najuhuana nocua quiaareni?

<sup>13</sup> Naa Jesu pohuatasacari canaa Lázarojinijitij, canaa sequeriquiaa juucaari Lázaro tari macu quiriquiaa. Canaari saniniuujia jiyaniriquiaani Jesu



naasucuaari canaa pohuatariquiaa Lázaro nareja maqueriquiaa. <sup>14</sup> Nocuaji Jesuuri maatia canaa sequeree:

—Lázaro tari cusoyarucuaa. <sup>15</sup> Janiyari timiyani tii cua quiyaquiniuucua Lázaro quishacarijia saminio. Naa quiarijia macu na quishacaritij, niaari socua jiyajeneta casaa cua miishano niquiniutianiya, seetanujuanaa cucua nia tiuuniuria cutara. Quiarijia cutara, nocua pa quiaare.

<sup>16</sup> Jiyacaritij, Tomásri canaa narta saquiriojosano pueya sequeree:

—Pa Jiyaniijata pa quiaarejuhuj, nata pa cojiritiasaanura puecoonu. Cuno Tomásri pueya sesojosano quiquiaari “Caapueya muetusano”.

### *Jesu, macunucua samiitianijojua*

<sup>17</sup> Canaa jaara tiuquiiioseequiaarini, Jesuuri pohuatasaaquiaari Lázaro tari cuatro juuca shocotejoriquiaa raaco na niasaanujiniji. <sup>18</sup> Betania tiacaari catecaja Jerusalén tiacajiniji. (Nareja media hora paa jaara ritia rucuaneyareni). <sup>19</sup> Naaratej, queraatia narta Judiocuacaari quiojoquiaari Marta, María tiajinia, nojori na cumanijianura na nanu nuhuaji. <sup>20</sup> Marta jaara niishiquiaari Jesu shusha tiuquiriquiaa, nojuajaari nocua tohuataquiaari canaa na naacunura. Majaari María niniu quiriquiaa cutara. Tiajiniaja quiriiri. <sup>21</sup> Canaacua Marta tiuquishacari, nojuajaari Jesu sequeree:

—Jiyaniijianaa, ¡quiaa jaara niya quiquianu, cua nanu maara shaajeyaquiquianu! <sup>22</sup> Naajaa, janiyari niishiyani quiaa jaara Pueyaso secojore, Pueyasoori quia secojosano tojiniutianiya.

<sup>23</sup> Jesuuri Marta sequeree:

—Quia nanucuaja samiitianutaniuhua.

<sup>24</sup> Martaari na riucuaaree:

—Taaquiriirinij, janiyacuaaja niishiyani nojuajaari samiitianutaniuhua macunucua samiitiasacariuhua jiya puequesacari.

<sup>25</sup> Jesuuri na sequeree:

—Janiyacuaajaari macunucua samiitianijojuani. Cante cucua tiuujiani, jaara cusoyare, naajaa, samiitianutaniuhuari. <sup>26</sup> Cante cucua tiuuri saminio na quishacarijiani, nojuaja jaara cusoyare, naajaa, majaari na shaajenu quiniutianiya seetanujuanaa. ¿Quiaate cua sequesanoocua tiuya Martanaa?

<sup>27</sup> Nojuajaari Jesu riucuaaree:

—Jaa, Jiyaniijianaa. Janiyacuaja niishiyani quiaari Cristo, Pueyaso Niyanu, noj tariucuaaanu sequesaaquiaari mijiria niriqianotej.

<sup>28</sup> Naa Marta riucuanu nuhuaji Jesutej, na tiajinia quiaarohuari. Naa María numaama sasacasuhuari:

—Niishitiojona jati quiya. Quia sequeyano nocua quia quianura.

<sup>29</sup> Naa María tojishacari Marta sequesantej, ritia sanequeeri. Jesuucua nimiaari tee canaa quiriquiaacuajani. <sup>30</sup> Jesuuri juhuanojuaja maja na tiuquitianu quiquiaari canaa cuno tiacajinia. Canaari tiaca shurucua quiriquiaajaani tee Marta naacuquiaari canacuajani, Jesuucua na nishacari. <sup>31</sup> Nojori cumanijianaa pueya jaara María niquiquiaari ritia tohuataano tiajiniji, nojoriiri na jyaniquiaari na nanu raajinia nujuquenuucua quiaa naasucua. Naaratej, nojoriiri na nuhuaji quiaaree.

<sup>32</sup> María tiuquishacari canaacua, Jesu cariquimiaaji mojuquetaseeri. Naa na sequereeri:

—Quiaa jaara niya quiquianu, cua nanu maara shaajeyaquiquianu.

<sup>33</sup> Jesu niquishacari María nujuqueyano, mariyata nata quiniaa nujuqueyanojuhuj, Jesuuri nojori taraajetaree. <sup>34</sup> Jesuuri pueya nequesotaree:

—¿Tee na niasaarucuaani?

Pueyari Jesu sequeree:

—Miji, Jiyaniijianaa. Quia niquiquii. Niya niasaarucuaano.

<sup>35</sup> Jesuuri nujuquese. <sup>36</sup> Tii quiniaa Judiocuaca niquishacari Jesu nujuqueyano, tama sequetooreejaarijia:

—¡Nia niquiri! Jiyanohua Lázaro panijiaquiiri.

<sup>37</sup> Noojiaqueya cuno pojorijinijinioori sequeriquiaajuhuj:

—Jesu jaara cariojuaru namijia jeecacanucuaa, maara Lázaro naataniquianujuhuj maja na shaajenura.

### *Jesu samiitianishacari Lázaro*

<sup>38</sup> Jesuuri jiyanohua na taraajenuta raa jiyajiria catecanoquiaari, canaajuhuj. Raari puereetuca saajiata mishiquiosano quiriquiaa. <sup>39</sup> Jesuuri pueya sequeree:

—¡Saajia nia ruutiniri tamocora!

Martaari Jesu sequeree:

—¡Jiyaniijianaa, cuatro juuca tari na shoconujiya! ¡Tari mocuaatia jaaniuya naasucua!

<sup>40</sup> Jesuuri Marta sequeree:

—Janiyacujaja tari quia sequereeni, quiaa jaara cua sequesanoocua tiuuri, quiaari Pueyaso cumaacata cua miishano niquiniutianiya.

<sup>41</sup> Jiyacaritij, pueyari saajia ruutinirii tamocora. Jesuuri jiyocuacaanu mauree. Naa Pueyaso sequereeri:

—Cua Quenaa, quia timitiaanijia. Quiaari tari cua sequesano tojiriucuaacujaja. <sup>42</sup> Janiyari niishiyani quiaari pueyaracaanu cua tojiquiaa. Janiyari naa quia sequereeni, niya quiniaa pueya niishiniuria quiaari mijiria cua jiyaroquiaari.

<sup>43</sup> Naa Jesu sequenu nuhujitij, jiyanohua na rupaa paaretareeri. Naa sequereeri:

—¡Lázaronaa, quia tohuatama!

<sup>44</sup> Macuuri tariucua saminio tohuatamaa. Na juaashiquiaca, na niohuacaari jiuniocosano quiriquiaajaa. Na nacaari puetunu na jiquiocotajanaa mishiquiosano quiriquiaajuhuj, toquerauta morosano. Jesuuri pueya sequeree:

—Nia saacatare, cuara rucuanera.

### *Judiocuaca camarucua rojotoosacari na monura Jesu* (Mt 26.1-5; Mr 14.1-2; Lc 22.1-2)

<sup>45</sup> Naa Jesu samiitianishacari Lázarotej, queraatia narta Judiocuacaari nocua tiuquiaari, noo pojori canapuate Maríacua nijioquiaari na cumanijianuracujani. <sup>46</sup> Noojiaqueya cuno Judiocuacajinijinioori Fariseocuacaacua quiojoquiaari nojori pohuatanura Jesu miishano. <sup>47</sup> Naaratej, Fariseocuaca, pueyacuara secojonaa jiyaniijianucuanio, nojoriiri rerejoquiaari puetunu Judiocuaca camarucujanaa. Nojoriiri sequetuquiaari:

—¿Taa pa miiniutianiya? Cuno pueyanoori queraatia casaa miiquiaa na cumaacata pueya niquiara. <sup>48</sup> Paa jaara nareja na shanacure naa na miiniuriatej, ¡puetunu pueyajanaari na pueyara quiniutianiya, nocua nojori tiushacari! Nojoriiri na jiyaniijiaara socua na jiyatenutianiya. Naaratej, pa jiitianaa Romano pueyari pocua nijionutianiya Pueyaso Secojoua tia nojori niyartanura, pa pueya na puecoonurajuhuj.

<sup>49</sup> Caifásri tii quiriquiaajuhuj. Nojuajaari canaa pueyacuara secojonaa jiyaniijiajanaa quiriquiaa cuno marijiaara. Jiyacaritij, nojuajaari narta camarucua sequeree:

—¡Niaquiiri niishiyashijiaca seetanujuanaa! <sup>50</sup> ¿Majateeri nia niishiniu? Maninia cutaraari niquiriyatu pueyano cusonura pa niti, maja najuhuana puetunu pa pueyajanaa puecoosaanura.

<sup>51</sup> Caifás sequesanoori maja tama na sequesanojuaaja quiquiaari. Pueyacuara secojonaa jiyaniijiajanaa na quishacari, Pueyasoori naa na pohuaterree taa Jesu cusonutaniya puetunu Judiocuacaacuarajanaani.

<sup>52</sup> Seetanujuanaari. Jesuuri maja cusoriquiano quiquiaari saaja Judiocuacaacuara. Nojuajaari cusoriquiano quiquiaari puetunu tariucua Pueyaso saquiriojosano pueyapueecuarajanaajuhuj, tee tiqiyocua niaquejonu na muerasurano quiyacuajani. Nojuajaari cusoriquiano puetunu cuno pojorijianaa na rerejotenura, jatiqui na quituniuria juhua niquiriyatu maanu. <sup>53</sup> Naacuaajitij, cuno juucajiniji, cuno Judiocuaca camarucuaari rojotooriquiaa taa nojori monutaniya Jesuni.

<sup>54</sup> Nocuaji, Jesuuri maja tari na rucuanefonu quijia narta Judiocuaca niqiara. Cunora tamaquiria canaa jiyataquiaariiri. Canaari nata quishii cariigua jiya shuriucua tamonu tiacajiniani. Cuno tiaca sesa quiquiaari Efraín.

<sup>55</sup> Jaara quera quiquiaari tari canaa queranacusacari Pascua juucara, queraatia pueyari quiojoriquiaa Jerusalén tiacajiniara tama na tiacajinijijaaja. Nojoriiri quiojoquiaari juhuacarijia nojori jeenucuanura na cuaqueya nojori puecoosacari tama na seyajaaja nojoriicua. Nojoriiri naa miiquiaari jiyanooshano nojori quiniuria Pueyaso niqiara, taa supuetana Moisés rootaquiaaricuajani. Nojoriiri naa miiquiaari juhuajaniya nojori queranacunura Pueyaso niqiara Pascua juuca. <sup>56</sup> Pueyari tii Jesu pajenuuriquiaa. Pueyaso Secojoua tiajinia nojori quishacari, nojoriiri tama nequesoreetooriquiaajaaja:

—¿Taa nia sequeyani? ¿Pa queranacunujinia niniutianiyatenojotij, maja soj?

<sup>57</sup> Pueyacuara secojonaa jiyaniijianucua, Fariseocuacanio, nojoriiri tari pueya rootaquiaari, tamonu pueyano jaara niishiri tee Jesu quiyani, cuara nojori numooteera nojori quiatenura Jesu.

## 12

### *María totasacari na shanohua jaanutaja Jesuucua (Mt 26.6-13; Mr 14.3-9)*

<sup>1</sup> Seis juuca jaara cureeriquiaajaa Pascua juucara, canaari jiyacari Jesuta Betania tiacajinia quiaareeni, Lázaro quijia tiacajinia, teyano Jesu samiitiani quiaaricuajani. <sup>2</sup> Cuno tiacajinijinio Jesu rupuenaa pueya timitiasacari Jesu, nojoriiri sumatunu quiaari nojori miaquenuunura cuno niucua Jesuta. Martaari miaquesano patootariquiaa pueyara. Lázaroori Jesuta miaquenuuriquiaa narta masuusano pueyata, canaatanio. <sup>3</sup> Jiyacaritij, Maríari Jesuucua pataree na shanohua jaanutaja. Cunoori “nardo” jiyaniishano nataujiniji shipinishano quiquiaari. Jiyanoohua queraatia cumaneecata masesano. Puereetuca motiiquio cajiniocua puecariquiaari cuno shanohua jaanutaja. Maríari Jesu niohuacaacua na totaree. Na nuhuaji, na sacuanijiarohua na muecacataari. Puetunu tiacojuanaari shanohua jaanuriquiaa. <sup>4</sup> Naa María miishacaritij, niquiriyatu canaajinijinio Jesu saquiriojosano pueyanoori juaarii. Nojuajaari Judas Iscariote quiriquiaa, na nuhuaji Jesu quiatequiaari na paraani. Nojuajaari naa sequeree:

<sup>5</sup> —¿Casaara cuno shanohua jaanutaja niqutioyaquishaaree queraatia cumaneecarani, casamijiuniucua pueya niqutiojosocoriquianoni? ¡Jaara

masenu panishaare, maara niqutiosaare juhua niquiriyatu marijiara pueyano poonijionu sami!

<sup>6</sup> Naa Judas sequesacaritij, majaari seetanujuanaa na taraajenu quiriquiaa casamiijiuniucua pueyacua. Naa sequereeri saaja cumaneecaacua jiaatiaja na quiniuucua, nohuasejojua na quishacari. Judasri cumaneeca quiquico cojuatana quijia puetunu canaarajanaa. Naacujitij, nojuajaari tiji nohuasejojua, pueya niqutiojosanojiniji canaara. <sup>7</sup> Jesuuri saaja Judas sequereeri:

—Nareja quia niquiri. Nojuajaari nio shanohua jaanutaja cojuataja pueyaracaanu, juhuacarijia na jeenucuatajara cua cuaqueya, pueya niaaquishacarijia janiya raajinia, janiya jaara mosaareni. <sup>8</sup> Casamiijiuniucua pueyari pueyaracaanu niaata quiriquiano cutara. Saniniuujia, janiyari maja pueyaracaanu niaata quiriquianoni.

*Pueyacuara secojonaa jiyaniijanucua roojotoosacari Lázaroocua*

<sup>9</sup> Queraatia canaa Judiocuacaari niishiquiaari Jesu Betania tiacajinia quiriquiaa. Cunora, nojoriiri nocua quiojoquiaari na niqiniuucua, Lázaro niqiniuucujuhua, teyano Jesu samiitianiquiaaricujani. <sup>10-11</sup> Jesu samiitianiniuucua Lázaro, queraatia canaa Judiocuacaari Jesuucua tiuququiaari, na pueya nojori quiniuria. Cunora, canaa pueyacuara secojonaa jiyaniijanucuaari roojotooquiaari Lázaro na motunurajuhua.

*Juhua Jiyaniijajanaa Jesu tiuquishacari Jerusalén tiacajinia  
(Mt 21.1-11; Mr 11.1-11; Lc 19.28-40)*

<sup>12</sup> Cuno queraatia pueya, tari Jerusalén tiacajinia quiriquiaacuaa Pascua juucara queranacunurani, nojoriiri niishiquiaari Jesu tariqui tiuquiniutianiyajuhua. <sup>13</sup> Nocujaji, nojoriiri tucuru piyotaree. Na nuhuaji, nijiyareeri Jesu naacunuucua, na tucuru shiiniotanuuriquiaari. Naa nacooriquiaajaariuhua nojori shuquiritiasacari Jesu:

—¡Pocujaji Tacuna! ¡Pocujaji Tacuna! ¡Cuaara shuquiriaatia quiiria pa Jiyaniijia, teyano Pueyaso jiyaroquiaari pocuacujani! ¡Nojuacuajaari Israel pueya Jiyaniijajanaa!

<sup>14</sup> Jesuquiiri jiyacari burro niquiojua riuriatamaa. Tari na nijinia cajiriquiaari, taa tariucuacaanu Pueyaso Rupaajinia naajiotasano quiyacujani. <sup>15</sup> Naa sequeyari:

“¡Sión tuhuananuucua quiniaa pueyanaa, maja puerenu! ¡Nia niquiri! ¡Nia Jiyaniijia cumaji niya niaacua! ¡Burro niquiojua nijinia cajiyari!”

<sup>16</sup> Jiyacaritij, majaari canaa niishiniu quiriquiaa naa canaa tiuquitishacari canaa Jiyaniijia Jesutej, canaari nio tariucuacaanu Pueyaso Rupaajinia naajiotasano tohuateeriquiaani. Pueyaso jaara Jesu samiitianiquiaariuhua, canaari jiyacari shusha niishiquiaarini cuno naajiotasanoquiiri Jesujiniji quiquiaari.

<sup>17</sup> Cuno pueya, Jesu samiitianishacari Lázaro niquiquiaarini, nojoriiri pueya pohuatariquiaa taa Jesu jiiquiooquiaari Lázaro na raacoji na tohuatanurani. <sup>18</sup> Queraatia pueya niishishacari naa Jesu miishano na cumaacatatej, nojoriiri Jesu naacunuucua nijiyaree. <sup>19</sup> Nocujaji, Fariseocuacaari tama sequetooriquiaajaaja:

—¡Canaacuajaari cunora nia sequequiaani pa morejanaa! ¿Niaate na niquiya? ¡Puetunu pueyajanaari cuno pueyanoocua pacuree, na pueya nojori quiniuria!

*Grecia jiyajinijinio taucuaca pocoojonu panishacari Jesuta*

<sup>20</sup> Grecia jiyajiniinio taucuacaari Jerusalén tiacajiniara nijioquiaariji-uhuj Pueyaso niquiara nojori queranacunuunura Pascuara. <sup>21</sup> Cuno pojoriiri canaa cojinia Felipeecua catecanoquiaari. Felipeeri Betsaida tiacajiniinio quiquiaari. Cunoori Galilea jiyajinia tiaca. Cuno Griegohuari Felipe sequeturee:

—Pueyanonaa, canaa quia Jiyaniijia Jesuta pocoojonu paniyani.

<sup>22</sup> Jiyacaritij, Felipeeri Andrés sequeeseo cuno pojori sequesano nojuaja. Na nuhuaji, Andrésri Felipeta quiaaree Jesuucua. Nojoriiri Jesu pohuataseejuhuaj. <sup>23</sup> Jesuuri naa nojori riucuaaree:

—Quiarijiani, tama janiyajaarijia mosaanutaniya pueya nitini. <sup>24</sup> Seetanujuanaa nia sequeyanijia, sohuajajau jaara raama jataaquishaare, pueyaracaanu niquijajau quiniutianiyari. Saniniuujia, jaara natasaare juhua na moquenura, saaja moritianutaniyari queraatia na muetunura. <sup>25</sup> Naajuhuj, cante tama na cuaqueyajaaja panijia puerani, nojuajaari puetunu shaajenutaniyajanaa. Saniniuujia, cante tama na cuaqueyajaaja panitiaja na tojiniuria janiya mijiriani, nojuajaari pueyaracaanu shuquiriaatia rishijiaara jiyatesaanutaniya. <sup>26</sup> Cante quiria poonijionu paniyani, cuara seetanujuanaa cua tojijia quiriia. Tee cua quiniutianiyacuaani, cua tojitiajacaari tii quiniutianiyajuhuj. Cua Queeri cua tojijiaa timitianutaniya. ¡Jiyanohua maninia nojori miiniutianiyajaariuhuj!

### *Jesu pohuatasacari nojuaja mosaanutaniya*

<sup>27</sup> Quiarijiani, janiyari jiyanohua tacayani. ¿Casaa cua sequeyarini? ¿Janiyate sequeya soj: “Cua Quenaa, maja naquiya cua miitiniu”? Maja. Maja naa cua sequenu quiniutianiya. Janiyacuajaari cunora niqiaari mijiriani. <sup>28</sup> ¡Cua Quenaa, janiya cuara miishiiriaqui taa quia paniyacuajani, pueya niishiniuria quiaari jiyanohua maninia!

Jiyacaritij, Pueyasoori tojishaaree pocuaano jiyocuacaanuji. Naa Neyanu sequereeri:

—Janiyacuajaari naa niishitirii pueyani, pueyaracaanu quia miishacari cua panishano. Janiyari socua pacutenutaniuhua pueya niishitiniuni, quiaa jaara nojoriicuara mosaare.

<sup>29</sup> Cuno pueya, canaata tii quiriqiaa Jesutani, nojori tojishacari Pueyaso pocuaano, nojoriiri sequeturee:

—¡Miacanacuaja cuno tojishaareeni!

Tamasacaari saniniuujia sequereecujua:

—¡Pueyaso serucujaja nocua pocuaareno!

<sup>30</sup> Saniniuujia, Jesuuri canaa sequeree:

—Cuno rupaa niaa na tojiriini, majaari quiria na quiniu quiriqiaa. Cunoori nia tojishocoriquiano quiriqiaa, nia niishiniuria cua Queeri cua tojiquiaa cua secojosacari nojuaja. <sup>31</sup> Quiarijiani, mijiria quiniaa miishacari naquiya janiya, nojoriiri saniniuujia saniitiosocoriquiano jiyatesaaree tari. Naajuhuj, mijiria jiyaniijia Sesaacaari jataaanutaniyajuhuj, maja cumaacaraca na quiniuria socua. <sup>32</sup> Janiya jaara nujuaretasaareni, janiyari puetunu pueyapuejanaa nijiotenutaniya cucuani. Nojoriiri juhua jaatiasaanutaniya cucua, cucua nojori tiuuniuria, nojori ruuretanura janiya soj.

<sup>33</sup> Naa Jesu sequesacaritij, canaa niishitiriiri taa pueya monutaniya nojuajani. <sup>34</sup> Tii quiniaa pueyari na riucuaaree:

—Canaacuaajaari tariucuacaanu Pueyaso Rupaajiniji niishiyani, Pueyaso Jiyarosocoriquiano Cristoori pueyaracaanu rishiriquiano cutara. Quia-janiyarijiataj, ¿casaara quia sequeyarinijia, Pueyaso Jiyarosanoori nujuare-tasaanutaniya tii na cusonura? ¿Canteeri cuno pueyanoni, quiaa na sequeya Pueyaso Jiyarosanooni?

<sup>35</sup> Jesuuri nojori sequeree saaja:

—Janiya, nioojia cuhuatanani, janiyari niaata quiniutianiyajaara ru-paquijiani. Nocua nia tiuuri juhuacarijia, ninishiqui quiaquishacarijia. Cante ninishiqui rucuanajojuani, nojuajaari maja na niishiniu tee na quiaani. <sup>36</sup> Nioojia cuhuatanaacua nia tiuuri, niaata cua quishacarijia, seetanujuanaa cuhuashiqui quijiaca nia quiniuria.

Naa Jesu sequenu nuhuaji cuno pojoritij, quiacuahuari. Nojoriicuaaji ja-maashiiri.

### *Judiocuaca tiuyaquishacari Jesuucua*

<sup>37</sup> Jesuuri jiyanoohua queraatia jiyajeneta na cumaacata miishano miiquiaari pueya niquiara. Nojoriiri saaja nocua tiuyaquiquiaari.

<sup>38</sup> Naacuajitij, tariucuacaanu Pueyaso sequenu panishano caminiujiunia Isaías pohuatasanoori tohuateequiaari, nojuaja jaara naa sequequiaari:

“Jiyaniijianaa, ¿cante canaa pohuatasanoocua tiuuriini, canaa pohuatasacari quia Jiyarosocoriquianojinijini? ¡Shaaqui! ¿Cante niishiriijaaniuhuj, jiyajeneta casaa nojori niquishanoori seetanujuanaa quia cumaacata miishano quiriquiaa? ¡Shaaqui!”

<sup>39</sup> Naacuajitij, majaari nojori naata tiuuniu quiquiaari Jesuucua. Isaíasri naa naajiotaquiaarijuhuaj:

<sup>40</sup> “Pueyasoori nojori jiyateree juhua nimishitiuria, maja nojori niquiniuria na namijiata. Nojori niishitija cushitioreejaariuhuj, maja nojori niishiniuria nojori jiuujiata. Naa nojori miiriiri maja nojori taca-tonura nojori jiuujia, cua jiyanooniuria nojori, quiarinio pueyara cua jataniyaquiniuria nojoriujuhuaj”.

<sup>41</sup> Supuetana Isaíasri naa caminiujuiquiaari Pueyaso niishitishano nojuajatej, Jesu na niquiniuucua na shacantuuca cumaacajinia quiyano. Naa na pohuatasacaritij, nojuajaari juhuacarijia Jesujiniji pohuatariquiaa.

<sup>42</sup> Naajaa, queraatia narta Judiocuacaari Jesuucua tiuquiaari. Queraatia canaa jiyaniijianucuaari nocua tiuquiaarijuhuaj. Cuno jiyaniijianucuaari maja na pohuatanu quijia pueya niquiara, Jesuucua tiuujia nojori quishacari. Nojoriiri na pohuataaquijia, Fariseocuaca na pueretusacari, Fariseocuaca mariqui nojori tenujureeri maja socua nojori tiuquitianura Pueyaso secojojua tiacajinia. <sup>43</sup> Nojoriiri saaja narta pueya shuquiritiasano pueya quiniu panijia, maja Pueyaso shuquiritiasano cutara.

### *Pueya tojitiaaquiniuucua Jesu sequesano, nojoriiri saniitiosaariquiano*

<sup>44</sup> Jesuuri jiyanoohua na rupaa paaretaree. Naa sequereeri:

—¡Cante cucua tiuuriini, majaari saaja na tiuuniu cucua! ¡Cua Queecua tiuuriijiaariuhuj, cante cua jiyaroquiaaricuaajani! <sup>45</sup> ¡Cante cua niquiriini, nojuajaari cua Jiyarona niquiriijuuhuj! <sup>46</sup> Janiyari mijiria niquiaarini cua cuhuatanura niajaniya. Naacuajitij, cante cucua tiuuriini, majaari tari na quiniu ninishiqui. <sup>47</sup> Pueyano jaara cua rupaa tojiriquia najuhanaj, janiyajanaari maja nocuara cua saquiriojotanu quiniutianiya na saniitiosaanura. Majaari cua niniu quiquiaari mijiria, pueya cua saniitionura. Janiya cutaraari niquiaarini nojoriicuaaji cua tacunura. <sup>48</sup> Cante cua ruuretaja saajani, cua sequesano tojiyaquiyajaariuhuj, nojuajaari tari nocuara saquiriojotana jiitiaa na saniitiosaanura. Nojoriiri cua sequesano cutaraari tama



nojoriicuara saquiriojotariquianojuaaja nio jiya puequesacari. <sup>49</sup> Cua pohu-  
 atasanoori maja tama cua niishishanojuaaja. Cua Jiyarona cua Quecuajaari  
 cua niishitiquiaa casaa cua sequenutaniyani, mariyata casaa cua niishitio-  
 jonutaniyani. <sup>50</sup> Janiyari niishiyani cante cua Que rupaa tojijiani, nojuajaari  
 pueyaracaanu quijia quiniutianiya cutara. Naaratej, janiyari seetanujuanaa  
 saaja na sequesano caminiujuquiaani, taa na niishitiquiaa janiyacujani.

## 13

### *Jesu jeequejosacari na saquiriojosano pueya niohuaca*

<sup>1</sup> Jesuuri canaa na saquiriojosano pueyata rerejoquiaari Pascuaacuara  
 juucajinia. Jesuuri jiyacari niishiquiaari tari quiquiaariiri quera na tiu-  
 jiasacari canaa mijiria, na Queecua na tacanuhuara. Nojuajaari canaa  
 paniriquiaajaa, taa canaa na paniquiaari pueyaracaanucujani, mijiria na  
 quishacari canaata.

<sup>2</sup> Cuno niucuaja, Jesuuri canaa na saquiriojosano pueyata miaqueriquiaa.  
 Sesaacaari tari Judas Iscariote niishitirii noojiajinia, nojuaja cuara Jesu  
 quiateera na paraa, na mosaanura. Cuno Judasri tamonu Simón jiyanis-  
 hano pueyano niyanu quiquiaari. <sup>3</sup> Jesuuri niishijia nojuaja seetanujua-  
 naa Pueyasojiniji niquiaari. Naajuhuj, nojuajaari niishiquiaari, na Que  
 Pueyasoori na jiyatequiaari Jiyaniijiarajanaa, puetunu casaa jitianajanaa  
 na quiniuria. Niishiriquiaajaariuhua nojuajaari quera na Queecua tacanu-  
 taniuhua. <sup>4</sup> Jiyaniijiajanaa na quishacari, naajaa, nojuajaari miaquejajiniji  
 sanequiaari. Na tucuaque toque jocuareeri. Na nuhuaji na cajiniocua  
 camarucuteree cuaqueya tuujutajaari. <sup>5</sup> Na nuhuaji, mohuaca shuurii  
 tohuatashijiniaari. Canaa niohuaca jeequejoriquiaari juhua tiaco seru. Na  
 nuhuaji, na sacuanijiariquiaajaariuhuj na cajiniocua na camarucutesano  
 cuaqueya tuujutajata.

<sup>6</sup> Na jeequenu panishacari Simón Pedro niohuaca, Pedroori saaja Jesu  
 sequeree:

—Jiyaniijianaa, ¿taa quia miyani? ¿Quiaateeri cua niohuaca jeequenu-  
 taniya?

<sup>7</sup> Jesuuri Pedro riucuaaree:

—Quiarijiani, majaari quia niishiniu casaara naa cua miyani. Naajaa,  
 quiaacuaja na nuhuaji niishiniutianiya.

<sup>8</sup> Pedroori Jesu sequeree:

—¡Cua Jiyaniijianaa, janiya cutaraari maja quenaaja cua shanacunu  
 quiniutianiya cucua quiajaniya, cua niohuaca quia jeequenura!

Jesuuri na riucuaaree:

—Janiya jaara quia niohuaca jeequejiyaquirini, majaari cua pueyano quia  
 quiniu quiniutianiya.

<sup>9</sup> Simón Pedroori na sequeree:

—Jaara naa quiritij Jiyaniijianaa, maja saaja cua niohuaca jeequenucuara-  
 jaj! ¡Quia jeequerejuhua cua juaashiquiaca, cua nacanio!

<sup>10</sup> Jesuuri na sequeree:

—Cante shusha nanajani, saaja na niohuacaari jeequeshiya cutara. Na  
 cuaqueyacuajaari tariucua jeequesano quiya. Puetunu niajanijajanaari tari  
 jeequejosano quiyacuaja. Saa niquiriyatujuaari jeequesoo quiya saniniuu-  
 jia.

<sup>11</sup> Jesuuri tari niishiquiaari cante na quiatenutaniya na paraani. Nocuaji  
 sequeriquiaari: “Niquiriyatu pueyanoori jeequesoo quiya cutara”.

<sup>12</sup> Canaa niohuaca na jeequejonu nuhuaji, Jesuuri na toque cushiriohua. Miaquejajinia cajiriohuari. Canaa nequesotareeri:

—¿Niaate niishiya casaara naa cua jeequejoree nia niohuacani?  
<sup>13</sup> Niaacuajaari cua sequequiaa “Niishitiojonata”, nia “Jiyaniijiatanio”. Seetanujuanaa nojuacuajanijia, taa nia jiyaniquiquiaa janiyacujani.  
<sup>14</sup> Naaratej, janiya jaara jeequejoree nia niohuacacuaani, nia Jiyaniijia cua quishacari, nia Niishitiojonajuhuj, naa nia miiriquia niarta Pueyaso muerasujuhuj. <sup>15</sup> Janiyari naa miiriini, cua niishitiojonura nijaniya, naa nia miitioonurajuhuj taa cua miirii nijaniyacuaani. <sup>16</sup> Seetanujuanaa nia sequeyanijia, seruuri maja socua tojishano quijia na camarnujiniji. Naajuhuj, jiyarosano pueyanoori maja socua tojishano quijia na jiyaronajiniji. <sup>17</sup> Naa jaara cua rootasano niishiri, niaari shuquiriaatia quijiaca quiniutianiya niaa jaara na tojijiaca quiri.

<sup>18</sup> Shusha cua sequesano nijaniyani, cunoori maja puetunu nijaniyara-nojuanaa. Janiyacuajaari niishiyani canapue cua saquiriojoquiaarini, taamueca pueyate nijaniyani. Naacuajitij, tariucuacaanu Pueyaso Rupaaajinia janiyajiniji naajiotasanoori tohuateenutaniya. Naa sequeyari: “Tama cuata miaquenajaarijia cua paracara quirii”.

<sup>19</sup> Janiyari juhuacarijia nia toyani. Naacuajitij, cua pohuatasano jaara tohuateere, niaari niishiniutianiya janiyari seetanujuanaa Pueyaso Niyanuni. <sup>20</sup> Seetanujuanaa nia sequeyanijia, cante cua jiyaramiquishano pueya tojijiani, nojuajaari cua tojiyajuhuj. Cante cua tojijiara quiriini, nojuajaari cua Jiyarona tojijiara quiriijuhuj.

*Jesu pohuatasacari, Judascuajaari na paraa na quiateriquiano*  
 (Mt 26.20-25; Mr 14.17-21; Lc 22.21-23)

<sup>21</sup> Naa Jesu sequenu nuhuaji canaatej, jyanohua na taraajenuta naa canaa sequereeri:

—Seetanujuanaa nia sequeyanijia, niquiriyatu nijaniyajinijinioori cua paraa cua quiatenutaniya.

<sup>22</sup> Canaari jiyacari tama niqutiooreejaanijia. Majaari canaa niishiniu quiriquiaa canajiniji naa Jesu sequeriquiaani. <sup>23</sup> Jiyacaritij, janiyari na shuriucuaji cajiriquiaa miaquenuujajiniani, na panishano pueyano cua quiniuucua. <sup>24</sup> Naaratej, Simón Pedroori cua mashiniquirii sanaa cua nequesotanura Jesu, canajiniji naa na sequereeni. <sup>25</sup> Naarate janiyari Jesuucua tatereeni, jiyasohuaja cua nequesotanura nojuaja. Janiyari naa na sasacareeni:

—Jiyaniijianaa, ¿canteeri naa quia miiniutianiyani?

<sup>26</sup> Jesuuri cua riucuaaree:

—Janiyari pan rau piquiojonutaniya caacajiniani. Cana cua niqutionutaniyani, nojuajaari cuno.

Jesuuri jiyacari pan rau piquiojoree. Judas Iscariote na niqutiooreeri. Nojuajaari tamonu Simón jyanishano niyanu. <sup>27</sup> Judas masesacari cuno pan rau, Satanásri noojiajania tiuquiquii. Jesuuri jiyacari Judas sequereeri:

—Cuno, quiaa na niishiriojiya miiniuni, quiocua ritia miirinioj.

<sup>28</sup> Canaa na saquiriojosano pueya nata miaquenuuriquiaani, majaari quenaaja canaa niishiniu quiriquiaa casaara naa Jesu sequeree Judasni. <sup>29</sup> Judasri canaa cumaneeca cojuatana quijia. Naaratej, noojiaqueya canaajinijinioori jyaniriquiaani Jesu naasucua na jiyaroriquiaa socua casaa na masenura canaa queranacunuutajara, casamiijiuniucua na niqutiojonura cumaneeca soj. <sup>30</sup> Judas jaara masequiaari Jesu niquticosano pan, jiyacari tohuataqueeri. Tariucua niucuaari quiriquiaa.

*Jesu rootasano quiarinio*

<sup>31</sup> Judas tohuatanu nuhuaji, Jesuuri canaa sequeree:

—Quiarijia cua miishanojiniji, janiyari maniniuhuaqueetasanutaniyani. Pueyasoori jiyanoehua maniniuhuaqueetasanutaniyajuhuj, naa cua miishanojiniji. <sup>32</sup> Pueyaso jaara maniniuhuaqueetasaaare naa maninia cua miiniuucuatej, nojuajaari cua jiyatenutaniya cumaacaraca quijia cua quiniuria na shuriucua. Quera naa cua miiniutianiyari. <sup>33</sup> Quiquihuanijoyuanaa, janiya rupaquijia niaata quiniutianiyajaarani. Taa cua sequecanu parta Judiocuacacuaani, janiyari naa nia sequeyajaaniuhuj. Niaari cua pajenuunutaniya juucua. Majaari nia naata quianu quiniutianiya cucua, tee cua quianutaniyacuaani. <sup>34</sup> Quiarijia nia niishitiriiria nio quiarinio rootasano. Nia tojiri. ¡Panitioojuaca nia quiri! Naatej, taa cua paniquiaacuaa nijaniyani, naa nia panitioorejuhuaj. <sup>35</sup> Niaa jaara naa panitioojuaca quiri, puetunu Pueyaso niishiyashijiaa pueyajanaari naacuaji niishiniutianiya, niaari cua tojitiajaca pueya.

*Jesu pahuatasacari Pedro nocuaji seetanutaniya*

(Mt 26.31-35; Mr 14.27-31; Lc 22.31-34)

<sup>36</sup> Simón Pedroori jiyacari Jesu nequesotaree:

—Jiyaniijiana, ¿tee quia quianutaniyani?

Jesuuri na riucuaaree:

—Tee cua quianutaniyacuaani, majaari quia naata nuhuajiniu janiya. Naajaa, quiaari na nuhuaji quiariquiano.

<sup>37</sup> Pedroori na sequeree:

—Jiyaniijiana, ¿casaara quia sequeyarini, quiarijia cutara maja cua naata quianu quiata? Janiyacuaja tama cua cuaqueyajaaja tarinijiotaaree quiocuarani.

<sup>38</sup> Jesuuri na riucuaaree:

—¿Naatee? ¿Quiaate tama quia cuaqueyajaaja tarinijiotaaree cucuara? Janiyari seetanujuanaa quia sequeyani: juhuaquenu panishacari caacaraja niunijiaquishacarijia, quiaari jiyacari cucuaji seetanu pacutejonutaniya tari.

**14***Jesuuri juhua nuu Pueyasooocua*

<sup>1</sup> Jesuuri naa canaa sequeree socua:

—Maja nia tacaaniu, pueyanaa. Nioojia nia cajitiri. Saaja Pueyasooocua nia tiuuri. Cucua nia tiurijiuhuj. <sup>2</sup> Cua Que tiaari puereetuca. Queraatia quiquioori tii quiya. Cunora, janiyari coteenu nia puetanutaniyani, niaacuaji cua jeenucuanura nia quijiara. Jaara naa quiyaquiritij, janiya maara nia sequeyaquirini janiya nia puetanutaniyani, niaacuaji cua jeenucuanura. <sup>3</sup> Cua jeenucuanu nuhuaji nia quiquiora, janiyari niaacua tacatenu-taniuhuaani, cua rijionuhuaa nijaniya, cuata nia quiniuriajuhuaj tee cua quiniutaniyacuaani. <sup>4</sup> Niaacuajaari cua quiquiojiniara neteja nuu niishiya, tee cua quianutaniyacuaani.

<sup>5</sup> Tomásri Jesu sequeree:

—Jiyaniijiana, ¡maja canaa niishiniu quenaaja tee quia quiaani! ¿Canaatucua taa cuno nuu niishirini, quiaa na sequeyani?

<sup>6</sup> Jesuuri na riucuaaree:

—Janiyacujaari cuno nuuni, Pueyasooocua nia quianura. Janiyacuajaari seetanujuanaa Pueyaso Rupaani. Janiyari pueya samiitianijiajuhuaj. Majaari pueya naata Pueyaso rupuenu tamajaaja. Saaja janiya cutaraari pueya

rupueteja Pueyasoni, nojori tiuushacari cucua. <sup>7</sup> Niaa jaara seetanujuanaa cua niishiquiaaricuaa, niaa maara cua Que niishirijiuhuaaj. Seetanujuanaa, niaari tari na niishiyacuaja. Niaari na niquiquiaajuhuaaj.

<sup>8</sup> Felipeeri na sequeree:

—Jiyaniijianaa, quiaa jaara canaa niqutiri quia Que Pueyaso, canaacua panaatia quiriohuani.

<sup>9</sup> Jesuuri Felipe riucuaaree:

—Felipenaa, janiyacujaruhua pueyaracaanu niaata quiquiaa juucuani. ¿Majateeri juhuanojuaja quia niishiniu janiya? Cante cua niquiquiaani, cua Que niquiquiaajaariuhuaaj. ¿Casaara quia sequeya cua niqutiniuria cua Que niajaniyarini? <sup>10</sup> ¿Majateeri quia tiuuniu cucua cua sequesacari quiajaniya, janiyari cua Que jiuujiajinia quiyani, cua Queeri saniniuujia coojiajinia quiyacuaja? Canaari maja rimiajatani. Nio, cua sequesano niajaniyani, cunoori maja tama cua niishishanojuaja. Cua Que, coojiajinia quiyani, nojuajaari na panishano miitiquiaa janiya. <sup>11</sup> Cucua nia tiuuri cua sequesacari niajaniya, janiyari cua Que jiuujiajinia quiyani, cua Queeri saniniuujia coojiajinia quiyacuaja. Niaa jaara cua sequesanoocua tiuuniu paniyaquiri, cucua nia tiuuriqui na cumaacata cua miiniuucua nia niquiara. <sup>12</sup> Seetanujuanaa nia sequeyanijia, cante cucua tiuujiani, nojuajaari puetunu cua miishanojuanaa miiniutianiyajuhuaaj. Cua tacasacariuhua cua Que shuriucua cua quiniuhuara, cucua tiuujiaacari cua cumaacata seetanujuanaa socua jiya-jeneta casaa miiniutianiya cua miishanojiniji. <sup>13</sup> Seetanujuanaa nioojiajinia cua quishacari, janiyari niaara miiniutianiyani puetunu nia masesanojuanaa nia secojosacari cua Que. Naacujitij, pueyari cua Que timitianutaniya, nojori niishishacari cua Queeri jiyanohua maninia miijia. <sup>14</sup> Nioojia rupueetosacari coojiata, janiyari puetunu nia masesanojuanaa miiniutianiya niaarani.

*Jesu sequesacari, nojuaja Pueyaso Sohuanu jiyaronutaniya mijiria*

<sup>15</sup> 'Niaa jaara seetanujuanaa cua panijiaa quiri, niaari cua rootasano tojtiajaca quiniutianiya. <sup>16</sup> Naajuhuaaj janiyari cua Que secojonutaniyani, niaacua na jiyaronura tamonu cua niti mijiria, nia cumaquiriquiano. Nojuajaari pueyaracaanu niaata quiriquiano. <sup>17</sup> Nojuajaari Pueyaso Sohuanu, seetanu rupaa jiiitianajanaa. Pueyaso tojiyashijiaca pueyari maja na naata cuno Sohuanu na jiiitianu, nojori niquiyaquiniuucua nojuaja, na niishi-tiuyaquiniuucua nojuajuhuaaj. Niaa cutaraari na niishijiaca. Nojuajaari niaata quiyacuaja. ¡Pueyaracaanu nioojiajinia quiriquianojaariuhuaaj!

<sup>18</sup> 'Majaari seetanujuanaa cua tiujianu quiniutianiya niajaniya juhua japueyojuaca nia quiniuria. Janiyacuajaari tacatenutaniuhuani niaata cua quiniuhuara. <sup>19</sup> Pueyaso tojtiaashijiaca pueyari quiari naataja cua niquiyaquiniutianiya socua. Niaa cutaraari cua niquijiaca quiniutianiya. Samiitianijiojua cua quiniuucua, niaari pueyaracaanu quijiaca quiniutianiyajuhuaaj. <sup>20</sup> Jiyacaritij, niaari niishiniutianiya janiyari cua Que jiuujia rupuejani, niaari coojia rupuejacajuhuaaj. Janiyari saniniuujia nioojiajinia quijiani. <sup>21</sup> Cante cua rootasano niishijiani, nojuaja jaara na tojjia quirijiuhuaaj, nojuajaari cua panijia cutara. Cante cua panijiani, cua Queeri na panijia quiniutianiyajuhuaaj. Janiyari na panijia quiniutianiyajuhuaaj. Janiyari cua panijiaacua niniutianiyani, seetanujuanaa na niishiniuria janiyari nata quiyani.

<sup>22</sup> Canaa cojinia Judasni, nooj, Judas Iscariote sesaanucuatej, nojuajaari Jesu nequesotaree:

—Jiyaniijianaa, ¿casaara saaja canaacua quia niniutianiyarini, maja puetunu mijiria quiniaa pueyacujanaa?

<sup>23</sup> Jesuuri na riucaaree:

—Cante cua panijiani, cua rootasano tojijijaariuhua. Cua Queeri jiyano pueyano panijia. Naaratej, canaari nocua niniutianiyani, noojiajinia canaa quiniuria, canaa quiquiora canaa jiyatenura nojuaja. <sup>24</sup> Saniniuujia, cante cua paniyaquijiani, jiyano pueyari cua rootasano tojiyashijiacajuhua. Puetunu cua rootasanojuanaa, niaa na tojiquiaani, cunoori maja tama cua niishishanojuaja. Cunoori cua Que niishitishano janiya, cante mijiria cua jiyaroquiaaricujani.

<sup>25</sup> 'Janiyari puetunu niojuanaa nia pahuataani, niaata cua quishacarijia mijiria. <sup>26</sup> Cua Que jiyarosocoriquiano na Sohuanuuri nia cumaquiriquiano. Nojuajaari nia niishitiojonutaniya puetunu cua niishitionu panishanojuanaa nijaniya. Naajuhua, nojuajaari nia niishitiniutianihua puetunu tari cua pahuatasano nijaniyajanaa.

<sup>27</sup> 'Janiyari nioojia cajitiniutianiyani. Janiyari coojia nianutaniya nioojiajiniani, juhuajaniya quijia nia quiniuria taa cua quiyacuaani. Naacuajitij, niaari seetanujuanaa juhuajaniya quiniutianiya. Mijiria quiniaa pueyari maja na niishiniu cumanijianu juhua janiya. Naaratej, maja nia tacaani. Majaari puerenujuhua. <sup>28</sup> Tari nia sequereecuajanjia: "Janiya quera quiohuani. Janiyari na nuhuaji tacatenutaniuhuan niaata cua quiniuria". Niaa jaara seetanujuanaa cua panijia quiriquia, niaa maara shuquiriri nia niishishacari janiyari cua Queecua quiohuani. Nojuajaari seetanu Jiyaniijianaa cutara janiyajiniji. <sup>29</sup> Janiyacuajaari juhuacarijia nio nia sequyani. Naacuajitij, niaa jaara niquiri tohuateyano cua sequesano nijaniya, niaari niishiniutianiya puetunu cua pahuatasanojuanaari seetanujuanaa.

<sup>30</sup> 'Majaari puera cua pocoojonu quiniutianiya niaata tari. Cua Paraca cucua quenaacoya tarini, na miiniuria janiya taa na paniyacujani. Nojuajaari Pueyaso tojitiaashijia jiyaniijia. Pueyaracaanu cua Que Pueyaso tojijia cua quiniucua, cua Paraca maara naquiya cua miyaquiri janiya jaara cucua na shanacuyaquirini. Na cumaacaari maja na shocotanu cua cumaaca cutara. <sup>31</sup> Naajaa, na miishanojiniji janiya, puetunu pueyajanaari niishiniutianiya, janiyari puetunu cua Que sequesanojuanaa tojijiani, na panijia cua quiniucua.

'Nia sanetare. Niiquiji pa quiaare.

## 15

*Jesu pueyari juhua Jesu cashacucua, Jesu quishacari juhua neyona*

<sup>1</sup> Jesuuri naa pahuataquiaari socua canaa niquiara:

—Janiyari juhua uva jiyonani, cua Que natau. <sup>2</sup> Cua pueyari juhua cua cashacucua. Tamonu cua cashacucujinijinio jaara muetuyashijia quiri, cua Queeri na piyotaja. Teyano cua cashacucujinijiniote muetujua saniniunijia, cua Queeri na nacareetaja, socua queraatia na muetunura. <sup>3</sup> Nia tojiniucua cua rootasano, niaari tari juhua nacareetasano quiya. <sup>4</sup> Pueyaracaanu coojia nia rupuere, taa cua rupueya nioojiacuaani, niaa mariqui juhua uva cashacucua piyotasaareeri. Jaara neyonaacuaji piyotasaare, majaari na naata muetunu tari. Naajuhua, majaari nia naata muetujua quiniu, niaa jaara coojia rupueyashijia quiri.

<sup>5</sup> 'Janiyari juhua nia jiyonani. Niaari juhua cua cashacucua. Cante coojia rupuejani, taa cua rupueya nijaniyacuaani, naacuajitij, niaari juhua queraatia muetujuaca quiniutianiya. Cucuaji rupatejacaari maja na naata casaa

miiniu janiyaju. <sup>6</sup> Cante cua rupueyashijiani, nojuajaari taraatia miishaanutaniya juhua uva cashacucua piyotasano neyonajiniji, tamocora jaquerootasano. Jaara sorere, tatucuasaarohuari manijinia quejoosocoriquiano. Tii cateyari.

<sup>7</sup> 'Niaa jaara coojia rupuejaca quiri, niaa jaara cua rootasano tojjiaca quirijiuhuj, puetunu nia panishanoocuarajanaa nia secojore Pueyaso. Nojuacuajaari nia masesano miiniutianiya. <sup>8</sup> Naa cua Que miishacari nia panishanotej, niaari juhua queraatia muetujuaca quiniutianiya. Naacuajitij, cua Queeri jiyanoehua timitiasaanutaniya. Naacuajitij, niishishaanutaniya-jaariuhua niaari cua tojtiajaca pueyaniyotua. <sup>9</sup> Janiyari nia panijiani, taa cua Que paniya janiyacuaani. Coojia rupuejaca nia quiri pueyaracaanu, cua panishano pueya nia quiniuria. <sup>10</sup> Janiyari cua Que panishanoni, pueyaracaanu cua miiniuucua na panishano. Naajuhuj, niaa jaara cua rootasano tojjiaca quiriquia, niaari pueyaracaanu cua panishano pueya quiniutianiyajuhuj.

<sup>11</sup> 'Janiyari naa nia sequeyani, shuquiriaatia quijiaca nia quiniuria, taa shuquiriaatia quiija cua quiyacuaani. Naacuajitij, niaari tojetaarucujanaa shuquiriaatia quijiaca quiniutianiya. <sup>12</sup> Cua tojiri. Nioori cua sequesano niaara: "¡Pueyaracaanu panitiojuaca nia quiriquia, taa cua paniya nia-janiyacuaani!" <sup>13</sup> Cante tama na cuaqueyajaaja panitiaja na cusonura na rupuenaa nitini, naa miijia cutaraari seetanujuanaa jiyanoehua narta pueya panijia. <sup>14</sup> Niaa jaara cua sequesano miijica quiri, niaari cua rupuenaa. <sup>15</sup> Naacuajitij, majaari cua sequenu quiniutianiya tari niajaniya cua seyata. Pueyano seruuri maja na niishiniu casaa poonijosano na camarnu miiquiaacuaani. Janiyari quiaritia nia sequeya cua rupuenaatani, cua niishitiniucua niajaniya puetunu cua Que sequesanojuanaa janiya. <sup>16</sup> Majaari nia saquiriojonu quiquiaari janiya. Janiya cutaraari nia saquiriojoquiaarini cua jiyaramiquiniuria niajaniya, cua panishano nia miiniuria. Naa nia miishacari cua panishanotej, niaari juhua queraatia muetujua naana quiniutianiya. Puetunu nia miishanojuanaa cua cumaacatani, cunoori pueyaracaanu rishijia quiniutianiya. Cuno miishanoori maja najuhuanaj. Naaratej, cua Queeri puetunu nia masesanojuanaa nia niqutionutaniya seetanujuanaa coojia rupuejaca nioojia quishacari. <sup>17</sup> Janiyari cunora nia sequeyani: "Pueyaracaanu panitiojuaca nia quiri".

*Pueyaso niishiyashijica pueyari Pueyaso muerasu niqiniu paniyashijica*

<sup>18</sup> 'Pueyaso niishiyashijica jaara nia niqiniu paniyaquiriquia, majaari nia tacaaniu. Cuno pojoricuajaari naa cua niqitiuniu paniyaquiijiacacuaa. <sup>19</sup> Niaa jaara Pueyaso muerasu quiyaquiriquia, Pueyaso niishiyashijica maara nia panijica quiriquia, taa nojori paniquiaa narta Pueyaso niishiyashijiacacuaani. Niaari Pueyaso niishiyashijica quiquiaarijihuj. Naajaa, janiyari nojori tajiniji nia saquiriojoquiaarini, cua pueya nia quiniuria. Cunora, Pueyaso niishiyashijicaari nia niqiniu paniyaquiiquiaa, maja tari nia quishacari juhua nojori. <sup>20</sup> Majaari nio cua sequesano nia niyasetanu: "Seruuri maja socua tojishano na camarnujiniji". Naaratej, Pueyaso niishiyashijica jaara naquiya cua miiquiaacuaa, niaari naquiya miishaanutaniyajuhuj. Naajuhuj, nojori jaara cua rootasano tojiquiaacuaa, nojoriiri nia rootasano tojjiaca quiniutianiyajuhuj. <sup>21</sup> Nojoriiri naa naquiya miiniutianiya niajanijatej, cua pueya nia quiniucua, nojori niishiyaquishacari cua Jiyarona.



<sup>22</sup> 'Janiya jaara niaquiquiaari nojori cua pohuatanura Pueyaso rupaani, nojoriicuara maara saquiriojotaaquishaare, sesa nojori miishanojiniji. Nojori niquiara cua pohuatanuucua Pueyaso rupaa, majaari nojori naata sequenu quiniutianiya: "Cua jiyanoori. Maja cua niishiniu quiquiaari quia rootasano". <sup>23</sup> Cante cua niquiniu paniyashijiani, nojoriiri cua Que niquiniu paniyashijiajuhuaj. <sup>24</sup> Sesa nojori miishano maara nojoriicuara saquiriojotaaquishaare, janiya jaara cua cumaacata miyaquiquiaari nojori niquiarani. Janiyari socua jiyajeneta casaa miiioquiaari cua cumaacata nojori niquiarani, socua tamasaca miishanojiniji. Naajaa, naa nojori niquishacari cua cumaacata cua miishanotej, nojoriiri saaja cua niquitiuniu paniaquijiaca, cua Que niquitiuniu paniaquijiacaariuhuaaj. <sup>25</sup> Naajaa, naa nojori miiniuucua janiyatej, tariucuacaanu Pueyaso Rupaajinia naajiotasano janiyajiniiri tari tohuateeree. Naa sequeyari: "Janiyari najuhuana niquiniu paniaquishiyani".

<sup>26</sup> 'Janiya jaara cua Que shuriucua quishuhuani, janiyari tiji Pueyaso Sohuanu jiyaronutaniya mijiriani. Nojuajaari seetanu rupaajanaa jiiitaja. Nojuajaari janiyajiniji niishitiniutianiya pueya. <sup>27</sup> Niaari janiyajiniji pohuatanutaniya pueyajuhuaaj, pueyaracaanu cuata nia quiniuucua shushajanaa cua cotesacari pohuatanu Pueyaso rupaa.

## 16

<sup>1</sup> 'Janiyari naa nia numooteyani maja nia tarinitianura cucua tiuuniu niaa jaara naquiya miishaare. <sup>2</sup> Cua pueya nia quiniuucua, majaari nia shanacusaanu quiniutianiya nia tiuquitianura Pueyaso secojojuu tiacajinia. Pueya jaara nia puecoorejuhuaj cua tojitiajaca nia quiniuucua, nojoriiri jiyaniutianiya nojori maninia miya Pueyasora, naa nojori miishacari. <sup>3</sup> Nojoriiri naa miiniutianiya niajanijatej, nojori niishiyaquiniuucua janiya, cua Quejuhuaj. <sup>4</sup> Janiyacuajaari juhuacarijia naa nia sequeyani. Naacuajitij, niaa jaara naquiya miishaare, niocua jiyacari niishiri janiyacujaari tari naa nia sequequiaarini. Majaari quenaaja nio cua sequenu quijia niajaniya, pueyaracaanu niaata cua quiniuucua.

### *Pueyaso Sohuanu miishanojiniji pohuatasano*

<sup>5</sup> 'Quiarijiani, janiyari cua Jiyaronaacua quiohuani. Quiarijiani, majaari quenaaja niajanijajiniio nequesotanu janiya: "¿Tee quia quiohuarini?" <sup>6</sup> Janiya jaara nia sequereeni janiya quianutaniuhuani, niaari saaja taraajee. <sup>7</sup> Seetanujuanaa nia sequeyanijia, socua maninia quiniutianiya niaaraari, janiya jaara quiaarohuani. Janiya jaara quiaaquiyarohuani, majaari Pueyaso Sohuanu ninu quiniutianiya niaacua, na cumaquiniuria niajaniya. Janiya jaara quiaarohua cutarani, janiyari niaacua na jiyaronutaniyani. <sup>8</sup> Mijiria na tiuquishacari, nojuajaari pueya jiuujajinia poonijionutaniya, nojori na niishitiniuria nojoriiri seetanujuanaa sesa miijiaca. Nojori niishitiniutianiyajaariuhua nojoriiri na naata sesa miyashijiacara jiyatesaanu. Naajuhuaaj, nojori niishitiniutianiyari Pueyasoori na naata jiyanooni nojori, maja Sesaacata nojori cojiritiasaanura mani quiquiojinia quejoonu. <sup>9</sup> Seetanujuanaa, Pueyasora, nojoriiri sesa miijiaca nojori tiuyaquiniuucua cucua. <sup>10</sup> Jiyocuacaanu cua tacasacariuhua cua Queecua, majaari socua nia niquiniu quiniutianiya janiya. Naacuajitij, Pueyaso Sohuanuuri pueya niishitiniutianiya, janiyari seetanujuanaa cua Que Pueyaso jiyanootijia cucua tiuuriquiano pueyani. <sup>11</sup> Cua shocotasacari Sesaaca, Pueyaso Sohuanuuri pueya niishitiniutianiya, nojoriiri saniitiosaanutaniya.

Naacuaajitij, nojori jiyaniijia Satanás jaara tari saniitiosocoriquiano quiy-acuaa, nojoriiri saniitiosaanutaniyajuhuaaj, cucua nojori tiuyaquiniucua.

<sup>12</sup> 'Janiyari queraatia jiitiaajaa cua pohuatanura nijaniyani. Naajaa, majaari cua pohuatanu quiniutianiya quiarijia nijaniya. Juhuanajuaja maja nia naata na niishiniu. Pueraruhua. <sup>13</sup> Pueyaso Sohuanu tiuquishacari niaacua, nojuajaari nia niishitiniutianiya puetunujanaa cutara. Nojuajaari seetanu rupaaajanaa jiitiaaja. Nojuajaari maja tama na niishishanojuaja na niishitiniu quiniutianiya nijaniya. Puetunu na tojishanojuanaa janiyajini-jini, cuno nia niishitiniutianiya cutaraari. Nia niishitiniutianiyajaariuhua taate nio pa quishacari nuhuaji quiniutianiya. <sup>14</sup> Niaari cua shuquiri-tianutaniya, nojuaja niishitiniucua nijaniya janiyajiniji. <sup>15</sup> Puetunu cua Que jiitiasanojuanaani, cunoori cua casaajuhuaaj. Naaratej, janiyari nia sequereeni, Pueyaso Sohuanuuri janiyajiniji masenutaniya cua jiitiasano niaara, na caminiujiuniuria nijaniyarajuhuaaj.

<sup>16</sup> 'Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuuhuaaj.

*Nia taraajenuuri jatanutaniya shuquiriaatia nia quiniuria*

<sup>17</sup> Jiyacaritij, noojiaqueya canaa na saquiriojosano pueyajinijinioori tama nequesoreetooreejaaja:

—¿Casaa na sequenu paniyarini, nojuaja jaara sequeree: “Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya”? ¿Casaa na sequenu paniyajaaraniuhua na sequesacari: “Pasa naataja na nuhuaji niaari cua niquiniutianihuacuuhuaaj”, na sequesacarijuhuaj: “Cua Queecua quianutaniuhuanijia”? <sup>18</sup> Naajuhuaaj, ¿casaa na sequeyarini na sequesacari “quiarijiani”, mariyata “pasa naataja na nuhuaji”? ¡Majaari pa niishiniu casaaraqui na sequeyatejaj!

<sup>19</sup> Jesuuri tari canaa nequesotanu panishano nojuaja niishirii. Cunora naa canaa sequereeri:

—Janiyari nia sequereeni: “Niaari quiarijia cua niquiya, na nuhuaji cutara maja socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuuhuaaj”. ¿Niaatejaara niojiniji nequesoreetoya tama nijaniyajaaja? <sup>20</sup> Seetanujuanaa nia sequeyanijia, niaari nujuquenu-taniya. Niaari taraajeconutaniyajuhuaaj. Jiyacaritij, Pueyaso niishiyashijia-caari taquiya shuquiriaatia quiniutianiyacuaa nijaniyajiniji. Naajaa, cuno nia taraajenuuri jatanutaniya shuquiriaatia nia quiniuria. <sup>21</sup> Naajaariuhuaaj, maaji ranu panishacari na mueya, jiyanoehua naquiya miyari. Naajaa, mueya na ranu nuhuaji, naquiya na miiniu niyajetaqueeri, na mueya na timitiasacari. <sup>22</sup> Quiarijiani, niaari naa taraatia quiyajuhuaaj. Naajaa, niaacua tacatenutaniuhuanijia. Niaari jiyanoehua shuquiriniutianiya nia niquishacari janiya. Majaari quenaaja tamasa pueya naata quiniutianiya cuno nia shuquiriniu jaariutianu.

<sup>23</sup> 'Jiyacaritij, majaari socua nia nequesotanu quiniutianiya janiya. Seetanujuanaa nia sequeyanijia, cua Queeri nia niqutionutaniya puetunu nia masesanojuanaa nojuaja, seetanujuanaa coojia rupuejaca nioojia quishacari. <sup>24</sup> Majaari juhuanajuaja nia secojonu Pueyaso seetanujuanaa taa cua sequeyacujani, seetanujuanaa coojia rupuejaca nioojia quishacari. Naa nia secojoretej. Niocua nia panishano niquitiosaare, seetanujuanaa shuquiriaatia nia quiniuria.

*Jiyaniijia Jesuuri Sesaaca shocotana*

<sup>25</sup> 'Janiyari pueyaracaanu nia pohuataquiaa miriquini. Janiya quera nia pohuatanutaniya maatia seetanujuanaa cua Quejiniji cutarani. <sup>26</sup> Jiyacaritij, niaari cua Que secojonutaniya coojia rupuesano nia quishacari. Jiyacaritij, majaari na panishaanu quiniutianiya cua shiniujiuniuria cua Que, na tojiniuria niajaniya. <sup>27</sup> Cua Quejanaacuajaari nia panijia, nia paniniuucua janiya, nia niishiniuucujuhua janiyari na jiyarosaroni. <sup>28</sup> Niaacuajaari niishiya, janiyari cua Que shuriucujaji niquiaarini pueyanora cua quiniuria mijiria. Quiarijia saniniuujia, janiyari nio jiya tiujianutaniyani, cua Queecua cua quianuhua.

<sup>29</sup> Naa Jesu sequesacari canatej, canaari na sequereeni:

—Quiarijia cutara, quiaari maatiajanaa sequeree, maja miriqui.

<sup>30</sup> Quiarijia cutara, canaari niishiyani quiaari puetunu casaajanaa niishijia. Majaari quenaaja na panishaanu pueya nequesoreenura quiajaniya. Naacuajitij, canaari niishiyani, quiaacuajaqui Pueyaso Jiyarosano.

<sup>31</sup> Jesuuri canaa sequeree:

—¿Naatee? ¿Niaate shusha cucua tiuyaruhua? <sup>32</sup> Tari quenaacoyari naquiya cua miishaanura. Seetanujuanaa quiarijiaari. Niaari cucujaji cocuatasaanutaniya puetunujuanaa. Niaari tamajaaja cua tiujianutaniya. Naajaa, seetanujuanaa maja cua quiniu tamajaaja. Cua Quecuajaari cua cojiyani.

<sup>33</sup> Janiyari puetunu niojuanaa nia sequeyani, nioojia nia cajitiniuria nio cua pohuatasanoocua nia tiushacari. Mijiria nia quishacari, niaari seetanujuanaa naquiya miiniutianiya. Naajaa, janiyacujaari mijiria jiyaniijia shocotareeni. Naacuajitij, nioojia nia cumaquiri tamajaaja.

## 17

### *Jesu secojosacari na pueyacuara*

<sup>1</sup> Naa Jesu sequenu nuhuajitij, jiyocuacaanu na mausacari, naa na Que sequereeri:

—Cua Quena, janiya nio juuca naquiya miishaanutaniyani taa quia sequequiaaricujani. Cua tojiniuucua quiajaniya, quia Jiyarosano quia jiyatere pueya timitiasano cua quiniuria. Naacuajitij, janiyacu saniniuujia quia jiyatere pueya timitiasano quia quiniuriani, tojetaarucujanaa maninia mijia quia quiniuucua. <sup>2</sup> Quiaacuajaari quia cumaaca cua niquitioquiaari puetunu pueyajanaa cua jitianura. Naacuajitij, janiyari saniniuujia nojori jiyatenutaniya pueyaracaanu quijiaca nojori quiniuriani, teyano pojori quia niquitioquiaari janiyacujani. <sup>3</sup> Nojori niishishacari saaja quiajaniyari seetanujuanaa Pueyasocuja, naajuhua, nojori niishishacari janiyari quia jiyarosaroni, naacuajitij, nojoriiri pueyaracaanu quiijara quiniutianiya shuquiriaatia.

<sup>4</sup> 'Janiyari tari tucuatere quia sequesano cua miiniuria mijiriani. Naa cua miiniuucua puetunu quia panishanojuanaatej, pueyari quia timitiaa. <sup>5</sup> Jiya shipiniyaquishacarijia, janiyari jyanohua shuquiriaatia quijia quiquiaari quia shuriucuan, jiyaniijiajanaa cua quishacari. Cua Quena, naa quiijara cua jiyaterohua quiarijiani, quia shuriucua cua quiniuhua.

<sup>6</sup> 'Quia niquitiosano pueya janiya, quia saquirojosano pueya quia niishiyashijia pueyajiniinioni, quiarijia cutara, nojoriiri niishiya cante quiajaniyani. Nojoriiri quia niishiya, nojori niquiniuucua cua mijiosano quia cumaacata, cua pohuatasano quiajaniyajiniji nojori tojiniuucujuhua. Nojoriiri quia pueya quijia. Quiaari saniniuujia nojori cua niquitioquiaari. Nojoriiri quiarijia quia rupaa tojitajaca cutara. <sup>7</sup> Nojoriiri niishiya puetunu cua jitiananojuanaani, cunoori quia niquitiosano janiya. <sup>8</sup> Janiyari quia

rupaa rootacanu nojorini, quia niishitishano janiyani. Nojoriiri seetanujuanaa nocua tiuurii. Nojoriiri seetanujuanaa niishiya, janiyari quia shuriucujaji niquiaarini. Niishitiuyajaariuhuj, janiyari seetanujuanaa quia jiyarosani.

<sup>9</sup>Janiyari cunora nojoriicuara quia secojiyani, seetanujuanaa quia pueya nojori quiniuucua. Majaari cua secojonu quia niishiyashijiaca pueyacuara. Saaja noo pojoriicuara quia secojiyanijia, quiaa na niqutioquiaari janiyatej. <sup>10</sup>Naaratej, puetunu cua jiitiasano pueyajanaari quia pueyajuhuj. Mariyata puetunu quia jiitiasano pueyajanaari cua pueyajuhuj. Nojori tiuuniucua cucua, nojoriiri jatanishano pueya quiniutianiya. Naacuajitij, queraatia pueyari cua timitianutaniyajuhuj, naa nojori niquishacari cua cumaaca.

<sup>11</sup>Majaari puera cua tarishiniu quiniutianiya mijiria. Cua pueya cutaraari mijiria quiniutianiyaajara, janiya jaara quiaarohua quiocuani. Jiyanohua maninia cua Quenaa, nojori quia cojuare quia cumaacata, teyano pojori quia niqutioquiaari janiyacujani. Naa quia jiitiare nojori, jatiqiu nojori quiniuria juhua niquiriyatu jiuujiaraca, taa pa quiyacuaani. <sup>12</sup>Mijiria cua quishacari nojoritia, janiyari nojori cojuajani quia cumaacata, quia rupaacua tiuujiaa nojori quishacari. Majaari quenaaja niquiriyatu nojorijiniinio cua juurequetenu quiquiaari. Saa noojuaari juurequecanu cutara, tariucua juurequeriquiano quijiacuajatej. Naacuajitij, tariucuaaanu quia rupaajinia naajiotasanoori tohuatecanu.

<sup>13</sup>Quiarijiani, janiyari quiocua quianutaniyani, tee quia quiyacuaani. Niya cua quishacarijia, janiyari nio sequeya nojori niquiarani, nojori jiitiana nura cua shuquiriniujuhuj, tojetaarucujanaa shuquiriaatia quijiaca nojori quiniuriajuhuj. <sup>14</sup>Janiyari nojori niishitiocanu quia rupaani. Naa nojori tojishacari quia rupaatej, quia niishiyashijiaca pueyari nojori niquiniu paniyaquiquiaa. Cua pueya nojori quishacari, nojoriiri maja saaja mijiria quijiaca na quiniu tari, taa janiyacuaani. Naaratej, mijiria quijiaca pueyari nojori niquiniu paniyaquiquiaa. <sup>15</sup>Naa cua secojosacari quiarijia nojoriicuaratej, majaari cua sequenu quiajaniya nojori quia rijionura niqiuji. Saaja quia secojiya cutaranijia, nojori quia cojuanura Sesaacaacujaji. <sup>16</sup>Nojoriiri maja mijiria quijiaca na quiniu tari cua pueya nojori quishacari, taa nio jiyajiniinio cua quiaquiyacuani. <sup>17</sup>Quia rupaa quia poonijiotere nojori jiuujiajinia, tojetaarucujanaa quia tojijiaa nojori quiniuria. Quia rupaari seetanu rupaajanaa cutara. <sup>18</sup>Quiaacuajaari cua jiyaroquiaari mijiria quiniaa pueya niquiara cua pohuatanura quia rupaa. Naajuhuj, janiyari cua pueya jiyaramiquiyani mijiria quiniaa pueyacuajuhuj. <sup>19</sup>Quia tojijiaa nojori quiniuria seetanujuanaa, janiyari tama cua cuaqueyajaaja jiyateya puetunu quia panishanojuanaa miijia cua quiniuriani. Naacuajitij, nojori niishishacari seetanu rupaajanaa janiyajiniji, nojoriiri tojetaarucujanaa maninia miijiacara jatanishaanutaniya.

<sup>20</sup>Majaari saaja cua secojonu nio pojoriicuara, tariucua quia tojitiajacuaani. Janiyari secojiyajuhuj na nuhuaji cucua tiuuriquiano pueyacuara, noo pojoriicuara cante cucua tiuuniutianiya na nuhuajini, nojori tojishacari nio pojori pohuatasano janiyajiniji. <sup>21</sup>Cucua tiuuriquiano pueyacuara secojiyanijia puetunu cucua tiuniaajanaa cuara quiiria jatiqiu, juhua rupuetootesano, taa pa quiyacuaani, cua Quenaa. Naatej, taa cua quia quiiojiajiniacuani, quiaari saniniuujia cojiajinia quiyacujua. Nojori jiuujia cuara juhua rupuetootesano quiiria poojatajuhuj, mijiria quiniaa pueya niishiniuria, quiaari cua jiyaroquiaari mijiria. <sup>22</sup>Janiyari nojori cumaquiya quia Sohuanutani, quia niqutiosano janiyacuaa, juhua

niquiriyatu jiuujiaraca nojori quiniuria, naatej, taa niquiriyatu jiuujiaraca pa quiyacuaani. <sup>23</sup> Quiaari coojiajinia quiya. Naajuhuaaj, janiyari nojori jiuujiajinia quiyajaacuhuaaj. Naacuaajitij, paari nojoritia juhua niquiriyatu quiniutianiyani. Naacuaajitij, mijiria quijiacaari niishiniutianiya, quiaari seetanujuanaa mijiria cua jiyaroquiaari. Nojoriiri niishiniutianiyajuhuaaj, quiaari jiyanoehua cua pueya panijia, taa quia paniya janiyacuaani.

<sup>24</sup> Cua Quenaa, cuno pueya quia niqutiosano janiyani, janiyari paniyani nojori quiniuria cuata quia shuriucua, nojori niquiniuria cua shacantuuca cumaaca. Quiaari cuno cumaaca cua niqutioquiaari pueyaracaanu quia paniniuucua janiya, jiya shipiniyaquishacarijia. <sup>25</sup> Tojetaarucuajanaa sesa miyashijia cua Quenaa, mijiria quijiaca pueyari maja na niishiniu quia-janiya. Janiya cutaraari quia niishiyani. Nio cua pueyari niishiyajuhuaaj, janiyari seetanujuanaa quia jiyarosononi. <sup>26</sup> Janiyari nojori niishitioceanucuaajani cante quiajaniyani. Janiyari naa pueyaracaanu nojori jiuujiajinia niishitiniutianiya quiajaniyajinijini, seetanujuanaa nojori niishiniuria quia-janiya. Naacuaajitij, taa quia paniya janiyacuaani, nojori cuara cuno paniniu jiiitaara nojori jiuujiajiniajuhuaaj. Naa nojori niishishacari quia-janiyatej, janiyari nojori jiuujiajinia quiniutianiyajuhuaaj.

## 18

### *Na paraa quiasacari Jesu*

*(Mt 26.47-56; Mr 14.43-50; Lc 22.47-53)*

<sup>1</sup> Naa Jesu secojonu nuhuaji na Quetej, nojuajaari canaa puetaaree Cedrón surocono taquijiria. Tii quiquiaari olivo cuhuariquia. Cuno cuhuariquiaari matacosano quijia puetunu na shocuajanaa. Jesuuri tii tiuquitiamaa canaa, na Que Pueyaso na secojonura. <sup>2</sup> Jesuuri tii jiiitiquiaari canaata na rerejonura. Naacuaajitij, na paraa na quiateriquiano Judasri cuno cuhuariquia niishiquiaarijiuhuaaj. <sup>3</sup> Canaa quishacari tii, Judasri jiyacari soldadoehua tiuquitiasee, Pueyaso Secojojua tia cojuanaa pueyano. Cuno pojoriiri pueyacuara secojonaa jiyaniijianucua jiyaramiquishano pueya quiriquiaa, Fariseocuaca jiyaramiquishano pueyano. Nojoriiri pueya na miaquetaja pooriquiaa, nocuaji na nunutaja jayoco, samarinio. <sup>4</sup> Jesuuri tari puetunujuanaa niishiriquiaacuaja taa nojuaja miishaanutaniyani. Naaratej, nojuajaari cuhuariquia matacainijini tohuatamaa, na paraa na naacunura. Na naacusacari nojori, nojori nequesotareeri:

—¿Cana nia pajeyani?

<sup>5</sup> Na paraari na riucuaaree:

—Canaa Nazaret tiacajinijinio Jesu pajeyani.

Jesuuri nojori riucuaaree:

—Janiyacuaaja nojuajani.

Jesu tacartana Judasri cuno pojoritia quiriquiaa tii. <sup>6</sup> Jesu sequesacari, “Janiyacuaaja nojuajani”, na paraari na nijiniara pojotuquee. <sup>7</sup> Jesuuri socua nojori nequesotarohua:

—¿Cana nia pajeyani?

Nojoriiri socua pacuterohua sequenu:

—Canaa Nazaret tiacajinijinio Jesu pajeyani.

<sup>8</sup> Jesuuri nojori riucuaaree:

—Janiyacuaaja tari nia sequereeni, janiyacuaaja nojuajani. Niaa jaara cua pajeya, nareja nia niquiri nio, cua cojiniaani.

<sup>9</sup> Naacuaajitij, tama Jesu sequesanojuaarjia tohuateequiaari, nojuaja jaara naa na Que sequesquiaari: “Majaari quenaaja niquiriyatu pueyano



cua juurequetenu quiquiaari quia niqutiosano pueyajinijinio janiya”.  
<sup>10</sup> Jiyacaritij, Simón Pedroori tama na mueruujuaaja shitiaree na shuucuaji shiyano. Nata, pueyacuara secojonaa jiyaniijia seru numoco jaatereeri, na miaquetajara na numoco. Cuno seru sesa quiquiaari Malco. <sup>11</sup> Jesuuri Pedro sequere:

—Na co jiniacuma quia shiiriohua quia mueruu. Cua Que jaara paniya naa cua miishaanura naquiyatej, ¿janiyatucua nio pojoriria tama cua cuaqueya-jaaja tarinitiaaquiri naquiya cua miishaanurani? ¡Taaquiririnij!

*Anás nequesoreesacari Jesu*

*(Mt 26.57-58; Mr 14.53-54; Lc 22.54)*

<sup>12</sup> Jiyacaritij, na paraari Jesu quiaree. Nojoriiri quiquiaari Romano soldadohua, nojori jiyaniijiajuhuaj, Pueyaso Secojoua tiaco cojuanaa pueyano. Nojoriiri Jesu morojoturee. <sup>13</sup> Na nuhuaji, nojoriiri coteenu na jaatucutaquiaari Anáscua, canaa pueyacuara secojonaa jiyaniijia Caifás cama na quiniuucua. Cuno marijara, Caifásri pueyacuara secojonaa jiyaniijiajanaa quiriquiaa. <sup>14</sup> Cuno Caifáscuajaari tari naa sequequiaari narta Judiocuaca camarucua: “Maniniacuajaari niquiriyatu pueyano mosaanura puetunu pueya nitijanaa, maja najuhuaana puetunu pueyajanaa puecoosaa-nura”.

*Pedro coteesacari seetanu Jesujiniji*

*(Mt 26.69-70; Mr 14.66-68; Lc 22.55-57)*

<sup>15</sup> Simón Pedroori cuata Jesu nuhuajiriquiaa tucuacaanuji. Janiya cutaraari pueyacuara secojonaa jiyaniijiajanaa niishishano pueyano quiquiaarini. Naacuaajitij, janiyari tiuquinishaaree cutara Jesutani, jiyaniijia tia shocua mataca jiniacuma. <sup>16</sup> Saaja Pedro cutaraari tohuatayaji jateese. Jiyaniijiajanaa niishishano pueyano cua quiniuucua, janiyari tohuatayaji cojuana niyacoota pocoojoseeni, Pedro na tiuquininiuriajuhuaj. <sup>17</sup> Cuno niyacoori Pedro nequesotaree:

—¿Majate quiajaniya cuno Jesu pueyajinijiniojuhuaj?

Pedroori na riucuarere:

—¡Maja janiya!

<sup>18</sup> Shiniquiaari jiyacari jaanujuriquiaa. Nocuaaji cuno jiyaniijia seyari Pueyaso Secojoua tiajinia cojuanaa pueyata mani naatequiaari. Nojoriiri na jitiuriquiaa. Pedroori nojoritia tii quiriquiaajuhuaaj. Mani jitiuriquiaari.

*Pueyacuara secojonaa jiyaniijia nequesoreesacari Jesu*

*(Mt 26.59-66; Mr 14.55-64; Lc 22.66-71)*

<sup>19</sup> Jiyacaritij, pueyacuara secojonaa jiyaniijia Anásri Jesu nequesoreenu coteeree canaa na saquiriojosano pueyajiniji. Jesu niishitiojosanojiniji Jesu nequesoreerejaariuhuaaj. <sup>20</sup> Jesuuri na sequere:

—Janiyacuaajaari pueyaracaanu puetunu pueya niquiarajanaa maatia niishitiojoquiaani. Janiyari pueyaracaanu tiquiyocua Pueyaso secojonuu-juaca tiacajiniaqueya niishitiojoquiaa pueyani. Naajuhuaaj, janiyari niya Jerusalén tiacajinia Pueyaso Secojoua tiajinia niishitiojoriquiaani, tee puetunu parta Judiocuacajanaa rerejoquiaacuajani. Majaari quenaaja jiya-sohua cua rootanu quiquiaa pueya. <sup>21</sup> ¿Casaara quia nequesoreya janiyani? Quia nequesoreere juhuari cuno pojori, canapuate cua pohuatasano tojiquianuni. Nojoricuaajaari quia sequenutaniya casaa cua rootaquiaa nojorini.

<sup>22</sup> Jiyacaritij, Pueyaso Secojoua tiaco cojuana pueyanoori Jesu shuriucua nujuariquiaa. Naa Jesu riucuasacari jiyaniijia Anástej, Secojonuujuu tiaco cojuana pueyanoori Jesu jiquioco maseteree. Naa Jesu sequereeri:



—¿Naa riucuasanote pueyacuara secojonaa jiyaniijia?

<sup>23</sup> Jesuuri na riucuaaree:

—Janiya jaara sesa riucuaareeni, cua sequere casaate sesa quiriini. Sanini-uujia, janiya jaara maninia sequereeni, ¿casaara quia maseteree cua jiquio-cocuaraarini?

<sup>24</sup> Canaa pueyacuara secojonaa jiyaniijiajanaa Caifás quiniuucua, jiyacar-itij, Anásri Jesu moronucua jiyarotaree Caifáscua.

*Pedro pacutesacari seetanu Jesujiniji*

*(Mt 26.71-75; Mr 14.69-72; Lc 22.58-62)*

<sup>25</sup> Anás nequesoreesacarijia Jesu, Pedroori tii jitiuriquiaajaa. Tii quiniaa pueyari jiyacari na nequesotaree:

—¿Majate quiajaniya cuno pueyano pueyajinijiniojuhuaj?

Pedroori saaja seetaree. Sequereeri:

—¡Maja janiya!

<sup>26</sup> Pueyacuara secojonaa jiyaniijia seruuri Pedro niquirii. Nojuajaari noo pueyano cuna quiriquiaa, Pedro jaatesano na numocotej. Nojuajaari Pedro sequere:

—¡Janiyacujaruhua quia niquirii cuno pueyanota quia quishacari olivo cuhuariquajiniani!

<sup>27</sup> Pedroori na seetarohuacuhuj. Caacarajaari jiyacari niunijioquee.

*Jiya jiyaniijia Pilato nequesoreesacari Jesu*

*(Mt 27.1-2, 11-14; Mr 15.1-5; Lc 23.1-5)*

<sup>28</sup> Caifás tiajiniji, Jesuuri jaatucusaquiaari Romano jiyaniijia tiajinia. Cuno tiaari jyanohua puereetuca quiriQUIASE, jiyaniijiaacuaji tiasano. Cuno jiyaniijiani, nojuajaari Romano jiyaniijiajanaa César jiyatesano quiquiaari jiyaniijiajanaa na quiniuria Judea jiyajinia. Na sesa quiquiaari Pilato. Canaa Judiocuaca jaara tiuquijioquiaari Jesuta Pilato tia carijiniacuma, shusha juhuaqueriquiaari. Nojoriiri maja na tiuquitianu quiquiaari Pilato tiaco, nojori mariqui juhua curuushiriiri Pueyaso niquiara, nojori tiuquitianuucua tahue tiajinia. Nojori jaara juhua curuutuucua quiri Pueyaso niquiara, naacuajitij, nojori maara Pascuara miaquesano borrego miaqueyaquirij. <sup>29</sup> Naaratej, Pilatoori nojoriicua tohuataquiaari. Nojori nequesotareeri:

—¿Casaa nio pueyano miiriucuaani, miji nia nitianura cucuani?

<sup>30</sup> Nojoriiri saaja riucuaaree:

—Jaara sesa miyashijia quiriquia, ¿canaatucua casaara quiocua na nitiamani?

<sup>31</sup> Pilatoori nojori sequere:

—¡Niiquiji nia jiyataarohua! ¡Tama nia nequesoreesuhuaajaaja, taa nia supuetanaa rootasano sequeyacuajani!

Canaa Judiocuaca camarucuaari Pilato riucuaaree:

—¡Niajaniya Romano pueyani, niaacuajaari canaa sequecanu maja canaa monura pueyano!

<sup>32</sup> Naacuajitij, naa tarijia Jesu sequesanoori tohuateeriquiano quiquiaari, nojuaja jaara sequequiaari taa na mosaanutaniya niyacutesanojiniani. Saaja Romano pueyari naa monu niishiquiaari niyacutesanojinia.

<sup>33</sup> Jiyacaritij, Pilatoori na tiaco tiuquiyarohua. Jesu piiriiri nocua na niniuria. Tii Jesu nequesotareeri:

—¿Quiaate seetanujuanaa Judiocuaca jiyaniijia?

<sup>34</sup> Jesuuri Pilato sequere:

—¿Cunote tama quia niishishanojuaja naa quia nequesotanura janiyatej?  
¿Tamonu soj quia pohuatacanu janiyajiniji?

<sup>35</sup> Pilatoori Jesu juaarii. Na sequereeri:

—¡Quiaa jaara Judiocuaca jiyaniijiarano quiri, janiyara naajaa! ¿Janiyateeri quiarta Judio pueyanoni? ¡Tama quiarta Judiocuacacujaari cucua nitiamaa quiajaniya, nia pueyacuara secojonaa jiyaniijianucuata! ¡Cua sequere casaa quia miiriucuaani!

<sup>36</sup> Jesuuri na riucuaaree:

—Janiyacujaari Jiyaniijiani, maja juhua mijiria jiyaniijia. Janiya jaara mijiria jiyaniijia quiriquiani, cua pueya maara cua quiatunaa cuarta Judiocuacata miaquetoore, maja nojori quiatunura janiya. Majaari jiyaniijia cua quiniu mijiria, taa quia quiyacuaani.

<sup>37</sup> Pilatoori Jesu nequesotaree:

—¿Naatee? ¿Quiaateeri jiyaniijia?

Jesuuri na riucuaaree:

—Jaa. Janiyacujaari Jiyaniijiani. Janiyacujaari cunora rasaaquiaarini. Janiyari mijiria niquiaarini seetanu rupaaajanaa cua niishitiniuria pueya. Cante seetanu rupaaajanaa panijiani, nojoriiri cua sequesano tojtiajaca.

<sup>38</sup> Pilatoori najuhuana na nequesotaree:

—¿Casaateeri cuno seetanu rupaaajanaani?

Naa na nequesotanu nuhuajitij, Pilatoori tohuatamohuacuhua canaa Judiocuacaacua.

*Pueya sequesacari Jesu cuaara mosaaria*

*(Mt 27.15-31; Mr 15.6-20; Lc 23.13-25)*

Pilatoori jiyacari pueya sequereeri:

—Nio pueyano nequesoreerecuaajaniijia. Nojuajaqui maja sesa na miiniu quiquianu. <sup>39</sup> Niajaniya Judiocuacani, niaari puetunu Pascua juucarajanaa cua nenecojoquiaa cua cartenura nujuatejojuajiniji nujuatesano pueyano. Quiarijiani, ¿cana nia paniya cua cartenura nio Pascua juucarani? ¿Niarta Judiocuaca jiyaniijiatee?

<sup>40</sup> Puetunu pueyajanaari naa jiyanohua nacoorohuacuhuj:

—¡Maja cuno cartenu! ¡Barrabás quia cartere cutara!

Cuno Barrabásri nohuasejojua quijia.

## 19

<sup>1</sup> Jiyacaritij, Pilatoori na soldadohua majacuteree Jesu, coqueeca casaata.  
<sup>2</sup> Soldadohuari juhuacontucua maaturee Jesu nacaquera. Na nuhuaji cushitishaarohuari. Na macaatiniuria, shaaruque toque cushitishaarohuari, juhua jiyaniijia toque. <sup>3</sup> Naa nojori miiniu nuhuaji Jesutej, nojoriiri nocua catecanoquiaari. Na sequetureeri:

—¡Judiocuaca jiyaniijianaa! ¡Quia timiri, Judiocuaca jiyaniijianaa!

Naa nojori sequesacari Jesutej, nojoriiri na jiquioco piquitiurii.

<sup>4</sup> Pilatoori socua tohuataquiaari canaa Judiocuacaacua. Nojori sequereeri:

—¡Nia niquiri! Janiya na tohuateya niaacuani, nia niishiniuria janiyacujaari tari na nequesoreereeni. Janiyari quiarijia niishiyani, nio pueyanoqui maja sesa na miiniu quiiriucuaa.

<sup>5</sup> Jesu muetasacari nojoriicua, juhuacontucuaajiniji nacaque cushiriquiaari, shaaruque toquenio. Pilatoori Judiocuaca sequereeri:

—Nia niquiri niarta pueyano.

<sup>6</sup> Canaa pueyacuara secojonaa jiyaniijianucua, Pueyaso Secojoua tiaco cojuanaa pueyajuhuj, nojori jaara Jesu niquiquiaari, na nacoonu coteetureeri:

—¡Niyacutesanojinia quia teetere tii na cusonura! ¡Niyacutesanojinia quia teetere!

Pilatoori nacoyano riucuaaree saaja:

—¡Maja! ¡Janiyacuajaari niishiyani, nio pueyano maja sesa na miiniu quiquianu! ¡Niaa jaara na monu paniri, nia teetere tama niajaniyajaaja!

<sup>7</sup> Canaa Judiocuacaari Pilato riucuaaree:

—¡Canaari Pueyaso Rootasano naajionee jiitiaani! ¡Canaari cunojiniji niishiyani, nio pueyano cuaara mosaaria tama na cuaqueyajaaja na jiyatenucua Pueyaso Niyanura!

<sup>8</sup> Pilato tojishacari naa canaa Judiocuaca sequesantej, nojuajaari socua puerequiaari. <sup>9</sup> Pilatoori na tiaco tiuquiyarohua Jesuucua. Na nequesotareeri:

—¿Tejenotejaara quiajaniyani?

Jesuuri maja na riucuanu quirii. <sup>10</sup> Pilatoori na sequeree:

—¡Cua riucuaarejaj! ¿Quiaate niishiyaquiya, janiya jiyaniijiani? ¡Janiya jaara panirini, cua naata cua pueya sequenu na teetenura quiajaniya! ¡Janiya jaara paniyaquirijihuhaj, cua naata quia cartenujuhujaj!

<sup>11</sup> Jesuuri saaja na riucuaaree:

—Jiyocuacaanu Quijia jaara quia jiyateyaquiquiaari jiyaniijia quia quiniuria, quiaa maara quia cumaaca paaretaaquiri cucujaj. Naaratej, cante niyara cua nitiamaa quiocuani, nojuajaari socua jiyanoehua sesa miirii quiajaniyajiniji.

<sup>12</sup> Naa Pilato tojishacari Jesu sequesantej, nojuajaari socua shiri-iquiquiaari. Nocujaj, Jesu cartenu saniniujiuriquiaa juucuaari. Judiocuacaari saa nacooreejaa. Naa Pilato sequetureeri:

—¡Cante tama na cuaqueyajaaja jiyateja jiyaniijiarani, nojuajaari pa jiyaniijia César paracara quijia! ¡Naaratej, quiaa jaara cuno pueyano cartere, majaari socua pa jiyaniijiajanaa César rupuenta quia quiniu quiniutianiya!

<sup>13</sup> Naa Pilato tojishacari pueya sequesano nojuajatej, nojuajaari na soldado sequeree na tohuatenuhuara Jesu pueya niquiara. Pilatoori jiyacari cajirii pueya na nequesoreesaquiji cajituijinia. Pilato tii cajiriquiaani, na tajoji pueya nujuatusaquini, cunoori shanohua saitia shipinishano quiquiaari. Naaratej, na sesa quiquiaari “Saitia maniniushitishano”. Judiocuaca ru-paajinia saniniuujia, cunoori quiquiaari “Gábata”. <sup>14</sup> Jiyacariiri panacari quiriquiaa. Cuno juuca, canaa Judiocuacaari juhuacarijia jeenucuariquiaa Pascuara juucajinia. Pilatoori jiyacari tii quiniaa Judiocuaca sequeree:

—¡Nia niquiri nia jiyaniijia!

<sup>15</sup> Pueyari saa nacooreejaa:

—¡Cunoori maja canaa panishano canaa jiyaniijia na quiniuria! ¡Niyacutesanojinia quia teetere!

Pilatoori nojori sequeree:

—¿Janiyatucua nia jiyaniijia teetereni? ¡Maja!

Pueyacuara secojonaa jiyaniijianucuaari Pilato sequeree:

—¡Jiyaniijia César cuajaari canaa jiyaniijiajanaa! ¡Maja socua tamonu jiyaniijia canaa jiitianu!

<sup>16</sup> Pilatoori socua Judiocuaca niqutioree Jesu, nojori teetesocoriquiano. Naaratej, nojoriiri na jiyataquiaari na teetenucua.

*Jesu teetesacari*

*(Mt 27.32-44; Mr 15.21-32; Lc 23.26-43)*

<sup>17</sup> Jesuuri tama na teejaranojuaaja canujutaaree pueya puecoosaquiria. Puecoosaqui sesa quiquiaari “Pueyano nacaco tuhuananu”. Judiocuaca rupaaajinia saniniuujia, “Gólgota”. <sup>18</sup> Jesuuri tii teetesaaquiaari, socua caapiqui pueyano. Jesuuri cuno pojori tajinia nujuaretasaaree. <sup>19</sup> Pilatoori naa naajiotequiaarijuhuaj Jesu nacaacuma rupotasocoriquiano: “Nazaret tiacajinijinio Jesu, Judiocuaca jiyaniijia”. <sup>20</sup> Naajiosano quiriquiaari canaa Judiocuaca rupaaajinia, Romano pueya rupaaajiniajuhuaj, Griego rupaaajinianio. Jesuuri catecaja teetesaaquiaari Jerusalén tiacajiniji. Naacuajitij, queraatia Judiocuacaari cuno naajio serojoquiaari. <sup>21</sup> Naaratej, Judiocuacaacuara secojonaa jiyaniijianucuaari Pilato juaatiurii:

—¿Casaara naa quia naajiotereeni: “Judiocuaca jiyaniijia”? Cuaara naajiosaaria cutara: “Tama na cuaqueya sequejajaaja, Judiocuaca jiyaniijiani-jia”.

<sup>22</sup> Pilatoori nojori riuacuaree saaja:

—Janiyacuaajaari naa naajiotereeni. ¡Cuaara naa quiiriatej!

<sup>23</sup> Cuno cuatro soldadohua teetenu nuhuaji Jesu, nojoriiri Jesu toqueya seraatiaree. Socua quiriquiaari Jesu tucuaque cacojoqui. Cuno toqueeri shitasano quiquiaari na riquiajiniji jiyocuara. Maja cusupuesano. <sup>24</sup> Naaratej, cuno soldadohuari sequetooquiaari:

—Maja pa sureenu nio toque. Coteenu pa tacuarishijiore, pa niishiniuria cante nera na panutaniyani.

Naacuajitij, tariucuacaanu Pueyaso Rupaaajinia naajiotasanoori tohuateequiaari. Naa naajiotasano quiyari:

“Cua toqueeri seraatiasaaree. Cua tucuaque toqueecuara tacuarishiyonureeri, na pasocoriquiano”.

Seetanujuanaa, naa miitiuquiaariiri cuno soldadohua.

<sup>25</sup> Niyacutesano shuriucua tee Jesu teeriquiaacuajani, tii nujuaturiquiaari na nucua, na nucua tarajanujuhuaj, Cleofas niquiocua Maríajuhuaj, María Magdalenanio. <sup>26</sup> Jiyanohua Jesu panishano pueyanoori Jesu nucua shuriucua nujuariquiaa. Cuno pueyanocuaajaari janiya. Jesu niquishacari canaa, na nucua sequereeri:

—Maajiniaa, cua panishano pueyano cuaara quiiria juhua quia mueya cua niti.

<sup>27</sup> Na nuhuaji, cua sequereajaarijuhuaj:

—Juannaa, cua nucua cuaara quiiria juhua quia nucua.

Naaratej, janiyari María riquiaari cua tiajinianani, tii na quiniuria canaata.

### *Jesu cusosacari*

*(Mt 27.45-56; Mr 15.33-41; Lc 23.44-49)*

<sup>28</sup> Na nuhuaji, Jesuuri niishiquiaari puetunu nojuajiniji naajiotasanojuanaari tari tohuateere. Naajuahuaj, tariucuacaanu Pueyaso Rupaaajinia naajiotasano tohuateenurajuhuaaj, Jesuuri sequequiaari:

—¡Jiyamueyanijia!

<sup>29</sup> Cuniqúi, vino jereecaari patacojinia mishaja cajitiariquiaa. Jiyacaritij, namasu casaari jereeca vinojinia shishaaree. Naajuaacua na morotatureeri. Na nuhuaji, Jesu rupaama shitasaaareeri. <sup>30</sup> Jesu ratunu nuhuaji cuno jereeca vino, naa sequerohuari:

—¡Tari tucuatere puetunujuanaacuajanijia!

Naa na sequenu nuhuajitij, naniquiiri. Cusoqueeri.

### *Soldado jitasacari Jesu shuucuaji na cashanata*

<sup>31</sup> Cuno juucaari canaa Judiocuaca jeenucuasacari quiriquiaa Pascuaacuara juucaajinia. Cuno marijiara, Pascua juucaari Sábado

juucajinia quiriquiaajuhuj, samaatenu juuca. Naaratej, canaa Judiocuaca camarucuaari maja na paniniu quiquiaari samaatenu juuca macunucua jaasuconura na niyacutesanojinia. Naaratej, nojoriiri Pilato sequeree cuno teetejosano pueya cashacucua na shuniitianiniuria, ritia nojori cusuunura, na roshinijiosaanura cuno juucaja. <sup>32</sup> Naaratej, Pilatoori na soldadohua jiyaramiquirii. Cuno soldadohuari coteenu shuniitiaree niquiriyatu pueyano cashacucua. Na nuhuaji, tamonu cashacucua shuniitiatuureejaariuhuj. <sup>33</sup> Saniniuujia, nojori pacusacari Jesuucua, Jesuuri tariucua macu quiriquiaa cutara. Nojoriiri cunora na cashacucua shuniitiaquirii.

<sup>34</sup> Naajaa, tamonu soldadoori Jesu shuucujaji jitiaree na cashanata najuhanaj. Ritia shooqueeri nanaca, mohuacanio. <sup>35</sup> Cuno pueyano, na naajiojinia naa nia pohuataani, cunocujajari janiya. Janiyajanaari na niquiquiaarini. Naarate janiyari seetanujanaa nia pohuataani. Tama janiyajaarijia niishiyani cua sequesanoori seetanujanaa, nocua nia tiuuniuria. <sup>36</sup> Jesuuri naa miishaaquiaaritij, tariucuacaanu nojuajiniji naajio-tasano tohuateenura. Naa sequeyacuajajari juhuacarijia nojuajiniji naajio-tasano:

“Majaari quenaaja na nucu shuniitiasaanu quiniutianiya”.

<sup>37</sup> Tamaquiiri nojuajiniji naa naajiotasano quiyajuhuj:

“Cashanata na shuucujaji na jitiatusano niquitiuniutianiya”.

### *Jesu quete niasacari raaco*

(Mt 27.57-61; Mr 15.42-47; Lc 23.50-56)

<sup>38</sup> Na nuhuaji, Arimatea tiacajinijinio Joseeri Pilato sequesee:

—Cua niquitiore Jesu quete raaco cua niasocoriquiano.

Nio Joseeri jiyasohujaja Jesuucua tiuujia quiquiaari, na pueresacari narta Judiocuaca. Pilatoori na sequequiaari na panura Jesu quete. Naacuajitij, Joseeri quiaaree. Macu paquiaariiri. <sup>39</sup> Nicodemojuhuj, noo pueyano Jesuucua niquiaari niucua nata pocoojonuratej, nojuajajari jiyacari tiuquishii Josecua. Nojuajajari queraatia shanohua jaanutaja nitiariquiaa, macuucua niojosocoriquiano. Na niiquiaari quiquiaari cuarenta y cinco kilo. Cuno shanohua jaanutajajari quiquiaari mirra, aloeta cojitijosano. <sup>40</sup> Joseeri Nicodemota Jesu jiuniocoree toqueneecajinia. Nojori jiuniocosacari, nojoriiri nocua niojoriquiaa cuno shanohua jaanutaja. Canaa Judiocuacaari naa miitijuajia quiquiaari, na macu na niatunura raaco. <sup>41</sup> Tee Jesu teetesaaquiaaricujajani, cuniquijia na shuriucua quiquiaariiri cuhuariquia. Cuno cuhuariquiajiniani, quiarinio jiuutiasano raari quiriquiaa, macunucua niojuuara. Cuno raaconi, juhuanajuaja maja macu niasaanu quiquiaari. <sup>42</sup> Macuuri cuno raaco niasaaquiaari, cateca na quiniuucua. Naajuhuj, quera puequeriquiaari canaa Judiocuaca jeenucuanu juuca. Cunoori, Pascuaacuara juuca.

## 20

### *Jesu samiitiasacariuhua*

(Mt 28.1-10; Mr 16.1-8; Lc 24.1-12)

<sup>1</sup> Domingo, coteenujanaa semaana juucani, María Magdalenaari tariquicujaji quiaquiaari Jesu raajiniara. Ninishiquiiri quiriquiaajaa. Na tiuquishacari, cuno puereetuucua saajia niquishiiri tariucua tamocora ruutinishano, teyanota raa tiosaaquiaaricujajani. <sup>2</sup> Naa na niquishacaritij, nojuajajari neterohua Simón Pedroocua, cucuanio. Canaa sequesuhuari:

—¡Pueyanaa, pa Jiyaniiijaaqui na raajiniji pasaaree! ¡Majaari canaa niishiniu teeriquitijia na niasaareetejaj!

<sup>3</sup> Naaratej, janiyari Pedrotá netequiaari raajiniarajuhuaaj. <sup>4</sup> Canaari mariyata netecuaturiquiaa coteenuni. Janiya cutaraari socua ritia netequiaari Pedrojinijini. Naacuajitij, janiyari coteenu tiuquishii raajiniani. <sup>5</sup> Janiyari raaco cuuqueseeni. Janiyari saaja Jesu jiuniocotaja toque niquirii maanoni tee Jesu quete niasaarucuaacujani. Majaari cua tiuquiniu quimiaa raaco. <sup>6</sup> Simón Pedroori cua nuhuaji tiuquishii. Cami tiuquimiaajanaa cutaraari. Nojuajaari Jesu jiuniocotaja toque niquishii tii maanojuhuaaj. <sup>7</sup> Jesu naca jiuniocotaja niquiriijaariuhuaaj tamoco maano, maninia mariquiosano. Majaari na manu quiriquiaa Jesu cuaqueya jiuniocotaja toqueta. <sup>8</sup> Pedro tiuquiniu nuhuaji raaco, janiyari shusha jiyacari tiuquimiaajaaniuhuaaj. Cua niquishacari Jesu jiuniocotaja toque, janiyari niishiquiini Jesuqui tari samiitiarohua. <sup>9</sup> Canaari juhuanajuaja maja canaa niishiniu quiriquiaa tariucuaaanu Pueyaso Rupaajinia naajiotasano Jesujiniji. Tii sequeyacuajaari Jesuuri samiitianutaniuhua macujiniji. <sup>10</sup> Na nuhuaji, canaari tiajinia quiaarohuani.

*Jesu muetasacari María Magdalenaacua*  
(Mr 16.9-11)

<sup>11</sup> Canaa quiojosacariuhua raajiniji, María Magdalenaari tiijia jateequiaari. Raá shuriucua nujuqueriquiaari. Na nujuquenuta, raaco cuuquereeri. <sup>12</sup> Raaco na niquishacari, caapiqui Pueyaso seya niquiriiri, cohuaaque toqueyaraca. Nojoriiri macu niasaqui cajitiuriquiaa, tamonu na nacaacora, tamonu na cashacuucumara. <sup>13</sup> Pueyaso seyari María Magdalena sequeree:

—Maajiniaa, ¿casaara quia nujuqueyani?

Nojuajaari Pueyaso seya riuacuaree:

—Cua jiyaniiijia quete niiquiji pasaarucuaa. Majaari cua niishiniu teeriquitijia na niasaarucuaatejaj.

<sup>14</sup> Naa na sequenu nuhuajitij, na nijiniara tacaterohuari. Saaja Jesu niquirii na shuriucua nujaanoori. Maja cutaraari na niishiniu quiriquiaa nojuaja Jesu.

<sup>15</sup> Jesuuri na nequesotaree:

—Maajiniaa, ¿casaara quia nujuqueyani? ¿Cana quia pajeyani?

Maríari na jiyanirii cuno cuhuariquia cojuana pueyano naasucua. Cunora, naa na sequereeri:

—Pueyanonaa, quiaa jaara canaa macu parucuaa, cua sequere tee quia niarucuaanoj. Janiyacua nocua quiaare na panurani.

<sup>16</sup> Jesuuri na sequeree:

—¡Maríanaa!

Jiyacaritij, Maríari nocua tacatequee na niishishacari nojuajaari Jesu. Hebreo rupaajinia na sequereeri:

—¡Rabuni!

Cunoori sequeya, “Cua Niishitiojonanaa”. <sup>17</sup> Jesuuri María sequeree:

—Maja cua quianu. Juhuanajuaja maja cua tacanu quiquioo cua Queecua. Quia quiaarohua. Cua tapueyocuaca quia sequesuhua: “Janiya cua Que Pueyasocua tacanutaniuhuani. Nojuajaari nia Quejuhuaaj. Nojuajaari cua Jiyaniiijia, nia Jiyaniiijajuhuaaj”.

Jesuuri naa na saquiriojosano pueya sequeree na tapueyocuacata, na Que Pueyaso na jiyatesacari nojori Quejuhuaaj. <sup>18</sup> Jiyacaritij, María Magdalenaari



nimiohua canaacua, Jesu saquiriojosano pueyacuani. Nojuajaari canaa po-  
huatasuhua taa Jesu na niquiriini. Naajuhuaaj, Jesu sequesano caminiujiurii  
canaaraari.

*Jesu muetasacari na saquiriojosano pueyacu*

(Mt 28.16-20; Mr 16.14-18; Lc 24.36-49)

<sup>19</sup> Cuno domingo juucajani, shusha ninishacari, canaa, Jesu saquiri-  
ojosano pueyani, canaari jatiqui quiriquiaa tiaconi. Canaari tia tohu-  
ateya mishiquiojoquiaari cumaatiani, canaa pueresacari Jesu motenaa  
Judocuaca. Naa tia tiotiu mishiquiojosano quishacaritij, Jesuuri saaja  
canaacua tiuquimiaa. Canashiyaquiji nujuasee canaa tajiniaari. Naa canaa  
sequereeri:

—¿Niaate quiyajaa? Juhuaajaniya nia quiri.

<sup>20</sup> Naa canaa na sequenu nuhuajitij, canaa niqitijioree na juaashiquiaari,  
na shuucuaji cashana jiyanio. Canaari jiyanohua timiriini canaa  
niquishacari canaa Jiyaniijia. <sup>21</sup> Jesuuri socua pacuterohua sequenu:

—¡Juhuaajaniya nia quiri! Naatej, taa cua Que jiyaroquiaari janiya mijiria  
na rupaa cua pohuatanuracuaani, janiyari naa nia jiyaramiquiniutianiya-  
juhuaaj.

<sup>22</sup> Naa canaa na sequenu nuhuajitij, canaa caco nooriiri. Sequereeri:

—Pueyaso Sohuanu nia tiuquiniri nioojiajinia. <sup>23</sup> Niaa jaara pueyano  
jiyanoori sesa na miishanojiniji, seetanujuanaa jiyanooshano quiniutiani-  
yari. Saniniuujia, niaa jaara pueyano jiyanoyaquiri sesa na miishanojiniji,  
Pueyasora, jiyanooshoo quiniutianiyajaariuhuaaj.

*Tomás niquishacari Jesu, saminio seetanujuanaa*

<sup>24</sup> Majaari Tomás quiniu quiriquiaa canaata, narta saquiriojosano puey-  
atani, Jesu muetasacari canaacua. <sup>25</sup> Naaratej, canaari Tomás sequequiaari  
na nuhuajini:

—¡Caapueyanonaa, canaa pa Jiyaniijia niquiriicuaani!

Tomásri saa canaa sequereejaa:

—Majaari cua tiuuniu quiniutianiya nia sequesanoocua, janiya jaara Jesu  
juaashiquiajinia niqiyaquiri clavo jiyacani. Janiya jaara cua juaashiquia  
shiyaquiri clavo jiyamani, janiya jaara cashana jiyama pueraaquiri na  
shuucuajijiuhuaaj, janiyari nia cuaracashitiniutianiyan.

<sup>26</sup> Cuno nuhuaji, socua tamonu domingora, canaa, Jesu saquiriojosano  
pueyani, canaari rerejoquiaariuhuani. Tomásri jiyacari canaata quiriquiaa  
cutara. Tia tiotiuuri maninia mishiquiojosano quiriquiaa. Naajaa, Jesuuri  
saaja canaacua tiuquiquiaari. Canashiyaquiji canaa tajinia nujuaseeri.  
Canaa sequereeri:

—¿Niaate quiyajaa? Juhuaajaniya nia quiri.

<sup>27</sup> Jiyacari Tomás sequereeri:

—Miji, Tomásnaa. Cua juaashiquia quia niquiri. Quia juaashiquia quia  
shiri clavo jiyama. Cashana jiyama cua shuucuaji quia puerarejuhuaaj.  
¿Casaara cucuaji quia taacanuyajaani? Cucua quia tiuuri.

<sup>28</sup> Tomásri jiyacari Jesu sequereeri:

—¡Cua Jiyaniijiana! ¡Cua Pueyasonaa!

<sup>29</sup> Jesuuri na sequereeri:

—Quia niquishacari janiya, quiaari shusha cucua tiuya. Socua shuquiriaa-  
tia quiniutianiya cutaraari noo pojori, canapuete cucua tiuuniutianiya saaja  
nojori tojishacari janiyajinijini, nojori niqiyaquishacari janiya.

*Casaara Juan naajioquiaari nio naajioneeni*

<sup>30</sup> Jesuuri jiyano hua socua queraatia casaa miiquiaari na cumaacata canaa na saquiriojosano pueya niquiara. Cunoori nio nequesoreetunee-jinia naajiotasoo. <sup>31</sup> Janiyari secaja saquiriojoree niya cua naajiotasocoriquianoni, nia niishiniuria Jesuuri seetanujuanaa Pueyaso Jiyarosano, Pueyaso Niyanutuhuj. Janiyari nio naajioreeni nocua nia tiuuniuria, Pueyaso muerasura nia jiyatesaanura, pueyaracaanu rishijiaca nia quiniuria.

## 21

### *Tiberias caminiajinia Jesu muetasacari na saquiriojosano pueyacua*

<sup>1</sup> Na nuhuaji, Jesuuri canaa na saquiriojosano pueyacua muetaquiaar-iuhua Tiberias caminiajinia. Naa quiquiaariti na muetasacari canaacua. <sup>2</sup> Nio pojoriiri jiyacari mariyata quiriquiaa: Simón Pedro, Tomás (Caa-pueyano jiyaniushano), Natanaeljuhuj. Nojuajaari Caná tiacajinijinio quiquiaari, Galilea jiyajinijinio. Janiyari cua tarajanuta tii quiriquiaajaani-uhuj. Canaari Zebedeo niquiohuani. Socua caapiqui Jesu saquiriojosano pueyajinijinioori tii quiriquiaajuhuj. <sup>3</sup> Simón Pedroori jiyacari canaa sequere:

—Sapitiaajara quejootaseera shiyaru.

Canaari na riucuaareeni:

—Canaa quiata quiaajuhuj.

Naacuajitij, canaari quiojiyareeni. Canaari botejinia tacataseeni. Canaari puetunu cuno niucujanaa shiyaru quejootariquiaa sapitiaajara juucuaani. Canaari shaa juhuaquetumaani. <sup>4</sup> Jiyacaritij, Jesuuri caminia casaqueyaji jaaquiajinia nujuariquiaa. Majaari canaa niishiniu quiquiaari cante nojuajani. <sup>5</sup> Jesuuri canaa jiiquiooree. Cana nequesotareeri:

—¡Sanajoorinia! ¿Niaate na quiaree?

Canaari na riucuaareeni:

—¡Maja! ¡Shaaqui sacaj!

<sup>6</sup> Jesuuri canaa sequere:

—¡Nia shiyaru nia jartare nia miaquetajara bote tamajiria! ¡Niaari cuniqui na quianutaniya cutara!

Canaari naa miiriini taa na sequere canacuajani. Na nuhuaji, majaari canaa naata canaa shiyaru jaatianu quiriquiaa, queraatia sapitiaaja canaa ritiasacari. <sup>7</sup> Jiyacaritij, janiyari Pedro sequereeni:

—¡Pa Jiyaniijiaqui!

Naa Pedro tojishacari cua sequesantej, nojuajaari ritia na toque cushirii. Nojuajaari juhuasu quiriquiaa. Na toque na cushiniu nuhuaji, caminiajinia jaataareeri Jesuucua na quianura. Jiritiuri quiriquiaa. <sup>8</sup> Canaari na nuhuaji jaatiariquiaa shiyaru botejinijini. Jaaquiaari namitia maja tucuacaanu na quiniu quiriquiaa, saaja cien metroruhua. <sup>9</sup> Cana rosetasacari botejiniji, canaari na mani niquishiini. Sapitiaajaari tii majeeriquiaa, pannio.

<sup>10</sup> Jesuuri canaa sequere:

—Nia sapitiaajajiniji miji nia riri rarishocoriquiano.

<sup>11</sup> Simón Pedroori ritia botejinia tacamaa. Shiyaru tacanitiaree jaaquiajiniari. Queraatia sapitiaajaari quiriquiaa. Ciento cincuenta y tres sapitiaaja, saa puereetunucuaaja. Naa queraatia sapitiaaja quishacaritij, naajaa, majaari shiyaru turejetanu quirii quenaaja. <sup>12</sup> Jesuuri canaa sequere:

—Pueyanaa, miji. Nia miaquesee.

Majaari quenaaja niquiriyatu canaajinijinio nequesotanu quiriquiaa, can-tejaaranojoni. Canacuajaari niishiriquiaani nojuacuajaari canaa Jiyaniijia

Jesu. <sup>13</sup> Jiyacaritij, Jesuuri pan rishii manijiniiji. Canaa na serotareeri. Sapitiaaja rariquia canaa niqutiojoreejaariuhuj.

<sup>14</sup> Jiyacari Jesu muetasacari canaa na saquirojosano pueyacuatej, cunota tari quiquiaari jiuujianaraca na muetasacari canaacua na samiitanu nuhuaji.

*Jesu pocoojosacari Simón Pedrotá*

<sup>15</sup> Canaa miaquenuunu nuhuaji, Jesuuri Simón Pedrotá pocoojoriquiaa. Na nequesotareeri:

—Juan niyanu Simónnaa, ¿quiaate cua panijia socua nio quiarta saquirojosano pueyajiniiji?

Pedroori na riucuarree:

—Jaa, Jiyaniijianaa, quiaacuajaari niishiya janiyari quia paniyani.

Jesuuri na sequeree:

—Cua borregohua niquiohuaniojua cojuanara quia quiriqui.

Naa Jesu sequesacari Pedrotej, nojuajaari miriqui na sequeriquiaa maninia na jitianura narta Pueyaso muerasu. <sup>16</sup> Jesuuri Pedro nequesotaru-huacuhuj:

—Juan niyanu Simónnaa, ¿quiaate cua panijia?

Pedroori Jesu riucuarree:

—Jaa, Jiyaniijianaa. Quiaacuajaari niishiya janiyari quia paniyani.

Jesuuri na sequeree:

—Cua borregohua cojuanara quia quiriqui.

<sup>17</sup> Jesuuri socua camiriohua Pedro nequesotanu:

—Juan niyanu Simónnaa, ¿quiaate cua paniya?

Pedroori socua taraajequee pueyaracaanu Jesu nequesoreesacari nojuaja. Seetanujuanaa Jesu riucuarree:

—¡Jiyaniijianaa, quiaacuajaari puetunujuanaa niishijia! ¡Quiaari niishiya janiyari quia paniyani!

Jesuuri na sequeree:

—Cua borregohuaniojua cojuanara quia quiriqui. <sup>18</sup> Seetanujuanaa quia sequeyanijia, mashaja quia quishacari, tama quiajanijaaarijia quia toque cushijia, quia quianura quia panishaqui. Saniniuujia, quiaa jaara saaquiano quiri, quiaari nareja quia numatucua shiitionutaniya tamasaca cushitiniuria quia toque. Na nuhuaji, quiaari canujutesaanutaniya quia paniyaquishaquiria.

<sup>19</sup> Naa Jesu pohuatasacari miriqui Pedrotej, nojuajaari Pedro numooteriquiaa taa nojuaja mosaanutaniyani. Pedro jaara naa mosaare, nojuajaari Pueyaso timitiniutaniya na mosaanuucua. Na nuhuaji, Jesuuri na sequeree:

—¡Pueyaracaanu cua tojjia quia quiri! Pa quiaarej.

*Juanjiniiji pohuatasano*

<sup>20</sup> Pedro tacatesacari na nijiniara, Jesu panishano pueyano niquirii na nuhuaji sacuaanoori. Nojuacuajaari janiya. Janiyari noo pueyanocuajani, canaa miaquenuusacari Pascuara, Jesu shuriucua cua cajishacari na nequesotaquiaariti: “¿Cantejaara cunoni, quia quiatenutaniyani?” <sup>21</sup> Quiarijiani, Pedro niquishacari janiya saniniuujia, Jesu nequesotareeri:

—Jiyaniijianaa, janiya jaara naa mosaanutaniyacuaani, ¿nojuajaarijataj, taa na miishaanutaniyarini?

<sup>22</sup> Jesuuri Pedro riucuarree:

—Janiya jaara paniri nojuaja rishiniuria pueyaracaanuni, janiya jaara jiyocuacaanuji tiuquiriohuajaatijia, quiara, naajaa. Quiajaniya cutara, pueyaracaanu cua tojjia quia quiri.

<sup>23</sup> Naa Jesu sequenuucua Pedrotej, puetunu cuarta Jesu pueyajanaari jiyaniriquiaa janiya naasucua shaajeyaquiriquianoni. Jesuuri seetanujua-naa maja naa na sequenu quiquiaari janiyajiniji. Nojuajaari saaja naa sequequiaari Pedro: “Janiya jaara paniri pueyaracaanu na rishiniuriani janiya jaara jiyocuacaanuji tacatemohujaatijia, quiajanijara naajaa”.

<sup>24</sup> Janiyacuajaari nojuajani, Jesucristo panishano pueyanoni. Nio cua naajiojiniani, janiyari nojuajiniji cua niquishano pahuataani. Cua pahu-atasanoori seetanujuanaa.

<sup>25</sup> Jesuuri jiyanohua queraatia socua casaa miiquiaari na cumaacata mijiria. Puetunu na miishanojuanaa jaara naajiotasaare, naa naasucua nio jiyajinia maara quiquio quiaquiri puetunu cuno nequesoretuneecaacua-jijianaa.

## JESUCRISTO JIYARAMIQUISHANO PUEYA MIISHANO

*“Pueyaso Sohuanu niaacua jiyarosaanutaniya”*

<sup>1</sup> Quiocuara naajionu pacuterohuanijia, cua panishano Teófilonaa. Coteenu cua naajiosanojinia, janiyari quia pohuataquiaarini taa Jesu na poonijiosano coteequiaari mijiriani. Puetunu na miishanojuanaa naajio-taquiaarinijia, mariyata na niishitiojosano na coteenujiniji, jaara tacanishaaquiaariuhua jiyocuacaanu na Queta na quiniuhua. <sup>2</sup> Mijiria na quishacarijia, Jesuuri na jiyaramiquishocoriquiano pueya rootaquiaari Pueyaso Sohuanu cumaacata, taa nojori miiniutianiya na nuhuajini. <sup>3</sup> Jesu cusonu nuhuaji, nojuajaari muetaquiaariuhua na saquiriojosano pueyacua. Nojoriicua mueranacujuquiaariiri. Cuarenta juuca nuhuaji tacaquiaariuhua puetunujuanaari. Na miishanota nojoriicua na mueranacujusacari, nojori niishitiriiri nojuaja seetanujuanaa saminio quiya. Nojoritia pocoojoquiaariiri taa Pueyaso jiitianutaniya na muerasuni.

<sup>4</sup> Nojoritia na pocoojosacari tamonu juuca, Jesuuri nojori numootequiaari maja ritia nojori quianuhua Jerusalén tiacajiniji. Nojori sequequiaariiri:

—Nia sashirijaara cua Que cuara niqutioorajaara na Sohuanu niajaniya. Nojuajaari cua sequequiaari na niqutionutaniya niajaniyana, taa cua caminiujuquiaari tari niaaracuajani. <sup>5</sup> Naa sequequiaari niajaniyacujajani: “Tiuquinijona Juanri nia tiuquinijioquiaari moojinia, Pueyaso tojjiara nia jatasacari. Pueyasoori saniniujia na Sohuanu nioojiajinia tiuquinijionutaniya, seetanujuanaa Pueyaso tojjiara nia quiniuria”. Quera niaacua tiuquiniutaniyacujajani. Naaratej, nia sashiri.

*Jesu tacasacariuhua jiyocuacaanu*

<sup>6</sup> Tamonu juuca, Jesu pueyari Jesuucua rerejoquiaari. Na nequesotatureeri:

—Jiyaniijianaa, ¿quiaate Jiyaniijiaara jiyatesaanutaniya quiarjia Israel pueyara, maninia pa quiniuhua tama pa jiyaniijiatajaaja, taa pa supuetanaa quiquiaaricuaani?

<sup>7</sup> Jesuuri nojori riucuaaree:

—Nio cutaraari maja nia niishishocoriquiano, taacari Israel pueya jiyaniijiaara cua jiyatesaanutaniyani. Pa Que Pueyasoori cuno niishishano racataa tama nerajaaja. Saa nojuajaari na niishiya cutara. <sup>8</sup> Naajaa, niaari Pueyaso cumaaca masenutaniyacujaja, Pueyaso Sohuanu jaara nioojiajinia tiuquiri. Niaari janiyajiniji pohuatanutaniya pueya niqiuara Jerusalén tiacajinia, puetunu Judea jiyajiniajanaano, Samaria jiyajiniajuhuaj. Naa pohuataaanutaniyajaariuhua puetunu jiyacajiniajanaa, socua tucuaaanu jiya puequeetujinianio.

<sup>9</sup> Jesu puecasacari pocuanu, nojuajaari tacanishaaquiaari na pueya shootiasacarijia nojuaja. Cohuajajinia shaajemaari pueya niquiyaquini-uucujaji nojuaja. <sup>10</sup> Nojori mautasacari jiya cajiniocua Jesu tacasacari, canashiyaquiji, caapiqui pueyari nojori shuriucua nujuatuquiaari. Nojori toqueeri jiyanoehua cohuajaque quiriquiaa. Nojoriiri jiyocuacaanujinio Pueyaso seya quiquiaari. <sup>11</sup> Nojoriiri Jesu pueya sequere:

—Galilea jiyajinijinio pueyanaa, ¿casaara nia mautaa jiyocuacaanuni? Taa nia niquirii tacaanocujajani, niaari naa na niquiniutaniya tacatehuanohuajuhuj.

<sup>12</sup> Nojoriiri jiyacari Olivo nacuhua tuhuananuucua quiriquiaa. Pueyaso seya nuhuaji, Jesu pueyari Jerusalén tiacajiniahua tacatequiaari. Cuniqiji, cateca naataja quiquiaari Jerusalén tiaca. Moisés Naajiotasanojiniji, Judocuacaari naa rootasaquiaari maja socua tucuacaanu nojori rucuanenura samaatenu juuca. <sup>13</sup> Nojori tiuquijiosacari Jerusalén tiacajinia, nojoriiri nojori quijia tiajinia tiuquitiaquiaariuhua. Nojoriiri nataco tacataquiaari na sohuacajinia, tee nojori sashiquiaari Pueyaso Sohuanucujani. Nojoriiri quiquiaari Pedro, Juan, Santiago, Andrés, Felipe, Tomás, Bartolomé, Mateo, tamonu Santiagonio cante Alfeo niyanu quiquiaaricujani. Quiquiaarijiaariuhua Simón, cante tari quiquiaari Romano pueya jatanu panijiacujani. Mariyata quiriquiaari Judas, Santiago tarajanu. <sup>14</sup> Nojoriiri jiyacari pueyaracaanu Pueyaso secojonuuriquiaa tii maajipohuata, mariyata Jesu nucua Mariata, Jesu tapueyocucatanio.

*Pueya saquiriojosacari Matías Judas niti*

<sup>15</sup> Nojori sashishacari Pueyaso Sohuanu tii, tamonu juuca, Pedroori nujuaquiaari pueya niquiara na sequenura nojori. Naa naasucuatuhuj ciento veinte pueyari tii quiriquiaa puetunujuanaa. Naa nojori sequereeri:

<sup>16</sup>—Cua tapueyocucanaa, Pueyaso Sohuanu sequesanoori maja na naata naajaa tajiniu. Seetanujuanaa tari tohuateerucuaari Judasjiniji na pohuatanishano pa supuetanaa jiyaniijia David. Naacuajitij, Judasri Jesu monaarano niishitiquianu tee Jesu quiriquiaani, nojori na quiatenura. Judasri cunora niquitiosaacanu cumaneeca, naa nojori na niishitiniucua Jesu quiasaanura. <sup>17</sup> Nojuacuajaari parta Jesu saquiriojosano pueyano quiquiaarijuhuaj. Nojuajaari mariyata Jesu jiyaramiquishano quiriquiaa juhua pajaniyajuhuj. <sup>18</sup> Tamonu cuhuariquiaari masesaacanu sesa na miishano samitia. Na nuhuaji, tama cusoyareejaarijia. Jiyocuaaanuji tiquianu na nacaraari. Na saracaari cocuaretasee. <sup>19</sup> Jerusalén tiacajinia quiniaa jaara na niishiqlianu, nojoriiri cuno cuhuariquia sesojoree “Acéldama”. Acéldamaari pueyano rupajinia sequeya “Nanaca samitia masesano cuhuariquia”. <sup>20</sup> Judasjinijiiri naa naajiotasaquiaarijuhua tariucuaaanu supuetana David jaaquequejojuajinia. Naa sequeyari: “Na quiquio cuara quiiria shaaco. Cuara quiiria sanaaca, camaruuju”. Sequeyajaariuhuj:

“Tamonu pueyano cuara jiyatesaaria na poonijosano miiriquiano na niti”.

<sup>21</sup> ‘Cuarta Jesu saquiriojosano pueyanaa, niya quiyacuaja pueya, canapuetucuaja pa tarajaquiaarini pueyaracaanu pa Jiyaniijia Jesu quishacari pata. <sup>22</sup> Nojoriiri Juan niquiquiaarijuhuaj Jesu tiuquiniyano moojinia, Jesu tacasacariuhua jiyocuaaanunio. Canapuetucuaja puetunu nio niquiquiaarijianaani, niquiriyatu nojorijinijinio cuara jiyatesaaria Jesu jiyaramiquishanora, pata na quiniuria, Jesu samiitianujiniji na pohuatanurajuhuj.

<sup>23</sup> Naaratej, pueyari caapiqui pueya saquiriojoquiaari. Cuniqii quiriquiaari José. Nojuajaari socua caapiqui sesaraca quiquiaari: Barsabás, mariyata Justo. Tamonu pueyanoori quiriquiaajuhuj, Matías. <sup>24</sup> Na nuhuaji, pueyari naa secojoquiaari Pueyaso:

—Jiyaniijianaa, quiaari puetunu pueya jiuujia niishijajanaa. Canaa quia niishitiri teyano pueyano tari quia saquiriojoreeni, quia jiyaramiquishocoriquiano na quiniuria, Judas niti poonijioriquiano. <sup>25</sup> Judasri quia niquitiosano poonijosanojiniji catecanu sesa na miiniucua, naquiya miishaqui na quianura, sesa miijia na quiniucua.



<sup>26</sup> Na nuhuaji, pueyari naajiosano saajia jaquerooree nojori niishiniuria teyanote Pueyaso panishano pueyanoni. Saajiaari Matíascuara tacatasee. Naacuajitij, Matíasri Jesu saquiriojosano pueyanora quiquiaarijuhuaj. Naacuajitij Jesu saquiriojosano pueyari juhua juhuanoraja quiquiaariuhua doce.

## 2

### *Pueyaso Sohuanu tiuquishacari*

<sup>1</sup> Pentecostés juuca jaara quiquiaari, puetunu Jesuucua tiuuniaajanaari rerejono quiquiaari tamonu tiajinia Jerusalén tiacajinia. <sup>2</sup> ¡Canashiyaquiji, paratuuri tojishaaquiaari jiyocuacaanuji, juhua paratu pocuaano jiyanoehua cojuata! Jiyanoehua tojishaareeri cuno tiajinia tee Jesu pueya cajitiuriquiaacuajani. <sup>3</sup> Jiyacari, juhua maniiri niquishaaree pueya caco rimianuqueyano. Puetunu nojori cacojuanaa rimianacuriquiaari juhua mani. <sup>4</sup> Jiyacaritij, Pueyaso Sohuanuuri puetunu tiajinia quiniaa jiuujiajiniajanaa tiuquirii. Pueyari juhuacatecara tamaatia rupaaca pocuaree. Pueyaso Sohuanuuri naa nojori pocooteree puetunujuanaa tamaatia rupaaca.

<sup>5</sup> Cuno quishacari, queraatia Judiocuaca puetunu jiyacajinijiniojuanaari camueenujuriquiaa Jerusalén tiacajinia. Nojoriiri jiyacari Jerusalén tiacajinia queranacunuuriquiaa Pentecostés juuca. Nojoriiri Pueyaso tojitiajaca quiquiaari. <sup>6</sup> Nojori tojishacari cuno cojuatunenu, nojoriiri cuqueree tee Jesu pueya pocooriquiaa tamaatia rupaacacuajani. Nojori tojishacari naatej, nojoriiri jiyanoehua cushitiirii. Naatej, puetunu rucoonaajanaari tama na jiyajinijinio rupaacajaaja tojitiariquiaa, cuno pojori pocoosacari. Nojoriiri maja na niishiniu quiquiaari casaara naa nojori miiriini. <sup>7</sup> Nojoriiri jiyanoehua jiuujiatecoree. Tama sequetooreejaarijia:

—¡Juhuej! ¿Cuno pojoriti maja Galilea jiyajinijinio pueyacuaja naa pocoyaniquitij? <sup>8</sup> ¿Taa nojori pocuaa puetunu coteenu pa rupaacajanaani? Pajaniyacuaajaari queraatia tamaatia jiyacajinijinioni, puetunu tamaatia rupaaca pocuajacajanaa.

<sup>9</sup> Seetanujuanaari. Cuno pojoriiri Partiya jiyajinijinio nijiono quiquiaari, Media jiyajinijinio, Elam jiyajinijinio, Mesopotamia jiyajinijinio, Judea jiyajinijinio, Capadocia jiyajinijinio, Ponto jiyajinijinio, Asia jiyajinijinionio. <sup>10</sup> Quiquiaarijaariuhuj Frigia jiyajinijinio, Panfilia jiyajinijinio, Egipto jiyajinijinio, África jiyajinijinionio. Cuno Africa jiyajinijinio pueyari quera Cirene tiaca shuriucuaji quiquiaari. Roma tiacajinijinio pueyari tii quiquiaarijuhuaj, canapuate Jerusalén tiacajinia pacunaa quiquiaaricuaajani. Puetunu cuno pojorijianaari Judiocuaca quiquiaari. Noojiaqueyari rasaanquiaari Judiocuacajanaa. Tamasacaari na cararaatiuuquia co miatejosaaquiaari Judiocuacacara na quiniuria, Pueyaso tojijiacara nojori quiniu panishacari. <sup>11</sup> Creta jiyajinijinio pueyari tii quiriquiaajuhuj, Arabia jiyajinijinionio. Puetunu cuno jiyacajiniajanaari tamaatia rupaaca pocuajaca quiquiaari. Nojoriiri socua naa sequetoquiaari:

—¿Taateni? ¡Puetunu pajaniyajanaari cuno Galilea pueya tojitiaani Pueyaso cutara miishano pohuataano, tama pa coteenu rupaajiniaajaaja!

<sup>12</sup> Puetunu nojorijianaari jiuujiaateriquiaa nojori jiyajenenuta. Tama nojorijiaarijia nequesoreetooquiaari nojori tacaaniutia:

—¿Casaa na miitiuyajaaranojoni?

<sup>13</sup> Tamasaca nojorijinijinioori saaja Jesu pueya macaatirii. Tama nojorijiaarijia tama sequetooreejaacujua:

—Cuno pojoriqui mashaasequenuya shocuanacuhuata.

*Pedro pohuatasano pueya niquiara*

<sup>14</sup> Jiyacaritij, Pedroori juhuacatecara pocuaree cuno pojori niquiara. Pedroori nujuaturiquiaa narta once pueyata. Na rupaa paaretaree Judiocuaca tojiniuriaari. Naa sequereeri:

—Cuarta Judiocuacanaa, maninia nia tojitiare casaa cua sequenutaniya niajaniani. Puetunu Jerusalén tiacajinia quiniaajanaa cuaara niishiiria cua pohuatasano. <sup>15</sup> Niaari canaa jiyaniya mashaasequenuyano. Pananucuaajaari shusha taqueejiya. Maja canaa mashaasequenuunu. <sup>16</sup> Niaari canaa tojitiaa tamaatia rupaaca pocuaano. Niocuaajaari tariucuacaanu Pueyaso sequesano caminiujiunia Joel pohuatasano. Cuno niaa na niquiyani, cunocuaajaari na sequesano, shusha tohuateyani. Nojuajaari naa sequequiaaritij:

<sup>17</sup> “Pueyasoori naa sequeyaquij: ‘Quera jiya puequesacari, janiyari cua Sohuanu niquitionutaniya puetunu pueyarajanaani. Naacuajitij, mashiquioriiri janiyajiniji pohuatanutaniya, niyacoojorinio. Cua Sohuanuuri cua niishishano niquitiniutaniya mashiquiori juhua na maquenujinia. Cua niishishano niishitiojonutaniya saaquiapue na maquenujiniajaariuhuaaj. <sup>18</sup> Cuno quishacari, janiyacua cua Sohuanu niquitiore puetunu cua tojitianaajanaani, canuu, maajipohuanio. Nojoriiri janiyajiniji pohuatanutaniya pueya niquiara. <sup>19</sup> Puereeta cua miishanoori jiya cajiniocua niquishaanutaniya. Cua miishanoori jiyacua niquishaanutaniyajuhuaaj, pueya na numootenura. Nanacaari niquishaanutaniya, mani, jiyanohua najacanio. <sup>20</sup> Pananuuri ninishiquiria quiniutianiya. Racaari juhua nanacara quiniutianiya-juhuaaj. Naa coteenutaniyari jiya puequenura. Na nuhuaji, Jiyaniijia-janaari rosenutaniya mijiria quiniaa na nequesoreenura, saminiucua pueya, macunucuanio. Na rosesacari, cutara juuca quiniutianiya, puereetajuhuaaj. Jiyanohua shanohua quiniutianiyaari na rosesacari. <sup>21</sup> Puetunu Jiyaniijia secojonaa pueyajanaari jiyanooshaanutaniya Pueyaso pueya nojori quiniuria’ ”.

’Supuetana Joelri naa naajiotaquiaari Pueyaso sequesano tarijiatej.

<sup>22</sup> Naaratej, socua cua tojitiare cuarta Israel pueyanaa. Jesujiniji nia pohuatanutaniyanijia, Nazaret tiacajinijinio pueyano. Pueyasocuaajaari pa niishitiquiaari, Jesuuri na jiyarosano pueyano quiquiaari. Naacuajitij, Pueyasoori na poonitijioquiaari pa niquiara jiyanohua jiyajeneta casaa na miiniuria. Paacuajaari nocuaji jiuujiatequiaarini pa niquishacari Jesu miishano Pueyaso cumaacata. Na miishanoori maninia quiquiaari pa niishiniuria Jesuuri seetanujuanaa Pueyaso Jiyarosano quiquiaari. Niajanuyacuajaari maninia niishiya puetunu maninia na miishanojuanaa.

<sup>23</sup> Saniniuujia, Jesu jaara niquitiosaarucuaa niajaniani, niaari na quiarucuaa juhua sesa miiijia. Na nuhuaji, niaari Pueyaso tojiyashijiaca pueya na moterucuaa maca niyacutesanojinia, taa Pueyaso paniquiaari tarijiacuajani. Pueyasocuaajaari niishiquiaari naa mosaanutaniyari Jesu.

<sup>24</sup> Pueyaso cutaraari na samiitianiriohuacuaa macujiniji. Na carterohua macujinijiiri. Majaari quenaaja tamonu cumaacaraca quijia quini quiquianu Jesu na jiyojetenura macu quiquiojinia pueyaracaanura.

<sup>25</sup> Pueyaso Sohuanu jaara pohuatequiaari pa supuetanaa jiyaniijia David, nojuajaari juhuacarijia naa pohuataquiaari Jesu sequesocoriquianotej:

“Cua shuriucua niquiquiaa Jiyaniijianijia. Nojuajaari cua shuriucua quiya, cua miaquetajara, maja quenaaja casaa teteyatenura janiya. <sup>26</sup> Naaratej, coojiaari timirii. Cua niti taquiriocuateree

cua shuquiriniutianijia. <sup>27</sup> Naajuhuj, cua cusosacari, cua queteeri juhuajaniya quiniutianiya, cua niishishacari quiaari cua tarinitiaaquiniutianiya macunucua quiquiojinia. Quiaari cua shu moquijiaaquiniutianiya saa maninia miijiaja cua quishacari quia niquiara. <sup>28</sup> Quiaari cua niishitiojoree maninia cua miiniuria, pueyaracaanu quiijara cua quiniuria. Quiaari jyanohua cua shuquiritiniutianiya quiata cua quishacari pueyaracaanu”.

<sup>29</sup> Cua pueyanaa, paacuaajaari niishiyani, pa supuetanaa jyaniiija Davidri jamosaaquiaari na cusosacari. Na jamaari niya quiyajaa Jerusalén tiacajinia. <sup>30</sup> Nojuajaari niishiquiaari Pueyasoori tari na sequequiaaricuaaja:

“Davidnaa, tamonu pueyanoori supuenutaniya quiajaniyajiniji, jyanohua quia nuhuaji. Cuno pueyanoori Jyaniiijara cua jiyatesano quiniutianiya quia niti. Nojuajaari cua jiyarosocoriquiano Cristo. Seetanu juanaa naa quiniutianiyari Davidnaa. Maja cua sapojonu”.

’Pueyanaa, paacuaajaari niishiyani Davidri Pueyaso sequesano caminiuujia quiquiaari. <sup>31</sup> Naacuaajitij, Davidri Cristojiniji p Duartequiaa jyanohua tariucuaaanujiniji, juhua tari na niquishano. Pueyaso Sohuanuuri na niishitiquiaari taa Cristo miishaanutaniyani. Naacuaajitij, Davidri Cristo samiitianujiniji Duartequiaa naa na sequesacari: “Pueyasoori na tarinitiaaquiniutianiya macunucua quiquiojinia”, mariyata naa na sequesacari: “Na quete moquijiaaquiniutianiyari”. <sup>32</sup> Pueyasoori nio Jesu samiitianirihuacuaa. Na samiitianu nuhuaji, puetunu canaajanaari na niquiquianuni. Janiyari nia pohuataa seetanu canaa niquishanojuanaani. <sup>33</sup> Cutara na cumaacata, Pueyasoori na tacaniriohua na miaquetajara cajiriquiano, Jyaniiijajanaa na quiniuria. Na nuhuaji, Jesuuri Pueyaso Sohuanu maseree na Quejiniji, taa Pueyaso sequequiaari tarijiacuajani. Jesuuri saniniuujia quiarjia canaa na niquitiooree. Naaratej, niaari canaa niquirii tamaatia rupaaca pocuaano. <sup>34</sup> Majaari David tacanu quiquiaari jiyocuacaanu cutara. Nojuacuajaari Jesujiniji sequequiaari:

“Jyaniiija Pueyasoori cua Jyaniiija sequequiaari: <sup>35</sup> ‘Cua miaquetajara quia cajishiiijaara, janiya cuaara quia paraa shocotarejaatijia’ ”.

<sup>36</sup> Cunora, puetunu nijaniyajanaa Israel pueyanaa, niaa cumaati niishiya, Pueyasocuaajaari nio Jesu jiyatecanu Jyaniiijajanaa na quiniuria. Niaacuaajaari niyacutesanojinia na mocanucuaaja. Nojuajaari Cristo, Pueyaso jiyatesano Jyaniiijara. Majaari canaa pohuatasanojiniji nia taacanuunu pueyanaa.

<sup>37</sup> Pueya tojishacari naa Pedro pohuatasanootej, nojoriiri tetecatuquiaari. Pueyari saniniuujia Pedro nequesotaquiaari, na cojiniaanio:

—Canaa pueyanaa, ¿taa canaa miiniutianiyarinijia?

<sup>38</sup> Pedroori nojori riucuaquiaari:

—Nioojia nia tacatore sesa nia miiniuujiniji. Nijaniya cuaara moojinia tiuquinijiosaaria Jesucristoocua nia tiuushacari, nia jiyanooshaanura sesa nia miishanojiniji. Naa nia miishacaritij, Pueyasocua nia niquitioore na Sohuanu. <sup>39</sup> Pueyaso sequesacari nojuaja na Sohuanu niquitionutianiya pueya, cunoori niaaranocuaaja, nia niquiohuanonionio, tucuaaanu quiijacarajuhuj. Pueyaso Sohuanucuaajaari puetunu pueyajanaa niquitiosaanutianiya, cana pa Jyaniiija Pueyaso sequeya na muerasura na quiniuriacuajani.

<sup>40</sup> Pedroori jiyacari pueya pohuataree queraatia socua Jesujiniji na niishishano. Jyanohua nojori nacasureeri. Naa nojori sequereeri:

—Nioojia nia tacatorohua Pueyasocua, maja Jesu ruuretajaca nia cojiri-tiasaanura quejoonu mani quiquiojinia.

<sup>41</sup> Pedro pohuatasanoocua tiuuniaari tiuquinijiosaaquiaari. Cuno juuca, tres mil pueya naasucuaari coteenu Jesu tojitianaa rupuentaara quiquiaari. Pueyaso pueyari naa canequiaaritij. <sup>42</sup> Puetunu nojorijianaari maninia tojitiaquiaari pueyaracaanu Jesu jiyaramiquishano pueya niishitiojosano. Nojoriiri jatiqui quijia maninia. Majaari nojori juayonuujutanu quijia. Nojoriiri pueyaracaanu rerejojua neecaru serotanura Jesu cusonu niishiniuria. Mariyata Pueyaso secojonuujua pueyaracaanuuri.

*Panitiojuaca Jesu tojitianaa quishacari juhua tapueyocuacata*

<sup>43</sup> Jesu jiyaramiquishano pueyari jiyajeneta miishano miijioriquiaa Pueyaso cumaacata. Naacuajitij, puetunu pueyajanaari puereturiquiaa. Pueyari shiriiquitiurii. <sup>44</sup> Puetunu Jesuucua tiuuniaajanaari maninia rupuetooquiaari juhua tapueyocuacata. Nojoriiri maja jamuejaca quiquiaari. Casamiriaca pueyari na casami niquitiojoquiaari nareja casamiijiuniucua pueya. <sup>45</sup> Tamasacaari na jiišanaso casami niquitioquiaari na cumaneeca na masenura na casami sami. Na cumaneeca na masenu nuhuaji, nojoriiri tamasa niquitioquiaarijuhuaj, casamiijiuniucua jiišanaso puetunu nojori panishanojuanaajuhuj. Tamasaca pueyari na cuhuariquia niquitioquiaari nojori jiišanaso na cumaneeca, tamasa na naacunurajuhuj. <sup>46</sup> Nojoriiri jatiqui rupuetooquiaari. Nojoriiri rerejojua puetunu juucajanaa Pueyaso Secojoua tiajinia. Mariyata tama nojori tiajiniajaaja nojoriiri rerejojua, neecaru neecasenura Jiyaniijia Jesu cusonu nojori niishiniuria, mariyata jatiqui nojori miaquenuunura nojori shuquiriniutia. Nojoriiri maninia jiuujaraca quiquiaari. Nojoriiri maja tamonu pueya shocotanu panijaca quiquiaari. <sup>47</sup> Nojoriiri pueyaracaanu Pueyaso maninuhuaqueetariquiaa nojori shuquiriniutia. Puetunu Jesuucua tiuyashijaca pueyajanaari nojori paniquiaari. Puetunu juucajanaa, Jiyaniijia Jesuuri nojori canijiariquiaa, socua pueya tiushacari nocua.

### 3

*Sesarunocua pueyano jeeacasacari*

<sup>1</sup> Tamonu juuca, Pedroori Juanta tacatariquiaa Pueyaso Secojoua tiajinia. Tari quiquiaariiri pananu piriushacari. Nojoriiri jiyacari quiojonu jiiitiquiaari Pueyaso secojonura Secojoua tiajinia. <sup>2</sup> Jiyacaritij, tamonu sesarunocua pueyanoori tii cajitiariquiaa Secojoua tia tohuatayaji. Nojua-jaari naa rasanohuanaja quiquiaari. Pueyaracaanu patoojotasaquiaari-iri Pueyaso Secojouajiniara, pueya na mashiniquiniuria cumaneeca nojori tiuquitiasacari. Na cajitiasaqui tohuateya sesa quiquiaari “Tohuateya Maniniu”. <sup>3</sup> Sesarunocua pueyano jaara niquiquiaari Pedro, Juannio, nojori tiuquitianu panishacari Secojoua tiajinia, nojori maseree juucua na cumaneecaari. <sup>4</sup> Pedroori Juanta na shootiaree tacuriitia. Jiyacaritij, Pedroori na sequeree:

—Canaa quia niquiri.

<sup>5</sup> Sesarunocuaari juucua shootiariquiaa nojori. Cumaneeca niquitiosaariquiano jiyaniriquiaa juucuaari. <sup>6</sup> Pedroori na sequequiaari:

—Shaaqui cua cumaneeca. Shaaqui tojetaarucujanaa. Naajaa, cua jii-  
asanota quia naacureera quiarijia. Quia sequeya Jesucristo sesajinianijia:  
“Quia sanere. Quia rucuanerejuhuaj”.

<sup>7</sup> Pedroori na juaashiquiajiniji na quiaquiaari. Na nujuatereeri. Na niohuacaari jiyacari ritia jeequequiaari na sanesacari. Na sairi maninujiaacara quiquiijuhuj. <sup>8</sup> Sesarunocuaari juhuacatecara rucuanequiaari.

Nojoritia tiuquiquiaari Pueyaso Secojojua tiajiniaari. Maninia rucuaneriquiaari. Jaacuatariquiaari. Pueyaso maniniuhuaqueetariquiaajaariuhuj. <sup>9</sup> Puetunu pueyajanaari na niquiquiaari rucuaneyano, Pueyaso maniniuhuaqueetaanojuhuaj. <sup>10</sup> Puetunu pueyajanaari na niishiquiaari nojuajaari sesarunocuacuja, Secojojua tiajinia tohuateya Maniniujinia cumaneeca mashiniquijiojuatej. Pueyari cunora jiuujiatequiaari. Jiyanohua shiriiquitiuquiaariiri.

*Pedro pohuatasacari Pueyaso rupaa pueya niquiara*

<sup>11</sup> Sesarunocuaari Pedro juaashiquia carteyaquiquiaari, Juan juaashiquiano. Nojoriiri Pueyaso Secojojujinia nujuaturiquiaa tamocora. Nojori nujuatusaquiiri pueya jiyaniquishano tariucuaaanu jiyaniijia Salomón canujuucojojua quiquiaari. Puetunu pueyajanaari nocua netecuatuquiaari na shiriiquiniutia. <sup>12</sup> Pedro niquishacari nojori, pueya sequequiaariiri:

—Cuarta Israel pueyanaa, ¿casaara nia jiuujiateya nocujajini? ¿Casaara nia niquitiaa canaani? ¿Niaate jiyaniya canaa na niohuaca jeeareeni? Maja canaa. Majaari canaa cumaacata na jeequenu quirii. Niaa naa-sucuaari jiyaniya canaari nio miiriini socua maninia miijia canaa quini-uucua Pueyaso niquiara tamasaca pueyajiniji. ¡Maja! <sup>13</sup> ¡Jesucuaajaari na jeeocarohua! Nojuacuajaari na Que Pueyaso jiyatesano Jiyaniijiajanaa na quiniuria. Jiyaniijiajanaara na jiyatenacuajaari Pueyaso, cante nio pojori pa supuetanaa jiyaniijia quiquiaaricujani: Abraham Jiyaniijia, Isaac Jiyaniijiano, Jacobo Jiyaniijiajuhuaj. Tama pa supuetanaa Jiyaniijia Pueyasocuaajaari Neyanu Jesu jiyatequiaari Jiyaniijiajanaa na quiniuria. Niaa cutaraari Pueyaso Niyanu niquitiocanu jiyaniijia Pilato, nojuaja na motenura. Pilato cartenu panishacari Jesu, majaari nia paniniu quiquianu na cartesaanura. <sup>14</sup> Niaa maara maninia pueyanoocuaaji tacucanu saniya cutara, niaari pueyano puecoojuaacua shiriiquitiurii saaja Pilato cartenura jiyano sesoriquia pueyano seque. <sup>15</sup> Niaari naa motecanu pueyano samiitianiijiacuajatej. Naajaa, Pueyasoori na samiitianiquianuhua macujiniji. Canaari na niquiquianuni. Naacuajitij, canaari nojuajiniji nia pohuataani. <sup>16</sup> Nio sesarunocua pueyanoori Jesuucua tiurii. Naacuajiti jeequerohuari. Nojuacuajaari sesarunocua quiquiaari taa nia niquiquiaaricujanoj. Jesuucua na tiushacari, na cuaqueya cumaquiriiri. Na cuaqueyari seetanujuanaa jeequerohua maninia, taa nia niquiyacuajanoj. <sup>17</sup> Cuarta Israel pueyanaa, quiarijia niishiyaniija, majaari nia niishiniu quiquianu casaa nia miiquianuni. Majaari pa camarucua niishiniu quiquianujuhuj. Niaari Pueyaso Jiyarosano mocanu nia niishiyaquishacari cante nojuaja quiquianuni. <sup>18</sup> Naacuajitij, Pueyasoori na sequesano tohuatecanu, tarijia na niishitishano na rupaa caminiujiunaa. Seetanujuanaa, puetunu Pueyaso sequesano caminiujiunaaajanaari pa supuetanaa niquiara poojotaquiaari: “Pueyaso Jiyarosanoorori naquiya miishaanutaniya”. Jesuuri naa miishaacanu taritij. <sup>19</sup> Naaratej, nioojia nia tacatore sesa nia miishanojiniji. Pueyasocua nia tacaterohua sesa nia miiniu tuujusaanura. <sup>20</sup> Naacuajitij, pa Jiyaniijia Pueyasoori na naata juhua maniniushiquiariria jiyatenuhua pajaniyara, shuquiriaatia pa quiniuhuara mijiria na jiyarosacariuhua Jesu. Pueyasoori tarijia na sequequiaari pa Jiyaniijia na quiniuria. <sup>21</sup> Nojuajaari jiyocuacaanu quiniutianiya na Que shuriucua, Pueyaso cuara tucuatara-jaatijia puetunu tariucuaaanu na pohuatanishanojuanaa na sequenu panishano caminiujiunaa. <sup>22</sup> Moiséscaajaari naa sequequiaari pa supuetanaatej:



“Jiyaniijia Pueyasocuaajaari niaacua jiyaronutaniya nojuajiniji pohuatana tama nia niqiuohuacuajinio supuenojuaaja, taa na jiyaroquiaari janiyacuaani. Nojuaja jaara supuere, niocua puetunu na sequesano-juanaa tojiri. <sup>23</sup> Canapuete cuno pueyano pohuatasano ruuretanutaniyani, nojoriiri Pueyaso saquiriojosano pueya tajiniji shaajasaanutaniya puetunurajanaa”.

<sup>24</sup> Pueyanaa, puetunu Pueyaso sequesano caminiujiuniaajanaari Moisés nuhuaji naa Jesujiniji pohuatanuuquiaarijiuhuj. Naacuajitij, Samuelri Jesucristojiniji pohuataquiaari taa na niniutianiyani. Naajuhuj, Samuel nuhuaji, puetunu Pueyaso sequesano caminiujiuniaajanaari naa pohuatanuuquiaarijiuhuj. <sup>25</sup> Puetunu Pueyaso sequesano Jesujinijianaani, cunoori quiarijia pajaniyara, taa Pueyaso pohuataquiaari tariucuacaanu na sequenu panishano caminiujiuniaacuajani. Nojoriiri pa supuetanaa quiquiaari. Pajaniyaranojaariuhuj Pueyaso sequesano pa supuetana Abraham. Pueyasoori naa sequequiaari pa supuetana Abraham:

“Quia muetusanojiniji tamonu pueyanoori supuenutaniya quia nuhuaji, cante pueya shuquiritiniutianiya puetunu jiyacajiniaajanaacuajani”.

<sup>26</sup> Pueyaso jaara na tojijia Nyanu samiitianiquianu, coteenu na jiyaroree pocuaari poojia tacatoriquiano, sesa pa miiniu pa cartenura, shuquiriaatia quijiara pa quiniuria.

Pedroori naa pohuataquiaari pueya niquiaratej.

## 4

### *Judiocuaca camarucua nequesoreesacari Pedro, Juannio*

<sup>1</sup> Pedro pohuatasacarijia pueya niquiara, nocua nijioquiaariiri pueyacuara secojonaa, Pueyaso Secojoua tia cojuanaata, Saduceocuatania. <sup>2</sup> Nojoriiri Pedro tojiquiaari pueya niishitiojiyano. Nojuajaari pueya niishitiojoriquiaa macunucuaari saneecuatunutaniuhua na jamacajiniji, naatej taa Jesu samiitiarohuacuaani. Cuno jiyaniijianucua jaara naa tojiquiaari sequesthiyanotej, nocuaji jiyanohua juaaquiocuaariiri, na ruuretasacari Pedro sequesano. <sup>3</sup> Cuno juaaquiocuaanoori Pedro quiatuquiaari, Juannio. Jiyacariiri tariucua tenacari quiquiaari. Tariucua niucua nujuatejosaaquiaariiri. Nojoriiri tii juhuaquequiaari nujuatejojuajinia. <sup>4</sup> Naajaa, queraatia pueyari Jesuucua tiuucuaari Pedro pohuatasacari Jesujiniji. Quera cinco mil saaja canuuri tari Jesuucua tiuunaa quiquiaari. Maajipohuari serojosoo quiquiaari.

<sup>5</sup> Tariqui, Judiocuaca camarucuaari rerejoquiaari camarucua nacasunaata, Moisés Rootasanojiniji niishitiojonaatanio. Nojoriiri Jerusalén tiacajinia rerejoquiaari Jesujiniji pohuataanaa nojori nequesoreenura. <sup>6</sup> Anásri tii quiriqiaajuhuj. Nojuajaari pueyacuara secojonaa jiyaniijia quiquiaari. Caifásri tii quiriqiaajuhuj, tamonu Juannio, Alejandronio, mariyata puetunu secojonaa jiyaniijia tapueyocuatania. <sup>7</sup> Pedro, Juannio, nojoriiri nujuatejojuajiniji tohuatejosaaquiaari. Nujuatejosaaree jiyaniijianucua tajiniaari. Pedro shocua, Juan shocua cajitiuniaari nojori nequesoreere:

—¿Taa nia miiriucuaa noonijia, sesarunocuatej? ¿Cana cumaacata nia jecarohuacuaanoj? ¿Cante nia sequecanu naa nia miiniuriani?

<sup>8</sup> Jiyacaritij, Pueyaso Sohuanuuri Pedro jiuujia cumaquiquiaari Pueyaso niishitiajata na pocuanura. Naacuajitij, Pedroori naa nojori riucuaquiaari:



<sup>9</sup>—Canaa camarucuaanaa, nia pohuatareera sesarunocujiniji, taa na jeequerohuacuaani. <sup>10</sup> Njaa canaa nequesoreetaate, nia tojitiare canaa sequesano, nia niishiniuria cua pohuatasano, puetunu Israel pueyajanaa niishiniuriajuhuaj. Nio pueyano niya njuuaani, nojuajaari Jesucristo cumaacata jeequerohuacuaa. Njaari Nazaret tiacajinijinio Jesu cusojuacanu niyacutesanojinia. Pueyaso cutaraari na sanacanhua macujiniji, pueyaracaanu na quiniuhuara. <sup>11</sup> Njajaniyari juhua saitia tiajonaa Pueyasora. Nja tiasacari, njaari maniniuujajau saajia jataquiaari, nia jiyanihacari sesarujajau naasucua. Na camaruuri saniniuujia sequeya:

“Cuno nia jatasano saajiani, cunoori saniya cua maniniuujajau saajia”.

Njaari naa Jesu jataquiaari juhua saajia sesarujajau. Naajaa, Pueyasoori na njaquiaariuhua socua maniniushiqui. <sup>12</sup> Majaari tamonu quiniu pocuaji tacuna. Puetunu pueya tajinijinijuanaani, maja Pueyaso tamonu pueyano sesa jiyaniquiniu quiquiaari cante pocuaji tacuriquianoni. Saaja Jesu cutaraari sequesaaquiaari pocuaji tacuriquianora.

<sup>13</sup> Judiocuaca camarucuaari jiyanoahua na namijiaa riunitiquioquiaari nojori niquishacari taa Pedro, Juan seetanujuanaa cumaacata pohuatariquiaa nojori niquiarani. Nojori Pedro, Juan niishiquiaari nojori seetanujuanaa maja puera naajionuujuaca quiquiaari. Nareja poonijionuujuaca pueyajinijinio quiquiaari. Naa nojori niishishacaritij, nojori seetanujuanaa niishirii nojori Jesu cojiniaa quiquiaari. <sup>14</sup> Sesarunocua jeequenohuari cuniqui nojori shuriucua nujuariquiaajaacuhaj. Naaratej, jiyaniijianucuaari socua sanaajetaquiaari. Saaja niishiriojonuuriquiaari.

<sup>15</sup> Camarucuaari Pedro, Juan tohuatanijioquiaari tamocora nojori tajiniji. Jiyareta camarucuaari tama pocoojoquiaarijiaaja. <sup>16</sup> Naa sequetuquiaariiri: —¿Taa pa miya socua nio pueyarini? Puetunu Jerusalén tiacajinia quini-aajanaari nojori cutara miishanojiniji niishiya. Majaari pa naata seetanu parta Israel pueya, pa sequenura nojori, cuno sesarunocuaari jeeCASOO. Nojoricuaajari tari maninia na niishitiuya. <sup>17</sup> Nio nojori pa piriyojore juhuari, maja socua quiarijia nojori pohuatanura Jesujiniji pueya niquiara, nojori miishano paaqueyaquiniuria socua niya pa tiacajiniani.

<sup>18</sup> Camarucuaari socua piiquiaariuhua Pedro, Juannio. Nojori nacasuree jiyanoahuari, maja socua quenaaja nojori pohuatanura Jesujiniji pueya niquiara.

<sup>19</sup> Pedroori Juanta nojori riucuaquiaari:

—¿Canaatucua casaara Pueyaso samiritiare canaa tojiniuria njajaniyani? ¿Taa nia sequeyani jiyaniijianucuaanaa? <sup>20</sup> Maja cutaraari canaa naata tarinitianu pohuatanu canaa niquishano, canaa tojishanonio.

<sup>21</sup> Camarucuaari nojori piriyojoquiaari juucuohuj. Puetunu pueyajanaari saaja maniniuhuaqueetariquiaa Pueyaso, puetunu maninia na miishanojinijianaa. Naaratej, camarucuaari socua Pedro tarinitiaquiaari Juannio. Majaari na mojoosaanu quirii. <sup>22</sup> Pedro jeeCASANOhua sesarunocua pueyanoni, nojuajaari cuarenta marijia shocotejoquiaari tari na quishacari.

### *Jesu pueya secojosacari Pueyaso, na cumaquiniuria nojori*

<sup>23</sup> Pedro, Juan jaara cartesaaquiaari, nojori narta Pueyaso pueyacua quiojoquiaariuhua. Nojori pohuatareeri Judiocuaca camarucua sequesano nojori, camarucua nacasunaa sequesanojuhuaj. <sup>24</sup> Na tojishacari camarucua piriyojosano, puetunu nojorijianaari Pueyaso secojonu cotequiaari. Naa sequetuquiaariiri:

—Canaa Jiyaniijianaa, quiaari jiya cajiniocua shipinia, jiyanio. Shoniniacu caminiaari quia shipinishanojuhuaj. Puetunu casaajanaari quia

shipinishano. Quiaari jiyano hua maninia. <sup>25</sup> Canaa supuetanaa jiyaniijia Davidri quia seru quiquiaari. Naacuajitij, quia Sohuanuuri na pohuatequiaari quia sequesano Jesujiniji juhua tariucua miishano. Quiaari naa na pohuatequiaaritij:

“¿Casaara jiyacua quiniaa pueya juayani? Pueyari najuhuana sesa niishiri-  
ojoriquiaa juucua. <sup>26</sup> Jiyajinijinio jiyaniijianucuaari na juaaquiaca sanetaree. Queraatia tiacajinijinio camarucuaari Jiyaniijia Pueya-  
soocuara roojotooree, na jiyarosano Cristoocuaranio”.

<sup>27</sup> Pueyasonaa, naacuaaquiniatejaj. Jiyaniijia Herodes, Poncio Pilatonio, nojoriiri nio tiacajinia rerejocanu narta taucucata, Israel pueyatano. Quia Niyanuucuaara roojotoocanuuri, tama quia Jiyarosanoocuarajaaja. <sup>28</sup> Naa nojori miiniuucuatej, nio pueyari tari quia miiniu panishano miiriucuaa, taa quia sequequiaari tariucuaaanucujani: “Cua Niyanu cuaara mosaaria puetunu pueyacuaraajanaa”. <sup>29</sup> Canaa Pueyasonaa, quia tojishuriucuaraj. Nojoriiri quiaritia canaa miananojiya saniniuujia. Canacuajaari quia seyani. Canaa jiuujia quia cumaquiri quiaritia, canaa pohuatanura socua quia rupaa canaa puereyaquiniutia. <sup>30</sup> Cusosuhua cuaara naatanijiosaaria quia cumaacata. Canaa jiyaniquishacari quia Niyanu sesa, jiyajeneta casaa cuaara miijiosaaria quia cumaacata pueya niquishocoriquiano. Nojuacua-  
jaari saa maninija.

<sup>31</sup> Nojori puecasacari secojonu, nojori quishaqui tiaari canashiyaquiji jiuuquiutiaquiaari. Pueyaso Sohuanuuri puetunu nojori jiuujiajina tiuquiquiaari, nojori na cumaquiniuhua. Naacuajitij, pueyari saaja maninia pohuataquiaari Pueyaso rupaa pueya niquiara. Majaari na pueretunu quiquiaari.

### *Jamueyashijia Jesu tojitiana quishacari*

<sup>32</sup> Jesuucua tiuuniaari maninia juhua rupuetootesano quiquiaari puetunujuanaa. Nojoriiri juhua seetanujuanaa tapueyocucataja quiquiaari. Majaari nojori sequenu quiquiaari: “Cua casami saaja quiria quiniutianiya”. Nojori jiiitasano casamiiri saniniuujia puetunu narta Jesuucua tiuuniaarajanaa quiquiaarijuhuaj. <sup>33</sup> Jesu saquiriojosano pueyari Jesu samiitanujiniji poojotaquiaari jiyano hua cumaacata. Naajuhuj, Pueyasoori puetunu Jesuucua tiuuniaajanaa naacuriquiaa jiyano hua, shuquiriaatia nojori quiniuria. <sup>34</sup> Puetunu Pueyaso pueyajanaari na panishano jiiitaquiaari puetunujuanaa. Nojorijinijinio jaara cuhuariquia jiiitaquiaari, tiano, nojoriiri na niqutioquiaari cumaneecara. <sup>35</sup> Jaara cumaneeca masequiaari na casaa sami, nojoriiri nareja na niqutioquiaari Jesu saquiriojosano pueya. Nojoriiri saniniuujia casamiijiu Pueyaso pueya na serotaquiaari, nojori jiiitanura na panishanojuhuaj. <sup>36</sup> Nojorijinijinio, tamonu pueyanoori quiquiaari. Na sesaari José, Levita pueyano. Jesu jiyaramiquishano pueyari na sesojoquiaari Bernabé. Nioori sequeya “Cumanijiana”. Chipre jiyajinia na raja. <sup>37</sup> Bernabeeri cuhuariquia jiiitaquiaari. Na cuhuariquia niqutioquiaari cumaneecaraari. Jaara masequiaari cumaneeca na cuhuariquia sami, nojuajaari nareja na niqutioquiaari Jesu jiyaramiquishano pueya, casamiijiu narta Pueyaso pueya niqutiojosaanura saniniuujia.

## 5

*Ananías, Safira sesa miishanojiniji pohuatasano*

<sup>1</sup> Tamonu pueyanoori quiquiaari. Na sesaari Ananías quijia. Necocua sesa quiquiaari Safira. Nojoriiri na cuhuariquia niquitioquiaari cumaneecara-juhuj. <sup>2</sup> Ananíasri na cuhuariquia samijiniji queyataquiaari nera. Na cureeno pataquiaari Jesu saquiriojosano pueyacuara. Juhua papatasoo niquitioquiaari na sapojonutaari. Necocuaari na miishano niishiquiaari-ijuhuj. Majaari neyacata na quiniu quiriquiaa Ananías niquitiosacari nareja na cumaneeca. <sup>3</sup> Ananías niquitiosacari na cumaneeca, Pedroori na sequeree:

—Ananíasnaa, ¿casaara quia tiuquinirii Sesaaca quioojiajiniani, quia sapojonura Pueyaso Sohuanu juucuani? ¡Nojuacuajaari cua niishitiquii nio cumaneecaari maja puetunu quia masesanojuanaa quia cuhuariquia samijiniji! ¡Quiaacuajaari tiji queyataree! <sup>4</sup> Quia cuhuariquia quia niquitioyaquishacari-ijia cumaneecara, cuno cuhuariquiaari quia casaa quiriquiaa. Na nuhuaji, quiaa jaara quia cuhuariquia niquitioree cumaneecara, quia cuhuariquia samiiri quia casaa quiriquiaajuhuj. ¿Casaara naa sesa quia niishiriojoreerini? Naa sacuaraatia quia miishacaritij, majaari quia sapojonu quirii parta pueyano. ¡Quiaa cutaraari Pueyaso sapojoree juucua!

<sup>5</sup> Ananías tojishacari naa Pedro sequesantej, ¡macuuri pojoquee! Puetunu pueyajanaa jaara tojiniuuquiaari nocuaji, jiyanoahua shiriiquituuquiaariiri. <sup>6</sup> Mashiquioriiri na jiunioquiaari toquejinia. Na nuhuaji, na patuquiaari na jamonuraari.

<sup>7</sup> Jiuujianaraca hora nuhuaji, necocuaari juhujaniya tiuquiquiaari Pedroocujuhuj. <sup>8</sup> Pedroori na nequesotaree:

—Cua sequere, ¿niojuanaate nia cuhuariquia sami quiriucaa?

Na riuacuareeri:

—Jaa, niojuanaacuaaquinatejaj.

<sup>9</sup> Pedroori na sequeree:

—¿Casaara naa nia rojotoorucuaa Pueyaso Sohuanu nia sapojonurani? Quia niquiri. Cuno mashiquioriiri quia niyaca jamonu nuhuaji shusha tiuquiiijohua. Nojoriiri quiaritia quia panutaniyajuhuj.

<sup>10</sup> Jiyacaritij, maajiiri macu pojoquee Pedro shuriucujuhuj. Mashiquiori tiuquiiijosacariuhua, nojoriiri Safira niquishuhua pojijanojuhuj, tariucua macu. Nojoriiri na patuquiaariijuhuj. Neyaca shuriucua na jamotuquiaariiri. <sup>11</sup> Puetunu Pueyaso pueyajanaa, tamasaca pueyano, nojori jaara tojiniuuquiaari puetunu nio miishanojinijianaa, jiyanoahua pueretuquiaariiri.

### *Queraatia miijosacari Pueyaso cumaacata pueya niquiara*

<sup>12</sup> Jesu jiyaramiquishano pueyari jiyanoahua cutara casaa miijioquiaari Pueyaso cumaacata. Queraatia pueya naatanijioquiaariiri. Puetunu Pueyaso pueyajanaari pueyaracaanu rerejoquiaari pueya jiyaniquishano tariucuaanu jiyaniijia Salomón canujuucojojuajinia, Pueyaso Secojua tiajinia. <sup>13</sup> Tamasaca pueyari nojori puerequiaari. Majaari nojori rupesaanu quijia. Na pueretujuacaari nojorijiniji sequetujua:

—Cuno pojoriiri maninia pueya.

<sup>14</sup> Queraatia pueyari Jiyaniijia Pueyasoocua tiuuquiaari, canuu, maa-jipohuanio. <sup>15</sup> Naajuhuj, cusosuhuari patootasaaquiaari na maquetucujinia nuujiniara. Pueyari naa niishiriojoquiaari, Pedro jaara cusosuhua shuriuquiuco tajimia, cusosuhuari naataconutaniuhua Pedro naaqui jaara nojori caco netema. <sup>16</sup> Queraatia Jerusalén tiaca shocua quiniaa pueyari na cusosuhua patootaquiaariijuhuj, Jerusalén tiacajiniara. Samaruhua sesosano pueyari jaatucunuusaaquiaariijuhuj. Puetunu pueyajanaari naatanijosaaquiaari.

*Pedro, Juan nujuatejosacari nujuatejojuajinia*

<sup>17</sup> Naaratej, pueyacuara secojonaa jiyaniijia, nata quiniaa narta Sa-duceocuacanio, nojoriiri juaaquoquiaari shocotasano nojori quishacari.

<sup>18</sup> Secojonaa jiyaniijiaari na pueya jiyaroquiaari Jesu jiyaramiquishano pueya nojori quioonura. Jaara na quiootuquiaari, nujuatejosaaquiaariiri Judiocuaca nujuatejojuajinia. <sup>19</sup> Pueyaso seruuri niucua jiyocuacaanuji nojoriicua rosequiaari. Nujuatejojua tohuateya riataseeri. Na tohuatejosacari Pedro, Juannio, nojori sequereeri:

<sup>20</sup> —Juhujaniya nia quiaarohua. Pueyaso Secojojua tiajinia puetunu Jesujinijijianaa nia pohuatara pueya niquiara. Nia pohuatarejuhuj taa jatanishano pueya nia quiya quiarijiani.

<sup>21</sup> Nojoriiri Pueyaso seru sequesano tojiquiaari. Nojoriiri tariquicuaji quiojoquiaari Pueyaso Secojojua tiajinia. Tii niishitiojonuuriquiaa juhujaniya Jesujiniji pueyari. Jiyacari, pueyacuara secojonaa jiyaniijiaari nata quiniaata saniniuuja quiojoquiaari pueya nequesoreesaqui. Puetunu Israel pueya camarucujanaa rerejotereeri, nojori nequesoreenura Jesu jiyaramiquishano pueya. Puetunu nojorijianaa jaara tari rerejoquiaari, na pueya sequequiaariiri nojori tohuatejonura Jesu jiyaramiquishano pueya nujuatejojuajiniji, nequesoreesocoriquiano. <sup>22</sup> Na pueya jaara tiuquitiaquiaari nujuatejojuajinia, majaari nujuatejosano na riuriatatunu quishii nujuatejojuajinia. Nojoriiri tacaretacuhua na shaacanu nuhuaji. <sup>23</sup> Naa pohuatanuusuhua camarucua niquiaraari:

—Canaa tiuquishacari nujuatejojuajinia, canaari maninia cumaatia mishiquionucua na riuriataseeni. Tii cojuanaari maninia cojuariquiaa na tiotiu. Canaa riatasacari tohuateya, ¡shaacoori quiriquiaa!

<sup>24</sup> Secojojua tia cojuanaa camarnu, mariyata pueyacuara secojonaa jiyaniijianucuaari tama sequetooquiaarijiaaja nojori shiriiquiniutia:

—¿Taaterini? ¿Taariquitijia socua na nuhuaji quiniutianiyatej?

<sup>25</sup> Jiyacaritij, tamonu pueyanoori camarucuaacua tiuquishii. Naa nojori sequeeseeri:

—¡Noo pojori, niaa na nujuatejocanu nujuatejojuajiniatej, nojoriiri juhujaniya pueya niishitiojonuya Pueyaso Secojojua tiajinia!

<sup>26</sup> Tari nojori niishishacari tee Jesu jiyaramiquishano pueya quiriquiaani, Secojojua tia camarnuuri na pueyata quiojoquiaari Jesu jiyaramiquishano pueya quioonura. Jaara na quiootuquiaari, nojoriiri jacaria na jaatucunuquiaariuhua. Secojojua tia camarnuuri pueya puereriquiaa. Nojori jaara caponeere Jesu jiyaramiquishano pueya na juaaniutia, pueya mariqui nojori jacure saitia saniniuurijia. Nojoriiri cuno puerequiaari. Nocuaji Jesu jiyaramiquishano pueyari jacaria jaatucunuusaaquiaari. Majaari na caponeesaanu quiquiaari. <sup>27</sup> Jaara tiuquitiasaaquiaariuhua, nojoriiri Israel pueya camarucujanaa tajinia nujuatejosaaquiaari, Sanedrínucua tajiniatuhuj. Pueyacuara secojonaa jiyaniijiaari nojori sequequiaari:

<sup>28</sup> —¡Majaquiiri nia niishiniu tojinu! Canaacuajaari tari nia tenujucanu juucuanu maja socua cuno Jesujiniji nia pohuatanura pueya niquiara. ¿Niaate nia numaa shama tojiquianu canaa sequesano? Naa nia niishitiojosacaritij, ¡puetunu Jerusalén tiacajinia quiniaajanaari canaacua tiutianutaniya Jesu mosaanu! Canaa sequetunutaniyari: “Cuno pojoriiri Jesu motucanu”.

<sup>29</sup> Pedroori narta Jesu saquiriojosano pueyata nojori riucuaquiaari:

—Seetanujanaari, pueya cuaara Pueyaso sequesano miiria coteenu, maja narta pueya sequesano. Maja cutaraari canaa tarinitianunoj. Na nuhuaji cutara, nio jiyajinia jiyaniijianucua sequesano cuaara miishaaria.

<sup>30</sup> Pueyasoori tariucuacaanu pa supuetanaa Jiyaniijia quiquiaarijuhuaj. Cuno Pueyasojuaanaacuajaari niyacutesanojinia nia cusojuasano samiitianiquianuhua. <sup>31</sup> Pueyasoori na tacaniquianu jiyocuacaanu. Na miaquetajara na cajitiquianuuri Jiyaniijiajanaa na quiniuucua, pocuaji Tacuna na quiniuucujuhuj. Naa miiquianuuri Israel pueya tacatonuhua noojia Pueyasocua, Pueyaso jiyanooniuria pajaniya sesa pa miishanojiniji. <sup>32</sup> Naaratej, canaari canaa tojishano pohuataani, canaa niquishanonio. Naajuhuj, Pueyaso Sohuanuuri canaa niishitiojoquiaa maninia canaa pohuatanura pueya niquiara. Pueyasocuajaari na tojitianaa niquitioquiaa na Sohuanu.

<sup>33</sup> Naa Judiocuaca camarucua tojishacari nojori sequesantej, juaaquioreeri. Nojori puecoonu panirii juucuaari. <sup>34</sup> Jiyacaritij, tamonu pueyanoori narta camarucua tajiniji nujaquiaari pocuanura. Na sesa quiquiaari Gamaliel, Fariseo pueyano. Nojuajaari Pueyaso tariucuacaanu rootasano niishijia quiquiaari cutara. Naajuhuj, nojuajaari jiyanoohua narta Israel pueya tojishano pueyano quiquiaari. Gamalielri Secojoua tia cojuanaa camarnu sequequiaari Jesu jiyaramiquishano pueya na tohuatanijionura rupaquijia. <sup>35</sup> Na nuhuaji, saa camarucua quishacarijia tii nata, nojuajaari naa nojori sequequiaaritij:

—Cuarta Israel pueyanaa, jacaria nia niishiriojore taa nia miiniutianiya nio pueyani. <sup>36</sup> ¿Majateeri nia niishiniu taa Teudas miiquiaari quiari naatajani? Nojuajaari jiyaniijia quiniu paniquiaari juucua. Queraatia pueyari na nuhuajiquiaari, quera cuatrociento pueya. Na nuhuaji, Teudasri mosaaquiaari. Puetunu na pueyajanaari niyaquejoquiaariuhua. Naa puequequiaariiri Teudas miiniu panishano. <sup>37</sup> Teudas nuhuaji, jiyaniijia César naajiotanishacari puetunu pueya sesacajanaa, Galilea jiyajiniinio tamonu Judasri jiyacari César ruuretaquiaari. Queraatia pueyari na nuhuajiquiaari nojori jiyaniijia na quiniuria juucua. Nojuajaari mosaaquiaarijuhuaj. Puetunu na pueyajanaari niyaquejoquiaariuhujuhuj. <sup>38</sup> Naaratej, naa nia sequeyanijia: nia tarinitiare nio canuu. Nojori niishitiojosano jaara tama nojori niishishanojuaja quiri, shaajenutaniyari. <sup>39</sup> Saniniuuja, nojori miishano jaara seetanujuaana Pueyasojiniji quiri, majaari nia naata nojori tarinitiniu quiniutianiya nojori miishanojiniji. Nocuaji tama nia cuaqueyajaaja nia cojuare, majaari Pueyasota nia miaquetoojonuruhua, naa nojori nia miishacaritij.

<sup>40</sup> Puetunu camarucujanaari Gamaliel sequesano tojiquiaari. Na nuhuaji, Jesu jiyaramiquishano pueyari tiuquinitiasaaruhi. Camarucuaari nojori mojooree nareja. Nojori tenujutureeri maja Jesujiniji nojori pohuatanura socua pueya niquiara. Naa nojori miishaanu nuhuajitij, Jesu pueyari cartequesaaquiaariuhua. <sup>41</sup> Jesu jiyaramiquishano pueyari camarucua rerejojuajiniji tohareetaquiaariuhua shuquiriaatia. Nojoriiri timiquioriquiaa cararaatia nojori camarucua miiniuucua nojori, Jesujiniji nojori poojotanuucua maninia. Majaari nojori seetanu quiquiaari nojori Jiyaniijia Jesujiniji. <sup>42</sup> Majaari nojori pishiniu quiquiaari nojori pohuatanura Jesujiniji. Socua pueya niishitiojonura jiyacatequiaariiri. Nojoriiri pueyaraacaanu pueya niquiara pohuatariquiaa Jesucristojiniji, puetunu juucajanaa, Pueyaso Secojoua tiajinia, mariyata puetunu Jerusalén tiacajiniaqueyanaano.

## 6

*Mashiquiopue mianuutenaara saquiriojosacari*



<sup>1</sup> Jiyacaritij, Jesuucua tiuuniaa pueyari socua canequiaari. Puetunu nio pojoriinjiniujojuanaani, noojiaqueyari Judio rupaa pocuanaa quiquiaari. Naajuhuj, noojiaqueyari Griego rupaa pocuanaa quiquiaari. Jiyacaritij, Griego rupaa pocuanaari juaaquiouquiaari Judio rupaa pocuanaata. Griego rupaa pocuanaari naa sequequiaari Judio rupaa pocuanaatej:

—¿Casaara canaa mashiquiopue nia niquitioyaquiquiaa miaquesanonijia?

<sup>2</sup> Nocuaji, Jesu jiyaramiquishano doce pueyari puetunu Jesuucua tiuuniaa pueyajanaa rerejoquiaari. Naa nojori sequequiaariiri:

—Maja maninia canaa cartenura Pueyaso rupaa pohuatenu, canaa mi-anuutenura mashiquiopue. <sup>3</sup> Cunora canaa tapueyocucanaa, tama ni-ajaniyajinijinio nia saquiriojore siete maninia miijiaca pueya, niishijia-aca, Pueyaso Sohuanuraca cutara. Nojori nia seeratare nio poonijosano, maninia nojori mianuutenura pa mashiquiopue. <sup>4</sup> Canaacua saniniuujia saa Pueyaso secojorenijia. Naajuhuj, majaari canaa tarinitianu quiniutianiya Jesujiniji niishitiojonu.

<sup>5</sup> Puetunu pueyajanaari na shuquiriniutia naa riucuaquiaari:

—Taaquiririirinj, naacuaaquinateja maniniaajaj.

Jiyacaritij, pueyari Esteban saquiriojoquiaari. Nojuajaari jiyanohua Pueyasocua tiuujia pueyano quiquiaari. Nojuajaari Pueyaso Sohuanu cumaacaraca quiquiaarijuhuaj. Nio pojoriiri Estebanta saquiriojosaaquiarjuhuaj: Felipe, Prócoronio, Nicanornio, Timónnio, Parmenasjuhuaj, Nicolásnio. Nicolásri tahue quiquiaari Antioquiya tiacajinijinio. Tii rasaaquiaariiri. Nojuajaari tarijia Judiocuaca niishitijosano pueyano quiquiaari, Judio pueyanora na quiniuria. <sup>6</sup> Puetunu pueyajanaa jaara cuno siete pueya saquiriojoquiaari, nojori jiyataquiaariiri Jesu jiyaramiquishano doce pueyacua. Jesu saquiriojosano pueyari cuno siete canuu nacaacua niaquiaari na juaashiquiaca. Pueyaso secojoturee nojoriicuaaraari Pueyaso Sohuanu cumaquiniuria nojori, miaquesano niquitiojonaa nojori quiniuria.

<sup>7</sup> Jiyacariti Pueyaso rupaari socua tojishano quiquiaari. Jesuucua tiuuniaari socua canequiaarijuhuaj. Queraatia Judiocuacaacuara secojonaa pueyari Jesuucua tiuquiarjuhuaj.

### *Jesu ruuretajaca quiasacari Esteban*

<sup>8</sup> Estebanri Pueyaso cumaacaraca quiquiaari jiyanohua. Pueyasoori maninia na jiitiaquiaari. Naacuajitij, nojuajaari cusosuhua pueya naatani-jioquiaari Pueyaso cumaacata. Pueyari niishiquiaari Esteban pohu-atasanoori seetanujuanaa Pueyasojiniji quiquiaari, nojori niquishacari jiya-jeneta na miishano Pueyaso cumaacata. <sup>9</sup> Jiyacariti, tamasaca Judiocua-caari Jerusalén tiacajinia quiriquiaa. Nojori maanuuri sesojosaaquiaari “Quioosanojiniji carteqesano pueya”. Quiquiaarijiaariuhua Cirene tiaca-jinijinio pueya, Alejandría tiacajinijinio pueya, Cilicia jiyajinijinio pueya-juhuaj, Asia jiyajinijinio pueyano. Puetunu nojorijianaari Estebancua rerejoquiaari nata juayonuutanura. <sup>10</sup> Nojoriiri maja na naata Esteban shocotanu quiquiaari nojori niishishanota. Estebanri saniya nojori shocotaquiaarijia. Nojuajaari Pueyaso Sohuanu niishitijosanota saa maninia pohuataquiaarijia nojori niquiara. <sup>11</sup> Maja socua nojori rejeretasacari Esteban pohuatasano, nojoriiri tamasaca pueya niquitioquiaari cumaneeca, najuhuana nojori cuaracashiniuria camarucua niquiara Estebancuara. Cuno pueya, cumaneeca niquitiojosaaquiaari na cuaracashiniuriani, nojoriiri naa sequequiaari Judiocuaca camarucua niquiaratej:



—¡Taaquiririni, canaacuajaari cuno pueyano tojiquianu Moisés sesacaanoni, Pueyaso sesacaanojuhuaj!

<sup>12</sup> Naa nojori sequesaciritij, puetunu pueyajanaari juaaquioree, Judocuaca camarucuajuhuaaj, Moisés Rootasano niishitiojonaanio. Puetunu nojorijianaari Estebancua catecanoquiaari. Na quiatureeri. Na nuhuaji, na jaatucutuquiaari pueya nequesoreesaquiriaari, Israel pueya camarucua nequesoreesocoriquiano tii nojuaja. <sup>13</sup> Socua pajesaaquiaariiri tamasaca, Estebancuara tonujuriquiano najuhuanaj, na cuaracashiniutia. Cuno pojoriiri na sequequiaari camarucua niquiaratej:

—Nio pueyanoori pueyaracaanu sesacaquiaa Pueyaso Secojoua tia. Moisés Rootasano sesacaariquihuariuhuaaj. <sup>14</sup> Canaari socua naa na sequesano tojiquiaajaaniuhuaaj: “Nazaret tiacajiniinio Jesuni, nojuajaari Pueyaso Secojoua tia niyartanutaniya”. Naajuhuaaj, tariucuacaanu Moisés niishitiojosano pajaniya pa cartetenutaniyaquinaari.

<sup>15</sup> Puetunu camarucuajanaari na cajitiushaquiiji niqutiariquiaa Esteban. Nojoriiri na jiquioco niqiquiaari shacantuuca, juhua Pueyaso seru jiquioco.

## 7

### *Esteban pohuatasano*

<sup>1</sup> Pueyacuara secojonaajiyaniijaari Esteban nequesotaquiaari:

—¿Seetanutejanaa taa nio pojori sequereecuajani?

<sup>2</sup> Nojuajaari na riucuaaree:

—Cua panishano pueyanaa, cua camarucuaanaa, cua tojitiare. Pueyasoori jiyanoohua maninia. Nojuajaari pa supuetana Abrahamcua muetaquiaari Mesopotamia jiyajinia na quishacari, na pacuyaquishacarija Harán tiacajinia. <sup>3</sup> Pueyasoori jiyacari naa na sequequiaari:

“Quia tiujiaare quia jiya, quia pueyano. Niiquiiji quia quiaare, janiya cuara quia sequerejaatijia, niya quia quishii. Quiocua tii jiyojese cutara”.

<sup>4</sup> Abrahamri Pueyaso sequesano tojiquiaari. Quiaquiaariiri Caldeo pueya jiyajiniiji. Harán tiacajinia quishiiri. Tii shaajaquiaari na shipininioori. Na nuhuaji, niyara pacuquiaariiri, paa tii quiyani. <sup>5</sup> Jiyacaritij, Pueyasoori juhuanajuaja maja Abraham na niqutionu quiquiaari nio jiya. Naacuajitij, Abrahamri maja quenaaja jiya na jitianu quiquiaari tama na quijiarajaaja. Naajaa, Pueyasoori na sequequiaari:

“Janiya na nuhuaji quia niqutionutaniya nio jiyani. Quiaa jaara shaajeyare, quia niqiuohuara quiniutianiya saniniuuriija”.

Pueyaso jaara naa sequequiaari Abrahamtej, Abrahamri jiyacari juhuanajuaja niqiuohuaju quiquiaari. <sup>6</sup> Pueyasoori naa pacutequiaari sequenu Abrahamtej:

“Puetunu quia jiniuanuucujinino supueno pueyajanaani, nojoriiri na niishishoo pueya jiyajinia quiniutianiya. Cuno jiya pueyari nojori poonijiotenutaniya jiyanoohua. Naa naquiya miishaanutaniyari. Tii nojori quishacari, na shoconujunutaniyari cuatro ciento mariija”.

<sup>7</sup> Pueyasoori Abraham sequereecuajuhuaaj:

“Janiyari saniniuujia cuno taucuaca naminiutianiya quiocujinino supueno pueyacuaani. Janiyari nojori saniitionutaniya saniniuunijia nojori poonijiotenuucua quiocujinino supueno pueya. Na nuhuaji, nojoriiri tiji quiojonutaniuhua niyara. Nojori tiuquijiosacariuhua, nojoriiri cua secojonujuaca quiniutianiya niya”.

<sup>8</sup> Pueyasoori naa Abraham rootaquiaarijuhuaj:

“Niocua nia cararaatiuuquia co miatejore. Cunoori juhua naajosano nia cuaqueyajinia quiniutianiya, pueyaracaanu nia niishiniuria cua sequesano nijaniya”.

Naa Pueyaso sequesanoori quiquiaari puetunu Israel pueyarajanaa. Naaratej, Abraham niyanu Isaac jaara rasaaquiaari, na queeri neyanu cararaatiuuquia co miatequiaari na camueesacari ocho juuca. Isaacri naa miiquiaari neyanu Jacobojuhuj. Pueyasoori Jacobo sesojoquiaari “Israel”. Jacoboori naa miiquiaari necohujuhuj. Necohuari quiquiaari doce canuu. Cuno doce canuu, Jacobo niquiohuani, nojoriiri puetunu pa doce Israel pueyapue supuetanaajanaa.

<sup>9</sup> Pa supuetana Jacobo niquiohuajinijinioni, tamonuuri sesojosaaquiaari José. Tapueyocuacaari José juaajiaca quiquiaari jiyanojua, puera na que panishano José quishacari. Majaari nojori niquitiuniu paniniu quijia nojuaja. Na queeri socua jiyanojua José panijia quiquiaari na pueranaajiniji. Tapueyocuacaari cunora casami niquitiojona pueya niquitioquiaari cumaneecara tarajanu José. Casami niquitiojonaari José jiyataquiaari Egipto jiyajinia, saniniuujia tii na niquitiosocoriquiano serura. Naajaa, Pueyasoori Joseeta quiriquiaa. <sup>10</sup> Pueyasoori na naacuquiaari naquiya na miishacari. Pueyasoori na jiyatequiaari niishijara. Naaratej, Egipto jiya jiyaniijia Faraónri na maniniucuaquiaari. Na jiyatequiaariiri puetunu Egipto jiya pueya camarnurajanaa. Na jiyateree na tia camarnurajaariuhuj.

<sup>11</sup> Na nuhuaji, miaajenuuri quiquiaari puetunu Egipto jiyajiniajanaa, Canaán jiyajinianio. Pa supuetanaa quishacari Canaán jiyajinia, nojoriiri quera titiacoquiaari na miajajara. Seetanujuanaa shaaqui quiquiaariiri nojori miasano. <sup>12</sup> Jiyacaritij, Jacoboori caminiujiushaaquiaari: “Egipto jiya-jinia quiyaquinia trigo”. Naaratej, necohua jiyaroreeri trigo masenura. Jiyacari nojori quiojosacarini, cunoori shushajanaa nojori quianu quiquiaari Egipto jiyajinia. Cuno Jacobo niquiohuani, nojoriiri pa supuetanaacuaja. <sup>13</sup> Coteenu nojori masesano jaara puequequiaari, nojoriiri Egipto jiya-jinia tacatequiaariuhua socua trigo nojori masenura. Jiyacaritij, Joseeri tapueyocuaca sequequiaari: “Janiya nia tarajanuni”. Joseeri Faraón niishitiquiaari tapueyocuacajuhuj. Naaratej, Faraónri shusha niishiquiaari tejeno pueyanote José quiquiaarini. <sup>14</sup> Joseeri tapueyocuaca sequequiaari: “Pa que Jacobo nia riquioo niyara, puetunu necohuatajanaa”. Puetunu nojorijianaari quiquiaari setenta y cinco pueya. <sup>15</sup> Jacoboori naa pacuquiaari Egipto jiyajinaratej. Na nuhuaji, saaquianoori tii shaajeseequiaari. Necohuari tii puequeseequiaarijihuj, tariucua saaquiapue. <sup>16</sup> Na nuhuaji, Egipto jiyajiniji pacusaaquiaariiri nojori nucuhua. Siquem tiacajinia niojosaquiaariiri na supuetana Abraham raaco. Cuno raari cuhuariquiajia quijia. Abrahamri cuno cuhuariquia masequiaari tariucuacaanu pueyajiniji raa na jiiitianura necocua na nijara jaara cusoyare. Cuno cuhuariquia masequiaariiri cumaneecata Hamor niquiohuajiniji, Siquem tiacajinia.

<sup>17</sup> Pueyasocuajaari tariucuacaanu Abraham sequequiaari nojuajaari nio jiya na niquitionutaniya. Quera na niquitionu panishacari, Israel pueyari jiyanojua canequiaari Egipto jiyajinia. <sup>18</sup> Jiyacaritij, tamonu pueyanoori jiyaniijia quiquiaari Egipto jiyajinia. Cunoori jiyanojua tarijia quiquiaari José shaajenu nuhuaji. Naacuajitij majaari cuno jiyaniijia niishiniu quiquiaari José. <sup>19</sup> Cuno jiyaniijiaari taraatia miiquiaari shusha roosano pa supuetanaa niquiohua. Pa supuetanaa sequequiaariiri shusha roosano cuara quejoosaria moojinia. Pa supuetanaari taraatia miiquioquiaari naacuatej. <sup>20</sup> Moisésri jiyacari rasaaquiaari. Pueya-

soori na maniniucuaquiaari. Na queyari na jiitiaquiaari rupaquijia. Jaara na shoconujuquiaari jiuujianaraca raca, conaajaari carijiniacuma niasaaquiaari. <sup>21</sup> Faraón niyatuuri na paquiaari saniniuujia. Na canashitiquiaari juhua na mueyari. <sup>22</sup> Egipto pueyari Moisés niishitiojoquiaari puetunu nojori niishishanojuanaa. Puetunu Moisés sequesanojuanaari jiyanohua tojishano quiquiaari cutara. Puetunu na miishanojuanaari maninia quiquiaarijuhua.

<sup>23</sup> 'Cuarenta marijia jaara shocojoquiaari Moisés, mashaja na quishacarijia, narta Israel pueyacia rucuanenu paniquiaariiri, nojori na niquniuria. Judiocuacacujaari cuno pojori, naa sesojoshiya Israel pueyatani, maja tamonu. <sup>24</sup> Naacuajitij, Moisés jaara quiaquiaari narta Israel pueya niquniucua, saaja Egipto pueyano niquishii narta Israel pueyano majacuyanoori. Moisésri narta Israel pueyanoocua namiquiaari. Na juaaniutia moquiaari saniniuujia cuno Egipcio pueyanoori. <sup>25</sup> Moisésri juucua jiyaniquiaari narta Israel pueyari niishiniutianiya Pueyasoori na jiyaroree nojori na mashiquiniuria Egipto jiyajiniji. Majaari nojori niishiniu quiquiaari saaja. <sup>26</sup> Moisésri socua tariqui quiaquiaari narta Israel pueya niquniuuquiohuaj. Nojuajaari saaja riuriatasee tama nojori piyotaanojuaja. Juucua nojori ruparetanu panishiiri. Nojori sequereeri: "¿Niaateeri tamonu, niaa jaara naa miitioyaniquitij? ¿Casaara naa nia nootujutoyani?" <sup>27</sup> Cuno narta pueyano piquiriquiaani, nojuajaari saaja Moisés caporee. Na sequereeri: "¿Cante quia jiyatecanu juhua canaa jiyaniijia quia quiniuriani, naa quia sequenura canatej? ¿Cante quia jiyatecanu canaa nequesoreenarani?" <sup>28</sup> ¿Quiaateeri cua monu panijajuhua, naatej taa quia morucuaa cuno Egipto pueyanocuaani?" <sup>29</sup> Moisés tojishacari naa cuno pueyano sequesantej, ritia mashiquiaari Egipto jiyajiniiri. Madián jiyajinia quishiiri tamonu pueya jiyajinia. Moisés quishacari cuno jiyajinia, tii camiquiaariiri. Caapiqui canuuniyotua mueratejoquiaariiri.

<sup>30</sup> 'Cuniqui na quishacari, na shocojoquiaariiri cuarenta marijia socua. Tamonu juuca, Moisésri rucuaneriquiaa cariiquia jiyajinia, pueya sesojosano Sinaí tuhuananu shuriucua. Pueyaso seruuri tii nocua muetaquiaari nequeru casaja noshiyanojiniji. <sup>31</sup> Moisés niquishacari mani noshiyano, nojuajaari shiriiquiquiaari. Jaara nocua catecanoquiaari na niquniuria maninia, saaja Jiyaniijia Pueyaso tojirii manijiniji pocuaanoori. <sup>32</sup> Pueyasoori naa na sequequiaaritij:

"Janiyacujaari Pueyasoni: quia supuetanaa Jiyaniijia: Abraham Jiyaniijia, Isaac Jiyaniijiajuhua, Jacobo Jiyaniijiano".

Moisés jaara naa tojiquiaaritij, tetecareeri. Majaari mani noshiyano na niquniu paniniu quiquiaari na puerenuta. <sup>33</sup> Pueyasoori na sequequiaari:

"Cuniquijia quia jocojore quia sapatu. Niya, quiaa tii nujuuani, niiori cua quishaqui. <sup>34</sup> Janiyacujaari cua pueya niquiquiaa Egipto jiyajinia quiyanoni. Egipto pueyari nojori miitaa puera. Cua pueyari noonu rejeretacoya. Janiyari nojori sariyocuatunu tojiquiaa taraatiani. Nojoriicua roseyareenijia cua mashiquiniuria nojori Egipto pueyajiniji. Cunora, janiyari quia jiyaronutaniya Egipto jiyajiniani".

Pueyasoori naa Moisés sequequiaaritij.

<sup>35</sup> 'Israel pueyari tarijia Moisés juaaquihaaricuja. Naa na sequetuquiaariiri: "¿Cante quia jiyatecanu juhua canaa jiyaniijia quia quiniuriani, canaa nequesoreenarajuhua?" Naajaa, Pueyaso cutaraari setanujuanaa na jiyaroquiaariuhua nojori jiyaniijia na quiniuria, Pueyaso seru jaara nocua pocuaquiaari nequeru casaja noshiyanojiniji. Na jiyaroquiaariiri puetunu

nojori tohuatanijioriquianojuanaa Egipto jiyajiniji. <sup>36</sup> Moisés cuajaari pa supuetanaa mashiquiquiaari Egipto jiyajiniji. Nojuajaari jiyajeneta miishano miijioquiaari Pueyaso cumaacata cuno jiyajinia, mariyata nojori niuutiasacari Naatunacu jiyaniishano caminiajuhuaj. Naa miiquiaari pueyaracaanu cariquia jiyajiniajaariuhuj. Cuarenta marijaari nojori shocojoquiaari pueyaracaanu nojori rucuanajosacari tii. <sup>37</sup> Nio Moisésni, nojuajaari naa sequequiaari puetunu Israel pueyajanaa:

“Pueyasoori niaacua jiyaronutaniya tamonu pueyano, na rupaa pohuatariquiano nia niqiuara, taa na jiyaroquiaari janiyacuaani. Tama nia niquihuacuajiniojuaja supuenutaniyari. Niocua saa nojuaja tojiri cutara”.

<sup>38</sup> Nio Moisésri narta Israel pueyata quiquiaari cariquia jiyajinia. Nojuajaari Pueyaso seruta pocoojoquiaari Sinaí tuhananuucua pa supuetanaa jateesacari tuhananu cari. Moisésri Pueyaso seru rootasano na tojishano niishitiojoquiaariuhua pa supuetanaa. Cuno rootasanoori samiitianija rupaa quiquiaari pajaniyara, maninia pa quiniuria pueyaracaanu.

<sup>39</sup> 'Pa supuetanaari saa na ruuretaquiaarijia. Majaari nojori tojiniu paniniu quiquiaari Moisés. Egipto jiyajinia tacatenu paniquiaariuhua saajaari. <sup>40</sup> Naacuajitij, Moisés tarishishacari tuhananuucua Pueyaso seru na tojishacari, pueyari socua Moisés tarajanu Aarón sequequiaari: “Puera quia shipinijiorequi pueyasohua, nojori puetariquiano pajaniya. Majaari pa niishiniu taa Moisés miishiicuaani. Shaajeseecuaa naasucujuhuanajaj, mariqui tiuquiriohua. Nojuajaari najuhua pa mashiquiquianu Egipto jiyajiniji”. <sup>41</sup> Naacuajitij, nojoriiri na pueyasora shipiniquiaari juhua seru juunu niyanujua niquishano. Nojoriiri na seya puecooquiaari na shuquiriniutia na juaashiquiata na shipinitiushano pueyasooacara. Nojoriiri jiyacari sacuaraatia timiquioriquiaa. <sup>42</sup> Pueyasoori socua nojoriicuaji pishiquiaari. Nojori tarinitiaquiaariiri jiya cajiniocua nunucojuaa nojori jiyatenura tama nojori pueyasohuarajaaja. Seetanujuanaa naa naajiotasano quiyajaariuhua tariucuacaanu Pueyaso sequesano caminiujunias naajioneejinia. Naa sequeyari:

“Israel pueyanaa, ¿canaacuara nia puecooquiaari pueyaracaanu nia seyani cariquia jiyajinia nia camarucuneetasacari cuarenta marija cuara nia shocojoquiaarijiaatijia? ¿Cucuaratee? ¡Maja! ¿Canaacuara nia catijiaquiaari nia seyani? ¿Cucuaratee? ¡Maja! Niaari puetunu cuno miiquiaarijanaa tama nia jiyatesano pueyasohuacuarajaaja. <sup>43</sup> Niaari Moloc suhuorotu pataquiaari, shoquejiniji suhuorotu, nia pueyasora nia jiyatesanoni. Cunocujaari nia sequesano, ‘canaa pueyaso’. Niaari Refam pataquiaarijuhuaj, juhua rijia niquishano shipinishano. Niaari puetunu nio shipinijioquiaarijanaa nia pueyasohuara, nojori cariquimiaji nia mojoquetaconura, nia shuquiritasacari nojori. Nocuaji, janiyari nia jiyaronutaniya tucuacaanuni, Babilonia jiya tamajiria”.

Pueyasocujaari naa sequequiaari pa supuetanaatej nojori miiniuucua sesa.

<sup>44</sup> Estebanri socua pohuataquiaari naatej:

—Pa supuetanaari Pueyaso secojojua suhuorotu jiitiaquiaarijuhuaj, cariquia jiyajinia nojori quishacari. Nojoriiri tii racataquiaari Pueyaso niqutiosano saajianeeca. Nocua naajiotasano quiquiaariiri Pueyaso rootasano na pueyara. Pueyasoori cuno suhuorotujiniji pocuaquiaari na pueyacu. Cuno suhuorotuuri shipinishaquiaari taa Moisés niqutishaquiaaricua-jani Sinaí tuhananuucua na quishacari. Pueyasoori jiyacari naa sequequiaari Moisés: “Quia shipiniri taamueca cua niqutiquianu quia-

janiyacuaajani”.<sup>45</sup> Na nuhuaji, pa supuetanaa, canapuate naatujoori quiriquiaa Moisés quishacarini, nojoriiri cuno suhuorotu pataquiaari. Na patatuquiaariiri Josuéta nojori pacusacari nio jiyajinia paa tii quiyani. Nojori miaquetoosacari taucacata, nojoriiri Pueyaso secojojua suhuorotu patariquiaa. Pueyasoori cuno taucaca jataquiaari nio jiyajiniji, saniniuujia pa supuetanaa jiya na quiniuria. Cuno suhuorotuuri pa supuetanaata quiquiaariija, David jaara jiyaniijia quiquiaari.<sup>46</sup> Jacoboori pa supuetanaa jiyaniijia David supuetana quiquiaarijuhuaj. Davidri Pueyaso tojjia quiquiaarijuhuaj. Pueyasoori na shuquiritiaquiaari. Naaratej, Davidri Pueyaso Secojojua tiara tianu paniquiaari juucua.<sup>47</sup> David niyanu Salomón cutaraari Pueyasora tiaquiaari.<sup>48</sup> Naajaa, jiyocuacaanu Quijiaari maja na quiniu pueyano tiasanojiniaaco. Tariucuacaanu Pueyaso sequesano caminiujiuniaari naa naajiotaquiaari Pueyaso sequesano nojuaja:

<sup>49</sup> “‘Jiyocuacaanuuri cua quiquio. Jiyari saniniuujia cua niohuaca cua niaja. ¿Taamueca tia nia tianutaniya quiriajaarani?’ Jiyaniijiaari naa sequeyaquij. ‘¿Taa nia sequeyani: na mueecujuara pa miiri, shuquiriaatia na quijiara? Maja.’<sup>50</sup> ¿Majateeri puetunu nio jiyajinia niquishanojuanaa cua juaashiquiata cua miishanocujaja, jiyocuacaanujuhuj?’ ”

<sup>51</sup> Estebanri socua nojori sequequiaari:

—¡Niaari tojtiaashijianucua! ¡Niaari Pueyaso sequesano ruuretaquiaa juhua nia supuetanaa! Nioojiaari maja juhua Pueyaso pueya jiuujia. Nia numaacaari maja Pueyaso rupaa na tojiniu paniniu. Niaari pueyaracaanu tojiyaquia Pueyaso Sohuanu niishitiojosano. Niaari Pueyaso tojiyashijianucua juhua nia supuetanaajuhuj.<sup>52</sup> Nia niishiritioj, ¿nia supuetanaate quena nia niquiriyatujua Pueyaso sequesano caminiujiuniaa miitiaaquiquiaari? Nia supuetanaari puetunu Pueyaso sequesano caminiujiuniaajanaa miiquioquiaari naquiya. ¿Quenaaja niquiriyatu nojorijinijiniote miitiasoo cureequiaari? Maja. Nojoriiri tari puecooquiaari noo pueya, canapuate maninia miijia mijiria niriquianojiniji pohuatanuuquiaaricuaajani. Cuno maninia miijia jaara tiuquiquiaari, niaari sesa miijia pueya na niquitiocanu nojori mosocoriquiano. ¡Niaari naa mocanu Pueyaso Jiyarosantej! ¡Niaari pueyaracaanu Pueyaso ruuretaquiaa!<sup>53</sup> Naacuajitij jiyocuacaanuji Pueyaso seya pohuatasano Pueyaso rootasano niaarani, majaari cuno nia tojiniu quiquiaajuhuj.

### *Jesu ruuretajaca mosacari Esteban*

<sup>54</sup> Pueya jaara naa tojtiquiaari Esteban sequesantej, nojoriiri jiyanojua juaaquioree. Na juaaniutia miaquenuuree na quiacaari.<sup>55</sup> Jiyanojua Pueyaso Sohuanu cumaquishacari Esteban jiuujia, nojuajaari jiyocuacaanu mauquiaari. Saaja Pueyaso shacantuuca niquiriiri. Jesu niquiriijiaariuhua na Que Pueyaso miaquetajara nujuaano.<sup>56</sup> Naa na niquishacaritij, nojori sequere juucuaari:

—¡Nia niquishuriniaja! Jiyocuacaanu niquiya riatenonijia. ¡Pueyaso Niyanu niquiyanijia na Que miaquetajara nujuaano!

<sup>57</sup> Pueyari na numaaca mishiquiojonuuquiaari saaja, maja na tojitiuniuria Esteban sequesano. Jiyanojua sariyocuatuuquiaari na juaaniutiaari. Na nuhuaji, Estebanca cocuatequiaariiri.<sup>58</sup> Na caponeetuquiaari Jerusalén tiacajiniijiri. Tiacajiniji tohuatesaaree tamamaari. Na tohuatesaanu nuhuaji, tii na jacutuquiaari saitiaari. Na jacaturiquianoori na toqueya cojuatequiaari tamonu mashaja. Nojori toqueya cojuana sesa quiquiaari Saulo.<sup>59</sup> Nojori jacutusacari saitia Esteban, Estebanri Pueyaso secojoriquiaa naatej:



—Jiyaniijianaa, cua sohanu quia riri quia shuriucuara.

<sup>60</sup> Na nuhuaji, mojuquetareeri. Jiyano hua nacaquiaari na nuhuajiriaari:

—Jiyaniijianaa, majaari nio pojori saniitionu naa nojori miiniuucua janiyatej!

Naa na sequenu nuhuajitij, cusoqueeri.

## 8

### *Saulo miishacari naquiya Jesuucua tiuuniaa*

<sup>1-2</sup> Pueyaso panijiaca pueyari Esteban quete patuquiaari na jamotusocoriquiano. Nojoriiri Esteban sapuequiaari. Cuno juuca, Jerusalén tiacajinia quiniaa Judiocuacaari juhuacatecara miitianu coteequiaari puetunu Jesuucua tiuuniaajanaa. Nocuaji, puetunu nojorijianaari tiji mashiquiaari. Saaja Jesu saquiriojosano doce pueyari tii cureequiaari nojori nuhuaji. Nojoriiri na mashishacari niyaquejoquiaari puetunu Judea jiyajiniajanaa, Samaria jiyajiniaranio. <sup>3</sup> Jiyacari Sauloori socua jiyacateriquiaa miitianu Pueyaso pueya. Nojori pajequiaari puetunu tiacajiniaqueyajanaari Jerusalén tiacajinia. Na riuriasacari, na jayoquiaari tiacojiiri, na nujuatejosocoriquiano nujuatejojuajinia, maajipohua, canuunio.

### *Jesujiniji pohuatasacari Samaria jiyajinia*

<sup>4</sup> Mashiyocuatuno pueyari puetunu na quiasacojuanaa Jesujiniji pohuatanuquiaari pueya niquiara. <sup>5</sup> Nojorijinijinio quiquiaarijuhuaj Felipe. Nojuajaari mashiquiaarijuhuaj tamonu tiacajiniara Samaria jiyajinia. Cuno tiacajinia juhuacatecara pohuataquiaari Jesucristojinijijaarijuhuaj. <sup>6</sup> Puetunu pueyajanaari Felipe pohuatasano tojiniuucua rerejoquiaari. Pueyari sanaa na tojtiaquiaari. Nojoriiri Felipe shootiaquiaari tacuriitia, na miishacari jiyajeneta casaa Pueyaso cumaacata. <sup>7</sup> Samaruhua tohuatanijioriquiaa pueyajinijiiri. Samaruhua tohuareetasacari pueyajiniji, sariyocumaquiaari. Queraatia cumatacuruhuana cusosuhuari naatanijiosaaquiaarijuhuaj, sesacujanucuanio. <sup>8</sup> Naaratej, puetunu cuno tiacajinia quiniaa pueyajanaari jiyano hua shuquiriquiaari.

<sup>9</sup> Shimiacuuri cuno tiacajinia quijiajuhuaj. Na sesa quiquiaari Simón. Cuno tiacajinia quiniaa pueyari na pueretujua. Puetunu pueyajanaa sapojuaari jiyajeneta na miijosanota. Naa sequeja tama na cuaqueyajaarijia: “Janiya cutaraari tojishano pueyanoni”. <sup>10</sup> Puetunu pueyajanaari na tojijia quiquiaari, camarucua, muerasunio. Nojoriiri sequetuquiaari: “Nio pueyanoqui jiyano hua Pueyaso cumaaca jiiitia”.

<sup>11</sup> Puereeta Simón miishacari pueyaracaanu, pueyari sapojosaaquiaari. Naaratej, pueyari na sequesanoocua tiuquiaari. <sup>12</sup> Na nuhuaji, nojori jaara tojiquiaari Felipe pohuatasacari Pueyaso rupaa, Jesucristojinijijaarijuhuaj, cuno Samaria pueyari Jesuucua tiuquiaari cutara. Canuu, maajipohuajuhuaaj, nojoriiri tiuquinijosaaquiaari moojinia. <sup>13</sup> Simónri Jesuucua tiuquiaarijuhuaj. Tiuquinishaaquiaarijiaarijuhuaj. Na tiuquinishaanu nuhuaji Felipecua sacuaquiaariiri. Felipe shootiaquiaari tacuriitiaari Felipe miijosacari jiyajeneta casaa Pueyaso cumaacata.

<sup>14</sup> Jerusalén tiacajinia Jesu saquiriojosano pueya jaara tojiquiaari taa Samaria pueya tiuurii Pueyasoo cuani, nojoriiri cuniquiji jiyarotuquiaari Pedro, Juannio. <sup>15</sup> Nojori tiuquishacari Samaria jiyajinia, cuniqui quiniaa Pueyaso pueyacuara secojotureeri nojori jiuujiajiajia Pueyaso tiuquitiniuria na Sohanujuhuaaj. <sup>16</sup> Majaari Pueyaso Sohanu tiuquiniu quiquiaari juhuanojuaja nojori jiuujiajiajia. Nojoriiri nareja moojinia tiuquinijosano quiquiaari Jesuucua nojori tiushacari. <sup>17</sup> Pedro, Juan, cunora na



juaashiquia niojoquiaari pueyacia, nojoriicuara na secojotusacari Pueyaso. Naa nojori miishacaritij, Pueyaso Sohuanuuri cuno pueya jiuujiajinia tiuquiquiaari cutara.

<sup>18</sup> Simónri niquiriquiaa taa Pueyaso Sohuanu tiuquiquiaari pueya jiuujiajinia Jesu saquiriojosano pueya niasacari na juaashiquia nojoriicuani. Naaratej nojuajaari Jesu saquiriojosano pueya niqutionu paniquiaari cumaneeca juucua, cuno cumaaca na jitianurajuhuj. <sup>19</sup> Simónri naa sequequiaari nojori:

—Cua niqutiotureja cuno cumaaca. Janiyacia Pueyaso Sohuanu panijiaacua niare cua juaashiquianijia, Pueyaso Sohuanu nojori masenurajuhuj, taa nia miyacuaani.

<sup>20</sup> Pedroori na sequequiaari saaja:

—¡Quia cumaneeca cuara shaajeera quiatajuhuaj! Quiaa naasucuaari jiyaniya Pueyaso Sohuanu cumaneecata masesano. Quia niishiri, Pueyasoori na Sohuanu niqutioquiaa nareja na tojitiajaca pueya. <sup>21</sup> ¡Pueyaso Sohuanu cumaacaari maja quiarano! Quioojaari jiyanojua sesa quiya Pueyaso niqiuara, nocuaji maja na cumaaca niqutiosaanu quiniutianiya quiajaniya. <sup>22</sup> Jiyanojua sesa quia niishiriojosanojiniji quia pishiriohua. Pueyaso quia secojore na jyanooniuria quiajaniya naa quia niishiriojosanojiniji quioojaajiniatej. <sup>23</sup> Niishiyacuajaniija, quiaari juhua cartesoo quiyajaa, sesa miiniuucua jitinio quia quishacariija. Quioojaari puera najiquitishano quiyajaa jyanoyashijia quia quiniuucujuhuj.

<sup>24</sup> Simónri na riucuaquiaari:

—¡Pueyaso nia secojorequi cucuara, mariqui cua saniitioreeri taa nia sequeyacuajani!

<sup>25</sup> Na nuhuaji, Pedroori Juanta socua pohuataquiaari Jiyaniija Pueyaso rupaa cuno pueya niqiuara. Pueya niqiuara pohuatatureeri socua Samaria jiya tiacajinia, cuniqui quiniaa tiuuniuria Jesuucujuhuj. Maninia rupaari Pueyasojiniji pohuatasaaquiaari queraatia tiacajinia, Samaria jiyajinia. Na nuhuaji, Pedroori tacatequiaariuhua Juanta Jerusalén tiacajiniohua.

### *Jesujiniji Felipe pohuatasacari Etiópe pueyano*

<sup>26</sup> Cuno nuhuaji, Pueyaso seruuri Felipeecua rosequiaari. Na sequeseeri:

—Quia sanere Felipejaa. Pananu shuucujiria nucuama quia quiaare. Quiocua tiuquishii tamonu nuujinia, Jerusalén tiacajiniji neteja Gaza tiacajiniara. Cuno nuuri cariquia jiyacuma neteya.

<sup>27</sup> Felipe tojishacari naatej, nojuajaari ritia sanequiaari. Nucuama quiaquiaariiri. Nuujinia naacuneetooquiaari saaja Etiopía jiyajinijinio pueyanotaari. Cuno pueyanoori riyacajajaaju quiquiaari Etiopía jiya jiyaniija naacutana na quiniuucua, maaji na jiyaniija quiniuucua. Na jiyaniija sesa quiquiaari Candace. Cuno maajiiri cuno pueyano jiyatequiaari Etiopía jiya casami jitianara, na cumaneeca cojuariquiano nera. Nio Etiópe pueyanoori Jerusalén tiacajinia quiaquiaari Pueyaso secojonuucua. Cuniqiji tacateyanoori Felipeeta naacuneetooquiaari nuujinia. <sup>28</sup> Nucuacooji na tacatesacariuhua na jiyajiniohuara, caballoori na jaatiariquiohua, rucanejotajarujinia cajiyano. Pueyaso rupaa serojoriquiohuari, tariucuaaanu Pueyaso sequesano caminiujunia Isaías naajioneejiniji. <sup>29</sup> Pueyaso Sohuanuuri jiyacari Felipe sequequiaari:

—¡Ritia nocua quia catecanore! Quiocua nata quiaare.

<sup>30</sup> Jaara nocua catecanoquiaari, Felipeeri Etiópe pueyano tojiquiaari Isaías naajiosano serojiyano cojuata. Felipeeri na nequesotaquiaari:

—¿Quiaate quia serojosano niishiya casaa na sequeyani?

<sup>31</sup> Etíope pueyanoori na riucuaquiaari:

—¿Janiyatucua taa niishirinio, tamonu jaara cua serojosano niishitioyaquiri janiyani?

Felipe sequereeri:

—Miji quia tacama. Cua shuriucua quia cajishii.

<sup>32</sup> Etíope pueyanoori nio serojoriquiaa tariucuaaanu Pueyaso Rupaajinia: “Juhua borrego jaatucusaquiaariiri mosocoriquiano. Naatej, taa borre-gocuaani sanaa niquiyari na cajaca miatejosacari, nojuajaari naa quiquiaarijiuhuj. Majaari na sariyocuanu quiquiaari quenaaja naquiya na miishacari. <sup>33</sup> Naquiya miishaaquiaari cararaatiaari. Nocua namiyaquishaaquiaariiri. Mashaja na quishacarijia, nojuajaari shaajasaaquiaari nio jiyajiniji. Cunora, majaari na muetunu quiquiaari. Niquiohuajuuri mosaaquiaari”.

Etíope pueyanoori nio serojoriquiaa Pueyaso rupaajiniji.

<sup>34</sup> Na nuhuaji, Etíope pueyanoori Felipe nequesotaree:

—Cua sequere pueyanonaa, ¿canajiniji Isaías pohuataa niya na naajiosano-jiniani? ¿Tama nojuajiniji pohuataatee? ¿Tamonujiniji soj?

<sup>35</sup> Felipeeri Etíope pueyano niishitiojonu coteequiaari Jesujiniji shusha na serojosano Isaías naajiosanojiniji. Felipeeri naa na sequeree:

—Isaías naajiosacari nio, nojuajaari juhuacarijia Jesujiniji pohu-ataquiaari, taa quiarijia Jesu miishaacanu taraatiacuajani.

Felipeeri socua na pohuataquiaari Jesu miishanojiniji. <sup>36</sup> Nojori quiasacari nucuaco, caminiaco shuriuquioco tajitiariquiaari. Etíope pueyano jaara caminiaco niquiquiaari, Felipe sequereeri:

—¿Majate maninia cua tiuquinishaanura niya?

<sup>37</sup> Felipeeri na sequeree:

—Quiaa jaara seetanjuanaa tiuuri Jesuucua, quia naata tiuquinishaanu. Cuno pueyanoori na riucuaaree:

—Jaa, janiya Jesucristoocua tiuyani. Nojuacuajaari Pueyaso Niyanu. Na niishiyanjia.

<sup>38</sup> Etíope pueyanoori jiyamitia na seru sequeree:

—Quia nujuaretare rucuanejotaja.

Felipeta rosetamaa caminiacojiniaari. Felipeeri tii na tiuquiniquiaari Jesuucua na tiushacari. <sup>39</sup> Nojori tacatasacariuhua caminiacojiniji, Pueyaso Sohuanuuri Felipe riquiaari canashiyaquiji cuno Etíope pueyano shuriucuaaji. Nojuajaari juucua tacareecuquiaari na tiuquininiaacua. Majaari socua na niquiniu quiquiaari Felipe. Tariucua tiuquinishanoori shuquiri-aatia quiaquiaariuhua na jiyajiniohua. <sup>40</sup> Pueyaso Sohuanuuri Felipe jataquiaari Azoto tiacajinia. Nojuajaari cuniquiji puetunu tiacajinia poojo-taquiaariuhujanaa Pueyaso rupaa Jesujiniji. Naa tiuquishuhua Cesareya tiacajiniaari.

## 9

### *Saulo jatasacari Jesu tojiniaara na quiniuria*

<sup>1</sup> Sauloori jiyacari pueyaracaanu Jesuucua tiuniaa miananajoriquiase. Nojori puecoonu paniquiaari puetunujuanaari. Naaratej, Sauloori pueyacuara secojonaa jiyaniijiaacua quiaquiaari. <sup>2</sup> Naa na sequeeseeri:

—Damasco tiacajinia quianu paniyanijia. Quiria quia naajiore cuniqui secojojua tiaca camarucuaacuara Damasco tiacajiniani, cuno naajioneeta cua tiuquiiionura nojori rerejojuacajinia. Jesu tojiniaa pueya morojonu

paniya cuniquijinjia. Janiyari cua quioosano jaatucunutaniya niyara Jerusalén tiacajinarani, canuu, maajipohuanio.

<sup>3</sup> Naacujitij, nucuaco Saulo quiasacari, tari quenaacoturiquiaa Damasco tiacajiniaraari. Jiyacaritij, ¡shacantuucaari canashiyaquiji nunuquiaari jiyocuacaanuji! <sup>4</sup> Sauloori juhua jatasaquiaari na cari. Na pojosaquiji tojiquiaari rupaa na sequeyanoori:

—¡Saulonaa, Saulonaa, cua tojiri! ¿Casaara quia miitiaa puera janiyani?

<sup>5</sup> Sauloori na riucuaaree:

—¿Cantequia Jiyaniijianaa?

Jiyocuacaanuji nocua pocuaanoori na riucuaquiaari:

—Janiya Jesuni. Quiaari puera cua miitiaajanaajataj, cucua tiuunia quia miitiasacari puera. Naa quia miishacari puera quia juaaniutiateg, quiaari tama quia cuaqueya sesoyajaacujua. Quiaari juhua juaajia pueyano. Quiaari quia juaaniutia juhua jiohuaca patiyashijia.

<sup>6</sup> Sauloori na puerenuta na tetecasacari na sequequiaari:

—Jiyaniijianaa, ¿casaa quia paniya cua miiniuriani?

Jiyaniijiaari na sequeree:

—Quia sanere. Naajaa quia tiuquishii Damasco tiacajinia. Quiaari tii sequesaanutaniya cua panishano quia miiniuria.

<sup>7</sup> Saulota quiojonaari shiriiquitiuquiaari nojori jaara tojitiuquiaari jiyocuacaanuji pocuanu. Nojoriiri juucua na niqiniu paniquiaari. Saaja shaaquiiri quiriquiaa. <sup>8</sup> Na nuhuaji, Sauloori na pojosaquiji sanerohua juucua. Majaari na naata niqiniu quiquiaari saaja. Nata quiniaari na jaatucutaquiaari Damasco tiacajiniara. <sup>9</sup> Nojuajaari tii camueenujuquiaari jiuujianaraca juuca, cariyojuaru na quishacari. Majaari na miaquenu quiquiaari pueyaracaanu cariyojuaru na quishacari. Ratuyaquiquiaarijiaariuhuj.

<sup>10</sup> Tamonu Jesuucua tiuunia pueyanoori Damasco tiacajinia quijia. Na sesa quiquiaari Ananías. Jiyaniijia Jesuuri na sequequiaari juhua na maquenujia:

—¡Ananíasnaa!

Nojuajaari na riucuaquiaari:

—¿Casaate cua Jiyaniijianaa?

<sup>11</sup> Jiyaniijiaari na sequeree:

—Quiaritia quia quiaare Saulo pajenuucua. Nojuajaari noo Saulo, Tarso tiacajinijinio pueyanotej. Nojuajaari Judas tiajinia quiya. Judas tiaari jati tamonu nuujinia quiya. Cuno nuu sesa, Nuu Maniniu. Sauloori cuno tiajinia secojiya Pueyaso. <sup>12</sup> Nojuajaari juhua na maquenujia tari niquirii quiajaniya nocua tiuquiyano. Tari quia sesa niishiyajaariuhuj. Sauloori tari quia niquirii na maquenujia. Quiaari quia juaashiquia niariquiaa nocua, na namijia jeequenuhuara, maninia na niqiniuhuara.

<sup>13</sup> Ananías jaara naa tojiquiaari Jiyaniijia sequeyanotej, nojuajaari sequeree:

—¡Cua Jiyaniijianaa, queraatia pueyari cuno pueyanojiniji cua pohuatacununi! ¡Quiocua tiuunia pueya miitiaquiaa taraatia Jerusalén tiacajiniaraari!

<sup>14</sup> Pueyacuaara secojona jiyaniijia jiyarosanonaari cunohuj, quiaritia niya tiuquiriini. ¡Nojuajanaari quia secojona pueya quioonutaniya, morojonucua canaa na jiyatasocoriquiano Jerusalén tiacajiniara!

<sup>15</sup> Jiyaniijiaari Ananías sequequiaari saaja:

—Naajaa, quia quiaare. Janiyacuajaari cuno pueyano saquiriojoquiaari tarijia cua jiyaramiquishocoriquianoni. Nojuajaari tamasaca jiyacajinia poojotanutaniya janiyajiniji taucuaca niqiuara. Taucuaca jiyaniijianucua

poojotanutaniya janiyajinijijaariuhuj, Israel pueyano. <sup>16</sup> Janiyacuajaari Saulo niishitiojonutaniyani taa jiyanohua naquiya pueya miitianutaniya nojuajani, janiyajiniji na pohuatasacari.

<sup>17</sup> Naaratej, Ananíasri quiaquiaari. Judas tiajinia tiuquishiiri, tee Saulo quiriquiaacuajani. Na tiuquishacari, Sauloocua niasee na juaashiquiaari. Na sequereeri:

—Cua tarajanunaa, pa Jiyaniijia Jesu, quiocua muetarucuaa nio tiaca nucuamaji niyara quia nishacarini, nojuajaari quiocua cua jiyaroreeni. Cua jiyaroreeni quia namijia jeequenuhuara maninia, Pueyaso Sohuanu tiuquiniuria quioojiajiniajuhuaj.

<sup>18</sup> Jiyacari ritia totequiaariiri juhua sapitiaaja cocua Saulo namijiajiniji. Maninia niquiquiaariuhua na nuhuajiiri. Na nuhuaji, Sauloori ritia tiuquin-ishaquiaari moojinia Jesuucua na tiuushacari. <sup>19</sup> Na nuhuaji, miaquereeri, raturouhajaariuhuj. Noojia jatarohuari. Pasaja camueenujuquiaari Damasco tiacajiniaari Jesuucua tiuuniaa pueyata.

### *Jesujiniji Saulo pohuatasacari Damasco tiacajinia*

<sup>20</sup> Sauloori juhuacatecara coteequiaari Jesujiniji pohuatanu narta Judiocuaca secojojuaca tiajinia Damasco tiacajinia. Nojuajaari pueya niquiara na pohuatasacari sequeja:

—¡Jesuuri seetanujuanaa Pueyaso Niyanu!

<sup>21</sup> Naa nojori tojishacari Saulo pocuaanotej, pueyari shiriiquiquiaari. Na shiriiquitiuniutia sequetureeri:

—Nio pueyano pocuaani, ¿majate nootej, naquiya miiquiaa Jesuucua tiuuniaa pueya Jerusalén tiacajiniatej? Niyara niyareejaariuhuj, Jesuucua tiuuniaa pueya na morojonura. Nojuajaari nojori jiyatanu paniriquiaa juucua Jerusalén tiacajinia secojonaa jiyaniijianucua na niquitiosocoriquiano, nojori nujuatejosaanura.

<sup>22</sup> Sauloori socua noojia cumaquiquiaari Pueyaso Sohuanuta, jiyanohua maninia na pohuatanura puetunu juucajanaa. Nocuaji pataquiaari saaja Damasco tiacajinia quiniaa narta Judiocuacaari. Sauloori maninia pohuataquiaari tariucuacaanu Pueyaso Rupaajiniji, seetanujuanaa maatia pueya niishiniuria Jesuuri Pueyaso Jiyarosano pocuaji tacuriquiano.

### *Saulo mashishacari narta Judiocuacaacuaji*

<sup>23</sup> Quiniqui Saulo camueenujusacarijia pueyaracaanu, narta Judiocuacaari nocuara rojotooquiaari na motunura juucua. <sup>24</sup> Tamonuuri Sauloocua jiyanooquiaari. Naa na sequequiaariiri:

—¡Quiaa monu panishiya sacaj!

Judiocuacaari na sashiriquiaa tiaca tohuateyaji, na monu paniniutia juucua Saulo. Na shanacuturiquiaari juuca, niucuanio. <sup>25</sup> Damasco tiacaari puereetuca sohuacaraca quiquiaari puetunu na shocuajanaa. Jesuucua tiuuniaa pueyari saaja Saulo mashiquiquiaari niucua. Sohuacajiniji roshinitiasaaquiaari jiyocuacaanuji puereetuca canaasatujiniaari. Sauloori naa mashiquiaaritij.

### *Saulo quishacariuhua Jerusalén tiacajinia*

<sup>26</sup> Na tiuquishacariuhua Jerusalén tiacajinia, Sauloori Jesuucua tiuuniaa pueya rupuenu paniquiaari juucua. Nojoriiri saaja na puerequiaari. Na puerenuta sequetuquiaariiri:

—Pueyasocua tiuujaquinio naasucua jiyanotej.

<sup>27</sup> Bernabé cutaraari maja na puerenu quiquiaari Saulo. Nojuajaari Jesu saquiriojosano pueyacua na jiyataquiaari, Saulo niishiniuria puetunu nojorijianaa. Bernabeeri Jesu jiyaramiquishano pueya sequequiaari:

—Sauloori pa Jiyaniijia niquiquianu Damasco tiacaacua neteja nucuamaji. Jiyaniijiaari nata pocoojocanu. Sauloori cunora juhuajaniya pohuatariquiaa Jesujiniji Damasco tiacajinia.

<sup>28</sup> Sauloori narta Jesuucua tiuuniaa pueyata jiyajequiaari cuniquijia Jerusalén tiacajinia. Nojoritia rucanejojuaari, mariyata Jesujiniji pohuataja juhuajaniyari. <sup>29</sup> Saulo pocuasacari, nojuajaari seetanujuanaa cumaacata pocuaquiaari Jiyaniijia Jesuucua na tiuushacari. Griego rupaa pocuanaa Judiocuacata pocoojoquiaariiri. Noojiaqueyari Saulota juayonutaquiaari saaja. Nojoriiri socua na motunu paniquiaari. <sup>30</sup> Jesuucua tiuuniaa pueya jaara niishiquiaari naatej, nojoriiri Saulo jiyataquiaari Cesareya tiacajinia. Cuniqiji jiyarosaaquiaari na raja Tarso tiacajiniaari.

<sup>31</sup> Na nuhuaji, puetunu Judea jiyajinia Jesuucua tiuuniaa pueyajanaari panaatia quiquiaari quenaaja, Samaria jiyajinia, Galilea jiyajinianio. Tamasacaari maja tari naquiya na miishaanu quijia. Nojoriiri socua Jiyaniijia tojtiajacara quiquiaari nojori pueretusacari nojori mariqui na tojiyashijara quiriohuari. Pueyaso Sohuanu naacusacari nojori, Pueyaso pueyari socua canequiaari queraatiara.

#### *Pedro naatanishacari Eneas*

<sup>32</sup> Pedroori pueyaracaanu rucanejojua Jesuucua tiuuniaa pueyacua, nojori na niishitiojonura socua Jesujiniji. Tamonu juuca nojuajaari Pueyaso pueya niquiniucua quiaquiaari Lida tiacajiniajuhuaj. <sup>33</sup> Tii quiriquiaari tamonu pueyano. Na sesa quiquiaari Eneas. Cuno pueyanoori cumat-acuruhuana cusosu quijia. Tari na shocojoquiaari ocho marijia pootia na matasacari na matujinia. <sup>34</sup> Pedroori cuno cusosu sequequiaari:

—Eneasnaa, ¡Jesucristo tari quia naatanirii! ¡Quia sanere! Quia matu quia jecare.

Eneasri ritia sanequiaari. <sup>35</sup> Puetunu pueyajanaa Lida tiacajinia quiniaa, mariyata Sarón tiacajinijinio pueyajuhuj, puetunu nojorijianaari nio miishano niquiquiaari. Nojoriiri cunora tama na supuetanaa niishitiushano casaajaaja cartequiaari. Puetunu nojorijianaari Jesuucua tiuquiaari.

#### *Dorcas samitianishaanujiniji pohuatasano*

<sup>36</sup> Jiyacarijuhuaj, Jope tiacajinia quiquiaari tamonu maaji. Na sesa quiquiaari Tabita. Tabitaari griego rupajinia sequesano “Dorcas”. Dorcasri saniniujia pueyano rupajinia sequeshiyacujua “nequeru”. Cuno maajiiri Jesuucua tiujia quiquiaari. Nojuajaari maninia miijia maaji quiquiaari. Casamiiuniucua pueya niquitiojojua nareja na jiiitasanojinijiiri. <sup>37</sup> Na nuhuaji, Pedro quishacari Lida tiacajinia, Dorcasri cusoquiaari. Na cusonu nuhuaji, pueyari macu cuaqueya jeequequiaari. Na jeequetunu nuhuaji, nojoriiri na niaquiaari cuno tiajinia nataco, tamonu sohuacajinia. <sup>38</sup> Jope tiacaari cateca quiya Lida tiacajiniji. Pedroori Lida tiacajinia quiriquiaajaa Dorcas shaajesacari. Jesuucua tiuuniaa pueyari tari niishiriquiaa tee Pedro quiyani. Naaratej, caapiqui pueyano jiyarotureeri Pedro na numootenura. Nojoriiri na jiyarosano caapiqui pueyano sequequiaari:

—Niocua naa Pedro sequesee: “Quia quiaarena ritia Jope tiacajinia. Maajaari tarishiniu”.

<sup>39</sup> Pedroori nojoritia tacatequiaariuhua Jope tiacajiniohua. Na tiuquishacari, quiniqui quiniaari Pedro tiuquiniquiaari macuucua sohuacamara. Mashiquiopueeri Pedro shocua rerejoquiaari na

nujuquetunuta. Nojoriiri Pedro niquitijioquiaari Dorcas cusupuenuusano toqueya, cacojoquiyanio. Cunoori quiquiaari na cusupuenuusano saminio na quishacarijia. <sup>40</sup> Pedroori jiyacari puetunujuanaa pueya tohuatanijioquiaari sohuacamaji. Na nuhuaji, nojuajaari mojuquetaquiaari Pueyaso na secojonura. Na secojonu nuhuaji, macuucua tacatereeri. Na sequereeri:

—¡Dorcasnaa, quia sanere!

Macuuri juhua na maquenujiniji niucuaquiaari. Na niquishacari Pedro, cajiriiri. <sup>41</sup> Pedroori na juaashiquiajiniji na quiaquiaari. Na nujuatereeri. Na nuhuaji sequequiaari Jesuucua tiuuniaa pueyari, mashiquiopuenio:

—Miji pueyanaa, jnia nimia!

Nojori tiuquitiasacari, saaja maaji niquitiushii nujuaanoori, tariucua saminio. <sup>42</sup> Pedro miishanoori puetunu Jope tiacajiniajanaa niishishaaquiaari. Queraatia pueyari cunora Jesuucua tiuquiaari. <sup>43</sup> Pedroori na nuhuaji janiya camueenujuquiaarijiaara Jope tiacajinia. Nojuajaari Simón tiajinia quiriquiaa cuniqui na camueenujusacari. Nio Simónri piiquia casaata shoqueya majeetejojua quiquiaari, casaara shipinishocoriquiano shoquejiniji.

## 10

### *Pedro quiasacari Cornelio niquiniuucua*

<sup>1</sup> Cesareya tiacajinia quiquiaariiri tamonu tahue, Romano soldadohua jiyaniijia. Na sesa quiquiaari Cornelio. Na soldadohuari cien quiquiaari. Cuno soldadohua maanuari sesojosaaquiaari “Italiano”. <sup>2</sup> Cornelioori Pueyaso secojojua pueyano quiquiaari, mariyata puetunu na tiajinia quiniaatajanaanio. Nojuajaari seetanujuanaa Pueyaso shuqiritiniu panijia quiquiaari. Cornelioori queraatia na cumaneecajiniji niquitiojojua quiquiaari nareyajuhuj, casamijiuniucua Judiocuaca niquitiojosocoriquiano. Pueyaso secojojua pueyaracaanuuri. <sup>3</sup> Tamonu juuca, tariucua pananu piriushacari, Cornelioori Pueyaso seru niquiquiaari juhua na maquenujinia nocua niyano na tiajinia. Na sequeseeri:

—Cornelionaa.

<sup>4</sup> Cornelioori saaja Pueyaso seru shootiaquiaari na shiriiquiniutia. Na nuhuaji na riucuaereeri:

—¿Casaate jiyaniijianaa?

Pueyaso seruuri na sequeree:

—Pueyasoori quia secojosano tojiquiaa. Quia timitiaari capora quia quiniuucua, quia jiiitiasanojiniji quia niquitiojosacari nareja casamijiuniucua pueyara. <sup>5</sup> Naaratej, quia seya quia jiyaramiquiri Jope tiacajinia. Nojori cuara Simón masuunuucua quiaara. Na sesaari Pedrojuhuj. <sup>6</sup> Nojuajaari na sesaanucua pueyano tiajinia quiya. Tia camaruuri shoque majeetejojua piiquiajinia. Cunoori na poonijosano. Na tiaari shoniniacu caminia casaqueyaji naniya. Simón Pedroori quia sequenutaniya casaa quia miiniu-tianiyani Pueyaso jiyanooniuria quiajaniya.

<sup>7</sup> Pueyaso seru jaara quiaquiaariuhua, Cornelioori caapiqui na seyajini-jinio piiquiaari, niquiriyatu na soldadonio. Cuno soldadoori Pueyaso sec-ojona quiquiaarijuuhuj. Maninia na jiyaniijia naacujua quiquiaarijiaari-uhuj. <sup>8</sup> Cornelio jiyarosaacarijia na seya, nojori pohuataree coteenuuri puetunu Pueyaso seru sequesanojuanaa nojuaja. Na nuhuaji, nojori jiyaramiquirii Jope tiacajiniaari.



<sup>9</sup> Tariqui, Cornelio seya quiasacari nucuaco, nojori quenaacotusacari tari Jope tiacajiniara, Pedroori jiyacari tacaquiaari tia cacojiria, Pueyaso na secojonura. Pananu quishacari pa nacasuhuojuajinia quiquiaari jiyacari. <sup>10</sup> Nojuajaari jiyacari miaajeriquiaa. Neraari juucua sumatusaariquiaacujaja. Nera sumatusacarijia, Pueyasoori casaa na niquitiquiaari juhua na maquenujiniara, na quishacari tia cacojiria. <sup>11</sup> Pedro niquishacari jiyocuacaanu, saaja jiya cajiniocua niquirii riateyanoori. Sonaque queraque niquirii tiji roshinitiashiyanoori, na nacatucujajiniji morojotasano. Pedroocua roshinitiasaareejanaari. <sup>12</sup> Sonaque jiniacuma quiriquiaari puetunu casaajanaa: sacocua, jiyacua rucojuacanio, jiyocuacaanu jaacuatujucacajuhua. Cuno casamiiri quiquiaari Judiocuaca pueresano casaa puetunujuanaa. Maja nojori miaquesano. <sup>13</sup> Jiyacaritij, Pedroori rupaa tojirii jiyocuacaanuji na sequeyano. Naa sequeriquiaari:

—¡Pedronaa, nocua quia sanere! Quia puecoore quia miaquesocoriquiano.

<sup>14</sup> Pedroori na riucuarere:

—¡Maja cua Jiyaniijianaa! ¿Janiyatucua taa miaquere sacuaratia cua miaguesooni? ¡Cunocujajaari tarijia quia sequesano canaa pueresocoriquiano!

<sup>15</sup> Jiyocuacaanuji rupaari socua na sequerohua:

—Pedronaa, majaari miaquesocoriquiano Pueyaso jiyatesano soonu.

<sup>16</sup> Pueyasoori naa pacutejoquiaari sequenu Pedrotej. Na nuhuaji, sonaqueeri tacanitiasaaquiaariuhua jiyocuacaanu. <sup>17</sup> Pedro tacaashacari naa na niquiniuucua juhua na maquenujinatej, jiyacari Cornelio jiyaramiquishano pueyari tia tohuateyaji tiuquiijoquiaari, Simón tia na pajetunura. Cornelio pueyari nequesoretariquiaa nucuacoji nojori tiuquiniuria Simón tiajinia. <sup>18</sup> Nojoriiri tohuateyaji nacaquiaari:

—¿Niya quiyate Simón jiyaniishano pueyano? Na sesaari Pedrojuhua.

<sup>19</sup> Pedroori juhuanajuaja niishiriojoriquiaa na niquishanojiniji juhua na maquenujiniara tia cacojiria. Pueyaso Sohuanuuri jiyacari na sequere:

—Pedronaa, jiuujianaraca pueya quia pajeya. <sup>20</sup> Tariucujaja. Quia sanerohua. Nojoriicua quia roseyarohua. Quiocua nojoritia quiaarohuajuhua. Majaari taacanuunu. Janiyacujajaari nojori jiyaramiquiriucuaa quiocuani.

<sup>21</sup> Pedroori Cornelio jiyarosano pueyacua rosequiaari. Nojori sequeeseri:

—Janiyacujaja nia pajesano pueyanoni. ¿Casaacua nia niyareecuarani?

<sup>22</sup> Nojoriiri na riucuarere:

—Canaa jiyaniijiaari Romano soldadohua jiyaniijia. Na sesa Cornelio. Nojuajaari canaa jiyarorucuaa quiocuani. Maninia miijia pueyanoori. Jiyaniijia Pueyaso tojijiaariuhua. Puetunu Judiocuacajanaari maninia na miiniuucua na panitiuya. Pueyaso seruuri na sequerucuaa, nojuaja masuunura quiajaniya na tiajinia quia quianura, na tojiniuria puetunu quia sequesanojuanaa.

<sup>23</sup> Pedroori Cornelio pueya tiuquinitiaquiaari na quijia tiajinia. Nojori sequereeri:

—Niyaja nia maquesejajara. Pocua tariqui quiaariquiani.

Jaara juhuaquequiaari, Pedroori nojoritia quiaquiaari. Nata quiojoquiaarijiaariuhua Jope tiacajinijinio Jesuucua tiuuniaa pueya.

<sup>24</sup> Tama tariqui saniniuujia, nojoriiri Cesareya tiacajinia tiuquiijoquiaari. Cornelioori na tiajinia sashiriquiaa Pedro, puetunu na tiajinia quijiacatajanaa, queraatia na rupuenatanio. Cornelioori puetunu nio

pueyajanaa masuuquiaari, nojori rerejonura juhuacarijia na tiajinia Pedro tiuquiyaquishacarijia. <sup>25</sup> Pedro tiuquishacari, Cornelioori nocua tohuataquiaari. Carijiniacuma na naacuseeri. Pedroocuara mojuquetaquiaariiri juhua Pueyasooocua. <sup>26</sup> Pedroori saaja na sanaquiaari. Na sequereeri:

—¡Quia nujuare! Janiyari cayajuhua, juhua quiajaniya.

<sup>27</sup> Tiaco na tiuquitasacari, pocoojoriquiaa Pedrotaari. Pedro tiuquishacari, saaja queraatia pueya niquishiiri. <sup>28</sup> Pedroori nojori sequereeri:

—Taucuacanaa, niaacuajaari niishiya canaari Judiocuacani. Judiocuacari rootasaaquiaari maja canaa rupuenura taucuaca, maja quenaaja tahue tiajinia canaa tiuquiniuriajuhua. Saniniuuja, Pueyasoori quiarijia cua niishitiorucuaa cutara maja cua soonura tamasaca. Taucuacaari maja sacuaraatia quiarijia quiria. <sup>29</sup> Naaratej, cua niishishacari niaari cua masuurucuaa niyara, janiyari ritia canujyarucuaani cua taacanuyaquiniutia. Cua totureja, ¿casaara nia masuurucuaa janiyani?

<sup>30</sup> Cornelioori na riucaaree:

—Cuatro juucaari tari shoconujiya. Janiyari jiyacari Pueyaso secojoriquiaa juucua cua tiajiniani, pananu mueecosacari. Jiyacaritij, pueyanoori cucua muetarucuaa. Jiyacaricuajaari quiriquiaa, tee pananu tiuyanijia. Cuno pueyano toqueeri shacantuque quiriquiaa. <sup>31</sup> Cua sequereeri: “Cornelionaa, Pueyasoori quia secojosano tojirii. Naajuhua, niishiyari taa quia niquitiojoquiaa quia casami casamijiuniucuaani. <sup>32</sup> Naaratej, quia seya quia jiyaramiquiri Jope tiacajinia, cuara Simón masuunuucua quiatuura. Na sesaari Pedrojuhua. Nojuajaari na sesaanucua tiajinia quia, shoniniacu caminia casaqueyaji. Tia camaruuri piiquiajinia shoqueya majeetejonu poonijiojua. Simón Pedro jaara nimia quia tiajinia, quiata pocoojonutaniyari”. Pueyaso seruuri naa cua sequerucuaaqui Simónnaa. <sup>33</sup> Janiyari jiyamitia ritia jiyarorucuaa cua seya Jope tiacajiniani, nojori pajenura tii quiajaniya. Quiaacuajaari maninia miirii cucua quia nishacari. Quiarijiani, puetunu pajaniyajanaari niya Pueyaso niquiara quiyani. Naa quia pohuatate canaa tojishocoriquiano quiarijia, taa Pueyaso niishitiojorucuaa quiajaniya canaa quia pohuatanuracuajani.

### *Pedro pohuatasacari Cornelio tiajinia*

<sup>34</sup> Pedroori juhuacatecara pohuatanu coteequiaari. Sequereeri:

—Quiarijia niishiya seetanujuanaa cutaranijia, Pueyasoori maja rimi-ajata na niquiniu pajaniya. Majaari nia jiyaniniu Pueyasoori saaja Judiocuacaacua jiaatiaa, Israel pueya nojori quiniuucua. Maja. Nojuajaari tamasacaacua jiaatiaajuhua. <sup>35</sup> Tiquiyocua jiyacajinia Pueyaso secoj-  
jua pueya quishacari, nojoriiri Pueyaso jiyanooshano pueya quiyajuhua, maninia miijia nojori quishacari. <sup>36</sup> Pueyasoori na rupaa pohuataniquiaari puetunu canaa Israel pueyarajanaa, jiyanooshano canaa quiniuria Jesucristoocua canaa tiuushacari. Nio Jesucristoori puetunu mijiria quiniaa Camarnujuanaa. <sup>37</sup> Tiuquinijiona Juanri Pueyaso rupaa pohuataquiaari pueya tiuquinijosaanura. Na nuhuaji, Jesuuri cutara miishano miiniu coteequiaari Pueyaso cumaacata. Niaari tari niishiyacuaja na miishano canaa Galilea jiyajinia, na nuhuaji na miishano puetunu Judea jiyajinia-janaanio. <sup>38</sup> Niaari niishiyajuhua, Pueyasoori na Sohuanu niquitioquiaari Jesu, na cumaaca na jitianura. Nojuajaari maninia miiquiaari pueya, tiquiyocua na rucuanesacari. Cusosuhua naatanijiojaari. Samaruhua

camarnu sesosano jeecaquiaariijaariuhua. Puetunu naa miijia manini-ajanaari na Que Pueyaso quiniucua nata. <sup>39</sup> Canaari puetunu na miishanojuanaa niqiquiaarini, puetunu canaa Judiocuaca jiyajiniajanaa, Jerusalén tiacajiniajuhuaj. Janiyari seetanujuanaa canaa niqishano pohuataani. Na nuhuaji, pueyari na teetequiaari niyacutesanojinia. Tii na cusojuatuquiaariiri. <sup>40</sup> Jiuujianaraca juucajinia, Pueyasoori na samiitian-iquiaariuhua. Jiyacaritij, na saquirojosano pueyacu na mueratereeri. <sup>41</sup> Majaari na muetanu quiquiaari puetunu pueyacuajanaa. Saaja canacua muetaquiaariiri, teyano Pueyaso saquirojoquiaari coteenu tariucuacaanucujani, Jesujiniji pohuatanuuriquiano. Na samiitiasacariuhua, canaari nata miaquenuuquiaari mariyatani. Canaari nata raruquiaarijuhuaj. <sup>42</sup> Jesu jaara canaa jiyaramiquiquiaari, nojuajaari canaa sequequiaari: “Naa nia pohuatare pueya niqiara: ‘Pueyasoori Jesu jiyatequiaari puetunu mijiria quinia nequesoreenarajanaa, macunucua nequesoreeriquianojuhuaj’ ”. <sup>43</sup> Tariucuacaanu pueyara Pueyaso sequesano caminiujiuniaari naa juhuacariija sequetuquiaari Jesujinijiuhua: “Cante nocua tiuyani, nojuajaari jiyanooshaanutaniya sesa na miishanojiniji”.

#### *Pueyaso Sohuanu tiuquishacari taucuaca jiuujiajiniajuhuaj*

<sup>44</sup> Pedro pohuatasacariija taucuaca niqiara, Pueyaso Sohuanuuri Pedro tojitiana taucuacaacua niqiara, nojori jiuujiajinia na tiuquiniuria. <sup>45</sup> Pueyasocua tiuunia Judiocuacani, Pedrota nijioquiaari Jope tiacajinijini, nojoriiri shiriiquiquiaari Pueyaso niqitiosacari cuno taucuaca na Sohuanu. <sup>46</sup> Cuno taucuacaari nojori niqiara pocooriquiaa tamaatia rupaacajinia. Pueyaso maniuhuaqueetaturiquiaari. <sup>47</sup> Naaratej, Pedroori sequequiaari:

—Nio pueyari tarijiitiaa Pueyaso Sohuanu noojiajinia, taa pa jiitiaacuaani. Naaratej, nojori cuara tiuquinijiosaaria quiarija. ¿Cantucua nojori tenujure maja na tiuquinijiosaanurani?

<sup>48</sup> Pedroori na nuhuaji sequequiaari cuno taucuaca tiuquinijiosaanura Jesucristo sesajinia, nojori tiushacari nocua. Na nuhuaji, Cornelioori Pedro sequequiaari:

—Niyaja quia camueenujurejaara canaata. Maja senota quianuhua.

## 11

#### *Taucuacajiniji Pedro pohuatasacari Jerusalén tiacajinia*

<sup>1</sup> Jesu jiyaramiquishano pueya, mariyata puetunu Jesucua tiuunia pueyajanaa Judea jiyajinia, nojoriiri naa pohuatasaaquiaaritij: “Taucuacanaari Pueyaso rupaacua tiuuriucuaajuahuaj”. <sup>2</sup> Nocujaji, Pedro jaara tacatequiaariuhua Jerusalén tiacajiniohua, narta Pueyaso pueyari na juaaquiariuhua. Na juaaniaari taucuaca cararaatiuquia co miatejonu panijaca quiquiaari, taucuaca quiniuria seetanujuanaa Pueyaso pueya nojoriria. <sup>3</sup> Nojoriiri naa juaaquiari Pedro:

—¿Casaara quia quiaarucuaa cuno taucuacaacuaani? Nojoriiri maja Judiocuaca juhua pajaniya. ¡Quiaanaari nojoritia miaquejocanujuhua! Quia miishanoori maja maninia taa Pueyaso rootaquiari tariucuacaanucujani.

<sup>4</sup> Pedroori suraatiaja nojori pohuataquiaari puetunujanaa tahuajiniji. Coteenu pohuataree na niqishano juhua na maquenujiniaari. Naa sequeeri:

<sup>5</sup> —Jope tiacajinia cua quishacari, janiyari panacari secojoriquiaani. Janiyari jiyacari juhua cua maquenujinia sonaque na nacatucujiniji morojotasano niqiriini. Jiyareta cucuajanaa roshinitiasaareeri. <sup>6</sup> Cua

niquishacari sonaquejinia cua niishiniuria casaate mii quiriquiaani, janiyari saa puereeta casami niquiriijiaani. Janiyari niquiriini jiyacua rucoojuaca, sacocuajuhuj, jiyocuacaanu jaacuatujucanio. Puetunujuaanari pa miaquesocoriquiano pa pueresano casaa quiriquiaa. <sup>7</sup> Janiyari jiyacari jiyocuacaanuji rupaa tojiriini. Cua sequereeri: “Pedronaa, nocua quia sanere. Quia puecoore quia miaquesocoriquiano”. <sup>8</sup> Janiyari saaja na riucuaareni: “¡Maja cua Jiyaniijiana! ¿Janiyatucua taa miaquere sacuaraatia cua miaquesooni?” <sup>9</sup> Jiyocuacaanuji rupaari socua cua sequerohuani: “Pedronaa, majaari miaquesocoriquiano Pueyaso jiyatesano soonu”. <sup>10</sup> Pueyasoori naa pacutejocanu sequenu juucua janiyatej. Na nuhuaji, sonaque tacanitariohua jiyocuacaanuuri. <sup>11</sup> Jiyacaritij, jiuujianaraca canuuri cua quijia tiajinia tiuquishii. Nojoriiri Cesareya tiacajiniji jiyaramiquishano quiquianu, na pajenuunura janiya. <sup>12</sup> Nojori tiuquiyaquishacarijia, Pueyaso Sohuanuuri cua sequeree: “Quiocua nojoritia quiaare. Majaari taacanuunu. Majaari tahua soonu nojori quia rupesacari”. Naa cua tojiniuucuatej, janiyari cunora juhuajaniya nojoritia quiaarucuaani. Nio seis parta Jesuucua tiuunias pueyari cuata quiojiyarucuaajuhuj. Canaari mariyata cuno tahua tiajinia tiuquishiini. <sup>13</sup> Tia camaruuri canaa pohuatarucuaa taa na niquiquianu Pueyaso seru na tiajinia nocua nujuaanoni. Pueyaso serunaari na sequeree: “Jope tiacajinia quia jiyarore quia seya, nojori cuara quiaara Simón masuunuucua. Na sesaari Pedrojuhuaj. <sup>14</sup> Nojuajaari quia sequenutaniya taate quia naata jiyanooshano quiniuni, Pueyaso pueyano quia quiniuria, puetunu quia tiajinia quiniaajuhuj”. <sup>15</sup> Saaja cua cotelesacari Pueyaso rupaa pohuatanu nojori niquiara, Pueyaso Sohuanuuri nojoriicua niquianu, taa pocua coteenujuanaa na niquianucujani. <sup>16</sup> Janiyari jiyacari niishiquii pa Jiyaniijia sequesanonni. Naa na sequesanotej: “Juanri moojinia tiuquiniijia pueya. Pueyaso cutaraari na Sohuanu jiyaronutaniya niaacua, nioojiajinia na tiuquiniuria”. <sup>17</sup> Naacujitij, taucuaca tiuushacari pa Jiyaniijiaacua, Pueyasoori na Sohuanu niquitiorucuaa nojoriijuhuj, taa na niquitiocanu pajaniyacuaani. Cante Jesucristoocua tiuyani, Pueyasoori na Sohuanu na niquitioya. ¿Janiyatucua taa Pueyaso sequereruhuarini: “Maja cuno pojori niquitionu quia Sohuanu”?

<sup>18</sup> Jerusalén tiacajinia quiniaa Pueyaso pueya jaara tojiquiaari naa Pedro sequesanotej, nojoriiri sanaajetaquiaari. Tama nojoriijaarijia Pueyaso maniniuhuaqueetaquiaari. Naa sequetuquiaariiri:

—¡Pueyasojuhuanaja jiyanoohua maninia! Nojuajaari taucuaca panijajuhuj nojori tacatonura noojia sesa nojori miishanojiniji, jiyanooshano nojori quiniuriajuhuaj, pueyaracaanu nojori rishiniuria Pueyasota.

### *Antioquiya tiacajinia Jesu pueyajiniji pohuatasano*

<sup>19</sup> Esteban jaara mosaaquiaaricuaa, Judiocuacaari juhuacatecara Jesuucua tiuunias miiquiaari naquiyajuhuj. Queraatia Jesuucua tiuunias pueyari nocuaji mashiyocuatquiaari. Nojoriiri tiquiyocua niaquejoquiaari. Noojiaqueyari na mashiyocuatucacari tiuquiijoquiaari Fenicia jiyajinia. Tamasacaari tiuquiijoquiaari Chipre jiyajinia. Noojiaqueyari Antioquiya tiacajinia tiuquiijoquiaarijuhuaj. Nojoriiri tii pohuatanuquiaari Pueyaso rupaa Jesujiniji saa Judiocuacaraja, maja taucuacaa. <sup>20</sup> Mashiyocuatunaa tajinia quiquiaariiri Chipre jiyajinijinio pueya, Cirene tiacajinijinio pueyajuhuj. Nio pueya jaara tiuquiijoquiaari Antioquiya tiacajinia, nojoriiri Jesujiniji pohuataquiaari Griegohua niquiarajuhuj. <sup>21</sup> Jiyaniijia Jesu cumaacaari nojoritia quiquiaarijuhuaj. Naacujitij,

queraatia Griegohuari tariucuacaanu tama nojori niishishanojuaaja cartequiaari, Jiyaniijia Jesu tojijiaca nojori quiniuria.

<sup>22</sup> Jerusalén tiacajinia quiniaa Pueyaso pueya jaara nio niishiquiaari, nojoriiri Bernabé jiyarotuequiaari Antioquiya tiacajinia. <sup>23</sup> Bernabé jaara tiuquiquiaari nojoriicua, nojuajaari jiyanoehua shuquiriquiaari na niquishacari taa Pueyaso miiriucuaa maninia cuno Griegohuani, nocua nojori tiuushacari. Naaratej, nojuajaari naa rootaquiaari nojori:

—Pa Jiyaniijiaacua nia tiuuri pueyaracaanu. Majaari nocua tiuuniu nia cartenu. Suraatia na tojijiara nia quiri.

<sup>24</sup> Bernabeeri jiyanoehua maninia pueyano quiquiaari. Pueyaso Sohuanuuri noojia cumaquiquiaari jiyanoehua. Naacuajitij, na pohuatasacari Jesu-jiniji, queraatia pueyari Jiyaniijiaacua tiuquiquiaari.

<sup>25</sup> Na nuhuaji, Bernabeeri Tarso tiacajinia quiaquiaari Saulo pajenuucua. Jaara na riuriataquiaari, na jiyataquiaari Antioquiya tiacajiniaari. <sup>26</sup> Nojori quishacari Pueyaso pueyata cuno tiacajinia, nojoriiri tii shocotequiaari niquiriyatu marijia. Nojoriiri queraatia Pueyaso pueya niishitiojonuuquiaari. Tii Antioquiya tiacajiniani, Jesuucua tiuuniaa pueyari co-teenu sesojosaaquiaari “Cristiano”. Niiori pueyano rupaajinia sequeshiya “Cristo tojiniaa pueya”.

<sup>27</sup> Cuno quishacari, Jerusalén tiacajiniji Pueyaso sequenu panishano caminiujiuniaa pueyari tiuquijioquiaari Antioquiya tiacajinia. <sup>28</sup> Tamonu nojorijinijinioni, na sesa quiquiaari Ágabo. Nojuajaari Jesuucua tiuuniaa pueya rerejonaa tajiniji nujuaquiaari pocuanura. Naa caminiujiuquiaari Pueyaso Sohuanu niishitiosano nojuajaari:

—¡Pueyanaa, puetunu pa jiyacajiniajanaani, miaajenuuri quiniutianiya!

Seetanujuanaa sequequiaariiri Ágabo. Cuno miaajenuuri quiquiaari Claudio quishacari jiyaniijiajanaa, Césartuhuj. Nojuajaari Roma tiacajiniji jitiaquiaari puetunu jiyacajanaa. <sup>29</sup> Antioquiya tiacajinia quiniaa Pueyaso pueya tojishacari naa Ágabo sequesantej, nojoriiri sequequiaari:

—¡Judea jiyajinia quiniaa parta Pueyaso pueya pa naacure!

Nojoriiri naa miiquiaari. Naaratej, cante queraatia cumaneeca jiitiaquiaarini, nojoriiri queraatia niqutioquiaari. Saniniuujia, cante maja puera cumaneecaraca quiquiaarini, nojoriiri secaja niqutioquiaari na jitiiasanojiniji. <sup>30</sup> Na nuhuaji, nojoriiri nareja na niqutiojosano cumaneeca jiyarotaquiaari Bernabeeta, Saulotanio. Nojoriiri Pueyaso pueya jitianaa niqutioquiaari saniniuujia Judea jiyajinia.

## 12

### *Jacobo nacatasaanujiniji pohuatasano, Pedro nujuatesaanujinijinio*

<sup>1</sup> Jiyacaritij, Herodesri jiyaniijia quiquiaari Judea jiyajinia. Nojuajaari Jesuucua tiuuniaa miiquiaari naquiya. Noojiaqueya quiotequiaari na saniitiosocoriquiano nujuatejojuajiniaari. <sup>2</sup> Naa Juan tarajanu Santiago motequiaaricuajaari nijiniaquetucujaja mueruuta. <sup>3</sup> Judiocuacaari shuquiriquiaari naa nojori jiyaniijia motesacari Santiagotej. Naaratej, Herodesri Pedro quiatequiaari na soldadohuajuhuj, Judiocuaca timitianura socua nojuaja. Pedroori quiasaaquiaari Judiocuaca queranacunuusacari, nojori sasacari pan na poreetajaaju majeetesano. <sup>4</sup> Pedro quiasaanu nuhuaji, Herodesri na nujuatequiaari nujuatejojuajinia. Na tohuatenu paniriquiohua juucua Pascua nuhuajiiri, na nequesoresocoriquiano



puetunu quiniqui quiniaa Judiocuaca niquiarajanaa. Dieciséis soldadohuari Pedro cojuariquiaa pueyaracaanu. Nocua sanitijiootoquiaariiri; coteenu cuatro, na nuhuaji socua cuatro. Nojoriiri naa sanitijiootoquiaariti. <sup>5</sup> Pedroori maninia cojuasaaquiaari nujuatejojuajinia. Jiyacariti, Jesuucua tiuuniaa pueyari saniniuujia nocuara secojonuuriquiaa jiyanoehua, Pueyaso naacunura Pedro.

*Pueyaso mashiquishacari Pedro nujuatejojuajiniji*

<sup>6</sup> Cuno niucujani, na juhuaqueyaquishacarijia, quera Herodes tohuatesee tariquicuaji Pedroni, na nequesoreesocoriquiano puetunu pueya niquiarajanaa. Pedroori caapiqui soldadohua tajiniocoma maqueriquiaa, maninia saatijiotasano cumayocuata na numatucua cajiniocua. Tamasaca soldadohuari nujuatejojuah tohuateyaji cojuariquiaacujua. <sup>7</sup> Jiyacariti, Pueyaso seruuri canashiyaquiji coretaquiaari jiyareta Pedro shuriucujanaa nujuatejojuah jiniacuma. Na shacantuucaari jiyanoehua cuhuataquiaari nujuatejojuah. Pueyaso seruuri Pedro jiuuquirii na shuucujaji. Na niucujareeri. Na niucuasacari, na sequereeri:

—¡Ritia quia sanere!

Cumayocuacari tamajaaja saacarejetaquiaari Pedro numatucuaacuaji.

<sup>8</sup> Pueyaso seruuri na sequereejuhuj:

—¡Quia cajiniocua camarucujua quia saatiri socua! ¡Quia sapatu quia cushirijuhuj!

Pedro jaara naa miiquiaari puetunu na sequesanojuanaa, Pueyaso seruuri socua na sequerohua:

—¡Quia toque quia cushiri ritia! Majaari tarishiniu. ¡Quiocua cua nuhuaji rupaashijia!

<sup>9</sup> Pedroori ritia Pueyaso seru nuhuaji sacuariquiaajaa. Jiyanoehua jiya-jeneriquiaari. Majaari na niishiniu quiriquiaa puetunu na niquishanojuanaa. Nojuajaari jiyaniriquiaa na maquenujina niquiya naasucua. <sup>10</sup> Nojoriiri coteenu shocoma na tacoji cojuanaa soldadohua. Socua na tacoji cojuanaa tajitiumiaajaariuhuj. Naa quenaacoturee nujuatejojuah tohuateyajiiri. Nojuajaari Pueyaso seruta nujuatusee jiyareta tohuateyaji. Tohuateyari cumueeca casaata shipinishano quiquiaari. Jiyacariti, tohuateyari tamajaaja riatequee. Nojoriiri tohuareetamaa carijiniacuma. Pueyaso seruuri Pedro jiyatariquiaa sapuenujuaara tiaca jiuujiaaco. Na nuhuaji, na shuriucujaji shaajequeeri. <sup>11</sup> Pedroori jiyacari shusha niishiquii. Naa sequereeri:

—¡Seetanujuanaaqui quiriquiaa! ¡Cua Jiyaniijaquiiri na seru jiyaroree cucua, na mashiquiniuria janiya Herodescuaji, cuarta Judiocuacaacuaji-jiuhuj! Naa na jiyaroreeri maja cua miishaanura taa nojori niishiriojoriquiaa na miiniuria juucua janiyani.

<sup>12</sup> Nojuajaari naa na niishiriojonuta María tiajinia quiaquiaari. Nio Mariacuajaari tamonu Juan nucua. Cuno Juan sesaari Marcojuhuj. Cuno tiajinia, queraatia Pueyaso pueyari Pedroocuara tii secojonuuriquiaa jiyacari.

<sup>13</sup> Pedroori jiyacari piquiquiaari carijiniacuma mataca tohuateyaji. Tiaco seruuri na tojiquiaari piquiyano. Nio seru sesaari quiquiaari Rode, niyaco. Nojuajaari juucua catecanoquiaari tohuateyaji, na niquiniuria cante quiriquiaani. <sup>14</sup> Nojuajaari saaja Pedro tojishii tia camaru jiyaniquiyano, na tiotiu na riatanura nocuaji. Niyaco tojishacari seetanujuanaa Pedro rupaa, majaari tiotiu na riatanu quiquiaari na shuquiriniutia. Saaja netequiaariuhua tiaco quiniaa numootenuraari. Nojori sequesuhuari:

—¡Pedrocuajaqui nooj, tohuateyaji nujuatej!



<sup>15</sup> Pueyari saa niyacoo riucuaquiaarjia:

—¿Quiaate paateya? Teyano Pedrote nujuatesaarucuaacuajani.

Niyacoori nojori sequenu pacutequiaariuhua:

—¡Taaquiririnij! ¡Pedrocuaaquiniatejaj, nooj nujuatej!

Pueyari saaja sequequiaari:

—Maja nojuaja. Pedro cojuana Pueyaso seru naasucuaajaja.

<sup>16</sup> Nojori nacojosacari tiaco, Pedroori tohuateyaji piquijioriquiaajaa. Tiootiu jaara socua riatasaaquiaari, nojuacuajaari quiriquiaa. Pueyari na niquishacari shiriiquitiuquiaari. <sup>17</sup> Pedroori nojori sanaajaree jiyacari na juaashiquiata. Cuniqi quiniaa pohuatareeri taa Pueyaso tohuaterohua nojuaja nujuatejojuajinjini. Pedroori naa sequequiaari nojoritij:

—Niocua naa pohuatate Santiagoyuhua, parta Jesuucua tiuuniaanio.

Na nuhuaji, Pedroori tiji tohuatacuhua. Tamaqui quiaareeri.

<sup>18</sup> Jaara juhuaquequiaari, nujuatejojuajinia cojuanaa soldadohuari jiyanohua shiriiquitiuquiaari. Majaari nojori niishiniu quiquiaari taa Pedro miirii nujuatejojuajinjini nojori tajinjini. Tama nojorijiaarjia naa sequetuquiaari na puerenuta:

—¡Pa jiyaniijia Herodesri quiarjia pa pueconutaniya, maninia pa cojuaaquiniucua Pedro!

<sup>19</sup> Herodes niishishacari, na shuriucua nujuatunaa soldadohua jiyaroguiaariiri nujuatejojuajinia nojori pajenura Pedro. Nojori jaara na riuritaquiquiaari, Herodesri nujuatejojuajinia Pedro cojuanaa soldadohua nequesoreequiaari na juaaniutia, na niishiniuria juucua taa Pedro juurequere nojori shuriucujini. Na nuhuaji, Herodesri jiyanohua na juaaniutia na shuriucua nujuatunaa soldadohua sequequiaari, nojori pueconura narta soldadohua, nojori cojuaaquiniucua maninia Pedro nujuatejojuajinia. Naa na miiniu nuhuajitij, Herodesri Judea jiyajinjini pacuquiaari. Cesareya tiacajinia quishiiri.

### *Herodes shaajenujiniji pohuatasano*

<sup>20</sup> Jiyacaritij, Herodesri jiyanohua juariquiaa Tiro tiacajinia quiniaa pueyata, Sidón tiacajinia quiniaatano. Nio caapiqui tiacajinjini pueyari jiyaniijia Herodes tiacajinia quiojoquiaari nata nojori pocoojonura juucua. Majaari cuno juuca nojori pocoojonu quirii jiyaniijia Herodesta. Nocujaj, nojoriiri Herodes seru sequere:

—Quiocua quia jiyaniijia sequere, canaa nata jiyanoootionu paniyani.

Cuno Herodes seru sesaari quiquiaari Blasto. Nojuajaari na jiyaniijia panishano quiquiaari. Na jiyaniijia maqueja cojuana quiquiaarijiaariuhua. Tiro tiacajinjini pueya, mariyata Sidón tiacajinjini, nojoriiri na cumaneecata masetujua na miaquesocoriquiano jiyaniijia Herodes jiitiasano pueyajinjini. Nojoriiri jiyamitia jeecatoonu paniriquiaa cuno jiyaniijiatata, maninia nojori quiniuhuara nata, Herodes niqitiojotenuhuara na jiitiasano pueya na miajajaura Sidón tiacajinjini pueya, Tiro tiacajinjini pueyano. <sup>21</sup> Herodes seruuri nojori sequequiaariuhua:

—Niocuana tamonu juuca nimia, jiyaniijiatata nia pocoojonura.

Na nuhuaji, cuno pueyari na sequesano juucajinia niqiaariuhua. Jiyaniijia Herodesri nojoriicujaj maniniushiquiaari. Na maniniuqui toque cushiquiaariiri. Jiyaniijiaacuajinjini shipinishano cajitujinia cajiriohuari. Tiji pocuaquiaari cuno pueyacuaari. <sup>22</sup> Puetunu cuniqi quiniaa pueya tojishacari naa maninia Herodes pocuaano nojori niquiaratej, nojoriiri nacoonu coteequiaari. Naa sequetuquiaari na nacoosacariiri:

—¡Nio pueyano pocuaani, majaari nareja pueyano! ¡Nojuajaqui Pueyaso!

<sup>23</sup> Pueya sequesacari naa Herodestej, nojuajaari juhua shuquiu-riosaaquiaari sajaruhua. Majaari quenaaja cuno pueya na sequenu quirii: “Maja naa cua sequetunutej. Janiya maja Pueyasoni”. Nocuaji, Pueyaso seruuri canashiyaquiji na tojetequiaari. Na pocuasacarijia cusomaari. Na sarapiyari na jiniacuma miaquequiaari. Naa cusotaquiaari tama na sarapiyajaarijia.

<sup>24</sup> Pueyaso rupaari saniniuujia socua niyacasaaquiaari, tiquiyocua pohu-atasacari puetunu pueya niquiarajanaa. Naacujitij, Pueyasocua tiuuniaa pueyari socua queraatiara canequiaarijuhuaj. <sup>25</sup> Bernabé, Saulonio, nojori jaara niqutioquiaari cumaneeca Jerusalén tiacajinia Pueyaso pueya jitianaa, nojoriiri ritia quiojoquiaariuhua Antioquiya tiacajiniohua. Nojoriiri jiyacari Jerusalén tiacajiniji riquiaariuhua Juan. Juan sesaari quiquiaarijuhuaj Marco.

## 13

*Saulo Bernabeeta rucuanenoncu coteesacari Jesujiniji pohuatanura tiquiyocua*

<sup>1</sup> Antioquiya tiacajinia Jesuucua tiuuniaa pueyajinijinioni, noojiaqueyari quiquiaari Pueyaso sequenu panishano Pueyaso pueyara caminiuujiniana. Quiquiaarijaariuhua Pueyaso Rupaa niishitiojonaa. Nioori nojori sesaca: Bernabé; Simónnio, na sesa tarajanu quiquiaari Negro; Lucionio. Nojuajaari Cirene tiacajinijinio pueyano. Quiquiaarijaariuhua Manaén. Nojuajaari mariyata Galilea jiyajinia jiyaniijiarano Herodesta canashitijiosaaquiaari. Quiquiaarijaariuhua Saulo. <sup>2</sup> Tamonu juuca, puetunu nojorijianaari Pueyaso secojonuuriquiaa. Cuno juucajuhuaj, majaari nojori miaquenuunu quiriquiaa socua na secojonuunura Pueyaso. Jiyacaritij, Pueyaso Sohuanuuri nojori sequequiaari:

—Bernabé Saulonio, nojori nia jiyatere cua panishano miiriquiano, taa cua sequequiaari tariucuaaanucujani.

<sup>3</sup> Nojoriiri jiyacari socua maja na miaquenuunu quiquiaari. Saaja Pueyaso secojonuuriquiaa socua jyanohuari. Na secojonuunu nuhuaji, nojoriiri Bernabé nacaacua, mariyata Saulo nacaacua niatuquiaari na juaashiquiaca. Nojoriiri naa miishaaquiaari nojori jiyatesaanura Pueyaso jiyaramiquishano pueyara, Pueyaso rupaa pohuatanuuriquiano jyanohua Pueyaso Sohuanu cumaacata.

*Jesujiniji pohuatasacari Chipre jiyajinia*

<sup>4</sup> Pueyaso Sohuanu jiyaramiquishano Bernabé, Saulonio, nojoriiri cuniquiji janiya quiaquiaarijaara nucuaco Seleucia tiacajiniara, shoniniacu caminia casaqueyaji. Nojoriiri cuniquiji quiaquiaari puereetuua buquejia Chipre jyanishano jiyajiniara. Chipre jiyari jiya tucuaatiaja, shoniniacu caminia jiuujiajia. <sup>5</sup> Nojori tiuquijiosacari Salamina tiaca tacatajajiniji, tii Pueyaso rupaa pohuatanuunu coteequiaari puetunu cuniqui quiniaa Judiocuaca secojojuaca tiajiniaqueyajanaari. Juanri nojoritia quiriquiaajuhuj, nojori naacuriquiano. <sup>6</sup> Naa nojori rucoojosacari Pueyaso rupaa pohuatanura Chipre jiya tucuaatiajaacuatej, socua tiuquijioseequiaari Pafos tiacajiniaari Chipre tamajiria. Nojoriiri tii riuriataquiaari shimiacu, narta Judio pueyano. Na sesa quiquiaari Barjesús. Nojuajaari cuniqui quiniaa sapojoquiaari naatej: “Janiyacujaja Pueyaso sequenu panishano caminiuujiniana pajaniyarani”.

<sup>7</sup> Cuno shimiacuuri pueyaracaanu Sergio Paulota quiquiaari. Sergio Pauloori Chipre jiya jiyaniijia quiquiaari. Cuno jiyaniijiaari jyanohua

niishijia quiquiaari. Nojuajaari Bernabé masuuquiaari Saulonio, nojori pohuatanura Pueyaso rupaa nojuaja. <sup>8</sup> Cuno shimiacu sesaari Griego rupajinia sequesaaquiaari Elimas. Nojuajaari saaja cuno jiyaniijia niqiara cuarachitiquiaari Pueyaso rupaa. Naa sequeree cuno jiyaniijiaari:

—Maja cuno pojori tojiniu. Jiyanhua sesaari nojori pohuatasano. Quia sapojotiuyano.

<sup>9</sup> Saulo sesaari Pablo quiquiaarijuhuaj. Jiyacari, Pueyaso Sohuanu cumaquishacari nojuaja, Pabloori jiyanhua shitimia shimiacu jiquioco shootiaree naa na sequesacari nojuaja:

<sup>10</sup> —¡Sesaaca niyanu sequenaa! ¡Maninia miijiaca paracaajianaa! ¿Casaara pueya quia tenujiya Pueyasooajini? <sup>11</sup> ¡Cua Jiyaniijiaari quiaritia quia sanitionutaniya! ¡Quiaari cariojuarura quiniutianiya seetanujuanaa! ¡Quiaari pasaja tarishiniutianiya cariojuaru quia quishacari!

Jiyacaritij, juhua niniquiaari na namijiajinia cajimaa. Cariojuarura quiquiiri. Juhua ninishiqui quiaquejoquiaari puetunu cunocojuanaari, na juaashiquiajiniji na jaatucusaanura juucua. <sup>12</sup> Cuno jiyaniijia jaara naa niquiquiaaritij, Pueyasooajia tiuuriiri na niqiara nojori pohuatasacari shanhua Jiyaniijia Jesujiniji.

*Pablo, Bernabé quishacari Antioquiya tiacajinia, Pisidia jiyajinia*

<sup>13</sup> Pabloori na cojiniaata Pafos tiacajiniji quiaquiaari buquejinia Perge tiacajiniara, Panfilia jiyajinia. Juanri Perge tiacajinia cateseequiaari nojoriicuai. Tiji riujiuuquiaarihua Jerusalén tiacajiniohuari. <sup>14</sup> Na nuhuaji, Pabloori Bernabeeta Perge tiacajiniji quiaquiaari Antioquiya tiacajinia. Antioquiya tiacaari Pisidia jiyajinia. Tii nojori quishacari, nojoriiri samaatenu juuca quiaquiaari narta Judiocuaca secojonuujuu tiacajinia. Na tiuquishacari, cajitiushiiri. <sup>15</sup> Jiyacaritij, tariucuacaanu Moisés Rootasanoori serojosaaquiaari. Tariucuacaanu Pueyaso sequesano caminiujiuniaa naajiotasanoori serojosaaquiaarijuhuaj. Na nuhuaji, rerejua tia camarnuuri naa sequequiaari Pablo, Bernabeenio:

—Cuarta Judiocuacanaa, niaa jaara Pueyasojiniji nia niishishano casaa sequenu paniri, nia niishitiojore quiaritia niya quiniaa niqiara.

<sup>16</sup> Pabloori sanequiaari. Na juaashiquiata sanaajaree pueyari. Naa nojori sequereeri:

—Nia tojitiare cuarta Israel pueyanaa, nijaniyajuhuj, canapuate Pueyaso tojitiajacacuajani tamasa pueyapuejinijinio. <sup>17</sup> Paari sequequiaani: “Pueyasoori pa Jiyaniijia, Israel pueya pa quiniucua”. Seetanujuanaa, paacuajaari Pueyaso saquiriojosano pueyacuajinioni. Tariucuacaanu, Pueyasoori maniniushiquiari pa supuetanaa saquiriojquiaari na pueyara quiriqiano. Na nuhuaji, jiyanhua pa supuetanaa canetequiaariiri Egipto jiyajinia nojori quishacari. Na nuhuaji, Pueyasoori nojori mashiquiquiaari cuno jiyajiniji na cumacata. <sup>18</sup> Cuarenta marijiaari pa supuetanaa shoconujuquiaari pueyaracaanu nojori rucojosacari najuhuaa cariiquia jiyajinia. Pueyasoori jiyacari nojori rejeretaquiaari na tojitiaaquishacari nojuaja. <sup>19</sup> Na nuhuaji, Pueyaso cumacata, siete tamaatiucua rupaa pocuajaca taucuacaari puecoosaaquiaari Canaán jiyajiniji, saniniuujia cuno jiya na niqutiosocoriquiano pa supuetanaa. <sup>20</sup> Pa supuetanaa jaara Canaán jiya camaruhua quiquiaari tari, socua cuatrociento cincuenta marijiaari nojori shoconujuquiaari saaja nequesoreenaa jittiasacari nojori. Na nuhuaji Samuelri nojori nequesoreenara jiyatesaaquiaarijuhuaj. Nojuajaari Pueyaso sequesano caminiujiunia quiquiaarijuhuaj. <sup>21</sup> Samuel quishacarijia, pa supuetanaari

Pueyaso secojonuuquiaari na panitiushacari jiyaniijia, nojori jiitariquiano nequesoreenaa niti. Naacujitij, Pueyasoori nojori jiyaniijia jiyatequiaari Saúl, Cis niyanu, supuetana Benjamín niquiohuacuajinio supueno pueyano. Saúlri nareja cuarenta marijia shocotejoquiaari pa supuetanaa jiyaniijia na quishacari. <sup>22</sup> Na nuhuaji, Pueyasoori Saúl sojotaquiaariuhua Saúl tojiyaquiniucua nojuaja. Saúl niti David jiyatequiaariuhua Israel pueya jiyaniijia saniniuurijia. Pueyasoori naa sequequiaari Davidjiniji, na timitiasacari nojuaja:

“Isaí niyanu Davidcuajaari cua shuquiuriojua. Nojuajaari cua panishano pueyano. Nojuajaari puetunu cua panishano miiniutianiyajanaa”.

<sup>23</sup> Quiari naataja, Pueyasoori na sequesano tohuateequiaari na muerate-sacari pocuaji Tacuna. Nojuajaari Jesu, David niquiohuacuajinio supuenoni. Pueyasoori na seerataquiaari Israel pueyacuaji Tacuna quiriquiano, taa na sequequiaari tariucuacaanucujani. <sup>24</sup> Jesu coteyaquishacarijia rucuanenu na Quejiniji pohuatanura, Tiuquinijona Juanri coteenu nocuaji pohuataquiaari Pueyasojiniji puetunu Israel pueya niquiarajanaa. Tiuquinijona Juanri nojori sequequiaari noojia nojori tacatonuhua Pueyasocua, naajuhuj, moojinia nojori tiuquinijosaanura, Pueyaso tojijia nojori quiniuria. <sup>25</sup> Quera Tiuquinijona Juan shaajesacari, nojuajaari naa sequequiaari: “Janiyari maja Pueyaso Jiyarosani taa nia jiyaniquiaa najuhuana janiyacujani. Na Jiyarosano cutaraari cua nuhuaji niniutianiya. Nojuajaari seetanujanaa Jiyaniijajanaa cutara. Janiya maara jiyanohua shuquiriaatia quirini, nojuaja jaara cua sequere na serura cua quiniuria quenaaja na sapatu cua jocuanura nera. Nojuaja cutaraari saaja maninia miijia”.

<sup>26</sup> ‘Cuarta pueyanaa, nijaniya cante Abraham niquiohuacuajinio pueyacuajani, cua tojitiare, nijaniyajuhaaj taucucanaa, canapute Pueyaso tojijiacujani. Niaranoori nio maninia rupaa Pueyasojiniji, nia jiyanooshaanura sesa nia miishanojiniji. <sup>27</sup> Jerusalén tiacajinia quiniaa, mariyata na camarucuanio, nojoriiri maja na niishiniu quijia cante Jesu quiquiaarini. Majaari nojori niishitiuniu quiquiaarijuhuaj Pueyaso sequesano caminiujiuniaa naajiotasano tariucuacaanu. Cunoori najuhuana nojori serojonuusano puetunu samaatenu juucujanaa. Naacujitij, nojori jaara moquiaari Jesu, maninia tohuateequiaariiri Pueyaso sequesano caminiujiuniaa naajiotasano, taa Jesujiniji sequesaaquiaari tariucuacaanucujani. <sup>28</sup> Jesuuri seetanujanaa maja na miiniu quiquiaari sesa. Tama nojorijiaarijia juhua sesa miijia na jiyatequiaari cutara. Naacujitij, Pilato sequetuquiaariiri cuara na moteeranoj. <sup>29</sup> Nojori jaara tari miiquiaari taa nojuajiniji naajiotasano quiya tariucuacaanu Pueyaso Rupaajiniacuajani, na roshinitiuquiaari niyacutesanojinijiiri. Raaco na niatureeri. <sup>30</sup> Naajaa, macu na quishacari, Pueyasoori saaja na samiitianiquiaariuhua. <sup>31</sup> Na samiitianu nuhuaji, Jesuuri sequeyarucua na pueyacu mueranacujuquiaari, noo pojoriicua canapute na tarajaquiaari na quiasacari Galilea jiyajiniji Jerusalén tiacajiniaracuajani. Nojoricujiaari quiarijia nojuajiniji poojotaniuhua puetunu pueya niquiarajanaa.

<sup>32</sup> ‘Canaari timiyani canaa pohuatasacari nijaniya, ¡Pueyaso pohuatasano pa supuetanaari tari tohuateecanu! ¡Pocuaji Tacunacuajaari tari miiquianu puetunu pa jiyanooshaanurajanaa! <sup>33</sup> Seetanujanaa, Pueyaso sequesano pa supuetanaa Israel pueyarani, cunoori shusha pajaniyara tohuateecanu, pa supuetanaa Israel pueyacuajinio pa quiniucua. Pueyasoori tari tohuateecanu na sequesano pajaniyara, na samiitianishacariuhua Jesu, naatej, taa David jaaquequejonee Salmojinia na sequesano quiyacuajani. Naa

naajiotasano quiyari segundo Salmojinia:

“Quiaari cua Niyanucuaaja. Janiyari quiarijia quia samiitianiriini”.

<sup>34</sup> Pueyasocuaajaari sequequiaari, nojuacuajaari na samiitianiniutianihua na moqueyaquiniuucuaaji na raaco. Nioori naajiotasano quiyajuhuj tariucuaaanu Pueyaso Rupaajinia. Naa sequeyari:

“Janiyari maninia niaara miiniutianiyani taa cua sequequiaari Davidcua-jani”.

<sup>35</sup> Naa naajiotasanoori Jesujiniji quiyajuhua David jaaquequejonee Salmojinia:

“Majaari quia panishano seru cuaqueya quia shanacunu quiniutianiya na moquenura”.

<sup>36</sup> Pueyanaa, paari seetanujuanaa niishiyani Davidri puetunu Pueyaso panishano na miiniu nuhuajijianaa shaajequiaari. Nojuajaari na supuetanaa rupuequiaari macunucua quiquiojinia. Na cuaqueyari seetanujuanaa moquequiaari cutara. <sup>37</sup> Noo Jesu saniniuujia, Pueyaso cutaraari na samiitianiquiaariuhua. Majaari na moquenu quiquiaari cutara. <sup>38</sup> Cuarta Israel pueyanaa, niaa cumaati canaa pohuatasano niishiya. Canaari Jesujiniji nia pohuataani. Niaa jaara nocua tiuuri, niaari sesa nia miishanojiniji jiyanooshaanutaniya. <sup>39</sup> Moisés Rootasanojinia, paari tariucuaaanu niishitiojosaaquiaarini pa seya pa puecoonura Pueyasora, Pueyaso jiyanooniuria pajaniya sesa pa miishanojiniji, maja pa mosaanura saniniuujia. Majaari seetanujuanaa pa jiyanooshaanu quiquiaari naa pa miishacaritij. Quiarijia cutara, canapuate Jesuucua tiuya saniniunijia, nojoriiri puetunu sesa na miishanojinijijianaa jiyanooshiya. <sup>40</sup> Niaa cutaraari cocuaatia miiniutianiya pueyanaa, nia jaara cua pohuatasano ruuretare. Pueyasoori na tojiyashijiaaca saniitionutaniya taa tariucuaaanu Pueyaso sequesano caminiuujunaa sequequiaaricuaajani. Naa sequetuquiaariiri:

<sup>41</sup> “Nia tojitiare, rerequetejacanaa. Niaari jiuujiatenutaniya najuhuanaj. Na nuhuaji, niaari shaajasaanutaniyajuhuj. Janiyari Pueyasoni. Janiyari tarijia nia niquishoo casaa miiniutianiyani. Tamasaca jaara nia pohuatare, niaari saaja na cuaracashitiniutianiya”.

<sup>42</sup> Na nuhuaji, Pabloori narta Judiocuaca rerejojua tiajiniji tohuareetaquiaariuhua na cojiniaata. Taucuacaari tii quiriquiaajuhuj. Nio taucuaacari Judiocuacaacua pacunaa quiquiaari, Judiocuaca nojori quiniurijuhuj, Pueyaso sequesano tojitianaara na quiniuria. Nojoriiri Pablo sequequiaari, Bernabeenio:

—Niocua tamonu sábadu canaa pohuatareeruhuj, socua canaa tojiniuria Jesujiniji.

<sup>43</sup> Nojori quiojosacariuhua Judiocuaca rerejojua tiajiniji, queraatia narta Judiocuacaari nojori nuhuajiquiaari, queraatia taucuaacajinijinio Judiocuaacua pacunaanio. Cuno pojoriiri maninia Moisés niishitiojosano tojitianaa quiquiaari. Nojoriiri Pablo, Bernabé nuhuaji sacuariquiaa. Naaratej, Pabloori Bernabeeta naa rootaquiaari nojori:

—Saaja Pueyasocua tiuujia nia quiri. Majaari nocuaji taacanuunu. Nojuacuajaari pa cumaquijia.

<sup>44</sup> Cuno nuhuaji, Sábado juuca jaara tari quiquiaari, quera puetunu cuno tiacajiniji pueyajanaari Pueyaso rupaa tojiniuucua rerejoquiaari.

<sup>45</sup> Judiocuaca secojojua tia camarucua jaara niquiquiaari queraatia pueya na rerejojuaajinia mishiyano, Pablo pohuatasano na tojitianura, nojoriiri juaaquiouquiaari. Nojoriiri tama sequetooquiaariiaaja:



—Puetunu pueyajanaari cuno pojori tojitiajacara quiniutianiya. Pa tojiyaquiniutianiya saniniuurijia.

Naa sequeturiquiaa pueya niquiara Pablojinijijaariuhuj:

—¡Pabloori maja maninia na niishiniu Pueyaso rupaa! ¡Najuhuana sesa pohuataano! ¡Nojuajaari niishiyashijia!

<sup>46</sup> Pabloori saaja Bernabeeta sequequiaari na puereyaquiniutia:

—Maniacuajaqui, cuarta Judiocuacanaa. Canacuajaari naa panitijaja niajanijatej, Pueyaso rupaa canaa coteetanura pohuatanu niajanijatej, Pueyaso saquiriojosano Judiocuaca nia quiniuucua. Niaacuajaari saa na ruuretareejaa. ¡Majaquiiri nia rishiniu paniniu, pueyaracaanu nia quiniuria Pueyasota! Quiarijiani, canaari saniniuujia taucuacaacua quianutaniyani, Pueyaso rupaa canaa pohuatanura nojori niquiara. <sup>47</sup> Canaa Jiyaniijia jaara canaa jiyaramiquiquiaari, nojuajaari naa canaa sequequiaariti: “Quia jiyatequiaari mijiria cuhuatariquianonijia. Quia pohuatasano janiyajiniiri caminiujiushaanutaniya taucuaca niquiara puetunu jiya puequeetujinijanaa, Pueyaso jiyanooniuria nojorijihuj”.

<sup>48</sup> Cuniqi quinia taucuaca jaara naa tojiquiaari sequeshianotej, nojoriiri shuquiriquiaari. Pueyaso rupaa maniniuhuaqueetareeri. Sequetureeri:

—¡Jiyanohua maninia pa Jiyaniijia Pueyaso rupaa!

Teyano pueya Pueyaso saquiriojoquiaari tariucuacaanu na pueyara quiriqianocuajani, pueyaracaanu nata rishiniuriacuajani, jiyacariti, nojoriiri Jesuucua tiuquiaari. <sup>49</sup> Jiyaniijia rupaari pohuatasaaquiaari puetunu cuno jiyajinijanaa. <sup>50</sup> Judiocuacaari na juaaniutia Pueyaso panijia maajipohua shiniujuquiaari na cojitiuniuria nojori, nojori miiniuria naquiya Pablo, Bernabeenio. Naa rootatuquiaari cuno tiacajinijicamarucuajaariuhuj, mariyata cuno jiyajinijic nojori taanuunura Pablo, Bernabeenio. <sup>51</sup> Naaratej, na nuhuajiria, Pablo, Bernabeenio, nojoriiri na niohuacajinijic seseeca rapijionuutaquiaari. Naacuajiti, Antioquiya tiacajinia quinia pueyari niishiquiaari, Pueyaso saniitiosacari nojori, majaari nojori Pabloori, Bernabeecua na tiutianu quiniutianiya Pueyaso jiyanoyaquishacari nojori. Na nuhuaji, Pabloori Bernabeeta cuno tiacajinijic quiaquiaari Iconio tiacajinia. <sup>52</sup> Jesuucua tiunijia pueyari saniniuujia shuquiriaatia jatequiaari Antioquiya tiacajinia, nojori jiiitiasacari Pueyaso Sohanu.

## 14

### *Pablo, Bernabé quishacari Iconio tiacajinia*

<sup>1</sup> Pablo, Bernabeeta naa miiquiaarijuhua Iconio tiacajinia. Nojoriiri narta Judiocuaca rerejojua tiajinia tiuquitiaquiaari. Nojoriiri tii pohuataquiaari Jesujinijic puetunu nojori niquiarajanaa. Queraatia pueyari Jesuucua tiuquiaari, Judiocuaca, taucuacanio. <sup>2</sup> Noojiaqueya Judiocuacajinijinijic maja na tojinijic paniniu quiquiaari Jesujinijic pohuatasano. Cuno pojoriiri taucuaca shiniujuquiaari nojori juaaniuria Jesuucua tiunijia pueya. <sup>3</sup> Pabloori, Bernabeeta cunora socua jijojequiaari pueyaracaanu cuniqi, Jesuucua tiunijia nojori cumaquiniuria. Nojoriiri maja na puerenu quiquiaari Jiyaniijicajinijic nojori pohuatasacari. Seetanujuanaa, Jiyaniijicari nojori naacuquiaari jiyano hua cutara maninia miishano nojori miiniuria, pueya naatanijionurajuhuj. Jiyaniijicari nojori naacuquiaari cuno pueya niishiniuria, seetanujuanaari quiquiaari Pablo, Bernabé pohuatasano. <sup>4</sup> Cuno tiacajinia quinia pueyari raquitiquiaari. Noojiaqueyari tama narta Judiocuaca tojiquiaarijaaja. Saniniuujia, tamasacari



Jesu jiyaramiquishano pueya tojjiara quiquiaari. Nojoriiri naa quiquiaari cuno tiacajinia. <sup>5</sup> Naa nojori quishacaritij, Judiocuacaari taucacata roojotooquiaari cuno tiacajinia jiyaniijianucuata. Naa roojotooquiaariiri nojori sesacanura Pablo, Bernabeenio, na jacutunura saitiajuhuaj. <sup>6</sup> Pablo, Bernabé jaara niishiquiaari naa cuno pueya miiniu panishacari nojoritij, tiji mashiyocuatiquiaariiri Licaonia jiyajiniara. Nojoriiri Litra tiacajinia quiojoquiaari, Derbe tiacajiniarano, cuno caapiqui tiaca shocua quijiaca tiacajiniajuhuaj. <sup>7</sup> Nojoriiri tii poojotaquiaari Jesujiniji nojori niishishano.

*Litra tiacajinia pueya jacutusacari Pablo saitia*

<sup>8</sup> Litra tiacajinia quiquiaariiri sesarunocua pueyano. Majaari na rucuanenu quijia. Nojuajaari naa rasaaquiaarijuhuanajaj. Majaari na pooniniu quijia na cajituijiniji. <sup>9</sup> Cuno pueyanoori Pablo tojiriquiaa na pohuatasacari Jesujiniji. Pablo jaara na niquiquiaari, na niishiriiri nojuajaari seetanujanaa tiuuriquiaa na pohuatasanoocua. Naa Jesuucua na tiuuniuucuatej, Pabloori niishirii cuno pueyano na naata na cashacu jeequenuhua. <sup>10</sup> Pabloori jiyamitia jiyanoohua na sequeree:

—¡Maninia quia nujuare! ¡Maja porequetanu!

Cuno pueyanoori ritia sanequee. Rucuanenu saniriiri. <sup>11</sup> Cuno Licaonia pueya jaara niqutiuchiaari naa Pablo miishanotej, nojoriiri tama na rupaa-jiniajaaja sequetuquiaari:

—¡Cumaacaraca quijiacaari juhua pueyasohua pocua rosetareeni, juhua pueya niquishano!

<sup>12</sup> Naa nojori sequesacaritij, majaari Pablo, Bernabé niishiniu quiquiaari nojori sequesano tama nojori rupaa-jiniajaaja. Cuno pueyari Bernabé sesojoree Júpiterta, juhua nojori pueyaso sesa. Pabloori sesojosaareecujua Mercurio, jiyanoohua pocuanu niishijia na quiniuucua, juhua nojori pueyaso Mercurio. Nio sesacaari Licaonia pueyapue pueyasohua sesaca quiquiaari, nojori jiiitasano juhua na pueyasohuara cuno jiyajinia. <sup>13</sup> Júpiter secojojua tiaari Litra tiaca tohuateya shuriucua quiquiaari. Jiyacaritij, Júpiter secojojua tia cojuanaari juyaca jaatucunuquiaari, Pabloocuara nojori puecoosocoriquiano Bernabeecuarano, juhua nojori pueyasohuacuara. Maniniushitiajara naana shuucuaca shiyosano patootaquiaarijiaariuhujaj. Cuno pueyanoori puetunu pueyatajanaa Pablo, Bernabé shuquiritianu paniriquiaa juucua, juyaca na puecoosacari nojoriicuara juhua Pueyasooacuara. <sup>14</sup> Pablo, Bernabé jaara niquiquiaari naa cuno pueya miiniu paniyano nojoritij, nojoriiri na toqueya sutaquiaari nojori tacaaniutia. Pueya tajiniaaco netecuatuquiaariiri nojori miiniu panishano nojori tarinitianura. Pabloori naa nacaquiaari puetunu cuno pueya tojishocoriquianojuanaa:

<sup>15</sup> —¡Pueyanaa! ¿Casaara naa nia miya canaani? ¡Canaari nareja pueyani taa niajaniiyacuaani! ¡Canaari naacua niyarucuaa niaacuatej canaa sequenura niajaniiya, puetunu nio najuhuaana nia miishanojuanaa nia cartenura! ¡Saaja nia shuquiritiare cutara pueyaracaanu rishijia Pueyaso! Nojuajaari nio jiya shipiniquiaari, jiya cajiniocua. Na shipinishanojaariuhua shoniniacu caminia. Puetunu pa niquishanojuanaari na shipinishano. <sup>16</sup> Pueyasoori tarijia puetunu pueyajanaa tarinitiaquiaari nojori miiniuria tama nojori panishanojuajaaja. <sup>17</sup> Naajaa, nojuajaari pa supuetanaa niishitiquiaari cante nojuajani, maninia na miishacari nojoriria. Nojuajaari maru nitiquiaa pajaniyara, pa nataacuaca moritianura, pa miasocoriquiano pa jiiitianura queraatia, shuquiriaatia pa quiniuriajuhuaj.

<sup>18</sup> Pablo, Bernabé jaara naa sequequiaari cuno pueyatej, pueyari jatarinitiaja socua tarinitiaquiaari nojoriicuara na puecoonu panishano juyaca.

<sup>19</sup> Jiyacaritij, Antioquiya tiacajinijinio Judiocuacaari tii tiuquiiijioseequiaari, Iconio tiacajinijinionio. Nojoriiri cuniqui quiniaa nasojosee Pabloocuara, Bernabeecuaranio. Cuniqui jacuturee saitia Pabloori. Nojori jaara jiyaniquiaari Pablo naasucuaari tari cusoyaree saitia jacusano, na jaatiuquiaari tiacajiniji tamamaari. <sup>20</sup> Jesuucua tiuuniaa pueya jaara rerejoquiaari Pablo shocua, macu na quishacari, nojuajaari saaja sanequiaariuhua, saitia jacusano juucua. Na jacunaa tiacajinia tiuquiquiaariuhua saajaari. Tariqui cuno tiacajiniji quiaquiaari Bernabeeta Derbe tiacajiniaari.

<sup>21</sup> Jaara Jesujiniji pahuataquiaari tii, queraatia pueyari Jesuucua tiuquiaari. Na nuhuaji, nojoriiri Derbe tiacajiniji riujuutuiaquiaariuhua. Tiuquiiijioquiaariuhuari Listra tiacajinia, Iconio tiacajinia, Antioquiya tiacajinianio. <sup>22</sup> Pabloori Bernabeeta puetunu cuno tiacajinia quiniaa Pueyaso pueya rootaquiaari socua, maja nojori tarinitianura Jesuucua tiuuniu. Pabloori naa nojori sequequiaari:

—Canapuete Pueyaso shuriucua quiriquianoni, nojoriiri naquiya miiniutianiya mijiria.

<sup>23</sup> Nojoriiri maninia Pueyaso tojijaca pueya saquiriojotuquiaari, nojori jiyatesocoriquiano Pueyaso pueya jiitariquiano. Naa miitiuquiaari puetunu cuno tiacajiniajanaari, Pueyaso pueya jiitianura tama nojori nacasunaajaaja. Jesu saquiriojosano pueyari maja na miaquenuunu quiquiaari Pueyaso na secojonuusacari. Nojoriiri naa secojoquiaari Pueyasotej, narta Pueyaso pueya jiitariquianoocuara:

—Canaa Jiyaniijianaa, nio pueya quiocua tiuujiacani, nojori quia naacure quiocua tiuuniaa narta pueya nojori jiitianura maninia.

*Pablo tacatesacariuhua Bernabeeta Siria jiyajinia Antioquiya tiacajiniara*

<sup>24</sup> Nojori riujuuuniuhuara Antioquiya tiacajiniohuara, Pisidia jiya shocotumohuari. Na nuhuaji, tiuquiiijioquiaariuhua Panfilia jiyajiniaari. <sup>25</sup> Tii Pueyaso rupaa pahuatatuquiaari Perge tiacajiniaari cuno pueya niquiara. Nojori pahuatanu nuhuaji, Atalia tiacajinia quiojoquiaariijaariuhuj. <sup>26</sup> Cuniquiji, buquejina jaaretatuquiaari Antioquiya tiacajiniaraari. Cuno Antioquiya tiacaari quiquiaari tee cuniqui narta Pueyaso pueya niaquiaari nojoriicua na juaashiquiacujani, Pueyaso nojori secojosacari. Nojori naa miiquiaari, Pablo, Bernabé jiyatesaanura tucuaaanu nojori quiojonura Pueyaso rupaa nojori pahuatanura taucua. Cunoori quiquiaari shushajanaa nojori coteenu panishacari rucuanefonu tamaquiicua. Naacuajitij, nojori tohuateenu nuhuaji puetunu Pueyaso panishanojuanaa, jiyacari shusha tiuquiiijioriquiohuari. <sup>27</sup> Antioquiya tiacajinia nojori quishacari tari, nojoriiri puetunu Jesuucua tiuunia pueya masuunujuquiaariijianaa. Cuniqui pahuataturee puetunu nojori niquiarajanaari, taa Pueyaso naacucanu maninia nojori pahuatasacari Jesujinijini. Pahuatanuuquiaariijaariuhuj taa Pueyaso taraajetequiaari taucua jiuujiani, Jesuucua nojori tiuuniuriajuhuaj. <sup>28</sup> Pabloori, Bernabeeta cuniqui tarishiquiaariijaara narta Jesuucua tiuuniaata.

## 15

*Jesuucua tiuuniaa jiitianaa nacoosacari Jerusalén tiacajinia*

<sup>1</sup> Jiyacaritij, Judea jiyajinijinio pueyari Antioquiya tiacajinia quiojoquiaari. Nojoriiri tii sesa niishitiojonu coteequiaari cuniqui quiniaa Jesuucua tiuuniaa pueya. Nojoriiri naa sequeriquiaa Antioquiya tiacajinia quiniaa narta Pueyaso pueyatej:

—¡Pueyanaa, Jesuucua tiuuniaa pueya cuaara na cararaatiuuquia co miatejoteera, taa Moisés niishitiojoquiaaricujani! ¡Jaara miatesoo quiri, majaari Pueyaso jiyanooni quiniutianiya jiyanotej, na pueya nojori quiniuria!

<sup>2</sup> Pablo, Bernabeenio, nojori jaara tojiquiaari naa cuno pojori niishitiojosanotej, nojoriiri cuno pojoritia nacojoquiaari jiyanohua. Naacuajitij, Antioquiya tiacajinia quiniaa Pueyaso pueyari Pablo, Bernabé sequequiaari nojori quianura noojiaqueya cuniquijinio pueyata Jerusalén tiacajinia. Nojori jiyaroreeri na nequesotanura Jesu jiyaramiquishano pueya Jerusalén tiacajinia, mariyata Jesuucua tiuuniaa pueya jiiitianaanio. Nojoriiri jiyaramiquishaaree cuno pojori nequesotasaanura, ¿seetanutejanaa naa miishiyatena, taa cuno Judea jiyajinijinio nijiono pueya niishitiojiya canaacujani?

<sup>3</sup> Naacuajitij, Pabloori Bernabeeta jiyarosaaquiaari Jerusalén tiacajiniara. Nojori quiasacari Jerusalén tiacajiniara, Fenicia jiyacuma quiojomaquiaariiri, Samaria jiyacumanio. Nojoriiri cuno jiyacajinia Pueyaso pueya pohuatanuumaquiaari taa taucuaca cartequiaari tama sesa nojori miishanojuajani, Pueyaso tojijiara nojori quiniuria. Jesuucua tiuuniaa pueya jaara naa tojiquiaaritij, nojoriiri jiyanohua shuquiriquiaari.

<sup>4</sup> Nojori tiuquiiijosacari Jerusalén tiacajinia, puetunu Jesuucua tiuuniaa pueyajanaari nojori rerejotaquiaari, mariyata puetunu Jesu jiyaramiquishano pueyajanaanio. Pablo, Bernabeeri jiyacari nojori pohuataquiaari puetunujanaa, naajuhuj, taa Pueyaso naacuquiaari maninia nojorini, nojori pohuatasacari taucuaca Jesujiniji. <sup>5</sup> Cuniqui quiriquiaajaariuhua Fariseocuaca, tariucua Jesuucua tiuujiaa. Cuno pojoriiri rerejonaa tajiniji nujuatuquiaari. Naa sequetureeri:

—Cuno taucuaca Jesuucua tiuuniaani, na cararaatiuuquia co cuaara miatejosaaria Judiocuaca nojori quiaquishacari. Na nuhuaji, nojori cuaara Moisés niishitiojosano tojijiara quiri, taa Moisés rootaquiaari tariucuaanucujani.

<sup>6</sup> Naa nojori nacojonu nuhuajitij, saa Jesu jiyaramiquishano pueyajaari rerejoquiaari jiyareta Jesuucua tiuuniaa narta pueya jiiitianaata. Nojoriiri maninia niishiriojonuuquiaari taa na miiniutianiyani. <sup>7</sup> Naa pueyaracaanu nojori pocoojosacaritij, Pedroori socua nojori tajiniji nujuaquiaari. Naa nojori sequereeri:

—Pueyanaa cua tojitiare. Niaacuajaari niishiya, pa Jiyaniijiaari cua saquiriojoquiaari na rupaa pohuatariquiano taucuaca tojishocoriquiano, nojori tiuuniuria Pueyasocuajuhuj. <sup>8</sup> Pueyasocuajaari poojia niishijia. Nojuajaari cuno taucuaca niishitiquiaari, nojuajaari nojori jiyateree na pueyarajuhuj, na Sohanu na niqitiosacari nojori, taa na niqitioquiaari pajaniyacuaani. <sup>9</sup> Majaari nia jiyaniniu Pueyasoori saaja Judiocuaca paniya. Pueyasoori maja rimiajata na paniniu. Nojuajaari puetunu pueya paniyanaa. Cuno taucuaca jaara nocua tiuquiaari, nojuajaari nojori jiuujia jeequereehuj saaja Jesuucua nojori tiushacari. <sup>10</sup> Naa nia tamacasacari taucuacajinijinio parta Pueyaso pueyatej, niaari Pueyaso miishano sojotaaruhua. ¿Casaara nia tamaca Pueyaso miishanoni? Niaari quiaritia Moisés niishitiojosano tojitiniu paniya Jesuucua tiuuniaa pueya, juhua pa tojishanocuaa. Saniniuujia, majaari quenaaja pa supuetanaa na naata na miiniu

quiquiaari puetunujuanaa, taa Moisés niishitiojoquiaaricuajani. <sup>11</sup> Paari niishiyani pa Jiyaniijia Jesuuri pa jiyanoojia. Naaratej, pa jiyanooquiaari, na pueya pa quiniuria. Mariyata naa miiquianu cuno taucuacajaariuhuj. Majaari seetanujuanaa maninia pa miiniu quiquiaari pa jiyanooshaanura.

<sup>12</sup> Naa Pedro sequesacaritij, puetunu pueyajanaari socua sanaajetaquiaari. Bernabeeri Pablota jiyacari pohuataquiaari taa Pueyaso na cumaacata miitiqiaari maninia taucuaca niquiarani, naajuhuj, taa nojori naatanijioquiaari cusosuhujaniuhuj. <sup>13</sup> Naa nojori pohuatanu nuhuajitij, Santiagoori sequequiaarijuhuaj:

—Cuarta Pueyaso muerasunaa, cua tojitiare. <sup>14</sup> Simón Pedrocuajaari tari pa pohuataree taa Pueyaso coteecanu shusha na Sohuanuta poonijionura cuno taucuaca jiuujiajiniani. Pueyasocujaari nojorijinijinio jiyateya seetanujuanaa na pueyara, nojori maniniuhuaqueetanura nojuaja. <sup>15</sup> Seetanujuanaari nio. Naajuhuj, tariucuacaanu Pueyaso sequenu panishano caminiujiuniaacuajaari naa naajionuutaquiaari Pueyaso sequesantej:

<sup>16</sup> “Janiyari David niquihuacuajinio mueratenutaniya tamonu pueyanoni. Davidcuajaari na supuetanarano. Nojuajaari Jiyaniijiajanaa quiriquiano puetunu pueyapuerajanaa, taa David quiquiaari Israel pueya jiyaniijiacuaani. <sup>17</sup> Naacuajitij, puetunu taucuacajanaari cua pajenuunutaniya, noo pojori teyano cua saquiriojoquiaari tariucuacaanucujani, nojori jiyatesocoriquiano na Jiyaniijia janiya’. <sup>18</sup> Jiyaniijiaari naa sequeyaquij. Nojuajaari tariucuacaanu pueya toquiaari nio”.

<sup>19</sup> Naaratej pueyanaa, janiyari nia sequeyani, nareja nia niquiri cuno taucuaca, Jiyaniijia Jesuucua tiuuniaani. Majaari nojori najiquitiniu Pueyasocujaari, nia tojitiniu panishacari nojori tariucuacaanu Moisés niishitiojosano. <sup>20</sup> Nareja nojoriicuara pa naajiore. Pocua pa naajioneejinia sequere nojorini, maja tari nojori miaquenuunura shipinishano pueyasocuaara na puecootusano casaa, juunu, borregonio. Cuaara qutiuruia saa necocuataja, maja tamonu na numuetucunura socua. Jaara shu miaquetunu paniri, cuaara na miaqueera puetunu na nanaca caatinijasanojuanaa, naajuhuj, maja na miaquenuunura casami nanaca. <sup>21</sup> Puetunu nio cua sequesanojuanaari parta Judiocuaca tojishano. Cuno niishitiojosanoori pueyaracaanu parta Judiocuaca rerejojuaca tiajinaqueya naa serojosaaquiaa Moisés naajioneejiniji puetunu samaatenu juucajanaa, puetunu tiquiyocua tiacajinijanaa.

<sup>22</sup> Naa nojori pocoojonu nuhuajitij, Jesu jiyaramiquishano pueya, puetunu tii quiniaa Jesuucua tiuuniaa pueyajanaano, nojori jiiitianaajuhuj, puetunu nojorijianaari mariyata niishiriojonuuquiaari. Naacuajitij, nojoriiri narta Pueyaso pueya saquiriojotuquiaari na jiyarotusocoriquiano Antioquiya tiacajinia Pablota, Bernabeetanio. Jiyacari saquiriojosaareeri Judas, Silasno. Judas sesaari Barsabás quiquiaarijuhuaj. Cuno pojoriiri Jesuucua tiuuniaa pueya tojishano quijia cutara, cuniqui Jerusalén tiacajiniani. <sup>23</sup> Nojoritia jiyarotasaquiaariiri naajione. Cuno naajioneejiniaari naa sequequiaari:

“Niaacuara naajionaani, canaari Jesu jiyaramiquishano pueyani, Jesuucua tiuuniaa jiiitianaano, Jerusalén tiacajinia niarta Jesuucua tiuniaa pueyajuhuj. Canaari nia saruhuataani pueyanaa. Taucuaca nia quishacari, naajaa. Jesuucua tiuuniaa nia quishacari, niaari canaa tapueyocujuhuj, tiquiyocua Antioquiya tiacajinia quijia, Siria jiyajinia quiniaano, Cilicia

jiyajinia quiniaajuhuaaj. <sup>24</sup> Canaari niajanijajiniji pohuatasaarucuaani, ni-iquiji pueyanaari niaacua quiacanu. Canaa nia jiyanoori. Majaari canaa jiyaronu quiquianu nojori. Cuno pojoriniaari nia taajetecanu tamaatia nojori niishitiojosacari niajaniya. Naajuhuaaj, nia cushitioconuuri nojori sequesacari nia cararaatiuuquia co nia miatejonura taa Moisés niishitiojoquiaaricujani. Nojoriniaari nia shiniujuquianu nia tojtianura socua Moisés Rootasanojuhuaaj. Quiaritia maja naate pueyanaa. <sup>25</sup> Naaratej, saa jiyareta canaajaari niya rerejoreeni canaa niishiriojonura canapue canaa saquiriojonutaniyani niaacua jiyaramiquishocoriquiano. Canaari nojori saquiriojoree tarini canaa jiyarosocoriquiano Pablota, Bernabeetanio, nojori pocoojoriquiano maninia niaata. <sup>26</sup> Canaa panishano pueya Pablo, Bernabeenio, nojoriiri tama na cuaqueya panitiaquiaaritiaa Jesujiniji nojori pohuatasacari tiqiyocua. <sup>27</sup> Quiarijiani, canaari niaacua jiyaroya canaajinijinio canaa saquiriojosano pueyani. Nojoriiri Judas, Silasnio. Nojoriiri nia sequenutaniya casaa nia miiniutianiyani, naatej, taa canaa pocoojoree canaa rerejosacaricujani. <sup>28</sup> Canaa niishiriojosanoori maninia quiya Pueyaso Sohuanura. Canaari na shuquiritiaajuhuaaj. Majaari canaa cushitionu paniniu niajaniya puera canaa supuetanaa niishitiojosanota najuhanaj. <sup>29</sup> Canaari saaja nio nia sequenu paniyani pueyanaa. Nia tojitiare. Majaari socua nia miaquenu shipinijosano pueyasohuacuara puecoosano casaa. Majaari nanaca miaquenu. Naajuhuaaj, niaa jaara shu miaquenu paniri, nia miaquere maninia na nanaca caatinijasano. Naajuhuaaj, saaja nia niquiocoahuata nia quiriquia. Majaari socua tamonu numuetucunu. Niaa jaara nio tojjia quiri, niaari maninia miyacuaja. Tariucuaja pueyanaa”.

<sup>30</sup> Naacuajitij, cuno cuatro pueyari jiyarosaaquiaari Jerusalén tiacajiniji. Jaara tiuquiijoquiaari Antioquiya tiacajinia, nojoriiri puetunu Jesuucua tiuuniaa pueyajanaa numootejoquiaari na rerejonura. Puetunu nojorijianaa jaara tari rerejoquiaari, jiyacari niquitiosaaquiaariirino cuno naajionee puetunu nojori niquiarajanaa serojosocoriquiano. <sup>31</sup> Naajionee jaara serojosaaquiaari, puetunu Jesuucua tiuuniaa taucuacajanaari shuquiriquiaari jiyanoohua. Naacuajitij, nojoriiri noojia cajitiquiaariuhua tacaquioyano juucua. <sup>32</sup> Na nuhuaji, Judasri Silasta cuniqui Antioquiya tiacajinia camueenujuquiaari. Nojoriiri Pueyaso Sohuanu cumaaca jiiitiaquiaari, Pueyaso sequenu panishano nojori caminiujiuniuria. Naacuajitij, nojoriiri Jesuucua tiuuniaa pueya cumanijiaquiaari jiyanoohua. Na rootatuquiaariiri maja nojori tarinitianura Jesuucua tiuuniu. <sup>33</sup> Nojoriiri Antioquiya tiacajinia camueenujuquiaari pasaja. Na nuhuaji, nojori quianu panishacariuhua Jerusalén tiacajiniohua na jiyaronaacua, Antioquiya tiacajinia quiniaa Pueyaso pueyari nojori sequequiaari:

—Maniniacuaja. Juhuaajaniya nia quiaarohuaqui.

<sup>34</sup> Silasri saaja na cojiniaacuaji jateequiaari cuniquijia Antioquiya tiacajinia. Naacuajitij, Judasri tamajaaja tacatequiaariuhua Jerusalén tiacajiniohua. <sup>35</sup> Pablo, Bernabeeri Antioquiya tiacajinia camueenujuquiaarijuhuaaj. Nojoriiri cuniqui Jesuucua tiuuniaa pueya niishitiojoquiaari. Queraatia cuniquijinio pueyari nojori rupuequiaari niishitiojonurajuhuaaj. Puetunu nojorijianaari Jiyaniijia Jesujiniji pohuataquiaari tamasa niquiarajuhuaaj.

*Pablo pacutenu panishacariuhua quianu Pueyaso pueya na niquiniuhua*

<sup>36</sup> Nojori jaara tari tarishiquiaari tii, Pabloori Bernabé sequequiaari:

—Noo tiacajinia pa camiquioocuara socua niquiniuhua, paa tii pohuatacanu Jiyaniijia rupaatej. Naa pa miiri pa niishiniuria taa parta Jesuucua tiuuniaa pueya quiyani.



<sup>37</sup> Bernabeeri na riucuaaree:

—Jajaa. Juan pa riyarecuarajaj, pa tarajariquiano.

Juan sesaari Marco quiquiaarijuhuaj. <sup>38</sup> Majaari Pablo paniniu quiquiaari Juan quianura nojoritia. Nocuaiji Bernabé sequequiaariiri:

—¿Paatucua casaara rupoyare pocua Marco sajaaraniuhua? Nojuacua-jaari pa tiujiaquiaariuhua Panfilia jiyajinia pa quishacari. ¿Pueyaso rupaa pa pohuatasacari pa tarajacanu maniniatucuaa? Naacujaa.

<sup>39</sup> Saa nojorijaari socua juayonuutaquiaari Juan Marcoocua. Nocuaiji Bernabeeri jiyacari Pabloocuaiji rupatequiaari. Na rupatesacari na rupuena Pablojiniji, nojuajaari Juan riquiaari cutara na tarajariquiano. Jiyacaritij, tama nojorijaarijia buquejinia quiaquiaari Chipre jiyajiniara. <sup>40</sup> Pabloori saniniuujia Silas saquiriojoquiaari na tarajariquiano. Nojori quiaaquishacarijia, Jesuucua tiuuniaa pueyari nocuara Pueyaso secojotuaquiaari. Naa na miitiuniu nuhuajitij, Pablo, Silasnio, nojoriiri panaatia quiaquiaari cutara Pueyaso rupaa pohuatanura. <sup>41</sup> Nojori quiasacari Jesuucua tiuuniaa pueya shiniujiuniuucua, Siria jiyacuma tajitiumiaquiaariiri, Cilicia jiyacumano. Pabloori cuno jiyaca tiacajinia socua poojotaquiaari Jesujiniji. Naa cumaquiaariaari Jesuucua tiuuniaa pueyari.

## 16

### *Timoteo cojishacari Pablo, Silasnio*

<sup>1</sup> Pabloori Silasta tiuquiiioquiaari Derbe tiacajinia, Listra tiacajinianio. Tii riuriatatuquiaari Timoteo jiyanishano pueyanoori. Cuno mashajaari Jesuucua tiuujia pueyano quiquiaari. Na nucuaari Judio maaji quiquiaari, Jesuucua tiuuniajuhuaj. Timoteo queeri tahue quiquiaari cutara. <sup>2</sup> Listra tiacajinia Jesuucua tiuuniaa pueyari Timoteo maniniucuatujua. Naa sequetujuaari nojori: “Timoteori jiyanoehua maninia pueyano”. Iconio tiacajinijinio Jesuucua tiuuniaa pueyari naa sequetujuajuhuj. <sup>3</sup> Naaratej, Pabloori Timoteo riniu paniquiaari na tarajariquiano. Cunora, coteenu Timoteo cararaatiuuquia co miategetequiaariiri, cuno jiyajinia quiniaa Judocuaca sojotanuucuaaji nojuaja. Puetunu pueyajanaari na niishijia, na queeri seetanujuanaa tahue quijia. Nocuaiji naa miishaareeri. Na nuhuaji, Timoteo cutaraari Pablo cojiquiaari. <sup>4</sup> Pabloori Jesuucua tiuuniaa taucuaa niquiquiaari puetunu tiacajiniajanaa. Nojori niquiara caminiujuquiaari Jerusalén tiacajiniji Jesu jiyaramiquishano pueya sequesano nojoririaari, mariyata Jesuucua tiuuniaa pueya jiiitanaa sequesanojuhuaj. <sup>5</sup> Naa Pablo caminiujiushacaritij, puetunu Jesuucua tiuuniaa pueyajanaari socua noojia cumaquiaariaari jiyanoehua. Tamasacaari socua Jesuucua tiuquiaarijuhuaj. Jesuucua tiuuniaa pueyari naa canequiaari socua. Naa caneriquiaa puetunu juucajanaari.

### *Pueyaso Sohuanu tosacari Pablo, Macedonia jiyajiniara na quianura*

<sup>6</sup> Na nuhuaji, Pueyaso Sohuanuuri Pablo tenujuquiaari maja nojori pohuatanura Jesujiniji Asia jiyajinia. Naacujitij, nojoriiri Frigia jiyacuma quiojoquiaari, Galacia jiyacumano. <sup>7</sup> Naa tiuquiiiosequiaari Misia jiya shuriucuaari. Nojoriiri cuniquiji quianu paniquiaari Bitinia jiyajinia juucua. Naajuhuj, majaari Pueyaso Sohuanu paniniu quiquiaari tii nojori quianura. <sup>8</sup> Cunora, Pabloori na cojiniaata cuaniquiaari Misia jiyacuma. Troas tiacajinia tiuquiiioseeri. Nio Troas tiacaari shoniniacu caminia casaqueyajij quiya. Tiiri buque tiuutiacojua. <sup>9</sup> Pabloori cuno niucua juhua na maquenujinia niquiquiaari Macedonia jiyajinijinio pueyano nocua nujuanao. Cuno pueyanoori Pablo sequequiaari: “¡Miji! Canaa quia naacutaquee Macedonia



jiyajinia”. Cuno Macedonia jiyari quiquiaari shoniniacu caminia taquijiria.  
<sup>10</sup> Naa Pablo niquniu nuhuaji juhua na maquenujiniatej, canaari jiyacari ritia pajequiaarini taa canaa quianutaniya cuniquijini. Canaari sequereeni:  
 —¡Pa quiaarequij! Pueyasocujaari pa panitiaa Jesujiniji pa pohuatanura cuno pueya niquiarajuhuj.

*Pablo quishacari Filipino tiacajinia Silasta*

<sup>11</sup> Canaari Troas tiacajiniji quiaquiaari buquejiniani. Canaari Samotracia jiya tucuaatiajaacua tiuquishiini. Canaari cuniquiji sanequiaari tariquiniuhuj, tiuquishiiri Neápolis tiacajinia. <sup>12</sup> Canaari cuniquiji quiamaa Filipino tiacajiniani. Filipino tiacaari socua panishano tiaca quiquiaari tamasaca tiacajiniji Macedonia jiyajinia. Roma tiacajinijinio pueyari tii pacuquiaari tarijia. Nojoriiri cuno Filipino tiaca jiyatequiaari nojori quiquiora. Canaari tii camueenujuquiaari rupaquijiani. <sup>13</sup> Cuniqui canaa quishacari, canaari samaatenu juuca quiaquiaari cuno tiacajiniji moo casaqueyajiriani. Canaari soquequiaarini cuno pueyari tii jiitiquiaari Pueyaso secojonura. Canaari tii narejashiquijia cajitiuquiaari mariyatani. Jiyacaritij, maajipohuari cuniqui rerejoquiaari na secojonuunura juucua. Canaari saaja nojori niqiara pohuataree Jesujinijini. <sup>14</sup> Cuniqui maajipohua rerejosaquini, nojori tajinia quiquiaarijiaariuhua tamonu maaji. Na sesa quiquiaari Lidia. Nojuajaari Tiyatira tiacajinijinio quiquiaari. Shanohua quenaaruqueya naatuque toqueya niqutiojojua quiquiaari na cumaneecaraari. Nio maajiiri tarijia Pueyaso secojojua quiquiaari. Tii na quishacari, Pablo pohuatasano tojiriquiaari. Pueyasoori jiyacari na tojeteree. Juhua noojia riatareeri seetanujuanaa Pablo pohuatasano na tojiniuria maninia. Jesuucua tiuuriiri. <sup>15</sup> Na nuhuaji, Lidiaari puetunu na tiajinia quiniaatajanaa tiuquinijosaaquiaari moojinia. Canaa tiuquinijionu nuhuaji puetunu nojorijianaa, Lidiaari canaa sequequiaari:

—Niaa jaara cucuaji taacanuyaquiri, miji, nia quishii cua tiajinia. Janiyari pa Jiyaniijia tojijiajuhuaj.

Nojuajaari seetanujuanaa canaa panitiaquiaari na tiajinia canaa quiniuria. Naacuaajitij, canaari na tiajinia camueenujuquiaarini.

<sup>16</sup> Tamonu juuca, socua canaa pacutesacari quianu pueya secojonujuajiniara, canaari samaruraca niyacoo niquiquiaarini. Cuno niyacoori camaruhuaraca quiquiaari. Niyacoori “niishijia samaru” jiitiaja. Naaratej, cuno niyacoori puetunu pueya niishiniu panishanojuanaa pohuataja nojoriria. Naa na miishacaritij, na camaruhuara maseja queraatia cumaneecaari. <sup>17</sup> Cuno niyacoori canaa nuhuaji sacuariquiaa. Naa nacariquiaa canaa na nuhuajishacariiri:

—¡Nio canuu cutaraari jiyocuacaanuji Jiyaniijiajiniji pohuatanaa! Nia niishitiojiyari Pueyaso jiyanooshano nia quiniuria, pueyaracaanu nia rishiniuria nata.

<sup>18</sup> Saa naa canaa nuhuaji nacajaari, cuno tiacajinia canaa camueenujusacari. Pabloori socua na juaatiaquiaari. Nocua tacatequiaariiri. Cuno niyacoojinia quijia samaru sequereeri:

—¡Janiyari Jesucristo sesajinia quia jiyaroyani! ¡Cuno maajijiniji quia tohuatare!

Naa Pablo sequesacaritij, samaruuri na tojiquiaari. Ritia tohuataquiaari cuno niyacoojinijiri.

<sup>19</sup> Cuno niyacoo camaruhuari niishiquiaari maja tari nojori masenu quiniutianiya socua cumaneeca juhua coteenu, niyacoo pohuatasanojiniji. Naaratej, nojoriiri Pablo, Silas quiooquiaari na juaaniutia. Nojori

jaatucunuquiaari tiaca jiuujiajinia curotasano pueya cajitiucujiniaraari. Tiaca jiyaniijianucuaari tii quijiaca pueyaracaanu, nojori jiitianura pueya. <sup>20</sup> Niyacoo camaruhuari Pablo, Silas nujuatejoquiaari tiaca jiyaniijianucua tajoji, cuniqui na nequesoreesaanura. Jiyaniijianucua sequetureeri:

—¡Nio canuuri Judiocuaca! Nojoriiri niya pa tiacajinia quiniaa pueya juaatijiosee. <sup>21</sup> Nojoriiri tamaatia niishishano niishitiojonuya. Maja cumaati pa tojiniunioj. ¡Paari Romano pueyani!

<sup>22</sup> Naacuajitij, puetunu cuno pueyajanaari na juaaniutia, Pablo, Silas cosequiaari ritia. Jiyaniijianucuaari nojori toqueya jaamitiquiaari jiyanohua, na jocojosacari nojorijiniji. Na nuhuaji, tamasaari seeratasaree nojori na mojoonura macata. <sup>23</sup> Jiyanohua na mojoosaanu nuhuaji, nojoriiri socua na tiuquinijioquiaari nujuatejojuajinia. Na nuhuaji, nujuatejojua tia camarnu seeratasareeri maninia na cojuatenura nojori nujuatejojuajinia. <sup>24</sup> Naacuajitij, cuno nujuatejojua tia camarnuuri Pablo, Silas nujuatejoquiaari socua mij, nujuatejojua cariquimiatej. Cuniqui nujuatejosaaquiaari iri tii na cojuasaanura maninia, na mashiyocuatunuucuaaji. Nojori cashacuaari suruhuatuneecca quejasano tajiniocoma saatijosaaquiaarijuhuaj.

<sup>25</sup> Cuno niucua shiyaqueya, Pabloori Silasta Pueyaso secojonuuriquiaajaa. Pueyaso maniniuhuaqueetaturiquiaari na jaaquequejosanota. Cuniqui nujuatejosano pueyari nojori tojitiariquiaa. <sup>26</sup> Jiyacaritij, rijiaari canashiyaquiji jiuuquiutiaquiaari jiyanohua cuno nujuatejojua tia. Puetunu na tiotihuajanaari riатеquequiaari. Puetunu pueya numatucuaacua morojotasano casaajanaari tamajaaja saacarejetaquiaari. <sup>27</sup> Nujuatejojua camarnuuri ritia niucuaquiaari. Saaja niquirii puetunu tohuateya riатеquenोजनाari. Cunora, na nijiniaquetucuaaja mueruu shitiaree ritia na shuucuaajiiri tama na cuaqueya na miaquenurajaaja. Naa miiriiri na jyanishacari puetunu nujuatejosano pueyajanaa naasucuaari tari mashiyocuaaturee. <sup>28</sup> Pablo jaara na niquiquiaari, nocua nacareeri:

—¡Maja najuhuana naa miiniutij! ¡Canaacuajaari puetunujuanaa niya quiyani!

<sup>29</sup> Nujuatejojua camarnuuri na shiriiquiniutia tetecariquiaa. Tamonu sequereeri ritia samaritiu na patanura nocua. Samaritiu caaniuji netequee cutaraari nujuatejojua jiniacumara. Pablo, Silas cariquimiaji mojoquetaseeri. <sup>30</sup> Jiyacari nojori tohuatejoree carijiniacumaari. Nojori nequesotareeri:

—¡Pueyanaa! ¿Taa cua miyarinijia, Pueyaso jiyanooshano cua quiniuriajuhuaj?

<sup>31</sup> Nojoriiri na riucuaaree:

—Jiyaniijia Jesucristoocua quia tiuuri jiyanooshano quia quiniuria, puetunu quia tiajinia quiniaa quiniuria jiyanooshanojuhuaj.

<sup>32</sup> Naaratej, Pabloori Silasta na niquiara pohuataree Pueyaso rupaa Jesujiniji, mariyata puetunu na tiajinia quiniaajanaa niquiaranio. <sup>33</sup> Jiyacaritij, nujuatejojua camarnuuri cuno niucuaaja Pabloocua jiyanoocuaquiaari, Silascuanio. Nojori cuaqueya majacuyashiquia jeequejoreeri. Na nuhuaji, puetunu cuno pueyajanaari ritia tiuquinijosaaquiaari moojinia Jesucua nojori tiuushacari. <sup>34</sup> Jiyacari na tiajinia nojori jiyataquiaariiri. Tii Pablo, Silas mianuutereeri. Cuno nujuatejojua camarnuuri jiyanohua shuquiriaatia quiriquiaa puetunu na tiajinia quiniaatajanaa, Pueyasocua tiuuniaa nojori quishacari.

<sup>35</sup> Cuno tariqui, Filipino tiaca jiyaniijianucuaari na seya jiyaroquiaari nujuatejojua tia camarnucua, na sequenura nojuaja cuaara Pablo, Silas tohuanijioora tari. <sup>36</sup> Nujuatejojua camarnuuri Pablo sequesee:

—Tiaca jiyaniijianucua cucua jiyaroree na rupaani, cua cartenura quiarijia niajaniya. ¡Juhuaajaniya nia quiaarohuaqui!

<sup>37</sup> Pabloori saaja jiyaniijianucua seya sequequiaari:

—¿Majateeri nia jiyaniijianucua niishiniu canaari Romano pueyajuhuaaj? Canaa mojooturiquiaacuaa puetunu pueya niquiarajanaari. Majaari co-teenu canaa nequesoreesaanu quiariucuaa. Canaari jiyanojuua nujuatejosaarucuaani. ¿Taa na miitiuniu paniya quiarijia canaarini, jiyasohuaja tohuatejonu paniniu? ¿Jiyasohuaja mojooturiquiaacuaa canaatucuaa? ¡Nojorijianaa cuara niiria quiarijia, niiquiji nojori tohuatejonura canaa!

<sup>38</sup> Jiyaniijianucua seya jaara tacatequiaariuhua, puetunu Pablo sequesanojuanaa pohuataquiaari Filipino tiaca jiyaniijianucua niquiaraari. Nocuaji jiyaniijianucuaari pueretuquiaari nojori niishishacari Pablo, Silas Romano pueya quiquiaarijuhuaj. <sup>39</sup> Naaratej, cuno jiyaniijianucuaari ritia quiaquiaari nujuatejojuajinia Pabloocua, Silascuanio, nojori jyanootioonura. Jiyaniijianucuaari nojori tohuatejosee. Nojori sequereeri cuara quiojora quenaaja nojori tiacajiniji. <sup>40</sup> Naacuajitij, Pablo, Silas jaara tohuareetaquiaari nujuatejojuajiniji, Lidia tiajinia quiojoquiaariiri. Tii rootatuquiaari socua Jesucua tiuniaa pueyari, socua Pueyasocua nojori tiuniuria. Na nuhuaji, tiji quiojoquiaariuhuari.

## 17

### *Tesalónica pueya juaashacari Pueyaso pueya*

<sup>1</sup> Pablo rucanejosacari Silasta Jesujiniji nojori pohuatasacari, nojoriiri jiyacari shoconujutuquiaari Anfípolis tiaca, Apolonia tiacanio. Naa tiuquijioseequiaari socua Tesalónica tiacajiniaari. Cuno tiacajinia quiquiaariiri Judiocuaca rerejojua tia. <sup>2</sup> Taate Pablo quijiacuajani, nojuajaari narta Judiocuaca rerejojua tiajinia quiaquiaari. Cuno tiacajinia na quishacari, jiuujianaraca semaana shocotejoquiaariiri. Puetunu semaana shocojosacarijianaa, samaatenu juuca, cuno pueya niquiara pohuataquiaari Pueyaso rupaari. <sup>3</sup> Pabloori nojori niishitiojoquiaari taa tariucuaaanu Pueyaso sequesano caminiujiunaa naajiotaquiaari Pueyaso Jiyarosocoriquianojinijicuajani. Niishitiojoquiaariiri cuno naajiotasanoori tari tohuateequiaari Jesu jaara naquiya miishaaquiaari, naajuhuaaj, Jesu jaara na cusonu nuhuaji samiitiaquiaariuhua. Naa nojori sequereeri:

—Nio Jesucuaajani, janiya nia pohuataani, nojuajaari Pueyaso Jiyarosano pocua.

<sup>4</sup> Jiyacaritij, noojiaqueya Judiocuacaari Jesucua tiuquiaari. Queraatia taucuaacari Jesucua tiuquiaarijuhuaj, canapuate tari Moisés niishitiosano tojijiaca quiquiaaricuajani. Queraatia cuno tiacajinia quinia pueya tojishano maajipohuari Jesucua tiuquiaarijuhuaj. <sup>5</sup> Pueyasocua tiuyashijiaca Judiocuacatej, nojoriiri juaaquiocuaari juhua shocotasano nojori quiniucua. Nocuaji, nojoriiri sesa miijiaca taajecori masuunujuquiaari. Nooj, nareja rucojuaca tiacaacacotej. Cuno pojoriiri masusaaquiaari nojori na cojiniuria, tamasa nojori nasojonura. Na nuhuaji, puetunu cuno pojorijianaa jaara tonujutooquiaari taa na miitiuniutianiyani, nojoriiri puetunu cuno tiacajinia quiniaajanaa juaatiquiaari Pueyaso pueyacuara. Nocuaji, puetunu cuno pojorijianaari Jasón tiaco tiuquitiaquiaari, Pablo, Silas nojori quioonura juucua, juaaquiocuaari pueya nojori niquitiosocoriquiano. <sup>6</sup> Nojori jaara na riuriataaquiocuaari, noojiaqueya Jesucua tiuniaa pueyari Jasóna cojiritiasaaquiaari quioonu. Cuno tiacajinia jiyaniijiacuaa na jayotuquiaariiri. Naa nacatureeri:

—¡Nio canuuri puetunu jiyacajinia pueya sesojiyajanaa! ¡Niya tiuquijioreejaariuhua naa na miiniuriajuhuj! <sup>7</sup> ¡Jasónri nojori masecanu maninia na tiajinia! ¡Puetunu nojorijianaari pa jiyaniijia César sequesano tojtiaashijica! ¡Nojoriiri saaja sequequiaa socua tamonu jiyaniijianaari quiya! ¡Na sesanaari “Jesu”! Naa sequetuquiaaqui nio pojori.

<sup>8</sup> Puetunu pueyajanaa, mariyata tiaca jiyaniijianucuanio, nojori jaara naa tojiquiaari sequeshiyanotej, nojoriiri juaaquoquiaari. <sup>9</sup> Jiyacaritij, tiaca jiyaniijianucuaari queraatia cumaneeca masequiaari Jasónjiniji, narta Jesuucua tiuuniaa pueyajinijinio. Naa sequeturee nojoriiri:

—¡Pablo jaara niiquiji quiaaquiri, majaari canaa niqutionu quiniutianihua nia cumaneeca!

Naa na miishaanu nuhuajitij, Jasónri nata quioosano pueyata cartequesaaquiaariuhua.

### *Berea tiacajinia Pablo quishacari Silasta*

<sup>10</sup> Cuno niucujaja, cuno tiacajinia quiniaa Jesuucua tiuuniaa pueyari Berea tiacajiniara mashiquiquiaari Pablo, Silasnio. Berea tiacajinia na tiuquijiosacari, cuniqui quiniaa Judiocuaca rerejojua tiajinia quiojoquiaariiri. <sup>11</sup> Cuniqui quijia Judiocuaca cutaraari maninia pueya quiquiaari, maja juhua Tesalónica tiacajinia quiniaa. Naacujitij, Pablo jaara Jesujiniji pohuataquiaari nojori niqiuara, nojoriiri maninia tojtiaquiaari na pohuatasano. Na nuhuaji, puetunu juucajanaa, tama nojorijiaarjia tariucuaaanu Pueyaso Rupajinia naajiotasano pajenuuquiaari, nojori niishiniuria seetanujanaa quiriquiaate Pablo niishitiojosano. <sup>12</sup> Naacujitij, queraatia Judiocuacaari Jesuucua tiuquiaari, queraatia taucuaanio, canuu, mariyata queraatia tojishano maajipohuanio. <sup>13</sup> Tesalónica tiacajinia quiniaa Judiocuaca jaara niishiquiaari Pabloori Berea tiacajinia Pueyaso rupaa pohuatasecuhuj, nojoriiri nocua quiojoquiaari nojori taanuunura nojuaja cuniquijijuhuj. Na tiuquijiosacari Berea tiacajinia, cuniqui pueya nasojoseeri, Pablo na juaatiuniuria. <sup>14</sup> Nocujaja, Jesuucua tiuuniaa pueyari cuniquiji ritia mashiquiquiaari Pablo shoniacu caminiajiniara. Silasri Timoteota Berea tiacajinia jateequiaari saaja. <sup>15</sup> Berea tiacajinijinio pueyari Pablo mashitiaquiaari, nuu na niishitiniuria. Nojoriiri Pablo jiyataquiaari Atenas tiacajiniara. Nojoriiri cuniqui jataquiaari Pablo. Cuno pojori jaara tacaretanu paniquiaariuhua cuniquiji Berea tiacajiniohuara, Pabloori nojori sequesquiaari:

—Niocua ritia jiyarosuhua Silas, Timoteonio. Nojoricua niyaja cua coqueese.

### *Pablo quishacari Atenas tiacajinia*

<sup>16</sup> Pabloori Silas, Timoteo sashiquiaari Atenas tiacajinia. Cuno tiacajinia na rucuanijosacari pueya na sashishacari, Pabloori niquiquiaari tama cuno pueya shipinijosanojuaja na pueyasohuara. Nojori shipinijosanoori puetunu cuno tiacajiniajanaa quiriquiaa. Pabloori cunora jiyanohua tacaquiaari. <sup>17</sup> Pabloori Jesujiniji Judiocuaca poojotaquiaari nojori rerejonuujua tiajinia, noo pojori taucuaajuhuj, canapuate Pueyaso tojtiajaca quiquiaaricujani. Naajuhuj, Pabloori cuno tiaca jiuujiajinia pueya cajitiucuaara curotasanojinia pohuataquiaari Jesujiniji cuniqui quiniaa niqiuara. <sup>18</sup> Tamasaca niishijiaacari Pablo pohuatasacari Jesujiniji tojtiaariquiaa. Nojoriiri caapiqui maapuejinijinio quiquiaari. Tamonu maanuuri sesojosaaquiaari “Epicureohua”, Epicuro jiyanishano niishijia

niishitiojosano tojitiajaca nojori quiniuucua. Tamonu maanuuri saniniuujia sesojosaaquiaari “Rejeretajaca”. Naa sesojosaaquiaariiri Zenón jiyaniishano niishijia niishitiojosano nojori tojiniuucua. Pablo pohuatasacari nojori niquiara, nojoriiri maja na niishitiuniu quiquiaari casaa na pohuatariquiaani. Nocuaji tama nojorijiaarijia sequetooquiaari:

—¿Casaariquitijia cuno paateca pohuataa pajaniyatejaj? Najuhuana pocuaa pueyaracaanuuri.

Tamasacaari saniniuujia sequetuquiaari:

—Tamasaca pueyasohuajiniji poojotana juhuanaruhua.

Nojoriiri naa sequeriquiaa Pablo pohuatanuucua Pueyaso rupaa Jesujiniji, mariyata taa cusonuuno samiitiaconutaniuhuani. <sup>19</sup> Na nuhuaji, nojoriiri Pablo jiyataquiaari tuhuananujiniji, tee nojori jiitiquiaari rerejonuunucujani. Cuno tuhuananu sesaari quiquiaari Areópago. Nojoriiri naa sequetuquiaari Pablo:

—Miji. Socua canaa tojishocoriquiano quia pohuataqueeruhuj. Canaari quia pohuatasanojiniji socua maninia niishiniu paniyani. <sup>20</sup> Quiaari jiya-jeneta sequeriquiaa canaa niquiara quia pohuatasacari. Quiarijia canaa quia tore maninia.

<sup>21</sup> Puetunu Atenas tiacajinia quiniaa pueyajanaa, mariyata tamonu jiyacajinijinio cuniqui quiniaajuhuj, nojoriiri maja socua tamonu casaa na miitiuniu quijia. Saaja quiarinio sequesanojiniji niishitiuniu panijiaaari.

<sup>22</sup> Jiyacaritij, Pabloori Areópagojiniji nujaquiaari na pohuatanura na tojitanu panijiaa niquiara. Naa coteereeri:

—Atenas tiacajinia quiniaa pueyanaa, janiyari quiarijia niishiyani, niaaqui pueyasohuacua jiaatiajaca jiyanohua. <sup>23</sup> Janiyari naa nia sequeyani pueyanaa, cua niquiniuucua queraatia nia shipinijosano pueyasohua, cua rucuanesacari nia tiacajinia. Naajuhuj, janiyari saajiajiniji nia shipinishano juhua juhuacutura niquiriucuaajuhuj. Nocua naajioori sequeya, “Niishishoo Pueyasora”. Cuno Pueyaso niaa na tojitiaquiaa na niishiyaquiniutiani, nojuajaari nio Pueyasocujaja janiya nia pohuataani.

<sup>24</sup> Cuno Pueyasoori nio jiya shipiniquiaaricujaja, puetunu pa niquishanojuanaano. Nojuajaari jiyocuacaanu camarnujuhuj. Nojuajaari puetunu tiqiyocujanaa Quijia. Majaari pueya tiajosano secojojua tiajinia na quiniu. <sup>25</sup> ¿Taa nia jiyaniyani pueyanaa, cutara Pueyasोजनाate pa jiiitiasano casamijiniji panijajuhuj? Maja. Nojuacuajaari puetunu pa jiiitiasanojuanaa shipiniquiaari puera. Pa rishiniuria, na Sohuanujiniji pa niquitioquiaariuhuj, pa rijiosocoriquiano paratunio.

<sup>26</sup> Pueyasoori niquiriyatu pueyano shipiniquiaari juhuacatecara. Paari cuniquiji canequiaarini, puetunu jiyacajiniajanaa pa quiniuria. Pueyasoori tarijia sequequiaari tee pueya quiniutianiyani. Sequequiaariuhuj taacari tii pa quiniutianiyani. <sup>27</sup> Pueyasoori naa panitiaquiaaricujaja puetunu jiyacajinia quiniaa pueyajanaa pajenura nojuaja. Pueyasoori pa saniya, na niishiniuria, ¿pueyate na pajenutianiyani pa riuritanura nojuaja? Pueyasocujajaari maja na quiniu tucuacaanu pajaniyajiniji. <sup>28</sup> Pueyasoori pa samiitianiya. Pa cumaquiquiaaariuhua pa poonijionura. Pa rishitiquiaaariuhuj. Naatej, taa nia pohuatajaca sequequiaaricujani: “Paari Pueyaso muerasuni”. <sup>29</sup> Paa jaara seetanujuanaa Pueyaso muerasu quirini, majaari socua pa jiyaniniu Pueyaso naasucuaari juhua orojiniji pa shipinijosano niquishano. Majaari juhua platajiniji shipinishano, juhua saajiajiniji shipinishanonio. Pueyaso cutaraari maja na niquishaanu juhua



tama pa niishiriojosanojuaja. Majaari na niquishaanu taa pueya shipinijioquiaacuajani, nojori jyanishacari Pueyaso naasucuaari naa niquishanotej. <sup>30</sup> Pueyasocuajaari pueya miiniu sesa rejeretariquiaa pueyaracaanu. Saniniuujia, nojuajaari quiarjia puetunu tiqiyocua quijiaca pueyajanaa sequeya, nojori cartenura puetunu sesa na miiquiosanojuanaa, saaja nojuaja nojori tojitianura. <sup>31</sup> Pueyasocuajaari tari saquiriojoquiaari tamonu juuca taacari na nequesoreenutaniya mijiria quiniaani. Maninia pa nequesoreenutaniya puetunujuanaari. Pueyasoori tari na saquiriojosano pueyano jiitiaa pa nequesoreeriquianojuhuaj. Na samiitianishacari cuno pueyano macujiniji, nojuajaari naa pa niishitiquiaari, cunocujaari na saquiriojosano pueyano.

<sup>32</sup> Nojori jaara tojiquiaari Pablo pohuatasacari taa macunucua samiitiaconutaniuhuanu, cuno niishijiacaari na saroojotaquiaari na rerequetenuta. Tamasacaari saniniuujia Pablo sequequiaari:

—Canaacua tamacari quia tojiriirianiuhuj.

<sup>33</sup> Na nuhuaji, Pabloori cuno pueya tajiniji quiacuhua. <sup>34</sup> Noojiaqueya cuno pueyajinijinioori Jesuucua tiuquuaari, Pablo pohuatasano nojori tojitasacari. Nojorijinijinioori quiquiaari Dionisio jyanishano pueyano. Nojuajaari Areópago niishijiaca pueya maanujinijinio quiquiaari. Jesuucua tiuquuaarijiaariuhua tamonu maaji. Dámaris na sesa. Socua tamasaca pueyari Jesuucua tiuquuaarijuhuaj.

## 18

### *Pablo quishacari Corinto tiacajinia*

<sup>1</sup> Na nuhuaji, Pabloori Atenas tiacajiniji quiaquiaari Corinto tiacajinia. <sup>2</sup> Cuniqiu riuriataseequiaari tamonu Judio pueyanoori. Na sesaari Aquila quiquiaari. Nojuajaari Ponto jiyajinia rasaquiaari. Aquilaari necocua Priscilata shusha Italia jiyajiniji tiuquuijiono quiriquiaa Corinto tiacajinia, tii Pablo tiuquishacari. Jiyacaritij, Claudioori jyanijiajanaa quiquiaari Roma tiacajinia, Italia jiyajinia. Nojuajaari puetunu pueyapue camarnujuanaa quiquiaari puetunu jiyacajiniajanaa. Nojori jiitiaquiaari Roma tiacajinijiiri. Nojuajaari tama na tiacajinia pueyajaaja sequequiaari puetunu Judiocuacajanaa nojori taanuunura Roma tiacajiniji. Naaratej, Aquilaari necocuatata quiaquiaari Roma tiacajiniji. Corinto tiacajinia quishiiri. Pabloori nojoriicua quiaquiaari nojoritia na pocojonura. <sup>3</sup> Aquilaari necocuata suhuoronuutaja toqueya cusupuenuujua quiquiaari juhua Pablojuhuaj. Naaratej, Pabloori nojoritia quishii, mariyata na poonijionuunura tii. <sup>4</sup> Pabloori maja nareja na shocotenu quijia samaatenu juuca. Nojuajaari Judiocuaca rerejojua tiajinia rucuanerjojua. Tii nojori pohuataquiaari Jesujinijiiri, taucuaca niquiaranio, noo pojori canapuate Judiocuacara jiyatesaaquiaaricuajani, tariucuacaanu Moisés niishitiojosano nojori tojishacari.

<sup>5</sup> Silas jaara Timoteota Pabloocua tiuquuijioquiaari Macedonia jiyajiniji, Pabloori jiyacari coteequiaari puetunu juucajanaa Jesujiniji pohuatanura Judiocuaca niquiara. Nojori sequequiaariiri:

—¡Jesucujaari nia sashishano, Pueyaso Jiyarosano seetanujuanaa pocua!

<sup>6</sup> Judiocuaca jaara tojiquiaari naa Pablo sequesantej, na tojitiaaquirii saajaari nojori cuaracashitiniutia Pablo sequesano. Saaja juaaquioreeri. Sesa pocooreejaariuhuj. Naaratej, Pabloori nojori niquiara na toque nuutojoquiaari, nojori niishiniuria Pablo tari nojori tiujiaarohua. Pabloori nojori sequequiaari:



—Majaari cucua nia tiuutianu, Pueyaso jaara mijiria quiniaa saniitiore. Niaacuajaari Pueyaso rupaa ruuretaquiaa saaja. Quiarjia taucuacaacia quiaa cutaranjia, nojori cua pohuatanura Pueyaso rupaa Jesucristojiniji.

<sup>7</sup> Na nuhuaji, Pabloori cuno Judiocuaca rerejojua tiajiniji tohuataquiaar-iuhua. Tamonu pueyano tiajinia quiaquiaariiri. Cuno pueyano sesaari quiquiaari Justo. Nojuajaari Pueyaso tojinia quijia. Na tiaari jiyareta Judiocuaca rerejojua tia shuriucua quiriquiase. <sup>8</sup> Crispoori jiyacari cuno Judiocuaca rerejojua tia camarnu quijia. Nojuajaari puetunu na tiajinia quiniaa pueyatajanaa Jesuucua tiuquiaari. Naajuhuj, queraatia Corinto pueyari Jesuucua tiuquiaari Pueyaso rupaa nojori tojishacari. Naaratej, puetunu Jesuucua tiuuniaajanaari moojinia tiuquinijosaaquiaari. <sup>9</sup> Jiyacari tamonu niucua, Jiyaniijia Jesuuri Pablo sequequiaari na maquenujinia:

—Maja quia puerenu Pablonaa. Socua quia pohuatare cuno pueya tojishocoriquiano. Majaari sanaajenu. <sup>10</sup> Janiyacuajaari quiata quiyani. Majaari quenaaja tamonu pueyano jiyashiniu quiniutianiya taa na miiniu paniniuria quiajaniya. Janiyari queraatia pueya nio tiacajinia jiitiaa cucua tiuuriquianoni.

<sup>11</sup> Naaratej, Pabloori Corinto tiacajinia jiyojequiaari. Tii na quishacari, quera shocojotequiaari caapiqui marijiaari. Cuniqum na quishacari, Pueyaso rupaa niishitiojoriquiaa cuno pueyari.

<sup>12</sup> Jiyacaritij, Galión jiyaniishano tahueri Acaya jiyajinia pueya camarnu quiquiaari. Corinto tiacaari Acaya jiyajinia quiriquiasejuhuaj. Jiyacari, Judiocuacaari tii Pabloocuara roojotoquiaari. Na nuhuaji, na quiatuquiaariiri. Naa na jaatucutuquiaari cuno jiya camarnuucuaari, Pablo nequesoreesaanura. <sup>13</sup> Naa sequetusee camarnuuri:

—¡Canaa camarnunaa, nio pueyanoori pueya shiniujiya Pueyaso nojori shuquiritianura tamaatia canaa supuetana Moisés Rootasanojiniji!

<sup>14</sup> Pabloori jiyacari juucua pocuanu paniriquiaa. Galiónri saa na rupaa niyacutequeejaa senota. Cuno Judiocuaca sequereeri:

—Judiocucanaa, niaa jaara maninia miyashijiaca cucua jaatucure cutara, sesa miijiaca sequenio, janiya maara jiyano pueyanoocuara nia tonujusacari tojiri cutarani. <sup>15</sup> Niaari saaja tama nia niishishanojiniji juayonuutaajaacujua. Maja cua nequesoreenu quiniutianiya tama nia juayonuutasacarijiaaja nia sequesano tamasaca shaajecono pueya sesacajiniji, tama nia supuetanaa rootasanojinijiaajanio. ¡Tama nia jeecatoorejaaja!

<sup>16</sup> Na nuhuaji, cuno camarnuuri nojori juaarii. Na shuriucujia na jiyaramiquiriohuari. <sup>17</sup> Naa Galión miishacari nojoritij, narta taucuacaari cuniquijia quiatuquiaari Sóstenes, Judiocuaca rerejojua tia cojuana. Na piquitiurii camarnu Galión niqiara cuniquijiaari. Majaari Galión tenujunu quirii nojori. Nareja na niquiriquiaari.

*Pablo riuujiushacariuhua Antioquiya tiacajiniahua. Na nuhuaji jiuujianaraca pacutequiaariuhua quianuuri*

<sup>18</sup> Pabloori cuniqui queraatia camueenujuquiaarijaara Corinto tiacajinia. Tari na riuujiushacariuhua cuniquiji, na nuhuajiria saruhuataarohua narta Jesuucua tiuuniaa pueyari. Buquejinia quiaarohua Siria jiyajiniahuari. Na cojiriquiaajaari Priscila, neyaca Aquilano. Nojori tacataaquishacarijia buquejiniacuma, Cencrea tiacajiniji na quiojonura, Pabloori jiyacari na naca riuujiuquiaari caritianajara. Nojuajaari Pueyaso sequequiaari tari, maja na naca na riuujiutiniu quiniutianiya nojuaja jaara na sequesano Pueyaso tucataaquiri.

Cunora, naa quiarjia riuujiutirii na nacaari. <sup>19</sup> Nojori tiuquijiosacari Éfeso tiacajinia, Pabloori tii jatamaquiaari Priscila, Aquilano. Nojuajaari tajimiaa Judiocuaca rerejojua tiajinia. Cuniqii rerejono Judiocuaca pohuatasee Jesujiniiri. <sup>20</sup> Nojoriiri Pablo nenecojoquiaari juucua cuniqii na camueenujunurajaara nojoritia. Majaari Pablo paniniu quiquiaari. <sup>21</sup> Cuniqii quiniaa sequereeri:

—Quiohuanijia pueyanaa. Jerusalén tiacajiniara secohuanijia. Canaari tii rerejonutaniya Jesuucua tiuuniaa pueyatani. Pueyaso jaara paniri, janiyacua nia niquiniuria tacatemohuaraniuhuj.

Cuniqii tacaquiaariuhua buquejiniaari. Éfeso tiacajiniji quiaarohuari. <sup>22</sup> Pablo tiuquishacariuhua Cesareya tiacajiniuhua, cuniqii quiaamaa Jerusalén tiacajiniaari, puetunu Jesuucua tiuuniaa na saruhuatanurajanaa. Na nuhuaji, quiaarohua Antioquiya tiacajiniaari. <sup>23</sup> Cuniqii tarishiquiaari pasajaari. Na nuhuaji, socua quiaquiaariuhua cuniqiiiri puetunu jiyacajiniarajanaa. Quiariquiaari na niquiniuhuara Jesuucua tiuuniaa pueya Galacia jiyajinia, Frigia jiyajiniano. Pabloori nojori niquiara pohuataquiaari socua Pueyaso rupaajiniji. Jesuucua tiuuniaa nacasuquiaariiri maja nojori tarinitianura Jesuucua tiuuniu.

### *Éfeso tiacajinia Apolo pohuatasacari Pueyaso rupaa*

<sup>24</sup> Jiyacaritij, tamonu Judio pueyanoori Éfeso tiacajinia tiuquiquiaari. Alejandria tiacajinijio pueyano. Na sesaari Apolo quijia. Nojuajaari maninia Pueyaso rupaa pohuatana quiriquiase. Tariucuacaanu Pueyaso Rupaa naajiosano niishijia quiquiaariiaariuhuj. <sup>25</sup> Nojuajaari maninia niishitiojosaaquiaari Jiyaniijia Jesu niishitiojosanojiniji. Shitimia pohuataja pueya niquiaraari. Maninia niishitiojojua Jesujiniji na pohuatasacariiaariuhuj. Seetanujuanaa sequeja Jesujiniji puetunujuanaari. Maja cutaraari na niishiniu quijia Pueyaso Sohuanute pueyano jiuujiajinia tiuquijia. Saaja moojinia tiuquinijionu niishiquiaariiri, taa Tiuquinijiona Juan niishitiojoquiaaricuaani. <sup>26</sup> Apoloori na puerenu jataquiaari tii na pohuatasacari Pueyaso rupaa narta Judiocuaca rerejojua tiajinia. Aquilaari Priscilata tii quiriquiaajuhuj. Apolo pohuatasano tojitiariquiaari. Apolo jaara puecaquiaari pohuatanu, nojoriiri tamocora na jaatucuquiaari na niishitiojonura taa pa jatanishaaquiaa Pueyaso Sohuanutani, Pueyaso muerasu pa quiniuria cutara. <sup>27</sup> Na nuhuaji, Apolo jaara quianu paniquiaari Éfeso tiacajiniji Acaya jiyajiniara, Jesuucua tiuuniaa pueyari na cumaquiquiaari. Naajuhuj, nojoriiri Acaya jiyajinia Jesuucua tiuuniaa pueyacuara naajioquiaari Apolo patasocoriquiano, maninia cuno pueya tojiniuria nojuaja na tiuquishacari tii. Jaara tiuquishiiquiaari Acaya jiyajinia, Apoloori Jesuucua tiuujiaa cumaquiquiaari jiyanoehua, nojori na niishitiojosacari. <sup>28</sup> Apoloori nojori niquiara niishitiojoquiaari tariucuacaanu Pueyaso Rupaajiniji naajiotasano. Jiyanoehua maninia na niishitiojosacari Jesuuri seetanujuanaa nojori sashishano quiquiaari, naacujitij Judiocuaca niishishano pataquiaariiri.

## 19

### *Pablo quishacari Éfeso tiacajinia*

<sup>1</sup> Apolo quishacari Corinto tiacajinia, Pabloori saniniuujia Antioquiya tiacajiniji quiaquiaari nucuaco Éfeso tiacajiniara. Na quiasacari, tuhuanuhua shoconujuquiaariiri. Naa tiuquishiiquiaari Éfeso tiacajiniaari. Tii

riuriataquiaari Pueyaso pueya maanuuri. <sup>2</sup> Pabloori jiyacari nojori nequesotaquiaari:

—¿Niaate Pueyaso Sohuanu tiuquiniqianu nioojiajinia, Pueyaso ru-paacua nia tiuushacari?

Pablo riucuatereeri:

—Majaari quenaaja canaa niishiniu quijia Pueyaso Sohuanute quiyaju-huaj.

<sup>3</sup> Pabloori nojori sequequiaari:

—¿Casaara nia tiuquinijiosaacanucuaararini?

Nojoriiri na riucuaquiaari:

—Canaari tiuquinijiosaquiaarini taa Tiuquinijiona Juan niishitiojo-  
quiaaricuaajani.

<sup>4</sup> Pabloori nojori riucuaaree:

—Taaquiriirinij. Tiuquinijiona Juancuaaquiniateja pueya tiuquinijio-  
quiaarijiaj, nojori jaara noojia tacatoquiaari sesa na miitiushanojiniji. No-  
jori sequequiaarijiaariuhua: “Cua nuhuaji Niriquianoocua nia tiuuri”. Naa  
Tiuquinijiona Juan sequesacaritij, nojuajaari Jesucristojiniji sequeriquiaa.

<sup>5</sup> Cuno pojori jaara Pablo pahuatasano Jesucristojiniji tojiquiaari, nojoriiri  
socua tiuquinijiosaquiaariuhua Jesuucua nojori tiuushacari seetanujua-  
naa. <sup>6</sup> Naacuajitij, Pablo niasacari na juaashiquia nojori nacaacua Pueyaso  
na secojosacari, Pueyaso Sohuanuuri cuno pojori jiuujiajinia tiuquiquiaari.  
Naacuajitij, nojoriiri niishishoo rupaacajinia pocooree. Naajuhua, Pueyaso  
Sohuanu niishitiojosano Pueyasojiniji pahuatanuuquiaariiri. <sup>7</sup> Cuno pojori-  
iri doce canuu quiquiaari.

<sup>8</sup> Pablo quishacari cuno tiacajinia, nojuajaari tii shocotejoquiaari jiuujia-  
naraca raca. Jiyacari, puetunu samaatenu juucajanaa quiaja Judiocuaca  
rerejojua tiajiniaari. Tii pahuataja Pueyaso rupaa pueya niquiaraari.  
Naajuhua, nojori niishitiojojuaari taa Pueyaso jiitianutaniya pueyara-  
caanu Jesuucua tiuuniaa pueyani. Pueyari na tojitiaquiaari maninia,  
na puereyaquiniutia na niishitiojosacari. <sup>9</sup> Noojiaqueya cuno pueyajini-  
jiniiori saaja ruuretaquiaari Pueyaso rupaa. Na rerequetequiaari saa-  
jaari. Sacuaraatia pocoquiaari Jesu rupaaajiniji pueya niquiaraari, Je-  
suucua nojori tiuuniu paniyaquishacari. Nocuaji, Pabloori saa jiyareta  
Jesuucua tiuuniaa pueya jiyataquiaari cuniquiji, tamaquiria serojonuuja  
tiajiniaara. Tirano jiyanishano pueyanoori cuno serojonuuja tia camaru  
quiquiaari. Pabloori cuniqui puetunu juucajanaa niishitiojojua Pueyaso  
rupaa Jesuucua tiuuniaa pueya. <sup>10</sup> Caapiqui marijiaari socua Pablo shoco-  
joquiaari tii na poojotasacari Pueyaso rupaa Tirano serojonuuja tiajinia.  
Naacuajitij, puetunu Asia jiyajinia quiniaa pueyajanaari Pueyaso rupaaajiniji  
caminiujiushaaquiaari, Judiocuaca, taucuacajuhua. <sup>11</sup> Pueyasoori jiyacari  
Pablo cumaquiquiaari jiyajeneta casaa na miiniuria Pueyaso cumaacata.  
<sup>12</sup> Naacuajitij, pueyari Pablo paneyaca tuujutaqueya rijioquiaari, Pablo  
cooshano toqueraacuanio. Cuno pueya jaara na cusosuhuacua niojoquiaar-  
iuhua cuno toqueraacua, ¡cusosuhuari naatacoquiaariuhua! Naajuhua,  
samaruhuari tohuareetaquiaarijuhua, samaruhua jiitiaja pueyacuaaji.

<sup>13</sup> Tamasaca Judiocuacajinijiniiori quiriquiaajuhua, pueyajiniji  
samaruhua tohuatanijiojua. Nojoriiri puetunu tiacajiniajanaa rucoojojuaca  
quiquiaari. Jiyacaritij, nojoriiri juhua Pablo miiniu paniquiaarijuhua.  
Juucua naa sequetuquiaari samaruhuari:

—Pablo pahuatasano Jesu sesajinia nia sequeyanijia: “¡Nio pueyanojiniji  
nia tohuareetare!”

<sup>14</sup> Naa miijiacaari siete canuu quijia. Nojoriiri Esceva jiyaniishano pueyano niqiuohua quiriquiaa. Escevaari pueyacuara secojonaa camarnu quiriquiasejuhuaj, Judio pueyanotuhuj. <sup>15</sup> Cuno pojori jaara saniquiaari juucua Jesu sesajinia samaruhua tohuatanijionura pueyanojiniji, samaruuri saaja nojori riucuaquiaari:

—Jesu niishiyacuajanijia. Janiyari Pablo niishiyajaaniuhuj. ¿Canteerini niajanianijia, naa nia sequenura janiyatej?

<sup>16</sup> Samaruhuaraca pueyanoori jiyacari nojoriicua jaaquee. Nojori piyoree saajaari. Maja na naata nojori nujuataaquishacari, nocuaji netecuatuquiaari tiacojiiri juhuasunucua, jiyareta naatiquishanojuhuaj.

<sup>17</sup> Puetunu Éfeso tiacajinia quiniaa Judiocuacajanaa, mariyata tii quiniaa taucuacanio, nojori jaara niishiquiaari naa miishanojinijitij, jiyanohua pueretuquiaariiri. Naacuajitij, puetunu Éfeso tiacajinia quiniaa pueyajanaari sequequiaari:

—¡Jesucui seetanujuanaa Jiyaniijiajanaa cutara!

<sup>18</sup> Naajuhuj, queraatia Jesucua tiuniasa pueyari nijioquiaari, tarijia sesa na miitiushano pohuatanura puetunu pueya niquiarajanaa.

<sup>19</sup> Naajuhuj, queraatia pueyari juhua shimiacuri miijiojuaca quiquiaari. Nojoriiri na nequesoreetuneece mueratejotaquiaari. Cuno nequesoreetuneeceajiniaari serojosano quijia taate pueyano cumueeca shimiadura quiniuni. Na camaruhuari jiyacari puetunu cuno nequesoreetuneeceajanaa patootaquiaari. Na catijiaquiaari puetunu pueya niquiarajanaari. Puetunu cuno nequesoreetuneeceajanaa catijiasaquiaarini, cunoori cincuenta mil platajiniji shipinijosano cumaneecata masano quiquiaari. <sup>20</sup> Naacuajitij, Pueyaso rupaari socua cuno jiyajinia paaquequiaari, na cumaaca poonijosacari pueya jiuujiajinia.

<sup>21</sup> Na nuhuaji, Pabloori cuniquiji naquerejoquiaari Macedonia jiyajiniarajuhuj, Acaya jiyajiniarano. Cuniquiji riujuuniu paniriquiohua Jerusalén tiacajiniohuaraari. Sequequiaarijiaariuhuj:

—Janiya jaara tiuquishuhua Jerusalén tiacajiniohuani, janiyari Roma tiacajinia tajiriquianohuani.

<sup>22</sup> Jiyacaritij, Pabloori na naacuna jiyaramiquiquiaari Macedonia jiyajinia. Na jiyaramiquishanoori quiquiaari Timoteo, Erastonio. Nojuajaari cuniqui Asia jiyajinia jiyojequiaarijiaara.

### *Éfeso pueya cushitiishacari na juaaquionuta najuhuanaj*

<sup>23</sup> Pablo quishacari Éfeso tiacajiniaja, Éfeso tiacajinia quiniaa pueyari jiyanohua juaaquioquiaari Pablo niishitiojonuucua Jesucristojiniji. <sup>24</sup> Naa quiquiaariiri. Demetrio jiyaniishano pueyanocuajaari juhuacatecara narta pueya nasojoquiaari. Cuno pueyano, Demetrioni, nojuajaari shiirijiaa tia platajiniji shipinijiojua quiquiaari. Cuno shiirijiaa tiacaari juhua nojori jiyaniishano pueyaso secojojua tia niquishano quiquiaari. Nojori pueyasoori maaji sesaanucua quijia, “Artemisa”. Na shipinijosano niqutiojojua na cumaneecaraari. Naacuajitij, Demetrioori nata poonijionaa pueyata queraatia cumaneecaraca quijia. <sup>25</sup> Demetrioori jiyacari nata poonijionaa rerejotequiaari nojori nacoontanura Pablo miishanojiniji nojori tiacajinia. Nojoritia rerejoquiaariiri tamasa pueya, casaa shipinijionaa platajiniji juhua nojorijuhuj. Puetunu cuno pueyajanaa jaara tari rerejoquiaari, Demetrioori nojori sequequiaari:

—Pueyanaa, niaacuajaari niishiya, paari puetunu pa panishanojuanaa jiiitiaani pa niqutiojosacari pa cumaneecara pa shipinijosano. <sup>26</sup> Quiarijia

cuno Pablo jiyanishano pueyanoni, nojuajaari queraatia pueya niishitio-joquiaa, pueyano shipinijosano pueyasohuanaari maja seetanu pueyasohuajanaa. Niaari na niquiriquiaacuaja naa na niishitiojosacari. Niaari na tojiriquiaajuhuj. Naacuajitij, majaari tari pueya masenu quiniutianiya pa shipinijosano platajiniji casami. Queraatia nio Éfeso tiacajinia quiniaa pueyari na sequesano tojiya. Puetunu pa Asia jiyajinia pueyapuejanaari na sequesano tojtiaajuhuj. <sup>27</sup> Taa cua sequeyacuajani, pa shipinijosano jaara shocotesaare saaja, paari pa poonijosano carteriquiano socuani. Majaari pueya shocotenu quiniutianiya saa pajaniyaja, pa pueyaso Artemisa rerequetenutaniyajaariuhuj. Nocuaji, majaari pueya nijionu quiniutianiya tari pa pueyaso Artemisa secojojua tiajiniaara, tii nojori secojonura, naa cuno Pablo niishitiojonuucua pueyaracaanu pueyatej. ¡Naacuajitij, puetunu pa Asia jiyajinijinio pueya, mariyata puetunu jiyacajinijinio pueyapuejanaari pa pueyaso Artemisa rerequetejacara jatanutaniya! ¡Puetunu pueyapuejanaari naa niyajetanutaniya socua pa pueyaso Artemisatej!

<sup>28</sup> Cuniqúi quiniaa pueya jaara tojiquiaari naa Demetrio sequesantej, nojoriiri jiyanojua juaaquiouiaari. Naa nacoouiaariiri:

—¡Pa timitiasano Artemisa cuaara pueyaracaanu quiiria Éfeso tiacajinia quiniaa pueyaso!

<sup>29</sup> Naa nojori juaaquiouiaari, puetunu cuno tiacajiniajanaa pueyari cushitiquiaari. Nojoriiri jiyacari quiouuree caapiqui Pablo cojiniaa pueya, Macedonia jiyajinijinio pueya. Nojoriiri quiquiaari Gayo, Aristarconio. Na jayouuree Éfeso tiacajinijinio pueya rerejojua tiajiniaaraari. <sup>30</sup> Pabloori cuno pueya nacoosaqui tiajinia tiuquiniu paniquiaari juucuajuhuj. Quera na pocuasee cuno pueya tajiniani. Jesuucua tiuuniaa pueyari saa na cosequiaarijia na tiuquiaquiniuucujia. <sup>31</sup> Asia jiya camarucuaari na seya jiyaroquiaari Pabloocujuhuj. Camarucuaari coteenu naa sequequiaari na seya:

—Niocua Pablo sequesee, maja cumaati jaarajaaja na tiuquiniu pueya nacoouiaari, mariqui mosaareeri.

Cuno camarucua na seya jiyaroquiaari nocuani, nojoriiri Pablo rupuenaa quijia. <sup>32</sup> Cuno nasojosano rerejono pueyari saaja cushitiquiaari na juaaquiouuta. Jiyanojua nacooreeri. Tamasacaari saniniuujia tamaatia nacooriquiaajuhuj. Jiyacaritij, tama cuno nojorijinijinio pueyari maja na niishiniu quiquiaari casaajiniji na nacooriquiaani. Secaja nojorijinijinioori na niishiquiaari cutara. <sup>33</sup> Jiyacaritij, Judiocuacaari Alejandro jiyanishano pueyano caponeequiaari pueya nacoyano tajoji na nujuatesocoriquiano. Cuniquijinio pueyajaari tii toquiaari Alejandro casaara pueya nacoyani. Alejandroori Judio pueyano quiquiaarijuhuaj. Naaratej, Judiocuacuacujia tacunu paniriquiaa juucuaraari. Alejandro jaara nujuaquiaari pocujajiniji, na juaashiquia shiitioquiaariiri pueya sanaajetanura. <sup>34</sup> Saniniuujia, cuno pueya jaara niishiquiaari Alejandroori Judio pueyano, puetunu pueyajanaari socua jiyacatequiaari nacoounura. Nojoriiri caapiqui hora shocoteree pueyaracaanu naa na nacoosacari najuhuanaj. Naa sequeturiquiaa na nacoosacariiri:

—¡Pa timitiasano Artemisa cuaara pueyaracaanu quiiria Efesio tiacajinia quiniaa pueyaso!

Naa pueyaracaanu nacooriquiaari. <sup>35</sup> Cuno tiaca camarucua naajiona pueyano jaara na naata quiriquiaa nojori na sanaajanura, nojori sequereeri:



—Cuarta Éfeso pueyanaa, puetunu jiyacajinia quiniaajanaari niishiya, pajaniya Éfeso tiacajinia quiniaari pa pueyaso Artemisa secojojua tia cojuanaani. Niishitiuyajaariuhua paacuajaari cuno casaa juhua pa pueyaso Artemisa niquishano cojuaquiaani, jiya cajiniocuaji tinio pa riuriatasanoni.<sup>36</sup> ¡Canteeri nio niishiyaquiyanijia! Shaaqui. Cunora tariucuaja. ¡Nia sanaajetarohua! Majaari najuhuaana sesa nia miitiuniu, maninia nia niishiriojiyaquishacari.<sup>37</sup> Nio canuu niaa niyara na jayoreeni, nojoriiri maja na nohuasenu quirii casaa pa pueyaso secojojua tiajiniji. Majaari na sesacatunu quiquiaa pa pueyasojuhua. <sup>38</sup> Demetrio jaara nata poonijion-aata cuno pueyacuara tonujunu paniri, ¿casaara na quiaaquiya pa nequesoreena niquiara tonujunuraarini? ¿Casaara pa jiitiaa nequesoreena pa tiacajiniaarini? ¿Najuhuanaj? Pa nequesoreenaari pa paraa tacujua pocuaji.<sup>39</sup> Niaa jaara tamonu casaacua juaaquioreja, pocua tamonu juuca na rerejotariquiani pa jiyaniijianucuata pa jeecanura puetunu nia sequesanojuanaa.<sup>40</sup> Pueyanaa, ¿majate nia puerenu, Roma tiacajinia quijia pa jiyaniijiajanaa jaara pocuara tosaare pa nacojonujiniji? Paa jaara sequesaa nocua quiojonurani, ¿paatucua taa pocuaji tacureni jaara pa nequesoreere pa nacojonujiniji?

<sup>41</sup> Tiaca camarucua naajiona pueyano jaara puecaquiaari pocuanu, pueya sequequiaariiri:

—Nia quiojorohua pueyanaa.

Naacuajitij, puetunu pueyajanaari cuniquiji niyaquejoquiaariuhua.

## 20

### *Pablo rucuanajosacariuhua Macedonia jiyajinia, Grecia jiyajinianio*

<sup>1</sup> Pueya jaara na juaaniutia na nacojonu nuhuaji sanaajetaquiaariuhua, Pabloori jiyacari Jesuucua tiunaa pueya sequequiaari tama jiyareta nojorijiaaja rerejonura. Tii nojori nacasuree maniniaari. Tari na quiasacari cuniquiji, na nuhuajiria cacanuquiaari puetunu nojorijianaari. Na nuhuaji, Macedonia jiyajinia quiaareeri.<sup>2</sup> Nojuajaari puetunu cuno jiyajinia rucuanequiaarijanaa. Jesuucua tiunaa pueya cumashitiquiaari socuaari, maja nojori tarinitianura Jesuucua tiuniu. Naa na rucuanesacari cuno jiyajiniatej, socua tiuquishiiquiaari Grecia jiyajiniaari.<sup>3</sup> Pabloori tii na quishacari shocotejoquiaari jiuujianaraca raca. Juucua cuniquiji quiuanu paniriquiaa buquejinia Siria jiyajiniaraari. Judiocuacaari na niishiquiaari saaja. Nojoriiri jiyacari na monu paniquiaari. Naa Pablo niishishacariitij, nojuajaari nocuaji Macedonia jiyajiniara neteja nucuacohua tacatequiaariuhua saaja.<sup>4</sup> Nucuaco na quiasacariuhua, na tarajaquiaariiri Sópater jiyaniishano pueyano Berea tiacajinijinio, Pirro niyanu. Na tarajaquiaariijaariuhua Aristarco, Segundonio. Nojoriiri Tesalónica tiacajinijinio pueya quiquiaari. Nata quiaquiaariijaariuhua Gayo, Derbe tiacajinijinio. Timoteori nojoritia quiriquiaajaacuhua, Tíquiconio, Trófimojuhuaj. Nojoriiri Asia jiyajinijinio quiquiaari.<sup>5</sup> Puetunu nio canaa tapueyocajajanaari canaa puetaquiaari. Canacuaji tiuquijioseequiaari coteenu Troas tiacajiniaari. Cuniqui sashitiquiaari canaari.<sup>6</sup> Jiyacariiri queranacunuusacari quiquiaari, poreetajaaju shipinijosano pan miaquesacari. Queranacunuunu nuhuaji, canaari Filipo tiacajiniji jaaretaquiaari buquejiniani. Canaari cinco juuca camueenujuquiaari canaa tiuquiniuria Troas tiacajiniani. Canaari tii nojori coqueseeni. Canaari mariyata tii camueenujuquiaari siete juucani.

### *Pablo niishitijosacari Troas tiacajinia*



<sup>7</sup> Shusha semaana coteejajinia domingo juuca, canaari rerejoquiaarini pan neecasenura pa Jiyaniijia cusosacari niishiriojonura. Pabloori jiyacari Jesuucua tiuunaa pueya rootariquiaa niucua. Nojuajaari cuno tariqui quiariquiano quiriquiaa cuniquiji. Naaratej, na nuhujiria pocoojoriquiaa pueyataari. Pueyaracaanu na pohuatasacari, shiyaqueyari tari quiquiaari. <sup>8</sup> Cuno tiajinia canaa tii quiriquiaani, canaari jiyocuacaanu tercero na natacojinia rerejoriquiaani. Queraatia samariiri canaa caaniuji noshiquioriquiaa. Pabloori shitimia pohuatariquiaa pueya niquiara. <sup>9</sup> Jiyacaritij, tamonu mashajaari tia shuucujaji tacuhuajiniji cajiriquiaa. Na sesaari Eutico quijia. Pablo pohuatasacari pueyaracaanu, socua maquequiaari na cajishaquiiri. Jiyanojia na maquesacari, jiyocua tiquii socuaari. Cusoseejanaari. <sup>10</sup> Pabloori nata quiniaata ritia nocua netecuatiquiaari jiyocua. Pabloori nocua jacamasee na cacatanura. Narta Jesuucua tiuunaa pueya sequereeri:

—Maja najuhuana shiriiquitiuniu. Saminiocuaja.

<sup>11</sup> Na nuhujaji, puetunu nojorijianaari tiniota shuquiriaatia tacataquiaariuhua. Pabloori neecaruu neecasequiaari canaa miaquenuusocoriquiano. Pabloori socua pohuataquiaari pueya na niishitiojonura. Naa juhuaque-maajaa socuaari. Tariucua juuca quiaqueeri. Nojuajaari nucuaco quianu paniquiaari cuniquiji Asón tiacajiniara. <sup>12</sup> Cuno mashajaari saminio jaatucusaquiaariuhua na tiajiniohua. Puetunu pueyajanaari noojia cajitiquiaariuhua, saminio mashaja tacatesacariuhua.

*Pablo quiasacari Mileto tiacajiniara*

<sup>13</sup> Pabloori na quiaaquishacarijia tari canaa sequequiaari:

—Nia puetaarecuua buqueta. Niocua cua rimia Asón tiacajiniji. Janiya nucuaco quianu paniyani.

<sup>14</sup> Naacuajitij, canaari coquetoquiaari Asón tiacajiniani. Canaari cuniquiji Pablo tacanimiaquiaarini. Canaari mariyata tiji quiaaree Mitilene tiacajiniani. <sup>15</sup> Canaari tariqui shocomaa Quío jiya tucuaatijani. Canaari tama tariqui tiuquishii Samos tiaca tacatajajinijini. Canaari rupaquijia samaatemaacuara Trogilio tiacajiniani. Canaari cuniquiji sanetaaree tariquiniuhuj. Canaari Mileto tiacajinia tiuquishiini. <sup>16</sup> Canaari naa secoriquiohua ritiani. Majaari Pablo tarishiniu paniniu quiquiaari Asia jiyajinia. Naaratej, majaari na quianu paniniu quiquiaari Éfeso tiacajiniajuhuj. Ritia tiuquiniu paniquiaariuhua Jerusalén tiacajiniaari. Pentecostés juucara quiniu paniriquiaa tiiri.

*Pablo cumashitishacari Éfeso tiacajinijinio Jesuucua tiuunaa jiiitanaa pueya*

<sup>17</sup> Canaa quishacari Mileto tiacajinia, Pabloori pueyano jiyaroquiaari na masuunura Éfeso tiacajiniji Jesuucua tiuunaa pueya jiiitanaa. <sup>18</sup> Nojori jaara canaacua tiuquijioquiaari, Pabloori nojori sequereeri:

—Niaacuajaari maninia niishiya taa cua quishiiquiaari niaatani, cua tiuquishacari Asia jiyajinia niaacua. <sup>19</sup> Niaata cua quishacari, janiyari pueyaracaanu nia niishitiojojuani, pueyaracaanu pa Jiyaniijiaara cua poonijiosacari. Naa cua miishacaritij, majaari cua quiniu paniniu quijia juhua nia jiyaniijia. Janiyari niaacua cua tacaashacari nujuquejojuani. Janiyari pueyaracaanu naquiya miishanoni, cuarta Judiocuaca paracaashacari janiya. <sup>20</sup> Naajaa, majaari cua pishiniu quijia nia niquiara cua pohuatanura Pueyaso rupaa. Janiyari nia niishitiojojuani puetunujanaa maninia nia quiniuria, maninia miijia nia quiniuriajuhuj. Majaari cua niishitiojonu

quijia jiyasohuaja. Janiyari puetunu pueya niquiarajanaa nia niishitiojuani, tama nia tiacajiniaqueyajaajanio. <sup>21</sup> Janiyari Judiocuaca sequejani taucucanio, nojori tacatonuhuaa noojia Pueyasooocua, sesa nojori miishanojiniji, pa Jiyaniiijaacua nojori tiuuniuria cutara. <sup>22</sup> Quiarijiani, Pueyaso Sohuanuuri cua jiyaroya Jerusalén tiacajinia. Majaari cua niishiniu taa cua miishaanutaniya cuno tiacajiniani. <sup>23</sup> Janiyari saaja niishiya cutarani, puetunu tiacajiniajanaa cua quiasacari, Pueyaso Sohuanuuri cua sequeya: “Quiaari nujuatesaanutaniya. Quiaari naquiya miishaanutaniyajuhua”. <sup>24</sup> Janiya jaara naa niishirini, majaari cua tacaaniu quiquiaa. Cuaara cua motuuraqui jaara monu panitiuri. Janiyari saaja pa Jiyaniiija sequesano tucuatenu paniya cutarani. Pa Jiyaniiija Jesuuri cua jiyaroquiaari cua pohuatanura pueya niquiara, taa Pueyaso jiyanooni paniya pueyani.

<sup>25</sup> Janiyari seetanujuanaa nia sequeyani pueyanaa. Puetunu niajaniyanaa, cana niquiara cua pohuataquiaari Pueyaso rupaacuajani, majaari socua nia niqiniu quiniutianiya mijiria janiya. <sup>26</sup> Naaratej, janiyari nia sequeyani, majaari na nuhuaji nia sequenu: “Maja canaa pohuataasaanu quiquiaari Pueyaso rupaani”. <sup>27</sup> Janiyacuajaari tari nia pohuataquiaari puetunu Pueyaso sequesanojuanaa pajaniyarani. <sup>28</sup> Quiarijiani, tama nia cuaqueyajaaja nia cojuare. Maninia nia cojuare Jesuucua tiuunaa pueyajuhua. Pueyaso Sohuanucuaajaari nia jiyatequiaari Jesuucua tiuunaa pueya jitianaa nia quiniuria. Nojuajaari nojori masequiaari na nanacata tama nerajaaja, pocuara na cusosacari. <sup>29</sup> Janiyari seetanujuanaa niishiyani, janiya jaara niiquiji quiaqueeni, tamasaacari cua nuhuaji nijionutaniya. Jesuucua tiuunaa pueya sesonutaniyari, sacuaraatia nojori niishitiojosanota. Nojoriiri juhua marucatuque sareya tiuquitianutaniya Jesuucua tiuunaa pueya tajinia. Taa marucatuque sare tiuquiya borregohua tajiniacuaani, puetunu na sooseejanaari, cuno pojoriiri naa miiniutianiya Pueyaso muerasutej. <sup>30</sup> Naajuhua, tama niajaniyajinijiojuaaribia najuhuaana tamaatia niishitiojonu coteenutaniya na sapojonuta. Majaari Pueyaso panishano na niishitiojonunu quiniutianiya tari. Naa sapojotunutaniya Jesuucua tiuunaa pueyari, pueya tojiniuria nojori saniniuujia. <sup>31</sup> Janiyacuajaari nia sequeyani, jiyanohua nia cojuare tama nia cuaqueyajaaja. Nia niishirijuhua, jiuujianaraca marijiaari tari cua shocojoree pueyaracaanu cua niishitiojosacari niajaniya. Majaari cua tarinitianu quijia rootanu niajaniya, juuca, niucuanio. Janiyari naajaa cua namijiaacatenuta niishitiojoja puetunu niajaniyajanaani. Majaari naa cua miishano nia niyajetanu pueyanaa.

<sup>32</sup> Nia tiujianutaniya tarinijia. Janiyacuajaari pa Jiyaniiija juaashiquiajinia nia jataani. Na rupaa nia tojiriquia pueyaracaanu, juhua rishimiaca pueyano nia quiniuria, cumuecara. Nia jaara naa miiritij, Pueyasoori nia rijionutaniya na shuriucua, na saquiriojosano pueyata nia quiniuria. <sup>33</sup> Niaata cua quishacari, majaari tama quiriaajaaja cua paniniu quijia cumaneeca, toquenio. <sup>34</sup> Niaari naa quiyano cua niquijiajuhua. Janiyari tama cua juaashiquiataajaaja poonijiojuani, cua panishano cua masetajara, cua cojinia panishano masetajarajuhua. <sup>35</sup> Janiyari nia niishitiojuani, naa poonijosanotej casamijiuniucua pa naacunura pa jitianasanta. Majaari pa Jiyaniiija Jesu sequesano nia niyajetanujuhua. Naa sequequiaariiri: “Maninia pueyano jaara na jitiananojiniji niquitio nareja tamonu pueyano, na niquitiosacari tamonu, nojuajaari socua shuquiriaatia quiya, niquitiosano masejajiniji”.

<sup>36</sup> Naa nojori na sequenu nuhuajitij, Pabloori mojuquetaree. Puetunu nojoritiajanaa secojoreeri. <sup>37</sup> Puetunu pueyajanaari nujuquettee. Pablo

cacanuutureeri. Na nujuunequecturejaariuhuj. <sup>38</sup> Pueyari jiyanoehua taraajeriquiaa Pablo sequenuucua nojori, maja tari socua na niqutiuni quiniutianiya nojuaja. Nojoriiri caminiajiniara rosetaquiaarijuhuaj, Pablo na niqutiuniuria buquejinia na tacasacari.

## 21

### *Pablo quiasacari Jerusalén tiacajiniara*

<sup>1</sup> Éfeso tiacajiniji canaa ruparetasacari, canaari shoniacu caminia jiu-ujiaaco quiaareeni. Canaari Cos tiacajinia tiuquishiini. Cuniqiji canaa quiasacari tariqui, canaari Rodas tiacajinia tiuquishiiniuhuj. Tama tariqui canaa quiasacari Rodas tiacajiniji, canaari Pátara tiacajinia tiuquishiini. <sup>2</sup> Pátara tiacajinia canaa tiuquishacari, canaari tii riuriatasee tamonu buque quera Fenicia jiyajiniara ruparetaanoni. Canaari tii tacataareeni. <sup>3</sup> Canaa jaaretasacari, canaari canaa muenecara niqumiohua Chipre jiya tucuaatiajani. Canaari Siria jiyajinia tiuquishiini. Cuno buquejinia canaa tii quiariquiaani, casami pariquiaari Tiro tiacajinia jatasocoriquiano. Naaratej, canaari Tiro tiaca tacatajajiniji tiutiaseeni, casami jatanura tii. <sup>4</sup> Jesuucua tiuuniaa pueyari tii quiijajuhuj. Canaari nojoritia quishiini. Canaari siete juuca camueenujusee cuniqui nojoritiani. Pueyaso Sohuanuuri cuniquijinio Jesuucua tiuuniaa pueya niishitioquiaari taa Pablo miishaanutaniyani. Nocuaji nojoriiri Pablo sequetuquiaari maja na quianura Jerusalén tiacajinia. <sup>5</sup> Naajaa, siete juuca jaara tari shocojoquiaari cuniqui canaa quishacari, canaari tiji quiaquiaarini. Jiyacaritij, puetunu Jesuucua tiuuniaa pueyajanaari necocohuata, mariyata necohuata canaata quiaquiaari canaa na jatanura buquejinia. Canaari rosetaquiaari tiacajiniji tacatajajinijiriani, Pueyaso canaa secojonura jaaquiajinia. Puetunu canajanaari mojuquetacoquiaarini shoniacu caminia casaqueyaji. <sup>6</sup> Na nuhuaji, canaari nojori cacanuuree canaa nuhuajiriani. Canaari buquejinia tacataqueeni. Nojoriiri tacatajajiniji quiojoquiaariuhua na tiajiniohua.

<sup>7</sup> Canaari Tiro tiacajiniji jaaretaareeni. Canaari Tolemaida tiacajinia tiutiaseeni. Canaari cuniqui tacatasee puetunujuanaani. Canaari tii quiijaca Jesuucua tiuuniaa pueya saruhuataseeni. Canaari nojoritia quishii niquiriyatu juucani. <sup>8</sup> Tariqui saniniuujia, puetunu canajanaari mariyata quiojoquiaari Pablotani. Canaari Cesareya tiacajinia tiuquishiini. Felipeeri cuno tiacajinia quiriquiaa. Canaari na tiajinia quishiini. Felipeeri Jesujiniji pohuatana quijia. Nojuacuajaari Jerusalén tiacajinia coteenujuanaa tamasacata jiyatesaquiaari mashiquiopue mianuuteriquiano. <sup>9</sup> Felipeeri necojori jiitiaja, saa caqueetacaneeja, niyacoojori. Cuno niyacoojoriiri Pueyaso Sohuanu jiiitajaca. Naacuajitij, Pueyaso Sohuanu niishitiojosano nojori jiuujiajinia Pueyasojiniji pohuatanuujuaari. <sup>10</sup> Canaa camueenujusacari cuniqui, jiyacari tiuquishiiquiaariiri Judea jiyajinijinio pueyano. Nojuajaari Pueyaso sequenu panishano caminiuujunia quiijajuhuj. Ágabo jiyanihano pueyano. <sup>11</sup> Nojuajaari canacua niquiaari Felipe tiajinia. Jiyacaritij, Pablo cajiniocua camarucujua samaacataseeri. Nata morojoree tama na cashacucuaajaariija, na numatucuanio. Na nuhuaji sequerohuari:

—Jerusalén tiacajinia parta Judiocuacaari naa morojonutaniya nio cajiniocuaque camarutej. Na nuhuaji, taucuaa niqutiosaanutaniyani. Pueyaso Sohuanuuri naa cua sequereequij.

<sup>12</sup> Naa Cesareya tiacajinia quiniaa Jesuucua tiuuniaa pueya tojishacaritij, canajuhuj, puetunu canajanaari juucua Pablo nenecojoquiaarini maja na quianura Jerusalén tiacajinia. <sup>13</sup> Saa canaa sequereejari:

—¿Casaara nia nujuquetiuyajaarani? ¿Niaateeri cua taraajonu paniyaruhua? Majaari saaja cua paniniu pueya morojonura janiya Jerusalén tiacajinia; janiyari tama cua cuaqueyajaaja panitiaacujua. Cuaara cua motuuraqui, cua pohuatanuucua cua Jiyaniijia Jesujiniji.

<sup>14</sup> Maja canaa naata na tarinitiniu quishacari, canaari socua na tarinitiareeni.

—Cuajaquij. Pueyaso cuaara miiria taa na miiniu paniyacuajani.

<sup>15</sup> Naa canaa sequenu nuhuaji nojuaja juucuatej, canaari canaa jiitiasano casaa jeenucuaareeni. Canaari Jerusalén tiacajinia quiaarejaaniuhuj. <sup>16</sup> Canaata quiojoquiaariiri Cesareya tiacajiniji Jesuucua tiuuniaa pueyajuhuj. Canaata quiariquiaajaariuhua Mnasón jiyaniishano pueyano. Nojuajaari Chipre jiya tucuaatiajajinijinio pueyano quiquiaari. Nojuajaari tarijia Jesuucua tiuujia quijia. Nojuajaari canaa sequequiaari:

—Paa jaara Jerusalén tiacajinia tiuquishiini, niocua cua tiajinia quishii cuata.

### *Pablo pocojosacari Santiagota*

<sup>17</sup> Canaa tiuquijiosacari Jerusalén tiacajinia, cuniquijinio Jesuucua tiuuniaa pueyari canaa timitiaree canaa tiuquijiosacari. <sup>18</sup> Pabloori tariqui canaata quiaquiaari Santiago niquiniuucua. Tii quiriquiaajaariuhua puetunujuanaa Jesuucua tiuuniaa jiitianaa pueya. <sup>19</sup> Canaa tiuquishacari, canaari nojori saruhuataquiaarini. Na nuhuaji, Pabloori nojori pohuataquiaari puetunu Pueyaso miishanojuanaa na pohuatanuucua Jesujiniji, na rucuanajosacari tucuaaanu taucuaca quijia jiyacajinia. <sup>20</sup> Pueya jaara naa tojiquiaari Pablo pohuatasanotej, puetunu tii quiniaajanaari Pueyaso maniniuhuaqueetaquiaari nojori shuquiritiasacari Pueyaso.

Na nuhuaji, nojoriiri Pablo sequequiaari:

—Canaa tarajanunaa, taa quia niquiquiaacuajani, jiyanoehua queraatia parta Judiocuacari Jesuucua tiuya. Puetunu nojorijianaari tariucuacaanu Moisés niishitiojosano tojitiajacajuhuj, nocua nojori jiaatianuta jiyanoehua. <sup>21</sup> Nio Jerusalén tiacajinia quiniaa Jesuucua tiuuniaa pueyari quiocuaji tojiquianujuhuj. Quiaanaari tamonu jiyacajinia quijiaca parta Judiocuaca niishitiojoquiaa maja nojori miiniuria tari tariucuacaanu Moisés niishitiojosano. Quiaanaari niishitiojoquiaajuhuj maja nojori necohua cararaatiuquia co nojori miatejonura, taa pa supuetanaa niishitiojosaquiaaricuaani. <sup>22</sup> Naacuajitij, pueya jaara niishiri quiaa tari niya tiuquiriohua, nojoriiri quia rerejotanutaniya ritia. ¿Taa pa miyarini? <sup>23</sup> Canaari naa niishiriojiyani, naa quia miiri juhuari. Niya quiyari cuatro pueya na naca tuquenuuteriquiano, tarijia na sequetusano Pueyaso na tohuateenura. <sup>24</sup> Nojori quia jiyataare Pueyaso Secojua tiajinia. Niocua nia cuaqueya jeequejosee taa pa supuetanaa sequequiaaricuaajani. Naajuhuj, quiocua nojoriria cumaneeca niquitiore nojori naca riuujiushaanura. Quiaa jaara naa miiritij, puetunu pueyajanaari niishiniutianiya majaqui seetanujuanaa quiquianu pueya sequesano quiajanijajiniji. Niishitiuniutianiyajaariuhuj, quiaaqui tariucuacaanu Moisés niishitiojosano miyajaa. <sup>25</sup> Majaari Jesuucua tiuunio taucuacaacua quia tacaaniu. Canacuajaari tari nojori nacasuquiaari canaa naajioneejiniani, nojoriicuaa canaa naajiosacari. Canaari nojori sequequiaari cutarani maja tari nojori tojiniuria Moisés niishitiojosano. Canaari nojori sequequiaarijuhuaj, maja na miaquenuunura shipinishano pueyasohuacuara puecoosano casaa, naajuhuj, maja na miaquenuunura nanaca. Canaari nojori sequequiaarijuhuaj maja na miaquenuunura shu na nanacataja, naajuhuj, maja na numuetucunura na camishoo maaji.

Puetunu pa supuetanaa rootasanojinijianaani, saa niojuaari taucuaca to-jishocoriquiano rootasano.

*Na cojiniaata Pablo quioosacari Pueyaso Secojoua tiajinia*

<sup>26</sup> Pabloori narta Pueyaso pueya sequesano tojiqquiaari jaarajaaja. Naaratej, nojuajaari cuno cuatro pueya jiyataquiaari tariqui. Nojoritia jeequejoquiaari na cuaqueyari taa Moisés niishitiojoquiaaricuajani. Naa na miiniu nuhuajitij, Pueyaso Secojoua tiajinia tiuquitiaquiaariiri pueyacuara secोजनाacua. Na sequetuquiaariiri casaa juuca na tucuatatunutaniya na cuaqueya na jeequejonuununi, naajuhuj, casaa juuca nojori panutaniya Pueyasora na niquitiosocoriquianoni.

<sup>27</sup> Quera nojori tucuatascari puetunu cuno semaana juucajanaa, Asia jiyajinijinio narta Judiocuacaari Pablo niquiquiaari Pueyaso Secojoua tiajinia. Nojoriiri puetunu pueyajanaa nasajoquiaari ritia. Jiyacari Pablo quiatureeri. <sup>28</sup> Na quiatusacari Pablo, pueya na jiiquioonuutareeri:

—¡Israel pueyanaa, miji! ¡Canaa nia naacuseja! Nioori noo pueyanocuja tiqiyocua na rucanesaqui pueya niishitiojoquiaa sacuaraatia pocuaratej, nio Pueyaso Secojoua tiaacuarajuhuj. Naajuhuj, tariucuacaanu Moisés Rootasano sesacatequiaa pueyajaariuhuj. ¡Quiarijiani, pa Secojoua tiajinia sacuaraatia tiuquinitiaree taucuacaari!

<sup>29</sup> Cuno Judiocuacaari naa sequetuquiaari Pablotej, Trófimo jiyaniishano pueyanota nojori niqiniucua nojuaja tarijia na rucanejosacari cuno tiacajiniaja. Trófimoori Jesuucua tiuunia tahue quijia, Éfeso tiacajinijinio pueyano. Naaratej, cuno Judiocuacaari jyaniquiaari Pablo naasucuaari cuno tahue tiuquinirii Pueyaso Secojoua tiajinia.

<sup>30</sup> Puetunu Jerusalén tiacajinia quiniaa pueyajanaari juaaquoquiaari. Pablocua netecuatuquiaariiri. Na quiatureeri. Pueyaso Secojoua tiacoji na jaatiuquiaari carijiniacumaari. Pueyaso Secojoua tia tohuateyari ritia tionujusaaquiaari na nuhuaji. <sup>31</sup> Pueyari tari monu paniriquiaa Pablo. Jiyacaritij, tii Jerusalén tiacajinia quijia Romano soldadohua comandanteeri numootesaaquiaari: “¡Judiocuaca na juaaniutia nacoya!” Cuno comandanteni, nojuajaari soldadohua capitáncuaca jyanijia. <sup>32</sup> Jiyacaritij, comandanteeri na soldadohua rerejotequiaari ritia, na capitáncuacanio. Tee pueya nacoorigiaani, nocua netecuatuquiaariiri. Judiocuaca jaara niquiquiaari comandante na soldadohua neretaano nojoriicua, jiyacari shusha cartetuquiaari Pablo piquitiuniuuri. <sup>33</sup> Comandante tiuquishacari nojoriicua, Pablo quiaseejanaari. Na soldadohua sequereeri:

—Caapiqui cumayocua casaa nia saatijiore na numatucua cajiniocua.

Comandanteeri na nuhuaji pueya nequesoreeree:

—¿Cante nio pueyanoni? ¿Casaa na miiriini?

<sup>34</sup> Pueyari saaja jiyajeneta nacoorigiaa. Nioori tamaatia nacoorigiaacujua. Tamasacaari socua tamaatia nacoorigiaajanaajataj. Comandanteeri cunora maja na niishiniu quiquiaari casaa Pablo miirijiaarani, puera nojori cojuatunenuucua na nacoosacari. Cunora na soldadohua sequereeri:

—¡Pa quijia tiajinia nia jaatucuyarohua!

<sup>35</sup> Soldadohua tacatasacari tari nojori quijia tia tacatuhuoco Pablo nojori jaatucusacari, Judiocuacaari jiyacari quera na macaaniutia socua shiinuquitiaquiaari Pablocua, na monu paniniuria juucua. Soldadohuari nojoriicujaji Pablo shiitioquiaari jiyocuaanu. <sup>36</sup> Pueyari soldadohua nuhuaji na cocuatesacari jiiquioonuuriquiaa:

—¡Nia more cuno sesaaca! ¡Nia more!

*Tama nocuaji Pablo tacusacarijiaaja*



<sup>37</sup> Quera soldadohua tiuquinishacari Pablo nojori quijia tiaco, Pabloori soldadohua comandante sequeree:

—Quenaaja niquiriyatu rupaa sequereera cuno pueya.

Comandanteeri na riucuaaree:

—¿Quiaaquiri Griego rupaa pocuaja? Janiya juucua quia jiyaniriquiaa Egipto jiyajinijinio pueyanoni. <sup>38</sup> ¿Majateeri noo quiajaniya quiquianucuaaja, cariquia jiyajinia jiyatacanu cuatro mil puecojuaca pueyatej?

<sup>39</sup> Pabloori saaja na sequeree:

—Janiyari Judio pueyanoni, Tarso tiacajinia rasanotuhuj. Naacuajitij, janiyari Tarso tiacajinijinio pueyanoni, teyano tiacatucuaaja socua panishano tiaca Cilicia jiyajiniani. Quenaaja rupaquijia cua tarishitiricuarajaj. Cuno pueya sequenu paniya niquiriyatu rupaa quenaajanijia.

<sup>40</sup> Comandanteeri socua na sequeree:

—Quia pocuare.

Pabloori jiyacari tacatujiniji nujuaquiaari. Na juaashiquia shiitioquiaari pueya na sanaajanuraari. Puetunujuanaa jaara sanaajetaquiaari, nojoricuara pocuaree tama nojori Hebreo rupajiniaari. Naa nojori sequereeri:

## 22

<sup>1</sup>—Cua tapueyocuacanaa, cua jiyaniijianucuanaa, nia tojitiare cua sequesano niajaniya tama cua tacusacarijiaaja cucuaji.

<sup>2</sup> Cuno pueya jaara tojiquiaari Pablo pocuasacari nojoricuara Hebreo rupajinia, pueyari maninia sanaajetaquiaarijanaa. Pabloori nojori sequeree:

<sup>3</sup>—Janiyari Judio pueyanoni. Tarso tiacajinia cua raja, Cilicia jiyajinia. Janiyari nio Jerusalén tiacajinia maashiquiaarini. Gamalielri cua niishitiojona quijia. Jiyanhua rootasaquiaari pa supuetanaa niishitiojosanoni. Janiyari pueyaracaanu Pueyaso panishano miiniuucua jiaatiaquiaani, taa quiarijia nia miiniu paniyanijia. <sup>4</sup> Janiyari tarijia Jesuucua tiuuniaa pajejani naquiya cua miitiasocoriquiano. Janiyari na mooquiaarijuhuaj. Janiyari canuu cojiritiaquiaari quioonu maajipohuatajani, cua nujuatejosocoriquiano nujuatejojuajinia. <sup>5</sup> Pueyacuara secojona camarnuuri cua miijosano niishiyajuhuj, puetunu pa jiyaniijianucujanaanio. Nojoricuajaari cua niquitioquiaari nojori naajione Damasco tiacajinia quiniaa parta Judiocuacaacuara. Janiyari juucua quiariquiaa Jesuucua tiuuniaa pueya cua pajenura Damasco tiacajiniani. Quera cua quioosano cua nitiamohua niya Jerusalén tiacajiniani, saniitiojosocoriquiano.

### *Pablo pohuatasacari Jesuucua na tiuuniujiniji*

<sup>6</sup> Janiyari juucua nuucaco quiariquiaani. Quera cua tiuquishacari Damasco tiacajinia, panacariiri quiriquiaa. Canashiyaquiji jiyanhua shacantuuca juhua miacanaari cua nunuquiaari. <sup>7</sup> Janiyari juhua jataaareeni. Jiyacaritij, janiyari rupaa tojirii cua sequayanoni: “Saulo, Saulonaa, ¿casaara quia miitiaa puera janiyani?” <sup>8</sup> Janiyari na nequesotareeni: “¿Cantequia Jiyaniijianaa?” Cua sequereeri: “Janiyacuaajaari Jesuni, Nazaret tiacajinijinio pueyano. Cunocuaajaari quiaa na miitiaani”. <sup>9</sup> Cua cojiniaa pueyari cuno shacantuuca na niquishacari shiriiquitiquiaari. Majaari na tojitiuniu quiquiaari cutara jiyocuacaanuji rupaa cucua pocuaano. <sup>10</sup> Janiyari socua na sequereeni: “¿Casaa cua miyarini Jiyaniijianaa?” Jiyaniijaari cua sequereeni: “Quia sanerohua. Naajaa quia quiaare Damasco tiacajinia. Quiaari tii sequesaanutaniya puetunu cua panishanojuanaa quia miinuria”. <sup>11</sup> Cuno shacantuuca cua nunuquiaari jiyocuacaanujini, cua namijia



sesoquiaariiri. Janiyari cariyajuaru quiriquiaani. Naacuaajitij, cua cojiniaari cua jaatucutuquiaari. Naa cua tiuquitiatusee Damasco tiacajiniaari.

<sup>12</sup> 'Tamonu pueyanoori cuniqui quijia, parta Judio pueyano. Na sesaari Ananías quijia. Nojuajaari seetanjuanaa tariucuacaanu Moisés niishitiojosano tojijia cutara. Puetunu Damasco tiacajinia quiniaa Judiocuacaari na panijia. Nojoriiri na sequetujua: "Ananías cutaraari maninia pueyano".

<sup>13</sup> Ananíasri jiyacari cua niquiniucua niquiaari. Jaara tiuquiquiaari cu-cua, cua sequeeseeri: "Cua tarajanu Saulonaa, maninia niquijia quia quiriohua". Jiyacaritij, cua namijiaari ritia jeequequee. Janiyari maninia niquiqui Ananíasni. <sup>14</sup> Cua sequerejaariuhaj: "Pa supuetanaa Jiyani-ijia Pueyasocuajaari quia saquiriojoquiaari tariucuacaanujiniji, na niishitio-nura quiajaniya na panishano quia miiniuria. Quia saquiriojoquiaari-ariuhaj quia niquiniuria taquiya pocuajinio sesa miyashijia cutara, tama na camaru rupaajiniji quia tojiniuria na sequesanojuhuaj. Nojuacuajaari pa Jiyaniijia Jesucristo. <sup>15</sup> Quiaari puetunu pueyapue niquiarajanaa pohu-atanutaniya nojuajiniji quia niquishano, quia tojishanonio".

<sup>16</sup> 'Ananíasri socua cua sequequiaari: "¿Casaara quia tarishiyarini? Quiar-ijiani, quiaa cuara tiuquinishaaria. Jiyaniijia Jesu quia sequere: 'Cua jiyanoori sesa cua miishanojiniji'. Nocua quia tiuushacari, quia sesa miis-hanoori jeequesaanutaniya".

#### *Pablo pohuatasano taa Jesu jiyaroquiaari nojuaja taucuacaacuani*

<sup>17</sup> 'Janiya jaara riujuuquiaariuhua Jerusalén tiacajiniohuani, janiyari Pueyaso Secojonuuja tiajinia secojoriquiaani. <sup>18</sup> Cua secojosacari, jani-yari Jesu niquiquiaari juhua cua maquenujiniani. Cua sequereeri: "Ri-tia quia quiaare niiquiji. Nio pueyari maja na tojitianu quiniutianiya quiajaniya, nojori quia pohuatasacari janiyajiniji". <sup>19</sup> Janiyari saaja na sequereeni: "Cua Jiyaniijianaa, nojoricuajaruhua niishiya janiyari quiocua tiuuniaa pueya quioojuani puetunu rerejojua tiajinijijianaa cua nujuate-josocoriquiano nojori. Janiyari nojori mojoojuajuhaj. <sup>20</sup> Naajuhaj, quia rupaa pohuatana Esteban jaara mosaaquiaaritij, janiyari catecaji saitia na jacusacari shootiaquiaarini. Janiyari na jacunaa toqueya cojuariquiaajaani-uhaj, nojori mosacari Esteban. Janiyari jaarajaaja sequequiaarini: 'Cuara mosaaria' ". <sup>21</sup> Naa cua sequesacaritij, Jiyaniijiaari saaja cua sequereeni: "¡Niiquiji quia quiaarejaj! Janiyacuajaari tucuacaanu quia jiyaronutaniya taucuacaacuani".

#### *Comandante jítiasacari Pablo*

<sup>22</sup> Pueyari sanaa tojtitariquiaa Pablo pohuatasacari. Saniniuujia, Pablo jaara jiyaniquiquiaari taucuaca, pueyari jiyacari coteequiaari nacoonu, taucuaca soojeaca nojori quiniucua:

—¡Cuara mosaaria cuno pueyano! ¡Majaari maninia jiyano pueyano rishiniuria socuatej!

Cuno pueyari naa nacooriguiaa.

<sup>23</sup> Na juaaquionuta na nacoosacarijia, na toqueya quejootuquiaari jiy-ocuacaanuuri quera na macaaniutia. Naa quejootuquiaari jiyajuajaari-uhaj. <sup>24</sup> Comandanteeri na capitáncuaca sequequiaari Pablojiniji:

—Nio pueyano nia tiuquiniri nia quijia tiajinia. Niocua na saniri majacu-nunoj, cuara sequeera casaara naa pueya nacoyani.

<sup>25</sup> Soldadohua jaara tari Pablo morojotuquiaari tiaacuara na majacutuso-coriquiano juucua, Pabloori capitán sequequiaari:

—¿Jiyaniijia César rootasanotee, naa nequesoreesoojua nia majacunura narta Romano pueyanotej?

<sup>26</sup> Capitán jaara tojiqquiaari naa Pablo sequesantej, ritia neteqquiaariiri. Na comandante sequeeseeri:

—¡Quiaa cocuaatia miya! ¡Cuno pueyanona Romano!

<sup>27</sup> Comandanteeri ritia Pabloocua catecanoquiaari. Na nequesotaseeri:

—¿Seetanutejanaa? ¿Quiaatena Romanotej?

Pabloori na riucuaaree:

—Taaquiririnij.

<sup>28</sup> Comandanteeri na sequerohuacuhuj:

—Romano pueyano cua quiniuria, janiyari queraatia cua cumaneeca niqutioquiaarini.

Pabloori saaja na sequere:

—Janiyari Romano cutarani, nojori tiacajinia cua rasaanuucua.

<sup>29</sup> Cuno pojori, Pablo majacunura seeratasaaquiaari juucuan, naa nojori tojtiasacaritij, Pablo shuriucuj ritia shiriquitiaquiaariiri. Comandante niishishacari Pablo seetanujanaa Romano quiquiaari, puererejaariuhuj, Pablo na morojotenuucua.

### *Tama nocuaji Pablo tacusacarijaaja Judiocuaca jiyaniijianucua niquiara*

<sup>30</sup> Tariqui saniniuujia, comandanteeri maninia niishiniu paniquiaari casaara Judiocuaca nacootariquiaacuaa naa Pabloni. Naaratej, comandanteeri Judiocuacaacara secojonaa jiyaniijianucua rerejotequiaari. Puetunu Judiocuaca camarucua nacasunaa maanujanaa rerejotequiaariuhuj. Nojoricuajaari Sanedrín maanu. Jiyacari Pablo numatucujinij rupareetaquiaari cumayocua saatijiotasanoori. Puetunu nojorijanaa jaara tari rerejoquiaari, jiyacari Pablo tohuatequiaariiri. Nojori tacoji na nujuatereeri.

## 23

<sup>1</sup> Pabloori juhuacatecara pohuatanu coteeqquiaari camarucua niquiara. Nojori sequereeri:

—Cua tapueyocuaanaa, janiyari pueyaracaanu juhuajaniya quiquiaani, Pueyaso tojijia cua quishacari pueyaracaanu.

<sup>2</sup> Naa Pablo sequesacaritij, pueyacuara secojonaa jiyaniijajanaari juaari. Ananías na sesa. Nojuajaari Pablo jiyaniquiaari najuhuana pocuaa naasucua. Nocujia, Ananíasri Pablo shuriucua nujuatunaa sequequiaari ritia:

—¡Na rupaaajinia nia piri naa pocuaaniquitij!

Pablo shuriucua nujuanaari jaarajaaja na piqui. <sup>3</sup> Majaari Pablo niishiniu quiquiaari casaate Ananías quiquiaarini. Naacujitij, Pabloori juhuajaniya Ananías sequequiaari:

—¡Pueyasoori saniniuujia cucua quia naminiutianiyacujua, Moisés Rootasano tojiyashijiana! Nia jyanishacari janiyari Moisés Rootasano tojiyashijiani, niaari coteenu cua nequesoreya maninia taa Moisés rootaquiaaricujani. ¡Quiaa sajara Moisés Rootasano tojiyashijia cutara, quia sequesacari cua pishaanura nia nequesoreyaquishacarijia maninia janiya!

<sup>4</sup> Pablo shuriucua nujuatunaari Pablo sequequiaari:

—¿Quiaateeri saa rerequeteyajaa pueyacuara secojonaa jiyaniijiaruhua?

<sup>5</sup> Pabloori nojori riucuaaree:

—Cua tapueyocuaanaa, cua jyanoori. Paacuajaari naa rootasaaquiaari Moisés nequesoreetuneejiniani:

“Majaari sacuaratia rimiaaquenu nia camarnuucua”.

Cua pueyanaa, maja cutaraari cua niishiniu quiriquiaa nojuajate pueyacuara secojonaa jiyaniijia.

<sup>6</sup> Pabloori niishiiguii cuno Judiocuaca camarucua nacasunaa cuniqui quiriquiaani, noojiaqueya nojorijinijinioori Saduceocuaca maanujiniji quiriquiaa. Tamasacaari saniniuujia narta Fariseocuaca maanujiniji quiriquiaacujua. Naaratej, Pabloori jiyanoohua na rupaa paaretaquiaari naa na sequenura nojori:

—¡Cua tapueyocucanaa, janiyari Fariseo pueyanoni! Cua shipininioori Fariseo pueyano quiquiaarijuhuaj. Canaari Pueyaso Rupaacua tiuujiacani. Naacuajitij canaari niishiyani Pueyasoori macunucua samiitianijionutaniuhua taa puetunu cuarta Fariseocuaca niya quiniaa tiuyanijia. ¡Niaaquiiri jiyamitia cua nequesoreya!

<sup>7</sup> Pablo jaara naa sequequiaaritij, Fariseocuacaari Saduceocuacata juhuacatecara juayonuutaquiaari tama nojorijiaaja. Naacuajitij, nojoriiri caapiqui maapuera raquitiiquiaari. <sup>8</sup> Saduceocuacaari jiyaniya maja macunucua samiitiaconu quiniutianihua. Nojoriiri sequeyajuhuj: “Maja Pueyaso seya quiniu”. Pueyapuenaari sohuanuujuhuj. Fariseocuaca cutaraari nojori cuaracashitishanoocua tiuya. <sup>9</sup> Naacuajitij, puetunu pueyajanaari nacooriguiaa na juayonuutasacari. Jiyacaritij, tariucuaaanu Moisés Naajiotasanojiniji niishitiojonaa pueyari sanetaquiaari. Nojoriiri Fariseocuaca quijiajuhuaj. Nojoriiri naa sequetuquiaari Pablojiniji:

—¡Nio pueyanoori maja sesa na miiniu quiquianu! Maninia sohuanu jiyoteeri nocua muetacanu, Pueyaso seru soj. Majaari pa niishiniu. ¿Paatucua casaara tenujire Pueyaso panishano na miishacarini?

<sup>10</sup> Pueyari socua jiyacatequiaari nacoonu. Comandanteeri puerequiaari, na jyanishacari Pablo naasucua socua sureesaanutaniyaquij. Naa jyaniquiaariiri, puerajanaa pueya juaaquiiosacari. Nocuaji, comandanteeri ritia na soldadohua jiyaramiquiquiaari, na tiajnia nojori tiuquininiuhua Pablo pueya tajiniji. Naa miitiquiaariiri.

<sup>11</sup> Cuno niucujani, Jiyaniijia Jesuuri Pabloocua muetaquiaari. Na sequereeri:

—Quioojia quia cumaquri Pablonaa. Naatej, taa quia pohuatarucuaa janiyajiniji niya Jerusalén tiacajiniacuaani, quiaari naa pohuatanutaniya janiyajiniji Roma tiacajinia quiniaajuhuj, Césarjanaa niquiarajuhuj.

### *Judiocuaca roojotoosacari Pablo na motunura juucua*

<sup>12</sup> Tariqui saniniuujia, noojiaqueya Judiocuacajinijinioori Pabloocua roojotooquiaari na monura. Nojoriiri naa sequetuquiaaritij:

—Paa jaara Pablo moyaquirini, pocua miaqueyaquirini, pocua ratuyaquirijianiuhuj.

<sup>13</sup> Nojoriiri cuarenta canuu quiquiaari, naa sequetuquiaarini. <sup>14</sup> Na nuhuaji, cuno pojoriiri pueyacuara secojonaa jiyaniijianucuaacua quiaquiaari, Sanedrín maanuucuanio. Nojoriiri naa sequetuquiaari:

—Majaari canaa miaquenu quiniutianiya quenaaja casaa, canaa cuaraa more Pablojaatijia. <sup>15</sup> Niajaniya, pueyacuara secojonaa jiyaniijianucuaanaa, puetunu Sanedrín maanujuaanao, nia sequere comandante cuara nitiaara tariqui Pablo niaacua. Niocua naa na sequerenoj: “Miji Pablo quia nitiaare. Canaari socua maninia na nequesoreenu paniyani”. Canaacua jiyacari niaacua na tiuquiyaquishacarijia nuu cajiniocua na moreni.

<sup>16</sup> Tamonu pueyanoori Pablo raaquia caminiujuquiaari naa cuno pojori sequesano camarucatej. Pablo raaquiaari nocuaji ritia soldadohua quijia

tiajinia quiaquiaari na cama Pablo na pohuatanura. <sup>17</sup> Jaara tari na pohuataquiaari, Pabloori jiyacari cuniqui cojuanaajinijinio capitán piiquiaari. Na sequereeri:

—Nio caya samijia quia jiyataare comandanteecua. Nojuajaari comandante numootenu paniya.

<sup>18</sup> Jiyacaritij, capitánri Pablo raaquia jiyataquiaari. Na tiuquishacari, comandante sequequiaariiri:

—Pa quiasano Pabloori cua piiriini. Cua sequereeri cua nitianura quiocua nio caya samijia. Nojuajanaari casaa quia sequenu paniya.

<sup>19</sup> Jiyacaritij, comandanteeri caya samijia numatujiniji quiaquiaari. Tamocora na jaatucureeri. Tii na nequesotaseeri:

—¿Casaa quia sequenu paniya janiyani?

<sup>20</sup> Caya samijiaari na sequeree:

—Noojiaqueya Judiocuacajinijinoori Pabloocuara rojotoorucuaa. Quiaari sapojonu sequesaanutaniya tariqui quia jiyatanura Pablo, puetunu Sanedrín maanujuanaa niqiara nequesoreesocoriquiano. <sup>21</sup> Quiaa jaara sequesaa, majaari nojori tojinu. Cuarenta canuuri tari nuu cajiniocua nocuaji jamaatiuya. Cuno pojoriniaari maja na miaquenuunu quiniutianiya, majanaari na raruunu quiniutianiyajuhuaaj, cuaara moture Pablojaatijia.

<sup>22</sup> Comandanteeri caya samijia sequequiaari:

—Maniniacujaja. Majaari tamasaca pohuatanu quia sequesano janiya. Tariucujaja. Quia quiaarohua.

### *Soldadohua jiyatasacari Pablo camarnu Félix*

<sup>23</sup> Comandanteeri caapiqui capitán piiquiaari. Nojori sequereeri na numootejonura dosciento soldadohua, Cesareya tiacajinia quiojoriquiano cuno niucujaja. Mariyata cuaara quiojoora setenta soldadohua caballohua nijinia cajitiujiaajuhuaaj, socua dosciento soldadohua saa cashiriacajanio.

<sup>24</sup> Comandanteeri na capitáncuaca sequequiaarijuhuaaj, nojori niojotanura cajitiucua tamasaca caballohua nijinia Pablo cajijiara. Nojori sequequiaarijiaarijuhuaaj:

—Niocua maninia cojuaare Pablo, cuaara tiuquiiria camarnu Félix nequesoreesocoriquiano.

<sup>25</sup> Comandanteeri na naajionee niqutioquiaari Pablo jiyatanaa. Naa naajiosanoori quiquiaari camarnu Félixcuara:

<sup>26</sup> “Camarnu Félixnaa. Nio Claudio Lisias naajionee. ¿Taa quia quiyani cua panishano camarnunaa? <sup>27</sup> Cua jiyarotasano pueyanojiniji quia pohuatareeraj. Na sesa Pablo. Narta Judiocuacaari na motunu paniquianu. Janiyari jiyacari cua soldadohuata nocua tiuquishii namitiani. Janiya jaara niishiQuianuni nojuaja Romano pueyano, janiyari cua soldadohua sequereeni: ‘Judiocuacaacuaji nia quiare ritia cuno pueyano, mariqui na motureeri’. <sup>28</sup> Maninia cua niishiniuria casaara naa pueya nacootariquiaa Pablóni, janiyari puetunu Judiocuaca camarucua nacasunaa rerejotecanuni. Janiyari nojoriicua tohuatecanu Pablóni, nojori nequesoreenura nojuajanaa cua tojishocoriquiano. Janiyajanaa jaara Pablo tojiquianuni, casaara pueya monu paniriquiaanoj, janiyari jiyacari shusha niishiriini. <sup>29</sup> Nojoriquiiri na nacootacanu Pablo tojiyaquiniucua tariucuaaanu tama nojori supuetanaa rootasanojuaaja. Cunora na motunu paniriquiaari. Janiyari quia sequeyani, ¿maatucua cunora mosaareeri? Majaari quenaaja sesa na

miiniu quiquianu, pueyaracaanu na nujuatesaanura. <sup>30</sup> Janiyari sequesaarucuaajuhuaaj, noojiaqueya Judiocuacajinijionaaari na monu paniya. Janiyari jiyamitia quiocua cua soldadohua na jiyarotareeni. Janiyari nocuara saquiriojotanaa sequerucuaajuhuaaj, cuara quia saquiriojotatuura nocuara cutara. Cunojuanaa quia sequeyanijia cua camarnunaa. Tariucuaaja”.

<sup>31</sup> Soldadohuari naa miiquiaari taa comandante sequequiaari nojoricua-jani. Nojoriiri cuno niucuaaja Pablo jiyataquiaari. Antípatris tiacajinia tiuquiiijioseeri. <sup>32</sup> Na niohuacata quiojonaa soldadohuari Antípatris tiacajiniji tariquiiicuaaji riujuuutiaquiaariuhua Jerusalén tiacajiniahua. Caballohua nijinia cajitiuniaa soldadohua cutaraari Pablo jiyataquiaari. <sup>33</sup> Pablo jiyatanaa jaara tiuquiiijioseequiaari Cesareya tiacajinia, nojoriiri comandante naajionee niqutiose camarnu Félix. Pablo na niqutiotureejaariuhuaaj. <sup>34</sup> Camarnu serojonu nuhuaaji comandante naajionee, Pablo nequesotaquiaariiri:

—¿Tee quia rasaanquiaarini?

Pabloori na riucuaree:

—Cilicia jiyajinia rasanonijia.

<sup>35</sup> Camarnuuri na sequeree:

—Janiyacua quia nequesoreeriquiani quiocuara saquiriojotanaa jaara tiuquiiijiore.

Jiyacaritij, camarnuuri na soldadohua sequequiaari cuara maninia cojuatuura Pablo tariucuaacaanu jiyaniijia Herodes tiaco. Herodes quishacari jiyaniijia, cuno tiaari nocuaji tiasaaquiaari na quijiara.

## 24

### *Tama Pablo tacusacari nocuajijiaaja camarnu Félix niquiara*

<sup>1</sup> Pabloori cinco juuca camueequiaari tari Cesareya tiacajinia. Jiyacari tiuquiiijioquiaariiri nocuara saquiriojotanuuriquiano pueya. Nojoriiri quiquiaari pueyacuara secojonaa jiyaniijia Ananías, mariyata secaya Judiocuaca camarucuanio. Nojoritia tiuquiquiaariiri Tértulo jyanishano pueyanohuaaj. Jyanohua pocuanu niishijia. Puetunu nio pojorijianaari camarnu Félix quia tiuquitiaquiaari Pabloocuara na saquiriojotanura. <sup>2</sup> Pablo jaara tohuatesaaquiaari nojoriicua, Tértulo juhuacatecara coteequiaari camarnu Félix saquiriojotanu nocuara. Naa sequequiaari camarnu Félixri:

—Canaa camarnunaa, quiaari jyanohua niishijia. Naa niishijia quia quishacaritij, quiaari maninia quia pueya jiitiaa. Canaari naacua juhua-janiya quiyani, maninia canaa quia jiitiasacari. <sup>3</sup> Canaari cunora quia timitiaani camarnunaa, maninia quia jiitianuucua canaa pueyaracaanu, puetunu canaa jiyajiniajanaa. <sup>4</sup> Maja puera cua tarishitiniu paniniu quia-janiya. Quenaaja rupaquijia canaa quia tojiricuara. <sup>5</sup> Nio pueyanoori tariucuaacaanu canaa supuetanaa rootasano tamacateya queraatia cuarta Judiocuaca. Nojuajaari tamaatia niishitiojoquiaa tamonu jiyacajinia quinia Judiocuacajuhuaaj. Naa sesa na niishitiojonuucua pueyatej, tamasaari maja tari na rupuenu paniniu narta pueyano. Nio pueyano tojitiajacaari sesojosaaquiaari Nazarenoocua tiunaa maapue. Nio pueyanocuajaari cuno pojori jiyaniijia. <sup>6</sup> Juucua Pueyaso juaatiniu paniquianujaariuhuaaj, tahue na tiuquininiu panishacari Pueyaso Secojoua tiajinia. Canaari jiyamitia na quiarucuaani, canaa nequesoreesocoriquiano taa tariucuaacaanu canaa supuetanaa rootasaaquiaaricuaajani. <sup>7</sup> Comandante Lisiasri canaa na jaariutiarucuaa saajani. <sup>8</sup> Canaa sequerucuaajaariuhuaaj: “Cante nio



pueyanoocuara saquiriojotanu paniyani, cuaara quiaara camarnu Félix<sup>cua</sup>". Naa canaa sequerucuaari. Nio pueyano quia nequesotasure, quia niishinuria maninia. Seetanujuanaacuj, canaari cunora nocuara quia saquiriojotaani.

<sup>9</sup> Cuniqum quiniaa Judiocuacaari jaarajaaja sequeturee:

—Taaquiriirini, camarnu Félixnaa. Naacuaaquiniatejaj, taa Tértulo sequeyacuajani.

<sup>10</sup> Camarnuuri na juaashiquia shiitioquiaari Pablo pocuanura saniniuujia. Pabloori jiyacari coteeree. Naa sequereeri:

—Taaquiriirini, pocuashiyacuaaquiniatejaj. Camarnunaa, janiyari niishiyani, quiaari tari queraatia marijia shocotejiya cuarta Judiocuaca nequesoreena quia quishacari. Naaratej, janiyari juhuajaniya quia niquiara tama cucuaji tacunu paniyani, cuarta Judiocuaca saquiriojotasacari cucuara quiajaniya. <sup>11</sup> Janiyari shusha tiuquiriohuacuaa Jerusalén tiacajiniani, Pueyaso cua secojonura Secojonuujua tiajinia. Janiyari shusha camueesuhua doce juucani. Cucuara saquiriojotanaa quia nequesoreesureeraj. <sup>12</sup> Nojoriiri maja quenaaja na riuriatanu quiqumianu janiya tamonu pueyanota juayonuutaano. Majaari na riuriatatunu quiqumianu janiya pueya ruutaqueyano quenaaja Pueyaso Secojoua tiajinia. Majaari quenaaja nojori riuriatanu quiqumianu janiya canaa Secojoua tiajinia juayonuutaano pueyata. Majaari quenaaja naa cua miiniu quiqumiaari puetunu tiacajiniajanaa cua rucuanesacari. <sup>13</sup> Nio pojori cucuara quia saquiriojotaani, nojoriiri maja na naata sequenu seetanujuanaa janiya sesa miijiani. <sup>14</sup> Nojori sequesacari janiyanaari Pueyaso tojjia tamaatia nojorijiniini, cua tojinuucua cuno Nazareno pueyano, taaquiriirini. Saaja cuno nojori sequesano cutaraari seetanujuanaa. Janiyari Nazareno tojjiani seetanujuanaa cua tiuushacari puetunu Moisés naajiotasanoocuajanaa, naajuhuj, cua tiuushacari puetunu canaa supuetanaa caminiujiushano Pueyasojiniji naajionuutasanoocuajanaano. <sup>15</sup> Janiyari juhua cucuara saquiriojotanaa pueya tiuya Pueyasooacuajuhuj, taa Pueyaso samiitianijionutaniuhua macunucuan; maninia miijiaca, sesa miijiacano. <sup>16</sup> Naaratej, janiyari pueyaraaanu sesa miyaquiniu saniniujuquiaani, maninia cua quiniuria Pueyaso niquiara, pueya niquiaranio. Naacuajitij, janiya jaara samiitiarohuani, majaari cua macuhujenu quiniutianiya.

<sup>17</sup> 'Queraatia marijia cua shocotejonu nuhuaji cua rucuanesacari tamonu jiyacajinia, janiyari shusha tiuquiriohuacuaa cua jiyajiniani. Tamonu jiyacajiniji Jesuucua tiuuniaa niquitiojosano cumaneeca tiuquitiarohuacuaanijia. Janiyari na tiuquitiarohuani na jatanuhuara Jerusalén tiacajinia, Jesuucua tiuuniaa casamiijiuniucua niquitiojosocoriquiano, mariyata cua jiišanasojiniji cua niquitionuhuara Pueyasora. <sup>18</sup> Naa cua miiniu nuhuaji Pueyaso Secojoua tiajiniatej, Asia jiyajinijinio Judiocuacaari cua naacutucanu tohuataano juucua Pueyaso Secojoua tiajiniji. Janiyari juucua tohuatariquiohuani cua cuaqueya cua jeequenu nuhuaji, taa canaa supuetanaa niishitiojosaaquiaaricuajani. Cuno juuca, majaari queraatia pueya quiniu quiriquiaa Pueyaso Secojonuujuaajinia. Majaari quenaaja pueyata cua juayonuutanu quiriquiaajuhuj. <sup>19</sup> ¿Teete cuno pojoricuarani? Mariqui niya nimaacuara cucuara na saquiriojotanuunura, janiya jaara sesa miiquianuni. <sup>20</sup> Cucuara saquiriojotanaa jaara nijiyaquimia, naajaa, nio pojori niya quiyani, nojoriiri Judiocuaca camarucua nacasunaa nequesoreesacari janiya tii quituquianu jiyacarijuhuaj. Nojori cuaara sequeera, ¿cuno camarucuate cua sequecanu janiya sesa miiquianuni? <sup>21</sup> ¿Pueyateeri cucuara saquiriojotaa soj, nio cua sequenuucua Judiocuaca camarucua:



“Niaari cua nequesoreya quiarjia, cua niishishacari macunucuaari samitianijiosaanutaniuhua”? Janiyacuajaari naa nacacanu camarucua nequesoresacari janiyani.

<sup>22</sup> Camarnu Félix jaara naa tojiquiaari Pablo sequesantej, nojuajaari pueya sequequiaari:

—Comandante Lisias cuaara tiuquiirijaara, janiyacua Pablo nequesoreeriquiani.

Camarnu Félixri Jesujiniji pohuatasano tari maninia niishiquiaari. Naaratej, nojuajaari Pablocuara saquiriojotanaa pueya tarinitiaquiaarijaara. <sup>23</sup> Na nuhuaji, camarnu Félixri soldadohua capitán sequequiaari:

—Pablo nia tiuquiniriohuajaara. Niocua maninia na cojuarenoj. Na rupuenaa, tapueyocuacanio, nojori jaara Pablocuara nimiaquia, majaari nocuaji na tenujununoj. Nojori cuaara na niqutiotuura na panishano.

<sup>24</sup> Na nuhuaji, camarnu Félixri tamaqui quiaquiaari camueenujunura. Na nuhuaji, juhua shusha tiuquiquiaariuhua necocuataari. Necocua Drusilaari Judiocuacajinjinio maaji quijia. Camarnu Félixri na soldadohua sequequiaari:

—¡Pablo nia tohuatere! Janiyari cua niquiocuata na tojiniu paniyani. Cuaara canaa niquiara pohuataara taate Jesuucua tiushanojuaarani.

<sup>25</sup> Naacuajitij, Pabloori Félix pohuataquiaari nojori niquiara taate pa naata maninia miijiaara pa quiniuni. Pohuataquiaarijuhuaj taate pa naata tama pa cuaqueyajaaja pa cojuanu maniniani, sesa pa miyaquiniucujaji. Naajuhuj, Pabloori na numootequiaari Pueyasoori sesa miijiacaa saniitionutaniya.

Camarnu Félix jaara naa tojiquiaaritij, jiyanohua shiriquiquiaariiri. Pablo sequereeri:

—¡Tariucujaja! Quia quiaarohuacuarajaara. Janiya jaara jeya quiriqiani, janiyacua quia sequereeraniuhuj.

<sup>26</sup> Camarnu Félixri naa sequeyarucua na soldadohua sequequiaari Pablo na jiyatanura nocua, nata na pocoojonura. Nojuajaari juucua jiyaniquiaari Pablo naasucuaari cumaneeca na niqutionutaniya na cartesaanura. <sup>27</sup> Pablo shocojoquiaariiri caapiqui marijia, nujuatesano na quishacari Cesareya tiacajinia. Jiyacaritij, Porcio Festoori saniniuujia camarnura jiyatesaquiaari Félix niti. Majaari Félix tohuatenu quiquiaari na nuhuajiria Pablo. Naajaa na tiujiaquiaari nujuatesanoori. Naa miiquiaariiri Judiocuaca timitianura nojuaja.

## 25

### *Pablo pohuatasacari Festo niquiara Jesujiniji*

<sup>1</sup> Jiyacaritij, Festoori tiuquiquiaari Cesareya tiacajinia, Judea jiya camarnu na quiniuria. Jiuujianaraca juuca nuhuaji, Cesareya tiacajiniji quiaquiaari Jerusalén tiacajiniaari. <sup>2</sup> Jerusalén tiacajinia na quishacari, pueyacuara secjona jiyaniijianucuaari tii Judiocuacajinjinio socua tojishano camarucua Pablocuara saquiriojotaquiaari camarnu Festo. <sup>3</sup> Nojoriiri camarnu Festo sequequiaari cuaara na soldadohua jiyaroora, Pablo na riniuria Jerusalén tiacajiniara. Nojoriiri naa sequequiaari camarnu juucuatej, na motunu panishacari Pablo nucumaji na nishacari. <sup>4</sup> Camarnu Festoori saaja nojori riucuaquiaari:

—Nujuatesano quiya Cesareya tiacajiniacujaruhua. ¿Maatucua casaara niyara rishaareni? Janiyacuajaari nocua tacatenutaniuhua.

<sup>5</sup> Camarnuuri nojori sequequiaarijuhuaj:

—Niajaniyajinijinio socua tojishano pueya cuaara quiojohuara cuata Cesareya tiacajinia. Nojoriiri na naata Pabloocuara saquiriojotanu cua niquiara tii, cua niishiniuria maninia, Pablote seetanujuanaa sesa mi-iquianujuuara.

<sup>6</sup> Camarnu Festoori camueenujuquiaari Jerusalén tiacajinia ocho juuca, diez juucaruhua. Na nuhuaji, quiaquiaariuhua Cesareya tiacajini-ohuari. Na tiuquiniu nuhuaji, saniniuujia tariqui cajiquiaari nequesoreesaqui camarnu cajitiujiniaari, camarnu na quishacari. Jiyacari na soldado sequequiaariiri cuaara Pablo tohuateera na nequesoreeso-coriqiano. <sup>7</sup> Judiocuacaari tari tiuquiiioquiaari Jerusalén tiacajiniijii-uhuj, Pabloocuara na saquiriojotanuunura. Pablo jaara nujuatesaquiaari camarnu tacoji, cuno pojoriiri jaarajaaja catecanoquiaari Pabloocua. Nojoriiri jiyanohua sesa nocuara saquiriojotanuquiaari najuhuaana queraatia casaa. <sup>8</sup> Jiyacaritij, Pabloori tama nocuaji na tacusacarijaaaja naa sequequiaari:

—Maja sesa cua miiniu quiqianu. Janiyari tariucuacaanu Moisés Rootasano tojiquiaajaaniuhuj. Majaari sesa cua miiniu quiqianu Pueyaso Secojoua tiajuhuaj. Majaari Roma tiacajinia quijia pa jiyaniijia tojiyashijia cua quiniu.

<sup>9</sup> Camarnu Festoori jaarajaaja Judiocuaca panishano miiquiaari, cuno pueya paniniuria nojuaja. Naaratej, Pablo nequesotaquiaariiri:

—¿Quiaate Jerusalén tiacajinia quianu paniya, tii cua nequesoreenura quiajaniya?

<sup>10</sup> Pabloori na riucuaquiaari:

—¿Majateeri Roma tiacajiniji pa jiyaniijiajanaa quia jiyatecanu niya camarnura quia quiniuriacuaja? ¿Casaara niyaja quia nequesoreyaquiya janiyarini? Roma tiacajinia quijia pa jiyaniijiacuajaari niya camarnura quia jiyatecanu. Quiaacuajaari niishiyajuhuj, majaari sesa cua miiniu quiqianu Judiocuaca. <sup>11</sup> Janiya jaara sesa miirii seetanujuanaani, cuaara cua motuuraqui. Cucuara cuno pojori saquiriojotasano jaara coriaa quiri, majaari quenaaja tamonu pueyano naata niqutionu janiya cua mosaanura. ¿Janiyatucua casaara mosaare najuhuanani? Naaratej, janiyari quia sequeyani camarnunaa: jiyaniijia Césarjanaa cuaara cua nequesoreeraqui.

<sup>12</sup> Camarnu Festo pocoojonu nuhuaji na nacasunaata, Pablo sequequiaari-iri:

—Quiaacuajaari cua sequeree cua jiyaronura quiajaniya pa jiyaniijia Césarqua, nojuajanaa nequesoreenura quiajaniya. Janiyari nocua quia jiyaronutaniya cua soldadohuatani.

### *Jiyaniijia Herodes Agripa niquiara Pablo pohuatasacari Jesujiniji*

<sup>13</sup> Naa Pablo sequesaanu nuhuajitij, pasaja camueenujuquiaariiri. Jiyacari jiyaniijia Agripaari Cesareya tiacajinia tiuquiquiaari Festoocua, na saruhuatanura nojuaja. Agripaari tiuquiquiaari na rimiatu Bereniceta.

<sup>14</sup> Nojori camueenujusacari camarnu Festo tiajinia, Festoori socua jiyaniijia Agripa pohuataquiaari Pablojiniji. Na sequequiaariiri:

—Tamonu pueyanoori niya quiya, Félix tiujiasano nujuatesano.

<sup>15</sup> Jerusalén tiacajinia cua quishacari, Judiocuacaacuara secojonaa jiyaniijianucuaari nocuara cua saquiriojotacanu, Judiocuaca camarucuata. Nojoriiri cua sequetucanu Pablo cua motenura. <sup>16</sup> Janiyari saaja nojori riucuanuni: “Roma tiacajiniji jiyaniijiaari maja ritia na monu pueyano.

Nocuara saquiriojotanaa cuaara niijoma niya nocuara saquiriojotanuunurajaatijia. Monu panishano cuaara rihuaneeera

tamajaaja quenaaja nocuaji, jaara seetanujuanaa quiyaquiri nocuara saquiriojotasano”.<sup>17</sup> Naacuajitij, Jerusalén tiacajinijinio pueya nocuara saquiriojotanuuriquiano jaara cucua tiuquiijiocanu, majaari socua cua tarishiniu quiquianu. Janiyari tariquicuaji nequesoreeja cajitujinia cajiquianuni, pueya camarnu cua quishacari. Janiyari jiyacari cua soldadohua sequereeni nojori jaatucunura cucua cuno pueyano.<sup>18</sup> Cuno pojori Pablocuara saquiriojotanuucanuni, nojoriiri maja quenaaja na saquiriojotanuunu quiriucuaa juhua cua niishiriojosano.<sup>19</sup> Saaja tamaatia nocuara cua saquiriojotanuureeri. Pablonaari nojori supuetanaa Pueyasojiniji rootasano tamacaquiaa saaja. Cua sequetureejaariuhuj, Jesu jiyanishano pueyanonaari mosaquiaari. Pablonaari saaja pueya niishitiojiyacujua, cuno Jesu jiyanishanonaari samiitiaquiaariuhua. Saminionaari quiari quiyajaa.<sup>20</sup> Naa cua tojishacari nocuara pueya saquiriojotasantej, majaari cua niishiniu quiquianu taa cua miiniutianiyani. Janiyari cunora Pablo nequesotarucuaani: “¿Quiaate Jerusalén tiacajinia quianu paniya, tii cua nequesoreenura socua quiajaniya?”<sup>21</sup> Nojuajaari saaja cua sequecanu: “Jiyaniijia César Augustojuanaa cuaara cua nequesoreera juhuari”. Janiyari cunora niyaja nujuatesano na jiitiaani, janiya cuaara na jiyarore jiyaniijia César Augustoocuaajaatijia.

<sup>22</sup> Jiyaniijia Agripaari camarnu Festo sequequiaari:

—Janiyari cuno pueyano tojiniu paniyajaacuhuj.

Festoori na riucuaquiaari:

—Quiaacuajaari tariqui na tojiniutianiya.

<sup>23</sup> Tariqui, jiyaniijia Herodes Agripaari niquiaariuhua Bereniceta. Nojoriiri tiuquitiaquiaari nequesoreeja sohuacajinia, shanohua jacaria na rucuanenuta, shanohua na toqueya maniniuquiyatajuhuj. Puereeta niqishano. Nojori tiuquitiasacari, nojori cojiquiaariiri soldadohua camarucua, mariyata tama cuno tiacajinijinio camarucuaajaajanio. Camarnu Festoori jiyacari na soldadohua seerataquiaari Pablo na riniuria, nojori tacoji na nujuatesocoriquiano.<sup>24</sup> Pablo tiuquishacari, Festoori sequequiaari:

—Jiyaniijia Agripanaa, puetunu niya canaata rerejono pueyajanaanaa, cua tojitiare. Cuno pueyano niaa na niqiyani, queraatia Judiocuacaari nocuara cua saquiriojotanuquiaa, Jerusalén tiacajinia cua quishacari, niya Cesareya tiacajiniajuhuj. Nojoriiri pueyaracaanu cua taajetequiaa. Cua sequetuquiaari: “Cuno pueyano cuaara mosaaria camarnunaa”.

<sup>25</sup> Janiyacuajaari tari niishiyani, nio pueyanoori maja sesa na miiniu quiquianu. Naacuajitij, janiyari niishiriojiyani, ¿pueyanotucua casaara najuhuana mosaareni? Tama nojuajaari cua sequerucuaani, cua jiyaronura nojuaja pa jiyaniijia César Augustoocua, pa Jiyaniijiajanaa nequesoreenura nojuaja. Janiyari cunora na jiyaronutaniyani.<sup>26</sup> Saniniuujia majaari cua niishiniu taa cua pohuatanutaniya cua jiyaniijia cua naajiojiniani. Cunora, nio pueyano nitirii niya nia nequesoreesocoriquianonijia, pueyanaa. Janiyari quia panitiaa cutara nojuajanaa quia nequesoreenurani, jiyaniijia Agripanaa. Quia nequesoreere, cua naajionura pa jiyaniijia Augustoocuara casaara nio pueyano cua jiyarore nocuani.<sup>27</sup> Majaari cua naata naajaa jiyaronu quiasano pueyano, maninia nequesoreyaquishoojua.

## 26

### *Pablo riuhanesacari jiyaniijia Agripa*

<sup>1</sup> Jiyacaritij, Jiyaniijia Agripaari Pablo sequequiaari:

—Quiocuaji quia riuhanereja, jaara seetanujuanaa quiyaquiri quiocuara pueya saquiriojotasano.

Pabloori na juaashiquia sanaquiaari. Naa coteequiaari pocuanuuri:

<sup>2</sup>—Timiyaniija jiyaniija Agripanaa, quia sequesacari cua pocuanura quia niquiara, tama cua tacunura cucuajijiaaja, Judiocuaca saquiriojotasanojiniji cucuara. <sup>3</sup> Quiaari puetunu cuarta Judiocuaca miiijosanojuanaa niishijajuhuj, puetunu canaa nacojotasanojuanaano. Janiyari cunora quia sequeyani, nareja cua tojiri cua pohuatasacari quiajaniya.

*Pablo pohuatasacari taa na quiquiaari Jesuucua na tiuyaquishacarijiani*

<sup>4</sup> Puetunu Judiocuacajanaari niishiyajuhuj taa quijia cua quiquiaari cua naatujuajiniji nojoritia cua quishacari cua jiyajiniani, Jerusalén tiacajiniano. <sup>5</sup> Cuno Judiocuaca quia nequesotasureraaj. Nojori cuara quia pohuataara jaara paniri pohuatanu. Cua mashajajiniji, janiyari seetanujuanaa Fariseo quijiani. Fariseocuacaari puetunu canaa supuetanaa rootasano Pueyasojinijijianaa tojtiaja cutara, socua tamasaca cuarta Judiocuacajiniji. <sup>6</sup> Nojorijiaari cucuara saquiriojotacanu cua tiuushacari Pueyasooocua, taa na samiitianijionutaniuhua macunucuanu. Pueyasoori nojori samiitianijionutaniuhua taa na sequequiaari tariucuaaanu canaa supuetanaacuajani. <sup>7</sup> Quiarrijiani, canaa supuetana Israel doce niquiohuacuajinio caneno pueyari naa seetanujuanaa Pueyaso sequesano niquinuria sashiyajaa. Naaratej, nojoriiri pueyaracaanu Pueyaso secojonuuquiaa, juuca, niucuanio, Pueyaso na tojtiasacari. Naa cua sashishacari Pueyaso sequesanojuhuj Jiyaniija Agripanaa, nio cuarta Judiocuacaari quiarijia cucuara saquiriojotanuquiaa. <sup>8</sup> ¿Niaateeri jiyaniya Pueyasoori maja na naata macunucua samiitianijionuhua?

*Taa Pablo miitiaquiaari Jesuucua tiuuniaa tarijiani*

<sup>9</sup> Janiyari tarijia sequequiaari tamajaajani sesa cua niishiriojosacari Jesujiniji: “Nazaret tiacajinijinio pueyanooocua tiuuniaa pueya paracaari-iriaj”. <sup>10</sup> Janiyari seetanujuanaa taraatia nojori miitiaquiaari Jerusalén tiacajiniani. Pueyacuara secojonaa jiyaniijianucuaari cua jiyatequiaari nojori cua miitianura. Naacuajitij, janiyari queraatia Jesuucua tiuuniaa riuniujuquiaari nujuatejojuajiniani. Nojori jaara puecoosaaquiaarijuhuj, janiyari jaarajaaja sequequiaarini: “Maniniacuaja, cuara puecoosaria”. <sup>11</sup> Janiyari sequeyarucua naa miitiaquiaari Jesuucua tiuuniaa pueyani, nojori cua pishojonura Jesuucua nojori tiuuniu.

Janiyari naa miiquiaari nojorini puetunu cuarta Judiocuaca rerejojua tiacajinaqueyajanaa canaa jiyajinia. Janiyari jiyanoehua nojori juaajia quiquiaarini. Majaari quenaaja nojori cua niquiniu paniniu quijia. Naa cua miitiasocoriquiano nojoritij, janiyari nojori pajequiaari tucuaaanu tamonu jiyaca tiacajiniani.

*Pablo pohuatasacari taa Jesuucua tiuujiaara na quiquiaarini*

<sup>12</sup> Naacuajitij, janiyari juucua quiariquiaa Damasco tiacajiniani, pueyacuara secojonaa jiyaniijianucua jiyarosano. Janiyari tiriara quiariquiaani cua pajenura socua Jesuucua tiuuniaa pueya cua miitiasocoriquiano. <sup>13</sup> Nucuaco cua quiasacari jiyaniija Agripanaa, janiyari jiyocuacaanuji nunusaaquiaarini, cuata quiojonaajuhuj. Cuno shacantuucuaari socua jiyanoehua shacantuuca quiquiaari pananujiniji. Panacariiri jiyacari quiriquiaa. <sup>14</sup> Cuno shacantuuca jaara canaa nunuquiaari, canaari juhua quejoosaaquiaarini. Janiyari jiyacari tojiquiaari rupaani. Hebreo rupaajinia cua sequeriquiaari: “¡Saulo,

Saulonaa! ¿Casaara puera quia miitiaa janiyani? Naa quia miishacaritij, quiaari tama quia cuaqueya miitiaajaacujua. Juhua juaajia pueyano, na juaashacari saaja mocoshoco patiyashiyari”. <sup>15</sup> Janiyari na sequereeni: “¿Cantequia Jiyaniijianaa?” Cua riucuaereeri: “Janiyacuaajaari Jesuni, quiaa na miitiaquiaani. <sup>16</sup> Quia sanerohua. Janiyacuajaari quiocua muetareeni puetunu cua panishanojuanaa miijiara cua jiyatenura quiajaniya, quiarijia janiyajiniji quia niquishano quia pohuatanurajuhua. Naajuhua, na nuhuaji janiyani quiocua muetanutaniuhuaani janiyajiniji quia niquishanorano pohuatana quia quiniuria. <sup>17</sup> Cua jiyarosacari quiajaniya, janiyani quiarta Judiocuacaacuaji quia cojuanutaniyacuaajani, tamonu jiyacajinijinio taucuacaacuajinio, tiquiyocua quia rucuanajosacari janiyajiniji quia poojotasacari. <sup>18</sup> Nojoriicua quia jiyaroyanijia, janiyajiniji nojori quia pohuatanura, maja juhua nimishitiu nojori quiniuria pueyaracaanu. Quia pohuatasacari janiyajiniji nojori, nojori jiuujiaari juhua cuhuatasaanutaniya cucua nojori tiuushacari. Nojori jaara naa miiri, Sesaacari maja tari nojori jiyaniijia na quiniu quiniutianiya. Naa nojori tiuushacari cucuatej, Pueyasoori puetunu sesa nojori miishanojuanaa jiyanooniutianiya. Pueyasoori puetunu na saquiriojosano pueyatajanaa nojori rupuetootenutaniya, puetunu Pueyaso jiiitiasanojinijianaa nojori jiiitianurajuhua”.

*Pablo pohuatasano Jesu tojjiara na jatanujiniji*

<sup>19</sup> 'Naacuajitij jiyaniijia Agripanaa, janiya jaara naa tojiquiaari sequeshiyano jiyocuacaanujini, majaari cua tarijionu quiquiaarinio. <sup>20</sup> Janiyari jiyacari juhuacatecara Damasco tiacajinia Pueyaso rupaa Jesujiniji pohuatanu coteequiaarini, na nuhuaji Jerusalén tiacajinia, mariyata puetunu cuno Judea jiyajiniajanaano. Maja saaja cuarta Judiocuaca cua pohuatanu quiquiaari Jesujiniji, janiyani taucuaca pohuataquiaarijuhuaj. Nojori nacasuquiaarinijia cuara sesa nojori miishano carteera, Pueyasocua nojori tacatonuhuara nojori jiuujia. Janiyari nojori sequequiaarijuhuaj, cuara saaja maninia miijiaca quiiria, na niishishaanura Pueyasoori seetanujuanaa nojori jataniquianu. <sup>21</sup> Naa cua pohuatanuucuatej jiyaniijianaa, cuarta Judiocuacaari cua quiatucanu Pueyaso Secojonuuja tiajinia. Cua motunu paniquianuuri. <sup>22-23</sup> Naajaa, Pueyaso cumaquishacari janiya, majaari cua tarinitianu quiquiaa puetunu pueyajanaa cua pohuatanu Pueyasojiniji; poonijionuutesano pueya, tojishano pueyano. Majaari tama cua niishishanojuaaja cua pohuatanu quiquiaa. Janiyari pueya niishitiojoquiaani taa tariucuaaanu Pueyaso sequesano caminiujiuniaa naajionuutaquiaaricuaajani, naajuhua, taa Moisés naajiotasano quiya tariucuaaanu Pueyaso Rupaajiniacuajani. Nojori naajionuutasanoori seetanujuanaa. Naa sequeyari:

“Pueyaso Jiyarosocoriquianoori naquiya miishaanutaniya. Na cusonu nuhuaji, nojuajaari coteenu samiitariquianohua. Jaara samiitiarohua, nojuajiniji pohuatasanoori puetunu pueyapuejanaa cuhuatanutaniya. Naacuajitij, nojoriiri niishiniutianiya nojori jaara nocua tiuuri, nojoriiri samiitiaconutaniuhuaajuhua; Judiocuaca, taucuacanio”.

*Pablo tiuutiniu panishacari jiyaniijia Agripa Jesuucua juucua*

<sup>24</sup> Pablo jaara naa sequequiaari tama nocuaji na tacusacaritij, camarnu Festoori nacaquiaari:

—¿Taa quia miyani Pablonaa? ¡Quia mueyocuaquui seseree puera quia niishiniuucua!

<sup>25</sup> Pabloori na riucuaquiaari saaja:



—Maja cua paatenu, camarnu Festonaa. Cua sequesanoori seetanujuaanaa, maja cuaracashiniu. <sup>26</sup> Jiyaniijia Agripaari puetunu cua sequesanojiniji niishiyajuhuaaj. Cunora majaari cua puerenu na niquiara pocuanu. Nojuaja naasucuaari tarijia tosaaquiaaricuaaja Jesujiniji, Jesuucua tiuuniaa pueya miishanojinijijuhuaaj. Puetunu canaa miishanojuanaari maja jiya-sohuaaja na miishaanu quiquiaa. <sup>27</sup> Jiyaniijia Agripanaa, ¿quiaate tariucuaaanu Pueyaso sequesano caminiujiuniaa naajionuutasanoocua tiyajuhaaj? Quiaacuajaari nocua tiuya. ¿Naatejaaratej?

<sup>28</sup> Jiyaniijia Agripaari na sequequiaari:

—¿Quiaateeri ritia cua jiyatenu paniya Jesuucua tiuuniara?

<sup>29</sup> Pabloori na riucuaquiaari:

—Naajaa, ritia, na nuhuaaji soj, taa quia paniyacuajani. Pueyaso maara seetanujuanaa naara quia jiyatere taa quia sequeyacuajani; maja saaja quiajaniya, mariyata puetunu pueyajanaa niya cua tojitiaani, juhua janiya nia quiniuriajuhaaj. Maja naatej, taa cumayocuata moronucua cua nuju-atashuyanijia.

<sup>30</sup> Jiyacaritij, jiyaniijia Agripaari sanequee, camarnu Festojuhuaaj, Berenicienio, puetunu cuniqui nojoritia cajitiuniaa pueyano. <sup>31</sup> Nojoriiri cuniquiji tamaqui pacutaquiaari jiyareta nojori pocoojonura Pablojiniji. Tama nojoriiri sequetooquiaari:

—Cuno pueyanoqui seetanujuanaa maja sesa na miiniu quiqiuianu na mosaanura, maja quenaaja na nujuatesaanurajuhuaaj.

<sup>32</sup> Jiyaniijia Agripaari camarnu Festo sequequiaari:

—Paa maara cuno pueyano cartereni nojuaja jaara quia sequeyaquiqiuianu pa jiyaniijiaacua quia jiyaronura nojuaja.

## 27

*Roma tiacajiniara Pablo jiyarosaanujiniji pohuatasano. Nio naajiona Lucasri nata quiriquiaa na cojiriquiano*

<sup>1</sup> Camarucua jaara sequequiaari canaa buquejinia jiyarosaanutaniya Italia jiyajiniani, Pabloori jiyacari narta quioosano pueyata cojiritiasaaquiaari niqutionu soldadohua capitán. Cuno capitán sesaari quiquiaari Julio. Na soldadohua maanuuri sesojosaaquiaari “Augusto”. <sup>2</sup> Jiyacaritij, Adramitio tiacajiniji buqueeri quera ruparetariquiaa, Asia jiya tiacajinia shiiniuquitiariquiano. Canaari cuno buquejinia jaaretaquiaarini. Canaata quiriquiaajaariuhua Aristarco. Nojuajaari Macedonia jiyajinia Tesalónica tiacajinijinio pueyano quijia. <sup>3</sup> Canaa quianu nuhuaaji Cesareya tiaca tacatajajiniji, canaari tariqui tiuquishiiquiaari Sidón tiaca tacatajajiniani. Capitán Julioori jiyacari cuniqui maninia miiquiaari Pablo. Nojuajaari Pablo tarinitiaquiaari cuara tacaara na rupuenaa pueyacuua, nojori na saruhuatanura Sidón tiacajinia, naajuhuaaj, na rupuenaa niqutionura puetunu Pablo panishanojuanaanio. <sup>4</sup> Canaa jaara jaaretaquiaari Sidón tiacajinijini, canaari canaa muenecara niquimiaa Chipre jiya tucuaatiajani. Paratuuri buque nacaacoji piyarojoriquiaa saaja. <sup>5</sup> Canaari Sidón tiacajiniji niuutiaquiaari Cilicia jiyacuani, Panfilia jiyacuano. Canaari na shuriuquiumia jaaretamaani. Canaari Mira tiacajinia tiuutiaseeni, Licia jiyajinia.

<sup>6</sup> Capitánri cuniqui riuriataquiaari Alejandría tiacajinijinio buque. Italia jiyajinia quiariquiaari. Naaratej, canaa tacanitiaquiaari cuno buquejinaari, tii canaa quianura saniniuujia. <sup>7</sup> Canaari camueenujuquiaarini, puera jacaria canaa jaaretanuucua. Naa canaa tarishiniuucuatej, canaari socua



tiuquishiiquiaari Gnido tiaca taquijiriani. Paratuuri saa canaa patariquiaa-jaa. Naacuajitij, canaari Salmón jiya tucuaatiajanijojua shuriucuaratamaani. Canaari Creta jiya tucuaatiaja camarucutamaajaaniuhuj. <sup>8</sup> Naa puera canaa tarishiniuucua canaa jaaretasacari Creta jiya shuriuquiumiatej, canaari socua tiuquishiiquiaari pueya jiyaniquishano “Tacataja Maniniujiniani”. Cunoori Lasea tiaca shuriucua quiya.

<sup>9</sup> Canaari puera tarishiiquiaari tarini. Judiocuaca miaquenuyaquiniujuucaari tari shocoquiaari. Jiyacaritij, shoniniacu caminiajiniaari puereeta quijia tari buqueta jaaretanura. Pabloori juucua sequequiaari:

<sup>10</sup> —Camarucuaanaa, janiya niishiyani paari cocuaatia miiniutianiyani. Paa jaara socua jaaretaareni, pa buqueeri jiaquetanutaniya socua. Pa pasano casamiiri niitiiniutianiya. Paa naasucuaari cusonuunutanijajuhuj. ¿Casaatejaj pa toyani?

<sup>11</sup> Pablo jaara naa sequequiaaritij, majaari buque jiyatana capitán tojiniu quiquiaarinioj. Saaja buque camarujuanaa tojiquiaariiri, buque capitánnio. <sup>12</sup> Cuno tacatajajiniji canaa tii tiuutiariquiaani, majaari maninia quiquiaari shuniya canaa tajitiniuria tii. Nocuaji, puetunu pueyajanaari sequetuquiaari:

—¡Niiquiji pa quiaarej! Fenice tiacajinia pa quishii shuniyacuaaji.

Cuno Fenice tiaca tacatajaari pananu muetasamaji quiquiaari, cuno Creta jiya tucuaatiajaacuaja.

*Shoniniacu caminiajinia paratu piyarojosacari jiyanojua nojori*

<sup>13</sup> Jiyacaritij, paratuuri jacaria piyarojonu coteequiaari pananu shuucuaaji, canaa muenecarajiniji. Naaratej, nojoriiri sequetuquiaari:

—¡Pa naatacuajaqui niiquiji quianu!

Canaari cuniquiji ruparetaquiaarini. Creta jiya tucuaatiaja shuriuquiumia jaaretaareeri. <sup>14</sup> Na jaaretasacari shiitianiyojua, paratuuri canashiyaquiji jiyanojua piyarojoquiaari buque. Cuno paratu sesaari quijia “Noreste”. <sup>15</sup> Paratuuri buque capotariquiaa na shuucujiria saaja. Naaratej, majaari canaa naata jaaretanu quiriquiaa paratu piyarojosacoji. Paratuuri saa canaa patariquiaajaa. Nocuaji, canaari buque tarinitaquiaarini paratu cuaara na capotaara tamajaaja. <sup>16</sup> Paratuuri canaa capotaquiaari tamonu jiya tucuaatiaja tamajiria. Cuno jiya tucuaatiaja sesaari quiquiaari Cauda. Majaari puera paratu piyarojonu quiriquiaa tii. Canaa rishano boteniyojuaari buque pajamaji jaasutariquiaa. Canaari jiyanojua poonijioquiaari cuniquini, canaa tacaniniuhuara buque cacojiria cuno boteniyojua. <sup>17</sup> Bote tacanishaanu nuhuaji, canaari buque cuaqueya morojoquiaarini na cumaquiniuria na jiaqueyaquiniuucuaaji. Pueyari na puerenuta sequetuquiaari:

—¡Paratuuri pa capotanutaniya jaaquajiniara! ¡Paari tii riitianutaniyani!

Cuno canaa pueresano jaaquiani, na sesa quiquiaari Sirte. Nocuaji, nojoriiri buque toqueya roshinitiaquiaari. Paratuuri saaja capotaquiaari buque.

<sup>18</sup> Jaara juhuaquequiaari, paratuuri saaja jiyanojua piyarojoriquiaajaa. Naaratej, nojoriiri buque pasano casami quejoonu coteequiaari moojinia. <sup>19</sup> Canaa camueenujusacari jiuujianaraca juuca naquiya canaa miishacari, canaari buque casamijianaa quejooquiaari socuani, buque namuenura quenaaja. <sup>20</sup> Tari canaa shocojoquiaariiri queraatia juuca. Majaari quenaaja canaa niquiniu quiquiaari pananu, ryanio. Paratu piyarojosacari canaacua, mohuacaari socua jiyanojua cajiniuucuaquiaari canaacua. Nocuaji, canaari niishiriojoriquiaani canaari quiarjia cusonuunutanianiyani.

<sup>21</sup> Majaari tojetaarucujanaa quenaaja canaa miaquenu quiquiaari pueyaracaanu. Pabloori jiyacari nujuaquiaari canaata quiniaa tajiniji. Naa nojori sequequiaariiri:

—Camarucuaanaa, niaa jaara tojiqianu quenaaja cua sequesano, maja pa ruparetanura Creta jiya tucuaatiajajiniji, paatuma naa miya naquiyani. <sup>22</sup> Naajaa, nioojia nia cumaquiri. Maja quenaaja niquiriyatu pajaniyajinijinio cusonu quiniutianiya. Pa buque cutaraari juhua rapitiasaanutaniya puetunujuanaa. <sup>23</sup> Janiyari quiarijia cua maquenujinia cua Jiyaniijia Pueyaso seru niquirii cua shuriucua nujuaanoni. Janiyari cuno Pueyaso tojijiani. Janiyacuajaari na pueyanoni. <sup>24</sup> Pueyaso seruuri cua sequeree: “Majaari puerenu Pablonaa. Quiaacuajaari jiyaniijiajanaa Augustoocua tiuquiniutianiya Roma tiacajinia. Quiaari na tacoji nujuanutaniya quia pocuanura. Naajuhuaaj, Pueyasoori quia secojosano tojiriucuaa. Naaratej, puetunu quiata quiniaajanaari quiata rishiniutianiyajuhuaaj”.

<sup>25</sup> 'Naacuajitij camarucuaanaa, nioojia nia cumaquiri. Janiyacuajaari seetanujuanaa niishiyani, naa quiniutianiyari taa Pueyaso seru sequeree janiyacujani. <sup>26</sup> Naajaa, paari tamonu jiya tucuaatiajaacua juhua niojosaanutaniyani.

Pabloori naa canaa cumanijiaquiaari.

<sup>27</sup> Pueyaracaanu canaa jaaretasacari shoniniacu caminiajinia, caapiqui semaanaari tari canaa shocoquiaari. Tamonu niucua canaa jaaretasacari, canaari Adriaajinia quiriquiaa tarini. Pueyari cuno shoniniacu caminia jiuujiajinia sesojoquiaari Adria. Paratuuri canaa niyacuneetetariquiaa jiyareta. Jaara shiyaqueya quiriquiaa cuno niucua, buque jiniacuma poonijionaari niishiquiaari canaari tari jiyacua catecanoyani. <sup>28</sup> Buque jiniacuma poonijionaari jiya shanacuquiaari, na niishiniuria queroniti quiriquiaajaa. Na shanacutusacari, saaja treinta y seis metro queroni quiriquiaari. Jaara socua na tacoji shanacutuquiaariuhua, saaja veintiseete metro queroni quiriquiaari. <sup>29</sup> Nojoriiri puerequiaari buque naasucuaari shoniniacu caminia casaqueyaji pojotujua saicua cutetanutaniya. Nocuaji, buque pajamaji sohuaneyocuata morojotasano cuatro niajaaca casaa quejootuquiaariiri, buque nujuatanura pootia. Nojoriiri cuniquijia na puerenuta sashiquiaari cuara juhuaqueera. <sup>30</sup> Jiyacaritij, buquejinia poonijionaa pueyari juucua cuno niucujaa jiyasohuaja mashiyocuatunu paniriquiaa buquejiniji. Naaratej, nojoriiri buque nacaacoji sapojonu tinitiariquiaa niajaaca casaa moojinia. Jiyasohuaja roshinitiuriquiaa jiyocuaacaanu tacanishano boteeri, tii na mashiyocuatunura. <sup>31</sup> Pabloori jiyacari na jiyatana capitán toquiaari, na soldadohuanio. Naa nojori sequequiaariiri:

—Cuno pojori jaara niya juhuaqueyaquimia pata, niaari cusonuriquiano.

<sup>32</sup> Soldadohuari ritia jiyocuaacaanu tunusano bote neyocua jiyatajotaquiaari. Moojinia na tinitiuiri. Paratuuri na piyarojoquiaari tamoco nojorijiniji.

<sup>33</sup> Juhuaquenu panishacari, Pabloori puetunu buquejinia quiniaajanaa sequequiaari cuara quenaaja miaquenuura. Naa nojori sequequiaariiri:

—Tari nia shocojiyari catorce juuca pueyaracaanu nia sutesacari. Majaari nia miaquenu quiquiaajuhuaaj. <sup>34</sup> Quiarijia nia miaquerecuara, nia cuaqueya nia cumaquitajara quenaaja. Majaari quenaaja niquiriyatu nia janiyajinijinio cusonu quiniutianiya quiarijia.

<sup>35</sup> Naa na sequenu nuhuajitij, Pabloori pan riquiaari. Na miaqueyaquishacarijia, coteenu Pueyaso secojoree puetunu nata quiniaa niquiara-janaari. Na nuhuaji miaquerohuari. <sup>36</sup> Tamasaca jaara naa niquiquiaari Pablotej, puetunu nojorijianaari noojia cajitiquiaari. Pan satureejaariuhuj. <sup>37</sup> Cuno buquejinia, puetunu canaajanaari quiquiaarini dosciento setenta y seis pueya. <sup>38</sup> Puetunu pueyajanaa jaara tooquioquiaari, na nuhuaji trigo quejootuquiaari moojiniaari, buque namuenura quenaaja.

### *Buque coquesacari caminiajinia*

<sup>39</sup> Jaara juhuaquequiaari, buquejinia poonijionaa pueyari maja na niishiniu quiquiaari teyano jiya tucuaatiajatejaara cunoni, nojori na niquiriquiaani. Nojoriiri cuno jiya tucuaatiajaacua niquiquiaari puereet-uca surocohua. Jaaquiaari puetunu na shocuajanaa quiriquiaa. Naacuajitij, nojoriiri sequetuquiaari:

—Buque pa saniri shiitianiniu cuno surocohuama.

<sup>40</sup> Buquejinia poonijionaa pueyari niajaaca sohuaneyocua jiyatajo-taquiaari. Cuno niajaacaari caminia jiuujiajinia jateequiaari cuniquijia. Nojoriiri buque niqiniijiotetajaa roshinitiaquiaarijuhuaj, buque tacutajara. Buque nacaacuaji teeja toque tacanitiatureejaariuhuj. Buqueeri canujutaaree jaaquiajiniara, paratu piyarojosano. <sup>41</sup> Buqueeri saacariji jaaquiajinia riitaseequiaari, caminia cajiniuucasacari mohuaca paatishano jaaquiajinia. Buque nacaari jiyanohua tiuquishii cumaatia jaaquiajinia. Majaari quenaaja na naata pooniu quiriquiaa na matasaquiji. Na pajaari maa rapuequiaarijia moo cajiniuucasacari jiyanohua nocua. <sup>42</sup> Soldadohuari nojori jiyatasano quioosano pueya puecoonu paniquiaari cuniquijia, nojori jiyanishacari cuaconutaniya naasucua, mashiyocuatumaari. <sup>43</sup> Capitán cutaraari Pablo tiuquitiniu paniquiaari jiyaniijia Augustoocua. Naaratej, na soldadohua sequequiaariiri:

—¡Maja quioosano pueya puecootunu!

Cuno capitánri puetunu pueyajanaa sequequiaari:

—Cante cuacojua cutarani, nojori cuaara cuacoora coteenu, jaaquiajinia rupaatiushiicuaari. <sup>44</sup> Cuaashijianucua saniniuujia cuaara buque jini-acumaji suruhuatuneeacaacua jacamatuura na cuatajara. Tamasaca cuaara buque neecaacua jacamatuurajuhuj.

Naa miitiquiaariiri. Puetunu pueyajanaari jaaquiajinia rupaatiushi-iquiaari.

## 28

### *Pablo quishacari Malta jiya tucuaatiajajinia*

<sup>1</sup> Puereeta canaa cuaconu nuhuaji shoniacu caminiajinia, canaari namitia puetunujuanaa maninia tacataseequiaari cuno jiya tucuaatiajaacuani. Canaari jiyacari shusha niishiquiaarini, cuno jiya tucuaatiaja sesaari quiquiaari Malta. <sup>2</sup> Cuno jiya tucuaatiajaacua quijia taucuacaari maninia canaacua jyanooquiaari. Shiniquiaari quiriquiaa. Maruuri niriqiaa-juhuaj. Naa canaa shiniquiosacaritij, taucuacaari canaara noshitiquiaari puereetuca mani. Na nuhuaji canaa sequetureeri:

—Miji. Nia jitiushii.

<sup>3</sup> Pabloori naanacucua reratejoriquiaajuhuj. Manijinia na quejooriquiaari. Jiyacaritij, soconuquiiri maniicuaaji mashiriquiaa juucua. Pablo juaashiquia saariiri. <sup>4</sup> Cuno jiya tucuaatiajaacua quijia pueyari soconu niquiquiaari Pablo juaashiquiaacuaji sohuataano. Jaara naa niqitiquiaaritij, tama nojorijaarijia sequetooquiaari:

—¡Nio pueyano naasucuaari pueyano mojua! Cocuaatia miirii juucua shoniniacu caminiajania na cuasacari buquejinijiiri. Pueyasoori quiarijia saniniuujia cunora soconu na sajitirii na cusonura.

<sup>5</sup> Pabloori saaja manijinia majiriataree soconu. Majaari quenaaja na sajiyashi noonu quirii. <sup>6</sup> Puetunu pueyajanaari na sashiriquiaa, taacari na poreenutaniyani. Na sashitiuriquiaajaariuhuj na jiyantiushacari canashiyaquiji cusonutaniya naasucua. Naa pueyaracaanu na sashitiushacari juucuatej, nojoriiri socua tamaatia niishiriojonuuquiaari. Nojoriiri Pablojiniji sequetooquiaari:

—¡Cuno pueyano naasucuaari pueyasojuhuanajaj!

<sup>7</sup> Cuniqúi canaa quishaquini, canaari tamonu pueyano cuhuariquia shurucua quiriqúiaani. Na camaruuri cuno Malta jiya tucuaatiaja camarnu quiquiaari. Na sesaari Publio quijia, maninia pueyano. Nojuajaari canaa masuuquiaari na tiacora. Canaa mianuutequiaari maninia tiiri. Canaari jiuujianaraca juuca na tiajinia camueequiaarini. <sup>8</sup> Cuno camarnu queeri jiyacari cusosu matariquiaa. Jiyanohua naseecaari quiriqúiaa. Coriyacau rurequeriquiaajaariuhuj, na jiniacuma noonunio. Pabloori nocua tiuquiquiaari na matasaqui. Pueyaso secojoree nocuaraari. Na secojosacari, nocua niaquiaari na juaashiquiaari. Pueyanoori naatarohua. <sup>9</sup> Cuno jiya tucuaatiajaacua cusosuhua jaara niishiquiaari naa Pablo naatanishanocuaa cuno pueyanotej, nojoriiri nijioquiaarijiuhuj. Pabloori puetunujuanaa na naatanijioquiaari. <sup>10</sup> Naa Pablo miiniuucuatej, cuno pueyari na jiiti-asano casamijiniji canaa niqúitiojoquiaari nareja. Na nuhuaji, canaa jaara quiaquiaari cuniquiji tamonu buquejiniani, nojoriiri canaa jiyatajara canaa panishano niqúitiojotujuquiaari narejajuhuj.

### *Pablo tiuquishacari Roma tiacajinia*

<sup>11</sup> Canaa sashishacari shuniya cuaara tajiiria, jiuujianaraca racaari canaa shocojoquiaari Malta jiya tucuaatiajaacua canaa quishacari. Alejandría tiacajinijinio buqueeri tii nujuatariquiaajuhuj. Shuniyacuaaji tiutiaquiaari tiiquiiri. Cuno buque nacatuuri juhua nojori pueyasohua Cástor nacara quejasano quiquiaari, juhua Pólux nacanio. Canaari cuno buquejinia quiojoquiaari cuniquijini. <sup>12</sup> Canaari Siracusa tiaca tacatajajiniji tiutiaseequiaarini. Canaari jiuujianaraca juuca camueenujusee tiini. Siracusa tiacaari Sicilia jiya tucuaatiajaacua. <sup>13</sup> Cuniquiji canaa quiasacari, canaari cuno jiya tucuaatiaja shuriucuaataareni. Canaari Regio tiacajinia tiuquishiini. Tariqui, paratuuri maninia piyarojoriquiaa buque nijiniji. Canaari cunora tama tariqui tiuquishii Puteoli tiacajiniani. Canaari quiniqui tacatasee puetunujuanaani. <sup>14</sup> Puteoli tiacajinia Jesuucua tiuuniaa pueyari canaa masuuquiaari na tiajiniara. Canaa sequetuquiaariiri:

—¡Maja canaa shoconu pueyanaa! Canaa tiajinia nia camueenujumajaara.

Naaratej, canaari siete juuca nojoritia camueenujuquiaarini. Na nuhuaji, canaari cuniquiji Roma tiacajiniara neteja nucuaco quiaquiaarini. <sup>15</sup> Roma tiacajinijinio Jesuucua tiuuniaa pueya jaara niishiquiaari canaa tari nucumaji niyani, nojoriiri nucuacoci canaa naacunuucua nijioquiaari. Coteenu nijionaari canaa naacuquiaari Foro de Apio tiacajinia. Tamasacaari saniniuujia canaa naacuquiaari Tres Tabernas jyanishano tiacajinia. Pablo jaara narta Jesuucua tiuuniaa niqúiquiaari, noojia cumaquiquiaariiri. Naaratej, Pueyaso sequequiaariiri:

—¡Paacarasho cua Pueyasonaa!

<sup>16</sup> Canaa jaara tiuquiquiaari Roma tiacajiniani, Pablo jiyatana capitánri puetunu quioosano pueyajanaa niqúitioquiaari Roma tiacajinia quioosano

cojuanaa camarnu. Pabloori saniniuujia tarinitiasaaquiaari tamonu tiajinia na quiniuria tamajaaja, tamonu soldadota na cojuariquiano.

*Pablo pohuatasacari Jesujiniji Roma tiacajinia*

<sup>17</sup> Jiuujianaraca juuca na quishacari tari Roma tiacajinia, Pabloori puetunu tii quijiaca narta Judiocuaca camarucujanaa masuuquiaari, nata nojori rerejonura. Cuno pueya jaara rerejoquiaari, Pabloori nojori sequequiaari:

—Cua tapueyocucanaa, majaari cua miiniu quiquiaari sesa parta Judiocuacani. Majaari cua numueejushiniu quiquiaa pa supuetanaa niishitiojosanojuhuaj. Naajaa, pueyari cua quiatucanu Jerusalén tiacajinia. Cua niquitiotucanu Romano pueyari, cua morosaanura. <sup>18</sup> Nojori nequesoreenu nuhuaji janiya, cua cartetunu paniquianu juucuaari, nojori niishishacari maja sesa cua miiniu quiquiaari cua mosaanura. <sup>19</sup> Romano camarucua jaara cua cartenu paniquianu, parta Judiocuacaari saaja juaaquioree. Janiyari jiyamitia sequecanuni, cuara cua jiyarotuura jiyaniijiajanaacua niya Roma tiacajiniani, Césarjanaa nequesoreenura janiya. Naajaa, majaari cua saquiriojotanu quiniutianiya saniniuujia nojoriicuaara, cuarta Judiocuaca nojori quiniuucua. <sup>20</sup> Janiyari cunora nia niquiniu paniriquiaani, cua pohuatanura niajaniya taa puetunujuanaa parta Israel pueya niishiyacujani, niajanijajuhuj; macunucuaari samiitianijiosaanutaniuhua. Janiyari cunora cumayocuata moronucua niya quiyani.

<sup>21</sup> Judiocuaca camarucuaari Pablo riucuaquiaari:

—Maja quenaaja canaa masetanu quiquianu Judea jiyajiniji naajionee, canaa pohuatasaaanura quiajanijajiniji. Cuniqiijinio parta Judiocuacaari niya tiuquiijiocanujuhuaj. Naajaa, nojoriiri maja quenaaja sesa na pohuatanuunu quiquianu canaa quiajanijajiniji. <sup>22</sup> Canaari saaja niishiyani, puetunu tiquiyocujanaa sesacasaquiaaquinaari Jesujiniji pohuatasano. Quiaa mariqui cunojiniji canaa pohuatare, canaa niishiniuria socua.

<sup>23</sup> Jiyacaritij, Judiocuacaari Pablo sequetuquiaari:

—Canaacua tamonu juuca quia tojiqiiquiani.

Na nuhuaji, nojoriiri na sequetusano juuca nijioquiaari. Pablo quijia tiajinia mishitiquiaariiri. Pabloori nojori niquiara pohuatanu coteequiaari tariquiiquaji. Naa niniyareejaari. Juucua nojori niishitiojoquiaariiri, Jesuuri seetanujuanaa Pueyaso Jiyarosano quiquiaari. Nojori sequequiaariijaariuhuj taa Pueyaso jiiitiaa na jiyanooshano pueyani. Naajuhuj, tariucuacaanu Moisés naajiotasano Jesujiniji niishitiojoquiaariiri, Pueyaso sequesano caminiujiuniaa naajionuutasanonio. <sup>24</sup> Noojiaqueya nojorijinijiniori Pablo sequesano tojiquiaari cutara. Tamasacaari saaja na cuaracashitiquiaari saniniuujia. <sup>25</sup> Nojorijinijinio jaara Pablo niishitiojosano tojiquiaari cutara, tamasaari nojoritia juayonuutanu coteequiaari. Naa na juayonuutasacaritij, tohuareetaquiaariiri na quiojonuhua. Pabloori jiyacari nojori sequequiaari:

—Pueyaso Sohuanuquiiri seetanujuanaa tariucuacaanu Pueyaso sequenu panishano caminiujiunia Isaiás pohuataniquiaari parta Israel pueya niquiara, jaara na sequequiaari:

<sup>26</sup> “Quia quiaare cuno pueyacia. Quiocua nojori sequesee: ‘Niaari cua rupaa tojiniutianiya. Majaari nia niishiniu quiniutianiya casaa nia tojiyani. Niaari cua cumaacata cua miishano niquiniutianijajuhuj. Majaari quenaaja nia niishiniu quiniutianiya’. <sup>27</sup> Cuno pueyari noojia cumantaree maja na tojitianura cua rupaa. Naaratej, saaja sesa

tojitiaquiaari. Nojori namijiaari mishiquiojosanojuhuj, na niquiti-aaquiniuucujaji, maja na numaata na tojtianura, noojiata na niishi-tiuyaquiniurianio. Naa jiyatecanu nojorinjia, maja na niishitiuniuria janiya, mariqui cucua tacateturohuari, nojori cua naarajonura”.

<sup>28</sup> Pueyanaa, nia niishiri. Niaa jaara ruuretare cua pohuatasano Jesujiniji, taucuacaari saniniuujia pohuatasanutaniyacujua, taa Pueyaso jiyanooni paniya pueyani, maninia na jitianura nojori. Taucuacaari na tojtianutaniya cutara.

<sup>29</sup> Pablo jaara naa sequequiaari nojoritij, Judiocuacaari quiojijarohua. Tama nojorijiaarjia juayonuutaarohua na quiojosacariuhua.

<sup>30</sup> Caapiqui marijiaari Pablo shocojoquiaari rupaquijia na masesano tiajinia moronucua na quishacari Roma tiacajinia. Puetunu pueyajanaa jaara nocua niquiaari na niquiniuria, nojuajaari maninia na masequiaari na quijia tiajinia. <sup>31</sup> Majaari jiyasohujaja na pohuatanu quijia taa Pueyaso jitianaa na jiyanooshano pueyani. Jiyaniijia Jesujiniji niishitiojuajaariuhuj. Majaari na sanaajasaanu quijia.



## PABLO NAAJIONEE ROMA TIACAJINIA QUINIAA PUEYASO PUEYACUARA

### *Pablo saruhuatasacari Pueyaso pueya*

<sup>1</sup> Janiyari Pabloni, Jesucristo seru. Nojuajaari cua saquiriojoquiaari saa neraja cua poonijionura. Nojuajaari cua jiyatequiaari na jiyaramiquishano cua quiniuria, seetanu rupaaajanaa cua pohuatanura pueya niquiara, Pueyaso pueyara nojori jatanishaanura. Janiyari cunora nio naajioteya niaacuarani.

<sup>2</sup> Pueyasocuaajaari tariucuacaanu na sequenu panishano caminiujiunaa pueya niishitiquiaari, nojori naajiotanura Pueyaso Rupaa, pa niishiniuria taa Neyanu na miiniutianiya pocuarani. <sup>3</sup> Pueyano na quiniuria mijiria, Neyanu Jesucristoori rasaaquiaari. Na supuetanaari quiquiaari Israel pueya jiyaniijia David. <sup>4</sup> Jesu sohuanuuri saniniuujia pueyaracaanu Pueyaso Niyanujuhanajaj. Paa cutaraari quiari naataja niishitishaaquiaarini, nojuajaari seetanujuanaa Pueyaso Niyanu. Paari quiarijia na niishiya seetanujuanaa cutarani, Pueyaso Sohuanu samiitianiniuucua nojuaja macujiniji. Nojuajaari tari jiyatesaaquiaari Jiyaniijiajanaa na quiniuria, puetunu cumaacajanaa na jiiitianurajuhujaj. Nojuajaari pa Jiyaniijia Jesucristo.

<sup>5</sup> Nocua canaa tiuuniuucua, Pueyasoori canaa jiyatequiaari na jiyaramiquishano pueya canaa quiniuria, Neyanujiniji canaa pohuatanura. Canaa cumaquiriiri puetunu jiyacajinijinio pueyajanaa canaa tiutiniuria Neyanuucua, na tojitiajaca nojori quiniuria. <sup>6</sup> Niajaniyajuhujaj, Roma tiacajinia quiniaa Pueyaso pueyanaa, Pueyasoori nia saquiriojoquiaari Jesucristo pueya nia quiniuriajuhujaj. <sup>7</sup> Puetunu Pueyaso panishano pueyajanaa, canapue Pueyaso saquiriojoquiaari saa maniniaja nojori quiniuriacuajani, janiyari niaacuara naajioteyani. Pa Que Pueyaso, pa Jiyaniijia Jesucristojuhujaj, nojori cuara cumaquiiria niajaniya, maninia na tojijia nia quiniuria. Naajuhujaj, nojori cuara nioojiaca cajitiiria shuquiriaatia nia quiniuria pueyaracaanu.

### *Pablo naquerejosacari Roma tiacajiniara*

<sup>8</sup> Coteenu nia sequenu paniyanijia, janiyari nia timitiaquiaani, maninia niajaniyajiniji pueya pohuatanuucua puetunu jiyacajiniajanaa. Nojoriiri pohuataquiaa, niaanaari maninia tiuujia pa Jiyaniijia Jesucristoocua. Naa Jesucristo miiniuucua niajaniyatej, janiyari cua Pueyaso sequequiaani: “¡Paacarasho! Quiaari jiyanohua maninia”. <sup>9</sup> Janiyari pueyaracaanu cua Pueyasora poonijioquiaani puetunu cua cumaacatajanaa, Neyanujiniji cua pohuatanura. Pueyasocuaajaari niishiya, pueyaracaanu cua secojosacari nojuaja, janiyari niaacuara secojoquiaajuhujaj. <sup>10</sup> Naa cua secojosacari nojuajatej, janiyari na sequequiaani cuara cua tiuquitiiria niaacua, rupaquijia cua quiniuria niaata, nojuaja jaara naa paniri. <sup>11</sup> Janiyari nia niquiniuucua jiaatiaani, cua cumaquiniuria socua niajaniya na Sohuanu cumaacata, socua jiyanohua Pueyasooocua tiuujia nia quiniuria. <sup>12</sup> Majaari cua cumaquiniu paniniu saa niajaniyaja. Janiyari paniyani nia cumaquiniuria janiyajuhujaj. Naacuajitij, mariyata pa tiuushacari Jesucristoocua, paari mariyata cumaquitiojonutaniyani.

<sup>13</sup> Cuarta Pueyaso muerasunaa, janiyari nia sequenu paniyani nia niishiniuria, janiyari sequeyarucua niaacua naquerejoquiaa juucuan. Majaari juhuanujuaja cua naata quianu niaacua. Janiyari Jesucristojiniji pohuatanu

paniya tii Roma tiacajiniani, tee nia quiyacuajani, cuno taucuaca tiuuniuria Jesuucuajuhuaaj. Tamonu jiyacajinia taucuacaari tari Jesucristoocua tiuujia-aca quiyacuaa, cua pohuatanuucua Jesucristojiniji nojori niquiara. Janiyari naa miiniu paniya nia tajiniajuhuaj. <sup>14</sup> Cua Jiyaniijaari cua jiyatequiaari na rupaa pohuatanara. Janiyari cunora na rupaa pohuataquiaani. Majaari na tojiyashijia cua quiniu paniniu. Naaratej, janiya cuaara pohuataara na rupaa puereetuuca tiacajinia pueya niquiara, mariyata tiquiyocua quijia-aca pueya niquiarajuhuaaj. Janiya cuaara na rupaa pohuataara niishijia pueya, niishiyashijia pueyanio. <sup>15</sup> Janiyari cunora quianu paniya Roma tiacajiniani, cua pohuatanura Jesucristojiniji nijaniya.

*Pueyaso Rupaari cumaacaraca na jataniniuria pajaniya*

<sup>16</sup> Maja cutaraari cua caririquiniu Jesucristojiniji cua pohuatanura. Jesucristo rupaacuajaari Pueyaso cumaacaraca, pueya na jataniniuria Pueyaso muerasu nojori quiniuria, nocua nojori tiuushacari. Puetunu Jesuucua tiuunia pueyapuejanaari Pueyaso pueyara jatanishaanutaniya, taa Judiocuaca jatanishaaquiaa Pueyaso pueyaracuaani. <sup>17</sup> Jesucristo pohuatasanojiniji paari niishiyani, Pueyasoori pa jiyanoocuaa sesa pa miishanojiniji, saaja Jesucristoocua pa tiuushacari. Saaja nocua pa tiuuniuucua, paari Pueyaso pueyara jatanishaaquiaani. Cunora, naa naajiotasano quiyacuajaari tariucuaanu Pueyaso Rupaajinia:

“Pueyaso jiyanooshano pueyanoori pueyaracaanu shuquiriaatia quijia quiniutianiya, saaja Pueyasooocua na tiuushacari”.

*Pueyasora, puetunu pueyajanaari sesa miijiaca*

<sup>18</sup> Pueyasoori jiyocuacaanu ni na tojiyashijia pueya saniitioquiaa. Naa nojori na saniitiosacaritij, Pueyasoori nojori numootequiaa, nojuajaari puetunu na tojiyashijia pueyajanaa saniitionutaniya jiyanoohua na juaniutia. Naa saniitiosaanutaniyajaariuhuaaj, puetunu sesa miijiaca pueyajanaa. Naa sesa miijiaca pueya quishacaritij, nojoriiri Pueyasojiniji niishishano ruuretaquiaa saaja. <sup>19</sup> Nojori jaara Pueyaso niishiniuucua jiaatiariquia, nojori maara na niishirij. Pueyasocuaajaari tari nojori niishitiquiaari taamuecate nojuajani. Nojoricuaajaari tari maninia nojuajiniji niishiya. <sup>20</sup> Majaari pa naata Pueyaso niquiniu pa namijiata, pa niishiniuria taamuecate nojuajani. Naajaa, Pueyaso shipininiuucua jiya, maatia niishishiyacuajaari nojuajaari Pueyaso, pa niquishacari puetunu na shipinishanojuanaa. Na shipinishanojiniji niishishiyajaariuhuaaj, majaari na cumaaca puequenu quiniutianiya. Pueyaracaanu quiriquianoori. Naacua-jitij, Pueyaso saniitionu panishacari na tojiyashijia pueya, nojoriiri maja na naata sequenu quiniutianiya Pueyaso: “Maja canaa niishiniu quijia quiajanijajiniji”. <sup>21</sup> Nojoricuaajaari Pueyaso niishijia najuhuanaj. Na niishijia nojori quishacari, nojoriiri saaja na rerequeteja. Nojoriiri na tojitiaaquiiaajuhuaaj. Pueyaso miiniuucua maninia pueyaracaanu nojori, nojoriiri maja quenaaja na sequetunu quijia: “Paacarasho Pueyasona”. Tama nojoriijaarijia jiyanoohua cushitiquiaa sesa nojori niishiriojonuusacari najuhuanaj. Naa mosanucua nojori quishacaritij, nojori jiuujiaari juhua ninishiquiria quiquiaa. <sup>22</sup> Nojori jiyanihacari nojori cutaraari seetanujuanaa niishijia, naacua-jitij nojoriiri socua niishiyashijia-aca quiquiaa. <sup>23</sup> Nojoriiri Pueyaso shuquiritiaaquiiaa tama nojori shipinishano casaajaaja nojori shuquiritianura. Pa shipinina Pueyaso cutaraari jiyanoohua cumaacaraca, pueyaracaanu quijiajuhanajaj. Nojoriiri Pueyaso niti shuquiritiaquiaa tama nojori shipinijosanojuajaaja. Cuno, nojori shipinijosano Pueyaso niti na shuquiritasocoriquianoni, cunoori quiquiaa

juhua shaajeja pueya niquishano, juhua jaacuatujuaca niquishanojuhuaj, juhua nacujiniaaco canujuucuatujuaca niquishanojuhuaj, juhua roshiyocuatujuaca niquishanonio.

<sup>24</sup> Naaratej, Pueyasoori nojori tarinitiaquiaa sacuaraatia casaa nojori miiniuria tama na cuaqueyatajaaja, taa nojori miiniu paniquiaacuajani. Nojoriiri socua jiyacatequiaa sesa miiniuria. Naacuajitij, pueyari tama na cuaqueyajaaja miiquiaa sesa, cararaatia nojori miitioosacari narta pueyanota. <sup>25</sup> Naa sesa miijiaca nojori quishacaritij, pueyari seetanu casaa janaa Pueyasojiniji niishishano ruuretaquiaa, sapojonuunu nojori tojiniuria saniniuuja. Naaratej, pueyari Pueyaso shipinijosano casami shuquiritiaquiaa, saniya na Shipinia niti. Nojuajaari pa Pueyasojanaa cutara. Nojuaja cuara shuquiritiasaaria pueyaracaanu cutara.

<sup>26</sup> Pueya jaara Pueyaso cartequiaa, Pueyasoori nojori tarinitiaquiaa juhuaj, cararaatia casaa nojori miiniuria, taa nojori jiaatiaquiaa miiniuriacuajani. Naacuajitij, maajipohuari maja na caminiu paniniu quiquiaa. Saaja narta maajipohuata cararaatia casaa miiquiaari juhua canuu. <sup>27</sup> Naajuhua, canuuri maajitia quiniu paniyaquiquiaa, sacuaraatia na jiaatiasacari narta canuucua. Canuuri jiyanohua cararaatia miitiooquiaa. Naa nojori miiniuucuatej, nojoriiri tama na cuaqueyajaaja miitiaquiaa naquiya na miishaanura.

<sup>28</sup> Nojori niishiniu paniyaquiniucua Pueyaso, Pueyasoori nojori tarinitiaquiaa nojori miiniuria tama nojori niishiriojosano sesajaaja. Nojoricuajaari niishiya, nojori miishanoori sesa. Naajaa, nojoriiri saaja na miijiaca quiquiaa, cararaatia miiniu niishiriojonuujuaca nojori quiniucua. <sup>29</sup> Naacuajitij, nojoriiri puetunu tamaatia sesa miishanojuanaa miiniu niishijiaca. Jaara sesa miiri, timiquioyari. Nojoriiri nio miijiaca: puera casamiriaca quiniucua jiaatijaca. Sesa miiquiaari na panishano nojori jiitianura. Nojoriiri tamasaca pueya jiitiasano casamiicua jiaatijaca. Nojoriiri pueya puecoojuaca. Nojoriiri pueya ruutaqueja. Nojoriiri na panishano casami nohuasenuujuaca jiyasohua. Nojoriiri narta pueya miitianu panijiaca. Rimiaacatujurijiaariuhua. <sup>30</sup> Nojoriiri sacuaraatia sequejoja narta pueya. Nojoriiri Pueyaso niqiniu paniyashijiaca. Nojoriiri tamasaca soojeaca. Nojoriiri tama na cuaqueyajaaja jiyatequiaa juhua socua maninia pueyara tamasacajiniji. Nojoriiri najuhuaana sequeja: "Janiya maninia miijiani". Nojoriiri jiyanohua niishijiaca, niishishoo sesa casaa na miiniuria. Nojoriiri na queya tojiyashijiaca. <sup>31</sup> Nojoriiri seetanujuanaa mosanucua Pueyaso na tojitiaquiniucua. Nojoriiri saaja tama na rupajaaja jataja. Majaari na sequesano na miiniu. Nojoriiri narta pueya paniyashijiaca. Majaari nojori niishiniu jiyanooni. Majaari nojori niishiniu taraajenu narta pueyacua. <sup>32</sup> Nojoricuajaari tariucuaaanu naa Pueyaso sequesano niishiya: "Cante naa sesa miijiacani, cuara puecoosaaria". Naajaa, nojoriiri saaja sesa miiquiaa juhuajaniya. Majaari nojori quiniu shuquiriaatia saaja tama nojori miishacarijaaja sesa, nojoriiri shuquiriquiaajuhua tamasaca jaara sesa miiri juhua nojori.

## 2

### *Pueyasoori sesa miijiaca saniitionutaniya sesa nojori miiniucua*

<sup>1</sup> Naacuajitij pueyanaa, niaa jaara tamonuucua tonujujua quiriquia, majaari nia jyaniniu niaari sesa miyashijiaca cutara. Niaa jaara tamonuucua tonujure sesa na miishano, niaari tama niaacuarajaaja tonujiya naa sesa miiniu niishijiaca nia quishacarijuhuaj. <sup>2</sup> Paacuajaari niishiyani,

Pueyasoori puetunu sesa miijiacajanaa saniitionutaniya, maninia na niishishacari nojori miijosano. <sup>3</sup> Quiajaniya saniniuujia, quiarta pueyacua tonujujanaa, majaari quenaaja quia jiyaniyu quiaa saniitioyaquishaanutaniya. Quiaari saniitiosaanutaniyajuhua. Quiaacuajaari juhua nojori, sesa miijiajuhua. <sup>4</sup> ¿Majateeri quia niishiniyu, Pueyasocuaajaari pueyaracaanu quia sashiquiaa juucua, quioojia quia tacatonuhua nocua? Naaratej, nojuajaari pueyaracaanu maninia quia miiquiaa. Quia rejeretaquiaajaariuhua. ¿Quiaateeri jiyaniquiaa Pueyasoori naa maninia quia miiquiaa, maninia quia quiniucua na niqiara? ¡Maja! <sup>5</sup> Quiaari quioojia tacatonu paniyaquiquiaa, sesa quia miishanojiniji quia taraajeyaquishacari. Cunora, quiaari puetunu sesa quia miishanojinijijianaa saniitiosaanutaniya jiya puequesacari. Jiyacaritij niishishaanutaniyari, Pueyasoori seetanujanaa maninia saniitiojua. <sup>6</sup> Pueyasoori puetunu pueyajanaa miiniutianiya taa nojori miishano quiquiaari mijiriacuajani. <sup>7</sup> Naacuajitij, Pueyasoori maninia miijiacajiyatenutaniya pueyaracaanu rishijiacara. Nojoriiri pueyaracaanu maninia miijiacajiquiaari mijiria, Pueyasoori timitiasano nojori quiniuria, shaajeyashijiacara nojori quiniuriajuhua. <sup>8</sup> Saniniuujia, Pueyasoori na tojiyashijiacara saniitionutaniya jiyanojua na juaaniutia. Naa saniitiosaanutaniyajaariuhua noo pojori, canapuate saaja sesa miiniyu paniijiacajiquiaarini. <sup>9</sup> Puetunu sesa miijiacajapuejajanaari naquiya miishaanutaniya, taa Pueyasoori tojiyashijiacara cuarta Judiocuaca miishaanutaniyacuaani. <sup>10</sup> Saniniuujia, Pueyasoori puetunu maninia miijiacajapuejajanaa miiniutianiya maninia, taa maninia miijiacaj Judiocuaca miishaanutaniyacuaani. Pueyasoori timitiasano pueya nojori quiniucua, nojoriiri jiyanojua shuquiriaatia quijiacaj quiniutianiya pueyaracaanu. Naacuajitij, nojoriiri juhujaniya quiniutianiya Pueyasoota pueyaracaanu.

<sup>11</sup> Pueyasoori maja rimiajata na miiniyu quiniutianiya taucua, Judiocuacano. Puetunu maninia pueyajanaari maninia miishaanutaniya. Sesa pueyari saniitiosaanutaniyacujua. <sup>12</sup> Naacuajitij, pueya jaara Pueyasoori rootasano Moisés niishiyashijiacaj quiriquia, naajaa, nojori jaara sesa miijiacaj quiri, nojoriiri saniitiosocoriquiano. Naajuhua, pueya jaara Pueyasoori rootasano Moisés niishijiacaj quiriquia, nojori jaara na tojiyashijiacaj quiquiaarijuhua, nojoriiri cuno Moisés Naajioneejiniji nequesoreesaanutaniya na tojitiaaquiniucua. <sup>13</sup> Majaari nia jiyaniyu niaari jiyanooshaanutaniya sesa nia miishanojiniji nareja najuhua nia tojishacari Moisés Rootasano. Niaari jiyanojuaquishaanutaniya maja seetanujanaa na tojiijiacaj nia quiniucua. Noo pojori cutaraari jiyanooshaanutaniya, canapuate seetanujanaa na tojiijiacacuajani. <sup>14</sup> Moisés Rootasano jiiitaashijiacaj pueya jaara tamajaaja maninia miiniyu niishijiacaj quiriquia, naacuajitij, niishishiyari, nojoriiri tamajaaja maninia miiniyu niishijiacaj cutara. <sup>15</sup> Naa maninia miiniyu niishijiacaj nojori quiniucuatej, niishishiyari, Pueyasoori rootasano Moisésri juhua nojori jiuujiajinia naajiotasano quia. Naaratej, nojori jaara sesa miiri, tama nojori jiuujiajaarijia nojori niishitiya: “Sesa miiriinijia”. Naajuhua, nojori jaara maninia miiri, tama nojori jiuujiajaarijia nojori niishitiya: “Maninia miiriinijia”. <sup>16</sup> Naacuajitij, cuno juuca, Pueyasoori nequesoreetesacari Neyanu Jesucristo puetunu mijiria quiniaa pueyajanaani, jiyacaritij, tama pueya jiuujiaari nojoriicuara tonujunutaniya sesa nojori miishanojiniji jiyasohua. Naaratej, janiyari pueyaracaanu pueya numootequiaacuajani cua pohuatasacari Pueyasoori rupaa Jesucristojiniji.

*Pablo nacasusacari Judiocuaca nojori tojitiaaquiniucua Moisés*

### Rootasano

<sup>17</sup> Cuarta Judio pueyanonaa, quiaari jiyaniya quiaa Pueyaso pueyano cutara, na saquiriojosano Israel pueyajiniinio quia quishacari, Moisés Rootasano niishijia quia quishacarijuhuaj. Cunora, quiaari sequequiaa: “Janiya cutaraari Pueyaso pueyanoni. <sup>18</sup> Janiyari niishiyani casaa Pueyaso paniya cua miiniuriani. Moisés Rootasano niishijia cua quishacari, janiyari niishiyani teyano casaate socua tojishocoriquiano rootasanoni Pueyaso cua shuquiritiniuria”. <sup>19</sup> Quiaari sequequiaajuhuaaj: “Janiyacuaajaari seetanu rupaajanaa niishiyashijiaca pueya niishitiojonani. Janiyari juhua ninishiqui quijiaca pueya cuhuatanani. <sup>20</sup> Janiyari niishiyashijiaca niishitiojuani, naatujoorinio, maninia cua niishishacari seetanu rupaajanaa Moisés Naajioneejiniji”. <sup>21</sup> Naa tamasaca niishitiojona quia quishacaritij, tama quia cuaqueyajaaja quia niishitiojore coteenu, maninia miihia quia quiniuria. Quiaa jaara tamasaca niishitiojoquiaa maja na nohuasenuunura, ¿casaara nohuasejojua quia quiyacuaraarini? <sup>22</sup> Quia rootasacari tamasaca, maja nojori numuetucunura niyacaraca maaji, ¿casaara saniniuujia naa quia miiquiaacuaraarini? Quiaacuajaari sequeja: “Janiyari pueya shipinijosano casaa soojeani, nojori shipinijosano na secojonuu-socoriquiano juhua Pueyasoni”. Naa quia soosacari nojori shipinijosano casaatej, ¿casaara quia nohuasejoquiaa cuno casaa nojori secojonuujua tiacajinijicuaraarini? <sup>23</sup> Quiaari sequequiaajuhuaaj: “Moisés Rootasanoori jiyanohua maninia. Na timitiaanijia”. Naajaa, quiaari Pueyaso rerequetequiaa quia tojiyaquishacari Moisés Rootasano. <sup>24</sup> Cunora, tariucuacaanu Pueyaso Rupaajinia naajiotasanoori seetanujuanaa naa sequeya:

“Pueyaso niishiyashijiaca taucuacaari Pueyasocuara rimiaaquequiaa sacuaraatia, Pueyaso tojiyashijiaca nia quiniuucua nojori niqiuara”.

<sup>25</sup> Cuarta Judioacuacanaa, Pueyasocuajaari pa supuetanaa rootaquiaari pa cararaatiuuquia co cuaara miatesano quiiria, na saquiriojosano pueya pa quiniuucua. Naacuajitij, nia cararaatiuuquia co jaara miatesano quiri, cunoori maniniacuaja, niaa jaara seetanujuanaa Moisés Rootasano tojijiaca quiri. Saniniuujia, niaa jaara Moisés Rootasano tojiyashijiaca quiriquia, niaari juhua miatesoo quiyajaa Pueyaso niqiuara. Nia cararaatiuuquia coori najuhuaana miatesano quiya. <sup>26</sup> Saniniuujia, taucuaca jaara maninia miihiaca quiri taa Moisés rootasano sequeyacujani, miatesoo nojori cararaatiuuquia co quishacari, naajaa. Pueyasora, nojoriiri juhua miatesano quiya, na muerasu nojori quiniuria. <sup>27</sup> Naacuajitij, na cararaatiuuquia co miatesoo tahue jaara maninia miihia quiri, taa Moisés Rootasano sequeyacujani, nojuajaari jiyanooshaanutaniya, Pueyaso muerasu na quiniuria. Quiajaniya saniniuujia Judio pueyanonaa, quiaari Moisés Rootasano niishijiacuaja. Quiaacuajaari quia cararaatiuuquia co miatesanoraca. Naajaa, quiaa cutaraari saniitiosaanutaniya quia tojiyaquiniuucua Moisés Rootasano. Naacuajitij, cuno tahueri quiocuara tonujuriquiano saniya, Judio pueyanonaa. <sup>28</sup> Pueyasocuajaari Judiocuaca saquiriojoquiaari na muerasu nojori quiniuria juucua. ¿Cante seetanujuanaa Judio pueyano Pueyasorani? ¿Na cararaatiuuquia co miatesano pueyanotee, Judio pueyacujiniio supueno pueyanotejuhuaj? Maja. <sup>29</sup> Noo pojori cutaraari seetanujuanaa Judio pueyano Pueyasora, noojia jatanishano pueyanotej. Pueyaso Sohuanu jaara pueyano jiuujia jataniri Pueyaso tojijia na quiniuria, cunoori juhua na cararaatiuuquia co miatesano cutara, seetanujuanaa Pueyaso muerasu na quiniuria. Jiyano pueyatej, nojori cutaraari Pueyaso timitiasano, maja narta pueya timitiasano. Pueyanoori maja na naata pueyano



jiyatenu Pueyaso pueyano na quiniuria. Saaja Pueyaso Sohuanu cutaraari na naata.

### 3

<sup>1</sup> Naa cua sequesacari niajanियatej, niaa naasucuaari sequeya: “Taucuaca jaara naa maninia miishaanutaniya nojori quiyaquishacari Pueyaso saquiriojosano Judiocuaca, naatej, taa pajaniyacuaani, ¿casaara pa cararaatiuuquia co miatejosaaquiaaricuararini? ¿Paateeri najuhuaana Pueyaso saquiriojosano Judiocuacani?” <sup>2</sup> Maja, Judiocuacanaa. Maniniacuajaari pa quishacari Judiocuaca. Pueyasocuaajaari Judiocuacaacia tiuuquiaari nojori jiitianura na rupaa. <sup>3</sup> Noojiaqueya Judiocuacajinijinio jaara Pueyaso Rupaacua tiuyashijiaca quiya, ¿Pueyasoteeri cunora na rupaa jatanutaniyajuhuaaj? ¡Maja! <sup>4</sup> Puetunu pueyajanaa jaara sapojonuujuaca quiriquia, naajaa, Pueyaso cutaraari tojetaarucujanaa sapojiyashijia. Naaratej, nojuajiniiri naa naajiotasano quiya tariucuacaanu na Rupaajinia:

“Puetunu pueyajanaari niishiniutianiya puetunu quia sequesanojuanaari seetanujanaa cutara. Naajuhuaaj, pueya jaara quiocuara tonujure juucua, puetunu nojorijianaari sanaajasaanutaniya, saa maniniaja quia miiniuucua pueyaracaanu”.

<sup>5</sup> Pa supuetanaa tiuyaquiniuucua seetanu Pueyaso rupaacuajanaa, naacuajitij, mijiria quiniaa pueyari niishiya, Pueyasoori socua jiyanohua maninia pueyajiniji. Sesa pa miiniuujiniji, paari niishiyani Pueyaso cutaraari jiyanohua maninia. Naacuajitij, nojuaja jaara pa saniitiore sesa pa miiniuucua, ¿taa nia sequeyani? ¿Nojuajate sesa, jaara pa saniitiore sesa pa miiniuucua? ¡Juaj! Juhua niishiyashijia pocuareenijia. <sup>6</sup> ¡Seetanujanaa, Pueyasoori sesa miyashijia! Nojuaja jaara sesa miijia quiriquiajuhuaaj, ¿maatucua taa mijiria quiniaa nequesoreereni?

<sup>7</sup> Tamasaca naasucuaari sequequiaa: “Sapojojua cua quishacari, pueyari Pueyaso timitiaquiaa socua, nojori niishishacari saaja nojuaja cutaraari seetanu rupaajanaa jiitiaja. Naaratej, ¿Pueyasotucua casaara cua saniitioreni?” <sup>8</sup> Teyano pueyanote naa sequejani, nojuaja naasucuaari naa sequejajuhuaaj: “Socua sesa pa miiri, Pueyaso jiyanooniuria pajaniya. Naacuajitij, pocua Pueyaso shuquiritiare socuani, nojuaja jaara pa jiyanoori”. Tamasacaari canaacuara tonujuquiaa najuhuanaj, canaanaari naa niishitiojoquiaani. Canapuate naa sapojonuuquiaa canaacuarani, nojoriiri saniitiosaanutaniya, nojori sesacanuucua canaa.

#### *Pueyasora, puetunu pajaniyajanaari sesa miijiacani*

<sup>9</sup> Quiarijia, jaara naa quiriritij cuarta Judiocuacanaa, ¿paateeri socua maninia miijia taucuacajiniji Pueyasorani? Maja. Janiyacuajaari shusha nia pohuatariquiaani, puetunu mijiria quiniaa pueyajanaari sesa miijia; Judiocuaca, taucuacanio. <sup>10</sup> Tariucuacaanu Pueyaso Rupaajiniacuajaari naa naajiotasano quiya:

“Majaari quenaaja niquiriyatu maninia miijia quiniu. Shaaqui tojetaarucujanaa. <sup>11</sup> Majaari quenaaja maninia niishiriojojua pueyano quiniu. Majaari quenaaja Pueyasocua jiaatiaja pueyano quiniuujuhuaaj. <sup>12</sup> Puetunu pueyajanaari Pueyasocuaaji tashuquiorucuaa. Puetunu nojorijianaari seserucuaa. ¿Cante maninia miijiani? Shaaqui. Shaaqui tojetaarucujanaa. <sup>13</sup> Nojoriiri miananajonu maniniu. Nojori rupaari saa monujua. Nojoriiri na niti taquiriocateja saa sapojonuraja. Cuno pojoriiri juhua soconu noonacu jiitiaa na rupaama, rimiaacatujuri nojori quiniuucua. <sup>14</sup> Nojori jaara pocuare, saaja



tamasaca sesacaquiaari, puera juaajia nojori quishacari. <sup>15</sup> Nojoriiri puecojuaca. Puereeta nanaca shootejaca. <sup>16</sup> Puetunu mijiria nojori miishanojuanaari casaa sesojua, narta pueya taraajetejajuhuaaj. <sup>17</sup> Majaari nojori niishiniu jiyanooni. <sup>18</sup> Nojoriiri juhuajaniya mi-iquiaa sesa saaja. Majaari na pueretunu Pueyaso”.

<sup>19</sup> Paacuajaari niishiyani, puetunu Pueyaso Rupaajinia naajiotasanojuanaari Pueyaso saquiriojosano Judiocuacara quiquiaari, nojori niishiniuria, puetunu pueyajanaari sesa miijiaca. Naacuajitij, puetunu mijiria quiniaajanaari sanaajetanutaniya, nojori niishishacari puetunu nojorijianaari sesa miijiaca; Judiocuaca, taucuacanio. <sup>20</sup> Naacuajitij, pueya tojishacari Moisés Rootasano juucua, cuno rootasanoori maja na naata nojori na jiyatenu sesa miyashijara. Moisés Rootasanojiniji, paari saaja cunojiniji niishiyani, puetunu pajaniyajanaari sesa miijiacani.

### *Paari Pueyaso jiyanooshano cutarani, Jesuucua pa tiuushacari*

<sup>21</sup> Pueyasoori quiari naataja pa niishitiquianu cutara, taate pa naata maninia miijia pa jatanishaanuni. Moisés Rootasanojinia, tariucuacaanu Pueyaso sequenu panishano caminiujiuniaa naajionuutasanojiniaari naa sequeyajuhuaaj. Tiiri maatia sequeya taa Pueyaso jiyanooniutianiya pueyani, naajaa, pueya jaara Moisés Rootasano tojiyashijaca quiri. <sup>22</sup> Quiarijiani, Pueyasoori pa jiyanooquiaa cutara, saaja Neyanu Jesucristoocua pa tiuushacari. Judiocuaca, taucuacajuhuaaj, Pueyasoori puetunujuanaa jiyanooquiaa Neyanuucua nojori tiuushacari. Majaari rimi-ajata na jiyanooni. <sup>23</sup> Puetunu pueyajanaari sesa miijiaca; Judiocuaca, taucuacanio. Naacuajitij, nojoriiri juhua tucuacaanu quiya Pueyasojiniji. Sesa miijiaca pueya quiniuucua, nojoriiri soosano pueyara jataquiaari. Naacuajitij, pueyari Pueyaso timitiasoo quiquiaari. <sup>24</sup> Naajaa, jiyanoohua panijia Pueyaso quiniuucua, nojuajaari pa jiyanooquiaari Jesucristo cusonuucua pocuara. Naacuajitij, Pueyasoori pa jiyatequiaari juhua sesa miyashijara. <sup>25</sup> Pueyasoori Neyanu Jesucristo jiyatequiaari pueyacuaji Tacuna na quiniuria, Neyanu nanaca shoonuucua niyacutesanojinia. Naacuajitij, pueya jaara niishiriquia Jesucristo nojori niti cusoquiaari, saaja naa nojori tiuushacari nocuatej, nojuajaari na Que Pueyaso jiyanootiquiaa pueya. Naajuhuaaj, Pueyaso saniitioyaquishacari tariucuacaanu nocua tiuujia pueya Jesu cusoyaquishacarijia, majaari najuhuaana puera jiuujiaajia na quiniu quiquiaari. <sup>26</sup> Pueyasoori niishiquiaari Neyanu Jesucristoori nojoricuara mosocoriquiano, sesa nojori miijiosano tuujusaanura seetanujuanaa. Naaratej, nojuajaari pueyaracaanu sesa nojori miijiosano rejeretaquiaari saaja. Jesucristo cusonuucua quiari naataja pocuara, paari niishiyani, Pueyasoori seetanujuanaa maninia miijia. Nojuajaari maja najuhuaana na jiyanooni pajaniya. ¡Neyanu motequiaari pocuaraari!

<sup>27</sup> ¿Teyano nijaniyajinijiniote tojetaarucujanaa saaja maninia miijiani? Shaaqui. Naacuajitij, maninia miyashijaca pa quishacari, puetunu pueyajanaari sanaajasaanutaniya Pueyaso nequesoresacari pueya. Saniniuujia, paa jaara puetunu Moisés Rootasanojuanaa tojitiaajaca quiriquia maniniani, paa maara tama pa cuaqueyajaaja shuquiritiaajaca quiriquia cutarani. Saniniuujia, Pueyasoori pa jiyanooquiaa saaja pa tiuushacari Jesucristoocua. Naacuajitij, majaari pa jiitianu tama pa miishanojuaja pa shuquiritiasocoriquiano. <sup>28</sup> Naacuajiti paari niishiyani, Pueyasoori pa jiyanoojia puetunu sesa pa miishanojinijianaa saaja Jesucristoocua pa tiuushacari. Majaari na jiyanooni pajaniya, Moisés Rootasano pa tojishacari.

<sup>29</sup> ¿Niaateeri jiyaniya, Pueyasoori saaja Judiocuaca Jiyano? ¡Maja! Pueyasocuajaari puetunu mijiria quiniaa pueyapuejanaa Jiyano. <sup>30</sup> Pueyasoori maja caapiqui. Nojuajaari saaja niquiriyatu. Naacuajitij, majaari niquiriyatu Pueyaso quiniu Judiocuacacara, socua tamonu Pueyaso taucuacacara. Naaratej, puetunu pueyapuejanaari jiyanooshaaquiaa saaja Jesucristoocua nojori tiuushacari; tariucuacaanu na saquiriojosano Judiocuaca, taucuacanio. <sup>31</sup> Pueyaso muerasu pa quishacari saaja Jesuucua pa tiuushacari, ¿paateeri Moisés Rootasano shocoteyani? Maja. Paacuajaari Moisés Rootasanojiniji niishiyani, paari sesa miijiacani. Naacuajitij, Moisés Rootasanoori panishiya, pa niishiniuria paa cuaara Jesucristoocua tiuuria, jiyanooshano pa quiniuria.

## 4

### *Pueyaso jiyatesacari Abraham juhua sesa miyashijiara*

<sup>1</sup> Naaratej cuarta Judiocuacanaa, ¿taa nia sequeya pa supuetana Abrahamjinijini? <sup>2</sup> ¿Casaara Pueyaso jiyatequiaari nojuaja juhua sesa miyashijiarani? Abrahamri maja na jiyanooshaanu quiquiaari maninia na miiniucua. Pueyaso jaara nojuaja jiyanooshaanu maninia na miiniucua, nojuaja maara tama na cuaqueyajaaja timitiaja quiquiaari. <sup>3</sup> Saniniuujia, tariucuacaanu Pueyaso Rupaajinia naa naajiotasano quiyari Abrahamjiniji: “Abrahamri Pueyasooocua tiuquiaari. Naaratej, Pueyasoori na jiyatequiaari juhua sesa miyashijiara”.

<sup>4</sup> Cua tojiri pueyanaa. Pueyano jaara poonijiore tamonura, na poonijiotenaari na poonijionujiniji na cumaneeca niqutiojua. Jaara niqutiosaare, cuno cumaneecaari maja nareja niqutiosano. Cunoori seetanujuanaa na poonijiosanojiniji. <sup>5</sup> Saniniuujia, maninia miyashijia jaara Pueyasooocua tiuuri, Pueyasoori na jiyatenutaniya juhua sesa miyashijiara saaja nocua na tiuuniucua. <sup>6</sup> Pa supuetanaa jiyaniijia Davidcuajaari naa pohuataquiaari taa shuquiriaatia pa quiyani, Pueyaso jaara pa jiyatere juhua sesa miyashijia pa quiniuria na niqiara, maninia miyashijia pa quishacarijia. Naa naajiotasaaquiaariiri David sequesano:

<sup>7</sup> “Shuquiriaatia quijiaca cutaraari noo pueya, canapue Pueyaso jiyanooya sesa na miijiosanojinijicuaajani, Pueyaso jaara tuujure sesa nojori miijiosanojuhuaj. <sup>8</sup> Shuquiriaatia quijiacaari noo pueyajuhuj, puetunu sesa nojori miishanojuanaa Pueyaso saneyaquishootej”.

<sup>9</sup> Janiyacuajaari tari sequereeni, Pueyasoori Abraham jiyatequiaari juhua sesa miyashijia na quiniuria, saaja nocua na tiuushacari. Pueyaso jaara naa jiyanooshaanicuaa Abrahamtej, ¿Pueyasote saaja Judiocuaca jiyanooni panijia, noo pojori canapuate na cararaatiuuquia co miatesano jiiitiaani, taa nojori supuetana Abrahamcuaani? ¿Taa nia sequeyani? ¿Taucuacaarijiataj? ¿Nojoriti jiyanooshiyajuhuj? ¡Taaquiririnij! <sup>10</sup> ¿Taa nia sequeyani? ¿Abrahamte tari na cararaatiuuquia co miatesano quiquiaari Pueyaso jiyanooshaari nojuaja? Maja. Pueyasocuajaari na jiyanooshaanu miatesoojua na quishacari. <sup>11</sup> Na tiuuniu nuhuaji Pueyasooocua, Pueyasoori shusha jiyacari na niishitiquiaari na cararaatiuuquia co na miatenura. Cunoori quiquiaari na niyajetaaquishaanura, saaja Pueyasooocua na tiuushacari, Pueyasoori na jiyatequiaari juhua sesa miyashijiara, miatesoojua na quishacari. Naacuajitij, miatesoo taucuaca tiuushacari Jesucristoocua, taa Abraham tiuquiaaricuaani, Pueyasoori nojori jiyateya juhua sesa miyashijia nojori quiniuriajuhuaj, mariyata juhua Abraham niqiohua nojori quiniuria. Naacuajitij, puetunu Pueyaso sequesano Abrahamjanaani,

cunoori nojoririajuhuaj. <sup>12</sup> Naajuhuj, pueya jaara na cararaatiuuquia co miatesano quiri Judiocuaca nojori quiniuria, naajaa. Nojori jaara Jesucristoocua tiuuri taa Abraham tiuquiaaricuaani miatesoo na quishacarijia, Pueyasoori nojori jiyateya juhua Abraham niquiohua nojori quiniuriajuhuaj.

*Pueyaso sequesano Abrahamni, cunoori Jesucristoocua tiuujiacarajuhuj*

<sup>13</sup> Pueyasocuajaari Abraham sequequiaari, nojuajaari nio jiya camaru quiniutianiya, puetunu necohuatajanaa. Pueyasoori naa sequequiaari Abrahamtej, saaja nocua na tiuushacari. Majaari naa Abraham sequesaanu quiquiaari Moisés Rootasano tojjijia na quiniuucua. Jiyacaritij, Moisés Rootasanoori maja na quiniu quiquiaari juhuanajuaja. <sup>14</sup> Pueyaso sequesano Abraham jaara saaja Moisés Rootasano tojjijiacara quiriquia, na sequesano maara najuhua quiri Pueyasooocua tiuujia pueyara. Naajuhuj, pueya maara najuhua Pueyasooocua tiuujia quiriquiajuhuaj. Seetanujanaa Pueyaso sequesano Abrahamni, cunoori puetunu Pueyasooocua tiuujiacarajanaa. <sup>15</sup> Cunoori maja saaja Moisés Rootasano tojjijiacara. Pueyasocuajaari niishiquiaari, pueyari maja na naata Moisés Rootasano tojiniu quiniutianiya puetunujanaa. Moisés Rootasanojiniji, paari niishiyani, paari saniitiosaanutaniyani pa tojitiaaquiniuucua cuno rootasano. Saniniuujia, Moisés Rootasano jaara quiyaquiriquia, pueya maara sequeyaquishaare: “Niaari sesa miijia”.

<sup>16</sup> Pueyasoori tariucuacaanu na sequesano Abraham nareja niqutionu paniquiaari, puetunu necohuarajanaano. Naaratej, seetanujanaa pa masenura na sequesano Abraham, Pueyasoori sequequiaari, nojuajaari nareja na niqutionutaniya nocua tiuujia. Naacuajitij, Pueyaso sequesanoori maja saaja Moisés Rootasano tojjijiacara. Cuno sequesanoori puetunu pueyapuerajanaa, canapute Pueyasooocua tiuujia quiyani, taa Abraham quiquiaari Pueyasooocua tiuujiacuaani. Naa Pueyasooocua tiuujia pa quishacari taa Abraham tiuquiaari Pueyasooocuaani, paari Abraham niquiohuani. Naaratej, Pueyasora, Abrahamri pa que. <sup>17</sup> Pueyasocuajaari naa sequequiaari Abrahamtej nojuajaari queraatia niquiohuaraca quiriquiano. Naacuajitij, Pueyaso sequesanoori naa naajiotasano quiya:

“Abrahamnaa, janiyari quiaritia quia jiyateree queraatia tamaatia rupaaca pocuajaca que quia quiniuriani”.

Abrahamri Pueyaso sequesanoocua tiuquiaari. Nojuajaari niishiquiaari Pueyasoori macunucua samiitianijia. Niishiquiaarijaariuhuj, Pueyasoori cumaacaraca na panishano na shipininiuria shaaquijiniji.

<sup>18</sup> Abrahamri niishiquiaari, nojuajaari maja na naata necocua na muetutenu, puera saaquiano na quishacari tari. Naajaa, Abrahamri saaja Pueyaso sequesanoocua tiuquiaari. Naacuajitij, nojuajaari seetanujanaa queraatia tamaatia rupaaca pocuajaca pueyapue que, taa Pueyaso sequequiaari nojuacuajani. Pueyasoori naa na sequequiaari:

“Quia niquiohuari tojetaarucujanaa queraatia quiriquiano”.

<sup>19</sup> Naa Pueyaso sequesacari nojuajatej, nojuajaari tari cien marijia shocotejoquiaari. Naa saaquiano na quishacaritij, necocua Saarajuhuj, naajaa, majaari na tarinitianu quiquiaari Pueyaso sequesanoocua tiuuniu.

<sup>20</sup> Saaja Pueyaso sequesanoocua na tiuushacari, nojuajaari maja noojia

na niquijiotenu quiquiaari. Majaari Pueyaso sequesanojiniji na taacanuunu quiquiaarijuhuaj. Saaja Pueyasocua na tiushacari, nojuajaari noojia cumaquiquiaari socua. Naacujitij, nojuajaari naa maninihuaqueetaquiaari Pueyaso: “Paacarasho cua Pueyasonaa. Niishiyani quiaari canaa muetutenutaniya taa quia sequecanu janiyacujani. <sup>21</sup> Quiaacujajari cumaacaraca quia miiniuria puetunu quia sequesanojuanaa”. <sup>22</sup> Naa Abraham tiuuniucua Pueyasocuatej, Pueyasoori na jiyatequiaari juhua sesa miyashijia pueyanora.

<sup>23</sup> Jaara naa naajiotasaaquiaari Abrahamjiniji: “Pueyasoori na jiyatequiaari juhua sesa miyashijiaara”, cunoori maja saaja Abrahamra sequesano. <sup>24</sup> Cunoori pajaniyara sequesanojuhuaj. Cunora, Pueyasoori pa jiyateya juhua sesa miyashijiarajuhuj, nocua pa tiushacari, pa niishishacarijuhuaj nojuacujajari pa Jiyaniijia Jesucristo samiitiani quiaariuhua macujiniji. <sup>25</sup> Pueyasocujajari mijiria na jiyaroquiaari sesa pa miishanoocua mosocoriquiano. Nojuajaari na samiitiani quiaariuhua, Jesu jaatianura nocua pajaniya, juhua tariucua sesa miyashijia.

## 5

### *Jesuucua tiuuniaa pueyari jiyanooshano*

<sup>1</sup> Naacujitij, paa jaara tari jiyanooshano quiyani Jesucristoocua pa tiushacari, paari juhujaniya quia Pueyaso niquiarani. Jesucristoori na Que pa jiyanootiquiaari, pocuara na cusosacari. <sup>2</sup> Jesucristoocua tiuujia pa quishacari, Pueyasoori pa timitiaquiaa. Pa cumaquiquiaajariuhuj maninia necohua pa quiniuria. Paari shuquiriyajacuhuj, pa niishishacari paari jatanishaanutaniyani, shacantuuca quijia pa quiniuria juhua nojuajuhuj. <sup>3</sup> Majaari saa cunojua. Paari shuquiriquiaajuhuj, paa jaara taraatia miishaareni. Paacujajari niishiyani, paa jaara naquiya miishaareni, paari socua juhujaniya rejeretajaca quiniutianiyan. <sup>4</sup> Naa rejeretajaca pa quishacaritij, paari cumueeca Pueyaso muerasu quiniutianiyan. Naa cumueeca Pueyaso muerasu pa quishacaritij, paari juhujaniya sashijia quiniutianiyan, pa niishishacari Pueyasoori seetanujuanaa maninia miiniutianiya pajaniya, taa na sequequiaaricujani. <sup>5</sup> Naa pa niishishacaritij, majaari sapojosano pa quiniu quiniutianiya. Pueyasocujajari tari jiyaroquiaari na Sohuanu, poojiajinia quiriquiano, seetanujuanaa Pueyaso paniniu pa jitianura poojiajinia.

<sup>6</sup> Pueyaso tojiyashijia pa quishacarijia, majaari pa naata quiquiaari Pueyaso jiyanootiniu tama pa cuaqueyajaaja. Jesucristoori jiyacari namitia pocuara cusoquiaari na Que na jiyanootiniuria pajaniya. <sup>7</sup> Sesa miyashijia pueyano jaara monu panishiya juucua, ¿tamonu maninia pueyanoteeri quia na sequenura: “Janiya cuaara mosaaria juhuari cuno pueyano niti”? Majaruhua. Monu panishano pueyano jaara seetanujuanaa maninia pueyano quiri, na rupuena pueyano jaara jiyanohua na panijia quiri, nojuaja maara sequere: “Janiya cuaara na niti mosaaria juhuari”. <sup>8</sup> Saniniuujia, sesa miijia pa quishacarijia, Jesucristoori pa niti cusoquiaari cutara. Naacujitij, paari niishiyani, Pueyasoori jiyanohua pa panijia. <sup>9</sup> Quiarijia, paari sesa miyashijia quia Pueyaso niquiarani, Jesucristo cusonuucua pocuara. Naacujitij, paa cutaraari niishiyani, Pueyaso saniitiosacari na tojiyashijia pueya, Cristoori pocuaji tacunutaniya cutara, tariucua na jatanishano pueya pa quiniuucua. <sup>10</sup> Na paraa pa quishacarijia, Pueyasocujajari pa jiyanoquiaari, Neyanu cusonuucua pocuara. Quiarijia, nata jecatoono pa quishacari, Neyanuuri saminio quia pueyaracaanu pocuaji na tacunura.

<sup>11</sup> Majaari saaja cunora shuquiriaatia pa quiniu. Paari shuquiriyajuhuaaj, pa Jiyanijia Jesucristo rupuetootenuucua pajaniya na Que Pueyasota.

*Pa supuetana Adánri maja juhua pa Jiyanano Cristo*

<sup>12</sup> ¿Casaara pa cusonuquiaani? Juhuacatecara pa supuetana Adán miiniuucua sesa, naaratej puetunu pueyajanaari sesa miijiacajuhuaaj. Pueyasocua-jaari tari sequequiaari: “Cante sesa miiijani, cuara shaajeera”. Seetanujuanaa naari. Puetunu pajaniyajanaari shaajeriquianoni, sesa miijiaca pa quiniuucua. <sup>13</sup> Moisés Rootasano quiyaquishacarijia, pueyari tari sesa miiniu niishijia quiquiaari. Jiyacaritij, pueya miishacari sesa, majaari nojoriicua saquiriojotasaanu quiija sesa nojori miishacari. <sup>14</sup> Cuno pojori, Moisés niyacari quiquiaarini, nojoriiri maja na tojiyaquiniu quiquiaari Pueyaso sequesano taa Adán tojiyaquiquiaari Pueyaso sequesano cuani. Naajaa, puetunu nojorijianaari cusonuquiaarijuhuaaj sesa miijiaca nojori quiniuucua, sesa miiija Adán cuajinio nojori supuenucua. Quiarijia saniniuujia, nia pohuataraera Adán miishanojiniji, Jesucristo miishanojinijinio.

<sup>15</sup> Adán miishanoori jiyanojia tamaatia Jesu miishanojiniji. Coteenu shipinishano pueyano miiniuucua sesa, puetunu pueyajanaari shaajenu niishiya. Saniniuujia, Jesucristo miiniuucua maninia, Pueyasoori queraatia pueya jiyatequiaa pueyaracaanu rishijia nojori quiniuria cutara. <sup>16</sup> Pueyaso miishano maninia pajaniyarani, cunoori sesa Adán miishano shocotaa jiyanojia cutara. Naa niquiriyatu sesa casaa Adán miiniuucuatej, puetunu pueyajanaari saniitiosocoriquiano. Saniniuujia, maninia Jesucristo miiniuucua pajaniyarani, Pueyasoori pa jiyanoquiaa puetunu sesa pa miishanojinijianaa. <sup>17</sup> Niquiriyatu pueyano miiniuucua sesa, puetunu pueyajanaari cusonujuacara quiquiaari. Saniniuujia, niquiriyatu pueyano miiniuucua maninia pajaniyara, cunora, Pueyasoori pa jiyateya juhua sesa miyashijia pa quiniuria. Cunoori, Jesucristoocua pa tiushacari. Majaari saaja cuno, naajuhuaaj, paari shuquiriaatia quiija jiyanijianucua quiniutianiya maniuuquini, Jesucristo rupuesano pa quishacari.

<sup>18</sup> Naa Adán miiniuucua sesatej, nojuajaari puetunu nocuajinio supueno pueyajanaa jiyatequiaari sesa miijiacara, saniitiosano nojori quiniuria. Naajuhuaaj, Jesucristo miiniuucua maninia, puetunu pueyajanaari na naata jiyanooshaanu, nojori saniitioyaquishaanuucuaaji, pueyaracaanu quiija nojori quiniuria. <sup>19</sup> Adán tojiyaquiniuucua Pueyaso sequesano, puetunu pueyajanaari sesa miijiacara jiyatesaaquiarijuhuaaj. Saniniuujia, Jesucristo tojiniuucua Pueyaso sequesano, puetunu nocua tiujiacajanaari juhua sesa miyashijianucua jiyatesaaquihua.

<sup>20</sup> Moisés Rootasano jaara niishishaaquiaari, pueyari socua sesa miijiacara jiyatequiaari. Naa socua sesa miijiacara pa quishacaritij, naajuhuaaj, Pueyasoori socua jiyatequiaari pocua taraajenujuhuaaj. <sup>21</sup> Sesa miiniu tarinitianu niishiyashijia pa quiniuucua, puetunu pueyajanaari cusonuriquiano quiquiaari. Saniniuujia, Pueyaso taraajenuucua pocua, nojuajaari Neyanu Jesucristo motequiaari pa niti, pa jiyanooshaanura. Naacua-jitij, nojuajaari juhua pa samiitianoquiariuhua, pueyaracaanu rishijia pa quiniuria pa Jiyanijia Jesucristota.

## 6

*Pablo niishitiojoso moojinia tiuquinijionujiniji*



<sup>1</sup> Pueyaso jaara naa pa jiyanooquiaa pocua na taraajesacari, ¿taa nia sequeyani pueyanaa? ¿Paate socua pueyaracaanu sesa miihia quiniutianiyani, pueyaracaanu Pueyaso jiyanooniuria pajaniya, pueya niishinuria, Pueyasocuaajaqui jiyanoohua maninia na jiyanooniuria pajaniya? <sup>2</sup> ¡Maja pueyanaa! ¡Maja naa nia niishiriojonu! Pueyaso jaara tari poojia sesoriquia seque jataniquiaari Neyanu Jesucristo na rupuetesacari pajaniya, ¿paatucua casaara socua sesa miihia quirini? Pueyasora, paacuaajaari tari cusonuquiaari Jesutani. <sup>3</sup> ¿Niaateeri cuno niishiyaquiyajaa? Naajuhuj, paa jaara moojinia tiuquinishaare Jesucristoocua pa tiuushacarini, Pueyaso niquiara, paari Jesu rupuequiaari niyacutesanojiniani. Nojuacuajaari pa niti sanitiosaaquiaari. <sup>4</sup> Naacuajitij, paa jaara moo cariquimia shishaareni, jiyacaritij, paari juhua Jesuta jamoshiyajuhuj. Naa juhua macu pa quishacaritij, paari samiitianijosanohuani, taa Jesucristo samiitianishaaquiaariuhua macujiniji jiyanoohua Pueyaso cumaacatacuaani. Naa samiitianijosanohua pa quishacaritij, maninia miijiaca pa quiri juhua quiarinio pueya.

<sup>5</sup> Paa jaara Jesucristo rupuetesaaquiaari sesa pa miishanoocuara na cusosacarini, naajuhuj, paa cutaraari tari samiitianijosanohua juhua nojuajani, maninia quijiaca pa quiniuria. <sup>6</sup> Tarihia, majaari pa naata tarinitianu quijia sesa pa miiniu, sesa jiuujaraca pa quishacarihia. Sesoriquia poojia sequeeri Jesuta cojiritiasaaquiaari monu, nocua pa tiuushacari, maja socua cumaaca na jiitianura, sesa na miitiniuria pajaniya. <sup>7</sup> Naacuajitij, sesoriquia poojia seque jaara tari jatanishano quiya, majaari tari sesa miijiaca pa quiniu. <sup>8</sup> Paa jaara tari naa cojiritiasaaquiaari monu Jesuta nocua pa tiuushacarini, paari quiaritia niishiya cutarani, paari pueyaracaanu nata quiriquiano saminioni. <sup>9</sup> Cristocuaajaari samiitiaquiaariuhua. Paari niishiyajuhuj, majaari socua na pacutenu quiniutianiuhua cusonu. Nojuacuajaari tari cusoquiaari puetunu sesa pa miishanoocuarajanaa. Naaratej, nojuajaari maja na naata socua cusojuasaanuhua. <sup>10</sup> Majaari socua Jesucristo pacutenu quiniutianiuhua cusonu, sesa pa miishanoocuara. Nojuacuajaari tari cusoquiaari, Pueyaso jiyanooniuria puetunu mijiria quiniaa sesa miishanojuanaa. Nojuaja jaara samiitiaquiaariuhua, nojuajaari seetanujuanaa pueyaracaanu rishiriquiano Pueyasora cutara. <sup>11</sup> Naajuhuj pueyanaa, tama nia cuaqueyajaaja nia jiyatere juhua macura, maja socua nia miiniuria sesa. Nia niishirijuhuj, niaacuajaari Jesucristota samiitiaconohua, Pueyaso tojijiaca nia quiniuria.

<sup>12</sup> Naaratej pueyanaa, majaari nia shanacunu sacuaraatia nioojia seque niishiriojosano nia miiniuria. Seetanujuanaa nia niyaretare tama nia cuaqueya panishanojuajaaja nia miyaquiniuria. <sup>13</sup> Majaari nia cuaqueya nia panitianu sesa nia miiniuria, taa na paniya nia miiniuria juucuacuajani. Saniniuujia, nia cuaqueya nia jiyatere cutara saaja Pueyaso panishano miihia na quiniuria. Niaacuajaari tari samiiticoquiaariuhua juhua macunucua nia quiniujiniji. Naacuajitij, nia cuaqueya nia jiyatere saa maninia miihia na quiniurijaja. <sup>14</sup> Niaa jaara nioojiajinia cuno sesa niishiriojosano ruuretajaca quiri, niaari na shocotanutaniya, Pueyaso cumaquishacari nijaniya. Nia niishiri, niaari quiaritia Pueyaso tojitiajaca cutara, maja tari Moisés Rootasano tojijiaca.

*Pueyaso tojiyashijiaca pueyani, nojoriiri Sesaaca pueya*

<sup>15</sup> Cua sequesacari nijaniya, pajaniya maja tari Moisés Rootasano tojijiacani, ¿niaateeri cunora sesa miiniutianiya, Pueyaso quishacari pa jiyanoojia? ¡Maja naa nia miiniu pueyanaa! <sup>16</sup> Niaacuajaari niishiya, paa jaara tama



pa cuaqueyajaaja jiyatere tamonu camarnu seru pa quiniuriani, naacua-jitij, paari pueyaracaanu na tojijia quiniutianiyani. Naajuhuj, niaa jaara sesa miijiaca quiriohua, niaari Sesaaca tojijia. Naa sesa miijiaca nia quishacaritij, niaari cusonutaniya. Saniniuujia, niaa jaara Pueyaso tojijiacara quiri, niaari sesa miyashijiaca quiniutianiya. <sup>17</sup> Tarijia, niaari Sesaaca tojijia quijia, juhua na seya, sesa miijiaca nia quishacari. Quiarijia, janiyari Pueyaso timitiaani nia tojiniuucua Jesucristo rootasano puetunu nioojiatajanaa, taa nia niishitiojosaaquiaaricujani. <sup>18</sup> Jesucristo rupaa nia tojishacari, Pueyasoori nia jiyatequiaari na muerasu nia quiniuria, maja Sesaaca seya nia quiniuria socua. Naacuajitij, niaari Pueyaso tojijiacara jatanishano, saaja maninia miijiaca nia quiniuria. <sup>19</sup> Janiyari naa pohuataa serujiniji najaniyani, maatia nia tojiniuria cua niishitiojosano. Majaari juhuanajuaja nia naata puera jiyajeneta niishitiojosano niishiniu, cumueeca Pueyaso muerasu nia quiyaquishacarijia. Tarijia, niaari tama nia cuaqueyajaaja jiyatequiaari Sesaaca panishano nia miiniuria. Naacuajitij, niaari jiyanohua sesa miijiacara jiyatequiaari. Naajuhuj, quiarijia saniniuujia, tama nia cuaqueyajaaja nia jiyatere Pueyaso panishano nia miiniuria. Naa jaara naa miiri, niaari tojetaarucujanaa maninia miijiaca quiniutianiya Pueyasora.

<sup>20</sup> Naa jaara sesa miijiaca quiquiaarijia Sesaaca tojijia nia quishacarijia, niaari juhujaniya Pueyaso tojiyashijiaca quiquiaari. <sup>21</sup> ¿Sesaacate maninia nia miiquiaari sesa nia miiniuucua nera? ¡Maja! Naa cutaraari saaja caririquiquiaa sacuaraatia casaa nia miiniuucua tarijia. Naaari quiarijia niishiyajuhuj, cante sesa miijiaca quiquiaani, nojoriiri shaajasaariquiano. <sup>22</sup> Naa sesa miyashijiaca nia quishacari quiarijia saniniuujia, niaari Pueyaso tojijiacara jiyatesaaquiaari, saaja na panishano nia miiniuria cutara. Naa Pueyaso tojijia nia quishacaritij, nojuajaari nia jiyatenutaniya seetanujanaa maninia miijiaca nia quiniuria. Naacuajitij, niaari pueyaracaanu shuquiriaatia rishijiaca quiniutianiyajuhuj. <sup>23</sup> Saniniuujia, sesoriquia pueya miiniuucua sesa saaja, nojoriiri naa na miiniuucua shaajasaanutaniya. Saniniuujia, saaja Jesucristoocua tiuujia pa quishacari, Pueyasoori saa cunoraja pa jiyatequiaa pueyaracaanu rishijiaca pa quiniuria, pa Jiyaniijia Jesucristo rupuejaca pa quishacari.

## 7

### *Paari juhua camishanoni*

<sup>1</sup> Pueyanaa, niaacuajaari Moisés Rootasano niishijiaca. Naaari niishiya-juhuj, paa jaara shaajequeeni, paari jiyacari Moisés Rootasano cartequese shushani. <sup>2</sup> Naajuhuj, paacuajaari rootasaaquiaarini, maaji jaara camishano quiri, cuara tamonu cayata quiyaquiri, neyaca jaara saminio quiyaja. Neyaca jaara cusoyare, caminio pueyara Moisés rootasanoori maja tari na quiniu cuno mashiquio tojishocoriquiano. <sup>3</sup> Saniniuujia, maaji jaara tamonu pueyanota quiriquia neyaca quishacarijia saminio, cuno maajiiri sequeshiya paanatuta, naa na quiniuucua tamonu pueyanota. Saniniuujia, neyaca jaara cusoyare, mashiquio camishacari tamonu pueyanota, naajaa, majaari Moisés Rootasano tojiyashijia na quiniu cunora. Nojuajaari maja paanatu, naa na miishacari.

<sup>4</sup> Naaari naajuhuj pueyanaa. Jesucristo cusonuucua pa niti, niaari juhua cusonuquiaarijuhuj, maja Moisés Rootasano tojijia nia quiniuria socua. Naacuajitij, niaari tamonu tojijia quiya cutara. Nojuajaari

pa Jiyanijia Jesucristo, nooj, macujiniji samiitiaquiaarihuatej. Naacuajitij, quiarijia pa Jiyanijia Jesucristo tojijiaca pa quishacari, paari maninia miijiaca Pueyasorani. <sup>5</sup> Tarijia, Pueyaso tojiyashijiaca pa quishacarijia, Moisés Rootasano pa niishishacari maja quenaaja pa miiniuria sesa casaa, cuno rootasanoori saaja juhua socua pa shiniujuquiaari sesa pa miiniuria. Naacuajitij, tama sesa pa miishacarijiaaja, paari tama pa cuaqueyajaaja jiyateriquiaa saniitiosano pa quiniuria maquesaashijia mani quiquiojiniani. <sup>6</sup> Tarijia, paari juhua quioosano pueya Moisés Rootasano tojitishaquiaarini. Saniniuujia, Jesucristota pa cusonuucua, nojuaja jaara pocuara cusoquiaari, paari tari Moisés Rootasano tojiniu cartequiaarini. Moisés Rootasano pa tojiyaquishacari quiarijia, naacuajiti pa naata Pueyasojuanaa tojiniu shitimia cutara, na Sohuanu cumaquishacari pajaniya. Majaari juhua tarijia pueya miishano. Tarijia, paari Moisés Rootasano tojitiajaca quiquiaari maniniani, pa puerenuta paa mariqui saniitiosaareeri pa tojiyaquiniuucua niquiriyatu queraatia na rootasanojiniji.

### *Poojiaari saa sesa miiniu niishijiaja*

<sup>7</sup> Tamasaca naasucuaari jiyaniya janiyari Moisés Rootasano soojeani. Maja. Quiria, jyanohua maniniacuajaari Moisés Rootasano. Moisés Rootasanojiniji, paacuajaari niishiyani paari sesa miijiacani. Moisés Rootasano jaara quiaquiriquia, janiya maara niishiyaquiquiaarini, cua jiaatiasacari tamasaca jiatiasano casamiicua, cunoori sesa Pueyasora. <sup>8</sup> Saniniuujia, Moisés Rootasanojiniji cua niishishacari maja tamasaca casamiicua cua jiaatianura, janiyari saaja juhua shiniujiushaquiaarini casamiicua jiaatiaja cua quiniuria socuani. Naacuajitij, Moisés Rootasano cua niishiyaquishacarijia, coojiaari juhujaniya quiquiaari juhua maqueja. Saniniuujia, janiya jaara Moisés Rootasano niishiquiaarini, coojia sequeeri juhua niucuaquiaari, puetunu sesa casaajanaa na miiniu paniniuria. <sup>9</sup> Moisés Rootasano cua niishiyaquishacarijia, janiyari juhujaniya quijia quiquiaarini. Saniniuujia, Moisés Rootasano cua niishishacari, janiyari jyanohua taraajequiaarini, cua niishishacari janiyari jyanohua sesa miijia Pueyaso niquirarani. <sup>10</sup> Naa sesa miijia cua quishacaritij, janiyari niishiquiaarini, janiyari quera jatashiya saniitiosocoriquianoni. Janiya jaara Moisés Rootasano tojiquiaari shushajanaani, janiyari jyaniquiaarini, janiya jaara cuno rootasano tojirini, janiya naasucuaari pueyaracaanu rishijia quiniutianiyani. Saniniuujia, Moisés Rootasanoori saaja cucuara tonujuquiaari puetunu sesa cua miishanojinijijianaa. <sup>11</sup> Naacuajitij, janiyari jyanohua jiyajenequiaarini, cua jyanishacari cua naatacuaja Moisés Rootasano tojiniu maninia, Pueyaso jyanooniuria janiya. Jaara maja cua naata quiquiaari Moisés Rootasano cua tojiniuria maninia, janiyari niishiquiaarini Pueyasoori cua jyanoyaquiniutianiya.

<sup>12</sup> Seetanujuanaa nia sequeyanijia pueyanaa, Moisés Rootasanoori jyanohua maninia. Tojetaarucujanaa maninia rootasano. Cunoori seetanujuanaa rupaa maniniu Pueyasojiniji. <sup>13</sup> Moisés Rootasano jaara naa maninia quiri, ¿janiyateeri nia sequeyani cuno na rootasanoori pa cusojuaja? Maja. Janiyari nia sequeyani, Moisés Rootasanojiniji, paari niishiyani sesa pa miishano cutaraari jyanohua sesa Pueyasora. Naacuajitij, paari Moisés Rootasanojiniji niishijiani, paari puetunujuanaa jatasocoriquiano quijia juucuan, seetanujuanaa sesa miijiaca pa quiniuucua.

<sup>14</sup> Paacuajaari niishiyani, Moisés Rootasanoni, cunoori maja nareja pueyano niishitiojosano. Pueyaso niishitiojosanocuajaari pa tojihocoriquiano puetunu poojatajanaa. Saniniuujia, coojiaari Pueyaso

tojiyashijia. Janiyari tamajaaja juhua coojia seruni, na panishano cua miiniuria. Naa sesa jiuujiaraca cua quishacaritij, majaari cua naata Moisés Rootasano tojiniu. <sup>15</sup> ¿Casaara naa sesa cua miiquiaani? Janiyari saaja cua niishishano sesa casaa miiquiaani. Majaari maninia cua miiniu quiquiaa, taa cua paniyacujani. <sup>16</sup> Janiya jaara cua panishoo sesa casaa miirini, naacuajitij, janiyari sequequiaani, Moisés Rootasanoori seetanujuanaa maninia. <sup>17</sup> Naa cua panishoo sesa casaa cua miishacaritij, cunoori maja tama cua miishanojuaaja. Cuno sesa cua miishanoori coojiajiniji supueno tamajaaja. <sup>18</sup> Quiarijia niishiya cutaranijia, coojiaari tojetaarucujanaa sesa miiniu niishijia. Naacuajitij, janiyari juucua maninia miiniuucua jiaatiaquiaani. Naajaa, majaari cua naata quiquiaa maninia cua miiniuria tamajaaja. <sup>19</sup> Naacuajitij, cua miishanoori maja maninia, taa cua miiniu paniquiaa juucucujani. Cua miishanoori saaja cua miiniu paniyaquishoo quiquiaa. <sup>20</sup> Naacuajitij, janiya jaara cua panishoo sesa casaa miirini, janiyari niishiyani, cunoori tama coojiajiniji supuenojuaaja, majaari tama cua miiniu panishanojuaaja.

<sup>21</sup> Quiarijia niishiya cutaranijia, janiyari naa sesa miijiani: janiya jaara maninia casaa miiniu paniyani, janiyari saaja sesa miiquiaani. <sup>22</sup> Janiya cutaraari niishiyani Pueyaso rootasano Moisésri seetanujuanaa maninia cua tojishocoriquiano. Na tojiniuucua jiaatiaquiaa juucuanijia. <sup>23</sup> Janiyari niishiyajaanihuaj, coojiaari juhua cua niishitiaja paraca quiya. Naacuajitij, cua niishiriojosacari, “Maninia miiniutianianijia”, coojiaari saaja sesa cua miitiquiaa. Naacuajitij, tama janiyajaarijia juhua coojia seruni, cua miishacari puetunu sesa na panishanojuanaa.

<sup>24</sup> ¿Taa cua miiniutianiya socuaarini? ¡Tojetaarucujanaa tاراatia quijianijia! Pueyaracaanu sesa miijianijia. Majaari cua naata tamajaaja maninia miijia cua quiniu. Naa sesa miijia cua quishacaritij, cua cuaqueyari macu quiriquiano. ¿Cante na naata cua jataniniuni, naa sesa miijia cua quishacaritij? <sup>25</sup> ¡Pueyaso shuquiritiaanijia cua niishishacari, nojuacujaaari cua Jiyaniijia Jesucristota cua jataniniutianiya tojetaarucujanaa maninia miijia cua quiniuria! Naacuajitij, mijiria cua quishacarijia, janiyari Pueyaso tojjia quiniu paniyani. Saniniuujia, naa coojia quiniuucua sesatej, saaja sesa cua miitiniu paniquiaari.

## 8

### *Pueyaso Sohuanu pa tojishacari, paari maninia miijia quiniutianiyani*

<sup>1</sup> Pa rupuesacari Jesucristo, nocua pa tiushacari, Pueyasoori pa jiyanooquiaa. Naacuajitij, paari tojetaarucujanaa jiyanooshano quiyani. <sup>2</sup> Puetunu pueyajanaari cusonuuriquiano quijia, sesa miijiaca nojori quishacari. Saniniuujia, Jesucristo pa rupuesacari, Pueyaso Sohuanuuri pa jiyatequiaa saaja maninia miijiaca pa quiniuria. Naacuajitij, majaari tari sesa miijiaca pa quiniu pa saniitiosaanura. <sup>3</sup> Moisés Rootasano pa tojishacari juucua, majaari pa naata quiniu jiyanooshano. Cunoori saaja sesa miijiaca pa quiniuucua. Naaratej, Pueyasoori Neyanujuanaa jiyaroquiaari mijiria, pueyano na quiniuria juhua pajaniya, pa niti na mosaanura. Naacuajitij, Jesucristo jiiitasacari juhua pa cuaqueyajuhua, Pueyasoori juhua sesa miijiara na jiyatequiaari, pa niti na saniitiosocoriquiano. <sup>4</sup> Naacuajitij, Pueyaso Sohuanu pa jiiitasacari quiarijia, pa naata maninia miijiaca quiniu, taa Moisés Rootasano sequeyacujani. Pueyaso Sohuanu tojjia pa quishacari, majaari tari pa quiniu sesa miijiaca, taa pa quiquiaari tarijacujani.

<sup>5</sup> Canapuate tama na panishanojuaaja miiquiaani, nojoriiri tama na cuaqueyajaaja shuquiritiniuria jiaatiaquiaa. Saniniuujia, canapuate Pueyaso Sohuanu tojijiaca cutarani, nojoriiri saaja Pueyaso shuquiritiniuria jiaatiaquiaa. <sup>6</sup> Tama na cuaqueyajaaja shuquiritiniuria jiaatiajacaari saaja shaajecoriquiano cutara. Saniniuujia, Pueyaso shuquiritiniuria jiaatiajacaari pueyaracaanu rishiriquiano cutara. Nojoriiri juhuajaniya shuquiriaatia quijiacajuhuaaj. <sup>7</sup> Cante tama na cuaqueyajaaja shuquiritiniuria jiaatiaquiaani, nojuajaari Pueyaso paraca. Majaari Pueyaso tojijia na quiniu paniniu. Seetanujuanaa majaari na naata Pueyaso tojijia na quiniujuhuaj. <sup>8</sup> Naacujitij, canapuate saaja tama na cuaqueyajaaja shuquiritiniuria jiaatiaquiaani, cuno pojoriiri maja na naata Pueyaso shuquiritiniu.

<sup>9</sup> Niajaniya cutaraari maja nia quiniu juhua cuno pojorijia, tama na cuaqueyajaaja shuquiritiniuria jiaatiajacani. Niaa cutaraari Pueyaso shuquiritijia, Pueyaso Sohuanu cumaquishacari niajaniya, nojuaja jaara seetanujuanaa nioojiajinia quiya. Cante Pueyaso Sohuanu jiiitiaquiyani, nojuajaari maja Pueyaso pueyano. <sup>10</sup> Cristo quishacari poojiajinia, pa sohuanuuri tari jatanishano quiya maninia miijiaca pa quiniuria, pueyaracaanu rishijiaca pa quiniuriajuhuaj. Pa cuaqueya cutaraari shaajascoriquiano, sesa miijiaca pa quiniuucua. <sup>11</sup> Naajaa, Pueyaso Sohuanu jaara poojiajinia quiya, nojuajaari pa cuaqueya samiitianijionutaniuhua, taa na samiitiani quiaariuhua macujiniji Jesucuaani.

<sup>12</sup> Naa Pueyaso miishacari maninia pajaniyatej, maninia miijiaca pa quiri Pueyaso Sohuanu cumaquishacari pajaniya. Maja cumaati tama pa cuaqueyajaaja pa shuquiritiniuria pa jiaatianu tari, taa pa miiquiaari tarijiacujani. <sup>13</sup> Cante naa miijiaca quiyajaani, nojoriiri shaajasaariquiano. Saniniuujia, niaa jaara Pueyaso Sohuanu cumaacata rejeretariquia saaja tama sesa nia cuaqueya miiniu panishanojuaaja, niaa cutaraari pueyaracaanu shuquiriaatia quijiaca quiniutianiya.

<sup>14</sup> Canapuate Pueyaso Sohuanu tojitiajacani, nojoriiri Pueyaso niquiohua cutara. <sup>15</sup> Pueyaso Sohuanucujaaari pa jiyatequiaari Pueyaso muerasuniyojua pa quiniuria. Naacujitij, cuno pa jiiitasano Sohuanuuri Pueyaso pa sequetequiaa, “cua Quenaa”. Naa Pueyaso muerasuniyojua pa quishacaritij, majaari tari pa puerenu paari saniitiosaanutaniyani, Moisés Rootasano pa tojiyaquiniuucua. <sup>16</sup> Pueyaso Sohuanuuri pa sohuanu rupuequiaa, na niishitiniuria pajaniya, paari Pueyaso muerasuni. <sup>17</sup> Naa Pueyaso muerasu pa quishacaritij, puetunu Pueyaso jiiitasanojuanaari pa jiiitasano quiniutianiyajuhuaaj. Pueyasoori Neyanu Jesucristota pa cojiritianutaniya na maninia na miiniuria pajaniya, paa jaara naquiya miiniu rejeretajaca quirini, Jesucristoocua tiuujia pa quiniuucua. Paa jaara naquiya miishaare nocuara mijiriani, paari jiyanojua maninia quijiacara jiyatesaanutaniyani juhua nojuajuhuaaj.

#### *Pueyasoori maninia miiniutianiya na muerasu*

<sup>18</sup> Quiarijia mijiria naquiya pa miiniuni, cunoori saaja rupaquijia. Janiyara, naajaa, cua niishishacari naa naquiya pa miiniu nuhuajitij, paari jiyanojua maninia miishaanutaniyani, pueyaracaanu shuquiriaatia pa quiniuria. <sup>19</sup> Quiarijiani, puetunu Pueyaso shipinishano casaajanaari pa niquiniuucua jiaatiaa paa jaara quiariniora jatanishaareni. Na niishiniupaniyari taamueca quijiacara Pueyaso jataniniutianiya pajaniya na cumaacatani, tojetaarucujanaa maninia jeenucuasano na muerasu pa quiniuria. <sup>20</sup> Coteenujuanaa pa supuetana pueyano jaara juhuacatecara sesequiaari,

jiyacaritij, puetunu Pueyaso shipinijosano casaajanaari sesequiaarijuhuaj. Majaari na sesenu quiquiaari tama na panishacarijaaaja. Pueyasocua-jaari naa paniquiaari sesa na quiniuria, na shipinishano pueya sesenuucujuhuaaj. Naajaa, majaari pueyaracaanu sesa na quiniu quiniutianiya. <sup>21</sup> Pueyaso muerasu jaara jatanishaare shacantuuca quijiaca pa quiniuria, jiyacaritij, puetunu Pueyaso shipinijosano casaajanaari pata cojiritiasaanutaniya jeezanujuhuaaj. Naacuaajitij, puetunu Pueyaso shipinijosano casaajanaari maninara quiniutianihua, maja na sesenura socua. <sup>22</sup> Quiarijiani, puetunu Pueyaso shipinijosanojuanaari jiyanoehua noojia niojiya taraatia na quishacari. Quiatojiyari juhua maaji noyano, cuaara quiariniora jatanishaarejaatijia. <sup>23</sup> Majaari saaja puetunu Pueyaso shipinishano casaajanaa quiatojonu, poojiaari juhua quiatojiyajuhuaaj, na panishacari tojetaarucua-janaa jatanishano quijiaca pa quiniuria. Paacuajaari tari jiiitiaa Pueyaso Sohuanu poojiajiniani, pa niishiniuria, paari seetanujuanaa Pueyaso muerasuni. Saaja pa cuaqueya cutaraari juhuanojua jatanishoojua. Paari cunora quiatojiyajaani. <sup>24</sup> Paacuajaari tari Pueyaso muerasu quiyani. Jesucristo cutaraari pa saquiriojoquiaari shacantuuca quijiacara pa jatanishaanura. Paari naa na jataniniuria pajaniya sashiyajaani. Pa cuaqueya jaara tari jatanishano quiriquia, paa maara na jataniniuucua jiaatiaaquirini. Paa jaara tari jiiitariquia pa panishanoni, ¿paatucua casaara nocua jiaatiare socuani? Pa cuaqueya cutaraari juhuanojua jatanishoojua. <sup>25</sup> Naajaa, paacuajaari niishiyani pa cuaqueyari jatanishaanutaniya, jiyocuacaanu pa rupuenura pa Jiyaniijia. Cunora, paari mijiria taraatia pa quishacari juhua-janiya rejeretaquiaani pueyaracaanu pa sashishacari.

<sup>26</sup> Naa rejeretajaca pa quishacari mijiria pa sashishacari pueyaracaanutej, Pueyaso Sohuanuuri pa cumaquiquiaa, cumueeca pa quiyaquishacari. Naacuaajitij, Pueyaso pa secojosacari, pa niishiyaquishacari casaacuara pa secojonutaniyani, Pueyaso Sohuanucuaajaari poojiajiniji Pueyaso secojoquiaa pocuara. Jiyanoehua na secojosacari pocuara, jiyasohua quiatojiya poojiajiniaari. <sup>27</sup> Poojia niishijia Pueyasoni, nojuajaari niishiyacuaja casaa na Sohuanu secojiya nojuaja pocuarani. Na Sohuanucuaajaari maninia secojojua cutara, taa Pueyaso miiniu paniya na muerasuracuajani.

### *Jesucristo pa shocotanijia cutara*

<sup>28</sup> Paacuajaari niishiyani, paa jaara maninia miishaareni, paa jaara sesa miishaarejuhuaaj, Pueyasoori puetunu cuno miishanojuanaa jiyatequiaa saaja maninia na quiniuria na panijiacara. Nojuacuajaari pa saquiriojoquiaari na muerasuniyojua pa quiniuria. <sup>29</sup> Naajuhuaaj, jiya shipiniyaquishacarijia, Pueyasoori tari niishiquiaari na panishano pueyarano. Pueyasoori jiyacari sequequiaari cuno pojoriiri juhua Neyanu Jesucristo quiriquianojuhuaaj. Naa sequequiaariiri Jesucristo quiniuria pa puerana, queraatia tapueyocuacaraca na quiniuria. <sup>30</sup> Naacuaajitij, canapue Pueyaso saquiriojoquiaari na muerasu nojori quiniuriacuajani, juhua Jesucristo nojori quiniuriajuhuaaj, Pueyasoori cuno pojori niishitiquiaa nojori tiuuniuria Neyanuucua. Jesucristoocua nojori tiuushacari, Pueyasoori nojori jiyatequiaa juhua sesa miyashijiacara. Jiyanooshano nojori quishacari, Pueyasoori nojori niquitioquiaa na Sohuanu, na Sohuanu jataniniuria nojori shacantuuca quijiaca nojori quiniuria juhua Neyanu.

<sup>31</sup> Naa Pueyaso miishacari maninia pajaniyaratej, ¿taa pa sequeyani? Pueyaso jaara pa jiyano quiya, ¿tamonute na naata sesonu pajaniya? ¡Maja!  
<sup>32</sup> Pueyasoori jiyanoehua pa panijia. Nojuajaari Neyanuniyojua jiyaroquiaari pocuara mosocoriquiano. Nojuaja jaara Neyanu jamueyaquiquiaaricuaa,



¿maatucua casaara quiaríjia niqúitioyaquíri puetunu pa panishanojuanaani?  
<sup>33</sup> ¿Cantucua Pueyaso saquíriojosano pueyacuara saquíriojotare sesa nojori miishanoni? Pueyasojuanaacuajaari pa jiyatequiaari juhua sesa miyashijí-aca pa quiniuria. <sup>34</sup> Jesucristocuajaari tari cusoquiaari pa niti. ¿Cantucua saniniuuíjia quiaríjia Pueyaso sequeriquia pocuarani: “Cuno pojori quia shaajare”? Pocuaji Tacunacuajaari samiítiaquiaariuhua. Quiaríjia na Que Pueyaso miaquetajara cajiyari, pocuara na Que na secojonura pueyara-caanu. <sup>35</sup> Nojuajaari jiyanoíhua pa paníjia. ¿Tamonu casaate na naata Cristo tarinitiniu maja na paniniuria pajaniya? ¡Majaari quenaaja casaa quiniu na tarinitiniuria nojuaja! Naaratej, majaari nía jiyaniniu Cristo pa paniyaquíya, paa jaara taraatia miishiyani, paa jaara casaacua tacayani, tamasaca jaara naquíya miya pajaniyani. Naajuhuaíj, paa jaara quera titiacoya pa miaajenutani, majaari nía jiyaniniu Cristo pa paniyaquíyani, naajuhuaíj, paa jaara toqueeju quiyani, paa jaara cocuaatia miyani, paa jaara miananajoshiya monurajaniuhuaíj. Puetunu niojuanaari maja na tarinitiniu Jesucristo, na paniyaquíniuria pajaniya. <sup>36</sup> Paacuajaari taraatia miishocoriquianoni, naatej, taa tariucuacaanu Pueyaso Rupaaíjnia naajio-tasano quiyacuajani. Naa sequeyari:

“Canaa Pueyasonaa, canaari puecooshiya pueyaracaanuni, quia tojítiájaca canaa quiniuucua. Nojoriíri juhua miaquesocoriquiano borregohua canaa puecooquíaa juhuaíjaniya”.

<sup>37</sup> Paari naa miishaaquíaaíjaniuhuaíj. Naajaa, naa taraatia pa miishacari-tíj, Jesucristo panishacari pajaniya, nojuajaari shocotajacara pa jiyatequíaa. Naacuajítíj, majaari saaja pa rejeretanu naquíya pa miishacari. Jesucristoori seetanujuanaa cuno naquíya pa miiniu jiyatequíaa maninia na jeečanura pajaniya, juhua nojuaja pa quiniuria socua. <sup>38</sup> Seetanujuanaa niishiyaniíjia, Pueyaso panishacari jiyanoíhua pajaniya, majaari quenaaja tamonu casaa na naata rupatanu pajaniya Nojuajíníjia. Paa jaara quiri saminiójuani, macu soj, naajaa, pa paníjia Pueyasocuajaari pata quiyajaa. Naajuhuaíj, Pueyaso seya, samaruhuanio, puetunu cunojuanaari maja na naata pa rupatanu Pueyasooquíjia. Naajuhuaíj, majaari quenaaja tamonu cumaacaraca quíjia na naata pa rupatanu Pueyasooquíjia. Pueyaso paniniu pajaniyani, cunoori maja na puequenu quiniutianiya quiaríjia, tamacarinio. <sup>39</sup> Naajaariuhuaíj, tee pa quiyani, jiyocuacaanu, jíya cariquimia soj, naajaa. Pa paníjia Pueya-soori tíi quíya pataíjuhuaíj. Naacuajítíj, pa Jiyaniíjia Jesucristota rupuetootesano pa quishacari, puetunu Pueyaso shipiníjiosano casaajanaari maja na naata pa rupatanu Pueyasojíníjia.

## 9

### *Pueyasojuanaari pueya saquíriojojua na pueyara*

<sup>1-3</sup> Naa Pueyaso pueyano cua quishacariíj, janiyari jiyanoíhua cuarta Israel pueyacua taraajequiaani, nojori tiyaquíniuucua pa Jiyaniíjia Jesucristoocua. Janiyari pueyaracaanu nojoriícuua taraajequíaa jiyanoíhuani, maja cua naata quishacari cuarta Israel pueya tiuutiniu Jesucristoocua. Seetanujuanaa nía sequeyaníjia, Pueyaso jaara na naata quiri mani quiquiojínia na jatanura janiya nojori niti, janiya maara sequereni, maniacua-jaari naa cua miishaanura. Nojori jaara na naata quiri Jesucristoocua rupuetesaanu cua niti, janiya maara Pueyaso sequereni: “Cua rupatare cutara Jesucristojíníjia, saniya cuarta Israel pueya jíyatesaanura Pueyaso muerasura cutara”. Naa cua sequesacari niajaníyatej, janiyari coojiaíjnia



niishiyani, seetanujuanaari cua sequesano. Pueyaso Sohuanuuri cua niishiyajuhuaaj majaari cua sapojonu. <sup>4</sup> Cuarta Judiocuacaari pa supuetana Israel niquiohuacuajinio supueno pueyacuaja. Pueyasoori nojori jiyatequiaari na muerasu nojori quiniuria, nocua nojori tiuushacari. Pueyasoori nojori niquitiquiaari shacantuuca na cumaaca, tariucuacaanu nojoritia na quishacari. Pueyasoori nojori sequequiaari: “Janiyacuajaari Pueyasoni. Niaari cua pueya quiniutianiya niaa jaara cucua tiuuri”. Naajuhuaaj, Pueyasoori Moisés niquitioquiaari caapiqui saajianecua na naajiosano, saniniuujia Moisés niishitiojonura tiji nojori. Pueyasoori nojori niishitiquiaarijiuhuaaj taa nojori miiniutianiyan, tariucua jiyanooshano nojori rerejonura na niquiara. Pueyasoori nojori sequequiaarijiuhuaaj, nojuajaari puetunujuanaa na sequesano Abraham tohuateenutaniya nojoriria. <sup>5</sup> Israel pueya supuetanaari quiquiaari Abraham, Isaac, Jacobonio. Pa Jiyaniijia Cristoori cuno pojori niquiohuacuajinio supuequiaari. Nojuajaari tari jiyatesaaquiaari Jiyaniijiajanaa na quiniuria, puetunu casamijianaa jiitiana na quiniuriajuhuaaj. Nojuajaari Pueyasojuhuanajaj, juhua na Quejuhuaaj. ¡Nojuaja cuara pueyaraacaanu maniniuhuaqueetasano quiiria! ¡Cuara naa quiiria pueyaracaanutej!

<sup>6</sup> Quiarijiani, queraatia parta Israel pueyajinijinio pueyari maja Pueyaso muerasu. Naa cua sequesacari nijaniyatej, majaari nia jiyaniinu tariucuacaanu Pueyaso sequesano pa supuetanaari tohuateyaquiniutianiya. Maja pueyanaa. Tohuateenutaniyanocuaja. Jaara naa quiriritij, ¿casaara puetunu Israel pueyajanaa maseyaquiniutianiya Pueyaso sequesano nojoriarini? Cua tojitiare pueyanaa. Puetunu pa supuetana Israel niquiohuacuajinio supueno pueyajanaari maja seetanujuanaa Israel pueya Pueyasora. <sup>7</sup> Naajaariuhua Abraham niquiohua. Puetunu Abraham niquiohuajanaari maja seetanujuanaa Abraham niquiohua na quiniu quiquiaari Pueyasora. Pueyasocuajaari naa sequequiaari Abraham: “Cua sequesano quiajanitari saaja quia niyanu Isaaccuajinio supueno pueyarano quiniutianiya cutara”.

<sup>8</sup> Naa Pueyaso sequesacari Abrahamtej, naacuajiti paari niishiyani, majaari puetunu Pueyaso saquiriojosano pueyacuajinio supueno pueyajanaa seetanujuanaa Pueyaso muerasu. Saniniuujia, seetanujuanaa Pueyaso muerasu cutaraari noo pojori, Pueyaso sequesanoocua tiuujiacatej, taa pa supuetana Abraham tiuquiaari Pueyaso sequesanoocuaacuaani. Pueyasora, nojori cutaraari Abrahamcuajinio supueno pueya. <sup>9</sup> Abrahamri Pueyaso sequesanoocua tiuquiaari, Pueyaso jaara naa na sequequiaari: “Abrahamnaa, janiyari quiocua tacatenutaniuhua tamacarini. Janiyari jiyacari quia niquio Saara riuriatanutaniuhua tariucua mueyaracani”. Naacuajitij, Isaac jaara rasaaquiaari, Pueyaso sequesanoori tohuateequiaari. Naacuajitij, puetunu Abraham niquiohuajinijiniojuanaani, saaja Isaacri Pueyaso saquiriojosano pueyano quiquiaari.

<sup>10</sup> Naa quiquiaarijiaariuhua Isaac niquiohua. Isaac jaara neco Rebeca manajoquiaari, Rebecaari caapueya manajequiaari. <sup>11-13</sup> Cuno caapueya royaquishacarijia, juhuanajuaja nojori niishiyaquishacari maninia miiniu, sesa soj, jiyacariti Pueyasoori na nucua sequequiaari: “Janiyari quia jiyapueranu jiyatenutaniya na nuhuajishana tojjiarani”. Naa Pueyaso sequesacaritij, cunoori juhua Pueyaso sequesano tariucuaacaanu. Naa sequequiaari cuno royaquishoojua caapueyajiniiri: “Jacoboori cua panishano quiniutianiya. Esauuri saniniuujia cua soosano quiniutianiyacujua”.

Naa Pueyaso sequesacaritij, paari niishiyani, Pueyasoori saquiriojoquiaa cana na saquiriojonu paniyacuajani, tama na miiniu panishanojuaja na

tohuateenura. Naacuajitij, Pueyaso jaara saquiriojore pueya, nojuajaari maja na niishiriojonu nojori miishanojiniji; maninia, sesa soj.

<sup>14</sup> Naa Pueyaso miishacari tama na panishanojuaajatej, ¿taa pa sequeyani? ¿Pueyasote sesa miya, naa rimiajata na saquiriojosacari pueyatej? Maja.

<sup>15</sup> Pueyasocuaajaari naa Moisés sequequiaari:

“Janiyari pueya jiyanooniutianiyani teyano pueyano cua jiyanooni paniyacuajani. Naajuhuj, janiyari pueyanooocua taraajenutianiyani, teyano pueyanooocua cua taraajenu paniyacuajani”.

<sup>16</sup> Naacuajitij paari niishiyani, pueyano maja na naata tama na cuaqueya-jaaja jiyatenu Pueyaso pueyano na quiniuria. Pueyasocuaajaari tama saquiriojoquiaajaaja cana na jiyanooni paniyani. <sup>17</sup> Naajuhuj, tariucuaaanu Pueyaso sequesano Egipto jiyaniijaraari naa naajiotasano quiyajuhuj:

“Faraónnaa, janiyari quia jiyatequiaari Egipto pueya jiyaniijia quia quiniuriani, cua cumaacata cua miijosano cua niquitiniuria quiajaniya. Naacuajitij, puetunu jiyacajinia quiniaa pueyapuejanaari niishiniutianiya, janiyari Pueyasojuanaa cutarani”.

<sup>18</sup> Naacuajitij, paari niishiyani, Pueyasoori taraajeja teyanoocua na taraajenu paniyani. Naajaariuhuj, nojuajaari na tojiyashijia pueyano jiuujia jiyateja cumajiuujiaacara, teyano pueyano jiuujia na jiyatenu paniya naaracuajani.

<sup>19</sup> Naa cua sequesacari niajanijatej, tamonu naasucuaari sequenutaniya: “Pueyaso jaara naa miiquiaa taa na miiniu paniquiaacuajani, ¿maatucua casaara sesa pa miiniuucua pa saniitioeni? ¿Canteeri na naata Pueyaso tarinitiniu na miiniu panishanojinijini?” <sup>20</sup> Majaari naa sequenu pueyanonaa. ¿Canteeri quiajanianiyani, naa quia juaaniuria Pueyasotej? Paacuajaari na shipinishano pueyani. ¿Taa nia sequeyani? Marau jaara pocuanu niishiriquia, ¿nojuajate na naata na paninia juaaniu: “Juaashiquiaracanaa, ¿casaara quia panirii conatura janiyani?”

<sup>21</sup> Paniyojojuacuajaari na naata paniniu maraujiniji na panishano casaa, shanohua pataconiyojua, mashaca quiquiora manijinia cajitiariquiano conatunio.

<sup>22</sup> Naajuhuj, ¿taa pa sequenutaniyani, Pueyaso jaara niishitiniu paniya na juaaniu, na cumaacanio, na saniitiosacari sesa miijiaca? Naajaa, Pueyasoori jiyanoohua rejeretaquiaa sesa miijiaca, cante tari saniitiosocoriquiano quiyacujani. <sup>23</sup> Pueyasoori naa tarishiyajaara na saniitionura na tojiti-aashijia pueya. Naa na tarishishacaritij, nojuajaari pueya niishitiquiaa na shacantuuca cumaaca, maninia na miishacari na jiyanooshano pueya, cante tari saquiriojosano quia na shuriucua quiriquianocujani. <sup>24</sup> Paacuajaari cuno jiyanooshano pueyani, canapue tari Pueyaso saquiriojoquiaaricujani Judioacuajinijinio, taucuacajinijinionio. <sup>25</sup> Naa naajiotasano quiyacujani Pueyaso sequesano supuetana Oseas naajionejinia:

“Cante cua pueya quiaquiquiaarini, janiyari nojori sequenutaniyani: ‘Niaari cua quiquiohuanijojua’. Naajuhuj, cante cua shuquiritiasoo pueya quiquiaarini, nojoriiri cua timitiasano pueyara quiniutianiya”.

<sup>26</sup> Naa naajiotasanoori quiyajuhuj:

“Tee cuniqui naa pueya sequesaaquiaricujani: ‘Niaari maja cua pueya’, nojoriiri cuniquijia jiyaniquishaanutaniya: ‘Niaari Pueyaso niquihuajanaa cutara’ ”.

<sup>27</sup> Saniniuujia, supuetana Isaíasri naa sequequiaari Jacobo niquihuacuajinio supueno pueyajiniji:

“Israel pueyari jiyanoehua canenutaniya, juhua shoniniacu caminia shuriuquioco paajia jaaquia, serojosoo. Saniniuujia, saaja secaja nojorijinijinioori Pueyaso pueyara jatanishaanutaniya. <sup>28</sup> Pueyasoori mijiriara na sequesano tohuateenutaniya. Majaari na tarishiniu quiniutianiya”.

<sup>29</sup> Supuetana Isafascuajaari naa sequequiaari tarijiajuhuaj:

“Pa Jiyaniijia Pueyaso jaara Israel pueya niquiohua jiyanoyaquiquiaari, Israel pueya maara quiaritia quiyaquiri. Maara tari shaajasaa-canu tojetaarucuajanaa, naatej, taa Sodoma tiacajinia quiniaa pueya puecoosaaquiaaricuaani, Gomorra tiacajinia quiniaa pueyanio”.

### *Judocuacaari Pueyaso rupaacua tiuyashijiaca saaja*

<sup>30</sup> Naa cua pohuatasacari niajaniya tariucuacaanu Pueyaso Rupaajinitij, paari quiaritia nio niishiyani: taucuacaari maja quenaaja na tacaaniu quijia taate nojori naata Pueyaso jiyanooshano quiniuni. Nojoriiri juhuajaniya quijia saaja. Naajaa, quiaritia, Pueyasoori nojori jiyatequiaa juhua sesa miyashijiacara, saaja Jesucristoocua nojori tiushacari.

<sup>31</sup> Israel pueyari saniniuujia jiyanoehua Moisés Rootasano tojjijaca juucua, nojori jiyaniushacari Pueyaso naasucuaari naa nojori miishacari nojori jiyanooniutianiya. Majaari Pueyaso jiyanooni quijia nojori. <sup>32</sup> ¿Niaate niishiya casaara Pueyaso jiyanoyaquiquiaari nojorini? Pueyasoori nojori jiyanoyaquiquiaari nojori tiuyaquiniucua nocua. Nojoriiri jiyaniquiaari tama nojorijiaaritia na naata tama nojori cuaqueyajaaja jiyatenu juhua sesa miyashijiacara, Moisés Rootasano nojori tojjishacari. Naaratej, majaari nojori tiuuni quiquiaa Jesucristoocua. Nojoriiri saaja na sooquiaa. Naacuajitij, Jesucristoori juhua saajia nojoriria, nocua nojori tiuriiniuria. <sup>33</sup> Jesucristojiniji miriqui Pueyaso sequesano cuajaari naa naajio-tasaaquiaari tariucuacaanu, Jesucristo niyacaritia:

“Cua tojitiare. Janiyari Sión tuhuananuucua nianutaniya saajiani, pueya tiuriiniuria nocua. Saniniuujia, cante nocua tiuyani, nojoriiri puetunu Pueyaso sequesanojuanaa na muerasurano masenutaniya”.

## 10

<sup>1</sup> Cuarta Pueyaso muerasunaa, janiyari jiyanoehua Pueyaso secojoquiaani parta Israel pueyacuara, Jesucristoocua nojori tiuuniuria, Pueyaso pueya nojori quiniuriajuhuaj. Janiyari jiyanoehua nojoriicua tacayani.

<sup>2</sup> Janiyacuajaari seetanujuanaa niishiyani, Israel pueyari seetanujuanaa Pueyaso panishano miiniu panijia juucua, na muerasu nojori quiniuria. Nojoriiri naa miiquiaa najuhuanaj, nojori niishiyaquishacari maninia.

<sup>3</sup> Nojoriiri saaja sequequiaa, majana Pueyaso naata pueya jiyanooni saaja nojori tiushacari nocua. Naaratej, nojoriiri jiyanoehua saniniuujia quiaa maninia nojori quiniuria Pueyaso niquiara tama nojori miishanotajaaja. Naacuajitij, nojoriiri Jesucristoocua tiuyaquiquiaa Pueyaso jiyanooniuria nojori. Pueyasojuaari Cristo jiyatequiaari pa niti mosocoriquiano.

<sup>4</sup> Naacuajitij, Cristo jaara mosaaquiaari, nojuajaari Moisés Rootasano tojiniu tohuateequiaari cutara. Naacuajitij, Pueyasoori puetunu nocua tiuniaajanaa jiyatequiaa juhua sesa miyashijiacara. <sup>5</sup> Moisés cuajaari naajioquiaari taa na rootasano tojjijaca miiniutianiya, juhua sesa miyashijiaca nojori quiniuria. Nojuajaari naa naajioquiaari:

“Cante puetunu cua rootasanojuanaa tojjijiani, nojuajaari pueyaracaanu rishijiaa jiyatesaanutaniya”.

<sup>6</sup> Saniniuujia, saaja Jesucristoocua pa tiushacari, paari juhua sesa miyashijiacara jiyatesaaquiaani, pueyaracaanu rishijiaca pa quiniuria. Naacuajitij, majaari naa nia niishiriojonu nioojiajinia nia taacanuusacari: “¿Cante na naata jiyocuacaanu tacanu Jesucristo na roshiniuria Pueyaso pueyara na jataniniuria pajaniyani?” <sup>7</sup> Naajuhuj, majaari naa nia niishiriojonu: “¿Cante na naata macunucua quiquiojinia quianu, Jesucristo na tacaniniuria pocuani?” ¡Pueyanaa, majaari quenaaja naa nia niishiriojonutej! <sup>8</sup> Pueyaso Rupaacuajaari tari naa naajiotasaaquiaari pajaniyara:

“Niaacuajaari cua rupaa jiiitaa. Niaari na niishiyajuhuj. Nioojiajinia quiyacuajaari”.

Cuno rupaa canaa na pohuataquiaa nijaniyani, cunocuajaari Jesucristoocua nia tiuuniuria. <sup>9</sup> Naacuajitij, Pueyasoori pueya jiyatequiaa na pueya nojori quiniuria, Jesucristoocua tiuujia jaara pueya niquiara pohuatare: “Jesucristoori seetanujuanaa Jiyaniijiajanaa cutara”, noojiajinia na niishishacarijuhuaj Pueyasoori Jesu samitiani quiaariuhua macujiniji. <sup>10</sup> Seetanujuanaa naari: poojiata pa tiushacari Neyanuucua, Pueyasoori pa jiyateya juhua sesa miyashijia pa quiniuria. Naajuhuj, pa rupaata pa pohuatasacari: “Janiya Jesucristoocua tiuujiani”, jiyacaritij, Pueyasoori pa jataniquiaa na pueya pa quiniuria cutara.

<sup>11</sup> Tariucuacaanu Neyanujiniji Pueyaso sequesanoori naa naajiotasano quiyajuhuj:

“Puetunu nocua tiuuniaajanaari puetunu cua sequesanojuanaa cua muera-surano masenutaniya”.

<sup>12</sup> Naacuajitij Judiocuaca, mariyata taucuacanio, nojori jiyanooshaanutaniya nojori jaara sequere: “Jiyaniijianaa, cua jiyanoori”. Pa Jiyaniijiaari maja rimiajata na jiyanooni nocua tiuujia pueya. Nojuajaari jiyanoohua capora. Jiyaniijiajanaa cutaraari. <sup>13</sup> Tariucuacaanu Pueyaso Rupaajiniaari naa naajiotasano quiyajuhuj:

“Puetunu pueyajanaari Pueyaso pueyara jatanishaanutaniya nojori jaara Jiyaniijia sequere: ‘Jiyaniijianaa, cua jiyanoori’ ”.

<sup>14</sup> Jaara naa quiritij, ¿pueyatucua taa Jiyaniijia secojonuureni, nojori jaara nocua tiuyaquiyajaa? Naajuhuj, ¿pueyatucua taa nocua tiuurini, nojori jaara nojuajiniji pohuataaquishoo quiyajaa? ¿Nojoritucua taa nojuajiniji niishijia quirini, tamasaca jaara quenaaja nojori pohuataaquiri?

<sup>15</sup> ¿Pueyaso Rupaa pohuatanaatucua taa cuno pojoriicua quiaareni, nojori jaara jiyaramiquiyaquishaare? ¿Pueyaso rupaa pohuatanaate jiyaramiquiyaquishaaquiaari? ¡Maja! Jiyaramiquishaaquiaaricua. Naaratej, naa naajiotasano quiyari tariucuacaanu Pueyaso Rupaajinia:

“Jiyanoohua timitiasano pueya cutaraari, noo pojori canapuate tamasacaacua quiajani, nojori na pohuatanura Pueyaso rupaa”.

<sup>16</sup> Naajaa, majaari puetunu pueyajanaa tojiniu quiquiaa, Pueyaso Rupaa jaara nojori niquiara pohuataaare. Naacuajitij, supuetana Isaiasri naa sequequiaari na taraajenuta:

“Jiyaniijianaa, majaari pueya tojiniu paniniu canaa pohuatasano quia-janiyajiniji”.

<sup>17</sup> Naacuajitij pueyanaa, paa jaara Jesucristo rupaa pohuataaareni, paari pa numaata na tojiyani. Paa jaara pa tojishanoocua tiuurini, Pueyasoori pa jiyatenutaniya na pueya pa quiniuria.

<sup>18</sup> Pa jaara Pueyaso pueyara jiyatesaaquiaa saaja pa tiushacari Pueyaso rupaacua, jaara naa quiritij, ¿casaara puetunu Israel pueyajanaa Pueyaso

pueyara jiyateyaquishaaquiaariirini? ¿Cristo rupaateeri nojori niquiara pohuataaquishaaquiaari? Maja. Nojori niquiaracuajaari pohuatasaaquiaari. Naa naajiotasano quiyacuajaari tariucuacaanu Pueyaso Rupaajinia:

“Pueyaso Rupaacuajaari puetunu jiyacajiniajanaa pohuatasaaquiaari. Na rupaari tojishaaquiaari puetunu tiqiyocujanaa, jiya puequetujinia”.

<sup>19</sup> Jaara naa pohuatasaaquiaariti, ¿Israel pueyateeri Pueyaso rupaa niishiyaquiquiaari nojori tojishacari? Maja. Nojoricuajaari na niishijia quiquiaari. Nojoriiri saaja na ruuretajaca quiquiaari. Supuetana Moisés cuajaari naa naajiotaquiaari Pueyaso sequesano Israel pueyara, tariucua na tojiyashijia nojori quishacari:

“Maninia cua miishacari tiqiyocua quijiaca taucuaca nia niti, janiyari nia juaatiniutianiyani. Niaari jiyanoohua juaaniutianiya cua jiyanooshacari mosanucua taucuaca”.

<sup>20</sup> Na nuhuaji, supuetana Isaíasri naa maatia sequequiaari Pueyaso niishtiosano nojuaja:

“Cucua jiaatiaashijia taucuaca cutaraari cua riuriataquiaa, cua tojiijia nojori quiniuria cutara. Naajuhuj, janiyari cua pajeyashijia taucuacaacua muetaquiaani”.

<sup>21</sup> Saniniuujia, Isaíasri naa Pueyaso sequesano Israel pueyajiniji naajiotaquiaari:

“Janiyari puetunu juucujanaa Israel pueyacuaji masequiaa juucuan, maninia cua miiniu panishacari nojori. Nojoriiri saaja cua shocotequiaa, cua tojiyashijia pueya nojori quishacari”.

## 11

### *Israel pueyajiniji cureenoori Pueyaso saquiriojosano*

<sup>1</sup> Israel pueya jaara naa Pueyaso tojiyashijia quiya, ¿Pueyasote seetanu juanaa nojori tarinitiacanu, na tojiyashijia nojori quiniucua? ¡Maja pueyanaa! Janiyacuajaari Israel pueyanojaniuhuj. Abrahamri cua supuetana. Janiyari na jinianu Jacobo niyanu Benjamíncuajinio supuenoni.

<sup>2</sup> Naacuajiti, janiyari niishiyani, Pueyasoori maja na cartenu quiquianu puetunu tariucuacaanu na saquiriojosano Israel pueyajanaa. ¿Niaateeri supuetana Elíasjiniji naajiotasano niishiyaquiya? Tariucuacaanu Pueyaso Rupaajinia naa naajiotasano quiyacuajaari Elías sequesano Pueyaso, na tacaashacari Israel pueya quiniucua sesa:

<sup>3</sup> “¡Cua Jiyaniijanaa, cuarta Israel pueyari puetunu quia sequesano caminiujiunaa pueyajanaa puecoorucuaa! ¡Saa janiyajaari cureyani! Naajuhuj, nojoriiri puetunu juhuacutucujanaa niyarequetarucuaa, tee quia tojitiajaca pueya catijiaquiaa na seya quiocuaracuajani. ¡Nojoriiri quiaritia cua pajenuyajuhuj, na motunura janiya!”

<sup>4</sup> Pueyasoori naa Elías riucuaquiaari saaja:

“Janiyari siete mil pueya jitiiajaani. Nojoriiri cua tojitiajaca. Nojoriiri maja na mojuquetaconu quiquiaa cuno sacuaraatia shipinishano Baalcuara cua niti, taa narta Israel pueya miiquiaacuaani”.

<sup>5</sup> Quiaritiaari naajuhuj, Pueyasoori secaja na saquiriojosano Israel pueyajinijinio jitiiaa, jiyanootio na quiniucua. <sup>6</sup> Naa Pueyaso muerasu nojori quishacari saaja Pueyaso jiyanooniucua nojori, naacuajiti paari niishiyani, majaari Pueyaso saquiriojonu quiquiaari nojori, maninia nojori quiniucua. Nojori jaara maninia miijiaca quiriquia, nojori maara paniyaquiri na jiyanooshanura.



<sup>7</sup> Naacuajitij, paari niishiyani, Pueyasoori saaja na saquiriojosano pueya jiyatequiaa na muerasura. Israel pueya saniniuujia, nojoriiri saaja maninia quiniuria saniniuujia juucua. Naajaa, majaari nojori naata tama na cuaqueyajaaja jiyatenu quiquiaari Pueyaso muerasu nojori quiniuria. Cuno pojori jiuujiaari saaja cumajiuujiaacara quiquiaari, tojetaarucujanaa niishiyashijiaca nojori quiniuria. <sup>8</sup> Tariucuaaanu Pueyaso Rupaajiniacua-jaari naa naajiotasano quiya:

“Pueyasoori nojori jiyatequiaari niishiyashijiacara, maja nojori niishiniuria nojuaja. Naaratej, majaari nojori niishiniu quijia, nojori niquishacari Pueyaso miishano. Majaari nojori niishiniu quijiajuhuaj, nojori tojishacari na rupaa. Israel pueyari naa Pueyaso tojiyashijiaca quiyajaa quiarijiani”.

<sup>9</sup> Supuetana David sequesanoori nojorijiniji naa naajiotasano quiyajuhuaaj: “Pueyasonaa, Israel pueyari puetunu nojori panishanojuanaa jiiitaa, maninia quia miishacari nojori. Saniniuujia, nojori tojiyaquiniuucua quiajaniya, nojori shuquiritiasano casaa cuara quiiria juhua norijia tama nojoririjaaja, nojori saniitiosaanura. <sup>10</sup> Nojori jiuujia cuara jataara juhua cariyujuarujuriria, maja nojori niishiniuria seetanu Pueyaso rupajanaa. Nojori cuara porequetacoora socua, pueyaracaanu taraatia nojori miishacari”.

#### *Pueyaso jiyanooshacari taucuaca, Israel pueya niti*

<sup>11</sup> ¿Niaateeri jiyaniya Pueyasoori Israel pueya cartequiaarijianaa, tojiyashijiaca nojori quiniuucua? Maja. Pueyaso tojiyashijiaca nojori quiniuucua, taucuacaari saniniuujia Pueyaso muerasura quiquiaa, nojori tiushacari Jesucristoocua. Cunoori Israel pueya jiaatianiquiaa taucuacaacua, Pueyaso muerasu nojori quiniuriajuhuaj. <sup>12</sup> Quiarijia, puetunu jiyacajiniajanaa taucuacaari shuquiriaatia quiya, Pueyaso muerasu nojori quishacari Israel pueya tiuyaquiniuucua Jesucristoocua. Saniniuujia, Israel pueya jaara Pueyaso muerasura quiriohua Jesucristoocua nojori tiushacari, jiyacaritij, socua jiyanoohua maninia quiniutianiyari puetunu pueyapuerajanaa, puetunu jiyacajiniajanaa.

<sup>13</sup> Taucuacajinijinio cuarta Pueyaso muerasunaa, cua tojiri. Nia sequenu panianijia. Janiyari seetanujuanaa jiyaramiquishaaquiaari Jesucristo rupaa cua pohuatanura taucuaca niquiarani. Naaratej, janiyari puetunu cua cumaacatajanaa pohuataquiaa Jesucristojiniji taucuaca niquiarani, nojori quiniuria Pueyaso muerasujuhuaj. <sup>14</sup> Janiyari seetanujuanaa naa miiquiaani cuarta Israel pueya jiaatianura niaacua, nojori tiuniuria Jesucristoocujuhuaaj, noojiaqueya nojorijinijinio Pueyaso jiyatenura na pueyara. <sup>15</sup> Pueyasoori juhua taanuquiaari Israel pueya nocuaji, nojori tiuyaquishacari Neyanuucua. Naajaa, naacuajiti Pueyasoori puetunu mijiria quiniaa pueyapuejanaa jiyanooquiaa, na muerasu nojori quiniuria. Saniniuujia, Israel pueya jaara jiyanooshaarohua, jiyacaritij, jiyanoohua maninia quiniutianiyari puetunu pueyapuerajanaa. Israel pueya tiushacari Jesucristoocua, nojoriiri juhua macujiniji samiitiaconutaniuhua. <sup>16</sup> Seetanujuanaa maninia nia niishiniuria nio miriqui cua pohuatasanoni, maatia nia pohuatareeraj. Nia tojiri. Coteenujuanaa pa jiunio-cotasano neecaru jaara maninia quiri Pueyasora pa niqutiosocoriquiano, tariquiaari puetunujuanaa maniajuhua Pueyasora. Naajuhuaaj, naana nujuaca jaara maninia quiri puetunujuanaa, na cashacucuaari maniniuquiucujuhuaaj. Nio miriqui cua pohuatasanoori nia niishitiya cutara Israel pueyajiniji. Naacuajitij, Pueyaso jaara Abraham jiyanooquiaaricuaa



nocua na tiuushacari, naacuajiti paari niishiyani, Pueyasoori puetunu Israel pueyajanaa jiyanooniutianiyajuhuaaj, nojori jaara tiuuriquia Jesucristoocua.

<sup>17</sup> Supuetana Abrahamri juhua Pueyaso panishano olivo naana nujuaca. Saniniuujia, na jinianuucujinino supueno Israel pueyari juhua na cashacucua. Cuno na cashacucujinijinio jaara Jesucristoocua tiuyaquiuaari, Pueyasoori na piyotaquiaari. Niajaniya saniniuujia taucuaacanaa, niaari panishoo quiquiaari, juhua nacujiniaacoji olivo naana cama, maja natau. Naajaa, Jesucristoocua nia tiuushacari, Pueyasoori nia rupotaquiaari na panishano naanaacua nia moritianura. Naa Pueyaso panishano naanaacua nia moritiasacaritij, cuno naana nujuacaari nia nujuacajuhuaaj. Naacuajitij, niaacuajaari puetunu Pueyaso sequesanojuanaa supuetana Abrahamra masequiaa tari. <sup>18</sup> Naa Pueyaso rupotanuucua niajaniya na panishano naanaacuatej, majaari tama nia cuaqueyajaaja nia shuquiritianu. Majaari nia jiyaniniu niaa cutaraari socua maninia pueya, Pueyaso cartesano Israel pueyajiniji. Naa jaara jiyaniya niaari socua maninia pueya nojorijiniji, nia niishiri, niaari maja nia nujuaca rishitijia. Naa nujuaca cutaraari nia rishitiya.

<sup>19</sup> Naa naasucuaari sequeya: “Taaquiririnij. Cuno olivo cashacucua-jaari canaacuaji piyotasaquiaari, saniniuujia canaa rupotasaanura nocua nojori niti”. <sup>20</sup> Taaquiririnij, seetanujuanaacuaaquinateja nia sequesanojuaj. Saniniuujia nia niishiri, nojori Pueyaso panishano naanajiniji piyotasaquiaari, nojori tiuyaquiniucua Jesucristoocua. Naaari saniniuujia cuno naanaacua rupotasano quiya, saaja Jesucristoocua nia tiuuniucua. Naacuajitij, maja tama nia cuaqueyajaaja nia shuquiritianu nia jyanishacari niaari socua maninia pueya cuno Israel pueyajiniji. Saaja puerejaca nia quiri cutara, cua panishano taucuaacanaa, niaa mariqui piyotasaarohuari, niaa jaara Pueyaso tojiyashijiacara quiriohua. <sup>21</sup> Pueyaso jaara jyanoyaquiuaari na saquiriojosano pueyacuaa, nojori tiuyaquiniucua nocua, ¿maatucua casaara jyanoori niajaniyanijia? Naaacuajaari taucuaa. Naaacuajaari maja na saquiriojosano Israel pueyacujinino. <sup>22</sup> Naacuajiti pueyanaa, nia niishiri. Pueyasoori jyanohua maninia. Naajuhuaaj, nojuajaari saniitonu niishijia cutara. Naaratej, nojuajaari na tojitiaashijiaa Israel pueya jyanoyaquiuaari. Saniniuujia, nojuajaari jyanohua maninia miiquiaa niajaniya na jyanoooshano pueya nia quishacari, niaa jaara pueyaracaanu nocua tiuujiaa quiriquia. Niajaniya taucuaacanaa, niaa jaara nocua tiuyashijiacara quiriohua, niaari nocuaji rupotasaanutaniuhua. <sup>23</sup> Saniniuujia, Israel pueya jaara Jesucristoocua tiuujiacara quiriohua, Pueyasoori nojori rupotanutaniuhua na panishano olivo naanaacua. Pueyasoori jyanohua cumaacaracacuaaja na rupotanuuhua na panishano naanaacua. <sup>24</sup> Niajaniya taucuaacanaa, niaari maja seetanujuanaa Pueyaso saquiriojosano Israel pueya. Naaari juhua nacujiniaacoji olivo naana cashacucua. Naajaa, nia tiuushacari Cristoocua, Pueyasoori nia rupotaquiaari na panishano olivo naanaacuajanaa. Naaratej, majaari jiyajeneta Pueyasora, na piyotasano olivo cashacucua na rupotanuuhua tama neyonaacuajaaja, nojori jaara Jesucristoocua tiuujiacara quiriohua.

*Pueyaso jatanishacari puetunu Israel pueyajanaa na pueyara*

<sup>25</sup> Taucuaajinijinio cuarta Pueyaso pueyanaa, tariucuaaanu pueyari niishiyaquijia taa Pueyaso miiniutianiya Israel pueyani. Quiaritia cutara nia niishiri Pueyaso niishitishano janiya, maja nia jyaniniuria Pueyasoori nia paniya socua Israel pueyajiniji. Naarate cua tojitiare. Quera puetunu Israel pueyajanaari Pueyaso tojiyashijiaa quiya. Nojoriiri naa quiniutianiya,

puetunu Pueyaso saquiriojosano taucuacajinijinio pueyajanaa cuaara Jesucristoocua tiuurijiaatijia. <sup>26</sup> Jiyacaritij, puetunu Israel pueyajanaari jiyate-saanutaniya Pueyaso pueyarajuhuj, taa tariucuacaanu Pueyaso Rupaajinia naajiotasaaquiaaricujani. Naa sequeyari:

“Sión tiacajinia supuenutaniyari pueyacuaji Tacuriquiano. Nojuajaari puetunu sesa casaajanaa jaariutianutaniya Jacobo niquiohuacuajinio supueno pueya jiuujiajiniji. <sup>27</sup> Naa cua jiyanooshacari puetunu sesa nojori miishanojuanaatej, janiyari jiyacari tohuateenutaniya tariucuacaanu cua sequesano nojori supuetanaani”.

<sup>28</sup> Quiarjia Israel pueya tiuyaquishacari Jesucristo rupaacua saniniuujia, nojoriiri juhua Pueyaso paraa, Pueyaso jiyanooniuria niajaniya saniniuujia, taucuacanaa. Naajaa, Pueyasoori cuno Israel pueya panijajaa, nojori supuetanaa quiniuucua na saquiriojosano pueya. <sup>29</sup> Pueyasoori maja na jaariutianu quijia na niquitiosano. Na saquiriojosano pueya jiyanoojiaari. Majaari nojori na ruuretanu. Pueyasocujajaari Israel pueya saquiriojoquiaari na pueya nojori quiniuria, maninia na miiniuria nojori. <sup>30</sup> Maniniushiquiari, niajaniya taucuacanaa, niaari Pueyaso tojiyashijiaca quijia. Israel pueya tojiyaquiniuucua Pueyaso quiarjia saniniuujia, Pueyasoori niaacua taraajequiaa. <sup>31</sup> Nojoriiri Pueyaso tojiyashijiaca quia quiarjia, Pueyaso taraajenura nojoriicua taa na taraajeya niaacuacuaani. <sup>32</sup> Naacuajitij, Pueyasora, puetunu pueyajanaari na tojiyashijiaca quia, Israel pueya, taucuacano. Naacuajitij, Pueyasoori na naata jiyanooni nojoriijuhuj, nojori tiushacari Jesucristoocua. Pueyasoori maja rimiajata na jiyanooni.

<sup>33</sup> ¡Pa Pueyasoori jiyanoohua niishijia, maninia na miiniuria! ¡Nojuajaari puetunu niishijiajanaa cutara! ¿Cante niishiquiaarini casaa Pueyaso miiniutianiyani? Na miishanoori jiyanoohua jiyajeneta. ¿Cante na naata na niishiniuni? Shaaqui. <sup>34</sup> Naaratej, seetanujuanaari nio tariucuacaanu sequesano:

“¿Cante na naata Pueyaso niishiriojosano niishiniuni? ¿Tamonuteeri na naata Pueyaso rootanu, maninia na miiniuria? ¡Maja! <sup>35</sup> ¿Pueyasoteeri na panishano jiiiaaquiquiaari tamonu niquitionura nojuaja na panishano, na nuhuaji na niquitionuhua? ¡Maja!”.

<sup>36</sup> Seetanujuanaa puetunu casaajanaacujajaari Pueyaso shipinishano. Na camaruuri na rishitiquiaa na cumaacata. Puetunu cunojuanaari nerano. ¡Pueyaracaanu pa shuquiritiare pa Que Pueyaso! ¡Nojuajaari jiyanoohua maninia! ¡Cuaara naa quiiriatej!

## 12

### *Saaja Pueyasora pa quirij*

<sup>1</sup> Cuarta Pueyaso niquiohuanaa, jiyanoohua maninia Pueyaso jiyanooshacari pajaniya, tama nia cuaqueyajaaja nia jiyatere tojetaarucujajanaa saa neraja nia quiniuria. Naacuajitij, niaari Pueyaso shuquiritiniutianiya, pueyaracaanu na tojiijaca nia quishacari. <sup>2</sup> Majaari socua nia quiniu taa Pueyaso tojiyashijiaca quiquiaacuaani. Saniya Pueyaso Sohuanu tojiijaca nia quiri cutara, seetanujuanaa quiariniora jatanishano pueya nia quiniuria. Naacuajitij, niaari niishiniutianiya casaa Pueyaso panijia nia miiniuriani. Nia niishitija jaara jatanishano quiri, naacuajiti niaari niishiniutianiya casaate maninia nia miiniuriani, Pueyaso nia shuquiritiniuria. Naa nia miishacari Pueyaso panishanotej, niaari niishiniutianiya, cunoori tojetaarucujajanaa jiyanoohua maninia.

<sup>3</sup> Jiyanoojia Pueyaso quiniuucua, nojuajaari cua jiyatequiaari Neyanujiniji pohuatana cua quiniuria. Naaratej, puetunu niajanijajanaa cua tojitiare quiarijia. Naa jaara Pueyaso cumaaca masequiaari nocua nia tiushacari, nojuajaari puetunu niajanijajanaa jiyatequiaari tamaatia poonijosano miijia nia quiniuria. Naaratej, majaari tama nia cuaqueyajaaja nia jiyatenu paniniu socua maninia quiijaca nia quiniuria tamasacajiniji. Saaja jacaria niishiriojuaca nia quiri, maninia nia miiniuria nia poonijosano, teyano Pueyaso sequequiaari nia miiniuriacuajani. <sup>4</sup> Pa cuaqueyajiniacuma, paari queraatia tamaatia casaa jiiitaani. Puetunu cunojuanaari tamaatia miniu niishijia, maninia pa quiniuria. <sup>5</sup> Paari naajuhuj, taa pa jiniacuma casaacuaani. Queraatia Pueyaso muerasu pa quishacari, naajaa, paari juhua niquiriyatu cuaqueyani, Cristota rupuetootesano pa quishacari, maninia pa miitioonura.

<sup>6</sup> Naatej, taa pa cuaqueyajiniacuma casaa tamaatia poonijosano miniu niishiyacuaani, naajuhuj, Pueyasoori puetunu na muerasujuanaa na cumaaca niqutioquiaa, tamaatia miiniu niishijia pa quiniuria. Naaratej, cante Pueyaso cumaaca jiiitaani, Pueyaso niishitishano nojuaja na pohuatanurani, nojuaja cuara seetanjuanaa pueya niqiuara pohuataara na taacanuyaquiniutia. <sup>7</sup> Naajuhuj, cante Pueyaso cumaaca jiiitaa pueya na naacunurani, nojuaja cuara maninia naacuura pueya. Naajuhuj, cante Pueyaso cumaaca jiiitaa Pueyaso rupaa niishitiojona na quiniuriani, nojuaja cuara maninia niishitiojora Pueyaso rupaa pueya niqiuara. <sup>8</sup> Cante Pueyaso cumaaca jiiitaa pueya na shiniujiuniuriani, nojuaja cuara pueya shiniujiuuria, maja pueya cartenura Pueyaso rupaa. Cante na jiiitasanojiniji nareja niqutiojojua casamijiuniucua pueyani, nojuaja cuara juhujaniya niqutiojora nareja, nojori na paniniutia. Naajuhuj, cante Pueyaso pueya jiiitanani, nojuaja cuara jiiitaara Pueyaso pueya nojoriicua na tacaaniutia. Cante taraatia miishano pueya naacujuani, nojuaja cuara shuquiriaatia na naacuuranoj.

*Pueyaso tojijaca nia quiri, taa Pablo rootaacuajani*

<sup>9</sup> Seetanjuanaa panitiojuaca nia quiri. Puetunu sesa casaajanaa soojea nia quiri. Majaari maninia miiniu nia tarinitianu cutara. <sup>10</sup> Jiyanojua panitiojuaca nia quiri, taa nia paniquiaa nia tarajanucuaani. Niarta Pueyaso muerasu nia jiyatere juhua socua maninia pueya niajanijajiniji. Majaari nojori nia rerequetenu.

<sup>11</sup> Tama nia cuaqueyajaaja nia cumaquiri maninia nia poonijionura pa Jiyaniijara. Majaari taajecori nia quiniu.

<sup>12</sup> Shuquiriaatia nia quiri pueyaracaanu, nia niishishacari taa Pueyaso miiniutianiya jiyanojua maninia na muerasuni. Saaja juhujaniya nia rejeretare nia jaara naquiya miishaare. Pueyaracaanu Pueyaso nia secojore. Majaari quenaaja nia tarinitianu na secojonu.

<sup>13</sup> Niarta Pueyaso pueya jaara na panishano jiiitaaquiri, nareja nia niqutiojore nojori nia jiiitasanojiniji. Naacuajitij, nojori jaara ruconaa quiri, nojori nia masuure nia tiacora.

<sup>14</sup> Naa jaara naquiya miishaariquia, majaari nia miitianaa nia sesacanu. Saaja nia secojore Pueyaso nojoriicua, Pueyaso taraajenura nojoriicua.

<sup>15</sup> Cante shuquiriaatia quiyacuaani, nojoritia nia shuquiririjuhuj. Saniniuuja, cante nujuqueyacuaani, nojoritia nia nujuquerejuhuj.

<sup>16</sup> Jiyanojiojuaca nia quiriquia, jatiqiu nia quiniuria maninia. Majaari tama nia cuaqueyajaaja nia jiyatenu juhua socua maninia quiijaca pueya tamasacajiniji. Majaari pueya rerequeteja nia quiniu. Saniniuuja,

tama nia cuaqueyajaaja nia mueyashitiri cutara, maninia nia rupuenura paniyaquishoo pueyajuhuaaj. Majaari tama nia cuaqueyajaaja nia jiyatenu juhua socua niishijiaca pueya nia quiniuria tamasacajiniji.

<sup>17</sup> Niaa jaara sesa miishaariquia, majaari nia paraa nia naminiu saniniuujia. Puetunu nia miishanojuanaa cuaara quiiria maninia puetunu pueya niquiarajanaa. <sup>18</sup> Maninia nia quiri puetunu pueyatajanaa, majaari nojori ruutaquenu niaacuara. <sup>19</sup> Socua cua tojitiare cua panishano cuarta Pueyaso pueyanaa. Niaa jaara sesa miishaariquia, majaari nojori nia naminiu. Juhuaianiya nia rejeretare saaja. Pueyasocuaajaari niaacua naminiutianiya nojori. Pueyaso sequesano cuajaari naa naajiotasano quiya na rupaaajinia:

“Quiria nia tarinitiare puetunu sesa nojori miishanojuanaa niajaniya. Janiyacuajaari nojori naminiutianiya niaacuani”.

Cua tojiri. Pueyasojuaanaacuajaari naa sequequiaari. <sup>20</sup> Naaratej pueyanaa, majaari nia paraca nia naminiu. Saaja maninia nia miiri nojori taa tariucuaaanu Pueyaso Rupaaajinia naajiotasaaquiaaricujani. Naa sequeyari:

“Quia paraca jaara miaajeya, quia miaqueterenoj. Jaara jiyamueyajuhuaaj, quia raatorenoj. Quiaa jaara naa na miiritij, tama nojuajaarijia jiyanohua caririquiniutianiya noojiajinia”.

<sup>21</sup> Naacuajitij, niaa jaara sesa miishaariquia, majaari nia juaaniu, niaa mariqui sesa miijiara quirijaariuhuaaj. Saaja maninia nia miiriquia nia paraca. Naacuajitij, niaari Sesaaca shocotanutaniya.

## 13

### *Pa jiya jiyaniijianucua tojiijaca pa quirij*

<sup>1</sup> Pueyanaa, mijiria nia jiyaniijianucua tojitiajaca nia quiri. Nojoricuaajaari Pueyaso jiyatesano, nia jiya jiyaniijianucua nojori quiniuria. Majaari pueyano na naata jiyatesaanu jiyaniijia na quiniuria, Pueyaso jaara paniyaquiri. <sup>2</sup> Naacuajitij, cante mijiria jiyaniijianucua tojiyashijiani, nojuajaari jiyaniijiaara Pueyaso jiyatesano tojiyashijia. Cante naa mijiria jiyaniijianucua tojiyashijiani, nojuajaari saniitiosaanutaniya. <sup>3</sup> Paa jaara maninia miijiaca quirini, ¿paatucua casaara pa jiyaniijianucua puereriquiani? Jiyaniijianucuaari maja na pueretenu maninia miijiaca. Sesa miijiaca cuaara na puereera cutara, sesa miijiaca nojori quiniucua. Saaja maninia miijiaca nia quiri. Naacuajitij, nia jiyaniijianucuaari maninia poojotanutaniya niajanijajiniji. <sup>4</sup> Nojoricuaajaari Pueyasora poonijionaa, maninia nojori jiitianura niajaniya. Saniniuujia, niaa jaara sesa miiri, nia puerere cutara. Jiyaniijianucua pueyari maja najuhuanaj. Nojoricuaajaari jiyaniijianucua cumaacaraca, sesa miijiaca nojori saniitionura. <sup>5</sup> Naacuajitij, nia jiyaniijianucua tojiijaca nia quiri maja nia saniitiosaanura, naajuhuaaj, maja Pueyaso tojiyashijia nia quiniuria. <sup>6</sup> Naajuhuaaj, nia cumaneecajiniji nia niquitiore nia jiyaniijianucua, taa nojori sequequiaa nia niquitionuracujani. Nojoricuaajaari Pueyasora poonijioquiaa pueyaracaanu, maninia nojori jiitianura niajaniya. Naaratej, nojoriiri cumaneeca masequiaa niajanijajiniji.

<sup>7</sup> Naaratej, puetunu nojorijianaa nia niquitiore, taa nojori sequequiaa nia niquitionuracujani. Naacuajitij, niaa jaara sequesaa nia cumaneecajiniji nia niquitionura nia jiya jiyaniijiaara, nareja nia niquitiore. Naajuhuaaj, cumaneeca jaara jiya jiyaniijiaara masenu cojiritiasaare, casami nia masesacari, majaari nia juaaniu. Naajuhuaaj, majaari nia jiyaniijia nia sesacanu, jiyaniijianucua nia jiyatesano pueyano. Majaari nojori

nia rerequetenu. Naajuhuaaj, nia jiyaniijianucua tojijiaca nia quiri, nojori quiniuucua Pueyaso jiyatesano nia jiyaniijianucua.

<sup>8</sup> Pueyanaa, majaari najuhuaana casami nia poonu, niaa jaara cuma-neecaaju quiri. Saniniuujia pueyanaa, maja cutaraari niarta pueya paniniu nia puecanu. Pueyaracaanu nojori panijiaca nia quiri cutara. Naacuajitij, cante narta pueya panijiani, nojuajaari Moisés Rootasano tojijia cutara. <sup>9</sup> Supuetana Moisés cuajaari naa naajiotaquiaari puera, Pueyaso sequesano nojuaja:

“Maja niyacaraca maaji numuetucunu. Maja pueyano monu. Maja nohuasejonu. Maja tamasa jiiatasano casamiicua jiaatiaja nia quiniu”.

Socua queraatia na rootasanoori quiya. Niocuaajaari socua pa tojishocoriquiano na rootasano:

“Quiarta pueyano panijia quia quiri, taa quia paniya tama quia cuaqueyacuanaani”.

Paa jaara saaja nio Moisés rootasano tojijia quirini, paari tari puetunu na rootasanojuanaa tojijia quiyani. <sup>10</sup> Cante seetanujuanaa pueyano panijiani, nojuajaari maja sesa na miiniu narta pueyano. Naaratej, paa jaara panijia quiriquiani, paari puetunu Moisés Rootasano tojijia cutarani.

<sup>11</sup> Pueyanaa, nio nia niishiri. Pa Jiyaniijia rijionu juuca pajaniyari tari quenaacoya. Cuno juucaari quiarjia socua cateca quiya paa jaara nocua tiuquiarini. Naaratej, cante juhua maqueyajaani, nojuaja cuara niucuaara, pa Jiyaniijia na poonijionura. <sup>12</sup> Mijiria pa quishacari juhua ninishiqui. Paari juhua quera juhuaqueya tarini. Janiyari naa nia sequeyani, pa Jiyaniijiaari quera tiuquihua. Nojuaja cutaraari na cumaacata pa cuhuatanutaniya. Naaratej, puetunu sesa pa miiniujuanaa pa cartere. Majaari juhua ninishiqui quijiaca pa quiniu socua. Taa pueya cushiquiaa na toque tariquiicuaaji na poonijionuracuaani, naa nia cushiri Pueyaso cumaacajuhuaaj. Naa nia miiritij, nera nia poonijionura, puetunu mijiria sesa casaajanaa rejeretajaca nia quiniuriajuhuaaj. <sup>13</sup> Seetanujuanaa juhua Pueyaso pueya nia quiri. Majaari juhua ninishiqui quijiaca pueya nia quiniu. Niaacuajaari cuhuashiqui quijiaca. Naaratej, majaari mashaasequenujuaca nia quiniu. Majaari nia queranacunuunu, cararaatia casaa nia miiniuria. Majaari nia camishoo maaji numuetucunuucua jiaatiajaca nia quiniu. Majaari sacuaraatia casaa miiniuucua nia jiiitiniu. Majaari juayonuujutajaca nia quiniujiuhuaaj. Naajuhuaaj, majaari tamonu pueyano jiiatasano casaacua nia jiaatianu. Naajuhuaaj, majaari nia juaaniu tamonu jaara nia shocotare. <sup>14</sup> Naacuajiti pueyanaa, majaari nia niishiriojonu nia cuaqueya nia shuquitiniuria taa nia paniya sacuaraatia nia miiniuriacua-jani. Saniniuujia, maninia cutaraari Jiyaniijia Jesucristo niishitiaja nia jiiitanura, na cumaacanio. Naa nia miishacaritij, niaari juhua soldadohua miaquetojojataja toque cushiojua, maja Sesaaca miitiniuria sesa nijaniya.

## 14

### *Maja quiarta Pueyaso pueyacuara nia rimiaaquenu sacuaraatia*

<sup>1</sup> Pueyaso pueyajinijinio pueyano jaara Pueyaso rootasanojiniji taacanuujuu quiri quia pueyaracaanu, naajaa, na rupuejaca nia quiri. Majaari nata nia juayonuujutanu tamaatia na niishiriojosacari Pueyaso rootasanojiniji.

<sup>2</sup> Naacuajitij, Pueyaso rootasano niishijia nia quishacari cutara, niaa naasucuaari niishiya nia naata puetunu miaquesanojuanaa miaquenu cutara. Saniniuujia, cante Pueyaso rootasanojiniji taacanuujuani, nojuaja naasucuaari jiyaniya na naata saaja na natau miaquenu, na shuquitiniuria



Pueyaso. <sup>3</sup> Cante puetunu casaajanaa miaqueja cutarani, nojuaja cuaara soyaquiiria narta Pueyaso pueyano, cante na miaquesano miaqueyashijia saniniunijia. Naajuhuj, cante puetunu casaajanaa miaqueyashijiani, nojuaja cuaara sesacaaquiiria puetunu casaa miaquejajanaa. Cuno pojori, shu miaquejaca cutarani, nojoricuajaari Pueyaso jiyatesano na muerasu nojori quiniuriajuhuaj. <sup>4</sup> ¿Canteeri pajaniyani, tamonu pueyanora poonijionaa pueya sesacaja pa quiniuriani? Tama nojori camarnucuajaari nojori sequenutaniya, nojori miishanote maninia, sesa soj. Naajuhuj, pa Jiyaniijia Jesucristocuajaari cumaacaraca, na muerasu na jiyatenura maninia quijiaca nojori quiniuria.

<sup>5</sup> Cua tojiri pueyanaa, noojiaqueya Pueyaso muerasujinijinioori niquiriyatu juuca semaanajiniji jiyatequiaa nojori maniniuhuaqueetanura Pueyaso. Tamasacaari saniniuujia sequequiaa, puetunu juucajanaanaari maninia, Pueyaso pa maniniuhuaqueetanura. Puetunu nijaniyajanaa cuaara taacanuyaquiiria tama nia miishanojinijijiaaja, maja nia macuhujetenura nioojia. <sup>6</sup> Cante niquiriyatu juuca semaanajinia jiyatequiaa samaatenu juucara Pueyaso na maniniuhuaqueetanurani, maniniacuajaari. Nojuajaari naa miiquiaa Pueyaso na shuquiritiniuria. Naajuhuj, cante puetunu casaa miaquejajanaa, maniniacuajaari. Pueyaso na shuquiritiniuria, nojuajaari na miaquequiaa nocuara na secojonu nuhuaji. Naajuhuj, cante shu miaqueyaquijia Pueyaso na shuquiritiniuriani, cuaara naa miiria. Nojuajaari Pueyaso shuquiritijuhuj na secojosacari Pueyaso, na natau na miaquenura.

<sup>7</sup> Seetanujuanaa pueyanaa, majaari pa quiniu tama pajaniyarajaaja. Naajuhuj, majaari quenaaja pa shaajenu tama pajaniyarajaaja. <sup>8</sup> Paa jaara mijiria quiyani, paari pa Jiyaniijia rishiquiaani. Paa jaara cusoyareni, paari pa Jiyaniijia cusoqueen. Naaratej, paa jaara saminio quiyajani, naajuhuj, paa jaara tariucua macu quiyani, paari pa Jiyaniijia jütiasanoni. <sup>9</sup> Jesucristocuajaari cunora cusoquiaari, macunucua Jiyaniijia na quiniuria. Nojuajaari samiitiaquiaariuhua saminiucua Jiyaniijia na quiniuriajuhuaj. Naacuajitij, nojuajaari pa Jiyaniijiajanaa cutara.

<sup>10</sup> Naaratej, saaja niquiriyatu Jiyaniijia pa jütiasacari, ¿paatucua casaara parta Pueyaso muerasu sojeaca quirini, nojori miaqueyaquiniucua shuni? Naajuhuj, ¿paatucua casaara parta Pueyaso pueya sesacajaca quirini, nojori miaquenuucua puetunu casaajanaa? Nia niishiri pueyanaa. Puetunu pajaniyajanaari nujuatejosaanutaniya Pueyaso tacojini, Pueyaso nequesoreenura pajaniya. <sup>11</sup> Tariucuaaanu pa Jiyaniijia sequesanoori naa naajiotasano quiya na rupaajinia:

“Seetanujuanaa sequeyanijia, puetunu pueyajanaari cucuara mojuquetacanutaniya, nojori niishishacari janiyari seetanujuanaa Jiyaniijiajanaa cutarani. Puetunu nojorijianaari sequenutaniya: ‘Jiyaniijianaa, quiaari Pueyasojanaa cutara! Puetunu quia miishanojuanaari maninia’ ”.

<sup>12</sup> Naacuajitij, paari niishiyani, puetunu pajaniyajanaari Pueyaso rihuanenutaniya tamajaajani, na nequesoresacari pajaniya.

### *Maja sesa pa miitiniu parta Pueyaso pueya*

<sup>13</sup> Naacuajitij cuarta Pueyaso pueyanaa, maja cumaati pa sesacatoonu, paa jaara tamaatia miiniu niishijia quiri parta Pueyaso pueyajiniji saniniunijia. Tama nia cuaqueyajaaja nia cojuare maja niarta Pueyaso pueya niqiuara nia miiniuria nojori jiyaniishano sesa casaa. Nojori jaara saniri miiniu nia miishanocuaa, naacuajitij, niaari tari sesa miitirii nojori Pueyaso niqiuara. <sup>14</sup> Janiyacuajaari niishiyani, majaari quenaaja tamonu sumatuu



quiniu pa miaquesacari sesa miijiacara na jiyatenura pajaniya Pueyaso niquiara. Janiyari naa niishiyani cua Jiyaniijia Jesu rupaacua tiuujia cua quiniuucua. Saniniuujia, cante jiyaniyanijia tamonu sumatuu na naata na jiyatenu sesa miijiaara nojuaja jaara na miaquere, nojuaja cuaara mi-  
aqueyaquiirianoj. Jaara na pueresano saniri miaquenu, nojuajaari tama noojiajaaja macuhuaajanutaniya. <sup>15</sup> Naacuajitij, paa jaara parta Pueyaso pueyano macuhuajetere pa miaquenuucua na miaqueyaquishoo casaani, majaari seetanujuanaa parta Pueyaso pueyano panijia pa quiniu. Jesu-  
cristocuaajaari tama na cuaqueyajaaja panitiaquiiaari nocuaji na ritianura Sesaaca. ¿Paateeri na sesonutaniya saniniunijia, na miaquesoo casaa pa miaquesacari na niquiarani? <sup>16</sup> Naacuajitij, majaari nia shanacunu Pueyaso tojiyashijia pueya sesacanura Pueyaso rupaa, nia miaquesano casaacua nia juayonuujutanuucua niarta Pueyaso pueyata. <sup>17</sup> Seetanujuanaa nia sequeyanijia, majaari Pueyaso muerasu pa quiniu casaa pa miaqueyaquini-  
uucua, casaa pa ratuyaquiniuucuanio. Pueyaso muerasu pa quishacari, nojuaja cutaraari paniya maninia miijiacara pa quiniuria, jatiqiu pa quiniuria juhuajaniya. Pa panitiaajaariuhua shuquiriaatia quiijia pa quiniuria. Paacuajaari na Sohuanu jiiitiaani, naa maninia pa quiniuria. <sup>18</sup> Paa jaara naa quiijia quiriqiuani Cristora pa poonijiosacari, Pueyasoori pa shuquiritiaa. Naacuajitij, Pueyaso tojiyashijia pueyari maja na rerequetenu quiniu-  
tianiya pajaniya.

<sup>19</sup> Naarate cuarta Pueyaso pueyanaa, jiyanoehua nia saniniujiuri taate nia naata maninia rupuetosano quiniu puetunu niarta Pueyaso pueyata-  
janaani. Naacuajiti nia naata tama cumaquitioonujuaaja maninia Pueyaso muerasu nia quiniuria. <sup>20</sup> Majaari nia sesonu Pueyaso miishano niarta Pueyaso pueya jiuujiajinia, saaja nia miaquenuucua nojori niquiara nojori pueresano casaa. Seetanujuanaa, Pueyasora, puetunu miaquesano casaa-  
janaari maninia pa miaquesocoriquiano. Saniniuujia, tama nia cuaqueya-  
jaaja nia cojuare cutara, maja niarta Pueyaso pueya niquiara nia miaque-  
nura nojori miaquesoo casaa, niaa mariqui nojori cushitioreeri. Naacuajitij, majaari nia naata maninia rupuetosano quiniu niaa jaara nia miishanota taraajoriqiu niarta Pueyaso pueya. <sup>21</sup> Naacuajitij, socua maninia juhuari maja pa miaquenura parta Pueyaso pueya pueresano casaa. Naajuhuaaj, ma-  
jaari pa ratunu jereeca mashaca nojori niquiara, cuno naa pa miishano jaara quiri nojori shiniujiuniuria sesa nojori miiniuria. Naajuhuaaj, pa cartere puetunu parta Pueyaso pueya jiyaniishano sesa miiniu casaajanaa, maja no-  
jori pa taraajonura nojori ruparetanura pocuaji. <sup>22</sup> Naacuajitij, Pueyaso Ru-  
paacua nia tiuushacari seetanujuanaa, niaa jaara niishiya nia miishanoori maja sesa, tamajaaja nia miirinioj saaja Pueyaso niquiara. Shuquiriaatia quiijia cutaraari noo pueyano, cante niishiyani na miishocoriquiano casaari maninia Pueyasora, maja noojia na macuhuaajetenura na miiniu nuhuaji. <sup>23</sup> Saniniuujia, cante niishiriojiyani na miaquenu panishano casaa naasu-  
cuaari sesa quiniutianiya Pueyasora, jaara naa niishiriojiya, seetanujuanaa naa sesa quiniutianiyari taa na niishiriojiyacujani. Paa jaara casaa mi-  
aquere seetanujuanaa pa tiuyaquiniutia Pueyasocucani, pa miaquesacari, paari tari sesa miirii Pueyaso niquiarani. Seetanujuanaa, puetunu pa miishanojuanaari sesa, paa jaara pa taacanuunuta na miiriquiani. Naaratej poojaari macuhuaajenutaniya.

## 15

*Parta Pueyaso pueya pa shuquiritiri, maja tama pa cuaqueyajaaja*

<sup>1</sup> Noojiaqueya parta Pueyaso muerasuuri juhuanojuaja seetanujuanaa Pueyaso Rupaacua tiuyashijiaca. Naacuajitij cuarta Pueyaso pueyanaa, pajaniya, cante tari seetanujuanaa Pueyaso Rupaa tojijiacacuaani, pajaniya cuara nojori rejeretaara juhuajaniya. Paa jaara socua Pueyaso Rupaa niishijiacacuaani, nojori pa cumaquiri. Majaari pa niishiriojonu tama pa cuaqueyajaaja pa shuquiritiniuria tamajaaja. <sup>2</sup> Puetunu pajaniyajanaa cuara niishiriojora taate pa naata parta Pueyaso pueyano cumaquiniuni, shuquiriaatia na quiniuria, maninia Pueyaso tojijia na quiniuriajuhuaj. <sup>3</sup> Paacuajaari niishiyani, majaari quenaaja pa Jiyaniijia Jesucristo niishiriojonu quijia tama na cuaqueyajaaja na shuquiritiniuria. Saniniuujia, nojuaja cutaraari taraatia miiniu rejeretaquiaari na rupuenura mijiria quiniaa pueya, nojori na jaariuutianura Sesaaca. Naacuajitij, nojuajaari nio tariucuaaanu tama nojuajiniijiaaja naajiotasano tohuateequiaari:

“Cua Quena, cuno pojori, canapute quia sesacajacani, nojoriiri cua sesacaajuhuj, cua miiniuucua quia panishano”.

<sup>4</sup> Seetanujuanaari pueyanaa, puetunu tariucuaaanu Pueyaso Rupaajinia naajiotasanojuanaani, cunoori pajaniyara naajiotasaquiaari. Cunoori pa niishitiojiya maninia pa rejeretanura puetunu sesa casaajanaa. Pa cumanijiaajaariuhuj. Naacuajitij, paari juhuajaniya sashiya pa Jiyaniijiani. <sup>5</sup> Pueyasocujaari pa cumaquina, maninia rejeretajaca pa quiniuria, cumanijasano pa quiniuriajuhuaj. Nojuaja cuara nia jiyateera jiyanoojiaca nia quiniuria taa Cristo quiquiaari jiyanoojiacuaani, rupuetoojuaca nia quiniuria niarta Pueyaso pueyata. <sup>6</sup> Naacuajitij nia naata pa Que Pueyaso, mariyata pa Jiyaniijia Jesucristo maniniuhaqueetanu, juhua niquiriyatu pueyano, maninia rupuetoojuaca nia quishacari.

#### *Pueyaso rupaari maja saaja Judiocuacara*

<sup>7</sup> Pueyanaa, jyanootiojuaca nia quiriquia, taa Jesucristo jyanooquiaa pajaniyacuaani, maninia rupuetosano nia quiniuria. Naacuajitij, pueyari Pueyaso timitianutaniya nojori niquishacari Judiocuaca taucucata Pueyaso maniniuhaqueetaano jatiqui. <sup>8</sup> Janiyari seetanujuanaa nia sequeyani, Cristoori mijiria niqiaari Judiocuacaacua, na tohuateenura Pueyaso sequesano nojori supuetanaa. Tariucuaaanu Pueyaso sequesanoori seetanujuanaa. Nojuajaari maja na sequesano na jatanu. <sup>9</sup> Judiocuacara Cristo miishanoori taucucara quiquiaarijuhuaj, nojori maniniuhaqueetanura Pueyaso, na jyanooniuucua nojoriujuhuaj. Tariucuaaanu Pueyaso Rupaajinia supuetana David naajiotasanoori naa quiyajuhuj:

“Maninia quia miiniuucua janiya Pueyasonaa, janiyari quiajanijiniiji pootanutaniya maniniani taucucata jiyacajinia. Maninia quia miiniuucua janiya, janiyari quia timitianutaniya cua jaaquequejosanotani”.

<sup>10</sup> Tamaqui Pueyaso Rupaajinia naa naajiotasanoori quiyajuhuj:

“Pueyaso niishiyashijiaca taucucanaa, Pueyaso saquiriojosano pueya nia cojiri, mariyata jatiqui nia shuquiritianura pa Pueyaso”.

<sup>11</sup> Pueyaso Rupaajinia, supuetana David naajiotasanoori naa sequeyajuhuj: “Pa Jiyaniijia Pueyaso nia maniniuhaqueetare, puetunu niajanijijanaa, tamaatia rupaaca pocujaca taucucanaa. Pueyasora nia jaaquequenuure puetunu jiyacajinia quiniaa pueyajanaanaa, maninia na miiniuucua pajaniya”.

<sup>12</sup> Supuetana Isaías naajiotasanojinijijuhuj, paari niishiyani Pueyasoori taucucata jitianu panijia pueyaracaanu, maja saaja Judiocuaca. Naaratej, Isaíasri naa naajiotaquiaari:

“Supuetana Isaí niyanujiniiji supuenutaniyari pueya Jiitiana. Nojuajaari puetunu mijiria quiniaajanaa jiyaniijia quiriqiano. Puetunu jiyacajiniinio taucuacajanaari nocua tiuujiaa quiniutianiya”.

<sup>13</sup> Pueyasocujaari poojiajina poonijiojua, juhuajaniya pa sashiniuria pueyaracaanu, nojuaja cuara miirijiaatijia puetunu na sequesanojuanaa pajaniyara. Pueyanaa, Pueyaso cuara nia timitiiria jyanohua. Naajuhuj, nojuaja cuara nia jiitiaara juhuajaniya, canapuate nocua tiuujiaacujani. Naacujitij, mijiria nia sashishacari, niaari shuquiriaatia rejeretajaca quiniutianiya Pueyaso Sohuanu cumaquishacari niajaniya, seetanujuanaa nia niishishacari pa Jiyaniijiaari pa rijionuucua tacatenutaniuhua.

<sup>14</sup> Cua panishano Pueyaso niquiohuanaa, naa cua naajiojina cua nacasusacari jyanohua niajanijatej, majaari nia jyaniniu janiyari niaacuaji taacanuyajaani. Maja. Janiyacuajaari niaacua tiuyani niaacuajaari seetanujuanaa maninia quijiaa. Niaacuajaari Pueyaso rupaa niishijiaacujuhuj. Naacujitij, nia naata tama nacasutoojonujuaaja maninia, maninia rupuetoojuaca nia quiniuria Pueyaso niquiara. <sup>15</sup> Naajaa, quiarijia janiyari niaacuara naajiyani cua niishitiniuhua niajaniya tarijia nia niishishano. Cua jyanootiuri, nio cua naajiojina jyanohua cua nacasunuucua niajaniya. Naa nia rootaanijia Pueyaso jyatenuucua janiya Neyanu Jesucristo jiyaramiquishano, taucuaca cua pohuatanura na rupaa. <sup>16</sup> Pueyaso jyatenuucua janiya nera poonijionara, janiyari cunora Jesucristo rupaa pohuataquiaa taucuacani. Naacujitij, Pueyaso Sohuanu poonijionuucua nojori jiuujiajina, nojoriiri Pueyaso shuquiritasano muerasu quiniutianiya juhuaj.

<sup>17</sup> Pueyasora cua poonijosacari, janiyari jyanohua timitiaa Jesucristoni, cua niquishacari taa taucuaca tiuquiaa na rupaacuan. <sup>18</sup> Majaari cua timitianu tama cua miishanojuaja. Janiya cutaraari Jesucristo miishano timitiaani. Nojuacuajaari taucuaca tiuutiquiaa na rupaacua. Nojoriiri nocua tiuquiaa nojori niquiara cua pohuatasacari na rupaa, naajuhuj, Pueyaso Sohuanu cumaacata cua miiniuucua nojori niquiara. <sup>19</sup> Nojori niquishacari Pueyaso Sohuanu cumaacata cua miijosano, nojoriiri niishiquiaa cua pohuatasanoori seetanu rupaajanaa. Janiyari pocuaji Tacuna Jesucristojiniiji tari pohuataquiaari puetunu tiqiyocujanaani, Jerusalén tiacajiniiji, puetunu Iliria jiyajinarajanaanio. <sup>20</sup> Naa cua pohuatasacari pa Jiyano Jesucristojiniiji puetunu cuno jiyacajiniajanaatej, janiyari pueyaracaanu pohuataquiaari cuniquini, tee Jesucristojiniiji tojiyaquishaaquiaari juhuanojuajacuajani. Majaari cua pohuatanu paniniu quiquiaari tee tamasaca pohuataquiaari tari Jesucristojiniiji. <sup>21</sup> Naa cua pohuatasacari Jesucristojiniiji cuno pueya niquiaratej, janiyari nio tariucuacaanu Pueyaso Rupaajinia naajiotasano tohuateeriquiaani. Naa sequeya Jesucristojiniijiiri:

“Nojuajiniiji pohuatasoojua pueyari nojuajiniiji pohuatasaanutaniya. Nojoriiri jiyacari niishiniutianiya cante nojuajani”.

*Pablo naquerejosacari Roma tiacajiniara*

<sup>22</sup> Pueyaracaanu nio jiyacajinia cua pohuatasacari Jesucristojiniiji, majaari jeya cua quiniu quiriquiaa nia niquiniuucua cua quianura. <sup>23</sup> Quiarijia cutara, janiyari Jesucristojiniiji pohuatanu tucatarucuaa tarini, tee Jesucristo rupaa tojiyaquishaaquiaari juhuanojuajacuajani. Janiyari Espania jiyajinia pohuatanu paniya Jesucristojiniijiuhuj. Queraatia marijiaari tari cua shocojocanu pueyaracaanu cua naquerejosacari niaacua cua quianura.

<sup>24</sup> Naacujitij, Espania jiyajiniara cua quiasacari, janiyacu nia tiacajinia jatemani. Janiya jaara pasaja camueenujusee niaata shuquiriaatiani, na

nuhuaaji, janiyari paniniutianiyani nia naacunura janiya, cua quianura Espania jiyajiniara. <sup>25</sup> Janiyari coteenu Jerusalén tiacajinia tacatenutaniuhua tii quiniaa parta Pueyaso muerasu cua niqutionuhua cumaneecani, niya quiniaa parta Pueyaso pueya niqutiojosano nojoriria. <sup>26</sup> Puetunu parta Pueyaso pueya maapuejanaa Macedonia jiyajinia, mariyata niya Acaya jiyajiniani, nojoriiri jiyanoehua maninia miya. Nojoriiri tama niishiriojonuucanujuaaja nareja na cumaneeca niqutiojonura Jerusalén tiacajinia quiniaa casamiijiuniucua Pueyaso pueyara. Cunora, nojoriiri quiarijia na rerateya cuata na jiyarosocoriquiano. <sup>27</sup> Nojoriiri naa miya nojori niishiriojosacari, maniniacuajaari nojori naacunura narta Pueyaso pueya. Seetanujuanaa maniniacuajaari nojori miishano. Judiocuacaari maja na jamuenu quiquiaari Pueyaso rupaa pohuatasaanura taucuaca niqiuara. Naaratej, taucuaca cuara saniniuujia quiarijia naacuura casamiijiuniucua Judiocuaca, nojori jiitiasano cumaneecata. <sup>28</sup> Naacuajitij pueyanaa, janiyari nojori jiyarosocoriquiano cumaneeca niqutionutaniya Jerusalén tiacajinia parta Pueyaso pueya jiitianaani. Na nuhuaaji, janiyari Espania jiyajiniara quianutaniya cutarani. Cua quiasacari, janiyari nia tiacajinia tacanutaniyani cua niquniuria niajaniya. <sup>29</sup> Janiyari seetanujuanaa niishiyani, Cristoori cua naacunutaniya maninia pa shuquiriniuria jatiqui, niaacua cua tiuquishacari.

<sup>30</sup> Cuarta Pueyaso pueyanaa, cua Jiyaniiija Jesucristo nia jiitianuucujuhuaaj, mariyata Pueyaso Sohuanu panitiootesacari pajaniya, janiyari jiyanoehua paniyani nia cojiniuria janiya, Pueyaso nia secojonuta cucuara. <sup>31</sup> Cucuara nia secojore Pueyaso, na cojuanura janiya Jesucristo rupaa paraa Judiocuacaacuaji, Jerusalén tiacajinia cua quiasacari. Naajuhuaaj, nia secojore Pueyaso, Jerusalén tiacajinia quiniaa Pueyaso pueyacuara. Nojoriicua nia secojore, nojori masenura shuquiriaatia narta Pueyaso pueya taucuaca jiyarosocoriquiano cumaneeca nojoriria. <sup>32</sup> Naajuhuaaj, quiria nia secojore, niaacua Pueyaso tiuquitiniuria shuquiriaatia janiya, nojuaja jaara naa paniri. Tii cua quishacari niaata, janiyacua tii samaatesee nia shuriucuaani. <sup>33</sup> Pa jiyanoojia Pueyaso cuara maninia jiitiaara puetunu niajaniyajanaa. Cuara naa quiiriatej.

## 16

### *Nata quiniaata Pablo saruhuatasacari nojori niishishano pueya*

<sup>1</sup> Cuarta Pueyaso pueyanaa, nio maaji niaacua tiuquiniutianiyani, nojuajaari maninia maaji, Pueyaso tojjia. Na sesaari Febe. Nojuajaari Cencrea tiacajinia Pueyaso pueya maanu naacujua maninia. <sup>2</sup> Pa Jiyaniiija panijiaca nia quishacari, nia paniniutia nia masuure nia tiacora nio parta Pueyaso muerasu naacuna maaji. Niocua nia tiaco jiitiarenoj, taa nia jiitiaquiaacuaa parta Pueyaso muerasuni, maninia na quiniuria na camueenujusacari nia tiacajinia. Nojuaja nia naacure maninia, puetunu na panishanotajanaa. Nojuajaari queraatia parta Pueyaso pueya naacujuacuaa. Cua naacujuajaariuhuaaj.

<sup>3</sup> Quiria nia saruhuatare Priscila, neyaca Aquilanio. Nojoriiri cua cojiniaa pa Jiyaniiija Jesucristora poonijionura. <sup>4</sup> Nojoriiri tama nojori cuaqueyajaaja panitiaquiaari cucuara, nojori tacunura cucuaji cua moyaquishaanura. Janiyari cunora jiyanoehua nojori timitiaani, naa nojori jiyanootiuniucua cucuatej. Majaari saa janiyaja nojori cua timitianu. Seetanujuanaa puetunu parta Pueyaso muerasu taucuacajinijiniojuanaari nojori timitiaajuhuaaj, naa nojori miiniuucua. <sup>5</sup> Quiria nia saruhuatarejuhua parta Pueyaso

pueya, noo pojori Priscila, Aquila tiajinia rerejoquiaa Pueyaso secojonu-unuratej. Quiria nia saruhuatarejuhua cua rupuena Epéneto. Nojuajaari coteenujuanaa Jesucristoocua tiuquiaari Asia jiyajinia. <sup>6</sup> María nia saruhuatate quiriajuhuaj. Nojuajaari jiyanoehua poonijioquiaari niaara. <sup>7</sup> Quiria nia saruhuatatejuhua Andrónico, Juniasnio. Nojoriiri cuarta Judiocuaca. Nojoriiri cuata nujuatejosaaquiaari nujuatejojuajinia, canaa pohuatanuucua Jesucristojiniji. Puetunu cuarta Jesucristo jiyaramiquishano pueyajanaari nojori panijiacajuhuj. Andrónico, Junias, nojoriiri socua coteenu janiyajiniji tiuquiaari Jesucristoocua.

<sup>8</sup> Nia saruhuatatejuhua Ampliato. Nojuajaari cua panishano pueyano, Jesucristoocua na tiuuniuucua. <sup>9</sup> Naajuhuj, quiria nia saruhuatate Urbano. Nojuajaari pa Jiyaniijia Cristora poonijionajuhuj. Cua rupuena Estaquis nia saruhuatatejuhuj. <sup>10</sup> Apeles nia saruhuatate quiriajuhuaj. Nojuajaari puetunu casaajanaa rejeretaja cutara, Jesucristoocua tiuujia na quiniuucua. Aristóbulo tiajinia quiniaa pueya nia saruhuatate quiriajuhuaj. <sup>11</sup> Naajuhuj, quiria nia saruhuatate Herodión, parta Judio pueyano. Naajuhuj, Narciso tiajinia quiniaa pueya nia saruhuatate quiria, noo pojori pa Jiyaniijiaacua tiuujia pueyatej. <sup>12</sup> Trifena nia saruhuatate quiria, Trifosajuhuj. Cuno maajipohuari pa Jiyaniijiaara poonijionuujuaca. Naajuhuj, pa panishano maaji Pérsida nia saruhuatate quiria. Nojuajaari jiyanoehua poonijiojua pa Jiyaniijiaara. <sup>13</sup> Rufo nia saruhuatatejuhuj. Nojuajaari maninia tojjia pa Jiyaniijia. Na nucua nia saruhuatatejuhuj. Nojuajaari juhua cua nucua quiquiaari quiria. <sup>14</sup> Nio pojori quiria nia saruhuatatejuhuj, Asíncrito, Flegonte, Hermes, Patrobas, Hermasnio, mariyata nojoritia quiniaa parta Pueyaso pueyano. <sup>15</sup> Naajuhuj, nio pojori nia saruhuatate quiria, Filólogo, necocua Julianio, Nereo, na rimiatunio, Olimpasjuhuaj, mariyata nojoritia quiniaa parta Pueyaso muerasunio.

<sup>16</sup> Niarta Pueyaso pueya nia saruhuatate seetanujuanaa nia paniniutia nojori. Puetunu niiquijinio parta Pueyaso pueya maapuejanaari cua sequecanuni cua saruhuatanura niajaniya.

<sup>17</sup> Cuarta Pueyaso pueyanaa, nia numooteyanijia, jiyanoehua nia cojuare tama nia cuaqueyajaaja najuhuaana tamaatia niishitiojonuujuaca pueyacuai. Nojoriiri Pueyaso pueya maapue cushitiojoquiaa, sesa nojori niishitiojosanota. Naacujitij, Pueyaso pueyari juaatooquiaa. Majaari nojori niishitiojonu pueya taa coteenujuanaa nia niishitiojosaaquiaari seetanu rupaaajanaa cutarani. Naa sesa niishitiojonuujuacaacuai nia rupatere. <sup>18</sup> Nojoriiri maja seetanujuanaa na poonijionu pa Jiyaniijia Jesucristora. Nojoriiri poonijioquiaa tama nojori panishanojuaaja nojori masenura. Najuhuaana shanohua nojori pohuatasanota, nojoriiri niishiyashijiaca pueya sapojoquiaa. <sup>19</sup> Puetunu tamonu jiyacajinijinio parta Pueyaso pueyajanaari niishiya, niaari seetanujuanaa Jesucristo rupaa tojjitajaca cutara. Naaratej, janiyari jiyanoehua nia timitiaani. Naajuhuj, janiyari paniyani niishijiaca nia quiniuria, saaja seetanu rupaaajanaa tojjijaca nia quiniuria, maninia miijaca nia quiniuriajuhuaj. Saniniuujia, sesa niishitiojosano niishiyashijiaca nia quitiriquiani, maja sesa miijaca nia quiniuria. <sup>20</sup> Naacujitij, poojia cajitijia Pueyasoori nia cumaquiniutianiya, Satanás nia shocotanura na sapojosacari niajaniya juucua. Niaari juhua na tanacunutaniya jiyocuar, Pueyaso tojjijaca nia quiniuucua. Pa Jiyaniijia Jesu cuara nia cumaquiria, shuquiriaatia nia quiniuria.

<sup>21</sup> Timoteo, cuata poonijiona Jesucristorani, nojuajaari cua sequeya nera cua saruhuatanura niajaniya. Cuarta Judiocuaca Lucio, Jasón, Sosípater,

nojoriiri nia saruhuataajuhuj.

<sup>22</sup> Cuarta Pueyaso pueyanaa, janiyari Tercioni. Janiyari Pablora nio naajiyani, niaacua jiyarosocoriguiano. Janiyari nia saruhuataajaaniuhuj Cristoocua tiujia cua quishacarijuhuaj. Niojuanaa, pueyanaa.

<sup>23</sup> Parta Pueyaso pueyano Gayoori nia saruhuataajuhuj. Nojuajaari na tiajinia cua quiniuria cua masuucanu. Nojuajaari puetunu parta Pueyaso pueyajanaa masuujua, na tiajinia nojori maquenura, nojori tiuquiiijosacari nio tiacajinia. Parta Pueyaso pueyano Erastoori nia saruhuataajuhuj. Nojuajaari jiyatesaacanu nio tiacajinia jiyaniijia cumaneeca cojuana na quiniuria. Parta Pueyaso pueyano Cuartoori nia saruhuataajuhuj.

<sup>24</sup> Pa Jiyaniijia Jesucristo cuaara cumaquiiria puetunu niajanijajanaa.

*Pablo maniniuhuaqueetasacari Pueyaso, quera na tucuatascari na naajio*

<sup>25</sup> ¡Pueyanaa, jyanohua pa maniniuhuaqueetare pa Pueyaso! Nojuajaari na naata cumaquiniu niajaniya, seetanujuanaa na muerasu nia quiniuria na rupaacua nia tiuushacari. Janiyari naa rootaquiaa niajanijacujani, cua pohuatasacari Jesucristojiniji. Pueyasajuanaacuajaari tarijia cua niishitiquiaari Neyanu Jesucristojiniji cua pohuatanura. Jiya shipiniyaquishaacarijiyujua, Pueyasoori jiyasohua tamajaaja na niishishano jiitiaja Neyanu Jesucristojiniji. <sup>26</sup> Saniniuujia, quiari naataja, paari niishiquiaarini, Jesucristocuajaari mijiria niquiaari puetunu pueyajanaa na jaariuutianura Sesaaca. Tariucuacaanu Pueyaso sequesano caminiujiuniaa naajionuutasanojiniji paari quiarijia seetanujuanaa na niishiya cutarani. Pueyaracaanu Quijia Pueyasocuajaari naa paniquiaari quiarijia pa niishiniuria Neyanujiniji. Quiarijiani, Pueyasoori Neyanujiniji pohuataniquiaa puetunu jiyacajinijinio pueya niquiarajanaa, Neyanuucua nojori tiuuniuria. Naa na pohuataniquiaariiri Neyanu Jesu tojijiaca nojori quiniuria, Judiocuaca, taucuacanio.

<sup>27</sup> Pa Pueyasoori jyanohua niishijia cutara. ¡Pueyaracaanu pa maniniuhuaqueetare nojuaja, maninia na miiniuucua pajaniya, Neyanu Jesucristoocua pa tiuushacari! Cuaara naa shuquiritiasaaria pueyaracaanutej.



## **COTEENU PABLO NAAJIONEE CORINTO TIACAJINIA QUINIAA PUEYASO PUEYACUARA**

### *Pablo saruhuatasacari Corinto pueya*

<sup>1-2</sup> Corinto tiacajinia quiniaa Pueyaso muerasunaa, ¿niaate quiyajaa? Janiya, pa tarajanu Sóstenesjuhuaj, canaari nia saruhuataani. Janiya Pablóni, Jesucristo jiyarosano na rupaa cua pohuatanura taa Pueyaso paniquiaar-icujani. Canaa niaacuara naajiyani, socua canaa niishitiojonura niajaniya, Pueyaso saquiriojosano pueya nia quiniuucua. Niaari maninia quiya Pueyaso niquiara, Jesucristo nia rupuesacari. Niaari seetanujuanaa Pueyaso muerasu, puetunu jiyacajinia pueyatajanaa, canapuete Jesucristoocua tiu-ujiacacuajani. Jesucristocuajaari nojori Jiyaniijia, pa Jiyaniijiajuhuaj. <sup>3</sup> Pa Que Pueyaso, pa Jiyaniijia Jesucristo cuara cumaquiiria niajaniya, juhua-janiya nia quiniuria.

### *Paari maninia miishaaquiaani Cristo pa rupuesacari*

<sup>4</sup> Maninia nia quiniuucua, janiyari pueyaracaanu Pueyaso sequequiaani “Paacarasho”. Pueyasocuajaari jiyanojua maninia miiquiaari niajaniya, nia rupuesacari Jesucristo. <sup>5</sup> Nia rupuesacari Jesucristo, Pueyasoori puetunu cumaquiquiaarijianaa niajaniya na cumaacata, nia poojotanura puetunu na rupaajanaa, puetunu na rupaajanaa nia niishiniuriajuhuaj. <sup>6</sup> Maninia nia tojitasacari Cristojiniji pohuatasano, niaari maninia miishaaquiaari taa canaa sequequiaari niajanuyacuajani. <sup>7</sup> Naacuajitij, niaari tari masequiaari puetunu Pueyaso niquitionu panishanojuanaa, maninia na muerasu nia quiniuria, nocua nia jiaatianuta nia sashishacari pa Jiyaniijia Jesucristo tiuquishacarihua. <sup>8</sup> Pueyasoori nia cumaquiniutianiya pueyaracaanu, maja quenaaja niaacua casaa tiuutiasoo quiniuria, sesa nia miishanojiniji. Naacuajitij, pa Jiyaniijia Jesucristo jaara tiuquiriohua na ruuretajaca na saniitionura, niaa cutaraari juhujaniya quiniutianiya. <sup>9</sup> Pueyasocuajaari maninia tohuateequiaa na sequesano. Nojuacuajaari pa sequequiaari pa co-jiniuria Neyanu, maninia pa miishaanura Neyanutajuhuj. Cuno Neyanuni, nojuacuajaari pa Jiyaniijia Jesucristo.

### *Pueyaso muerasu juhua tamasaca niquitioquiaari*

<sup>10</sup> Cuarta Jesuucua tiuuniaanaa, cua tojitiare. Pa Jiyaniijia Jesucristoori cua sequeteya nio. Maninia nia niishiriojore. Maja juhua tamasaca nia niquitioonu. Maja tamasaca niajaniya. Maninia nia niishiriojore, maja tamaatia. Nia jiuujiaatioorejuhuj. <sup>11</sup> Naa nia sequeyanijia cuarta Jesuucua tiuuniaanaa, Cloe niquiohua pohuatanuucua janiya niajaniya-jiniji. Nojoriiri cua sequerucuaa niaana juayonuujutaquiaa. <sup>12</sup> Naa pohu-ataaarucuaa niajanuyajinijinijia: puetunu pueyajanaana tama sequequiaa-jaaja: “Canaari Pablo pueyani”. Tamasaacanaari saniniuuja sequequiaacu-ja: “Canaari Apolo pueyani”. Tamasaacanaari sequequiaajuhuj: “Canaari Cristo pueyani”. ¿Naatee pueyanaa? ¿Casaara tamajaaja naa nia raquitijiquia-nuni? <sup>13</sup> ¿Majateeri nia niishiniu? Paari Jesucristo cuaqueyani. ¿Pa Jiyani-ijia cuaqueyateeri neequeresetanocuaa? ¿Janiyateeri niaacuara cusoquiaari niyacutesanojiniani, cua pueya nia quiniuria? ¿Niaateeri cua sesajinia tiuquinijosaaquiaari moojiniajuhuaj? ¡Maja, cuarta Pueyaso pueyanaa! <sup>14</sup> Janiyaquiiri namitia nia tiuquinijiaquiquiaari moojiniani. Naacuajitij,

majaari nia naata sequenu niaa cua sesajinia tiuquinijiosaaquiaari. Janiyari niishiya cutarani, janiyari saaja Crispo tiuquiniquiaarini, Gayonio. <sup>15</sup> Naacuajitij, majaari quenaaja tamonu na naata sequenu janiyari na tiuquiniquiaarini. <sup>16</sup> Quera niyajetaanijia. Janiyari Estéfanos tiuquinijioquiaarijuhua necohuatajani. Majaruhua socua pueya cua tiuquinijionu quiquiaari.

<sup>17</sup> Jesucristoori maja na jiyaronu quiquiaari janiya pueya cua tiuquinijionura. Cristo cutaraari cua jiyaroquiaari na rupaa cua pohuatanura. Majaari cua maniniushitiniu na rupaa cua pohuatasacari, pueya mariqui shanohua cua pohuatasanoocua tiuuri najuhuaanaari. Cuaara tiutuuri cutara Jesucristoocua, na miiniuucua maninia pocuara. Pueyasoori pa jiyanoocua saaja Jesucristo cusonuucua niyacutesanojinia pocuara.

*Cristoori Pueyaso cumaaca jiitiaa, Pueyaso niishitiajajuhuj*

<sup>18</sup> Canaa pohuatasano Cristo cusonujiniji niyacutesanojinia pocuarani, cunoori juhua mosanucua pohuatasano shaajecoriquiano pueyara. Naajaa, Jesucristo rupaari Pueyaso cumaacaracacua na tojitianaara, Pueyaso muerasura na jataniniuria pajaniya. <sup>19</sup> Pueyaso sequesanoocuaari naa naajiotasaaquiaaritij:

“Janiyari niishijaca niishishano cushitionutaniyani. Mijiria pueya niishishano jiyatenutaniya najuhuanaranijia”.

Naacuajitij, cante mijiria pueya niishishanoocua tiuyani, nojuajaari maja na jiyanooshaanu quiniutianiya.

<sup>20</sup> ¿Pueyanoteeri jiyanoocua niishitiajaraca Pueyaso muerasura na jataniniuria pajaniya? ¡Maja! Niishijajanaa jaara jiyanoocua niishirojore, ¿pa naatate na sequesanoocua tiuuniu, Pueyaso na jiyanoocua pajaniya? Maja. ¿Niishitiojona rootasanote na naata Pueyaso pueyara jiyatenu pajaniya nocua pa tiuushacari? Maja. Naacuajitij, puetunu mijiria niishishanojuanaari najuhuaana quiya Pueyasora. <sup>21</sup> Pueyari maja na naata Pueyaso niishiniu quiquiaari tama nojori niishitiajatajaaja. Pueyasoori tama sequesaaquiaari na niishitiajata cutara:

“Jaaja. Maninia naatej. Pueya jiyanoocua saaja nojori tiuushacari cua Niyanuucua”.

Pueyari saniniuuja jiyaniya Jesucristo rupaari nareja sequesanojuhuanajaj, tojishoo. <sup>22-23</sup> Naaratej, cuarta Judiocuacaari maja Jesucristoocua tiuuniaara na quiniu ritia. Nojoriiri Pueyaso cumaacata miishano niquiniu paniquiaa coteenu saaja. Cunora, nojoriiri canaa tojitiaaqui quiaa canaa pohuatasacari Jesucristo mosaanujiniji niyacutesanojinia teetesano. Nojoriiri saaja sequesaaquiaa: “¿Pa Jiyaniijaranotucua casaara naa cararaatia mosaareni?” Griego pueyari naajuhuj. Majaari ritia nojori quiniu paniniu Jesucristoocua tiuuniaara. Nojoriiri saaja niishiniuucua jiaatiajaca. Nojoriiri jiyaniya Jesucristoori najuhuaana cusoquiaari juhua moseeca. Naacuajitij, canaa pohuatasacari Jesucristo niyacutesanojinia mosaaquiaari, Judiocuacaari jiyaniya Jesucristoori cumaacaju quiquiaari. Nojoriiri jiyaniyajuhuj Pueyaso Jiyarosocoriquianoocua ritia Judiocuaca jiyaniijara quiniutianiya cutara. Majaari na niishitiniu quijia Cristo cuaara coteenu miishaaria naquiya, jiyanooshaano nojori quiniuria sesa nojori miijosanojiniji. Griego pueyari canaa pohuatasano tojiaqui quiaajuhuj. Nojoriiri jiyaniya Pueyasoori niishiyashijia quiquiaari Neyanu na motenura. <sup>24</sup> Paa cutaraari niishiyani Cristoori pocuara cusoquiaari. Naacuajitij, Pueyasoori cumaacacua cutara na saquiriojosano pueya na jaariutianura Sesaaca, na muerasura na jataniniuria pajaniya, Judiocuaca, Griegohuanio. ¡Pueyasoori jiyanoocua

niishijia cutara! <sup>25</sup> Pueyari jiyaniya Pueyasoori niishiyashijia quiquiaari. Cunora Neyanu cusojuaquiaari niyacutesanojiniaari. Naajaa, naacuajiti Pueyasoori pa jiyanooquiaari. Pueyasoori jiyanoohua socua niishijia cutara mijiria niishijiacajiniji. Pueyari jiyaniyajuhuaaj, Pueyasoori cumueecaaju quiquiaari Cristo cusosacari niyacutesanojinia. Naajaa, naacuajitij, ¡Cristoori Sesaaca shocotaquiaaricuaaja! Pueyasoori jiyanoohua socua cumueeca panijaniyajiniji.

<sup>26</sup> Cuarta Jesuucua tiuuniaanaa, niaacuajaari niishiya taamueca pueya nia quiquiaari pueya niquiarani, Pueyaso sequesacari niajaniya na muerasu nia quiniuria. Saaja secaja niajanijajinijinioori niishijia quiquiaa. Saaja secaja niajanijajinijinioori tojishano pueya quiquiaajuhuaaj. Saaja secaja niajanijajinijinioori jiyaniijianucua niquihuacuajinio supueno quiquiaa.

<sup>27</sup> Mijiria quiniaa pueyara, Pueyasoori socua niishiyashijia pueya saquiriojoquiaari, na muerasu nojori quiniuria. Naacuajitij, mijiria niishijiaaari tamajaaja caririquiniutianiya nojori jaara saquiriojiyaquishaare. Pueyasoori tojishoo pueya saquiriojoquiaarijuhuaaj, na muerasu nojori quiniuria, mijiria tojishano pueya caririquiniuria nojori jaara saquiriojiyaquishaare.

<sup>28</sup> Pueyasoori soosano pueya saquiriojoquiaarijuhuaaj, tojishoo pueyano. Pueyasoori naa saquiriojoquiaari najuhuaana quijiaca. Canapuate tama na cuaqueyajaaja jiyaniya cutara pueyanoni, cuno pojoriiri saniniuujia quejoosaanutaniya. <sup>29</sup> Naacuajitij, majaari quenaaja jiyanoohua pocuaja cureenu quiniutianiya Pueyaso niquiara. Tojetaarucuajanaa shaaquiiri pocuajaca quiniutianiya. <sup>30</sup> Pueyasojuaanaacuajaari nia rupetequiaari Jesucristo. Naacuajitij, niaari Pueyaso niishitiaja jiiitiaa. Nia rupesacari Jesucristo, niaari maninia miijia quiya Pueyasora. Pueyasoori nia jataniya saa na tojijiacaraja nia quiniuria, juhua Neyanu nia quiniuriajuhuaaj. Nijaniyari puetunu jecasaanutaniyajanaa. Paari naa miishiyani Jesucristo pa rupesacari. <sup>31</sup> Seetanujuanaari nio sequesano tariucuacaanu Pueyaso Rupaajiniji:

“Cante shuquiriaatia quiniu paniyani, nojuaja cuara shuquiritiaara pa Jiyaniijia”.

## 2

### *Jesucristo mosaanujiniji pohuatasano*

<sup>1</sup> Cuarta Jesuucua tiuuniaa pueyanaa, janiya jaara niaacua tiuquiquiaarini, niaacuajaari niishiya taa cua pohuataquiaari Pueyasojiniji Jesucristo rupaa niajanijani. Majaari jiyajeneta cua pohuatanu quiquiaari niishijia niishishano rupaacata. Cua pohuatasanoori niishishaatia quiquiaarijia, maja juhua cutara pueyano pohuatasano. Janiyari jacaria pohuataquiaari Pueyaso rupaa niajanijani. <sup>2</sup> Janiyari tari tama sequequiaarijiaanijia: “Janiyari saaja Jesucristojiniji pohuatanu paniya Corinto pueya niquiarani, naajuhuaaj, taa na cusoquiaari pocuara niyacutesanojiniani”. <sup>3</sup> Cua pohuatasacari Jesucristo rupaa nia niquiara, janiyari sasaca quiquiaa cua puerenutani. Janiyari tetecariquiaani.

<sup>4</sup> Majaari cua paniniu quiquiaari cua tiutiniuria niajanijani Jesucristoocua tama cua niishitajatajaaja. Naaratej, majaari cua pohuatasano quiniu quiquiaari juhua shanohua pohuataja sequesano. Naacuajitij, cua pohuatasacari Jesucristo rupaa nia niquiara, Pueyaso Sohuanu cutaraari niojiacajinia poonijioquiaari Pueyaso cumaacata cutara. <sup>5</sup> Naacuajitij, niaari Jesucristoocua tiuquiaari Pueyaso cumaaca miishacari maninia

nioojiajinia. Maja cutaraari nia tiuuniu quiquiaari saaja pueya niishishanoocua.

*Pueyaso Sohuanucuaajaari pa niishitiya Pueyaso*

<sup>6</sup>Naajaa, canapuate Pueyasocua tiuujia seetanujuanaa cutarani, nojoriiri niishiya canaa pohuatasano Jesucristojiniiri seetanu niishishanojuanaa cutara. Nio niishishanoori maja saa pueya niishishanojua. Maja mijiria jiyaniijianucua niishishano. Mijiria niishijiacaari shaajeconutaniya. Nojori niishishanoori najuhuana quiniutianiya. <sup>7</sup>Canaa pohuatasano cutaraari Pueyaso niishishano tarijia, jiya shipinishaacarijiyujua. Pueyasoori jiyacari niishiriojoquiaari jiyano hua maninia na miiniuria pajaniya, shuquiriaatia pa quiniuria pueyaracaanu pa Jiyaniijia Jesucristo shuriucua. Nio rupaari maja pueya niishishano tari. Pueyasoori maja nio na niishitionu quiquiaari pueya tari. <sup>8</sup>Mijiria jiyaniijianucuaari nio niishiyaquiquiaari. Nojori jaara na niishiyaquiaria tarijia, nojori maara pa Jiyaniijia moyaquiquiaari niyacutesanojinia. ¡Na Shipinia motuquiaarijiaari, pueyaracaanu shacantuuca quijia! <sup>9</sup>Naa naajiotasano quiyacuaajaari tariucuaaanu Pueyaso Rupaajinia: “Pueyasoori jiyasohuaja casaa jeenucuasano jiiitaa na panijiaca pueyara. Cunoori maja pueya niquishano quenaaja. Majaari cunojiniji nojori tojishano quenaajajuhuaaj. Majaari quenaaja pueya niishiriojonu quiquiaari jiyano casaate na naata quiniu nojoriria”.

Quiarijiani, canaari saniniuujia pueya niquiara na pohuataani. <sup>10</sup>Pueyasocuaajaari quiarijia canaa niishitiquiaari canaa jiuujiajinia na miiniu panishano pajaniyara. Canaa niishitiquiaariiri na Sohuanuta. Na Sohuanuuri puetunu Pueyaso niishiriojosanojuanaa noojiajinia niishiya. <sup>11</sup>¿Cante pueyano niishiriojosano noojiajinia niishiyani? ¿Majate saa na camaru sohuanujua niishiniu? Taaquiriirinij. Naajuhuaaj, saaja Pueyaso Sohuanuuri Pueyaso niishiriojosano noojiajinia niishiya. <sup>12</sup>Naaratej, Pueyasoori na Sohuanu niquitioquiaari pajaniya, pa niishiniuria Pueyaso niishishano. Naacuajitij, majaari pa jiiitanu saaja tama pa sohuanujuaaja Pueyaso niishishano pa niishiniuria. Paa cutaraari Pueyaso Sohuanuracajaniuhuaaj. Naacuajitij, Pueyaso Sohuanu cumaquishacari pajaniya, pa naata puetunu Pueyaso niquitiosano pajaniyarajanaa niishiniu. ¡Jiyano hua capora Pueyaso! <sup>13</sup>Naacuajitij, canaa pohuatasanoori maja saaja mijiria pueya niishishano. Pueyaso Sohuanujuanaari canaa niishitiojoquiaari Pueyaso rupaa canaa niishiniuria canaa jiuujiajinia. Naacuajitij, canaa naata Pueyaso Sohuanu jiiitanaa niishitiojonu seetanu Pueyaso rupaaajanaa, mariyata taa Pueyaso Sohuanu niishitiojoquiaa canaacuaani.

<sup>14</sup>Mijiria quiniaa pueyari Pueyaso Sohuanu niishitiojosano niishiniu paniyaquiquiaa. Nojoriiri saaja juhua tama mijiria niishiriojosanojuaja na jiyatequiaa. Seetanujuanaa, nojoriiri maja na naata na niishiniu. Saa Pueyaso Sohuanutaja pa naata Pueyaso Sohuanu niishitiojosano niishiniu.

<sup>15</sup>Cante Pueyaso Sohuanu jiiitaaani, nojuajaari na naata puetunu niishishanojuanaa saniniuujuniu. Saniniuujia, tamasaca pueyari maja na naata Pueyaso Sohuanu jiiitana miishano niishiniu nocuara na rimiaaquenura.

<sup>16</sup>Tariucuaaanu Pueyaso Rupaajinia naa naajiotasaaquiaarijuhuaaj: “¿Cante pa Jiyaniijia jiuujiajinia na niishiriojosano niishiyani, socua na niishitiojonura nojuajani? Shaaqui”.

Paa cutaraari Jesucristo niishishano niishiyani Pueyaso Sohuanuraca pa quishacari. Naacuajitij, majaari pa niishiniu saa mijiria pueya niishishanojua.

## 3

*Pueyasora poonijionaa pueya cuaara poonijionuuriquia nojori panitioonuta*

<sup>1</sup> Cuarta Jesuucua tiuuniaanaa, cua quishacari niaata, majaari cua naata jiyajeneta Pueyaso niishishano cua niishitiojonu quiquiaari niajaniya. Niaari juhua Pueyaso Sohuanuuju quiriquiaajaa. Niaari juhua Cristo conaaja quiriquiaajaa, maja Pueyaso tojjiaca seetanujuanaa. Nocuaji, janiyari nia niishitiojoriquiaa jacariani, juhua Pueyaso niishiyashijiaca pueya nia quishacarijia. <sup>2</sup> Cua niishitiojosano niajaniyari niishishaatia quiquiaarijia, maja jiyajeneta. Majaari cua naata Pueyaso cutara niishishano cua pohuatanu quiquiaari niajaniya. Cuno niishishanoori cumueeca Pueyaso pueyara, naatej, taa shu quiya tariucua puereetuca pueyaracuaani. Juhua naatujoori nia quishacarijia, majaari nia naata na tojiniu quiquiaari. Juhuanajuajaari maja nia naata na tojiniu quiarijiani. <sup>3</sup> Niaari juhua Pueyaso Sohuanuuju quiyajaa, juhua Pueyaso niishiyashijiaca pueya. ¿Naatejaaratej? Niaana niarta Pueyaso muerasu shocotanu paniquiaa juucua. Niaanaari juayonuujuataquiaa. Naa nia quishacaritij, niaari juhua Pueyaso Sohuanuuju quiyajaa pueyaracaanu, juhua Pueyaso niishiyashijiaca pueya. <sup>4</sup> Niaana sequequiaa: “Canaari Pablo pueyani”. Tamasacanaari sequequiaajuhuj: “Canaari Apolo pueyani”. Naacuajitij, puetunu niajaniyajanaari saaja juhua Pueyaso niishiyashijiaca pueya quiyaja.

<sup>5</sup> Nia sequeretoj: ¿casaate Apoloni? ¿Casaate janiyani? Canaari nareja Pueyasora poonijionaajuhuanani. Canaari saa Pueyaso panishano miiquiaajaani, Jesucristo rupaa nia tojtianura. Canaari Jesucristo panishano miiquiaarini taa na sequequiaari canaa miiniuriacuajani. <sup>6</sup> Naacuajitij, janiyari Pueyaso rupaa nia pohuataquiaarini, naatej, taa casaa jajau pueyano natojoquiaacuani. Apoloori saniniuujia socua Pueyaso rupaa nia niishitiojoquiaari na cumaquiniuria niajaniya, naatej, taa pueyano na natau shiijioya mohuacatacuani, maninia na maashiniuria. Pueyaso cutaraari na rupaa maashitiquiaari nioojiacajinia, na muerasu nia quiniuria cutara. <sup>7</sup> Naaratej, ¿casaateeri canaani; Apolo, janiyano? Canaari Pueyasora poonijionaa narejani. Saa Pueyasojua cutaraari cumaacaraca. Saaja nojuaja cutara na naata pa tojtiniu na rupaa, seetanujuanaa na muerasu pa quiniuria. <sup>8</sup> Naacuajitij, paari niishiyani, cante natojonani, cante mohuaca shiijiotanani, canaari mariyata saaja Pueyaso poonitijosanoni. Pueyasocujaaari canaa niqutionutaniya na jiiitasano, nera canaa poonijionuucua. Cante socua poonijioreeni, Pueyasoori socua na jiiitasanojiniji na niqutionutaniya taajecori pueyajiniji. <sup>9</sup> Canaari mariyata Pueyasora poonijionaani. Niaari juhua Pueyaso nataacuaca nera. Niaari na muerasu cutara, maja canaa muerasu. Naajuhuj, Pueyasoori juhua nia tiaa saitia, na quiquiorano. Saitia tiasacari, sairí coteenu cumaatia niojoshiya na morijiuria, maja tia matanura. <sup>10</sup> Pueyaso jaara jiyaroquiaari janiya, janiyari Jesucristo rupaa pohuatanu coteequiaari maninia niajaniyani, Pueyaso muerasu nia quiniuria nia tiushacari cua pohuatasanoocua. Naacuajitij, janiyari juhua Pueyaso tiara shipininiu coteequiaarini. Cua niishitiojosano niajaniyani, cunoori juhua moriiu nujuatejosano quiquiaari. Cua nuhuaji, tamasaari nia niishitiojoriquiaa socua Jesucristo rupaa, juhua Pueyaso tia tucuatasaanura. Nojori cuaara niishiiria maninia, maninia nojori niishitiojonura niajaniya, juhua maninia tiasano nia quiniuria.



<sup>11</sup> Majaari socua tamonu rupaa quiniu nocua pa tiuuniuria Pueyaso pueya pa quiniuria. Saaja Jesucristo rupaa cutaraari pa jatanijia Pueyaso pueya pa quiniuria. Janiyacuajaari na rupaa pohuataquiaari niajaniania. Saa na rupaacuaja nia tiuushacari, niocua maninia quiri, juhua maninia morijiucuaacua tiasano tia, maja na matanura. <sup>12-13</sup> Cante socua Jesucristo rupaa niishitiojiya niajaniania, cuno cuaara niishitiojooora jiyanoehua maninia. Cuaara niyajetaaquiiria cutara, nojuajaari na niishitiojosanojiniji nequesoreesaanutaniya Jesucristo muetasacariuhua pocua, pa miishano na saniniujiuniuria juhua manitia. Puetunu niishishaanutaniyajanaari taa canaa niishitiojoriquiaa Jesucristo rupaani, maninia, sesa soj. Pa naata sequenu, canaa niishitiojosanoori juhua pueyano tiasano. Pueya jaara tiare orota, platatanio, shanohua saitiano, maniiri maja na naata na catijianu. Cante saniniuujia tiaree macacatani, tucurutajuhuaaj, turequenacotanio, cunoori taraatia quiniutianiya na tia jaara sanishaare catijianu. Naaratej, pa niishiriojore, ¿pa rootasanote seetanujuanaa maninia? <sup>14</sup> Tamonu jaara maninia miijia quiquiaari Pueyaso cumaacata, na miishanoori maja najuhuaana quiniutianiya Pueyasora. Pueyasoori cuno pueyano niqutionutaniya na jiitiasanojiniji. Cuno pueyanoori niishijia quiquiaari, juhua maninia tiana pueyano. Maninia casaata tiaquiaariiri, maja na tia catenura jaara sanishaare senu. <sup>15</sup> Cante saniniuujia tiaquiaari cateja casaatani, na tiasanoori catenutaniya. Puetunu na jiitiasanojuanaari juurequenutaniya. Saaja nojuajaari Sesaaca jaariutiasaanutaniya juhua manijiniji jaashano. Naa miishaanutaniyari Jesuucua tiuuniaa, canapuate maninia miyashijia quiquiaari mijiriani. Nojuajaari jatarinitiaja Sesaaca jaariutiasaanutaniya, juhua manijiniji jaashano.

<sup>16</sup> ¿Majateeri nia niishiniu pueyanaa? Niaacuajaari Pueyaso quiquio, juhua na tia. Na Sohuanuuri nioojiacajinia quijia. <sup>17</sup> Tamonu jaara Pueyaso quiquio sesore, Pueyasoori cuno pueyano saniitionutaniya saniniuujia. Puetunu Pueyaso muerasujuanaari juhua na tia quiya. Pueyaso quiquio cuaara quiiria tojetaarucujanaa maninia, saa neraja, maja raquiriojotasano. Niaacuajaari na quiquio.

<sup>18</sup> Tama nia cuaqueyajaaja nia cojuare tamonu mariqui nia sapojoreeri. Cante tama na cuaqueyajaaja jiyaniya niishijiani, nojuaja naasucuaari niishijia saaja Pueyaso niishiyashijia niquiara. Cuno pueyano cuaara jataara cuno na niishishano juhua niishiyashijia na quiniuria narta pueya niquiara. Na nuhuaji, cuaara maseera Pueyaso niishitiaja, seetanu niishijia na quiniurijanaa. <sup>19</sup> Mijiria pueya niishishanoori juhua paateca sequesano Pueyasora. Tariucuaaanu Pueyaso Rupaajinia naa naajiotasanoori quiya: “Pueyasoori mijiria quiniaa pueya cushiriquiitaniniutianiya, tama nojori niishitiushanoocuaajaaja nojori tiuushacari najuhuanaj”.

<sup>20</sup> Naa naajiotasanoori quiyajuhuaaj:

“Pueyasocuaajaari mijiria niishijia nia niishiriojosano niishiya. Naa sequeyari: ‘Najuhuaanaari cuno pojori niishiriojonuusano’ ”.

<sup>21</sup> Naaratej, maja shuquiriaatia nia quiniu saaja niquiriyatu Pueyaso rupaa pohuatana nia tojishacari. Pueyasoori tamasaca pueya jiyaramiquiquiaa nia cumaquiniurijuhuaaj, maja saa niquiriyatu niishitiojonaja. Puetunu casaajanaari niaara, maninia nia quiniuria. Naaratej, majaari saa niquiriyatu pueyanoocuaaja nia jiaatianu. <sup>22</sup> Pueyasoori canaa jiyaramiquiquiaari canaa cumaquiniuria niajaniania. Naacuajitij, janiya, Apolo, Pedro, canaari niaara quiyani, maninia canaa miiniuria niajaniania Pueyaso rupaata. Nio jiyari niaara quiyajuhuaaj. Pueyaso shipinishanocuaajaari niaara. Naajuhuaaj,



mijiria nia quishacari, cunoori niaara quiya, socua maninia quijiara nia quiniuhuara. Taa nia miishiya quiarijiacuajani, taa nia miishaanutaniyani, puetunu cunajuanaari niaara, cumueeca Pueyaso muerasu nia quiniuria. Nia shaajesacariiri maninia quiniutianiya niaarajuhuj. Pueyasoori nia shaajeteya na shuriucua nia quianura. Naacuajitij, puetunu casaajanaari niaara quiya. <sup>23</sup> Niajaniyari Cristora quiya saniniuuja. Cristoori saniniuuja Pueyasora quiyacujua.

## 4

### *Jesucristo jiyaramiquishano poonijosano*

<sup>1</sup> Naaratej pueyanaa, niajaniya cuaara niishiiria canaari saaja Jesucristo seyani. Canaari maja cutara pueyani. Pueyasoori canaa jiyatequiaari na rupaa canaa niishitiojonura niajaniya, Pueyaso niishitiojosano canaa. Cunoori tarijia pa niishishoo. <sup>2</sup> Cante Pueyaso niishitiaja jiitiaani, cuno cuaara quiiria seetanujuanaa Pueyaso miiniu panishano panijia, na rupaa na pahuatanura puetunu maniniajanaa. <sup>3</sup> Niajaniya, tamasaca pueyajuhuj jaara sequenu paniya taamueca pahuatanate janiyani, quiria, naajaa. Mijiria nequesoreena jaara cua nequesoreere cua niishitiojonujiniji, naajaa. ¿Janiyate sesa niishitiojoquiaani? Johuaj. Maja cua niishiniu. <sup>4</sup> Janiya jaara sesa miriquiaa cua Jiyaniijiaara cua poonijosacarini, majaari cua niishiniu. Majaari coojia macuhujenu quiija. Naajaa, maja cua naata tama cua cuaqueyajaaja sequenu janiya cutara maniniani. Saa cua Jiyaniijiaja na naata sequenu taa cua quiquiaarini. <sup>5</sup> Naaratej, maja nia rimiaaquenu tamonuucua, Jesucristo tiuquiyaquishacariuhua pocua. Nia sashiri. Pa Jiyaniijia jaara tiuquiriohua, puetunu jiyasohua pa miishanojuanaari niishishaanutaniya. Niishishaanutaniyajaariuhuj casaara pa miiquiaari puetunu pa miishanojuanaani. Cuno quishacari, pa Jiyaniijiaari maninia pahuatanutaniya cante maninia miiija quiriquiaa mijiria na quishacarini.

<sup>6</sup> Cua tojitiare cuarta Jesuucua tiuuniaanaa. Janiyari nareja nia pahuatariquiaa Apolojinijini, janiyajinijiiuhuj, maninia nia niishiniuria casaa cua niishitiojiya niajaniyani. Naacuajitij, nia niishitiojoriquiaanijia saa Pueyaso rupaa nia tojtianura suraatiaja. Majaari socua tamonu niishitiojosano nia tojiniu. Naajuhuj, maja nia sequenu tamonu niishitiojonajiniji: “Cuno niishitiojonaari sesa pahuataja. Tamonu niishitiojona cutaraari shanohua pahuataja. Na tojiriirij, na shuquiritiniuucua janiya”. Maja naate pueyanaa. Mariyata nia tojitiare puetunu Pueyaso jiyaramiquishano pueyajanaa, seetanujuanaa nojori pahuatasacari Pueyaso rupaa. <sup>7</sup> ¿Niajaniyariuhuj? ¿Taa nia sequeya tama nia cuaqueyajinijiaajani? ¿Ni-aateeri socua maninia pueya tamasacajiniji, socua niishijiacajuhuj? Majaruhua. Naajaa, niaa jaara seetanujuanaa socua niishijiacacari tamonujiniji, ¿taa jiyano nia niishijiacara nia quiquianuni? ¿Tamajaate? ¡Maja tamajaaja! Niaacuajaari Pueyaso niishitiaja jiitaa. Naaratej, maja nia jyaniniu niaa socua maninia pueya tamasaca pueyajiniji, tama nia niishishanotajaaja.

<sup>8</sup> Niaa jiyoteeri jiyaniya niaa tari cutara niishijiacara quirii. Niaa jiyoteeri jiyaniyajuhuj, niaa tari jiitaa puetunu Pueyaso niquitonu panishanojuanaa niajaniya. Naajuhuj, niaa jiyoteeri jiyaniya Pueyasoori nia jiyateree jiyaniijianucua nia quiniuria. Niaa naasucuaari canaa shocotaree tari. ¿Naatejaaratej? Seetanujuanaa naara nia jiyateriquiani, canaa quiniuria niarta jiyaniijianucujuhuj, shuquiriaatia pa quiniuria mariyata. <sup>9</sup> Janiyari cuarta Jesucristo jiyaramiquishanoocua niishiriojoriquiaani,

Pueyaso naasucuaari canaa jiyatequiaari juhua najuhuana quijiacara, saa puecoosocoriquianojua. Canaa naasucuaari naa quiya mijiriani, puetunu pueyajanaa shootianura canaa, Pueyaso seya shootianura canaajuhua. <sup>10</sup> Canaa tojitiasacari Cristo, canaa naasucuaari niishiyashijiaca quiya tamasacarani. Niajanitari saniniuujia niishijiaca quiya tamasacara, Jesucristo nia rupuesacari. Canaa naasucuaari Pueyaso muerasu sasaca quiya saajani. Niaari saniniuujia Pueyaso muerasu cumueeca quiya tama nia niquiarajaaja. Pueya jiyoteeri nia shuquiritiaa. Canaari saniniuujia saaja rerequetesano quiyani, pueya soosanojuhuj. <sup>11</sup> Canaari pueyaraaanu miaaquequiaaani. Canaari jiyamuequiaaaniuhuj. Canaa cushishano toqueniyojuaari jiyareta sesaruqueniyojua. Pueyari canaa miiquiaa taraatiani. Shaaquiri canaa tia, canaa rucojonuucua pueyaracaanu. <sup>12</sup> Canaari samareequiaani pueyaracaanu canaa poonijiosacari tama canaa juaashiquiatajaaja. Pueyari canaa sesacaquiaani. Canaari maninia na riucuaquiaa saajani. Canaa jaara naquiya miishaareni, canaari na rejerequiaa juhujaniya saajani. Majaari canaa naminiu quiquiaa saniniuujia nojori. <sup>13</sup> Pueya jaara tamasaca niquiara rimiaaquequiaa canaajiniji, canaari nojoritia jeeatoonu saniquiaa juucuan. Pueyari canaa jiyatequiaa juhua rucucuarani. Canaari naa quiyajaa nojoririani.

<sup>14</sup> Naa cua naajiosacari niaacuaratej, majaari cua cararonu paniniu niajaninya. Janiyari saaja nia niishitiojonu paniya cutarani. Janiyari nia rootaa juhua cua muerasuniyojuani. <sup>15</sup> Naa naasucuaari queraatia Jesucristo rupaa niishitiojonaaraca. Naajaa, saa janiyajaari juhua nia queni. Nia tojitiasacari Jesucristo rupaa cua pohuatasacari niajaninya, niaari Pueyaso muerasura quiquiaari. <sup>16</sup> Juhua nia que cua quishacari, nia nacasureenijia pueyanaa. Naate taa maninia muerasu na queecua jiaatiaacuaani, naa cucua nia jiaatiarejuhuj, juhua janiya nia quiniuriajuhuj.

<sup>17</sup> Naaratej, janiyari niaacua jiyaroya cua panishano Timoteoni. Nojuajaari juhua cua niyanura quiquiaari na tojishacari Jesucristo rupaa. Timoteori pa Jiyaniijia Jesucristo tojiquiaa maninia. Nojuajaari nia niishitiojonutaniuhua taa cua niishitiojoquiaacuaa puetunu Pueyaso maa-puejanaa puetunu jiyacajiniajanaacuaani. Naa nia rootanutaniyari nia niishiniuhuara maninia cua niishitiojosano niajaninya tarijia. Nojuajaari nia pohuatanutaniyahuj taa quijia cua quiyani cua tojishacari pa Jiyaniijia Jesucristo, naa maninia nia miiniuriajuhuj.

<sup>18</sup> Noojiaqueya niajanijiniiniori shuquiriaatia quiya, juhua jiyaniijianucua nojori jiyatesacari tama na cuaqueyajaaja. Nojoriiri naa miriiqui nojori jiyaniishacari maja naasucuaari cua tacatenu quiniutianuhua, cua niquiniuhuara niajaninya socua. <sup>19</sup> Janiyacuajaari niaacua naquerejiya tarini, cua Jiyaniijia Jesucristo jaara paniri niaacua cua quianura. Cua tiuquishacari niaacua, janiyari cuno niishijiaca pueya saniniujiuniutianiyani, cua niishiniuria casaate nojorini, maja naa sacuaraatia nojori quiniuriatej. ¿Cumaacaracate nojori, saaja pocuajaca soj? <sup>20</sup> ¿Canteeri seetanujuanaa Pueyaso pueyanoni? ¿Saaja pocuajatee? ¡Maja pocuaja! Cante Pueyaso Sohuanu jiiitiaa na cumaquiriquiano Jesucristo na tojiniuriani, cunoori seetanujuanaa Pueyaso pueyano cutara. <sup>21</sup> Nia niishiriojore, cuarta Jesuucua tiunianaana. ¿Taa nia paniya cua miiniuria niajaninya cua quiasacari niaacuani? ¿Niaateeri paniya cua saniitionura niajaninya, jacaria cua niishitiojonura niajaninya cua paniniutia soj? ¿Taa nia paniyani?

*Na que niquiocuata quijiajiniji pohuatasano*

<sup>1</sup> Niajanijajiniji pohuatasaarucuaa taraatianijia. Tamonu niajanijajinijionaaari jiyanoohua sesa miya. ¡Na que niquiocuata quiyacuini-aari! ¡Pueyanaa, cuno miishanoori socua jiyanoohua cararaatia Pueyaso niishiyashijiaca miishanojiniji! Pueyaso niishiyashijiaca pueyani, majaari quenaaja nojori naa sesa miiniu niishiniutij. <sup>2</sup> Naa cuno pueyano miishacari sesa nia tajinatej, ¿niaateeri saaja juhuajaniya cuniqui na jiitiaaruhua? ¡Niaa cuara na tacaatiaara! Cuno sesa miijia cuara taanuusaaria nia tajiniji, maja na cojiniuria socua niajanijajiniji nia rerejosacari. <sup>3</sup> Cua tojiri taa pa miiniutianiyani. Janiyari maja cua quiniu niaata. Naajaa, coojiaari niaata quiya cua niishiriojosacari niajanijajiniji. Naacuajitij, janiyari juhua nia tajinia quiyani. Naacuajitij, janiyari tari cuno sesa miijia saniniujiuriini. <sup>4-5</sup> Naaratej pueyanaa, cua tojitiare. Nia rerejore cuno sesa miijia nia tarinitianura Sesaacara. Coojiaari niaata quiniutianiyani naa nia miishacari pa Jiyaniijia Jesucristo cumaquishacari niajanijajiniji. Naacuajitij, Sesaacaari naquiya na miiniutianiyani; na cusojuanura naasucua, maja soj. Naajaa, na cuaqueyari naa naquiya miishaanutaniya noojia na tacatonuhuara, Pueyaso tojijiaara na quiniuhuara. Naacuajitij, pa Jiyaniijia Jesucristo metasacariuhua pocua, nojuajaari samiitianishaanutaniuhuajuhua puetunu Pueyaso muerasutajanaa.

<sup>6</sup> Cuarta Jesuucua tiuuniaanaa, ¿taate nia naata shuquiriaatia quiniu tamaajajani, naa sesa miijia quishacari nia tajinatej? ¿Majateeri nia niishiniu? ¡Niaa jaara cojiya sesa miijia saniniujiushoojua, socua pueyari mariyata naa sesa miiniutianiyacuij! Sesa miijia niishishanoori tamasaacua paaquenu-taniya. Niaacuajaari niishiya, shiitianiyojua pan poreeteja jaara niasaare cashojuajinia, ritia poreeteja puetunu cashojua miniquiootasanajuanaari. Naajuhuj, sesa miijia jaara sequeyaquishaare na miishano, sesa na miishanoori socua paaquenutaniya.

<sup>7</sup> Tarijia, Pueyasoori pa supuetanaa Judiocuaca rootaquiaari puetunu na pan poretejajanaa nojori jatanura puetunu marijarajanaa. Nojori-iri naa rootasaquiaari saaja poreetesoo pan nojori miaquenura siete juuca, shuquiriaatia nojori quiniuria Pueyaso niquiara. Pueyasoori naa nojori niishitiojoquiaari miriquitij, nojori cartenura puetunu sesa nojori miitiushanojuanaa, nojori rupuenura Pueyaso. Naajuhuj quiarijiani, nia taanure cuno sesa miijia nia tajiniji, seetanujuanaa sesa miyashijiaca nia quiniuria Pueyaso niquiara. Pueyaso jiyanooniuria pajaniya, Cristoori tari mosaaquiaari pocuara, taa borregohua puecoosaaquiaari Pascua juucacuaani. Tariucuacaanuuri naa miishano quijia, Pueyaso jiyanooni-uria pa supuetanaa Judiocuaca, sesa nojori miishanojiniji. <sup>8</sup> Naa Pueyaso pa cojishacari quiarijiatej, tojetaarucujanaa sesa miyashijiaca pa quiri, shuquiriaatia pa quiniuria pa Jiyanoonia niquiara. Pueyaso pueya maanu pa cojuare puetunu maninijajanaa, maja sesa miijiacata cojitishano. Seetanujuanaa maninia pa quiri puetunu pajaniyajanaa.

<sup>9</sup> Pueyanaa, janiyari tari niaacuara naajiocanuni cua sequenura niajanijajiniji, maja nia cojiniuria sesoriquia pueya, cuno pojori canapuate na camishoo maaji numuetucuquiaani. <sup>10</sup> Naa cua sequesacari niajanijajinijatej, majaari cua sequenu nia rupueyaquiniuria puetunu sesoriquia pueya sequejanaa mijiria. Saa nia shaajesacarijia cutara nia naata puetunu sesoriquia pueyacuajijianaa rupertenu. Nio jiyacua, pueyari naa sesa miijiacua quiya: nojori-iri sesa miiquiaa tama na niishiriojosanotajaaja. Nojoriiri tama nerajaaja paniquiaa socua casami pueyaracaanu. Nojoriiri nohuasenuquiaa. Nojoriiri tama na panishanoocujajaaja jiaatiaquiaa puera, maja Pueyasocua.

<sup>11</sup> Cua tojitiare casaa cua sequecanu tari niajanianiyani. Cante tama na cuaqueyajaaja sequejani: “Janiya Pueyaso muerasuni”, maja cunota nia cojitianu, cuno jaara na camishoo maaji numuetucujuquiaa. Naajuhuj, majaari nia cojiniu nooj cante casamiriacara quiniuucua jiaatiaquiaani. Majaari nia cojiniu nooj cante tama na panishanoocujajaaja jiaatiaquiaajaaniuhuj, maja Pueyasoo. Majaari nia cojiniu narta pueya sesacaja. Majaari nia cojiniu mashaasequejo. Majaari nia cojiniu nooj, cante tamonu casami nohuasejoquiaa na sapojonutani. Janiyacuajaari tari naa nia sequecanuni maja jiyano pueyata nia cojitianura. Majaari jiyano pueyanota nia miaquenu quenaaja. <sup>12-13</sup> Naa cua sequesacari niajaniatej, majaari cua sequenu quiriquiaa tamasa pueyajiniji, canapuetucujaja maja Pueyaso muerasuni. ¿Paate nojori nequesoreenaani? Maja. Pueyasocujajaari nojori saniniujuuniutianiya. Pajaniya cumaati parta Pueyaso pueya saniniujuquiaani, nojori jaara sesa miiriquia. Naaratej, nia jatara cuno sesa miijia nia tajiniji, noo cante sacuaraatia na que niquiocuata quiyacuajani.

## 6

### *Sesa miijia cuaara nequesoreesaa narta Pueyaso muerasu niquiara*

<sup>1</sup> ¿Seetanutejanaa naa niajanijajiniji pueya pohuatasanojuhuaj? Niarta Jesuucua tiuunia jaara sesa miiri niajaniana, niaanaari Pueyaso niishiyashijiacaa nequesoreena tonujuquiaa nocuara. ¿Casaara tamajaaja niarta Pueyaso muerasu niquiara nia jeecatoyaquiquiaani? <sup>2</sup> ¿Niaate niishiyaquiya, Pueyaso muerasuuri Pueyaso niishiyashijiacaa nequesoreeriquianocujaja, Pueyaso saniniujuushacari nojori? Pueyaso jaara naa nia nequesoreetenutaniya na ruuretajaca, ¿majate nia naata quiarjia niarta Pueyaso muerasu nequesoreenu tamajaaja, nojori jaara sesa miiri shiitianiyojua? <sup>3</sup> ¿Majate nia niishiniujuhuaj, paari Pueyaso seya nequesoreeriquianojuhuaj? Pueyaso jaara pa nequesoreetenutaniya na seya na tojiyashijiacaa, ¿majate quiarjia nia naata maninia nequesoreenu niarta Pueyaso muerasu mijiria? <sup>4</sup> Naa jaara nia tapueyocuaacuara tonujunu paniya sesa na miishacari, ¿niaateeri Pueyaso ruuretajaca tonujunutaniya nojoriicuara? ¡Maja maninia naatej! Cuno pojoriiri maja Pueyaso muerasu jiiitanaa. <sup>5</sup> Naa nia sequeyanijia cua cararonura quenaaja niajaniana, cua niishiriojotenura niajanijajuhuj. ¿Seetanujanaa tojetaarucujanaa shaaquiti niishijia niajanijajinijinio, cante na naata nia tonujutoosacari nequesoreenu niajaniana maniniani? ¡Quiya jiyotucuaajaari! <sup>6</sup> Niajanianaari tama niarta Jesuucua tiuuniaacuarajaaja tonujutoojoquiaa Pueyaso niishiyashijiacaa nequesoreena niquiara. Naa nia miishacaritij, ¡niaari sesa miiquiaa pueyanaa!

<sup>7</sup> Niaari jiyanojua jiyajeneya nia juayonuujuutasacari. Naa jaara sesa miishaare, naa cuaara jiyanoootioora saniniuujia, nia casami jaara nohuasesaarejuhuaj. <sup>8</sup> Nijajaniyarijataj, ¡niaari saaja sesa miiquiaacujua! ¡Niaanaari niarta Pueyaso muerasu miiquiaa sesa! Naaanaari tama niarta Jesuucua tiuuniaajaaja nohuasejoquiaa, sesa miijiacaa nia quiniuucua.

<sup>9-10</sup> Maja tama nia cuaqueyajaaja nia sapojonu, pueyanaa. ¿Niaateeri niishiyaquiya Pueyasoori maja na rijionu quiniutianiya sesa miijiacaa na shuriucua nojori quiniuria? Jiyano pueyari puetunu quejoosaanutaniyanajanaa. Quejoosaanutaniyari noo pojori canapuate na camishoo maajipohua numuetucujuquiaani, naajuhuj, noo pojori, canapuate tama na panishanoocujajaaja jiaatiaquiaani, maja Pueyasoo. Quejoosaanutaniyajaarihua noo pojori, canapuate narta pueyano niquiocua numuetucujujani, naajuhuj, canapuate maajishuriutia quijia juhua maajitiani. No-

huasenuujuacaari quejoosaanutaniyajuhuaaj, noo pojorijuhuaaj canapuede pueyaracaanu socua casami paniquiaa tama nerajaajani. Mashaasequenuujuacaari puetunu quejoosaanutaniyajuhuaaj, tamasa sesacajacanio, tamasaacuara rimiaaquejajuhuaaj. Naa quejoosaanutaniyajaariuhua noo pojori, canapuede nohuasejoquiaa na sapojonutani. Puetunu jiyano pueyajanaari maja Pueyaso muerasu na quiniu quiniutianiya, Pueyasota nojori quiniuria shuquiriaatia pueyaracaanu. <sup>11</sup> Noojiaqueya niajanijiniiniori jiyano sesa miijica pueya quiquiaari tarijia. Na nuhuaji, sesa nia miishanoori jeequesaaquiaari Jesucristoocua nia tiushacari. Pueyaso Sohuanuuri nioojiajinia tiuquiquiaari, Pueyaso na tojitiuria niajaninya. Naacuajitij, nia rupuesacari Jesucristo, Pueyasoori nia jiyanoquiaari. Nia sequereeri: “Niaari saa maniniaja quiya cua niquiara”.

### *Pa cuaqueya cuaara quiiria saa Pueyasoraja*

<sup>12</sup> Queraatia pueyari sequequiaa: “Pueyaso jiyanooshacari pajaniya, paari tarinitiasaaree puetunu pa miiniu panishanojuanaa pa miiniuriani”. Seetanujuanaa naacuaj. Saniniuujia, majaari puetunu pa miiniu panishanojuanaa maninia na quiniu pajaniyara. Seetanujuanaa cua naata miiniu puetunu cua miiniu panishanojuanaa. Naajaa, maja cutaraari cua miiniu puetunu cua miiniu panishanojuanaa, janiya mariqui puera nocua jiyartuureeri. Naa pa jiyartuusacaritij, na nuhuaji majaari pa naata pa jiiitishano casaa pa tarinitianu. <sup>13</sup> Pueyari sequequiaa: “Pueyasoori miaquesano shipiniquiaari pa seecora. Pa seeco shipiniquiaari sumatuucujia saniniuujia, shuquiriaatia pa quiniuria”. Seetanujuanaari cuno sequesano. Naajaa, majaari nio pa niyajetanu, na nuhuaji, Pueyasoori na shaajanutaniya puetunujuanaa. ¿Pa cuaqueyariuhuaaj? ¿Pueyasoteeri pa cuaqueya shipiniquiaari pa numuetucunura pa camishoo maajipohua? ¡Maja! Pa cuaqueya cutaraari shipinishaaquiaari pa Jiyaniijia, na panishano pa miiniuria. Naajuhuaaj, pa Jiyaniijiaari pa cuaqueyara quiyacujua, na cumaquiniuria pajaniya, maninia pa quiniuria pueyaracaanu. <sup>14</sup> Naajuhuaaj, taa Pueyaso samiitiani quiaaricuaa pa Jiyaniijia Jesu na cuaqueyatani, nojuajaari macujiniji naa pa samiitianiutianihua na cumaacatajuhuaaj.

<sup>15</sup> ¿Niaateeri niishiyaquiyajuhuaaj, Pueyaso Sohuanu quiniuucua poojiajinia, pa cuaqueyari seetanujuanaa pa Jiyaniijia cuaqueya quiya? Naaratej, Jesucristo cuaqueya pa quishacari, maja cumaati pa curuushojonu pa cuaqueya, maaji paanatu pa numuetucunuta. ¡Cunoori jiyanoohua sesa! <sup>16</sup> Pueyasocuaajaari coteenujuanaa na shipinishano pueyano sequequiaari: “Quia camishacari maaji, niaari niquiriyatu cuaqueyara quiniutianiya”. ¿Niaateeri nio niishiyaquiya, cante paanatu numuetucureeni, Pueyasora, nojoriiri niquiriyatu cuaqueyaracara quiquii? <sup>17</sup> Naajuhuaaj, paa jaara Jesucristo rupuereni, pa sohuanuuri rupuetooree na Sohuanuta, niquiriyatu sohuanuraca pa quiniuria Jesucristota.

<sup>18</sup> Naaratej, nioojia nia tacatore maja nia numuetucunura tamasa, cante quia camishoo maajini. Puetunu tamaatia sesa pa miishanojuanaani, cunoori maja pa cuaqueya sesojua. Saniniuujia, cante na camishoo maajipohua numuetucujani, nojuaja cutaraari tama na cuaqueyajaaja sesoya. <sup>19-20</sup> ¿Majateeri nia niishiniu, nia cuaqueyari Pueyaso Sohuanu quiquio? Pueyasoori na Sohuanu jiyaroquiaari poojiajinia na quiniuria. Pueyasoori nia masequiaari tama nerajaaja nia quiniuria. ¡Jiyanoohua naquiya na miiniutia nia masereeri Neyanu na motesacari pocuara! Naacuajitij, Pueyasoori quiarijia pa camarnu quiya. Naaratej, quiarijia maja pa quiniu tama pa



cuaqueya camarujuaaja. Naaratej, pa shuquiriritiri pa Pueyaso pa cuaquey-ata, pa sohuanutajuhuj. Nojuacuajaari pa cuaqueya camaru, pa sohuanu camarujuhuj.

## 7

### *Pablo rootasano pa caminiuria, camiojua pa quiniuria soj*

<sup>1</sup> Quiarijiani pueyanaa, cucuara nia naajiosanojinia nia nequesotasano riu-ucuaereeraj. Cante niquiriyatu quiniu paniya tamajaajani, cuno pueyanoori maninia miya, maaji na camiyaquishacari. <sup>2</sup> Saniniuujia, quiarijiani, pueyari puera sesa miiniu niishiQUIIAA. Nocuaji pueya cuaara camiiiria. Maajipohua cuaara camiiirajuhuj. <sup>3</sup> Pueyano jaara camiri, necocua cuaara na cuaqueya jamueyaquiiria neyaca numuetucunu panishacari. Naajuhuj, neyaca cuaara na cuaqueya jamueyaquiiria necocua panishacari na numuetucusaanura. <sup>4</sup> Necocuaari maja tari tama na cuaqueya camarujuaaja na quiniu. Neyacaari na cuaqueya camaru cutara. Naajuhuj, neyacaari maja tama na cuaqueya camarujuaaja na quiniujiuhuj. Necocuaari neyaca cuaqueya camaru cutara. <sup>5</sup> Naacuajiti maajipohuanaa, maja nia niyacaacuaji nia jamuenu nia cuaqueya, na panishacari numuetucunu nijaniya. Naajuhua nijaniya canuunaa, maja nia niquiocua nia tarijionu na panishacari na numuetucusaanura. Saniniuujia, jiyanohua Pueyaso nia secojonu panishacari, jiyacari cutara nia naata tarinitianu numuetucunu rupaquijia, Pueyaso nia secojonura, niaa jaara mariyata naa miiniu paniri. Na nuhuaji cutara, nia numuetucurohua nia niquiocua, Sesaaca mariqui sesa nia miitiriiri tamonu maaji nia paniniuria, nia camueenujusacari puera. <sup>6</sup> Nioori quiarijia maja niaara Pueyaso rootasano janiya. Janiyari nareja naa sequeya nijaniyani socua panaatia nia quiniuria. <sup>7</sup> Naaratej, nia jiyateriquiani taa cua quiyacuaani, niquiocuaaju. Naajaa, Pueyasoori puetunu pa cumaquiquiaajanaa tamaatia pa quiniuria, taa Pueyaso paniyacuaajani. Camishoo, camishano soj, naajaa. Taa pa quiyani, paari shuquiriaatia quiquiaa Pueyaso cumaquishacari pajaniyani.

<sup>8</sup> Camiojua pueyanaa, mashiquiopuenaa, cua tojitiare: niaa jaara juhujaniya quiya taa camiojua cua quiyacuaani, niaari maninia quiniutianiya. <sup>9</sup> Cante saniniuujia maja na naata tama na cuaqueya panishanojuaaja re-jetenu maninia tamajaajani, cuno cuaara camiiiria. Socua maninia cutaraari nia caminiuria, maja maajiicua nia jiaatianura pueyaracaanu. <sup>10</sup> Camiyono pueyanaa, nio nia tojitiare cutara. Nioori pa Jiyaniijia Jesucristo sequesano cutara, maja saa cua sequesanojua. Maajipohuanaa, maja nia cartenu nia niyaca. <sup>11</sup> Cante neyaca carteyani, nojori cuaara jiyanoootioora, na rupuetoonuhua. Jaara maja na naata jiyanoootioonu, cuaara quiiria tamajaaja pueyaracaanu. Cuaara camiyaquiiria socua. Canuunaa, pa Jiyaniijia Jesucristo sequesanoori mariyata niaarajuhuj. Naa sequeyari: “Maja nia cartenu nia niquiocua”.

<sup>12</sup> Quiarijiani, socua nia niishitiojoreeraj. Nioori tama cua niishitiojosanojuaaja, maja niaara Jesucristo rootasano. Pueyano jaara Pueyaso tojiyashijia niquiocuaraca quiri, cuaara jiitiaara maninianoj. Quia niquiocua jaara quiata quiniu paniyajaa, majaari na cartenu. <sup>13</sup> Naajuhuj, maaji jaara Pueyaso tojiyashijia niyacaraca quiri, cuaara maninia jiitiaara neyaca. Majaari na cartenu, quia niyaca jaara quiata quiniu panirijia. <sup>14</sup> Cuarta Pueyaso muerasunaa, Pueyaso tojiyashijiacua pueya nia jiyanoori, nojori jaara Jesuucua tiuuniaata caminio quiya. Nojoriiri seetanujuanaa maja Pueyaso muerasu. Naajaa, necocuaari Pueyaso pueyano quiya cutara. Naaratej,



niajaniya cuaara neyaca jiyanooria necocua quiniuucua niarta Pueyaso pueyano. Nareja nia niquirinioj, niaata na rerejonu panishacari. Naa-juhuaj, nia jiyanoori niarta Pueyaso pueyano niquiocua, naajaa, Jesuucua tiuyashijia na quishacarijia. Naa Pueyaso pueyano neyaca quishacaritij, necocua cuaara nareja niquishaariajuhuaj, na rerejosacari niaata. Naa-juhuaj, maja rimiajata nia niqiniu necohua. Necohuari maniniacuaja Pueyasora, maja juhua tama maaji muetusanojuaaja. <sup>15-16</sup> Pueyaso muerasunaa, canuu, maajipohuanio, Pueyaso tojiyashijia jaara nia cartenu paniri, nia tarinitiare. Pueyaso tojiyashijia cartesacari niajaniya, niaari juhua camishoo quiriohua. Majaari socua nia tojiniu coteenu nia niyaca, coteenu nia niquiocuanio. ¡Maja cutaraari nia cartenunoj! Nia niishiriojore pueyanaa, nia niquiocua jaara Pueyaso tojiyashijia quiri, ¿nia naatate na tojitiniu Pueyaso rupaa, Pueyaso muerasu na quiniuria, jaara quiata quiyajaa? Maja pa niishiniu. Naajuhuj, maja niishishano quia naatate quia niyaca quia tojitiniu Pueyaso rupaa. Naaratej, maja nia cartenu Pueyaso tojiyashijia. Nareja carteshiya cutaraari tama na panishacarijiaaja na cartenura quiajaniya. Naatej, Pueyasoori paniquiaa juhuajaniya pa quiniuria, camishano, cartesano soj.

<sup>17</sup> Cuarta Jesuucua tiuuniaanaa, taa nia quiquiaari Pueyaso sequesacari niajaniya na muerasu nia quiniuriacuajani, naajaa, naa nia quiri Pueyasora. Janiyari naa nia sequeyani, taa cua rootaquiaacuaja puetunu Pueyaso pueya maapuerajanaani. Taa nia quiquiaarini, naajuhuj casaate quia poonijosano quiquiaarini, cunocuajaari Pueyaso panishano quiquiaari niaara. <sup>18</sup> Naacuajitij, cante tarijia na cararaatiuuquia co miatesano quiquiaari Judio pueyano na quiniuriani, naajaa, cuno pueyano cuaara naa quiiria pueyaracaanutej, Jesucristoocua na tiushacari quiarijia. Naajuhuj, cante miatesoo quiquiaari Pueyaso sequesacari na pueyano na quiniuriani, cuno cuaara quiiria naajuhuj. <sup>19</sup> Cante Judio pueyano na quiniuria miatesaaquiarini, naajaa. Cante miatesoo quiyani, naajaa. Saaja maninia cutaraari pa tojitianura Pueyaso niishitijosano pajaniya. <sup>20</sup> Naarate nia sequeyanijia, nia quiri taa nia quiquiaaricuajani shushajanaa Pueyaso sequesacari na muerasu nia quiniuria. <sup>21</sup> Cante poonitijiotasusano pueyano quiquiaari Pueyaso sequesacari na muerasu nia quiniuriani, naajaa, maja nia niishiriojonu nocua. Juhujaniya nia poonijiore saaja. Saniniuujia, jaara nia naata quiri quia cartesano pueyano nia camarnujiniji, maniniacuajaari. <sup>22</sup> Cante poonitijiotasusano pueyano quiquiaari Pueyaso sequesacari niajaniya na muerasu nia quiniuriani, naajaa, niaari seetanujanaa cartesano pueya quiya pa Jiyaniijara. Naajuhuj, cante camarnuujju quijia quiquiaari Pueyaso sequeyaquishacarijia na muerasu nia quiniuriani, quiarijiani, niaari pa Jiyaniijia poonitijosano pueya quiya cutara. <sup>23</sup> Pueyasoori jiyanoohua naquiya miiquiaari na cusojuasacari Neyanuniyosua, na masenura niajaniya, na muerasu nia quiniuria. Nia masequiaariiri tama nerajaaja nia quiniuria. Naaratej, majaari juhua tamonu camarnu poonitijosano nia quiniu socua. Quiarijia saa Pueyasoraja nia quiri maninia. <sup>24</sup> Naaratej cuarta Pueyaso muerasunaa, taa nia quiquiaari tarijia Pueyaso muerasu nia quiyaquishacarijiani, naa nia quiri quiarijia Pueyaso cumaquishacari pueyaracaanu niajaniya.

<sup>25</sup> Quiarijia nia sequereera cua niishiriojosano, taa camishoo pueya miiniutianiyani. Nioori maja pa Jiyaniijia rootasano janiya. Majaari na sequenu quiquiaari cunojiniji. Naajaa, pa Jiyaniijiaari cucua tiuquuia na sequenu panishano cua caminiuuniuria niajaniya, na Sohuanu

cumaquishacari janiya. <sup>26</sup> Naacuaajitij, naa nia sequeyanijia: niaacuajaari niishiya, quiarijiani, jiyanohua puereeta quishacari. Nocuaji niajaniya cuaara quiiria taa nia quiyacuajani. <sup>27</sup> Cante niquiocuaracani, maja nia paniniu na cartenu. Cante niquiocuaaju quiyani, majaari nia niquiocuaaniu paniniu. <sup>28</sup> Naajaa, mashaja jaara camiri, cunoori maja sesa. Naajuhuaaj, niyacoo jaara camiri, majaari sesa na miishano. Saniniuujia, camishano pueyari socua taraatia miishaanutaniya camishoo pueyajiniji, puereeta quishacari quiniucua mijiria quiarijiani. Majaari cua paniniu taraatia nia miishaanura. Nocuaji janiyari naa nia niishitiojiyani puera sesa quishacari quiniucua quiarijiani.

<sup>29</sup> Cuarta Pueyaso muerasunaa, niajaniya cuaara niishiiria nio jiyari puequenutaniya. Majaari mijiria pa quiniu quiniutianiya pueyaracaanu. ¿Taariquitijia mijiria pa tarishiniutianiya socuatejaj? Maja pa niishiniu. Majaruhua puera pa tarishiniu quiniutianiya. Naaratej mijiria pa quishacari, jiyanohua pa tojitiare pa Jiyaniijia. Naacuaajitij, cante niquiocuaraca quiyani, majaari nocua nia niishiriojonu puera. <sup>30</sup> Cante na shaajasanocua sapueyani, naajaa, majaari nia tarinitianu Pueyasora nia poonijionu. Cante queranacuyani, naajaa, Pueyasora pa poonijiorejuhuaj. Cante casami niquitiojojua quiquiaani, naajaa, maja casamiicua nia niishiriojonu puera. Socua nia niishiriojore cutara Pueyasocua. <sup>31</sup> Canapuate niishijiacani, queraatia casami na masejonura mijiriani, nojori cuaara niishiiria maja casami panijaca nojori quiniuria puera. Nio jiyari tari puequeya puetunu pa niquishano casaatajanaa. Naaratej, maja casamiicua nia niishiriojonu. Saaja Pueyaso nia tojiri cutara.

<sup>32</sup> Janiyari paniyani mijiria casaacua tacayashijaca nia quiniuria. Pueyaso nia tojitiare juhuajaniya cutara. Camishoo pueyano na naata saaja pa Jiyaniijiaacua niishiriojonu na tojiniuria maninia, pa Jiyaniijia na shuquiritiniuria. <sup>33</sup> Cante niquiocuaraca saniniunijia, nojuajaari niishiriojoquiaa mijiria casaacua, necocua na shuquiritiniuria. <sup>34</sup> Naacuaajitij, noojia niquijioteyari. Naajuhuaaj, camishoo maajiiri pa Jiyaniijiaacua niishiriojoquiaa maninia, tama na cuaqueya na cojuasacarijaa Jesucristora, nera na poonijionura puetunu noojiatajanaa. Saniniuujia, cante niyacaraca quiyani, nojuajaari mijiria casaacua niishiriojoquiaa neyaca na shuquiritiniuria. Naacuaajitij, majaari puera jeya na quiniu Pueyaso panishano na miiniuria.

<sup>35</sup> Janiyari naa nia sequeyani socua shuquiriaatia nia quiniuria. Maja cua taajetenu paniniu niajaniya puera cua rootasanota. Janiyari nareja naa nia niishitiojiyani, maninia nia quiniuria, pa Jiyaniijia nia tojitianura maninia. Naa jaara cua niishitiojosano tojiri, nia naata pa Jiyaniijia tojiniu maninia. Naacuaajitij, niaari nioojia niquijioteyaquiniutianiya.

<sup>36</sup> Pueyano jaara naa niishiriojore: “Majaari maninia cua miiniu cua jamuesacari cua niyatu pueyaracaanu na camiyaquiniuria”, cuno pueyano cuaara miiria taa na miiniu paniyacuajani. Camishocoriquiano maaraja, cuaara camitioora. Quia niyatu jaara camiri, majaari sesa. <sup>37</sup> Cante saniniuujia maja noojia niquijioteyaquiya na niishiriojosacari neyatuu-cuani, cunoori maninia miiniutianiya na camitiyaquishacari, jaara na naata neyatu cojuanu maninia. <sup>38</sup> Naacuaajitij, cante neyatu camitiriini, maninia miyari. Cante neyatu camitiyaquiyaaniuhuaaj, nojuajaari socua maninia miya. Naacuaajitij, cuno neyatuuri na naata Pueyaso panishano miiniu socua, camishoo na quishacari.

<sup>39</sup> Camishano maaji cuaara carteyaquiiria neyaca, saminio neyaca quishacarijia. Pueyasoori naa sequequiaaritij. Neyaca jaara cusoyare, na mashiquioori maja tari na quiniu juhua camishano. Na panishacari, cuaara camiiiria cana na caminiu paniyacujani. Jaara caminiu paniri, cuaara camiiiria Pueyasooocua tiuujia pueyanota cutara. <sup>40</sup> Naajaa, mashiquio jaara camiyaquiriohua, socua shuquiriaatia quiniutianiyari, Pueyaso panishano na miiniuria. Janiyari naa niishiriojiyani pueyanaa. Pueyaso Sohuanu naasucuaari cua sequeteree nio.

## 8

*¿Maninate cuno shu pa miaquenura, seya jaara puecoosano quiri nareja shipinishano casaacuara, juhua Pueyasooocuarajanaa?*

<sup>1</sup> Cuarta Jesuucua tiuunaa pueyanaa, janiya quiarijia nia niishitiojonutaniyani teyano pa miaquesanojinijiti puereshiyani. Pueyaso niishiyashijiacaari na miaquesocoriquiano seya puecoonu niishijia shipinishano casaacuara juhua Pueyasooocua. Pueyari nequesotaquiaa, ¿maninate cuno shu, Pueyaso muerasu miaquesocoriquianojuhuj, cuno seru jaara taucuaca jiyanishano cumaacaraca quijiaacuara mosano quiri? ¡Janiya cutaraari maja cua miaquenunoj! Nia pohuatareera casaara cua miaqueyaquiquiaanoj. Cua tojitiare. Paacuajaari niishiyani cuno shipinishano casaari nareja pueyano shipinishano najuhuanaj, nojori jiyanitiushano na pueyasoni. Naa pa niishishacari, paari maninia niishijiani. Naajaa, maja cutaraari maninia pa niishiriojonu paa jaara nocuara puecoosano miaqueriquiani. Naa niishijiaari shuquiriaatia quiya tamajaaja. Saniniuujia, majaari na niishiriojonu narta Pueyaso pueyanooocua. Cante narta pueya paniquiaani, cunoori narta pueyacia niishiriojoquiaa cutara, nojori jiuujia na cumaquiniuria maninia. Jiyano pueyanoori cumueeca Pueyaso pueyano quiniutianiya. <sup>2</sup> Naacuajitij, cante tama na cuaqueyajaaja jiyaniya niishijiani, cunoori juhuanajuaja maja niishijia seetanujuanaa. <sup>3</sup> Cante Pueyaso panijia saniniunijia, cunoori narta Pueyaso muerasuucua niishiriojoquiaa. Cunoori Pueyaso panishano pueyano cutara. Seetanujuanaa niishijia cutaraari cuno.

<sup>4</sup> Juhuanajuajaari maja cua riucuanu nia niishiniu panishano: “¿Maninate-naari cuno shu pa miaquenu, seru jaara pueya jiyanishano pueyasooocua mosano quiri?” ¿Casaatejaara cuno nojori jiyanishano pueyasoni? Paacuajaari niishiyani cuno shipinishano casaari maja saminio. Pueyano shipinishano casaari maja cumaacaraca quijia. Naaratej, nojori jiyanishano pueyasoni, cunoori maja seetanujuanaa Pueyaso. Niquiriyatu Pueyasoori quiya cutara. Jiyocuacaanu Quijia. Maja socua tamonu quiniu juhua nojuaja. <sup>5</sup> Tamasaca pueyari jiyaniya queraatia cumaacaraca quijiaaari quiya juhua Pueyaso, jiya cajiniocua, mijiriano. Nojoriiri na jiyatequiaa nojori cojuanara, nojori cumaquiriquianojuhuj. <sup>6</sup> Naajaa, paari niishiyani saa niquiriyatu Pueyasooocua quiya. Nojuacuajaari pa Que Pueyaso, pa shipinina. Puetunu casaajanaa shipiniquiaariiri. Pa shipiniquiaariiri tama nerajaaja pa quiniuria. Niquiriyatujua Jiyaniijiaari quiyajuhuj. Cunoori pa Jiyaniijia Jesucristo. Na Queeri na shipinitiquiaari puetunu na shipinishanojuanaa. Pajaniyajuhuj, paari rishiyani saaja na cumaquishacari pajaniya.

<sup>7</sup> Noojiaqueya Pueyaso pueyari saniniuujia jiyaniyajaa taucuaca shipinijosano casaari seetanujuanaa cumaacaraca quijiaa juhua Pueyasooocua juhuj. Nojoriiri najuhuaana sesa niishiriojonuujuaca. Jiyano pueya jaara Pueyaso muerasura quiri, juhuanajuaja maja na niishiniu maninia. Majaari tarijia na niishishano na tarinitianu juhuanajuaja. Naacuajitij, nojori

jaara shu miaquere teyanote mosaaree nojori jiyanihano cumaacaraca quijiaacuarani, nojori miaquenu nuhuaji, noojia niquijioteyari. Nojoriiri tama sequeyajaaja: “¡Janiya naasucuaari sesa miirii Pueyaso niquiarani!” Naacuajitij, nojoriiri noojia macuhajetequiaa. <sup>8</sup> Pueyanaa, paacuajaari niishiyani, casaa pa miaquequiaani, naajaa. Pa miaquesanoori maja na naata Pueyaso jiyanooniniu pajaniya. Cante cuno shu miaqueyaquiquiaani, naajaa, majaari socua maninia pueyanora na quiniu Pueyasora. Naajuhua, cante na miaquequiaani, majaari socua sesa pueyanora na quiniujiuhua. <sup>9-11</sup> Niaacuajaari jiyanoohua tiuquiaa Pueyasocua. Naacuajitij, niaa naasucuaari na naata juhuajaniya tiuquiniu cuno shu miaquenura nojori jiyanihano pueyaso quiquiojinia. Niaacuajaari niishiya, cuno, nojori sequesano pueyasoni, majaari seetanujuanaa Pueyaso cuno. Naacuajitij, nia naata nocuara mosano seru miaquenu juhuajaniya. Saniniuujia, nia cajishacari cuno miaquenujuajinia, niarta Pueyaso pueyanoori nia niquiniutianiya na pueresano shu miaquenuyano. Na niquishacari nijaniya, tamajaaja sequenutaniyari: “¡Jaj! ¡Nojoriqui cuno shu miaquenuyacuaa! Saniriirijataj”. Naa sequejatej, nojuajaari jiyaniyajaa cuno miaquesanoori mosaaree seetanujuanaa tamonu cumaacaraca quijiaacuara. Naacuajitij, na sanishacariuhua cuno shu miaquenu, tamajaaja noojia macuhajanutaniyari. Naacuajitij, niaari niarta Pueyaso pueyano sesoya, na niquiara nia miaquesacari cuno shu. Na niquiniuucua nijaniya cuno shu miaquenuyano, nojuajaari cunora na miaquereejuhua. Saniniuujia, nojuajaari juhuanujuaja maja jiyanoohua Cristoocua tiuuniu na niishiniu. Cristo cutaraari nocuara cusoquiaari, sesa na miishanojiniji na jiyanooshaanura. Nijaniyari saniniuujia quiarijia na sesorohuacuhua nia niishishanota. Nocuaji janiyari nia sequeyani, maja socua nia miaquenu cuno shu, cuno shu miaqueyaquijia mariqui na pueresano shu miaquerohuariuhua, na rupuesacari nijaniya. <sup>12</sup> Nia miaquesacari, niaari na pueresano shu na miaqueteya. Naacuajitij, noojiaari macuhajenutaniya. Naacuajitij, niaari sesa miya niarta Pueyaso pueyano. Niaari pa Jiyaniijia Cristo miya sesajuhua, naa nia sesosacari tama na pueyanujuaja. <sup>13</sup> ¿Taa nia sequeyani pueyanaa? ¿Maniinate shu pa miaquenu, seya jaara taucua jiyanihano pueyasocua puecosano quiri? Janiya cutaraari maja socua cuno shu cua miaquenu quiniutianiya, cuarta Pueyaso pueyano mariqui sesereeri cua miishanojiniji. Saaja maninia mijiacara nia jiyateriquiani, taa cua miquiaa saaja maniacuaani.

## 9

### *Taa quijia Pablo quiquiaarini, Jesucristo jiyaramiquishano na quishacari*

<sup>1</sup> Janiya jaara cuno shu miaquenu paniyani, cua naata miaquenu cua panishano. Naajuhua, cua naata puetunu cua panishanojuanaa miiniu taa cua Jiyaniijia sequequiaari na jiyaramiquishano pueyacujani. Janiyacuajaari Jesucristo jiyaramiquishanojaaniuhua. Seetanujuanaa cua namijiata Jesucristo niquiquiaarinijia. Nojuajaari cua jiyatequiaari na jiyaramiquishano cua quiniuria. Naajuhua, cua pohuatasacari Jesucristojiniji nia niquiara, niaari na muerasura quiquiaari cua pohuatasanoocua nia tiushacari. Naacuajitij niishishiyari janiyari Jesucristo jiyaramiquishanojaaniuhua. <sup>2</sup> Tamasaca jaara jiyaniya janiya maja Jesucristo jiyaramiquishanoni, naajaa. Niaacuajaari na niishiya. Niaacuajaari Jesucristo tiuquiaari nia tojishacari cua pohuatasano nojuajiniji. Naacuajitij, niaacuajaari niishiya

janiyari Jesucristo jiyaramiquishanoni. Na jiyaramiquishano cua quini-uucua, cua naata miiniujiuhuj taa cuarta Jesu jiyaramiquishano pueya miiquiaacuaani.

<sup>3</sup> Tamonu jaara cua nequesoreere taa cua miiquiaani, janiyari saaja naa na riucuaquiaani: <sup>4</sup> “Pueyasoori sequequiaari, na jiyaramiquishano pueya cuara niquitiosaaria na miaquesocoriquiano”. Naaratej, canaa jaara naa miiniu paniriquiani, canaa maara nia sequereni canaa nia niquitiojonura canaa panishano. Naajaa, majaari canaa masenu quiquiaa canaa panishano niajaniyajini, janiya, Bernabeenio. <sup>5</sup> Naajuhuj, canaa jaara niquiocuaraca quiriquiani, canaa maara canaa niquiocua rupojoriquia canaacuani, taa cuarta Jesucristo jiyaramiquishano pueya miiquiaacuaani. Pa Jiyaniijia Jesu tapueyocuaari naa miiquiaajuhuj. Pedrojuanaari necocuata rucuanajoquiaajuhuj, Jesucristo rupaa na poojotasacari. Naajaa, majaari naa canaa miiniu quiquiaaquij. <sup>6</sup> Jesucristoori sequequiaarijiuhuj: “Cua jiyaramiquishano pueya cuara niquitiosaaria cumaneeca, na panishano nojori masetajara”. ¿Niaateeri jiyaniya cuno sequesano maja quiria, maja Bernabeerajuhuj? ¿Cunocujaari naa sequesaaquiaari canaarajuhuj! Naaratej, canaa jaara naa paniriquiani, canaa maara canaa panishano masere niajaniyajini, canaa niishitiojonuucua niajaniya. Naajaa, canaari tama canaa juaashiquiatajaaja poonijioquiaani, canaa panishano canaa masetajara.

<sup>7</sup> ¿Soldadoteeri tamonu poonijosano jiiitaja, na miaquesano na masetajara? ¡Maja! Soldadohua jiyaniijiaari na niquitiojua puetunu na miaquesanojuanaa. ¿Pueyanoteeri na cuhاريquia nataja najuhuanaj? ¡Maja! Na nuhuaji na natau mianutaniyari na poonijosanojiniji. ¿Majateeri seru juunu camaru ratunu na seru quitiaaca, jaara na paniri? ¡Taaquiririnij! Na ratuyacuaaquinatejaj. ¿Maatucua casaara najuhuaana seesaareerini? ¿Canaarijataj? Canaa jaara naa paniriquiani, canaa naata nia masenu canaa panishano niajaniyajini. Naajaa, majaari canaa mashiniquijionu quiquiaa quenaaja canaa panishano niajaniyajini. Canaari nareja poonijioquiaa tama canaa juaashiquiatajanijia, Jesucristo rupaa canaa pohuatasacari niajaniya.

<sup>8</sup> Nio cua pohuatasano niajaniyani, majaari tama canaa niishiriojosanojuaja. Nio niishitiojosanoori tariucuaaanu Pueyaso Rupaa naajiosanojinia quiyajuhuj, taa cua sequeriquiaacuajani. <sup>9</sup> Supuetana Moisés caminiujiushano Pueyasojiniiri naa naajiotasaaquiaariti:

“Maja quia juunu rupaa quia seecutanu maja na miaquenura quia carojotasano, quiaa jaara na rapijioteya na coreetanura”.

¿Pueyasoteeri saa juyacaacua niishiriojoriquiaajaa naa na sequenuratej? ¡Maja! <sup>10</sup> Pueyasoori naa sequeriquiaaqui na niishitiojonura puetunu pajaniyajanaa. Naaratej, Pueyasora poonijionaani, na niishitiojosano pueya cuara nojori niquitiojooora na panishano. ¿Taa nia sequeyani? ¿Pueyanote shuquiriaatia cuhuataja na cuhاريquiara? Taaquiririnij. Na camaruuri niishiya na poonijosanojiniji mianutaniya na nuhuajiiri. ¿Majateeri pueyano carojotanu shuquiriaatia na nataujuhuj? Jaa. Niishiyacujaari na mianutaniyari. <sup>11</sup> Naajaa, niaata cua quishacari, canaari naa poonijioriquiaa Pueyasorani, nioojiaca canaa cumaquiniuria maninia. Naacuajitij, canaa cuara niquitiojosaaria saniniuujia canaa panishano. Naajaa, majaari canaa paniniu canaa panishano nia niquitiojonura canaa. <sup>12</sup> Tamasaca pueya niishitiojosacari niajaniya, niaa cutaraari nojori niquitiojooquiaa nojori panishano. Canaari saniya coteenujuanaa pohuataquiaari Jesucristo rupaa niajaniyani. ¿Majateeri coteenu canaa niquitiosaanu canaa panishanojuhuaj?



Naajaa, majaari canaa masenu quijia nia casami. Niaata canaa quishacari, canaari sanaa poonijiojua tamajaajani, canaa masetajara canaa panishano. Canaa jiitiaaquishacari canaa panishano, canaari sanaa rejeretaja saajani. Majaari canaa taajetenu paniniu quijia niajaniya, canaa jiitiaaquishacari canaa panishano. Canaari naa miiquiaaritiij, niaa mariqui Jesucristo rupaa tojiniu paniyaquiriiri canaa taajetesacari niajaniya, pueyaracaanu canaa mashiniquijosacari canaa panishano niajanijajiniiji.

<sup>13</sup> Niaacuajaari niishiyajuhuj, Jerusalén tiacajinia Pueyaso Secojojua tiajinia, cuarta Judiocuaca miaquesocoriquianoori puecoosaaquiaa Pueyasoo cuara, taa Pueyaso rootaquiaari canaa supuetanaacuajani. ¿Niaateeri niishiyaquiyajuhuj, shu camaruuri secojojuajinia poonijionaa niqutioquiaa nojori miaquesocoriquianojohuj? Naacuajitiij, Pueyaso secojojua tiajinia poonijionaari miaquesanoraca quiquiaajuhuj. <sup>14</sup> Pa Jiyaniijia Jesucristoori na rupaa pahuatanaara naa sequequiaarijuhuj: “Cua rupaa pahuatanaa cuara niqutiojosaaria na panishano pueyaracaanu”. <sup>15</sup> Naacuajitiij, cua naata puetunu cua panishanojuanaa sequenu nia niqutiojonura janiya, juhujaniya cua quiniuria, taa cuarta Jesucristo jiyaramiquishano pueya miiquiaacuaani. Naajaa, majaari cua masenu quijia niajaniya cua panishano cua masetajara. Niaa naasucuaari jiyaniya janiyari quiarijia niaacuara naajioree nioni, cua shiniujiuniuria niajaniya nia niqutiojonura janiya cua panishano. ¡Maja! Majaari cua paniniu nia niqutiojonura janiya cua panishano. Janiya jaara titiare cua miaajenutani, naajaa. Janiyari tama cua juaashiquiatajaaja poonijionu paniyani, Jesucristo rupaa nia tojitianura, cua panishano cua maseyaquiniutia niajanijajiniiji. Naacuajitiij, janiyari tamajaaja shuquiriaatia quiya Pueyaso niquiarani.

<sup>16</sup> Cua tojitianaa jaara niqutiojore janiya cua panishano, maja cua naata shuquiriaatia quiniu tamajaaja, cua pahuatasacari Jesucristo rupaa. Janiya jaara pahuataaquiri Jesucristo rupaani, cua Jiyaniijia mariqui cua sanitioreeri cua tojiyaquiniucua nojuaja. Cua pahuatasacari na rupaa, janiyari saaja na tojiyani. Nojuacuajaari cua jiyaroquiaari na rupaa cua pahuatanura. Cunoori maja tama cua niishiriojosano cua miiniuriajaaja. <sup>17</sup> Majaari cua sequenu quiquiaari cua Jiyaniijia: “Cua Jiyaniijianaa, quia rupaa pahuatareera quiajanijara”. Janiya jaara naa na sequequiaarini, cua Jiyaniijia maara cua niqutiojore cua poonijosanojiniji nera, na shuqiritiasacari janiya. Saniniuujia, tama na panishacarijiaaja cua Jiyaniijia-janaacuajaari cua jiyaroquiaari na rupaa cua pahuatanura. Cunora, majaari cua naata na tarijonu. Janiyacuajaari na seruni. <sup>18</sup> Naacuajitiij, ¿taa cua miya socuani, cua Jiyaniijia cua shuqiritiniuria socuani? Naa miiquiaacuajaniija, nareja poonijioquiaanijia tama cua juaashiquiatajaaja cua panishano cua jitianura, na rupaa cua pahuatasacari. Naaratej, majaari cua sequenu quiquiaa cua tojitianaa, nojori niqutiojonura janiya cua panishano. Jesucristocuajaari sequequiaari na rupaa pahuatanaa cuara niqutiojosaaria na panishano. Naajaa, majaari naa cua sequenu quiquiaa niajaniya. Naacuajitiij, cua naata pa Jiyaniijia shuqiritiniu socua, cua pahuatasacari na rupaa cua maseyaquishacari cua panishano cua tojitianaajiniiji. Naacuajitiij, janiyari shuquiriaatia pahuataquiaa Pueyaso rupaa pa Jiyaniijiarani.

<sup>19</sup> Majaari pueya niqutiojonu quiquiaa janiya na jitiananojiniji cua niishitiojonuucua nojori. Naacuajitiij, janiyari maja juhua nojori seruni. Pueyanoori maja cua jiyarona. Naajaa, janiyari tama cua cuaqueyajaaja jiyatequiaari juhua puetunu pueya serujuanaa cua quiniuriani, socua pueya quiniuria pa Jiyaniijia Jesucristo tojitianaara. <sup>20</sup> Jesucristo rupaa cua pahuatasacari cuarta Judiocuaca niquiara, janiyari juhua Judio pueyanora



quiquiaani. Janiyari naa miiquiaani nojori mariqui cua tojiyaquiriiri, janiya jaara juhua tahue quiri nojori niquiarani. Naacuajitij, socua Judiocuacaari Jesucristo rupaa tojitiaa. Jesucristoocua cua tiuushacari, janiyari maja socua cua quiniu juhua cua supuetanaa Judiocuaca rootasano tojijia. Naajaa, na tojiquiaajaanijia cua quishacari cuarta Judiocuacata, noo pojoritiatej cante cuno rootasano tojitiaaani. Naacuajitij, cua quishacari juhua nojori, nojoriiri socua cua tojitiaa cua pohuatasacari Jesucristojiniji. <sup>21</sup> Naajuhua, cua quishacari tamasaca pueyata, janiyari juhua nojori quiquiaani, nojori tojiniuria maninia janiya. Nojoriiri maja Judiocuaca supuetanaa rootasano tojiniu niishiniu. Naaratej, janiyari na tojiyaquiquiaajuhua, nojoritia cua quishacari. Janiyari naa miiquiaani nojori mariqui cua sooreeri, janiya jaara juhua tamaatia quijia quiri nojori niquiarani. Naajaa, Pueyaso rootasano tojiquiaa pueyaracaanu cutaranijia. Naajuhua, puetunu Jesucristo niishitiojosanojuanaa tojiquiaanijia. <sup>22</sup> Noojiaqueya Pueyaso muerasuuri maja na naata tarinitianu najuhuana na supuetanaa rootasano. Cuaara tarinitiaara najuhuana na supuetanaa rootasano. Naajaa, janiyari mariyata cuno najuhuana rootasano tojiquiaajuhua nojoritia cua quishacari. Nojori jyanishacari tamonu casaa sesa quiya, janiyari mariyata maja cua miiniu nojori pueresano casaa. Naacuajitij, cua naata nojori cumaquiniu maninia Pueyaso rupaata, nojori tojitasacari janiya, juhua nojori cua quishacari. <sup>23</sup> Janiyari puetunu naa miiquiaajaanani, socua pueya cua tojitiniuria Jesucristo rupaa. Naa maninia poonijioquiaa cua Jiyaniijiaranijia, cua masenura puetunu maninia na sequesanojuanaa na muerasura.

<sup>24</sup> Niaacuajaari niishiya taa pueya tacuarishiyajoquiaacuajani. Pueya netecuatusacari, puetunu pueyajanaari jyanohua netecuatusua jaarajaaja. Cante narta netecuatusanaa shocotajani, shanohua casaa niqutioshiyari. Rituuquia pueyanoori jyanohua shuquiriaatia quijia na shocotanutiniji na masesacari casaa. Naajuhua pueyanaa, jyanohua nia poonijiore Pueyasora mijiria, shuquiriaatia nia masenura nia poonijosanojiniji na jitasanojiniji jiyocuacaanu. <sup>25</sup> Naajuhua, pueya jaara tacuarishijionu paniri, cante shocotanu paniyani, cuno pueyanoori puetunu najuhuana na miiniu panishanojuanaa tarinitiaja, na cuaqueya quiniuria cumueeca. Naa miiquiaari narta pueya na shocotanura, shuquiriaatia na quiniuria. Saniniuujia, na masesano na shocotanuucuanu, cunoori saaja shanohua nacaque jaamasujiniji shitiasano. Majaari na rishiniu. Pajaniyari saniniuujia pueyaracaanu shuquiriaatia quiniutianiyani Pueyaso niqutiosanota pajaniya, paa jaara maninia miiri mijiria pa quishacarini. Naaratej, pa tarinitiare puetunu najuhuana tama pa miiniu panishanojuanaa, pa shuqiritiniuria pa Pueyaso.

<sup>26</sup> Pueya netecuatusacari, netecuatusanaa cuaara niishiiria tee netenu puequeetu quiyani. Majaari najuhuana na camarucuneejonu. Naajuhua, cua poonijosacari Pueyasora, majaari cua niquijotenu coojia.

Mocoritia piyotoosacari, pueyanoori namitia piquiquiaa narta pueyano. Majaari najuhuana na piquiniu capa. Naajuhua, pa cartere najuhuana pa miiijosano. Saaja pa niishiriojore Pueyasooocua, maninia pa tojiniuria nojuaja. <sup>27</sup> Janiyari jyanohua saniniujuquiaa maja cua miiniuria tama cua cuaqueya miiniu panishanojuaaajani. Janiyari cua cuaqueya jiyartuutenu paniquiaani saa Pueyaso cua tojiniuriaja. Janiyari tari queraatia pueya niishitiojoquiaari Pueyaso rupaani. Janiya jaara tama cua niishitiojosanojuaja tojiyaquirini, Pueyaso mariqui cua cartereeri, maja na rupaa cua pohuatanura socua.

## 10

*Supuetanaa Israel pueya miishanoori pajaniyara naajiotasaaquiaari pa niishiniuria maninia*

<sup>1</sup> Cuarta Pueyaso pueyanaa, nia niishiri taa pa supuetanaa Judiocuaca miishaaquiaaricuaani nojori rucuanajosacari pueyaracaanu cariiquia jiyajinia. Majaari nia niyajetanu niaa mariqui Pueyaso tojiyashijiara quiri-ohuajuhuj. Nojori mashishacari Egipto jiyajiniji, Pueyasoori cohujaja najaca shipiniquiaari nojori na cojuanura, nojori puetariquianojuhuaj. Pueyasoori puereetuuca shoniniacu caminia raquitiaquiaari nojori nuura caminia cajiniocua. Naacuajitij, puetunu pueyajanaari niuutiaquiaari joojuashiquio. <sup>2</sup> Naaratej, puetunu nojorijianaari juhua Moisés muerasura jiyatesaaquiaari, nojori nuhuajishacari Moisés puereetuuca caminia tajini-aaco, cohujaja najaca cariquiaconio. Majaari socua na qutiuniu quiquiaari Egipto pueya seya. <sup>3</sup> Puetunu nojorijianaari jiya cajiniocuaji casaa mi-aquenuujua, Pueyaso tinishano nojori miaquesocoriquiano pueyaracaanu cuno cariiquia jiyajinia nojori rucuanajosacari. <sup>4</sup> Naajuhuj, nojori jiyamuetusacari, Pueyasoori mohuaca pojuartaniquiaari saajiajiniji. Puetunu pueyajanaari cuno mohuaca ratuquiaari. Pueyasoori cuno saajiajiniji naa raatequiaari nojoritij, na niishitiojonura cuno pueya, nojuajaari nojori nuhuajiriqiaa jiyasohujaja, pueyaracaanu nojori na cojuanura. ¡Nojuacuajaari pa Jiyaniijia Cristo quiquiaari! <sup>5</sup> Puetunu cuno supuetanaa Israel pueyajanaari naa maninia cojuasano quiquiaari cariiquia jiyajinia. Naajaa, quera puetunu nojorijianaari Pueyaso tojtiaashijia quiquiaari saaja. Pueyasoori cunora nojori shuquiritiaaquiquiaari. Naaratej nojori cusojuanuuriquiaari cuno cariiquia jiyajinia nojori camarucuneetasacari pueyaracaanu, cuara puequequiaarijiaatijia puetunu cuno tojiyashijiacajanaa.

<sup>6</sup> Naa miishaaquiaariti cua supuetanaa Judiocuaca, sesa casaacua nojori jiaatianuucua. Nojorijinijiiri puetunu naajiotasaaquiaarijianaa pajaniyara, pa niishiniuria maja sesa casaacua pa jiaatianurajuhuj. <sup>7</sup> Shushajanaa nojori coteesacari rucuanenu cariiquia jiyaco, noojiaqueya nojorijinijinioori caapiqui casaa shipiniquiaari orojiniji juhua juunu niquishano. Nojoriiri tama nojori shipinijosano casaajaaja sequequiaari: “Nioori pa Pueyasohua, pa mashiquiniaa Egipto jiyajinia pa camarucuaacuaji”. Naacuajitij, nojoriiri na shipinishano casaa shuquiritiaquiaari sacuaraatia. Jiyacari nojori miishanoori naa naajiotasaaquiaaritij:

“Pueyari cajituri queranacunura. Na nuhuaji, nujuatuquiaariiri na shipinishano juyaca tajoji na jiareyocuatunura. Socua sacuaraatia casaa miitiuquiaariiri”.

¡Maja naa pa miiniuti pueyanaa! Maja pa timitianu tamonu casaa Pueyaso niti. Saaja Pueyaso pa timitiare cutara.

<sup>8</sup> Na nuhuaji, tamacari, noojiaqueya nojorijinijinioori sesa miiquiaari taatujuritia, cararaatia taucuaca miishacari nojori shuquirishacari na shipinishano casaa tajoji. Pueyasoori nocuaji naa sequequiaari: “¡Cuaara puecoosaaria cuno sesa miijiacal!” Cunora, veintitrés mil Judiocuacaari puecoosaaquiaari cuno juuca. Cunojiniji pa niishiri maja pa miiniuria sesajuhuj, taa nojori miiquiaaricuaa taatujuritiani.

<sup>9</sup> Na nuhuaji, noojiaqueya nojorijinijinioori Pueyasota juaaquiouquiaari, tamonu miaquesanoocua nojori jiaatiasacari, puera nojori jishacari nojori miaquesano. Nocuaji Pueyasoori sacocua satejoquiaari cuno pueya. Querataa pueyari cusonuuquiaari. Naaratej pueyanaa, maja cumaati pa juaaniu,

Pueyaso jaara pa saniniujiuri. Maja naa pa miiniutij paa mariqui Pueyaso juaatiriiri.

<sup>10</sup> Tamacari, noojiaqueya cuno pueyajinijinioori Moisésta juayonuu-taquiaari. Moiséscajaari nojori jiitianara Pueyaso jiyatesano quiquiaari. Nocuaji Pueyasoori na seru jiyaroquiaari cuno juaajiaca na cusojuanura. Queraatia pueyari cusunuuquiaari jiyacari. Naaratej pueyanaa, majaari pa juaatianu pa jiyaniijianucua.

<sup>11</sup> Puetunu pa supuetanaajiniji naajiotasanojuanaari tariucuacaanu naa-jiotasaquiaari, pa numootesaanura quiarijiani, quera pa Jiyaniijia mue-tasacariuhua. <sup>12</sup> Naaratej pueyanaa, tama nia cuaqueyajaaja nia cojuare nia jyanishacari niaari Pueyaso tojjia seetanu cutarajanaa, niaa mariqui sesa miiriiri, juhuajaniya nia quishacari tamajaaja. <sup>13</sup> Niaari mariyata saniniujiushaaquiaajuhua, taa puetunu parta Pueyaso pueyajanaa sanini-ujiushaaquiaacuaani. Naajaa, nia naata Pueyasocua tiuniu maja puera nia saniniujiushaanura. Pueyasocujaari niishiya taate nia naata rejereta-nuni. Majaari puera pa saniniujiushaanu quiniutianiya. Pueyasocua nia niishitiojore taate nia naata cartesano quiniuhua taraatia nia miiniuu-cuaji. Naacuajiti pa naata rejeretanu, Pueyaso jaara Sesaaca saniniujiutiri pajaniya.

*Maja pa cojiniu tamasaca, na miaquenuusacari na jiyanitiushano na pueyasocuaru na puecootusano*

<sup>14</sup> Cua panishano Pueyaso muerasunaa, maja nia tiuquitianu tamasaca pueya jiyanitiushano pueyaso quiquojinia, na tojtianaa nia cojiniuria, no- jori shuquiritasacari juaashiquiata shipinishano casaa Pueyaso niti. Maja nojori cojiniu, niaa mariqui saniitiosaareeri. <sup>15</sup> Niaacujaari niishijiaca. Naaratej, nia niishiriojore cua sequesanoocua.

<sup>16</sup> Paa jaara rerejore pa Jiyaniijia cusonu juuca pa niishiniuriani, pa ratunu panishacari, paari sequequiaani: “Paacarasho canaa Jiyaniijianaa, quia nanacaari puetunu canaacuarajanaa shooquiaari”. Naa pa ra-tusacari cuarta Pueyaso muerasunaa, puetunu pajaniyajanaari pa Jiyani-ijia rupuesano quiquiaani, na nanaca shoonuucua puetunu pocuarajanaa. Naajuhua, pa miaquesacari, paari sequequiaani: “Canaa Jiyaniijianaa, quiaari quia cuaqueya nootunequiaari puetunu canaacuarajanaa”. Naa pa miaquesacaritij, puetunu pajaniyajanaari jatiqui pa Jiyaniijia cojiquiaani, na cuaqueya cusonuucua pocuara. <sup>17</sup> Cuno pan pa miaquesacari, puetunu pajaniyajanaari niquiriyatu panjiniji neecasequiaani. Naacuajitij, paari ni- ishiyani puetunu pajaniyajanaari rupuetono quiya pa Jiyaniijiatani, juhua niquiriyatu cuaqueyaja.

<sup>18</sup> Nia niishiriojori quia taa Israel pueya miiquiaacuaani. Nojori miaque- sacari Pueyasocuaru na mosano Pueyaso niquiara, na niti nojori mosano seruuri juhua tama nojorijiaaja, Pueyaso jiyanooniuria nojori. Naacuajitij, nojoriiri na naata Pueyaso rupuenu, nojori secojonura nojuaja. <sup>19</sup> Jaara naa quiritij, ¿taateerini, pueya jaara shipinijosano casaacuaru mosano shu miaquere? ¿Casaate pueya jyanishano pueyasocuaru mosano shuni? Nareja shucujaari. ¿Cumaacaraca quiijate cuno, pueya shipinishano casaa juhua Pueyasorani? ¡Maja! <sup>20</sup> Naajaa, nia tojitiare casaa cua sequenu- taniyani. ¡Pueyaso niishiyashijiaca pueyari na miaquesocoriquiano na seya puecoquiaa samaruhacuara! Naa nojori miishanoniquitij, cunoori maja Pueyasora. Naacuajitij, nojoriiri samaruhua rupuequiaa, maja Pueyaso. ¡Majaari cua paniniu nia rupuenu samaruhua! Nocuaji, maja Pueyaso niishiyashijiaca nia cojiniu cuno shu nia miaquenura. <sup>21</sup> Majaari pa naata pa

Jiyaniijia rupuetoonu, samaruhuata pa rupuetoosacarijuhuaj. ¿Pueyasote samaruhuata cojitishiya? Pa Jiyaniijia cusonu juuca pa niishiniuria, ¿paateeri na sequesano miaquenutaniyani, samaruhuacuara mosano casaajuhuaaj? ¿Cojitishiyatee? ¡Maja pueyanaa! <sup>22</sup> ¿Paateeri pa Jiyaniijia paraca cojiniu paniyani, pa Jiyaniijia pa juaatiniuriani? ¿Pajaniyate socua cumueeca pa Jiyaniijiajinijini? ¿Majateeri nia puerenu pa Jiyaniijia saniitonu?

### *Taa pa miiniutianiyani*

<sup>23</sup> Tari sequereecuajaniija, pa naata miiniu puetunu pa miiniu panishanojuanaa. Naajaa, majaari puetunu pa miiniu panishanojuanaa maninia pajaniyara. Puetunu pa miiniu panishanojuanaari maja na cumaquiniu quiniutianiya parta Pueyaso pueya. <sup>24</sup> Naaratej, majaari pa niishiriojonu saaja maninia pa quiniuria tamajaaja. Pa niishiriojore parta pueyacua, maninia nojori quiniuriajuhuaj. <sup>25-26</sup> Seetanujuanaari nio naajiosano: “Nio jiyari pa Jiyaniijia jiya, puetunu tii quijia casaajanaano”. Naaratej, niaa jaara shu masere shu niqutiojosaquiji cumaneecata, majaari nia nequesotanu: “¿Nio shujiyo casaacuara mosano?” Maja naa nia nequesotanutej. Nia panishano nia masere nareja, nia miaquesocoriquiano juhuajaniya. Pa Jiyaniijia shipinishanocuajaari. Pa miaquesanoori maja na naata na sesonu pajaniya Pueyasora.

<sup>27</sup> Pueyaso niishiyashijia jaara nia masuure nata nia miaquenura, nia quiaare, niaa jaara quianu paniri. Juhuaajaniya nia miaquere na rupojosano niaara. Majaari nia nequesotanunoj: “¿Nio shuti casaacuara mosaarucuaa?” Majaari naa nia nequesotanu niaa mariqui nioojia macuhujetereeri niaa jaara niishiri nia miaquesanoori shipinishano casaacuara mosano juhua Pueyasooacara. Juhuaajaniya nia miaquere nareja. Puetunujuanaari pa Jiyaniijia shipinishanocuaja. <sup>28</sup> Saniniuujia, nia cojinia jaara numootere niajaniya: “Nio shuuri mosaaree shipinishano casaacuara juhua Pueyasooacara”, majaari nia miaquenunoj, niaa jaara naa sequesaa. Maja nia miaquenunoj, nia cojinia mariqui na miaquerejaariuhuaaj na cojishacari niajaniya. Nia tarajana jiyoteeri jiyaniyajaa cuno shipinishano casaari seetanujuanaa cumaacaraca quijia. Naacuajitij, na miaquesacari nocuara mosano shu, noojia macuhujanutaniyari. <sup>29</sup> Majaari nio cua sequenu niaara. Niaacuajaari tari niishiya nia naata cuno shu miaquenu. Nia sequeya nio cutaranijia nia cojiniaa pueyara, maja nia miaquenura cuno shu nojori niquiara, nia cojinia mariqui noojia macuhujareeri cuno shu na miaquesacari niaata.

Niaa naasucuaari cua nequesotanu paniya: “¿Paatucua pa panishano shu miaqueyaquirini saaja tamonu pueyano pueresacari pa miaquenu panishano shu? <sup>30</sup> Paa jaara Pueyaso sequereni ‘paacarasho’ cuno sumaturani, ¿majateeri maninia pa miaquenura? ¿Tamasacatucua casaara pa sesacare cuno miaquesano pa miaquesacarini?” <sup>31</sup> Cua tojitiare quenaaja cuarta Pueyaso muerasunaa. Nia miaquesacari, nia ratusacari, casaa nia miishacarinio, pueyaracaanu puetunu maninia nia miirijianaa Pueyaso nia shuquiritiniuria. <sup>32</sup> Puetunu nia miishanojuanaa cuara quiiria maninia Judiocuaca niquiara, taucuaca niquiarajuhuaaj, parta Pueyaso pueya niquiaranio. Jiyanohua taraatia cutaraari, pueya jaara tojiyaquiya Pueyaso, juhuajaniya pa miishacari nojori jiyanitiushano sacuaraatia casaa. <sup>33</sup> Naaratej, janiyari pueyaracaanu maninia miiniu paniquiaa puetunu pueya niquiarajanaani, nojori cuara tojitiaara Pueyaso, Pueyaso pueyara nojori jiyatesaanura.

Majaari cua niishiriojonu tama cua panishanojuaaja cua miiniuria. Janiyari socua niishiriojoquiaa tamasacaacuani, maninia cua miiniuria nojori niquiara.

## 11

<sup>1</sup> Naaratej cucua nia jiaatiare, juhua janiya nia miiniuria maninia saaja, naatej, taa Cristoocua cua jiaatiaquiaacuaani, juhua nojuaja cua quiniuria. Mijiria na quishacari, nojuacuajaari pueyaracaanu maninia miiquiaari pueyacuaa.

### *Maajipohuatucua taa quiriqiani Pueyaso pueya rerejosacari*

<sup>2</sup> Cuarta Jesuucua tiuuniaanaa, janiyari nia shuquiritiaani, pueyaracaanu nia niishishacari janiya, naajuhuaaj, maninia nia tojitasacari puetunu cua niishitiojosanojuanaa Pueyasojiniji. <sup>3</sup> Janiyari paniya cutarani socua nio nia niishiniuria: Cristocuaajaari caya camarnu. Cayari saniniuujia necocua camarnu, taa pa Que Pueyaso pa Jiyaniihia Cristo camarnu quiyacuaani. <sup>4-5</sup> Naaratej, nia secojosacari Pueyaso, nia caminiujiushacari Pueyaso sequenu panishano Pueyaso pueya maanu niquiarajuhuaaj, jiyacaritij, canuu cuaara jocuaara na nacaque na pocuasacari. Saniniuujia, maajipohua pocuanura, nojori cuaara mishiquioora na naca toquerauta. Cararaatia cutaraari caya jaara pocuare Pueyasora, Pueyasotajuhuaaj, na naca mishiquiosano. Cararaatiajaariuhuaaj, maaji pocuasacari Pueyasota, Pueyasorano, na naca mishiquiosoo. Maaji jaara caririquiyashijia quiri, ¿casaara na naca na tuqueteyaquiya puetunujuanaacuararini? ¿Maajiti juhua cayara quiniu paniya? Maja naasucua. <sup>6</sup> Maaji jaara na naca mishiquionu paniyaquiri pueya niquiara na pocuanura Pueyasora, Pueyaso na secojonurano, cuno tojiyashijia cuaara tuqueteera na naca. ¿Cararaatiatee, maaji jaara na naca tuquesano quiri juhua caya? Taaquiririnij. Cararaatia quiyajaariuhuaaj, na secojosacari Pueyaso, na caminiujiushacari Pueyaso sequenu panishano pueya niquiarajuhuaaj, mishiquiosoo na naca quishacari. <sup>7</sup> Maajiiri neyaca shuquiritiya na tojijia na quishacari. Naacuajitij, neyacaari narta pueya shuquiritiasano quiyajuhuaaj. Naaratej, maaji cuaara mishiquioora na naca na secojosacari Pueyaso, pueya niquiara, maja neyaca na rerequetenura. Canuuri shipinishaaquiaari juhua Pueyaso na quiniuria, Pueyaso shipinishano casami camarnura na quiniuriajuhuaaj. Cayari Pueyaso shuquiritiya Pueyaso tojijia na quishacari. Naaratej, nia rerejosacari, canuuri maja nacaque na cushiniu na caminiujiushacari Pueyaso rupaa, na secojosacari Pueyasojuhuaaj.

<sup>8</sup> Pueyaso jaara coteenujuanaa caya shipiniquiaari, majaari maajijiniji na shipininiu quiquiaari caya. Maaji cutaraari caya riuquiocuajiniji shipinishaaquiaari. <sup>9</sup> Naacuajitij, maajiiri cayara shipinishaaquiaari. Majaari caya shipinishaanu quiquiaari maajiria. Naaratej, maaji cuaara caya tojiiria cutara. <sup>10</sup> Naacuajitij, maaji secojosacari Pueyaso, na caminiujiushacari Pueyaso sequenu panishano pueya niquiara, cuno maaji cuaara mishiquioora na naca. Naacuajitij, pueyari niishiniutianiya cuno maajiiri maja neyaca rerequeteja. Naa maninia quiya Pueyaso seya niquiarajaariuhuaaj. <sup>11</sup> Naajaa, puetunu pajaniyajanaari mariyata Pueyaso muerasuni, Jesucristoocua pa tiuushacari, canuu, maajipohuanio. Naaratej maja pa rerequetenu tamonu. Caya, maaji, nojoriiri mariyata panishano. Maajiiri maja na naata tamajaaja supueno cayaju. Naajuhuaaj, cayari maja na naata supueno tamajaaja maajijiu. <sup>12</sup> Seetanujuanaari, maajiiri coteenu



shipinishaaquiaari caya cuaqueyajiniji. Na nuhuaji, puetunu canuujua-naari saniniuujia supuequiaa maajijiniji. Naajaa, puetunu pajaniyajanaari Pueyasojiniji supuequiaani. Naacujitij, caya, maajinio, nojoriiri mariyata panishano pa naacutoojonura.

<sup>13</sup> ¿Taa nia sequeyani pueyanaa? ¿Maninateeri, maaji jaara Pueyaso secjore na naca mishiquiosoo pueya niquiara? Maja maninia. <sup>14</sup> Naajuhuaaj, quera puetunu pueyajanaari sequeja, cararaatia niquishanoori caya jaara tucamuejaru quiya juhua maaji. <sup>15</sup> ¿Maajirijiataj? Jaara tucamuejaru quiri, cunoori maninia niquishano cutara. Pueyasoori naa maninia shipiniquiaari maaji, tucamuejaru na quiniuria, na naca mishiquioriquiano na muecacaata. <sup>16</sup> Tamonu jaara nacoonu panijajaa socua pa muesujiniji, niocua na sequere: “Pablocuajaari tari pa niishitiojoree puetunu na niishishanojuanaa. Naajuhuaaj, puetunu Pueyaso pueya maapuejanaari tamaquicua naa miiquiaa taa Pablo pohuatatee pajaniyacujani. Majaari socua pa niishiniu tamaatia quiniu”. Niojuanaari cua rootasano cunojiniji, pueyanaa.

*Corinto pueyari sesa miiquiaari na miaquenuujuajinia, pa Jiyaniijia cusonu nojori niishishacari*

<sup>17</sup> Cuarta Jesuucua tiunianaana, nio, janiya niaacuara na naajiyani, nioori maja cua shuquiritianura nijaniya. Nia rerejosacari pa Jiyaniijia cusosacari nia niishiniuria, niaanaari saaja sesa miiquiaa. Nia rerejonuni, cunoori nia cumaquitioonura juucua. Nia rerejosacari saniniuujia, niaari saaja socua seseyaree. <sup>18</sup> Janiyari naa pohuatasaarucuaa nijaniyajinijini: “Corinto pueyari sesa na niishiriojonuta nojori jiuujiajinia raquirijitiaquiaa nojori rerejosacari”. ¿Seetanutejanaa nio pohuatasano nijaniyajiniji? Naa naasucuj. ¿Casaate cua toyani? <sup>19-20</sup> Seetanu naasucujanaa niaari nioojiajinia naa niaaquejoquiaaquij. Paacuajaari tari niishiquiaarini noojiaqueya pueyari Pueyaso pueya maapueecuaji rupatenutaniya. Naa niishishanote canapuate maja Pueyaso muerasuni. Cante seetanujuanaa Pueyasocua tiuujiani, majaari na rupatenu quiniutianiya narta Pueyaso muerasuucuj. Cuarta Pueyaso muerasunaa, niaacuajaari Pueyaso pueya maanu. Naaratej, niaa jaara rerejore nia miaquenura pa Jiyaniijia cusonu nia niishiniuria, maja sesa nia niishiriojonu juhua niaaquejono nia quiniuria. Niaa jaara naa niaaquejoriquiatej, majaari pa Jiyaniijia cusonu nia niishiniu quiquiaa seetanujuanaa. <sup>21</sup> Nijaniyanaari tama nia patasanojuaja coteetaquiaa miaquenu. Niaanaari nia miaquesano serotaaquiquiaa. Naacujitij, casamijiuniucuaanaari miaajecoquiaacujua. ¿Saniniuujia casamiriacaanaari juhuanijaniya mashaasequenuquiaacujua! <sup>22</sup> ¡Jiyanohua cararaatiaari naa nia miishanotej! Niaa jaara naa jamuejaca quiriquiretej, ¿majate nia naata tama nia tijiniajaaja nia miaquenuunu, ratununio? ¿Niaateeri niarta Pueyaso muerasu soquiaa? Naa nia miishacari casamijiuniucuatej, niaacuajaari nojori cararokuiaa, casamijiuniucua nojori quiniuucua. ¿Taa nia sequeyani pueyanaa? ¿Janiyate nia maniniuuaqueetaani? ¡Maja! Jiyanohua tacayaniija. Majaari cunora cua shuquiritianu nijaniya.

*Pa Jiyaniijia rootasano na cusonu pa niishiniuria*

<sup>23</sup> Janiyacuajaari nia rootacanu tari pa Jiyaniijia Jesu pohuatasano janiyani, taa na miaquequiaari na saquiriojosano pueyatani. Cuno niucujaa, Judasri pa Jiyaniijia quiateriquiano quiriquireteja taucua mosocoriquiano. Cua tojitiarohuacuara pueyanaa. <sup>24</sup> Judas quiateyaquishacariija nojuaja, pa Jiyaniijia Jesucristoori pan riquiaari. Na Que Pueyaso sequereeri: “Paacarasho cua Quenaa”. Na nuhuaji, na neecaserohuari na serotanura na pueya. Nojori sequereeri: “Nioori cua cuaqueya, niaacuara cua panitiaca



nia jiyanooshaanura. Nia miaquere. Niocua naa miiriquia pueyaracaanutej, nia niishiniuria cua miishano niaacuara”.

<sup>25</sup> Naajuhuj, nojori miaquenu nuhuaji, Jesuuri raatonuque pataquiaari na pueya na serotanura. Coteenu na Que secojoreeri. Na nuhuaji, na pueya sequerohuari: “Pueyaracaanu nia ratusacari nio, nia niishiriquia, cua Queeri cua nanaca seera nia jiyanooquiaa, na muerasu nia quiniuria. Seyari maja socua niaacuara na moonu quishaanutaniya, sesa nia miiniu jiyanooshaanura juucua. Janiya cutaraari nia niti mosaanutaniyani”. Pa Jiyaniiijaari naa sequequiaari. <sup>26</sup> Naa nia miaquesacaritij, nia ratusacarijuhuaj, pueyari niishiniutianiya niaari Pueyaso jiyanooshano pueya, pa Jiyaniiija Jesu cusonuucua pa niti. Naa nia miaqueriquia pueyaracaanu na sequesano pan, pa Jiyaniiija cuaara tiuquiriohuajaatijia.

*Nia niishiri taate pa naata miaquenu pa Jiyaniiija cusonu pa niishiniuriani*

<sup>27</sup> Naaratej, niaa jaara sesa miiri, Pueyaso nia secojore ritia na jiyanooniuhuara nijaniya, nia miaquenuhuara pa Jiyaniiija cusonu nia niishiniuria. Niaa jaara pa Jiyaniiija pan miaquere jiyanooshoo nia quishacariija, niaa jaara na cusonu mashaca rature jiyanooshoo nia quishacarijuhuaj, niaari na cusonu rerequeteya! Niaari juhua sequeyaruha, pa Jiyaniiija najuhuanana cusoquiaari. Naa nia miishacaritij, niaa cutaraari saniitiosaanutaniya.

<sup>28</sup> Naaratej, tama nioojiajiniaaja nia niishiriojore taa nia quiquiaani, casaa nia miiquianu sesani. Naa nia miiri coteenu, niaa mariqui sesa nia miishano miaquetareeri Pueyaso jiyanooyaquishacariija nijaniya. Naa nia miiniu nuhuajitij, niocua shuquiriaatia juhuajaniya miaquerohua pa Jiyaniiija pan. Niocua juhuajaniya raturuhua pa Jiyaniiija raatonuquejiniji cutara.

<sup>29</sup> Cante juhuajaniya miaquereeni, cante juhuajaniya raturee najuhuanani, jiyanooshoo na quishacariija, cuno pueyanoori Pueyaso saniitiotenutaniya tama na cuaqueyajaaja. <sup>30</sup> Naacuajitij, jiyanooshoo nia quishacariija nia miaquesacari, queraatia nijaniyajinijiniiori cunora cusosuhua quiya. Noojiaqueya nijaniyajinijinio cutaraari tari cusonuucanujuhua, Pueyaso saniitiosacari nojori. <sup>31</sup> Nocuaji tama nia cuaqueyajaaja nia jeeicare suraattia, pa Jiyaniiija mariqui saniniuujia nia saniitioreeri. <sup>32</sup> Pa Jiyaniiija jaara pa saniniuujuri, canapuate sesa quiyani, Pueyasoori na saniitioquiaa na muerasu nojori quiniuucua, maninia nojori quiniuhuara juhua maninia na muerasu. Naacuajitij, juhuacariija na saniitiosacari na muerasu, majaari pa saniitiosaanu quiniutianiya na ruuretatacata jiya puequesacari, Pueyaso jaqueroosacari na tojiyashijiaca.

<sup>33</sup> Naaratej cuarta Jesuucua tiuuniaanaa, niaa jaara pa Jiyaniiija pan sanu paniriquia na cusonu niishiniuria, nia sashiri niarta Pueyaso muerasu, jatiqui nia miaquenura maninia. <sup>34</sup> Miaajeyano maaraja, cuaara miaqueera coteenu tama na tiajiniaaja, Pueyaso mariqui nia saniitioreeri, sesa nia miiniuucua nia rerejosacari nia jamuenuta.

Socua nia nequesotasanoiniji janiya, janiyari nia sequenutaniyani cua tiuquishacari niaacua.

## 12

*Pueyaso Sohanu cumaquishacari puetunu Pueyaso muerasujuaanaa*

<sup>1</sup> Cuarta Pueyaso muerasunaa, niaacuajaari tari niishiya Pueyasoori na Sohanu niqutioquiaa puetunu pajaniyajanaa, na cumaaca pa jiitianura. Quiarijiani, socua nia niishitiojonu paniya cunoinijiniija. <sup>2</sup> Niaacuajaari

niishiya taa nia quiquiaari tarini, Pueyaso niishiyashijiaca nia quishacar-  
ijia. Niaari puetunu sapojosaaquiaarijianaa, pueya shipinishanoocua nia  
tiuuniuucua najuhuanaj. Sesaacaari naa nia tojitiqiaari najuhuaana pueya  
shipinishano, nia jiyaniushano pueyasohuani. <sup>3</sup> Naaratej cua pueyanaa,  
maja sapojosano nia quiniu socua. ¿Taate pa naata niishiniuni, cante see-  
tanujuanaa Pueyaso Sohuanu cumaacata pohuataa Pueyasojiniini? Naa  
nia saniniujiuritij: Pueyaso Sohuanu pohuatesacari pueyano, nojuajaari  
maja na naata Jesucristo sesacanu. Naajuhuj, saaja Pueyaso Sohuanu  
cumaquishacari pueyano na naata sequenu: “Jesucuaajaari Jiyaniijijanaa”.  
Naacuajitij, maja nia tojiniu na rupaa, cante Jesucristo sesacajani.

<sup>4</sup> Pueyaso Sohuanuuri niquiriyatujua. Naajaa, Pueyaso Sohuanuuri  
puetunu Pueyaso muerasujuanaa cumaquiquiaa tamaatia miishano pa mi-  
iniuria na cumaacata. <sup>5</sup> Queraatia tamaatia poonijosanoori Pueyasora  
quiya. Naajaa, puetunu pajaniyajanaari niquiriyatujua Jiyaniijiaara pooni-  
jioquiaani. <sup>6</sup> Puetunu pajaniyajanaari tamaatia miiquiaa pa poonijosanoni.  
Saniniuujia, Pueyasojuanaari na panishano miiquiaa puetunu pueya jiuuji-  
ajiniajanaa. <sup>7</sup> Pueyasoori puetunu na muerasujuanaa cumaquiquiaa na So-  
huanuta, maninia pa miitioonura, Pueyaso muerasu maapue cumaquishaa-  
nura puetunujuanaa. <sup>8</sup> Pueyasoori pa cumaquiquiaa tamaatia miishano  
pa miiniuria. Naacuajitij, Pueyaso Sohuanuuri tamonu pueyano po-  
huataniquiaa Pueyaso niishishano na muerasura. Pueyaso Sohuanu-  
uri tamonu pueyano niishitiquiaajuhua Pueyaso sequenu panishano pa-  
janiya. <sup>9</sup> Pueyaso Sohuanuuri tamonu cumaquiquiaa Pueyasooocua na  
tiuuniuria jiyanoohua, na shiniujiuniuria Pueyaso miiniu panishano pa  
miiniuria. Pueyaso Sohuanuuri tamonu cumaquiquiaajuhuj cusosuhua  
na naatanijionura Pueyaso cumaacata. <sup>10</sup> Pueyaso Sohuanuuri tamonu  
pueyano jiyajeneta miishano miitijajuhuj Pueyaso cumaacata. Tamonu-  
uri niishitishaaquiaa Pueyaso sequenu panishano na pohuatanura pueya  
niquiara. Pueyaso Sohuanuuri tamonu niishitiquiaa teyano sohuanute  
tamonu pueyano cumaquiyani, Pueyaso Sohuanu, sapojona samaru soj.  
Pueyaso Sohuanuuri tamonu pueyano pocuatequiaa tamaatia rupaaca, na  
niishishoo rupaa. Pueyaso Sohuanuuri tamonu pueyano niishitiojoquiaa  
tamaatia rupaajinia sequesano na pacunura pueya rupaajiniajuhuj, pueya  
tojiniuria maninia tama nojori rupaajiniajaaja. <sup>11</sup> Naacuajitij, Pueyaso  
Sohuanujuanaari puetunu pa cumaquiquiaajanaa, tamaatia pa miiniuria.  
Naa pa poonitijioquiaari taa na paniyacuajani, cana na panijajaaniuhuj.

*Puetunu Pueyaso pueyajanaari juhua niquiriyatu cuaqueya quiya*

<sup>12</sup> Tamaatia poonijosano puetunu pajaniyajanaa jiiitiasacari, paari juhua  
niquiriyatu cuaqueya quiyani. Mijiria pa cuaqueyari jiyanoohua maninia  
shipinishano jiyanoohua Pueyaso niishitiajata. Pa cuaqueyari maja saaja  
shu na quiniu. Pa cuaqueyari queraatia tamaatia casaaraca. Puetunu  
pa cuaqueya casaajanaari jatiqiu poonijioquiaa pa cuaqueyajinia, maninia  
pa quiniuria. Puetunu pa cuaqueya casaajanaari saa niquiriyatu cuaque-  
yaja quiya. Jiyano pa cuaqueyatej, Pueyaso muerasuuri naa quiyajuhuj.  
Naacuajitij, Cristota rupuetootesano pa quishacari, puetunu pajaniya-  
janaari juhua niquiriyatu cuaqueyaja quiyani, pa Jiyaniijiaara pa pooni-  
jionura jatiqiu. <sup>13</sup> Pueyasoori pa rupuetootequiaa na Sohuanuta, puetunu  
jatiqiu pa quiniurijanaa. Pueyasoori puetunu na muerasujuanaa sami-  
itianiquiaari na Sohuanuta. Pueyaso Sohuanu pa jiiitiasacari, puetunu

pajaniyajanaari rupuetootesano quiya niquiriyatu Sohuanutani. Naacua-jitij, paari juhua niquiriyatu cuaqueya quiyani: Judiocuaca, taucuacanio, poonitijosano pueyajuhuaaj, camarnuuj pueyano.

<sup>14</sup> Pa cuaqueyajiniji pohuatareeraj. Pa cuaqueyajinia, majaari saa niquiriyatu casaaja quiniu. Queraatia casaari quiya pa cuaqueyajinia. <sup>15</sup> ¿Taa nia sequeyani pueyanaa? Pa niohuaca jaara sequere: “Janiyari maja juaashiquiani. Naaratej, janiyari maja pueyano cuaqueyajinijini”. ¿Taa nia sequeyani cuarta Pueyaso muerasunaa? ¿Pa niohuacate maja pa cuaqueyajiniji, maja juaashiquia na quiniuucua? Maja. Naajuhuaaj, majaari pa soonu tamaatia poonijosano pa jittiasacari Pueyasora. <sup>16</sup> Naajuhuaaj, pa numaa jaara sequere: “Janiyari maja namijiani. Naaratej, janiyari maja pueyano cuaqueyajinijini”. ¿Taa nia sequeyani pueyanaa? ¿Pa numaate maja pa cuaqueyajiniji, maja namijia na quishacari? ¿Sooshiyatee? Maja. <sup>17</sup> Paa jaara saaja puereetuuca namijia quirini, shaaqui pa cuaqueya, ¿paatucua tojirini? Maja pa naata. Paa jaara saaja numaa quirini, shaaqui pa najuhua, ¿paatucua nujuuriquiani? Maja pa naata.

<sup>18</sup> Pueyasoori namitia pa cuaqueya shipiniquiaari puetunu pa panishano casaatajanaa. Puetunu pa cuaqueya casaajanaari rupuetootesaaquiaari tee Pueyaso paniquiaari nianucujani. Naajuhuaaj, Pueyasoori puetunu na muerasujanaa cumaquiquiaa mariyata, tamaatia poonijosano pa jittianura taa na paniyacuajani. <sup>19</sup> Pa cuaqueya jaara quiriquia saa namijiaja puetunujuanaa, ¿pa cuaqueyatuma tee quiriquia socuani? <sup>20</sup> Puetunu pa cuaqueya casaajanaari namitia saaja niquiriyatu cuaqueya quiya.

<sup>21</sup> ¿Taa nia sequeyani pueyanaa? Pa namijia jaara pa juaashiquia sequere: “Juaashiquianaa, niaari najuhuana quijiaca. Maja nia naata niqiniu”, ¿majate pa juaashiquia pa panishanojuhuaaj? Taaquiririnij. Naajuhuaaj, pa naca jaara pa niohuaca sequere: “Niohuacanaa, niaari najuhuana quijiaca. Maja cua paniniu niya niajaniya”, ¿majate pa niohuaca pa panishanojuhuaaj pa rucanejotajara? Taaquiririnij. Pueyanaa, naa pa quiri jatiquijihua puetunu parta Pueyaso muerasutajanaa, taa puetunu pa cuaqueyajinia pa jittiasano casaajanaa quiya jatiquicuaani. Naaratej, puetunu parta Pueyaso muerasujanaari pa panishano quiya, pa cumaquitioonura maninia. <sup>22</sup> Teyano casaate pa cuaqueyajinia socua sasaca quiya pa niquiarani, cunoori socua pa panishano. Maja pa naata rishiniu cunooju. <sup>23</sup> Naajuhuaaj, teyanote maja puera maninia niquishano pa cuaqueyajiniani, paari toque cushiquiaani pa cararaatiuuquia pa mishiquionura, maninia pa niquishaanura. Paari caririquijia cutarani, juhuasu pa quishacari. <sup>24</sup> Saniniuujia, maninia niquishano casaa pa cuaqueyajiniani, majaari cuno pa mishiquionu quiquiaa toqueta. Pueyasoori naa puetunu pa cuaqueya casaajanaa shipiniquiaari maninia pa cojuanurajuhua teyanote maja maninia niquishano pa cuaqueyajiniani. <sup>25</sup> Naacuaajitij, pa cuaqueya casaari maja rimiajata cojuasano na quiniu. Puetunu pa cuaqueya casaajanaari maninia miitiooquiaa, puetunu maninia pa cuaqueya quiniurijanaa. Naatej, taa pa tacaquiaa pa cuaqueyaracuaani, naa pa miiri parta Pueyaso muerasujuhuaaj. <sup>26</sup> Pa niohuaca jaara noore, puetunu pa cuaqueyajanaari na tacaatiaa. Pa niohuaca jaara shaaterohua, pa cuaqueyari jaarajaaja puetunujuanaa shuquiriaatia quiriohua. Naajuhuaaj, parta Pueyaso muerasu jaara taraatia miishaare, naa nojori pa taraajetarejuhuaaj. Naajuhuaaj, parta Pueyaso muerasu jaara maninia miishaare, nojoritia pa timirijuhuaaj.

<sup>27</sup> Puetunu pajaniyajanaari juhua Cristo cuaqueya quiyani. Naaratej, Pueyasoori puetunu na muerasujanaa rupueteya Cristo cuaqueyajinia,

saa niquiriyatu cuaqueyaja pa quiniuria, pa camarnura pa poonijionura. <sup>28</sup> Cristo cuaqueya pa quishacari, Pueyasoori coteenujuanaa canaa jiyatequiaari Jesucristo jiyaramiquishano pueya canaa quiniuria. Na nuhuaji, Pueyasoori tamasaca jiyatequiaari na rupaa pohuatanaa nojori quiniuria, nojori caminiujiuniuria Pueyaso sequenu panishano pueya niquiarajuhuaaj. Naajuhuaaj, Pueyasoori tamasaca jiyatequiaari na rupaa niishitiojonaa nojori quiniuria. Pueyasoori tamasaca jiyatequiaari jiyajeneta casaa nojori miiijionura na cumaacata. Tamasaacari jiyatesaaquiaari cusosuhua naatanijionaa nojori quiniuriajuhuaaj, Pueyaso Sohuanu cumaquishacari nojori. Tamasaacari jiyatesaaquiaarijiuhuaaj Pueyaso muerasu naacunaara nojori quiniuria. Tamasaacari jiyatesaaquiaarijiuhuaaj Pueyaso muerasu jiiitianaa nojori quiniuria. Tamasaacari pohuatesaaquiaari tamaatia rupaacajuhuaaj. Naacuaajitij, queraatia tamaatia poonijiosanoori quiya. <sup>29</sup> ¿Puetunu Pueyaso muerasujuanaateeri jiyaramiquishaaquiaari Jesucristojiniji nojori pohuata-nura tamasaca niquiara? Maja. ¿Puetunu Pueyaso muerasujuanaateeri Pueyaso rupaa pohuatanaa? Maja. ¿Puetunu Pueyaso muerasujuanaateeri Pueyaso rupaa niishitiojonaa? Maja. ¿Puetunu Pueyaso muerasujuanaateeri jiyajeneta miishano miijiaca? Maja. <sup>30</sup> ¿Puetunu Pueyaso muerasujuanaateeri cusosuhua naatanijionaa? Maja. ¿Puetunu Pueyaso muerasujuanaateeri tamaatia rupaaca pocuajaca? Maja. Tamaatia rupaajinia pohuatasano jaara quiriquia, ¿puetunu Pueyaso muerasujuanaateeri na naata na pacunu tama nojori rupaajiniajaaja? Maja. <sup>31</sup> Naaratej, nijaniya cuaara jiaatiaara socua maninia poonijiosano nia jiiitanura Pueyaso Sohuanujiniji, niarta Pueyaso muerasu nia cumaquiniuria maninia.

Cuarta Jesuucua tiunianaana, quiarjianani nia niishitiojoreera casaate socua panishanoni, Pueyaso shuquiritianura pajaniya.

## 13

### *Panijiaca pa quirij*

<sup>1</sup> Pueyaso Sohuanu jaara cua pohuatere queraatia cua niishishoo rupaaca, Pueyaso seya rupaajuhuaaj, naajaa, janiya jaara pueya paniyashijia quirini, janiya maara saaja cojuatuneja quirij Pueyasorani. <sup>2</sup> Naajuhuaaj, janiya jaara Pueyaso cumaacaraca quirini Pueyaso sequenu panishano cua caminiujiuniuria, naajaa, cua paniyaquishacari pueya, janiya maara najuhuana quijia quirini. Naajuhuaaj, janiya jaara niishiri puetunu Pueyaso miiniu panishanojuanaani, puetunu Pueyaso niishishanojuanaanio, naajaa, janiya jaara pueya paniyashijia quirini, janiya maara najuhuana quijia quirij Pueyasorani. Naajuhuaaj, janiya jaara Pueyaso cumaacaraca quirini, tuhuananuhua cua jatanura tamocora Pueyasocua cua tiuniuucua jiyanojuani, naajaa. Cua paniyaquishacari pueya, janiya maara najuhuana quijia quiriquia Pueyasorani. <sup>3</sup> Naajuhuaaj, janiya jaara puetunu cua casamijiana nareja niqutiore casamiijiuniucua cua paniyaquiniutiani, cua Jiyaniijia maara cua shuquiritiaaquiri. Naajuhuaaj, janiya jaara tama cua cuaqueyajaaja panitiare Pueyaso rupaa cua pohuatanurani, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini. Naajuhuaaj, janiya jaara mosaare Pueyaso rupaa cua pohuatanuucua, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini.

<sup>4</sup> Cante pueya panijiani, nojuajaari panaatia sashijia. Cante pueya panijiani, nojuajaari maninia miiijia puetunu pueyarajanaa. Cante pueya panijiani, nojuajaari tamonu pueya jiiitiasanoocua jiaatiaashijia. Cante

pueya panijiani, majaari tama na cuaqueyajaaja na jiyatenu juhua cutara pueyanora. Naajuhuj, cante pueya panijiani, majaari pueya rerequeteja na quiniu. <sup>5</sup> Cante pueya panijiani, majaari pueya na cararajonu. Cante pueya panijiani, majaari saaja nera niishiriojojua tamajaaja. Cante pueya panijiani, majaari ritia juaajia. Majaari na niishiniu naminiujuhuaj, tamonu jaara sesa na miiri. <sup>6</sup> Cante pueya panijiani, nojuajaari pueyacia taraajeja, nojori miishacari sesa. Saniniuujia, nojuajaari shuquiriaatia quiya pueya miishacari Pueyaso panishano. <sup>7</sup> Cante pueya panijiani, juhujaniya pueyaracaanu rejeretaari, tamasa miishacari sesa nojuaja. Majaari na taacanuunu Pueyaso sequesanojiniji, tamonu sequesanojinijinio. Naajuhuj, majaari na tarinitianu maninia miiniu pueyaracaanu. Pueya panijaari naa puetunu rejeretajajanaa, taraatia na miishacari.

<sup>8</sup> Panijia pa quiniuni, cunoori pueyaracaanu panishaanutaniya, maja saa mijiria pa quishacarijia. Naaratej, socua cutara panijia pa quirij. Mijiria pa quishacari, Pueyaso Sohuanuuri pa cumaquia Pueyaso sequenu panishano pa caminiuuniuria, pa niishishoo rupaaca pa pocuanurajuhuj, Pueyaso niishitishano pajaniya pa pohuatanurano. Puetunu nio niishishanojuanaari puequenutaniya Jesucristo tiuquishacariuhua pocua. Paniniu cutaraari puequeyaquiniutianiya. <sup>9</sup> Mijiria pa quishacari, paari saaja shiitianiyojua Pueyaso niishishano jiiitaani. Pa niishishano Pueyasojiniji pa pohuatasani, cunoori saaja shiitianiyojua Pueyaso niishishanojiniji. <sup>10</sup> Naacuajitij, mijiria pa niishishanoori najuhua quiniutianiya paa jaara Pueyaso shuriucua quirini. Pueyasoori jiyacari pa niishitiojonutaniya maninia cutara. Paari jiyacari puetunu maninia niishiniutianiyajanaani.

<sup>11</sup> Janiya jaara naatujua quiquiaarini, juhua naatujua pocuaquiaarinijia. Juhua naatujua niishiriojoquiaarinijia. Saaja naatujua niishitiaja jiiitaquiaarinijia. Saniniuujia, janiya jaara cumantumaca quiquiaarini, janiyari cua naatujua quiniu niyajetaquiaarini. Naajuhuj mijiria pa quishacari, paari juhua naatujoori quiyajaa Pueyaso niquiarani. Pa Jiyanijia tiuquishacariuhua, paa cutaraari cumueeca Pueyaso pueya quiniutianiyani. <sup>12</sup> Mijiria pa quishacarijia, paari shiitianiyojua niishiyani. Paari juhua ninitia niquia jariyani, juhua sesarunee niqutiujinia. Pueyaso shuriucua pa quishacari, paari maatia niishiniutianiyani. Quiarijiani, saa shiitianiyojuajaari pa niishishano. Na nuhuaji, Pueyasota pa quishacari, paari puetunu maniniajanaa niishiniutianiyani, naatej, taa Pueyaso niishiya puetunu pajaniyajanaacuaani. <sup>13</sup> Quiarijiani, paari Pueyaso rupaacua tiuniu niishiyani. Naajuhuj, paari juhujaniya sashiniu niishiyani, maatia pa niishishacari nojuajaari maninia miiniutianiya pajaniya. Nioori maniniacuaaja. Naajaa, pa panishacari Pueyaso, pueyano, cunoori socua maninia cutara Pueyasora, puetunu tamonu casaajinijiniojuanaa.

## 14

### *Niishishoo rupaaca pocuanujiniji niishitiojosano*

<sup>1</sup> Naarate cua panishano Pueyaso muerasunaa, nia jiaatiare socua jiyanojua pueya panijia nia quiniuria, Pueyaso panijiacajuhuj. Naajuhuj, nia jiaatiare Pueyaso Sohuanu cumaaca nia jiiitanura maninia nia miiniuria. Panishano cutaraari Pueyaso Sohuanu niishitiaja nia jiiitanura, Pueyaso sequenu panishano nia caminiuuniuria Pueyaso pueyara. <sup>2</sup> Cante niishishoo rupaa pocuaa pueya niquiarani Pueyaso Sohuanu cumaacatani, cuno pueyanoori maja na cumaquiniu narta Pueyaso pueya. Na pohuatasanoori saaja Pueyaso tojishano, maja pueya tojishano. Cuno pueyanoori



jiyasohuaja Pueyaso Sohuanu niishitishano pohuataa pueya niquiara najuhanaj. Majaari pueya niishiniu casaa na sequeyani. <sup>3</sup> Saniniuujia, cante Pueyaso sequenu panishano caminiujiujia pueya rupaajiniani, cunoori narta Pueyaso muerasu cumaquiya. Na numooteyari. Na cumanjiaajaari-iuhuj. <sup>4</sup> Na pohuatasanoori maja najuhuaana na quiniu pueyara. Pueyaso pueya maanu tojishacari na pohuatasano, nojoriiri socua cumaquishaanutaniya. Saniniuujia, cante niishishoo rupaajinia pocuaa Pueyaso pueya maanu tajiniani, najuhuaana pocuaari. Saa tama noojia cumaquiyajaarijia. <sup>5</sup> Puetunu niajanijajanaa jaara niishishoo rupaaca pocuanu niishijia-quiriquia, janiya maara shuquiriaatia quirini. Naajaa, janiya maara socua shuquiriaatia quirini puetunu niajanijajanaa jaara Pueyaso sequenu panishano caminiujiuniaa quiriquia Pueyaso cumaacata. Cante Pueyaso rupaa pohuatanani, cuno pueyanoori socua tojishano pueyano niishishoo rupaa pocuanajiniji. Naajaa, niishishoo rupaa pocuanaari mariyata panishano quiya, na sequesano jaara pueya rupaajinia pacusaare pueya tojishocoriquiano. Naacuajitij, Pueyaso maapueeri cumaquishaanutaniya-juhuj, maatia Pueyaso sequesano nojori tojishacari.

<sup>6</sup> Cuarta Pueyaso muerasunaa, ¿niaatucua taa sequereni, janiya jaara Pueyaso rupaa pohuatasee niajanijajanaa nia niishishoo rupaajiniani? ¿Niaatucua cumaquishaare cua pocuasacari najuhuaana naa nia niquiaratej? Maja. Niaa cutaraari cumaquishano quiniutianiya, janiya jaara nia pohuatare nia rupaajinijajanaa Pueyaso niishitiojosano janiyani. Maninijajariuhuj janiya jaara nia niishitiojore Pueyaso rupaa nia rupaajiniani. <sup>7</sup> Nia niishiriojore. Jiuujiaaju casamiiri rupaaracajuhuj. Naaratej, paari shuquiriaatia tojitiaa naajua jonesesarini, jaaquequejotaja taquiniosacarijuhuaj. Saniniuujia, pueyano jaara naajua jonenejonu saniniuujia na niishiyaquishacarijia, saaja nareja cojuatuneyari. Naacuajitij, cante na tojiyani, majaari na niishiniu casaa na jonenenu paniya juucuanu. <sup>8</sup> Naajuhuj, trompeta jaara sesa jonesesaare, ¿soldadohuate na naata niishiniu casaa na miiniutianiya? Maja. <sup>9</sup> Mariyata naajaariuhuj, niaa jaara niishishoo rupaa pocuaa pueya niquiara, ¿pueyatucua taa niishirini casaa nia sequeyani? Niaari saaja nia niti taquiriocuateya najuhuaana nojori niquiara. <sup>10</sup> Niaacuajaari niishiya queraatia rupaacaari mijiria quiya. Puetunu maninijajanaa cutaraari na niishiniaara. <sup>11</sup> Saniniuujia, janiya jaara niishiyaquiya tamonu rupaani, janiyari tahue quiya cuno rupaa pocuanarani. Cuno rupaa pocuanaari tahue quiya quiriajuhuaj. <sup>12</sup> Cuarta Jesuucua tiunianaa, niaacuajaari Pueyaso Sohuanuucua jiaatiaquiaa, na cumaaca nia jitianura. Maninacuaja. Naajaa, niajanijajanaa cuaara jiaatiaara Pueyaso Sohuanu cumaquiniuria niajanijajanaa, puetunu tamaatia poonijosanojuanaa nia miiniuriajuhuaj, maja saaja tamaatia rupaajinia nia pocuanura. Naacuajitij, nia naata niarta Pueyaso pueya cumaquiniu maninia puetunu nia miishanotajanaa, Pueyaso Sohuanu cumaquishacari niajanijajanaa.

<sup>13</sup> Naaratej, cante niishishoo rupaajinia pocuaquiaa pueya niquiara Pueyaso Sohuanu cumaacatani, cuno cuaara secojora Pueyaso, Pueyaso Sohuanu cumaquiniuria nojuaja, na sequesano na pacutenura pueya rupaajinijajuhuj. <sup>14</sup> Pa secojosacari Pueyaso pa niishishoo rupaajinia, Pueyaso Sohuanuuri pa sohuanu secojoteya Pueyaso. Majaari pa niishitijajajanaa niishiniu cutara casaa pa sequeyani. <sup>15</sup> Cunora, ¿casaa pa miiniutianiya Pueyaso pueya maapue tajiniani? Naa pa miiritij: pa sohuanu cuaara secojora Pueyaso pa niishishoo rupaajinia. Pueyaso pa secojorejuhua tama pa rupaajinijajajaa. Naajuhuj, pa sohuanu cuaara jaaquequejora Pueyaso niquiara



pa niishishoo rupaajinia. Pa jaaquequejorejuhua tama pa rupaajiniajaaja. <sup>16</sup> Pueyaso Sohuanu jaara nia sohuanu secojotere niishishoo rupaajinia, nia tojtianaari maja na naata sequenu: “Jaa, cuara naa quiiriatej”. Majaari nojori niishiniu tamaatia rupaajinia nia secojosano. <sup>17</sup> Niaa naasucuaari jiyanoehua maninia secojiya Pueyaso. Naajaa, saaja najuhuana quiyari tamasacara, nojori niishiyaquishacari cuno rupaa. Cuno niishishoo rupaajinia secojosanoori maja na naacunu tamasaca. <sup>18</sup> Pueyanaa, shuquiriaatia quiyanjia Pueyaso niquiara, Pueyaso Sohuanu pocuatesacari janiya cua niishishoo rupaacajinia, tamajaaja cua quishacari. Janiyari tamaatia rupaacajinia pocuaja socua niajanijiniiji cutarani. <sup>19</sup> Naajaa, janiya jaara pueyaracaanu pocuariquia niishishoo rupaajinia Pueyaso pueya maapue niquiarani, cuno maara najuhuana quiriqiaj. Rupaquijia pohuatasano tama pueya rupaajiniajaajani, cunoori jiyanoehua socua maninia tucuyocua pohuatasanojiniji niishishoo rupaajinia. Saaja pueya niishishano rupaajinia cutara cua naata nojori cumaquiniu.

<sup>20</sup> Cuarta Pueyaso muerasunaa, niaari najuhuana shuquiriya niishishoo rupaajinia nia pocuasacari pueya niquiara, naatej, taa naatujoori shuquiritiaquiaa quiarinio tacuarishijiotajacuaani. Niaa jaara juhua naatujoori quiniu panijajaa, sesa niishiriojiyashijiaca nia quiri, taa naatujoori quiyacuaani. Saniniuujia, majaari seetanujuanaa naatujoori niajanijia. Naaratej, cumantumaca nia quishacari, nia niishiriojore maninia nia cumaquitioonura nia rerejosacari. <sup>21</sup> Tariucuaaanu, tama Pueyaso sequesanojaarijia naajiotasaaquiaari. Naa sequeyari:

“Janiyari taucuaca jiyaramiquiniutianiya cua saquiriojosano Israel pueyacuani, cua sequenu panishano nojori pohuatanura cua pueya. Cua pueya niishiyaquishoo rupaacajinia pohuatanutaniyari. Naajaa, niishiyanjia, tahua pohuatasacari cua rupaa, cua pueyari saa cua ruuretanutaniyajaa, taa nojori ruuretaquiaa cua rupaacuaani jaara tama nojori rupaajiniajaaja pohuatasariquiaa”.

<sup>22</sup> Naa Pueyaso sequesacaritij, paari niishiyani, Pueyasoori tamaatia rupaacata na tojiyashijiaca tojtiniu saniniuuiuquiaa na rupaa juucua. Paari saniniuujia tari na rupaa tojtiajaca cutarani. Naaratej, majaari socua panishano Pueyaso sequenura pajaniya pa niishishoo rupaajinia, na tojtiniuria pajaniya nojuaja. Pueyaso sequenu panishano caminiujiushano cutaraari pajaniyara. Cunocuaajaari tama pa rupaajiniajaaja. Cunoori maja Pueyasoocua tiuyashijiacara. <sup>23</sup> Naaratej, Pueyaso pueya maapue rerejosacari, saaja secaja niajanijiniijinio cuara pocuara niishishoo rupaacajinia. Naa pocuanu nia tarinitiare quenaaja, tamasaca Jesuucua tiuyashijiaca quishacari nia rerejojuajinia, nojori mariqui jiyaniiri: “¡Nio pueyaqui puetunu paatecoorijihuanajaj!” <sup>24</sup> Saniniuujia, puetunu niajanijianaa jaara Pueyaso sequenu panishano caminiujiya tama nia rupaajiniajaaja, tamonu pueyano jaara niaacua tiuquiri, nojuajaari maninia niishiniutianiya nia pohuatasano. Puetunu nia pohuatasanojuanaari noojia tacaatiniutianiya sesa miijia na quiniuucua. Tama nojuajaarijia niishiniutianiya: “¡Janijiaqui sesa miijia Pueyaso niquiarani!” <sup>25</sup> Nia pohuatasano Pueyasojinijiri puetunu sesa na miishanojuanaa na niishitiniutianiya noojiajia. Nocuaji, nojuajaari Pueyaso tojijia quiniutianiya. Sequenutaniyari: “¡Pueyasoqui seetanujuanaa nia tajinia niya quiya!”

*Puetunu nia miirijianaa maninia. Majaari nia riutiocojonu tamonu pocuasacari*

<sup>26</sup> Naaratej, cua tojitiare taa nia miiniutianiyani cuarta Pueyaso muera-sunaa. Naa nia miiri nia rerejosacari. Puetunu nia miishanojuanaa cuaara quiiria nia cumaquitioonura, socua maninia Pueyaso tojitiaanaara nia quiniuria. Naacuajitij, Pueyaso Sohuanu cumaacata, tamonu naasucuaari jaaquequejonutaniya. Tamonu naasucuaari Pueyaso rupaa niishitiojonutaniya. Tamonu naasucuaari Pueyaso Sohuanu niishitiojosano noojiajinia caminiujiuniutianiya. Tamonu naasucuaari niishishoo rupaajinia pocuanutaniya. Na nuhuaji, tamonu cuaara na pacuura nia rupaajinia, maninia nia tojiniuria. Naa nia miiri maninia. Niquiriyatujua cuaara pocuaara coteenu, na nuhuaji tamonu, na nuhuaji socua tamonu. Naate nia miiri. Majaari nia riutioconu tamonu pahuatasacari. <sup>27</sup> Niaa jaara niishishoo rupaajinia pocuanu paniri, cuaara pocuaara saa querajaa pueyaja, maja socua. Cuaara pocuaara niquiriyatujua, na nuhuaji tarajanu, na nuhuaji socua tarajanu. Naate maninia. Maja nia pocuanu tamonu pocuasacari. Na nuhuaji, tamonu cuaara pacuura pueya rupaajinia, niishishoo rupaajinia nia sequesano, pueya tojiniuria maninia. <sup>28</sup> Niishishoo rupaa pacuna quiyaquishacari, cuaara pocuaaquiiria cante tamaatia rupaajinia pocuanu paniriquiaa nia niquiarani. Na naata sanaa pocuanu noojiajinia tamajaaja, saa Pueyaso niquiaraja.

<sup>29</sup> Naajuhuj, niaa jaara Pueyaso Sohuanu niishitiojosano nioojiajinia pahuatanu paniri, cuaara pocuaara saa querajaa pueyaja, maja socua. Na nuhuaji, Pueyaso Sohuanu cumaaca jitianaa cuaara saniniujiuuria nia pahuatasano, nia niishiniuria, cunote seetanujuanaa Pueyaso Sohuanu niishitiojosano, maja soj. <sup>30</sup> Nia pahuatasacari Pueyaso rupaa, tamonu jaara pahuatanu paniya shusha Pueyaso Sohuanu niishitiojosano noojiajinia, cante pahuataajaani cuaara sanaajeera, na tarajana pocuanura. <sup>31</sup> Naacuajitij, puetunu Pueyaso niishitiojosano jitianajaanaari na naata na pahuatanu. Naaratej, niquiriyatujua cuaara pahuataara, na nuhuaji tamonu, na nuhuaji socua tamonu. Naacuajitij, puetunu niajanijajanaa na naata pahuatanu nia niishishano Pueyasojiniji. Naacuajitij, puetunu Pueyaso muerasujuanaari maninia niishitiojosano quiniutianiya, maninia cumaquishanojuhuaj, maninia nia miiniuria. <sup>32</sup> Maja timia pocuanu jaara-jaaja tamonu pocuasacari. Majaari Pueyaso Sohuanu pocuatenu tari nijaniya, tari tamonu pocuasacaricuaa. Nia naata cutaraari sashiniu nia pocuanura. <sup>33</sup> Pa Pueyaso cutaraari maninia miijijajanaa. Maja cushitiojua. Naarate pueyanaa, maja tamasaca pocuasacari pa riuticojonu. Saaja maninia pa miiriquia pueyaracaanu.

Cua tojitiare socua. Puetunu Pueyaso pueya maapuejanaa cuaara naa miiria na rerejosacari. <sup>34</sup> Maajipohua cuaara sanaa tojitiara Pueyaso rupaa pahuatasacari. Maajipohua cuaara niishitiojiyaquiiria pueya niquiara. Maajipohua cuaara tojijira quiiria, taa pa niishitiojosaaquiaari Moisés Rootasanojinijicujani. <sup>35</sup> Maajipohua jaara niishiniu paniya socua pahuatana niishitiosanojiniji, nojori cuaara nequesotohuara neyaca tama na tijiniajaaja, na que maaraja. Cararaatia cutaraari maaji jaara nequesoreetare caya pahuatasacari, Pueyaso muerasu rerejojuajinia. <sup>36</sup> Nia tojiri nio cua rootasano pueyanaa. Niaacuajaari niishiya, Pueyaso rupaari supueyaquiquiaari niajanijajiniji. Naajuhuj, majaari Pueyaso rupaa pahuatanaa jiyaramiquiniu quishaaquiaari saa niaacuaja. Tamonu jiyacajinia, queraatia Pueyaso pueya maapueeri cua niishitiojosano tojitiaquiaa maninia cutara. <sup>37</sup> Nijaniyajinijinio, noojiaqueya pueyari Pueyaso Sohuanu cumaaca jitiaa, nia niishiniuria cana cumaacata tamonu pueyano

niishitiojiyani. Naacujitij, ¿taa nia sequeyani? ¿Majate Pueyaso Sohuanu niishitiosano cua sequesano niajaniya? <sup>38</sup> Cante nio niishiniu paniyaquiya, cuno jiyoteeri maja Pueyaso Sohuanu cumaacaraca quijia. Cuno pueyano cuaara tojiyaquishaaria saniniuujia.

<sup>39</sup> Naacujitij cuarta Pueyaso muerasunaa, nia jiaatiare Pueyaso Sohuanu cumaaca nia jiitianura, pueya niquiara nia pohuatanura Pueyaso Sohuanu niishitishano niajaniya. Naajuhuaaj, majaari nia tenujunu noo pojori, canapuate niishishoo rupaacajinia pocuanu paniyani, Pueyaso Sohuanu cumaquishacari nojori. <sup>40</sup> Nareja maninia nia miiriquia puetunujuanaa. Naacujitij, niquiriyatu cuaara pocuara coteenu, na nuhuaji tamonu, na nuhuaji socua tamonu.

## 15

### *Cristo samitiasacariuhua*

<sup>1</sup> Cuarta Jesucua tiuuniaanaa, Jesucristo rupaa nia niishiriohua, tarijia cua pohuatasano niajaniya, nia jiyanooshaanurani. Niaari nocua tiuquiaari maninia. Niaari quiarijia maninia na tojitiaajaa. <sup>2</sup> Naacujitij, Jesucristoori niaacujia tacuquiaa quiarijia, maninia nia tojitiasacari na rupaa, taa cua pohuataquiaari niajanacuajani. Niaacujiaari Pueyaso pueyara jatanishano quiya niaa jaara maja najuhuaana na rupaa tojiyaquiquiaari. <sup>3</sup> Janiyari niaara caminiujuquiaari Jesucristo rupaani, taa cua tojiquiaaricuaani. Nio cutara rupaa nia coteetaquiaari pohuatanunijia: Cristoori pocuara cusoquiaari niyacutesanojinia, sesa pa miiniuucua. Tariucuacaanu Pueyaso sequenu panishano caminiujuuniaari naa naajiotaquiaari, taa Cristo miishaanutaniya naquiya. Seetanujuanaa naa miishaaquiaariiri. <sup>4</sup> Jesucristo cusonu nuhuaji, raaco niasaaquiaariiri. Jiuujanaraca juuca jaara na shoconujuquiaari macu na quishacari, na raaco samitiaquiaariuhuari. Naa tohuatequiaariiri puetunu tariucuacaanu Pueyaso Rupaa-janaa, taa nojuajiniji naajiotasaaquiaaricujani. <sup>5</sup> Na nuhuaji, Jesucristoori Pedroocua muetaquiaariuhua. Na nuhuaji, na jiyaramiquishocoriquiano pueyacua muetaquiaariuhua. <sup>6</sup> Na nuhuaji, muetaquiaariuhua na tojitianaa rerejosaquiiri. Socua quiniento pueyari na niquitiaquiaari jiyacari. Queraatia jiyacari na niquiniaajinijinio pueyari saminio quiyajaa. Noojiaqueyari tari shaajecocanu. <sup>7</sup> Na nuhuaji, pa Jiyaniijaari Santiagoocua muetaquiaariuhua. Na nuhuaji, muetanu pacutequiaariuhua na doce jiyaramiquishocoriquiano pueyacuaari.

<sup>8</sup> Puetunu cuno pojori nuhuaji, Jesucristoori socua cucua muetaquiaariuhua, nocua tiuujia cua quiyaquishacarijia. Naa na paraca cua quishacarijiatej, Jesucristoori cucua muetaquiaari na jiyanooniuria janiya. Ritia cua jiyatequiaariiri na jiyaramiquishano cua quiniuriajuhuaj. <sup>9</sup> ¿Casaaraquitijia na saquiriojoquiaari janiyatejaj, na jiyaramiquishano cua quiniuriajuhuaj? Janiyari puera sesa miiija quiquiaarini cua niishiyaquishacari Jesucristo. Cucua na muetaquishacarijia, janiyari Pueyaso saquiriojosano pueya mitiaquiaarini. Cuarta Jesucristo jiyaramiquishano pueyari maja naa sesa miiijaca na qutiuniu quiquiaari. <sup>10</sup> ¡Pueyasoori jiyanoohua maninia! Cua jiyanooquiaariiri Jesucristo jiyaramiquishano cua quiniuriajuhuaj, taa cua quiya quiarijiacujani. Naa quiyanijia Pueyaso jiyanooniucua janiya. Majaari najuhuaana na jiyanooni quiquiaari janiya. Na jiyanooshacari janiya, janiyari socua jiyanoohua nera poonijiocanu cuarta Jesucristo jiyaramiquishano pueyajinijini. Naajaa, maninia cua poonijosanoori maja

tama cua miishanojuaaja na quiniu. Pueyasocuaajaari cua cumaquiquiaa na Sohuanuta, maninia cua miiniuria na panishano.

<sup>11</sup> Naacuajitij, naa sequeriquiaa niajaniyanijia: cante nia pohuataquiaari Jesucristo rupaani, naajaa. Janiyari Jesucristo rupaa pohuataquiaajaacuhaj, mariyata taa cuarta Jesucristo jiyaramiquishano pueya pohuataquiaacuaani. Majaari rimiajata canaa pohuatasano. Niaari cuno ru-paacua tiuquiquiaari maninia.

*Pueyaso muerasu macunucua samiitiasacariuhua*

<sup>12</sup> Cuarta Jesuucua tiuuniaanaa, canaa jaara pohuatariquiaa taa Cristo samiitiaquiaariuhua macujinijini, ¿casaara noojiaqueya niajaniyanijini sequequiaani: “Macunucua maja na samiitiaconu quiniutianihua”? <sup>13</sup> Macunucua jaara samiitianiyaquishaanutaniya taa nia sequequiaacuajani, Jesucristo jiyoteeri macu quiyajaacuhaj. ¿Cristoteeri macu quiyajaa? ¡Maja! <sup>14</sup> Cristo jaara macu quiriquiaja, canaa maara najuhuaana pohuataa na rupaani. Naajuhaj, niaa maara najuhuaana Jesucristoocua tiuya, na pueya nia quiniu paniniuria juucua. <sup>15</sup> Canaacuaajaari pohuatanuuquiaani Pueyasoori Jesucristo samiitianiyaariuhua. Macunucua jaara samiitianiyaquishaanutaniya taa nia jiyaniquiaacuajani, canaa jiyoteeri sapojonuujuaca Pueyaso jiyaramiquishano pueyani. Naacuajitij, nia sequesano jaara seetanujuanaa quiri, maja jiyoteeri Pueyaso samiitianiniu quiquiaariuhua Jesu. Saniniuujia, ¡niaari jiyajeneya cutara! ¡Pueyasocuaajaari seetanujuanaa Jesu samiitianiyaariuhua! <sup>16</sup> Macunucua jaara samiitianiyaquishaanutaniya taa nia sequequiaacuajani, Cristo maara samiitiaquiquiaariuhajuhaj. <sup>17</sup> Cristo jaara samiitiaquiquiaari, niaa jiyoteeri Cristoocua tiuya najuhuanaj, Pueyaso na jiyanootiniuria juucua niajaniya. ¿Macuteeri na naata pocuaji tacunu? Maja na naata. Niaa jiyoteeri jiyanooshoojua quiya. Sesa nia miishano jiyoteeri tuujusoojua quiyajuhaj. ¿Naatejaaratej? <sup>18</sup> Cristo jaara macu quiriquiaja, tariucua shaajecono nocua tiuuniaa pueya maara taraatia quiriquiaj. Nojori maara taraatia shaajecanu puetunurajanaa, maja quenaaja nojori samiitiaconuhua. <sup>19</sup> Pajaniyajuhaj, canapuede saminio quiyajaani, paa maara jiyanoohua taraatia quiyani, pueyaracaanu najuhuaana naquiya pa miishacari mijiria. Jaara naa quiritij, pa Jiyaniijia Jesucristo jaara macu quiriquiaja, paa maara najuhuaana poonijioriquia pa shuquiritiniuria nojuaja juucuan.

<sup>20</sup> ¡Namitia naa quiyaquiyari! ¡Cristoori seetanujuanaa samiitianishaaquiaariuhua! ¡Canaari na niquitiaquiaarini! Naacuajitij canaari niishiyani Jesucristoori saminio quiyacuaja. Pueyaracaanu saminio quiniutianiyari. Naa pa Jiyaniijia Jesu samiitiasacariuhua coteenu pocuajicuaatej, naacuajitij paari niishiyani puetunu shaajecono nocua tiuuniaajanaari samiitianishaanutaniuhuaajaacuhaj. <sup>21-22</sup> Paacuajaari niishiyani, pa supuetana Adánri coteenujuanaa shaajequiaari, Pueyaso na tojiyaquiniucua. Naacuajitij, puetunu nojuajiniji supuenaajanaari shaajecoquiaajuhaj. Adán nuhuaji, parta pueyano Jesucristoori saniniuujia Pueyaso tojijia quiquiaari cutara. Naacuajitij, nojuajaari samiitiaquiaariuhua. Naaratej, puetunu nocua tiuuniaajanaari samiitianishaanutaniuhua, pueyaracaanu saminio pa quiniuhua pa Jiyaniijia. <sup>23</sup> Pa Jiyaniijia Jesucristoori coteenu samiitiaquiaariuhua. Cristo nuhuaji, puetunu nocua tiuuniaajanaari samiitiaconutaniuhua, pa naacuneetonura nata, na nishacariuhua pocua. Paari naa samiitiaconutaniuhua Pueyaso panishacarini. <sup>24-26</sup> Na nuhuaji, nio

jiya puequesacariiri quiniutianiya. Pa Jiyaniijia Jesucristoori mijiria tiuquiniutianihua, na tucuatenuhuara puetunu na Que panishanojuanaa. Na Queeri na jiyaronutaniya puetunu na paraajanaa na puecoonura. Jesucristoori Jiyaniijiajanaa quiniutianiya, na Que cuaara puecoorejaatijia puetunu Neyanu paraajanaa. Jesuuri puetunu mijiria jiyaniijianucua quejoonutaniyajanaa, mariyata puetunu jiya cajiniocua cumaacaraca quijiacajanaanio. Sesaacaari jataaanutaniyajuhua, puetunu na seyatajanaa. Majaari tamonu Pueyaso ruuretaja cureenu quiniutianiya quenaaja. Pa Jiyaniijia jatanu nuhuaji puetunu na paraajanaa, jiyacari pueya cusojuana shaajanutaniyajaariuhua. Majaari cusonu niishishaanu quiniutianiya socua, shaajenunio. Puetunu casaajanaa jaara maninia jiitiasano quiriohua, Jesucristoori na Que na niqutionutaniuhua, na Que jiitianuhua puetunujuanaa.

<sup>27</sup> Na Que Pueyasoori Jesu jiyatequiaari Jiyaniijia na quiniuria jiyanohua na cumaacata. Naacuajitij, nojuajaari na naata puetunu casaajanaa na tojitianiniu. Nojuajaari Jiyaniijiajanaa. Saa na Que Pueyasojuuari socua Jiyaniijiajanaa, maja tamonu. Pueyasojuanaari Neyanu jiyaroquiaari puetunu na shipinishanojuanaa na jeenucuanura na cumaacata. <sup>28</sup> Na tucuatascari, pa Jiyaniijia Jesucristoori na Que sequenutaniya: “Cua Quena, tari tucuataree quia panishanonijia. Puetunu quia paraajanaa quejooree tarinijia. Majaari socua sesa na miiniu quiniutianiya. Saa quiajanijajaari pueyaracaanu Jiyaniijiajanaa quiniutianiya cutara, maja socua tamonu”. Naacuajitij, pa Que Pueyasoori Jiyaniijiajanaa quiniutianiya pueyaracaanu, puetunu na shipinishanojuanaa na jiitianura maninia.

<sup>29</sup> Socua nia niishiriojore pueyanaa. Niaa jaara jiyaniyajaa macunucuaari maja na samiitianishaanu quiniutianihua, ¿casaara pueya tiuquinijosaaquiaa moojinia macu nitini, cuno macu jaara na shaajeyaquishacarijia Jesucristoocua tiuuri? Paa jaara tiuquinijosaaquiaa Jesucristoocua pa tiuushacarini, paari miriqui miyani taa pa Jiyaniijia Jesucristo miishaaquiaaricuaani. Nojuajaari raaco niasaaquiaari na cusosacari. Na nuhuaji samiitiaquiaariuhuari. Naajuhua, paari mariyata samiitianishaanutaniuhuani. Niaari sequeya macunucuaari maja na samiitianishaanu quiniutianihua. ¿Naatejaaratej? Macunucua jaara samiitianijiyaquishaanutaniuhua taa nia jiyaniyacujani, ¿casaara pueya tiuquinijosaaquiaa shusha shaajeno macu niticuararini?

<sup>30</sup> Paa jaara samiitianiyaquishaanutaniyani taa nia sequequiaacuajani, canaquiiri najuhuana tama canaa cuaqueyajaaja panitiaquiaani, pueyaracaanu canaa poonijosacari pa Jiyaniijia. <sup>31</sup> Seetanujuanaa nia sequeyanijia, janiyari jiyanohua shuquiriaatia quiyani, Jesucristoocua nia tiuushacari, cua pohuatanucua na rupaa nijaniya. Seetanujuanaajaariuhua, pueyari cua monu paniquiaa pueyaracaanuni, maja socua cua pohuatanura Jesujiniji. Naajaa, janiyari tama cua cuaqueyajaaja panitiaquiaa puetunu juucajanaani, cua niishishacari janiyari samiitianishaanutaniuhuani. <sup>32</sup> Pa Jiyaniijia jaara macu quiya taa nia sequequiaacuajani, janiyaqui najuhuana Jesucristo rupaacuaji tacuriquiaani nio sesaaca pueya tajinia cua quishacari nia Éfeso tiacajiniani. Nojoriiri juhua puereeta sayoru quiriquiaa cucuaji. Janiyaqui najuhuana Jesucristo shuquiritiriquiaa juucuanu, nojuaja jaara samiitianiyaquishaaquiariuhua. Paa jaara samiitianiyaquishaanutaniyani, pa miiriqui taa Pueyaso tojiyashijiaca sequequiaacuajani: “Pa shuquiriri saminio pa quishacarijia. Pa queranacunuure. Pa mashaasequenuurejuhua. Naajaa, pa shaajesacari, pocua puetunu shaajequee-



janaani”. Naa sesa miiquioquiaari noo pojori, canapuate jiyaniyani macunucuaari maja na samiitianishaanu quiniutianiya.

<sup>33</sup> Pueyanaa, tama nia cuaqueyajaaja nia cojuare, niaa mariqui sapojosaa-reeri naa sesa nia niishiriojonurajuhuaaj. Tamonu pueyanoori naa sequequiaari seetanujuanaatej: “Maninia miiijaari sesa miiijara jatanishaaree na cojiniuucua sesa miiijaca”. Naaratej, majaari nia cojiniu sesoriquia pueya, niaa mariqui seserejaariuhuaaj. <sup>34</sup> Niishiriojojuara nia quiri. Sesa nia miniu nia cartere. Noojiaqueya nijaniyajiniinioori Pueyaso niishiyashijaca quiyajaa. Naa nia sequereenijia pueyanaa, quenaaja nia caririquiniuria.

*Taamueca pa quiniutianiuhuani pa samiitiasacariuhua*

<sup>35</sup> Tamonu nijaniyajiniinio naasucuaari niishiriojiya: “¿Taa macunucua samiitianijiosaanutaniuhuaaarani? ¿Taamuecate na cuaqueya quiniutianiya?” <sup>36</sup> Maninia nia niishiriojore pueyanaa. Maja niishiyashijia nia quiniu. ¿Majateeri nia jamosano naana jajau co moquenu, neyona moritianura? Naacuaaquiniatejaj. Saa na co moquesacarijia na naata moritianu. <sup>37</sup> Naajuhuaaj, niaa jaara saaco natare, tamaatia jajaujuhuaaj, nia natasanooi saaja shiitianiyojua jajau quiya. Na moritiasacari, jiyanoohua tamaatia niquishiyari. <sup>38</sup> Pueyasoori na maashitiya puetunu na jaamasucuatajanaa, taa na paniyacuajani. Pueyasoori puetunu jajaujanaan moritianijia tamaatia niquishano na quiniuria. Naa quiniutianiyajaariuhua macunucua samiitiasacariuhua. Majaari pa cuaqueya quiniutianiya taa na quiya quiarijiacua-jani. ¡Pa cuaqueyari jiyanoohua maninia quiniutianiuhua!

<sup>39</sup> Majaari puetunu cuaqueyaraca casaajanaa mariyata na quiniu. Naacuajitij, pueyano cuaqueyari tamaatia quiya casaa cuaqueyajiniiji. Shuhua cuaqueyari tamaatia quiyajuhuaaj. Sapitiaaja cuaqueyari tamaatia quiyajuhuaaj, moojinia na quiniuria. <sup>40</sup> Jiyocuacaanu quiijacaari tamaatia cuaqueyaraca, maja juhua mijiria quiniaa cuaqueya. Pueyaso seya cuaqueyari shanohua niquishano. Nojori cuaqueyari tamaatia niquishano mijiria quiniaa cuaqueyajiniiji. <sup>41</sup> Naajuhuaaj, pananuuri jiyanoohua shacantuuca quiijia. Raca shacantuucaari tamaatia niquishano pananu shacantuucajiniiji. Riya shacantuucaari socua tamaatia niquishano. Naajuhuaaj, puetunu riyajanaari tamaatia niquishano narta riyajiniiji. Puetunu Pueyaso shipinishanojuanaari naa tamaatia quiya.

<sup>42</sup> Naajuhuaaj, Pueyaso muerasuuri samiitianishaanutaniya tamaatia cuaqueyata. Moquejacaari jamojosaanutaniya. Moqueyashijiacaaari saniniuujia samiitianishaanutaniuhua, pueyaracaanu na quiniuria. <sup>43</sup> Jamosano pa quete sequeeri samiitianishaanutaniuhua, jiyanoohua shanohua niquishano na quiniuria. Cumaacaaju jamosanoori samiitianishaanutaniuhua jiyanoohua cumaacaraca na quiniuria. <sup>44</sup> Pa cuaqueya jamosanoori saaja jiyacua rucuanajaca quiquiaari. Paari samiitianishaanutaniuhuaani tamaatia cuaqueyata, jiyocuacaanu quiijaca pa quiniuria. Naaratej, Pueyaso jaara maninia cuaqueya shipiniquiaari pajaniyara, mijiria pa rucuanajonura, ¿majateeri Pueyaso niishiniu tamaatia cuaqueya shipininiu na muerasura, na shuriucua pa quiniuria? Taaquiriiriniij.

<sup>45</sup> Pueyasoori coteenu pa supuetana shipiniquiaari marajiniiji. Na nuhuaji, na samiitianiquiaariiri. Moisés Naajioneejiniaari naa naajiotasaaquiaaritij: “Adánri saminiora quiquiaari Pueyaso nooshacari na jiquioco”. Jesucristoori saniniuujia jiyatesaaquiaari juhua pa supuetanara na quiniuria pa supuetana Adán niti. ¡Jesucristoori jiyanoohua socua cutara Adánjiniiji! Adánri samiitianishaquiaari saminio na quiniuria. Jesucristo cutaraari



pa samiitianijajanaa na Sohuanuta. <sup>46</sup> Coteenujuanaa pa supuetanani, majaari na shipinishaanu quiquiaari jiyocuacaanu quijiarano. Cunora, coteenu pa cuaqueyari saaja mijiria quijiara. Na nuhuaji, pa cuaqueyari jiyocuacaanu quijiara jatanishaanutaniya mariyata juhua Jesucristo cuaqueyara. <sup>47</sup> Adánri saaja mijiria quiriquiano quiquiaari. Marajiniji shipinishaaquiariiri. Jesucristoori saniniuujia jiyocuacaanujinio. <sup>48</sup> Puetunu Adáncuajinio supuenojuanaari saaja mijiria quijiaca. Naaratej, puetunu pajaniyajanaari saaja cusonuujacani, juhua pa supuetana Adánjuhuj. Jesucristo muerasuuri saniniuujia juhua pa Jiyaniijia Jesucristo quiniutianiya, jiyocuacaanu quijiaca pa quiniuria. <sup>49</sup> Mijiria pa quishacari, pa cuaqueyari juhua pa supuetana Adán cuaqueya quiya, marajiniji shipinishano. Majaari pa cuaqueya quiaritia socua maninia Adán cuaqueyajiniji. Pa samiitiasacariuhua, pa cuaqueya cutaraari quiniutianiya mariyata juhua cuno jiyocuacaanu Quijia cuaqueya. Nojuacuajaari pa samiitianinia Jesucristo.

<sup>50</sup> Cuarta Pueyaso muerasunaa, maja pa naata Pueyaso rupueno nio pa cuaqueyataja. Pa rishiyashijia cuaqueyari maja na naata cuno pueyaraacaanu Quijia rupueno. <sup>51</sup> Naajaa, cua tojitiare. Nia pohuatareera pueya niishishoo. Majaari puetunu pajaniyajanaa cusonuuriquianoni. Puetunu pa cuaqueyajanaa cutaraari jatanishaanutaniyani, maninia cuaqueya pa jitianura, juhua Jesucristo cuaqueyajuhuj. <sup>52</sup> Jiyocuacaanuji trompeta jonesacari, pa cuaqueyari ritia jatanishaanutaniya, naatej, taa pa nimishiniuquiya ritiacaani. Pa Jiyaniijia naacuneetoonu panishacari pajaniyata, Pueyaso trompetaari tojishaanutaniya joneseshiyano, na muerasu na jiiquioonura. Canapuate macu quiyani, quiarinio cuaqueyata ritia samiitianutaniuhuari. Pajaniyajuhuj, canapuate saminio quiyajaani, pa cuaqueyari ritia jatanishaanutaniyajuhuj, quiarinio cuaqueya pa jitianurajuhuj, shaajeyashijiaca pa quiniuria. <sup>53</sup> Cusonuujuua cuaqueya cuara jatanishaaria, rishijia cuaqueya pa jitianura saniniuujia. Nio moqueja pa cuaqueyani, jataniniu panishiyari, maninia cuaqueya pa jitianura, pueyaracaanu pa quiniuria Pueyasota.

<sup>54</sup> Moqueja pa cuaqueya jaara maninia cuaqueyara jatanishaarohua; pa rishiyashijia cuaqueya jaara rishijia cuaqueyara jatanishaarohua; jiyacaritij pocua niishirini tariucuacaanu sequesanoori tari tohuateeree. Naa naajio-tasaaquiari tariucuacaanu Pueyaso Rupaaajinatej:

“¡Jeje! ¡Pa Jiyaniijiaari na muerasu mashiquirii macunucua quiquiojiniji!

<sup>55</sup> Cusojuananaa, ¡quiaaqui tari shocotasaaree! ¡Quiaari shocotasaaree! Sesaacanaa, quia cusojuatajaari juhua mohuacara quiqiii cumaacaju. ¡Shaajeconoori samiitiacoree!”

<sup>56</sup> Pueyanaa, puetunu pajaniyajanaari cusonuquiaa sesa miijiaca pa quiniucua mijiriani. Paari sesa quiquiaani pa tojiyaquishacari tariucuaacaanu Moisés Rootasano Pueyasojiniji. Naaratej, puetunu pueyajanaari cusonu niishiya. <sup>57</sup> Naajaa, pa Jiyaniijia Jesucristo miishanota pocuara, Pueyasoori pa mashiquiquiaa pa cusoyaquiniuucujia. Naaratej, paari Pueyaso sequequiaani: “¡Paacarasho canaa Pueyasonaa! Quiaacuajaari canaa shocotaniniutianiya cusonu, quia Nyanu cusonuucua canacuara, pueyaracaanu canaa quiniuria quia shuriucua. ¡Jiyanoohua paacarasho!” Paari naa maninuhuaqueetaa pa Que Pueyasoni.

<sup>58</sup> Naaratej cua panishano pueyanaa, nia numaama nia racatare cua niishitiojosano niajaniya. Saa Pueyaso rupaaaja nia tojitiare, maja tamaatia niishitiojosano. Pa Jiyaniijia nia poonijiore socua jiyanoohua, na panishano

nia miiniuria saaja. Pa Jiyaniijiara pa poonijiosanoori maja najuhuana na quiniu.

## 16

### *Casamiijiuniucua Pueyaso pueyara cumaneeca reratesacari*

<sup>1</sup> Quiarijiani, nia riucuaereera taa nia miiniutianiyani, cumaneeca nia reratenura casamiijiuniucua. Cuno cumaneecani, paari na jiyaronutaniya parta Pueyaso muerasura Jerusalén tiacajiniani. Niaa cuara maninia miiria, mariyata taa cua rootacanucuaaja Pueyaso pueya maapue Galacia jiyajiniani. <sup>2</sup> Naa nia miiritij. Puetunu domingo juucajanaa, puetunu pueyajanaa cuara racataara tama na niqutiosocoriquiano cumaneeca, teyano nia niqutionutaniya niarta Pueyaso muerasuracuajani. Naa nia racatare juhuataja nia niqutiosocoriquiano cumaneeca puetunu semaanajanaa, maja na reratesaanura shusha cua tiuquishacari niaacua. <sup>3</sup> Niocua maninia pueya saquiriojore, nia niqutiojosano cumaneeca nojori patanura Jerusalén tiacajinia. Naacujitij, cua tiuquishacari niaacua, janiyari cua naajioneeca jiyarotanutaniya nojorini. Naajioreera parta Jesuucua tiuuniaa pueyacuara Jerusalén tiacajinia, nojori cuara shuquiriaatia maseera cumaneecata nia jiyarotasano pueya. <sup>4</sup> Janiya jaara Jerusalén tiacajinia quianu panirini, cumaneeca jiyatanaari na naata cuata quianujuhuj.

### *Pablo naquerejosacari*

<sup>5</sup> Cua quiasacari niaacua, janiyari Macedonia jiya tajiniu paniyani. Na nuhuaji, janiyari niaacua tiuquiniutianiyani. <sup>6-7</sup> Janiyari maja ritia cua tajiniu paniniu niajaniya. Niaata camueenujunu paniya pueyaracaanunijia, pa Jiyaniijia jaara naa paniyajuhuj. Janiyari shuniya shocotenu paniya niaatani. Na nuhuaji, nia naata cua naacunu cua jiitianura cua panishano, cua pasocoriquiano tee Pueyaso jiyaronu paniya janiyacujani. <sup>8-9</sup> Janiyari niya Éfeso tiacajinia camueenujiyajaarani, Pentecostés juuca cua sashishacari. Queraatia pueyari Jesucristo rupaa tojitianu paniya niya. Naajuhuj, queraatia pueyari Jesucristo rupaa ruuretaa saniniuujia. Naaratej, janiyari jiyanohua socua Jesucristo rupaa pohuatanu paniyajaa Éfeso pueya niquiarani. Naajaa, janiyari niaacua quianutaniyani Pentecostés juucara queranacunuunu nuhuaji.

<sup>10</sup> Timoteo jaara niaacua tiuquishii, niocua na cumaquiri Pueyaso rupaa na pohuatanura na puereyaquiniutia. Timoteocuajaari pa Jiyaniijiara poonijioquiaa mariyata taa cua poonijioquiaacuaani. <sup>11</sup> Naaratej, maja Timoteo nia rerequetenu. Niocua na naacure saniniuujia, cucua na tiuquiniuhuara shuquiriaatia, maninia nia miiniuucua nera. Janiyari niya na sashiya parta Pueyaso muerasutani. <sup>12</sup> Janiyari Apolota pocoojoriquiaani. Janiyacuajaari na nenecojoriquiaa juucuaani, niaacua na quianura parta Pueyaso muerasuta quiarijiani. Nojuajaari saaja cua sequeree majana na quianu paniniu quiarijiani. Tamacari niaacua quianutaniyaquiniaari, jaara na naata quiri.

### *Pablo sequesano, naajionu na puecasacari*

<sup>13</sup> Cuarta Jesuucua tiuuniaanaa, niishiriojuuca nia quiri. Jesucristo rupaa nia niishiri maninia, seetanujuanaa na tojitianaara nia quiniuria. Juhua cumueeca mashaja nia quiri Pueyaso Sohanu cumaacata, pa Jiyaniijia panishano nia miiniuria. <sup>14</sup> Puetunu nia miishanojuanaa cuara quiiria seetanujuanaa nia paniniutia.

<sup>15</sup> Pueyanaa, niaari niishiya Estéfanasri necohuata coteenu Jesucristo tojitiánaara quiquiaari cuniqui Acaya jiyajiniani. Nojoriiri Pueyaso muerasu naacuquiaa pueyaracaanu nojori paniniutia. <sup>16</sup> Naarate nia sequenu paniyanijia, niajaniya cuaara quiiria juhua nojori seya, nia cumaquiniuria nojori, maninia nojori miishacari. Naa nia cumaquiriti puetunu jiyano pueyajanaa, noo pojori canapuate naa maninia miiquiaa Pueyaso muerasu-cuajani.

<sup>17</sup> Jiyanohua shuquiririucuaanijia Estéfanas tiuquishacari niajanijianijia Fortunatota, Acaicotajuhua. Nojoriiri cua shuquiriritiucuaa nia niti, cua jiaatiasacari cua niquiniuria niajaniya juucua. <sup>18</sup> Nojoriiri coojia cajitiriucuaa puera cua niishiriojiyaquiniucuaaji niaacua. Nojori naasucuaari nioojia cajitiquianujuhua, nojori pohuatasacari niajaniya janiyajiniji. Niajaniya cuaara shuquiritiaara nojori, naa nojori miishacari maninatej.

<sup>19</sup> Pueyaso muerasu maapue niya Asia jiyajiniaari cua sequerucuaa, cua saruhuatanura niajaniya. Aquila, Priscilano, nojoriiri jiyanohua nia saruhuataajuhua, narta Jiyaniijia muerasu nia quiniucuaajuhua. Pueyaso pueya maanuuri nia saruhuataajuhua, nooj, teyanote Aquila tiajinia rerejoquiaacuajani. <sup>20</sup> Puetunu parta Pueyaso muerasujanaari niya nia saruhuataajuhua. Nia sarhuatatoosacari, nia sarhuatatoore seetanujanaa Pueyaso paniniutia.

<sup>21</sup> Quiarijiani, tama cua juaashiquiatajaaja saaja nioniyojua naajioreeraj, cua saruhuatanura niajaniya. Naacuajitij, niocua niishiri nio naajioneeri seetanujanaa janiyajiniji.

<sup>22</sup> Cante maja pa Jiyaniijia panijia quiyani, Pueyaso cuaara jataara cuno, saniitiosocoriquiano.

¡Jiyaniijianaa, quia nimiohua!

<sup>23</sup> Pa Jiyaniijia Jesu cuaara cumaquiiria niajaniya na Sohuanuta. <sup>24</sup> Janiyari puetunu niajanijanaa paniyani Jesucristo paniniutia. Tariucuaa, cua panishano pueyanaa.

## TANEE PABLO NAAJIONEE CORINTO TIACAJINIA QUINIAA PUEYASO PUEYACUARA

### *Pablo saruhuatasacari Pueyaso pueya maanu Corinto tiacajinia*

<sup>1</sup> Janiyari Pabloni. Pueyaso panishacari, janiyari Jesucristo jiyaramiquishanora jiyatesaaquiaari na rupaa cua poojotanurani. Janiyari Timoteota naajiya nio niaacuarani. Nojuajaari parta Pueyaso pueyano. Canaari Corinto tiacajinia quiniaa Pueyaso pueya maanuucuaara naajiyani, puetunu Acaya jiyajinia Pueyaso tojitiajaca pueyacuara janaanio. <sup>2</sup> Pa Que Pueyaso, mariyata pa Jiyaniijia Jesucristo cuaara cumaquiiria niajaniya. Nojori cuaara jiyateera niajaniya juhuajaniya quijiaca nia quiniuria.

### *Pablo miishacari naquiya*

<sup>3</sup> Pa Jiyaniijia Jesucristo Que pa shuquiritiare. Nojuajaari pa Quejuhuaj, pocua taraajeja cutara. Nojuajaari pa Pueyaso, pueyaracaanu pa cumanijiana. <sup>4</sup> Nojuajaari pueyaracaanu pa cumanijiaquiaa naquiya pa miishacari. Naacuajiti pa naata cumanijianu tamasacajuhuaaj, naquiya nojori miishacari, taa Pueyaso cumanijiaquiaa pajaniyacuaani. <sup>5</sup> Seetanujuanaa, Cristo rupuejaca pa quishacari, paari naquiya miishaaquiaajuhuaaj, taa naquiya na miishaaquiaaricuaani. Naajaa, nojuajaari pa cumanijiaquiaa shuquiriaatia pa quiniuria. <sup>6</sup> Naacuajitij, canaa jaara naquiya miishaaquiaa Cristojiniji canaa pohuatanuucuaani, Pueyasoori canaa cumaquiiaa saaja canaa rejeretanura. Naacuajitij, majaari canaa tarinitianu Pueyaso Rupaa pohuatanu nia niqiara, seetanujuanaa Pueyaso pueya nia quiniuria, nia cumanijiasaanurajuhuaaj. Naajuhuaaj, Pueyaso jaara canaa cumanijiarecuaa, naacuajitij, canaa naata nia cumanijianujuhuaaj. Canaari nia cumanijiaani, maninia rejeretajaca nia quiniuria naquiya nia miishacari, taa canaa rejere-taquiaacuaani naquiya canaa miishacari. <sup>7</sup> Canaari seetanujuanaa niaacua tiuyani, niaari cumanijiasaanutaniya, maninia rejeretajaca nia quiniuria. Niaari naquiya miiquiaa Pueyaso muerasu nia quiniucuaajuhuaaj, taa canaa miiquiaa naquiycuaani. Naacuajitij, Pueyasoori nia cumanijianutaniya-juhuaaj, taa na cumanijiaquiaa canaacuaani.

<sup>8</sup> Canaa panishano Pueyaso pueyanaa, canaari paniyani nia niishini-uria taa canaa tacaquianuni, jiyano hua naquiya canaa miishacari Asia jiyajinia. Canaari puera jiyano hua taraatia miiquianuni. Jiyacari, majaari tari canaa jiiitianu quiriquiaa cumaaca canaa rejeretanura socua. Canaari jiyaniriquiaani maja naasucua tari canaa rishiniu quiniutianiya. <sup>9</sup> Seetanujuanaa, canaari jiyaniijiani Pueyaso naasucuaari nareja canaa shanacunutaniya canaa cusonuunura. Naajaa, naacuajitij, Pueyasoori jiyacari canaa niishitiriquiaa maja canaa tiuuniuria tama canaacuaajaaja, saaja nocua canaa tiuuniuria cutara. Nojuacuajaari macunucua samiitianijiojua. <sup>10</sup> Nojuajaari canaacua taraajecanu. Cocuaatia canaa miishacari, canaa cojuacanuuri maja canaa cusonuunura. Nojuacuajaari socua canaa cojuanutaniya nocua canaa tiuuniucua, niaa jaara canaacuara secorejuhuaaj. <sup>11</sup> Naacuajitij, Pueyaso miishacari maninia canaa, queraatia pueya sec-ohonucua canaacuarajuhuaaj, queraatia pueyari Pueyaso sequenutaniya, “paacarasho”.

### *Pablo pohuatasano casaara na quiaaquiiaari Corinto pueyacuani*

<sup>12</sup> Canaari shuquiriaatia quiyani canaa niishishacari canaari maninia quijiaca quiquiaari canaa quishacari niaatani, Pueyaso niishiyashiaca niquiaranio. Majaari canaa sapojonu quijia nijaniya. Canaari seetanujuanaa niaacua taraajejani Pueyaso jiyatenuucua canaa nia panijiaca canaa quiniuria. Canaari naa maninia quiquiaari niaatani, saaja Pueyaso cumaquishacari canaa, maja tama canaa niishitiajataaja. <sup>13</sup> Cunora, janiyari nia nequesotaani, ¿casaara nia cushitiiquianu canaa naajionee nia serojosacarini? Puetunu canaa naajioneecajiniyajanaa majaari canaa naajionu quiquiaa jiyajeneta casaa, nia cushitiniuria. Puetunujuanaacuajaari maatia niishishaatia quiquiaa nia serojosocoriquiano. <sup>14</sup> Niaacuajaari tari secaja niishiya taa canaa paniya jiyanoehua nijaniyani. Pa Jiyaniijia Jesucristo tiuquishacariuhua, niaari jiyacari seetanujuanaa canaa timitianutaniya, maatia nia niishishacari canaari seetanujuanaa nia panijiaca quiquiaarini. Naajuhuaaj, nijaniyari canaa timitiasano quiniutianiyajuhuaaj.

<sup>15-16</sup> Cua jiyaniishacari niaa naasucuaari seetanujuanaa cua panijiaca, taa cua paniquiaa nijaniyacuaani, janiyari cunora naquerejocanu niaacua juucuani. Niiquiji cua quiasacari Macedonia jiyajiniara, janiyari nia niqiniu paniriquiaa juucua nia tiacajiniani. Janiyari Pueyaso rupaata nia cumaquiniu paniriquiaa juucua cunoco cua tajishacarini. Naacuajitij, janiyari niishiriojoriqiaani cua naata naasucua nia shuqiritiniu Pueyaso rupaata, cua quiasacari Macedonia jiyajiniara, naajuhuaaj, cua tacatesacariuhua cunocojiuhua. Janiyari niishiriojoriqiaani nia naata naasucua cua naacunu cua panishanotajuhuaaj, Judea jiyajinia cua quianuhuaa. <sup>17</sup> ¿Niaateeri jiyaniquianu janiyari nareya nia sequecanuni, naa cua sequesacari coteenujuanaa cua naajiojiniatej? ¿Niaateeri jiyaniya, naa cua naquerejosacaritij, janiyari tama cua panishanojuaaja miiniu paniquianuni, maja Pueyaso panishano? Seetanujuanaa, majaari coojia cua niqijiotenu quiquianu naa cua sequesacari nijaniyatej. <sup>18</sup> ¿Janiyateeri coojia niqijiotejani? Maja. Canaa pohuatasacari Pueyaso rupaa nia niquiara, ¿canaateeri na jataniquiaani? Pueyasocuaajaari niishiya, na rupaa canaa pohuatasacari, majaari canaa jataniniu quiquiaa. Pueyaso rupaacuajaari seetanujuanaa. <sup>19</sup> Naajuhuaaj, Neyanu Jesucristoori jataashijia. Silvano, Timoteo, janiyajuhuaaj, canaari nojuajiniji nia niquiara pohuatanaani. Paari nojuajiniji niishiyani puetunu Pueyaso sequesanojuanaari seetanu rupajanaa cutara. <sup>20</sup> Jesucristocuajaari tari tohuateequiaari puetunu tariucuaaanu Pueyaso sequesanojuanaa pajaniyara. Naacuajitij, pa tiushacari Jesucristoocua, paari niishiyani, Pueyaso sequesanoori seetanujuanaa. Naaratej, pa shuqiritiasacari Pueyaso, paari na sequequiaani: “Seetanujuanaari canaa quia sequesano, Pueyasonaa”. <sup>21</sup> Jesucristo rupuejaca pa quishacari, Pueyasocuaajaari pa cumaquiquiaa, socua maninia na tojijiaca canaa quiniuria, nijaniyajuhuaaj. Pueyasoori pa niqutioquiaari na Sohuanu, seetanujuanaa na muerasu pa quiniuria. <sup>22</sup> Pueyaso Sohuanu pa jiiitasacari poojiajinia, naacuajitij, paari tari Pueyaso sesa jiiitiaa juhua naajiotasano poojiajiniani, saa neraja pa quiniuria. Na Sohuanu pa jiiitasacari poojiajinia, paari niishiyani, paari puetunu na sequesanojuanaa maseriquianoni.

<sup>23</sup> Niaari cua jiyaniquianu janiyari najuhuaana coojia niqijiotejani, niaacua cua quiaaquiniuucua taa cua sequecanu coteenu nijaniyacuaajani. Pueyasocuaajaari niishiya, majaari cua quianu quiquianu niaacua Corinto tiacajinia, maja cua tacaatiniuria nijaniya, janiya jaara nia nacasusee jiyanohuani. <sup>24</sup> Canaari maja nia jiyaniijiani canaa shiniuujuniuria puera

niajaniya, Jesuucua nia tiuuniuria. Niaacuajaari tari maninia Jesuucua tiuujiaa. Canaari saaja niarta Pueyaso pueyani, canaa cumaquiniuria niajaniya, socua pa Jiyaniijia tojijiaa nia quiniuria, seetanujuanaa shuquiriaatia quijiaa nia quiniuria.

## 2

<sup>1</sup> Janiyari tama sequecanujuaanijia, maja juhuari niaacua cua quianu quiniutianiya, maja cua taraajetenura niajaniya. <sup>2</sup> Janiya jaara nia taraajetere cua nacasusacari niajaniyani, ¿cantucua cua timitiri quenaajani? ¿Cua taraajetesano pueyateeri cua shuquiritiniutianiya? Maja. <sup>3</sup> Naaratej, janiyari niaacuara naajiocanuni, cua nacasunura juhuacarijia niajaniya, cua taraajeyaquiniuria niaacua cua tiuquishacari. Janiya jaara sashiri cua nacasunura niajaniya cua tiuquishacari niaacuani, janiya maara jiyanojua nia taraajetereni, jeecatoojua nia quishacari. Saniniuujia, niaa jaara juhuacarijia jeecare puetunu sesa nia miishanojuanaa, naacuajitij, cua tiuquishacari niaacua, niaari cua cojiniutianiya maninia, shuquiriaatia pa quiniuria jatiqiu. <sup>4</sup> Janiya jaara niaacuara naajiocanu coteenu cua naajioneeni, janiyari jiyacari jiyanojua tacaariquiaa niaacuani. Coojiaari jiyanojua taraajeriquiaa. Janiyari jiyacari nujuqueriquiaaaniuhuj. Majaari cua naajionu quiquianu cuno naajionee cua taraajonura niajaniya. Cunoori seetanujuanaa quiquianu cutara cua niishitiniuria niajaniya, taa cua paniya jiyanojua niajaniyani.

*Cuno sesa miijia cuaara jiyanooshaaria jaara tari pishirii sesa na miiniujiniji*

<sup>5</sup> Cuno sesa miijiaari maja na taraajetenu quiquianu saa janiyaja. Quera puetunu niajaniyajanaa naasucuaari taraajecanu cuno pueyano miiniucua sesa. Seetanujuanaa, majaari puetunu niajaniyajanaa taraajenu quiquianu. Janiya jaara sequereni: “Puetunu niajaniyajanaari taraajecanu”, janiya maara puera na maateyani. <sup>6</sup> Puetunu niajaniyajanaa jiyatenuucua nojuaja saniitiosano na quiniuria, nojuajaari tari noojia tacaatorohua sesa na miiniujiniji. Tariucujaja. Majaari socua na saniitionu. <sup>7</sup> Quiarijiani nojuaja nia jiyanoorihua. Nia cumanijiarohua, nojuaja mariqui puera tacaariiri jiyanojua na taraajesacari. <sup>8</sup> Nocuaji janiyari jiyanojua nia rootaani, maninia nia miiriohua cuno pueyano, na niishiniuria niaaqui na paniyajaa. <sup>9</sup> Janiyacuajaari cunora niaacuara naajiocanu tarini, taa nia miiniutianiya cuno pueyanoni, cua niishiniuria niaate seetanujuanaa pa Jiyaniijiajiniji cua rootasano tojitiajaca. <sup>10</sup> Cua tojitiare, cana nia jiyanooriicuaani, janiyari na jiyanojua. Naacuajitij, pueyano jaara sesa miiriquia, janiyari Cristo niquiara na jiyanooquiaajuhuj, jatiqiu nia quiniuhua. <sup>11</sup> Naaratej, niarta Pueyaso pueya nia jiyanooriquia, Sesaaca mariqui pocua riutiocoreeri, juaajiaara na jiyatenura pajaniya, pa jiyanootiyoaquinuucua. Paacuajaari maninia niishiyani taa Sesaaca niishiriojoquiaa sesa miijiacara na jiyatenura pajaniyani, paa jaara jiyanojua ashijia quiriqiuani.

*Pablo tacaashacari Troas tiacajinia na quishacari*

<sup>12</sup> Janiya jaara Troas tiacajinia tiuquiquianu Jesujiniji cua pohuatanurani, cuno pueyari jiyanojua tojitianu paniriquiaa Jesujiniji cua pohuatanura juucua. Jiyacaritij, seetanujuanaa nojori niquiara pohuatasatia quiriqiuari. Pa Jiyaniijia Jesuuri juhua tiotiu riatacanu cucuaji juucua, cua pohuatanura nojuajiniji tii. <sup>13</sup> Janiyari saaja nojori tiujiacanuhuani puera cua tacaashacari, cua riuriataquinuucua pa tarajanu Tito. Janiyari



juucua paniriquiaani cua pohuatasaanura niajanijajiniji. Janiyari cunora tacaariquiaa jiyanoahuani. Naaratej, janiyari Macedonia jiyajinia quiaarohuani, Tito cua pajenuhuara tii.

### *Pa Jiyaniijia Cristoori pa paraa pa shocotanjia*

<sup>14</sup> Janiyari jiyanohua shuquiritiaa Pueyasoni. Nojuajaari pueyaraanu pa shocotaniquiaa pa paraca seque, pueyaracaanu pa sacuanuucua pa Jiyaniijia Cristoocua. Pueyasoori na rupaa pohuataniquiaa canaa. Naacuajitij, canaa niishishano Jesucristojiniiri juhua shanohua jaanuta-taja jaanujuquiaa pueya tajinia puetunu tiqiyocuajanaa. <sup>15</sup> Pueyasora, canaari juhua shanohua jaanutajani, Cristo quishacari canaa jiuujia-jinia. Nojuajiniji canaa pohuatanuusacari, canaari puetunu pueyarajanaa jaanuquiaani: Pueyaso muerasurano, saniitiosaariquiano pueyaranio. <sup>16</sup> Saniitiosaariquiano pueyara, Jesucristo rupaari mocuaatia jaanujua saniniuujia. Naa nojori soonuucua Jesucristo rupaatej, nojoriiri shaa-jasaariquiano cutara. Pueyaso jiyanooshocoriquiano pueyara saniniuujia, Jesucristo rupaari shanohua jaanuquiaa. Naa nojori paniniuucua Jesucristo rupaatej, nojori cutaraari pueyaracaanu quijiacara jiyatesaanutaniya. ¿Canapueteeeri seetanujuanaa Pueyaso jiyaramiquishanoni, na rupaa nojori pohuatanura, pueya na tiutuniuria Jesucristoocuanii? <sup>17</sup> ¿Noo pojoritii, najuhua Pueyaso rupaa pohuatanuquiaa, pueyajiniji na masejonura cumaneeca na sapojonuunutatej? Maja. Majaari canaa pohuatanu quiquiaa Pueyaso rupaani, pueyajiniji canaa masejonura cumaneeca. Canaa cutaraari seetanujuanaa Pueyaso jiyaramiquishano pueyani, na rupaa canaa pohuatanura. Canaari seetanujuanaa pa Jiyaniijia rupaa pohuataquiaa Pueyaso niqiarani, Cristo rupuesano canaa quishacari.

## 3

### *Quiarinio rupaa Jesucristojiniji*

<sup>1</sup> Naa canaa naajiosacari niaacuaratej, niaa naasucuaari jiyaniya canaari tama canaa cuaqueyajinijiaaja nia pohuatohuaniuhuaaj, canaacua nia tiuuniuria. ¿Niaateeri pa niishishano pueyanojiniji naajionee paniya, canaajiniji na pohuatanura coteenu niajaninya, canaacua nia tiuuniuria cutara? Tamasaca cutaraari naa miiquiaa. Niaacuajaari canaa niishijaca cutara. Puetunu tiqiyocuajanaa quijiaca pueyari canaajiniji niishiyacuaja, canaari seetanujuanaa Pueyaso jiyaramiquishano pueyani, na rupaa canaa pohuatanura. Naacuajitij, majaari quenaaja canaa paniniu, canaa nia niqutionura nia naajionee, canaa patasocoriquiano, tamasa tiuuniuria canaacua. <sup>2</sup> ¿Naajioneetucua casaara panishaareni? Puetunu pueyajanaari na naata niishiniucuaaja canaari seetanujuanaa Pueyaso jiyaramiquishano pueyani, nojori niishishacari taa canaa paniya jiyanohua niajaninyani. <sup>3</sup> Cristocuaajaari nioojiajinia naajiotaquiaari na rupaa, nojuajiniji canaa pohuatanuucua nia niqiarara. Majaari na rupaa na naajiotanu quiquiaari nioojiajinia minianata. Seetanujuanaa na Sohuanuta na naajiotaquiaariiri. Majaari na naajiotanu quiquiaari saajianeecua. Seetanujuanaa nioojiajiniajaanaa naajiotaquiaari na rupaari. Naa jatanishano pueya nia quishacaritij, puetunu pueyajanaari niishiya niaari seetanujuanaa Pueyaso pueya, nojuajiniji canaa pohuatanuucua niajaninya.

<sup>4</sup> Naacuajitij, canaari seetanujuanaa niishiyani canaari Pueyaso jiyaramiquishanoni. Cristocuaajaari naa canaa niishitiquiaa maninia. <sup>5</sup> Majaari canaa niishiriojonu canaa miijosanoori tama canaa cumaacata canaa miishanojuaja. Maja. Canaari saaja Pueyaso cumaacata

poonijioquiaani. <sup>6</sup> Na cumaacata, nojuajaari canaa jataniquiaari quiarinio na rupaa pohuatanaa canaa quiniuria. Quiarinio na rupaari seetanujuanaa Pueyaso Sohuanu cumaacaraca cutara, pueya na jataniniuria seetanujuanaa Pueyaso niquiohua nojori quiniuria. Tariucuacaanu, Pueyaso rupaari naajiotasano quiquiaari pueya tojishocoriquiano juucua. Cuno rootasanojiniji, pueyari niishiquiaari nojoriiri shaajeriquiano na numaa shama nojori tojiniuucua saaja. <sup>7</sup> Naajaa, cuno rootasano saajianeecaacua quejasanoni, cunoori jiyanoehua maninia quiquiaari. Naacuajitij, Moisés jaara cuno rootasano niishitiojosaariquiaa Sinaí tuhuananuucua, Pueyaso shacantuucaari nocua pacuriquiaa. Naacuajitij, na rosesacariuhua Israel pueyacia, na jiquiocoori puera shacantuuca quiquiaarijia. Naaratej, narta Israel pueyari maja na naata na jiquioco niquiniu quiquiaari. Na nuhuaji, cuno shacantuucaari jacaria maquesaquiaariuhua. <sup>8</sup> Quiarijiani, Pueyaso Sohuanuuri poonijioquiaa pueya jiuujiajinia saniniuujia, nojori tiuuniuucua canaa pohuatasanoocua. Cunoori socua shanohua shacantuuca cutara Moisés jiquiocojiniji. <sup>9</sup> Moisés pohuatasano Pueyaso rootasano nojuajani, cunoori seetanujuanaa jiyanoehua maninia quiquiaari. Naaratej, Moisés jiquiocoori shacantuuca quiquiaari. Naajaa, na pohuatasanojiniji, Israel pueyari saaja niishiquiaari, Pueyasora, nojoriiri sesa miijiaca quiquiaari. Saniniuujia, quiarijiaari socua jiyanoehua maninia. Canaa pohuatanuucua quiarinio Pueyaso rupaa Jesucristojiniji, pueyari nocua tiuquiaa seetanujuanaa sesa miyashijiacara nojori jiyatesaanura Pueyasora. <sup>10</sup> Pueyaso jiyatenuucua Moisés tariucuacaanu na rupaa pohuatana na quiniuria, Moisésri shacantuucara jataquiaari. Quiari naataja saniniuujia, Pueyasoori canaa niishitiquiaari socua jiyanoehua maninia rupaa canaa pohuatanura Moisés pohuatasanojiniji. <sup>11</sup> Moisés shacantuuca maquesaquiaariuhuani, cunoori maja na jataniniu quiquiaari Israel pueya. Quiarijia saniniuujia, Pueyaso Sohuanu cutaraari pa jataniquiaa seetanujuanaa pueyaracaanu shacantuuca quiijaca pa quiniuria.

<sup>12</sup> Quiarijiani, canaari niishiyani paari pueyaracaanu shacantuuca quiijacarano cutarani. Canaari cunora canaa timiniutia pohuataquiaa Pueyaso rupaa canaa puereyaquiniutiani. <sup>13</sup> Majaari canaa miiniu taa Moisés mi-iquiaaricuaani. Nojuajaari quenaaruque toqueta na jiquioco mishiquioquiaari narta Israel pueya niquiyaquiniuria na shacantuuca maquesaano. <sup>14</sup> Israel pueya jiuujiacaari juhua toqueta mishiquiosano quiquiaarijuhuaj. Cumajiuujiaaca nojori quiniuucua, majaari Israel pueya niishiniu quiijia Moisés caminiujiushano nojoriria. Cuarta Israel pueyari naa quiyajaa. Majaari nojori niishiniu quiquiaa nojori serojosacari tariucuacaanu Pueyaso sequesano nojoriria. Cuno, juhua toque nojori jiuujia mishiquioyajaani, cunoori juhuanujuaja tii quiyajaa. Saaja Jesucristo cutaraari na naata pueya jiuujia riatanu, pueya niishiniuria maninia na rupaa cutara. <sup>15</sup> Quiarijiaari naajuhuj. Moisés naajioneeca jaara serojosaariquia Israel pueya niquiara, nojori niishitiajaari juhua toqueta mishiquiosano quiyajaa, maja nojori niishiniuria nojori tojishano. <sup>16</sup> Quiarijiani, pueyano jaara pa Jiyaniijiaacua tiuuri, cuno toqueeri juhua na niishitiajajiniji jaariutiasaaquiaa, maninia na niishiniuria Pueyaso Rupaa. <sup>17</sup> Pa Jiyaniijiaari Pueyaso Sohuanujuhuanajaj. Pa Jiyaniijia Sohuanu jaara poojiajinia quiya, paari Sesaacajiniji jaariutiasanoni, maja pa camarnu na quiniuria socua. Naajuhuj, majaari tari poojia quiniu juhua toqueta mishiquiosano. <sup>18</sup> Naacuajitij, puetunu pajaniyajanaari juhua niquituu nenecuaquiaani, pa Jiyaniijia shacantuuca

pacusacari pocua. Cunoori pa sohuanu rupuetoosacari nata. Naacuajitij, nojuajaari pueyaracaanu pa jataniquiaa jacaria, socua shacantuuca quijiaca pa quiniuria juhua nojuaja, na Sohuanu poonijosacari poojiajinia.

#### 4

<sup>1</sup> Naa pa Jiyaniijia poonijosacari canaa jiuujiajiniatej, majaari canaa pishiniu quiquiaa canaa poonijosacari nera. Pueyaso jiyanooniucua canaa, nojuajaari canaa jiyatequiaari na rupaa pohuatanaa canaa quiniuria. <sup>2</sup> Majaari canaa miiniu quiquiaa cararaatia casaa, taa tamasaca miiquiaacuaa jiyasohuani. Majaari canaa pohuatanu quiquiaa Pueyaso rupaa canaa cuaracashiniutia. Naajuhuj, canaa pohuatasacari, majaari canaa jataniniu quiquiaa Pueyaso rupaa. Canaari seetanujuanaa maatia pohuataquiaa Pueyaso Rupaani, puetunu pueyajanaa niishiniuria nojoriiri na naata canaacia tiuuniu. <sup>3</sup> Teyano pueyate canaa pohuatasano Jesucristojiniji niishiyaquiyaani, cuno pojoriiri shaajasaariquiano. Nojoriiri niishiyaquiya, juhua toqueta mishiquiosano nojori jiuujia quishacari. <sup>4</sup> Pueyaso rupaacia tiuyashijiaca nojori quishacari, nojori jiyaniijia Sesacaari nojori jiuujia jiyatequiaa juhua cariyojuarura, Pueyaso Rupaa mariqui nojori jiuujia cuhuatareeri. Nojori jaara Pueyaso rupaacia tiuuriquia, nojori maara niishiri, Cristoori seetanujuanaa shacantuuca quiija cutara, juhua na Que Pueyasojuhuj. <sup>5</sup> Canaa pohuatasacari Pueyaso rupaa niajaniya, majaari tama canaajiniijiaaja canaa pohuatanu quiquiaa nia timitianura canaa. Canaari saaja nia pohuataquiaa cutarani, Jesucristoori seetanujuanaa Jiyaniijiajanaa cutara. Canaari tama canaa cuaqueyajaaja jiyatequiaa juhua nia seya canaa quiniuriani, canaa panishacari pa Jiyaniijia Jesu. <sup>6</sup> Canaari naa maninia miijiacani, Pueyaso cuhuatanuucua canaa jiuujia. Jiya shipinishacari, nojuajaari sequequiaari: “Cuhuashiqui cuaara coretaara ninishiquiji”.

Quiariijaari naajuhuj, nojuajaari poojia cuhuataquiaajuhuj, pa niishiniuria nojuajaari tojetaarucujanaa maninia quiija. Paari cuno niishiyani, Jesucristojiniji pa niishishacari. Nojuajaari seetanujuanaa shacantuuca quiija cutara, Pueyaso Niyanu na quiniuucua.

*Paari maninia quijiaca quiniutianiyaani saaja Pueyaso rupaacia pa tiushacari*

<sup>7</sup> Cuno cumaaca canaa na jiiitiaani, cunoori Pueyaso cumaaca cutara. Saniniuujia, canaa cuaqueyari cumaacaaju, saaja juhua maraujiniji panishano pataco. Naacuajiti niishishiyari, cuno cumaaca pueya jataniyani, cunoori seetanujuanaa Pueyaso cumaaca, maja tama canaa cumacajaaja. <sup>8</sup> Naacuajitij, canaa paraa cosejosacari canaa, majaari canaa tarinitianu quiquiaa Pueyaso rupaa pohuatanu, cuno cumaaca canaa jiiitiasacari. Jiyanoohua canaa tacaashacari, naajaa, majaari canaa tarinitianu quiquiaa Pueyasora poonijionu. <sup>9</sup> Canaari naquiya miishaquiaajaaniuhuj. Naajaa, majaari Pueyaso cartenu quiquiaa canaa. Naajuhuj, canaari juhua quiaquesano jiyocuara jaqueroosaaquiaajaaniuhuj. Naajaa, majaari canaa cusojuasaanu quiquiaani. <sup>10</sup> Puetunu tiqiyocuajanaa canaa quishacari, canaari pueyaracaanu tama canaa cuaqueyajaaja panitiaquiaani, taa pa Jiyaniijia Jesu panitiaquiaari tama na cuaqueyajaaja pocuaracuaani. Naacuajitij, canaa na niquitiosano cumaaca poonijosacari canaa rishiyashijiaca cuaqueyajinia, pueyari niishiquiaa, Jesuuri seetanujuanaa saminio. <sup>11</sup> Mijiria canaa quishacarijia, pueyari pueyaracaanu canaa puecoonu paniquiaani, Jesujiniji canaa pohuatanuucua. Naacuajitij, saminio na jiiitiasacari canaa, Jesu cumaacaari niquishaaquiaa rishiyashijia

canaa cuaqueyajinia. <sup>12</sup> Canaari juhua piriuquiuniuquiaani, canaa pohu-  
atanuucua Pueyaso rupaa nia niquiara. Niaari pueyaracaanu rishijiacara  
quiriquiano saniniuujia, canaa pohuatasanoocua nia tiuuniuucua.

<sup>13</sup> Tariucuacaanu Pueyaso Rupaajinia, supuetana David naajiotasanoori  
naa sequeya:

“Pueyasooocua cua tiuuniuucua, janiyari pocuareeni”.

Canaari naajuhuj. Pueyasooocua canaa tiuuniuucua, canaari na rupaa  
pohuataquiaani. <sup>14</sup> Canaa jaara puecoosaariquia na rupaa canaa pohu-  
atanuucuaani, naajaa. Canacuajaari niishiyani, pa Jiyanijia Jesu Samiitian-  
iniacuajaari canaa samiitianijionutaniuhujuhuj, Neyanu Jesu rupuesano  
canaa quiniuucua. Pueyasoori canaa rijionutaniya puetunu niajaninyata-  
janaa, pueyaracaanu na shuriucua pa quiniuria. <sup>15</sup> Naacuajitij, canaa jaara  
rejeretaquiaa naquiya canaa miishaanu Pueyaso rupaa canaa pohuatanuu-  
cuani, puetunu cunojuanaari niaacuara, maninia nia quiniuria Pueyasora.  
Naa Pueyaso jiyanooniucua niajaninyacuatej, socua queraatia pueyari na  
timiniutia na sequenutaniya, “paacarasho”. Pueyasoori jiyanoohua shuquiri-  
tiasaanutaniya, queraatia pueya na jiyanooniucua.

<sup>16</sup> Naaratej, majaari canaa pishiniu na rupaa canaa pohuatanura. Canaa  
cuaqueyari saaquianoshiya. Naajaa, canaa jiuujiaari saniniuujia puetunu  
juucajanaa socua mashajashiyacujua. <sup>17</sup> Janiyara, puetunu naquiya canaa  
miishacarijanaa mijiria, cunoori secaja, rupaquijiajuhuj. Cuno naquiya  
miiniu canaa rejeretanuucua, ¡Pueyasoori cunora jiyanoohua maninia mi-  
iniutianiya canaa! Cunora, canaari shacantuuca quijiacara jatanishaanu-  
taniyani, pueyaracaanu rishijiaa canaa quiniuria. <sup>18</sup> Naaratej, majaari  
canaa jiaatianu quiquiaa canaa jiiitianura mijiria canaa niquishano casaa.  
Canaa cutaraari Pueyaso jiiitiasano niquishoo casaacua jiaatiaquiaani. Mi-  
jiria niquishano casaari saaja shaajeja casaa. Pueyaso jiiitiasano pa  
niquishoo casaa saniniunjia, cuno cutaraari shaajeyashijia.

## 5

<sup>1</sup> Mijiria pa quishacarijia, nio pa cuaqueyari saaja juhua suhuorotu quiya  
pa sohuanura, nareja juhua rucoonaa pa quishacari mijiria. Mijiria pa  
jiiitiasano pa shoque jaara cusoquee, paacuajaari niishiyani, paari tari ji-  
itiaa tamonu cuaqueya jiyocuacaanuni. Cuno cuaqueyari juhua shanohua  
tia, Pueyaso shipinishano pajaniyara. Cuno cuaqueyari pueyaracaanu  
rishiniutianiya pa sohuanu quiquiora. Cunoori maja pueyano shipinis-  
hano. <sup>2</sup> Mijiria canaa quishacarijia nio canaa sohuanu suhuorotujiniani,  
canaari taraatia miishaaquiaani. Cunora, canaari juhua quiatojoquiaani,  
canaa jiaatiasacari canaa sohuanu pacusaanura jiyocuacaanu. Tii quiy-  
acuajaari canaa sohuanuucujia tiasano quiquio. <sup>3</sup> Canaari cuno quiarinio  
cuaqueya cushiyonutaniya juhua toqueni, maja juhuasu canaa sohuanu  
quiniuria. <sup>4</sup> Nio cuaqueyajiniaja canaa quishacari mijiria juhua suhuoro-  
tujinia, canaari quiatojoquiaani taraatia canaa miishacari mijiria. Maja  
cutaraari canaa quiniu paniniu cuaqueyaju, juhua juhuasunucua. Canaa  
cutaraari canaa quiarinio cuaqueya cushiniu paniyani, Pueyaso shipin-  
ishano canaarani. Naacuajitij, nio shaajeja canaa cuaqueyari puetunu  
maninia jatanishaanutaniyajanaa Pueyaso cumaacata, pueyaracaanu rishi-  
jia cuaqueyaraca canaa quiniuria. <sup>5</sup> Pueyasojuanaacuajaari na muerasura  
pa saquiriojoquiaari, naa na jataniniuria pajaniyatej. Naaratej, nojuajaari  
na muerasu niquitioquiaa na Sohuanu, pa niishiniuria nojuajaari seetanu-  
juanaa naa pa miiniutianiya.

<sup>6</sup> Naa canaa niishishacarijij, majaari canaa tacaaniu quiquiaa. Canaacua-jaari niishiyani nio cuaqueyajinia canaa quishacarijia, majaari juhuano-juaja pa quiniu pa Jiyaniijia shuriucua. Naacuaajitij, paari tucuacaanu quiya-jaani pueyaracaanu pa quiijiarano quiquiojiniji. <sup>7</sup> Cunora, mijiria canaa quishacarijia, majaari canaa quiniu tama canaa niishitiajataaja. Canaa cutaraari canaa Jiyaniijiaacua canaa tiuuniutia quiquiaani. <sup>8</sup> Naacuaajitij, canaari shuquiriaatia quiya mijiriani, nocua canaa tiuushacari. Naajaa, canaari nio canaa cuaqueya tarinitianuucua jiaatiaani, canaa pacunura pa Jiyaniijia shuriucua, tii canaa quiniuria nata. <sup>9</sup> Naacuaajitij, canaa jaara nio cuaqueyajinia quiyajaa mijiriani, naajuhuaaj canaa jaara na cartequeni, canaari saaja pa Jiyaniijia shuquiritiniuucua jiaatiaani. <sup>10</sup> Puetunu pajaniya-janaacuaajaari Jesucristo tacoji na nequesoreesaqui nujuatejosaariquianoni. Cuniqum, puetunu mijiria pueya miishanojuanaari maatia niishishaanutaaniya, maninia pa miishano, sesa pa miishanonio. Na nuhuaji, pa Jiyaniijia-ari maninia miiniutianiya maninia miijiaa. Saniniuujia, sesa miijiaaari taraatia miishaanutaniyacujua.

*Pueyasoori pueya jiyanooniu panijia cutara*

<sup>11</sup> Naaratej, canaa niishishacari jiyanoohua puereeta quiniutianiyaari pa Jiyaniijia saniitiosacari na tojitiaashijiaa, canaari cunora saniniuujiaquiaa pueya tojitiniuria Pueyaso Rupaani. Pueyasocuaajaari niishiya canaari seetanujuanaa nera poonijionaani. ¡Seetanujuanaa naa nia niishitiriqiajaanihuaj! <sup>12</sup> Majaari nia jiyaniiniu canaari tama canaajiniijiaaja nia pohuatanu coteerohuanihuaj, canaacua nia tiuuniuria. Canaari saaja naa nia pohuataani nia niishiniuria casarate nia naata timitianu canaani. Canaa nia timitiare cutara, seetanujuanaa Pueyasora poonijionaa canaa quiniuucua. Naacuaajiti nia naata cuno pueya tacunu canaacuaaji, cuno pojori canapuate sapuenu juhua maninia quiijiaa niquishano pueya najuhuanacuajani. Majaari nojori niishiniu tacaaniu taamueca jiuujiaracateja nojorini. <sup>13</sup> Noojiaqueya niajanijiniijinio naasucuaari jiyaniya canaari juhua paateca pocuaquiaani. Naajaa, canaa jaara seetanujuanaa paateca quirini, canaari paateca quiya Pueyasorani. Saniniuujia, canaa jaara maninia niishiriojuaca quiriquiani, canaari naa quiya niaarani, maninia canaa niishitiojonura niajanijia. <sup>14</sup> Cristo paniniuucua canaa, cuno na paniniuuri canaa shiniuujiaquiaa nera canaa poonijionura. Naaratej, canaari pueyaracaanu nojuajiniijia pohuataquiaani. Canaacuaajaari niishiyani, nojuajaari puetunu pueyacuaraajanaa cusoquiaari. Naa na cusonuucua puetunu pueya nitijianaatej, Pueyasora, puetunu pueyajanaari tari cusonuucuaari Cristota. Naacuaajitij, Pueyasoori na naata jiyanooniu puetunu Neyanuucua tiuniaajanaa. <sup>15</sup> Cristocuaajaari puetunu pueyacuaraajanaa cusoquiaari, na samiitianishano pueya quiniuria saa neraja. Pocuara cusoquiaariiri. Nojuajaari pocuara samiitiaquiaarihuajuhuaaj. Naaratej, paa cuara miiria saa na panishanojua. Majaari socua pa miiniu tama pa panishanojuaaja. <sup>16</sup> Tarijia, canaari saaja canaa panishano pueyacuara taraajani. Quiarijia saniniuujia, Pueyaso jatanishano pueya canaa quishacari, majaari rimiajata canaa paniniu pueya. Tarijia, canaari Cristo jiyaniijiani nojuaja naasucuaari nareja pueyano, juhua pajaniyajuhuaaj. Quiarijia cutara, majaari naa canaa niishiriojonu nojuajiniijia. <sup>17</sup> Naajuhuaaj, cante Cristo rupuesanoni, nojuajaari quiariniora jatanishano pueyano. Tariucuaacaanu sesa na quiniuuri tari jatanocuaaja. Saniniuujia, puetunujuanaari quiarinio quiya.

<sup>18</sup> Puetunu cunojuanaari Pueyaso miishano. Nojuajaari Neyanu Cristo cusojuaquiaari pocuara, na jiyanooshano pueya pa quiniuria. Na nuhuaji,



nojuajaari canaa jiyaramiquiquiaari puetunu pueyajanaa canaa pohuata-nura, nojori jiyanooshaanurajuhuaaj. <sup>19</sup> Naacujitij, Pueyasoori mijiria quiniaa jiyanooquiaa saaja Neyanu Cristoocua nojori tiushacari. Naa na jiyanooshacari pueyatej, majaari quenaaja sesa nojori miishano na saneenu quiniutianihua socua. Nojuajaari canaa jiyatequiaari na rupaa pohu-atanaa canaa quiniuria, pueya canaa tiutiniuria Neyanu Jesucristoocua, jiyanooshano nojori quiniurajuhuaaj. <sup>20</sup> Naacujitij, canaari Jesucristo jiyaramiquishanoni, canaa caminiujiuniuria niaara na sequesano canaa. Naa canaa caminiujiushacari Jesucristo rupaatej, Pueyasojuanaari nia masuya na muerasu nia quiniuria, Neyanuucua nia tiushacari. Naacujitij, canaari Cristo niti nia secojiyani, itama nia cuaqueyajaaja nia jiyanootiri Pueyaso! <sup>21</sup> Pa Jiyaniijiarano Jesucristoni, nojuajaari tojetaarucujanaa sesa miyashijajuhuanaj. Naajaa, na Que Pueyasoori nocua tiutiaquiaari puetunu sesa pa miishanojuanaa, pa niti na saniitiosocoriquiano. Naacujitij, Neyanuucua pa tiushacari, Pueyasoori pa jiyatequiaa juhua sesa miyashijia pa quiniuria.

## 6

<sup>1</sup> Naa Pueyasora poonijionaa canaa quiniuucuatej, canaari jyanohua nia secojiyani cuarta Pueyaso muerasunaa, saa Pueyasoraja nia quiri, nia jyanoojia na quiniuucua. Maninia na muerasu nia quiri. <sup>2</sup> Tariucuaaanu na sequesano cuajaari naa naajiotasano quiya na rupaajinia:

“Quiaari namitia cua secojocanu, pueya cua naacunu panishacari. Pueya cua jiyanooshacari cua, janiyari quia naacucanujuhuaaj”. Cua panishano pueyanaa, quiarijiaari Pueyaso jiyanooshacari pueya. Nojuajaari quiarijia pueya jiyatequiaa na muerasu nojori quiniuria.

<sup>3</sup> Cunora, canaari tama canaa cuaqueyajaaja cojuaquiaani, maja canaa miiniuria sesa tamasa niquiara. Canaari naa maninia miiquiaani, nojori mariqui Jesucristoocua tiuyaquiriri, nojori mariqui Pueyasora canaa poonijosano sesacarejariuhuaaj. <sup>4</sup> Canaa cutaraari saaja maninia miiquiaa pueya niquiarani, puetunu pueya niishiniurajanaa canaari seetanujanaa Pueyasora poonijionaani. Naaratej, canaari juhuajaniya rejeretaquiaa naquiya canaa miiniuni, canaa panishano canaa jiiitaaquishacarijuhuaaj. Naajuhuaaj, canaari rejeretaquiaani puera canaa tacaashacari, canaa niishiyaquishacari taa canaa miiniutianiya socuani. <sup>5</sup> Naajuhuaaj, canaari juhuajaniya rejeretaquiaa canaa jaara majacujusaaquiaani, canaa jaara nujuatejojuajinia nujuatejosaaquiaaaniuhuaaj. Nasojosano pueya jaara miitianu paniquiaa canaani, canaari na rejeretaquiaajuhuaaj, pueya tiuniuria canaa pohuatasanoocua. Naa Pueyaso jiyaramiquishano pueya canaa quishacari, canaari jyanohua poonijioquiaa nerani. Canaari sequeyarucua sutequiaani. Canaari miaajequiaajuhuaaj. <sup>6</sup> Naajuhuaaj, pueyari na naata niishiniu canaari seetanujanaa Pueyaso seyani, sesa miyashijia canaa quiniuucua, maninia canaa niishiniuucua Pueyaso rupaajuhuaaj. Niishishaatiacujaari, canaari Pueyaso seyani, jacaria pocuajaca canaa quishacari juaajaca pueyata, naajuhuaaj, maninia canaa miishacari puetunu pueyajanaano. Naa niishishaatiajaariuhua canaari Pueyaso seyani Pueyaso Sohanu cumaquishacari canaa, seetanujanaa canaa panishacari pueyajuhuaaj. <sup>7</sup> Niishishaatiajaariuhua canaari Pueyaso seyani seetanu rupaajanaa canaa pohuatanuucua pueya, naajuhuaaj, casaa canaa miiniuucua Pueyaso cumaacata. Canaari Sesaaca



nujuataquiaa cumaatiani, Pueyaso jiyanooshano pueya canaa quiniuucua. Pueyaso rupaata, canaa cutaraari saaja Sesaaca jiyatequiaa canaacuajini. <sup>8</sup> Naa Pueyasora canaa poonijiosacaritij, noojiaqueya pueyari canaa shuquiritiaquiaani. Tamasacaari canaa rerequetequiaa saniniuujia. Naajuhuj, noojiaqueya pueyari maninia pohuatanuuquiaa tamasaca niquiara canaajiniji. Tamasacaari canaa sesacaquiaa saniniuujia. Noojiaqueya pueyari canaa sequequiaa sapojonuujucatanani. Tamasacaari saniniuujia maninia tojitiaquiaa canaa, seetanu rupaaajanaa canaa pohuatasacari. <sup>9</sup> Noojiaqueya pueyari canaa niquiquiaa juhua najuhuaana quijiaca pueyani. Tamasacara saniniuujia, canaari tojishano pueya cutarani. Canaari sequeyarucua quera puecoosaaquiaani. Naajaa, canaari saminio quiyajaani. Canaari jyanohua miitiasaaquiaani. Naajaa, majaari canaa puecoosaanu quiquiaani. <sup>10</sup> Taraatia canaa quishacari, naajaa, canaari pueyaracaanu shuquiriaatia quiquiaani, Pueyaso pueya canaa quiniuucua. Canaari seetanujuanaa casamiijiuniucua juhuj. Naajaa, canaari queraatia pueya jiyatequiaa queraatia casamiriaca nojori quiniuria Pueyaso casaatani. Canaari juhua casamiijiuniucua niquishanoni. Naajaa, canaari puetunu canaa panishanojuanaa jiiitiaacuajani.

<sup>11</sup> Corinto tiacajinia quiniaa cuarta Pueyaso pueyanaa, canaa nia tojitiare. Canaa jiaatiasacari niaacua, canaari seetanujuanaa puetunu canaa jiuujiajinia canaa niishiriojosanojuanaa nia sequereeni. <sup>12</sup> Majaari canaa tarinitianu canaa paniniu jyanohua niajaniya. Niajaniya sajaraj, majaari nia paniniu canaa, taa canaa paniya niajanayacuaani. <sup>13</sup> Janiyari nia nenecojiyani, naatej, taa pueyano nenecojoquiaa necohuacuaani, ¡majaari canacuaji nia taacanuunu! Seetanujuanaa canaa nia paniri, taa canaa paniquiaa niajanayacuaani, seetanujuanaa panitiojuaca pa quiniuria.

### *Paari Pueyaso quiquioni*

<sup>14</sup> Saniniuujia, maja Pueyaso tojiyashijiaca pueya nia paniniu, nojori nia cojiniuria. Naajuhuj, maja cutaraari nia caminiu Pueyaso tojiyashijiata, niaa mariqui rimiajata quijiaca quiriiri. ¿Maninia miijiatucua shuquiriaatia quijia quiriquia, sesa miijiatata na quishacari? Maja. Cua riuquareto pueyanaa. ¿Cuhuashiqui quijiateeri na naata juhujaniya jatiqui quiniu ninishiqui quijiatata? Maja na naata. <sup>15</sup> Seetanujuanaa pueyanaa, Cristoori maja Sesaaca rupuena. Naajuhuj, Pueyasocua tiuujia pueyanoori maja na naata maninia rupuetoonu Pueyasocua tiuyashijia pueyanota. <sup>16</sup> Paa jaara Pueyaso quiquio quirini, ¿paateeri Pueyaso quiquiojinia shanacunutaniya samaruhua tiuquitianura tiini? ¡Maja! Paacuajaari pueyaracaanu Quijia Pueyaso quiquioni. Na pueyara na sequesano cuajaari naa naajiotasano quiya:

“Janiyari nojorijinia quiriquianoni. Janiyari nojori tajinia rucuanenonutaniyani. Janiyari nojori Jiyaniijiajanaa quiniutianiyani. Nojoriiri cua pueya quiniutianiyacujua”.

<sup>17</sup> Cunora, pa Jiyaniijiaari na pueya sequeya:

“¡Cua tojitiaashijiaca pueya tajiniji nia pacure! Nia shiriquiri tamocora nojoriicuaji. Majaari sesa casaa nia saniniu paniniu. Naa jaara cua tojiijaca quiri, janiyari nia jiyatenutaniya quirianoni. <sup>18</sup> Janiyari nia Que quiniutianiyani. Naacuajitij, niaari cua niquiohua quiniutianiya. Naa sequeyanijia, puetunu cumaacaracajanaa cua quiniuucua”.

## 7

<sup>1</sup> Naacuajiti canaa panishano pueyanaa, paacuaajaari naa seetanujuanaa pa Jiyanijia sequesano pajaniyarano jiitiaani. Naaratej, pueyaracaanu tama pa cuaqueyajaaja juhua jeequesano pa jiitariquia, poojiajuhuaj. Majaari pa shanacunu juhua curuushojosano pa quiniuria sesa pa miishanota. Pueyaso puerejaca pa quiriquia, tojetaarucuajanaa sesa miyashijiaca pa quiniuria, saa neraja pa quiniuriajuhuaj.

*Corinto pueya tacatosacari nojori jiuujia, maninia nojori quiniuhuara*

<sup>2</sup> Pueyanaa, ¿taa nia miiquianuni? ¡Canaa panijia nia quiriouhua! Majaari canaa miiniu quiquianu sesa niajaniya. Majaari quenaaja niquiriyatu niajanijajiniinio canaa sesonu quiquianu canaa niishitiojosanota. Majaari canaa sapojonu quijia niajaniya. <sup>3</sup> Naa cua sequesacari niajanijatej, majaari cua sequenu cua cararonura niajaniya. Janiyacuajaari tari nia sequereeni, canaari jiyanoehua nia paniyani. Naacuajitij, canaari shuquiriaatia quiniutianiyani canaa jaara puecoosaare canaa cumaquiniuucua niajanijani, seetanujuanaa Pueyaso muerasu nia quiniuria. Naacuajitij, niaa jaara shaajerejuhuaj, paari pueyaracaanu jatiqui quijia quiniutianiya Pueyasotani. <sup>4</sup> Janiyari seetanujuanaa naa nia sequeyani cua panishacari niajaniya. Quiarijiani, janiyari jiyanoehua nia timitiaani, maninia cua tojiniuucua niajanijajiniji. Canaari seetanujuanaa naquiya miiquiaani. Naajaa, maninia canaa tojiniuushacari niajanijajiniji, cunoori cua cumanijiacanu. Cunora, janiyari jiyanoehua nia shuquiritiaani.

<sup>5</sup> Canaa jaara tiuquiquianu niya Macedonia jiyajiniani, majaari quenaaja rupaquijia canaa quiniu quiquianu juhuajaniya. Canaari puetunu taraatia miishaacanujuanaani. Pueyasocua tiuyashijiacaari canaa juaariquiaa. Canaa jiuujiaari niaacua tacaariquiaa saniniuujia. <sup>6</sup> Jiyacaritij, Pueyasoori canaa cumanijiacanu Tito tiuquishacariuhua canaacua. ¡Pa Pueyasocuaajaari tacaajiaa cumanijiana! <sup>7</sup> Canaa jiuujia canaa cajitishacarini, cunoori maja saaja canaa niquishacari Tito canaacua tiuquihuano. Canaa cutaraari canaa jiuujia cajitiquianuni, nojuaja jaara canaa pahuatacanu niajanijajiniji jiyanoehua na timiniutia. Nojuajaari canaa pahuatacanu, niaanaari canaa niquiniuucua jiaatiaa. Niaanaari cucua taraajeya, jiyanoehua nia taraajetenuucua janiya. Niaanaari cucua tacaya jiyanoehua, cua rootasano tojijia nia quiniuria quiarijia cutara. Naa cua tojishacari niaacuajitij, janiyari jiyanoehua shuquiriquianuni.

<sup>8</sup> Niaacuara cua naajioneeri nia taraajetecanu. Janiyari taraajecanu juhuaj, naa cua taraajetenuucua niajanijatej. Quiarijia cutaraari maja cua taraajenu. Cua naajioneecuaajaari saaja rupaquijia nia taraajocanu. <sup>9</sup> Quiarijiani, ¡shuquiriaatia quiyanijia! Majaari nia jiyaniniu janiyari shuquiriaatia quiyani naa cua taraajonuucua niajanijatej. Shuquiriaatia quiya cutaranijia, cua niishishacari, naa cua taraajonuucua niajanijatej, niaari nioojia tacatorohuacuaa Pueyasocua, Pueyaso tojitiajaca nia quiniuhuara. Naacuajitij, janiyari quiarijia niishiyani, majaquiiri cua sesonu quiquianu niajaniya, naa cua taraajonuucua niajanijatej. Pueyasocuaajaquiiri maninia poonijioriquiaa nioojiacajinia, naa nia taraajesacaritij. <sup>10</sup> Pueyasोजनाa jaara pa taraajetere, cunoori maninia, poojia pa taca-tonuhuara nocua, na jiyanooniuria pajaniya. Na nuhuaji, paari shuquiriaatia quiya cutarani. Saniniuujia, tama pa taraajesacarijiaaja, cunoori tama poojia pa shaajanurajaaja. <sup>11</sup> Nia taraajesacari cua nacasusacari niajanijia cua naajioneerini, cunoori seetanujuanaa Pueyaso taraajetesano quiquianu niajaniya. Naa nia taraajenuucuatej, nia niquishuriiraj, majaari

nia tarishiniu quiquianu maninia nia miiniuria. Niaari ritia cua niishitiniu paniriquiaa juucua, maja niaacua na tiutiasaanura cuno pueyano miishano sesa. Niaacuajaari maninia miiquianu nia juaashacari cuno sesa miiija. Niaari na naaqui puerecanujuhuj, niaa mariqui nata cojiritiasaare saniitionuuri. Niaari cua jaqueroojocanu. Niaari ritia miiquianu cua naajiojinia cua sequesano niajaniya. Naacuajitij, niaari ritia cuno sesa miiija taanuucanu nia tajiniji, maja socua nia rupuesano na quiniuria. Naa nia miiniuucua puetunu maniniajanaatej, janiyari quiaritia niishiyani, majaquiiri nia maniniucuanu quiquianu naa sacuaraatia cuno pueyano miishanotej. <sup>12</sup> Pueyanaa, niaari maninia canaa tojijiaca. Seetanujuanaa, cua naajiosacari niaacuara, majaari cua naajionu quiquianu saaja cuno sesa miiija pueyanojiniji, sesa miishano pueyanojinijinio. Janiya cutaraari niaacuara naajiocanuni tamajaaja nio nia niishiniuria Pueyaso niquiara: niaacuajaari seetanujuanaa canaa panijiaca quiyajaa, nia tojishacari canaa. <sup>13</sup> Naaratej, canaari canaa jiuujia cajitiquianuni, canaa tojishacari Tito pahuatasano niajanijajiniji.

Majaari saaja Tito pahuatasano cumanijianu quiquianu canaa. Canaari Tito timitiakanujuhuj, canaa niquishacari nojuajaari shuquiriaatia tiuquiriohua canaacua. Puetunu niajanijajanaari na naacucanu, noojia na cajitiniuhua, najuhua na tacaaniuucua niaacuajuhuj. <sup>14</sup> Tito quiaaquishacari niaacua, janiyacuaajaari juhuacari nia pahuatatanu niajanijajinijini, maja puera na taacanuunura niaacuaji. Naa maninia nia quishacari Tito tiuquishacari niaacuatej, majaari cua caririquiniu quiquianu niajanijajiniji. Puetunu cua pahuatasanojuanaa Tito niajanijajinijiiri seetanujuanaa quiquianu Titora. Naajuhuj, puetunu cua pahuatasano niajanijajanaari pueyaracaanu seetanu rupaaajanaa quijia. <sup>15</sup> Quiaritia Tito niishiriojosacari niajaniya, nojuajaari socua jiyanohua nia panijia quiya, nia tojinuuucua maninia nojuaja. Niaacuajaari tetecatucanu nia puerenuta na tiuquishacari niaacua. Majaari nia rerequetenu quiquianu nojuaja. <sup>16</sup> Janiyajuhuj, jiyanohua shuquiriaatia quiyanijia, cua niishishacari quiaritia cutara cua naata niaacua tiuuniu seetanujuanaa.

## 8

### *Capora pa quiriqiaj*

<sup>1</sup> Quiarijiani pueyanaa, canaari nia pahuatanu paniyani, taa Pueyaso cumaquiya jiyanohua na muerasu maapue niya Macedonia jiyajiniani. <sup>2</sup> Nojoriiri jiyanohua taraatia miiquioquiaa. Naajaa, nojoriiri saaja jiyanohua shuquiriaatia quiya. Naajuhuj, casamijiuniucua nojori quishacari, naajaa, nojoriiri caporatujuri. Nojoriiri na cumaneecajiniji nareja niquitiojoquiaa queraatia, Judea jiyajinia casamijiuniucua Pueyaso pueyara. Nojori niquitiojosanoori juhua casamiriaca pueya niquitiojosano. <sup>3</sup> Seetanujuanaa narta Pueyaso pueyacu nojori taraajenuta, nojoriiri naa na cumaneecajiniji niquitiojocanu queraatia. Nojoriiri puetunu na jiiitasano cumaneecajanaa niquitiojonuucanu. Naacuajitij, janiyari jiyaniquianuni, maja naasucuaari nojori naata niquitiojonu quiniutianiya socua. Naajaa, na nuhuaji, ¡nojoriiri socua niquitiojocanu! Seetanujuanaari cua sequesano niajaniya. Janiyacuajaari nojori miishano niquiniani. <sup>4</sup> Niya Macedonia jiyajinia quiniaa parta Pueyaso pueyani, nojoriiri niajanijajiniji tojiquianu. Niaanaari cumaneeca reratenu paniriquiaacuaa, nia jiyarosocoriquiano Judea jiyajinia quiniaa casamijiuniucua parta Pueyaso pueyara. Naaratej, nojoriiri jiyanohua canaa nenecojocanu

canaa masenura nojori niqutionu panishano cumaneecajuhua, parta Pueyaso muerasura. <sup>5</sup> Seetanujuanaa Pueyaso tojjiaca nojori quiniucua, nojoriiri maja saaja na cumaneeca na niqutiojonu quiquianu. Nojoriiri coteenu tama nojori cuaqueyajaaja jiyatecanu seetanujuanaa nojori quiniuria saaja pa Jiyaniijara, taa Pueyaso paniya pa miiniuriacuajani. Naajuhua, nojoriiri tama na cuaqueyajaaja jiyatecanu canaa tojjiaca nojori quiniuriajuhua. Cunora, canaari nojoriicuaji jiuujiatecanuni. <sup>6</sup> Naa capora niqutiojonaa nojori quiniucuatej, canaari Tito sequerucuaani, niaacua na quiianhuara quiarjia. Nojuacuajaari tarijia naacucanu nijaniya, nia reratenura nia niqutionu panishano cumaneeca. Niaacuajaari maninia niqutiojocanu juhua capora pueya. Naaratej, nojuaja cuara nia naacuura, nia tucuatnura reratenu puetunu nia niqutionu panishano cumaneecajanaa. <sup>7</sup> Nijaniya, Corinto tiacajinia quiniaanaa, niaacuajaari jiyanoehua maninia Pueyaso muerasu. Niaari Pueyasocua tiuujiaa jiyanoehua. Naajuhua, niaari jiyanoehua maninia Pueyaso rupaa niishitiojonuujuaca. Niaari Pueyaso niishitiaja jiiitiaajuhua. Niaari mariyata shitimia poonijionuujuaca, tamasaca nia naacunura. Naajuhua, niaari canaa panijiaa jiyanoehua. Naatej, taa maninia miijiacatucuaa nijaniyani, capora nia quirijihua, nia cumaneeca nia niqutiojonura nareja parta Pueyaso pueyara.

<sup>8</sup> Majaari juhua nia jiyaniijia cua sequenu nijaniya, nia cumaneeca cua niqutiojotenura nijaniya. Janiyari nareja nia pohuatariquiaa capora Macedonia pueyajinijini, tama nia niishiniuriajaaja, niaate seetanujuanaa canaa panijiacajuhua, taa Macedonia jiyajinijinio pueya paniya canaacuaani. <sup>9</sup> Niaacuajaari pa Jiyaniijia Jesucristojiniji niishiya; na Que Pueyaso shuriucua na quishacarijia, nojuajaari puetunu maninia casajanaa jiiitiaja quiquiaari. Naajaa, nojuajaari juhua casamiijuria quiquiaari, mijiria na rosesacari pocua. Nojuajaari naa taraatia quijia quiquiaari, saniniuujia jiyanoehua shuquiriaatia quiijia na jiyatenura pajaniya, juhua jiyanoehua queraatia casamiriaca pueya pa quiniuria. Naa jaara seetanujuanaa panijiaa quiriquia, naa nia miirijihua, taa pa Jiyaniijia miiquiaaricuaani.

<sup>10</sup> Janiyari niishiriojoriquiaani, taate socua maninia nia naata miiniu parta casamiijiuniucua Pueyaso pueyarani, shuquiriaatia nia quiniuriajuhua. Cua tojiri. Niaacuajaari niishiya, noo marijara pa shococanutej, niaacuajaari juhuacatecara cumaneeca reratejonu coteecanu. Niaari naa maninia miiquianu tama nia tacaashacarijiaa niarta Pueyaso pueyacu. <sup>11</sup> Niaari shitimia juhuacatecara nia cumaneeca niqutiojonu coteecanucua. Naaratej, quiarjia nia sequyanijia, niaa cuara naa shitimia niqutiojonu tucataara puetunu nia niqutionu panishano cumaneecajanaa. Nia jiiitiasano cumaneecajiniji nia niqutiojore, taa cumaneeca nia niqutionu paniyacuajani. <sup>12</sup> Nia tojiri. Paa jaara seetanujuanaa nareja niqutionu paniriquia pa cumaneecajinijini, Pueyasoori pa niqutiosano shuquiritiaja, paa jaara juhua capora niqutiore pa jiiitiasanojinijini. Maja cutaraari Pueyaso paniniu pa niqutionura, pa jaara na jiiitiaquiyani.

<sup>13</sup> Majaari Pueyaso paniniu cutara puera nia niqutiojonura nia cumaneeca, tamasaca quiniuria casamiriaca, saniniuujia nia jiiitiaquiniuria nia panishano. <sup>14</sup> Maninia cutaraari puetunu Pueyaso muerasujuanaa jiiitiana na panishano. Naaratej, quiarijiani, niaa cuara niqutiojora nia jiiitiasanojiniji, nojori jiiitianura na panishanojuhua. Tamacari saniniuujia, nojoriiri saniniuujia nia jiiitiaquishoo casaa nia niqutionutaniyacujua, niaa jaara na jiiitiaquiri. Naacuajitij, puetunu Pueyaso muerasujuanaari na

panishano jiiitianutaniya mariyata, maja rimiajata. <sup>15</sup> Naajuhuaaj, tariucua-caanu Pueyaso Rupaajiniani, jiyocuacaanuji Pueyaso tinishano Israel pueya miaquesocoriquiano panjiniijiiri naa naajiotasano quiya:

“Cante queraatia reratequiaarini, majaari quenaaja na cureenu quiquiaari. Naajuhuaaj, cante secaja reratequiaarini, majaari nojoriria na pueetanu quiquiaari”.

Naaratej, Pueyasoocua tiuujiaca nia quiri. Nia jiiitiasanojiniji nia niqutiojore nareja, nia jamueyaquiniutia.

*Pablo pohuatasano Titojiniji, Tito cojiniaajinijinio*

<sup>16</sup> Titoori jiyanoehua niaacua jiaatiaja, taa cua jiaatiaa niaacuacuaani. Pueyasocuaajaari na jiyatequiaari nia panijia na quiniuria. Janiyari cunora Pueyaso sequequiaani: “¡Paacarasho Pueyasonaa!” <sup>17</sup> Naacuajitij, janiya jaara Tito sequerucuaani nia niquniuucua na quianura, nojuajaari cua timitiriucuaa. Tama nojuajaari nia niquniuucua jiaatiaa. Naacuajitij, nojuajaari quiarijia quianutaniya niaacua.

<sup>18</sup> Canaari tamonu parta Pueyaso pueyano jiyaroya Titotani, na tarajariquiano. Cuno pueyanoori puetunu Pueyaso muerasu maapuejanaa shuquiritiasano pueyano, maninia na pohuatanuucua pa Jiyaniijia Jesucristojiniji. <sup>19</sup> Macedonia jiyajinia quiniaa Pueyaso muerasu maapueeri tari na saquiriojocanu na tarajanura canaa, pa niqutiojosano cumaneeca canaa jiyatanura nata, Judea jiyajiniara. Naa pa niqutiojonuucua pa cumaneeca parta Pueyaso muerasuratej, queraatia pueyari pa Jiyaniijia timitianutaniya socua. Naajuhuaaj, parta Pueyaso pueya Judiocuacaari niishiniutianiya, narta Pueyaso pueya taucuacaquiiri nojoriicua taraajejacajuhuaaj. <sup>20</sup> Maniniacuajaari parta Pueyaso pueya maapue saquiriojosano pueyano quianura canaata. Naacuajitij, majaari pueya jiyaniinu quiniutianiya canaari nio queraatia canaa reratesocoriquiano cumaneecajiniji nohuasenutaniyani. <sup>21</sup> Canaari pueyaracaanu maninia miiniu paniquiaani puetunu pueya niquiarajanaa, maja saaja Pueyaso niquiara.

<sup>22</sup> Quiarijiani, niaacua canaa jiyarosocoriquiano pueyata, canaari niqijinijio tamonu parta Pueyaso pueyano jiyaronutaniyani. Pueyaracaanu na poonijiosacari pa Jiyaniijiara, janiyajanaari na niqiquianuni. Nojuajaari seetanujuanaa pueya panijia, Pueyaso panijia na quiniuucua. Quiarijia cutara, seetanujuanaa niaacua na tiushacari, janiyari niishiyani, nojuajaari jiyanoehua maninia Pueyaso pueyano. <sup>23</sup> Tamonu jaara nia nequesotare cante Titoni, niocua na riucua: “Nojuacuajaari Pablota poonijiona, na cumaquiniuria pajaniya”. Naajuhuaaj, Tito cojiniaari niqiji Pueyaso muerasu maapue jiyarosano niaacuajuhuaaj. Pa Jiyaniijia Jesucristoori socua maninihuaqueetasano, maninia na tojitiajaca nojori quiniuucua. <sup>24</sup> Naaratej, nio pojori jaara niaacua tiuquijiosee, niocua puetunujuanaa maninia miiri nojoriria, nia paniniutia nojori. Naacuajitij, puetunu Pueyaso muerasu maapuejanaari niishiniutianiya niaaqui seetanujuanaa panijia. Naajuhuaaj, puetunu Pueyaso pueyajanaari niishiniutianiya, majaari cua sapojonu quiquianu, maninia cua pohuatasacari nojori niajaniyajiniji.

## 9

*Pablo shiniujiushacari pueya, cumaneeca nojori reratenura narta Pueyaso pueyara*

<sup>1</sup> Janiyaruhua najuhuaana niaacuara naajiyani, cua sequenura niajaniya, nia cumaneecata nia naacunura Judea jiyajinia quiniaa parta Pueyaso



pueya. <sup>2</sup> Janiyacuajaari niishiyani, niaari tarijia na naacunu paniquianu-cuaja. Cua shuquiritiasacari cunora niajaniya, janiyari pueyaracaanu niya Macedonia jiyajinia quiniaa parta Pueyaso pueya niquiara pahuataquiaa niajanijajinijini. Janiyacuajaari nojori pahuataquiaani, niajaniya Acaya jiyajinia quiniaa pueyani, niaari nia cumaneeca niquitionu paniquianu noo marijara pa shococanutej. Naaratej, queraatia niya Macedonia jiyajinia quiniaa Pueyaso pueyari cunora jaarajaaja na cumaneeca niquitionu panijajuhuj, naa nojori cua pahuatanuucua niajanijajinijitij. <sup>3</sup> Janiyari niaacua tiuya seetanujuanaani, niaacuajaari canacuaji tariucua reratesano jitianutaniya nia cumaneeca, taa cua pahuataquiaa niya niajanijajinijicujani. Naajaa, janiyari nio parta Pueyaso pueya jiyaronutaniya niaacuani, seetanujuanaa juhuacarijia nia reratenura nia niquitiojosocoriquiano cumaneeca. Majaari cua paniniu cutara cua pahuatasano niajanijajiniji cuaracashitishaanura. <sup>4</sup> Macedonia jiyajinijinio parta Pueyaso pueya naasucuaari cuata tiuquiniutianiya niaacua. Nojori jaara cuata tiuquishii niaacua, canaa jaara nia riuriatasee nia cumaneeca rerateyojuani, canaari caririquiniutianiya. Niaari caririquiniutianijuhuj. <sup>5</sup> Naaratej, janiyari Tito sequereeni, parta Pueyaso muerasuta na quianura coteenu niaacua cucuaji, nia niquitiojonu panishano cumaneeca cuara tari reratesano quiiria canacuaji. Naacuajitij, nia niquitiojosano cumaneecaari seetanujuanaa nareja nia niquitionu panishano quiniutianiya, maja canaa niquitiojotesano niajaniya.

<sup>6</sup> Pueyanaa, nio sequesano nia niishiriquia. Naa sequeyari: “Cante secaja natajani, secaja senoonutaniyajaariuhuj. Saniniuujia, cante queraatia natajani, queraatia senoonutaniyajaariuhuj”. Naajuhuj, paa jaara capora quiriquiani, Pueyasoori saniniuujia socua queraatia pa niquitionutaniya pa niquitiosanojiniji. <sup>7</sup> Naaratej, puetunu niajanijajanaa cuara niquitioora taa nioojiajinia nia niishiriojoree nia niquitiojonuracuajani. Majaari nia cumaneeca nia niquitiojonu nia jamuenuta, nocua nia taraajenutanio. Naajuhuj, majaari nia niquitionu nia cumaneeca saaja tamasaca shiniujiushacari niajaniya. Pueyaso cutaraari shuquiriaatia niquitiojuaca timitiaja. <sup>8</sup> Pueyasocuajaari cumaacaraca na niquitionura niajanijajinijia puetunu nia panishanojuanaa nia jitianocoriquiano pueyaracaanu. Naacuajitij, niaari pueyaracaanu socua queraatia jitianajaca quiniutianiya, tamasaca nia niquitiojonurajuhuj, nojori jaara jitianacquiriquia nojori panishano. <sup>9</sup> Naa jaara naa capora quiriquiatej, niaari nio tariucuacaanu Pueyaso Rupaa naajiotasano tohuateenutaniya. Naa sequeyari:

“Maninia pueyanoori juhua capora nareja niquitiojojua na casamijiniji casamijiuucua pueya. Na miishanoori pueyaracaanu maninia quiniutianiya Pueyasora. Majaari Pueyaso niyajetanu quiniutianiya”.

<sup>10</sup> Pueyano natasacari casaa jajau na cuhuariquiajinia, Pueyasoori na canijiaquiaa. Naacuajitij, na camaruuri socua jitianutaniya tamacari na natasocoriquianohua, na miaquesocoriquianonio. Naajuhuj, juhua capora nia niquitiojosacari nia jitiananojiniji, niaari juhua nia cuhuariquiajinia nataa. Naacuajitij, Pueyasoori nia jiyatenutaniya socua queraatia jitianajaca nia quiniuria, pueyaracaanu maninia nia miiniuria tamasacarahujuhuj. <sup>11</sup> Naa capora nia quiniuucua nia casaatatej, Pueyasoori juhua capora nia niquitiojonutaniya puetunu na jitiananojinijijianaa, queraatia nia jitianura, tamasaca nia niquitiojonura pueyaracaanu. Naacuajitij, canaa jaara nia niquitiojosano cumaneeca tiuquitiasee Judea jiyajiniani, parta Pueyaso pueyari Pueyaso timitianutaniya. Capora nia quiniuucua, nojoriiri Pueyaso sequenutaniya, “paacarasho”. <sup>12</sup> Naacuajitij, nojori jaara



masere nojoririano nia jiyarosano cumaneeca, majaari saaja nojori jiitianu quiniutianiya nojori panishano. Cunoori saniya nojori shiniujiuniutianiya nojori shuquiritiniuria Pueyaso, queraatia nojori sequesacari: “Paacarasho Pueyasonaa”.<sup>13</sup> Nojori jiitiasacari puetunu nojori panishanojuanaa, nojori-iri Pueyaso maniniuhuaqueetanutaniya jiyanoehua. Nojoriiri naa maniniuhuaqueetanutaniya Pueyaso, nojori niishishacari niaaqui seetanujuanaa Jesucristo Rupaa tojitiajacajuhuaaj, naajaa, taucuaca nia quishacari nojoriria. Nojoriiri Pueyaso maniniuhuaqueetanutaniyajuhuaaj jiyanoehua capora nia quiniuucua nojoriria, tamasacaranio.<sup>14</sup> Nojoriiri Pueyaso seconutaniya niaacuarajuhuaaj, jiyanoehua nojori paniniutia niajaniya, Pueyaso jiyatenuucua niajaniya nojori panijiaca nia quiniuria.<sup>15</sup> Naajuhuaaj, janiyari jiyanoehua Pueyaso sequeyani, “paacarasho”, jiyanoehua maninia na miiniuucua niajaniya, Neyanu Jesucristo jataniniuucua nioojia.

## 10

*Pablo cuaara tojishaaria, Jesucristo jiyatenuucua nojuaja na rupaa pohanara*

<sup>1</sup> Janiyacuajaari Pabloni. Quenaaja cua tojitiare. Cua Jiyaniijia Cristoori jiyanoojia quiquiaaricuaa, jacaria pocuajajuhuaaj. Janiyari naa quiniupaniyajuhuaaj. Naaratej, janiyari quiarijia nia nenecojiyani, cua tojitiare quenaaja. Tamasacanaari cua pocuaquiaa, janiyanaari jacaria pocuaja quiquiaa juhua puerejani, nia tajinia cua quishacari. Saniniuujia, tucacaanu cua quishacari, janiyanaari jiyanoehua nia nacasuquiaa cua naajioneejiniani, juhua nia pueresano jiyaniijia.<sup>2</sup> ¿Seetanutejanaa, janiyate naani? Janiya jaara naa quiya niaarani, naajaa. Quiarijia tucacaanu cua quishacarijia, janiyari nio cua naajiojinia nia nenecojiyani, nia tojiniuria janiya. Saniniuujia, niaacua cua tiuquishacari, janiyari noo pojori nacasunutaniya jiyanoehua, sacuaraatia cucuara rimiaaquenuuquiaani. Janiyari naa miiniutianiya nojorini, nojori jaara tarinitiaaquiyajaa naa sacuaraatia na pocoojontej. Cuno pojoriiri jiyaniya canaari saaja juhua mijiria quiniaa pueya miiquiaani, maninia canaa quiniuria nia niquiara.<sup>3</sup> Seetanujuanaacuaaquinatejaj, canaari nareja pueyani. Naajaa, majaari canaa miaquejonu quiquiaa canaa paraa, taa pueya miaquetoojoquiaacuaani.<sup>4</sup> Mijiria quiniaa pueyari miaquetoojoquiaa cutara tama nojori shipinishano casaatajaaja. Canaa miaquetoojotaja saniniuujia, cunoori Pueyaso cumaacajanaa cutara. Naacuaajitij, canaa naata Sesaaca niishishano shocotanu.<sup>5</sup> Pueyaso cumaacata, canaari mijiria niishijiaca niishishano shocotaquiaani. Cuno niishishanoori Pueyasojiniji niishishano jataniquiaa juucua, maja pueya niishiniuria Pueyaso. Naajaa, Pueyaso cumaacata, canaari puetunujuanaa najuhuaana pueya niishiriojosano jataniquiaani, Cristo tojijiaca nojori quiniuriajuhuaaj.<sup>6</sup> Canaacuajaari Pueyaso jeenucuasano pueyani, canaa nacasunura puetunu tojiyashijiacaajanaa. Naacuaajitij, niaa jaara puetunu Pueyasojiniji canaa niishitiojosanojuanaa tojitiajacara quiriohua, na nuhuaji cutara canaa naata puetunu cureeno tojiyashijiacaajanaa saniitionu.

<sup>7</sup> Niaari tama cushitiiquiaajaacujua nia tiuushacari cuno sapojonuujuaca pohanatanooocua. Nojoriiri sapuenu juhua Jesucristo jiyaramiquishano niquishiya najuhuanaj. Maninia nia niishiriojore pueyanaa, niajaniya cante sapojosaacanucujani. Niaa jaara niishiri niaari seetanujuanaa Cristo saquiriojosano pueya, naacuaajitij, niajaniya cuaara niishiria canaari Cristo saquiriojosano pueyajaniuhuaaj.<sup>8</sup> Niaa jaara jiyaniya janiyari juhua pueya shocotaja nia sequesacari: “Canaari nia jiitianaani”,

naajaa, majaari cua caririquiniu naa cua sequesacari niajaniyatej. Pa Jiyaniijia Cristojuanaacuajaari canaa jiyatequiaari nia jiiitanaa canaa quiniuria. Canaari naa jiyatesaaquiaarini, canaa cumaquiniuria niajaniya na rupaata, seetanujuanaa Cristo pueya nia quiniuria. Majaari canaa jiiitanu najuhuana na cumaaca, canaa sesonura niajaniya. <sup>9</sup> Naa cua naajiosacari niaacuaratej, majaari nia jiyaniniu janiyari nia piriyojiyani nia puerenura janiya. <sup>10</sup> Tamasaca niajaniyajiniinio pueyanaari cua sequequiaajuhuaaj: “Pabloori puera jiyanoehua pa nacasuquiaa na naajioneejinia. Naajaa, pa tajinia na quishacari, nojuajaari juhua tojishoo pueyano niquishano quiquiaa. Naajuhuaaj, na pohuatasacari pa niquiara, na pohuatasanoori maja shanohua tojishano”. <sup>11</sup> ¿Seetanutejanaa? Cante naa pocuaquiaani, nojuaja cuara niishiiria quiaritia, taa canaa naajiocanu niaacuaracuaja tucuacaanu canaa quishacarijiani, canaari naa miiniutianiyani niaacua canaa tiuquishacari.

<sup>12</sup> Cuniqiu niaata quiyajaariuhua tamasaca pueya, canapuate nia sequequiaacuajani, nojoriniaari socua maninia Pueyaso rupaa pohuatanaa tamasacajiniiji, canaajiniijiiuhuaaj. ¿Nojoritiiri seetanujuanaa socua maninia Pueyaso rupaa pohuatanaa canaajiniiji? Johuaaj. Naajaa. Majaari canaa tacaaniu quiquiaa juhua nojori canaa quiniuria. Cuno pojoriiri tama na cuaqueya timitiacoquiaajaacujua, nojori soosacari narta Pueyaso rupaa pohuatanaa. Nojoriiri naa quijiacatej, nojori jiyanishacari nojori cutaraari socua tojishano pueya tamasacajiniiji. Naa nojori miishacaritij, nojori cutaraari seetanujuanaa mosanucua. <sup>13</sup> Canaa cutara, majaari tamasaca poonijiosano canaa jiyatenu quiquiaa juhua canaa poonijiosano Pueyasora. Canaa cutaraari saaja canaa miishano shuquiritiaquiaani, tee Pueyaso jiyaroquiaari canaacuajani. Nojuacuajaari canaa jiyaramiquiquiaari niaacua Corinto tiacajinia, nia niquiara canaa pohuatanura na rupaa. Naacuajitij, niaari na muerasura quiquiaari. <sup>14</sup> Majaari najuhuana canaa timitianu niajaniya, Pueyaso muerasu nia quiniuucua. Niaacuajaari Pueyaso muerasura quiquiaari canaa pohuatanuucua nia niquiara seetanu rupaajanaa Jesucristojiniiji. Canaa cutaraari seetanujuanaa Pueyaso rupaa pohuatanu coteetanaa nia niquiarani. <sup>15</sup> Majaari canaa shuquiritianu najuhuana niajaniya. Canaa cutaraari nia tiuutiquiaari Jesucristoocuaani, niaacua Pueyaso jiyaronuucua canaa. Naajaa, canaari socua nia pohuatanu paniya Pueyaso rupaani, seetanujuanaa Jesucristo rupaacua tiuujiaca nia quiniuria. Naacuajitij, niaa jaara seetanujuanaa Pueyaso rupaa tojjiaca quiri, niaari saniniuujia na naata canaa cumaquiniu. <sup>16</sup> Niocua canaa cumaquiri canaa quianura tamaqui, tee Jesucristojiniiji pohuatasoojua quiyacuajani, tii canaa pohuatanura nojuajiniijiiuhuaaj. Majaari canaa quiniu paniniu pootia tamasaca poonijiosaqui, taa cuno rimiaacoori quiquioya shuquiriatia canaa poonijiosaquicuaani. ¿Nojori shuquiritiasanoteeri tama nojori poonijiosanojuaja? Maja. Niaacuajaari Pueyaso muerasura quiquiaari canaa nia tojitianuucua.

<sup>17</sup> Pueyanaa, nio tariucuacaanu naajiotasanoori niaara, nia niishishocoriquiano. Naa sequeyari: “Cante shuquiriatia quijia quiniu paniyani, nojuaja cuara pa Jiyaniijia shuquiritiaara cutara”. <sup>18</sup> ¿Taa nia sequeyani pueyanaa? ¿Cana Pueyaso sequenutaniya socuaarini: “Quiaa cutara maninia cua pueyanoniyojua”? ¿Cunotee, tama na cuaqueyajaaja sequejani: “Janiya cutaraari maninia Pueyaso pueyanoni”? Maja. Pueyaso shuquiritiasano cutaraari noo pueyano, cana pa Jiyaniijiajanaa sequenutaniyacujani: “Quiaa cutaraari maninia cua pueyanoniyojua”.

# 11

## *Pablo pohuatasano na paraajiniji*

<sup>1</sup> Pueyanaa, cua tojitiuri nareja. Juhua paateca tama cua cuaqueyajiniji-jiaaja nia pohuatanu paniyanijia. Naajaa, quenaaja nia rejeretare janiya. <sup>2</sup> Janiyari jiyanoehua nia tacaatiaquiaani, saaja Jesucristora nia quiniuria. Niaacuajaari niishiya, naatej, taa pueyano cojuaacuaa neyatuniyojua canu-ucujini, saaja na camiriquiano pueyanora na quiniuria, naajuhuj, janiyari nia cojuanu paniyani sesosoo nia quiniuria nia Jiyaniijara. Cristocuajaari juhua nia niyacarano. Nia jiiitiana cua quishacari, janiyari juhua nia queni. <sup>3</sup> Tarijia, niaacuajaari saaja Cristo tojitiajaca quiquiaari, na panijia nia quishacari. Quiarjia saniniuujia, janiyari Sesaaca nia pueretaani, nojuaja mariqui nia sapojoreeri Cristoocujia nia rupatenura, taa cuno Susanacu sapojoquiaari Eva tariucuacaanucuaani. <sup>4</sup> Cuno sapojonuujua tuuquijiosacari niaacua, tamaatia nojori pohuatanura Jesujiniji niajaniya, niaari jaarajaaja ritia na tojiquiaa. Nojori niishitiojosanoori tojetaarucujanaa tamaatia canaa niishitiojosanojiniji niajaniya. Nojori nia tojishacari, niaari juhujaniya samaruhua niishishano tojitiaquiaajuhuj. Niaacuajaari tari tiuquiaari Jesucristoocua, Pueyaso jiyanooniuria niajaniya. Saniniuujia, cuno pojori pohuatasacari tamaatia, taa nia miiniutianiya Pueyaso pueya nia quiniuriani, niaari jaarajaaja ritia nojori tojiquiaajuhuj. <sup>5</sup> ¿Cuno sapojonuujucateeri socua tojishocoriquiano janiyajiniji, niaa na jiyatecanu juhua seetanujuanaa Pueyaso jiyaramiquishano pueyarani? ¡Janiyara maja! <sup>6</sup> Seetanujuanaa, majaari cua niishiniu maniniuhuaqueenu cua pohuatasacari Pueyaso rupaa, taa cuno pojoricuaani. Naajaa, Pueyasojiniji cua niishishano cutaraari seetanu rupaaajanaa, tojishocoriquiano cutara. Maja najuhuanaj. Niaacuajaari cuno niishiya, pueyaracaanu saaja maninia cua miishacari nia niquiara, cua pohuatasanojinijinio.

<sup>7</sup> ¿Casaara nia tojitiaa cuno pojori quiarjianijia, majaari saniniuujia nia tojitianu janiya? ¿Janiyateeri sesa miiquianu niajaniyani, cua masejoyaquiniucua nia cumaneeca cua pohuatanuucua Pueyaso rupaa, Pueyaso pueyara nia jatanishaanura? Janiyacuajaari tama cua cuaqueyajaaja mueyashitiquiaarini cua cumaquiniuria niajaniya. Naa cua miiniuucuatej, ¿cunoteeri sesa niaara? <sup>8</sup> Janiyari tamonu jiyacajinia Pueyaso pueya maapuejiniji masejoquiaari cumaneecani, cuno cumaneecata cua quianura niaacua, nia niquiara cua pohuatanura Pueyaso Rupaa. <sup>9</sup> Saniniuujia, nia tajinia cua quishacari, cua jiiitaaquishacari cua panishano, naajaa, maja cutaraari cua mashiniquijionu quijia nia cumaneeca. Naa cua jiiitaaquishacari cua panishanotej, Macedonia jiyajinijinio parta Pueyaso pueyari namitia tiuquijioquiaari. Nojori cutaraari cumaneeca cua niquitioquiaari, cua panishano cua masetajara. Janiyari naa pueyaracaanu tama cua cuaqueyajaaja cojuaquiaani, maja cua taajetenura niajaniya cua panishano cua jiiitaaquishacari. Janiyari naa miiniutianiya pueyaracaanuni. <sup>10</sup> Cua Jiyaniijia Cristocuajaari niishiya, majaari quenaaja cumaneeca cua masejonu quiquiaari Acaya jiyajinia quiniaa parta Pueyaso pueyajiniji. Naacua-jitij, majaari quenaaja niquiriyatu pueyano Acaya jiyajinijinio naata sequenu janiya: “Pablocuajaari cumaneeca mashiniquijiojua canaajiniji”. <sup>11</sup> Pueyanaa, ¿niaate niishiya casaara pueyaracaanu cua sequequiaani, maja cumaneeca cua masejonu quiquiaa Acaya jiyajinia quiniaa Pueyaso pueyajiniji? Naa cua sequesacarij, ¿janiyateeri nia paniyaquiyani? ¡Maja! Pueyasocuajaari niishiya, janiyari jiyanoehua nia panijiani.

<sup>12</sup> Nia sequereera casaara cua mashiniquijiyacuquiaa nia cumaneecani, cua pahuatasacari Pueyaso rupaa nia niquiara. Cuno pojori, nia jiyanihano Pueyaso jiyaramiquishano pueyani, nojoriiri nia jiyajenetenu paniquiaa. Nojoriniaari seetanujuanaa Cristo jiyaramiquishanojuhuj, taa canaacuaani. Saniniuujia, nojori mashiniquijiosacari nia cumaneeca, nojori nia niquitiojonura nareja, naacuajiti maatia niishishiyari, ¡nojoriiri jiyanohua tamaatia canaajiniji! Naaratej, majaari quenaaja canaa mashiniquiniu quiniutianiya nia cumaneeca, canaa pahuatanuucua Pueyaso rupaa niajaniya. <sup>13</sup> Seetanujuanaari, ¡nojoriiri maja Cristo jiyaramiquishano pueya! Nojoriiri tama nojori cuaqueyajaaja jiyatecanu sapuenu juhua Cristo jiyaramiquishano pueya nojori quiniuria. Naacuajitij, nojoriiri nia sapojiya. Nojoriiri sapuenu juhua Cristo jiyaramiquishano pueya niquishano najuhuanaj. <sup>14</sup> Cunoori maja jiyajeneta naa nojori miiniuriatej. Satanáscuaajaari tama na cuaqueyajaaja jatanijia shacantuucara, juhua Pueyaso seru na niquishaanura, pueya na sapojonura. <sup>15</sup> Naaratej, majaari cua jiuujiatenu cuno pojori jaara tama na cuaqueyajaaja jiyatecanu juhua seetanujuanaa maninia miijiaca pueya nojori quiniuria. Nojoriiri naa miiquiaa, Satanás seya nojori quiniuucua. Naajaa, ¡nojoriiri saniitiosaanutaniya sesa nojori miiniuucua!

*Pablo pahuatasacari naquiya na miiniujiniji, Cristo jiyaramiquishano na quiniuucua*

<sup>16</sup> Socua nia sequenu pacuteyanijia, majaari nia jiyaniinu janiyari paatecani cua pahuatasacari tama janiyajinijijiaaja. Niaa jaara jiyaniya janiyari seetanujuanaa paatecani, naajaa, rupaquijia cua tojitiare quenaaja. Janiyari juhua paateca tama janiyajinijijiaaja niaara pahuatanu paniyajaaniuhuj, taa nia tojishano pueya miiquiaacuaani. <sup>17</sup> Naa cua pahuatasacari tama janiyajinijijiaajatej, cunoori maja cua Jiyaniijia Cristo pahuatesano janiya. Cunoori tama cua pahuatasanojuaaja, juhua paateca cua quishacari. <sup>18</sup> Naatej, taa queraatia Pueyaso rupaa pahuatanaa tama nojorijinijijiaaja pahuatanuuquiaacuaani, janiyari quiarijia naa tama janiyajinijijiaaja pahuatanu paniyajuhuj. <sup>19</sup> Jiyanohua niishijia nia quishacari, niaari cuno paatecoori tojitiaquiaa juhujaniya. Naatej, taa nia tojitiaquiaa cuno pojoricuaani, quiarijia cua tojitiarejuhuj. <sup>20</sup> Naajuhuj, niaanaari juhujaniya rejeretaquiaa cuno pojori, nojori jaara nia poonijotequiaa juhuj nojori seya. Niaanaari nojori rejeretaquiaa nojori jaara nia jiiitasano casami riutiocojoquiaa niaacuaji. Juhua nia jiyaniijia nojori quishacari, niaanaari nojoriicua shiniuquiquiaa saaja, naajaa, nojori soosacari niajaniya. Niaanaari juhujaniya nojori rejeretaquiaajuhuj, nojori jaara nia jiquioco maseteriquia. <sup>21</sup> ¡Nojoriquiiri jiyaniijianucuajanaa cutara! Saniniuujia, janiyari nojori naaqui caririquiyani juhua nojori cua quiyaquiniuucua, maja naa canaa miiniuucua niajaniya, taa nojori miiquiaa sesa niajanuyacuani.

Naajaa, quiarijia cutara, janiyari tama janiyajinijijiaaja pahuatanutaniyani, taa nojori pahuataquiaa juhua paateca tama nojorijinijijiaajacuani. <sup>22</sup> ¿Taa nojori sequequiaani? ¿Nojoritiniaari Hebreo pueya, Hebreo rupaa pocuajacajuhuj? Janiyajuhuj. Janiyari Hebreo pueyanohuj, Hebreo rupaa pocuajanio. ¿Nojoritiniaari Pueyaso saquiriojosano Israel pueyajinijinio? Janiyacuajaari Israel pueyacujinino supuenohuj. ¿Abrahamtenaari nojori supuetana? Abrahamcuajaari cua supuetanajuhuj. <sup>23</sup> ¿Nojoritiniaari Cristo jiyaramiquishano pueya? Janiya cutaraari seetanujuanaa Cristo seruni. Janiyari jiyanohua soyani, juhua paateca naa cua pahuatasacari tama janiyajinijijiaajatej. Naajaa, janiyari seetanujuanaa nia

sequeyani. Janiya cutaraari socua jiyanoehua nojorijiniji poonijioquiaari Cristorani. Janiya cutaraari pueyaracaanu caminiujiushaaquiaari nujuatejojuajinia nujuatejonuni, Jesucristojiniji cua pohuatanuucua. Naajuhuj, janiyari pueyaracaanu caminiujiushaaquiaari majacununi. Naajuhuj, janiyari pueyaracaanu cocuaatia miiquiaarini, pueya monu panishacari janiya. <sup>24</sup> Cuarta Judiocuacaari cua caminiujiuquiaari majacunu puetunu niquiriyatu pa juaashiquiajanaa. Cuarta Judiocuaca majacusacari, nojoriiri na majanu serojoua. Nojori majasano jaara treinta y nueve quiri, nojoriiri jiyacari carteja na majacusano pueyano. <sup>25</sup> Naajuhuj, janiyari jiuujianaraca caminiujiushaaquiaari macata piquiniuni. Tamacari, janiyari saitia jacusaaquiaarini. Shoniacu caminiajinia cua jaaretasacari buquejinia, jiuujianaraca buqueeri tiuquitiaquiaari. Naa tamacari buque tiuquitiasacarijuhuaj, janiyari na raucua cuataquiaarini puetunu niucujanaa, niquiriyatu juucanio. Cunoori quiquiaari puereeta shoniacu caminia jiuujiajinia. <sup>26</sup> Janiyari pueyaracaanu tiquiyocua rucanejojua quiquiaarini. Naacuajitij, moocua cua niuniujiushacari, janiyari cocuaatia miiquiaarini. Naa cua rucanejosacaritij, janiyari pueyaracaanu puereeta nohuasenuujuaca quishaqui shocoquiaarini. Naajuhuj, tama cuarta Judiocuacajaarijia pueyaracaanu cua miitianu panijia, taucucanio. Puereetaari quiquiaarijuhua cua rucanejosacari tiacajinia, tiquiyocua pueya quiaquishaqui, shoniacu caminiajiniano. Naajuhuj, puereetaari quiquiaari janiyara, cua jyanishacari janiyari cuarta Pueyaso muerasu tajinia quiyani, saaja cua paraa nojori quishacari. <sup>27</sup> Jiyanoehua cua poonijosacari cua Jiyaniijiaa cua samareenuta, janiyari pueyaracaanu sutequiaarini. Janiyari miaajequiaarini. Janiyari jiyamuequiaarijuhuaj. Janiyari noojiaqueya miaqueyaquiquiaarijuhuaj, jeya cua quiaquishacari. Janiyari naquiya miiquiaari cua rucanejosacari shiniquiajiniajuhuaj, toqueeju cua quishacarijuhuaj.

<sup>28</sup> Janiyari naa naquiya miishaaquiaarini, mariyata tamaatia naquiya miiniujiuhuj. Naajuhuj, janiyari puetunu juucujanaa niishiriojoquiaani, taariquitijia Pueyaso muerasu maapue quia puetunu jiyacajiniajanaatej. Janiyari jiyanoehua nojoriicua tacaquiaani. <sup>29</sup> Naacuajitij, tamonu cuarta Pueyaso pueyano jaara rejeretaquiriquia Sesaaca saniniujiushacari nojuaja, janiyari jiyanoehua taraajeja nocuani. Tamonu jaara sesa miitishaare, janiyari na naaqui caririquiyajuhuj. <sup>30</sup> Naa jaara paniya socua cua pohuatanura niajaniya tama janiyajiniijiaaja, nia pohuatareeraqui pueyaracaanu taraatia cua miishaanujiniji. Tama janiyajaaja, janiyari maja cumueecani. <sup>31</sup> Pa Jiyaniijia Que Pueyasocujaari niishiya janiyari seetanujanaa sequeyani. Nojuajanaa cuara pueyaracaanu maniniuhuaqueetasaaria cutara, maja nojuajiniji pohuatanaa. <sup>32</sup> Tarijia, Damasco tiacajinia cua quishacari, tamonu pueyanoori Damasco tiaca jiyaniijia quiriquiaa. Nojuajaari cuno jiya jiyaniijia Aretas jiyatesano quiquiaari, Damasco tiaca jiyaniijia na quiniuria. Cuno jiyaniijiaari na soldadoehua nujuatejoquiaari tiaca shocua sohuaca tohuateyaji, nojori quianura juucua janiya. Nojoriiri cua quiatunu paniriquiaa Jesucristojiniji cua pohuatanuucua. <sup>33</sup> Naajaa, cuarta Pueyaso pueyari namitia cua roshinitiaquiaari shuquiriaatia, puereetucua canaasatujinia, cuno tiaca sohuaca tacuhua shuucujaji. Janiyari naa mashiquishaaquiaari cua paraacuajini.

## 12

*Pablo pohuatasano Pueyaso niqutishanojiniji nojuaja*



<sup>1</sup> Paa jaara tama pajaniyajiniji pohuatariquia juhua paatecani, cunoori najuhuanaj. Naajaa, socua nia pohuatareeraj. Nia pohuatareera taa cua niqutishaaquiaari pa Jiyaniijia casaa jiyocuacaanuni. <sup>2</sup> Tariucua Jesucristoocua tiuujia cua quishacari, janiyari jiya cajiniocua cacojiria tacanishaaquiaari Pueyaso quiquiojiniarani. Naa cua tacanishaanujinijitij, tari shocojorucuaari catorce marijia. Majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuanu soj. Johuaj. Saaja Pueyasocuaajaari na niishiya. <sup>3</sup> Cua tojitiare, seetanujuanaa majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuanu soj. Pueyasocuaajaari na niishiya. <sup>4</sup> Janiyari saaja niishiya cutarani, janiyari shuquiriaatia quishaqui Pueyaso shuriucua tiuquinishaaquiaarini. Janiyari tii casaa tojiquiaarini. Cunoori maja quenaaja na naata pohuatasaanu mijiria quiniaa rupaajinia. Pueyasoori cua tenujuquiaari maja cua caminiujiuniuria jiyocuacaanu cua tojishano mijiria quiniaa pueyara. <sup>5</sup> Naa Pueyaso niqutiniuucua janiyatej, janiya maara tama janiyajinijijiaaja poojotariquia cua timiniutiani, juhua tamasaca shocotaja cua quishacari. Naajaa, majaari cua timitianu tama cua cuaqueyajaaja. Saaja shuquiriaatia quiya cutaranijia, cua niishishacari majaari cua naata tama cua cumaacatajaaja rejeretanu taraatia cua miiniu. <sup>6</sup> Naajuhuj, janiya jaara tama janiyajinijijiaaja pohuatanu paniriquiani, cuno maara seetanujuanaa pohuatasano quiriquia, maja juhua paateca pohuatasano. Seetanujuanaa majaari naa cua pohuatanu paniniu, pueya mariqui cua pohuatasanojiniji cua jiyaniriiri janiya jiyanoehua maninia pueyanoni. Pueya cuara niishiiria cutara taamueca pueyanote janiyani, saaja nojori namijiata nojori niquishacari cua miishano, tama nojori numatajaaja nojori tojishacari cua niishitiojosanojuhuj. <sup>7</sup> Pueyaso niqutishano janiyani, na niishitishano janiyajuhuj, cunoori puera jiyanoehua maninia quiquiaari. ¡Cunoori jiyanoehua cua timitiquiaari! Naaratej, janiyari cua cuaqueyajinia nootusaaquiaari juhua jihoecatani, janiya mariqui pueya shocotajara quiiri. Cuno taajeta noonuuri Satanás miishano quiquiaari, na tacaatiniuria janiya. <sup>8</sup> Janiyari jiyanoehua secojoquiaari pa Jiyaniijiani, nojuaja cuara shaataara cua nootunenu. Janiyari jiuujianaraca pacutejoquiaari secojonuni. <sup>9</sup> Cua Jiyaniijiaari saaja cua sequequiaari: “Janiyacuaajaari quia cumaquiniutianiyani, cua panishano pueyano quia quiniuucua. Saaja cunocuaajaari quiara. Cua naatacuaajaari socua jiyanoehua poonijiotenu cua cumaaca sasaca cua pueyajinia, tamasaca niishiniuria cunoori seetanujuanaa cua cumaaca, maja pueyano cumaaca”. Naa cua Jiyaniijia riucuasacari janiyatej, janiyari shuquiriaatia quiyani cumaacaaju pueyano cua quiniuucua pueyaracaanu. Naacuajitij, Cristo cumaacaari socua janiyajinia niquishaaquiaa poonijiyano. <sup>10</sup> Naacuajitij, janiyari shuquiriquiaani cumaacaaju pueyano cua quiniuucua, Pueyaso cumaquiniuria janiya. Naacuajitij, tamasaca jaara sacuaraatia casaa sequeriquia janiya na juaashacari, janiyari Pueyaso cumaacata juhujaniya na rejerequetaqiaani. Naajuhuj, janiya jaara cua panishano jiiitiaaquiriquiani, naajaa. Pueyaso cumaquishacari janiya, janiyari juhujaniya rejeretaquiaani. Naajuhuj, janiya jaara naquiya miitiasaaquiaani, taraatia cua miishacarijuhua Cristora cua poonijionuucua, naajaa. Pueyaso cumaacata, janiyari juhujaniya rejeretaquiaa saajani. Naacuajitij, janiya jaara tojetaarucujanaa cumaacaaju quiquiaani, janiyari jiyacari socua jiyanoehua cumaacaraca quiquiaani, Pueyaso cumaquiniuucua janiya.



*Pablo tacaashacari Corinto tiacajinia quiniaa Pueyaso muerasu maanuu-cua*

<sup>11</sup> Janiyari seetanujuanaa juhua paateca tama janiyajiniijiaaja pahuatareeni, juhua pueya shocotaja. Niaacuajaari naa cua pahuateree, niaacuaja naara cucuaji tacuyaquiquianu cua sesacaja pueyatej. Janiyanaari najuhua quijia pueyanoni. Naajaa, niaacuajaari niishiya, janiyari maja socua najuhua quijia cuno pojorijinijini. Cuno pojori nia tojishano pueyani, nojoriiri tama na cuaqueyajaaja jiyatecanu juhua seetanujuanaa Jesucristo jiyaramiquishano pueyara cutara. <sup>12</sup> Juhua janiya cua rejeretasacari naquiya cua miiniu nia tajinia cua quishacari, naajaa, janiyari pueyaracaanu jiyajeneta casaa miijioquiaari Pueyaso cumaacata nia niquiarani. Niaari nocuaji jiuujiatecoquiaari. Naacuajitij, niaa cutaraari niishiquiaari janiyari seetanujuanaa Cristo jiyaramiquishano pueyano cutarani. <sup>13</sup> ¿Janiyateeri sesa nia jiitiaquiaarini, Pueyaso rupaa cua niishitiojosacari niajaniya? ¡Maja! Janiyari nia miiquiaari maniniani, naajuhua, taa cua miiquiaari tamasa jiyacajinia quiniaa Pueyaso pueya maapuecuaani. Majaari rimiajata cua miiniu quiquiaari niajaniya, niaata cua quishacari. Maja cutaraari cua mashiniquijionu quiquiaari cumaneeca niajaniyajiniji. ¡Cua jiyanoori cunora, jaara sesa quiquiaari niajaniyara!

<sup>14</sup> Quiarijiani, janiyacujaari quera quiaa niaacuani. Janiya jaara niaacua quiaareni, cunota quiniutianiyari jiuujianaraca cua pacutenu niaacua cua quianu. Majaari nia jiyaniniu janiyari nia cumaneeca mashiniquijionucua quianutaniyani. Janiya cutaraari maja cua jiaatianu nia jiiitasano casamiicua. ¡Janiyari saaja niaacua jiaatiaa cutarani! Niaacuajaari juhua cua muerasuniyojua. Niaacuajaari maninia niishiya, muerasuuri maja na reratenu cumaneeca na quera. Na que cutaraari saniya cumaneeca rerateja necohuara. Naacuajitij, cua mashiniquijiyacuquishacari cumaneeca niajaniyajiniji, janiyari seetanujuanaa juhua nia queni. <sup>15</sup> Janiyari shuquiriaatia tama cua cumaneecajaaja puecanutaniyani cua quishacari niaata, socua cua niishitiojonura niajaniya. Naacuajitij, janiyari tama cua cumacajaaja puecanutaniyajuhua, nioojia cua cumaquiniuria. Janiyara, nioori taraatia: janiya jaara socua nia paniquiaani, niaari socua jiyacatequiaa seaja nia paniniuria janiya.

<sup>16</sup> Niaacuajaari niishiya, majaari quenaaja nia niqutionu quijia nia cumaneeca janiya. Naajaa, tamasa niajaniyajinijionaaari soquecoya, janiya naasucuaanaari jiyasohuaja nia cumaneeca nohuasejoquiaani, cua sapojonuta niajaniya. <sup>17</sup> ¿Seetanutejanaa pueyanaa? ¿Janiyateeri nia sapojoquiaari niaacua cua jiyaramiquishano pueyatani? ¿Nojoritiiri nia cumaneeca masequiaari? ¡Maja! <sup>18</sup> Janiyacuajaari Tito jiyaroquiaari niaacua na quianurani, na cumaquiniuria niajaniya. Janiyari nata jiyaroquiaari tamonu Pueyaso pueyanojuhua. ¿Titoteeri jiyacari nia cumaneeca mashiniquiquiaari? ¡Majaruhua! Niaacuajaari niishiya, Titocujaari cumaneecaacua jiaatiaashijia, juhua janiyajuhua. Janiya Titota, canaacujaari jiyanohua nia paniquiaani.

<sup>19</sup> Sacuaraatia canaacuara nia rimiaaquenuucua pueyanaa, naajaa, majaari nia jiyaniniu canaa tama canaacujijiaaja tacuyani, juhua canaa nequesoreena nia quishacari. Saniniuujia, canaari niya Pueyaso niquiara nio naajiya niaacuarani, Cristo pueya canaa quiniuucua. Naajuhua, puetunu cua sequesanojuanaa niajaniya nio cua naajiojiniani, cunoori cua cumaquiniuria niajaniya cua panishano pueyanaa. Janiyari naa nia nacasuyani, seetanujuanaa Jesucristo tojijia nia quiniuria. <sup>20</sup> Janiyari puereyani, niaacua cua tiuquishacari, janiyari niaacua taraajenutaniyani cua riuriasacari niajaniya sesa quiyanojua, maja maninia taa cua

paniriquiaacuajani. Janiya jaara nia riuriatasee naa sesa quiyanojuani, jeecatoojua, niaari saniniuujia taraajenutaniya nia niishishacari taa cua miiniutianiya niajaniyani. Janiyari puereyani niaa naasucuaari juayonuujutaajaa. Niaa naasucuaari niarta pueyano jiitiasanoocua jiaatiajaca quiyajaa. Niaa naasucuaari juaaniu porocua quiyajaa. Niaa naasucuaari tama nia panishanojuaaja miijiaca quiyajaa. Niaa naasucuaari niarta pueyacuara coriaacojuaca quiyajuhua. Naajuhua, niaa naasucuaari niarta pueyacuara rimiaaquenujuaca quiyajaa. Naajuhua, niaa naasucuaari tama nia cuaqueyajaaja jiyaniya niaa socua maninia pueya tamasa pueyajiniji. Niaa naasucuaari jatiqui quiyashijiacajuhua, pueyaracaanu nia juayonuu-jutanuucua. <sup>21</sup> Naacuajitij, janiyari puereyani janiya naasucuaari Pueyaso niquiara caririquiniutianiya nia naaquini, niaa jaara naa sesa miijiaca quiyajaa. Janiyari puereyajaaniuhua, janiya naasucuaari nujuquenutaniya cua taraajenuta noo sesa miijiaca pueyacuani, cuno pojori jaara sesa na miishano tarinitiaaquiquianujua. Noojiaqueya niajanijajinijiniori sacuaraatia miijiaca quiquianujua: cararaatia miijiaca sacuaraatia, na camishoo maaji numuetucunu porocujuhua, naajuhua, majaari tama nojori cuaqueya panishanojuaaja nojori rejetenu quiquiaa.

## 13

### *Socua Pablo nacasusacari Pueyaso pueya*

<sup>1</sup> Nioori quiniutianiya jiuujianaraca cua pacutesacari quianu niaacua. Tariucuacaanu Pueyaso rupaajinia, paari nio niishitiojosaaquiaarini: querajaa pueya jaara mariyata pohuatate nojori niquishanojiniji, pa naata seetanujuanaa na pohuatasanoocua tiuuniu cutara. Naajuhua, niaacua cua tiuquishacari, janiyari naa miiniutianiya nia nequesoreesacari cuno sesa miijiaca. <sup>2</sup> Pueyanaa, janiya jaara pacutequiaariuhua niaacua quianutej, janiyacuaajaari puetunu niajanijajinijinio cuno sesa miijiacajanaa piriyojoquiaarini. Quiarijiani, tucuacaanu cua quishacarijia, janiyari puetunu cuno sesa miijiacajanaa socua piriyojijiani. Naacuajitij, janiya jaara niaacua tiuquishiini, cuno pojori jaara noojia tacatoyaquiyajaa, majaari nojori cua jiuujiaaniu quiniutianiya, narta sesa miijiacanio. <sup>3</sup> Cua nequesoreesacari cuno sesa miijiaca, niaari jiyacari niishiniutianiya janiyari seetanujuanaa Cristo sequesano caminiujuniani, taa nia niishiniu paniriquiaacuajani. Niaacuajaari tari niishiya, pa Jiyaniijia Cristoori maja na jiitianu niajanijia juhua cumaacaju pueyano. Niaacuajaari na cumaaca niquiquiaa tama niajanijajiniaaja na saniitiosacari niajanijia. <sup>4</sup> Seetanujuanaa, Cristoori juhua cumaacaju quiquiaari jaara niyacutesanojinia teetesaaquiaari. Saniniuujia, Pueyaso samiitianishacari nojuaja, nojuajaari quiarijia puetunu Pueyaso cumaacajanaa jiitiaa. Naajuhua, canaa, na rupaa pohuatanaani, canaari naquiya miishaaquiaajaaniuhua saaja mijiria quiniaa canaa quini-uucua, taa nojuaja quiquiaaricuaani. Saniniuujia, Cristo rupuesano canaa quishacari quiarijiani, canaa cutaraari Pueyaso cumaacaracani, maninia canaa jiitianura niajanijia.

<sup>5</sup> Naarate pueyanaa, jacaria nia niishiriojore, ¿niaate seetanujuanaa Jesucristoocua tiuujia, maja soj? ¿Niaate maninia miijiaca taa Pueyaso muerasu miiquiaacuaani? ¿Majateeri nia niishiniu, niaa jaara seetanujuanaa Jesucristoocua tiuujia quiri, nojuajaari nioojiajinia quiya? <sup>6</sup> Naajuhua, jacaria nia niishiriojore canaajiniji. Nia niishitiriquiani, canaari seetanujuanaa Jesucristo jiyaramiquishano pueyani, maja sapojonuujua. <sup>7</sup> Canaari Pueyaso secojoquiaa niaacuarani, tojetaarucujanaa sesa miyashijia nia

quiniuria, maninia Pueyaso muerasu nia quiniuria. Majaari naa canaa secojonu quiquiaa saaja pueya niishiniuria canaa seetanujuanaa Jesucristo jiyaramiquishano pueyani. Canaari saaja nia panitiaa cutarani, maninia miijiaca nia quiniuria Pueyasora. Niaa jaara naa maninia miijiacara quiriohua, majaari canaa saniitionu quiniutianiya niajaniya Pueyaso cumaacata. Naacuajitij, majaari pueya niqiniu quiniutianiya Pueyaso cumaaca canaa jiitiasano. Naajaa, pueya jaara jiyaniya canaa najuhuana quijiaca pueyani, naajaa. <sup>8</sup> Canaa jiitiasano cumaacaari maja canaa saniitotajara seetanujuanaa Pueyaso rupaa tojitiajaca. Canaa cumaaca cutaraari canaa cumaquiniuria niajaniya, socua maninia Pueyaso Rupaa tojitiajaca nia quiniuria. <sup>9</sup> Naacuajitij, canaari shuquiriquiaani niaacua canaa paaretaaquishacari cana cumaaca, cana saniitionura niajaniya niaa jaara Pueyaso tojitaashijiaca quiriquia. Naacuajitij, canaari juhua cumaacaaju pueya niquis-hano quiniutianiya, cumueeca Pueyaso muerasu nia quishacari sanini-uujia. Canaari cunora Pueyaso secojoquiaani, tojetaarucujanaa maninia miijiaca Pueyaso muerasu nia quiniuria seetanujuanaa. <sup>10</sup> Janiyari nio cua naajioneejinia jyanohua nia nacasuyani tucuacaanu cua quishacariija, maja jyanohua cua nacasunura niajaniya, niaacua cua tiuquishacari. Pa Jiyaniijiacuajaari cua jiyatequiaari juhua nia jyaniiija cua quiniuria, na cumaacata cua canashitijionura niajaniya, seetanujuanaa cumueeca na muerasu nia quiniuria. Pueyaso niqitiosano na cumaaca janiyari maja cua sesonura niajaniya.

<sup>11</sup> Cua tucuatanura nio cua naajioni cua panishano pueyanaa, janiyari nia panitiaani shuquiriaatia nia quiniuria pueyaracaanu. Saaja maninia quini-uucua jiaatiajaca nia quiri. Nioojia nia cumaquiri, maninia cua rootasanota. Naajuhuaaj, nia jyanootooriquia maninia rupuetootesano nia quiniuria. Naa nia quishacaritij, Pueyasoori nia rupueja quiniutianiya. Nojuajaari pa panijia, pa jyanoojiajuhuaj. <sup>12</sup> Pueyanaa, Pueyaso tojijiaca nia quiniuucua, nia saruhuaajotooriquia nujuunuta, seetanujuanaa nia paniniutia niarta Pueyaso pueya. <sup>13</sup> Puetunu niquijinio parta Pueyaso muerasujuanaari cua sequeya cua saruhuatanura niajaniya.

<sup>14</sup> Pa Jiyaniijia Jesucristo cuara cumaquiiria niajaniya pueyaracaanu. Niajaniya cuara quiiria pa Que Pueyaso panishano pueyaracaanujuhuaaj. Naajuhuaaj, niaa cuara quiiria Pueyaso Sohuanu rupuesano pueyaracaanu. Puetunu niajanijajanaa cuara naa quiiria.

## PABLO NAAJIONEE GÁLATA JIYAJINIA QUINIAA PUEYASO PUEYACUARA

### *Gálata pueyacuara naajionee*

<sup>1</sup> ¿Niaate quiyajaa pueyanaa? Janiyari Pablóni, pa Que Pueyaso jiyaramiquishano. Janiyari maja nareja pueyano jiyaramiquishanoni. Mijiria quiniaa pueyari maja na jiyatenu quiquiaari janiya Pueyaso jiyaramiquishano cua quiniuria. Jesucristojuanaacuaajaari cua jiyatequiaari na jiyaramiquishano cua quiniuria. Nojuacuajaari na Que samiitianishanohua macujiniji. <sup>2</sup> Niya cuata quiniaa parta Pueyaso pueyatani, janiyari nio naajiyani. Nio cua naajioneeri puetunu Galacia jiyajinia quiniaa Pueyaso pueya maapuerajanaa. <sup>3</sup> Pa Que Pueyaso, mariyata pa Jiyaniijia Jesucristoni, nojori cuara cumaquiiria niajaniya, nioojia cajitishano nia quiniuriajuhuaj. <sup>4</sup> Jesucristoori tama na cuaqueyajaaja panitiaquiaari pocuara na mosaanura. Naacujitij, nojuajaari pa jeequequiaari puetunu sesa pa miishanojinijijianaa. Nojuajaari naa miiquiaari sesa miiniuucua jiaatianu pa cartenura. Nojuajaari naa cusoquiaari pocuaratej, taa pa Que Pueyaso paniquiaaricujani, na muerasu pa quiniuria. <sup>5</sup> Naaratej, pa Que Pueyaso cuara maniniuhuaqueetasano quiiria. Cuaara naa quiiria pueyaracaanutej.

### *Maja tamonu maninia rupaa quiniu socua Jesucristo rupaajiniji*

<sup>6</sup> ¿Taa nia miiquianuni pueyanaa? Quiarijiani, janiyari jiyano hua tacaya niaacuani. ¿Niaateeri ritia cartecanu Jesucristo rupaa, tamaatia niishitiojosano tojitiajaca nia quiniuria? Pueyasocuaajaari Neyanutaja nia cojiritiaquiaari paniniu, Jesucristo miiniuucua maninia niaara, na panishano pueya nia quiniuria. <sup>7</sup> Seetanujuanaa, majaari socua tamonu rupaa quiniu Pueyaso pueyara pa jatanishaanura. Noo juhuari nia cushitiojoquiaa saajatejaj, najuhuaa tamaatia nia niishitiojonuuquiaatej. Nojoriiri Jesucristo rupaa cushitiojoquiaa niaara, nojori tacarojosacari najuhuanaj, mariyateyacato nojori quiniuucua. <sup>8</sup> Cua tojiri pueyanaa, tamonu pueyano jaara pocuaji Tacuna rupaa niishitiojoriquia niajaniya tamaatia canaa niishitiojosanojiniji niajaniya, Pueyasoori na saniitionutaniya. Naajuhuj, janiya jaara tamaatia pohuatatare Jesucristojiniji niajaniyani, jiyocuacaanuji roseno Pueyaso serujuhuj, Pueyasojuanaari canaa saniitionutaniya. <sup>9</sup> Janiyacuajaari naa sequeja niajaniyani. Quiarijia socua pacutero huacuara sequenu nia niishishocoriquiano. Cua tojiri pueyanaa. Niaa jaara tamaatia pahuatasaariquia Jesucristojiniji, maja naate taa tari cua pahuataquiaari niajanuyacuajani, Pueyaso cuara saniitiooranaj.

<sup>10</sup> ¿Niaateeri jiyaniya janiya pueya timitiasano quiniu paniyani? Maja. Janiya cutaraari Pueyaso timitiasano quiniu paniyani. Janiya jaara saaja pueya timitiasano quiniu paniriquiani, janiya maara pa Jiyaniijia Jesucristo seru quiyaquirini.

### *Taa Pablo jatanishaaquiaari Jesucristo jiyaramiquishano na quiniuriani*

<sup>11</sup> Cuarta Pueyaso pueyanaa, nia pohuatatareera cante cua niishitiojoquiaari Jesucristo rupaani, cua pahuatasano niajaniyani. Pueyanaa, nio rupaa janiya na pahuataa niajaniyani, nioori maja mijiria quiniaa pueya niishitiojosano janiya. <sup>12</sup> Taa cua sequeya niajanuyacuajani, majaari nio rupaa

cua niishiniu quiquiaari tamasa pueyajiniji. Jesucristojuanaacuaajaari na rupaa cua niishitiquiaari.

<sup>13</sup> Níaa naasucuaari janiyajiniji tojinuujiacuaja tarijia. Seetanujuanaa cuarta Judiocuaca miishano miijia cua quishacarijia, janiyari Pueyaso saquiriojosano pueya pueconu panijia puetunujuanaani. Janiyari jiyanohua paracaajia nojorini. <sup>14</sup> Janiyari seetanujuanaa canaa supuetanaa niishitiojosano tojjia quijia cutarani, socua cuarta Judiocuaca mashiquiorijiniji. <sup>15</sup> Naajaa, jiyanohua panijia Pueyaso quiniuucua, cua supueyaquishacarijia, inojuajaquiiri tari cua saquiriojoquiaari na pueyano cua quiniuria! <sup>16</sup> Naacuaajitij, tama na panishacarijiaaja, nojuajanaari Neyanu cua niishitiquiaari, Neyanujiniji cua pohuatanura taucuaca. Neyanu na niishitiniu nuhuaji janiya, majaari quenaaja tamasa nequesotanuucua cua quianu quiquiaari, cua niishiniuria seetanutejanaa na niishitishano janiya. Pueyasocuaajaari maninia cua niishitiquiaari puetunujuanaa Neyanujiniji. <sup>17</sup> Naajuhua, majaari cua quianu quiquiaari Jerusalén tiacajinia, tii cua niquiniuria cuarta Jesu jiyaramiquishano pueya. Nojoriiri coteenujuanaa Jesu jiyaramiquishano pueya quijia. Jiyacaritij, majaari quenaaja cua tarishiniu quiquiaari Damasco tiacajinia. Janiyari ritia quiaquiaari pueya quiaquishaqui Arabia jiyajiniani. Na nuhuaji, janiyari tacatequiaariuhua Damasco tiacajinihuani.

<sup>18</sup> Jiuujianaraca marijia cua shocotejonu nuhuaji Damasco tiacajinia, janiyari shusha jiyacari quiaquiaari Jerusalén tiacajiniani, Pedro cua niishiniuria shushajanaa. Nata cua quishacari, quince juucaari cua shocojoquiaari tiini. <sup>19</sup> Jiyacaritij, majaari socua Jesu saquiriojosano pueya cua niquiniu quiquiaari. Janiyari saaja Santiago niquiuciaari cutarani. Nojuacuajaari pa Jiyaniijia Jesu tarajanu. <sup>20</sup> Pueyanaa, Pueyasocuaajaari niishiya, janiyari nio cua naajiojinia seetanujuanaa nia pohuataani.

<sup>21</sup> Na nuhuaji, janiyari quiaquiaari Siria jiyajiniani, Cilicia jiyajiniano. <sup>22</sup> Saniniuujia, Judea jiyajinia Jesu tojitiajaca maapueeri juhuanojuaja maja na niishitiniu quijia janiya. <sup>23</sup> Nojoriiri saaja naa poojotasaquiaari janiyajinijitij: “Noo pueyano tarijia pa miitiaja naquiya Jesujiniji pa pohuatasacariitij, nojuajanaari quiarjia pa Jiyaniijiajiniji pohuataa pueya niquiara-juhua”. <sup>24</sup> Naa nojori tojinuuushacari janiyajinijitij, nojoriiri Pueyaso maniniuuaqueetaquiaari nojori paraca na jataniniuucua Jesu rupaa pohuataana na quiniuria.

## 2

*Jesu jiyaramiquishano pueya niishishacari, Pablo seetanujuanaa Jesu jiyaramiquishano pueyanojuhua*

<sup>1</sup> Catorce marijia jaara shocojoquiaari, janiyari Bernabeeta Jerusalén tiacajinia pacutequiaariuhua quianuni. Janiyari jiyacari Tito rupoquiaari cucuajuhua. <sup>2</sup> Pueyasocuaajaari cua toquiaari cua quianura Jerusalén tiacajinia. Janiyari cunora quiaquiaarini. Tii cua quishacari, janiyari Jesu tojitiajaca jitianaa pueyata rerejoquiaarini. Maja seetanu puetunu nojortiajanaa, saaja nio pojortia: Santiago, Pedro, Juannio. Janiyari saaja cunopojoiri niquiara pohuataquiaarini taa cua pohuataquiaa Jesujiniji puetunu taucuacajanaacuajani. Na nuhuaji, janiyari nojori nequesotareeni: “¿Taa nia sequeyani pueyanaa? ¿Janiyate najuhuana sesa niishitiojiya taucuacani?” Cua sequeteeri: “Maja. Quiaacuaja seetanu rupaajanaa niishitiojiya taucuaca, naa Jesucristojiniji quia pohuatasacari nojori”. <sup>3</sup> Naajuhua, parta

Pueyaso pueyano Titoni, cuata quiquiaari tiini, nojuajaari Grecia jiyajini-jinio tahue. Naajaa, majaari na sequesaanu quiquiaari na cararaatiuuquia co miatesaanura, seetanujuanaa Pueyaso pueyano na quiniuria. Nojuajaari maja naa na sequesaanu quiquiaari. Canaa rerejosacari Pueyaso pueya jiiitianaata, nojoriiri Tito niqiuquiaari nareja, nojori na rupuenurajuhuaaj. Nojoriiri niishiquiaari nojuajaari seetanujuanaa Pueyaso pueyanojuhuaaj, saaja Jesucristoocua na tiuuniuucua. <sup>4</sup> Saniniuujia, noojiaqueya canaa Judiocuacajiniiniori tama nojori cuaqueyajaaja jiyatequiaari juhua Jesu tojijiaca pueyara, nojori cojiniuria canaa. Nojoriiri naa canaa rupuequiaari na sapojonuta. Canaata nojori quishacari, nojoriiri canaa shanacutaja nojori niishiniuria canaate seetanujuanaa Pueyaso muerasuni, saaja Jesu-ucua canaa tiuushacari. Nojoriiri juucua canaa jiyatenu paniquiaari tari-ucuaaanu Moisés Rootasano tojijiaca canaa quiniuhuaa. <sup>5</sup> Canaari nojori niishitiojosano pataquiaari saajani. Majaari quenaaja shiitianiyojua nojori rootasano canaa tojiniu quiquiaari. Canaari naa miiquiaarini seetanu Jesu-cristo rupaajanaa canaa cojuanura niaara, seetanujuanaa Pueyaso muerasu nia quiniuria saaja Jesucristoocua nia tiuuniuucua. Majaari canaa cojitiniu paniniu quiquiaari Jesucristo rupaa, tariucuacaanu niishitiojosanota.

<sup>6</sup> Cuno pojori Pueyaso pueya maapue jiiitianaa Jerusalén tiacajiniani, nojoriiri jiyanojua tojishano pueya quijia. Janiyara naajaa. Pueyasocua-jaari najuhuaa quijia jiyanoquiaajuhuaaj, taa na jiyanoquiaa tojishano pueyacuaani. Naajaa, cuno tojishano pueya jaara tojiquiaari taa cua pohuataquiaa Jesucristo rupaani, majaari quenaaja niquiriyatu rupaa nojori sequenu quiquiaari, nojori niishitiojonura janiya socua. <sup>7</sup> Nojori cutaraari niishiquiaari Pueyasocuajaari seetanujuanaa cua jiyatequiaari Judiocuaca niqiuara pohuatana na quiniuriacuaani. <sup>8</sup> Pedro Jiyatena Judiocuaca niqiuara Jesucristojiniji pohuatariquianoni, cuno Pueyasojuanaacuaajaari cua jiyatequiaarijuhuaa taucuaca niqiuara pohuatana cua quiniuria. Naacujitij, canaari mariyata Pueyaso jiyaramiquishano pueyani.

<sup>9</sup> Santiago, Pedro, Juannio, nojoriiri socua tojishano quijia puetunu Jesuucua tiuuniaa cuarta Judiocuacajiniinijuananaa. Nojoriiri seetanujuanaa puetunu Pueyaso muerasu jiyaniijianucuaajanaa quijia. Naajaa, nojoriiri seetanujuanaa niishiquiaari Pueyasoori maninia cua jiyanoquiaari, na jiyatenura janiya Neyanujiniji pohuatana cua quiniuria taucuaca niqiuara. Naaratej, nojoriiri na juaashiquia niqutiojoquiaari canaani, janiya, Bernabeenio. Nojoriiri cunota juhua canaa sequeturiquiaa canaari seetanujuanaa nojori cojiniaani. Naa canaa sequetuquiaarijiaariuhuaaj: “Maniniacuaja. Nia quiojiyare taucuacaacua tii nia pohuatanura Jesujiniji nojorijihuaaj. Canaari saniniuujia parta Judiocuaca tajinia poonijionutaniyanijia, nojori niqiuara canaa pohuatanura Jesujinijihuaaj”. <sup>10</sup> Nojoriiri canaa sequequiaarijuhuaaj: “Canaa panishano pueyanaa, majaari nia niyajetanu casamiijuniucua pueya naacunu”. Naaratej cuarta Pueyaso pueyanaa, puetunu tiqiyocuajanaa cua rucuanesacari, janiyari naa miiquiaa seetanujuanaani.

### *Antioquiya tiacajinia Pedro nacasusaanujiniji pohuatasano*

<sup>11</sup> Tamacari, canaa quishacari Antioquiya tiacajinia, Pedroori canaacua niqiuarijuhuaaj, canaata na quiniuria tii. Tii na quishacari canaata, Pedroori sesa miiquiaari cua niqiuara. Cunora, janiyari jiyanojua na nacasuquiaarini. Cuno na miishanoni, cunoori seetanujuanaa sesa quiquiaari



Pueyasora. Naa na miishacaritij, tamajaaja miiriquiaa cocuaatiaari. <sup>12</sup> Pedroori naa miiquiaaritij. Coteenu canaa cojiquiaari maniniaari tariucua Jesuucua tiuujiaa taucucata, canaata na miaquejonura jatiqiu. Jiyacaritij, canacua tiuquiiioquiaariiri socua cuarta Judiocuaca Jerusalén tiacajiniji. Nojoriiri Santiago jiyarosano pueya quiquiaari. Cuno Judiocuaca quishacari tii canaata, Pedroori canacuaji rupatequiaari. Majaari tari na miaquenu paniniu quijia canaata, tariucua Jesuucua tiuujiaa taucucata. Narta Judiocuaca puerequiaariiri maja na sequesaaanura: “Cunoqui sacuaatia miaquejojua taucucata”. <sup>13</sup> Tii quiniaa Jesuucua tiuujiaa Judiocuaca jaara niquiquiaari naa Pedro miishanocuaatej, nojoriiri jaaraaja canacuaji rupatequiaarijihuaj, Pedro na cojitiuniuria. Naajuhua, ¡Bernabeeri jaarajaaja canacuaji rupatequiaarijihuaj cuno mosanucua na cojiniuria! <sup>14</sup> Naaratej, janiya jaara naa nojori niquiquiaari tariucua Jesuucua tiuunio taucucata tamacatiuyanoni, janiyari niishiQuiini, cuno pojoriiri maja maninia na miitiuniu quiriquiaa. Cunoori maja na quiniu quiriquiaa taa nojori rootasaaquiaari Pueyaso rupaacuajani. Cunora, janiyari puetunu Pueyaso pueya maanu niquiarajanaa naa sequequiaari Pedroni: “Quiaari Judío pueyano. Naajaa, majaari seetanujuanaa juhua Judío pueyano quia quiniu quiquiaa. Quiarijia saniniuujia, quiaari Jesuucua tiuunio taucucata shiniuujia nojori quiniuria seetanujuanaa juhua Judiocuaca, nojori rupuenura pajaniya. ¿Casaara naa quia shiniuujia nojoriirini? <sup>15</sup> Paacuajaari Moisés Rootasano tojijiaa cutarani, Judiocuaca pa quiniuucua. Paari maja tahuani, Pueyaso tojiyashijiaa. <sup>16</sup> Naajaa, paacuajaari niishiyani, majaari Pueyaso jiyanooni pajaniya Moisés Rootasano tojijiaa pa quiniuucua. Maja. Pueyaso cutaraari pa jiyanoojia, Neyanu Jesucristoocua pa tiuushacari. Paari cunora Jesucristoocua tiuquiaani, nojuaja jiyanooniuria pajaniya puetunu sesa pa miishanojinijijianaa. Sesa pa miishanoori maja na jiyanooshaanu quiquiaa Moisés Rootasano pa tojishacari. Maja. Naajuhua, majaari quenaaja niquiriyatu pueyano jiyanooshaanu quiniutianiya Moisés Rootasano tojijia na quiniuucua. Maja.

<sup>17</sup> Paacuajaari Jesucristoocua tiuquiaarini, jiyanooshano pa quiniuria, maja socua Moisés Rootasano tojijiaa pa quiniuria. Na nuhuaji, paa jaara jiyaniyani paa sesa miijiaa quiriohuani Moisés Rootasano pa tojiyaquishacari tarini, saaja Jesucristoocua pa tiuushacari, paari jiyanoohua jiyajeneyani. Naa pa jiyaniishacaritij, paari juhua sequeyani Cristoori pa jiyaterohua sesa miijiaa pa quiniuhua nocua pa tiuuniucua. ¿Quiaateeri naa sequenu paniya Pedronaa? ¡Maja! <sup>18</sup> Paacuajaari maninia miiquiaarini pa tarinitiasacari tojiniu Moisés Rootasano, jiyanooshano pa quiniuria saaja Jesucristo rupaacua pa tiuushacari. ¿Paateeri socua maninia miijiaa quiniutianiya Pueyaso niquiarani, paa jaara Moisés Rootasano tojijiaa quiriohuani? ¡Maja! Paa jaara naa niishiriojiyani, paari jiyanoohua jiyajeneyani. Paacuajaari seetanujuanaa pohuatanuuquiaa puetunu pueya niquiarajanaani, nojoriiri jiyanooshaanutaniya saaja Jesuucua nojori tiuushacari. Naa pa pohuatanuusano jaara sajojosoano quiriquia, paa maara jiyanoohua sesa miijiaa quiriquiani. Saniniuujia, Pueyaso cutaraari seetanujuanaa pa jiyanooquiaa saaja Neyanuucua pa tiuushacari”.

Janiyari naa nacasuquiaari Pedroni puetunu tii quiniaa Pueyaso pueya niquiarajanaa. <sup>19</sup> Pueyanaa, cua niishishacari maja cua naata Moisés Rootasano tojiniu maninia puetunujuanaa, janiyari niishiQuiaarini Pueyasoori cua shaajanutaniya na shuriucuaaji. Naaratej, janiyari tama cua cuaqueyajaaja jiyatequiaari juhua tariucua macuni, maja Moisés Rootasano

tojijia cua quiniuria socua. Naacuaajitij, janiyari quiarijia saaja Pueyasora quiya cutarani. Janiyara, janiyari tari cojiritiasaaquiaari monu Cristota niyacutesanojiniani. <sup>20</sup> Naacuaajitij, quiarijiani, majaari nio janiya quiyani. Jesucristocuaajaari nio, coojiajinia quiyani. Majaari tamajaaja saminiu cua quiniu. Jesucristo cua rupuesacari, naacuaajiti janiyari saminiu quiyani. Naa saminiu cua quishacari puetunu cua cuaqueyatajanaatej, janiyari rishiyani Pueyaso Niyanuucua tiuujia cua quishacari. Nojuajaari cua paniquiaari. Naaratej, tama na cuaqueyajaaja tarinitiaquiaariiri cucuara na mosaanura. <sup>21</sup> Majaari cua ruuretanu Pueyaso jiyanooniu panishacari janiya. Jaara pa naata quiriquia tama pa cuaqueyajaaja jiyanooniu Pueyaso, Moisés Rootasano tojijiaca pa quiniuucua, Jesucristo maara najuhuana cusoquiaari pocuara.

### 3

*¿Teyano tojijia pa quishacari pa jiyanooshaaquiaani, Moisés Rootasano, Jesucristoocua tiuuniu soj?*

<sup>1</sup> Mosanucua Gálata pueyanaa, ¿cante nia shimiojocanuni, naa pa Jiyani-ijia Jesuucua tiuuniu nia tarinitianuratej? Canaa jaara shushajanaa nia niquiara pohuataquiaari Jesucristojinijitij, canaacuaajaari maatia nia niishitiquiaarini, nojuajaari pocuara mosaaquiaari pa jiyanooshaanura. ¿Quiar-ijiaariuhuaj, cante tari nia sapojocanuni, Jesucristoocua tiuuniujiniji nia pishiniuriani? Naa nia miishacaritij, ¿niaateeri jiyaniya niaa tama nia cuaqueyajaaja jiyanoonitianiya Pueyaso? Maja nia naata pueyanaa. <sup>2</sup> Quiarijiani pueyanaa, janiya saaja nio nia nequesotanu paniyani. Cua riucature. ¿Niaateeri Pueyaso Sohuanu tiuquiniquiaari nioojiajinia Moisés Rootasano nia tojiniuucua, Jesucristo rupaacua nia tiuuniuucua soj? ¿Taa nia sequeyani? Niaacuajaari niishiya, niaari Pueyaso Sohuanu tiuquiniquiaari nioojiajinia Jesucristoocua nia tiuushacari, niaa jaara na rupaa tojiquiaari. <sup>3</sup> ¡Niaaquiiri tojetaarucujanaa mosanucujuhuanajaj! Nia niquishuriirijaj, niaacuajaari Pueyaso muerasura quiquiaari Pueyaso Sohuanu nia shanacunuucua nioojiajinia na tiuquiniuria, Jesucristoocua nia tiuushacari. Quiarijia saniniuujia, ¿niaateeri jiyaniya nia naata Pueyaso jiyanooniu tama nia cuaqueyajaaja Moisés Rootasano nia tojishacariuhua juucua, tama nia cumaacatajaaja? ¡Maja! <sup>4</sup> Pueyasocuaajaari jiyanoohua maninia miiriquiaa niajaniya, saaja Neyanuucua nia tiuushacari. Naa Pueyaso miishano niaarani, ¿cunoteeri najuhuana quiquiaarijuhuaj? <sup>5</sup> Pueyanaa, Pueyaso jaara na Sohuanu niquitioquiaa niajaniya, na nuhuaji na cumaacata miiquiaa nia niishishoo casaari, nia sequeretoj, ¿casaara naa na miiquiaarini? ¿Pueyasoteeri naa maninia miiquiaa niajaniyatej, Moisés Rootasano tojijiaca nia quiniuucua? Maja. Nojuajaari naa maninia miiquiaa niajaniyatej, saaja na rupaacua tiuujia nia quiniuucua, canaa pohuatasano niajaniyani.

<sup>6</sup> ¿Niaate niishiya, casaara Pueyaso jiyanooquiaari canaa supuetana Abrahamni? Abrahamcuaajaari Pueyaso sequesanoocua tiuquiaari. Naaratej, Pueyasoori na jiyatequiaari juhua tojetaarucujanaa sesa miyashijia pueyanora. Naa na jiyatequiaariiri saaja nocua na tiuuniuucua. <sup>7</sup> Naacuaajitij pueyanaa, quiarijia nia niishiri cutara, cante Pueyasooocua tiuujiani taa supuetana Abraham tiuquiaaricuaani, nojoriiri seetanujanaa canaa supuetana Abraham niquiohuajanaa cutara. <sup>8</sup> Pueyaso jaara na sequenu panishano naajiotaniquiaari tariucuaaanu, nojuajaari tari niishiquiaari taa taucua na jiyanoonitianiyaaniuhuaj, nojori jaara nocua tiuuri. Naaratej, nojuajaari naa sequequiaari supuetana

Abrahamtej: “Quiaacuajaari cua sequesanoocua tiuurii, Abrahamnaa. Naaratej, quia jinianuucujinio supueno pueyanoori jiyanoohua maninia miiniutianiya puetunu pueyapuerajanaa. Noo pojori shuqiritiniutianiyari, puetunu jiyacajinijiniojuanaa nocua tiuuriquiano pueyatej”.<sup>9</sup> Naaratej, cante Jesucristoocua tiuujiani, Pueyasoori na jiyanooniutianiyajuhuaaj, taa supuetana Abraham na jiyanooquiaaricuaani, na sequesanoocua Abraham tiushacari. Cunora, Pueyasoori maninia miiquiaa Jesucristoocua tiuujiaa, taa na miiquiaari Abrahamcuaani.

<sup>10</sup> Saniniuujia, cante jiyaniyani Pueyasoori na jiyanooniutianiya Moisés Rootasano tojjia na quiniuucua, nojuajaari pueyaracaanu saniitiosaanutaniya. Naa naajiotasano quiyacuajaari tariucuacaanu Pueyaso Rupaajinia: “Moisés Rootasano tojjia cuaara tojiiria puetunu Pueyaso naajiotanishanojuanaa. Cante niquiriyatu na sequesano tojiyaquijiani, nojuajaari pueyaracaanu saniitiosocoriquiano”.

<sup>11</sup> Naacuajitij, niaari niishiyacuaja, majaari quenaaja niquiriyatu pueyano jiyanooshaanu quiniutianiya, Moisés Rootasano na tojjiniucua. Saniniuujia, naa naajiotasano quiyacuajaari Pueyaso Rupaajinia:

“Pueyaso jiyanooshano pueyanoori pueyaracaanu rishiriquiano cutara, Pueyasooocua na tiuuniucua”.

<sup>12</sup> Saniniuujia, Moisés Rootasanoni, cunoori maja na niishitiojonu Pueyasooocua pa tiuuniuria, jiyanooshano pa quiniuria. Maja. Saaja naa sequeyari: “Cante puetunu nio naajioneejinia rootasanojuanaa tojjiani, nojuajaari cuno na tojjiniucua rishiniutianiya”.

<sup>13</sup> Maja maninia pa tojiyaquiniuucua Moisés Rootasano, paari Pueyaso puecoosocoriquiano quiquiaarini. Naajaa, Pueyasoori pa Jiyaniijia Jesucristo jiyatequiaari na sesacasano pueyanora pa niti, pocuara na cusonura. Naa sequeyajaariuhua tariucuacaanu Pueyaso Rupaajinia:

“Pueyaso sesacasanoori cuno, niyacutesanojinia teetesanoni”.

<sup>14</sup> Naa Jesucristo csonuucua pocuaratej, saaja nocua nia tiushacari, Pueyasoori na naata shuqiritiniu nijaniya taucuacajuhuaaj, puetunu na sequesano tajanaa canaa supuetana Abraham. Naajuhuaaj, saaja pa tiuuniucua Jesuucua, puetunu pajaniyajanaari Pueyaso Sohuanu masequiaani, taa seetanujuanaa Pueyaso sequequiaari tariucuacaanucujani.

### *Moisés Rootasanoori maja na naata Pueyaso sequesano Abraham jataniniu*

<sup>15</sup> Cuarta Pueyaso pueyanaa, maatia nia pahuatateera maninia nia niishiniuria cua pahuatasano. Cua tojiri. Pueyano jaara maninia miini paniri narta pueyanora, naa miijiaari: na sesa naajiotajaari naajioneejinia, tee cuniqui na miishocoriquiano naajiotasano quiyacuajani. Jaara naa miiritij, majaari quenaaja tamonu na naata cuno naajioneejinia naajiotasano jataniniu, socua na maatenunio. <sup>16</sup> Tariucuacaanu, Pueyasoori naa sequequiaari Abrahamtej:

“Janiyari seetanujuanaa maninia quia miiniutianiyani, quia jinianuucujinio supueriquiano pueyanonio”.

Nia niishiri pueyanaa, tariucuacaanu Pueyaso Rupaajinia naajiotasanoori maja na sequenu: “Abraham jinianuucujinio supueno pueyara”. Maatia sequeyacuajaari: “Abraham jinianuucujinio supueno pueyanora”. Niquiriyatu pueyano sequeyari, maja queraatia. Nojuajaari pa Jiyaniijia Cristocujia.

<sup>17</sup> Cunora pueyanaa, janiyari seetanujuanaa nia sequeyacuajani, Pueyasoori seetanujuanaa sequequiaari Abraham taa nera na miiniutianiyani. Seetanujuanaa Pueyaso sequesanoori maja na naata jatanishaanu. Naacuajitij,

Moisés Rootasanoori maja na naata Pueyaso sequesano Abraham jatanini-  
ujiuhuj. Seetanujuanaa Pueyaso sequenu nuhuaji Abraham, taa nera na  
miiniutianiyani, cuno nuhuaji, shocojoquiaarijiaaraari cuatrociento treinta  
marijia. Cuatrociento treinta marijia shocojonu nuhuaji, Pueyasoori jiy-  
acari shusha Moisés niqutioquiaari na rootasano, saajianeeacaacia na que-  
jasano. Moisésri saniniuujia pueya na niishitiojoquiaari. Naacuajitij, Moisés  
Rootasanoori maja na naata Pueyaso sequesano Abraham jataniniu, na-  
juhuana na quiniuria pajaniyara. <sup>18</sup> Pueyaso niqutionu panishano pajaniya  
jaara pa niqutiosariquia saaja pa tojiniuucua Moisés Rootasano, na niq-  
uitiosocoriquiano pajaniya maara nareja niqutiosoo quiri. Saniniuujia,  
Pueyasocuaajaari seetanujuanaa naa Abraham sequequiaari:

“Janiyari nareja quia niqutionutaniya cua sequesano”.

<sup>19</sup> Niaa naasucuaari sequeya: “Jaara naa quiritij, ¿casaarano socuateeri  
Moisés Rootasano?” Nia sequereera pueyanaa. Jiyanoahua Abraham  
nuhuaji, Pueyasoori Moisés caminiujiutiquiaari na rootasano, pueya  
niishiniuria nojoriiri seetanujuanaa Pueyaso tojiyashijiaca. Cunora  
quiquiaariiri Moisés Rootasano. Cuno Rootasanoori quiquiaari Abraham  
jinianuucujinino supueno pueyano cuaara tiuquiquiaarijiaatijia, taa  
Pueyaso sequequiaari Abrahamcujani. Nojuajaari pa Jiyaniijia  
Jesucristocuaaja. Naacuajitij, Jesucristocuaajaari Pueyaso jiyaniquishano  
quiquiaari, na sequesacari Abraham, “quia jinianuucujinino supueriquiano  
pueyano”. Cristocuaajaari puetunu Pueyaso sequesano Abrahamjanaa  
masequiaari pajaniyarajuhuj, taa Pueyasojuanaa sequequiaari  
Abrahamcujani. Saniniuujia, Moisésri saaja pueya niishitiojoquiaari  
Pueyaso seya caminiujiushano nojuaja. <sup>20</sup> Abrahamra saniniuujia, majaari  
quenaaja tamonu pueyano quiniu quiquiaari nera na caminiujiuriquiano.  
Pueyasojuanaacuaajaari nocua muetaquiaari, na sequenura seetanujuanaa  
taa Neyanuucua tiuujia na miiniutianiya maniniani. Cunora,  
Pueyaso rupaa Jesucristojiniji pa tojishanoni, cuno cutaraari socua pa  
tojishocoriquiano Moisés Rootasanojiniji.

### *Casaaranote Moisés Rootasano*

<sup>21</sup> Naa cua sequesacaritij, ¿niaateeri jiyaniya, Moisés Rootasano naasu-  
cuaari pajaniyarano Pueyaso sequesano paraca? Majaari naa cua se-  
quentej. Janiyari saaja sequeyani, Moisés Rootasano jaara na naata  
quiriquia Pueyaso jiyanootiniu pajaniya, paa maara Moisés Rootasano to-  
jitiajaca quiriquiani, Pueyaso jiyanooniuria pajaniya. <sup>22</sup> Saniniuujia, tariu-  
cuacaanu Pueyaso Rupaajinijini, paari niishiyani puetunu pueyapuejanaari  
Sesaaca pueya. Naaratej, majaari pa naata tarinitianu quiquiaari sesa  
miiniu. Naacuajitij, paari maatia niishiyani, puetunu pueyajanaa cuaara  
tiuria Jesucristoocua, Pueyaso sequesano Abraham nojori masenura.

<sup>23</sup> Pa niishiyaquishacarijia Jesucristoocua pa tiuuniuria, paari juhua  
Moisés Rootasano jiiitasano pueya quijiani. Paari naa quijia taraatia  
pueyacuaani, paa jaara tojiquiaari Jesucristojinijiaatijia, nocua pa tiu-  
niuria. <sup>24</sup> Naacuajitij, Moisés Rootasanoori juhua pa jiiitiana quiquiaari.  
Juhua naatujooriniyoyua pa pueratejojua Jesuucuaari. Naa na miishacari  
pajaniyatej, juhuacarijia Jesujiniji pa niishitiojojuaari. Naacuajitij, paa  
jaara Jesuucua tiuquiarini, paari puetunu sesa pa miishanojinijianaa  
jiyanooshaaquiaarini. <sup>25</sup> Naa Jesuucua tiuujia pueya pa quishacari quiar-  
ijiatej, majaari socua pa tojiniu tariucuacaanu pa canashitijiona. Moisés  
Rootasanoori juhua pataaco seru quiquiaari, Pueyasora na canashitijionura  
pajaniya, juhua naatujoori pa quishacarijia. <sup>26</sup> Quiarijia cutara, puetunu

niajaniyajanaari Pueyaso pueya, Jesuucua nia tiuuniuucua. <sup>27</sup> Naacujiti pueyanaa, niaa jaara moojinia tiuquinishaacanu, seetanujuanaa nioojiata nia tiuushacari Jesuucua, niaari na coquetesaaquiaa. Naa nia quishacari natatej, na Que niquiara, niaari juhua nojuaja niquishano, na panishano muerasuniyojua nia quiniuucujuhua. <sup>28</sup> Naa Pueyaso muerasu pa quiniuucuatej, majaari Pueyaso niquiniu rimiajata pajaniya. Tamonu jaara Judio pueyano quiri, naajaa. Tamonu jaara tahue quirijihua, naajaa. Poonijotesano pueyano maaraja, camarnuju pueyanonio, cunoori maja rimiajata Pueyasora. Naajuhua, caya, maaji, cunoori maja rimiajata Pueyasora. Jesucristoocua tiuujica pa quishacari, Pueyasora, puetunu pajaniyajanaari juhua niquiriyatu pueyanoni. <sup>29</sup> Naajuhua, niaa jaara seetanujuanaa Jesucristo pueya quiri, niaari seetanujuanaa canaa supuetana Abraham jihuacuajinio supueno pueya cutara. Naacujitij, niaari Pueyaso sequesano Abrahamrano maseriquianojuhua.

#### 4

<sup>1</sup> Nia sequenu paniya socuanijia pueyanaa. Cua tojiri. Mijiria, pueyano jaara jiyaniijia quiri, na shaajesacari, neyanuuri camarnura jiyatesano na que niti. Shaajeno pueyano niyanu jaara naatujua quirijia, neyanuuri juhuanajuaja maja na naata na que casami jitianu. Nojuajaari saaja juhua pataaco seru, naatujua na quishacarijia. <sup>2</sup> Naacujitij, tamasaari cuno mueya canashitijia, cuara mashajara quirijiaatijia, jiyaniijara jiyatesocoriquiano, taa na shipininio sequequiaaricujani. Juhuacarijia niishitiojoshiyajaariuhua, maninia na jitianura nerano na que riuriotaca. <sup>3</sup> Paari naajuhua. Pueyaso pueya pa quiyaquishacarijia, paari juhua naatujoori quiquiaarini. Paari mijiria niishishano tojitishaaquiaarini, pa supuetanaa niishishanonio. Paari naa taraatia jitiiasaaquiaarini. <sup>4</sup> Na nuhuaji, Pueyaso jaara tari na sequesano tohuateenu paniquiaari, nojuajaari Neyanu jiyaroquiaari pocua, mijiria na rasaanura maninia maajijiniijianaa, pueyano na quiniuria. Mijiria na quishacari, nojuajaari puetunu Moisés Rootasanojuanaa tojiquiaari pa niti. <sup>5</sup> Naacujitij, nojuajaari na naata Moisés Rootasano tojijica jiyanooni, maja socua pa tojitishaanura Moisés Rootasano. Naaratej, Pueyasoori na naata pa jiyatenu na muerasu pa quiniuria cutara. <sup>6</sup> Seetanujuanaa na niishitiniuria pajaniya paari necohuani, nojuajaari Neyanu Sohuanu jiyaroquiaari pocua, poojiajinia na quiniuria. Naa poojiajinia na quishacaritij, nojuajaari Pueyaso pa sequetequiaa, “cua Quenaa”. <sup>7</sup> Naacujitij pueyanaa, majaari tari nia quiniu Moisés Rootasano tojijica, juhua pataaco seru. Niaacuajaari seetanujuanaa Pueyaso niquiohua cutara. Naa na muerasu nia quishacaritij, niaari tariucuaaanu Pueyaso sequesano Abrahamrano maseriquianojuhua, taa na muerasurano niquitionu na sequequiaaricujani.

#### *Pablo tacaashacari Galacia jiyajinia quiniaa Pueyaso pueyacu*

<sup>8</sup> Pueyaso nia niishiyaquishacarijia pueyanaa, niaari juaashiquiata shipinijosano nia pueyasohua tojijica quiquiaari taraatia. Cuno casaari maja seetanujuanaa Pueyaso. <sup>9</sup> Quiarijia saniniuujia, niaari Pueyasojuanaa niishiya. Pueyasojuanaa cutaraari saniya nia niishiya. Naa Pueyaso panishano muerasu nia quishacaritij, ¿casaara najuhua supuetanaa pueya niishishano miiniuria nia paniuhua socuani? Cuno, canaa supuetanaa Judiocuaca rootasanoni, cunoori maja na naata cumaquiniu niajaniya. Naaari najuhua na tojijica quiniutianiya. <sup>10</sup> Niaanaari puetunu juucajanaa niishijica quiya, juhua canaa supuetanaa Judiocuaca. Niaanaari



sequetuquiaa: “Cuno juuca, majaari pa miaquenu quiniutianiya. Cunoori pueresano juuca, Pueyaso jiyanooniuria pajaniya”. Niaanaari naa miiquiaa puetunu shuniyarajanaa, puetunu marijarajanaanio. ¿Casaara naa miiji-acara nia quiriohuacuaarini cuarta Pueyaso pueyanaa? <sup>11</sup> Naa nia miiniu-ucuatej, janiyari jiyanoohua tacaya quiaritia niaacuani. Janiyari tama seque-quaajaacujua: “Cuno pueya tajinia Pueyaso rupaa cua pohuatasanoquiiri najuhuana quiquiaari”.

<sup>12</sup> Cuarta Pueyaso pueyanaa, janiyari seetanujuanaa nia sequenu paniyani. Nia miiriohuarohua taa cua miiquiaaricuaani, shusha cua tiuquishacari niaacua. Moisés Rootasano niishiyashijiaca nia quishacari, janiyari na tarinitiaquiaari tojiniuni, juhua niajaniya cua quiniuriajuhuaj. Saaja Jesucristo rupaa nia tojiriohua cutara taa cua miiquiaaricuaani. Cua panishano pueyanaa, niaari maninia cua jitiaquiaari niaata cua quishacari. <sup>13</sup> Niaacuajaari niishiya, cusosu cua quiniuucua, janiyari shushajanaa Jesucristojiniji pohuataquiaari nia niquiarani. <sup>14</sup> Naa cusosu cua quishacari niaatatej, naajaa, majaari nia ruuretanu quiquiaari janiya, naa sacuaraatia cusosu cua quishacaritij. Majaari quenaaja nia soonu quiquiaari janiya. Saniniuujia, niaari cua tojitiaquiaari juhua Pueyaso serujuanaa, nia niquiara cua pohuatasacari Jesucristojiniji. Niaa cutaraari seetanujuanaa cua tojiquiaari juhua Jesucristojuanaa. Niaari naa timitiaquiaari janiyatej, Jesujiniji cua pohuatanuucua niajaniya. <sup>15</sup> Quiaritiaariuhua pueyanaa, ¿casaa nia tojetacanuni? ¿Casaara nia tarinitiarohuacuaa shuquiriaatia nia quiniuurini, taa nia quiquiaari coteenucuajani? Janiyacuajaari niishiquiaarini, jiyanoohua nia paniniuucua janiya, jaara nia naata quiquiaari, niaa maara nia namijia samiriootaquiaari nia niquitiosocoriquiano janiya, cucua nia taraajesacari. <sup>16</sup> Quiaritia naa cua sequesacari seetanujuanaa niajanijatej, ¿niaateeri cunora cua niquiniutianiya juhua nia paraca? <sup>17</sup> Cuno pueya, najuhuana tamaatia nia niishitiojoquiaa Pueyaso rupaani, quiaritia nojoriiri maninia miiquiaa niajaniya na sapojonuta. Nojoriiri nia shuqiritiya, nojoriicua nia tiuuniuria. Nojoriiri naa miya, canaa nia cartenura, saniniuujia nojori tojijiaca nia quiniuria. Naacuajitij, majaari tari cua rootasano tojitiajaca nia quiniu quiniutianiya. Niaari cua cartenutaniyajuhua. <sup>18</sup> Quiaritiani, cuno pojoriiri nia shuqiritiyacuaja. Majaari nia jyaniniu janiya nia sequeyani, maja maninia parta pueya pa shuqiritiniuria. Taaquiririnij, maniniacuajaari parta pueya pa shuqiritiniuria, seetanujuanaa pa naacunura nojori. Niaacuajaari niishiya pueyanaa, janiyari jiyanoohua nia tojishano pueyano quiquiaarini, Jesucristojiniji cua pohuatanuucua nia niquiara. ¡Naa seetanujuanaa pueyaracaanu cua panijiacara nia jiyateriquiani, maja saaja nia shuriucua cua quishacari! <sup>19</sup> Quiquiohuaniyojuanaa, jiyanoohua cua tacaashacari niaacua, coojiaari jiyanoohua noonu pacuterohuacuhua, naatej, taa maaji nooquiaacuaa na manajani, quera na ranu panishacari. Naajuhua, janiyari naa pueyaracaanu miijionutianiya naquiya niaacuani, niaa cuara jatanishaarejaatijia, quiarinio pueya nia quiniuria. Niaari naa quiniutianiyaquij, seetanujuanaa Jesucristo quishacari nioojiacajinia, juhua nojuaja nia quiniuria. <sup>20</sup> ¡Seetanujuanaa nia shuriucua cua jatariquiani, maninia cua niishitiojonura niajaniya! Naa cua quishacari tucuaaanu niajanijajinijitij, majaari cua niishiniu taa nia quiya seetanujuanaani. Niaanaari Moisés Rootasano tojijiacara quiriohuacuaa. ¿Niaateeri seetanujuanaa Jesucristo rupaa cartecanu, maja soj?



*Miriqui pohuatasano Agarjiniji, Saarajinijinio*

<sup>21</sup> Moisés Rootasano tojitiajacanaa, cua tojiri. ¿Majateeri tariucuacaanu Pueyaso Rupaajinia nia serojonu quiquiaacuaja, taa Abrahamjiniji na pohuataani? <sup>22</sup> Moisés Rootasanocuajaari Abrahamjiniji sequeya, nojuajaari caapiqui niyanuraca quiquiaari, caapiqui nucuaacuajiniojuhuaj. Abrahamri neco seru muetutequiaari. Na sesojoquiaariiri Ismael. Na nuhuaji, saniya necojuanaari nera muetuquiaarijuhuaj. Na sesojoquiaariiri Isaac. <sup>23</sup> Pueyanaa, Agar jaara Abrahamra muetuquiaari, cunoori tama Abraham miishanojuaja quiquiaari, mueya na panishacari. Maja cutaraari Pueyaso panishano. Saniniuujia, saniya necocuajanaa jaara nera muetuquiaari na nuhuaji, cunoori Pueyaso panishano quiquiaari cutara, na camishano maajijianaa muetusacari nera. Naacuajitij, Pueyasoori tarijia na sequesano Abraham tohuatequiaari. Naa na sequequiaariiri: “Abrahamnaa, quiaari niyanuraca quiniutianiya”. Naa Pueyaso sequenuucuatej, necocua Saaraari muetuquiaari, motaja na quishacari. Cunoori maja tama nojori cumaacatajaaja. Cunora, Isaacri Pueyaso sequesanojuanaa mueya cutara, maja juhua Ismael, seru mueya. <sup>24</sup> Nio caapiqui maajipohuani, Agar, Saaranio, nojoriiri juhua caapiqui seetanujuanaa Pueyaso sequesano na pueyara. Naacuajitij, Agarri miriqui juhua Moisés Rootasano, Sinaí tuhuananujinia Pueyaso niishitiojosano Moisés. Naaratej, Moisés Rootasano tojitiajacaari juhua seya quiquiaa, taa Agar quiquiaari serucuaani. <sup>25</sup> Seetanujuanaari, Agarri miriqui juhua Sinaí tuhuananu Arabia jiyajinia. Saniniuujia, nio pa quishacarini, Jerusalén tiacaari juhua Sinaí tuhuananu, cuno tiacajinia quiniaa pueya quiniuucua Moisés Rootasano tojijiaca. Cunora, Moisés Rootasanoori juhua nojori jiiitiana quiya, juhua poonijiotosano seya nojori quiniuria. <sup>26</sup> Saniniuujia, quiarinio Jerusalén tiacani, jiyocuacaanu Pueyaso racatasano pa quiquioranoni, cunoori seetanujuanaa Pueyaso muerasurano cutara. Cunoori maja Moisés Rootasano tojijiacara. Cuno tiacaari miriqui juhua Saara. Paacuajaari juhua Saara niquiohua cutarani. Majaari tari pa quiniu seru niquiohua. <sup>27</sup> Tariucuacaanu Pueyaso sequesanoacuajaari naa naajiotasano quiyajuhuj:

“Niyajaru maajiniaa, shuquiriaatia quia quiri. Quiaacuajaari mueya noonu saniyashijia. Naajaa, majaari quia taraajenu. Quia shuquiriniutia quia jaaquequejore cutara. Quiaacuajaari cartesaquiaari niyajaru quia quiniuucua. Naajaa, quiaacuajaari socua queraatia niquiohuaraca quiriquiano cuno niyacaraca maajijiniji”.

<sup>28</sup> Cuarta Pueyaso pueyanaa, paacuajaari juhua Isaacni. Na nucuarano Saara tiuuniuucua Pueyaso sequesanoocua, taa na muetunutaniyani, naacuajiti nojuajaari neyanu Isaac raquiaari. Quiarijiani, paari naajuhuj. Jesucristo rupaacua pa tiuushacari, Pueyasoori na cumaacata pa jataniquiaari seetanujuanaa na muerasu pa quiniuria. <sup>29</sup> Maninia nia niishiri nio pohuatasano, pueyanaa. Abraham jaara mueya paniquiaari, nojuajaari neco seru manajoquiaari tamajaaja. Saniniuujia, saniya necocuajanaa jaara nera muetuquiaari, cunoori Pueyaso Sohuanu cumaacata raaquiaari cutara. Na nuhuaji, seru niyanuuri Pueyaso Sohuanu cumaacata rasano miitiaja quiquiaari. Quiarijiaari naajuhuj, Pueyaso ruuretajaca pueyari Pueyaso Sohuanu jatanishano pueya miitiaquiaa. <sup>30</sup> Quiarijia nia niishiri cutara, naa naajiotasaaquiaaricuajaari tariucuacaanu Pueyaso sequesano Abraham:

“Quia niquiocua seru quia taanuure neyanuta puetunujuanaa. Cuno, janiya seetanujuanaa quia sequequiaari niquitionuni, cunoori maja Agar

niyanurano. Cunoori seetanujuanaa quia niquiocua muetusanorano, cua Sohuanu cumaacata rasano mueyaranotuhua]”.

<sup>31</sup> Paari naajuhua, cuarta Pueyaso pueyanaa. Paari maja seru niquiohuani. Paari Jiyaniijia niquiohuajanaa cutarani.

## 5

### *Saaja Jesucristoocua tiuujia pa quiri*

<sup>1</sup> Jesucristo cusuucua pocuara, nojuajaari Pueyaso niquiohuara pa jiyatequiaari, maja socua Moisés Rootasano tojijia pa quiniuria. Naarate pueyanaa, jiyanohua nia cojuare tama nia cuaqueyajaaja saaja Jesucristoocua nia tiuuniuria, Pueyaso jiyanooshano pueya nia quishacari tari. Majaari supuetanaa rootasano tojijiacara nia quiniuhua. ¿Moisés Rootasano tojijiacateeri jiyanooshaanutaniya? ¡Maja! Maja pa naata tama pa cuaqueyajaaja jiyanootiniu Pueyaso, Moisés Rootasano pa tojiniucua. <sup>2</sup> Cua tojitiare pueyanaa. Janiyari Pabloni. Janiyajanaari seetanujuanaa nia sequeyani, niaacuajaari Jesucristoocua tiuujia, Gálata jiyajinia quinia pueyanaa. Cunora, Pueyaso nia jiyatequiaari na muerasu nia quiniuria. ¿Niaateeri jiyaniya nia seetanujuanaa Pueyaso pueyara quiniutianiya cutara, nia cararaatiuuquia co miatejosaanuucua? ¡Maja! Naa jaara naa niishiriojiya, niaari Jesucristo cusu jiyatenutaniya najuhua na quiniuria nijaniyara. ¡Pueyanaa, majaari nia tojiniu cuno Judiocuaca, canapuate nia shiniujuquia nia cararaatiuuquia co miatejosaanuracuajani, seetanujanaa Pueyaso pueya nia quiniuria! <sup>3</sup> Janiyari socua sequenu paniya noo pojoririani, cararaatiuuquia co miatejonuujuacatej, nojori jiyaniucua naa nojori miishacarij, nojori cutaraari seetanujuanaa Pueyaso muerasu. Cante naa miijiani, nojuaja cuara tojiiria puetunu Moisés Rootasanojuanaa. ¿Niaateeri jiyaniya nia naata puetunu Moisés Rootasanojuanaa tojiniu, Pueyaso jiyanooniuria nijaniya? ¡Maja! <sup>4</sup> Naa tama nia cuaqueyajaaja nia jiyanootiniu panishacari Pueyasotej, Moisés Rootasano nia tojiniucua, niaari Jesucristojiniji carejerucua. Majaari Pueyaso naata maninia miiniu nijaniya socua, taa maninia na miiquiaacua na panishano muerasuni. <sup>5</sup> Pajaniya saniniujia, paari Pueyaso Sohuanuraca cutarani, Jesucristoocua pa tiuuniucua. Naacuajitij, paari niishiyani paari tojetaarucujanaa sesa miyashijiacara jiyatesaanutaniyani. <sup>6</sup> Quiarijiani, Jesucristo rupuesano pa quishacari nocua pa tiuuniucua, paa jaara pa cararaatiuuquia co miatesano quirini, maja soj, naajaa. Cunoori najuhuanaj. Socua maninia cutaraari Jesucristo tiuuni, Pueyaso panijia pa quiniuria, parta pueya pa paniniurajuhua.

<sup>7</sup> Cuarta Pueyaso pueyanaa, niaacuajaruhua Jesucristo tiuujia quijia seetanujuanaa. ¿Quiarijiaariuhua, cante nia tarinitiriohuacua seetanu ru-pacuajanaa nia tiyaquiniuriani? <sup>8</sup> Cuno pojori niishitiojosano Jesucristo tiuuni nia tarinitianurani, cunoori maja Pueyaso niishitishano nojori. <sup>9</sup> Cunora, seetanujanaari nio sequesano: “Shiitianiyojua jereeca mashaca jaara shoqueeca mashacajinia shuushaare, cuno shiitianiyojuaari puetunu cuno mashacajanaa jereteja”. Naajaariuhua, shiitianiyojua sesa niishitiojosanoori puetunujuanaa pa sesojuajuhua. <sup>10</sup> Naajaa, janiyacujaari pa Jiyaniijiaacua tiya seetanujanaani, majaari nia tojiniu quiniutianiya tamaatia cuno pojori niishitiojosano. Saniniujia, Pueyaso nio pojori saniitioriquiano, tamaatia na niishitiojonuusanota nia cushitiojoquiaani. Cante nia niishitiojiya sesani, jaara quiri cuarta Jesucristo jiyaramiquishano pueyano, tama janiyajaaja soj, naajaa, nojori saniitiosariquiano.

<sup>11</sup> Cuarta Pueyaso pueyanaa, majaari cua niishitiojonu quiquiaa taucua-cajinijinio Jesucristoocua tiuujiaca, nojori miatejonura na cararaatiuuquia co, seetanujuanaa Pueyaso muerasu nojori quiniuria. Janiya jaara naa seetanujuanaa niishitiojoriquiaani, cuarta Judiocuaca maara naquiya cua miitiaaquiriquiani. Saniniuujia, Jesucristo cusuucua niyacutesanojinia pocuara, paari saaja naacua jiyanooshaaquiiaani. Naa cua niishitiojonuucuatej, Judiocuacaari jiyanoohua cua juaaquiiaani. <sup>12</sup> Majaari nojori nia tojiniu, nojori niishitiojosacari nia cararaatiuuquia co miatejosaanura. Maninia juhuari cuno miatejonuunu porocua jayosaanura nia tajiniji, maja socua nojori cushitiojonura nijaniya.

<sup>13</sup> Cuarta Pueyaso pueyanaa, Pueyasocuaajaari nia sequequiaari na muera-suniyojua nia quiniuria, Neyanu Jesucristoocua nia tiuuniuucua. Naacuajitij, majaari tari nia quiniu juhua poonijotesano pueya, taa nia quiquiaaricuaani Moisés Rootasano nia tojishacari pueyaracaanu. Naa Moisés Rootasano tojijiaca nia quiyaquishacari taritij, naajaa, majaari nia jiyaniniu nia naata miiniu puetunu nia cuaqueya miiniu panishanojuanaa. Maja. Maninia cutaraari niarta Pueyaso pueyata nia cumaquitiojonura, seetanujuanaa nia panitioonuta. <sup>14</sup> Niaa jaara naa miijiaca quiriquiatej, niari puetunu Moisés Rootasanojuanaa tojiyacuaaja, taa na rootasanojinia naajiotasano quiyacujani. Naa sequeyari:

“Panijia quia quiriquia, taa quia paniyacuaa tama quia cuaqueyajaajani”.

<sup>15</sup> Naarate pueyanaa, tama nia cuaqueyajaaja nia cojuare. Majaari pueyaracaanu nia juayonuujutunu, naatej, taa sareya sayonuujutaquiiaacuaani. Niaa jaara naa quiriquiatej, niari socua puecootonutaniyaquij.

*Taa quiijate tama na panishanojuaaja miijia pueyanoni, Pueyaso Sohuanu tojijia pueyanonio*

<sup>16</sup> Janiya nia sequeya cutarani pueyanaa. Cua tojiri. Pueyaso Sohuanu tojijiaca nia quiri pueyaracaanu. Naacuajitij, majaari sacuaraatia tama nia panishanojuaaja nia miiniu quiniutianiya. <sup>17</sup> Nio nia niishiri cutara. Cuno, poojiajinia sesa casaa pa panishanoni, cunoori Pueyaso Sohuanu paraca. Naajuhuj, Pueyaso Sohuanuuri poojiajinia sesa casaa pa panishano paracajuhuj. Naacuajitij, cuno pojori miaquetojosacari poojiajinia, cunora, majaari pa naata miiniu taa pa miiniu paniyacujani. <sup>18</sup> Saniniuujia, Pueyaso Sohuanu jaara nia cumaquiiaacuaja saaja Pueyaso nia tojiniuria maninia, cunora, Moisés Rootasanoori tojiniu paniyaquishaanutaniya tari. Naacuajitij, niaacuajaari maninia miiniutianiya saa Pueyaso Sohuanutaja.

<sup>19</sup> Maatia niquishanocuaajaari taa pueya miiquiaani, noo pojori, canapuate tama na panishanojuaaja miijiacani. Nojoriiri juhuajaniya na camishoo maajipohua numuetucunujuaca, sacuaraatia miitioojua narta canuutajaariuhuj. Maajipohuari naa sacuaraatia miitioojua narta maajipohuatajuhuaj. Pueyari saaja naa miiniuucua jiaatijaca sacuaraatiej.

<sup>20</sup> Naajuhuj, nojoriiri tama nojori pueyasorajaaja nojori shipinishano casaa secojonujuaca. Nojoriiri shimiacurijuhuj, narta pueyano shimiojonujuaca. Narta pueyano niqiniu paniyashijiacajaariuhuj. Nojoriiri juaatioojucajuhuj. Nojoriiri narta pueyano jiiitasanoocua jiaatijacajuhuj. Cunora, nojori niqiniu paniyaquijiaari. Nojoriiri maja na niishiniu rejetenu na juaaquiaca. Ritia juaajiacari. Pueya nasojojua narta pueyanoocuarajaariuhuj. Naacuajitij, nojoriiri narta pueya raquiriojotaquiaa narta pueyajiniji. Nojoriiri saaja tama nojori panishano pueyajaaja panijia, canapuate maninia miiquiaa nojoricujani. <sup>21</sup> Cuno pojori, naa sacuaraatia miijia pueyaracaanu Pueyaso niquiarani, nojoriiri maja na

niquiniu paniniu quijia narta pueyano, cante taquiya maninia miishaare nocuajicuaani. Nojoriiri sacuaraatia mashaasequenuujuacajuhuj. Nojori mashaasequenuusacari, puetunu sacuaraatia casaa miijioquiaajanaari. Jiyanohua miaquenu porocua. Nojori queranacusacari, nojoriiri socua tamaatia sesa casaa miiniu niishijiacajuhuj. Niajaniya saniniuujia cuarta Pueyaso pueyanaa, cua tojiri. Cante naa sacuaraatia casaa miijiojuani, nojuajaari maja Pueyaso jittiasano na quiniu quiniutianiya, pueyaracaanu rishijia na quiniuria shuquiriaatia.

<sup>22</sup> Saniniuujia, paa jaara Pueyaso Sohuanu shanacure poojiajania na poonijionurani, nojuajaari parta pueya panijara pa jiyateja. Poojia jiyateya shuquiriaatia quijiaari. Poojia cajitijiaariuhuj. Jacaria pocuajara pa jiyateyajaariuhuj, juhuajaniya sashijiano. Pueyaso Sohuanuuri maninia pueyanora pa jiyatequiaa, jiyanoojiano. Pa sequesano miijia pa jiyatejajaariuhuj, pueya tiuniuria pocua. <sup>23</sup> Pueyaso Sohuanuuri pa jiyateja pueya shocoteyashijiarajuhuj. Pa niishitiquiaajaariuhua tama sesa casaa pa cuaqueya panishanojuaaja pa rejetenura. Paa jaara naa miijia quiriquia Pueyaso Sohuanu cumaacatani, majaari que-naaja niquiriyatu Moisés Rootasanojinijinio sesacanu quiniutianiya pajaniya. <sup>24</sup> Seetanujuanaari, paa jaara Jesucristo pueyanora quiquiaarini, pa rupuesacari nojuaja, paari tari poojia sesoriquia seque cusojuaquiaari Cristotani, puetunu sesa pa jiaatianujuanaanio. <sup>25</sup> Pueyaso Sohuanu jaara nia samiitianijioquiaari Pueyaso muerasu nia quiniuria, quiarijia seetanujuanaa pueyaracaanu na tojijia nia quiri cutara. <sup>26</sup> Majaari tama pa cuaqueyajaaja pa jiyaniniu, paa socua maninia pueyano parta pueyajinijini. Paa jaara pueya shocotejaca quiriqiani, paari parta Pueyaso pueya juaatiniutianiyani. Maja maninia, paa jaara juaatishaareni tamonu jaara socua tojishano pueyano quiri pajaniyajiniji, naajuhuj, tamonu jaara socua maninia miishaare pajaniyajiniji. Majaari naa miijia nia quiniu Pueyaso pueyanaa. Saaja maninia quijia pa quiri cutara.

## 6

### *Niarta Pueyaso pueyata nia cumaquitioojoriquia*

<sup>1</sup> Cuarta Pueyaso pueyanaa, niaa jaara parta Pueyaso pueyano niquiriquia sesa miyano, jacaria nia nacasure. Cuno niajanijianijinio canapueete Pueyaso Sohuanu niishitiajaraca cutarani, nojori cuara jacaria na nacasuuranon, sesa miiniu na tarinitianuhua. Cante cuno sesa miijia nacasuyani, nojuaja cuara na nacasuura seetanujuanaa na paniniutia narta pueyano. Naajuhuj, jiyanohua nia cojuare tama nia cuaqueyajaaja Sesaaca mariqui nia saniniujiurijiaariuhuj, sesa nia miiniuriajuhuaj. <sup>2</sup> Maninia cutaraari nia cumaquitiojonura niarta Pueyaso pueyata, niaa jaara taraatia miishaare. Naa pa cumaquishacari parta Pueyaso pueyatej, paari naa pa Jiyaniijia Cristo rootasano pajaniyarano tohuateenutaniyani.

<sup>3</sup> Najuhua quijia jaara jiyaniya nojuaja cutara niishijia pueyano, pueya tojishano pueyanotuhuj, naa niishiriojuaari tama na cuaqueya sapojiyajaacujua. <sup>4</sup> Puetunu niajanijiania cumaati tama niishiriojquiaajaacujua, taamueca pueyanote niajanijiani, maninia miijia, sesa miijia soj. Niaa jaara seetanujuanaa maninia miijia quiriquia, tama maninia nia miishanojuaaja nia timitiare. Niarta Pueyaso pueyano jaara socua maninia miijia quiri niajanijianiji, socua sesa miijia soj, niaara, naajaa. Maja cunora taraajenu, maja cunora shuquiriaatia quiniujiuhuj. Saaja shuquiriaatia nia quiri, niaa jaara maninia miiquiaa taate nia naata miiniucujani.

<sup>5</sup> Puetunu pajaniyajanaari tamaatia poonijiosano jiidiaani. Tama niajaniya-jaaja cumaati na miiquiaa maninia, Pueyaso shuquiritianura niajaniya, seetanujuanaa shuquiriaatia nia quiniuria.

<sup>6</sup> Canapuate Pueyaso rupaa niishitiojosaaquiaani, cuno pojori cuaara na niishitiojonaa niqutiojoora nojori casamijiniji saniniuujia, nojori niishitiojonaa jiidianura nojori panishanojuhuaj.

<sup>7</sup> Pueyanaa, maja tama nia cuaqueyajaaja nia sapojonu nia jiyanihacari niaari saniitioyaquishaanutaniya sesa nia miiniuucua. Majaari quenaaja tamonu pueyano na naata Pueyaso rerequetenu. Pueyasoori saniitiojua cutara. Naaratej, nio miriqui sequesano nia niishiri: “Casaa jajau pa natareeni, paari juhua cuno jajau senoonutaniyajaaniuhuj”. Nio miriqui sequesanoori nio niishitiojiya: cante maninia miijiani, nojuajaari maninia miishaanutaniyajaacuhuj. Naajuhuj, cante sesa miijiani, nojuajaari sesa miishaanutaniyajaacuhuj sesa na miiniuucua. Cunoori maja rimiajata. <sup>8</sup> Naacuajitij, canapuate tama na cuaqueyajaaja shuquiritijaca sacuaratia casaa na miishacari mijiriani, Pueyasoori cuno pojori quejoonutaniya cutara, pueyaracaanu na saniitiosocoriquiano. Saniniuujia, cante Pueyaso Sohuanu tojijiani, Pueyaso panishano na miiniuria puetunujuanaa, nojuajaari pueyaracaanu rishijara jiyatesaanutaniya cutara. Nojuajaari shuquiriaatia quiniutianiya pueyaracaanu. <sup>9</sup> Cunora pueyanaa, niaa jaara maninia miijiaa quiri, majaari maninia miiniuria nia taajenu. Pueyaracaanu maninia miijiaa nia quiri. Niaacuajaari niishiya, pueyano jaara na cuhuariquia natare, nojuajaari na sashijia. Majaari ritia na senoonu. Nio miriqui sequesanoori pa niishitiya, paa jaara Pueyaso Sohuanu tojiniu tarinitiaaquirini, paa cuaara sashiirajuhuj. Na nuhuaji cutara paari jiyanohua shuquiriaatia quijiacara jiyatesaanutaniyani, maninia pa miiniuucua. <sup>10</sup> Naacuajitij, jaara pa naata quiriquia, maninia pa miiriquia puetunu pueyajanaa. Saniya maninia cutaraari puetunu parta Pueyaso pueyajanaa pa miiniuria maninia.

*Pablo nacasusacari pueya, quera na tucuatascari na naajio*

<sup>11</sup> Nia niquri cua naajio pueyanaa. Naa quera namijiaaca cua naajiosacari niaacuaratej, nia niishiri janiyajanaari nio naajiya tama cua juaashiquiata-jaajani. <sup>12</sup> Socua cua tojiri pueyanaa. Cuno pojori, nia shiniujuquiaa nia cararaatiuuquia co nia miatejonurani, nojoriiri naa nia miitiniu paniya saaja narta Judiocuaca timitianura nojori. Nojoriiri narta Judiocuaca puerequiaa. Nojoriiri niishiya narta Judiocuacaari nojori miiniutianiya naquiya, miatesoo nia cararaatiuuquia co quiniuucua. Majaari nojori tiuuniu quiquiaa saaja Jesucristoocua, Pueyaso pueya nojori quiniuria. Cunora, nojoriiri jiyanohua paniya nia cararaatiuuquia co miatesano pueya nia quiniurajuhuj, taa puetunu Judiocuacajanaacuaani. <sup>13</sup> Cuno pojori, canapuate na cararaatiuuquia co miatesanocuaani, nojorijianaari maja nojori tojiniu quiquiaa puetunu Moisés Rootasanojuanaa. Naajaa, nojoriiri nia panitiaa nia cararaatiuuquia co miatesano nia quiniurajuhuj. Niaa jaara miatejosaare, nojoriiri tama timiquionutaniyajaaja, nojori tojitiajaca nia quiniuucua. <sup>14</sup> Janiya saniniuujia, Pueyaso cuaara cojuaara janiya maja cua shuquiritianura tama cua miishanojuajaaja. Janiyari saaja pa Jiyaniijia Jesucristo shuquiritianu paniquiaani, pocuara na cusonuucua niyacutesanojinia. Naacuajitij, janiyari mijiria niishishanoocua jiaatiaashijara jatanishaaquiaarini. Mijiria casaari maja na naata shiniujiuniu janiya, nocua cua jiaatianura socua. <sup>15</sup> Pueyanaa, pa cararaatiuuquia co jaara miatesano quiri, naajaa. Naajuhuj, pa cararaatiuuquia co jaara miatesoo quiri, naajaa.



Majaari rimiajata pa quiniu Pueyaso niquiara cunora. Saaja panishano cutaraari, quiarinio pueyanora pa jatanishaanura Pueyaso Sohuanu cumaa-cata. <sup>16</sup> Puetunu nio sequesanoocua tiuujiacajanaani, Pueyasoori nojori jiuujia cajitiquiaa, na jiyanooshacari nojori. Cuno pojoriiri seetanujuanaa Pueyaso saquiriojosano pueya.

<sup>17</sup> Tariucujaari cua rootasano nio naajioneejinia. Quiarijiani, tamonu cuaara socua cua taajeteyaquiiria sesa na niishitiojosanota niajaniya. Janiya cutaraari pa Jiyaniijia Jesucristojiniji niishitiojonani. Cua cuaqueyajinia nio majacuyashiquiajinijini, cunojiniji maatia niishishiyari, janiya seetanujua-naa Jesu seruni.

<sup>18</sup> Cua panishano cuarta Pueyaso pueyanaa, nioojia cuaara jiitiaara pa Jiyaniijia Jesucristo cumaaca, na niishitiajanio. Cuaara naa quiiriatej.

## PABLO NAAJIONEE ÉFESO TIACAJINIA QUINIAA PUEYASO PUEYACUARA

### *Pablo saruhuatasacari Jesucristo tojitiajaca*

<sup>1</sup> ¿Niaate quiyajaa cuarta Pueyaso pueyanaa? Janiyari Pabloni, Jesucristo jiyaramiquishano na rupaa cua pohuatanura, taa na Que Pueyaso paniquiaaricujani. Niaacuara naajiyaniija, canapue Pueyaso saquiriojoquiaari tama neracuajani, canapue te Jesucristo tojitianaacuajani. <sup>2</sup> Pa Que Pueyaso, mariyata pa Jiyaniija Jesucristo cuara taraajeera niaacua, maninia na miiniuria niajaniya. Nojori cuara cajitiiria nioojia pueyaracaanujuhaj.

### *Taa Pueyaso miiquiaa pajaniyani Cristo rupuesano pa quishacari*

<sup>3</sup> Pa Jiyaniija Jesucristo Queeri Pueyaso. Nojuaja pa shuquiritiare. Neyanu Jesucristo pa rupuenuucua, Pueyasoori capora pajaniyara. Nojuajaari jiyano hua maninia miiquiaa pajaniya, puetunu jiyocuacaanu na jiiti-asano cumaacatajanaa. <sup>4</sup> Pueyaso niishishacari taa Neyanu miiniutianiya pocuarani, jiya shipiniyaquishacariija, nojuajaari tari pa saquiriojoquiaari na shuriucua quijiaca pa quiniuria. Pa saquiriojoquiaariijaariuhua na tojiija pa quiniuria, tojetaarucujanaa sesa miyashijia pa quiniuriajuhuaj. <sup>5</sup> Panijia na quiniuucua, nojuajaari pa saquiriojoquiaari na muerasura na jiyatenura pajaniya, Jesucristo jaara maninia miiri pajaniyara. Pueyasoori naa miiquiaa pajaniyatej, taa tariucuacaanu na niishiriojoquiaari na miiniuria pajaniyacujani. <sup>6</sup> Jiyano hua maninia na panishano Niyanuniyojua miiniuucua pocuara, nojuajaari pueyaracaanu jiyanooquiaa pajaniya. Nojuajaari jiyano hua capora. Naa maninia na miiniuucua pajaniyatej, paari cunora pueyaracaanu na maniniuhuaqueetaquiaani. <sup>7</sup> Niyacutesanojinia Neyanu shootenuucua na nanaca pocuara, Pueyasoori pa jiyanooquiaari na muerasu pa quiniuria. Naaratej, majaari Pueyaso saniitionu quiniutianiya pajaniya. Puetunu sesa pa miishanojinijijianaa pa jiyanooquiaari. <sup>8</sup> Pueyasoori na paniniu niishitiquiaari pajaniya, na niqitiosacari na niishitiaja pajaniya, puetunu casaa niishijiajanaa pa quiniuria. <sup>9</sup> Nojuajaari jiyano hua tariucuacaanu niishiriojoquiaari taa na miiniutianiya puetunu na shipinishanoocuarajanaani. Quiari naataja saniniuujia, nojuajaari jiyasohua na miiniu panishano niishitiquiaari pajaniya. <sup>10</sup> Pueyanaa, nia niishiri casaa Pueyaso miiniutianiyani. Nojuajaari Cristo jiyatenutaniya Jiyaniijaajanaa na quiniuria. Naacuajitij, puetunu jiyocuacaanu quijiacajanaa, mariyata puetunu mijiria quijiacajanaari na tojiiacara quiniutianiya. Nojuajaari naa tohuateenutaniya tamacari, taa tamajaaja na niishiriojoquiaaricujani.

<sup>11</sup> Pueyasoori tariucuacaanu pa saquiriojoquiaari Neyanutaja na cojiritianura pajaniya, maninia na miiniuria pajaniya. Pueyasojuaari tariucuacaanu naa niishiriojoquiaari maninia na miiniuria pajaniya. Nojuajaari pueyaracaanu tohuateequiaa taa na miiniu paniquiaaricujani, niishijia na quiniuucua. <sup>12</sup> Nojuajaari pa saquiriojoquiaari maninia quijiacara na jataniniuria pajaniya. Cuarta Judiocuacajinijinio pueyani, canaari coteenujanaa Jesucristoocua tiuquiarini. Naa jiyano hua maninia Pueyaso miiniuucua canaa, nojuaja cuara maniniuhuaqueetasaaria jiyano hua. <sup>13</sup> Quiari naataja nia tojishacari Jesucristo rupaa, niaari cuno seetanu rupaacujanaa tiuquiarijiuhaj, Pueyaso muerasura jatanishano nia quiniuria.

Naa nocua nia tiuuniuucuatej, Pueyasoori Neyanu nia rupuetequiaari. Na Sohuanu niqutioquiaari niajanijajaariuhuj taa na sequequiaaricua-jani. Naacuaji niishishaaquiaari, niaari seetanujuanaa Pueyaso muerasu. <sup>14</sup> Pueyaso Sohuanuraca pa quishacari, paacuajaari niishiyani, paari puetunu Pueyaso sequesano Neyanuranajuanaa masenutaniya Neyanuta-juhuj. Pueyaso Sohuanu pa jiitiasacari, paari niishiyani, Pueyasoori pa rionutaniya puetunu na saquiriojosano pueyatajanaa, na muerasu pa quini-uria na shuriucua. Jiyacaritij, paari tojetaarucuajanaa jatanishaanutaniya juhua Neyanu pa niqishaanurajuhuj. Cunora, Pueyasoori jiyano-hua maniniuhuaqueetasano quiniutianiya, jiyano-hua maninia na miiniucua pajaniya.

### *Taa Pablo secojoquiaari Pueyaso pueyacuarani*

<sup>15</sup> Janiyari niajanijajiniji tojiriucuaani, taa pa Jiyaniijia Jesuucua tiuuj-aca nia quiyani, taa parta Pueyaso pueya panijia nia quiyajaaniuhuj. <sup>16</sup> Cunora, pueyaracaanu cua secojosacari niaacuara, majaari cua tarini-tianu quiquiaa Pueyaso cua sequenura “paacarasho”, maninia na muerasu nia quiniucua. <sup>17</sup> Pa Jiyaniijia Jesucristo Queeri shacantushiqui quijia na cumaacajinia. Janiyari niaacuara na secojoquiaani, nojuaja niq-itionura niajanijia jiyocuacaanuji niishitiaja. Naacuaji nia naata niishiniu na niishitiniu panishano niajanijia, maninia nia niishiniuria nojuajuhuj. <sup>18</sup> Janiyari niaacuara secojoquiaajaaniuhuj, Pueyaso cuaara cuhuataara nioojia, maninia nia niishiniuria casaara Pueyaso saquiriojoquiaari nia-janiyani, casaa na miiniutianiya niaarajaniuhuj. Janiyari niaacuara seco-joquiaajuhuj, maninia nia niishiniuria taa Pueyaso muerasu jiyatesaanu-taniya shacantuuca quijia nojori quiniuriani. <sup>19</sup> Janiyari secojoquiaa-juhuj, Pueyaso cuaara niishitiiria na cumaaca niajanijia, cuno, nioojiajinia poonijiyani. Na cumaacaari jiyano-hua, puequeyashijia. <sup>20</sup> Pueyasocuaajaari cuno na cumaaca poonitijioquiaari Cristo quetejinia, nojuaja jaara na sami-itianiquiaariuhua macujiniji. Jaara na samiitiani-quiaari, cuno na cumaa-cata na cajitiquiaariiri Jiyaniijiajanaa cajitijinia na miaquetajara jiyocu-aanu. <sup>21</sup> Tii na cajitiquiaariiri puetunu tamasa cumaacaraca quijia Jiyaniijiajanaa na quiniuria. Majaari tamonu socua cumaacaraca quijia quiniu pa Jiyaniijiajiniji. Nojuajaari puetunu tamasa jiyaniijianucuajanaa Jiyaniijia. Puetunu mijiria quijia jiitiasanojuanaari na casaa. Nojuajaari puetunu casaajanaa camaru. Pueyaso jaara quiarinio jiya shipiniriohua, Jesucristoori jiyacari Jiyaniijiajanaa quiniutianijajuhuj, taa quiarijia na quiyacuajani. <sup>22</sup> Naacuajitij, Pueyasoori puetunu na shipinishanojuanaa jiyatequiaari Jesucristo jiitiasocoriquiano. Naajuhuj, Pueyasoori Jesucristo jiyatequiaari na saquiriojosano pueya jiitariquiano, canapuate nocua tiu-jiacacuajani. <sup>23</sup> Pueyaso saquiriojosano pueyari juhua Jesucristo cuaqueya. Nojuajaari juhua poojia saniniuujia, pa jiitiana na quishacari. Puetunu Pueyaso saquiriojosano pueyajanaa jaara Cristo cuaqueyajinia rupuete-saare, Cristo cuaqueyari tucateenutaniya seetanujuanaa maninia jecana-mitishano na quiniuria. Na cuaqueya pa quishacari, nojuajaari puetunu poojiajiniajanaa quiya. Naajuhuj, nojuajaari puetunu tiqiyocuajanaa quijiajuhuanajaj.

## 2

*Panijia Pueyaso quiniucua, nojuajaari pa jiyanoquiaari*

<sup>1</sup> Sesa miijiaca nia quiniuucua tarijia, Pueyaso tojiyashijiaca juhuaj, niaari macunucua quijia Pueyasora. <sup>2</sup> Naa jaara naa sesa miijiaca quiquiaaritij, niaari juhua puetunu mijiria quiniaa Pueyaso tojiyashijiacajanaa quiquiaari. Niaari samaruhua jiyaniijia tojiijaca quiquiaari, cuno, paratu piyarojosaqui quijiani. Nojuajaari Pueyaso tojiyashijiaca shiniujujia, nojori miiniuria sesa, taa Sesaaca seque paniyacuajani. <sup>3</sup> Tarijia, puetunu pajaniyajanaari Pueyaso tojiyashijiaca quiquiaarini. Paari tama pa miiniu panishanojuaaja miijiaca quiquiaarini. Naacujitij, paari puetunu pa cuaqueya miiniu panishanojuanaa miijiaca quiquiaarini, puetunu sacuaraatia pa niishiriojosanojuhuaj. Naa sesa miijiaca pa quiniuucuatej, paari tojetaarucujanaa jiyanojuaa Pueyaso saniitosocoriquiano quiquiaari juucuan, juhua tamasaacajuahuaj. <sup>4</sup> Saniniuujia, Pueyasoori pocua taraajeja cutara. Jiyanojuaa pa paniquiaariiri. <sup>5</sup> Cunora, macunucua pa quishacarijia nera, sesa miijiaca pa quiniuucua, nojuajaari Jesucristota pa cojiritiaquiaari samiitianijionu. Jiyanootio Pueyaso quiniuucua, nojuajaari nia jiyanooquiaari. <sup>6</sup> Naa na samiitianijionuucua pajaniya Cristoocua pa tiuuniuucuatej, Pueyasoori tari pa tacanijioquiaari Cristota jiyocuacaanu, tii Cristo cajitianura pajaniya. <sup>7</sup> ¡Naa Cristota na cojiritianuucua maninia miiniu pajaniyatej, cunoori jiyanojuaa maninia! Nojuajaari naa pa miiquiaaritij, puetunu quijiacajanaa nio pa quishacari nuhuaji niishiniuria maatia, Pueyasoori jiyanojuaa pa panijia. Maatia niishishaanutaniyari Pueyasoori tojetaarucujanaa jiyanootio cutara, na jiyanooniuucua pajaniya, Neyanuucua pa tiuuniuucua. <sup>8</sup> Naa Pueyaso quiniuucua jiyanootiotej, nojuajaari nia jiyanooquiaari saaja Jesuucua nia tiushacari. Majaari tama nia miishanotajaaja Pueyaso nia jiyanootini quiquiaari tama nijaniyajaja. Pueyasojuaanaacujajaari nia jiyanooquiaari niaacua na taraajenuucua. Naa juhuaj, nojuacuajaari nia tiutuquiaari Neyanuucua. <sup>9</sup> Majaari Pueyaso jiyanooniu quiquiaari pajaniya, maninia miijiaca pa quiniuucua. Paa jaara maninia pa miiniuucua Pueyaso jiyanootiquiaari tama pa cuaqueyajaajani, paa maara tama pa cuaqueyajaaja timitiareni juhua najuhua pocuja. <sup>10</sup> Shushajanaa Jesucristoocua pa tiushacari, Pueyasoori jiyacari pa jataniquiaari quiarinio pueyano pa quiniuria, maninia miijiaca pa quiniuria. Nojuacuajaari tari naa niishiriojoquiaari, maninia miijiacara na jataniniuria pajaniya.

### *Jesucristoori pa jiyateja jiyanootiojuacara*

<sup>11</sup> Éfeso tiacajinia quiniaa pueyanaa, quiarijia nia niishiriohua taa nia quiquiaari tariucuaaanuni, Pueyaso muerasu nia quiyacuquishacarijia. Niaari cuarta Judiocuaca soosano taucuaca quiquiaari, nia cararaatiuuquia co miatesoo quiyacuquiniuucua. Canaa cutaraari canaa cararaatiuuquia co miatesanoni. <sup>12</sup> Nia niishirijuhuaaj, naa nia quishacariitij, niaari Cristoaju quiquiaari. Majaari nia naata rupueni quijia Pueyaso saquiriojosano Israel pueya. Puetunu Pueyaso sequesanojuanaa Israel pueyanoni, cunoori maja niaarano quiquiaari. Majaari nia niishiniu quiquiaari Pueyasoori pueyacujia Tacuriquiano jiyaronutaniya mijiria. Majaari quenaaja tamonu quiniu quiquiaari nocua nia tiuuniuria, Pueyaso na jiyanootiniuria nijaniya. Niaari saaja taraatia shaajeriquiano quiquiaari. ¿Cantucua niaacua taraajereni? Niaari seetanujuanaa tojetaarucujanaa Pueyasooju quiquiaari mijiria. <sup>13</sup> Tarijia, niaari seetanujuanaa tucuacaanu quijiac quiquiaari Pueyasojiniji. Quiarijia saniniuujia, Jesucristo shootenuucua na nanaca niyacutesanojinia, niaari nata rupuetootesaaquiaari, nocua nia tiushacari. Naacujitij, niaari canaa rupuejacajuahuaj. <sup>14</sup> Cristocujajaari

pa jiyanootequiaari. Moisés Rootasanoni, cunoori juhua jiyaconaja sohuaca quiquiaari pa tajinia, maja nia cojiniuria canaa, maja nia rupuenura canaajuhuaaj, taucuaca nia quiniuucua. Jesucristocuaajaari cunora tama na cuaqueyajaaja tarinitiaquiaari na mosaanura pa niti, cuno jiyaconaja sohuaca niyartasaanura, pa juaaquiaca tajiyatenura. Naacuajitij, nojuajaari pa jiyatequiaari juhua niquiriyatu queecuajinio supueno pueya, Judiocuaca, niajaniya taucuacanio. <sup>15</sup> Naa pa niti Jesucristo cusunucuatej, nojuajaari puetunu Moisés Rootasanojuanaa sanaajaquiaari, maja socua na sesacnura pajaniya. Tarijia, paari juhua caapiqui tiaca quiquiaarini. Paari pueyaracaanu paracaatioojua quijiani. Quiarijia saniniuujia, Jesucristo cusunucua, nojuajaari pa jiyanootequiaari jatiqui pa quiniuria juhua niquiriyatu tiaca, mariyata na rupuejaca pa quishacari. <sup>16</sup> Naaratej, janiyari socua camiya nia sequenuni. Cristo cusunucua niyacutesanojinia, nojuajaari Pueyaso jiyanootequiaari pajaniya, na panishano muerasu pa quiniuria puetunujuanaa, niajaniya taucuaca, canaajuhuaaj. Naacuajitij, Jesucristoocua pa tiuushacari, paari juhua niquiriyatu tiaca nerani.

<sup>17</sup> Niajaniya taucuacanaa, niaari juhua tucuacaanu quijiaa quiquiaari Pueyasojiniji. Canaa cutaraari juhua cateca quijia nojuajinijini. Jesucristoori mijiria niquiaari, na niishitiniuria puetunu pajaniyajanaa taa Pueyaso jiyanooni pania pajaniyani. <sup>18</sup> Cristo jiyanootiniucua na Que Pueyaso pajaniya, naacuajitij, pa naata pa Que Pueyaso rupueno pa secojosacari nojuaja, mariyata na Sohuanuraca pa quishacari, niajaniya, canaajuhuaaj. <sup>19</sup> Jesucristo tiuujia nia quishacari quiarijia cua panishano pueyanaa, majaari tari nia quiniu tahue canaara. Majaari nia quiniu juhua tamonu tiacajinijinio rucoona. Quiarijiani, niaari seetanujuanaa Pueyaso pueya cutara. Pueyasoori maninia nia jiitiaajuhuaaj, taa na jiitiaquiaa puetunu na saquiriojosano pueyacuaani. <sup>20</sup> Pueyaso pueya nia quiniuucua, niaari rupuetesano puetunu Pueyaso muerasutajanaa, juhua shanohua tia pa quiniuria Pueyaso quiquiora. Jesucristo jiyaramiquishano pueya na rupaa pohuatariquianoni, mariyata na sequenu panishano caminiuujia pueyani, nojoriiri juhua cuno tia pacaariana. Saniniuujia, Jesucristoori juhua cuno tia morijiuujiana cutara, cuno tia nujuatana. <sup>21</sup> Pueyasoori naa saquiriojoquiaa Neyanuucua tiuuriquiano pueya, na quiquiorano na tucatanura. Cuno tia tucateesacari, tojetaarucujanaa maninia jeenucuasano quiniutianiya pa Jiyaniijiaari. <sup>22</sup> Niaari naajuhuaaj, Cristo nia rupuesacari, niarta Pueyaso pueya nia rupuesacarijuhuaaj, Pueyasora, niaari juhua riana, tucurunio. Nojuajaari nia morojotaquiaa na tia na tucatanura, na Sohuanu quiquiorano.

### 3

#### *Pabloori Pueyaso jiyaramiquishano taucuacaacua*

<sup>1</sup> Jesucristojiniji cua pohuatanucua niarta taucuaca, janiyari cunora nujuatesano quiya nujuatejojuajiniani. <sup>2</sup> Niaa naasucuaari niishiyacuaja Pueyasoori cua jiyaramiquiquiaari Jesucristojiniji cua pohuatanura taucuaca, jiyanooshano nojori quiniuriajuhuaaj. <sup>3</sup> Tariucuacaanu, majaari pueya niishiniu quijia, Pueyasoori taucuaca jiyanooniutianiyajuhuaaj, taa na jiyanooquiaacuaa Judiocuacani. Pueyasojuaanaacuajaari naa jiyasohuaja na miiniu panishano cua niishitiquiaaritij, taa shusha nio cua naajio coteejajinia cua pohuataa niajaniyacujani. <sup>4</sup> Niaa jaara cua naajione serojore, niaari jiyacari seetanujuanaa niishiniutianiya, janiya cutaraari Jesucristo rupaa niishijiani. Naacuajitij, janiyari niishiyani taa jiyanoohua maninia



nia miishaanutaniyani nocua nia tiuushacari. <sup>5</sup> Tariucuacaanu, majaari quenaaja tamonu pueyano niishiniu quijia nio jiyasohuaja Pueyaso miiniu panishano. Quiari naataja saniniuujia, Pueyasoori na jiyaramiquishano pueya niishitiquiaari cuno, jiyasohuaja na miiniu panishano taucuacani. Na sequenu panishano caminiuujunia pueya na niishitiquiaariijaariuhuaaj. Pueyaso Sohuanucuajaari cuno canaa niishitiquiaari. <sup>6</sup> Niajaniya taucua-canaa, niocuajaari Pueyaso miiniu panishano jiyasohuaja niajaniya: Jesucristoocua nia tiuuniuucua, Pueyasoori puetunu Judiocuacarano na sequesanojuanaa jiyatenutaniya niaarajuhuaaj. Canaari Judiocuacani. Naajaa, Jesucristoocua nia tiuuniuucua, Pueyasoori canaa rupuetequiaa niajaniya, juhua niquiriyatu pueyano pa quiniuria nera. Naajuhuaaj, cunora, Pueyasoori nia niquitioquiaa na Sohuanujuhuaaj, taa na sequequiaari Neyanu Jesucristoocua tiuujiacacuajani.

<sup>7</sup> Janiyari Jesucristo ruuretaja quiquiaarini. Naajaa, jiyanoehua cumaacaraca Pueyaso quiniuucua, nojuajaari cua jataniquiaari Neyanu Jesucristojiniji pohuatana cua quiniuria. <sup>8</sup> Jesucristo paraca cua quiniuucua tarijia, janiyara, janiya cuara socua rerequetesano pueyano quiiria puetunu cuarta Pueyaso pueyajinijijianaa. Saniniuujia, jiyanoehua jiyanoetio Pueyaso quiniuucua, nojuajaari cua jiyanooquiaari. Cua jiyatequiaariiri seetanu rupaajanaa Neyanu Jesucristojiniji pohuatana cua quiniuria taucuacana. Janiyari cunora Pueyaso shuquiritiaa jiyanoehua. Cristo jiiitasano pajaniyanonni, puetunu cuno casaajanaari pa niishishoojua. <sup>9</sup> Tariucuacaanu, Pueyasoori puetunu casaajanaa shipiniquiaari. Na shipiniyaquishacarijia, Pueyasoori tari niishiriojoquiaari casaa na miiniutianiya puetunu pajaniyarajanaani. Naajaa, tariucuacaanu, majaari na niishitiniu quiquiaari pueya. Nio pa quishacari saniniuujia, nojuajaari cua seerataquiaari puetunu pueyajanaa cua niishitiniuria jiyasohuaja na miiniu panishano. <sup>10</sup> Pueyasoori tariucuacaanu pajaniyara na niishiriojosano racataquiaari pueyaracaanu tama na niishitiajajiniaaja. Saniniuujia, nio pa quishacariini, nojuajaari na niishitiquiaari. Quiarijiani, jiyanoehua maninia Pueyaso miishacari puetunu na saquiriojosano pueyajanaa, puetunu jiyocuacaanu cumaacaraca quijiacajanaari niishiya, Pueyasoori seetanujuanaa jiyanoehua niishijia cutara. Naacuajitij, Pueyaso seya, Satanás, samaruhanio, nojoriiri tacuriitia shootiaquiaa pajaniya, Pueyaso miiniuucua maninia pajaniya, niishijia na quiniuucua. <sup>11</sup> Quiari naataja, Pueyasoori tariucuacaanu na miishocoriquiano na niishiriojosano tohuateequiaari pa Jiyaniijia Jesucristo cusosacari niyacutesanojinia. <sup>12</sup> Naacuajitij, Jesucristoocua pa tiuuniuucua, pa naata juhujaniya rupueni na Que Pueyaso pa puereyaquiniutia. <sup>13</sup> Naa Pueyaso miiniuucua pajaniyaratej, majaari nioojia nia niqijiotenu Pueyasooocuaji nia puerenuta naquiya cua miishacari. Naa naquiya cua miishacari Jesucristojiniji cua pohuatanuucua niajanijatej, shuquiriaatia nia quiri juhuari. Naa naquiya cua miishacariitij, cuno cuara shiniujuuria niajaniya, socua pa Jiyaniijia tojijia nia quiniuria.

*Pablo secojosano Éfeso tiacajinia quiniaa Pueyaso pueyacuara*

<sup>14</sup> Naa Pueyaso muerasu nia quiniuucujuhuaaj, janiyari mojuetequiaani pa Que Pueyaso cua secojonura niaacuara. <sup>15</sup> Nojuacuajaari Que cutara. Puetunu queyajanaari na sesaatiaacuaja. Nojuajaari puetunu parta Pueyaso muerasujuanaa Que, mijiria quiniaa, tariucua jiyocuacaanu quiniaa Pueyaso muerasunio. <sup>16</sup> Naa nia Que na quiniuucujuhuaaj, janiyari niaacuara secojoquiaani, nojuaja cuara cumaquiiria jiyanoehua niajaniya

na Sohuanuta nioojiajinia. Na Sohuanuuri puetunu pa panishanojuanaa jiitiana. <sup>17</sup> Naajuhuj, niaacuara secojoquiaanijia, seetanujuanaa nia niishiniuria Jesucristojuanaacuajaari nioojiajinia quijia. Nojuajaari nioojiajinia quiya quiarinio pueyara na jataniniuria niajaniya, nocua tiuujia nia quishacari. Naacuajitij, niocua niishiri taa Jesucristo paniya jiyanohua niajaniyani. Naacuajitij, majaari nioojia nia niquijiotenu quiniutianiya socua. <sup>18</sup> Naa Jesucristo paniniu nia niishishacari taritij, niaari puetunu Pueyaso pueyatajanaa niishiniutianiya taamuecate Cristo paniniuni. Naajuhuj, niaari seetanujuanaa niishiniutianiya tee na paniniu pueetaani. Jesucristo paniniu jaara shanacujusaatia quiri shanacujutajata, paa maara nocua puequeetejore najuhuanani. Seetanujuanaa, majaari pa naata shanacujununoj. Paa jaara na jamatu, na tucuanee, na queroni, na jiyaconaja shanacujunu paniriquiani, majaari na puequeeja pa riuriatanu quiniutianiya. <sup>19</sup> Seetanujuanaa, majaari pa naata niishiniu taa jiyanohua na paniya pajaniyani. Naajaa, janiyari niaacuara secojoquiaa Pueyasoni, seetanujuanaa nioojiata nia niishiniuria cuno, na paniniuni. Niaa jaara na paniniu niishiri, Pueyasojuanaari nioojiajinia quiniutianiya. Naacuajitij, niaari tojetaarucujanaa panijia nia quiniutianiya taa Pueyasocuaani.

<sup>20</sup> Naa Pueyaso miiniuucua maniatej, nojuaja cuaara shuquiritiasaaria. Naa jiyanohua na cumaacata na poonijosacari poojiajinatej, nojuajaari na naata miiniu socua jiyanohua queraatia pa masesanojiniji nojuaja, pa niishiriojosanojinijinio. <sup>21</sup> Puetunu quiijacajanaa cuaara niishiiria Pueyasoori jiyanohua maninia. Nojori cuaara naa niishiiria nojori niquishacari Pueyaso jatanishano na saquiriojosano pueya, Jesucristo miishanonio. ¡Cuaara naa shuquiritiasaaria pueyaracaanutej!

## 4

### *Pueyaso Sohuanu pa jiitiasacari, paari rupuetootesano quijiani*

<sup>1</sup> Janiyari niya nujuatesano quiyani pa Jiyaniijiajiniji cua poojotanuucua. Cunora, cua tojitiare. Janiyari nia sequeyani, saaja pa Jiyaniijia tojijia nia quiri, seetanujuanaa maninia na muerasu nia quiniuria. Pueyasocujajaari nia saquiriojoquiaari naa maninia na muerasu nia quiniuria. <sup>2</sup> Majaari niarta Pueyaso pueya rerequetejaca nia quiniu. Maninia miitioojuaca nia quiriquia. Puetunu casaajanaa rejeretajaca nia quiriujuhuj. Naa jiuujiaatoojuaca nia quiri nia panitioosacari. <sup>3</sup> Naa Pueyaso jiyanoootiootesacari niajaniyatej, pueyaracaanu nia jiyanoootioore, juhuajaniya nioojia quiniuria juhua rupuetootesano. Pueyaracaanu naa nia miiri Pueyaso Sohuanu cumaquishacari niajaniya. <sup>4</sup> Naa quiijia nia quiri pueyanaa, niquiriyatu cuaqueyaraca pa quishacari pa Jiyaniijia, mariyata niquiriyatu Sohuanuraca pa quishacarijuhuaj. Naa Jesucristoocua tiuujia pa quishacaritij, Pueyasoori puetunu pajaniyajanaa rijionutianiya, pueyaracaanu na shuriucua pa quiniuria. <sup>5</sup> Puetunu pajaniyajanaari niquiriyatu Jiyaniijiaracani. Nojuajaari Jesucristo. Naajuhuj, puetunu pajaniyajanaari saaja Jesucristo rupaacua tiuujiacani, maja tamonu rupaacua. Naajuhuj, puetunu pajaniyajanaari moojinia tiuquinijosaaquiaarini, Jesucristo pa jiyatesacari pa Jiyaniijia. <sup>6</sup> Naajuhuj, saa niquiriyatujua Pueyasoori quiya. Nojuajaari puetunu Neyanuucua tiuujiacajanaa Que. Nojuajaari puetunu na tojijiacajanaa Jiyaniijia. Nojuajaari puetunu na pueyajanaa poonijioteya na panishano nojori miiniuria. Puetunu na muerasu jiuujiaajanaari na quiquio.

<sup>7</sup> Saniniuujia pueyanaa, puetunu pajaniyacuaajaari tari jiiitaa tamaatia poonijiosano pa miiniuriani, teyano Cristo niqutionu paniquiaari pajaniyacuaajani. Naacuajitij, puetunu pajaniyajanaari maja pa niishiniu miiniu saa niquiriyatu casaaja. <sup>8</sup> Tariucuacaanu Pueyaso Rupaa naajiotasanojiniji, paari niishiyani Pueyasoori na Sohuanu niqutionu paniquiaari na pueya. Cunora naa sequeya Jesucristojiniijiiri:

“Na quioosano pueya tacataquiaariuhua jiyocuacaanuuri. Nareja na niqutionu panishano casaa serotaquiaari na pueyari”.

<sup>9</sup> Jaara sequeya “tacaquiaariuhua”, cunojiniji paari niishiyani nojuaja jiyocuacaanuji rosequiaari coteenu, taraatia mijiria na mosaanura pocuara. <sup>10</sup> Nojuajani, jiyocuacaanuji rosequiaarini, nojuajaari tojetaarucuajanaa jiyocuacaanu tacaquiaariuhua, Jiyaniijiajanaa na quiniuria na Que shuriucua. Tacaquiaariiri puetunu jiya cajiniocuajanaa na mishininiuria na cumaacata, puetunu jiyajanaanio. Naacuajitij, nojuajaari puetunu tiquiyocuajanaa quijia. <sup>11</sup> Nojuacuajaari noojiaqueya na saquiriojosano pueyajinijinio jiyatequiaari na jiyaramiquishano pueya nojori quiniuria. Saniniuujia, tamasaca jiyatequiaariiri Pueyaso sequenu panishano caminiujunia nojori quiniuria. Saniniuujia, tamasaca jiyatequiaariiri Jesucristo niishiyashijiaca niquiara poojotanaa nojori quiniuria, Pueyaso jiyanooniuria nojorijihuhaj, Jesuucua nojori tiuushacari. Tamasaca jiyatequiaariiri na tojitiajaca pueya jiiitanaa nojori quiniuria. Tamasaca jiyatequiaariiri na rupaa niishitiojanaa nojori quiniuria narta Pueyaso pueyara. <sup>12</sup> Naacuajitij, Jesucristoori na Sohuanuta cumaquiquiaa cana na paniyani, puetunu tamaatia na miiniu panishanojuanaa nojori miiniuria. Naa na pueya cumaquiquiaa na Sohuanutaari na saquiriojosano pueya tiuuniuria nocua, nojori cumaquishaanurajuhaj. Naa Jesucristoocua tiuujia pueya canesacari socuatej, Jesucristo cuaqueyari canequiaa. <sup>13</sup> Jesucristora poonijionaa pueyari naa poonijioquiaatej, paa cuara tojetaarucuajanaa pa Jiyaniijia tojijia quirijiaatijia, juhua rupuetootesano pa quiniuria. Cristo pueyari naa poonijioquiaa Pueyaso Sohuanu cumaacata, paa cuara seetanujuaanaa Pueyaso Niyanu niishijiaca quirijiaatijia. Naacuajitij, paari tojetaarucuajanaa jeenucuasano quiniutianiyani, seetanujuaanaa juhua Jesucristo pa quiniuria. <sup>14</sup> Naacuajitij, majaari tari pa quiniu quiniutianiya juhua naatujua. Niaacuajaari niishiya naatujooriiri na niishiriojosano jatanijia ritia. Noojia niqijijotejajaariuhaj. Naa juhua tariucua cumueeca mashaja pa quishacaritij, majaari quenaaja tamasaca naata sapojonu quiniutianiya pajaniya, tamaatia nojori niishitiojosanota. Cuno pojori naa tamaatia niishitiojonuujuaca tariucua pa niishishanojinijini, nojoriiri jiyanohua sapojonu niishijiaca, nojori tojitiajaca na tashuquiootenura Pueyasojiniji. <sup>15</sup> Nocuaji pueyanaa, Pueyaso Rupaata pa cumaquitioojore seetanujuaanaa pa panitioonuta, Cristo rupuejaca pa quiniuria socua. Nojuacuajaari juhua poojia. <sup>16</sup> Pueyanaa, niaacuajaari niishiya, puetunu pa cuaqueyajiniacuma casaa pa jiiitiasanojuanaari maninia rupuetootesano. Puetunu cunajuanaa jaara maninia poonijioquiaa jatiqui, paari maninia quiyani. Pueyaso muerasuuri juhua pa cuaqueya jiiitiasano casaa. Naacuajitij, puetunu Pueyaso muerasujuanaa jaara tama na poonijiosanojuaja miiquiaa maninia taa pa Jiyaniijia paniyacuajani, pa Jiyaniijia cuaqueyari maninia canenutaniya, jatiqui rupuetesano pa quishacari, seetanujuaanaa panitiojuaca pa quiniuria.

*Cristoocua tiuujiaaari quiarinio pueya*

<sup>17</sup> Jesucristo jiyaramiquishano pueyano cua quiniucua, cua tojiri pueyanaa. Pueyaso saquiriojosano pueya nia quishacari, maja socua

nia quiniu taa Pueyaso niishiyashijiaca pueya quiyacuaani. Nojoriiri najuhuana quijiaca, najuhuana nojori niishiriojonuucua. Naajuhuaaj, nojoriiri tama na panishanojuaaja miijiaca, najuhuana casaacua nojori jiaatianuucua. <sup>18</sup> Nojoriiri naa quijiacatej, juhua ninishiqui nojori niishitiaja quiniuucua. Nojoriiri seetanujuanaa niishiyashijiaca, nojori tojiyaquiniuucua Pueyaso, juhua cumueeca jiuujiaraca nojori quishacari. Majaari nojori jiyatesaanu quiniutianiya Pueyaso muerasura, pueyaracaanu shuquiriaatia quijiaca nojori quiniuria. <sup>19</sup> Naa pueyaracaanu sesa nojori miijionuucuatej, nojoriiri maja tari na niishiniu caririquiniu, sesa nojori miishacari. Nojoriiri puetunu tama na miiniu panishanojuaaja miijiaca. Nojoriiri puetunu sacuaraatia casaajanaa miiniuucua jiyartuucono. <sup>20</sup> Niajaniya saniniuujia, majaari naa nia niishitiojosaanu quiquiaari Cristojiniji, naa sacuaraatia miijiaca nia quiniuria. <sup>21</sup> Naa jaara Jesujiniji tojiquiaari, niaacuajaari niishiquiaari na rupaari seetanu rupaajanaa cutara. Niaacuajaari na rupaajiniji niishitiojosaquiaari maninia miijiaca nia quiniuria, sesa nia miiniu nia tarinitianurajuhuaaj. <sup>22</sup> Pueyanaa, pa toque mocua jaara mocuaatia jaanure, paari ritia na jocuajani. Naa nia jatarejuhua sacuaraatia miiniu nia niishishano. Sesa nia miiniu panishanoori tama nia sapojoquiaarijiaaja naa sesa miijiaca nia quiniuriatej. <sup>23</sup> Quiarijia saniniuujia, sesa nia niishitiaja nia jatare, maninia niishitiajaraca nia quiniuria, maninia jiuujiaracanio. <sup>24</sup> Seetanujuanaa juhua quiarinio pueyano nia quiri, quiarinio jiuujiaraca, Pueyaso niqutiosano niajaniya. Naa quiarinio jiuujiaraca nia quishacaritij, seetanujuanaa juhua Pueyaso pueya nia quiriquia, maninia miijiaca, tojetaarucuajanaa sesa miyashijiaca. Naa maninia nia quiniuni, cunoori seetanujuanaa Pueyaso Rupaa nia tojiniuucua.

<sup>25</sup> Naacuajitij pueyanaa, majaari socua cuaracashijionuujuaca nia quiniu. Pueyaso pueya pa quishacari, puetunu pajaniyajanaari juhua pa Jiyaniijia cuaqueyani. Cunora, puetunu nia sequesanojuanaa niarta Pueyaso pueyano cuara quiiria seetanujuanaa.

<sup>26</sup> Naa jaara juaatishaare, tama nia cuaqueyajaaja nia cojuare maja nia juaaniutia sesa nia miiniuria niarta pueyano. Naajuhuaaj, nia jaara juaari, majaari nia juaaquiaca nia ninitianu. <sup>27</sup> Ritia nia jeecatoore, Sesaaca mariqui sesa nia miitiriiri nia jiyanoyaquishacari.

<sup>28</sup> Nio nia tojirijuhuaaj. Cante nohuasejojua quiyajaani, cuara tarinitiaara nohuasejonu. Saniniuujia cuara poonijioora tama na numatucuatajaaja cutara. Naacuajitij, nojuaja na naata na jiitiasanojiniji nareja niqutionu tamasaca, cante na panishano jiitiaquiiani.

<sup>29</sup> Naajuhuaaj pueyanaa, majaari sacuaraatia casaa nia pocuanu quenaaja. Majaari cararaatia nia puenujutoonujuhuaaj. Saaja maninia pocuajaca nia quiri cutara. Naacuajitij, nia naata niarta Pueyaso pueya niishitiojonu. Naa naata nojori cumaquiniu. Naa naata nojori nacasunujuhuaaj. Naacuajitij, nia naata nojori shiniujiuniu saaja Pueyaso tojijiaca nojori quiniuria. <sup>30</sup> Majaari sesa miijiaca nia quiniu, niaa mariqui nioojiajinia quiija Pueyaso Sohuanu taraajoreeri. Pueyasocuajaari juhua na sesa naajiotaquiaari poojiajinia na Sohuanuta. Naacuajitij, na rijionu juuca pajaniya, nojuajaari niishiniutianiya paari na saquiriojosano pueyani.

<sup>31</sup> Pueyanaa, majaari jiyanoyashijia nia quiniu. Seetanujuanaa jiyanoojiaca nia quiri cutara. Majaari tamasaca shanacunu niaacua, na nasojonura niajaniya. Majaari nia juayonuujutanu. Majaari nia juaaniutia nia nacajonu. Majaari niarta pueyano paracaajia nia quiniu, nia juaaniutia

nia sesacanura nojuaja. Naacuajitij, puetunu juaaniujianaa nia tarinitiare, puetunu sesa nia miiniujianaanio. <sup>32</sup> Saniniuujia, maninia miitioojuaca nia quiri. Taraajetoojuaca nia quirijiuhuj. Naajuhuj, jiyanootioojuaca nia quirijiuhuj, taa Pueyaso jiyanooquiaari pajaniyacuaani, Neyanuucua pa tiuushacari.

## 5

### *Seetanujuanaa juhua Pueyaso pueya nia quiri*

<sup>1</sup> Pueyanaa, niaacuaajaari Pueyaso panishano muerasuniyojua. Cunora, pueyaracaanu juhua nojuaja nia quiniuria nia saniniuujuri. <sup>2</sup> Puetunu nia miishanojuanaa nia miiri nia paniniutia, taa Jesucristo paniquiaari pajaniyacuaani. Jiyanojua na paniniuucua pajaniya, nojuajaari tama na cuaqueyajaaja tarinitiaquiaari pa niti na mosaanura. Naa na miiniuucuatej, nojuajaari Pueyaso shuquiritiquiaari jiyanojua. Na miishanoori juhua shanojua jaanutaja quiquiaari Pueyasora.

<sup>3</sup> Pueyaso pueya maanujinijinio nia quiniuucua, majaari nia camishoo maaji nia numuetucunu, maajishuriu, casaanio. Cunoori jiyanojua sacuaraatia Pueyasora. Majaari quenaaja jiyano sacuaraatia casaajiniji nia pocoojonu. Naajuhuj, majaari tamasa jiiitiasanoocua jiaatijaca nia quiniu. <sup>4</sup> Majaari najuhua sacuaraatia pocuajaca nia quiniuujuhuj. Majaari najuhua nia niti nia taquiriocuatenu juhua maninia pocuaja. Naajuhuj, majaari sacuaraatia puenujuuajuaca nia quiniu. Puetunu cuno sesa pocuanujuanaari sesa Pueyaso pueyara. Saniya nia pocoojore cutara Pueyaso miishanojiniji, socua pueya maniniuuhuaqueetanura Pueyaso. <sup>5</sup> Niaacuaajaari tari niishiya, cante juhujaniya na camishoo maajipohua numuetucujujani, maajishuriuhuanio, nojoriiri jiyanojua taraatia quiniutianiya. Pueyaso jiiitiasano na tojijaca pueyanoni, majaari na quiniu quiniutianiya naa miijaca pueyara. Naa taraatia miishaanutaniyajaariuhua puetunu tamasa jiiitiasanoocua jiaatijacajanaa. Pueyasora, jiyano pueyari jiyanojua sesa, juhua juaashiquiata shipinijosano pueyasohua sec-ojonuujuaca. <sup>6</sup> Naacuajitij pueyanaa, majaari nia shanacunu tamasa sapo-jonura najaniya na sequesacari naa sacuaraatia miishanoori maja sesa, sacuaraatia pocuanunio. Naa pueya miiniuucua sesatej, Pueyasocuaajaari juaatishaare. Tari saniitioya na tojiyashijaca pueyari. <sup>7</sup> Cunora pueyanaa, majaari quenaaja naa sacuaraatia miijaca nia cojinu.

<sup>8</sup> Pueyaso niishiyashijaca nia quishacarijia tarijia pueyanaa, niaari ninishiqui quijaca quiquiaari. Quiarijia saniniuujia, pa Jiyaniijia rupuejaca nia quishacari, Pueyasoori nia jiyatequiaari cuhuashiqui quijaca nia quiniuria. Cunora, seetanujuanaa maninia miijaca nia quiri, juhua cuhuashiqui quijaca. <sup>9</sup> Paa jaara seetanujuanaa cuhuashiqui quijaca quirini, paari maninia miijaca quiniutianiya. Naajuhuj, paari tojetaarucujanaa sesa miyashijaca quiniutianiya. Paari seetanujuanaa Pueyaso Rupaa tojijaca quiniutianiyajuhuj. <sup>10</sup> Naajuhuj pueyanaa, niaa cumaati niishiya, ¿puetunu nia miishanojuanaate pa Jiyaniijia maniniucasano, maja soj? <sup>11</sup> Majaari ninishiqui quijaca nia cojinu, nojori jaara sesa miya. Saniya nojori nia nacasure juhujari. Maninia nia miishanojiniji, nojoriiri niishiniutianiya nojori miishanoori tojetaarucujanaa sesa. <sup>12</sup> Jiyasohua nojori miijosano sacuaraatiaari tojetaarucujanaa jiyanojua cararaatia. Pohuataaquishoo. <sup>13</sup> Saniniuujia, pa nacasusacari nojori Pueyaso Rupaata, paari nojori jiuujia cuhuataquiaani, nojori niishiniuria nojori miishanoori seetanujuanaa sesa. <sup>14</sup> Pueyaso Rupaacuaajaari nojori jiuujia cuhuataquiaa



na cumaacata, cuhuashiqui quijiacara nojori na jataniniuria. Cunora, naa naajiotasano quiyari tariucuacaanu Pueyaso Rupaajinia:

“¡Maqueyanonaa, quia niucuaire! ¡Macunucua tajiniji quia sanere, Pueyaso Jiyarosano cuhuatanura quiajaniya!”

<sup>15</sup> Naacuajitij cua panishano pueyanaa, tama nia cuaqueyajaaja nia cojuare jiyanoehua, seetanujuanaa maninia miijiaca nia quiniuria. Majaari juhua niishiyashijiaca nia quiniu juhujaniya. Seetanujuanaa niishijiaca nia quiri, maninia miijiaca nia quiniuria. <sup>16</sup> Nio pa quishacarini, sesa miiniuri socua caneya puetunu juucajanaa. Majaari pa niishiniu taate tariqui quiniutianiyani. Naaratej, jaara pa naata quiriquia maninia pa miiniuria, maninia pa miiri puetunu juucajanaa. <sup>17</sup> Majaari moseeca nia quiniu. Maninia nia niishiri casaa pa Jiyaniijia paniya nia miiniuriani. <sup>18</sup> Naajuhuaaj, majaari nia mashaasequejonuunu. Niaa jaara mashaaseca quiriquia, majaari nia rejetenu quiniutianiya sesa nia miiniu panishacari. Saniya Pueyaso Sohuanu nia shanacure niaacua cutara, nioojia na mishininiuria na cumaacata, seetanujuanaa cumaacaraca nia quiniuria, shuquiriaatia quijiaca nia quiniuriajuhuaaj. <sup>19</sup> Naa Pueyaso Sohuanuraca nia quishacaritij, tariucuacaanu Pueyaso Rupaajinia naajiotasanojiniji jaaquequejonu nia naminiujiutioore. Naajuhuaaj, quiari naataja Pueyaso Sohuanu niishitiojosano nia jaaquequejotoore. Nia jaaquequejosacari, pa Jiyaniijia nia shuquiritiare puetunu nioojiatajanaa. <sup>20</sup> Pueyaracaanu puetunu casaarajanaa pa Que Pueyaso nia sequere “paacarasho” pa Jiyaniijia Jesucristoocua tiuujia nia quiniuucua.

*Taa quiija pa quiyani Pueyaso tojjia pa quishacari*

<sup>21</sup> Pueyanaa, maninia tojtitioojuaca nia quiri, taa pa Jiyaniijia Cristo paniyacuajani. Nojuajaari pa Jiyaniijia cutara.

<sup>22</sup> Maajipohuanaa, nia niyaca tojjiaca nia quiri, taa pa tojiquiaa pa Jiyaniijiacuaani. <sup>23</sup> Nia niyacaari juhua nioojia quiya niaara, taa Jesucristo quiya na saquiriojosano pueya jiuujiacuaani. Nojuajaari pocuaji Tacuna, juhua na cuaqueya pa quiniuucua nera. <sup>24</sup> Naacuajitij, taa Jesucristo saquiriojosano pueya na tojitiajaca quiyacuaani, maajipohua cuara naa pueyaracaanu neyaca tojitiajaca quiirijuhuaaj.

<sup>25</sup> Canuunaa, nia niquiocohua nia paniri taa Jesucristo na saquiriojosano pueyarano paniquiaaricuaa jiyanoehua. Nojuajaari cunora tama na cuaqueyajaaja tarinitiaquiaari na mosaanura. <sup>26</sup> Nojuajaari naa miiquiaariti seetanujuanaa nerano pa quiniuria. Tojetaarucuajanaa maninia pa quiniuria, nojuajaari poojia jeequequiaa na rupaata, naatej, taa pa jeequequiaacuaa pa cuaqueyani. <sup>27</sup> Paa jaara tojetaarucuajanaa tarijeequejosano quirini, pa Jiyaniijiajanaari pa tiuquinitianutaniya tama nocuajaaja, tariucua jatanishano shacantuucara. Jiyacaritij, paari tojetaarucuajanaa sesa miyashijia quiniutianiyani. Paari seetanujuanaa shanohua niquishano quiniutianiyani, juhua camishocoriquiano maniniushitishano niyacoo, tojetaarucuajanaa jiyanoehua cohuajaque toqueraca. <sup>28</sup> Pueyanaa, taa nia paniyacuaa tama nia cuaqueyajaajani, naa nia paniri nia niquiocuajuhuaaj. Cante necocua panijiani, nojuajaari juhua tama na cuaqueyajaaja paniya. <sup>29</sup> Majaari quenaaja tamonu pueyano quiniu tama na cuaqueya soojeajaaja. Paacuajaari maninia cojuaja pa cuaqueyani. Paari maninia na mianuutequiaani, naatej, taa Jesucristo cojuaquiaa na saquiriojosano pueyacuaani. <sup>30</sup> Puetunu na saquiriojosano pueyajanaari juhua na cuaqueya nera. Paacuajaari na cuaqueyajinijinioni. Naaratej, nojuajaari maninia



pa cojuaquiaa. <sup>31</sup> Cunora naa naajiotasano quiyari tariucuacaanu Pueyaso Rupaajinia. Naa sequeyari:

“Pueyano jaara camiri, nojuaja cuaara shiriquiiria na que, na nucua shuricuaji, necocuata na quiniuria. Jaara camiri, nojoriiri juhua niquiriyatu cuaqueyaraca quiniutianiya”.

<sup>32</sup> Pueyasojuanaacuajaari pa niishitiojoquiaari, pueyanoori juhua niquiriyatu cuaqueyaraca quijia jaara camiri necocuara. Cunoori miriqui pa niishitiojiya, puetunu Pueyaso saquiriojosano pueya maanujuanaari juhua pa Jiyaniijia niqiorano quiya, juhua niquiriyatu cuaqueyaraca pa quiniuria nata. <sup>33</sup> Pueyanaa, cunojuanaari cua pohuatasano pa Jiyaniijia cuaqueyajiniji. Saniniuujia, puetunu cuarta Pueyaso pueyanaa, nia niquiocua panijia nia quiri juhua tama nia cuaqueyajaaja. Naajuhuaaj, puetunu maajipohuajanaa cuaara neyaca tojijia quiiria.

## 6

<sup>1</sup> Muerasunaa, pa Jiyaniijia tojijia nia quishacari, nia queya tojijia nia quirijihuaaj. Niaa jaara naa miiritij, cunoori jiyanoohua maninia Pueyasora.

<sup>2</sup> Tariucuacaanu Pueyaso Rootasanojiniji Moisésni, naa sequeyajaariuhua tamonu rootasano:

“Nia que tojijia nia quiri, nia nucuanio. <sup>3</sup> Naa nia miiritij, pueyaracaanu shuquiriaatia nia quiniuria, pueyaracaanu nia rishiniuria mijiria, niaa cuaara saaquianoshirijiaatijia”.

Nio rootasanoori coteenujanaa rootasano tee Pueyaso sequeyacujani taa na tojitiajaca na miiniutianiya maniniani.

<sup>4</sup> Niajaniya saniniuujia pueyanaa, majaari nia niquiuhua nia juaatijionu najuhuaaj. Nojori nia canashitijiore maninia. Nia niishitijiore maninijuhuaaj. Nojori nia nasuresjuhuaaj. Jaara nia tojitiaaquiri, na pishiniuria, nia majacuriquianoj nojori nia paniniutia, maja nia juaaniutia. Naa nia miiritij taa pa Jiyaniijia paniyacujani.

<sup>5</sup> Niajaniya poonitijosano pueyanaa, mijiria nia camaruhua tojitiajaca nia quiri. Majaari nojori nia rerequetenu. Puetunu nojori sequesanojuanaa nijaniya nia miiri nia puerenuta, niaa mariqui saniitiosaareeri nojori sequesano nia miyaquiniucua maninia. Nojori sequesano nia miiriquia maninia, juhua pa Jiyaniijia Jesucristora. <sup>6</sup> Majaari maninia nia poonijionu saaja nojori niquishacari nijaniya, nojori shuquiritianura nijaniya. Maninia nia poonijiore pueyaracaanu puetunu nioojiatajanaa, seetanujuanaa juhua Cristora. Niaa jaara naa maninia poonijionuujuaca quiriquiatej, niaari Pueyaso panishano miyajuhuaaj. <sup>7</sup> Puetunu nia poonijosanojuanaa nia poonijiore shitimia, juhua Pueyasora. Majaari nia miishano nia poonijionu nia taajenuta, juhua niarta pueyanora. <sup>8</sup> Niaacuajaari tari niishiya, pa Jiyaniijia Jesucristoori puetunu pajaniyajanaa niqutionutianiya maninia pa miiniucua mijiria, poonijiotasano pueya, camarnuuju pueyano.

<sup>9</sup> Niajanijuhuaaj seya jiitiajacanaa, nio sequesano nia tojiri. Maninia nia jiitiare nia poonitijosano pueya. Majaari na miananajonu. Nia niishirijihuaaj, niaari mariyata niquiriyatu Jiyaniijiaraca, nijaniya, nojoriijuhuaaj. Nojuajaari jiyocuacaanu quijia. Naaratej, tamonu pueyanoori maja rimiajata nera, narta pueyanojiniji.

### *Taate pa naata Sesaaca nujuatanuni*

<sup>10</sup> Quiarjia cua panishano cuarta Pueyaso pueyanaa, seetanujuanaa pa Jiyaniijia rupuejaca nia quiri, jiyanoohua cumueeca nioojia quiniuria jiyanoohua na cumaacata. <sup>11</sup> Puetunu Pueyaso niqutiosano casaajanaa nia cushiyore juhua toqueya, Sesaaca sapojiyaquiniucujia nijaniya.

<sup>12</sup> Pueyaso pueya pa quishacari mijiria, majaari pa quiaquetojonu quiquiaa pueyanota. Pa coopueeri maja pueya. Nojoriiri cumaacaraca quijiaca jiya cajiniocua. Sesaacaari cuno na samaruhua jiyatequiaari jiyaniijianucua nojori quiniuria mijiria. Naacuajitij, nojoriiri cumaacaraca, ninishiqui quijiaca pueya nojori jitianura. Nojoriiri Pueyaso paraajuhua. <sup>13</sup> Naaratej Pueyaso pueyanaa, puetunu Pueyaso niqutiojosanojuanaa nia paracata nia miaquetojotaqueya nia cushiyore. Naacuajitij, sesashiquiari niocua na nujuatare, Sesaaca saniniujiushacari niajaniya. Niaa jaara naa nioojia jeenucuare juhuacarijia puetunu Pueyaso casaatajanaatej, niaari nia paraa nujuatajaca quiniutianiya.

<sup>14</sup> Pueyanaa, niaacuajaari niishiya taa miaquetojojuate pueyani. Na miaquetoonu panishacari, nojoriiri shoquejiniji casaa na cajiniocua morotaja. Na turtuconee cushiyonuujuaari, puetunu na jiriquiajanaa na mishiquiojonura cashiicua. Naajuhua, na sapatuhua cushiyonuujuaariuhua. Na nareenee pootujuaari, nocuaji na nujutajara cashi. Naajuhua, na naca na cojuatajara, cumoco casaa cushiyonuujuaari. Na nijiniaquetucua mueruu pootujuaariuhua.

Pueyaso pueya pa quishacari saniniuujia, tama nia cuaqueyajaaja nia jeenucuare Pueyaso casaata. Naacuajitij, seetanujuanaa Pueyaso Rupaa niishijiaca nia quiri maja nia sapojosaanura. Cunoori juhua pa cajiniocua camarucujua casaa saniniuujia. Pueyaracaanu maninia miijiacua nia quiri, nioojia nia cojuanura Sesaacaacuaji, nojuaja mariqui nia cararoreeri niaa jaara sesa miiri. Cunoori juhua nia turtuconee nia cushishano. <sup>15</sup> Pueyaracaanu jeenucuasano nia quiriquia juhua tariucua sapatu cushinio. Naa tariucua pueca nia quiriquia nia quianura, pueya nia pohuatanura Jesujiniji. Naa nia pohuataretej nojori niishiniuria Pueyasoori nojori jiyanooni panijuhua. <sup>16</sup> Naajuhua, pueyaracaanu nia tiuuri Jesucristoocua. Naa Jesucristoocua nia tiuuniuni, cunoori juhua nia nareenee Sesaaca cashi nishitiumiacaca nia nujutajara niaacuaji. <sup>17</sup> Naa niishishacari niaacuajaari Pueyaso jiyanooshano pueya, cunoori seetanujuanaa juhua cumoco nia cushishano nacaque, maja nioojia nia niqijiotenura Pueyasoocuaji. Naajuhua, Pueyaso Rupaa nia niishiri maninia. Cunocuaajaari Pueyaso Sohuanu nijiniaquetucua mueruu, pueya jiuujiajinia na poonijionura. <sup>18</sup> Naajuhua Pueyaso pueyanaa, majaari nia tarinitianu Pueyaso secojonuunu. Na Sohuanu cumaacata Pueyaso nia secojonuuriquia pueyaracaanu, naajuhua, na Sohuanu niishitishacari niajaniya casaacua nia secojonutaniyani. Majaari secojonu nia tarinitianu nia taajenuta. Juhua sutejaca pueyaracaanu nia secojonuuriquia puetunu niarta Pueyaso pueyacuarajanaa. <sup>19</sup> Naajuhua, cucuara nia secojonuure, Pueyaso niqutionura janiya na niishitija, maninia cua pohuatanura Jesujiniji cua puereyaquiniutia. Cucuara nia secojorejuhua, maatia cua niishitiniuria pueya, Pueyasoori puetunu pueyajanaa jiyanooni panija saaja Jesucristoocua nojori tiushacari. <sup>20</sup> Pueyasojuanaari cua jiyatequiaari na jiyaramiquishano cua quiniuria, na niti cua pohuatanura na rupaa pueya niqiuara. Janiyari cunora niya nujuatejojuajinia morotasano quiyani. Naaratej, cucuara nia secojore seetanujuanaa, Jesucristojiniji cua pohuatanura cua puereyaquiniutia.

### *Pablo pohuatasano Tíquicojiniji*

<sup>21</sup> Pa panishano Tíquicoacuajaari niaacua quianutaniya, puetunujuanaa na pohuatanura janiyajiniji, naajuhua, casaa cua miyani. Nojuacuajaari shamaatia poonijiojua pa Jiyaniijia. <sup>22</sup> Janiyacuajaari cunora niaacua na

jiyaroyani, nioojia nia cumanijianura canaajiniji nia tojishacari, taa canaa quiya niyani.

<sup>23</sup> Pa Que Pueyaso, mariyata pa Jiyaniijia Jesucristota, nojori cuaara cuniqui quiniaa parta Pueyaso pueya jiuujia cajitiiria, juhuajaniya nia quiniuria. Nojori cuaara nia jiyateera panitiojuacarajuhuaaj, seetanjuanaa Jesucristoocua tiuujica nia quiniuriajuhuaaj. <sup>24</sup> Naajuhuaaj, Pueyaso cuaara puetunu pa Jiyaniijia panijiacajanaa cumaquiiria na Sohuanuta, shuquiriaatia nojori quiniuria, cuno pojori, canapuete seetanjuanaa Jesucristo panijiacacuajani.

## PABLO NAAJIONEE FILIPO TIACAJINIA QUINIAA PUEYASO PUEYACUARA

### *Pablo saruhuatasacari Pueyaso pueya*

<sup>1</sup> Janiyari Pablóni. Janiyari Timoteota nia saruhuataani, Filipino tiacajinia quiniaa Pueyaso pueyanaa. Canaari Jesucristo poonitijosano pueyajuhuj. Canaari nio naajiyani puetunu Pueyaso jatanishano pueyacuaraanaa, nojori tiuuniucua Neyanu Jesucua. Canaari cuniqui nia jiitianaa pueyacuara naajiyajuhuj, nia cumaquiniaa pueyacuarianio. ¿Niaate maninia quiyajaa pueyanaa? <sup>2</sup> Pa Que Pueyaso, pa Jiyaniijia Jesucristonio, nojori cuara cumaquiiria niajaninya na Sohuanuta. Nojori cuara cajitiiria nioojiajuhuj.

### *Pablo secojosano, Filipino tiacajinia quiniaa Pueyaso pueyacuara*

<sup>3</sup> Pueyaracaanu cua niishiriojosacari niajaninya, janiyari pa Pueyaso sequequiaani “paacarasho”, maninia na muerasu nia quiniuucua. <sup>4</sup> Cua secojosacari, janiyari pueyaracaanu puetunu niaacuaraanaa cua shuquiriniutia masequiaa Pueyasoni. <sup>5</sup> Niaa jaara shushajanaa Jesucristoocua tiuquiaari, niaari jiyacari coteequiaari cua naacunura, Jesucristojiniji cua poojotanura tamaquiicua. Quiarijiani, niaari naa cua naacuyajaaquij. Janiyari cunora nia timitiaani. <sup>6</sup> Majaari cua taacanuunu niaacuaji. Naatej, taa Pueyaso coteequiaari maninia na miiniuria nioojiajiniaacuaani, nojuajaari naa nia jeenucuanu tucuatanutaniya, Jesucristota pa naacuneetoosacariuhua. <sup>7</sup> Majaari cua jiyajenenu naa cua taacanuyaquishacari niaacuaji. Janiyacuajaari tari naa niishiyani, jyanohua cua paniniucua niajaninya. Naajuhuj, niaari cua cojiritiasaaquiaa cumaaca niquitiosaanujuhuj. Naacuajiti cua naata Jesucristojiniji pohuatanu niya nio nujuatejojuajinia, naajuhuj, janiya jaara jiyaniijianucua tacoji nequesoreesaareni. Naa Pueyaso cumaquishacari janiyatej, cua naata Pueyaso Rupaacuaji tacunu na cuaracashitijiaca. Pueyaso Rupaacuajiiri naa tacusano maatia, nojori niishiniuria, Jesucristoocua nojori tiushacari, Pueyasoori na naata nojori jyanooniujuhuj. Naa nioojia rupesacari cojiatej, cunoori jyanohua cua shiniujuquiaa Jesucristojiniji cua pohuatanura. <sup>8</sup> Pueyasocuaajaari niishiya taa cua paniya jyanohua niajaniyani, Jesucristo paniniu cua jiitiasacari coojiajinia. <sup>9</sup> Janiyari niaacuara secojoquiaa Pueyasoni, socua niishijiaca nia quiniuria, socua Pueyaso niishitiaja nia jiitianurajuhuj, seetanujanaa maninia panitiojuaca nia quiniuria. <sup>10</sup> Naacuajitij, niaari niishiniutianiya teyano casaate seetanujanaa maninia niaarani, saniniujia, teyano casaate sesani. Naacuajitij, pa Jiyaniijia Cristo jaara tiuquiriohua, niaari seetanujanaa maninia miijiaca quiniutianiya, tojetaarucujanaa sesa miyashijiaca. <sup>11</sup> Naacuajitij, puetunu maninia nia miishanojuanaa Jesucristo cumaquishacari niajaniyani, cunoori juhua queraatia nia senoosano quiniutianiya, Pueyaso shuquiritiasaanura. Naacuajitij, maninia nia miiniucua, pueyari Pueyaso timitianutaniya.

### *Pabloori saaja Jesucristora quiniu panijia*

<sup>12</sup> Cuarta Pueyaso pueyanaa, majaari cucua nia taraajenu nujuatejojuajinia taraatia cua miishacari. Nio nia niishiri cutara: nujuatejojuajinia nujuatesocoriquiano cua quiasaanucua, naquiya cua miishacarijuhuaj, cunoori seetanujanaa pueya naacuya Jesucristojiniji tojishaanura socua.

<sup>13</sup> Naacuaajitij, puetunu jiyaniijia César tiajinia quiniaa soldadohuajanaari niishiya, janiyari cumayocua casaata morotasano quiya niyani, Jesucristojiniji cua pohuatanuucua. Majaari saaja soldadohua niishiniu cuno, mariyata puetunu pueyajanaari na niishiyajuhuaaj. <sup>14</sup> Parta Pueyaso pueyari namitia niishiyajuhuaaj, janiyari cumayocua casaata morotasaarucuaani. Naacuaajitij, cunoori quera puetunu nojorijianaa shiniujiuriucuaa Jesucristojiniji nojori pohuatanura na puereyaquiniutia, pa Jiyaniijiaacua nojori tiuushacari socua.

<sup>15</sup> Seetanujuanaa, noojiaqueya nojorijiniiniori Cristojiniji pohuatanuquiaa socua tojishano pueya nojori quiniuria janiyajiniji, nojori shocotanura janiya. Janiyara, naajaa. Tamasaca saniniuujia, nojori cutaraari seetanujuanaa Cristojiniji pohuatanuquiaa nojori shuquiritiniuria Pueyaso. <sup>16</sup> Nojoriiri naa pohuatanuquiaaquij, Jesucristo panijiaca nojori quiniucua. Nojoricuajaari niishiya, Pueyasojuanaacuajaari niya cua niacanu, cua tacunura Jesucristo rupaacuaji. <sup>17</sup> Tamasacaari saniniuujia Jesucristojiniji pohuatanuquiaacujua nojori shocotanu paniniutia janiya. Naa nojori miishacaritij, nojoriiri socua cua tacaatiniu paniya juucua. Majaari nojori pohuatanuunu quiquiaa seetanujuanaa nojori paniniutia pa Jiyaniijia Jesucristo. <sup>18</sup> Naa nojori pohuatanuusacari seetanujuanaa nojori paniyaquiniutia pa Jiyaniijiatej, naajaa. Nojoricuajaari Jesucristojiniji pohuatanuquiaa. Janiyari cunora shuquiriaatia quiyani.

<sup>19</sup> Socua shuquiriniutianianijia cua niishishacari Pueyasoori puetunu cuno pojori miishanojuanaa jataniniutianiya quiria saa maniaraja. Naa miiniutianiyari nia secojonuunuucua cucuara, naajuhuaaj, Jesucristo Sohuanu cumaquiniucua janiya. <sup>20</sup> Naacuaajitij, janiyacuajaari Pueyasocua tiuyani, nojuajaari cua cojuanutaniya maja cua cararoyaquishaanura janiya jaara nequesoreesaareni. Janiyari Pueyasocua tiuyajaaniuhua na cumaquiniuria janiya, cua puereyaquiniutia cua pohuatanura Jesucristojiniji puetunu pueya niquiarajanaa, taa cua miiquiaacuajani. Janiya jaara rishiriquiani, janiya jaara mosaariquiajuhuaaj, naajaa, janiyari jiyanohua paniyani cua Jiyaniijia Jesucristo timitiasaanura. <sup>21</sup> Mijiria cua quishacarijia, janiyari saaja Jesucristora quiyani. Saniniuujia, janiya jaara mosaareni, cunoori socua maninia janiyara, na shuriucua cua quianura, nata cua quiniuria shuquiriaatia. <sup>22</sup> Naajaa, janiya jaara mijiria rishiriquiajani, cua naata socua poonijionu cua Jiyaniijiaara. Naacuaajitij, quiarijia, majaari cua naata saquiriojonu; rishiniu, shaajenu soj. <sup>23</sup> Naaratej, janiyari coojia niqijioteyajaani. Majaari cua niishiniu teyano cua saquiriojonutaniyani. Janiyara maara socua maninia quiri janiya jaara cusoqueeni, Cristo shuriucua cua quianura nata cua quiniuria. <sup>24</sup> Saniniuujia, socua maniaruhua mijiria cua rishiniuraja, pa Jiyaniijiaacua cua shiniujiuniuria socua niajaniya. <sup>25</sup> Naa cua niishiriojosacaritij, janiyacuajaari tari seetanujuanaa niishiyani, janiyari juhanojuaja mijiria niaata rishiniutianiyani. Naacuaajitij, cua naata socua nia naacunu, socua pa Jiyaniijiaacua nia tiuuniuria. Cua naata nia naacunujuhuaaj, socua shuquiriaatia quijiaca nia quiniuria nocua nia tiuushacari. <sup>26</sup> Naa cua rishishacari mijiriatej, janiyari niaacua quianutaniyani cua niquiniuria niajaniya. Naa cua quishacariuhua niaatatej, niaari Jesucristo timitianutaniya maninia na miiniuucua janiya.

<sup>27</sup> Pueyaso pueyanaa, nio nia sequenu panianijia, seetanujuanaa maninia miijiaca nia quiri taa Jesucristo rootaacuajani. Janiya jaara niaacua quiaareni, janiya jaara quiaaquiyarejuhuaaj, naajaa. Saaja niajanijianijia pohuatasariquiani, taa jiyanohua Jesucristo tojiijaca nia quiyajaani, jiyanohua panitiojuacajuhuaaj. Naajuhuaaj, jatiqui Jesucristora



nia poonijoteriquiani, na rupaa nia pohuatanuucua. <sup>28</sup> Naajuhuaaj, Jesucristo Rupaa paraa puereyashijiacara nia jiyateriquiani. Nojori piriyojosacari niajaniya, majaari nojori puerenu quenaaja. Niaa jaara naa nojori puereyashijiacara quiriritij, nojoriiri cunojiniji niishiniutianiya, nojoriiri seetanujuanaa saniitiosocoriquiano taa nia pohuatanuuquiaa nojori niquiaracuajani. Saniniuujia, Pueyaso cajitishacari nioojia, nojori miananajosacari puecoonu niajaniya, niaari cunojiniji niishiniutianiya, niaaqui Pueyaso rijiosocoriquiano cutara. Pueyasocujaari naa cumaquijia na pueyatej, puereyashijianucua nojori quiniuria. <sup>29</sup> Pueyasocujaari nia tiuutiquiaari Neyanuucua, na muerasu nia quiniuria. Naajuhuaaj, Neyanu rupuejaca nia quishacari quiarijia, Pueyasoori nia jiyatequiaari Neyanuucua nia naquiya nia miitishaanurajuhuaaj, taa Neyanu miiquiaari naquiya pocuaracuaani. <sup>30</sup> Nia niishiri, janiya, niajanijuhuaaj, paari mariyata naquiya miiniu rejeretaquiaani, pa Jiyaniijara pa poonijosacari. Niaacujaari tari niquiquiaari naquiya cua miiniu. Majaari cua tarinitianu quiquiaari Jesucristojiniji pohuatanu. Quiarijiani, niaari janiyajiniji tojiniutianijuhuaaj, taa cua tarinitiaaquiya Jesucristojiniji pohuatanuni, naajaa naquiya cua miishacari.

## 2

### *Juhua Cristo pa quirij, taa na quiquiaaricuaani*

<sup>1</sup> Naacujitij pueyanaa, naquiya nia miishacari, nia niishiri taa Cristo shiniujuquiaa pueyaracaanu niajanijani, maja nia tacaaniuria. Nia niishirijuhuaaj taa na paniniu cumanjiaquiaa niajanijani, naajuhuaaj, taa Pueyaso Sohuanu jiuujiaatiootequiaa niajanijani. Nia niishirijuhuaaj taa Cristo taraajequiaa jiyanojua niaacuani. Naa panitiojuaca nia quirijihuaaj. <sup>2</sup> Jiuujiaatiojuaca nia quirijihuaaj, seetanujuanaa panitiojuaca nia quishacari. Naajuhuaaj, nareja nia shanacure Pueyaso Sohuanu niaacua, nojuaja cuara puetunu niajanijajanaa rupeteera, jatiqui nia poonijionura pa Jiyaniijara. Niaa jaara naa puetunu nio cua sequesanojuanaa mijia quiriritij, niaari tojetaarucujanaa shuquiriaatia quiijara cua jiyatenu-taniya. <sup>3</sup> Maninia nia miishacari, majaari na miiniu juhua tamasaca nia shocotanura, nia jiyanihacari niaa naasucuaari socua maninia miijiac tamasacajiniji. Puetunu maninia nia miishanojuanaa nia miiri tamasaca nia rerequeteyaquiniutia. Puetunu niarta Pueyaso pueyajanaa nia jiyatere juhua socua maninia miijiac niajanijajiniji. <sup>4</sup> Niaa jaara maninia miijiac quiriquiacuaa, majaari tama maninia miijiacajaaja nia quiniu. Niarta Pueyaso pueyacua nia taraajerejuhuaaj, maninia quiijiac nojori quiniuria-juhuaaj.

<sup>5</sup> Tama nia cuaqueyajaaja nia tarinitiare niarta pueyacua nia taraajesacari, taa Jesucristo tarinitiaquiaari tama na cuaqueyajaaja pocuaracuaani. <sup>6</sup> Nojuajaari naa miiquiaaritij: tariucuaaanu, nojuacujaari Pueyaso quijiajuhanajaj, juhua na Que. Naajaa, nojuajaari maja na cuaqueya nia jiyatenu quiquiaari seetanujuanaa juhua na Que Pueyaso na quiniuria. <sup>7</sup> Nojuajaari jiyanojua cumaacaraca Jiyaniijia na quiniu tarinitiaquiaari, juhua nareja poonijotesano pueyano na quiniuria. Naaratej, mijiria rasaquiaariiri seetanujuanaa pueyano na quiniuria. <sup>8</sup> Naa pueyano na quishacari mijiratej, nojuajaari juhua nareja pueyanora tama na cuaqueyajaaja jiyatequiaari. Pueyaracaanu na Que tojjia na quishacari, nojuajaari tama na cuaqueyajaaja tarinitiaquiaari na mosaanura. Seetanujuanaa cararaatia cusoquiaariiri niyacutesanojinia teetesano, juhua sesa miijia pueyano. <sup>9</sup> Naaratej,

Pueyasoori seetanujuanaa Jiyaniijiarajanaa na jiyatequiaari puetunu jiyani-  
ijianucujinijijianaa. Na sesojoquiaarijiaariuhuj “Jesu”. Nioori sequeya  
“pocujaji Tacuna”. Majaari socua tamonu pocujaji tacuna quiniu mijiria,  
jiyocuacaanunio. <sup>10</sup> Puetunu pueyajanaari niishiniutianiya Jesuuri Jiyani-  
ijiajanaa. Maja tamonu. Cunora, nocuara mojuquetaconutaniyari puetunu  
jiyocuacaanu quijiacajanaa, puetunu mijiria quijiacajanaajuhuj, puetunu  
jiya cariquimia quijiacajanaanio. <sup>11</sup> Puetunu tamaatia rupaaca pocujaca-  
janaari niishiniutianiya Jesucristoori Jiyaniijiajanaa cutara. Naa Pueyaso  
miiniuucua Neyanutej, puetunu nojorijianaari niishiniutianiya, Pueyasoori  
tojetaarucujanaa maninia miijia.

*Pueyaso pueyari juhua ninishiqui cuhuataja mijiria*

<sup>12</sup> Quiarijiani cua panishano cuarta Pueyaso pueyanaa, cua rootasano  
tojitiajaca nia quiri. Naatej, taa pueyaracaanu cua tojitiajaca nia quiquiaar-  
icujani niaata cua quishacari, quiarijia socua cua tojitiajaca nia quiri,  
tucuacaanu cua quishacari niajanijajiniji. Naacuajitij, seetanujuanaa pa  
Jiyaniijia tojitiajaca nia quiri nia niishiniuria niaari seetanujuanaa Pueyaso  
pueya. Majaari na rupaa ruuretano. Jiyanojia puereeta quiniutianiyaari  
na tojiyashijianucua. <sup>13</sup> Pueyasojanaacuajaari nioojiajinia poonijioquiaa  
maninia nia miiniu paniniuria. Na cumaaca nia niqutioquiaaariuhuj  
maninia nia miiniuria nera nia panishano, taa na paniyacuajani.

<sup>14</sup> Cunora, puetunu nera nia miishanojuanaa nia miiri shitimia, maja  
nia ririjiotanuta. Majaari nocua juayonuujutanujuhuj. <sup>15</sup> Niaa jaara naa  
maninia miijiaa quirijitij, majaari Pueyaso niishiyashijiaa pueya naata  
quiniutianiya sesa na saquiriojotanura niaacuara. Naaratej, tojetaarucua-  
janaa sesa miyashijiaa Pueyaso niqiohua nia quiri, mijiria sesa miijiaa  
pueya niqiuara. Nojoriiri seetanujuanaa sacuaraatia, Pueyaso tojiyashiji-  
aca. Cuno juhua ninishiqui quijiaca pueya tajinia nia quishacari, niaari  
juhua riya nojoriria, naatej, taa riya cuhuataquiaa ninishiquicuaani. <sup>16</sup> Pa  
samiitianijia rupaa Jesucristojiniji nia jiiitianoni, niaari cunota cuhu-  
ataquiaa mijiria quiniaa. Naa maninia Pueyaso pueya nia quiniuucu-  
atej, Cristo jaara tiuquiriohua na rijionuhuaa pajaniya, janiyari jiyanojia  
nia timitianutaniyani. Janiyari naa nia timitianutaniya cua niishishacari  
puetunu cua poonijosanojuanaari maja najuhuana na quiniu quiquiaari.  
Naajuhuj, majaari najuhuana naquiya cua miiniu quiquiaarijuhuaj.  
<sup>17</sup> Niaacuajaari maninia miijiaa Pueyasoocua tiuujiaa nia quiniuucua, Je-  
sucristojiniji cua pohuatanuucua niajanijia. Cuno maninia nia miishanoni,  
cunoori juhua shanohua jaanutaja Pueyasora. Janiya jaara nacatasaare Je-  
sucristojiniji cua pohuatanuucua niajanijiani, cua nanacaari shoonutaniya  
juhua Pueyasora niqutiosocoriquiano. Janiya jaara naa miishaareni, jani-  
yari cua nanacata tucuanutaniya puetunu cua miishanojuanaa Pueya-  
sorani. Janiya jaara naa miishaareni, janiyari seetanujuanaa shuquiriaa-  
tia quiniutianiyani. Janiyari puetunu niajanijatajanaa jiyanojia timini-  
utianiyani. <sup>18</sup> Shuquiriaatia nia quirijiuhuaj, janiya jaara mosaareni, cua  
Jiyaniijia tojijia cua quiniuucua. Cua cojitiuri shuquiriniujuhuaj.

*Pablo pohuatasano Timoteojiniji, Epafroditojinijinio*

<sup>19</sup> Janiyari niaacuaji tojinu panijiani taa nia quiyani, shuquiriaatia cua  
quiniuriajuhuaj janiya jaara niaacuaji tojirini. Janiyari cunora Timoteo  
jiyaronutaniya niaacuani. Naacuajitij, cuniquiji na tacatesacariuhua, no-  
juajacua cua pohuatasuhua niajanijajiniji saniniuuja. Janiyari cua Jiyani-  
ijia Jesuucua tiuyani na rishitiniuria janiya, niajanijajiniji cua tojinuria.

<sup>20</sup> Janiyari Timoteo jiyaronutaniya niaacuani. Saa nojuaja cutaraari seetanujuanaa niaacua tacaajia juhua janiyajuhuj, na naacunura niajaniya, maninia nia quiniuria. <sup>21</sup> Tamasacaari saniniuujia saaja tama nojori panishano casaacuaajaaja tacaajiaca, maja Jesucristo casaacua. <sup>22</sup> Niaacuajaari tari na niishiya, taamuecate Timoteoni. Nojuajaari pueyaracaanu cuata poonijioquiaa juhua quiyanu, Jesucristojiniji mariyata canaa pohuatanura. <sup>23</sup> Janiya jaara niishirini taa cua miishaanutaniyani, janiyari Timoteo jiyaronutaniya ritia niaacuani. <sup>24</sup> Naajaa, janiyacuaajaari cua Jiyaniijiaacua tiuyani cua cartesaanura niiquiji, niaacua cua quianura ritiajuhuj.

<sup>25</sup> Cua sashishacari Timoteo cua jiyaronura niaacua, maniniacuaruhua ritia cua jiyaronura niaacua Epafrodito, parta Pueyaso pueyano. Niaacuajaari nojuaja jiyarotaquiaari cumaneeca quiriano, nojuaja cumaquiniuria janiyajuhuj. Nojuajaari maninia cua naacuquiaa. Cuata miiquiaa naquiya jaarajaarijia Jesucristojiniji cua pohuatanura. <sup>26</sup> Nojuajaari puetunu niajanijajanaa niquniuucua jiaatiaa. Na niishishacari niaari jiyanohua nocua tacaquioya nia niishiniuucua nojuaja cusosu quiquianu, cunora, nojuajaari ritia nia niquniuria tacaya. <sup>27</sup> Seetanujuanaa nojuajaari cusosu quiquianu. Quera cusocanujuanaari. Pueyaso cutaraari nocua taraajecanu. Cucua taraajecanujaariuhuj, maja cua taraajenu jiyacatenura socua. <sup>28</sup> Janiyari cunora ritia niaacua na jiyaroyani, nia shuquiriniuria nia niquishacari nojuaja niaacua tiuquiuhuano. Naa shuquiriaatia nia quishacariuhuatej, janiyari coojia cajitiniutianiyajaacuhuj. <sup>29</sup> Niarta Pueyaso pueyano na quiniuucua, seetanujuanaa juhua nia tarajanu nia timitiarenoj, niaacua na tiuquishacariuhua. Puetunu jiyano pueyajanaa panijia nia quiri, noo pojori pa Jiyaniijiaara poonijionuujuacatej taa Epafroditocuaani. <sup>30</sup> Nojuacuajaari quera shaajeyarucuaa Cristora na poonijosacari. Cocuaatia miijiocanujaariuhuj. Nojuajaari tama na cuaqueyajaaja tarinitiacanu, na naacunura janiya nia niti. Tucuaaanu nia quiniuucua janiyajiniji, majaari nia naata naacunu janiya.

### 3

#### *Nio rootasano tojjiaca pa quiri cutara*

<sup>1</sup> Quiarjia saniniuujia, cuarta Pueyaso pueyanaa, pa Jiyaniijia nia shuquiritiare, pocuaji Tacuna na quiniuucua. Janiyara, maja taajeta cua pacutenuhuara socua cua sequenura niajaniya tari cua sequesano niajaniya. Cunoori seetanujuanaa maninia niaara. <sup>2</sup> Tama nia cuaqueyajaaja nia cojuare cuno sacuaraatia niishitiojonuujuaca pueyacuaaji, cuno pojoricuaaji, sesa miijiacani. Nojoriiri pueya cararaatiuuquia co miatejonuujuaca najuhuanaj, nojori jiyaniishacari nojori miatesano pueyari seetanujuanaa Pueyaso pueya. <sup>3</sup> Paa cutaraari seetanujuanaa Pueyaso pueyani, Pueyaso Sohanu jiyatenuucua pajaniya Pueyaso tojjiaca pa quiniuria. Paari timiquiaaaniuhuj Jesucristo rupuesano pa quishacari. Taa pa cararaatiuuquia casaa quiyani, naajaa. Jesucristoocua pa tiuushacari, paari seetanujuanaa Pueyaso pueyani. <sup>4</sup> Tamasaca jaara tama na cuaqueyajaaja jiyaniya nojuaja seetanujuanaa Pueyaso pueyano, maninia Judio pueyano na quiniuucua, janiya cutaraari nojori shocotaani. Janiyari tari naa jiyaniquiaarijihuj. <sup>5</sup> Naatej, janiya jaara rasaanuarini, ocho juuca jaara cua shocoquiaarini, cua cararaatiuuquia coori miatesaaquiaari. Janiyari naa miishaquiaarini taa canaa rootasaaquiaari Moisés Rootasanojinijicujani, seetanujuanaa Judio pueyano cua quiniuria. Naajuhuj, janiyari Israel pueyanoni, cua supuetana Benjamín jinianuucujinino supueno

pueyano. Na queeri quiquiaari Jacobo, Pueyaso saquiriojosano pueyano. Naa cua supuetanaa quiniucua Pueyaso saquiriojosano pueyatej, janiyari naajuhuaaj, nojoriicuaajinio cua supuenuucua. Naajuhuaaj, janiyari Hebreo rupaa pocuajani taa cua supuetanaacuaani. Cua que, cua nucuaari mariyata Hebreo rupaa pocuajaca quiquiaarijuhuaaj. Mashaja cua quishacari, janiyari Fariseo pueyanora quiquiaarini. Cuarta Fariseocuacaari socua jiyanoehua supuetana Moisés Rootasano tojjiaca puetunu cuarta Judiocucacajiniijiojuanaa. <sup>6</sup> Jiyacaritij, janiyari cua niishitiojonaa tojijia quiquiaari jiyanoehuaani. Majaari cua taajenu quiquiaari nojori sequesano cua miiniuria. Naaratej, janiyari Jesucristo tojitiajaca miijia naquiyaani, cua jyanishacari nojori naasucuaari Pueyaso paraa. Naajuhuaaj, maninia cua tojiniucua Moisés Rootasano, janiyari sesacasoo quiquiaarini Moisés Rootasano niishitiojonaara. <sup>7</sup> Puetunu nio cua sequesanojuanaani, janiyari jyanohua na timitiaquiaarini cua jyanishacari janiya naasucuaari naa seetanujuanaa Pueyaso pueyanoni. Quiaritia saniniuujia, Jesucristoocua cua tiushacari, tarijia cua jyanishano maninia casaani, puetunu cuno casaajanaari quiaritia najuhuaana janiyara. <sup>8</sup> Quiaritia, janiyari socua cua Jyanitia Jesucristo niishiniuria jiaatiaa jyanohuaani. Naaratej, puetunu tariucuacaanu cua timitiasano casaajanaari najuhuaana janiyara quiaritia. Cristo pueyano cua quiniucua, janiyari juhua taanuusaquiaari puetunu cuarta Judiocucacajiniijianaani. Naa Cristo tojjiara cua quiniucuatej, cua shipinijiojini cua casaarano maseyaquiaarini. Naajaa, puetunu cuno casaajanaari juhua rucucua quiya janiyara. Janiyari seetanujuanaa saaja cua Jyanitia Jesucristo niishiniu paniya socuani, nata rupuetootesano cua quiniuria seetanujuanaa. <sup>9</sup> Majaari cua jyaniniu janiya sesa miyashijiani, Moisés Rootasano cua tojiniucua. Saniniuujia, Jesucristoocua cua tiushacari, Pueyasoori puetunu sesa cua miishanojuanaa tuujuquiaa. Cua niishishacari Jesucristoori mosaaquiaari cua niti, Pueyasoori cua jyanooquiaari, maja na sesacanura janiya, Neyanuucua cua tiuuniucua. <sup>10</sup> Janiyari Jesucristo niishiniu paniya jyanohua socuani, seetanujuanaa nata rupuetootesano cua quiniuria. Janiyari na samiitianitiaja cumaaca panijajaniuhuaaj, coojajinia na poonijionura, seetanujuanaa quiarinio pueyanora cua jatanishaanura juhua Cristora. Nojuajaari jyanohua taraatia miishaquiaari mijiria na quishacari, na Que tojijia na quiniucua. Janiya cuara naa miishaariajuhuaaj cua tojiniucua nojuaja, juhua nojuaja cua quiniuria. Tama nojuajaaritia na cuaqueya tarinitiaquiaari na mosaanura. Naajuhuaaj, tama janiyajaaritia cua cuaqueya tarinitiaja quiniu paniyani, cua miiniuria puetunu cua Jyanitia sequesanojuanaa janiya. <sup>11</sup> Janiyari tojetaarucujanaa maninia miijia quiniucua jiaatiaquiaani, juhua quiarinio pueyano cua quiniuria, juhua tariucua macujiniijinio samiitianishano pueyano.

*Maninia pueya pa quirij, Pueyaso muerasu pa quishacari*

<sup>12</sup> Juhuanajuaja majaari cua quiniu tojetaarucujanaa maninia miijia. Sesa miiniu niishiyajaanijia. Jecasoojuaanijia. Naajaa, majaari cua tacaaniu. Jesucristocuaajaari cua jiyatequiaari na pueyano cua quiniuria. Naaratej, janiyari jyanohua saniniujuquiaani maninia na pueyano cua quiniuria. <sup>13</sup> Cua panishano cuarta Pueyaso muerasuna, janiyari niishiyacuajani, juhuanajuaja maja maninia cua quiniu taa cua Jyanitia quiyacuani. Naajaa, majaari cua tarininiu. Janiyari juhua ritia netena miiquiaani na shocotanura narta netecuatunaa pueya. Maninia netenaari na nijiniara niqiyashijia. Naajuhuaaj, majaari cua niishiriojonu maninia cua miishano tariucuacua. Janiyari saaja cua tacoji

niquiquiaani, socua maninia miihia cua quiniuria tari cua quiniujiniji. <sup>14</sup> Pueya tacuarishijosacari, netena jaara narta netecuatunaa shocotare, nojuajaari shanohua casaa niquitiosaaquiaa. Majaari najuhuana na netenu jyanohua. Janiyaraari naajuhuaaj. Majaari najuhuana jyanohua cua saniniujiuniu quiquiaa, maninia cua quiniuria juhua Cristojuhuaaj. Mijiria cua quiniu cua tucuatasaacari, Pueyasoori cua jataniniutianiya juhua Cristo cua quiniuria, Cristoocua tiuuja cua quiniuucua.

<sup>15</sup> Pueyanaa, nijaniya, cante seetanujuanaa Pueyaso tojjijaca quiyani, mariyata naa nia niishiriojore taa cua niishiriojiyacuaani. Naatej, jyanohua nia saniniujiuri juhua Cristo nia quiniuriajuhuaaj. Cante tama na cuaqueyajaaja jiyaniya nojuaja tariucua tojetaarucujanaa sesa miyashijiani, Pueyaso cuaara na niishitiiria maninia. <sup>16</sup> Paa jaara maninia miiniu niishijiac quirini, majaari pa jiyacatenu saaja sesa miiniuucua. Saniya maninia miijiacara pa quiri socua.

<sup>17</sup> Cuarta Pueyaso pueyanaa, maninia miijiaca nia quiri taa canaa nia niquiquiaari maninia miyanocuaani. Naajuhuaaj, maninia miijiaca nia niquiri, cante maninia miiquiaani taa canaa niishitiquiaari nijaniyacua-jani, maninia canaa miishacari. Nojorijiniji nia niishiriquia, maninia nia miniuriajuhuaaj. <sup>18</sup> Jesucristocuaajaari pocuara cusoquiaari niyacutesanojinia teetesano, maninia miijiacara pa jatanishaanura. Saniniuujia, queraatia pueyari juhujaniya miiquiaa sesa. Janiyacuajaari nojorijiniji pahuatanu pacutejoquiaari nijaniyani, maja juhua nojori nia quiniuria. Quiarjia cua nujuquenuta, janiyari nia pahuatarohuanuhua jiyano sesa miijiacajiniji. Nojoriiri pa Jiyaniijia cusonu soojeaca. Nojoriiri maja na paniniu naquiya na miishaanura Cristo tojjijaca nojori quiniuucua. <sup>19</sup> Nojoriiri puetunu quejoosaanutaniyajanaa mani quiquiojinia. Nojoriiri tama nojori panishanojuaja jiyatecanu juhua nojori pueyasora. Naa sesa miijiaca nojori quishacaritij, majaari nojori niishiniu caririqiniu. Saaja sesa na miitiushano timitiatuyari. Nojoriiri saaja mijiria casaacua jiaatijaca. <sup>20</sup> Pajaniya saniniuujia, paa cutaraari tari jiyatesaaquiaari jiyocuacaanu quijiacaranoni. Paari cuniquiji pocuaji Tacuna niniuria sashiyani. Nojuacuajaari pa Jiyaniijia Jesucristo. <sup>21</sup> Jyanohua na cumaacata, nojuajaari pa cuaqueya seque jataniniutianiya, shacantuuca quijia pa quiniuria juhua na cuaqueyajuhuaaj. Nojuajaari cumaacaraca puetunu casaajanaa na tojitiniuria nojuaja. Naacuajitij, nojuajaari na naata moqueja pa cuaqueya jataniniu, pueyaracaanu rishijiac pa quiniuria.

## 4

### *Pueyaracaanu pa Jiyaniijia pa shuquiritiare*

<sup>1</sup> Cunora, cua panishano cuarta Pueyaso pueyanaa, pueyaracaanu pa Jiyaniijia tojjijaca nia quiri. Janiyari jyanohua nia niquiniuucua jiaatiaani. Nia niquiara cua pahuatanuucua Pueyaso rupaa, niaaquiiri seetanujuanaa na tojjijaca quiquiaari. Naa jyanohua maninia Pueyaso muerasu nia quiniuucuatej, cunoori jyanohua cua timitiquiaa.

<sup>2</sup> Janiyari Evodia sequeya cutarani, narta maaji Sintiquenio, nojori cuaara jyanootioora juhua seetanujuanaa Pueyasocua tiuujiaca maajipohua.

<sup>3</sup> Quiajaniya saniniuujia Sicigonaa, quiaacuajaari cuata poonijiojua jaarajaaja. Cunora, janiyari quia sequenu paniyani, cuno maajipohua quia jyanootiooterohua, nojori rupuetoonuhua. Cuno maajipohuacuajaari jaarajaaja cuata poonijionuuquiaari, Clementejuhuaaj, pa Jiyaniijiajiniji cua



pohuatasacari. Naa cuata poonijionuuquiaarijiaariuhua tamasaca, canapue te cuata quiquiaaricuajani. Nojori sesacacuajaari tari naajiotasano quiya Pueyaso nequesoreetuneejina, tee cuniqui pueyaracaanu rishijiacarano sesaca naajiotasano quiyacuajani.

<sup>4</sup> Cua panishano pueyanaa, pueyaracaanu pa Jiyaniijia nia timitiare. Nia sequerohuacuaraj, pueyaracaanu nia timiri. <sup>5</sup> Puetunu pueyajanaa cuara niishiiria niaari seetanujuanaa maninia pueya, maja juaajiaca. Pa Jiyaniijiacuajaari quera tiuquihua.

<sup>6</sup> Majaari quenaaja nia tacaaniu. Saniniuujia, nia tacaashacari, Pueyaso nia pohuatare puetunujuanaa, nia secojosacari nojuaja. Nia secojosacari, nojuaja nia masere nia panishano. Jiyacaritij, nojuaja nia sequerejuhuaj “paacarasho”. <sup>7</sup> Naa nia miishacaritij, Pueyasoori nioojia cajitiniutianiya. Naa Pueyaso cajitiniuucua nioojiatej, majaari socua nioojiaca tacaaniu quiniutianiya, nia niishitiajanio. Naacujitij, niocua juhuajaniya panaatia quiri Jesucristo cojishano nia quiniuucua. Naa Pueyaso miishano pajaniyani, cunoori jiyanoehua jiyajeneta. Nocujia jiuujiatesano.

*Saaja maninia casaacua niishiriojojuaca nia quiriqia*

<sup>8</sup> Naajuhua cuarta Pueyaso pueyanaa, nio tojijiaca nia quiriujuhua. Pueyaracaanu saaja seetanujuanaa rupaacua niishiriojojuaca nia quiriqia. Naajuhua, saaja rerequeteyaquishoo casaacua nia niishiriojore. Saaja maninia casaacua niishiriojonuujuaca nia quiri, maja cararaatia casaacua. Naajuhua, saaja Pueyaso shuquiritiasano casaacua nia niishiriojore, maja Pueyaso sesacasano casaacua. Naacujitij, puetunu maninia casaacuajanaa nia niishiriojore, casaajinijiti pueya naata Pueyaso shuquiritianuni.

<sup>9</sup> Maninia nia miiriquia pueyaracaanu, taa cua niishitiojoquiaari niajaniiacuajani. Niaacuajaari cua rootasano tojiquiaari. Naajuhua, niaacuajaari cua niqijia taa miijia cua quiquiaarini. Naa jaara naa miijia quiriujuhua, poojia cajitina Pueyasoori niaata quiniutianiyajuhua.

*Pablo pohuatasano, Filipo tiacajinia quiniaa Pueyaso pueya jiyaronuucua cumaneeca nera*

<sup>10</sup> Janiyari jiyanoehua cua Jiyaniijia timitiaani juhua shusha nia niishiniuquiohua janiya, cucua nia jiyaronuucua nia reratesano cumaneeca. Naa cua sequesacari niajaniiatej, majaari nia jiyaniinu janiya nia sequyani niaari cua nijayetacanu. Maja. Janiyacuajaari niishiyani, majaari tarijia nia naata cua naacunu quijia nia cumaneecata, nia juuretasacari niaatucua canta cucua na jiyaroriquiani. <sup>11</sup> Majaari naa cua sequenu niajaniiatej cua panishano cua jiiitaaquiniuucua. Maja. Janiyacuajaari tari jiyartuunoni, juhuajaniya cua quiniuria cua jiiitiasanoniyajuata. <sup>12</sup> Naajuhua, janiyari niishiyani juhuajaniya cua quiniuria cua panishano cua jiiitaaquishacari. Naajuhua, janiyari niishiyani taa quishanote puetunu cua panishanojuanaa cua jiiitiasacari. Janiyari tariucua saniniujiushanoni puetunu casaajanaa cua rejeretanura. Juhuaajaniya quiniu niishiyani miaajaaraca cua quishacari, miaajeeju cua quishacarijuhuaj. Cua naata juhuajaniya quiniu casamijiu cua quishacarijuhuaj, maja saaja casamiriaca cua quishacari. <sup>13</sup> Cua naata rejeretanu puetunujuanaa, Cristo cumaquishacari janiya. <sup>14</sup> Naajaa, niaari maninia miiriuucua nia cumaneeca nia jiyarosacari cucua, naquiya cua miishacari niya. Niaari niarta pueyanocua taraajeja cutara.

<sup>15</sup> Naajuhua, Macedonia jiyajinijia cua quiasacari nia shuriucujia Filipo tiacajinijia, tamonu jiyacajinia cua pohuatanura Pueyaso rupaa, saaja niajaniiacuajani cutaraari cucua jiyanoquiaari. Cunoori quiquiaari shushajanaa Jesucristocua tiuujia nia quishacari. Jiyacaritij, niaari nia reratesano

cumaneeca jiyaroquiaari cucua, shuquiriaatia nia quishacari cua pohu-  
 atanuucua nia niquiara Jesucristojiniji. <sup>16</sup> Juhuanajuaja nia Macedonia  
 jiyajinia cua quishacarijia, Tesalónica tiacajinia, niaari cucua pacutejo-  
 quiaari jiyaronu nia cumaneeca, cua panishano cua masetajara. <sup>17</sup> Majaari  
 saaja cua paniniu pueyaracaanu nia niquitiojonura nia cumaneecajiniji  
 janiya. Janiya cutaraari nia panitiaani capora pueya nia quiniuria.  
 Naacuajitij, Pueyasoori saniniuujia socua queraatia nia niquitionutaniyacu-  
 jua. <sup>18</sup> Epafroditocujaari puetunu nia jiyarosano cumaneecajanaa cucua  
 tiuquitiaseecuaa. Janiyari cunota puetunu cua panishanojuanaa maseru-  
 cuaa tarini. Cureyajaari nia jiyarosano cumaneecajiniji. Cuno cumaneeca  
 cucua nia jiyarosanoi, cunoori juhua Pueyasora niquitiosano casaa. Nera,  
 cunoori juhua shanohua jaanutaja catijiasano nocuara. Na shuqiritiriiri.  
<sup>19</sup> Naaratej, cua Jiyaniiija Pueyasoori puetunu nia jiiitiaaquishoo casaajanaa  
 nia niquitionutaniya. ¿Pueyasoteeri casamiiju? ¡Maja! Nia rupuesacari  
 Neyanu Jesucristo, puetunu na jiiitasanojuanaari niaaranojuhuaj. <sup>20</sup> ¡Pa Que  
 Pueyasoori jiyanojua maninia! Saaja nojuaja pa shuqiritiare pueyara-  
 caanu. Cuaara naa quiiriatej.

*Nata quiniaata Pablo saruhuatasacari narta Pueyaso pueya*

<sup>21</sup> Quiria nia sarhuatare puetunu Jesucristo jiyanooshano pueyajanaa.  
 Niya cuata quiniaa Pueyaso pueyari nia sarhuataajuhuj. <sup>22</sup> Naajuhuj,  
 Jesucristoocua tiuujiaa jiyaniiija Césarra poonijionaa pueyari nia sarhu-  
 ataajaacuhuj, puetunu niya Jesucristoocua tiuujiaajanaanio.

<sup>23</sup> Pa Jiyaniiija Jesucristo cuaara cumaquiiria puetunu nioojiajanaa. Tari-  
 ucujaja pueyanaa.

## PABLO NAAJIONEE COLOSA TIACAJINIA QUINIAA PUEYASO PUEYACUARA

### *Pablo Colosa tiacajinia Pueyaso pueya maanuucuaru naajioquiaari*

<sup>1</sup> ¿Niaate quiyajaa, Colosa tiacajinia quiniaa cuarta Pueyaso pueyanaa? Janiyari Pabloni, Jesucristo jiyaramiquishano na rupaa pohuatariquiano taa na Que Pueyaso paniquiaaricuajani. Pa tarajanu Timoteota naajiya nionijia. <sup>2</sup> Niaacuara naajiyanjia, canapue Pueyaso saquiriojoquiaaricuajani tama nerajaaja nia quiniuria. Niajanियacuajaari maninia tiuquuaa Pueyasooa, Cristo rupuesano nia quishacari. Pa Que Pueyaso cuara cumaquiiria niajanिया, shuquiriaatia nia quiniuria, juhuajaniya nioojia quiniuriajuhuaj.

### *Pablo secojosano Jesuucua tiuuniaa pueyacuara*

<sup>3-4</sup> Canaari pohuatasaaanuni taa nia tiuquuaa Jesucristoocuan, naa-juhuaj, taa nia paniya puetunu niarta Pueyaso muerasujuaanaani. Naaratej, pueyaracaanu canaa secojosacari Pueyaso niaacuara, canaari na sequequiaani: “Paacarasho canaa Quena”. <sup>5</sup> Niaari naa maninia quiyatej, nia niishishacari Pueyasoori jiyanoa maninia pa miiniutianiya na niquitiosacari pajaniya jiyocuacaanu na jiitiasanojiniji. Niaacuajaari naa pohuatasaaquiaari tarijiatej, shushajanaa nia tojishacari seetanu Pueyaso rupajanaa. <sup>6</sup> Cuno maninia rupaari puetunu jiyacajiniajanaa paaqueyaree, mariyata taa na paaquecanucuaa na pohuatasacari nia tiacajiniacuaani. Pueyaso Rupaari maninia caneyaree queraatia pueya jiuujiajinia, mariyata taa na caneya nioojiacajiniacuaani. Naa caneyari nia niishishacari Pueyasoori seetanujuaanaa pa paniya, taa nia pohuatasaaquiaaricuajani. <sup>7</sup> Pa panishano Epafraasi naa pohuataquiaari niajanियatej. Nojuajaari Pueyasora poonijiona, juhua canaa. Nojuajaari canaa niti poonijioriquiaa niaara. <sup>8</sup> Nojuajaari canaa pohuatarucuaa niajanियajiniji, naajuhua taa Pueyaso Sohanu panitiooteya niajanियani.

<sup>9</sup> Naaratej, canaa jaara tojiquianu niajanियajinijini, majaari canaa tariniantu quiriquiaa Pueyaso secojonu niaacuara. Canaari Pueyaso secojoquiaani, nojuaja cuara nia jataniiria niishijara nia quiniuria na Sohanu cumaacata. Canaari naa secojoquiaani, maninia nia niishinuria taa Pueyaso paniya maninia nia quiniuriani, maninia nia miiniurijuhua. <sup>10</sup> Naa jaara Pueyaso panishano niishijaca quiri, naacuajitij, niaari maninia quiniutianiya taa pa Jiyaniijia paniya na pueya quiniuriacuajani, nojuaja shuqiritianura niajanिया, pueyaracaanu maninia nia quishacari. Niaari puetunu maninia casaajanaa miiniutianiya. Naa-juhuaj, niaari socua maninia niishiniutianiya Pueyaso. <sup>11</sup> Canaari Pueyaso secojoquiaa niaacuara juhuaj, Pueyaso cumaquiniuria niajanिया puetunu na cumaacatajanaa. Jiyanoa maniniaari na cumaaca, shuquiriaatia nia rejeretanura juhuajaniya puetunu casaajanaa. <sup>12</sup> Canaari Pueyaso secojoquiaajuhua nia cuara pueyaracaanu sequeera nia shuqiritianura “paacarasho”, pa Que Pueyaso miishanojiniji. Nojuacuajaari pa jataniquiaari maninia na muerasu pa quiniuria, puetunu na muerasutajanaa pa masenura na jiitiasanojiniji pajaniyara, cuhuashiqui quiquiojinia pa quishacari. <sup>13</sup> Pueyasoori ninishiquiji pa jayoquiaari, maja Sesaaca jiitianura socua pajaniya. Pa jiyatereeri cuhuashiqui quijiaca pa quiniuria, Neyanuniyojua jiitiasano pa quiniuria maninia cutara. <sup>14</sup> Tama Neyanu

cusonutajaaja pa jiyanooriiri sesa pa miishanojiniji. Naacuajitij, paari na pueyara jatanishaareeni.

*Paari maninia quiya Pueyasotani, Cristo cusuucua pa niti*

<sup>15</sup> Pueyasoori maja niquishano quijia. Cristo cutaraari niquishano. Nojuajaari mariyata juhua na Que Pueyaso. Nojuaja cutaraari coteenujuanaa quiquiaari Pueyaso shipiniyaquishacarijia puetunu casaajanaa. <sup>16</sup> Na Que Pueyasoori na shipinitiquiaari puetunu casaajanaa jiya cajiniocua, mijiriano; niquishano casaa, niquiyaquishoo casaanio. Naacuajitij, Cristoori puetunu tamonu cumaacaraca quijiacajanaa shipiniquiaari tama nerajaaja. Nojori shipiniquiaariiri nojori jiiitianura nera jiyocuacaanu casaa, jiyocuaacaanu quijiacanio, mariyata mijiria casaa, mijiria quijiacanio. Nojuajaari puetunujuanaa shipiniquiaari. Tama nerajaaja na shipiniquiaariiri. <sup>17</sup> Puetunu shipinishano casaajanaa jaara shipinishoojua quiquiaari, Cristo cutaraari tari quiquiaari. Nojuajaari puetunu na shipinishanojuanaa cojuua, maninia na quiniuria. <sup>18</sup> Cristoori Pueyaso muerasu Jiyaniijiajuhuaj, taa poojia quiya pa cuaqueya jiyaniijiacuaani. Puetunu Pueyaso muerasujuanaari juhua Cristo cuaqueya quiya, pa miiniuria na panishano mijiria. Nojuajaari juhua poojia. Nojuajaari pa samiitianijia, juhua na cuaqueya pa quishacari. Nojuajaari coteenu samiitiaquiaariuhua macujiniji, juhua Pueyaso jiyapueranu na quiniuria. Naacuajitij, Cristoori coteenu quijia. Nojuajaari Jiyaniijiajuhuanajaj. <sup>19</sup> Pueyasoori paniquiaari Neyanu Cristo jiiitianura puetunu tama na cumaacajanaa, juhua nojuaja na quiniuriajuhuaj. Naacuajitij, Cristoori maja rimiajata quenaaja na quiniu na Quejiniji. <sup>20</sup> Naajuhuj, Pueyasoori paniquiaari Cristo rupuetenuhuara nocua puetunu casaajanaa, maja socua tari juhua na paraa na quiniuria. Naaratej, Cristoori na Que Pueyaso jiyanootiquiaari puetunu casaajanaa tama na cusonutajaaja niyacutesanojinia. Na Que rupuetequiaariuhua puetunu casaajanaari, jiyocuacaanu casaa, mijiria casaanio.

<sup>21</sup> Tarijia, niaari Pueyaso paraa quiquiaari, juhua taanusano pueya Pueyasojiniji, sesa miijiaca nia quiniuucua. <sup>22</sup> Saniniuujia quiarijiani, Pueyasoori nia rupuetequiaariuhua nocua, Cristo cusuucua pocuara, cuaqueyaraca na quishacari mijiria. Naacuajitij, Pueyasoori na naata nia tiuquininiu nocua, tojetaarucujanaa jeequesano nia quishacari sesa nia miishanojiniji. Majaari niaacuara tonujusaanu quiniutianiya quenaaja sesa nia miishanojiniji. Majaari quenaaja shiitianiyojua sesa nia quiniu quiniutianiya na niquiara. <sup>23</sup> Niaari naa quiniutianiya maninia, nia jaara cumaatia rupaaquiaa Cristoocua, nocua nia tiuushacari, nioojia nia niquijioteyaquiniutia. Majaari nia niishiriojonu Pueyaso naasucuaari maja na miiniu quiniutianiya puetunu na sequesanojuanaa niaara, taa nia tojiquiaaricujani. Nia tojishano Pueyaso rupaacuajaari tari pohuatasaacanu puetunu jiyacajiniajanaa. Janiya, Pabloni, janiyari na pohuatanu naacutaajaaniuhuj.

*Pablo Pueyaso pueya maanu cumaquiniara jiyatesaaquiaari*

<sup>24</sup> Cristoori naquiya miishaaquiaari pocuaji na tacunura. Juhua na cuaqueya pa quishacari, naquiya pa miiniu pa rejeretarejuhua na rupaa pa pohuatasacari, puetunu na saquiriojosano pueyajanaa tiuuniuria nocujuhuaj. Naaratej, janiyari shuquiriaatia quiya niyani, naquiya cua miishacari niaacuara. Naa naquiya cua miishacari Cristojiniji cua pohuatanuucua tiquiyocuatej, janiyari Cristo naquiya miiniu tucuataa tama cua cuaqueyajiniaajajani. <sup>25</sup> Pueyasocujajaari cua jiyatequiaari na saquiriojosano pueya cua jiiitianura, cua cumaquiniuria niajaniya puetunu na rupaatajanaa.

<sup>26</sup> Cuno rupaari saaja Pueyaso jiyasohua niishishano quiquiaari tarijia. Majaari na pohuatanu quiquiaari supuetana pueya, tariucuacaanu quijiaca. Quiari naataja cutara, Pueyasoori jiyasohua na rupaa niishitiquiaari tama na saquiriojosano pueyarajaaja. <sup>27</sup> Pueyasoori pa niishitiniu paniquiaari taa jyanohua shacantuuca na cumaaca quiya niajaninyarani, canapue te maja na saquiriojosano Judiocuaca quiquiaaricuajani. Niocuajaari jiyasohua Pueyaso miiniu panishano tarijia: ¡Cristoori nioojiajinia quiya! Nia jiitiasacari Cristo, niaari niishiya niaari shacantuuca quijiara jatanishaanutanijahuaj.

<sup>28</sup> Naaratej, Cristocuajaari canaa pohuatasano. Canaari puetunu pueyajanana nacasuquiaani. Canaari nojori niishitiojoquiaani puetunu canaa niishishanotajanaa, maninia Pueyaso muerasu nojori quiniuria, juhua tojetaarucuajanaa maninia canashitishano pueya, Cristo rupuesano nojori quishacari. <sup>29</sup> Naaratej, puetunu Cristo niquitiosano cumaacatajanaa jyanohua poonijioquiaanijia, na cumaquishacari janiya.

## 2

<sup>1</sup> Pueyanaa, janiyari paniyani nia niishiniuria taa jyanohua cua poonijioquiaa Pueyaso cua secojonuta niaacuarani, Pueyaso muerasuucua Laodicea tiacajiniajuhuaj, puetunu juhuanujuaja cua niquiyaquiniaa pueyacuaraajanaano. <sup>2</sup> Jyanohua secojoquiaa niaacuaranijia, nioojiaca cumaquishaanura, nioojiaca rupuetoonura jatiqijiuhuaj, jyanohua nia panitioosacari. Naajuhua, secojoquiaanijia maninia niishijiacara nia quiniuria, maninia nia niishiniuria tariucuacaanu Pueyaso niishishano tamajaaja, taa Neyanu seera maninia na miiniutianiya pajaniyani. <sup>3</sup> Neyanu Cristocuajaari puetunu niishijiajanaa. Majaari tamonu niishijia quiniu juhua nojuaja. Jyanohua maninia miijia puetunu na niishishanotajanaari. <sup>4</sup> Janiyari nio sequeya niajaninyani, tamonu mariqui nia sapojoreeri najuhuaana tamaatia na pohuatasano. <sup>5</sup> Majaari cua quiniu quiquiaa niaata. Naajaa, cua sohuanuuri niaata quiquiaa. Nia shuquiritiaanijia, maninia jatiqui nia quishacari, mariyata seetanujuanaa maninia nia tiuushacari Cristoocua, maja jatasano nia quiniuria.

<sup>6</sup> Niaacuajaari pa Jyanijia Jesucristo masequiaari, nia jyanijia na quiniuria. Naaratej, pueyaracaanu maninia nia rupuerenoj, maninia nia quiniuria mijiria na cumaacata. <sup>7</sup> Maninia nia rupuetooore Cristota, naatej, taa naana cumaatia nujuaacuaani, jaara tucuamaaca nujucaraca quiri. Naacuajitij, majaari nia naata jatasano quiniu, maninia nia tiuushacari nocua, taa nia niishitiojosaaquiaricuajani. Cunora, pueyaracaanu nia sequeriquia Pueyaso: “Paacarasho canaa Quena”.

### *Niaari quiarinio pueya, Cristo quishacari nioojiajinia*

<sup>8</sup> Tama nia cuaqueyajaaja nia cojuare, tamasa mariqui nia sapojoreeri tamaatia nojori niishishanota najuhuanaj. Naa jaara nojori niishitiojosano tojitiariquia, niaari juhua nojori quioosano pueya quiniutianiya. Nojori niishishanoori maja Cristojiniji. Nojori niishishanoori saaja mijiria niishishano, supuetanaa pohuatasano najuhuanajahuaj.

<sup>9</sup> Nocuaji saaja Cristo nia tojiri. Tama Cristo cutarajaarijia puetunu Pueyaso cumaacajanaa jiitijaa, puetunu na niishitijajanaano. <sup>10</sup> Naajuhua, niaari Pueyaso cumaaca jiitiaa, na niishitijajanao, nia rupuesacari Cristo. Naacuajitij, niaari puetunu nia panishanujuanaa jiitiaa tari, maninia quijiaca nia quiniuria. Cristojuanaari Jyanijiajanaa. Cristo jaara na jiyarore, puetunu tamonu cumaacaraca quijiacajanaari



na tojitiaa; jiyocuacaanu camarnu, mijiria camarnunio. <sup>11</sup> Cristo nia rupuesacari, niaari seetanujuanaa jatanishaaree maja sesa nia quiniuria socua. Majaari nareja nia cararaatiuuquia co miatesaanu quiquiaari, taa Judiocuaca miiquiaacuaani. Nojoriiri miatesaaquiaa nojori niishiniuria nojori cuaara quiiria saa Pueyasoraja, maja sesa miihia nojori quiniuria socua. Cuno, miatenuni, majaari pueyano na jataniniu sesa na miiniuujiniji. Cristo cutaraari sesa nioojia jataquiaari, seetanujuanaa sesa nia quiniu jataaanura puetunujuanaa. <sup>12</sup> Puetunu sesa nia quiniujuanaari juhua jamosaaquiaari Cristota, niaa jaara moojinia tiuquinijiosaare. Nia tohuatasacariuhua, niaari juhua samiitianishaarohua Cristota, Pueyaso cumaacaacua nia tiuushacari. Niaari samiitianishaarohua taa Pueyaso samiitianiquiaariuhua Cristocuaani. <sup>13</sup> Niaari juhua macu quiquiaari tarijia, sesa miijiaca nia quishacarijia, sesa jiuujiaraca nia quishacarijianio. Jiyacaritij, Pueyasoori nia samiitianiquiaari Cristota, na jiyanooshacari niajaniya puetunu sesa nia miishanojinijijianaa. <sup>14</sup> Pa tojiyaquishacari tariucuacaanu Pueyaso rootasano, paari puecosocoriquiano quiquiaari juucuanu. Sesa pa miishanoori juhua naajiotasano quiquiaari Pueyasora. Pueyaso cutaraari sesa pa miishano naajiotasano tuujuquiaari puetunujuanaa. Pueyasoori puetunu sesa pa miishanojuanaa tiutiaquiaari Cristoocua. Cristo teetesacari niyacutesanojinia, puetunu sesa pa miishanojuanaari cuniqui puequequiaari. Naa Cristo miishacari pocuaratej, majaari sesa pa miishano tiutiasaanu pocua. <sup>15</sup> Na cusosacari niyacutesanojinia, Cristoori puetunu tamasa sesa cumaacaraca quijiacajanaa shocotaquiaari. Nojori cumaaca jaariutiareeri. Nojori rerequetereeri, naatej, taa quioosano pueya jaatucunuusaaquiaacuaani, pueya niquiara macaatisocoriquiano.

### *Saaja Pueyaso casaacua nia jiaatiariquia*

<sup>16</sup> Naaratej, majaari nia tojiniu noo pojori, canapuate nia tojitiniu saniniu-jiya supuetana niishitiojosanocujani. Nojoriiri najuhuana niishitiojoquiaa casaa sumatuute puereshiyani, rusanonio. Nojoriiri niishitiojoquiaa-juhuaj teyano juucate poonijiyaquishiyani, naajuhua, Pueyaso niquiara pa queranacunuunura raca macura. Nojoriiri naa niishitiojonuuquiaa nojori jyanishacari paa jaara naa miyaquirini, Pueyaso mariqui pa sanitioreeri. <sup>17</sup> Puetunu cuno supuetanaa niishitiojosanojuanaari tariucua-caanu quiquiaari, miriqui na niishitiojonura pueya taate seetanujuanaa quiniutianiyani Niriquiano jaara tiuquiri. Cuno Niriquianocujaaari Cristo. Tari tiuquiquiaariiri. Nojuajaari pocuaji Tacuna. Naaratej, majaari socua pa tojiniu cuno miriqui niishitiojosano. Quiarjia saaja Cristo pa tojiri cutara. <sup>18</sup> Tama nia cuaqueyajaaja nia cojuare, tamonu niishitiojonaa mariqui nia sapojoreeri, niaa mariqui Pueyaso niquitionu panishano nia-janiya maseyaquiriiri. Nojoriiri tama na cuaqueyajaaja shuquiritiaquiaa na jyanishacari nojori maja Pueyaso shocotaja na quiniu nojori secojosacari Pueyaso seya, maja Pueyasojanaa. Nojoriiri tama na maquenujinia na niquishanoocujaja tiuujiaa, maja Pueyaso rupaacua. Naacuajitij, nojori tiuushacari tama na niishiriojosanoocujaja, nojoriiri seetanujuanaa pueya shocotajaca quiya. <sup>19</sup> Nojoriiri maja na rupuenu Cristo, juhua poojia Cristo quishacari, na cuaqueya pa quishacarijuhuaj. Paa jaara maninia rupuetesano quiri poojatani, poojiaari maninia maashitiya puetunu pa cuaqueyajanaa, paa jaara maninia rupuetoonu quiya puetunu pa nucuhu-atajanaani, pa cusorohuatano. Pueyasoori naa pa maashitiniu paniya-juhuaj Cristota rupuetootesano pa quishacari.

<sup>20</sup> Niaari juhua tari cusoquiaari Cristota, maja socua juhua mijiria qui-jiaca nia quiniuria. ¿Macutucua taa supuetana rootasano tojirini? Maja na naata. ¿Niajaniyariuhuj? ¿Casaara nia tojitiaajaa cuno tariucuaaanu rootasanoni? Niaari juhua nareja mijiria quiniaa quiyajaa, nia tojishacarijia cuno rootasano. <sup>21</sup> Supuetanaari naa piriyojoquiaaritij: “Maja pa quianu cuno. Maja pa miaquenu cunojuhuj. Maja cuno pa cooniu”. Pa supuetanaari naa sequejatej. <sup>22</sup> Naajaa, puetunu cuno pueresano casaa-janaari saaja shaajeja pa seecojinia. Majaari poojia na miiniu sesa. Cuno tariucuaaanu rootasanoori saaja tama pueya niishishanojuajaa quiquiaari. <sup>23</sup> Paa naasucuaari jiyaniyani cuno rootasanoori maninia quiya Pueyaso shuquiritianura pajaniya socua. ¿Paatucua socua maninia pueya quirini paa jaara casaa sumatuu puerereni, naajuhuj, paa jaara naquiya miiri tama pa cuaqueyajaajani casaa pa puerenutani? Maja. Pa pueresacari casaa, cunoori najuhuana Pueyasora. Cunoori maja na naacunu pajaniya sesa casaacua pa jiaatiaaquiniuria.

### 3

<sup>1</sup> Niaa jaara samiitianishaaquiaari Cristota, jiyocuacaanu Pueyaso jiiti-asanooocua nia jiaatiare, tee Cristo cajiya na Que Pueyaso miaquetajaracua-jani. <sup>2</sup> Pueyaso casaacua nia niishiriojore saaja, maja mijiria casaacua. <sup>3</sup> Puetunu tarijia sesa nia quiniujianaari tari juhua jamosaaquiaari, niaa jaara Cristo cusonu jiyatere tama nia nitijiaaja. Quiarijiani, niaari saminio quiya nia rupuesacari Pueyaso, Neyanu Cristota. Nojuacuajaari pa sami-itianijia. Saniniuujia, juhuanajuaja maja niishishano taamueca quijiaca pa cuaqueya quiniutianiyani. <sup>4</sup> Cristo jaara muetarohua pocua mijiria, shacantuuca cumaacaraca quiija na quishacari, jiyacaritij, paari jatanishaanutaniyani shacantuuca cumaacaraca quijiaca pa quiniuria nata, juhua nojuajuhuj.

#### *Maninia rootasano Pueyaso muerasura*

<sup>5</sup> Naaratej, nia cuaqueya cuara quiiria juhua macu tama nia niquiara-jaaja, nia cuaqueya nia ruuretanura na jiaatiasacari sesa miiniuucua. Naaratej, maja nia numuetucunu nia camishoo maaji. Maja sesa nia miiniu niarta canuuta, niarta maajitianio. Nia cartere puetunu sesa miiniuucua nia jiaatiasanojuanaa. Maja sesa casaacua nia jiaatianu. Maja puera casamiicua nia jiaatianu. Casaacua jiaatijaari juhua Pueyaso ruuretaja quiya, tama na jiitiasano casaacuajaaja na tiuushacari juhua Pueyasooocuaaja. <sup>6</sup> Pueyasoori jiyanoohua saniitionutaniya na tojiyashijiaca, canapuate naa sesa quijiacacuajani. <sup>7</sup> Pueyaso tojiyashijiaca nia quishacari tarijia, niaari naa sesa miijiaca quiquiaari. <sup>8</sup> Quiarijiani, nia tarinitiare puetunu naa sesa nia quiniujianaa. Maja juaajia nia quiniu. Maja naseeca pueyano nia quiniu. Maja jiyanooyashijia nia quiniu. Maja sesa miijia nia quiniu. Maja pueya sesacaja nia quiniu. Maja sacuaraatia najuhuana nia niti taquiriocuateja nia quiniu. <sup>9</sup> Maja nia cuaracashijotoonu. Niaari tari jatanishaaquiaari tarijia sesa nia quiniujiniji, sesa jiuujiaraca nia quishacarijia, sesa miiniuucua jiiitinio nia quishacarijuhuaj. <sup>10</sup> Niaari quiarinio jiuujiaraca quijiaca tari. Quiarijiani, tama nia cuaqueyajaarijia tari jataa juhua nia Shipinina Pueyaso nia quiniuria, seetanujuanaa Pueyaso niishijia nia quiniuria. <sup>11</sup> Pueyaso jatanishano pueya pa quishacari quiarijiani, majaari tari rimiajata pa quiniu, paa jaara Judiocuaca quiyani, tamasaca pueyano; na cararaatiuuquia co miatesano pueya, miatesoo pueyano. Paa jaara tahue quiyani, juhua mococori, poonijotesano pueya, camarnuju pueyano, naajaa. Cristo pa rupuesacari,

puetunu pajaniyajanaari mariyata na muerasu quiyani. Nojuajaari puetunu poojiajinia quiyajuhuj.

<sup>12</sup> Pueyasoori nia saquiriojoquiaari saa maniniaja nia quiniuria nera. Niajanियari na panishano muerasu. Naaratej, pueyacuataaraajeja nia quiri. Maninia miijia nia quiri. Majaari nia jiyaniniu tama nia cuaqueyajaarija socua maninia tamonujiniji. Maja juaajia nia quiniu. Jacaria pocuaja nia quiri. <sup>13</sup> Jacaria nacasutoojua nia quiri. Maninia nia jiyanoori cante sesa miirii niajanियani. Taa pa Jiyaniijia jiyanooquiaari pajaniyacuaani, naa nia jiyanoootioorejuhuj. <sup>14</sup> Seetanujuanaa pueya panijiaca nia quiriijuhuj. Cunoori socua jiyanoohua panishano. Panitioojuaca nia quishacari, puetunu nia miishanojuanaari jiyanoohua maninia quiniutianiya, jatiqiu nia quiniuriajuhuj. <sup>15</sup> Naajuhuj, Pueyaso nia shanacure nioojia na cajitiniuria pueyaracaanu. Nojuacuajaari nia saquiriojoquiaari juhujaniya quijiaca nia quiniuria, maninia rupuetootesano. Pueyaso muerasu cuara jatiqiu poonijionuujuaca quiiria, naatej, taa pa cuaqueyajiniacuma casaa puetunujanaa jatiqiu quiyacuani. Majaari nia juaatiojonu. Naajuhuj, Pueyaso nia shuquiritiare pueyaracaanu, puetunu maninia na miishanojinijijianaa niaara.

<sup>16</sup> Nioojia cuara quiiria mishaja Cristo rupaata, jiyanoohua na tojjiaca nia quiniuria. Pueyaso Rupaa nia niishitiojotoore nia jaaquequejosanota. Naa nia cumaqutioojore puetunu Cristo niishishanotajanaa. Nia jaaquequejonuure Pueyaso Rupaa naajiosanojiniji, pueya naajiosanojinijijuhuj, Pueyaso Sohanu niishitiosano niajanियanio. Naa nia jaaquequejore Pueyasora, nia shuqiritianuta nojuaja. <sup>17</sup> Jesucristocuaajaari nia Jiyaniijia quiya. Naacuajitij, niaari na sesaanucua. Naaratej, nia sequesano, nia miishanojuhuj, puetunu cunojuanaa cuara quiiria maninia nera. Naa nia miiriquia pa Que Pueyaso nia sequenuta “paacarasho”, Neyanu cumaquiniucua niajanिया.

### *Maninia miijia pa quiri Pueyaso muerasu pa quishacari*

<sup>18</sup> Maajipohuanaa, nia niyaca tojitiajaca nia quiri. Pa Jiyaniijiaacua tiujiaca cumaati naa miiquiaaquij. <sup>19</sup> Pueyanaa, nia niquiocua nia paniri. Majaari na juaaniu. <sup>20</sup> Mueraasapuenaa, nia queya tojjiaca nia quiri, nia shuqiritiniuria pa Jiyaniijia. <sup>21</sup> Pueyanaa, maja nia juaatinu nia niquiohuan, nojori mariqui maninia miiniuucujaji pishiriiri, puera nia juaashacari nojori. <sup>22</sup> Poonitijosano pueyanaa, puetunu nia camarnu sequesanojuanaa nia tojiri. Maja na tojijia nia quiniu saaja na shootiasacari niajanिया, na shuqiritianura niajanिया. Majaari saaja na niquishacari nia poonijionu nia sapojonura nojuaja. Seetanujuanaa maninia nia poonijiore pueyaracaanu nia puerenuta saniya nia camarnujuanaa Pueyaso. <sup>23</sup> Puetunu nia miishanojuanaa nia miiri shitimia, juhua pa Jiyaniijia Cristora. Naa nia miiritij, maja juhua nareja pueyara. <sup>24</sup> Maja nia niyajetanu, pa Jiyaniijiaari nia niqutionutaniya jiyocuacaanu niaara na jiiiasanojiniji. Mijiria camarnura nia poonijosacari, niaa cutaraari Cristora poonijiya. Nojuacuajaari nia camarnujuanaa. <sup>25</sup> Pueyasoori sesa miijia sanitionutaniya cutara, sesa nojori miishanojiniji. Pueyasoori maja rimiajata saniniuujijia. Mijiria camarucua, poonitijosano pueyano, naajaa, nojoriiri maja rimiajata Pueyasora.

## 4

<sup>1</sup> Camarucuaanaa, pueyaracaanu maninia nia miiriquia nia poonitijosano pueya. Majaari nojori nia miiniu sesa. Maja nia niyajetanu, niaari jiyocuacaanu Camarnuracajuhuj.

<sup>2</sup> Pueyanaa, Pueyaso secojojua nia quiri pueyaracaanu. Nia secojoriquia maninia nia niishiniutia. Pueyaracaanu Pueyaso nia secojosacari, nia sequerenoj, “paacarasho”. <sup>3</sup> Naajuhuj, canaacuara nia secojore Pueyaso, nojuaja cuara canaa pohuataniiria pueya niquiara na rupaa Cristojiniji. Majaari pueya niishiniu quiquiaari tarijia Pueyaso miiniu panishano pajaniyara Cristo seera. Cua pohuatanuucua Cristojiniji, cunora nujuatesano niya quiyani nio nujuatejojua nia. <sup>4</sup> Pueyaso nia secojore cucuara, maninia cua pohuatanura Cristojiniji, pueya niishiniuria maninia cua pohuatasano, taa Pueyaso paniya cua pohuatanuracuajani.

<sup>5</sup> Maninia nia niishiriojore taa nia miiniutianiya noo pojorini, canapuetucuaaja maja Pueyaso muerasuni. Maninia nia miiri nojori, mijiria nia quishacarijia. <sup>6</sup> Nia pocoojosacari nojoritia, maja najuhuaana nia pocuanu. Pueya nia cumaquiri nia sequesanta. Nia niishiriojore taa nia riucuanutaniya tamasa pueyani, nojori jaara nequesotariquia niajaniya Pueya-soocua nia tiuuniujiniji.

*Nata quiniaata Pablo saruhuatasacari pueya, naajionu na puecanura*

<sup>7</sup> Pa panishano pa tarajanu Tiquicoori nia pohuatanutaniya janiyajiniji. Nojuacuajaari cua cumaquinia maninia. Nojuacuajaari cuarta Pueyaso seru, pa Jiyaniijara canaa poonijonura. <sup>8</sup> Niaacua na jiyaroyanijia na pohuatanura niajaniya taa canaa quiyani, naajuhuj, na cumanijianura niajaniya. <sup>9</sup> Pa panishano Onésimoori nata quianutaniyajuhuj. Nojuacuajaari niajaniyajinijinio pueyano. Maninia poonijojua Pueyasora. Nojoricuajaari nia pohuatanutaniya puetunu niiquijijianaa.

<sup>10</sup> Aristarco, cuata nujuatesano pueyanoni, nojuajaari cua sequeya cua saruhuatanura niajaniya nera. Marcoori nia saruhuataajuhuj. Nojuajaari Bernabé cuna. Niaacuajaari tari rootasaacanu Marcojiniji. Nojuaja jaara niaacua quiaare, niocua maninia na tiuquiniri nia tiajinia. <sup>11</sup> Jesu sesaanucua pueyanoori nia saruhuataajuhuj. Na sesaari Justojuhuj. Saa nio pojorijia Judiocuacajinijioori cuata poonijioquiaa Pueyasora, canaa niishitiojonura Cristojiniji pueya niquiara. Nojoriiri cua cumanijianaa quiquiaa. <sup>12</sup> Epafraasi nia saruhuataajuhuj. Nojuajaari Cristo seru niajaniyajinijiojuhuj. Nojuajaari pueyaracaanu niaacuara secojoquiaa queraatia, jiyano hua cumaatia Pueyasooocua tiuujica nia quiniuria. Secojouquiaajaariuhua ritia Pueyaso tojijica nia quiniuria, puetunu Pueyaso panishanojuanaa nia miiniuria maninia. <sup>13</sup> Seetanujuanaa, Epafraasi jiyano hua tacaquiaa niaacua, Laodicea tiacajinia quiniaa Pueyaso muerasuucujuhuj, Hierápolis tiacajinia Pueyaso muerasuucuanio. <sup>14</sup> Pa panishano naarajona Lucasri nia saruhuataa. Demas nia saruhuataajuhuj.

<sup>15</sup> Canaara nia saruhuatare Laodicea tiacajinia quiniaa parta Pueyaso muerasu. Ninfas nia saruhuatarejuhuj, na tiajinia rerejonaa Pueyaso pueya maanujuhuj. <sup>16</sup> Niaa jaara nio naajionee serojorecuaa nia rerejosacari, Laodicea tiacajinia nia jiyarotarejuhuj, cuara serojosaaria Pueyaso pueya maanu niquiara tiijuhuj. Naajuhuj, cua naajionee Laodicea pueyacuara nia serojore, niaacua nojori jiyarotasacari Laodicea tiacajiniji. <sup>17</sup> Naa Arquipo nia sequere quiria: “Tama quia cuaqueyajaaja quia cojuare quia tucuatnura quia poonijiosano pa Jiyaniijara. Nojuajaari quia jiyatequiaari nera poonijioriquiano”.

<sup>18</sup> Janiyari Pabloni. Quiarijiani, tama cua juaashiquiatajaaja naajiyaniija saaja cua saruhuatanura niajaniya. Nia niishiriquia, janiyari moronucua nujuatesano quiyani. Pueyaso cuara cumaquii niajaniya na cumaacata jiyano hua. Tariucuaaja.

## **COTEENU PABLO NAAJIONEE TESALÓNICA TIACAJINIA QUINIAA PUEYASO PUEYACUARA**

### *Pablo saruhuatasacari Pueyaso pueya*

<sup>1</sup> Janiyari Pabloni. Janiyari nio naajiya Tesalónica tiacajinia quiniaa Pueyaso pueya maanuucuarani. Niaacuajaari pa Que Pueyaso rupuejaca, pa Jiyaniijia Jesucristo rupuejacio. Canaari mariyata nia saruhuataani, Silvano, Timoteonio. Pueyaso cuara maninia jütiaara na cumaacata nia-janiya, maninia nia quiniuria. Cuara nioojia cajitiirijuhua, juhuajaniya nia quiniuria.

### *Tesalónica pueyanaari Jesuucua tiuujiaa quiquiaari seetanujuanaa*

<sup>2</sup> Maninia nia quiniucua, canaari pueyaracaanu Pueyaso sequequiaani, “paacarasho”. Canaa secojonuusacari, canaari pueyaracaanu niaacuara secojonuquiaani. <sup>3</sup> Pa Que Pueyaso canaa secojosacari, canaari pueyaracaanu niishiquiaa niajaniyani, taa pueyaracaanu nia poonijioquiaa Pueyasorani, Neyanuucua nia tiuuniucua. Canaari niishiquiaajuhua taa nia paniniutia nia naacuquiaa niarta pueyani. Naajuhua, niaari maninia rejeretaquiaa taraatia nia miiniu, nia niishiniucua pa Jiyaniijia Jesucristoori pocua niniutianihua. <sup>4</sup> Pueyaso panishano pueyanaa, canaacua-jaari niishiyani, nojuajaari nia saquiriojoquiaari na panishano muerasu nia quiniuria. <sup>5</sup> Canaa jaara nia niquiara pohuataquiaari Pueyaso rupaa Jesucristojinijini, cunoori maja najuhua pohuatasano quiquiaari. Canaa pohuatasanoori jiyanhua Pueyaso cumaacaraca quiquiaari. Pueyaso Sohuanuuri jiyanhua poonijioriquiaa nioojiacajinia. Naacuajitij, niaari niishiquiaari canaa pohuatasanoori seetanu rupaaajanaa. Niaacuajaari niishiya taa quijiaca canaa quiquiaari canaa quishacari niaatani, maninia Pueyaso muerasu nia quiniuria.

<sup>6</sup> Niaari canacua jiaatiaquiaari, juhua canaa nia quiniurijuhua, juhua pa Jiyaniijia Jesu nia quiniurijuhua. Niaari seetanujuanaa naa miijiacara quiquiaari, Pueyaso tojijia nia quiniurijuhua taa canaacuaani. Pueyaso rupaa nia tojishacari, niaari jiyanhua na timitiaquiaari. Cunora, niaari jiyanhua naquiya miishaaquiaari. Naajaa, Pueyaso Sohuanuuri nia cumaquiquiaari saaja, shuquiriaatia nia quiniuria. <sup>7</sup> Naa shuquiriaatia Pueyaso tojijia nia quiniucuatej, niaari niarta Pueyaso pueya shiniujuquiaari, seetanujuanaa Pueyaso tojijia nojori quiniurijuhua. Niaari naa shiniujuquiaari puetunu niarta Pueyaso pueyajanaa Macedonia jiyajinia quiniaatej, Acaya jiyajinia quiniaanio. <sup>8</sup> Pa Jiyaniijia rupaari niajaniyajiniji tucuaaanu paaquequiaari, maja saaja Macedonia jiyajinia, Acaya jiyajinianio. Cuno rupaari puetunu tiqiyocuaajanaa poojotasaquiaari. Naacuajitij, puetunu tiqiyocua quijiaca pueyajanaari tari niishiya taa Pueyasocua tiuujia nia quiya seetanujuanaani. Naacuajitij, ¿canaacua casaara niishitiojore Jesujiniji socuani, tee cuniqui pueya niishiya tari nojuajinijicuaajani? <sup>9</sup> Tee cuniqui canaa tiuquiquiaani, pueyari canaajiniji poojotanuya tari, taa Jesujiniji canaa pohuataquiaaricua niajaniyani. Nojoriiri niishiyajuhua taa canaa nia tiuquinitiaquiaari maninia nia tiacajini-queyani, canaa pohuatasano nia tojiniuria. Naajuhua, niaanaari pueya shipinijosano nia jiyatesano nia pueyasora cartequiaari, pueyaracaanu



rishijia seetanu Pueyasojuanaa tojtiaajaca nia quiniuria. <sup>10</sup> Naajuhuaaj, niaanaari Neyanu sashiya, jiyocuacaanuji na tiuquiniuhua, tevano Pueyaso samiitiani quiaariuhua macujiniicuaajani. Pueyari niajanijajini niishiya-jaacuhuaaj, Jesuuri pocuaji Tacuna, maja mani quiquiojinia pa quejoosaa-nura, Pueyaso saniitiosacari na tojtiaashijia.

## 2

### *Pablo niishitiosacariuhua pueya, taa na quiquiaari nojoritiani*

<sup>1</sup> Cuarta Pueyaso pueyanaa, niaacuajaari niishiya, majaari najuhuana canaa quiniu quiquiaari, niaata canaa quishacari. <sup>2</sup> Niaacuajaari niishiya, Filipino tiacajinia canaa quishacari, niaacua canaa tiuquiyacuquishacarijia, canaari cuno tiacajinia sesacasaquiarini. Canaari jiyano hua taraatia miishaaquiaarijuhuaaj. Naajuhuaaj, nia tiacajinia canaa tiuquiiijosacari, pueyari canaa pohuatasano ruuretaquiaari saaja. Naajaa, Pueyasoori canaa cumaquiquiaari juhua jiuujiaaju canaa pohuatanura Jesucristojiniji nia niquiarajuhuaaj. <sup>3</sup> Canaacuajaari niishi quiaarini canaa pohuatasanoori seetanu rupaajanaa. Majaari canaa pohuatanu quiquiaari canaa miiniuria sesa niajaninya, canaa sapojonura niajanijajuhuaaj. <sup>4</sup> Pueyasojuanaari canaacua tiuquiquiaari. Cunora, canaa jiyatequiaariiri Neyanujiniji pohuataanaa canaa quiniuria. Naacuajaari taa canaa poojotaquiaa pueya tiuuniuria nocuacua-jani, Pueyaso jiyanooniuria nojori. Canaari seetanujuanaa Pueyaso timitini paniyani, maja saaja pueya. Pueyasocuajaari canaa jiuujia niishijia. <sup>5</sup> Niaacuajaari niishiyajuhuaaj, majaari canaa sapojonu quiquiaari niajaninya shanohua canaa sequesanota, canaa nia maniniucuanura. Naajuhuaaj, majaari canaa cuaracashijionu quiquiaari niajaninya, canaa nia niquitiojonura nia cumaneecajiniji. Pueyasoori na niishiyacuaja. <sup>6</sup> Majaari quenaaja canaa niishiriojonu quijia pueya timitiasano canaa quiniuria, nia timitiasano pueya canaa quiniuriajuhuaaj. Maja. <sup>7</sup> Canaacuajaari seetanujuanaa nia jiyaniijianucuanu, Jesucristo jiyaramiquishano pueya canaa quiniuucua. Naajaa, niaata canaa quishacari, majaari naa canaa miiniu quiquiaari niajaninya, juhua canaa seya nia quiniuria. Saniniuujia, canaari tojetaarucua-janaa juhua naatujoori quiquiaarini, niaata canaa quishacari. Naatej, taa maaji jiiitaa maninia necohuacuaani, canaari naa nia jiiitacquiaarijuhuaaj. <sup>8</sup> Jiyano hua canaa paniniuucua niajaninya, majaari saaja Pueyaso rupaa canaa pohuatanu quiquiaari niajaninya. Canaa cutaraari tama canaa cuaqueyajaaja panitacquiaari niaacuarani, naajaa, canaa cuara puecoosaariaqui. Canaari naa jiiitacquiaari niajaninyani, jiyano hua canaa paniniuucua niajaninya. <sup>9</sup> Cuarta Pueyaso pueyanaa, niaacuajaari niishiya taa canaa poonijioquiaari jiyano huani, tama canaa panishanojuaaja canaa masetajara. Canaari naa poonijionuquiarini juuca, niucuanio, canaa pohuatanura Pueyaso rupaa niajaninya. Canaari naa miiquiarini maja canaa taajetenura niajaninya canaa mashiniquijionuta nia cumaneeca.

<sup>10</sup> Naacuajitij cuarta Pueyaso pueyanaa, niajaninya, Pueyasojuhuaaj, niaacuajaari niishiya canaari saaja maninia miiquiarini, niaata canaa quishacari. Majaari quenaaja canaa miiniu quiquiaari sesa. Naacuajitij, tamasaari maja na naata canaacuara saquiriojotanu, canaa jaara tojetaarucuajanaa sesa miyaquiquiarini. <sup>11</sup> Niaari niishiyajuhuaaj taa canaa shiniuquiquiaari niajaninyani Pueyaso nia tojiniuria. Niaari niishiyajuhuaaj taa canaa cumanjiaquiaari puetunu niajanijajanaani taraatia nia quishacari, naatej, taa pueyano miiquiaa na panishano niquiohuacuaani.

<sup>12</sup> Naajuhuaaj, canaacuajaari jiyanoehua nia nacasuquiaarini maninia miijia-aca nia quiniuria juhua seetanujuanaa Pueyaso pueya. Pueyasocuajaari nia saquiriojoquiaari pueyaracaanu nata nia quiniuria, jiyaniijianucua nia quiniuriajuhuj, juhua nojuajuhuaaj. Nojuacuajaari na shacantuuca cumaa-cajinia quijia.

<sup>13</sup> Canaa jaara Pueyaso rupaa pahuataquiaari nia niquliarani, majaari nia jyaniniu quiquiaari cunoori saaja pueyajini nia canaa tojiniuushano. Maja. Niaari seetanujuanaa na tojitiajacara quiquiaari, nia niishishacari cunoori seetanujuanaa Pueyaso rupaa cutara. Canaari cunora canaa timiniutia sequequiaa Pueyasoni, “paacarasho”. Canaa pahuatasanoori seetanujuanaa Pueyaso rupaa. Naacuajitij, na rupaari nioojiajinia poonijioquiaa, maninia miijiacara na jataniniuria niajaniya, Jesuucua tiuujiaca nia quiniucua. <sup>14</sup> Naa Jesucristoocua tiuujiaca nia quiniucuatej, niarta pueyari nia miiquiaari naquiya, taa Judea jiyajinia parta Pueyaso pueya maapue miishaaquiaaricuaani. Tama narta Judiocuacajaari nia nojori mi-iquiaari naquiya, Jesucristo tojijiacara nojori quiniucua. <sup>15</sup> Nio cuarta Judiocuacani, nojori supuetanaajuhuaaj, nojoricuajaari pa Jiyaniijia Jesucristo motuquiaari. Nojori supuetanaari naa tariucuaaanu puecooquiaarijuhua Pueyaso sequesano caminiujiuniaa pueyatej. Naajuhuaaj, Jesuucua tiuyashijiacara cuarta Judiocuacari canaa taanuquiaari canaa Judea jiyajini. ¿Cuno pojoritiiri Pueyaso timitiasano? ¡Maja! Cuno pojoricuajaari juhua puetunu mijiria quiniaa paraajanaa. <sup>16</sup> Naacuajitij, canaa jaara taucua pahuatanu paniriquia Jesucristojini nia, Pueyaso pueyara nojori jiyatesaanurajuhuaaj, Judiocuacari canaa tenujuquiaa juucua. Naacuajitij, Pueyasora, sesa Judiocuaca miijosanoori tari tojetaarucuaajanaa puera. Cunora, Pueyasoori nojori saniitioquiaa jiyanoehua.

*Pablo naquerejosacari juucua Tesalónica tiacajinia quiniaa Pueyaso puey-  
acua*

<sup>17</sup> Cua panishano pueyanaa, canaacuajaari rupaquijiara nia shuriucuaaji quiaquiaariuhua. Jiyacari canaa niquiyaquishacari niajaniya, naajaa, canaacuajaari juhua niaata quiquiaajaani, pueyaracaanu canaa niishirio-josacari niajaniya, niaacuara canaa secojosacari. Canaari juucua jiyanoehua nia niqiniu paniriquiaani. <sup>18</sup> Cunora, canaari niaacua naquerejoquiaari juucua. Janiyari niaacua naquerejonu pacutejoquiaarini. Satanásri canaa cushitioquiaari saajani. <sup>19</sup> ¿Janiyatucua casaara nia niqiniu paniyaquiri-irini? Niaacuajaari jiyanoehua cua timitiasano pueya. Pa Jiyaniijia Jesu-  
cristo tiuquishacariuhua, janiyari niishiyani, nojuajaari canaa shuquiri-  
tianutaniya maninia na tojijiacara nia quishacari canaa niishitiojonuucua  
na rupaa niajaniya. Pa Jiyaniijata pa quishacari, jiyacaritij, canaari  
jiyanoehua nia timitianutaniyani, maninia na tojitiajaca nia quiniucua mi-  
jiria. <sup>20</sup> Taaquiririnij, canaacuajaari tari shuquiriaatia quiyani, maninia na  
tojitiajaca nia quiniucua. Niacuajaari seetanujuanaa canaa timitiasano  
pueya.

### 3

<sup>1</sup> Naa jiyanoehua canaa niishiniu panishacari juucua niajaniyajiniitij, ma-  
jaari socua canaa sashiniu paniniu quiriquiaa. Cunora, canaari niishirio-  
joquiaarini, maniniacuajaari canaa jateenura tamajaaja Atenas tiacajinia.  
<sup>2</sup> Naacuajitij, canaari saaja parta Pueyaso pueyano Timoteo jiyaroquiaari  
niaacuani. Nojuacuajaari jaarajaaja cuata poonijiona Pueyasora, Jesucristo-  
jinijia canaa pahuatanura. Janiyari niaacua na jiyaroquiaarini na cumaquini-  
uria niajaniya, mariyata socua na shiniujiuniuria niajaniya Jesuucua nia

tiuuniuria saaja. <sup>3</sup> Na jiyaroquiaarinijia na cumaquiniuria niajaniya maja quenaaja niquiriyatu niajanijajinijinio pishiniuria Pueyasooquaji, naquiya nia miishacari. Niaacuajaari tari niishiquiaari, paari naquiya miishiyani Jesucristoocua pa tiuuniuucua. <sup>4</sup> Canaa quishacari niaataja, canaacuaajaari tari nia numootequiaarini, puetunu pajaniyajanaari naquiya miishaanutaniyani Jesucristo tojtiajaca pa quiniuucua. Niaacuajaari niishiya, seetanujuanaa naa tohuatecanuuri cua sequesano. <sup>5</sup> Cua niishishacari niajanijajiniji, niaanaari naquiya miishaaquiaa, janiyari puereriquiaani Sesaaca naasucua nia miitiriucuaa sesa. Jaara naa quiriritij, puetunu canaa miishanojuanaa niaara maara najuhuana quiquianu. Naa cua tacaashacari, majaari socua cua tarishiniu paniniu quiquianu, niajanijajiniji cua niishiniuria. Cunora, janiyari ritia jiyarocanu niaacua Timoteoni, saniniuujia nojuaja pohuatanuhua janiya, niaate Jesuucua tiuyajaa.

<sup>6</sup> Timoteocuaajaari tari niajanijajiniji tiuquiriohuacuaa. Nojuajaari canaa pohuatasuhuacuaa, niaanaari Jesuucua tiuyajaa. Niaanaari panitioojuaca quiyajaa. Canaa pohuatasuhuacuaajaariuhuaaj, niaanaari canaa niishiriojoquiaa jiyanohua nia paniniutia canaa. Niaanaari canaa niquiniuucua jiaatiaa, naatej, taa canaa jiaatiaa canaa niquiniuria niajanijajinijia. <sup>7</sup> Cuarta Pueyaso pueyanaa, seetanujuanaa canaari taraatia miishiya niyani. Canaari tacayajuhuaaj. Naajaa, canaa niishishacari niaanaari seetanujuanaa Jesuucua tiuyajaa, canaari canaa jiuujia cajitiriucuaani. <sup>8</sup> Naa canaa tojishacari niaacuajitij, canaari juhua samiitiacorohuani, pa Jiyaniijia tojtiajaca nia quiniuucuaaja. <sup>9</sup> Cunora, canaari jiyanohua nia shuquiritiaa Pueyaso niquiarani. Naacuajitij, majaari canaa niishiniu taate canaa naata sequenu nojuajani “paacarasho”. Naa maninia nia quiniuucuatej, canaari jiyanohua shuquiriaatia quiyani. <sup>10</sup> Naajuhuaaj, canaari juuca, niucua secojoquiaa Pueyasoni, nojuaja cuara canaa tiuquitihuara niaacua. Canaari maninia nia niishitiojonu tucuatenu panijani, seetanujuanaa maninia jeenucuasano Pueyaso pueya nia quiniuria.

<sup>11</sup> Canaari panijani pa Que Pueyasojuanaa, pa Jiyaniijia Jesucristonio, nojori cuara canaa naacuura niaacua canaa tiuquiniuria. <sup>12</sup> Pa Jiyaniijia cuara nia jiyateera socua jiyanohua panitioojuaca nia quiniuria, tamasa panijaca nia quiniuriajuhuaaj, taa canaa panija niajanijajinijia. <sup>13</sup> Naa panijaca na jiyatesacari niajanijatej, niaari nioojia niquijioteyashijaca quiniutianiya cutara. Naajuhuaaj, niaari tojetaarucuaajanaa sesa miyashijaca quiniutianiya, pa Jiyaniijia Jesucristo tiuquishacariuhua puetunu na jiyanooshano pueyatajanaa.

## 4

### *Taate pa naata Pueyaso shuquiritiniuni*

<sup>1</sup> Quiarijiani cuarta Pueyaso pueyanaa, pa Jiyaniijia Jesu jiyaramiquishano pueya canaa quiniuucua, canaa sequesano nia tojiri. Quiarijiani, canaari nia shiniujijani socua maninia miijaca nia quiniuria. Canaari nia niishitiojoquiaari maninia miijaca nia quiniuriani, Pueyaso nia shuquiritiniuria. Niaacuajaari naa maninia miya.

<sup>2</sup> Niaacuajaari canaa rootasano pa Jiyaniijia Jesujiniji niishiya tari. <sup>3</sup> Canaacuaajaari nia rootaquiaarini, Pueyasoori nia panitiaa saaja nera nia quiniuria, tojetaarucuaajanaa maninia jeequesano nia quiniuria sesa nia miishanojiniji. Majaari nia numuetucunu nia camishoo maaji. <sup>4</sup> Puetunu mashiquiorijianaa cuara niishiiria maninia na cojuanura necocuarano, maja ritia na numuetucunura, nata na camiyaquishacarijia. Cuara na

cuaqueya panishano rejetenu niishiiria. <sup>5</sup> Majaari sacuaraatia nia miiniu taa Pueyaso niishiyashijiaca pueya miiquiaacuaani, jiyanoehua nojori jiaatiasacari maajiicua. <sup>6</sup> Naajuhuj, majaari quenaaja jiyasohuaja niarta pueyano niquiocua nia numuetucunu, neyaca nia sapojonuta. Cuno maa-jicuajaari saa neyacaraja, maja tamonura socua. Pueyasocuajaari naa mi-ijiaca saniitionutaniya jiyanoehua, taa canaa numootequiaari tari nijaniyacuaajani. <sup>7</sup> Pueyasoori maja na saquirojONU quiquiaari pajaniya sacuaraatia miijiaca pa quiniuria. Pa saquirojoquiaari tojetaarucuaajanaa sesa miyashijiaca pa quiniuria, saa neraja. <sup>8</sup> Naacuajitij, cante nio rootasano ruuretajani, nojuajaari maja saaja na rerequetenu nio rootasanojiniji pohuatana. Nojuajaari Pueyasojuanaa rerequeteya cutara, cante na Sohuanu niquitioquiaari nijaniyacuaajani.

<sup>9</sup> Quiarijiani cuarta Pueyaso pueyanaa, janiyara, najuhuanaruhua niaacuara cua naajionura cua niishitiniuria nijaniya, panitioojuaca nia quiniuria. Pueyasocuajaari tari nioojiajinia nia niishitiquiaari panitioojuaca nia quiniuria. <sup>10</sup> Niaacuajaari seetanujuanaa puetunu Macedonia jiyajinia niarta Pueyaso pueya panijiaca quiyacuaaja. Naajaa, cuarta Pueyaso pueyanaa, canaa nia tojiri. ¡Socua panijiaca nia quiri! <sup>11</sup> Tama nia cuaqueyajaaja nia cumaquiriquia juhuajaniya quijiaca nia quiniuria. Tama nia poonijosanojiniaajaaja nia cojeriquia, tama nia juaashiquiataajaaja nia poonijosacari, taa canaa rootaquiaari nijaniyacuaajani. <sup>12</sup> Naacuajitij, Pueyaso niishiyashijiaca pueyari nia rerequeteyaquiniutianiya. Naajuhuj, niaari puetunu nia panishanojuanaa jitianutaniya.

### *Taa pa Jiyaniijia tiuquishacariuhua quiniutianiya*

<sup>13</sup> Cuarta Pueyaso pueyanaa, canaari juhuacarijia nia tonu paniyani taa Jesuucua tiuujiaaca shaajecono pueya miishaanutaniyani. Canaari nia niishitiniu paniyani maja nia taraajenura juhua Jesuucua tiuyashijiaca pueya. Nojoriiri maja na jitianu nojori Jiyano, nojori na samiitianijionuhua. <sup>14</sup> Paacuajaari niishiyani Jesuuri cusoquiaari. Na nuhuaji samiitiaquiaariuhuari. Naajuhuj, paari niishiyani, Pueyasoori Jesuucua tiuujiaaca shaajecono pueya samiitianijionutaniuhua, nojori na rijionura Jesuta, Jesu tiuquishacariuhua.

<sup>15</sup> Canaajanaacuajaari nia sequeyani, niocuajaari pa Jiyaniijia niishitihano canaa: pajaniya, canapuate pa Jiyaniijia tiuquishacariuhua saminiucua quiniutianiyaajaani, majaari macunucua pa puetanu quiniutianiya pa Jiyaniijiaata pa naacuneetonura jiya cajiniocua. <sup>16</sup> Naa quiniutianiyaari. Pa Jiyaniijia nicanuuri tojishaanutaniya, Pueyaso seya jiyaniijia nicanujuhuaj, Pueyaso trompeta jonenenunio. Jiyacaritij, pa Jiyaniijiaajanaari jiyocua-caanuji rosenutaniya cohuaja najacajiniara. Jiyacarijiuhuj, puetunujanaa Jesuucua tiuujiaaca shaajecono pueyari samiitiaconutaniuhua coteenu. <sup>17</sup> Na nuhuaji pajaniya, canapuate saminiucua quiyajaani, paari nojoritia ritia rijiosaanutaniya cohuaja najacajiniarani. Paari tii coquetonutaniya pa Jiyaniijiaata paratujiniani. Jiyacaritij, paari tari pueyaracaanu nata quijiacarano quiniutianiya. <sup>18</sup> Cua panishano pueyanaa, nio cua pohuatasanta nia cumanijiatooriquia.

## 5

<sup>1</sup> Majaruhua maninia cua naajionura niaacuara cua niishitiniuria nijaniya socua, taacari pa Jiyaniijia tiuquiniutianiuhua. Niaacuajaari tari na niishiya, naajuhuj, taate mijiria quiniutianiya nia tiuquiyaquishacarijia.

<sup>2</sup> Niaacuajaari maninia niishiya, pueya jiyaniishacari juhuanujuaja maja pa

Jiyaniijia tiuquiniu quiniutianiuhua, nojuajaari jiyacari tiuquiniutianiya. Nojuajaari canashiyaquiji tiuquiniutianiya, taa nohuasejojua tiuquiquiaa niucua tiajiniacocuaani, juhuajaniya tia camaru maquesacari. <sup>3</sup>Naajuhuaaj, quera pa Jiyaniijia tiuquishacariuhua, mijiria quiniaa pueyari naa sequejaca quiniutianiya: “Paacuaja maninia quiyani. Shaaquicuaja miaquetoojonu”. Canashiyaquiji jiyacari, Pueyaso saniitiosacari na tojiyashijia-caari quiniutianiya. Naa quiniutianiyari taa maaji nooquiaa juhuacatecara canashiyaquiji na manajacuaani. Majaari quenaaja niquiriyatu curosaanu quiniutianiya saniitiosoo. <sup>4</sup>Niajaniya saniniuujia cuarta Pueyaso pueyanaa, niaari maja juhua ninishiqui quijiaca, pa Jiyaniijia cariyatunura niajaniya. <sup>5</sup>Puetunu niajanijajanaacuajaari cuhuashiqui quijiaca. Pueyasojuanaacuajaari nioojiaca cuhuataquiaari. Majaari tari juhua ninishiqui quijiaca pueya pa quiniu. <sup>6</sup>Cunora, pa Jiyaniijia sashijiacaca pa quirij. Maja juhua tamasaaja, juhuajaniya quiquioyari. Nojoriiri juhua maquetiuya. Pajaniya saniniuujia cuarta Pueyaso pueyanaa, juhua sutejaca pa quirij, maninia niishiriojojua-cajuhuaj. <sup>7</sup>Maquetujuacaari niucua maquetuquiaa. Naajuhuaaj, mashaasequenujuacaari niucua mashaasequenuquiaa. Naa miijiacaari Pueyaso tojiyashijiacaca. Majaari na maniniucuanu cuhuashiqui. <sup>8</sup>Pajaniya saniniuujia, paari cuhuashiqui quijiaca cutarani. Naaratej, pueyaracaanu maninia niishiriojojua pa quirij. Romano pueya miaquetoosacari, nojoriiri turtuco cushiyonuujuu, nocuaji na nujutajara cashi. Cumueeca casaa cushiyonuujuajaariuhuaaj, na naca na cojuatajara. Naajuhuaaj, naa poojia pa cojuare, saaja Jesuucua pa tiuuniutia, seetanujuanaa panijiacaca pa quishacarijuhuaj. Seetanujuanaa pa niishiri, Pueyasoori pa saquiriojoquiaari na muerasu pa quiniuria pueyaracaanura. Naacuajitij, pocua pa niishitiaja cojuareni, maja poojia pa niquijiotenura najuhuanaj. Naacuajitij, Sesaacaari maja na naata shocotanu quiniutianiya pajaniya. <sup>9</sup>Pueyasoori maja na saquiriojonu quiquiaari pajaniya na saniitiosocoriquiano. Pa saquiriojoquiaari cutaraari na jyanooniuria pajaniya, na muerasu pa quiniuria, Neyanu Jesucristoocua tiuujiacaca pa quishacari. <sup>10</sup>Neyanucuaajaari pocuara cusoquiaari, nata rishijiacaca pa quiniuria pueyaracaanu. Naacuajitij, naajaa, paa jaara cusoyareni, paa jaara saminio quiyajuhuaaj, pa Jiyaniijia tiuquishacariuhua, puetunu nocua tiuujiacajanaari pueyaracaanu saminio quiniutianiya nata. <sup>11</sup>Naaratej, pueyaracaanu nia cumaquitioojoriquia Pueyaso rupaata. Nia shiniujiutiooriquiajuhuaj, seetanujuanaa pa Jiyaniijia tojijiacaca nia quiniuria, taa nia miiquiaacuaja tarini.

### *Socua Pablo rootasacari Pueyaso pueya*

<sup>12</sup>Cuarta Pueyaso pueyanaa, canaa nia tojiri. Cuniqui nia jiitianaa tojijiacaca nia quiri. Majaari nojori rerequetenu. Nojoriiri jyanohua poonijioquiaa pa Jiyaniijia nojori niishitiojonura niajaniya, na nacasunura niajanijajuhuaaj. <sup>13</sup>Cunora, jyanohua nojori nia paniri. Majaari na rerequetenu. Nojoriiri pa Jiyaniijia poonijioquiaa na cumaquiniuria niajaniya. Maninia nia quiri pueyanaa. Majaari juayonuujutanu.

<sup>14</sup>Nio nia tojirijuhuaaj cuarta Pueyaso pueyanaa. Taajecori nia nacasure. Noojia niquijiotejaca nia shiniujiuri, seetanujuanaa cumueeca Pueyaso pueya nojori quiniuria. Noo pojori nia cumaquiriquiajuhuaj, Satanás saniniujiushacari na cuaqueya miiniu panishano rejeretaashijiacatej. Majaari cuno pojori cartenu. Nia juaaniu nia rejeteriquia, maja quenaaja nia juaaniuria tamasaata.

<sup>15</sup>Naajuhuaaj, tama nia cuaqueyajaaja nia cojuariquia maja nia naminiuria niarta pueyano, nojuaja jaara sesa miiriquia niajaniya. Saniniuujia,

pueyaracaanu maninia nia miitiooriquia niarta Pueyaso pueyata. Naa nia miiriquia puetunu pueyajuhuj.

<sup>16</sup> Pueyaracaanu nia shuquiririquia, Pueyaso pueya nia quiniuucua. <sup>17</sup> Naajuhuj, pueyaracaanu nia secojoriquia Pueyaso. <sup>18</sup> Naa jaara maninia miishaare, niaa jaara sesa miishaarejuhuj, naajaa, puetunu naa nia miishaanuucujanaa Pueyaso nia sequeriquia, “paacarasho”. Pueyasojuanaacuajaari naa paniya pa miiniuria, Jesucristo Sohuanu pa jiitianuucua poojiajinia. <sup>19</sup> Majaari Pueyaso Sohuanu nia ruuretanu, nojuaja jaara nioojiajinia nia shiniujiya maninia nia miiniuria. <sup>20</sup> Naajuhuj, majaari nia soonu Pueyaso sequesano caminiujiuniaa pohuatasano. <sup>21</sup> Coteenu nia saniniujiuri cutara, nia niishiniuria seetanutejanaa nojori pohuatasano. Teyano nojori pohuatasanojinijiniote maniniani, cuno tojijiaca nia quiri. <sup>22</sup> Puetunu sesa niishishano casaajanaa soojeaca nia quiri.

<sup>23</sup> Poojia cajitinia Pueyasojuanaa cuaara nia jeenucuaara juhuacarijia, tojetaarucujanaa sesa miyashijiaca nia quiniuria pa Jiyaniiijaacuaji. Nojuaja cuaara naa cojuara nia sohuanu, nioojia, nia cuaqueyano, tojetaarucujanaa soosoo nia quiniuria pa Jiyaniiija Jesucristo cuaara tiuquiri-ohuajaatijia. <sup>24</sup> Cante nia saquiriojoquiaaricuaja na pueya nia quiniuriani, nojuajaari puetunu shusha cua sequesanojuanaa nijaniya miiniutianiya niaara. Nojuajaari maja na niishiniu na rupaa jatanu. Nojuaja cutaraari na sequesano miijia pueyaracaanu.

*Pablo sequesano na naajionee na tucuatascari*

<sup>25</sup> Cuarta Pueyaso pueyanaa, Pueyaso nia secojonuuriquia canaacuarajuhuj.

<sup>26</sup> Canaara nia saruhuatare cuniqui quiniaa parta Pueyaso pueyajuhua nojori nia nujuunuta, seetanujanaa Pueyaso paniniutia.

<sup>27</sup> Pa Jiyaniiija jiyaramiquishano cua quiniuucua, cua tojitiare pueyanaa. Nio cua naajionee nia serojore puetunu Pueyaso pueyarajanaa.

<sup>28</sup> Pa Jiyaniiija Jesucristo cuaara cumaquiiria nioojia. Cuaara naa quiiriatej.



## TANEE PABLO NAAJIONEE TESALÓNICA TIACAJINIA QUINIAA PUEYASO PUEYACUARA

### *Pablo saruhuatasacari Jesucristoocua tiuujia*

<sup>1</sup> Janiyari Pabloni. Silvano, Timoteonio, canaari nio naajiya niaacuarani, puetunu Tesalónica tiacajinia quiniaa parta Pueyaso pueyarajanaa. Nio naajioneeri niaara, canapuate pa Que Pueyaso rupuejacacuajani, pa Jiyaniijia Jesucristo rupuejacanio. <sup>2</sup> Pa Que Pueyaso, pa Jiyaniijia Jesucristojuhua, nojori cuara nioojia cumaquiiria. Cuara nia jiyateera juhuajaniya quijiacarajuhua.

### *Pueyasoori na tojitianu paniyashijia saniitioriquiano Jesucristo tiuquishacarihua*

<sup>3</sup> Cuarta Pueyaso pueyanaa, canaari jiyanojia nia timitiaani jiyanojia Pueyasooocua tiuujia nia quiniucua socua, panitioojia nia quiniucua socuajuhua. Cunora, canaa secojosacari Pueyaso, canaari pueyaracaanu na sequequiaani, “paacarasho”. <sup>4</sup> Naa maninia nia quiniucuatej, canaari shuquiriaatia poojotaquiaa niajanijini Pueyaso pueya maapue niquiara tamaquiicua canaa rucuanesacari. Canaari nojori poojotaquiaa nia nia rejeretaquiaa juhuajaniya naquiya nia miiniuni, taraatia nia miiniujihua, Pueyasooocua tiuujia nia quiniucua. <sup>5</sup> Pueyaso saquiriojonuucua niajanijia pueyaracaanu shuquiriaatia quijia nia quiniuria na shuriucua, cunoori maja najuhua quiquiaari. Niaacuajaari seetanujanaa na pueya. Cunoori maatia niishishiyacuaja juhuajaniya nia rejeretasacari naquiya nia miiniuni, Pueyasooocua nia tiuuniucua. Pueyaso niishiyashijia pueyari naa naquiya miiquiaa niajanijiatej, Jesucristoocua tiuujia nia quiniucua.

<sup>6</sup> Naajaa, Pueyasocuajaari tojetaarucujanaa sesa miyashijia. Nojuajaari niaacua naminiutianiya noo pojori, naquiya miitiajia niajanijiatej. <sup>7</sup> Niajanijia saniniujia, naquiya miijosaaquiaarini, niaari canaata samaraatanutaniyajuhua, Jesucristo tiuquishacarihua pocua. Jiyacariitij, nojuajaari niquishaanutaniya mani rimianuqueyano tiuquitiohuano, jiyanojia cumaacaraca na seyata jiyocuaanu. <sup>8</sup> Tiuquiniutianihuari na saniitionura noo pojori, canapuate Pueyaso niishiniu paniyaquiquiaani, noo pojoriujihua, pa Jiyaniijia Jesu rupaa ruuretajatej. <sup>9</sup> Puetunu cunoojorijianaari pueyaracaanu saniitiosocoriquiano jiyatesaanutaniya. Nojoriiri tucuaanura quejoosaanutaniya pa Jiyaniijia shuriucujia. Naacujitij, majaari nojori niquiniu quiniutianiya na jiquioco, shacantuuca na cumaacanio, nojuaja jaara mijiria tiuquiriohua pa shuquiritanura nojuaja. <sup>10</sup> Jiyacariitij, puetunu na jeenucuasano pueyajanaari jiyanojia na timitianutaniya. Puetunu nocua tiuujia pueyajanaari jiyanojia jiuujiateconutaniya, pa Jiyaniijia na shootiatuacari. Naaari na niquiniutianiya juhuaj, nojuajini canaa pohuatasanoocua nia tiuuniucua.

<sup>11</sup> Canaari cunora pueyaracaanu niaacuara secojoquiaa Pueyasoni, maninia na pueya nia quiniuria, maja nojuaja caririquiniuria na saquiriojonuucua niajanijia. Canaari niaacuara secojoquiaaaniuhua, Pueyaso cuara nia tucuataniiria na cumaacata puetunu maninia casaa nia miiniu panishanojanaa. Cuara nia tucuataniiriajuhua puetunu nia miishanojanaa, cunoo, Pueyasooocua nia tiuuniutia nia poonijosanoni.

<sup>12</sup> Naacujitij, pa Jiyaniijia Jesuuri socua timitiasaanutaniya naa nia

miiniucua maninatej. Naajuhuj, nojuajaari nia timitianutaniyajuhuj. Naa maninia quiniutianiyari pa Pueyaso pa Jiyaniijia Jesucristota na cumaquishacari niajaniya.

## 2

*Maatia pohuatasano, taate mijiria quiniutianiyani, pa Jiyaniijia tiuquishacariuhua*

<sup>1</sup> Quiarijiani cuarta Pueyaso pueyanaa, socua nia pohuatarohuacuara pa Jiyaniijia tiuquiniujiniji, taa pa coquetonutaniya natajaniuhuj. <sup>2</sup> Canaa sequesano niajaniya nia tojiri, pueyanaa. Majaari nia niyajetanu tariucua-caanu canaa niishitiojosano niajaniya, nia jiyajeneyaquiniuucujia tamasaca sapojosacari niajaniya. Majaari nia shiriiquiniu tamasaca jaara sequere niajaniya: “Pueyaso Sohuanuuri cua niishitirii, pa Jiyaniijia tiuquishacari-iri quiarijia”. Tamasa jaara naa nia pohuatare, majaari na sequesano tojiniu. Naajuhuj, tamasaca jaara naajionuure tamajaaja, niaara na jiy-atesocoriquiano juhua canaa naajione, majaari nojori tojiniu. Nojoricua-jaari nia sapojiya. <sup>3</sup> Pueyanaa, majaari niaacua nojori nia shanacunu nojori sapojonura niajaniya. Nia niishiri, pa Jiyaniijia tiuquiyacuquishacariuhua, queraatia pueyari Pueyasoo cuajia pishiniutianiya. Jiyacarijuhuaj, Pueyaso rootasano Ruuretajajanaari supenutaniya. Nojuacuajaari tariucua Pueyaso saniitiosocoriquiano na riuriotaca. <sup>4</sup> Nojuacuajaari Pueyaso paraca. Nojuajaari puetunu pueyajanaa tenujunutaniya maja nojori tojiniuria Pueyaso, pueya shipinijosano nojori pueyasohuara nojori tarinitianurajuhuj. Nojuaja cutaraari tama na cuaqueyajaaja jiyatenutaniya juhua Pueyasora. Pueyaso Secojoua tiajinia cajiniutianiyari, Jiyaniijiajanaa cajitiujinia. Jiyacari sequenutaniyari: “Janiyacuaajaari Pueyasoni”.

<sup>5</sup> Pueyanaa, ¿majateeri nio nia niishiniucuaaja? Janiyacuajaari nojuajiniji nia poojotajani niaata cua quishacari. <sup>6</sup> Naa naasucuaari niishiyacuaja canteeri juhua na quiaajaani, maja juhuanouaja mijiria na miiniuria tama na panishanojuaja, Pueyaso paniyacuquishacarijia. <sup>7</sup> Seetanujuanaa, Sesaaca cumaacari tari mijiria poonijia jiyasohuaja. Naajaa, Pueyaso paracaari juhuanouaja maja na naata muetanu, pueya niishiniuria nojuaja, na tenujuna cuara niiquiji rishaarejaatijaj. <sup>8</sup> Na tenujuna jaara rishaare niiquiji, jiyacaritij cuno sesaaca sequeeri muetanutaniya, jiyanojua sesa na miiniuria. Naajaa, pa Jiyaniijia tiuquishacariuhua na shacantuuca cumaacajinia, nojuajaari cuno sesaaca seque monutaniya saaja na rupaata na nooniutia, na shaajanura puetunujuanaa. <sup>9</sup> Cuno sesa miijia sequeeri muetanutaniya Satanás cumaquishacari nojuaja. Naacuajitij, nojuajaari jiyanojua cumaaca jiiutianutaniya jiyajeneta casaa na miiniuria, pueya jiuujiatenura nocuaji. Queraatia niishishoo casaa miiniutianiyajaariuhuj, pueya na sapojonura. <sup>10</sup> Nojuajaari puetunu tamaatia sesa miiniu niishishanojuanaa miiniutianiya na sapojonura noo pojori, canapuate saniitiosocoriquiano pueyacujani. Nojoriiri sapojosaanutaniya, Pueyaso Rupaa ruuretajaca nojori quiniucua. Nojoriiri maja na tojiniu paniniu quiquiaari seetanu rupaajanaa, Pueyaso jiyanooniuria nojori. <sup>11</sup> Naaratej, Pueyasoori nojori tarinitianutaniya nojori sapojosaanura, nojori tiuuniuria seetanujuanaa sapojonuucua. <sup>12</sup> Naacuajitij, puetunu noo pojorijianaari saniitiosaanutaniya, canapuate seetanu rupaacuajanaa tiuuniu paniyaquijiani, sesa miiniu maniniucujaca nojori quiniucua.

*Pueyaso muerasuranoori tariucuaaanujiniji saquiriojosano*

<sup>13</sup> Niajaniya saniniuujia, niaari pa Jiyaniijia panishano pueyacuaja. Jiya shipiniyaquishacarijia, niaacuajaari tariucua Pueyaso saquiriojosano pueya quiquiaari. Niaari Pueyaso pueyara quiquiaaricuaja, na Sohuanu jataniniuucua niajaniya quiarinio pueya nia quiniuria, seetanu rupaacujanaa nia tiuuniuucua. Cunora, canaari pueyaracaanu Pueyaso sequequiaa niaacuarani, “paacarasho”. <sup>14</sup> Canaa pohuatasacari Pueyaso rupaa nia niquiara, niaari Jesucristoocua tiuquuaari. Naacuajitij, Pueyasoori nia jiyatequiaari na pueya nia quiniuria, shacantuuca quijiacara nia jatanishaanura, taa pa Jiyaniijia Jesucristo quiyacuani.

<sup>15</sup> Naaratej cuarta Pueyaso pueyanaa, majaari nioojia nia niquijiotenu Pueyasoo cuaji. Naajuhuj, nia numaama nia racatare canaa niishitiojosano niajaniya niaata canaa quishacari, canaa naajioneecajinia canaa rootasano niajanijuhuj. <sup>16</sup> Jiyanoojia pa Jiyaniijia Jesucristo quiniuucua, pa Que Pueyasojuhuj, nojoriiri pa paniquiaa. Naajuhuj, poojia cajitiquiaa pueyaracaanuraari. Na rupaacua pa tiuutiquiaariiri, pa niishiniuria paari jyanohua maninia miishaanutaniya pueyaracaanuni. <sup>17</sup> Naajuhuj, nojori cuara nioojia shiniujiiria, maninia nojori tojitiajaca nia quiniuria pueyaracaanu. Nojori cuara cumaquiiria niajaniya, tojetaarucujanaa maninia nia sequesano quiniuria, nia miishanonio.

### 3

#### *Pueyaso rupaa pohuataanaacuara pa secojore*

<sup>1</sup> Pueyanaa, socua nia sequerohuacuaraj. Canaacuara nia secojore, pa Jiyaniijia rupaa paaquetesaanura puetunu tiquiyocuajanaa. Nia secojorejuhuj, cuno rupaa pueya tojishacari, nojori jatanishaanura, naatej, taa na jataniquiaari niajanijacuani. <sup>2</sup> Canaacuara nia secojorejuhuj, Pueyaso cojuanura canaa na tojiyashijiaca pueyacuaji, maja nojori miiniuria sesa canaa. Niaacuajaari niishiya, puetunu pueyajanaari maja na tiuuniu Pueyasoo cuajia. Cuno pojoricuajaari canaa paracaajiaca. <sup>3</sup> Naajaa, paacuajaari niishiyani pa Jiyaniijiacuajaari na sequesano miiquiaa. Nojuacuajaari nia cumaquiniutianiya, maja nioojia nia niquijiotenura nocuaji. Sesaacuajia nia cojuanutaniyajaariuhuj. <sup>4</sup> Pa Jiyaniijiaacua canaa tiuushacari, majaari canaa taacanuunu niaa naasucuaari canaa rootasano tojitiaaquiniutianiya. Maja. Niaa naasucuaari na tojitiaacuaja. <sup>5</sup> Pa Jiyaniijia cuara niishitiiria nioojiajinia, panijiaca nia quiniuria taa Pueyaso paniyacuani. Naajuhuj, cuara nia niishitiiria naquiya miiniu rejeretajaca nia quiniuria, Jesucristo cumaquishacari niajaniya.

#### *Poonijiojuaca pa quiri*

<sup>6</sup> Cuarta Pueyaso pueyanaa, pa Jiyaniijia Jesucristo jiyaramiquishano pueya canaa quiniuucua, canaa nia tojitiare. Majaari noo pojori nia rupeenu: taajecoritij, noo pojoriuhuj, canaa rootasano tojiyashijiacatej. <sup>7</sup> Niaacuajaari niishiya taa quijiaca canaa quiquiaari niaata canaa quishacarini. Naa quijiaca nia quirijiuhuj. Majaari canaa taajeyaca canaa matanu quijiani. <sup>8</sup> Majaari najuhuana canaa miaquenu quijia nia miaquesano. Canaa cutaraari pueyaracaanu canaa samareenuta poonijionuujuaca juucani, niucuanio. Canaari naa poonijionuuquiaarini canaa panishano canaa jitianura, maja quenaaja canaa taajetenura niajaniya, maja nia tacaatianura canaajuhuj. <sup>9</sup> Pueyaso jiyaramiquishano pueya canaa quiniuucua, canaa naata quiquiaaricuajaari canaa panishano canaa mashiniquiniuria niajanijajiniji. Naajaa, majaari naa canaa

miiniu quiquiaari. Canaari tama canaa juaashiquiacatajaaja poonijio-  
 quiaarini, canaa niishitiojonura niajaniya, poonijionuujuaca nia quiniuria  
 juhua canaajuhuj. <sup>10</sup> Canaa quishacari niaata jiyacarijuhuaj, canaari  
 nio nia niishitiojoquiaarini: “Cante poonijionu paniyaquiyani, cuaara mi-  
 aqueteshiyaquiiriajuhuaj”. <sup>11</sup> Canaari pohuatasaarucuaajaaniuhuj, nooji-  
 aqueya niajanijiniinionaari juhuajaniya quiquiaa. Majanaari na pooni-  
 jionuunu quiquiaa. Nojoriniaari noo pojori cushitiojoquiaa, poonijionuu-  
 juaca cutaratej. <sup>12</sup> Pa Jiyaniijia Jesucristo jiyaramiquishano pueya canaa  
 quiniucua, canaari cuno taajecori sequeyani, nojori cuaara poonijionuura,  
 nojori panishano nojori jitianura.

<sup>13</sup> Cuarta Pueyaso pueyanaa, teyano niajanijiniiniote maninia miiijia-  
 cacuaani, majaari maninia miiniu nia tarinitianu. <sup>14</sup> Saniniuujia, cante nio  
 naajioneejinia canaa sequesano tojiniu paniyaquiyani, nojuaja nia niishiri  
 cantenajoni. Majaari na rupuenunoj, na caririquiniuria quenaaja. <sup>15</sup> Maja  
 cutaraari nojuaja nia jiyatenu juhua nia paracara. Saaja nia nacasure cutara  
 nojuaja, niarta Pueyaso pueyano na quiniucua.

*Pablo sequesano na naajio na tucuatascari*

<sup>16</sup> Poojia cajitijia pa Jiyaniijiani, nojuajanaa cuaara nioojia cajitiiria  
 pueyaracaanu, naajaa, niaa jaara taa miishaariquia. Pa Jiyaniijia cuaara  
 pueyaracaanu jitianura puetunu niajanijijanaa.

<sup>17</sup> Janiyari Pabloni. Cua saruhuatanura niajaniya, janiyari tama cua  
 juaashiquiatajaaja nio naajiyani. Nia niquiri cua naajiosano, taamuecateno-  
 joni. Janiyari naa puetunu cua naajioneecajanaa tucuataciaani, cua sesa  
 cua naajionuta. <sup>18</sup> Pa Jiyaniijia Jesucristo cuaara cumaquiiria puetunu  
 niajanijijanaa. Cuaara naa quiiriatej.

## COTEENU PABLO NAAJIONEE TIMOTEOCUARA

### *Pablo saruhuatasacari Timoteo*

<sup>1</sup> Janiyari Pabloni, Jesucristo jiyaramiquishano. Pa Jiyanoojia Pueyaso, pa Jiyaniijia Jesucristonio, nojoriiri nera poonijionara cua jiyatequiaari. Paari Jesucristoocua tiuujiacani, nojuaja jataniniuria pajaniya juhua nojuaja pa quiniuriajuhuaj. <sup>2</sup> Timoteonaa, janiyari nio naajiya quiarani. Quiaari juhua quianura quiquiaari, Pueyaso pueyanora quia jatanuucua, quia niquiara cua pohuatasacari Pueyaso rupaa. Pa Que Pueyaso, pa Jiyaniijia Jesucristojuhuaaj, nojori cuara cumaquiiria quiajaniya. Nojori cuara quioocua taraajeerajuhuaaj. Nojori cuara pueyaracaanu quioojia cajitiiriajuhuaj.

### *Pablo sequesacari sesa niishitiojonuujuaca cuara sanaajasaaria*

<sup>3</sup> Janiya jaara Macedonia jiyajiniara quiaquiaarini, janiyacuaajaari quia sequequiaarini Éfeso tiacajiniaja quia jiyojenura. Janiyari naa quia sequequiaarini, quia tenujunura cuno pojori, najuhuana tamaatia niishitiojonuya pueyani. <sup>4</sup> Janiyari quia sequequiaarijuhuaj, nojori quia sequenura, maja nojori niishiriojonura najuhuana nojori supuetanaa pohuatanuusanojinia. Janiyari quia sequequiaarijuhuaj, maja nojori niishiriojonura nojori supuetanaa sesacajinia, cuno, najuhuana tucuyacuara naajionuutasanoni. Pueya niishiriojonuusacari pueyaracaanu cuno najuhuana casaajinia, nojoriiri cunoocua juayonuujutaquiaa saaja. Saniniuujia, nojori cuara Pueyaso rupaacua niishiriojoora cutara. Nocua pa tiuushacari, paari cumaquishaanutaniyani Pueyasora pa poonijionura maninia.

<sup>5</sup> Naa cua sequesacari Éfeso tiacajiniaja quia jiyojenuratej, janiyari quia sequenu paniriquiaani, pueya quia niishitiojonura panitiojuaca nojori quiniuria. Nojori cuara shitimia panitiojuaca quiiria, juhua jeequesano nojori jiuujia quishacari. Seetanujuanaa Pueyasooocua nojori tiuushacari, nojori cuara panitioora maja noojia macuhajenuta sesa nojori miishanojiniji. <sup>6</sup> Noojiaqueya cuno pojorijinijiniori tari tarinitiacanu tojiniu nio maninia niishitiojosano. Nojoriiri cushitiiquianu na pocoojonuucua, na nacojonuucua najuhuana tama nojori niishishanojinijiaaja. <sup>7</sup> Nojoriiri Moisés Rootasanojiniji niishitiojonaara quiniu paniya juucua. Majaari que-naaja nojori niishiniu tama nojori sequesanojuaaja, nojori shiniujiushacari pueya, pueya tojiniuria najuhuana capa nojori niishitiojosano.

<sup>8</sup> Paacuajaari niishiyani, Pueyaso rootasano Moisésni, cunoori maniacuaja, paa jaara niishirini casaara naa Pueyaso rootaquiaari pa supuetanaani. <sup>9</sup> Paacuajaari niishiyani, Moisés Rootasanoori maja na pueretenu maninia miijiacu pueya cutara. Pueyasoori maja na rootasano na niishitiniu quiquiaari maninia miijiacara. Na niishitiquiaari cutaraari na tojitiaashijiacara, tama na panishanojuaaja miijiacara, Pueyaso soojeacarajuhuaaj, sesa miijiacarani. Moisés Rootasanoori Pueyaso rerequetecacara, Pueyaso casaa rerequetecacarajuhuaaj, noo pojoririajuhuaj, tama na que tacartaja monutej, na nucuanio, pueya puecojuacarajuhuaaj. <sup>10</sup> Moisés Rootasanoori na camishoo maajipohua numuetucunujuacacara, maajishurihuara, na numuetucunujuacarani. Moisés Rootasanoori pueya nohuasenujuacacara juhua casami na niquitiojosocoriquiano tamasaca seyara; sapojonuujacacarajuhuaaj; na sapojonuta na sequesano maatejacarani, nocua na tiuushaanura; puetunu noo pojoririajanaanio,

maninia niishitiojosano tojiyashijiacatej. <sup>11</sup> Cuno maninia niishitiojosanoni, cunocuaajaari cua pohuatasano Jesucristo rupaaajiniiji, pueya jatanura Pueyaso pueyara. Pueyasoori jiyanohua maninia, cuno rupaa pohuatanara na jiyatenuucua janiya.

*Pablo shuquiritiasacari Pueyaso, na rupaa pohuatanara na jiyatenuucua nojuaja*

<sup>12</sup> Pa Jiyaniijia Jesucristoori cucua tiuquuaari nera cua poonijionura maninia. Cunora, na rupaa pohuatanara cua jiyatequiaariiri. Nojuajaari cua cumaquiquiaa. Cunora, janiyari na sequequiaani, “paacarasho”.

<sup>13</sup> Tariucuaaanu, janiyari nocuara rimiaaqueja quiquiaari sacuaraatiani. Janiyari naquiya na miiquiaarijiuhuj, nocua tiuujiaa cua miitiasacari. Janiyari jiyanohua na paracaajia quiquiaarijiuhuj. Naajaa, Jesucristoori saaja cucua taraajequiaarini cua niishiyaquiniucua casaa cua miiriquiaani, nocua tiuyashijia cua quishacarijia. <sup>14</sup> Naa cucua na taraajenuucuatej, nojuajaari seetanujuanaa cua jiyanooquiaari. Na jiyanooshacari janiya, nojuajaari cua jataniquiaari nocua tiuujia cua quiniuria, panijia cua quiniuriajuhuaj.

<sup>15</sup> Timoteonaa, niiori seetanujuanaa. Puetunu pueyajanaa cuaara niishiiria nio. Cua tojiri. Jesucristoori mijiria niquiaari na Que Pueyaso na jiyanootiniuria sesa miijiaca. Janiyacuajaari tojetaarucujanaa cuno sesa miijiaca pueyajinijinio na jiyanooshanoni. <sup>16</sup> Janiyari naa jiyanooshaaquiaarini puetunu pueyajanaa niishiniuria taa jiyanohua jiyanootiote Jesucristoni, pueyaracaanu na rejeretanuucua cua juaaniu. Naa Jesucristo jiyanooniucuaacuaa janiya, sesa miijia cua quishacarijiatej, Jesucristoocua tiuujiacarano cuaara niishiiria, nojoriiri na naata jiyanooshaanujuhuj Jesucristoocua nojori tiuushacari. Naacuajitij, nojoricua pueyaracaanu quijiacara jiyatesaarejuhuaj. <sup>17</sup> Naa jiyanootio pa Jiyaniijia quiniucuatej, nojuaja pa timitiare pueyaracaanu. Nojuajaari Jiyaniijiajuhanajaj. Nojuajaari Pueyasocuaaja, shaajeyashijia, namijiata niqiyaquishoo. ¡Jiyanohua maniniaari pa Jiyaniijia! ¡Naa seetanujuanaari!

<sup>18</sup> Timoteonaa, quiaacuajaari niishiya taa Pueyaso cumaquiquiaari quiajaniyacuaajani, nera quia poonijionura. Cunoori quiquiaari Pueyaso pueya jiitianaa jaara caminiujuquiaari Pueyaso sequenu panishano quiara, nera poonijiona quia quiniuria. Naacuajitij quiyanunaa, cua tojiri. Pueyaso cumaaca quia jiitiasacari, quioojia quia cumaquiri maninia quia poonijionura Pueyasora. Seetanujuanaa juhua quiaquejojua pueyano quia quiri, senota samareyashijia. <sup>19</sup> Naa quia quiri Pueyaso rupaa quia pohuatasacari, seetanujuanaa na rupaacua tiuujia quia quishacari, seetanujuanaa na rupaa tojjia quia quishacarijuhuaj. Naa quijia quia quiritij, quioojia mariqui quia macuhajareeri quiaa jaara sesa miiriquia. Noojiaqueya pueyari tari Pueyasooocua tiuuni tarinitiacanu nojori ruuretanuucua Pueyaso Sohuanu numootesacari nojori jiuujiajinia, sesa nojori miishacari. <sup>20</sup> Naa miituuquianuuri Himeneo, Alejandronio. Janiyari cunora Pueyaso secorucuaani, Pueyaso cuaara nojori tarinitiaara Satanásra, Satanás miiniuria naquiya nojori. Naacuajitij, nojori cuaara niishiiria maja socua sacuaraatia nojori rimiaaquenura Pueyasooocua.

## 2

*Secojonuunura niishitiojosano*



<sup>1</sup> Cua tojiri Timoteonaa, niaa jaara Pueyaso secojonuuriquia, nia secojonuure puetunu pueyacuarajanaa. Nia panishano casaacuara nia secoriquiajuhuaj. Naajuhuaaj, Pueyaso nia sequeriquia “paacarasho”, pueyara caanu maninia na miiniuucua. <sup>2</sup> Jiya jiyaniijianucuaacuara nia secojonuuriquiajuhuaj, puetunu pueya camarucuaacuara juhuaj. Nojoriicuara nia secojonuuriquia, juhuajaniya pa quiniuria panaatia, juhuajaniya pa tojiniuria Pueyaso, maninia pa quiniuria parta pueyatajuhuaj. <sup>3</sup> Pa Jiyanoojia Pueyasoori naa paniquiaa pa secojonuratej. Naa pa secojosano maniniucuaquiaari. <sup>4</sup> Nojuajaari paniya puetunu pueyajanaa tiuuniuria Neyanuucua, na pueyara nojori jatanishaanura, puetunu seetanu rupaajanaa niishijiaca nojori quiniuriajuhuaj. <sup>5</sup> Pa Que Pueyasoori niquiriyatujua. Majaari tamonu Pueyaso quiniu socua. Naajuhuaaj, niquiriyatujua pueyanoori quiya Pueyaso Jiyanootijia pueya. Nojuajaari Jesucristocuaaja. <sup>6</sup> Puetunu pueyajanaa quishacari saniitiosocoriquiano, Jesucristoori tama na cuaqueyajaaja tarinitiaquiaari na mosaanura narta pueya niti. Naacuaajitij, na Que Pueyasoori na naata jiyanooniu pajaniya saniniuuja. Quiarijiacuaajaari Pueyaso panishacari Neyanujiniji pohuatasaanura pueya niquiara, nojori jiyanooshaanura. <sup>7</sup> Nio rupaa cua pohuatanurajuhuaaj, Pueyasajuanaari cua jiyatequiaari Jesucristojiniji pohuatana cua quiniuria. Cua jiyaramiquiquiaariiri taucuaca cua niishitiniuria Jesuucua nojori tiuuniuria, seetanu rupaajanaa nojori niishiniuriajuhuaj. Nio cua sequesanoori seetanujuanaa. Majaari cua sapojonu.

<sup>8</sup> Cunora, cua tojiri. Janiyari paniyani puetunu tiquiyocuajanaa pueya secojonuunura Pueyaso. Jiyocuacaanu nojori shiitiosacari nojori juaashiquia nojori secojonura, nojori jiuujia cuara quiiria jeequesano sesa nojori miishanojiniji. Naajuhuaaj, cuara quiyaquiiria najiquitishano, maja sesa niishiriojonutajuhuaaj. <sup>9</sup> Naajuhuaaj, janiyari paniyani maajipohua cuara cushiyaquiiria puera maniniuquiya toqueya, narta maajipohua na shocotanura. Cuaara cushiyaquiiria cararaatia niquishano toqueyajuhuaaj. Maniniacuaajaari nojori maniniushiniuria. Sesa cutaraari nojori maniniushiniuria puera, pueya shootianura nojori. Nojori cuara jiyaniyaquiiria nojoriiri seetanujuanaa shanohua niquishano, nojori mucaca jeeacasano quishacari puera, nojori cushishacari orojiniji shipinishano casaanio. ¿Maa-jitiiri seetanujuanaa shanohua niquishano maaji, na cushitanuucua queraatia cumaneecata masesano noturu shipinijosano sai tiujiau, queraatia cumaneecata masesano maniniuquiya toqueyano? Maja. <sup>10</sup> Nojori cuara maniniucuaariquia cutara, maninia mijiaca maajipohua nojori quiniuucua. Nojori cuara quiiria juhua noo maajipohua, canapuetucuaaja tama nojori cuaqueyajaaja jiyatecanu Pueyasora na quiniuria seetanujuanaani. <sup>11</sup> Pueyaso rupaa niishitiojosacari, maajipohua cuara tojitariquia sanaa, maja Pueyaso rupaa pohuatanaa na rejetenuta. <sup>12</sup> Maja cutaraari cua shanacunu maajipohua niishitiojonura Pueyaso rupaa pueya niquiara. Naajuhuaaj, majaari cua shanacunu maajipohua jiyatesaanura narta Pueyaso pueya jiiitiana na quiniuria. Nojori cuara sanaa tojitariquia cutara, narta Pueyaso pueya rerejosacari. <sup>13</sup> Quia niishiri Timoteonaa, casaara naa cua sequyani. Pueyasocuaajaari coteenu Adán shipiniquiaari. Na nuhuaji Adán niquiorano Eva shipiniquiaariiri. <sup>14</sup> Quia niishirijuhuaaj, Soconurano jaara sapojoquiaari Evatej, majaari na sapojonu quiquiaari neyaca Adán. Eva cutaraari sapojosaquiaari. Naacuaajitij, na sapojosaanuucua, Evaari Pueyaso tojiyashijiara quiquiaari. <sup>15</sup> Naaratej, maajipohua cuara maninia canashitijioora necohua. Cuaara panijiaca quiiriajuhuaj. Cuaara maninia

miijiaca quiirijuhuaaj, maninia niishiriojojuaca nojori quishacari. Naa maajipohua miishacaritij, Pueyasoori nojori jiitianutaniya maninia, Jesu-cristoocua tiuujiaa nojori quishacari.

### 3

#### *Pueyaso pueya jiitianatucua taamueca pueyano quiriquiani*

<sup>1</sup> Nio sequesanoori seetanujuanaa: cante Pueyaso pueya jiitianara quiniu paniyani, nojuajaari maninia poonijosano miiniuucua jiaatiaa. <sup>2</sup> Naaratej, cante Pueyaso pueya jiitianani, nojuaja cuaara quiiria sesacasoo pueyano. Nojuaja cuaara quiiria saaja niquiriyatu maaji niyaca. Cuaara quiiria noojia niquijoteyashijia, maninia niishiriojojuajuhuaaj, pueya rerequeteyaquishoonio. Cuaara quiiria maninia pueyano, rucoojuaca pueya tiuquinitiaja na tiajinia. Cuaara quiiria Pueyaso rupaa niishitiojojua maninia. <sup>3</sup> Naajuhuaaj, nojuaja cuaara quiyaquiiria mashaasequejoru. Cuaara quiyaquiiria ritia juaajia, pueya na piniuria. Cuaara quiiria pueya riuhaneyashijia, pueya juaashacari nojuaja. Cuaara quiiria shiniquiajuhuaaj. Cuaara cumaneecaacua jiaatiaashijia quiirijuhuaaj. <sup>4</sup> Naajuhuaaj, nojuaja cuaara na tiajinia quiniaa jiitiaja quiiria maninia. Cuaara necohua niishitiojojua quiiria maninijuhuaaj, tojitiajaca nojori quiniuria, pueya rerequeteyashijiacanio. <sup>5</sup> Naacuajitij, pueyano jaara maninia casaa necohua niishitiojiyashijia quiriquia, ¿maatucua taa maninia jiitariquia Pueyaso pueya maanuni? <sup>6</sup> Naajuhuaaj, Pueyaso pueya maanu jiitariquiano cuaara quiiria seetanujuanaa Pueyaso tojijia pueyano cutara. Cuaara quiyaquiiria shusha Pueyasooocua tiuunio pueyano, nojuaja mariqui jiyaniiri nojuaja tojishano pueyano cutara. Nojuaja jaara jiyaniiri nojuaja socua maninia pueyano narta Pueyaso pueyajiniji, nojuajaari cocuaatia miya taa Satanás miiquiaaricuaani. Pueyaso panishano seru Satanás quishacarijia, nojuacuajaari taanusaaquiaari Pueyaso shuriucuaji, na jiyaniishacari nojuaja na naata na Jiyaniijia Pueyaso shocotanu. <sup>7</sup> Naajuhuaaj, Pueyaso pueya maanu jiitariquiano cuaara quiiria maninia miijia pueyano, Jesuucua tiuyashijia pueya mariqui na sesacareeri maninia miyashijia na quishacari. Nojuaja jaara naa rerequetesano quiriritij, nojuajaari juhua Sesaaca norijosano quiniutianiya. Naacuajitij, pueya tojiyaquishano quiniutianiyari.

#### *Narta Pueyaso pueya naacunaatucua taamueca pueya quiriquiani*

<sup>8</sup> Naajuhuaaj, parta Pueyaso pueya naacuna cuaara quiiria tojishano pueya, rerequetesoo. Cuaara quiiria na sequesano miijiaca. Cuaara quiyaquiiria puera mashaca jereeca ratunuucua jiitinio. Cuaara quiiria cumaneecaacua jiaatiaashijia, jiyasohuaja na nohuasejonura, na sapo-jonuta na masenurano. <sup>9</sup> Naajuhuaaj, nojori cuaara seetanujuanaa Pueyaso rupaa tojijiaa quiiria, teyanooocua tiuujiaa pa quiyacujani. Naacuajitij, nojori jaara naa miijiaca quiriritij, ¿nohoritiucua casaacua cararosaariquiani? <sup>10</sup> Cunora, pueya cuaara senota jiyateyaquishaaria Pueyaso pueya naacuna nojori quiniuria. Cuaara coteenu maninia niishishiiria nojoriiri seetanujuanaa Pueyaso tojitiajaca. Nojori jaara maninia miijiaca pueya quiri, na nuhuaji cutara, nojori cuaara jiyatesaaria narta Pueyaso pueya naacuna nojori quiniuria. <sup>11</sup> Naajuhuaaj, Pueyaso pueya naacuna niquiocohua cuaara quiiria tojishano maajipohua, maja rimiaacatuajuri. Cuaara quiiria niishiriojojuaca, na sequesano miijiaca pueyaracaanunio. <sup>12</sup> Cante Pueyaso pueya naacunaani, nojori cuaara jiitiaara saa niquiriyatu niquiocuaja. Cuaara quiiria necohua niishitiojojua maninia casaa, na tojitiajaca necohua

quiniuria. Naajuhuaaj, cuaara quiiria maninia jiiitiaja na tiajinia quiniaa pueya. <sup>13</sup> Naacuajitij, Pueyaso pueya naacunaa jaara maninia poonijioquiaa na naacusacari narta Pueyaso pueya, nojoriiri seetanujuanaa pueya tojishano pueya quiniutianiya. Naajuhuaaj, nojoriiri socua jiyanoehua Jesucristoocua tiuujiacara jatanutaniya, na puereyaquiniutia nojori poonijionura pa Jiyaniijiara.

*Jesucristojiniji Pueyaso niishitishano pueyani, paari nocua tiuujiacani*

<sup>14-15</sup> Timoteonaa, janiyari quiocua naquerejiyani. Naajaa, janiyari quiara naajiya nioni. Naacuajitij, janiya jaara tarishirini, janiyari paniyani juhuacarijia quia niishiniuria taa quijia quia quiniutianiyani, Pueyaso pueya maanujinia quia quishacari. Pueyaso pueya maanucuaajaari pueyaracaanu rishijia Pueyaso quiquio. Na saquiriojosano pueya nojori quiniuucua, nojoriiri na rupaa jiiitianaacuaaja, nocuaji tacunaajaariuhuaaj. <sup>16</sup> Seetanujuanaa nocuaji jiuujiatesanoori Pueyaso niishitishano Jesucristojiniji pajaniya. Paari nio sequesanoocua tiuujiacani:

Pueyaso Niyanuuri pueyanora jataquiaari, na rupuenura pajaniya. Pueyaso Sohuanuuri pa niishitiquiaari, nojuajaari tojetaarucuaajanaa sesa miyashijia. Naajuhuaaj, Pueyaso seyacuajaari Jesu niquiquiaari na samiitiasacariuhua. Nojuajiniijiiri pohuatasaaquiaari Judiocuaa niquiara, taucuaa niquiarajuhuaaj. Pueyapueeri nocua tiuuquiaari. Na Queeri na tacaniquiaariuhua Jiyaniijiajanaa na quiniuria.

## 4

*Pueyaso Rupaa carteriquiano pueyajiniji pohuatasano*

<sup>1</sup> Pueyaso Sohuanuuri maatia pa niishitiquiaa, nio pa quishacari nuhuaji noojiaqueya pueyari Pueyaso rupaa tarinitianutaniya tojiniu, tamaatia niishitiojosano nojori tojiniuucua. Nojoriiri seetanujuanaa sapojosaanutaniya naa nojori tojiniuucua samaruhua niishishano. <sup>2</sup> Nojoriiri sapojonuujuaca pueya tojitiajacara quiniutianiya, noo pojori, sapuenu juhua maninia niquishano pueyatej. Cuno sapojonuujuacaari tariucua sesa miiniuucua jiiitiquiono. Majaari tari na niishitiuniu caririquiniu. <sup>3</sup> Cuno pojoriiri pueya niishitiojojua maja na caminiuria. Niishitiojonuuquiaajaariuhuaaj maja pueya miaquenura noojiaqueya miaquesanojuhuaaj, teyano Pueyaso shipiniquiaari Jesuucua tiuujiacaracuajani, cante seetanu rupaaajanaa niishijiacacuajani. Cuno miaquesanocuaajaari pa timitiasocoriquiano, Pueyaso pa sequenura, “paacarasho”. <sup>4</sup> Puetunu Pueyaso shipinishano casaajanaari maninia. Puetunu miaquesano casaajanaa cuaara puereyaquishaaria miaguenu, paa jaara coteenu nocuara Pueyaso sequereni, “paacarasho”. <sup>5</sup> Pueyaso rupaacua tiuujiaca pa quishacari, naacuajitij, nocuara pa secosacari, Pueyasoori na jiyatequiaa maninia na quiniuria pajaniyara.

*Jesucristora poonijiona pueyanotucua taamueca pueyano quiriquiani*

<sup>6</sup> Pueyaracaanu parta Pueyaso pueya quia niishitiojoriquia nio cua rootasano quiajaniya. Naajuhuaaj, pueyaracaanu tama quia cuaqueyajaaja quia cumaquiriquia Jesucristojiniji pa niishishano rupaata, tama Jesucristojuaaja rootasanotanio, taa quia tojiquiaacuajanoj. Quiaa jaara naa miijia quiriritij, quiaari maninia poonijiona quiniutianiya Jesucristora.

<sup>7</sup> Majaari najuhuana tariucuaaanu supuetanaa pohuatanuusano tojjia quia quiniu, najuhuana tama pueya niishishanojuaajanio. Majaari cuno tojiniuucua quia cojenu najuhanaj. Jiyanoehua quia jiaatiare cutara, saaja Pueyaso tojjia quia quiniuria. Naa miiniu quia saniniujiuri jiyanoehua,

seetanujuanaa Pueyaso panijia quia quiniuria. <sup>8</sup> Pueyari queraatia casaa miiniu niishiya, cumueeca pueya nojori quiniuria. Supuetanaari pueyara-caanu nanoojoquiaari na cuaqueya na jiyartuutenura, cumueeca na quiniuria. Cunoori maniniacuaja pa cuaqueyara, mijiria pa quishacari. Saniniuujia, socua jiyanoehua maninia cutaraari Pueyaso panijia pa quiniuria seetanujuanaa. Cunoori jiyanoehua maninia, mijiria pa quishacariria, Pueyaso shuriucua pa quishacaririjuhua. <sup>9</sup> Nio cua sequesanoori seetanujuanaa. Puetunu pueyajanaa cuaara na tojiiria. <sup>10</sup> Cunora, pueya jaara pa miitariquia, naajaa, paari jiyanoehua poonijioquiaa pueya pa tojitiniuria Pueyaso rupaani. Majaari naa miiniu pa tarinitianu. Paacuajaari niishiyani, paari pueyaracaanu rishijia Pueyasocua tiuyani. Nojuacuajaari puetunu pueyacuaji Tacunajanaa, canapue cutarate nocua tiuujiacacuajani.

<sup>11</sup> Nio cua sequesano quiajaniya quia niishitiojore pueya. Nojori quia nacasuriquia jiyanoehua, na tojtianura quiajaniya. <sup>12</sup> Majaari pueya shanacunu quiocua, nojori rerequetenura quiajaniya, mashaja quia quiniuucua. Saniya maninia quijia quia quiriquia cutara, pueya jiaatianura quiocua, juhua quiajaniya nojori quiniu paniniurijuhua. Naaratej, tama quia cuaqueyajaaja quia cojuare, taa quia pocuaani, taa quia quiyani. Naajuhua, seetanujuanaa panijia quia quiri, Pueyaso rupaacua tiuujiajuhuaj. Majaari rucujeejojua quia quiniu. Naa maninia miijia quia quiri, pueya jiaatianura quiocua. <sup>13</sup> Naacuajitij, cua tiuquiyaquishacarijia quiocua, pueya niquiara maatia quia serojoriquia Pueyaso Rupaa. Parta Pueyaso pueya quia nacasuriquia jiyanoehua, Pueyaso tojtiajaca nojori quiniuhua seetanujuanaa. Seetanujuanaa nojori quia niishitiojoriquia maninia. <sup>14</sup> Pueyasocuajaari na cumaaca niquitioquiaari quiajaniya. Pueyaso Sohuanucuajaari naa pohuatequiaari Pueyaso pueya maanu jiitianaa pueyatej, nojori jaara niojoquiaari na juaashiquia quiocua, quia jiyatesaanura Pueyasora poonijiona quia quiniuria. Cuno cumaaca quiaa na jiitiaani, quia poonijiotere pueyara-caanu. Majaari najuhua na jiitianu.

<sup>15</sup> Puetunu niya cua rootasanojuanaa quiajaniyani, cuno tojijia quia quiriquia. Naa quia quiritij, puetunu pueyajanaa niquiniuria taa seetanujuanaa socua maninia Pueyaso tojijia quia quiyareeni. <sup>16</sup> Naacuajitij, tama quioojiaaja quia cojuare. Naajuhua, tama quia cuaqueyajaaja quia cojuare seetanu rupaaajanaa quia niishitiojonura pueya. Majaari quia tarinitianu miiniu cua sequesano quiajaniya. Naacuajitij, quiaa jaara naa maninia miijia quiri, quiaari tama quia cuaqueyajaaja jiyateya maninia Pueyaso pueyanora. Quia tojtiajaca pueyari Pueyaso pueyara quiniutianiyajuhua.

## 5

### *Paatucua taa jiitariquia parta Pueyaso pueyani*

<sup>1</sup> Majaari quia saaquiapue quia nacasunu quia juaaniutia, Pueyaso rupaa nojori tojiyaquiniuucua. Nojori quia nacasure jacaria, juhua quia que. Mashiquiori quia nacasure jacarijuhuaj, juhua quia tapueyocuaca. <sup>2</sup> Naajuhua, motajoori quia nacasure juhua quia nucua. Niyacoori quia nacasure juhua quia rimiatuhajuhua, maja nojoriicua quia jiaatianuta.

<sup>3</sup> Mashiquiopue jaara tojetaarucujanaa niquiohuaju quiri, jinianuhaju-nio, Pueyaso pueya cuaara nojori naacuura. <sup>4</sup> Saniniuujia, mashiquio jaara niquiohuaraca quiriquia, jinianuhuaraca soj, cuno pojori cuaara coteenu tama na nucuaajaaja cojuatunu niishiiria, na jijiuhua. Naacuajitij, necohua cuaara na queya cojuara, taa na queya cojuaquiaari nojoricuaani, naatujoori nojori quishacari. Pueyasoori naa na queyacuara taraajajaca timitiaja.

<sup>5</sup> Noo mashiquio, cante seetanujuanaa jiyopueejuni, nojuajaari saaja Pueyasooocua tiuuquiaa. Majaari na tarinitianu secojonu juuca, niucuanio. <sup>6</sup> Noo mashiquio saniniuujia, tama na cuaqueyajaaja shuquiritijiatej, nojuajaari tariucua juhua macu Pueyasora, saminio na quishacarijia. <sup>7</sup> Parta Pueyaso pueya quia niishitiojore nio cua rootasanojuhuaj, sesacasoo nojori quiniuria. <sup>8</sup> Canapuete na queecua, na nucuaacua taraajeyaquijiani, tama na tiajinia quijiaca pueyacuajuhuaaj, naa miijiacatej, nojoriiri Pueyaso Rupaa tojiyashijiacara jiyaterohua tari tama nojori cuaqueyajaaja. Naacuajitij, nojoriiri socua tojetaarucuaajanaa sesa, Pueyasooocua tiuyaquijia pueyajiniji.

<sup>9</sup> Mashiquio jaara Pueyaso pueya jiiitianaa naacunara jiyatenu panishaare, cuno mashiquiopue cuaara quiiria tariucua sesenta marijia shocotejono. Cuaara quiiria noo mashiquio, cante saaja na camishano pueyanota quiquiaari maninia pueyaracaanuni. <sup>10</sup> Cuno mashiquio cuaara niishishano maaji quiiria, maninia miijia na quiniuucua. Cuaara quiirajuhuaaj, cante maninia canashitijioquiaari necohuani. Cuaara rucojuacaacua taraajeja quiirajuhuaaj, na tiajinia na maquiojojua. Cuaara maninia miijia quiirajuhuaaj, narta Pueyaso pueya niohuaca jeequejojua. Cuaara taraatia miishano pueyacuara taraajeja quiirajuhuaaj, nojori cumanijianajuhuaaj. Cuaara puetunu maninia na miiniuujianaa tarinitiaaquijia quiirajuhuaaj.

<sup>11</sup> Saniniuujia, noo mashiquio, teyanote juhuanajuaja maja na shocotejonu sesenta marijiani, nojori cuaara jiyateyaquishaaria Pueyaso pueya jiiitianaa naacunaara. Nojori na naata Cristo samiritianu, niyacaaniucua nojori jiaatiasacari. <sup>12</sup> Naacuajitij, nojori camishacariuhua, nojoriiri tari sesa miirii, nojori jatanuucua nojori sequesano saaja Jesucristora na poonijionura. <sup>13</sup> Naajuhuaaj, niyacoo naata mashiquio nojori quishacarijia, nojoriiri saaja rucuanenonu maniniucuaaja, na tiuquiiijionura puetunu tiacojuanaa. Naa tama na poonijosanojuajaaja na jiiitaaquishacaritij, nojoriiri taajecaturiria quijia. Majaari saaja taajecara na quiniu, juura tojiyajaa pueya sequesanoori, tariucua na caminiujiuniu tamasacaraj. Naajuhuaaj, sacuaratia neteyocojiyari juhua paateca, na taajetenura pueya, na caminiujiushacari jiyasohuaaja niishishano casaa. <sup>14</sup> Naaratej, janiyari cunora paniyani niyacojori naata mashiquiopue cuaara camiyora neyacaara. Cuaara muetuurajuhuaaj. Cuaara na tia camarucua quiquioora. Nojori jaara naa maninia miiritij, nojori miishanoori maja quenaaja na quiniu quiniutianiya pa paraa rimiaaquenura Pueyaso pueyacuara. <sup>15</sup> Noojiaqueya niyacojori naata mashiquiopueeri Pueyaso tojiniu tarinitiacanu tari, Satanás tojijiaca nojori quiniuria saniniuujia.

<sup>16</sup> Pa Jiyaniiijaacua tiuujica maajipohuajinijinio jaara tama na pueyajinijiniojuajaaja jiiitiare mashiquiopue, nojori cuaara na naacuura tamajaaja. Naacuajitij, majaari Pueyaso pueya cojetanu quiniutianiya nojori, jiyopueraca nojori quishacari. Naacuajitij, Pueyaso pueyari na naata naacunu cutara noo mashiquiopue, canapuete tojetaarucuaajanaa jiyopueejuni.

<sup>17</sup> Pueyaso pueya jiiitianaa, noo pojori canapuete maninia jiiitianaa narta Pueyaso pueyani, nojori cuaara narta Pueyaso pueya tojishano quiiria. Naajuhuaaj, nojori cuaara nareja niquitiosaaria, na panishano nojori jiiitiana. Pueyaso pueya maanu jiiitianaajinijinio, canapuete Pueyaso rupaa pohuatanaacuajani, Pueyaso rupaa niishitiojonaanio, nojori cutara cuaara socua queraatia niquitiosaaria, maninia poonijosano nojori miiniuucua. <sup>18</sup> Tariucuaacanu Pueyaso Rupaaajinia naajiotasanoori naa niishitiojiyajuhuaaj, naa na sequesacari miriqui:



“Majaari quia juunu rupaa mishiquionu na miaqueyaquiniuria quia casaa, quia rapijjotesacari quia natau, na jocuanura na sucujajini”.

Naa sequeyajaariuhuj:

“Poonijjotesano pueyano cuaara niqutiosaaria na poonijjonu sami”.

<sup>19</sup> Pueyano jaara saquiriojotariquia Pueyaso pueya maanu jiitianaacuara, majaari na tojiniu, jaara nocuara cojitiaaquiri saquiriojotanu. Querajaa pueya jaara nocuara cojitiare saquiriojotanu, cuno pojori sequesano cutaraari seetanujuanaa. <sup>20</sup> Naacujajitij, Pueyaso pueya maanu jiitianaajini-jinio jaara sesa miiriquia, Pueyaso pueya maanu niqiara quia nacasurenoj, puetunu narta Pueyaso pueyajanaa puerenura, maja sesa nojori miiniurijuhuj. <sup>21</sup> Timoteonaa, janiyari nio quia sequeya Pueyaso niqiarani, Jesucristo niqiarajuhuj, na saquiriojosano seya niqiaranio. Nio cua rootasano quia tojiri. Majaari maninia, paa jaara ritia nacasure parta Pueyaso pueyani, seetanujuanaa maninia pa niishiyaquishacari na miishano. Naajuhuj, majaari pa naata jiuujiaaniu pa panishano pueyano, nojuaja jaara sesa miiri. Naacujajitij, majaari rimiajata miijjonu sacuaraatia.

<sup>22</sup> Naajuhuj, majaari senota quia juaashiquia quia nianu quia niishishoo pueyanoocua, nojuaja quia jiyatenura Pueyaso pueya jiitianara. Maninia cutaraari coteenu quia niishiniuria taamueca pueyanotenojoni, maja sesa miijia pueyano quia jiyatenura Pueyaso pueya jiitianara. Quiaa jaara naa Pueyaso pueya jiitianara jiyatere quia niishiyaquishoo pueyanotej, Pueyasoori quiocua tiutianutaniya cuno pueyano miishano sesa. Cunora quia sequeyanijia, tama quia cuaqueyajaaja quia cojuare, tojetaarucujanaa sesa miyaquijia quia quiniuria.

<sup>23</sup> Timoteonaa, naa quia seeco nojjonuucuatej, majaari saaja mohuaca ratunu. Sequeyarucua cusosu quia quiniuucua, secaja vino quia raturiquiajuhuaj quia jiniacuma na jeeanura.

<sup>24</sup> Noojiaqueya pueya, sesa nojori miishanoori maatia niishishanocuaja, Pueyaso saniitonu juuca quiaquishacarijia. Tamasacara saniniuujia, sesa nojori miishanoori maja na niishishaanu quiniutianiya juhuanujuaja, Pueyaso cuaara nojori nujuatejore na tacobijiaatijia, na nequesoreesoriquiano. <sup>25</sup> Naajaariuhuj, maninia pa miishanoori maatia niishishano mijiria. Jiyasohujaja maninia pa miishanojuhuaj, cunoori na nuhuaji niishishaanutaniya maatiajuhuaj.

## 6

<sup>1</sup> Parta Pueyaso pueyajini-jinio, canapuate poonijjotesano pueyani, nojori cuaara na camarucua tojitiajaca quiiria. Nojori cuaara rerequeteyaquiiira na camarucua, na camarucua mariqui Pueyaso sesacareeri, pa niishitiojosanonio, na tojiyashijia na seru quiniuucua. <sup>2</sup> Poonijjotesano pueyano camarnu jaara Pueyaso pueyano quiriquia, juhua na serujuhuj, na seru cuaara na tojijia quiiria. Cuaara na rerequeteja quiaquiiira, narta Pueyaso pueyano na camarnu quiniuucua. Nojuaja cuaara seetanujuanaa maninia poonijjoora nera, na niishishacari na camarnucujajari narta panishano Pueyaso pueyano.

### *Cante seetanujuanaa shuquiriaatia quijiacani*

Timoteonaa, nio cua sequesano quia niishitiojore pueya. Nojori quia shiniujiuri na tojtianurajuhuj. <sup>3</sup> Tamonu jaara tamaatia niishitiojoriquia cua niishitiojosanojiniji, nojuajaari tojetaarucujanaa moseeca. Pa Jiyanijia Jesucristo rupaari jiyano hua maninia. Na niishitiojosano pa tojishacari, cunoori pa naacquiaa juhua Pueyaso pa quiniuria socua. <sup>4</sup> Cante cuno



niishitiojosano ruuretaja tama na niishishanojuaaja na niishitiojonurani, nojuajaari tama na cuaqueyajaaja jiyaniya nojuaja niishijia cutara. Nojuajaari juaatioonu porocujuhuaaj, Pueyaso rootasanojiniji na taacanuusacari. Naa quijiaca pueya quishacaritij, nojoriiri juaajiacara jataquiaa, nojoritia juayonuujutajaca shocotanuucua nojori. Nojoriiri juhuacatecara ruutaquetooquiaa na juayonuutanura. Sesacatoquiaajaariuhuaaj. Naajuhuaaj, nojoriiri najuhuana soquequiaa, narta Pueyaso pueya naasucua sesa miiquiaa. <sup>5</sup> Nojoriiri juayonuujutanu tarinitiaaquijiaca. Nojoriiri maja na naata maninia niishiriojonu socua. Nojoriiri maja na niishiniu seetanu rupaajanaa Pueyasojiniji. Nojoriiri Pueyaso pueya jiitajacara quiniu paniya, nojori jyanishacari nojoriiri naacuaji jyanohua casamiriacara quiniutianiya. <sup>6</sup> Taaquiriirinij, Pueyasocua tiuujia pa quishacari, paacuaquinatejaj seetanujuanaa juhua queraatia casamiriaca quijiacani. Paacuaajaari shuquiriaatia quijiaca Pueyaso rupaacua tiuujia pa quishacarini, juhuajaniya quijiaca pa quishacarijuhuaaj pa jiitiasano casaaniyojuata. <sup>7</sup> Paacuaajaari juhuasunucua roosaaquiaari mijiriani. Naajuhuaaj, paari juhuasunucua tacateriquianohuani. <sup>8</sup> Naaratej, paa jaara pa miaquesocoriquiano jiitariquiani, paa jaara pa cushishocoriquiano jiitariquijuhuaaj, saa cunotaja shuquiriaatia pa quirij. <sup>9</sup> Saniniuujia, noo pojori, jyanohua casamiriaca quiniucua jiaatijacatej, nojoriiri maja na niishiniu rejetenu, na panishano na miyaquiniuria. Naacuajitij, nojoriiri cocuaatia miiquiaa. Nojoriiri juhua norijosaaquiaa, najuhuana casamiicua nojori jiaatiasacari, sesa casaacuanio. Puetunu cuno sesa casaajanaari pueya sesoquiaa, nojori saniitiosaanura taraatia. <sup>10</sup> Cumaneeaacua jiaatianu jyanohuani, cuniquiji supuejaari puetunu sesa casaa pa miiniurijanaa. Naacuajitij, noojiaqueya parta Pueyaso pueyajiniiniori Pueyaso rupaa tojiniu tarinitiacanu tari. Nojoriiri tama nojori cuaqueyajaaja miitiquiaa naquiya, naa cumaneecaacua jiaatijaca nojori quishacaritij. Naaratej Timoteonaa, majaari cumaneecaacua jiaatijaja quia quiniu.

*Pablo shiniuujushacari Timoteo, Pueyaso tojjia na quiniuria pueyaracaanu*

<sup>11</sup> Quiajaniya Timoteonaa, quiaacuajaari Pueyaso saquiriojosano pueyano. Naaratej, puetunu sesa casaajanaa miyashijia quia quiri. Tojetaarucujanaa saaja maninia miijia quia quiri, juhua pa Jiyaniijaja. Pueyasocua tiuujia quia quiri socua. Socua panijia quia quirijiuhuaaj. Puetunu casaajanaa rejeretaja quia quirijiuhuaaj. Jacaria pocuaja quia quirijiuhuaaj, maja pueya rerequeteja. <sup>12</sup> Pa paraca nujuataja quia quiriquia, jyanohua quia tiuuniutia Pueyaso rupaacua. Pueyasocuajaari quia saquiriojoquiaari na pueyano quia quiniuria. Cunora, quiaari queraatia pueya niquiara pohuataquiaari Jesucristocua quia tiuuniujiniji. Naa pueyaracaanu rishijiarano quia quishacaritij, cunora, majaari Pueyaso niqutiojonu panishano quiajaniya jaaretenu. <sup>13</sup> Quiaacuajaari niishiya taa Jesucristo seetanujuanaa pohuataquiaari Poncio Pilato niquiaracuajani, nojuajaari seetanujuanaa Pueyaso Niyanu. Naajaa, nojuajaari niishiquiaari nojuajaari cunora mosaanutaniya. Na Que Pueyasocuajaari na samiitianiquiaariuhua. Pueyasocuajaari saminiora jiyateja puetunu saminio casaajanaa. Naa quia niishishacaritij Timoteonaa, janiyari nio quia sequeya Pueyaso niquiarani, pa Jiyaniijia niquiarajuhuaaj. Cua tojiri. <sup>14</sup> Puetunu cua rootasano quiajaniyajanaa quia tojiri. Majaari na jataniniu quenaaja, pa Jiyaniijia mariqui quia niishitiojosano tamacareeri. Taa cua rootaa quiajaniyacujani, na tojjia quia quiri pueyaracaanu, pa Jiyaniijia Jesucristo cuara tiuquiriohuajaatijia, Jiyaniijajanaa na

quiniuria. <sup>15</sup> Na Que Pueyasoori na tiuquitiniutianiya na panishacari, taa na sequequiaaricujani. Pueyasocujajaari jiyano hua pa timitiasano, saaja maninia na quiniuucua. Nojuajanaari Jiyaniijia. Nojuajaari puetunu tamasaca jiyaniijianucujanaa Jiyaniijia. Nojuajaari camarucujajini Camarnujuanaa cutara. <sup>16</sup> Saaja nojuajaari pueyaracaanu quiijajuhuanajaj. Majaari na supueni quiquiaari. Majaari na shaajenu quiniutianiyajuhuaaj. Nojuajaari jiyano hua na shacantuuca cumaacajinia quiijajuhuanajaj. Cunora, majaari quenaaja tamonu pueyano na naata nocua catecanonu. ¿Canteeri na niqiquiaari quenaajani? Shaaqui. Pueyanoori maja na naata na niqiniu. ¡Nojuaja cuara pueyaracaanu timitiasaaria! ¡Nojuajaari namitia na cumaaca jitianajuhuanajaj! Cuara naa quiiria pueyaracaanutej.

<sup>17</sup> Timoteonaa, parta Pueyaso pueya quia tojitiri nio, noo pojori, queraatia casamiriacatej. Nojori cuara niishiiria maja pueya shocotejaca nojori quiniuria, casamiriaca nojori quiniuucua. Nojori cuara niishiirajuhuaaj, maja na casamiicua nojori tiuuniuria, nojori jyanishacari nojoriiri pueyaracaanu shuquiriaatia quiijaca quiniutianiya casamiriaca nojori quiniuucua. Pa jiiitiasano casamiiri shaajeriquiano. Nojori cuara Pueyasoocua tiuuria cutara. Nojuajaari capora cutara, na niqutionura puetunu pa panishano casaajanaa, shuquiriaatia pa quiniuria. <sup>18</sup> Cunora, nojori quia niishitiojore, pueyaracaanu maninia miijica nojori quiniuria. Naatej, taa queraatia casamiriacatucuaa nojorini, maninia nojori miishano cuara naa queraatia quiirajuhuaaj. Nojori cuara ritia niqutiojojuaca quiiria nojori jiiitiasano-jini, narta Pueyaso pueyano jiiitaaquishacari na panishano. <sup>19</sup> Naa capora nojori quishacari, nojoriiri juhua tari jiyocuacaanu racataa nojori casaa. Naacujajitij, nojoriiri seetanujuanaa shuquiriaatia quiijaca quiniutianiya pueyaracaanu, mijiria, jiyocuacaanunio.

*Pablo rootasano Timoteo, naajionu na tucuatasaari*

<sup>20</sup> Timoteonaa, Pueyasocujajaari quia jiyatequiaari na rupaajini pohuatana quia quiniuria. Maninia quia cojuare seetanu Pueyaso rupaajanaa. Majaari najuhuaana tama pueya niishitiojosanojuaaja tojijia quia quiniu. Noo niishishanojuhuaaj, pueya sequesano: “Seetanu niishijajanaa niishishano cutaratej”, majaari cuno tojiniu. Cuno niishishanoori seetanu niishishanojuanaa paraca, najuhuaanaari. <sup>21</sup> Noojiaqueya parta Pueyaso pueyari Pueyaso rupaa tojiniu tarinitiacanu tari, cuno najuhuaana niishishanoocua nojori tiuuniucua. Niojuanaa Timoteonaa.

Pa Jiyaniijia cuara quia cumaquiiria.

## TANEE PABLO NAAJIONEE TIMOTEOCUARA

### *Pablo saruhuatasacari Timoteo*

<sup>1</sup> Janiyari Pabloni, Jesucristo jiyaramiquishano, taa Pueyaso paniquiaaricujani. Naacujitij, janiyari Jesucristojiniji pohuatanara jiyatesaaquiaarini, pueya niishiniuria seetanujuanaa, nojoriiri pueyaracaanu rishijiacara jiyatesaanutaniya Jesucristoocua nojori tiushacari. <sup>2</sup> Naaratej quiyanu Timoteonaa, janiyari nio naajiya quiarani. Janiyari quia panitiaani pa Que Pueyaso, pa Jiyaniijia Jesucristojuhuaaj, nojori cuara cumaquiiria quiajaniya. Naajuhuaaj, nojori cuara taraajeera quioocua, nojori cuara pueyaracaanu quioojia cajitiirijuhuaaj shuquiriaatia quia quiniuria.

### *Jesucristojiniji quia pohuatariquia tamasaca*

<sup>3</sup> Pueyaso cua secojosacari pueyaracaanu, juuca, niucuanio, janiyari quiocuara secojoquiaani. Cua niishiriojosacari quiajaniya, maninia Pueyaso tojijia quia quiniucua, janiyari Pueyaso sequequiaani, “paacarasho”. Janiyari nera shitimia poonijioquiaa coojia najiquitishooni, taa pa supuetanaa tojitiaquiaari Pueyasocuaani. <sup>4</sup> Majaari cua niyajetanu quiquiaa quia nujuquenu cucua, janiya jaara quia shuriucujaji quiaquiaarini. Janiyari cunora jiyanohua jiaatiaa cua niquiniuria quiajaniyani, shuquiriaatia cua quiniuria quia shuriucua. <sup>5</sup> Janiyacuajaari niishiyani quiaari seetanujuanaa pa Jiyaniijiaacua tiuujiacuja. Quia ji Loida, quia nucua Eunicenio, nojoriiri coteenujuanaa quioquaji Pueyasocua tiuujiaa quiquiaari. Majaari cua taacanuunu quiaari seetanujuanaa Jesucristoocua tiuujia quiquiaajuhuaaj, taa nojori quiquiaaricuaani.

<sup>6</sup> Pueyasocujaari na cumaaca niqutioquiaari quiajaniya, cua secojosacari quiocuara, cua juaashiquia cua niasacari quioocua. Naacujitij, quiaacuajaari Pueyaso Sohuanu cumaacaraca quioojiajinia. Naaratej, Pueyaso Sohuanu quia shanacure quioocua, na cumaaca na poonijiotenura socua quioojiajinia. <sup>7</sup> Pueyasoori maja na niqutionu quiquiaari na Sohuanu, puereja pa quiniuria. Na Sohuanu niqutioquiaari pajaniya cutaraari, cumaacaraca pa quiniuria, panijiaa pa quiniurijuhuaaj, maninia niishiriojojuacarano. <sup>8</sup> Naacujitij, majaari quia caririquiniu pa Jiyaniijia Jesucristojiniji quia poojotanura. Naajuhuaaj, majaari cua naaqui quia caririquiniu, nujuatejojuajinia cua nujuatesaanuucua Jesucristojiniji cua pohuatanuucua. Pueyaso cumaquishacari quiajaniya, juhuaajaniya quia rejeretare, quiaa jaara naquiya miishaariquiaajuhuaaj, Jesucristojiniji quia pohuatasacari. <sup>9</sup> Pueyasocujaari pa jiyatequiaari na pueyara. Nojuajaari pa saquiriojoquiaari saa neraja pa quiniuria. Na jiyanooni pajaniyani, majaari na quiniu quiquiaari maninia miijiaa pa quiniucua juucua. Maja. Nojuacuajaari naa pa jiyanooquiaari saaja naa na miiniu paniniucua, jiyanoojia na quiniucuaajuhuaaj. Jiya shipiniyaquishacarijia, Pueyasoori jiyacari niishiriojoquiaari taa na jiyanooniutianiya pajaniyani, Jesucristo cusosacari pa niti. <sup>10</sup> Quiari naataja pocujaji Tacuna Jesucristo niniucua, Pueyasoori pa niishitiquiaari taate na naata jiyanooni pajaniyani. Cunora, Jesucristoori pa niti cusoquiaari. Na samiitiasacarihua, nojuajaari cusonu shocotaquiaari. Naacujitij, nocua pa tiushacari, paari pueyaracaanu rishijiaa jiyatesaanutaniyani.

<sup>11</sup> Pueya niishiniuria nio rupaa, Pueyasoori cunora na jiyaramiquishano pueyanora cua jiyatequiaari, pueya cua niishitiojonura Jesucristojiniji. <sup>12</sup> Naacuajitij, janiyari niya naquiya miya nujuatejojuajiniani. Naajaa, majaari cua caririquiniu. Janiyacuajaari niishiyani canaacua cua tiuquuaarini. Nojuacuajaari pocuaji Tacuna Jesucristo. Cunora, janiyari seetanujuanaa niishiyani, nojuajaari cumaacaraca na cojuanura janiya, nojuaja cuaara tiuquiriohuajaatijia. Naajuhuaaj, nojuacuajaari cumaacaraca na jataniniuria pajaniya, tojetaarucujanaa quiarinio pueya pa quiniuria na tiuquishacariuhua pocua.

<sup>13</sup> Timoteonaa, maninia niishitiojosano tojijia quia quiriquia taa cua niishitiojoquiaari quiajanuyacuajani. Naa quia miiriquia Pueyaso rupaacua tiuujia quia quishacari, pueya panijia quia quiniuucujuhuaaj, Jesucristo rupuesano pa quiniuucua. <sup>14</sup> Pueyasocujaari quia niishitiquiaari seetanu rupaajanaa. Pueyaso Sohuanu quiniuucua poojiajinia na cumaquiniuria pajaniya, cuno niishitiojosano quia jiitiare maninia, maja tamaatiara na jatanishaanura.

<sup>15</sup> Quiaacuajaari tari niishiya, puetunu Asia jiyajinijinio parta Pueyaso pueyari cua tiujiatuquiaari tamajaaja. Majaari na naacutunu paniniu quiquianu janiya. Nojorijinijinioori quiquianujuhua Figelo, Hermógenesnio. <sup>16-17</sup> Saniniuujia, Onesíforo cutaraari cucua tiuquitiasucanu. Cunora, pa Jiyaniijia cuaara nocua taraajeera, puetunu na tiajinia quijiacaacuajuhuaaj. Nojuaja jaara Roma tiacajinia tiuquiquianu, nojuajaari ritia coteecanu na pajenura janiya, cuaara cua riuriatarejaatijia. Jaara cua riuriatacanu, nojuajaari coojia cajitiquianu. Nojuajaari pueyaracaanu cucua tiuquijiocanu niya nujuatejojuajinia, na naacunura janiya. Majaari cucuaji na caririquiniu quiquianu nujuatesano cua quishacari. <sup>18</sup> Quiaacuajaari niishiyajuhuaaj taa nojuaja naacuquiaari pajaniyacuajani, Éfeso tiacajinia pa quishacari. Naa maninia na miiniuucua pajaniyacuuatej, pa Jiyaniijia tiuquishacariuhua pocua, nojuaja cuaara maninia miiria Onesíforo saniniuujia.

## 2

### *Jesucristora poonijiojua quia quiri quia puereyaquiniutia*

<sup>1</sup> Quiajaniya saniniuujia quiyanunaa, quioojia quia cumaquiriquia Jesucristo niquitiosano cumaacata. <sup>2</sup> Nocua tiuushano pueya quiarta Pueyaso pueyajinijinio quia niishitiojore Pueyaso rupaa, nojori niishitiojonura tamasaca saniniuujia. Cuno maninia pueya quia niishitiojore puetunu Pueyaso rupaajanaa, taa quia tojiquiaari queraatia pueya niquiara cua pohuatasacaricuajani.

<sup>3</sup> Juhuaajaniya naquiya miiniu rejeretaja quia quiriquia juhua pa Jiyaniijia Jesucristo soldado, puereyashijia. <sup>4</sup> Pueyano jaara soldadora saquiriojosaare, cuno pueyanoori maja na naata tama na panishanojuaja miiniu socua. Nojuajaari pueyaracaanu na camarnu tojijia, na camarnu timitianura nojuaja. Naa pa Jiyaniijia tojijia quia quiriquiajuhuaaj Timoteonaa. <sup>5</sup> Naajuhuaaj, pueya tacuarishijosacari, nojori cuaara quiiria tacuarishijionu camarnu tojijiaca. Tamonu jaara shocotare na tojiyaquiniutia camarnu, cuno na shocotanuuri najuhuanaj. Naacuajitij, majaari na niquitiosaanu casaa, sesa na miiniutia na shocotasacari. <sup>6</sup> Nio quia niishirijiuhuaaj: cante cuhuariquia cuhuatajani, nojuaja cuaara coteenu na senoosanojiniji racataara na panishano. Na nuhuaji cutara, nojuaja na naata tamasaca

niquitiojonu na senoosanojiniji. <sup>7</sup> Nio miriqui cua sequesanoocua quia niishiriojore. Pa Jiyaniijiacuajaari quia niishitiniutianiya puetunujuanaa.

<sup>8</sup> Majaari nio niyajetanu: Jesucristoori macujiniji samiitianishaaquiaar-iuhua, Pueyaso Niyanu na quiniuucua. Pueyano quiquiaariijaariuhua. Nojuacuajaari pa supuetanaa jiyaniijia David niquiohuacuajinio supueno pueyano quiquiaari. Naacuajitij, nojuajaari Pueyaso Jiyarosano quiquiaari mijiria quinia pueya niti na mosaanura. Cunocuajaari cua pohuatasano Pueyaso Rupaa. <sup>9</sup> Naa cua poojotanuucuatej, janiyari naquiya miyani. Janiyari cumayocuata moronucua quiyajaaniuhua, juhua sesa miijia. Naajaa, Pueyaso rupaa cutaraari maja na naata sanaajasaanu. <sup>10</sup> Cunora, janiyari puetunu naquiya miiniujianaa rejeretaquiaani, Pueyaso saquiriojosano pueya tojiniuria Jesucristojiniji. Naacuajitij, nojoriiri na naata nocua tiuuniu, Pueyaso pueyara nojori jiyatesaanurajuhua, taa na jatanishano pueya pa quiyacuaani. Naacuajitij, paari mariyata shacantuuca quijiacara jatanishaanutaniyani, Jesucristota pa quiniuria pueyaracaanu.

<sup>11</sup> Nio sequesanoori seetanujuanaa:

Jesucristoocua pa tiushacari, Pueyasoori Neyanu mosaanu jiyateya pa niti na quiniuria sesa pa miishanojiniji. Naacuajitij, Jesucristo mosaanu jaara pocuara quiquiaari, na samiitianuhuari pajaniyara quiyajuhua, pueyaracaanu rishiriquiano pa quiniuria. <sup>12</sup> Naajuhua, paa jaara naquiya miitiasaariquia nocua pa tiuuniuucua, nojuajaari camarucuara pa jiyatenutaniya narta jiyaniijianucua pa quiniuria. Saniniuujia, pa jaara pa Jiyaniijia tamacariquia Pueyaso niishiyashijia pueya niquiarani, nojuajaari pa tamacanutaniyajuhua. <sup>13</sup> Paa jaara na sequesano tojiyashijia quiriquiani, naajaa, nojuajaari pueyaracaanu na sequesano miijia. Pueyasoori na sequesano jataniyashijia cutara.

### *Taamueca quijiate Pueyaso shuquiritiasano nera poonijionani*

<sup>14</sup> Parta Pueyaso pueya quia niishitiojorohuarohua maja najuhuana nojori juayonuujutanura tamaatia niishitiojosanoocua. Jiyanohua quia nasure nojori Pueyaso niquiara, maja naa nojori nacojonura najuhuana supuetanaa niishitiojosanoocua. Naa tamaatia niishitiojosanoocua juayonuujutanuni, cunoori maja na cumaquiniu na tojiniaa. Socua nojori sesoya cutaraari. <sup>15</sup> Tama quia cuaqueyajaaja quia cojuare, saa maninijia quia niishitiojonura Pueyasojiniji cuno seetanu rupaajanaa. Naacuajitij, Pueyasoori quia timitianutaniya nera poonijiona maniniu quia quiniuucua. Majaari capa quia niishitiojonu, quiaa mariqui tamajaaja caririquiriiri. <sup>16</sup> Naaratej, majaari najuhuana tama mijiria pueya niishishanojuaja quia tojiniu. Pueya tojishacari cuno, nojoriiri socua jiyacatenutaniya Pueyaso tojiyashijia nojori quiniuria. <sup>17</sup> Cuno najuhuana niishitiojosanoori jiyanohua puereeta. Cunoori Pueyaso pueya tajinia paaqueja, na sesonura puetunu Pueyaso pueya maanujuanaa. Naa nojori tajinia paaqueyari taa pueyano cusojuaja sapueja pueyano cuaqueya moquijiaquiaacuaani, na camaru na cusojuanura. Himeneo, Filetonio, nojoriiri naa miiquioya quiar-ijia. <sup>18</sup> Nojoriiri seetanu rupaajanaa jataniquianu tamaatiara. Nojoriiri pueya niishitiojiya, paanaari tari tojetaarucujanaa samiitianishanocujani. Naacuajitij, majanaari pa cuaqueya jatanishaanu quiniutianiya, shacantuuca cuaqueyaraca pa quiniuria taa pa Jiyaniijiacuaani. Naa nojori

niishitiojosacari najuhuanatej, nojoriiri noojiaqueya Pueyaso pueya cushitiojiya, nojori tiuyaquiniuria pa Jiyaniijia sequesanoocua. <sup>19</sup> Naajaa, Pueyasojuanaacuajaari pa niishitiquiaari na rupaari seetanujuanaa. Majaari na naata jatanishaanu. Naa naajiotasano quiyacuajaari:

“Pa Jiyaniijiaari na saquiriojosano pueya niishiyacuaja”.

Naa naajiotasanoori quiyajuhuj:

“Canapuate pa Jiyaniijia Jesucristoocua tiuujiacani, nojori cuaara sesa na miijionu tarinitiaara”.

<sup>20</sup> Sanajanaa, cua tojiri. Jiyanohua queraatia casamiriaca pueyano tiajinia, cuno tiajiniaari maja saaja orojiniji shipinijosano coshiquia quiniu, miacojuanao, platajiniji casaano. Puetunu tamaatia casaajiniji shipinijosano casamijianaari quijia. Quijiajaariuhua mati, suruhuatu numajiniji quejasano. Quijiajaariuhua maraujiniiji panishano patacocua, conaano. Puetunu cuno casamijinijiniojuanaani, noojiaqueyari racatasano saaja masu miaquetejarano quiya, na raatojotajaranonio. Quiyajaariuhua rucucuaacuaji casaa, rucucua cajitiaja. <sup>21</sup> Paari naajuhuj. Paa jaara tama pa cuaqueyajaaja cojuariquia tojetaarucujanaa sesa pa miiniuucujini, saaja pa Jiyaniijiaara pa quiniuriajuhuaj, naacuajitij, pa naata juhua pa Jiyaniijia timitiasano tohuatashiniyojua quiniu. Naacuajitij, pa Jiyaniijia na naata poonijiotenu pajaniya puetunu maninia casaajanaa pa miiniuria.

<sup>22</sup> Sanajanaa, quiaacuajaari niishiya, casaa miiniuucua jiaatiajacate mashiquiorini. Puetunu cuno sesa niishiriojosanojuanaa quia tarinitariquia. Saniniuujia, saaja maninia miijia quia quiriquia. Saaja Pueyaso rupaacua tiuujia quia quiriquia, pueya panijiajuhuaj. Jiyanoojia quia quiriquiajuhuaj. Naa quia quiriquia, taa puetunu Pueyaso jiyatesano sesa miyashijiaca pueyajanaa miiquiaacuaani, pa Jiyaniijiaacua nojori tiuuniuucua. <sup>23</sup> Pueya jaara nacojoriquia nojori niishiyaquishoo casaajiniji najuhuanaj, nojori quia ruuretare saaja, nojori jaara quia nequesoretare cuno casaajiniji. Quiaacuajaari niishiya, pueyari jiyano casaacua paracaatiojua. <sup>24</sup> Pueyasora poonijiojua pueyano cuaara quiaquiiira pueya paracaajia. Saniya cuaara quiiira cutara puetunu pueya panijiajanaa. Cuaara quiiirajuhua maninia niishitiojojua. Cuaara juhuajaniya rejeretaja quiiira, tamasaca jaara na taajetere. <sup>25</sup> Cuaara Pueyaso rupaa tojiyashijiaca nacasuura jacaria, nojori na paniniutia, maja nojori na juaaniutia. Naa quia miishacari, Pueyaso naasucuaari nojori jiuujia tacatonutaniya seetanu rupaajanaa niishijiaca nojori quiniuria. <sup>26</sup> Naacuajitij, nojoriiri maninia niishiriojojuaca quiniutianiya, nojori jaareteenura Sesaacuajia, maja Sesaaca miitiniuria nojori taa na paniyacuajani.

### 3

#### *Taa quijiaa mijiria quiniaa quiniutianiya quera jiya puequesacarini*

<sup>1</sup> Quia niishirijuhua Timoteonaa, jiya puequenu panishacari, pueyari socua jiyacatenutaniya sesa miijiacara. <sup>2</sup> Pueyari saa tama nerajaaja niishiriojojuaca quiniutianiya. Majaari tamonura na niishiriojonu quiniutianiya. Pueyari queraatia cumaneeca jitianuucua jiaatiajaca quiniutianiyajuhuj. Naajuhuj, pueyari najuhuaana narta pueya niqiiara pocuajaca quiniutianiya, na jiyaniishacari nojori cutara socua niishijiaca narta pueyajiniji, socua shanohua niquishano tamasacajinijinio. Pueyari Pueyaso sesacajaca quiniutianiya, narta pueya sesacajacajuhuj. Pueyari na queya tojiyashijiaca quiniutianiya. Majaari quenaaja pueya timitianu quiniutianiya maninia na miijiaa. Pueyari maninia miyashijiaca quiniutianiya,



Pueyasojiniji maninia casaa rerequetejaca nojori quiniuucua. <sup>3</sup> Naajuhuaaj, majaari quenaaja na queya panijiacua pueya quiniu quiniutianiya, tapuey-ocua, tama necohuaajaanio. Pueyari tojetaarucuaajanaa jiyano yashijiacua quiniutianiya. Sacuaraatia rimiaacatujuri quiniutianiyajaariuhuaaj. Naajuhuaaj, majaari quenaaja tama nojori cuaqueya panishanojuaaja rejetejaca pueya quiniu quiniutianiya. Pueyari naquiya narta pueya miijiaca quiniutianiya, nojoriicua na taraajeyaquiniutia. Pueyari puetunu maninia miijiacajanaa soojeaca quiniutianiyajuhuaaj. <sup>4</sup> Pueyari tama na cojiniaajaaja tacartajaca quiniutianiya. Pueyari cocuaatia casaa miijiaca quiniutianiya, mosanucua nojori quiniuucua. Pueyari juhuajaniya quijiacua quiniutianiya, tama nojori cuaqueyajaaja shuquiritiajaca nojori quishacari. Shuquiriaatia pueya miishacari tama na panishanojuaaja pueyaracaanu, majaari jeya nojori quiniu quiniutianiya nojori shuquiritianura Pueyaso. <sup>5</sup> Pueyari sapuenu juhua Pueyaso pueya niquishaanutaniya. Naajaa, nojori miishanojiniji, maatia niishishaanutaniyari, nojoriiri Pueyaso cumaaca maseyaquiquiaari seetanujuanaa jatanishano pueya nojori quiniuria. Cunora cua tojiri Timoteona. Majaari jiyano pueya quia rupuenutej.

<sup>6</sup> Tamasaca cuno pueyajinijinioni, nojoriiri tiaco tiuquitiajaca, noo maajipohua na sapojonura, najuhuaana pueya pohuatasanoocua ritia tiuujiacatej. Cuno maajipohuari tama na cuaqueya miiniu panishanojuaaja rejetyashijiacua. Naa sesa miijiaca nojori quiniuucuatej, nojoriiri najuhuaana tacaquiquiaa. Cunora, nojoriiri cuno sapojonuujuaa tojtiaquiaa. <sup>7</sup> Cuno maajipohuari najuhuaana pueyaracaanu tojtiaquiaa cuno sapojonuujuaa niishitiojosano. Saniniuujia, majaari Jesucristojiniji seetanu rupaaajanaa niishijiacara nojori quiniu quiquiaa, Pueyaso jiyanooniuria nojori. <sup>8</sup> Cuno sapuenu juhua Pueyaso rupaa niishitiojonaari seetanu rupaaajanaa ruuretaquiaa, taa nio shimiacuri, Janes, Jambres ruuretaquiaari supuetana Moiséscaani. Naacuajitij, nojori niishitiajaari juhua ninishiqui, sesa nojori miishano timitiajaca nojori quiniuucua. Seetanu rupaaajanaa nojori tojiyaquiniuucua, pueya cuaara tojiyaquiria nojori saniniuujia. Nojoricuaajaari Jesucristoocua tiuyashijiacua. <sup>9</sup> Naajaa, majaari queraatia pueya tiuuniu quiniutianiya nojoriicua. Ritia niishishaanutaniyacuaajaari, nojoriiri seetanujuanaa niishiyashijiacua, taa pa supuetanaa niishiquiaaricuaani cuno shimiacuriiri sapojonuujuaa.

*Pablo tucuatascari naajionu, socua rootaa Timoteori*

<sup>10</sup> Timoteona, quiaacuajaari pueyaracaanu cua cojiquiaari maninia quia niishiniuria puetunu cua niishitiojosanojuanaa. Quiaacuajaari niishiya taa miijiaca cua quiquiaarini, pa Jiyaniijia cua shuquiritiniuria. Quiaari niishiyajuhuaaj taa seetanujuanaa pa Jiyaniijiaacua tiuujia cua quiquiaarini, jacaria pocuajajuhuaaj, pueya panijiano. Quiaari niishiyajuhuaaj, majaari coojia cua najiquitiniu quijiani, pueya miishacari naquiya janiya. <sup>11</sup> Quiaari niishiyajuhuaaj taa cua miitiasaaquiaari Antioquiya tiacajiniani, Iconio tiacajinijuhuaaj, Litra tiacajiniano. Seetanujuanaa, janiyari naquiya miishaaquiaarini. Naajaa, pa Jiyaniijiaari cucua taraajequiaari maninia na rishitiniuria janiya. <sup>12</sup> Seetanujuanaa naquiya miishaanutaniyari puetunu noo pueyajanaa, tama na cuaqueyajaaja jiyatejaca saaja Jesucristo tojijiacua nojori quiniuriatej. <sup>13</sup> Saniniuujia, sesa miijiaca pueya, sapojonuujucanio, nojoriiri socua sesa miiniuria jiyacatenutaniya. Nojori sapojonuusacari tamasaca, nojoriiri naa tama na cuaqueyajaaja sapojonutaniyajaacujua.

<sup>14</sup> Quiajaniya saniniuujia Timoteona, majaari quia cartenu puetunu maninia niishitiojosanojuanaa, taa quia niishitiojosaaquiaaricuaajani.

Quiaacuajaari niishiya, cuno niishitiojosanoori seetanu rupaajanaa. Quiaari niishiyajaacuhuj canapuate quia niishitiojoquiaarini. <sup>15</sup> Quiaacuajaari quia naatujajiniiji tariucuacaanu Pueyaso Rupaa niishijia. Cunoori quia niishitiquiaari Jesucristoocua quia tiuuniuria, Pueyaso jiyanooshano pueyano quia quiniuria. <sup>16</sup> Puetunu Pueyaso Rupaajanaacuajaari Pueyaso naajiotanishano na pueya. Cunora, puetunu cuno rupaajanaari maninia pajaniyara. Cuno rupaari cumaacaraca na niishitiojonura pajaniya, na niishitiniuria pajaniyajuhuj pa miishanoori sesa, na nacasunura pajaniya maninia miijiaca pa quiniuhua. Pa rootaajaariuhuj tojetaarucujanaa maninia miijiaca pa quiniuria. <sup>17</sup> Naacuajitij, Pueyaso Rupaari Pueyasora poonijionaa pueya jeenucuaja tojetaarucujanaa, puetunu maninia casaa miijiacajanaa nojori quiniuria.

#### 4

<sup>1</sup> Quiaacuajaari niishiya, Jesucristo tiuquishacariuhua mijiria, Jiyaniijia-janaa na quiniuria, nojuajaari puetunu na tojitiajacajanaa nequesoreenu-taniya mijiria pa miishanojiniji, saminiucua, macunucuanio. Cunora, janiyari na niquiara, pa Que Pueyaso niquiara quia sequeya seetanujua-naani. Cua tojiri. <sup>2</sup> Majaari pueya niquiara Pueyaso rupaa pohuatanu quia tarinitianu. Pueyaracaanu quia pohuatariquia, naajaa, quia jyanishacari jiyacari naasucuaari maja maninia quia pohuatanura. Pueyaso rupaata quia niishitiri sesa miijiaca nojori miishanoori sesa Pueyasora. Pueyaso rupaa tojiyashijia quia nacasuriquia. Pueya quia shiniujiuriquia Pueyaso rupaacua nojori tiuuniuria seetanujanaa. Puetunu cunojuanaa quia miriquia jacaria quia pocuanuta, maja juaaniutia. <sup>3</sup> Naa quia poojotariquia pueya niquiara, nojori tojiniu panishacarijia Pueyaso rupaa. Na nuhuaji, pueyari seetanu rupaajiniiji niishitiojosano tojiniu paniyaquiniutianiya. Saaja na ruuretanutaniyajaariuhuj. Naa Pueyaso rupaa nojori tojiniu paniyaquishacaritij, nojoriiri queraatia tamaatia niishitiojonuujuaca rerejotenutaniya, cuno pojori shuquiritiniuria nojori najuhuana pohuatasanta. <sup>4</sup> Nojoriiri seetanu Pueyaso rupaajanaa tarinitianutaniya, najuhuana sapo-jonusano tojitiajaca nojori quiniuria saniniuujia. <sup>5</sup> Quiajaniya saniniuujia, maninia niishiriojua quia quiriquia, maja quia sapojosaanurajuhuj. Naquiya miiniu rejeretaja quia quiriquia. Pueyaso rupaa Jesucristojiniiji pohuatanuucua cojeja quia quiriquia, pueya tiuuniuria Jesucristoocua. Puetunu quia poonijosanojuanaa Pueyasora quia tucutare maninia, taa pa Jiyaniijia sequequiaari quiajanuacuajani.

<sup>6</sup> Janiya saniniuujia, janiyari quera quianutaniya jiyocuacaanu cua quiniuria pa Jiyaniijiatani. Cua nanaca jaara shootesaare, janiyara, cunoori juhua Pueyasora cua niquitiosano quiniutianiya. <sup>7</sup> Majaari cua taajenu quijia, pueyaracaanu cua poonijosacari cua Jiyaniijia. Janiyari tari tucutatecanu miiniu puetunu na sequesanojuanaani. Pueyaracaanu cua poojotasacari Pueyaso rupaa, majaari cua jataniniu quiquiaari quenaaja. <sup>8</sup> Naacuajitij, shanohua tuhuajaari quiriano jiyocuacaanu racatasano quiya tari, maninia miijia cua quiniucua. Cua Jiyaniijiaari cuno tuhuaja cua niquitionutaniya na samiitianishacariuhua janiya. Pa Jiyaniijiaari jyanohua maninia. Na jiyanooshano pueya pa quiniucua, majaari socua na saneenu quiniutianiya sesa pa miishano. Majaari saaja janiya na niquitionu quiniutianiya cuno tuhuaja. Puetunu noo pojorijanaa niquitionutaniyajaariuhuj, canapuate nojuaja na paniniutia sashiyajaani, cuara tiuquiuhua shacantuuca na cumaacatajatijia.

*Pablo sequesano Timoteo miishocoriquiano*

<sup>9</sup> Majaari puera tarishiniu. Quia secoore, cucua quia tiuquiniuria ritia. <sup>10</sup> Demasri cua tiujiaarucuaani. Tesalónica tiacajinia quiaarucuaari. Nojuacuajaari tama na panishanojuaaja miiniu panijara jatarohuacuaa. Crecenteeri saniniuujia Galacia jiyajinia quiaarucuaa. Titoori Dalmacia jiyajinia quiaarucuaajaacuhuj. <sup>11</sup> Saaja Lucasri niya cuata quiya. Quiaa jaara cumaji niyare, quiocua Marco rupoyare quiocua. Nojuajaari na naata cua naacunu niya, pa Jiyaniijiaara cua poonijosacari. <sup>12</sup> Janiyari saniniuujia Tíquico jiyarorucuaa Éfeso tiacajiniani. <sup>13</sup> Taa cua sequeya quiajaniyacujani, quiaa jaara cumaji niyare, quiocua cua tucuaque toque paare quiria, Carpo tiajinia cua tiujiasano, Troas tiacajinia. Quiocua quiria patootaare cua nequesoreetunecajuhuj. Janiyari socua noo paniya quia patootanurani, shoqueecua naajionuutasano Pueyaso Rupaatej.

<sup>14</sup> Noo Alejandro, cumueeca casaajiniji shipinijiojua casamitij, nojuajaari jiyanohua cua paracaajiaara quiqianu. Naajaa, pa Jiyaniijiacujaari saniniuujia cucua na naminiutianiyacujua, naa na miiniuucua janiyatej. <sup>15</sup> Tama quia cuaqueyajaaja quia cojuare maja na miiniuria sesa quiajaniyajuhuj. Nojuajaari pa pohuatasano cuaracashitiya saaja, Pueyaso rupaa ruuretaja na quiniuucua.

<sup>16</sup> Janiya jaara shushajanaa nujuatesaacanu jiyaniijianucua tacojitij, nojori nequesoreenura janiya, majaari quenaaja tamonu Pueyaso pueyajinijinio quiniu quiriquiaa tii, cucuaji na tacunura quenaaja. Puetunu cua cojiniaajanaari cua cartecanu tamajaaja. Naa nojori tarinitianuucua tamajaaja janiyatej, Pueyaso cuara jiyanooria nojori. <sup>17</sup> Naajaa, pa Jiyaniijiaari cua cojiquianuni. Cua cumaquiquianujaariuhuj, nojuajiniji cua pohuata-nura puetunu cuniqui quiniaa Pueyaso niishiyashijiaca pueyajanaa. Pa Jiyaniijiaari cocuaatia cua miiniujiniji juhua nojori juaashiquiajiniji cua jaaquianu, maja nojori monura janiya. <sup>18</sup> Janiyari nocua tiuyani, nojuajaari cua mashiquiniutianiya puetunu sesa casaacuajijianaa. Cua cojuanutaniya-jaariuhuj, pueyaracaanu rishijia cua quiniuria na shuriucua jiyocuacaanu, Jiyaniijiajanaa na quishacari. ¡Jiyanohua maniniaari pa Jiyaniijia! ¡Nojuaja cuara shuquiritiasaaria pueyaracaanu! Cuaara naa quiiriatej.

*Pablo sequesano na naajionee na tucuatasaari*

<sup>19</sup> Quiria quia saruhuatare Prisca, neyaca Aquilano, puetunu Onesíforo pueyajanaajuhuj, na tiajinia quiniaani. <sup>20</sup> Erastoori Corinto tiacajinia jatecanu. Janiyari saniniuujia Trófimo tiujiacanu Mileto tiacajiniani, cusosu na quiniuucua. <sup>21</sup> Cucua quia niniuria quia secoore, shuniya coteyaquishacarijia quia tiuquiniuria cucua. Niya cuata quiniaa parta Pueyaso pueyari cua sequereeni, nojoriria cua saruhuatanura quiajaniya. Nojoriiri Eubulo, Pudente, Lino, Claudiano, puetunu parta Pueyaso pueya maanujuanaano.

<sup>22</sup> Pa Jiyaniijia cuara quioojiajinia quijia quiiria pueyaracaanu. Pueyaso cuara cumaquiiria puetunu niajaniyajanaa.

## PABLO NAAJIONEE TITOCUARA

### *Pablo naajiosacari Titoocuara*

<sup>1</sup> Janiyari Pabloni, Pueyaso seru. Jesucristoori cua jiyaroquiaari na Que Pueyaso saquiriojosano pueya cua tiutiniuria Jesuucua, Pueyaso pueya nojori quiniuria. Cua jiyaroquiaarijiaariuhua Jesuucua tiuuniaa cua niishitiniuria seetanu rupaajanaa Pueyasojiniji, nojori jatanishaanura maninia quijiacara. <sup>2</sup> Nojori tojishacari cuno rupaa, nojoriiri niishiquiaa nojori cutaraari samiitanishaanutaniuhua Pueyaso muerasu nojori quiniuucua, pueyaracaanu quijiaca nojori quiniuria Pueyasota. Cunocujaari tariucua-caanu Pueyaso sequesano, jyanohua tarijiatej, jiya shipinishaacarijiyojua. Nojuajaari maja na naata sapojonu. <sup>3</sup> Quiari naataja, Pueyasoori na rupaa niishitiniu paniquiaari pueya, taa na paniquiaari jiyasohuaja tariucua-caanucujani. Naaratej, pa Jyanoojia Pueyasoori cua jiyatequiaari na rupaa pahuatanarani, pueya cua tiutiniuria nocua. <sup>4</sup> Quiarijiani, quiocuara naajiyanjia Titonaa, juhua cua niyanuniyoyua quia quishacari. Quiaari Pueyaso pueyanora quiquiaari quia tiuushacari Cristojiniji cua pahuatasanoocua, taa cua tiuquiaaricuaani. Naacujitij, paari mariyata nocua tiuujacani. Pa Que Pueyaso, pocuaji Tacuna Jesucristonio, nojori cuara cumaquiiria quiajaniya. Nojori cuara jiitiaara quioojia maninia, shuquiriaatia quia quiniuria pueyaracaanu.

### *Titora Pablo sequesano, Creta jiya tucuaatiajajinia na miishocoriquiano*

<sup>5</sup> Janiyari quia tiujiaquiaari Creta jiya tucuaatiajajiniani, quia tucuatannura cua poonijiosano cureeno. Naaratej, quia sequecanunijia quia jiyatenura jiyaniijianucua, Pueyaso muerasu maapue jiitianaa quiniuria puetunu cuno jiya tiacajiniajanaa, taa cua sequequiaari quiajaniyacujani. <sup>6</sup> Pueyaso pueya jiitariquiano cuara quiiira maninia pueyano, sesa miyashijia, maja pueya pocuanura sesa nojuajiniji. Cuara jiitiaara niquiriyatujua niquiocua. Necohua cuara quiiira Pueyaso muerasujuhuj, maja sesa miijiaca, maja tojiyashijiacajuhuj. <sup>7</sup> Cante Pueyaso muerasu jiitianani, nojuajaari Pueyasora poonijiojua. Naaratej, nojuaja cuara quiiira maninia quijia, sesacasoo, maja tojiyashijia. Cuara quiaquiiria ritia juaajia, mashaasequejojua, piyototaja. Cuara quiaquiiria cumaneeca panijia sesa na miishanota na masenura. <sup>8</sup> Naajuhuj, Pueyaso pueya jiitiana cuara quiiira rucoonaacua taraajeja. Cuara quiiira maninia miijia, maninia niishiriojojua. Cuara quiriajahua seetanujuanaa Pueyaso rootasano tojjia, maja rimiajata maninia miijia. Cuara quiriajahua Pueyaso panijia cutara, tama na cuaqueyajaaja jiitiaja maninia, maja sacuaraatia casaa porocua. <sup>9</sup> Cuara quiiira Pueyaso rupaa tojjia cutara, taa na niishitiojosaaquiaaricujani. Naacujitij, nojuaja na naata pueya cumaquiniu, maninia na niishitiojosanota Pueyaso Rupaa-jiniji. Naacujijihuhuj, nojuaja na naata pueya tacatonuhua Pueyasooocua sesa nojori niishishanojiniji, noo pojori canapuete Pueyaso Rupaa ruureta-jaca quiyacujani.

<sup>10</sup> Naa quia sequereenijia, queraatia tojiyashijia pueya quiniuucua, canapuete juhua niishiyashijia niishitiojoquiaa najuhuaana niishitiojosanocujani. Nojoriiri Pueyaso muerasu sapojiya. Queraatia cuno pojoriiri cuarta Judiocuaca. Nojoriiri pueya niishitiojiya pueya cararaatiuuquia co miatesaanura, taa Moisés niishitiojoquiaari tarijiacuajani, seetanujuanaa Pueyaso muerasu nojori quiniuria

juucua. <sup>11</sup> Nojoriiri queraatia niquiohwaraca pueya jiyajeneteya sesa na niishitiojosanota, puetunu tapueyocuacatajanaa nojori juayonuujutanura. Cuno niishitiojonaa cuaara sanaajasaaria. Nojoriiri niishitiojoquiaa saaja cumaneeca nojori masenura sesa na niishitiojonuunujiniji.

<sup>12</sup> Creta jiya tucuaatiaja pueyajinijinio tamonu shimiacuuri tama na pueyajinijijaaja naa sequequiaaritia: “Creta pueyari pueyaracaanu saaja sapojonuujua. Nojoriiri jiyanojua juaajiaa juhua sayoru. Nojoriiri puera miaquenuujua. Nojoriiri taajecorijuhua”. <sup>13</sup> Seetanujanaari cuno shimiacu sequesano. Nocuaji, jiyanojua quia nacasure nojori, nojori cuaara Pueyaso tojijiaa quiri, maninia quijiaa nojori quiniuria. <sup>14</sup> Quia rootare nojori maja na tojitianura Judiocuaca nareja najuhuana pohuatasano, naajuhua, maja nojori tojiniuria pueya rootasano, canapuee Pueyaso seetanu rupaajanaa tojiyashijiaa quiyacuajani.

<sup>15</sup> Pueyano jaara maninia jiuujiaraca quiri, puetunu casaajanaari maninia quia nera. Saniniuujia, pueyano jaara sesa jiuujiaraca quiri Pueyaso rupaacua tiyashijia na quiniucua, majaari quenaaja niquiriyatu casaa maninia quiniu nera. Na niishitiaari juhua curuutuca, noojiano. <sup>16</sup> Nojoriiri tama na cuaqueyajaaja sequeya: “Pueyaso niishiyanijia”. Naa nojori sequesacaria, najuhuana sequeyari. Nojori miishanojiniji, paari niishiyanijia nojori maja seetanujanaa Pueyaso muerasu. Nojoriiri jiyanojua soosano pueya, puera sesa na quiniucua. Nojoriiri jiyanojua sesa, tojiyashijiaajuhua. Majaari na naata quenaaja maninia miiniu.

## 2

### *Maninia niishitiojosano cutara*

<sup>1</sup> Nocuaji, pueya quia niishitiojore maninia nojori quiniuria taa pa niishitiojosaaquiaaricuaajani. <sup>2</sup> Naaratej, socua saaquiapue quia niishitiojore nojori cuaara quiaquiri miaquejoru, mashaasequejorunio. Nojori cuaara quiri tojishano pueya cutara, maja rerequetesano. Nojori cuaara quiri maninia niishiriojojuaca. Cuaara quiri maninia quijiaajuhua, na tojishacari puetunu Pueyaso niishitiojosanojanaa, na panishacari pueyano. Nojori cuaara quiri juhua maninia rejeretajaca taraatia na miishacari, juhuaajaniya nojori sashishacari pa Jiyaniijia. <sup>3</sup> Naajuhua, socua motaja maajipohua quia niishitiojore nojori quiniuria maninia Pueyaso niquiara pueyaracaanu, maja rimiaacatujuri, maja mashaasequenuujua. Nojori cuaara pueyaracaanu miiria maninia tamasa niquiara, tamasa miiniuria juhua nojori miishanojuhua. <sup>4</sup> Nojori cuaara niishitiojora niyacaraca maajipohua, maninia na paniniuria neyaca, necojuano. <sup>5</sup> Cuno jiyaniyacua cuaara niishitiojora narta maajipohua, maninia niishiriojojuaca nojori quiniuria, saaja neyaca panijiaa nojori quiniuria, maja tamonu caya panijiacara. Nojori cuaara niishitiojosaariajuhua, maninia poonijiojuaca na tiajia nojori quiniuria, caporatujuri nojori quiniuria, neyaca tojitiajano. Nojori cuaara naa miiria, Pueyaso Rupaa mariqui rerequetesareeri.

<sup>6</sup> Naajuhua, mashiquiori quia niishitiojore maninia niishiriojojuaca nojori quiniuria. <sup>7</sup> Puetunu quia miishanojanaa cuaara quiri maninia nojori niquiara, nojori jiaatianura quiojua, juhua quiaajaniya nojori quiniuriajuhua. Quia niishitiojosacari nojori, tama quia cuaqueyajaaja quia cojuare, tama quia niishitiojosanojanaa tojijia quia quiniuria. Majaari puenuujua quia quiniu quia niishitiojosacari. <sup>8</sup> Maninia quia niishitiojore Pueyaso Rupaa, taa quia niishitiojosaaquiaaricuaajani. Naacuajitia, tamasaari maja



na naata ruuretanu quiniutianiya quia niishitiojosano pueya niquiara. Naa maninia quia niishitiojosacaritij, quia niishitiojosano rerequetejacaari caririquniutianiya. Naacujitij, nojoriiri maja tari na naata pocuanu quiniutianiya sesa pajaniyajiniji. Nojoriiri sanaajetanutaniya.

<sup>9</sup> Poonitijosano pueya quia rootare, puetunu na camarucua sequesanojuanaa nojori tojiniuria, na camarucua shuquiritianura nojori. Cuaara quiiria na camarucua panijiaca, maja rihuanejaca. <sup>10</sup> Cuaara nohuaseyaquiiria na camarucua casami. Cuaara quiiria seetanujuanaa maninia miijiaca, pueya niishiniuria pa Jiyanoojia Pueyaso rootasanoori jiyanoohua maninia cutara. Poonitijosano pueya jaara maninia quiriquia, Pueyaso Rupaari juhua maniniushitishano quiya tamasaca niquiara.

<sup>11</sup> Paacuajaari niishiyani Pueyasoori jiyanoohua jiyanoojia seetanujuaanaa, Jesu cusuucua puetunu pueyacuarajanaa, sesa pa miishanojiniji pa jiyanooshaanura. <sup>12</sup> Pueyaso jiyanooshacari pajaniya, cunoori pa niishitiojiya pa cartenura puetunu sesa pa miishanojuanaa, maja mijiria casaacua pa jiaatianura sacuaraatiajuhuaj. Naajuhuj, Pueyaso jiyanooniucua pajaniya, cunoori pa shiniujiya maninia niishiriojojuaca pa quiniuria mijiria pa quishacarijia, maninia miijiaca juhuaj, Pueyaso tojijiano pa paniniutia nojuaja. <sup>13</sup> Naa Pueyaso jiyanooshacari pajaniya na muerasu pa quiniuriatej, cunora paari na sequesanoocua tiuquuaajujuaj. Nojuacuajaari pa sequequiaari pa Pueyaso Cristoori pocua muetanutaniuhua, shacantuuca na cumaacajinia. Naacujitij, paari shuquiriaatia sashiya pa Jiyanoni. <sup>14</sup> Nojuajaari tama na cuaqueyajaaja panitiaquiaari pocuara, sesa pa jiiitishano casaacua na tarinitiniuria pajaniya. Pocuara cusoquiaariiri poojia seque jeequesano quiniuria puetunu sesa pa quiniujinijijianaa. Naa miiquiaariiri saaja tama na pueyarajaaja pa quiniuria, jiyanoohua maninia miiniucua jiaatiajaca pa quiniuriajuhuaj.

<sup>15</sup> Naa quia niishitiojore pueya Titonaa. Pueyaso pueya quia niishitiojore, quia shiniujiuri, quia nacasure. Naa quia cumaquiniuria nojoritij, quia cumaaca quia paaretare juhua cutara jiyaniijia, tojishano pueyano quia quiniuria. Saaja maninia quia miiriquia pueyaracaanu, tamonu mariqui quia rerequetereri.

### 3

#### *Maninia rootasano Pueyaso pueyara*

<sup>1</sup> Quia pueya quia niishitiojorohua jiya jiyaniijia tojijiaca nojori quiniuria, jiyaniijianucua na jiyatesano pueya nojori tojiniuriajuhuaj. Nojori cuaara cuno pojori naacutaara jaara sequesaaare maninia casaa nojori miiniuria.

<sup>2</sup> Pueya quia niishitiojore nojori cuaara pueya sesacaashijiaca quiiriajuhuaj. Nojori cuaara quiiria juhuajaniya quijiaca, maja juaajiaca. Cuaara quiiria jiyanoojiaca. Cuaara maninia niquiiria puetunu pueyajanaa, juhua socua maninia pueya nojorijiniji, maja rimiajata na miiniuria tamasaca.

<sup>3</sup> Tarijia, paari mariyata mosanucua quiquiaarini, Pueyaso tojiyashijianio. Paari juhua tashucuaano quiquiaarini, sapojosano pa quishacari. Paari sesa miiniucua jiiitiquiaarini. Majaari pa naata sesa pa miiniu tarinitianu quiquiaari. Paari pueyaracaanu shuquiriaatia quiniucua jiaatiajaca quiquiaarini sesa pa niishishanota. Paari sesa miijiaca quiquiaarini. Paari tamasaca jiiitiasanoocua jiaatiajaca quiquiaarini, juhua nojori pa quiniuriajuhuaj. Paari pueya soosano quijiaca quiquiaarini. Paari niquitioojuaca quiquiaarini. <sup>4</sup> Naajaa, pa Jiyanoojia Pueyaso cutaraari maninia miiquiaari pajaniya. Naacujitij, paari niishitishaquiaarini taa Pueyaso



paniya puetunu pueyajanaani, na jiyaronuucua Neyanuniyojua pocuara na cusonura. <sup>5</sup> Na muerasura pa jiyatequiaariiri saaja pocua na taraajesacari, maninia miyashijia pa quishacarijia. Sesa miyashijiacara na Sohuanuta pa jataniquiaariiri, na Sohuanu jeequesacari poojia, maninia jiuujiaraca pa quiniuria. Pueyaso Sohuanuuri pa jataniquiaa juhua quiarinio pueya pa quiniuria. <sup>6</sup> Pocuaji Tacuna Jesucristo miiniuucua maninia, Pueyasoori jiyanohua queraatia na Sohuanu niqutioquiaari pajaniya. Juhua pocua totasaareeri na Sohuanu. Maja shiitaniyojua quenaaja. <sup>7</sup> Naacuajitij, pa jiyatereeri maninia quijiaca pa quiniuria na jiyanooshacari pajaniya. Naa pa jiyatequiaariiri na muerasu pa quiniuria, pa masenura puetunu na jiiiasanojuanaa puera, jiyocuacaanu na racatasano. Naaratej, paari juhuajaniya sashiquiaani, pa niishishacari paari pueyaracaanu quijiaca quiniutianiya natani.

<sup>8</sup> Nio cua sequesanoori seetanu rupaajanaa. Nio rupaata quia nacasure Pueyaso tojitiajaca puetunu quioojiatajanaa, nojori cuaara niishiriojora, maninia nojori miiniuria pueyaracaanu. Nio rootasanoori jiyanohua maninia. Maninia cutaraari puetunu pueya cumaquitiajarajanaa. <sup>9</sup> Maja cutaraari quia rupuenu cuno pueya, noo pojori canapuate najuhuaana nacojoquiaani, naajuhuj, noo pojori canapuate pueyaracaanu na supuetanaa sesaca serojoquiaa najuhuanani, juhua pueya shocotajaca nojori quiniuria. Naajuhuj, maja quia rupuenu noo pojori canapuate juaatioquiaani, canapuate tariucuacaanu Moisés Rootasanoocua juayonuutaquiaacuajani. Puetunu cuno nojori niishishanojuanaari najuhuanaj. Majaari na naacunu nojori.

<sup>10</sup> Quia piriyojore cuno, cante Pueyaso muerasu maanu raquirijitiaani, capa na niishitiojosanota najuhuanaj. Nojuaja jaara quia tojiyaquiri coteenu quia sequesacari nojuaja, quiocua socua na camiriohua piriyojonu. Jaara tojiyaquiri quiajaniya jiyacaritij, nojuaja cuaara quiiriaqui juhua taanusano.

<sup>11</sup> Naa na tojiyaquishacari quiajaniyatej, quiocua niishiri cuno pueyano tari seseree. Tama sesa na miishanojuaarjia juhua nocuara saquiriojotaa.

#### *Pablo sequesano Titora*

<sup>12</sup> Janiya jaara Artemas jiyarore quiocuani, jiyanohua quia saniniujiuri cucua quia niniuria Nicópolis tiacajinia. Janiyari quiniqui shuniya tajitiniu paniani. Janiya jaara Artemas jiyaroyaquri quiocuani, janiyari Tíquico jiyaronutaniya quiocuani. <sup>13</sup> Zenas, Apoloori quiocua tiuquiniutianiya. Nojori quia naacutare quia jiiiasanota, nojori jiiitanura puetunu na panishanojuanaa nojori quianu panishacari quia quiijajiniji. Zenasri pueyacuaji tacuna pueya nequesoreena.

<sup>14</sup> Parta Pueyaso muerasu cuaara niishiiria maninia miijiaca nojori quiniuriajuhuaj, maja najuhuaana quijiaca na quiniuria. Maninia cutaraari nojori naacutanura na panishano jiiitiaashijia.

#### *Naajionee puequesacari saruhuatasano*

<sup>15</sup> Puetunu cuata quiniaajanaari cua sequeya cua saruhuatanura quiajaniya. Canaara quia saruhuatare parta Pueyaso muerasujuhuj, canapuate canaa panijiacacuajani. Pueyaso cuaara cumaquiiria puetunu niajaniyanaa. Cuaara naa quiiriatej. Tariucuaja Titonaa.

## PABLO NAAJIONEE FILEMÓN CUARA

### *Pablo saruhuatascari Filemón*

<sup>1</sup> ¿Quiaate quiyajaa canaa panishano Filemónnaa? Janiyari Pablóni. Quiasano pueyanonijia, Jesucristojiniji cua pohuatanuucua. Janiyari parta Pueyaso pueyano Timoteota nio naajiya quiarani, jaarajaaja pa Jiyaniijiaara poonijiona quia quiniuucua. <sup>2</sup> Canaara quia saruhuatate pa rimiatucua Apia, Arquiponio, jaarajaaja pa Jiyaniijiajiniji pohuatanani. Canaara quia saruhuatatejuhua parta Pueyaso pueya maanu, noo pojori, quia tiajinia rerejoquiaa Pueyaso secojonuunuratej. <sup>3</sup> Pa Que Pueyaso, pa Jiyaniijia Jesucristonio, nojori cuara cumaquiiria niajaniya, jiyanoojiaca nojori quiniuucua. Nojori cuara cajitiiria nioojiajuhuj, juhujaniya nia quiniuria.

### *Filemón paniniujiniji pohuatasano, Pueyasoocua na tiuuniujinijinio*

<sup>4</sup> Pueyaso cua secojosacari, janiyari quia seera pueyaracaanu Pueyaso sequequiaani, “paacarasho”. <sup>5</sup> Janiyari naa sequequiaa Pueyasoni, quia-janiyajiniji cua tojinuucua taa quia paniquiaa pa Jiyaniijia Jesuni, puetunu na pueyajanaanio. Quiaanaari seetanujuanaa pa Jiyaniijiaacua tiuujia. Janiyari cunora quia timitiaani. <sup>6</sup> Janiyari quiocuara secojoquiaani, seetanujuanaa quiarta Pueyaso pueya jiyanoojia quia quiniuria, nojoriicua quia taraajenura. Naacuajitij, nojori quia cumaquishacari, quiaari maatia niishiniutianiya puetunu quioojiajinia quia jiiitasanojuanaa Jesucristojiniji, Jesucristoocua tiuujia quia quiniuucua. <sup>7</sup> Parta Pueyaso pueya panijia quia quiniuucua, quiaanaari nojori cumanijiacanu, nojoriicua quia taraajesacari. Naa cua niishishacari quia miishanojinijitij, janiyari coojia cumanijiacanujuhuj. Cunora, shuquiriaatia quiyaniija.

### *Pablo sequesacari Filemón, nojuaja jiyanooniuhuara tama na seru Onésimojuaja*

<sup>8</sup> Jesucristo jiyaramiquishano pueyano cua quiniuucua, cua naata sequenu quiajaniya quia miiniuria cua sequesano. <sup>9</sup> Naajaa, majaari cua sequenu paniniu quiajaniya juhua quia jiyaniijia. Saniniuujia, panijia quia quiniuucua, janiyari quia sequenu paniani quia miiniuria nio cua sequesano quiaritia. Jesucristojiniji cua pohuatanuucua, janiyari quiaritia moronucua quiyani tariucua saaquiano. Naajaa, quia rupuena Pablo cua quiniuucua, cua tojiri Filemónnaa. <sup>10</sup> Cucua quia taraajere quenaaja. Quia nenecojiyanijia cua niyanuniyojua Onésimoocua. Nojuajaari seetanujuanaa juhua quiyanura quiariucuaa Jesucristoocua na tiuuniuucua, na tojishacari cua pohuatasano Jesucristojiniji, moronucua cua quishacari.

<sup>11</sup> Tariija, Onésimoori sesa seru quiquiaari quiara. Quiaritia saniniuujia, nojuajaari na naata maninia quiniu quiara, taa quiria na quiyacuaani. <sup>12</sup> Janiyari quiaritia quiocua jiyaroya quiyanuni. Quiocua na maserohua quia timiniutia, taa quia masequiaa janiyacuaani. <sup>13</sup> Moronucua cua quishacari Jesucristo rupaa cua pohuatanuucua, janiyari niyaja na jiyojetenu paniriquiaa juucuaani, na naacunura janiya quia niti. <sup>14</sup> Naajaa, majaari naa cua miiniu paniniu quiriquiaa jiyasohuaja, coteenu cua nequesotaaquishacari quiajaniya. Janiya jaara quia sequereni janiya niya na jiiitianutianiya na naacunura janiyani, quiaa maara cua ruuretaaquiri. Naajaa, janiyari seetanujuanaa saaja quia panishano miiniu paniani. Cunora,

janiyari na jiyaroya quiocuani. <sup>15</sup> Onésimo jiyoteeri quiocuaji rupatecanu rupaquiriaja, quiaritia quiara na quiniuhuara pueyaracaanu cutara. <sup>16</sup> Quiaritiajani, nojuaja naasucuaari socua quia panishano pueyano quiniutianiya serujiniji, seetanujuanaa quia tarajanu na quiniuucua quiaritiajani, Jesuucua tiuujia na quishacarijihuaj. Nojuajaari jiyanohua cua panishano parta Pueyaso pueyano. Naajaa, quiaa cuara jiyanohua na panijia quiiria socua janiyajiniji, maja juhua nareja quia panishano seru. Seetanujuanaa nojuaja quia paniri cutara, quiarta Pueyaso pueyano na quiniuucua.

<sup>17</sup> Naacuaajitij, janiya jaara seetanujuanaa quiarta Pueyaso pueyano quiariquiarani, Onésimo tiuquishacari quiocua, nojuaja quia miiri maninia, taa quia miiquiaacuaa janiyani. <sup>18</sup> Onésimo jaara sesa miiquiaari quiajaniya, jaara quia casaa nohuasequiaarijihuaj, nojuaja quia jiyanoori. Saniniuujia cucua quia tiutiare puetunu sesa na miishanojuanaa quiajaniya. <sup>19</sup> Janiyacua saniniuujia cua cumaneecajiniji quia niqutioreni puetunu sesa na miishanojinijianaa quiajaniya. Janiyari Pablóni. Janiyari tama cua juaashiquiatajaaja nio naajiyani, cua sequesanoocua quia tiuniuria. Janiyari quia niishitiniu paniyajuhuaaj, Jesucristojiniji cua pohuatasanoocua quia tiuushacari, quiaacuajaari pueyaracaanu quiijara jatanishaaquiara. Naacuaajitij, cua naata sequenu quiajaniya, cua serura quia quiniuriajuhuaj. Naajaa, janiyari saaja quia sequeyani Onésimoocua quia taraajenura. <sup>20</sup> Naa quiiria quia miiri quenaaja, mariyata Jesuucua tiuujia pa quiniuucua, cua panishano Filemónnaa. Quiaa jaara Onésimo jiyanoori, Cristo panijia quia quiniuucua, quiaari seetanujuanaa coojia cumanijianutianiya.

<sup>21</sup> Janiyari naa quiocuara naajiyani, cua niishishacari quiaacuajaari cua sequesano miiniutianiya. Janiyari niishiyajaanihuaj, quiaari socua maninia na miiniutianiya cua sequesanojiniji. <sup>22</sup> Naajuhuaaj, janiyari juhuacarijia quia sequeyani, cua maquejara quia jeenucuare cucuaji quia tiajinia. Naa pueyaracaanu cucuara nia secojosacari Pueyaso niiquiji cua cartesaanuratej, nojuajaruhua niaacua cua tiuquitiniutianiya, niaata cua quiniuria.

*Pablo sequesano na naajio na tucuatasaari*

<sup>23</sup> Epafrasri cua sequeree cua saruhuatanura niajaniya. Nojuajaari cuarta moronucuaajuhuaaj, Jesucristojiniji canaa pohuatanuucua. <sup>24</sup> Jaarajaaja cuata Jesucristojiniji pohuataanaa pueyari nia saruhuataajuhuaaj. Nojoriiri Marco, Aristarco, Demas, Lucasnio.

<sup>25</sup> Pa Jiyaniijia Jesucristo cuara cumaquiiria niajaniya.

## HEBREO PUEYACUARA NAAJIONEE

### *Pueyasoori pajaniyara na rupaa pohuataniquiaari Neyanujiniji*

<sup>1</sup> Tariucuacaanu, Pueyasoori pueyaracaanu na sequenu panishano caminiujiuniaa pueya poojotaniquiaari pa supuetanaara. Nojuajaari nojuajiniji caminiujiuniaa miijiotequiaari queraatia tamaatia casaa, nojori na niishitiniuria casaa nojuaja sequenu paniriquiaa nojorini. <sup>2</sup> Quiari naataja saniniuujia, Pueyasoori tama Neyanujuaaja pohuataniquiaari na sequenu panishano pajaniyara. Nio Neyanu shipinitiquiaari puetunu casaajanaacuajaari; nio jiya, jiya cajiniocuajuhuaaj, puetunu pa niquiyaquishoo casaajanaanio. Naajuhuaaj, Pueyasoori Neyanu jiyatequiaari puetunu tama na shipinishanojuanaa jiiitiana quiriquiano. <sup>3</sup> Neyanuuri tojetaarucuajanaa maninia, juhua na Quejuhuaaj, juhua na Que niquishanojuhuaaj. Naacuajitij, nojuajaari jiyanojuaa shacantuuca cumaacaracajuhuaaj. Naacuajitij, nojuajaari puetunu na shipinijosano casaajanaa rucuanetequiaa maninia, saa na rupaa cumaacataja. Nojuaja jaara cusoquiaari puetunu sesa pa miishanojuanaa na tuujunura, na nuhuaaj, jiyocuacaanu tacaquiaariuhuari, na Que Pueyaso miaquetajara na cajiniuria Jiyaniijiajanaa quiquiojinia.

### *Pueyaso Niyanuuri Jiyaniijiajanaa cutara Pueyaso seyajiniji*

<sup>4</sup> Naacuajitij, Pueyaso Niyanuuri Jiyaniijiarajanaa quiquiaari Pueyaso seyajiniji. Nojuajaari na Que sesaanucua. <sup>5</sup> ¿Pueyasoteeri quenaaja tamonu na seyajinijinio sequequiaari: “Nioori cua Niyanu”? ¡Maja! Neyanu sequequiaari cutaraari:

“Quiaari quiyanu. Janiyari pueyanora quia muerateree jiyacuani, cua saquiriojosano pueya Jiyaniijia quia quiniuria”.

Neyanujiniji sequequiaarijiaariuhuaaj:

“Nera, janiyari na Queni. Quiria saniniuujia, nojuajaari quiyanu”.

Pueyasoori maja quenaaja niquiriyatu na seyajinijinio naa na sequenu quiquiaari. <sup>6</sup> Tariucuacaanu Pueyaso Rupaajinia, naa naajiotasaaquiaariiri casaa Pueyaso sequenutaniyani, Neyanu na tiuquitishacariuhua mijiria, Jiyaniijiajanaa na quiniuria:

“Puetunu cua seyajanaa cuaara Quiyanu tojitiaara, Jiyaniijiajanaa na quini-uucua”.

<sup>7</sup> Pueyaso seyajiniji saniniuujia, naa naajiotasano quiyari tariucuacaanu Pueyaso Rupaajinia:

“Pueyasoori na seya jataniquiaa juhua paratura, juhua maniriano, na panishano nojori miiniuria”.

<sup>8</sup> Neyanu sequeya saniniuujia:

“Quiyanunaa, quiaacuajaari Pueyasojuhuanajaj. Quiaari Jiyaniijia. Quiaari naa quiniutianiya pueyaracaanutej. Quiaari cumaacaracajuhuaaj, maninia quia jiiitiana puetunu pueyajanaa. <sup>9</sup> Quiaari maninia miiniu porocua. Quiaari sesa miiniu soojea saniniuujia. Cunora, Pueyasonaa, janiyari quia jiyatequiaari Jiyaniijiajanaa quia quiniuriani, quia Jiyaniijia cua quiniuucua. Janiyari quia jiyatequiaarijuhua socua shuquiriaatia quijia quia quiniuria puetunu quia cojiniaajinijianaa”.

<sup>10</sup> Pueyasoori naa sequequiaari Neyanujuhuaaj:

“Jiyaniijianaa, quiaacuajaari coteenujuanaa casaa shipinijia. Quiaari jiya shipiniquiaari, puetunu jiya cajiniocua niquishano casaajanaanio. <sup>11</sup> Puetunu quia shipinishanojuanaari shaajeriquianohua. Quiajaniya saniniuujia, quiaari pueyaracaanu quiriquiano cutara. Puetunu quia shipinishano casaajanaari tariucuashiriquiano juhua toqueja. <sup>12</sup> Naa na tariucuashishacaritij, quiaari juhua toque mocua na jiunio-coriquiano, quia jatasocoriquiano. Quiaari naa miiniutianiyaquij taa pueyano jocuaquiaacuaa na toque mocuacuaani, quiariqui toque na cushiniuria saniniuujia. Quiajaniya saniniuujia, majaari quia jatanu quiniutianiya tamaatiara. Quia quiniuuri maja puequeriquiano”.

<sup>13</sup> Pueyasoori Neyanu sequequiaarijiuhuj:

“Miji, cua miaquetajara quia cajishii, janiya jaara quia paraa shocojotare puetunujuanaajaatijia, maja quenaaja niquiriyatu cureenura na mi-ananajonura quiajaniya”.

Majaari naa Pueyaso sequenu quiquiaari quenaaja niquiriyatu na seyajini-jinio. <sup>14</sup> Puetunu nojorijianaacuajaari Pueyasora poonijionaa. Pueyasoori nojori jiyaramiquiquiaa Jesuucua tiuuriquiano pueya nojori cojuanura.

## 2

### *Maja cumaati Jesucristo tojiyashijiacara pa quiniu*

<sup>1</sup> Naaratej, Jesucristojiniji pa tojishano tojiijaca pa quiriquia socua, paa mariqui Pueyasoo cuaji rupatereeri. <sup>2</sup> Tariucuacaanu, Pueyaso seya camini-ujiushano Pueyaso rootasano pueyarani, cuno rootasanoori seetanujuanaa pueya tojishocoriquiano cutara. Cuno rootasano ruuretajaca, na miyashijiacajuhuj, nojoriiri saniitiosaaquiaari. <sup>3</sup> Pueyaso seya caminiujiushano tojiyashijiacara jaara saniitiosaaquiaaricuaa, ¿paateeri jiyaniyani Pueyaso pa jiyanooniutianiya juhuajaniya Neyanu rupaa tojiyashijiacara pa quishacari? ¡Maja! Cuno rupaa nocua pa tiuushano pa jiyanooshaanurani, cunoori pa Jiyaniijianaa pohuatasano. Pa Jiyaniijia nuhuaji, cuno pojori, canapue te pa Jiyaniijianaa tojiquiaari pueyaracaanuni, nojoriiri saniniuujia cuno rupaa caminiujiuquiaari pajaniyara. Canaa sequetuquiaariiri nojori tojishanoori seetanu rupajaanaa. <sup>4</sup> Naajuhuj, nojori pohuatasacari Jesucristojiniji, Pueyasoori nojori miitiquiaari jiyajeneta casaa jyanohua na cumaacata, maatia pueya niishiniuria nojori pohuatasanoori seetanujuanaa. Pueyari cunora jyanohua shiriiquitiuquiaari queraatia Pueyaso cumaacata miishano nojori niquishacari. Naajuhuj, Pueyasoori Jesuucua tiuujia niqutioquiaa na Sohuanu, maatia pa miiniuria na cumaacata, taa na paniyacuajani. Cunora, paa cumaati seetanujuanaa Pueyaso rupaa Jesucristojiniji tojitiajaca quiyani.

### *Jesucristo mijiria rasaanquiaari pa puerana na quiniuria*

<sup>5</sup> Cuno quiarinio jiyaranojiniji teyano pa sequeriquiaacuajani, Pueyasoori maja na seya na jiyatenu quiquiaari cuno quiarinio jiya jiyaniijianucuarano nojori quiniuria. <sup>6</sup> Naajaa, tariucuacaanu Pueyaso Rupajinia naa naajio-tasaaquiaariiri pueyano nequesotasano Pueyaso:

“Pueyasonaa, ¿casaateeri pueyanoni, nocua quia niishiriojonurani? ¿Casaara quia taraajeya pueyacuani? <sup>7</sup> Quiaacuajaari na shipiniquiaari rupaguijara socua cumaacaju na quiniuria quia seyajiniji. Naajaa, quiaari na jiyatequiaari jiyaniijia na quiniuria, cumaacaraca quijia na quiniuriajuhuaj. <sup>8</sup> Quiaari na sequequiaari puetunu quia shipinishano casaajanaa jiyaniijia na quiniuria”.

Naa Pueyaso sequesacari pueyanotej, puetunu na shipinishano casaajanaa jiyaniijia na quiniuriatej, naacuaajitij, majaari quenaaja niquiriyatu casaa cureenu quiniutianiya na jiiitasoo. Saniniuujia, paacuaajaari niishiyani, pueyanoori juhuanojuaja maja seetanujuanaa cumaacaraca na quiniu puetunu casaajanaa na tojitiniuria tama nojuajaaja. <sup>9</sup> ¿Jesuurijataj? Pueyano na quiniuria, na Que Pueyasoori rupaquijiara na miiquiaari socua cumaa-caaju na quiniuria na seyajiniji. Naacuaajitij, pueyano na quishacari, Pueyaso taraajenuucua puetunu pueyacuaajanaa, Neyanuuri mosaaquiaari pocuara. Naa na cusonuucua pocuaratej, Pueyasoori na jiyatequiaari Jiyaniijiajanaa na quiniuria, jiyanohua cumaacaraca na quiniuriajuhuaj.

<sup>10</sup> Jamueyashijia Pueyaso quiniuucua, nojuajaari puetunu na muerasuranojuanaa panitiaquiaari na cojiniaa nojori quiniuria. Paniquiaari-iri jatiqui nata shuquiriaatia pa quiniuria, puetunu tama nerajaaja na shipinishano casaatajanaajuhuj. Jeenucuasano pa quiniuria pa cojinuria Pueyaso, nojuajaari jiyanohua maninia miiquiaari pocuara, Neyanu na miitishacari naquiya pa niti. Naacuaajitij, Neyanuuri tojetaarucua-janaa maninia quiquiaari Pueyaso muerasuranoocuaaji Tacuna na quiniuria. <sup>11</sup> Jesucristo jeequenuucua pajaniya sesa pa miishanojiniji, jatanishano pueya pa quiniuria, paari cunora seetanujuanaa Pueyaso muerasuni. Naacuaajitij, Pueyasoori pa Que, taa pocuaji Tacuna Que na quiyacuaani. Cunora, Jesucristoori maja na caririquiniu na Que na sequenura pajaniyajiniji, “cua tapueyocuacata”. <sup>12</sup> Tariucuacaanu Pueyaso Rupaajinia naa naajiotasano quiyacuajaari na sequesano na Que:

“Cua Quena, janiyari cua tapueyocuaca pohuatanutaniyani taamuecate quiajaniyani. Janiyari quia saquiriojosano pueya niqiara quia jaaquequejotanutaniyani cua shuquiritasacari quiajaniya”.

<sup>13</sup> Tamaqui, Jesu sequesanoori naa naajiotasano quiyajuhuj:

“Janiyari cua Queecua tiuujia quiniutaniyani”.

Naacuaajitij, mijiria na quishacari, Jesuuri na Que Pueyasooocua tiuquiar-icuaa taa pa tiuquiaa nocuanijia. Socua naa naajiotasano quiyari tamaqui taa Jesu sequenutaniyani, jiyocuacaanu na tiuquitasacari pajaniya na shuquiriniutia:

“Nio pojoriiri cua Que jiyatesano cua tapueyocuacara, nojori tojitianuucua janiya”.

<sup>14</sup> Cuaqueyaraca pa quiniuucua, Sesaacaari cumaacaraca quiquiaari na shaajanura pajaniya, Pueyaso tojitiaashijiaca pa quiniuucua. Naaratej, Jesuuri cuaqueyaraca na quiniuria jataquiaarijuhuaj, taa pajaniyacuaani. Naacuaajitij, nojuajaari na naata mosaanu quiquiaari pa niti. Naacuaajitij, nojuajaari Sesaaca jaariutiaquiaari pajaniya. <sup>15</sup> Naacuaajitij, nojuajaari juhuajaniya quijiacara jiyatequiaari pajaniya, nocua pa tiuuniuucua. Paari niishiyacuajani, pa cusosacari, paari pa Jiyaniijata quiniuria quianutaniyani. Cunora, majaari tari pa puerenu pa cusonura. Nocua tiuyashijiaca pueyari seetanujuanaa cusonu puerejaca cutara. <sup>16</sup> Seetanujuanaa, majaari Jesucristo niniu quiquiaari Pueyaso seya na naacunura. Niquiaari cutaraari pueyacuaaji na tacunura, noo pojoriicua, nocua tiuujiacate taa supuetana Abraham quiquiaari Pueyasooocua tiuujiacuaani. <sup>17</sup> Maninia pa naacuna na quiniuria, Jesucristoori puetunu naquiya miiniujuanaa rejeretaquiaari mariyata taa narta pueya miishaaquiaacuaani. Naacuaajitij, nojuajaari pocua taraajeja, pocuaji na tacunura Pueyaso. Taraatia pa miiniu niishijia na quiniuucua, pa naata nocua tiuuniu pueyaracaanu na Que Pueyaso na jiyanootiniuria pajaniya, sesa pa miishanojiniji. Na cusonuucua, naacuaajiti Pueyasoori na naata pa jiyanooniu puetunu sesa pa



miishanojinijijianaa. <sup>18</sup> Mijiria na quishacari, nojuajaari pueyaracaanu taraatia miishaaquiaari. Nojuajaari jiyano hua saniniujiushaaquiaari sesa na miiniuria juucua juhua j. Naacua j itij, nojuacua jaari jiyano hua niishijia na cumaquiniuria pajaniya, paa jaara sesa miiniuria saniniujiushaariquiani, paa jaara taraatia miishaariquia juhua j.

### 3

#### *Jesucristo cutaraari Jiyaniijajanaa Moisésjiniji*

<sup>1</sup> Cuarta Pueyaso pueyanaa, niaacua jaari Pueyaso saquiriojosano tama na pueyajaaja nia quiniuria. Nojuajaari Neyanu Jesu jiyaroquiaari na rupaa na niishitiniuria pajaniya, Pueyaso pueyara pa jatanishaanura. Neyanuuri na jiyano otijia pajaniya, nocua pa tiuushacari. Cunora, jacaria pa niishiriojore socua Jesucristojiniji. <sup>2</sup> Mijiria na quishacari, Jesuuri na Jiyarona tojjia quiquiaari pueyaracaanu, taa Moisés quiquiaari Pueyaso tojjiacuaani, Israel pueya j itiana na quishacari. <sup>3</sup> Naajaa, Jesucristo cutaraari Jiyaniijajanaa Moisésjiniji. Moisésri saaja narta Pueyaso pueyajinijinio pueyano quiquiaari. Saniniuujia, Jesucristoori puetunu Pueyaso pueyajanaa shipininia cutara. Naaratej, Jesucristo cuara tojishaaria socua cutara. <sup>4</sup> Puetunu pueyapuejanaari supuetanaaraca. Naajaa, Pueyasojuanaari nojori shipininia seetanujuanaa. <sup>5</sup> Naacua j itij, Moisésri pueyaracaanu Pueyaso sequesano caminiujiuquiaari Pueyaso saquiriojosano narta Pueyaso pueyara, maninia Pueyaso seru na quiniucua. <sup>6</sup> Saniniuujia, Jesucristoori Pueyaso Niyanujuanaa cutara. Nojuajaari Pueyaso saquiriojosano pueya Jiyaniijajanaa. Nojuajaari nojori j itiaa saa maniniaja, taa na Que paniyacuajani. Naaratej, majaari pa cartenu Jesucristo rupaa. Paa jaara Jesucristoocua tiuquiaani, naajuhua j, paa jaara shuquiriaatia na sashiquiaa na rijionura pajaniyani, naacua j itij, paari niishiyani paari seetanujuanaa Pueyaso muera-suni.

#### *Pueyasoori na pueya samaraataja*

<sup>7</sup> Pueyaso pueya pa quishacari, Pueyaso Sohuanu sequesano pa tojiri, maja pa rupatenura Pueyaso Rupaacuaji. Na sequesanoori naa naajiotasano quiya tariucuaaanu Pueyaso Rupaajinia pajaniyarajuhua j:

“Pueyanaa, niaa jaara quiaritia tojiri quia Pueyaso sequesano niajaniya, majaari na sequesano ruuretajaca nia quiniu. <sup>8</sup> Majaari naa nia quiniu taa nia supuetanaa quiquiaaricuaani, cariiquia jiyajinia nojori camarucuneejotasacari pueyaracaanu. Nojoriiri Pueyaso juaatijiojuaca quiquiaari, pueyaracaanu na tojiyashijiaca nojori quishacari. <sup>9</sup> Nojoricua jaari pueyaracaanu cua cumaacata cua miiijosano niquitiquiaari. Cuarenta mariijaari shocojoquiaari, pueyaracaanu jiyajeneta casaa cua miiijosacari cua cumaacata, maninia cua j itiasacari nojori. Naajaa, nia supuetanaari cua juaatijioquiaari, pueyaracaanu nojori taacanuusacari cucuaji. <sup>10</sup> Janiyari cunora seetanujuanaa juaaquiaari puetunu cuno pojoritajanaani. Naaratej, janiyari sequequiaarini: ‘Nojoriiri juhua cucuaji tashuquioono rucoojiya tamaajaaja. Nojoriiri cua niishitiojosano ruuretaquiaa saaja’. <sup>11</sup> Janiyari cunora jiyano hua cua juaaniutia naa sequequiaarini: ‘Majaari nojori rupuenu quiniutianiya janiya, shuquiriaatia cua quishaqui, cua samaraatanura nojori, pueyaracaanu shuquiriaatia quiijaca nojori quiniuria cuata’ ”.

<sup>12</sup> Naarate cuarta Pueyaso pueyanaa, tama nia cuaqueyajaaja nia cojuare jiyanoohua, niaa mariqui Pueyaso Rupaacua tiuyashijiacara quiriohuari, Pueyasocuaaji nia rupatenura puetunujuanaa. Pa Pueyasocuaajaari quiijajuhuanajaj. Nojuajaari na tojiyashijiaca saniitiojua. <sup>13</sup> Cunora, seetanujuanaa Pueyaso Rupaa tojitiajaca nia quiniuria, puetunu juucanjanaa nia shiniujiutiooriquia pueyaracaanu. Naa nia miiriquia nio pa quishacari Pueyaso jiyanooni puequeyaquishacarijia taa na Rupaa sequeyacuaajani. Naa nia shiniujiutiooriquiatej nia jiitiyaquiniucuaaji sesa miiniuria. Saniniuujia, niaa jaara sesa miijiaca quiriquia, tama sesa nia miiniujiaarijia nia sapojonutaniya Pueyaso tojiyashijiacara nia jatanuhuara. <sup>14</sup> Jesucristoocua pa tiuuniucua, paari na cojiniaara jiyatesanoni. Naacuajitij, puetunu na jiiatasanojuanaari puera quiriquianojuhuaj, paa jaara nocua tiuquuaa pueyaracaanuni, taa shushajanaa seetanujuanaa nocua tiuujia pa quiriquiaacuajani.

<sup>15</sup> Cunora, naa naajiotasano quiyari tariucuacaanu Pueyaso Rupaajinia: “Pueyanaa, niaa jaara quiarjia tojiriquia Pueyaso sequesano nijaniya, majaari na sequesano rejetejaca nia quiniu, taa nia supuetanaa quiquiaaricuaani. Nojoriiri Pueyaso juaatijiojuaca quiquiaari, pueyaracaanu na tojitiaashijiaca nojori quishacari”.

<sup>16</sup> ¿Canapueteeri cuno pojorini, Pueyaso tojitiaashijiacani? ¿Secaja pueyatee? Maja. Puetunu noo pojoricuajaari Egipto jiyajiniji Moisés mashiquishano pueyatej. Nojorijianaacuajaari Pueyaso tojiquiaari pocuaano. Naajaa, nojoriiri saaja na ruuretajaca quiquiaari. <sup>17</sup> Nia niishiritioj, ¿canapuate cuno pojorini, Pueyaso juaatijioquiaarini, pueyaracaanu nojori camarucuneejotasacari cariquia jiyajiniani? Noo pojoricuajani sesa miijiacatej. Nojoriiri cunora cusonuquiaari nojori quiojosacari nucuaco cariquia jiyaco. Na cusonusaquijia jamojosaaquiaariiri. <sup>18</sup> Nia niishirijuhuj, ¿canapue naa Pueyaso sequequiaari seetanujuanaa na juaaniutiani: “Majaari nia tiuquitianu quiniutianiya niaarano cua niqutionu panishano jiyajinia, tii juhuajaniya shuquiriaatia nia quiniuria cuata”? Puetunu Pueyaso tojitiaashijiacajanaacuajaari naa sequesaaquiaaritij. <sup>19</sup> Naacuajitij, paacuajaari quiarjia maatia niishiyani, Pueyasocua tiuyashijiaca nojori quiniucua, majaari nojori tiuquitianu quiquiaari Pueyaso niqutionu panishano jiyajinia.

## 4

<sup>1</sup> Pueyasocuaajaari pa masuyajaa panaatia pa quiniuria nata. Cunora, jiyanoohua pa cojuare tama pa cuaqueyajaaja Pueyaso sequesanoocua pa tiuuniuria, tamonu pajaniyajinijinio mariqui jiyanoyaquishaareeri. Na sequesanoocua tiuyashijiacaari maja na rupuenu quiniutianiya Pueyaso, shuquiriaatia na quiniuria Pueyasota. <sup>2</sup> Pueyaso rupaacuajaari tari pa niqiara pohuatasaaquiaarijuhuj, nocua pa tiuuniuria, taa pa supuetanaa niqiara na pohuatasaaquiaaricuaani. Nojoriiri Pueyaso rupaa tojiquiaari najuhuanaj. Majaari nocua na tiuutiuniu quiquiaari. <sup>3</sup> Cunora, Pueyasoori pa supuetanaajiniji naa sequequiaari:

“Cua sequesanoocua nojori tiuyaquiniucua, janiyari cunora seetanujuanaa naa sequequiaari cua juaaniutiani: ‘Majaari nojori tiuquitianu quiniutianiya cua niqutionu panishano jiyajinia, cuata nojori quiniuria shuquiriaatia’ ”.

Pajaniya saniniuujia, Jesuucua tiuujia pa quiniucua, paa cutaraari panaatia quijiacara jatanishanoni, pueyaracaanu Pueyaso rupuejaca pa quiniuria. Pueyasoori naajuhuj: jiya shipininiu na tucatanu nuhuaji,

nojuajaari panaatia quiya. <sup>4</sup> Cunora, tamaqui tariucuacaanu Pueyaso Rupaajinia, naa naajiotasaaquiaariiri:

“Seis juucajinia Pueyaso tucuatascari puetunu na poonijosanojuanaa, na nuhuaji nojuajaari séptimo juucajinia samaatequiaari”.

<sup>5</sup> Pueyaso sequesanoori tariucuacaanu na Rupaajinia naa pacutejosaaquiaari naajiotanu:

“Majaari cua tojtiaashijiaca rupuenu quiniutianiya janiya, panaatia nojori quiniuria cuata”.

<sup>6</sup> Naa sequesanojinijitij, maatia niishishiyari Pueyasoori pueya masuyajaa, nojori rupuenura nojuaja, panaatia nojori quiniuria nata. Noo pojori, co-teenujuanaa Pueyaso Rupaa pohuatasaaquiaaritij, nojoriiri maja panaatia quijiacara na jatanishaanu quiquiaari, Pueyaso tojtiaashijiaca nojori quiniucua. <sup>7</sup> Naa Pueyaso panitianuucua pueya, shuquiriaatia nojori quiniuria natajuhuj, nojuajaari quiarjia masuyajaa pueya. Cunora, jiyanohua Moisés nuhuaji, Pueyasoori supuetana David naajiotaniquiaari pajaniyara saniniujia. Naa sequeyari:

“Niaa jaara quiarjia tojiri Pueyaso rupaa, Pueyaso sequesano niaarano, majaari na ruuretanu”.

<sup>8</sup> Supuetana Moisés shaajenu nuhuaji, supuetana Josué cutaraari Israel pueya tiuquitianiquiaari nojoririano Pueyaso niqitionu panishano jiyajinia. Naajaa, nojori tiuquitiasacari cuno jiyajinia, majaari seetanujuanaa panaatia quijiacara nojori jatanishaanu quiquiaari. Cunoori quiquiaari Pueyasocua tiuyashijiaca nojori quiniucujuhuj, taa nojori supuetanaa quiquiaaricuaani. Naacuajitij, cuno jiyajinia Josué tiuquitiasacari nojori, majaari panaatia quijiacara nojori jatanishaanu quiquiaari. Nojori jaara panaatia quijiacara tari jatanishano quiriquia, ¿Pueyasotucua casaara quiarjia pa masuuriquiaja Jesuucua pa tiuuniuriani, seetanujuanaa panaatia quijiaca pa quiniuria natani? <sup>9</sup> Naacuajitij, paacuajaari niishiyani, Pueyaso pueyaranoori panaatia quijiacara jatanishaanutaniya, shuquiriaatia pa quiniuria Pueyasota pueyaracaanu. <sup>10</sup> Naacuajitij, cante Jesucristoocua tiuujiani, nojuajaari panaatia quijiara jatanishaanutaniya. Majaari socua na tacaaniu quiniutianiya taa tama na cuaqueyajaaja na jyanootiniutianiya Pueyasoni. Naacuajitij, nojuajaari juhuajaniya quiija quiniutianiya, tarijia najuhuaana na poonijosanojiniji, naatej, taa Pueyasojuanaa samaatequiaari na poonijionu nuhuajicuaani. <sup>11</sup> Naaratej, panaatia pa quiniuria Pueyasota, seetanujuanaa na Rupaa tojjiacara pa quiriquia quiarjia. Naa na rupaa tojjiaca pa quiri paa mariqui saniitiosaareeri taa pa supuetanaa Israel pueya saniitiosaaquiaaricuaani, Pueyaso sequesano tojiyashijiaca nojori quiniucua.

<sup>12</sup> Pueyaso Rupaari samiitianijia, cumaacaracajaariuhua pueya jiuujiajinia na poonijionura. Pueyaso Rupaari jyanohua socua shamatucuaaja nijiniaquetucuaaja mueruujiniji. Nijiniaquetucuaaja mueruuri saaja na naata pa cuaqueya jiyatanu. Pueyaso Rupaa cutaraari pa sohuanu tohuariquijia, pa niishitijia tohuariquijianio. Na naata cuhuatanu poojiajinia jiyasohuaja pa niishiriojosano casaa, poojiajinia pa niishishoo casaanio. Naacuajitij, Pueyaso Rupaari poojiajinia sesa casaa pa niishiriojosano nequesoreeja, jiyasohuaja pa miiniu panishano poojiajinia pa niishiriojosanonio. <sup>13</sup> Puetunu Pueyaso shipinishano casaajanaani, majaari na cureenu quiniutianiya na nequesoreyaquishoo. Majaari quenaaja niquiriyatu jamaaniu quiniutianiya nocuaji, nequesoreesoo na cureenura. Nojuacuajaari maatia niishiya puetunu pa miishanojuanaa, puetunu pa niishiriojosanojuanaanio.

*Jesujuanaari Pueyaso jiyanootijia pueya*

<sup>14</sup> Pueyaso Niyanu Jesuni, nojuajaari na Que jiyanootijia pajaniya. Nojuajaari jiya cajiniocua tohuariquiiquiaari na Queecua na tiuquiniuria. Nojuajaari quiarijia tii pocuara secojiya na Que. Naacujitij, Jesucristoocua tiuujiaca pa quiniuucua, maja cumaati pa pishiniu nocuaji. Paacuajaari na muerasuniyojuani. <sup>15</sup> Jesu, Pueyaso pa jiyanootijiani, nojuacuajaari pocua taraajenu niishijia paa jaara saniniujiushaariquia sesa pa miiniuriani. Nojuacuajaari naa saniniujiushaaquiaarijuhua sesa na miiniuria juucua, naate taa pa saniniujiushaaquiaacuaani. Maja cutaraari sesa na miiniu quiquiaari quenaaja. <sup>16</sup> Cunora, pa jiyanoojia Pueyaso pa rupueriquia pa puereyaquiniutia. Nojuacuajaari pa tojiquiaa pa secojosacari nojuaja, na jiyanooniuria pajaniya sesa pa miishanojiniji. Ritia pa cumaquiuaajaari iuhuj, pa rejeretanura paa jaara sesa miiniuria saniniujiushaariquiani.

## 5

<sup>1</sup> Puetunu pueyacuara secojona jiyaniijajanaari pueyaracaanu narta pueyajiniinio saquiriojosano pueyano quiquiaa, taa Pueyaso niishitiquiaari supuetana Moisés cuajani. Nojuajaari jiyatesaaquiaa pueyacuaji na tacunura Pueyaso. Naacujitij, nojuajaari nareja pueya niquitiojosano Pueyasorano masejojua. Naajuhuj, pueya jaara sesa miiri, pueyacuara secojonaari pueya seya nanaca shootequiaa, Pueyaso jiyanooniuria nojori, sesa nojori miishanojiniji. <sup>2</sup> Pueyacuara secojona quiniuucua pueyanohuj, nojuajaari sesa miijiajuhuaj. Naacujitij, nojuajaari na naata narta pueyacuara taraajenu, sesa nojori miishacari, nojori niishiyaquishacari maninia miiniujiuhuj. <sup>3</sup> Naacujitij, nojuajaari tama nocuarajaaja seya nanaca shootequiaa sesa na miiniuucua, taa na miiquiaacuaa narta pueyacuarani, sesa nojori miishacari. <sup>4</sup> Niaacuajaari niishiya, majaari quenaaja tamonu pueyano na naata tama na cuaqueyajaaja jiyatenu pueyacuara secojona na quiniuria. Pueyasojuanaacuajaari tamajaaja saquiriojojua na panishano pueyano, cuno pueyano quiniuria pueyacuara secojona. Pueyasocuajaari naa saquiriojoquiaaricuaa Moisés tarajanu Aarón, pueyacuara secojona jiyaniijia na quiniuria. <sup>5</sup> Naajuhuj, Jesucristoori maja tama na cuaqueyajaaja na jiyatenu quiquiaari pueyacuara secojona na quiniuria, Pueyaso na jiyanootiniuria pajaniya. Tama Pueyasojuarijia na jiyatequiaari pueyacuara secojona na quiniuria. Nojuajanaacuajaari naa sequequiaari Jesu: “Quiaari quiyanu. Janiyari pueyanora quia muerateree jiyacuani cua saquiriojosano pueya Jiyaniijia quia quiniuria”.

<sup>6</sup> Pueyaso sequesanoori tamaqui tariucuacaanu na Rupaajinia naa naajio-tasano quiyajuhuj:

“Pueyaracaanu rishijia quia quiniuucua, quiaari pueyaracaanu pueyacuara secojoriquiano cutara, taa Melquisedeccuaani”.

<sup>7</sup> Naa pueyano na quishacari mijiriatej, Jesucristoori jiyanoohua saniniujiushaaquiaari. Naquiya na miyaquishaanuucujia juucua, nojuajaari na Que Pueyaso secojoquiaari jiyanoohua na nujuquenuta. Jiyanoohua martequiaariiri na Que na secojosacari, maja na mosaanura. Nojuajaari niishiquiaari na Que na naata nocua taraajenu, maja na mosaanura. Naajaa, na Que tojijia na quiniuucua, na Que sequequiaariiri: “Naajaa, quia miiri quia panishano cua Quena, taa quia panitiaquiaari miiniu janiyacujani”. Na Queeri na tojiquiaari. <sup>8</sup> Jesucristoori seetanujuanaa Pueyaso Niyanu quiquiaari mijiria na quishacarijuhuaj. Naajaa, na niishishacari nojuajaari jiyanoohua naquiya miishaanutaniya nojuaja jaara na Que tojiri, naajaa, nojuajaari saaja na tojiquiaari. <sup>9</sup> Naacujitij, tojetaarucujanaa maninia

mijia na quiniuucua, nojuajaari pueyacuaji Tacunara quiquiaari, puetunu na tojtiajacajanaa na jiyatenura pueyaracaanu rishijiacara. <sup>10</sup> Cunora, na Que Pueyasoori na jiyatequiaari pueyacuara secojona na quiniuria pueyara-caanu, juhua Melquisedec.

### *Jiyanohua puereetaari Jesu tojiniu tarinitianu*

<sup>11</sup> Janiyari queraatia socua nia niishitiojonu paniya Jesucristojinijini, nia niishiniuria nojuajaari seetanujuanaa juhua Melquisedec. Cunoori puera jiyajeneta, maatia cua niishitiojonura nijaniya, juhua niishiyashijiacara nia quiniuquihua. Niaacuajaari tari niyajetarucuaa tariucuaaanu nia tojishano. <sup>12</sup> Tariucuaaanujiniji Pueyaso rupaa tojjiaca nia quiniuucua, ¿taateni? Naa mariqui na niishitiojonuujuaca quiriquia tari. Saniniuujia, niaari quiarjia paniya socua nia niishitiojosaanuhuara maatia niishishaatia casaa Pueyasojiniji. Niaari juhua naatujooriria quiriohuacuaa, juhua shipiy-ataaquishoojua. Naacuajitij, majaari nia naata jiyajeneta niishitiojosano casaa niishiniu. <sup>13</sup> Naa maatia niishitiojosano niishijia nia quishacari saajatej, niaari juhua conaaja quiyajaa, saaja quitiaacaacua naataja. Majaari Jesucristo niishitiojosano tojtiajaca nia quiniu, maninia mijia nia quiniuria. <sup>14</sup> Juhua tariucua mashiquiriria nia jiyateriquiani. Mashiquiori cutaraari puetunu casaajanaa miaquenuujuaca. Naajuhuj, puetunu Jesucristo niishitiojosanojuanaa niishijia nia quiriquia. Naa jaara na niishitiojosano tojjiaca quiriquia, saaja maninia mijia nia quiniuria, niaari maninia niishiniutianiya teyano casaate maniniani, teyano casaate sesa saniniunijia.

## 6

<sup>1</sup> Naacuajitij, majaari juhua naatujoori nia quiniu pueyaracaanu. Seetanujuanaa socua Pueyaso rupaa tojtiajaca nia quiriquia, juhua tariucua cumantumaca mashaja nia quiniuria, cumueeca. Niaacuajaari tari co-teenujuanaa Jesucristojiniji niishitiojosano niishijia. ¿Niaatucua casaara socua niishitiojosaarohua nioojia nia tacatonurani, maja nia tiuuniuria maninia nia miishanoocua najuhuananij? Niaacuajaari tari niishiya, majaari nia naata maninia nia miishanota tama nia cuaqueyajaaja jiyanootiniu Pueyaso. Cunora, niaari Jesucristoocua tiuujiacara quiquiaari tari, Pueyaso jiyanooniuria nijaniya. <sup>2</sup> Naajuhuj, niaacuajaari tari niishitiojosaquiaari moojinia nia tiuquinishaanura Pueyaso pueya nia quiniuucua. Niaari niishitiojosaquiaarijuhua Pueyaso pueyacu nia nianura nia juaashiquia nojoriicua nia secojosacari, Pueyaso cumaquiniuria nojori. Niaari niishiya-juhuj, macunucuaari samiitiaconutaniuhua. Nojorijinjinio saniniuujia, Pueyaso tojiyashijiaari pueyaracaanu saniitiosocoriquiano jiyatesaanutaniya. <sup>3</sup> Quiarjiani, majaari socua cua niishitiojonu quiniutianiya nijaniya nio shusha cua sequesanojiniji nijaniyani. Pueyaso cumaquishacari janiya, janiyari socua jiyajeneta casaa Jesucristojiniji niishitiojonutaniya nijaniyani.

<sup>4-5</sup> Pueyano jaara Pueyaso Rupaa tojiyashijiaari quiriohua, najuhua-naari na niishitiojonu pacutenuhua, nojuaja jaara tari Pueyaso Sohuanu cuhuatasano jiuujiaraca quiquiaari. Najuhuaanaari nojuaja jaara tari jiyanooshano quiquiaari, nojuaja jaara tari Pueyaso Sohuanu cumaaca niishijia quiquiaari. Najuhuanajaariuhua nojuaja jaara tari Pueyaso Rupaa shuquiritiaja quiquiaari, nojuaja jaara tari Pueyaso cumaacaraca quijia quiquiaarijuhuj. <sup>6</sup> Jiyano pueyanotej, majaari tari na naata sesa mijia na quiniuucua taraajetesaanuhua, Jesucristoocua na tiuuniuhua



seetanujuanaa. Nojuajaari juhua Pueyaso Niyanu teetenu pacuteya niyacutesanojinia, naa na ruuretajaca na quiniuucua. Naa Jesucristo tacartaja na quiniuucuatej, tamasaari Jesu rerequetequiaajuhuj. <sup>7-8</sup> Naacuajitij, cuno pueyanoori juhua noo cuhuariquia tee cuniqui sesa jiyasocua maniniucuaa moritianucujani, riyocuacanio. Pueyasoori najuhua maru niy-  
ojotequiaa. Majaari cuno cuhuariquiajinia nataacuaca muetunu. Jiyano cuhuariquiatej, na camaru cuaara catijiataaranoj. Pueyasoori naa sanitionutaniya nocuaji ruparequeno pueyajuhuj. Saniniuujia, Jesucristo rupaa tojijiacani, nojoriiri juhua maninia cuhuariquia. Pueyasoori maru niy-  
ojotequiaa nocua, maninia na muetutenura tii natoosano casaa. Naacuajitij, na camaruuri queraatia miajajauraca quiniutianiya. Naajuhuj, Pueyasoori na tojitianu tarinitiaashijiaca shuquiritiniutianiya pueyaracaanura.

*Pa niishishacari Pueyasoori maninia pa miiniutianiya, paari cunora na tojiniu tarinitiaaquiuaani*

<sup>9</sup> Miriqui cua pohuatasano sesa cuhuariquiajinijini, cunoori maja nianianiya cua panishano pueyanaa. Majaari cua taacanuunu niajanijini. Niaacuajaari pa Jiyaniijia tojtiajaca quiquiaa. <sup>10</sup> Pueyasocujaari jiyanohua maninia. Nojuajaari maja na niyjetanu quiniutianiya maninia nia miishano niarta Pueyaso pueya, Pueyaso panijaca nia quiniuucua, taa quiaritia nia miyajaacuajani. <sup>11</sup> Naatej, taa shitimia niarta Pueyaso pueya naacu-  
juacatucaja niajanijani, naajuhuj, janiyari nia panitiaani pa Jiyaniijia nia sashiniuria nia timiniutiajuhuj, nojuaja jaara pa rijionuucua tiuquiri-  
ohuajaatijia. Nia niishitiriquiajaaniuhuj, Pueyasoori jiyanohua maninia miiniutianiya pajaniya. <sup>12</sup> Majaari nia macuhajeconu juhua taajecori nia quiniuria pa Jiyaniijia. Saniya nia quiriquia cutara juhua tariucuaaanu parta Pueyaso pueya. Nojoriiri shamaatia Pueyasoocua tiuujia quiquiaari pueyaracaanura. Naquiya miiniu rejeretajacaari quiquiaarijuhuj. Naaratej, Pueyasocujaari tari maninia miiquiaa nojori, taa seetanujuanaa na sequequiaari na pueyarano na miiniuriacuajani.

<sup>13</sup> Pueyasoori seetanujuanaa saaquiano Abraham sequequiaari taa na miiniutianiya maninia nojuajani. Majaari na naata sequenu, tamonu cuaara na saniitiooranoj, nojuaja jaara miyaquiri na sequesano saaquiano Abraham. ¿Cantucuaa cumaacaraca Pueyaso na saniitionurani? Shaaqui. Nojuajanaacuajaari Jiyaniijiajanaa. <sup>14</sup> Naaratej, Pueyasoori naa sequequiaari saaquiano Abraham:

“Janiyari seetanujuanaa maninia miiniutianiya quiajanijani. Janiyari quia jihuahua muetutenutaniya jiyanohua queraatiani”.

<sup>15</sup> Naa Pueyaso sequenu nuhuaji saaquiano Abrahamtej, Abrahamri juhujaniya sashiquiaari Pueyaso cuaara na sequesano miiquiaarijiaatijia.

<sup>16</sup> Pueyanaa, niaacuajaari niishiya taa pa miiquiaani, parta pueyano niishiniuria paari nojuaja pa sequesano miiniutianiya seetanujuanaani. Paari naa sequequiaani: “Seetanujuanaa quia sequeyanijia. Majaari cua sapojonu. Pueyaso cuaara saniitioora janiya, janiya jaara cua sequesano miyaquirini”. Naa pa sequesacarij, parta pueyanoori juhujaniya pocua tiuujia. Majaari tari na taacanuunu pocuaji. <sup>17</sup> Naajuhuj, Pueyaso sequesacari taa seetanujuanaa na miiniutianiya na pueyarani, nojuajaari jiyanohua panitiaquiaari pajaniya, na sequesanoocua pa tiuniuria seetanujuanaa. Majaari na paniniu quiquiaari pa taacanuunura quenaaja na sequesanojinijia. Cunora, nojuajaari naa sequequiaari: “Janiyacujaari Pueyasoni. Majaari cua niishiniu sapojonu. Cua sequesanoori seetanujuanaa”. <sup>18</sup> Naacuajitij, Pueyasoori maatia sequequiaari taa na



miiniutianiya nocua tiuujiacarano pueyarani. Majaari saaja cuno na sequenu quiquiaari. Nojuajaari sequequiaarijuhuaj: “Cua sequesanoori seetanujuanaa”. Pueyaso sequesanoori maja na naata jatanishaanu. Naacuajitij, pajaniya, nocua tiuujia pueyani, paari poojia cajitiquiaani maatia pa niishishacari, pocuaji Tacunaari puetunu na sequesanojuanaa miiniutianiya pajaniyara. Naacuajitij, majaari pa taacanuunu quenaaja. <sup>19</sup> Naa Pueyaso sequesanoocua tiuujia pa quishacaritij, paari juhuajaniya naquiya miiniu rejeretajaca quiquiaani. Sesaacaari maja na naata Pueyaso jaariutianu pajaniya. Naacuajitij, paari juhua buqueni, pootioyaquishoo, niiquia casaacuaji na jaasutanuucua. Cuno niiquia casaari niquishoo, moo cariquimia pojiyari. Naajuhuj, nocua pa tiuushanoni, nojuajaari jiyocuacaanu quiya, niquishoojaariuhua na Que Pueyaso shuriucua na quiniuucua. <sup>20</sup> Nojuajaari na Queecua quianu pa puetaquiaari. Nojuajaari tii pueyaracaanu secojoquiaa na Que pocuara, na Que jiyanooniuria pajaniya. Naacuajitij, Pueyasoori na jiyatequiaari pueyaracaanu secojona na quiniuria pueyacuara, taa Melquisedec quiquiaaricuaani.

## 7

### *Jesuuri pueyacuara secojona, taa Melquisedec quiquiaaricuaani*

<sup>1</sup> Cuno Melquisedecni, nojuajaari Salem tiaca jiyaniijia quijia. Nojuajaari Pueyasojanaa secojona pueyacuara. Pa supuetana Abraham tacate-sacariuhua na naminiu nuhuaji na paraa, tamasa tiacajinijinio jiyani-ijianucuaani, Melquisedecri nocua tohuataquiaari Salem tiacajiniji. Naa na sequequiaariiri: “Abrahamnaa, quiaari Pueyaso timitiasano. Pueyasoori quia miiniutianiya jyanohua maninia”. <sup>2</sup> Jiyacaritij, Abrahamri na paraa casami nitariquiohua na quiquojiniohuara. Naacuajitij, nojuajaari puetunu cuno casamijinijiniojuanaa Pueyasora na riuriosano niq-uitioquiaari Melquisedec. Abrahamri naa miiquiaari na niishishacari Melquisedecri Pueyaso secojona pueyacuara quiquiaari. Pueyanaa, nio Melquisedecjiniji nia niishiri. Pueyano rupaajinia, na sesaari sequeya, “Saaja maninia miijia jiyaniijia”. Naajuhuj, na tiaca sesa Salemni, cunoori pueyano rupaajinia sequeya, “Juhujaniya quijia pueya tiaca”. Na sesaari naa quiquiaari na pueya jiuujia cajitijia na quiniuucua. <sup>3</sup> Majaari toje-taarucujanaa na niishishaanu, ¿queraca quiquiaaritia, nucuaracajuhuj, supuetanaaracanio? Majaari quenaaja na pohuataaanujuhua na rasaanujiniji, na shaajenujinijinio. Naacuajitij, pajaniyara, Melquisedecri juhua pueyaracaanu quijiajahunajaj. Majaari na niishishaanujuhuj, tamonute na niti jiyatesaaquiaari pueyacuara secojona na quiniuria. Maja. Naacuajitij, nojuajaari juhua Pueyaso Niyanu, pueyacuara secojona na quiniuria pueyaracaanura.

<sup>4</sup> Pueyanaa nia niishiri, Melquisedecquiiri seetanujuanaa tojishano pueyano quiquiaari socua pa supuetana Abrahamjiniji. Naaratej, pa supuetana Abrahamri nareja na niq-uitioquiaari na paraa na shocotasano casamijinijinio. Secaja niq-uitioquiaariiri taa Pueyaso rootaquiaari pa supuetanaacuajani, nojori niq-uitiojonura nera. Tariucuaaanu, Pueyasoori pa supuetanaa niishitiojoquiaari nojori niq-uitiojonura secaja, puetunu nojori jiiitasano casaajinijinianaa. Naacuajitij, pueyano jaara diez casaa jiiitiare, cuara Pueyasora niq-uitioora niquiriyatujua. <sup>5</sup> Pueyasocuajaari supuetana Leví niquihuacuajinio supueno pueya jiyatequiaari narta Israel pueyacuara secojona nojori quiniuria. Nojoriiri jiyatesaaquiaari Pueyasoro pueya niq-uitiojosano masejojua nojori quiniuriajuhuaj. Naa Pueyaso sequesanoocuaari Moisés Rootasanojinia naajiotasaaquiaari.

Abrahamcuajaari puetunu Israel niquiohuajanaa supuetana quiquiaari, maja saaja Leví supuetana. Naajaa, Leví niquiohuacuajinio supueno pueyari Pueyasora narta Israel pueya niquitiojosano masejoja. <sup>6</sup> Melquisedecri pueyacuara secojona quiquiaarijuhuaj. Maja cutaraari Leví niquiohuacuajinio na supueno quiquiaari. Naajaa, seetanujuanaa pueyacuara secojona na quiniuucua, Abrahamri Pueyasorano na riuriotaca na niquitioquiaari. Abrahamri seetanujuanaa Pueyaso timitiasano pueyano quiquiaari. Naaratej, Pueyasojuanaacuajaari tari Abraham sequequiaari, nojuajaari maninia na miiniutianiya. Naajuhuaaj, Melquisedecri pa supuetana Abraham sequequiaari Pueyasoori jiyanojua maninia miiniutianiya nojuaja. <sup>7</sup> Paacuajaari niishiyani, Pueyaso jaara maninia miiniutianiya tamonu pueyano, na sequesano caminiujiunia pueyanoori socua tojishano pueyano maninia na miishocoriquiano pueyanojiniji. Naacuajitij, paari niishiyani Melquisedecri socua tojishano pueyano quiquiaari Abrahamjiniji. <sup>8</sup> Quiarijiani, Pueyasorano pueya niquitiojosano masejojuacani, puetunu nojorijianaari shaajajaca pueya. Saniniuujia, tariucuacaanu Pueyaso Rupaajinia pa serojosacari Melquisedecjiniji, juhua saminiojiniji pohuatashiyari. <sup>9-10</sup> Nia niishirijuhuaaj, Leví niquiohuacuajinio pueyacuajaari Pueyasorano pueya niquitiojosano masejojuaca, pueyacuara secojona nojori quiniuucua. Cua tojiri pueyanaa, Melquisedec naacuneetosacari Abrahamta, Abrahamri jiyacari tari na cuaqueyajinia jitiariquiaa puetunu nocuajinio supueriquiano pueyajanaa. Naacuajitij, Abraham niquitiosacari Pueyasorano na riuriotaca Melquisedec, pa naata sequenu Leví quiriquianojuanaari jiyacari Melquisedec niquitioquiaari, Abraham quiniuucua na jiyasorano tari.

<sup>11</sup> Leviicuajinio supueno pueyari pueyacuara secojona quiquiaari, nojori miiniuria taa Moisés Rootasanojinia sequequiaaricuajani. Naacuajitij, narta Israel pueya jaara sesa miiquiaari, nojoriiri sesa miijiaca seya puecoquiaari pueyaracaanu tama na camaruhuacuarajaaja, nojori na jiyanojiniuria Pueyaso. Naa nojori miishano jaara pueya jiyateriquia tojetaarucuajanaa sesa miyashijiacara, paa maara tamonu pocuara secojoriquiano paniyaquiriquiani. ¡Tamonu pocuara secojoriquiano cutaraari panishaaquiaari! Juhua pueyaracaanu rishijia Melquisedec panishaaquiaari cutaraari, maja juhua Aarón saniniuujia, nocuajinio supueno pueyano. Nojoriiri shaajajaca cutara. <sup>12</sup> Aaróncuajaari narta pueyacuara secojona jiyaniijia jiyatesano quiquiaari, taa Moisés Rootasanojinia sequeyacuajani. Naacuajitij, tamonu pueyano jaara jiyatesaarecuaa pueyacuara secojona na quiniuria, tamonu rootasanoori panishiyajuhuaaj, Moisés Rootasano niti na quiniuria. <sup>13</sup> Tariucuacaanu Pueyaso Rupaajinia, maatia sequeyacuajaari, Pueyasoori tamonu pueyano jiyatenutaniya pocuara secojoriquiano. Nojuacuajaari pa Jiyaniijia Jesu. Nojuajaari maja Leví niquiohuacuajinio supueno. Nojuajaari supuetana Israel niyanuucujiniocuaja, saniniuujia tamonu neyanuucujinio-jaarohuaaj, teyanuucujinio quenaaja niquiriyatu pueyacuara secojona supueyaquiquiaaricuajani. <sup>14</sup> Maatia niishishiyacuajaari, pa Jiyaniijiaari Judá niquiohuacuajinio supueno quiquiaari. Judaari Leví tarajanucuaja. Moisés pohuatasacari pueyacuara secojonaajinijini, majaari quenaaja Judá na jiyaniquiniu quiquiaari.

<sup>15</sup> Quiarijiani, quiarinio pocuara Secojona quishacari juhua Melquisedec, paari maatia niishiyani Leví niquiohuacuajinio supueno pueyacuara secojonaari sanitishaaquiaari. <sup>16</sup> Nojoriiri pueyacuara secojona quiquiaari

saaja Leví niquiohuacuajinio supueno pueya nojori quiniuucua. Jesucristo cutaraari pocuara secojonara jiyatesaaquiaari pueyaracaanu rishijia na quiniuucua. <sup>17</sup> Cunora, Pueyasoori naa sequequiaari nojuajiniji:

“Quiaari pueyacuara secojona quiniutianiya pueyaracaanura, juhua Melquisedec”.

<sup>18</sup> Naacuajitij, puetunu Moisés rootasanojuanaa pueyacuara secojona pueya miishocoriquianoori tari jatasaaquiaari, najuhua na quiniuucua. Cuno miishanoori cumaacaju quiquiaari pueya na jataniniuria.

<sup>19</sup> Seetanujuanaari, Moisés Rootasanoori maja na naata quiquiaari saaja maninia miijiacara na jataniniuria na tojitiajaca. Quiarijia saniniuujia, paari Pueyaso rupaa Jesucristojiniji jiiitiaani. Nocua pa tiuushacari, Jesucristoori pueyaracaanu pa jiyanootiquiaa na Que, juhujaniya pa rupuenura nojuaja.

<sup>20</sup> Na Que sequesacari Neyanu quiniuria pocuara secojona pueyaracaanura, nojuajaari naa sequequiaari seetanujuanaa. Naacuajitij, paari panaatia quiquiaani pa niishishacari Jesucristoori na Que shuriucua quiya, pueyaracaanu pocuara na secojonura na Que. Saniniuujia, majaari naa Pueyaso sequenu quiquiaari Leví niquiohuacuajinio supueno pueya, seetanujuanaa pueyaracaanu pueyacuara secojona nojori quiniuria. <sup>21</sup> Saniniuujia, Neyanujiniji na sequesano, cunoori seetanujuanaa. Majaari na sequesano jatanishaanu quiniutianiya. Naacuajitij, naa naajio-tasano quiyari tariucuacaanu Pueyaso Rupaaajinia:

“Jiyaniijia Pueyasoori seetanujuanaa sequeree na miishocoriquiano. Majaari na sequesano na jataniniu quiniutianiya. Neyanu sequereecua-jaari: ‘Quiaari pueyacuara secojoriquiano pueyaracaanu’ ”.

<sup>22</sup> Naacuajitij, pueyaracaanu na Que shuriucua Jesu quiniuucua pocuara na secojonura, paari seetanujuanaa niishiyani paari Pueyaso pueyani, Neyanuucua pa tiuuniuucua. Naacuajitij, Pueyaso rupaa Jesujinijiiri socua jiyanhua maninia Moisés Rootasanojiniji. Cunoori pueyaracaanu rishijia Jesu quiniuucua. <sup>23</sup> Saniniuujia, Leví niquiohuacuajinio supuenoni, queraatia pueyacuara secojonaari quiquiaari pueyaracaanu rishiyashijia nojori quiniuucua. <sup>24</sup> Jesu cutaraari shaajeyashijia. Naa pocuara secojona na quishacaritij, majaari quenaaja tamonu sanitiniu quiniutianiya nojuaja.

<sup>25</sup> Naacuajitij, nocua pa tiuushacari, nojuajaari pueyaracaanu pocuara secojoquiaa, tojetaarucujanaa maninia miijiacara pa jatanishaanura, Pueyaso pa rupuenura. Majaari pocuara na Que na secojonu na tarinitianu quiniutianiya, shaajeyashijia na quiniuucua.

<sup>26</sup> Jesuuri namitia pocuara secojona na Que. Majaari tamonu quiniu juhua nojuaja. Nojuajaari tojetaarucujanaa maninia miijiajuhuanajaj, juhua na Que Pueyaso. Majaari quenaaja sesa miiniu na niishiniu. Sesa miijiaa tajinia na quishacari mijiria, naajaa, majaari sesa na miiniu quiquiaari quenaaja. Saaja maninia miijia na quiniuucua, nojuajaari tojetaarucujanaa tamaatia quijia mijiria quiniaa pueyajiniji. Naaratej, Pueyasoori jiyocuacaanu quijiaara na jiyatequiaari, Jiyaniijiajanaa na quiniuria na shuriucua, tii na secojonura na Que pocuara. <sup>27</sup> Leví niquiohuacuajinio supueno pueyacuara secojona jiyaniijanucuaari pueyaracaanu tama sesa nojori miishanoocuarajaaja seya puecootujua coteenu, Pueyaso jiyanooniuria nojori. Naa nojori miiniu nuhuajitij, nojoriiri jiyacari narta Israel pueya seya puecooquiaari sesa cuno pojori miishanoocuarara saniniuujia. Maja cutaraari naa Jesu miiniu quiquiaari. Nojuaja jaara tama na cuaqueyajaaja tarinitiaquiaari pocuara na mosaanura juhua borregoniyojua sesa pa

miishanoocuara, cunojuanaari na cusonu quiquiaari. Majaari socua na caminiu quiniutianihua cusonu. Naa na cusonuucua pocuaratej, puetunu sesa miijiacajanaari na naata jiyanooshaanu puetunu sesa na miishano-jinijijianaa. <sup>28</sup> Moisés Rootasanojinia, Pueyasoori tii sequeyacuaja canapue te pueyacuara secojonaa jiyaniijara jiyateshiyani. Puetunu cuno pueyacuara secojonaa jiyaniijianucujanaari sesa miijiac quiquiaari, juhua puetunu pueyajuhuj. Jiyanohua Moisés nuhuaji, Pueyasoori saniniuu-jia tama Neyanujuaaja jiyatequiaari pocuara secojonajanaa na quiniuria pueyaracaanu. Na Que tojjia na quiniuucua pueyaracaanu, naquiya miiniu rejeretaja na quiniuucujuhuj, naacujitij, nojuajaari tojetaarucujanaa maninia, pocuara secojonara na jiyatesaanura.

## 8

### *Quiarinio Pueyaso Rupaacua pa tiuushacari, Jesuuri pa jiyanootiquiaa na Que*

<sup>1</sup> Nio, janiya na pacutenutaniuhua sequenuni, cunoori socua panishano nia niishiniuria. Cua tojiri. Pueyaso Niyanu quiniuucua pocuara secojona, nojuajaari na Que miaquetajara cajiquiaari jiyocuacaanu. <sup>2</sup> Nojuajaari tii na Que secojoquiaa pocuara Pueyaso Quishaquijianaa. Cunoori Pueyasojuaanaa shipinishano quiquio, maja pueyano tiasano.

<sup>3</sup> Puetunu pueyacuara secojonaajanaari jiyatesaaquiaari nojori masejonura narta pueya poosano casaa, Pueyasora nojori niquitiojosano. Naajuhuj, nojoriiri seya puecojuaca, Pueyaso nojori jiyanootiniuria. Naacujitij, Jesucristo quiniuucua pueyacuara secojonajuhuj, nojuaja cuara casaa jitiara, Pueyaso na niquitiosocoriquianojuhuj. Cuno casaacujajari tama na cuaqueyajaaja quiquiaari, pocuara na mosaanura, Pueyaso jiyanooniuria pajaniya. <sup>4</sup> Leví niquiohuacuajinio supueno pueyacuara secojonaacuajari pueya nitiasano nojoriicua masejoquiaajaa, Pueyasora nojori niquitiojosocoriquiano taa Moisés Rootasanojinia sequeyacuajani. Naacujitij, Jesucristo jaara mijiria quiriquiaaja, nojuaja maara pueyacuara secojona quiyaquiriquiaj. Pueyacuara secojonaacuajari queraatia quiya. <sup>5</sup> Pueyacuara secojonaa jeecajosano casaa Pueyaso Secojoua tiajinia nojori jitiisanoni, nojori miishanonio, puetunu cunojuanaari saaja juhua jiyocuacaanu casaa naaqui. Cunora, Moisés jaara tari shipiniriquiaa Pueyaso Secojouara suhorotu, puetunu na casamitajanaanio, jiyacaritij, Pueyasoori naa Moisés sequenu pacutequiaari:

“Moisésnaa, cua tojiri. Maninia quia miiri jacaria puetunujuaana, naatej, taa cua niquitiquianucujaja quiajanianiyani, Sinaí tuhananuucua quia quishacari”.

<sup>6</sup> Pocuara Secojonajanaa miishanoori jiyanohua maninia socua pueyacuara secojonaa Leví niquiohuacuajinio supueno miijosanojiniji. Pocuara Secojona cutaraari tama na cusonutajaaja pa jiyanootiquiaari Pueyaso. Naacujitij, Pueyaso rupaa Jesucristojinijiiri jiyanohua socua maninia Moisés Rootasanojiniji.

<sup>7</sup> Pueya jiuujia jaara na naata quiriquia seetanujuaanaa sesa miyashijiacara jatanishano Moisés Rootasano tojjijaca nojori quiniuucua, Pueyaso maara quiarinio rupaa niishitiyaquiquiaari pajaniya. <sup>8</sup> Saniniuuja, Pueyasoori niishiquiaari Israel pueyari maja na naata quiquiaari puetunu Moisés Rootasanojuanaa tojiniu. Cunora, tariucuaaanu pueyara Pueyaso sequesano caminiuujunia sequesanoori naa naajiotasano quiya:

“Jiyaniijia Pueyasoori sequeya: ‘Tamacari, janiyari quiarinio rupaa niishitiniutianiya Israel jiyajinijinio pueyani, Judá jiyajinijinio pueyanio. Teyano pojoriti nocua tiuyani, nojoriiri seetanujuanaa cua pueya quiniutianiya.<sup>9</sup> Quiarinio cua rupaari tamaatia quiniutianiya Moisés cua niishitiojosano rupaaajiniji puetunu Israel pueyarajanaa. Jiyacaritij, janiyari nojori mashiquiquiaari Egipto jiyajinijini. Juhua nojori que, janiyari nojori jaatucunuuriquiaa juucuaní nojori cua niqutiosocoriquiano jiyajiniara. Saniniuujia, nojoriiri Moisés cua rootasano nojoriria tojiniu paniyaquiquiaari saaja. Janiyari cunora nojori cartequiaarini’. Jiyaniijia Pueyasoori naa sequeree.<sup>10</sup> Socua sequeyari: ‘Nio pa quishacari nuhuaji, janiyari naa miiniutianiya cua saquiriojosano pueyarani: janiyari coojia nianutaniya nojori jiuujiajiniani. Naacuajitij, cua rootasanoori juhua naajiotasano quiniutianiya nojori niishitiajajinia, seetanujuanaa cua tojitiajaca nojori quiniuria. Naacuajitij, janiyari nojori Jiyaniijiajanaa quiniutianiyaní. Nojoriiri saniniuujia cua pueya quiniutianiyacujua.<sup>11</sup> Jiyacaritij, pueyano jaara janiyajiniji pohuatanu paniri narta pueyano, na cojiniajuhuaj, tapueyocuacanio, cunoori najuhua quiniutianiya. Puetunu pueyapuejanaacuajaari tariucua cua niishijia quiniutianiya; jiyaniijianucua, poonijiotasano pueyanio.<sup>12</sup> Janiyari nojoricua taraajeja quiniutianiyaní. Majaari cua saniitionu quiniutianiya nojori, sesa nojori miishanojiniji. Naa cua jiyanooshacari nojoritij, majaari socua cua sanejonu quiniutianiya sesa nojori miishano. Janiyari puetunujuanaa na niyajetanutaniyaní’ ”.

<sup>13</sup> Naa Pueyaso sequesacaritij, taa nojuaja quiarinio na rupaa niishitiniutianiya pajaniyaní, nojuajaari tariucuacaanu Moisés na rootasano jiyatequiaari tariucuaneeera. Naacuajitij, Moisés Rootasanoori quera shaajasaanutaniya puetunujuanaa.

## 9

*Tariucuacaanu Moisés suhuorotesano Pueyaso quiquioranoni, cunoori juhua jiyocuacaanu Pueyaso quiquiojuhuaj*

<sup>1</sup> Tariucuacaanu, Pueyasoori Moisés sequequiaari mijiria na quiquiorano na suhuorotenura. Na niishitiojoquiaarijiaariuhua taa pueyacuara secojonaa poonijionutaniya cuno na quiquiojiniani. <sup>2</sup> Pueyaso Secojua suhuorotuuri caapiqui sohuacaraca quiquiaari. Samari nujuatacojuaari coteenu sohuacajinia quiquiaari, miaquejania, tee Pueyaso tacoji pan niojosaaquiaari pueyaracaanucujani. Cuno sohuaca sesa quiquiaari “Pueyaso Shuriucua Quiquío”. <sup>3</sup> Cuno coteenu sohuaca puequeetujiniani, tii tunusano quiquiaariiri shiquiaruque toque. Cuno toque tamajiria quiquiaariiri Pueyaso quiquiojuanaa cutara. Naaratej, na sesa quiquiaari “Pueyaso Quishaquijianaa”. <sup>4</sup> Pueyaso Quishaqui tacoji nujuatajaari juhucutu, orojiniji shipinishano. Cuniqúi catejaari shanohua jaanutaja Pueyasora. Pueyaso Quishaquijianaa cutarani, tii nujuatajaari puereetuuca casaa, juhua caaja niquishano. Naananeecajiniji shipinishaaquiaariiri. Puetunu na cuaqueyajanaari orota mishiquiosano quiquiaari. Na jiniacuma, casamiiri mii racatasano quiquiaari. Pataconiyojua orojiniji shipinishanoori tii cajitiaquiaari “maná”. Manaari quiquiaari Pueyaso tinishano casaa, Israel pueya miaquesocoriquiano cariiquia jiyajinia nojori camarucuneejotasacari. Mii matariquiaajaariuhua Aarón nataca catuutianohua, puetunu na jajautajanaa. Mii maturiquiaajaariuhua sai neeca quejasano, nocua



Pueyaso naajiotasano na rootasano, Moisés na niqutiojosano. <sup>5</sup> Cuno caaja tiotiu caco nujuatejosano quiquiaariiri caapiqui shipinishano casaa, nesuhuaraca, juhua Pueyaso seya niquishano. Nojori nesuhuari coqueetesano quiquiaari. Teecojuuari, teje Pueyaso shacantuuca mueranacujuquiaari Moisésacuajani. Cuno caaja tiotiuuri seya nanaca majiriutiasaqui-jiuhuj, Pueyaso jiyanooniuria puetunu Israel pueyajanaa. Tariucujaja puetunu cuno casaajiniijianaa cua pohuatasano nijaniya.

<sup>6</sup> Pueyaso Secojoua tia jaara tari naa maninia tiasano quiquiaari puetunu na casamitijanaa, na nuhuaji, pueyacuara secojonaari pueyaracaanu tiuquijioquiaari Pueyaso Shuriucua quiquiojinia. Nojoriiri tii tiuquijioquiaari nojori miiniuria taa Moisés Rootasanojinia sequeyacuajani. Maja cutaraari nojori tiuquitianu quiquiaari Pueyaso Quishaquijianaa sohuacamara. <sup>7</sup> Saaja nojori jiyaniijia cutaraari tii tiuquiquiaari saaja rupaquijia puetunu marijarajanaa. Na tiuquishacari Pueyaso Quishaqui, seya nanaca pataquiaariiri Pueyaso jiyanooniuria nojuaja, narta Israel pueyano, sesa nojori miishanojiniji. <sup>8</sup> Naa Pueyaso Quishaqui quiniuucua mishiquionucua pueyacuajitij, Pueyaso Sohuanuuri pa niishitiya, pueyari juhuanouaja maja na naata rupuenu quiquiaari Pueyaso. <sup>9</sup> Naacuajitij, puetunu cunojuanaari quiquiaari juhua miriqui miishano, saniniuujia nio pa quishacari pa niishiniuria pocuara Secojonajanaa miishano pocuara. Puetunu pueyacuara secojona catijasano casaajanaari miriqui miishano quiquiaari saaja. Naajuhuj, pa supuetanaa niqutiojosano casaa Pueyaso jiyanooniuria nojorini, puetunu naa miishanojuanaari miriqui miishano quiquiaari. Naacuajitij, cunoori maja na naata cuno pueya jiuujia jeezanu seetanujuanaa, juhujaniya nojori rupunura Pueyaso. <sup>10</sup> Naaratej, cuno tariucuaaanu rootasanoori saaja panishaaquiaari Pueyaso cuaara na sanitiquiaariijaatijia quiarinio rupaata. Cuno tariucuaaanu rootasanoori pueya niishitiquiaari teyano sumatuuteja miaqueshiyani, teyano mashacateja ratushiyani. Naajuhuj, nojoriiri niishitishaaquiaari taacari pueya jeequeya na cuaqueyani, nojori casaanio, juhua maninia jeequejosano nojori quiniuria Pueyaso niqiara. Puetunu naa pueya miishanojuanaari maja na naata pueya jiuujia jeezanu sesa nojori miishanojiniji.

<sup>11</sup> Quiari naataja saniniuujia, Jesucristoori pocuara Secojonajanaara jiyatesaaquiaari, Pueyasojiniiji na masenura Pueyaso jiitiasano pajaniyarano. Cuno quiquio, tee na secojoquiaa na Que pocuaracuajani, cunoori seetanujuanaa Pueyaso quiquio jiyocuacaanu, maja pueyano tiasano. <sup>12</sup> Naa Cristo tiuquishacari na Que quiquiojinia Pueyaso na jiyanoootiniuria pajaniyatej, nojuajaari maja na tiuquitianu quiquiaari cabra nanaca, juunu niquihua nanacanio. Nojuaja cutaraari tama na nanacatajaaja Pueyaso jiyanoootiquiaari pajaniya. Nojuajaari maja pueyaracaanu na tiuquijionu na Queecua, taa mijiria pueyacuara secojona jiyaniijianucua miiquiaaricaani. Maja. Nojuajaari na Queecua tiuquiquiaari puetunujuanaa. Naa pocuara na cusuucuatej, na Queeri Neyanuucua tiuujica jiyanooquiaa puetunujuanaa. Naacuajitij, majaari Pueyaso shuriucujaji pa taanuusaanu quiniutianiya. <sup>13</sup> Pueyasoori Moisés niishitiquiaari, pueyano jaara macu masaqi tiuquimia, jaara na quiarejuhuj, jiyacaritij, nojuajaari juhua curutuucua Pueyasora. Naacuajitij, cuno pueyanoori maja na naata narta pueya rupuenu. Majaari na naata Pueyaso Secojoua tijania tiuquiniujiuhuj. Naajaa, nojuajaari na naata jeequesano quiniuhua, seru nanaca jaara nocua majiriutiasaaquiaari. Cabra nanaca, juunu nanaca, niyaco juunu catijasano juacani, puetunu cunojuanaari maninia quiquiaari pueyara, juhua jeequesano nojori quiniuhua Pueyasora. <sup>14</sup> Naa pueya cuaqueya quiniu-



ucua juhua jeequesano saaja seya nanacatacuaatej, Cristo nanaca cutaraari seetanujuanaa cumaacaraca pueya jiuujia na jeequenura seetanujuanaa, puetunu sesa casaajinijijianaa. Naatej, taa pueyacuara secojonaa jiyani-ijianucua tiuquitiaquiaari seru nanaca Pueyaso Quishaquicuaani, pueya jiyanooshaanura, Jesucristoori naa miiquiaarijuhuaj. Pueyaracaanu quijia na quiniuucua, Jesucristojuanaari tama na nanacajaaja tiuquitiaquiaari Pueyasocua, pa jiyanooshaanura puetunu sesa pa miishanojinijijianaa. Nojuajaari tojetaarucujanaa sesa miyashijia quiquiaari. Naacuajitij, na nanacaari poojia cajitiquiaa, nocua pa tiushacari. Majaari socua pa jiyaniniu pa naata tama pa cuaqueyajaaja jiyanootiniu Pueyaso tama pa miishanotajaaja. Naacuajitij, quiarijia cutaraari pa naata pa Pueyasora poonijionu shitimia, seetanujuanaa jiyanooshano pa quishacari.

<sup>15</sup> Jesucristo cusonuucua pocuara, nocua pa tiushacari, nojuajaari pa jiyanootiniara quiquiaari taa quiarinio Pueyaso rupaa sequeyacuajani. Naajuhuj, noo pojori, Pueyasocua tiuujiaa mijiria Jesu niyacarijiani, sesa nojori miishanoori jiyanooshaaquiaari Jesu cusonuta quiari naata-jajuhuj. Naacuajitij, puetunu Pueyaso saquiriojosano pueyapuejanaari na naata puetunu Pueyaso niqutiojonu panishanojuanaa masenu, taa na sequequiaari niqutionu seetanujuanaacuajani, pueyaracaanu shuquiriaatia jatiqiu pa quiniuria nata. <sup>16</sup> Pueyanaa, pa shaajeyaquishacarijia, paari pa miiniu panishano naajiotanu niishijiani. Paari naa miijiani pa casami serotasaanura maninia, teyano pueya pa panitiaa nojori jitianura pa casamicuajani pa shaajenu nuhuaji. Naacuajitij, paa jaara tari jamosaareni, pueyari maninia miiquiaa taa pa naajiotaquiaaricuajani, saminio pa quishacarijia. <sup>17</sup> Naacuajitij, saminio pa quishacarijia, najuhuaanari pa naajiotasano. Pa shaajesacari, jiyacari cutara pa casamiiri niqutiojosano. <sup>18</sup> Tariucuaaanu naajuhuj, seya nanacaari shootesaaquiaari, Israel pueya niishiniuria Moisés Rootasanoori seetanujuanaa, nojori tojishocoriquiano. <sup>19</sup> Naa quiquiaariiri: Moisésri puetunu Pueyaso rootasanojuanaa nojuaja caminiujuquiaari puetunu Israel pueya niquiara-janaa. Na nuhuaji, Moisésri juunu niquiohua nanaca, cabra nanaca cojitiquiaari mohuacata. Cunojinia shitiaquiaari borrego cajaca naatusu hisopo cashacucuataari. Cunota, mohuacanacu majiriuutiaquiaari Pueyaso Rupaa na naajiotasanoocuaari, puetunu Israel pueyacuajanaanio. <sup>20</sup> Jiyacaritij, nojori sequequiaariiri: “Nio nanacaari pa niishitiya Pueyasoori seetanujuanaa pajaniyara miiniutianiya puetunu na sequesanojuanaa, paa jaara na rootasano tojijiaa quirini”. <sup>21</sup> Moisésri Pueyaso Secojoua tiaacua majiriuutiaquiaari nanacajuhuj, puetunu Pueyasora poonijiotajara shipinijosano casamiicuajanaanio. <sup>22</sup> Moisés Rootasanojiniji niishishiyacuajaari, quera puetunu casaajanaari saaja nanacata juhua jeequesano quiya Pueyasora. Pueya miishano sesani, cuno cutaraari maja na naata jiyanooshaanu nanaca jaara shooteyaquishaare.

### *Sesa pa miiniuuri jiyanooshaaquiaa Cristo cusonuucua pocuara*

<sup>23</sup> Mijiria Pueyaso Secojoua tia, puetunu na casaatajanaa quiniuucua juhua jiyocuacaanu casaa naaqui, seya nanacaari maninia quiquiaaricuaja cuno mijiria casami quiniuria jeequesano. Saniniuujia, jiyocuacaanu casaa quiniuria jeequesano, socua maninia nanacaari panishaaquiaari seya nanacajiniji. <sup>24</sup> Majaari Cristo tiuquitianu quiquiaari seya nanaca mijiria pueyano tiasano Pueyaso Quishaquijianaa. Cuno quiquioori saaja juhua jiyocuacaanu Pueyaso quiquio naaqui. Cristo cutaraari seetanujuanaa Pueyaso Quishaquijianaa tiuquiquiaari. Nojuajaari tii

na Que Pueyaso secojoquiaa pocuara. <sup>25</sup> Mijiria pueyacuara secojonaa jiyaniijianucuaari puetunu marijarajanaa pueyaracaanu tiuquiiioquiaari Pueyaso Quishaqui saaja seya nanacata, pueya na jiyanootiniuria Pueyaso. Jesucristo cutaraari maja naa na miiniu quiquiaari. <sup>26</sup> Jesu jaara Pueyaso pa jiyanootiriquia puetunu marijarajanaa taa pueyacuara secojonaa jiyaniijianucua miiquiaaricuaani, nojuaja maara jiya shipinishaanujiniji mosaariquia puetunu marijarajanaa. Quiari naataja saniniuujia, Jesucristoori mijiria rasaaquiaari tama na cuaqueyajaaja na tarinitianura pocuara na mosaanura, pueya jiyanooshaanura puetunu sesa nojori miishanojinijianaa. Majaari socua na pacutesaanu quiniutianihua monu. Naa na mosaanuucuatej, cunoori tariucuaja puetunu nocua tiuujiaa pueyajanaa jiyanooshaanura. <sup>27</sup> Naatej, taatucuaa pueyani, nojoriiri shaajecoriquiano. Majaari nojori samiitiaconuhua mijiria nojori quiniuhuara, socua na cusonuhuara juhua coteenu na cusonu. Nojori shaajenu nuhuaji, nojoriiri saaja sashiya Pueyaso nequesoreenura nojori. <sup>28</sup> Naajuhuj, naa Jesucristo mosaanuucua jiyacaritij, saaja cunोजनाari na mosaanu quiquiaari, queraatia pueya jiyanooshaanura sesa nojori miishanojiniji. Naacujitij, pocua na muetasacariuhua, majaari jiyacari socua na mosaanu quiniutianihua pueya jiyanooshaanura sesa nojori miishanojiniji. Jiyacaritij, nojuajaari saaja nocua tiuujiaa rijionuucua tiuquiniutianihua, noo pojoriria canapuete na sashiyacuajani.

## 10

<sup>1</sup> Moisés Rootasano pueya miishocoriquianoni, pueyacuara secojonaa miishocoriquianojuhuaj, puetunu cunोजनाari juhua seetanujuanaa Pueyaso jiyocuacaanu casaa naaqui, Pueyaso racatasano Jesucristoocua tiuujiaa pueyarano. Moisés Rootasano tojitiajaca pueya cutaraari puetunu marijarajanaa na seya puecootequiaari, Pueyaso jiyanooniuria nojori juucua. Naajaa, majaari na naata seetanujuanaa maninia miijiaa pueyara na jatanishaanu seya nanacata. <sup>2</sup> Naajuhuj, pueya miishacari puetunu Moisés Rootasanojuanaa, naajaa, nojoriiri maja seetanujuanaa tama nojori jiuujiaajaaja na cajitiniu quiquiaari. Cunora, majaari nojori tarinitianu quiquiaari nojori seya puecootenu tama sesa nojori miishanoocuarajaaja. Seya nanacaari maja na naata tuujunu quiquiaari sesa nojori miishano, seetanujuanaa juhuajaniya nojori quiniuria. <sup>3</sup> Naa seya puecoosacari puetunu marijarajanaa Pueyaso jiyanooniuria pueyatej, cunoori saaja nojori niishitiquiaariuhua tarijia nojori miishano sesa. <sup>4</sup> Paari seetanujuanaa niishiyacuajani, juunu nanaca, cabra nanacanio, cunoori maja sesa pa miishano tuujujua seetanujuanaa.

<sup>5</sup> Cunora, tariucuacaanu Pueyaso Rupaajinia, mijiria Jesucristo nishacari na sequesocoriquianoori juhuacarijia naajiotasano quiquiaari. Naa sequeyari:

“Cua Pueyasonaa, janiyacuaajaari niishiyani, majaari quioojia quia cajitiniu quiquiaa seya puecoosacari quiocuara, puetunu nataacucajiniji pueya niqutiojosacari quiarajuhuj. Saniniuujia, quiaari cuaqueyaraca cua quiniuria cua jiyateree, quiocuara cua mosaanura. <sup>6</sup> Majaari quia timiniu quiquiaa seya catijasacari quiocuara, naajuhuj pueya shootesacari na seya nanaca, quia jiyanooniuria nojori sesa nojori miishanojiniji. <sup>7</sup> Naaratej, janiyari quia sequeyani: ‘Niya quiyacuajanijia cua miiniuria quia panishano cua Que Pueyasonaa, taa janiyajiniji tariucuacaanu naajiotasaaquiaaricujani’ ”.

8 Moisés Rootasanojiniji pueyari maatia niishitiojosaaquiaari nojori puecootenura tama na seyajaaja Pueyasooacara, na nataacuacajinijinio nojori niqutiojonura nerajuhuj. Nojoriiri niishitiojosaaquiaarijuhuaj nojori catijianura na seya Pueyasooacara, tama nojori seya nanacajaaja shootesaanurajuhuj, sesa nojori miiniuucua. Naajaa, Jesucristo sequesanojiniji, paari quiarjia niishiyani, puetunu naa pueya miishanojuanaari maja na timitiniu quiquiaari Pueyaso. <sup>9</sup> Nocuj, Jesucristoori naa sequequiaari na Que: “Niya quiyacuajanijia, cua miiniuria quia panishano”. Naacuajitij, Jesucristojuanaari mijiria niqiaari pocuara na mosaanura, seetanujuanaa jiyanooshano pa quiniuria cutara, maja najuhuaana seya puecoosaanura socua. <sup>10</sup> Pueyaso tojjia na quiniuucua, Jesucristoori tama na cuaqueyajaaja tarinitiaquiaari pocuara na mosaanura, tojetaarucujanaa jiyanooshano pa quiniuria pueyaracaanu. Naacuajitij, na Que Pueyasoori juhua tojetaarucujanaa sesa miyashijiacara pa jiyatequiaari, seetanujuanaa na pueya pa quiniuria tama nerajaaja.

<sup>11</sup> Israel pueyacuara secojonaa pueya poonijosacari Pueyaso Secojua tiajinia, nojoriiri pueyaracaanu seya puecooquiaa narta pueya miishanoocua sesa. Naajaa, naa nojori miishanoori maja seetanujuanaa na tuujunu pueya miishano sesa. <sup>12</sup> Saniniuujia, Jesucristoori tama na cuaqueyajaaja tarinitiaquiaari pocuara na mosaanura niyacutesanojinia. Cunojuanaari na mosaanu quiquiaari. Majaari socua na pacutesaanu quiniutianihua monu. Na cusuucua pa niti, puetunu nocua tiuujia pueya sesa miishanojuanaari tojetaarucujanaa jiyanooshaaquiaa. Naa na tucatanu nuhuaji Pueyaso miiniu panishano pueratej, nojuajaari na Que miaquetajara cajiquiaari. <sup>13</sup> Quiarjia tii sashiyari, Pueyaso cuara na paraa shocotare puetunujuanaajaatijaj. <sup>14</sup> Naa niquiriyatu pueyano mosaanuucuatej, puetunu nocua tiuujia pueyajanaari maninia miijiacara jatanishaaquiaa, tojetaarucujanaa maninia pa quiniuria, Pueyaso rupuejaca pa quiniuria pueyaracaanu. <sup>15</sup> Pueyaso Sohuanucujaaari naa pa niishitijuhuj naa Pueyaso sequesacari tariucuaaanu na rupaajinia:

<sup>16</sup> “Pa Jiyaniijia Pueyasoori naa sequeya: ‘Nio pa quishacari nuhuaji, janiyari tamaatia miiniutianiya cua saquiriojosano pueyani, quiarinio cua rupaacua nojori tiushacari. Janiyari quiarinio cua rupaa nianutaniya nojori jiuujajiniani, na tojjia nojori quiniuria. Naajuhuj, janiyari juhua na naajiotanutaniya nojori niishitijajiniani. <sup>17</sup> Janiyari puetunu sesa nojori miishanojuanaa niyajetanutaniya seetanujuaanaani’ ”.

<sup>18</sup> Naacuajitij, sesa pa miishano jaara tari seetanujuanaa jiyanooshano quiya, cunora, majaari tari na panishaanu seya puecoosaanura, sesa pa miishanojiniji pa jiyanooshaanura.

### *Pueyaso pa rupuere jeequesano poojiata*

<sup>19</sup> Naacuajiti cua panishano cuarta Pueyaso pueyanaa, quiarjia cutara pa naata pa puereyaquiniutia tiuquijionu Pueyaso Quishaquijianaa, Jesucristo shootenuucua na nanaca pocuara. <sup>20</sup> Nojuajaari quiarinio nuacuaco pa jaatiaquiaa na Queecua. Nojuajaari juhua pocuj nuunuquiaari Pueyasooacara. Mijiria Pueyaso Secojua tiajiniani, Pueyaso Quishaquiri shiquiaruque toqueta mishiquionucua quiquiaari, pueya tiuquitiaquiniuria Pueyasooacara. Cuno shiquiaruque toque cutaraari sutequiaari Jesu cusosacari. Cunocujaaari pa niishitiya, pocujiri juhua nuunusano quiya Pueyasooacara. Neyanu Jesucristocujaaari cuno quiarinio nuu. Nocua pa

tiuushacari, paari pueyaracaanu rishijiacara jatanishaaquiaani juhua nojuajuhuj. <sup>21</sup> Nojuacuajaari pocuara Secojonajanaa cutara. Na Que Pueyaso secojoquiaari puetunu Pueyaso muerasuucuarajanaa. <sup>22</sup> Cunora, Pueyasooocua pa catecanoriquia seetanujuanaa pa paniniutia nojuaja. Nojuaja pa secojoriquia, seetanujuanaa nocua pa tiuuniutia, maja quenaaja nocuaji pa taacanuunuta. Naa pa rupueriquia nojuaja, jatanishano jiuujiata, juhua poojiaacua Jesu nanaca majiriutiasano quishacari. Naajuhuj, puetunu sesa pa miishanojuanaa cuaara jiyanooshano quiiria, naatej, taa pa cuaqueyacaani, pa nanasacari maniniuniacu mohuacata. <sup>23</sup> Naa jaara moojinia tiuquinijosaaquiaari, niaari maninia pahuataquiaari pueya niquiara Jesuucua nia tiuuniujiniji. Nocua nia tiuushacari, niaacuajaari niishiya puetunu Pueyaso sequesanojuanaari pajaniyara tohuateenutaniya, pueyaracaanu shuquiriaatia pa quiniuria nata. Majaari nia taacanuunu nocuaji. <sup>24</sup> Parta Pueyaso pueyacia tacaajiaca pa quiriquia. Panijiaca pa quiniuria pa shiniujiutioriquia, maninia miijiaca pa quiniuriajuhuaj. <sup>25</sup> Noojiaqueya parta Pueyaso pueyari tari jitiqiuocanu maja na rerejonura narta Pueyaso pueyata. Majaari naa nia miiniujiuhuj. Maninia cutaraari pueyaracaanu pa rerejonura parta Pueyaso pueyata, pa shiniujiutioonura. Naa pa miriquia pueyaracaanu cutara, pa niishishacari pa Jiyaniijia tiuquiniuri tari catecanoya.

<sup>26</sup> Nia niishiri pueyanaa, maatia pa niishiniu nuhuaji seetanu Pueyaso rupaajanaa, paa jaara saaja sesa miijioquiaa tama pa panishacarijiaajani, ¿cancucua socua pocuara cusonu pacuterohua saajaniuhuj? Shaaqui. <sup>27</sup> Naa sacuaraatia miijiacani, nojori cuaara niishiiria, nojoriiri cocuaatia miya. Nojori jaara nojori jiuujia tacatoyaquiri sesa nojori miiniujiniji, nojoriiri jiyanoohua saniitiosaanutaniya. Narta Pueyaso paraata cojiritiasaanutaniya quejoonu mani quiqiuojiniaari pueyaracaanura. <sup>28</sup> Pueyano jaara Moisés Rootasano tojiyaquiquiaari, querajaa pueya jaara nocuara saquiriojotaquiaari, nojori sequesanoori seetanujuanaa quiquiaari. Naacuajitij, majaari nocua na taraajenu quishaaquiaari na mosaanura. <sup>29</sup> Moisés Rootasano tojiyashijiaca jaara naa miishaaquiaaricuaa, ¿paateeri jiyaniyanijia Pueyaso Niyanu soojeaca jiyanooshaanutaniya, na nanaca shootesaanu jiyatejaca juhua najuhuanaratej? ¿Noo pojoritiiri jiyanooshaanutaniyajuhuj, Pueyaso Sohuanuucua rimiaaquejaca sacuaraatiej? ¡Maja! Pueyaso Sohuanuuri nojori cumaquiniu paniriquiaa juucua. Jesu nanacacuajaari Pueyaso jiyanootiquiaari nojori, Pueyaso pueya nojori quiniuria juucua. Naacuajitij, Pueyaso Niyanu soojeaca pueyari socua jiyanoohua saniitiosaanutaniya Moisés Rootasano tojiyashijiaca pueyajiniji. <sup>30</sup> Paacuajaari tari tojiqiuiaari naa Pueyaso sequesaroni: “Janiyacujaari naminiani. Janiyari sesa miijiacaa saniitionutaniyani”. Naa naajiotasaaquiaarijiaariuhuj: “Pa Jiyaniijia Pueyasoori na pueya nequesoreenutaniya”. <sup>31</sup> ¡Jiyanoohua puereeta quiniutianiya cutaraari Pueyaso jiyanoonu ruuretajaca pueyara, Pueyaso nequesoresacari nojori!

<sup>32</sup> Pueyanaa, tariucuacaanu naquiya nia miishaanu nia niishiriquia, niaa jaara shushajanaa Jesuucua tiuquiaari. Naa pueya miitiasacari naquiya nijaniyatej, niaari juhuajaniya rejeretaquiaari saaja. <sup>33</sup> Noojiaqueya nijaniyajiniiniori cararaatia macaatishaaquiaari. Niaari pueya niquiara naquiya miishaaquiaarijuhuaj. Niarta Pueyaso pueya niquishacari naa nia miishaanutej, nojoriiri na puereyaquiniutia nia cojiqiuiaari saaja, niaacua nojori taraajesacari. <sup>34</sup> Naajuhuj, niarta Pueyaso pueyajinijinio jaara nujuatejosano quiquiaari nujuatejojuajinia, Jesu tojitiajaca nojori quiniucua, niaari nojoriicua tiuquijioquiaari, nojori nia cumanijianura

nocua nia taraajenuucua. Naajuhuj, nia paraa jaara nia jiiťiasano casami riutiocojoquiaari tama nojoririajaaja, nojori soosano Jesu pueya nia quiniuucua, niaari juhuajaniya nojoriria tarinitiaquiaari saaja. Niaari saaja shuquiriaatia quiquiaari nia niishishacari niaari jiyocuacaanu jiiťiaa socua maninia casaa cuno casamijiniji, pueya jaariuťiasano niajanijajinijini. Cuno, Pueyaso jiiťiasano niaaranoni, cunoori shaajeyashijia casami cutara. <sup>35</sup> Naatej, taa juhuajaniya naquiya miiniu rejeretajaca nia quiquiaaricua-jani, Pueyaso sequesanoocua tiuujia nia quiniuucua, naa Pueyaso sequesanoocua tiuujia nia quiriquia pueyaracaanu. Pueyasocuaajaari jiyanoħua maninia miiniutianiya nocua tiuuniu tarinitiaashijia. <sup>36</sup> Naquiya nia miishacari pueyaracaanu, juhuajaniya nia rejeretariquia saaja, maninia nia tucuatana puetunu Pueyaso panishano nia miiniurijanaa. Naacuajitij, niaari puetunu Pueyaso sequesanojuanaa masenutaniya, pueyaracaanu shuquiriaatia nia quiniuria. <sup>37</sup> Tariucuacaanu Pueyaso sequesanoocuaajaari naa naajiotasano quiya:

“iNiaaj! iQuera tiuquiya pueyacua Niriquiano! Maja na tarishiniu. <sup>38</sup> Cua jiyanooshano pueyari pueyaracaanu rishijacara jatanishaanutaniya saaja Quiyanuucua nojori tiushacari. Saniniuujia, tamonu pueyano jaara nocua tiuuniu tarinitiare, nojuajaari cua soosano pueyano quiniutianiya”.

<sup>39</sup> Cuno pojoriiri saniitiosocoriquiano seetanujuanaa. Pajaniya saniniuujia, paa cutaraari maja jiyano pueyajinijinioni. Paacuajaari pa Jiyaniijiaacua tiuujiacani, pueyaracaanu nata pa quiniuria shuquiriaatia.

## 11

### *Pueyasooocua tiuuniujiniji pohuatasano*

<sup>1</sup> Pueyaso sequesanoocua pa tiushacari, paari niishiyani paari puetunu Pueyaso sequesanojuanaa masenutaniyani. Nocua pa tiushacari, paari maatia niishiyani puetunu na sequesanojuanaa pajaniyarano pa niquishoo casaani, cunoori seetanujuanaa quiya. <sup>2</sup> Noojiaqueya pa supuetanaajinijiniori seetanujuanaa Pueyaso sequesanoocua tiuujia quiquiaari. Naaratej, Pueyasoori nojorijiniji naa sequequiaari: “Cuno pojorini, nojoriiri maninia cua pueya, cua sequesanoocua nojori tiuuniuucua seetanujuanaa”.

<sup>3</sup> Pajaniyara naajuhuj. Tariucuacaanu Pueyaso Rupaacua pa tiushacari, paari niishiyani Pueyasoori jiya shipiniquiaari saaja na pocuanuta. Naacuajitij, puetunu pa niquishano casaajanaari shipinishaaquiaari niquishoo casaajiniji.

<sup>4</sup> Supuetana Abel tiuuniuucua Pueyasooocua, Pueyasooocua na catijiasanoori socua maninia quiquiaari Pueyasora tarajanu Caín catijiasanijiniji. Naa Abel tiuuniuucua Pueyasooocuatej, Pueyasoori na jiyatequiaari maninia na pueyano na quiniuria. Pueyasoori Abel catijiasano timitiaquiaari, nocua Abel tiuuniuucua. Cunora, tarajanu Caínri Abel moquiaari. Naajaa, naa macu na quishacaritij, nojuajaari pa niishitiojijajaa Pueyasooocua pa tiuuniuria taa nojuaja tiuquiaricuaani.

<sup>5</sup> Supuetana Enoc quiniuucua Pueyasooocua tiuujia, Pueyasoori puetunujuanaa na riquiaari jiyocuacaanu, mijiria na shaajeyaquiniuucuaaji. Narta pueya pajesacari nojuaja, majaari tari na quiniu quiquiaari. Pueyasoori tari na riquiaari. Tariucuacaanu Pueyaso Rupaajinia, nojuajinijiiri pohuatahiyacuaaja, Enocnaari Pueyaso timitijia pueyano quiquiaari mijiria na quishacarijia. <sup>6</sup> Seetanujuanaari, paa jaara Pueyasooocua tiuyashijia quirini,



majaari pa naata timitiniu Pueyaso. Naacuajitij, cante Pueyaso niishiniuucua jiaatiaani, nojuaja cuaara tiuuria Pueyasoori seetanujuanaa quijia. Nojuaja cuaara tiuuriajuhuaj, Pueyasoori na secojonuujuaca tojiquiaa. Nojori panishano miiquiaa nojoririajaariuhuj.

<sup>7</sup> Pueyasoori supuetana Noé numootequiaari nojuajaari nio jiya pa-jaashitianiniutianiya, puetunu mijiria sesa miijiacajanaa na shaajanura. Pueyasoori na sequequiaarijuhuaj puereetuuca buque na shipininiuria tii na tacatajara pajaacuaji. Jiyacaritij, Noeri maja na niishiniu quijia pajaa. Naajaa, Pueyaso sequesanoocua na tiuuniuucua, nojuajaari Pueyaso tojiquiaari. Naacuajitij, nojuajaari necocuata, puetunu necohuatajanaa cureequiaari, necohua niquiocohuatajuhuaj. Puetunu narta mijiria quijia pueyajanaari cusonuquiaari pajaajinia, nojori tiuyaquiniuucua Noé pohu-atasanooocua Pueyasojiniji. Noé cutaraari juhua sesa miyashijara jiyate-saaquiaari pueyaracaanu Pueyasota rishijara na quiniuria, Pueyasooocua tiujia na quiniuucua.

<sup>8</sup> Abrahamri Pueyasooocua tiuquiaarijuhuaj. Pueyaso sequesacari nojuaja tamonu jiyajiniara na pacunura, Abrahamri na tojiquiaari. Tama na jiyajinijiaaja na quiasacari, majaari na niishiniu quiquiaari tee cuniquiria na quiaani. Nojuajaari saaja niishiquiaari Pueyasoori na quijia na niquitionutaniya tama na jiyaranojuaja. <sup>9</sup> Pueyaso niquitiosocoriquiano jiyajinia na tiuquishacari, Abrahamri cuno jiyajinia quiquiaari juhua ru-cuanejojua pueyano. Abrahamri juhuanujuaja maja cuno jiya camaru na quiniu quiquiaari. Naajaa, Pueyaso sequesanoocua tiujia quiquiaari pueyaracaanuuri. Nojuajaari saaja seya cajacajiniji shitiasano suhuorotujinia quijia quiquiaari pueyaracaanu. Abraham niyanu Isaacri naa quijia quiquiaarijuhuaj, Isaac niyanu Jacobonio. Pueyasoori cuno pojori sequenu pacutequiaarijuhua coteenujanaa na sequesano Abraham. Naacuajitij, nojoriiri Pueyaso sequesanoocua tiujiaca quiquiaari pueyaracaanujuhuaj. <sup>10</sup> Pueyaso jaara Abraham sequequiaari, nojuajaari pueyaracaanu na quijiarano quiquio na niquitionutaniya, Abrahamri niishiquiaari Pueyasoori miriqui sequeriquiaa tama na shipinishano tiacajinijiaaja. Cuno pueyaracaanu rishijia tiacaari Pueyaso niishiriojosano tiaca na saquiriojosano pueyarano. Abrahamri cuno tiacara sashijia quiquiaari pueyaracaanu, Pueyaso sequesanoocua na tiuuniuucua.

<sup>11</sup> Naajuhuj, seetanujuanaa Pueyaso sequesacari Abraham, nojuaja na muetutenutaniya, Abrahamri jiyacari tariucua saaquiano quiquiaari. Neco Saaraari puera motaja quiquiaarijuhua na manajenura. Naajaa, Abrahamri niishiquiaari Pueyasoori cumaacaraca quijia na sequesano na tohuateenura. Naa Pueyasooocua na tiuuniuucuatej, Pueyasoori na cumaquiquiaari neco na manajonura. <sup>12</sup> Naacuajitij, mueya shipiniyashijia saaquianoori mueya mueratequiaari. Cuno neyanuucujinijo supueno pueyari queraatiara canequiaari, queraatiate juhua riya, serojiyaquishoo, juhua shoniniacu caminia shuriuquico paajia jaaquia.

<sup>13</sup> Puetunu cuno pa supuetanaajanaari Pueyasooocua tiujiacaja shaajecoquiaari. Nojoriiri juhuanujuaja maja na jiitianu quiquiaari seetanujuanaa Pueyaso sequesano nojori na niquitiosocoriquiano. Naajaa, seetanujuanaa nojori tiuushacari Pueyasooocua, nojoriria, Pueyaso sequesanoori juhua tariucua tucuaaanuji nojori niquishano quiquiaari. Nojoriiri na timitiaquiaari juhua tariucua nojori jiitiasano. Naacuajitij, nojoriiri juhujaniya quiquiaari juhua rucojuaca nojori quishacari mijiria. Nojoriiri niishiquiaari, mijiria nio jiyani, majaari seetanujuanaa nojori quiquiorano. <sup>14</sup> Naacuajitij, paari niishiyani nojoriiri tamonu jiya jiitianuucua



jiaatiariquiaa, pueyaracaanu nojori quiquiorano cutara. <sup>15</sup> Nojori jaara saaja mijiria jiya camaruhua quiniuria panijiaca quiquiaari, nojori maara na supuetujua jiyajiniara riujiuuquiaariuhua. <sup>16</sup> Saniniuujia, nojori cutaraari socua maninia jiya jiiitianuucua jiaatiaquiaari, pueyaracaanu nojori quiquiorano cutara. Cunoori jiyocuacaanu quiquio, Pueyaso jeenucuasano nojoriria. Naaratej, majaari Pueyaso caririquiniu quiquiaari nojori sequesacari: “Pueyasoori canaa Jiyaniijia”. Nojuacuajaari tari jeenucuasano tiaca jiiitiaa nojoririano jiyocuacaanu.

<sup>17-18</sup> Pueyaso sequesano Abraham na mueratesano mueya jaara tari mashajaniyujua quiquiaari, Pueyasoori Abraham saniquiaari, na niishiniuria nojuajate seetanujuanaa na tojijia. Naacuajitij, na sequequiaariiri cuaara na panishano niyanu moora, nocuara na catijasocoriguiano. Cuno neyanu Isaaccuajaari Pueyaso sequesano quiquiaari, nojuajiniji canenutaniyari queraatia pueya. Naajaa, Pueyaso sequesacari Abraham, neyanu na monura, nojuajaari maja na ruuretanu quiquiaari Pueyaso. Nojuajaari tari Pueyaso sequesanoocua tiuuriquiaa saaja. <sup>19</sup> Seetanujuanaa Abraham tiuuniuucua Pueyasooocua, nojuajaari niishiquiaari Pueyaso na naata neyanu Isaac samiitianiniuhua, nojuaja jaara na more. Naacuajitij, quera Abraham mosacari neyanu Isaac, Pueyasoori nocuaji na tenujuquiaari, tari maatia na niishishacari Abrahamri seetanujuanaa na tojijia. Naacuajitij, Abrahamri neyanuniyujua jaatucuquiaariuhua shuquiriaatia na quiquiojiniohuara, juhua macu samiitianishanohua. Naa Abraham miishanoni, cunoori miriqui quiya pajaniyara taa Pueyaso miiquiaari Neyanu quiari naatajacuaani.

<sup>20</sup> Isaac tiuuniuucua Pueyasooocujuhujaj, nojuaja jaara saaquiano quiquiaarijuhuaj, nojuajaari necohua sequequiaari, Jacobo, Esaúnio: “Pueyasoori jiyanhua maninia miiniutianiya niaara, niaacuajinio supueno pueyano, taa na sequequiaari janiyacujani”.

<sup>21</sup> Jacoboori Pueyaso sequesanoocua tiuujia quiquiaarijuhuaj. Naacuajitij, quera na cusonu panishacari, nojuajaari neyanu José niquiohua sequequiaari: “Pueyasoori jiyanhua maninia miiniutianiya niaara, niaacuajinio supueno pueyano”. Naa na sequenu nuhuaji na jiuhuatej, nojuajaari na natacaacua tanishiquiaari. Pueyaso secojoquiaari na timiniutiaari, na niishishacari Pueyasoori pueyaracaanu miiquiaa puetunu na sequesanojuanaa.

<sup>22</sup> Jacobo niyanu Joseeri Pueyaso sequesanoocua tiuujia quiquiaarijuhuaj. Naacuajitij, quera na cusosacari, nojuajaari niishiquiaari Pueyasoori tamacari Israel pueya mashiquiniutianiuhua Egipto jiyajiniji. Naacuajitij, nojuajaari narta Israel pueya sequequiaari nocua nojori taraajenura. Nojuajaari nojori sequequiaari maja nojori tiujianura na nucuhua Egipto jiyajinia, nojori jaara quiojorohua Pueyaso niquitiosocoriguiano jiyajiniara.

<sup>23</sup> Moisés queya quiniuucua Pueyasooocua tiuujia, nojoriiri Moisés jamoquiaari jaara shusha rasaanquiaari, mueya maniniuniyujua na quiniuucua. Naa na shocojoquiaariiri jiuujianaraca raca, pueyaracaanu jamosano na quishacari. Egipto jiyaniijia Faraónri tarijia sequequiaari, puetunu Israel pueya niquiochua shusha roosano canujuanaa cuaara moojinia quejoosaria. Naajaa, nojoriiri cuno sequesano tojiyaquiaari nojori puereyaquiniutia saaja, Pueyasooocua tiuujia nojori quiniuucua.

<sup>24</sup> Naajuhujaj, Moisés quishacari tariucua cumantumaca, Pueyasooocua tiuujia na quiniuucua, nojuajaari na canashitinia Faraón niyatu tamacaquiaari. Nojuajaari tama sequequiaarijiaaja: “Majaari Faraón jinianu cua quiniu paniniu. Janiyacuajaari Israel pueyanoni”. <sup>25</sup> Egipto jiyaniijia jinianu na

quiniuucua, Moisésri na naata juhuajaniya miiniu quiquiaari puetunu na miiniu panishanojuanaa, shuquiriaatia na quiniuria. Naajaa, nojuajaari niishi quiaari cuno shuquiriaatia quiniuuri saaja rupaquijia mijiria. Nocuaji, majaari na tamacanu quiquiaari narta Israel pueya, shuquiriaatia na quiniuria tamajaaja. Nojuaja cutaraari narta Israel pueyacua taraajequiaari, Egipto jiya jiyaniijia poonijiotenuucua nojori puera. Cunora, nojuajaari niishiriojoquiaari nojuaja cuara cojiritiasaaria naquiya miishaanu narta Israel pueyatajuhuaj. <sup>26</sup> Pueyaso sequesanoocua tiuujia na quiniuucua, nojuajaari niishi quiaari Pueyasoori na tojitiajaca miiniutianiya maninia pueyaracaanu cutara. Nocuaji nojuajaari saquiriojoquiaari narta Israel pueyata soosano na quiniuria mijiria, maja puetunu Egipto casami jiiitaja na quiniuria mijiria, Faraón jinianu na quiniuucua.

<sup>27</sup> Pueyaso sequesanoocua tiuujia Moisés quiniuucua, na nuhuaji, nojuajaari Israel pueya jaatiaquiaari Egipto jiyajiniji. Majaari na puerenu quiquiaari Egipto jiya jiyaniijia juaashacari jiyanohua. Seetanujuanaa Moisés tiuushacari na ni quiaquishoo Pueyasooocua, nojuajaari Pueyaso ni quiquiaari noojiata, juhua na shuriucua quiyano pueyaracaanu. Naacua-jitij, Moisésri tama na cuaqueyajaaja cumaquiquiaari maja na tarinitianura miiniu Pueyaso sequesano nojuaja. <sup>28</sup> Quera Israel pueya mashishacari Egipto jiyajiniji, Pueyasoori Moisés sequequiaari: “Janiyari niucua cua seru jiyaronutaniyani, cua tojiyashijiaca jiyapueranuhua na puecoonura puetunujuanaa. Nocuaji Israel pueya quia numootere, borrego nanaca nojori shuquiuiutianura na tia tohuateyaji, maja nia jiyapueranuhua cusojuaasaanurajuhua”. Moisésri Pueyaso sequesanoocua tiuquiaari. Naacua-jitij, puetunu Israel pueya jiyapueranuhua jinijiniojuanaani, majaari que-naaja niquiriyatu niyanu mosaanu quiquiaari cutara.

<sup>29</sup> Israel pueya mashishacari Egipto pueyacuaji juucua, Naatunacu jiyani-ishano caminiaari nojori ritiaquiaari saaja. Nocuaji, Pueyasoori caminia raquitiaquiaari nojori nuura. Na nuhuaji, Pueyasoori Moisés sequequiaari puetunu nojorijianaa cuara niuutiaara caminia taquijiria. Israel pueya tiuuniucua Pueyaso sequesanoocua, nojoriiri joojuashiquio niuutiaquiaari juhua puereetunu nucuaco. Egipto jiya jiyaniijia soldadohua jaara juhua nojori niuutianu paniquiaarijuhuaj, nojoriiri saaja shushiniuuquiaari.

<sup>30</sup> Israel pueya tiuquishacari Pueyaso ni quitiosocoriquiano jiyajinia, nojoriiri na paraa Jericó tiaca shocua camarucuneetaquiaari siete juuca, naatej, taa Pueyaso rootaquiaari nojori miiniuriacuajani. Naa nojori tiuuniucua Pueyaso sequesanoocuatej, Jericó tiaca shocua sohuacaari puetunu pojotaquiaarijianaa. <sup>31</sup> Puetunu Pueyaso tojitiaashijiaca jianaari puecoosaaquiaari. Rahab cutaraari jiyanooshaaquiaari. Rahabri naa jiyanooshaaquiaari Israel pueyajinijinio namuenujunaa na jamojuonuucua tarijia narta pueyacuaji. Rahabri naa maninia miiquiaari Pueyasooocua tiuujia na quiniuucua. Naaratej, Israel pueyari cuno paanatu jiyanoocua.

<sup>32</sup> ¿Teyano pa supuetanaajiniji cua pohuatanutaniya nijaniya socuani? Socua queraatia pa supuetanaari Pueyasooocua tiuujia quiquiaari. Tariucuaaja cua pohuatasano, maninia nia niishiniuria Pueyasooocua tiuujia pueyari Pueyaso jiyanooshano. Naajuhuaaj, majaari jeya cua quiniu cua pohuatanura maninia nio pojorijiniji: Gedeón, Barac, Sansón, Jefté, David, Samueljinijinio, socua narta Pueyaso sequesano caminiujuunaa pueyajinijinio. <sup>33</sup> Pueyasooocua tiuujia nojori quiniuucua, nojoriiri tamasa jiyani-ijianucua miaquejoquiaari na jiyajiniji. Pueyasooocua tiuujia nojori quiniuucua, nojoriiri maninia jiyaniujanucua quiquiaari, maninia na jiiitanura

narta Israel pueya. Pueyaso sequesanoocua tiuujiaa nojori quiniuucua, nojoriiri Pueyaso sequesano nojori na niqutiosocoriquiano masequiaari. Pueyasooocua tiuujiaa nojori quiniuucua, juurunu sareya rupaari juhua seecujutasaquiaari saaja, maja na soonura nojori. <sup>34</sup> Pueyasooocua nojori tiuuniuucua, nojori jaara manijinia quejoosaaquiaari, nojoriiri maja na catenu quiquiaari. Pueyasooocua tiuujiaa nojori quiniuucua, nojoriiri na paraacuaji mashiquiaari saaja, maja na puecoosaanura nijiniaquetucujaja mueruuta. Pueyasooocua tiuujiaa nojori quiniuucua, sasaca pueyari jiyanoehua cumaacaraca quijiacara quiquiaari. Pueyasooocua tiuujiaa nojori quiniuucua, nojoriiri jiyanoehua cumaquishaquiaari na paraa nojori miaquejonura, na paraa nojori mashiquiniuria nojori jiyajinjijihuhaj. <sup>35</sup> Naajuhuj, Pueyasooocua tiuujiaa maajipohua quiniuucua, nojori macuuri samiitiacoquiaariuhua nojoriria.

Tamasacaari jiyanoehua taraatia miishaaquiaari Pueyasooocua tiuujiaa nojori quiniuucua. Cunora, nojori paraa jaara nojori quiooquiaari, nojoriiri puecoonura miananajosaaquiaari nojori jaara Pueyaso tojiniu tarinitiaaquiri. Nojori jaara na paraa sequesano tojiquiaari, nojori maara cartesaaquiaariuhua. Pueyasooocua tiuujiaa nojori quiniuucua, nojoriiri saaja paniquiaari nojori cuaara puecoosaaquiaari, naajaa, jiyanoehua naquiya na miiniutia. Nojoricuajaari niishiquiaari, Pueyasoori nojori samiitianijionutaniuhua, jiyanoehua shuquiriaatia nojori quiniuria pueyaracaanura cutara. <sup>36</sup> Tamasaca quiniuucua Pueyasooocua tiuujiaajuhuj, nojoriiri cararaatia macaatishaaquiaari, jiyanoehua majacusaquiaarijiaariuhuj. Naajuhuj, tamasaacari cumayocua shipinishano casaata morojosaaquiaari. Nujuatejojuajinia nujuatejosaaquiaariiri. <sup>37</sup> Tamasacaari saitia jacusaquiaari na puecoosaanura. Tamasacaari na cajiniocua rashiquiojosaaquiaari jacaria jiyaratajata juhua juhuana, socua jiyanoehua naquiya na miishaanura. Naajuhuj, tamasaacari nijiniaquetucujaja mueruuta puetujusaquiaarijianaa piyonu. Naajuhuj, tamasaacari quiniuucua Pueyasooocua tiuujiaajuhuj, nojoriiri juhua taanuusano rucoojoquiaari puetunu tiquiyocujanaa. Casamiijiuniucua nojori quiniuucua, nojoriiri saaja borrego shoque, cabra shoque cusupuequiaari nojori cushishocoriquiano. Nojoriiri taraatia miitiasano quiquiaari, naquiya miishanojuhuj. <sup>38</sup> Juhua taanuusano nojori quiniuucua, nojoriiri juhua tashuquioono rucoojoquiaari cariquia jiyajinia, tuhuananuhujianio. Tiaajunucua nojori quiniuucua, nojoriiri saaja raaco maquiyonuujuaca quiquiaari. Mijiria quijiaa pueyari nojori jiyatequiaari juhua najuhua quijiaa pueyara. Naajaa, nojori cutaraari seetanujuanaa Pueyaso timitiasano pueya quiquiaari, nocua tiuujiaa nojori quiniuucua.

<sup>39</sup> Pueyasocujajaari nojori jiyanoocua, seetanujuanaa nojori tiuuniuucua nocua. Naajaa, nojoriiri juhuanojuaja maja nojori masenu quiquiaari seetanujuanaa Pueyaso sequesano nojori na niqutiosocoriquiano. <sup>40</sup> Pueyasoori nio pa quishacari nojori sashitiyajaara, jiyanoehua maninia na miishacari pajaniya na Sohuanuta, Neyanu Jesucristooocua pa tiuuniuucua. Na nuhuaji, Pueyasoori puetunu nojoritianajanaa pa cojiritianutaniya jataniniu tojetaarucujanaa maninia mijiaca pa quiniuria, na shuriucua na rijiosacari puetunu pajaniyajanaa.

## 12

*Jesu miishano pa niishiriojoriquia, naquiya rejeretajaca pa quiniuriajuhuj*

<sup>1</sup> Naa pa niishishacari taa queraatia pueya maninia miiquiaari Pueyasooocua tiuujiaa nojori quiniuucuaacuaani, cunora, tama pa cojetasano

najuhuana casaa pa tarinitiariquia. Tarinitiashiyari puetunu najuhuana casaajanaa, teyanooocua pa cojequiaa Pueyaso panishano pa miyaquiniuriacuajani. Naajuhuaaj, puetunu sesa miiniujianaa pa tarinitiare, puetunu pa cumaacajanaa pa jiitianura, juhuajaniya rejeretajaca pa quiniuria. Naacujiti pa naata maninia tucuatunu puetunu Pueyaso panishanojuanaa pa miiniuria. <sup>2</sup> Jesu miishano pa niishiriojoriquia pueyaracaanu. Nojuajaari tojetaarucujanaa na Que Pueyasooocua tiuujia quiquiaari. Nojuajaari niishiquiaari, naquiya na miiniu nuhuaji, na Queeri jiyanoehua shuquiriaatia quijiara na jiyatenutaniya. Naaratej, nojuajaari juhuajaniya rejere-taquiaari naquiya na miiniu niyacutesanojinia, cararaatia na miishaanujuhuaaj. Cunora, nojuajaari na Que miaquetajara cajiya, Jiyaniijiajanaa na quishacari.

<sup>3</sup> Majaari nia niyajetanu taa Jesu rejeretaquiaari juhuajaniyacuaani, pueyaracaanu sesa miijiaca paracaashacari nojuaja. Nocua nia niishiriojoriquia, niaa mariqui Pueyaso tojinu tarinitianu paniriiri nia taraajenuta naquiya nia miishacari. <sup>4</sup> Niaacuajaari naquiya miishaquiaa, Jesucristooocua tiuujia nia quiniucua. Naajaa, majaari pa Jiyaniijia nia tacartanu, naquiya nia miyaquishaanuucujaji. Nia rejeretariquia saaja. Majaari juhuanojuaja nia puecoosaanu quiquianu na tojitiajaca nia quiniucua. <sup>5</sup> ¿Niaateeri Pueyaso rootasano niyajetarucuaa tari, na rootasano pajaniya juhua necohuaaja? Naa sequeyari:

“Quiyanunaa, majaari cua rootasano quia soonu, janiya jaara quia niishitiojiya naquiya cua miitishacari quiajaniyani. Janiya jaara quia nacasure socua maninia miijia quia quiniuriani, majaari cucujaji pishiniu. <sup>6</sup> Quia Jiyaniijia cua quiniucua, janiyacujajari cua panishano pueyano jiuujayashijiani sesa na miishacari. Naajuhuaaj, janiyari cua niyanura cua jiyatesano pueyano saniitiojuani jaara sesa miiriquia”.

<sup>7</sup> Naaratej, juhuajaniya na rejeretajaca nia quiriquia. Pueyasoori juhua necohua nia niishitiojiya, maninia na canashitiniuria nijaniya, seetanujuanaa necohua nia quiniucua. ¿Pueyanoteeri nareja niquijia neyanu, neyanu jaara na tojiyashijia quiriquia? ¡Maja! <sup>8</sup> Naajuhuaaj, Pueyasoori puetunu necohuarajanaa na jiyatesano pueya saniitioquiaa sesa nojori miishacari. Naacujitij, Pueyaso jaara nareja niquiriquia nijaniya sesa nia miishacari, cuno maara quiri maja seetanujuanaa necohua nia quiniucua, juhua tamonu queecuajinio nia quishacari. <sup>9</sup> Naajuhuaaj, naatujoori pa quishacari, pa queyari pa majacujua, nojori pa tojiyaquishacari. Majaari cunora nojori rerequetejaca pa quiniu quiquiaari. Naacujitij, pa Que Pueyaso jaara pa saniitioriquia, ¿paateeri na rerequetenutaniyani? ¡Maja! Nojuacuajaari seetanujuanaa pa sohuanu Que, pueyaracaanu rishijia pa quiniuria. <sup>10</sup> Pa queyari pa canashitioquiaari taa nojori paniquiaaricujani. Nojori rootasacari pajaniya, nojori saniitiosacari pajaniya, cunoori quiquiaari saaja mijiria pa quiniuria maninia. Pa Que Pueyaso saniniuujia, nojuajaari pa saniitioquiaa seetanujuanaa maninia miijiaca pa quiniuria, juhua nojuaja pa quiniuriajuhuaj. <sup>11</sup> Seetanujuanaa, puetunu saniitionujuanaari taraatia pajaniyara. Majaari pa timiniu paa jaara majacusaareni. Naajaa, na nuhuaji, paa jaara na ruuretaaquirini, paari socua maninia miijia jatanishaaquiaani, socua Pueyaso tojiijara pa quiniuria juhuajaniyajuhuaaj.

*Jiyanoehua cocuaatiaari Pueyaso pa tojiyaquishacari*

<sup>12</sup> Naacuaajitij, majaari nia pishiniu pueyanaa, Pueyaso saniitiosacari nia-janiya. Nocua nia tiuuri saaja. Nioojiaca nia cumaquiriohua. <sup>13</sup> Saaja Jesucristo rupaa tojijiaca nia quiri, jatarinitiaja Pueyasoocua tiuujiaa mariqui noojia niquijotereeri. Nojori cuaara saniya cumaquishano quiriira cutara.

<sup>14</sup> Tama nia cuaqueyajaaja nia cumaquiriquia, juhuajaniya quijiaca nia quiniuria puetunu pueyatajanaa. Majaari juayonuujutunu. Nia saniriquia seetanujuanaa sesa miyashijiaca nia quiniuria. Saaja noo pojori cutaraari pa Jiyaniijia niquniutianiya, seetanujuanaa maninia miijiacara jatanishano pueyatej. <sup>15</sup> Pueyasocuaajaari pa jiyanoojia. Tama nia cuaqueyajaaja nia cojuare niaa mariqui Pueyaso ruuretareeri na naacunu panishacari niajaniya. Nojuajaari cumaacaracacuaaja na cumaquiniuria niajaniya nia panishacari. Naacuaajitij, niarta Pueyaso pueyano jaara juaatishaare tamonu miiniucua sesa nojuaja, nojuaja nia naacure na jiyanooniuria sesa na miinia. Jaara naa miyaquiritij, cuno pueyano juaaquiacaari narta pueyacua paaquenutaniya na sesonura queraatia pueya. <sup>16</sup> Naajuhuaaj, tama nia cojuatooriquiaajaaja. Naa nia miitiooriquia tamonu niajanijiniinio mariqui Pueyaso sequesano na niquitiosocoriquiano pajaniya soojeera quiriiri, saniya tama na cuaqueyajaaja na shuquiritiniuria mijiria. Supuetana Jacobo puerana Esauucuaajaari naa miiquiaaritij. Tamacari na miaajesacari, nojuajaari Jacobo sequesquiaari: “Cua tarajanunaa, pa que niquitiosocoriquiano janiya, na jiyapueranu cua quiniucuaani, cuno cuaara quiriira quira, quiaa jaara quia sumatuujiniji rupore quiria. Jiyanohua miaajeyanijia”. <sup>17</sup> Niaacuaajaari niishiya, na nuhuaji, Esauuri paniquiaari na que secojonura nocuara, jiyanohua maninia Pueyaso miiniuria nojuaja, na que jiyapueranu na quiniucua. Na queeri na ruuretaquiaari saaja. Esauuri jiyanohua na que nenecojoquiaari na nujuquenuta. Naajaa, na queeri maja na naata jataniniu quiquiaari tariucua neyanu Jacobo na sequesano Pueyaso niqiuara.

<sup>18</sup> Nio pa quishacari, pajaniyara, Pueyasoori maja juhua tariucuacaanu na quishacari pa supuetanaa Israel pueyata. Jiyacaritij, Pueyaso jaara Moisés tacaniquiaari Sinaí tuhananuucua, Moisés na niishitiojonura na rootasano na pueyara, tuhananuuri jiyanohua puereeta niquishano quiquiaari. Tuhuananuuri puereeta noshiriquiaa. Na najacaari tacariquiaa muerucatej. Jiyanohua ninishiquiri quiriquiaajuhuaaj. Paratuuri jiyanohua piyarojoriquiaa puereetajuhuaaj. <sup>19</sup> Trompeta jonenenuunuuri jiyanohua tojishaariquiaa. Pueyaso pocuanuuri jiyanohua tojishaariquiaajuhuaaj. Israel pueya tojishacari Pueyaso pocuaano, nojoriiri jiyanohua pueretuquiaari. Naaratej, nojoriiri Moisés sequetuquiaari maja socua Pueyasojuanaa pocuanura nojoriicuara. <sup>20</sup> Nojoriiri maja socua na rejeretanu quiquiaari puera puereeta Pueyaso sequesacari nojori. Pueyasoori jiyacari naa sequeriquiaa nojoritij, cuno tuhananuucua nojuajanaa quiniucua:

“Cante nio tuhananu rupueyani, cuno pueyano cuaara mosaaria saitia jacusano, cashanata soj. Naa miijia seru cuaara naa puecoosaariajuhuaaj”.

<sup>21</sup> Puetunu Israel pueya niquishanojuanaari jiyanohua puereeta quiquiaari seetanujuanaa. Moisésjanaari na puerequiaarijuhuaaj. Nojuajaari na puerenuta sequesquiaari: “Cua puerenuta tetecanijia”.

<sup>22</sup> Nio pa quishacari saniniuujia, majaari pa catecanonu quiquiaa cuno tariucuacaanu pueya pueresano tuhananuucua. Jesucristo cusonucua pocuara, paari Pueyaso quiquiojiniajanaa tiuquitiaquiaani. Cuno na quiquio sesaari miriqui sequeshiya “Sión tuhananu”. Na pueya pa



quiniuucua, nojuajaari jiyocuacaanu pueyaracaanu pa quijiarano tiaca jitiaa. Cunoori seetanujuanaa jiyocuacaanujinio Jerusalén tiaca. Naacua-jitij, paari jiyanoehua queraatia Pueyaso seya rupuequiaani, Pueyaso pa maniniuuhuaqueetanura nojoritajuhuaaj. <sup>23</sup> Paari tii rerejonutaniya puetunu parta Pueyaso pueyatajanaani. Pueyaso saquiriojosano pueya pa quiniuucua, pa sesacaari jiyocuacaanu Pueyaso nequesoreetuneejinia naajio-tasano quiya. Paari Pueyasocua catecanoquiaani. Nojuajaari puetunu pueya nequesoreenajanaa. Jesucristo niyacarijia Pueyasocua tiuujiaa sohuanuhuari tii quiyajuhuaaj, canapue Pueyaso jiyatequiaari tojetaarucujanaa sesa miyashijiacaracuajani. <sup>24</sup> Jesucristoori tii quiyajuhuaaj. Nojuajaari tama na cusonutajaaja Pueyaso jiyanootiquiaari nocua tiuujiaa. Tama na nanacajaaja na shootenuucua pocuarajuhuaaj, paari cunota jee-quejosaaquiaari tojetaarucujanaani. Naacua-jitij, Jesu nanacaari jiyanoehua socua maninia Abel nanacajiniji. Caín monuucua tarajanu Abel, Abel nanacaari Pueyaso shiniujiya na mona cuara mosaariajuhuaaj. Jesucristo nanaca saniniuujia, cunoori Pueyaso pa jiyanootiquiaacujua.

<sup>25</sup> Cunora pueyanaa, tama nia cuaqueyajaaja nia cojuare maja nia ruuretannura Jesucristo Rupaa. Tariucuacaanu, pueyari jiyanoayaquishaquiaari nojori ruuretasacari Pueyaso sequesano, nojuaja jaara nojori piriyojocuaari Sinaí tuhuananujiniji. Nojoriiri jiyanoayaquishaquiaari nojori tojiyaquiniuucua mijiria Pueyaso quishacari na sequesano. Nojori jaara naa jiyanoayaquishaquiaaricuaa, nio pa quishacari saniniuujia, ¿paatucua taa jiyanooshaariquia pa ruuretasacari Pueyaso quiarijiani, jiyocuacaanuji na piriyojosacari pajaniyani? <sup>26</sup> Pueyaso pocuasacari Sinaí tuhuananujiniji, jiyari na pocuasacari tetecaquiaari. Quiarijia saniniuujia, Pueyasoori seetanujuanaa sequeya: “Janitari socua caminiutianihua jiya jiuuquiutianuni. Maja saa jiyaja. Jiya cajiniocuanio. Jiyacunojuanaari quiniutianiya naa cua miiniu”. <sup>27</sup> Naa na sequesacari taa socua na caminiutianihua jiya jiuuquiutianuni, naacuajiti paari niishiyani, puetunu na shipinishano casaajanaari shaajeyaquishaquiji shaajenutaniya. Saaja noo casaari cureenutaniya, maja na naata pootiosano casaatej. <sup>28</sup> Quiarinio quiquio, Pueyaso shipinishano na niqutiosocoriquiano pajaniyani, cunoori maja na naata shaajasaanu quiniutianiya cutara. Paari jiyaniijianucua quiniutianiya tii pueyaracaanuni. Pa Pueyasoori jiyanoehua maninia miiniutianiya pajaniya. Cunora pa shuquiritiare nojuaja. Paari na shuquiritiyani pa timitiasacari nojuaja. Naacuajitij, nojuaja pa timitiare jiyanoehua pa paniniutia nojuaja, pa puerenutano. <sup>29</sup> Nojuajaari puereeta mani, Neyanu ruuretajaca shaajaja, sesa pa miishano catijiajajuhuaaj.

## 13

### *Taa pa miyani Pueyaso pa timitiniuria*

<sup>1</sup> Majaari panitioonu nia tarinitianu. Naa Pueyaso pueya nia quiniuucuatej, pueyaracaanu panitioojuaca nia quiriquia. <sup>2</sup> Naajuhuaaj, majaari rucoojuaca ruuretannu, niaacua nojori tiuquishacari. Nojori panijiaa nia quiriquia. Noojiaqueya pa supuetanaajinijiniocujaaari Pueyaso seya masuquiciaari na tiacora, nojori jiyanishacari nareja pueyano naasucua.

<sup>3</sup> Nujuatejosano pueyacua taraajejaca nia quiriquia. Tama nia cuaqueyajaaja nia jiyatere juhua nojoritia nujuatejosanojuhuaaj, nojoriicua nia taraajenura seetanujuanaa. Naquiya miitiasano pueyacua taraajaja nia quiriquiajajuhuaaj. Nia niishiriquia, niaari na naata naa miitiasaanujuhuaaj.

<sup>4</sup> Pueyasojuanaacuaajaari pa niishitioquiaari pa camitioonura. Cunora, camitioonon pueya cuaara saaja neyacata, necocuata quijia quiiria. Cante camiyojuani, nojuaja cuaara tama na cuaqueyajaaja cojuara maja narta pueyano niqiuocua na numuetucunura, na camishoo maajinio. Nia niishiri, Pueyasocuaajaari naa sacuaraatia miijiaca saniitionutaniya.

<sup>5</sup> Majaari cumaneeca porocua nia quiniu tama niaarajaaja nia jiitianura. Juhujaniya quijia nia quiriqia nia jiitiasanota. Nia niishiri, Pueyasocuaajaari sequequiaari: “Majaari cua cartenu quiniutianiya nijaniya juhua japueyojua nia quiniuria. Majaari quenaaja cua tiujianu quiniutianiya nijaniya”. Cunora pueyanaa, maja nia tacaani. <sup>6</sup> Naa seetanujuanaa na sequesanoocua pa tiuushacaritij, pa naata sequenu taa supuetana David naajiotaquiaari na sequesanoocujani. Naa sequequiaariiri:

“Jiyaniijia Pueyasocuaajaari cua naacuna. Naacuajitij, majaari cua puerenu quiniutianiya. Majaari pueyano na naata taa miiniu janiya”.

<sup>7</sup> Coteenujuanaa nia jiitianaa pueya nia niishiriojoriquia, noo pojori canapuate shushajanaa nia tojtioquiaari Pueyaso rupaacuajani. Nojoriiri seetanujuanaa Pueyaso tojijia quiquiaari, Jesucristoocua tiuujia nojori quiniuucua. Juhua nojori quiniuucua jiaatijaca nia quiriqiajuhuj, taa nojori quiquiaaricuaani.

<sup>8</sup> Taa quijia Jesucristo quiquiaari tariucuacaanuni, nojuajaari naa quiyaa. Naa quiniutianiya pueyaracaanuuri. Majaari na jatanu. <sup>9</sup> Naaratej, majaari tamaatia niishitiojosano nia tojiniu. Miaquenu pueresanojiniji niishitiojosano cutaraari najuhuanaj. Cunoori maja quenaaja na cumaquiniu quiquiaari na tojtiajaca. Naajuhuj, majaari pueyacuara secojonaa jiuujia cumaquishaanu quiquiaari nojori miaquesacari Pueyasorano puecoosano seya shujiniji. Pueyaso Sohuanu cutaraari poojia cumaquiquiaa, panijia pa quiniuria. <sup>10-11</sup> Saniniuujia, pueyacuara secojonaa jiyaniijiaari maja noo shu na miaquenu quiquiaari cutara, Israel pueya jiyanooshaanura puecoosaaquiaritij. Pueyacuara secojonaa jiyaniijiaari cuno seya nanaca tiuquitiaquiaari Pueyaso Quishaquijianaa puetunu marijarajanaa, cuno nanaca na majiriuutianura tii. Na nanaca shootesano seruuri saniniuujia tiacajiniji jiyatasaaquiaari mij, tii na catijiasaanura puetunujuanaa. Pueyacuara secojonaa jiyaniijiaari tojetaarucujanaa tenujusaquiaari maja na miaquenura cuno shu. Nio pa quishacari saniniuujia, paari jyanohua cumaquishaaquiiaani Jesucristo cusonuucua pocuara. Cunojiniji, paari seetanujuanaa Pueyaso rupuesano quiyacuajani. <sup>12</sup> Naajuhuj, Jesucristo mosaanura pocuara, nojuajaari Jerusalén tiacajiniji jiyatasaaquiarijuhuj, naatej, taa na nanaca shootesano seya jiyatasaaquiaari tamaquiriacaani. Nojuajaari naa tama na cuaqueyajaaja tarinitiaquiaari na mosaanura, tojetaarucujanaa jeequesano pa quiniuria puetunu sesa pa miishanojinijianaa. <sup>13</sup> Nojuajaari jyanohua cararaatia teetesaaquiaari niyacutesanojinia pa niti. Naa Jesu miiniuucua pocuaracuaatej, Pueyaso niishiyashijia jaara cararaatia miiriquia pajaniya Jesuucua pa tiuuniucuaani, juhujaniya na rejeretajaca pa quiriqiajuhuj. <sup>14</sup> Pajaniyara, Jesuucua tiuujacani, nio jiyari maja pa quiquio. Mijiria, shaaquiiri pueyaracaanu rishijia quiquio pajaniyarano. Cunora, paari jiyocuaanu pajaniyarano Pueyaso shipinishano tiacaacua jiaatiaani. <sup>15</sup> Naa Pueyaso jiitianuucua pueyaracaanu rishijia quiquio pajaniyaranotej, nojuaja pa timitiariquia pueyaracaanu. Neyanu Jesucristo quiniuucua pocuara Secojona, nojuajaari pa tiuquitiaquiaa na Queecua. Nio pa quishacari quiarijiani, majaari Pueyaso paniniu pa seya nanaca. Nojuacuajaari paniquiaa pa shuqiritianura nojuaja cutara.

Naacuaajitij, pa rupaa pa jiyatere Pueyasora na quiniuria saaja, pueyara-caanu nata pa maniniuuaqueetanura nojuaja. Cunocuaajaari na panishano.

<sup>16</sup> Naajuhuaaj, majaari nia niyajetanu maninia nia miiniuria niarta Pueyaso pueya. Nojori jiiitaaquishacari nojori panishano, nia jiiitasano casaajiniji nia niqutiojoriquia nareja nojori. Paa jaara naa miijiaca quirini, paari juhua Pueyasora pa casaa niqutioyani. Cuno cutaraari na timitiquiaa.

<sup>17</sup> Cuarta Pueyaso pueyanaa, nia jiiitanaa tojitiajaca nia quiriqquia. Majaari nojori niishitiojosano nia ruuretano. Nojoricuaajaari nioojiaca cojuaquiaa pueyaracaanu, nojori niishishacari Pueyasoori nojori nequesoreenutaniya nia jiiitajaca nojori quiniuucua. Naaratej, shamaatia nojori tojitiajaca nia quiriqquia maninia, Pueyaso nojori pohuatanura shitimia niajanijajiniji. Naa jaara nojori tojitiaashijiaca quiri, nojoriiri Pueyaso pohuatanutaniya na taraajenuta niajanijajiniji. Jaara naa quiritij, niaa cutaraari taraatia quiniutianijajuhuaaj.

<sup>18</sup> Canaacuara nia secojonuuriqquia. Canaacuaajaari saaja maninia miiniuria saniniuuiuqquiaa pueyaracaanuni. Naacuaajitij, canaa jiuujiaari panaatia quiya Pueyaso niquiara. <sup>19</sup> Janiyari jiyanohua paniyani cucuara nia secojonura, Pueyaso tiuquitiniuhuaa ritia janiya niaacua.

*Nio naajiona panishacari maninia Pueyaso miiniuria pueya, na saruhu-atasacari pueyajuhuaaj*

<sup>20</sup> Jesucristo shootenuucua na nanaca pocuara, paari niishiyani puetunu Pueyaso sequesanojuanaari seetanujuanaa pajaniyarano quiniutianiya pueyaracaanu. Naa Jesucristo miishanoocua pa tiuushacaritij, na Que Pueyasoori pa jiyanooquiaa, juhujaniya pa rupuenura nojuaja. Pueyasojuanaacuajaari pa Jiyaniiija Jesucristo samiitianiqquiaariuhua macujiniji. Nojuacuajaari pa cojuana, na panishano pueya pa quiniuucua. ¡Jiyanohua maninia pa Pueyaso! <sup>21</sup> Neyanu Jesucristoocua nia tiuuniuucua, nojuaja cuara jataniiria niajanijajiniji tojetaarucuaajanaa jeenucuasano nia quiniuria, taa na paniyacuajani. Nojuaja cuara naa miiria niajanijatej, maninia nia tucuatanura puetunu na panishanojuanaa. ¡Pa Jiyaniiija Pueyaso cuara pueyaracaanu shuquiritiasaaria jiyanohua maninia na quiniuucua! Cuaara naa quiiriatej.

<sup>22</sup> Cuarta Pueyaso pueyanaa, jiyanohua nia secojijianijia maja nia ruuretana nura secaja rupaata cua shiniuuiushacari niajanijajiniji nio cua naajiojinia. <sup>23</sup> Naa niishiri pueyanaa, parta Pueyaso pueyano Timoteori nujuatejojuajiniji tari tohuatesaaruhiacuua. Nojuaja jaara tarishiyaquiri cucua na tiuquiniuria, janiyari cucua na ruponutaniyani nia niquiniuucua cua quiasacari.

<sup>24</sup> Naajuhuaaj, quiria nia saruhuatare puetunu nia jiiitanaa pueyajanaa, puetunu cuniqui quiniaa parta Pueyaso pueyajanaanio. Italia jiyajinijinio parta Pueyaso pueyari nia saruhuataajuhuaaj.

<sup>25</sup> Pueyaso cuara na Sohanuta cumaquiiria puetunu niajanijajanaa.

## SANTIAGO NAAJIONEE

### *Santiago naajiosano niyaquejeno pueyacuara*

<sup>1</sup> Janiyari Santiagoni, Pueyaso seru, Neyanu Jesucristo serujuhuj. Nia saruhuataanijia puetunu tiquiyocua jiyacajiniajanaa niyaquejeno Israel doce niqiuohuacujinio caneno pueyanaa.

### *Niishitaja Pueyasojiniji masesano*

<sup>2</sup> Cuarta Pueyaso pueyanaa, shuquiriaatia nia quiriquia niaa jaara taraatia miishaare, niaa jaara naquiya miishaarejuhuj. <sup>3</sup> Niaacuajaari niishiya, niaa jaara Pueyasocua nia tiuuniuucua saniniujiushaare, niaari socua juhujaniya sashijacara quiniutianiya. Niaaraari naa miishaanutaniyaqui nia sashishacari Pueyaso cuara puetunu maniniajanaa miiria niaarajaatijia. <sup>4</sup> Nia rejeretare seetanujuanaa maninia sashijaca nia quiniuria, majaari quenaaja nia taacanuunu. Niaa jaara naa miijia quiriti, niaari maninia jeenucuasano quiniutianiya, pueyaracaanu maninia miijia nia quiniuria.

<sup>5</sup> Tamonu najaniyajinijinio jaara niishiyaquiri taa na miiniutianiya, nojuaja cuara Pueyaso maseera, Pueyaso na secojosacari. Pueyasoori na niishitaja niqutionutaniya. Nojuajaari puetunu pueyajanaa niqutionquia, capora na quiniuucua. Majaari na juaaniu niaa jaara na masere. <sup>6</sup> Nia masesacari, seetanujuanaa nia tiuuri Pueyasocua, majaari quenaaja nia taacanuunu. Cante na masesacari taacanuujani, nojuajaari juhua paratu piyarojosano mohuaca, naatej, taa paratu tacarojiya mohuaca na piyarojosacaricuaani. <sup>7</sup> Jiyano pueyanotej, Pueyasoori maja na masesano na niqutionu quiniutianiya, noojia niquijoteja na quiniuucua. <sup>8</sup> Noojia niquijoteja pueyanoori quiarijia maseya na panishano. Tariqui na secojosacari saniniuujia, tamonu casaa maseyari, na paniyaquishacari coteenu na masesanocuaa. Jiyano pueyanoori noojia niquijoteja pueyaracaanu. Majaari quenaaja na miiniu panishano na tucuatenu quiniutianiya.

<sup>9</sup> Cua panishano Pueyaso muerasunaa, niaa jaara casamiiju quiri, naajaa, shuquiriaatia nia quiriquia. Pueyasocujaari nia jiyatequiaari na muerasura, na jiišanasojiniji nia jiiitianurajuhuj. <sup>10</sup> Saniniuujia, niaa jaara casamiriaca pueyano quiri, shuquiriaatia nia quiriquia Pueyaso jiyanooshano nia quishacari. Niaacuajaari niishiya niaari tojetaarucujanaa saniitiosocoriquiano quiquiaari juucua sesa miijia nia quiniuucua tarijia. Casamiriaca pueyanoori seetanujuanaa juhua naana shuu, majaari na rishiniu. Saaja rupaquijia niqishiya shanohuari. <sup>11</sup> Pananu jaara nasaatia jama, neyonaari sorequee. Na shuuri tiqiii. Shanohua niqishanoori shaajequeejuhuj. Casamiriaca pueyanoori naajuhuj. Na casami na niqutionjosacarijia na canijianura juucua, canashiyaquiji shaajenutaniyajaariuhuj.

### *Naquiya pa miishacari*

<sup>12</sup> Shuquiriaatia quijia cutaraari Pueyasocua tiuujia, cante taraatia na miishacari rejeretaja saajani. Naa taraatia na saniniujiushaanuucuatej, nojuajaari juhua cutara jiyaniijia tuhuaja niqutionaanutaniya, pueyaracaanu rishijia na quiniuria. Cunoori Pueyaso niqutionu panishano na panijiaa, taa na sequequiaaricujani. <sup>13</sup> Niaa jaara sesa miiniuucua jiaatiaa, majaari sequenu: “Pueyasoqui sesa cua miitiniu paniya”. Pueyasoori maja sesa miijia. ¿Pa Jiyaniijiatucua casaara sesa miitiri pajaniyani? <sup>14</sup> Saniniuujia, tama poojia sequejaarijia pa shiniujiuquiaa sesa pa miiniuria. Naajuhuj,

tama pa niishitiajajaarijia pa sapojoquiaa sesa pa panishano pa miiniuria. <sup>15</sup> Naa sesa miiniuucua pa jiaatiasacaritij, cunora paari sesa miiquiaani. Naa sesa miijia pa quishacaritij, paari cunora shaajasaanutaniyani.

<sup>16</sup> Cuarta Pueyaso pueyanaa, maja tama nia cuaqueyajaaja nia sapojonu. <sup>17</sup> Puetunu maninia casaajanaa pa masesanoni, cunoori Pueyaso niquitiosano jiyocuacaanuji. Nojuajaari puetunu jiyocuacaanu pa niquishano casaajanaa shipinijioquiaari, mijiria pa cuhuatariquiano. Pueyasoori pueyaracaanu maninia quijia. Majaari na jatanu tamaatia na quiniuria, na cojuaaquiniuria pajaniya. <sup>18</sup> Pueyasocuajaari pa sohuanu samiitiani-jioquiaariuhua na rupaacua pa tiuushacari. Nojuajaari pa jiyatequiaari quiarinio na muerasu pa quiniuria. Naacuajitij, taa pueyano tutaacuaa na shuquiriniutia na saaco rishishacaricuaani, Pueyasoori naa juhua pa tutaquiaari na shuquiriniutiajuhuaj, coteenujuanaa na jiyapueranuhua pa quiniuucua. Nojuajaari tariucuacaanujiniji naa pa riurioquiaaritij.

### *Seetanujuanaa Pueyaso tojitiajaca*

<sup>19</sup> Naacuajiti cua panishano cuarta Pueyaso pueyanaa, cua tojitiare. Puetunu niajanijajanaa cuara quiri ritia tojijia, jacaria pocuaja. Cuara quiri shiniquiajuhuaj, maja ritia juaajia. <sup>20</sup> Pueyanoori maja na naata Pueyaso panishano miiniu na juaaniutia. <sup>21</sup> Naaratej, nia cartere puetunu sacuaraatia nia miiniujuanaa, puetunu sesa nia niishiriojosanojuanaanio. Nio pa quishacarini, puera sesa miiniuuri quiquiaa. Naajuhua pueyanaa, juhua maninia naatujua nia tojiri Pueyaso rupaa, taa nia niishitiojosaquiaaricuaajani. Majaari na ruuretanu. Pueyaso rupaacuajaari cumaacaraca tojetaarucuajanaa sesa miyashijiacara na jiyatenura pajaniya.

<sup>22</sup> Pueyaso rupaa tojijia nia quiri seetanujuanaa. Majaari nia numaa shama nia tojitianunoj. Naa jaara Pueyaso rupaa tojiyaquiri, niaari tama nia cuaqueyajaaja sapojiya. <sup>23</sup> Pueyano jaara Pueyaso rupaa tojiquiaa saaja na numaa shama, nojuajaari juhua noo pueyanojua, na jiquioco niquirii niquitiujinia narejaari. <sup>24</sup> Jaara tacateyarohua, na jiquioco niyajetaseequihuari taamuecate na jiquioco quiriquiaani. <sup>25</sup> Pueyaso rootasanoori jiyanohua maninia, maja quenaaja sesa. Sesa miiniuucua jiiitino pueyano jaara na tojiijara quiri, nojuajaari na naata sesa na miiniu tarinitianu. Cante na numaama na racatajani, nojuajaari shuquiriaatia quijia quiniutianiya cutara. Puetunu na miishanojuanaari maninia quiniutianiya pueyaracaanujuhuaaj.

<sup>26</sup> Cante na niti rejeteyashijiani, nojuaja jaara tama na cuaqueyajaaja jiyaniya: “Janiya cutaraari Pueyaso tojijiani”, cunoori tama na cuaqueya sapojiyajaacujua. Saaja sacuaraatia pocuaja quiya pueyaracaanuuri. Nojuajaari najuhuaana Pueyaso rupaa tojijia. <sup>27</sup> Cante seetanujuanaa pa Que Pueyaso rupaa tojijiani, nojuaja cuara japueyojuaca niquniuucua rucua-neera, nojori na naacunura. Cuara naa miiria mashiquiopuerajuhuaaj, nojori taraajenucujusacari nojori na cumanijanura. Naajuhuaaj, cuara tama na cuaqueyajaaja cojuara, narta pueya na miyaquiniuucujaji sesa. Naa miijia pueyanotej, nojuajaari Pueyaso pueyano cutara.

## 2

### *Maja cumaati rimiajata pa paniniu pueya*

<sup>1</sup> Cuarta Pueyaso pueyanaa, pa Jiyaniijia Jesucristoori shacantuuca cumaacajinia quijia. Nojuacuajaari tojetaarucuajanaa maninia quijia. Nocua tiuujia nia quishacari, majaari rimiajata nia niquniu tamasaca. ¿Pa Jiyaniijiateeri pa sooquiaaricuaa, ninishiqui quijia pa quishacarijiani?



Maja. <sup>2</sup> Cunora cua sequesanojinia nia niishiriojore: casamiriaca pueyano jaara nia secojonuujua tiajinia tiuquimia, maniniuqui toqueraca, jaani-ishoracajuhuaaj, ¿taa nia miiniutianiyani? <sup>3</sup> Niaari naa sequeja: “Niya quia cajishii pueyanonaa, cajitiu maniniuujiniani”. Saniniuujia, toqueeju pueyano jaara jiyacari tiuquimiajuhuaaj, jiyareta curuutuquenaniyojua, niaari na sequereecujua: “Cuniquijia quia nujuare”. Casaa maaraja: “Cuniquijia quia cajiri quiaa tii nujuaaani”. <sup>4</sup> Niaa jaara naa miiritij, niaari tama nia cuaqueyajaaja jiyateree juhua niarta pueya nequesoreenara. Niaari casamiriaca pueyano jiyaniya nojuaja naasucua socua maninia pueyano casamiijiu pueyanojiniji. Naaratej, niaari casamiriaca pueyano shuquiritiniu panijia.

<sup>5</sup> Cua tojitiare cuarta Pueyaso pueyanaa, ¿majateeri nia niishiniu, Pueyasocuaajaari casamiijiuniucua pueya saquiriojoquiaari nocua tiuujiaa nojori quiniuria? Nocua tiuujiaa nojori quishacari, nojoriiri juhua jiyanohua casamiriaca Pueyasora. Naajuhuaaj, Pueyasoori nojori jiyatenutaniya jiyaniijianucua nojori quiniuria, puetunu Pueyaso jiitiasanojuanaa nojori jiitianura. Naa miiniutianiya na panijiaaari taa na sequequiaari seetanujuanaacuajani. <sup>6</sup> Niajanियarijiaataj, niaari nojori cararojoquiaacujua. ¿Majateeri nia niishiniuujuhuaaj, cuno casamiriaca pueyacuajaari nia nohuasejoquiaa na sapojonuta? Nojoriiri nia jaamitiquiaa nequesoreenaacua, niaacuara na saquiriojotanura. Nojoriiri naa miitiquiaaqui nia jiitiasano casaaniyojua na jaariuutianura puetunujuanaa. <sup>7</sup> ¿Majateeri nia niishiniu, nojoricuajaari pa shuquiritiasano Jiyaniiija sesacaquiaajuhuaaj? Pa Jiyaniiija sesa jiyaniquitiquiaa na soonutaari.

<sup>8</sup> Puetunu Pueyaso rootasanojinijijianaani, nioori socua tojishocoriquiano. Naa naajiotasano quiyari:

“Pueya nia paniri taa nia paniya tama nia cuaqueyacuaani”.

Pueyanaa, niaa jaara cuno rootasano miiija quiriquia, niaacuajaari maninia miiija. <sup>9</sup> Saniniuujia, niaa jaara rimiajata paniri pueya, niaari sesa miya. Niaari saniitiosocoriquiano, Pueyaso niishitiojosano tojiyashijiaca nia quiniucua. <sup>10</sup> Pueyano jaara puetunu Pueyaso rootasanojuanaa tojiquiaa maninia, saniniuujia, jaara niquiriyatu cuno rootasanojiniji tojiyashijia quiri, cuno pueyanocuajaari Pueyaso tojiyashijia. <sup>11</sup> Pueyasojuanaacuajaari sequequiaari: “Maja nia camishoo maaji nia numuetucunu”. Sequequiaarijiaariuhuaaj: “Maja monu”. Naacuajitij, pueyano jaara na camishoo maaji numuetuqueyaquijia quiri, saniniuujia narta pueyano moyari, cuno pueyanoori Pueyaso rootasano tojiyashijiajuhuaaj. <sup>12</sup> Niaa cumaati niishiya, Pueyasoori na muerasu nequesoreenutaniya taa nojori tojitiaquiaari na rootasanocuajani. Nocuaji tama pa cuaqueyajaaja pa cojuare taa pa miiquiaani, taa pa pocuaquiaani. Nia niishiri, paari nequesoreesaanutaniya pa miishanojinijini, taa pa miiquiaari parta pueyani. Cante pueya panijia quiyani taa Pueyaso rootaquiaaricuajani, nojoriiri jiyanooshaanutaniya taa nojori jiyanooquiaaricuaa tamasacani. <sup>13</sup> Saniniuujia, canapuate narta pueyano jiyanooyashijiaca quiquiaarini, Pueyaso nequesoreenu juuca puetunu pueyajanaa, nojoriiri jiyanoyaquishaanutaniyajuhuaaj. Canapuate jiyanoojia cutarani, nojoriiri jiyanooshaanutaniya cutara, taa tamasaca nojori jiyanooquiaacuaani. Nojoriiri shuquiriaatia quiriquiano cuno juuca, Pueyaso nequesoreesacari nojori.

*Pueyasocua tiuujiaaari maninia miiijaca*

<sup>14</sup> Cuarta Pueyaso pueyanaa, ¿maninate pueyano jaara sequere: “Janiyacuajaari Pueyasooocua tiuujiani”, nojuaja jaara maninia miyashijia quiyajaa? Nojuaja jaara maninia miijiara jatanishoo quiyajaa, najuhuaana sequeyari: “Pueyasooocua tiuujianijia”. <sup>15</sup> Naacuaajitij, tamonu parta Pueyaso pueyano jaara pa sequesee: “Maja cua jitianu toque. Maja quenaaja cua miaquesocoriquiano cua jitianujuhuaaj”, ¿taa pa miyani? <sup>16</sup> ¿Maninateeri paa jaara na sequereni: “Juhuaianiya quia quiaarohua. Quia miaquesuhua. Toque quia cushishuhuaajuhuaaj”? Maja. Paa jaara quenaaja na niqutioyaquiri na panishanoni, pa sequesanoori najuhuanaj. <sup>17</sup> Naajuhuaaj, pueyano jaara sequere: “Jesuucristooocua tiuujianijia”, jaara seetanujuanaa Pueyaso rootasano tojiyaquiri, na sequesanoori najuhuanajuhuaaj. Jiyano pueyanoori maja seetanujuanaa Jesuucua tiuujia. Paa jaara seetanujuanaa Jesuucua tiuujia quirini, pocua maninia miijiaca quirijihuaaj. Maninia miyashijiaari maja seetanujuanaa Pueyasooocua tiuujia.

<sup>18</sup> Pueyano jaara tamonu sequeriquia: “Quiaari sequeya quiaa Jesuucua tiuujia cutara. Janiyari saniniuujia maninia miiijiani. ¿Taa cua niishiniutianiyani quiaari seetanujuanaa Jesuucua tiuujia, quiaa jaara maninia miyaquiri? Maja cua naata na niishiniu. Janiya cutaraari quia niishitiniutianiyani janiyari seetanujuanaa Jesuucua tiuujia cutarani, maninia cua miishacari”. <sup>19</sup> Pueyaso Rupaacua quia tiuuniuucua, quiaari niishiyacuaja Pueyasoori Jiyaniijiajanaa. Cuno quia tiuuniuuri maniniacuaja. Naajaa, nia niishiri, samaruhuari cuno niishiyajuhuaaj. Na puerenuta nocuaji tete-catiuyari. <sup>20</sup> Mosanucuaanaa, ¿majateeri nia niishiniu? Jesuucua tiuujia nia quishacari, niaa jaara maninia miyashijia quiyajaa, Jesuucua nia tiuuniuuri najuhuanaj, nia tojiyaquishacari Pueyaso. <sup>21</sup> Niaacuajaari niishiya taa Pueyaso saniquiaari pa supuetana Abrahamni, na niishiniuria seetanujuanaa nocua tiuujiatee. Pueyasoori naa na saniquiaari: na sequequiaariiri: “Abrahamnaa, quia niyanuniyotua quia more cucuara quia catijasocoriquiano”. Majaari Abraham ruuretano quiquiaari Pueyaso sequesano nojuaja. Naaratej, Pueyasoori naa sequequiaari: “Jiyanohua maninia Abraham, cua tojijia cutara”. <sup>22</sup> Naacuaajiti cuarta Pueyaso pueyanaa, naa Abraham tojiniuucua Pueyasotej, paari maatia niishiyani nojuajaari seetanujuanaa Pueyasooocua tiuujia quiquiaari. Naajuhuaaj, Pueyaso sequesano na miishacari, nojuajaari Pueyasooocua tiuujia quiquiaari tojetaarucua-janaa. <sup>23</sup> Naa Abraham miiniuucuatej, nojuajaari tariucuacaanu Pueyaso rupaajinia nojuajiniji naajiotasano tohuateequiaari. Naa sequeyari:

“Abrahamri Pueyasooocua tiuquiaari. Naa na tiuuniuucua Pueyasooocuatej, Pueyasoori na jiyatequiaari juhua tojetaarucuaajanaa sesa miyashijia na quiniuria”.

Naa Abraham quiniuucua Pueyaso tojijiatej, nojuajaari sequesaaquiaari Pueyaso rupuenata.

<sup>24</sup> Naacuaajiti pueyanaa, Pueyasocuaajaari na sequesano miiijia jiyanoocua. Maja cutaraari na jiyanooni noo pojori, nocua tiuuniu sequeja najuhuanatej. <sup>25</sup> ¿Niaate niishiyajuhuaaj taa Pueyaso jiyanoocuaari Jericó tiacajinijinio paanatucuaani, nooj, Rahab jyanishanotej? Pueyasoori na jiyanoocuaari neyatu na quiniuriajuhuaaj. Na jiyanoocuaariiri maninia na miiniuucua caapiqui pueyano Israel pueyajinijinio. Rahabri cuno pueya jamojoquiaari na tiaco. Na nuhuaji, nojori mashiquiquiaariuhua tamocoori, narta Jericó tiacajinijinio pueya puecyaquiniuucuaaji cuno pojori. Rahabri naa maninia miiquiaaritij Pueyasojiniji na tojishanoocua na tiushacari. Niishiquiaariiri Pueyasoori Israel pueya cumaquinia quiquiaari. <sup>26</sup> Nio

pohuatasanoori pa niishitiojiya, naatej, taa pa cuaqueya macu quiya sohuanuujucuaani, naajuhuj, paa jaara Pueyaso sequesano miyashijia quirini, paari najuhuana sequeyani: “Jesuucua tiuujianijia”.

### 3

#### *Pa niti juhua mani*

<sup>1</sup> Cuarta Pueyaso pueyanaa, maja cumaati puera niajanijajiniinio jiaatianu Pueyaso rupaa niishitiojonaa nia quiniuria. Niaacuajaari niishiya, Pueyaso rupaa niishitiojonaari socua jiyanoohua saniitiosaanutaniya tamasacajiniji, nojori tojtiaaquiniuucua tama nojori niishitiojosanojuaaja. <sup>2</sup> Puetunu pajaniyajanaari sequeyarucua miiquiaa sesani. ¿Teyano pueyante tojetaarucujanaa narta pueyano najiquitijaquijia na pocuasacarini? Shaaqui. Pueyano sequesano jaara puetunu maninijanaa quiri pueyaraaanu, cuno pueyano maara seetanujanaa maninia pueyano quiri cutara. Cuno pueyano maara na naata puetunu tama na cuaqueyajaaja jiiitanu niishiriquiajuhua sesa na miyaquiniuucua. <sup>3</sup> Niaacuajaari niishiya, caballo rupaama jaara niasaare na niqitijiotaja, na camaru na tojiniuria, na netesacari, na camaruuri puetunu na caballo cuaqueyajanaa niqitijiotaa na panishaco. <sup>4</sup> Puereetuca buqueeri naajuhuj. Shiitaniyojua na niqitijiotaja jiiitajaariuhuj. Jiyanoohua paratu piyarojosacari, naajaa, na camaruuri saa cunotaja na niqitijiotaa na panishaco. <sup>5</sup> Pa nitiiri naajuhuj, shiitaniyojua casaaniyojuaari pa cuaqueyajinia shipinishano. Naajaa, jiyanoohua pocuanu niishijiaari. Sesa pa miitiyari. Nojuajaari juhua maniyashi. Maniyashi jaara jaare puereetuca cuhuariquiajia, cuno maniyashiiri puereetuca maniria pacusee. Cuhuariquiaari puetunu catemaajanaa. Pa nitiiri naajuhuj. <sup>6</sup> Pa nitiiri seetanujanaa juhua mani quiya pa cuaqueyajinia. Paa jaara sesa pocuareni, paari puetunu pa cuaqueyajanaa sesoyani. Pa nitiiri puetunu sesa niishijajanaa. Paa jaara sesa pocuare pueya niqiarani, puetunu pueyajanaari pa sequesano caminiujuquiaa tamasaca niqiarana. Pa nitiiri Sesaaca poonijotesano. Naacuajitij, sesa pa pocuasacari, paari puetunu mijiria pa quiniujanaa sesoquiaani. <sup>7</sup> Pueyanoori na naata jiyartuutenu puetunu casaajanaa: jaacuatujuaca, roshiyocuatujuacajuhuj, moojinijinio casaanio. Seetanujanaari, pueyari tari naa na jiyartuutejoquiaa. <sup>8</sup> Maja cutaraari pa naata jiyartuutenu pa niti seque, saa maninia pa pocuanuraja. Pueyaracaanu sesa taquiriocuaa saajaari. Nocua quiyari juhua soconu noonacu, puetunu pueyajanaa na sesonura. <sup>9</sup> Paari jiyano pa nititaja pa Que Pueyaso maninihuaqueetaquiaani. Naajuhuj, paari Pueyaso shipinishano parta pueya sesacaquiaa natajuhuj. <sup>10</sup> Naacuajitij, pa rupaamaji tohuataari maninia sequesano, sacuaraatia sequesanojuhuj. Cuarta Pueyaso pueyanaa, ¡maja cumaati naa pa quiniutij! Maja maninia naatej. <sup>11</sup> Samo nacajiniji pueyaracaanu pacaretajaari shocuanacu mohuaca. ¿Jataquiaate soj? ¿Pianacute saniniuuja pacaretaquiaacujua? Maja. Samo nacaari pueyaracaanu maniniuniacu quijia. <sup>12</sup> Cuarta Pueyaso pueyanaa, ¿mariyajate na naata muetunu shucuenajara? ¿Nateecate sacamanajara muetujuajuhuj? Maja. Naajuhuj, maja pa naata pianacu mohuaca taquitianu cuari maniniujiniji. ¿Mohuacatucua casaara jatara tamaatiuniacurani? Naajuhuj, paa cuara pueyaracaanu maninia pocuara saaja. Maja cumaati pa pocuasano pa cojitiniu sesa pocuasanota.

#### *Niishijia pueyano*

<sup>13</sup> Tamonu niajanijajinijinio jaara niishijia quiri, nojuaja cuaara juhua-janiya maninia miijia quiiria nareja, maja pueya shocoteja. Jaara naa maninia quijia quiri, pueyari niishiniutianiya nojuaja seetanujuanaa niishijia. <sup>14</sup> Saniniuujia, nioojia jaara najiquitishano quiri, niishijia nia quiyaquiniuucua juhua niarta Pueyaso pueyano, niaari seetanujuanaa mosanucua. Naajuhuj, nia miishano jaara quiri nia shocotanura niarta Pueyaso pueya saaja shuquiriaatia nia quiniuria tamajaaja, majaari nia jiyaniniu niaari niishijiaca. Naa miijiaca nia quishacaritij, niaa jaara tama nia niishitajajaaja shuquiritiare, niaari mosanucua saaja. Nia sequesacari: “Niishijia cutaranijia”, niaari sapojiya. <sup>15</sup> Cuno nia niishitajaaari maja jiyocuacaanuji Pueyaso niishitajaja. Cuno niishitajaaari tama nia niishishanojuaaja, mijiria niishishanojuhuj, Sesaacajanaa niishishanonio. <sup>16</sup> Pueyanaa, tee Pueyaso pueya juaatishano quiya tamasaca jaara na shocotare, naajuhuj, pueya miishacari saaja tama na panishanojuaaja, tii quiyari juayonuujutanu, puetunu sesa miiniujianaanio. <sup>17</sup> Saniniuujia, cante Pueyaso niishitajaja jiiitaa cutarani, nojuajaari maninia miijia pueyano cutara. Jiyano pueyanoori maninia quijia puetunu pueya niquliarajanaa, jyanootio, jacaria pocuaja. Majaari na niishiniu ritia juuanuu. Pueyacuataaraajaari. Majaari na niishiniu cuaracashijionu pueyacuataara. Pueyaracaanu seetanujuanaa sequeyari. <sup>18</sup> Naajuhuj, cante juuatoyano jyanootiootejani, nojuajaari jyanohua shuquiriaatia quiniutianiya Pueyaso shuquiritishacari nojuaja maninia na miiniuucua.

## 4

### *Mijiria casaacua jiaatijacajiniji pohuatasano*

<sup>1</sup> ¿Niaate niishiya casaara nia juayonuujutaquiaa tamajaaja pueyaracaanuni? Niaari naa quiyaquij sesa miiniuucua nia jiaatiasacari. Nioojiaari najiquitishano quiquiaa nia panishanoocua nia jiaatiasacari sacuaraatia. <sup>2</sup> Naaratej, nia panishano nia maseyaquishacari, niaari na casamiicuaaji pueyano moquiaa. Niaari naa miiquiaa puera nia jiaatiasacari nia panishanoocuatej. Nia panishanoocua nia jiaatiasacari jyanohua, niaari cunora miriyojotaquiaa. ¡Niaari socua piyotaariquiaaquij! Niaari naa quiyaquij Pueyaso nia secojiyaquiniuucua nojuaja niquitionura niajanijia nia panishano. <sup>3</sup> Naajuhuj, niaa jaara na secojore, majaari nia masenu quiquiaa nia masesano. ¿Casaara nia maseyaquiquiaanoj? Nia sequereeraj. Niaari sesa nia jiaatianuta na masequiaajuhuanajaj. Niaari nia jiaatiasanoocua masequiaa juucua, tama nia cuaqueyajaaja nia shuquiritiniuria. <sup>4</sup> ¡Pueyanaa, niaaqui Pueyaso rootasano ruuretajacajuhuanajaj! ¿Majateeri nia niishiniu? Cante mijiria sesa miijiaca miishano timitiajacani, nojuajaari Pueyaso paracara quirii. Niaa jaara naa miijiaca quiniu panijajuhuj, niaari tari Pueyaso paracara quirii. <sup>5</sup> Tariucuacaanu Pueyaso Rupaajinia naa naajiotasanoori quiyaquij:

“Pueyasoori na Sohanu niaquiaari poojiajinia, nera na cojuanura pajaniya. Jyanohua na paniniutia pajaniya, Pueyaso Sohanuuri pa jamuequiaa juucua saaja Pueyasora pa quiniuria”.

<sup>6</sup> Naajuhuj, Pueyasojuaanari jyanohua maninia naacuquiaa pajaniya, jyanootio na quiniuucua. Na Rupaajiniaari naa naajiotasano quiyajuhuj:

“Pueyasoori noo pueya paracaajia, narta pueyajiniji juhua socua cutara pueyano quiniu panijiatej. Saniniuujia noo pojori maniniucuaarijia, naa sequejacatej: ‘Maja cua naata miiniu maninia tamajaaja. Pueyaso cuaara cua naacuura’ ”.

<sup>7</sup> Naarate pueyanaa, seetanujuanaa Pueyaso tojitiyacara nia quiriquia. Cumaatia nia nujuatare Sesaaca, maja na shocotanura nijaniya. Naa jaara naa miiritij, niaacuaji mashiniutianiyari. <sup>8</sup> Naa jaara Pueyaso rupuere, Pueyasoori nia rupenuutaniyajuhuj. Sesa miijiacanaa, cua tojitiare. Taa curuutucojuanucua shuquirioyacuaani, naa tama nia cuaqueyajaaja nia jeequejorejuhua sesa nia miishanojiniji. Noojiaqueya Pueyaso panijiacari mijiria sesa miishano paniquiaajuhuj. Cuno pueya cuaara noojia jeequejora maja socua noojia na niquijiotenura najuhuanaj. Cuaara saaja Pueyaso panijiacara quiiria cutara. <sup>9</sup> Sesa nia miiniuucua nia nujuquette, nia taraajerejuhuj. Naa sapiyonuure. Sesa miishano nia saroojotanu nia jataniri namijiaacatenuucua. Sesa miiniuujiniji nia shuquiriniu nia jataniri taraajenuucujuhuj. <sup>10</sup> Naa jaara nioojiajinia sequeriquia Pueyaso niquiara: “Maja cua naata tamajaaja maninia miiniu”, Pueyasoori nia naacutaa maninia nia quiniuria mijiria. Nojuajaari nia jiyatenutaniya jiyaniijianucua nia quiniuria.

### *Parta Pueyaso pueyacuara rimiaaqueyashijiaca pa quiriquiaj*

<sup>11</sup> Pueyanaa, maja sacuaraatia nia rimiaaquenu niarta Pueyaso pueyacuara. Maja maninia naatej. Cante narta Pueyaso pueya sesacaani, Pueyaso Rupaajinia naajiotasano tojiyashijiacaari jiyanotej. Naa jaara naa miiritij, niaari Pueyaso Rupaajinia naajiotasano sesaca. Naajuhuj, niaari tama nia cuaqueyajaaja jiyateya juhua jiyaniijiaara, niarta pueya nequesoreena nia quiniuria. Naa nia miishacaritij, niaari Pueyaso rupaa tojiyashijiacara quiquii. <sup>12</sup> Pueyasojuanaari tamajaaja Jiyaniijiajanaa. Nojuacuajaari na rootasano niishitijia pajaniya. Nojuajaari niquiriyatujua pa nequesoreena, pa saniniujiuriquianojuhuj. Nojuajaari cumaacaraca pocuaji na tacunura, na shaajanura pajaniyajuhuj. ¿Canteeri quiajanianijia, quia saniniujiuniuria tamasaca, juhua nojori jiyaniijiani?

### *Majaari pa niishiniu tariquiria*

<sup>13</sup> Pueyari naa sequejaca: “Canaari tariqui quianutaniya tamonu tiacajiniani. Canaari cuniqui shocotenutaniya niquiriyatu marijiani canaa niquitiojosacari tii canaa casami. Canaari queraatia cumaneeca masenutaniya canaa casami samini”. Cua tojitiare naa sequejacanaa. <sup>14</sup> Majaari nia niishiniu taa nia juhuaquenutaniyani. ¿Niaatucua taa sequereni naa jaara macu juhuaquema saaja? Nocuaji majaari naa sequenute pueyanaa. Pa quiniuuri juhua shushiquiani. Naatej, taa shushiquiacuaani rupaquijia niquishiyari, na nuhuaji tajimiohuari, paari naajuhuj. <sup>15</sup> Naaratej, naa nia sequere cutara: “Pueyaso jaara paniri, canaari tariqui quianutaniya poonijionuucuaani”. Naa cutarate maninia sequenu. <sup>16</sup> Naaari saniniuujia sequequiaacujua: “Janiyari tariqui quianutaniyani cua miiniu panishano cua miiniuria”. Naa nia sequesacaritij, niaari jiyaniya nia naata tamajaaja miiniu puetunu nia panishanojuanaa. Naa nia sequesacari juhua nia miishocoriquianotej, niaari najuhua nia rupaa riutioconeetequiaa puera, juhua niishijia pueyano. Naa jaara tama nia cuaqueyajaaja nia jiyateya juhua tariqui miishocoriquiano niishijiatej, cunoori jiyanojua sesa. <sup>17</sup> Naajuhua pueyanaa, naa jaara maninia miyaquiri, maninia miiniu niishiijia nia quishacari, niaari tari sesa miijiaa.

## 5

### *Casamiriaca pueya nacasusaanu*



<sup>1</sup> Nia tojitiare, casamiriaca pueyanaa. ¡Juhuacarijia nia sapuere! ¡Nia sariyocature! ¡Niaari naquiya miiniutianiya taraatia! <sup>2</sup> Niaari jiyanoehua casamiriaca. Cuno nia jiitiasano casamini, najuhuana moqueyari. Surequeyari nia maniniuquiya toqueya miaqueyajuhaaj. Naacuajitij, puetunu nia jiitiasanojuanaari moquenutaniya. <sup>3</sup> Nia paatijosano oroni, nia cumaneecanio, najuhuana tiyarashiyari. Naacuajitij, pa Nequesoreenaari maatia niishiniutianiya niaari sacuaraatia jamuejaca quiquiaari. Naa miijiaca nia quiniuucuatej, niaari saniitiosaanutaniya. Niaari socua shaajasaanutaniyaquij. Niaari najuhuana queraatia casami paatijiya shuquiriaatia nia quiniuria tamajaaja mijiria. Saniniuujia, nio pa quishacariiri quera pa Jiyaniijia tiuquishacariuhua na saniniuujuniuria pajaniya. <sup>4</sup> ¡Jiyaniijiajanaari nia poonijjotesano pueya tojiquiaa! Nojoriiri sariyocuatuiya nia cumaneecajiniji nia niquitioyaquiniuucua nojori poonijionuunujiniji, niaara na senoonuucua nataacuaca nia cuhuariquijajiniji. <sup>5</sup> Mijiria nia quishacarijia, niaari shuquiriaatia quiquiaa puetunu nia panishanojuanaa nia jiitiasacari. Naa shuquiriaatia nia quishacaritij, niaari juhuajaniya shiyoshiya juhua puecosocoriquiano cushiya. Niaari naa miishaanutaniyajuhuaaj. <sup>6</sup> Niaari maninia miijiaca puecooquiaa. Majaari nojori nujuatanu quiquiaa niajaniya, nocuara nia tonujusacari nia cuaracashiniutia najuhanaj. Naacuajiti casamiriaca pueyanaa, niaa cumaati puetunu nio niaara sequesanojuanaa tojitiaa.

### *Juhuajaniya pa sashiri pa Jiyaniijia*

<sup>7</sup> Naacuajiti cuarta Pueyaso pueyanaa, juhuajaniya nia sashiri pa Jiyaniijia cuaara tiuquiuhua. Cuhariquia camaruuri na natanu nuhuaji naa sashiquiaa marujuhuaj, maninia na natau moritianura. Maru sashiya-jariuhua cuaara niiria, na natau jajau na querajaacaatiniuria. <sup>8</sup> Naa nia sashirijuhuaaj. Majaari pa Jiyaniijiaacuaji nia pishiniu. Nojuacuajaari quera tiuquiniutianiuhua. <sup>9</sup> Cuarta Pueyaso pueyanaa, majaari niarta pueyacua nia rimiaaquenu nojori nia soonuta, niaa mariqui saniitiosaareeri. Nia niishiri, pa saniniuujunia Pueyasoori pocua catecanoya. Tari juhua pa tohuateyaji nujuuari. Nojuajaari seetanujuanaa pa saniniuujunia cutara. Nocuaji maninia pa quirij. <sup>10</sup> Pueyanaa, juhuajaniya pa rejeretarejuhuaj, paa jaara naquiya miishaareni. Naatej, taa tariucuacaanu Pueyaso sequesano caminiuujuniaa rejeretacoquiaari taraatia nojori miishacaricaani, naa nia rejeretarejuhuaj. <sup>11</sup> Paari niishiyacuajani, Pueyasoori naquiya miiniu rejeretajaca pueya shuquiritiaja. Maninia na miiniutianiyari. Niacuajaari tari pohuataaquiarijuhuaj taa supuetana Job rejeretaquiaari naquiya na miishacaricaani. Na nuhuaji cutara, Pueyasoori jiyanoehua maninia na miiquiaariuhua, jiyanoehua pueyacua taraajeja na quiniuucua, jiyanoojiaariuhuaaj.

<sup>12</sup> Cuarta Pueyaso pueyanaa, nia tojitiare. Nia pocoojosacari, tamonu jaara quia sequesanoocua tiuyaquiri, naajaa, majaari najuhuana sesa pocuanu. Maja cutaraari sequenu: “Cua sequesanoori seetanujuanaa juhua jiya cajiniocuaja. Majaari na shaajenu quiniutianiya”. Majaari sequenujuhuaj: “Cua sequesanoori juhua nio jiya. Majaari na shaajenu quiniutianiya”. Majaari naa pocuanu sacuaraatiatej. Nia sequesano jaara seetanujuanaa quiri, nareja nia sequere: “Taaquiriirinij”. Naajuhuaaj, nia sequesano jaara quiri “maja”, cuaara naa quiiria seetanujuanaa. Majaari nia sequesano nia maatenu socua, Pueyaso mariqui nia saniitioreeri.

<sup>13</sup> Tamonu niajanijajinijinio jaara naquiya miishiya, nojuaja cuaara Pueyaso secojoora. Shuquiriaatia nia quishacari saniniuujia, Pueyasora

nia jaaquequejore. <sup>14</sup> Cusosu nia quishacari, Pueyaso pueya jiitianaa nia sequere nojori cuaara secojora niaacuara. Nojori cuaara shiyocua cojuata cusosu quiaara, pa Jiyaniijia sesajinia nojori secojosacari. <sup>15</sup> Nia secojosacari Pueyaso seetanujanaa nocua nia tiuuniutia, cusosuuri naatanutaniuhua. Nojuaja jaara sesa miiquianu, Pueyasoori na jiyanooniutianiya sesa na miishanojiniji. <sup>16</sup> Cunora, sesa nia miiniu nia sequetoore nia jiyanooshaanura. Majaari sesa nia miishano nia seetanu. Na nuhuaji Pueyaso nia secojore tama niaacuarajaaja. Pueyasocua nia naatanijiorohua. Maninia pueyano secojosacari jiyanoohua, cunoori jiyanoohua cumaacaraca. Pueyasoori na secojosano tojijia. <sup>17</sup> Tariucuacaanu pueyara Pueyaso sequesano caminiujiunia Elíasni, nojuajaari nareja pueyano quiquiaarijuhuaj taa pajaniyacuaani. Naajaa, nojuaja jaara Pueyaso secojoquiaari maja maru niniuria, majaari maru niniu quiquiaari jiuujianaraca marijia cuaara shocojoquiaarijiaatia, socua seis racanio. Majaari maru niniu quiquiaari tojetaarucujanaa. <sup>18</sup> Elías jaara pacutequiaariuhua secojonu maru na panishacari, maruuri shusha niquiaariuhua. Pueya nataacuacaari jiyacari shusha moritiaquiaariuhua.

<sup>19</sup> Cuarta Pueyaso pueyanaa, tamonu niajanijiniijinio jaara Pueyaso rootasano tojiyashijiara quiriohua, tamasaca jaara na niquiri, cuaara na rootaaranoj, maninia miiijia na quiniuhuara. <sup>20</sup> Nia niishiri, cante sesa miiijia tacatorohua Pueyasocua sesa na miiniuiniijini, nojuajaari cuno sesa miiijiaacuaji tacuya maja senota na shaajasaanura. Pueyaso na jiyanootiya-jaariuhua puetunu sesa na miishanojinijijianaa. Tariucuaja cua panishano pueyanaa.

## COTEENU PEDRO NAAJIONEE

### *Pedro saruhuatascari narta Pueyaso pueya*

<sup>1</sup> ¿Niaate quiyajaa cuarta Pueyaso pueyanaa? Janiyari Pedroni, Jesucristo jiyaramiquishano na rupaa pohuatana cua quiniuria. Janiyari nio naajiya niaacuarani, noo pojoriicuara canapueete tiquiyocua niaquecojoquiaaricujani: Ponto jiyajinia, Galacia jiyajinia, Capadocia jiyajinia, Asia jiyajinia, Bitinia jiyajinianio. <sup>2</sup> Tariucuacaanu, pa Que Pueyasocujaari nia saquiriojoquiaari na pueyarano nia quiniuria. Naaratej, nojuajaari na Sohuanu jiyaroquiaari nioojiajinia na poonijionura, Jesucristoocua nia tiuuniuria. Naacuajitij, Jesucristo shootenuucua na nanaca, Pueyasoori nia jiyanoocua, juhua tojetaarucujanaa jeequesano nioojia quiniuria. Na Sohuanuuri nia jataniquiaa tojetaarucujanaa maninia miijiaca nia quiniuria, seetanujuanaa Jesucristo tojijiaca nia quiniuriajuhuj. Naa Pueyaso panishano pueya nia quiniuucua, nojuaja cuara cumaquiiria jiyanohua nijaniya. Cuara nioojia cajitiiria pueyaracaanujuhuj.

### *Pa niishiri, paari jiyanohua maninia miishaariquianoni*

<sup>3</sup> Pa Jiyaniijia Jesucristo Que Pueyaso pa maninuhuaqueetare, jiyanohua maninia na miiniuucua pajaniya. Jiyanohua na taraajenuucua pocua, na pueya pa quiniuucujuhuj, nojuajaari pa niishitiquiaari paari juhua quiariniora samiitianijiosaanutaniuhuani. Paari naa samiitianijiosaanutaniuhuani, naatej, taa Jesucristo samiitiaquiaariuhuacuaani. Naa pa niishishacari taa pa miishaanutaniyani, paari shitimia sashiquiaani pa miishaanura taa Pueyaso miiniu paniya pajaniyacujani. <sup>4</sup> Naacuajitij, niaari niishiya niaari seetanujuanaa masenutaniya puetunujuanaa niaarano Pueyaso jiiitasano jiyocuacaanu. Cuno, Pueyaso racatasano niaaranoni, cunoori maja na naata shaajasaanu. Majaari na naata sesosaanu. Maja na naata tariucushiniujiuhuj. <sup>5</sup> Pueyasocua nia tiuuniuucua, nojuajaari na cumaacata nia cojuaquiaa. Pueyaracaanu nia cojuanutaniyari nojuaja cuara nia rijiorejaatijia mijiria taraatia nia quiniujiniji, tojetaarucujanaa jatanishano quijiaca nia quiniuria. Jiyanohua maninia Pueyaso miiniu panishano na pueyaranoni, shusha jiyacari niquishaanutaniyari.

<sup>6</sup> Cunora niaari shuquiriaatia quiya. Saniniuujia, niaa naasucuaari taraajeya rupaquijia nia miijiosacari naquiya mijiria. Naajaa, niaa jaara naquiya miishaare, cunoori maja najuhuanaj. <sup>7</sup> Naquiya pa miiniuni, cunoori pa saniniujiushaanura paate seetanujuanaa Pueyasocua tiuujiacani. Niaacujaari niishiya, pueyari jiyanohua oro panijiaca. Saniniuujia, Pueyasocua pa tiuuniuni, cunoori jiyanohua socua panishano orojiniji. Niaacujaari niishiya, pueyari oro catijijaja, na sanishaanura maninia oro seetanutejanaa. Naajaa, seetanujuanaa maninia oroori shaajejajuhuj. Saniniuujia, paa jaara mijiria naquiya pa miiniu rejeretajaca quirini, Pueyasocua tiuujia pa quiniuucua, cunoori socua jiyanohua maninia cuno shaajeja orojiniji. Pueyasocua nia tiuuniu jaara saniniujiushaare juhua orojuhuj, jaara seetanujuanaa maninia quiri, Pueyasoori nia timitianutaniya. Naacuajitij, Jesucristo muetasacari pocua, Pueyasoori jiyanohua maninia miiniutaniya nijaniya. Jiyaniijianucua nia jiyatenutaniyari.

<sup>8</sup> Majaari juhuanujuaja Jesucristo nia niquiniu. Naajaa, niaacujaari na panijiaca. Nia niquishoo na quishacarijia, naajaa, niaari nocua tiuquiaa. Niaari na timitiaquiaa jiyanohua. Tojetaarucujanaa jiyanohua

nia timiniu quiniuucua nioojiajania, majaari nia naata na pohuatanu nia rupaata. <sup>9</sup> Niaari naa timiquiaa, tariucua jatanishano nioojia quiniuucua, Jesucristoocua nia tiushacari.

<sup>10</sup> Tariucuacaanu, pueyara Pueyaso sequesano caminiujiuniaa pueyari poojotaquiaari taa Pueyaso jiyanooniutianiya nio pa quishacari pueyani, na pueya nojori quiniuria. Nojoriiri tama nojori naajiotasanojuaaja suraattia serojojuaca quiquiaari, Pueyaso Sohuanu niishitishano nojori naajiotasanoni. Nojoriiri jiyanoohua niishiniu paniquiaari taa Pueyaso jiyanooniutianiya pueyani. <sup>11</sup> Jesucristo Sohuanucuaajaari juhuacarijia nojori niishitiquiaari taa Pueyaso jiyarosocoriquiano Pueyano miishaanutaniya naquiya coteenuni. Nojori niishitiquiaarijiaariuhuj, naquiya na miiniu nuhuaji saniniuujia, nojuajaari Jiyaniijiarajanaa jiyatesaanutaniya, shacantuuca quijia na quiniuria. Naaratej, nojoriiri maninia na niishiniuria saniniuujiquiaari juucua, cantejaara cuno quiniutianiyani, Pueyaso Jiyarosocoriquianoni, naajuhuj, taacari na muetanutaninyani. <sup>12</sup> Pueyasoori saaja nojori niishitiquiaari, na Sohuanu poojotanishano nojorini, cunoori maja tama nojoririjaaaja na quiniu quiquiaari. Cuarta Pueyaso pueyanaa, ¡cunoori niaarano quiquiaari seetanujuaana! ¡Tariucuacaanu poojotasano Pueyaso Jiyarosocoriquianojinijiiri tari tohuateequiaari! Jiyocuacaanuji jiyarosano Pueyaso Sohuanuuri Pueyaso rupaa pohuatanaa cumaquiquiaa, taa na cumaquiquiaari Pueyaso Jiyarosocoriquianojiniji pohuatanaacuaani. Naacuajitij, quiari naataja nia tojishano Jesucristojinijini, cunoori supuetanaa pohuatasano quiquiaaricuaaja. Pueyaso seyajanaacuaajaari pueyarano Pueyaso miishocoriquianoocua maatia niishiniuucua jiaatiaajuhuj.

*Pueyasoori paniya saaja maninia miijiaca pa quiniuria*

<sup>13</sup> Cunora, cuarta Pueyaso pueyanaa, jeenucuasano nia quiriqquia. Jesucristo muetasacari pocua, Pueyasoori jiyanoohua maninia miiniutianiya pajaniya. Cunora, saaja naa nia miiniu panishaanuucua jiaatiajaca nia quiri. Majaari nioojia niquijiotejaca nia quiniu. Maninia niishiriojojuaca nia quiriqquia. <sup>14</sup> Tarijia, niaari tama nia cuaqueya panishanojuaaja miijiaca quiquiaari, Pueyaso niishiyashijiaca nia quishacarijia. Quiarijia saniniuujia, niaari na tojijiaca cutara. Naaratej, na muerasu nia quiniuucua, majaari naa quijiaca nia quiniu socua. <sup>15</sup> Saniniuujia, saa maninia miijiaca nia quiriqquia. Pueyasocuaajaari nia saquiriojoquiaari naa tojetaarucujanaa maninia miijiaca nia quiniuria, juhua nojuajuhuj. <sup>16</sup> Tariucuacaanu Pueyaso sequesanoori naa naajiotasano quiyajuhuj: “Tojetaarucujanaa sesa miyashijiaca nia quiri, taa janiyacuaani”.

<sup>17</sup> Nia secojosacari, niaari Pueyaso sequequiaa, “cua Quenaa”. Cunoori maniniacuaja. Naajaa, majaari nia niyajetanu cutara, nojuajaari puetunu pueyajanaa nequesoreenutaniya sesa pa miishanojiniji, maninia pa miishanojinijinio. Majaari rimiajata na saniitionu quiniutianiya. Cunora, mijiria nia quishacarijia, nia puerenuta tama nia cuaqueyajaaja nia cojuare, niaa mariqui na tojiyashijiacara quiriuhuari. <sup>18</sup> Pa supuetanaa quiniuucua sesa miijiaca, paari naa miijiacara quiquiaarijuhuj. Pueyaso cutaraari naa sesa pa quiniujiniji pa jataniquiaari maninia na muerasu pa quiniuria. Niaacuajaari niishiya, majaari Pueyaso masenu quiquiaari pajaniya orota, platatanio, shaajeja casaata. <sup>19</sup> Nojuajaari pa masequiaari tama Neyanuniyojua nanacatajaaja. Jesucristoori tama na cuaqueyajaaja tarinitiaquiaari pocuara na mosaanura, na nanaca shoonuucua pa jiyanooshaanura. Tariucuacaanu, borrego jaara Pueyaso niquiara mosaaquiaari na camaru niti,

cuno borregoori tojetaarucujanaa borrego maniniu quiquiaari. Naajuhuaaj, Jesucristoori tojetaarucujanaa maninia miijia quiquiaari. Naacuajitij, nojuajaari tojetaarucujanaa maninia pueyano quiquiaari pa niti na mosaanura. <sup>20</sup> Jiya shipiniyaquishacarijia, Jesucristoori tariucua pueya niti mosocoriquiano sequesaaquiaari, sesa miijiaa jiyanooshaanura. Saniniuujia quiari naataja, nojuajaari shusha mijiria muetaquiaari pocuara na mosaanura, taa Pueyaso miiniu paniquiaari pajaniyaracuajani. <sup>21</sup> Naa Jesucristo miiniuucua pocuaratej, niaari Pueyasocua tiuquuaa. Pueyasocujajaari Neyanu samiitianiquiaariuhua. Na jiyatequiaariiri Jiyaniijiajanaa na quiniuria, shacantuuca cumaacaraca quijia na quiniuria. Naacuajitij, niaari quiarjia Pueyasocua tiuya, na samiitianiuria niajanijuhuaaj. Naaratej, niaari juhujaniya sashiya, shacantuuca quijiacara nia jatanishaanurajuhuaaj.

<sup>22</sup> Seetanu rupaajanaa tojitiajaca nia quiniuucua, nioojiaari tari jeequejosaquiaari, niarta Pueyaso pueya panijiaa nia quiniuria seetanujanaa. Naaratej, seetanujanaa panitiojuaca nia quiriquia puetunu nioojiatjanaa, maja sesa nia niishiriojonuta quenaaja. <sup>23</sup> Naa panijiaa nia quiri, jatanishano pueya nia quiniuucua. Pueyaso rupaacua nia tiushacari, niaari juhua roosaaquiaariuhua, pueyaracaanu quijiaca nia quiniuria seetanujanaa. Pueyaso Rupaacujajaari pueyano samiitianijia, saminio na quiniuucua. Naacuajitij, niaari shaajeyashijiacara jatanishaaquiaari pueyaracaanu Quijia rupaacua nia tiuuniucua. <sup>24</sup> Tariucuacaanu Pueyaso Rupaajinia naajiotasanocujajaari naa sequeya:

“Puetunu pueyajanaari rishiyashijiaa juhua jiyasocua. Na cumaaca, puetunu na jiiatasanojuanaajuhuaaj, cunoori soreja, juhua naana shuu. Jiyasocuaari soreja. Naana shuuri tijia. <sup>25</sup> Saniniuujia, Pueyaso Rupaacutaraari pueyaracaanu quijia”.

Cuno rupaacujajaari nia niqiuara pohuatasaaquiaari pueyaracaanu quijiacara na jataniniuria niajanijia.

## 2

<sup>1</sup> Naaratej, nia tarinitiare puetunu sesa nia miiniuujanaa. Seetanujanaa nia tarinitiare cuaracashijionu. Naajuhuaaj, majaari sapuenu juhua maninia pueyano niqishano nia quiniu najuhuanaj. Majaari tamasaca jiiatasanoocua jiaatiajaca nia quiniuujuhuaaj. Majaari coriaacojuaca nia quiniu socua. <sup>2-3</sup> Niaa jaara tari niishiyacuaja pa Jiyaniijiaari seetanujanaa maninia, na rupaacua jiaatiajaca nia quiricuarajaj. Naatej, taa shusha rasano conaaja jiaatiaa supuenuucuaaani, naa Pueyaso Rupaacua jiaatiajaca nia quiriquiaajuhuaaj, cumueeca Pueyaso muerasu nia quiniuria seetanujanaa. Naacuajitij, niocua tojetaarucujanaa jatanishano pueya quiri.

### *Cristoori juhua saminio saajia, Pueyaso quiquiorano tiataja*

<sup>4</sup> Saijiniji shipinishano tiaari pueyaracaanu rishijia. Naaratej, pa Jiyaniijiaari miriqui sequeshiya juhua saminio saajiaa Pueyaso quiquiora. Mijiria Pueyasora tiajonaari jyaniquiaari cuno saajiaari sesarujau. Naaratej, nojori jiyajenetasacari cuno saajia, nojoriiri na jataquiaari na ruuretasacari. Nojuaja cutaraari Pueyaso saajia maniniu, tama na saquiriojosanojuaja. Naaratej, nocua pa tiuuri. <sup>5</sup> Naajuhuaaj, puetunu Jesuucua tiuujiaa pueyanojuanaari pueyaracaanu rishijia quiquiorano Pueyasora. Naacuajitij, Jesuucua pa tiushacari, paari juhua maniniuujiaa sai Pueyasorani, na



quiquiora na tiatajara. Naajuhuj, Pueyaso quiquio pa quishacari Neyanuucua pa tiuuniuucua, Pueyasoori pa jiyateya pueyacuara secojonaa pa quiniuria na tacoji. Majaari seya pa niqutiojonu quiquiaa Pueyasoni, taa tariucuacaanu pueyacuara secojonaa pueya miiquiaaricuaani. Paa cutaraari tama pa cuaqueyajaaja jiyatequiaa Pueyasora pa quiniuriani, puetunu pa miishanojuanaano. Puetunu naa pa miishanojuanaa Jesucristoocua pa tiuuniuucuaani, cunoori Pueyaso timitiquiaa. <sup>6</sup> Cunora, tariucuacaanu Pueyaso Rupaajinia, miriqui Pueyaso sequesano Jesucristojiniiri naa naajiotasano quiya:

“Janitari Sión tuhananuucua jiyanojuaa cua panishano saajia nianutaniyani. Cuno saajiaari tama cua saquiriojosanojuaaja. Maniniujajau saajia seetanujuanaari. Cante nocua tiuyani, nojuajaari maja na cararosaanu quiniutianiya”.

<sup>7</sup> Cua panishano pueyanaa, cuno saajiaacua tiujujia nia quiniuucua, cuno saajiaari jiyanojuaa nia timitiasano. Nocua tiuyashijia cutaraari cararosaanutaniya. Nio tariucuacaanu Pueyaso Rupaajinia naajiotasanoori tari tohuatecanu nojoriria. Naa miriqui sequeyari:

“Tiajonaa jatasano saajia, nojori jiyanishacari cuno saajia naasucua sesarujajau, cuno saajiacuajaari socua jiyanojuaa panishano saajiaari jiyate-saaquiaariuhua”.

<sup>8</sup> Tamaqui, nojuajiniiri naa miriqui naajiotasano quiyajuhuj:

“Pueyari cuno saajiaacua tiuriiniutianiya. Nocua jiriatanutaniyajaariuhua na tiuriiniuria”.

Nojoriiri nocua tiuriiquiaa, nojori tojiyaquiniuucua Pueyaso rupaa Jesucristojiniji. Pueyasocujaari tariucuacaanu sequequiaari Neyanuucua tiuyashijiaari tiuriiniutianiya puetunurajanaa.

<sup>9</sup> Niajaniya saniniuujia, niaari tama Pueyaso saquiriojosano pueyajaaja. Nojuajaari puetunu niajanijanaa jiyatequiaari nojuaja secojonaa nia quiniuria pueyacuara, pueyaracaanu na panishano miijiaca nia quiniurijuhuj. Puetunu niajanijanaari tamasa pueyapuejinijinio saquiriojosaaquiaari saaja Pueyaso pueya nia quiniuria. Neyanu cusonuta, Pueyasoori naa pa masequiaari tama nerajaaja, maninia Pueyaso miishano pa pohuatanura tamasa niqiuara. Tarijia, niaacuajaari juhua ninishiqui quijiaca quiquiaari. Pueyaso cutaraari nioojia cuhuataquiaari, seetanujuanaa shacantuuca cumaacajinia quijiaca nia quiniuria nata. <sup>10</sup> Tariucuacaanu, Jesucristoocua tiuyashijia nia quishacarijia, niaari juhua soosano taucuaca quiquiaari Pueyasora. Quiarijia saniniuujia, niaari Pueyaso panishano pueya. Tariucuacaanu, majaari Pueyaso taraajenu quijia niaacua. Quiarijia cutara, niaacua taraajeyari. Cunora, nia jiyanoquiaari.

### *Pueyaso panishano miijiaca pa quiriqiaaj*

<sup>11</sup> Cua panishano cuarta Pueyaso pueyanaa, nia tojiri cua sequesano. Niaari juhua rucoonaa mijiria. Nio jiyari maja pueyaracaanu pa quijiaari. Naaratej, majaari tama nia cuaqueya miiniu panishanojuaaja miijiaca nia quiniu, saaja shuquiriaatia nia quiniuria mijiria. Sesa casaacua pa cuaqueya jiaatianuni, cunoori poojia sesojua. <sup>12</sup> Saaja maninia miijiaca nia quiriqiaa Pueyaso niishiyashijia niqiuara. Naacuajitij, nojori jaara niaacuara rimiaaqueriquia juhua sesa miijiacara nojori jiyatesacari niajaniya, naajaa. Jiya puequesacari, Pueyasoori puetunu pueyajanaa nequesoreenutaniya. Jiyacari, niaacuara rimiaaquejacaari niishiniutianiya, Pueyasoori tojetaarucujanaa maninia miijia na saniitiosacari nojori, maninia na miishacari niajaniya saniniuujia.

<sup>13</sup> Pa Jiyaniijia tojjiaca nia quiniuucua, puetunu mijiria pa jiitianaa jiyani-  
ijianucua tojitiyajaca nia quiriquiajuhuj. Naacuajitij, nia jiya jiyaniijiajanaa  
tojjiaca nia quiri. Nojuacuajaari jiyaniijiajanaa cutara. <sup>14</sup> Cunora, na  
jiyatesano jiyaniijianucua tojjiaca nia quiriquiajuhuj. Nojoricuajaari na  
jiyaramiquishano, sesa miijiacaa saniitiosaanura, maninia miijiacaa manini-  
uhuaqueetasaanura saniniuujia. <sup>15</sup> Naacuajitij, saaja maninia miijiacaa  
nia quishacari, niaari niishiyashijiacaa sesa miijiacaa sanaajanutaniya, na-  
juhuana nojori sesacasacari niajaniya. Cunora, Pueyasoori paniya maninia  
miijiacaa nia quiniuria.

<sup>16</sup> Tariucuacaanu, Moisés Rootasanoori juhua nia jiyaniijia quijia puetunu  
niaarajanaa nia tojishocoriquiano. Quiarjia saniniuujia, Jesu cusonu-  
ucua nia niti, nojuajaari Moisés Rootasano tohuateequiaari. Naacuajitij,  
nojuajaari Moisés Rootasano sanaajaquiaari niaara. Naacuajitij, Moisés  
Rootasano tonujiyaquishacari niaacuara tari, naajaa, majaari nia jiyaniinu  
naacuajiti nia naata tama nia panishanojuaja miiniu. Pueyasajuanaacua-  
jaari nia Jiyaniijiajanaa cutara. Naaratej, seetanujuanaa na tojitiyajaca seya  
nia quiriquia cutara. <sup>17</sup> Majaari quenaaja niquiriyatu pueyano rerequeteja  
nia quiniu. Niarta Pueyaso pueya panijiacaa nia quiriquia cutara. See-  
tanujuanaa Pueyaso tojjiaca nia quiriquia. Majaari jiya jiyaniijiajanaa  
rerequetejaca nia quiniu.

### *Naquiya pa miishacari, sanaa pa rejeretariquia juhua Cristo*

<sup>18</sup> Poonijjotesano pueyanaa, seetanujuanaa maninia nia camarnu tojjiaca  
nia quiriquia. Nia camarnu jaara juaajiacaa quiriquia, naajaa, saaja na toji-  
jiaca nia quiriquia. Majaari saaja maninia nia jiitijacaa tojjiaca nia quiniu,  
nia jiyanoojiacanio. <sup>19</sup> Niaa jaara juhuajaniya rejeretariquia najuhuana nia  
camarnu saniitiosacari niajaniya, cunoori jiyanojua maninia Pueyasora.  
<sup>20</sup> Pueyaso cutaraari maja na timiniu niaa jaara juhuajaniya rejeretare  
nia camarnu saniitiosacari niajaniya seetanujuanaa sesa nia miiniuucua.  
Saniniuujia, nia camarnu jaara saniitiore niajaniya maninia nia miiniuucua,  
niaa jaara na rejeretare juhuajaniya, Pueyasoori cuno timitiaja cutara.  
<sup>21</sup> Pueyasocujaari nia saquiriojoquiaari naquiya rejeretajaca nia quiniuria  
maninia nia miiniuucua. Cristojuanaacujaari naquiya miishaaquiaari  
maninia na miiniuria pajaniya. Nojuajaari naa miiquiaaritij, pa niishiniuria  
juhua nojuaja pa miiniuriajuhuj. <sup>22</sup> Cristoori maja quenaaja sesa na miiniu  
quiquiaari mijiria na quishacari. Majaari na cuaracashijionu quiquiaari  
quenaajajuhuj. <sup>23</sup> Jaara sesacasaaquiaari, nojuajaari maja quenaaja nojori  
na riucuanu quijia na juaaniutia. Jaara miitiasaaquiaari, majaari que-  
naaja nojori na miananajonu quiquiaari. Nojuajaari saaja na Que Pueya-  
soocua tiuquuaari, na niishishacari nojuajaari seetanujuanaa maninia  
nequesoreena cutara. <sup>24</sup> Cristo jaara niyacutesanojinia cusojuaaaquiaari,  
nojuajaari tari puetunu sesa pa miiniuujianaa cusotaquiaari. Naa pa niti  
Cristo cusonuucuatej, cunoori quiquiaari maninia miijiacaa pa quiniuria  
saniniuujia, maja socua sesa miijiacaa pa quiniuria. Naajuhuj, nojuajaari  
pa niti nootusaquiaari, pa naatanijiosaanura saniniuujia. <sup>25</sup> Tarijia, niaari  
juhua tashuquioono borregohua rucoojuaca quiquiaari. Quiarjia saniniu-  
ujia, niaari nia cojuana Cristoocua tiuquuijoquiaari. Nojuacuajaari nioojia  
jiitiana maniniu.

## 3

*Camiyono pueyara rootasano*

<sup>1</sup> Camishano maajipohuanaa, nia niyaca tojitiajaca nia quiriquia maninia. Naacuajitij, nia niyaca jaara Pueyaso rupaacua tiuyashijia quiriquia, naajaa, nojori tojitiajaca nia quiniucua nojoriiri niishiniutianiya Pueyaso Rupaari seetanujuanaa. Nojoriiri naa niishiniutianiya saa maninia miijiacaja nia quishacari, nojori nia pohuataaquishacarijia Pueyaso Rupaa. <sup>2</sup> Nojori niquishacari tojetaarucujanaa maninia miijiacaja nia quishacari, nojori tojijiacajuhuaaj, saa cunotaja nojoriiri maatia niishiniutianiya Pueyaso Rupaari seetanujuanaa. <sup>3</sup> Maajipohuanaa, majaari nia tacaaniu saaja nia maniniushiniuria, maninia nia niquishaanura. ¿Maajitiiri maniniucuasano, saaja na muezaca na canuusacari maninia, na cushitiasacari orojiniji shipinishano tuhuajashiquia, na cushishacari shanohua toquejuhuaaj? ¿Jiyano maajitiiri maniniucuasano jaara juaaniu maniniu quiriquiajuhuaaj? Maja. <sup>4</sup> Naaratej, maninia cutaraari nia tacaaniuria nioojia nia maniniushitiniuria. Cunora, saaja maninia maaji quiniucua jiaatiajaca nia quiriquia cutara, jacaria pocuajajuhuaaj, maja juaajia. Jiyano maajitij, cunoori seetanujuanaa maninia niquishano Pueyasora cutara. Niaa jaara nioojia maniniushitiri cutara, cunoori seetanujuanaa shaajeyaquiriquiano. <sup>5</sup> Naajuhuaaj, Pueyasooocua tiuujiaca tariucuaaanu maajipohuari neyaca tojijiacaja quiquiaari. Naa nojori miiniucuatej, nojori jiuujiaari seetanujuanaa shanohua maniniushitishano quiquiaari Pueyasora cutara. <sup>6</sup> Supuetana Abraham niquiocua Saaraari naa neyaca tojijia quiquiaari. Seetanujuanaa neyaca tojijia na quishacari, nojuajaari na jiyaniquijia na jiyaniijiaata. Naacuajitij, niaa jaara maninia miijiacaja quiriquia, niaa jaara nia puereyaquiniutia nia niyaca tojijia quiriquiajuhuaaj, Pueyasora, niaari Saara niquiojori.

<sup>7</sup> Niajanijarijiaata canuunaa, nia niquiocua nia jiitariquia maninia, nia niishishacari maajiiri maja cumueeca juhua cayaja. Majaari na rerequetenu. Maajipohuacuajaari Pueyaso jiyanooshanojuhuaaj, taa na jiyanooquiaari niajanijacuaani. Pueyasoori niaata nojori cojiritianutianiya samiitiani-ionu, pueyaracaanu rishijiacaja nojori quiniuriajuhuaaj. Naacuajitij, maninia nia jiitariquia nia niquiocua, Pueyaso mariqui nojuaja nia secojosano tojiyaquiriiri.

### *Paatucua taa miiriquia parta pueyani*

<sup>8</sup> Pueyanaa, cua sequesano quiarijiani, nioori puetunu Pueyaso pueyarajanaa. Pueyaracaanu jiuujiaatiojuaca nia quiri. Majaari juayonuujutanu. Niarta Pueyaso pueya nia cojiriquia taraatia nojori quishacari, shuquiriaatia nojori quishacarijuhuaaj. Seetanujuanaa panitiojuaca nia quiri juhua nia tapueyocuacata. Taraajetoojuaca nia quiri juhuaaj. Naajuhuaaj, majaari tama nia cuaqueyajaaja nia jiyatenu juhua socua tojishano pueyano nia quiniuria tamonu pueyanojiniji. <sup>9</sup> Niaa jaara sesa miishaariquia, majaari na naminiu. Naajuhuaaj, niaa jaara sesacasaariquia, majaari nojori nia riucuanu nojori nia sesacanurajuhuaaj. Saaja maninia nia riuhanere nojori. Tariucuaaanu, Pueyaso paraca nia quishacarijia, nojuacuajaari nia saquiriojoquiaari maninia na miiniuria niajanijia. Naaratej, saaja maninia nia miiriquia nia paracajuhuaaj. <sup>10</sup> Tariucuaaanu Pueyaso Rupaajiniacuajaari naa naajiotasano quiyajuhuaaj:

“Cante pueyaracaanu mijiria rishiniucua jiaatiaani, shuquiriaatia na quiniuriajuhuaaj, nojuaja cuara na niti cojuara maja sesa na pocuanura. Cuara na rupaa cojuarajuhuaaja maja na cuaracashijionura.

<sup>11</sup> Naajuhuaaj, cuara sesa na miijionu tarinitiaara saaja maninia na miiniuria. Nojuaja cuara pueya jiyanoootiooteja quiiria. Cuara naa

maninia na miiniu tarinitiaaquiiria. <sup>12</sup> Cante naa maninia miijiani, Pueyasoori na cojuaja, na secojosano tojjiajaariuhuj. Saniniuujia, Pueyasoori sesa miijiaca samiritiaja saaja”.

<sup>13</sup> ¿Cantucua sesa nia miiriquiani niaa jaara saaja maninia miijiaca quiriquia? <sup>14</sup> Naajaa, niaa jaara saaja maninia nia miiniuucua miitiasaare, nia timiquiore. Pueyasocujaari jyanohua maninia miiniutianiya niajaniya saniniuujia. Mijiria quiniaa miananajosacari niajaniya, majaari puerenu, majaari nioojia nia niqijiotenu. <sup>15</sup> Saniniuujia, nioojiajania Cristo nia jiyatere nia Jiyaniijiajanaara, seetanujuanaa na tojjia nia quiniuria. Juhucarijia nia niishiriojoriquia, jeenucuasano nia quiniuria, maninia nia pohuatanura Jesucristojiniji. Naacuajitij, niaari jeenucuasano quiniutianiya, maninia nia riucuanura tamasaca jaara nequesotare niajaniya, casaara juhuajaniya naquiya miiniu rejeretajacate niajaniyani. <sup>16</sup> Jacaria nia pohuatare nia paniniutia nojori, maja nia rerequetenuta nojori. Pueyaracaanu maninia miijiaca nia quiriquia, sesa nia miiniu mariqui nioojia macuhujareeri. Naacuajitij, pueyaracaanu shitimia maninia miijiaca nia quishacari Jesucristoocua tiuujia nia quiniuucua, niaacuara rimiaaquejacaari tama sesa na pocuanuucujaaja caririquiniutianiya.

<sup>17</sup> Nio nia niishiri pueyanaa. Pueyaso jaara paniri naquiya nia miishaanura, socua maninia cutaraari naquiya nia miishaanura maninia nia miiniuucua, maja sesa nia miiniuucua. <sup>18</sup> Cristojuanaacuajaari mosaaquiaari sesa miijiaca pa quiniuucua. Majaari socua na pacutenu quiniutianiya cusonu. Nojuajaari tojetaarucujanaa maninia miijia quiquiaari. Naacuajitij, nojuajaari sesa miijiacaacuara cusoquiaari, Pueyasocua na jiyatanura niajaniya. Pueyano cuaqueyaraca na quishacari, mosaaquiaariiri. Pueyaracaanu rishijia sohuanuraca na quiniuucua, nojuajaari samiitiaquiaariuhua. <sup>19</sup> Naa sohuanu na quiniuucuatej, nojuajaari macunucua quiquiojina rosequiaari tii tama nojuajiniijiaaja na pohuatanura macunucua sohuanu. Cuno pojoriiri nujuatejojuajinia mishiquionucua quiya. <sup>20</sup> Cuno pojoriiri, noo pojoricujaja tariucuaanu supuetana Noé tojiyashijia quiquiaariti, pueyaracaanu Noé poojotasacari Pueyaso rupaa nojori niqiiara juucua. Pueyaracaanu Noé tarishishacari na puereetuca buque na shipinishacari, pajaacuaji na tacajara, Pueyasoori jiyacari cuno sesa miijiaca sashiquiaari juucua. Pueyaracaanu sashiquiaariiri nojori tacatonuhua noojia nocua juucua. Puetunu mijiria quijiaca pueyajiniujiajanaani, saaja ocho pueyari cureequiaari, buquejiniacuma nojori tiuquitianuucua. Puetunu pueya shushiniushacari pajaajinia, cuno pajaari saniniuujia Pueyasocua tiuujia cuataniquiaari na buquejina. <sup>21</sup> Quiarijia pajaniyara saniniuujia, cuno pajaari miriqui pa niishitiojiya taa Pueyaso miiquiaa pajaniyani, paa jaara moojinia tiuquinishaareni Jesuucua pa tiuushacari. Naatej, taa Noé juhuajaniya cuataquiaari pajaajiniacuaani, Pueyasocua tiuujia na quiniuucua, pueraari naajuhuj. Naacuajitij, paa jaara moojinia tiuquinishaareni, paari pa timiniutia moojiniji tohuataquiohuani, poojia cajitishano seetanujuanaa pa niishishacari paari tari jiyanooshanoni, pocuaji Tacuna Jesucristo samiitianuucua macujiniji. Majaari pa tiuquinishaanu quiquiaa pa seca pa jatanura. <sup>22</sup> Jesucristo samiitiasacariuhua, nojuajaari jiyocuaanu tacaquiaariuhua. Quiarijia cajiya Pueyaso miaquetajaraari. Jiyaniijiajanaa na quiniuucua, nojuajaari cumaacaraca, tama nojuajaaja na tojitiniuria Pueyaso seya, puetunu cumaacaraca quijiacajanaa, samaruhuanio.

*Maninia miijiaca pa quiriquia, Pueyaso cumaaca pa jiitianuucua*

<sup>1</sup> Naacuajiti pueyanaa, naatej, taa Cristo rejeretaquiaari naquiya miiniu mijiria na quishacaricaaani, naa rejeretajaca nia quiriquiajuhuaj, niaa jaara naquiya miishaariquia. Naquiya pa miishacari, cunoori sesa pa miiniu pa tarinitijia. <sup>2</sup> Naacuajitij, paa jaara naa naquiya miishaariquiani, na nuhuaji paari saaja Pueyasora quiniu paniyani. Paari saaja na panishano miiniu paniyani, maja tama pa cuaqueya panishanojuaja pa miiniuria socua. <sup>3</sup> Tarijia, Pueyaso tojiyashijiaca nia quishacarijia pueyanaa, niaari jyanohua sesa miijiaca quiquiaari, taa Pueyaso niishiyashijiaca miiquiaacuaani. Niaari saaja nia cuaqueya miiniu panishanoocua shiini-uquijia quiquiaari. Niaari queraatia tamaatia sesa miiniuucua jiaatiajaca quiquiaari. Niaari saaja mashaasequenujuaca quiquiaari. Nia queranacunuusaqui, niaari tojetaarucujanaa sacuaraatia miijiaca quiquiaari. Niaari rerejojuajuhua puera nia ratunura, jyanohua nia mashaasequenuunurajuhua. Naajuhua, niaari juaashiquiata shipinishano nia pueyasora nia jiyatesano shuquiritiajaca quiquiaari. Niaari na tacoji sacuaraatia pueresano casaa miiquiaarijuhuaj. <sup>4</sup> Quiarijia saniniuujia, Pueyaso niishiyashijiaca nia cojiyaquishacari naa sacuaraatia nia miijionuratej, nojoriiri jiuujiatequiaa nojori shaacasacari nijaniya. Nojoriiri cunora nia sesacaquiaa. <sup>5</sup> Cuno pojori cuaara niishiiria nio, Pueyasoori nojori nequesoreenutaniya na nequesoresacari puetunu pueyajanaa, saminiuucua, macunucuanio. Jiyacaritij, nojori cuaara tama nojoriicuaji riucuaara-jaaja. <sup>6</sup> Cunora, pa Jiyaniijia Jesucristoori macunucua niquiara pohuataquiaari Pueyaso rupaa tama nojuajiniijiaaja, nocua tiuujiacara na jiyatesocoriquiano. Nocua tiuujiaaari pueyaracaanu rishijiacara quiriquiano, taa Pueyasocuaani. Sesa miijiaca mijiria nojori quiniuucua, nojoriiri pajajinia cusonuquiaari taa puetunu pueyajanaa shaajecoquiaacuaani. Naajaa, Jesuucua tiuujiaa cutaraari samiitianijiosaanutaniuhua.

<sup>7</sup> Nio pa quishacarini, paari socua quenaacoya jiya puequesacariicuarani. Naaratej, niishiriojuaca nia quiriquia. Maninia nia jiitariquia tama nia cuaqueyajaaja, saaja Pueyaso secojuaca nia quiniuria pueyaracaanu. <sup>8</sup> Jyanohua panitiojuaca nia quiriquiajuhuaj. Cunoori socua panishano cutara. Paa jaara panijiaa quiriquiani, paari queraatia sesa miishano jyanoojia quiniutianiyani. Naaratej, seetanujuanaa panijiaa nia quiriquia. <sup>9</sup> Niarta Pueyaso pueya jiitiaaquishacari na maquejara, na miaquesocoriquianojuhuaj, nojoriicua taraajeja nia quiriquia. Nojori nia tiuquinitariquia nia tijajinia nia timiniutia. Majaari nojori nia ririjiotanu nia taajenuta. <sup>10</sup> Pueyasocuaajaari na Sohuanu niquitioquiaa puetunu na pueyajanaa, tamaatia maninia casaa miiniu niishijiaca pa quiniuria. Naaratej, puetunu nijaniyajanaa cuaara maninia miiria niarta Pueyaso pueya pueyaracaanu, taa Pueyaso cumaquiquiaa nijaniya maninia nia miiniuriacuajani. Maninia nia poonijioteriquia Pueyaso cumaaca, nojuaja niquitijosano nijaniyani. <sup>11</sup> Naacuajitij, nia pocuasacari, Pueyasocua nia tiuuri nojuaja cumaquiniuria nijaniya na panishano nia sequenura. Naajuhua, niaa jaara casaa miiriquia niarta Pueyaso pueya nia naacunura, nojori nia miiriquia maninia Pueyaso niquitiosano cumaacata. Naa nia miiriquiatej, Pueyaso timitiasaanura socua, Jesucristoocua tiuujiaa nia quiniuucua. Nojuaja cuaara maniniuhuaqueetasaaria pueyaracaanu, tojetaarucujanaa maninia miijia na quiniuucua, puetunu cumaacaracajanaa na quiniuucujuhua. Cuaara naa quiiriatej.

*Juhuaaniya pa rejeretare naquiya miiniu, Pueyaso pueya pa quiniuucua*



<sup>12</sup> Cua panishano cuarta Pueyaso pueyanaa, majaari nia shiriiquiniu niaa jaara jiyanoehua naquiya miishaariquia. Majaari nia jiyaniujuhuaj saa niajanijaya naa miishiya. <sup>13</sup> Niaa jaara naa naquiya miishaariquatej, nia timiri. Jesucristoocua tiuujiaca nia quiniuucua, niaacuajaari naa miishiya taa Jesucristo miishaaquiiaari naquiyacuaani. Naa naquiya miiniu nia rejeretasacarij, niaari jiyanoehua timitianutaniya Jesucristo, shacantuuca na cumaacata na tiuquishacariuhua, na jataniniuria niajanijaya juhua nojuaja nia quiniuriajuhuaj. <sup>14</sup> Naajuhuaaj, niaa jaara sesacasaariquia Jesucristo tojijiaca nia quiniuucua, shuquiriaatia nia quiriquia. Pueyari naa nia sesacaquiaa, shitimia maninia miijiaca nia quishacari, Pueyaso Sohuanuraca nia quiniuucua. <sup>15</sup> Niaa jaara naquiya miishaariquia pueyanaa, cuno cuara quiiria maninia miijiaca nia quiniuucua, maja sesa miijiaca nia quiniuucua. Naa cuara caririquiiria cutara niaa jaara mojuaquiri, nohuasejojua, sesa miijia, timia niishiniu panijia tamasa casa. <sup>16</sup> Saniniuujia, maja cutaraari nia caririquiniu niaa jaara naquiya miishaariquia Jesuucua tiuujiaca nia quiniuucua. Saaja Pueyaso nia shuquiriariquia cunora.

<sup>17</sup> Quiarijiani, Pueyasoori tama na pueyajaaja saniitioquiaa na tojitaquishacari na rupaa. Paa jaara naa saniitiosaaquiaacuaani, ¿taariquitijia noo pojori miishaanutaniya socuatejaj, Jesucristojiniji pohuatasano ruuretajacatej? <sup>18</sup> Naacuajitij, Pueyaso jiyanooshano pueya jaara queraatia naquiya miiquiaacuaa, ¿taariquitijia Pueyaso tojiyashijia miishaanutaniyatej? ¡Juhuej! Puereeta miishaanutaniyari Pueyaso ruuretajaca, sesa miijiacanio. Nojoriiri jiyanoehua socua naquiya miishaanutaniya, Pueyaso saniitiosacari nojori. <sup>19</sup> Naacuajitij, Pueyaso jaara naa naquiya nia miishaanura paniya, juhujaniya nia rejeretariquia naquiya nia miiniu. Majaari nia tarinitianu maninia nia miiniu, naquiya nia miishacari. Saaja Pueyasocua nia tiuuriquia nioojia na cojuanura maninia. Nojuacuajaari na Shipinia. Nojuacuajaari saa maniniaja. Naquiya pa miitiquiaacuajaari socua na jenucuanura pajaniya.

## 5

### *Socua rootasano Pueyaso pueyara*

<sup>1</sup> Quiarijia saniniuujia cuarta Pueyaso pueyanaa, janiyari nia jiiitianaa nacasuyani. Niajanijaya, Pueyaso pueya maapue jiiitianaanaa, cua tojitiare. Janiyacuajaari Pueyaso pueya maanu jiiitianajuhuaaj, juhua niajanijajuhuaaj. Janiyacuajaari pa Jiyaniijiajanaa niquiniani, nojuaja jaara naquiya miijioquiaari mijiria na quishacarijia canaata. Naajuhuaaj, nojuajiniji cua pohuatanuucua, janiyari naquiya miishaaquiiaaaniuhuaaj. Naacuajitij, pa Jiyaniijia muetasacariuhua na shacantuuca cumaacajinia, janiyari jaaraajaaja niaata cojiritiasaanutaniya jatanishaanuni, juhua nojuaja pa quiniuria mariyata. <sup>2</sup> Cunora Pueyaso pueya jiiitianaanaa, shamaatia nia cojuare Pueyaso pueyaniyoyua, teyano jiiitianaara Pueyaso jiyatequiaari niajanijiyacuajani. Maninia nia cojuariquia nojori, seetanujuanaa nojori nia paniniutia, taa Pueyaso paniya nojori nia cojuanuracuajani. Majaari nojori nia jiiitianu nia taajenuta saaja nojori jiiitianaa nia quiniuucua. Naajuhuaaj, majaari nojori jiiitianaa nia quiniu saaja cumaneecaacua nia jiaatianuta. Saniniuujia, seetanujuanaa nojori nia paniniutia nia jiiitariquia niarta Pueyaso pueya. <sup>3</sup> Majaari niarta Pueyaso pueya nia jiiitianu juhua tama nia seyajaaja. Niajanijaya saniya cuara maninia miijiaca quiiria nojori

niquiara, nojori niishiniuria naa quijiacate Pueyaso pueya, naa nojori miini-uriajuhuaj. <sup>4</sup> Naacuajitij, pa Jiitianajanaa tiuquishacariuhua jiyocuacaanuj, niaari shacantuuca quijiacara jatanishaanutaniya, pueyaracaanu rishijiaca nia quiniuriajuhuaj.

<sup>5</sup> Niajaniya mashiquioriniaa, Pueyaso pueya jiitianaa tojjiaca nia quiriquiajuhuaj. Puetunu niajanijajanaa Pueyaso pueyanaa, tama nia cuaqueyajaaja nia jiyatere niarta Pueyaso pueyano cumaquiniaa nia quiniuria jaarajaaja. Tariucuacaanu Pueyaso Rupaajiniacuajaari naa naajiotasano quiya:

“Pueyasoori na juaaniutia niqijia narta pueya shocoteja. Saniniuujia, narta pueyano shocoteyashijia naacujua cutaraari”.

<sup>6</sup> Naarate pueyanaa, puetunu niarta Pueyaso pueyajanaa nia jiyateriquia tojishano pueya nojori quiniuria niaara. Majaari quenaaja nojori nia rerequetenu. Naa juhuajaniya niarta Pueyaso pueya tojjiaca nia quishacar-itij, pa Jiyanijia Jesucristo jaara tiuquiriohua, Pueyasoori na cumaacata nia jiyatenutaniya jiyaniijianucua nia quiniuriajuhuaj. <sup>7</sup> Pueyanaa, puetunu nia tacaaniujianaa nia niqitiore Pueyaso. Nojuacuajaari niaacua taraajequiaa.

<sup>8</sup> Pueyanaa, nia Paraca sequeeri nia shanacujuquiaa, juhua sare, taa sare shanacujiya na sanura casaacuaani. Cunora, soquejaca nia quiriquia pueyaracaanu. Juhua sutejaca nia quiriquia, pueyaracaanu nia secojonura, Sesaaca mariqui juhua sare nia sareeri. <sup>9</sup> Cumaatia nia nujuatariquia nojuaja, seetanujuanaa Pueyasooocua tiuujia nia quishacari. Majaari Pueyaso Rupaacuaji nia taacanuunu. Naa nia miiriquiatej, nia niishishacari niarta Pueyaso pueyari puetunu tiqiyocuajanaa naa naquiya miiquioyajuahuaj. <sup>10</sup> Naa jaara rupaquijia naquiya miishaariquia mijiria, Pueyasoori na nuhuaji nia jataniniutianiya tojetaarucuajanaa maninia pueya nia quiniuria. Tojetaarucuajanaa pa jiyanoojia na quiniucua, nojuacuajaari nia saquiriojoquiaari nata nia quiniuria shacantuuca na cumaacajinia, Neyanu Jesuucua nia tiuuniucua. Naaratej, nojuacuajaari nia jiyatenutaniya seetanujuanaa nioojia niqijioteyashijiaca nia quiniuria, socua jiyanohua na cumaaca jiitiajaca nia quiniuria, maja quenaaja Sesaaca pootionura niajaniya. <sup>11</sup> ¡Jiyanohua maniniaari pa Que Pueyaso! Nojuacuajaari puetunu cumaacaracajanaa pueyaracaanura. ¡Cuara naa quiiriatej!

*Pedro sequesano quera na naajio na tucuatascari*

<sup>12</sup> Cuarta Pueyaso pueyanaa, janiyari parta Pueyaso pueyano Silvano naajioteree nio posunee naajioneeni. Nojuajaari shamaatia poonijiojua pa Jiyanijia. Janiyari niaacuara naajiotereeni, cua nacasunura niajaniya, cua shiniujiuniuria niajanijahuaj maja nia pishiniuria Pueyasooacuaji. Seetanujuanaa jiyanoojia na quiniucua, naarate nojuajaari nia jiitiaa maninia, naquiya na miitishacari niajanijahuaj. Cunora, nocua nia tiu-uriquia, pueyaracaanu na cumaquiniuria niajaniya.

<sup>13</sup> Babilonia tiacajinia quiniaa parta Pueyaso pueyari nia saruhuataa. Nojoriiri Pueyaso saquiriojosano na pueyaranojuhuaj, taa na saquiriojosanotucuaa niajaniani. Marcoori nia saruhuataajuahuaj. Nojuajaari juhua quiyanu. <sup>14</sup> Naa saruhuatasacari niarta Pueyaso pueya, seetanujuanaa nia paniniutia nia nujuutoore.

Pueyaso cuara nioojia cajitiiria, canapuate Jesucristoocua tiuujiacacua-jani.

## TANEE PEDRO NAAJIONEE

### *Pedro saruhuatasacari narta Pueyaso pueya*

<sup>1</sup> Janiyari Simón Pedroni, Jesucristo seru, na jiyaramiquishanojuhuaj. Janiyari cunora niaacuara naajiyani. Pa Que Pueyasoori nia tiuutiquiaari pocuaji Tacuna Jesucristoocua, taa nocua canaa tiuquiaricuaani. Nocua nia tiuuniuni, cunoori jiyanohua panishano. Naacuajitij, Pueyasoori nia jiyanoquiaa juhua sesa miyashijiaca nia quiniuria na niquiara, taa canaa quiyacuaani. <sup>2</sup> Seetanujuanaa maatia nia niishitiriquia Pueyasoni, pa Jiyaniijia Jesunio. Naacuajitij, niaari socua jiyanohua cumaquishaanutaniya. Nioojaari cajitishaanutaniyajuhua, juhuajaniya quijiaca nia quiniuria.

### *Pueyaso pueya cuaara nio niishitiojosano mijiaca quiiria*

<sup>3</sup> Jesucristojuanaacuajaari pa sequequiaari na pueya pa quiniuria. Paari na masuunu tojiquiaarini, pa niishishacari nojuajaari seetanujuanaa Pueyaso Niyanu, tojetaarucujanaa maninia mijiaca. Seetanujuanaa maatia pa niishiniucua nojuaja, paari Pueyaso cumaacaraca sesa miyashijiaca pa quiniuriani, seetanujuanaa na tojijiaca pa quiniuriajuhuaj. <sup>4</sup> Naa jiyanohua maninia mijiaca Jesucristo quiniucuatej, nojuajaari pa niishitiquiaari casaa na miiniu paniya pajaniyarani. Pajaniyarano na sequesanoori seetanujuanaa maninia, tojishocoriquiano. Paa jaara na sequesano tojitiajaca quiri seetanujuanaani, paari jatanishaanutaniyani juhua nojuaja pa quiniuriajuhuaj. Naacuajitij, paari quiariniora jatanishaquiaari na cumaacatani maja pa sesenura. Paa jaara Pueyaso tojiyashijiaca quiriquiani, paa maara tojetaarucujanaa seseriquiani, taa mijiria quiniaa pueya sesequiaacuaani tama nojori panishano mijiacajaaja nojori quiniucua. <sup>5</sup> Cunora, tamajaaja nia saniniujiuriquia tojetaarucujanaa maninia quijiaca nia quiniuria, juhua Pueyaso. Niaacuajaari tari nocua tiuujia. Naa nocua tiuujia nia quiniucuatej, jiyanohua nia saniniujiuri maninia mijiaca nia quiniuria pueyaracaanu. Naa maninia mijiaca nia quishacaritij, jiyanohua nia saniniujiuri socua niishijiaca nia quiniuria, sesa miiniu nia ruuretanura. <sup>6</sup> Naa niishijiaca nia quishacaritij, jiyanohua nia saniniujiuriquia tama nia cuaqueya miiniu panishanojuajaaja rejetejaca nia quiniuria, maja nia miiniuria sacuaraatia casaa nia panishano. Naa tama nia cuaqueyajaaja rejetejaca nia quishacaritij, jiyanohua nia saniniujiuriquia juhuajaniya sashijiaca nia quiniuriajuhuaj. Naa juhuajaniya sashijiaca nia quishacaritij, jiyanohua nia saniniujiuriquia seetanujuanaa Pueyaso panijiaca nia quiniuria. <sup>7</sup> Naa Pueyaso panijiaca nia quishacaritij, jiyanohua nia saniniujiuriquia niarta Pueyaso pueya panijiaca nia quiniuria socua. Naa niarta Pueyaso pueya panijiaca nia quishacaritij, jiyanohua nia saniniujiuriquia tojetaarucujanaa panijiaca nia quiniuria.

<sup>8</sup> Naa jaara puetunu nio niishitiojosanojuanaa tojijiaca quiriquia seetanujuanaa, majaari najuhuana pa Jiyaniijia Jesucristo niishijiaca nia quiniu quiniutianiya. Naajuhua, majaari najuhuana quijiaca nia quiniu quiniutianiya. <sup>9</sup> Nio rootasano tojiyashijiaca saniniuujia, nojoriiri juhua cariyajuaru, niishiyashijiaca. Naa nojori quiniucuatej, nojoriiri niyajetaquiaa nojoricuajaari juhua jeequejosaaquiaari sesa nojori miishanojiniji. <sup>10</sup> Cuarta Pueyaso pueyanaa, Pueyasocuajaari nia sequequiaari na pueya nia quiniuria. Nojuajaari nia saquiriojoquiaari. Cunora, puetunu nio cua

rootasanojuanaa tojjiaca nia quiriquia seetanujuanaa. Naacuajitij, niocua niishiri niaari seetanujuanaa Pueyaso pueya. Majaari quenaaja nocuaji nia rupatenu quiniutianiya. <sup>11</sup> Naa maninia quijiaca nia quiniuucuatej, niaari shuquiriaatia tiuquinitiasaanutaniya jiyocuacaanu pocuaji Tacuna Jesucristoocua, pueyaracaanu nata nia quiniuria, pueyaracaanu Jiyaniijia-janaa na quiniuucua.

<sup>12</sup> Niaacuajaari maatia niishitiojosaaquiaari Pueyaso rupaa Jesucristojiniji. Niaari cuno seetanujuanaa rupaacua tiuujia. Naajaa, janiyari pueyaracaanu nia niishitiniutianiyan, maninia nia racatanura nia numama. <sup>13</sup> Mijiria cua rishishacarijia, Jesucristo jiyaramiquishano cua quiniuucua, maniniacuajaari pueyaracaanu cua shiniujiuniuria niajaniya, maja tariucua nia niishishano Jesucristo rupajiniji nia niyajetanura. <sup>14</sup> Pa Jiyaniijia Jesucristoori tari cua nishitiriucuaa janiyari quera mosaanutaniyan. <sup>15</sup> Cunora, janiyari nio naajiya niaarani. Naacuajitij, janiya jaara mosaareni, niaari nio cua naajionee jitianutaniya cua nuhuaji nia serojosocoriquiano. Maniniacuajaari nia jitianura cua naajionee maja nia niyajetanura puetunujuanaa cua niishitiojosano niajaniya.

### *Shacantuuca Jesucristo cumaaca niquiniaajiniji pohuatasano*

<sup>16</sup> Canaa niishitiojosano niajaniya pa Jiyaniijiajinijini, cunoori maja canaa tojishano tamonujiniji. Naajuhuaaj, cunoori maja tama niishijiacajaaja pohuatasano na sapojonura pueya. Jesucristo cumaacajiniji canaa pohuatasani, naajuhuaaj, taa na tiuquiniutianihuani, puetunu cunojuanaari maja tama canaa niishishanojuaaja. Canaajanaacuajaari canaa namijiatajanaa na niquiquiaarini nojuaja jaara shacantuucara jataquiaari canaa niquiara. <sup>17</sup> Jiyacaritij, na Que Pueyasoori jiyanoehua na timitiariquiaa canaa niquiara. Canaari na tojiquiaarini naa na sequesacari Neyanujinijitij: “Nojuajaari Quiyanuniyojua. Jiyanoehua cua timitiasano”. <sup>18</sup> Canaa quishacari pa Jiyaniijiaata shacantuucara na jatasqui tuhananuucua, canaajanaari naa Pueyaso tojiquiaari jiyocuacaanuji pocuaanoni.

<sup>19</sup> Canaa tojiniuucua Pueyaso sequesanojuanaa Neyanujiniji, canaari cunora seetanujuanaa niishiyani, tariucuacaanu nojuajiniji pueyara Pueyaso sequesano caminiujiuniaa sequesanoori seetanujuanaajuhuaaj. Naaratej, maniniacuajaari nia tojiniuria nojori naajiotasano Pueyaso Jiyarosocoriquiano Pueyanojiniji. Nojori naajiotasanoni, cunoori poojiajinia cuhuataquiaa, naatej, taa samaritiu cuhuataa ninishiquicuaani, cuara juhuaquemajaatijia. Pananuuri saniniuujia muetanutaniyacujua, seetanujuanaa na cuhuatanura pajaniya. Naa quiniutianiyajaariuhua pa Jiyaniijia muetasacariuhua pocua. <sup>20</sup> Maninia nia niishiri nio, pueyanaa. Puetunu tariucuacaanu Pueyaso sequesano caminiujiuniaa naajiotasanojuanaari maja na naata niishishaanu maatia tama pa niishitijatajaaja. <sup>21</sup> Tariucuacaanu Pueyaso sequesano caminiujiuniaa naajionuutasanoni, cunoori maja tama nojori niishishanojuaaja. Pueyaso Sohanujuanaacuajaari nojori nishitiquiaari nojori pohuatanura Pueyaso sequenu panishano pueyara.

## 2

### *Sacuaraatia miijia nishitiojonaajiniji pohuatasano*

<sup>1</sup> Tariucuacaanu, noojiaqueya Israel pueyajinijiniori tama na cuaqueyajaaja jiyatequiaari juhua Pueyaso sequenu panishano caminiujiuniaa nojori quiniuria. Naacuajitij, nojoriiri narta Israel pueya sapojonuuquiaari.

Naajuhua cua panishano pueyanaa, sapojonuujuaaari nia tajinia supuenutaniyajuhuaaj. Nojori niishitiojosacari sacuaraatia tama nojori niishishanojuaaja, nojoriiri nia sapojonutaniya. Nojori niishitiojosanoori Pueyaso pueya sesojua cutara. Naacuajitij, nojoriiri tama nojori Camarnujuaaja tamacanutaniya, cante nojoriicuaara mosaaquiaaricuaajani, na pueya nojori quiniuria juucua. Cunora, nojoriiri canashiyaquiji niiquiji puetunu shaa-jasaanutaniyajanaa saniitiosocoriquiano. <sup>2</sup> Queraatia pueyari sacuaraatia miijiaca quiniutianiyajuhuaaj, sacuaraatia cuno pojori niishitiojosano toji-jiaa nojori quiniuucua. Naa nojori miiniuucuatej, Pueyaso niishiyashijiaacaari seetanu rupaaajanaa sesacanutaniya. <sup>3</sup> Cuno sacuaraatia niishitiojonuujuaaari jiyanojua casamiriaca quiniuucua jiaatijaca quiniutianiya. Naaratej, nojoriiri najuhuaana shanohua nojori niishitiojosanota nia sapojonutaniya, nareja nia niquitiojonura nojori nia cumaneeca, nia casaminio. Naajaa, naa sacuaraatia miijiaca nojori quiniuucuatej, nojoriiri tariucuaaanujiniji Pueyaso riuriosanocuaaja na saniitiosocoriquiano. Majaari Pueyaso jiyanooni quiniutianiya nojori.

<sup>4</sup> Naajuhuaaj, Pueyaso seya jaara sesa miiquiaari, majaari Pueyaso jiyanooni quiquiaari nojori. Pueyasoori puereeta nojori quejooquiaari ninishiqui. Tii nujuatejosano quiyari, nojori saniitiosaanu juuca cuaara quirijiaatijia. <sup>5</sup> Naajuhuaaj, Pueyasoori Noé quishacari sesa miijiaca pueya jiyanoaquiquiaarijuhuaaj. Cuno sesa miijiaca pajaashitiani quiaariiri nojori cusonuunura puetunujuanaa. Saaja Noé curoquiaariiri Pueyaso tojjia na quiniuucua, socua siete pueyano. Noeri pueyaracaanu cuno sesa miijiaca pueya numootequiaari juucua, nojori tacatonura noojia Pueyasocua, sesa nojori miiniuujiniji. <sup>6</sup> Naajuhuaaj, Sodoma tiacajinia quiniaa pueya quiniuucua jiyanojua sesa miijiaca, Pueyasoori cuno tiaca catijiataguiari tojetaarucuaajanaa juacara. Naa catijiataguiari Gomorra tiacajaariuhuaaj. Cuno caapiqui tiaca naa catijiatasaaquiaarini, cunoori quiquiaari cuno nuhuaji quiriquiano pueya na numootenura maja naa sesa miijiaca nojori quiniuriajuhuaaj, nojori mariqui saniitiosaarejaariuhuaaj. <sup>7</sup> Sodoma tiaca Pueyaso catijiatasacari, saaja Lot curoquiaariiri maninia pueyano na quiniuucua. Sodoma tiacajinia quijia Lot quiniuucua, nojuajaari jiyanojua taajequiaari tari, cuno pueya miijionuucua sacuaraatia casaa, tariucua nojori jiiitishano casaacua.

<sup>8</sup> Puetunu juucajanaa, Lotri narta Sodoma tiacajinia quiniaa niquiquiaari cararaatia miitioojiano. Sacuaraatia nojori pocoojonu toji quiaarijuhuaaj. Maninia pueyano Lot quiniuucua, nojuajaari jiyanojua naquiya miiquiaari noojiajinia. Cunora, quera Pueyaso saniitiosacari cuno pojori, Pueyasoori Lot mashiquiquiaari cuno pueya tajiniji. <sup>9</sup> Naacuajiti pueyanaa, paari niishiyani, Pueyasoori na tojitijaca pueya cojuaja, maja nojori mitishaanura sesa. Saniniuujia, Pueyasoori sesa miijiaca racatajajaara nujuatejosano, nojori saniitiojosaanu juucara. <sup>10</sup> Pueyasoori socua jiyanojua nio pojori saniitioriquiano: na camishoo maajipohua numuetucunuucua jiaatijacani, maajishuriu numuetucunuujuaajuhuaaj, noo pojori juhuaaj, pa Jiyaniijia rootasano ruuretajaca saajatej. Naa sacuaraatia miijiacani, nojoriiri tojetaarucuaajanaa tojiyashijiaa. Majaari na pueretunu quiquiaa sacuaraatia tama nojori panishanojuaaja nojori miiniuria. Naajuhuaaj, nojoriiri maja na pueretunu quiquiaa jiyocuacaanu cumaacaraca quijiaa na sesacanura. <sup>11</sup> Saniniuujia, Pueyaso seya cutaraari jiyanojua socua cumaacaraca cuno sesa miijiaca pueyajiniji. Naajaa, majaari nojori riuticonu quiquiaa Pueyaso, cuno jiyocuacaanu cumaacaraca quijiaa nojori sesacanura.



<sup>12</sup> Cuno pojori, saaja sacuaraatia miiniuria niishitiojonaani, nojoriiri niishiyashijiaca. Nojoriiri juhua nacujiniaaco quijiaca casami, teyanote saaja puecoosocoriquiano roosaaquiaacuajani. Tojetaarucujanaa niishiyashijiaca nojori quiniuucua, nojoriiri maninia quijiaca pa quiniuria pa Jiyaniijia rootasano sesacaquiaa. Cunora, nojoriiri juhua puecoosocoriquiano nacujiniaacoji casaa. <sup>13</sup> Naacuajitij, nojoriiri naquiya miishocoriquianojuhuj, naquiya nojori miitianuucua narta pueya. Nojoriiri jiyanojua timiquiaa nojori jaara naata quiriquia sesa miiniu juucajuhuaj taa nojori miiquiaa niucuacuaani. Cuno pojoriiri sacuaraatia miijiaca. Majaari na niishiniu caririquiniu. Nojori sapojonuucua niajaniya, nojoriiri jaarajaaja nia cojiquiaa nia queranacunuusaqui. Naa nojori quishacari nia tajiniatej, nojoriiri jiyanojua timiquiaa tariucua nojori jiiitishano sesa casaacua nojori niishiriojosacari. <sup>14</sup> Naacuajitij, nojoriiri maja nareja na niquiniu quiquiaa maajipohua. Puetunu maajipohujanaa niqutiutuquiaa nocua na jiaatianutaari. Nojoriiri maja na taajenu sesa na miiniuria pueyaracaanu. Canapuate jatarinitiaja pa Jiyaniijia tojijiani, cuno pojoriiri nojori shiniujuquiaa na sapojonuta, sesa nojori miiniurajuhuj. Naajuhuj, cuno pojoriiri tariucua jiiitinio puetunu nojori panishanojuanaa nojori jiiitianura, jaara na naata quiriquia. Nojoriiri tariucua Pueyaso jiyatesano na saniitiosocoriquiano. <sup>15</sup> Pueyaso rootasano tojiyashijiaca nojori quiniuucua, nojoriiri juhua tashuquioonoo Pueyasoocua neteja nuujiniji. Nojoriiri casamiriaca quiniuucua jiaatiajaca juhua supuetana Beor niyanu Balaam. Jiyacaritij, Moab jiya jiyaniijiaari Israel pueya paraca quiquiaari. Naaratej, nojuajaari Balaam sequequiaari, nojuajaari jiyanojua queraatia casami na niqutionutaniya, nojuaja jaara nocua quiaare, Israel pueya na shimiojonura nera. <sup>16</sup> Casamiicua jiaatiaja na quiniuucua, Balaamri na seru nijinia cajiquiaari. Quiaareeri. Nucuaco na quiasacari, Pueyasoori Balaam seru pocuatequiaari pueyano rupaa, Balaam na nacasunura. Naacuajitij, pocuaashijia seruuri Balaam tarinitiquiaariuhua, juhua moseeca sesa na miiniu panishacari juucua.

<sup>17</sup> Cuno pojori, pueya sapojoua na niishitiojosanotani, nojoriiri juhua cuari joojequetano. Naajuhuj, nojoriiri juhua niqutioocua paratu piyarojosano, tamoco quiamaa saajaari. Nojori niishitiojosanoori naajuhuj. Majaari na tojitiajaca na naacunu. Pueyasoori jiyanojua ninishiqui quiquio tari jiiitiaa nojoriicuaaji, pueyaracaanu nojori quiquiorano. <sup>18</sup> Nojori pohuatasanoori najuhuana shanohua tojishano. Saaja sapojonuuri. Naacuajitij, nojoriiri shusha Jesuucua tiuujiaa shiniujuquiaa nojori miiniuhuara tama nojori cuaqueya panishanojuaja. Cuno Jesuucua tiuujiacacuaajaari shusha naataja sesa miijiaca pueyajinijinio jatanishaariquiaa juucua, Pueyaso tojijiaa nojori quiniuria juucua. <sup>19</sup> Sapojonuujuaa cuno niishitiojonuujuaca quiniuucua, nojoriiri pueya niishitiojoquiaa sacuaraatia. Pueya niishitiojoquiaari, nojoriniaari seetanujuanaa juhujaniya quijiaca quiniutianiya shuquiriaatia, nojori jaara nojori niishitiojosano tojijiaa quiriquia. ¿Nojori niishitiojosano pueyatucua taa juhujaniya quijiaca quiriquiani, tama nojorijiaaja jaara sesa miiniuucua jiiitinio quiyajaa? Seetanujuaanaari, pueyano jaara maja na naata quiriquia sesa casaa na miijionu tarinitianu, cuno pueyanoori seetanujuanaa juhua tama sesa na miijosano serujuaaja. Majaari na naata na tarinitianu. <sup>20</sup> Pueyanaa, niaacuajaari niishiya, pueyano jaara pocuaji Tacunaacua tiuujiaa quiri, pa Jiyaniijia Jesucristoori na cumaquijia na tarinitianura sesa miiniuria na jiiitishano. Saniniuuja, cuno pueyano jaara sesa miijiaa quiriohua, nojuaja jaara sesa miijionura jiiitiriohua socua, neraari socua puereeta quiniutianiya

Pueyaso niishiyashijiaca pueyajiniji. <sup>21</sup> Naacuaajiti pueyanaa, pueyano jaara seetanu rupaajanaa niishijia quiriquia, nojuajaari cocuaatia miya jaara na samiritiarohua sesa miijia na quiniuhua. Cuno pueyanora maara socua maninia quiquiaari maja na niishiniuria Jesucristo rupaa, teyanote na niqiara pohuatasaaquiaaricuaajani, jatanishano pueyano na quiniuria. <sup>22</sup> Naa pa Jiyaniijia samiritiajaca pueya quiniuucuatej, sesa miijia nojori quiniuhua, nojoriiri nio tariucuacaanu Pueyaso Rupaajinia naajiotasano tohuateequiaa. Naa miriqui sequeyari: “Sareeri coteenu macayoree. Na miaquerohuari”. Naajuhuaaj: “Cushiiri nanatosaree juucua. Saaja na cooquiojinia neeneecuasuhuariuhuaaj”.

### 3

#### *Pa Jiyaniijia tiuquiniuhua cuaracashitishacari*

<sup>1</sup> Cua panishano cuarta Pueyaso pueyanaa, nioori tanee cua naajionee niaacuara. Coteenu cua naajiojinia, janiyari nia nacasuquiaarini socua cua shiniujiuniuria nijaniya maja nioojia niqijitejaca nia quiniuria Pueyaso rootasanojiniji. Janiyari naa miya quiaritia nio cua naajiojiniajuhuaaj. <sup>2</sup> Maninia nia numaama nia racatariquia tariucuacaanu pueyara Pueyaso sequesano caminiujiuniaa pohuatasano, pa Jiyaniijia jiyaramiquishano pueya pohuatasanonio. Cunocuaajaari pocuaaji Tacuna rootasano pajaniyara.

<sup>3</sup> Nio nia niishiriquia cutara pueyanaa. Quera nio jiya puequesacari, pa Jiyaniijia soojeacaari supuenutaniya. Nojoriiri tama na cuaqueya miniu panishano miijiacajaaja. Na macatiniuria nijaniya, nojoriiri nia nequesotanutaniya: <sup>4</sup> “¿Taa nia Jiyaniijia miiquiaarini? Nojuacuajaari nia sequequiaari: “Tacatenutaniuhuanijia”. Majaari na tiuquiniu. Tariucuaacaanu na niquiniaa pa supuetanaacuajaari tari puequecanu. Nio jiyajinia, puetunu casaajanaari quiyajaa, juhua shusha na shipinishaanujiniji. Majaari quenaaja tamonu casaa jatanu quiquiaa tamaatiara”. <sup>5</sup> Majaari naate pueyanaa. Cuno pojoriiri tariucuacaanu Pueyaso miishanojiniji niishiniu paniyashijiaca. Jiyanojia tariucuacaanu, Pueyasoori jiya cajiniocua shipiniquiaari saaja na pocuanuta. Na sequesacarijuhuaaj, jiyari mohuacajiniji muetaquiaari, mohuaca jiuujiajinia na quiniuria. <sup>6</sup> Na nuhuaji, Pueyasoori cuno mohuacaja pajaashitiquiaari puetunu mijiria quiijacajanaa na cusojuanura. <sup>7</sup> Quiaritia saniniuuja, jiya cajiniocua, nio jyanio, Pueyasoori na cumaacata nojori jiiitajaara. Na nuhuaji cutara, puetunujuanaari catenutaniya, Pueyaso saniitiosacari puetunu na ruuretajaca pueyajanaa.

<sup>8</sup> Naajuhuaaj cua panishano cuarta Pueyaso pueyanaa, pueyaracaanu nio nia niishiriquia. Pa Jiyaniijia, niqiriyatu juucaari juhua mil marijia. Naajuhuaaj, mil marijiaari juhua niqiriyatu juuca nera. <sup>9</sup> Majaari nia jyaniniu maja pa Jiyaniijia tacatenu quiniutianihua. Majaari na tarishiniu najuhanaj, taa tamasa jyaniyacuajani. Maja. Maja cutaraari na paniniu pueya quejoosaanura mani quiquiojinia. Naacuaajitij, nojuacuajaari pueya sashiyajaara nojori tacatonura nojori jiuujia sesa nojori miiniujiniji, Pueyaso pueya nojori quiniuria.

<sup>10</sup> Naajaa, nojuacuajaari tiuquiniutianihua. Pueya jyanishacari Jesucristo maja na tiuquiniu quiniutianihua, jiyacaritij, canashiyaquiji tiuquiniutianihuari. Juhua nohuasejojua tiuquiniutianihuari, sesa miijia na saniitionura. Na nuhuaji, jiya cajiniocuaari shaajenutaniya. Jiyanojia cojuatunenutaniyari na shaajesacari. Casaajiniji jiya shipinishaquiaarini, cunoori puetunu catenutaniyajanaa. Naacuaajitij, jiyari

puetunu mijiria na jiiitasano casaatajanaa shaajasaanutaniya jiyanoohua naseeca manijinia.

<sup>11</sup> Quiarijia pa niishishacari taa pa jiya shaajasaanutaniyani, cunora, seetanujuanaa Pueyaso panijiaca nia quiriquia saa maninia miijiacaja nia quiniuria. <sup>12</sup> Naa maninia miijiaca nia quiriquia, Pueyaso cuaara pa Jiyaniijia mueraterohua pocuajaatijia. Pa Jiyaniijia sequesano tojijiaca nia quiriquia, na tiuquiniu juuca nia secootenura. Jiyacaritij, Pueyasoori jiya cajiniocua setanutaniya. Naacuajitij, casaata na shipiniquiaari puetunu casaajanaani, cunoori manijinia mohuaquenutaniya. <sup>13</sup> Naajaa, Pueyaso cutaraari seetanujuanaa sequequiaari pajaniya, nojuajaari quiarinio jiya cajiniocua shipininiutianiya pajaniyara, quiarinio jiyanio. Cunora, paari shuquiriaatia na sashiyani. Jiyacaritij, majaari quenaaja sesa miiniu niishishaanu quiniutianiya socua. Puetunu casaajanaari tojetaarucujanaa maninia quiniutianiya.

<sup>14</sup> Naa nia niishishacari casaa pa sashiya nio pa quishacarini, cunora, jiyanoohua nia saniniujiuriquia saaja maninia miijiaca nia quiniuria. Tojetaarucujanaa jiyanooshano nia quiriquiajuhuaj, juhuajaniya nia quiniuria pa Jiyaniijia tacoji, na nequesoreesacari pajaniya. <sup>15</sup> Naacuajiti pueyanaa, nio nia niishiriquia: pa Jiyaniijiaari tarishiyajaara pueyacua na taraajenuucua, nocua nojori tiuniuria, Pueyaso jiyanooniuria nojori. Tarishiyajaarihuaj tojetaarucujanaa jeenucuasano pa quiniuria nera. Pa panishano parta Pueyaso pueyano Pabloori naa naajioquiaari niaacuara-juhuj, Pueyaso niishitiaja na jiiitanuucua. <sup>16</sup> Nojuacuajaari puetunu na naajioneecajiniyajanaa mariyata nio cua pohuatasano pohuataa. Noojiaqueya na pohuatasanoori seetanujuanaa jiyajeneta pueyara. Naacuajitij, mosanucua, noojia niquijiotecacanio, nojoriiri Pablo niishitiojosano jataniquiaa tamaatiara, nojori niishiyaquishacari cuno rootasano. Nojoriiri naa jataniquiaa puetunu Pueyaso Rupaajanaa. Naacuajitij, nojoriiri tama na cuaqueyajaaja jiyatequiaa Pueyaso saniitiosocoriquiano nojori quiniuria.

<sup>17</sup> Cunora cua panishano Pueyaso pueyanaa, niaacuajaari tari niishiya cuno Pueyaso rootasano tojiyashijiacajiniji. Nocuaiji jiyanoohua nia cojuariquia tama nia cuaqueyajaaja maja nia sapojosaanura sesa miijiaca nia quiniuhuara. Saaja Pueyaso rupaacua tiuujia nia quiriquia cutara, taa nocua tiuujia nia quiyacujani, cuno pojori mariqui nioojia niquijiotereeri. <sup>18</sup> Naajuhuj, socua pocuaiji Tacuna niishiniuucua jiaatijaca nia quiriquia. Naa maninia nia niishiri pa Jiyaniijia Jesucristo, socua na panijiaca nia quiniuria, socua na cumaaca nia jiiitanurajuhuj. ¡Pa Jiyaniijiaari jiyanoohua maninia! ¡Nojuaja cuaara shuquiritiasaaria quiarijia, pueyaracaanujuhuj! Cuaara naa quiiriatej.

## COTEENUJUANAA JUAN NAAJIONEE

### *Pueya samiitianijia rupaa*

<sup>1</sup> Jiya shipinishaacarijiyojua, Jesucristoori quijiajuhuanajaj. Canaari ni-aara naajiyani, canaa niishitiniuria niajaniya nojuajiniji canaa tojishano, canaa niquishanojuhuaj. Pueyanaa, canaari seetanujuanaa na niquiquiaari canaa namijiatani, pueyaracaanu nata canaa quishacari mijiria. Canaari na cooquiaarijuhuaj canaa rupuesacari nojuaja. Nojuajaari pueyaracaanu quijia cutara, pa Samiitianijiajaarihuaj, pueyaracaanu quijia pa quiniurijuhuj, na sequesanoocua pa tiuushacari. <sup>2</sup> Cuno pueyaracaanu Quijiani, nojuajaari pueyanora jataquiaari. Canaari na niquiquiaarini. Naaratej, canaari pueya pohuataquiaarini, nojuajaari seetanujuanaa pa Samiitianijia. Canaari quiarijia cuno pueyaracaanu Rishijiajiniji nia pohuatajaanihuaj. Coteenu na Queta quijia jiyocuacaanuuri. Na nuhuaji, canaacua muestaquiaariiri. <sup>3</sup> Canaari seetanujuanaa nia pohuataa canaa niquishanoni, canaa tojishanojuhuaj. Canaa pohuatasanoocua nia tiuushacari, pocua rupuetoreni, taa canaa quiya pa Que Pueyaso rupuesanocuaani, Neyanu Jesucristo rupuesanonio. <sup>4</sup> Niaa jaara nio naajiojinia canaa sequesano tojiri, niaari seetanujuanaa shuquiriaatia quijiaa quiniutianiya. Canaa jaara niaacuaji tojiriqiani, canaari shuquiriniutianiyajaacuhuj.

### *Pueyaso pa cuhuatana*

<sup>5</sup> Jesucristocuaajaari nio rupaa canaa niishitioquiaari, canaa nia pohuataani. Nojuajaari naa canaa sequequiaari: “Pueyasoori Cuhuatana cutara. Nojuajaari maja ninishiqui quijia quenaaja”. <sup>6</sup> Naacuajitij, paa jaara sequereni: “Pueyaso rupueja cutaranijia”, na rupaa pa tojiyaquishacari, paari saaja najuhuaana sapojiyani. Paari juhua ninishiqui quijia quiyajaani. <sup>7</sup> Paa jaara seetanujuanaa cuhuashiqui quiyani, taa Pueyaso quiya cuhuashiquicuaani, paari juhua rupuetootesano quiya parta Pueyaso muerasuta cutarani. Naa juhua rupuetootesano pa quishacaritij, Neyanu Jesucristo nanacaari puetunu sesa pa miishanojuanaa tuujuquiaa poojiajiniji.

<sup>8</sup> Paa jaara sequereni: “Janiya sesa miyashijiani”, paari tama pa cuaqueyajaaja sapojiyani naa pa sequesacaritij. Majaari Pueyaso rupaa tojijia pa quiniu. <sup>9</sup> Paa jaara sesa pa miishano pohuatare saniniunijia, Pueyasoori jiyanootio cutara, na jiyanooniuria pajaniya, taa na sequequiaaricuaajani. Poojiajiniji jeequenutaniya puetunu sesa casaajanaari. <sup>10</sup> Paa jaara saniniujia sequereni: “Maja sesa cua miiniu”, paari Pueyaso jiyateya juhua sapojuarani. Paa jaara naa quirini, majaari seetanujuanaa na rupaa quiniu poojiajinia.

## 2

### *Jesucristo pocuaji tacuna*

<sup>1</sup> Quiquiohuaniyojuanaa cua tojitiare. Nio naajiya niaaranijia, maja juhuajaniya nia miiniuria sesa. Paa jaara sesa miirini, paacuajaari pa Que Pueyaso shuriucua jiiitaa pocuaji Tacunani, na Que Pueyaso na jiyanootiniuria pajaniya. Nojuajaari Jesucristo, pueyaracaanu maninia miijia cutarani. <sup>2</sup> Sesa pa miishanoori jiyanooshaaquiaa Jesucristo cusonuucua pocuara. Majaari saaja jiyareta pa sesa miishano jiyanooshaanu quiquiaa, mariyata puetunu mijiria quiniaa sesa miishanojuanaari jiyanooshaaquiaajuhuj.

<sup>3</sup> Paa jaara pa Jiyaniijia rootasano tojirini, paari niishiyani paa tari Pueyaso niishirii cutarani. <sup>4</sup> Jesu rootasano tojiyashijia jaara sequeriquia: “Pueyaso niishiyaniijia”, jiyano pueyanoori sapojoua. Majaari na jiiitanu Pueyaso rupaa noojiajinia. <sup>5</sup> Cante saniniuujia pa Jiyaniijia sequesano tojijia cutarani, nojuajaari seetanujuanaa pa Que Pueyaso panijia cutara. Naacuajitij, paari niishiyani paari jatiqui quiya natani. <sup>6</sup> Cante sequejani: “Janiyari Pueyaso rupuejani”, nojuaja cuara quiiria juhua Jesucristo, taa na quiquiaari maniniacuaani, mijiria na quishacari.

### *Quiarinio Pueyaso rootasano pajaniyara*

<sup>7</sup> Cuarta Pueyaso muerasunaa, majaari quiarinio nio rootasano, janiya niaara na naajiyani. Niocuajaari tariucuacaanu nia tojishano, majaari quiarinio. Niaacuajaari tari na tojiquiaari, Pueyaso rupaa jaara shushajanaa nia niquiara pohuatasaaquiaari. <sup>8</sup> Naajaa, nio rootasano quiarijia cua naajiosanoni, niiori seetanujuanaa juhua quiarinio niaara. Niaari tari na tojiquiaa, pueya panijia nia quishacari, taa Jesucristo quiquiaari pueya panijiacuaani mijiria na quishacari. Na rootasano nia tojishacari, niniquiaari tari quiamacuaa nioojiajiniji. Pueyasoori nioojiajinia cuhuataa nia panitioosacari quiarijia.

<sup>9</sup> Njaa jaara sequeriquia: “Pueyasoori coojia cuhuatarucuaani na rupaa cua niishishacari”, na nuhuaji majaari nia niquiniu paniniu niarta Pueyaso pueyano, niaari ninishiqui quiyajaa. <sup>10</sup> Cante narta Pueyaso pueya panijia cutarani, nojuajaari cuhuashiqui quiijia cutara. Tamasacaari maja na naata sesa na miitiniu, naajuhuj, tama nojuajaarijia maja sesa na miiniu quiniutianiya, pueya panijia na quishacari. <sup>11</sup> Cante narta Pueyaso pueya niquiniu paniyashijiani, cuno pueyanoori ninishiqui quiyajaa, juhua ninishiqui canujuucuaaariuhuj. Majaari na niishiniu tee na quiaani. Naa na quiniucua juhua ninishiquitij, nojuajaari juhua cariyoujuru quiya. Majaari na niishiniu Pueyaso casaa.

<sup>12</sup> Quiquihuaniyojuanaa, niaara naajiya nionijia, Pueyaso jiyanooshano muerasu nia quiniucua, Neyanu Jesucristo mosaanuucua pocuara. <sup>13</sup> Queyanaa, niaara naajiyaniijia nia niishiniuucua pueyaracaanu Quijia, cante tari pocuaji quiquiaari jiya coteyaquishacarijiaacuajani. Mashiquioriniaa, janiya niaara naajiyajaniuhua cua timishacari nia shocotanuucua Sesaaca.

Janiyari niaara naajiocanuni quiquihuanaa, nia niishiniuucua pa Que Pueyaso, Neyanu Jesucristoocua nia tiuushacari. <sup>14</sup> Janiyari niaara naajiocanujuhua queyanaa, nia tiuuniucua tariucua pocuaji Quijiaacua, nio jiya coteyaquishacarijia. Janiyari niaara naajiocanujuhuj mashiquioriniaa, seetanujuanaa maninia nia tojiniucua Pueyaso rupaa, njaa jaara na masequiaari nioojiajinia, Sesaaca nia shocotanuucuaajuhuj.

<sup>15</sup> Majaari mijiria sesa miiniuucua nia jiaatianu, mijiria casamiicuanio. Cante mijiria casaacua jiaatijani, cunoori maja pa Que Pueyaso panijia. <sup>16</sup> Mijiria niishijia coretanijosano tama nojori niishishanojinijiaajani, puetunu cunojuanaari maja pa Que Pueyaso niishitishano. Cunoori sacuaraatia tama mijiria pueya niishishanojuaaja. Naacuajitij, pueyano pa quishacari, paari sesa pa jiaatianuta pueyaracaanu casaa paniquiaani tama pa cuaqueya pa shuquiritiniuriaaja. Paari pa niquishano pa maniniucuasano casaa paniquiaa pueyaracaanuni. Naajuhuj, paari pueyaracaanu timiquiaani tamasa timitiasacari pajaniya. Puetunu naa sacuaraatia pa niishishanojuanaani, cunoori mijiria niishishano. Majaari Pueyaso niishitiojonu naa pajaniyatej. <sup>17</sup> Nio jiyari tari tariucuashiyaree. Socua



shaajasaanutaniya puetunujuanaari. Puetunu sesa pa jiaatianujuanaari co-jiritiasaanutaniya shaajanu puetunu nio jiyatajanaa. Cante Pueyaso panishano miiquiaa saniniunijia, nojuaja cutaraari pueyaracaanu rishiniutianiya Pueyasota.

### *Jesucristo paraa*

<sup>18</sup> Quiquihuanaa, quiarijiaari quera jiya puequesacari tari. Niaacuajaari tari pahuatasaquiaari Cristo Paracaari niniutianiya. Quiarijiani, queraatia na paraari tari supueree. Naacuajitij, paari niishiyani nio pa quishacariiri jiya puequesacari quera. <sup>19</sup> Cuno Cristo paraani, nojoriiri pajaniyajini-jinio pueya quiquianucuaja. Pocuaji rupertetucanuuri maja seetanujuanaa Pueyaso muerasu nojori quishacari. Jaara seetanujuanaa Pueyaso muerasu quiquianu, mariqui pata quiyacuaateni. Naa nojori miiniuucuatej, paari niishiyani majaari puetunu pata rerejonaajanaa seetanujuanaa parta Pueyaso muerasu.

<sup>20</sup> Saniniuujia niajaniya Pueyaso muerasunaa, Jesucristoori nia niquitioquiaari na Sohuanu. Naaratej puetunu niajanijajanaari Pueyaso niishitijaraca. <sup>21</sup> Majaari niaacuara cua naajionuni nia niishiyaquishacari Pueyaso rupaa. Niaacuajaari na niishiya cutara. Niaari niishiyajuhuaaj, sapojoja sequesanoori maja Pueyasojiniji.

<sup>22</sup> Pueyano jaara sequere: “Jesuuri maja Pueyaso Jiyarosano”, cunoori sapojoja. Cante sequejani: “Pueyasoori maja Jesu Que”, cunocuajaari Cristo paraca. Jaara sequerejuhuaj: “Jesuuri maja Pueyaso Niyanu”, cunoori Cristo paracajuhuaaj. <sup>23</sup> Cante Pueyaso Niyanu Cristo tamacajani, majaari Pueyaso na jitianu na Querajuhuaaj. Cante Pueyaso Niyanu Cristo jitiaa cutarani, pa Que Pueyaso jitiaa na Querajaariuhuaaj.

<sup>24</sup> Naaratej, Pueyaso rupaa nia racatare nia numaama taa nia tojiquiaari tariucuacaanucuajani jaara shushajanaa pahuatasaquiaari nia niquiara. Naa jaara naa racatariquia na rupaa nioojiajiniate, seetanujuanaa nocua nia tiuushacari, niaari jatiqui quiya pa Que Pueyasota, Neyanu Jesucristotanio. <sup>25</sup> Jesucristocuajaari na Sohuanu niquitioquiaari pajaniya, pueyaracaanu pa rishiniuria. Nojuajanaari naa pa sequequiaari.

<sup>26</sup> Nio naajioree niaaranijia cua niishitiniuria niajaniya, nia niishiniuria taa Jesu paraa niishitiojonuuquiaa sesa najuhuaana na cuaracashiniuunutiiani. <sup>27</sup> ¿Casaara nojori nia tojiquiaani? Niaacuajaruhua tari Pueyaso Sohuanu jitiaa, Jesucristo niquitiosano niajanijani. Naacuajitij, majaari tari panishaanu tamasaca niishitiojonura socua niajaniya. Pueyaso Sohuanucuajaari nia niishitiojoquiaa puetunu casaajanaa. Puetunu na niishitiojosanojuanaari seetanujuanaa cutara, maja sapojonu. Naaratej, pueyaracaanu jatiqui nia quiriquia Jesucristota, taa Pueyaso Sohuanu niishitiojoquiaa nia quiniuriacuajani.

<sup>28</sup> Quiarijiani quiquihuaniyojuanaa, jatiqui nia quiri Cristota, seetanujuanaa juhuajaniya nia quiniuria pa Jiyaniijia jaara tiuquiriohua pocua. Naa nia quiriritij maja nia caririquiniuria nojuaja jaara pa jitiiasuhua. Na rupaa tojiyashijiacaari caririquiniutianiya cutara. <sup>29</sup> Niaacuajaari seetanujuanaa niishiya, Jesucristoori tojetaarucuajanaa sesa miyashijia cutara. Naa cumaati niishiyajuhuaaj, puetunu maninia miijiacajanaari Pueyaso muerasu.

## 3

### *Pueyaso muerasu*

<sup>1</sup> Pueyanaa, pa Que Pueyasoori jiyanohua pa panijia. Pa sequeyari, “cua niquihua”. Seetanujuanaa, paari necohuani. Naaratej, majaari

mijiria quiniaa pueya niishiniu pajaniya. Pa niishitiuyaquiari nojori niishiyaquiniuucua pa Que Pueyaso. <sup>2</sup> Cua panishano Pueyaso muerasunaa, paari tari Pueyaso muerasucujani. Maja cutaraari pa niishiniu taamuecaquitijia pa quiniutianiya na nuhuajitijaj. Paari saaja niishiya cutarani, Jesucristo jaara nimiohua, paari juhua nojuaja quiniutianiyani. Na tiuquishacariuhua, paari na niquiniutianiyani taa na quiyacuajani. <sup>3</sup> Puetunu na sashijiacajanaari tama na cuaqueyajaaja jeequequiaa sesa nojori miishanojiniji saaja maninia nojori quiniuria, taa Jesucristocuaani sesa miyashijia tojetaarucujanaa.

<sup>4</sup> Cante sesa miijiani, cunoori Pueyaso rootasano na rupaajinia tojiyaquijia. Puetunu sesa miiniujianaari Pueyaso rootasano tojiyaquiniu. <sup>5</sup> Niaari niishiyajuhuaaj, Jesuuri mijiria pocua niquiaari poojia seque na jataniniuria. Nojuajaari tojetaarucujanaa sesa miyashijia cutara. <sup>6</sup> Naacuajitij, cante jatiqúi quiya pa Jiyaniijiatani, nojuajaari maja sesa na miiniu quiquiaa cutara. Cante saniniuujia sesa miijiani, majaari na niishiniu Jesu. Majaari nojuaja na niquiniu quiquiaarijuhuaj. <sup>7</sup> Quiquiohuaniyojuanaa, tama nia cuaqueyajaaja nia cojuare niaa mariqui sapojosaareeri. Cante maninia miijiani, nojuajaari maninia pueyano cutara, taa pa Jiyaniijia Jesucuaani, pueyaracaanu maninia quijia cutara. <sup>8</sup> Saniniuujia, cante sesa miijiani, nojuajaari Sesaaca pueyano. Shusha jiya coteenujiniji, Sesaacacujajaari tari sesa miijia quiquiaari. Pueyaso Niyanuuri cunora niquiaari puetunu sesa na miijosanojuanaa na shaajanura.

<sup>9</sup> Puetunu Pueyaso pueyajanaari maja sesa miiniuucua na shiiniuquiniu, quiarinio pueyara Pueyaso rootesano nojori quiniuucua. Nojoriiri quiarinio pueyara jatanishano quiya Pueyaso Sohuanu nojori jiitiasacari. Naacuajitij, seetanujuanaa Pueyaso muerasu nojori quishacari, majaari na naata sesa miijiaca nojori quiniu pueyaracaanu. <sup>10</sup> Naacuajitij, maatia niishishanocujajaari cante Pueyaso muerasuni. Saniniuujia, cante maninia miyashijiani, nojuajaari maja Pueyaso pueyano. Naajuhuaaj, cante narta pueya paniyaquijiani, nojoriiri Sesaaca pueya. Naa niishishanoori cante Pueyaso muerasuni, cante Sesaaca muerasujaniuhuaaj.

### *Panitiojuaca pa quirij*

<sup>11</sup> Pueyanaa, shushajanaa Pueyaso rupaa nia tojishacari, niaacuajaari naa niishitiojosaaquiaaritij: “Panitiojuaca nia quiri”. <sup>12</sup> ¡Maja cutaraari pa quiniu juhua Caín! Nojuajaari tama tarajanujuaaja moquiaari, Sesaaca tojijia na quiniuucua. Nia niishiritio casaara Caín moquiaari tarajanuni. Nojuajaari tama tarajanujuaaja tacartaquiaari monu, tarajanu miishano quiniuucua maninia. Saniniuujia, tama na miishanojuaarjia sesa quiquiaari. Cunora tarajanu moquiaariiri.

<sup>13</sup> Cuarta Pueyaso muerasunaa, majaari nia jiyajenenu Pueyaso ruuretajaca jaara niquiniu paniyaquiriquia nijaniya. <sup>14</sup> Paacuajaari juhua macu samiitianijosaaquiaariuhuaani, seetanujuanaa saminiucua pa quiniuria. Paari seetanujuanaa na niishiyani panitiojuaca pa quishacari parta Pueyaso pueyata. Cante tapueyocuaca paniyaquijiani, nojuajaari juhua macu quiyajaa. <sup>15</sup> Naajuhuaaj, narta pueyano niquiniu paniyashijiacani, nojuajaari juhua pueya mojua Pueyasora. Niaacuajaari niishiya, pueyano mojuaari Pueyaso samiitianiyaquishoojua pueyaracaanu na rishiniuria. <sup>16</sup> Paacuajaari niishiyani, Cristoori jyanohua pa panijia na cusonuucua pocuara. Naacuajiti paari niishiyani taamuecate seetanujuanaa paniniuni. Paa cuara naa panijia quiirijuhuaaj, tama pa cuaqueyajaaja pa

tarinitianura parta Pueyaso pueyacuara, jiyano hua pa paniniutia nojori. <sup>17</sup> Niaa jaara nareja niquiya niarta Pueyaso pueya casamiijuniucua, puetunu nia panishanojuanaa nia jiiitasacaricuaa, niaari najuhuana sequeya: “Pueyaso panijianijia”. ¿Pueyaso panijia pueyanoteeri jiyano pueyano, narta Pueyaso muerasu niquitioyaquijia na jiiitasanojiniji? ¡Maja! <sup>18</sup> Quiquiohuaniyojuanaa, majaari najuhuana pa sequenu: “Cuarta Pueyaso pueya panijianijia”. Paa jaara seetanujuanaa nojori panirini, nojoriicua pa taraajere, taraatia nojori miishacari. Pueyaracaanu maninia pa miiri, seetanujuanaa pa paniniutia pueya. Majaari najuhuana pa sequenu: “Nojori panianijia”.

*Pueyaso tojjiaari juhuajaniya quijia Pueyaso niquiara*

<sup>19</sup> Naacuajitij, paa jaara pueya panijia quirini, paari niishiyani paa seetanujuanaa Pueyaso tojjiani. Paari niishiyani paa pueyaracaanu rishiriquiano Pueyasotani. Majaari pa shaajenu quiniutianiya. <sup>20</sup> Pueyaso muerasu pa quishacari, poojia jaara pa taacanuutere saaja nocuaji, naajaa, Pueyaso cutaraari jiyano hua maninia niishijia socua poojia niishishanojiniji. Nojuacuajaari pa niishiya cutara. <sup>21</sup> Cua panishano Pueyaso muerasunaa, poojia jaara pa macuhuaajaquiri, paari shuquiriaatia quiya Pueyaso niquiarani. <sup>22</sup> Nojuajaari puetunu pa masesano niqutionutaniya pajaniya, na rupaa pa tojjishacari, puetunu na panishanojuanaa pa miishacarijihuaj. <sup>23</sup> Pueyaso sequesano pueraari nio: Neyanu Jesucristoocua pa tiuuniuria, pa panitioonurajuhuaj taa na sequequiaaricujani. <sup>24</sup> Canapuate Pueyaso rootasano tojjiacani, nojoriiri Pueyasota rupuetootesano quijia. Naajuhuaj, Pueyasoori nojorijinia quiyacujua. Nojuacuajaari na Sohuanu niqutioquiaari pajaniya. Naa na Sohuanu pa jiiitasacaritij, paari maatia niishiyani Pueyasoori poojiajinia quiya.

## 4

*Pueyaso Sohuanujiniji pohuatasano, Cristo Paraca sohuanujinijinio*

<sup>1</sup> Cuarta Pueyaso pueyanaa, quiarijiani, queraatia Pueyaso sequenu panishano caminiujiuniana pueyari supueya. Majaari ritia nia tiuuniu puetunu nojoriicujanaa. Coteenu nojori nia saniniujiuri, nia niishiniuria nojori caminiujiushanote seetanujuanaa Pueyaso Sohuanujiniji, tamonujiniji soj. Mijiria, queraatia sapojonuujuaari caneya. Nojoriiri najuhuana cuaracashiniuya na sequesacari: “Janiyacujaari Pueyaso sequenu panishano caminiujiuniani: Pueyaso Sohuanu niishitishano janiya”. <sup>2</sup> Niaari naa niishiniutianiya cante seetanujuanaa Pueyaso Sohuanu niishitishano caminiujiuniani: Pueyaso Sohuanu jiiitajaari naa sequeja: “Pueyaso jiyarosano Jesucristoori pueyanora quiquiaari, mijiria pocuara cusoriquiano”. <sup>3</sup> Cante saniniuuja jiyaniyani Jesu maja pueyanora na quiniu quiquiaari, cunoori maja Pueyaso Sohuanu na jiiitanu. Saaja Sesaaca sohuanu jiiitaa noojiajinia cutaraari. Nojuacuajaari Jesucristo Paraca. Niaacuajaari tari pohuatasaaquiaari, Cristo Paraca sohuanuuri niniutianiya. Nojuacuajaari tari mijiria quiya.

<sup>4</sup> Quiquiohuaniyojuanaa, niaacuajaari Pueyaso muerasu. Naacuajitij, niaari cuno sapojonuujuaa shocotacanu Pueyaso cumaacata. Nioojiajinia Quijiaari socua cumaacaraca nojori jiiitasano Sesaaca cumaacajiniji. <sup>5</sup> Cuno sapojonuujuaari saaja Pueyaso niishiyashijiaca, maja Pueyaso muerasu. Naacuajitij, nojoriiri saaja mijiria casaajiniji pohuatanuuquiaa. Naarate narta Pueyaso ruuretajacaari nojori tojjitiaquiaa. <sup>6</sup> Paa cutaraari Pueyaso pueyani. Naacuajitij, cante Pueyaso tojjitajacani, nojoriiri pa tojjitiaquiaa.

Canapuate saniniuujia maja Pueyaso pueyani, nojoriiri maja na tojitianu quiquiaa pajaniya. Naacuajitij, pa naata niishiniu cante seetanujuanaa Pueyaso Sohuanu jiiitaa cutarani, cante saniniuujia sapojoua sohuanu jiiitaaanijia.

### *Pueyaso pa panijia cutara*

<sup>7</sup> Cua panishano Pueyaso pueyanaa, jiyanoehua panitioojuaca pa quirij. Pueyasocuaajaari pa panijia. Nojuajaari pa panitijia na Sohuanuta, jiyanoehua panijia pa quiniuriajuhuj. Canapuate puetunu pueya panijiacajanaani, nojoriiri Pueyaso muerasu cutara, seetanujuanaa Pueyaso niishijiacajaariuhuj. <sup>8</sup> Canapuate pueya paniyashijiacani, nojoriiri maja na niishiniu Pueyaso. Pueyasocuaajaari panijia cutara. <sup>9</sup> Nojuajaari pa niishitiquiaari taa na paniquiaa jiyanoehua pajaniyani, Neyanuniyoyua na jiyarosacari mijiria pa samiitianijioriquiano, pocuara na cusosacari. <sup>10</sup> Naa cutarate seetanujuanaa paniniu sequesano: Pueyasoori pa panijia. Paari maja pa coteetanu quiquiaari Pueyaso paniniuni. Nojuajaari saniya coteetaquiaari na paniniuria pajaniya. Neyanu jiyaroquiaariiri pocuara mosocoriquiano, sesa pa miishano jiyanooshaanura. Naa cutarate seetanujuanaa paniniu.

<sup>11</sup> Cua panishano Pueyaso muerasunaa, Pueyaso jaara naa pa paniquiaaricuaa, ¿casaara pa panitioyaquiyarinijia? Naa panitioojuacara pa quirijihuj. <sup>12</sup> Majaari quenaaja pa niquiniu quiquiaari Pueyaso, taamuecatejanojoni. Naajaa, paa jaara tamacata panitioojuaca quirini, Pueyasoori poojiajinia quiyacuaja. Naacuajitij, paari tojetaarucujanaa panijiacara quiniutianiyani, na paniniu quishacari poojiajinia. <sup>13</sup> Nojuajaari na Sohuanu pa niquitioquiaari poojiajinia na quiniuria. Naacuajitij, paari niishiyani paacuajaari nata rupuetoojuua quiyani. <sup>14</sup> Canaajanaari seetanujuanaa canaa niquishano pohuataani: Pueyasoori Neyanu jiyaroquiaari mijiria, mijiria quiniaa niti mosocoriquiano, nocua tiuujica jiyatesaanura Pueyaso pueyara. <sup>15</sup> Cante pueya niquiara sequejani: “Jesuuri seetanujuanaa Pueyaso Niyanu”, Pueyasoori noojiajinia quiya. Nojuajaari Pueyasota rupuetoojuua quiyajuhuj.

<sup>16</sup> Naacuajitij, paari niishiyani Pueyasoori jiyanoehua pa panijia. Paari na niishiyajaaniuhua na rupaacua pa tiuushacari. Pueyaso cutaraari panijia. Paa jaara pueyaracaanu panijia quirini, paari seetanujuanaa Pueyaso rupuejani. Naajuhuj, Pueyasoori poojiajinia quiya. <sup>17</sup> Naa Pueyaso quishacari poojiajinatej, paari pueya panijia jiyacatequiaa socuani. Naa seetanujuanaa panijia pa quishacaritij, paari juhuajaniya quiniutianiya Pueyaso nequesoreesacari puetunu pueyapuejanaani. Majaari pa puerenu quiniutianiya panijia pa quishacari taa panijia nojuaja quiyacuani. <sup>18</sup> Cante seetanujuanaa Pueyaso panijiani, majaari na niishiniu puerenu. Naa pa paniniuuri puetunu pa puerenu jataajanaa. Cante puereja quiya saniniunijia, majaari juhuanouja na paniniu Pueyaso puetunu noojiatajanaa. Puerejaari niishirojiya: “Saniitiosaanutaniyanijia”.

<sup>19</sup> Niaacuajaari niishiya, Pueyasoori coteenujuanaa pa paniquiaari, naarate paari saniniuujia na paniyani. <sup>20</sup> Saniniuujia, cante sequejani: “Janiyari Pueyaso panijiani”, narta pueya niquiniu paniyaquiya saajaaraariuhuj, jiyano pueyanoori sapojoua. Naa na paniyaquishacari tarajanu na niquishano na namijiata cutaratej, ¿maatucua taa Pueyaso panirini, na niquishoo socuani? <sup>21</sup> Pueyasocuaajaari naa pa rootaquiaari: “Cante cua panijiani, cuara paniiria narta pueyajuhuj”.

## 5

*Taa pa shocotanutaniya mijiria niishishanoni*

<sup>1</sup> Niaa jaara Jesuucua tiuuri nojuaja seetanujuanaa Pueyaso Jiyarosano quiquiaari, niaari Pueyaso muerasu. Mijiria, cante muerasu que panijiani, necohua panijajaariuhuj. <sup>2</sup> Naacujitij, pa panishacari Pueyaso, pa tojishacari na rootasanojuhuaj, jiyacariti paari niishiyani paari parta Pueyaso muerasu panijajaacuhuj. <sup>3</sup> Paa jaara Pueyaso panijia quiri seetanujuanaani, paari na sequesano tojijiaca quiyajaaniuhuj. Na rootasano pajaniyani, majaari jiyajeneta na quiniu pajaniyara. <sup>4</sup> Cante seetanujuanaa Pueyaso muerasuni, nojuajaari mijiria sesa niishishano shocotaa. Paari na shocotajani Pueyasoocua pa tiushacari. <sup>5</sup> Cante Jesu jiyateya seetanujuanaa Pueyaso Niyanurani, saaja jiyano pueyano na naata mijiria niishishano shocotanu cutara.

*Pueyaso Niyanujiniji pohuatasano*

<sup>6</sup> Pueyasoori canaa niishitiquiaari Jesuuri seetanujuanaa Neyanujuhuanajaj, Jesu jaara moojinia tiuquinishaquiaari. Canaa niishitiquiaariijaariuhuj Neyanu jaara niyacutesanojinia naatequiaari. Jesuuri maja saaja moojinia na tiuquinishaanu quiquiaari canaa niishiniuria nojuaja. Maja. Naajuhuj, janiyajanaari na niquiquiaari na nanaca shooteyano na shuucujini. Naajuhuj, poojiajinia quijia Pueyaso Sohuanuuri pa niishitiquiaa cunoori seetanujuanaa Pueyaso Niyanu quijiajuhanajaj. Pueyaso Sohuanu cutaraari maja na niishiniu sapojonu. <sup>7</sup> Jiuujianaraca jiyocuaaanu quijiaacari pa niishitiya Jesucristoori mijiria niquiaari pueyano na quiniuria seetanujuanaa. Cuno pojoriiri nio: Pueyasojuanaa, na Rupaa, na Sohuanunio. Nio jiuujianaraca quijiacani, nojoriiri Pueyasojuhanajaj. <sup>8</sup> Paari mijiria jiiitaa Jesujiniji pa niishitijiacajuhuj. Cunoori jiuujianaraca quiyajuhuj. Cuno pojoriiri nio: poojiajinia quijia Pueyaso Sohuanu, jiyocuaaanuji tojishano rupaa Jesu tiuquinishacari moojinia, naajuhuj, na nanaca, pueya niquishano na shuucujaji shoyano. Puetunu cunujuanaari mariyata pa niishitiya Jesuuri seetanujuanaa Pueyaso Niyanu. <sup>9</sup> Paa jaara tojiriquia pueya pohuatanuusanoni, ¿casaara saniya Pueyaso sequesano pa tojiyaquiyarini? Pueyaso sequesano Neyanujinijiiri socua seetanu rupaajanaa cutara pueya pohuatanuusanoiniji. <sup>10</sup> Cante Pueyaso Niyanuucua tiuujiani, Pueyaso Sohuanuuri noojiajinia na niishitiya Jesuuri seetanujuanaa Pueyaso Niyanu. Saniniuujia, cante Pueyaso sequesano Neyanujiniji ruuretaja saniniunijia, nojuajaari Pueyaso jiyateya sapojuara, na tiuyaquishacari tama Pueyaso sequesanoocuaaja Neyanujiniji. <sup>11</sup> Pueyasocuaajaari sequequiaari, Neyanuucua tiuujiaacari pueyaracaanu rishijiaca quiniutianiya. <sup>12</sup> Cante Pueyaso Niyanu jiiitaa noojiajiniani, nojuajaari tari samiitianishaarohua pueyaracaanu rishijia na quiniuria. Pueyaso Niyanu jiiitaaashijiaari saniniuujia maja na rishiniu quiniutianiya.

*Nio naajio puequenu panishacari rootasano*

<sup>13</sup> Nio naajiya niaaranijia nia niishiniuria, Pueyaso Niyanuucua nia tiushacari niaari tari samiitianijiosaarohua pueyaracaanu nia rishiniuria.

<sup>14</sup> Paari Pueyasoocua tiuquuaani, pa niishishacari nojuajaari pa tojiquiaa pa secojosacari nojuaja, pa masesano jaara quiri taa na panijacuajani.

<sup>15</sup> Naatej, taa pa niishiyacuaani Pueyasoori pa secojosano tojiquiaa, paari naa niishiyajuhuj paari nojuaja pa masesano maseree tarini.



<sup>16</sup> Cante narta Pueyaso pueyano niquiya sesa miyanoni, cuaara Pueyaso secojora nocuara, sesa na miishano jaara na cusojuashijia quiri. Naacua-jitij, Pueyasoori cuno sesa miiija naataniniutianihua, sesa na miishano jaara cusojuashijia quiri. Quiyajaariuhua tamonu sesa casaa miiniu. Paa jaara cuno sesa casaa miirini, paari cusoqueeni. Naa cua seque-sacari nijaniyatej, majaari cua sequenu nijaniya nia secojonura jiyano sesa miishanoocuaratej. <sup>17</sup> Seetanujuanaa, puetunu sesa miishanojuanaari sesa Pueyasora. Naajaa, majaari puetunu sesa miishanojuanaa cusojuanu quiniutianiya pajaniya.

<sup>18</sup> Paacuaajaari niishiyani pueyanaa, cante Pueyaso jiitiaa juhua na Que cutarani, nojuajaari sesa miyaquiquiaa, Pueyaso Niyanu cojuasacari nojuaja. Naacuaajitij, Sesaacaari maja na naata sesa na miitiniu. Majaari na naata sesa na miiniujiuhuj.

<sup>19</sup> Paari niishiyani paa cutaraari Pueyaso muerasuni. Sesaacaari sanini-uujia puetunu mijiria quiniaa Pueyaso niishiyashijiacajanaa jiitiaacujua. Nojuajaari nio jiya camarnu.

<sup>20</sup> Paari niishiyajuhuj Pueyaso Niyanuuri mijiria pocua niquiaari. Nojuajaari na niishitija niquitioquiaari pajaniya, maninia pa niishiniuria na Que, na Que quiniuria pa Quejuhuaj. Nojuajaari Pueyasojuanaa cutara. Paari nata quiya jatiqini, Neyanu Jesucristota pa rupuetosacari. Nojuajaari Pueyasojuhanajaj, pa Samiitianijajaariuhuj, pueyaracaanu rishijia pa quiniuria. <sup>21</sup> Quiquihuanijoyuanaa, saaja Pueyaso pa paniri. Tama pa cuaqueyajaaja pa cojuare, maja tamonu casaacua pa jiaatianura socua Pueyasojiniji. Paa jaara tamonu casaacua jiaatiareni, paari Pueyaso shocoteya nocuarani. Niojuanaa pueyanaa. Tariucujaja.

## TANEE JUAN NAAJIONEE

### *Pueyaso Rupaa seetanujuanaa panijara pa jiyateja*

<sup>1</sup> ¿Quiaate quiyajaa cua panishano cua rimiaticuanaa? Quiaacuajaari Pueyaso saquiriojosano, neyatu quia quiniuria. Quiocuara naajiyaniija, quia panishano muerasuucuaranio.

Janiyari saaquiano Juanni, Pueyaso muerasu jiihana. Seetanujuanaa nia paniyaniija, taa puetunu Pueyaso rupaa tojiniaa pueya paniya niajaniyacuaani. <sup>2</sup> Pueyasojiniija seetanu rupaaajanaari poojiajinia quiya. Naaratej, canaari nia paniyani. Cuno rupaari poojiajinia quiniutianiya pueyaracaanu. <sup>3</sup> Nia tojishacari seetanu Pueyaso rupaaajanaa, nia panitioosacarijihuaj, naacuajitij, pa Que Pueyasoori Neyanu Jesucristota nia cumaquiniutianiya. Niaacua taraajenutaniyaariuhuaj. Nioojia jiyatenutaniya juhuajaniya quiacarajaariuhuaj.

<sup>4</sup> Noojiaqueya quia niquiohuajiniijinio niquiquianunijia. Nojori timiaticanunijia nojori tojitianuucua maninia seetanu rupaaajanaa, taa pa rootasaaquiaari pa Que Pueyasojiniijicuajani. <sup>5</sup> Quiocuara naajiya quiar-ijianiija cua panishano cua rimiaticuanaa, cua sequenura quiajaniya: “Jiyanohua pa panitioore”. Majaari quiarinio rootasano nio, cua naajiosano quiocuarani. Nio rootasanocuajaari pa jiihtasano pueyaracaanu Jesucristojiniija. <sup>6</sup> ¿Taate pa naata paniniuni? Paari pueya panijaca quiyani Pueyaso rootasano pa tojishacari. Niocuajaari na rootasano: puetunu pa miishanojuanaa cuara quiiria Pueyaso pa paniniutia poojiajinia.

### *Cristo paraari sapojonuujuaca*

<sup>7</sup> Quiarijiani, queraatia sapuenu juhua Pueyaso sequenu panishano caminiujiuniaari mijiria quiya. Nojoriiri pueya niishitiojoquiaa: “Majaari Jesucristo rosenu quiquiaari jiyocuacaanuji, cuaqueyaraca na quiniuria, seetanujuanaa pueyano na quiniuria”. Canapueete naa sequejacani, nojoriiri sapojonuujuaca. Nojoricuajaari Cristo paraa. <sup>8</sup> Tama nia cuaqueyajaaja nia cojuare cuno pueyacuaaji, maja nia tojiniuria nojori, niaa mariqui Pueyaso niqutionu panishano pajaniya maseyaquiriiri, pa Jiyaniijara nia poonijionujiniija na niqutionu panishano. Suraatiaja nia tojiriohuarohua seetanu rupaaajanaa, nia masenura puetunu Pueyaso jiihtasanojuanaa niaara. <sup>9</sup> Cante tama na cuaqueyajaaja jiyateja Pueyaso casaa niishijiara socua Jesucristo jiyaramiquishano pueya niishitiojosanojinijini, cuno shocotajaari Pueyasoojura quiqiii, na shocotanuucua Cristo rupaa. Cante saniniuuja seetanu rupaaajanaa tojitiaquiaa maniniani, taa pa rootasaaquiaari Cristo rupaacuajani, Pueyasocuajaari na Que, Neyanuuri nocuaji Tacunajuhuaj. <sup>10</sup> Seetanu rupaaajanaa jiihtiaashijia jaara niaacua tiuquiniu paniya tamaatia na niishitiojonura niajaniya, majaari niaacua na shanacununoj. Majaari quenaaja na saruhwatanujuhuaj nia cumaquiniuria nojuaja. <sup>11</sup> Cante na sequeyani: “Pueyaso cuara cumaquiiria quiajaniya”, naa sequejaari cuno sapojoua cojiritiasaaree tari sesa na miishanotaja.

<sup>12</sup> Socua queraatia sequenu paniya niajaniyanijia. Naajaa, majaari cua naajionu paniniu. Janiyacuajaari niaacua naquerejiyani, maninia pa pocoojonura, shuquiriaatia pa quiniuria seetanujuanaa. <sup>13</sup> Quia tarajanu niqiohuari cua sequeree nojoriria cua saruhuatanura quiajaniya. Nojuacuajaari Pueyaso saquiriojosano maajjiuhuj. Tariucujaja.

## SOCUA TANEE JUAN NAAJIONEE

### *Juan maninia pohuatasaaquiaari Gayojiniji*

<sup>1</sup> ¿Quiaate quiyajaa cua panishano Gayonaa? Janiyari saaquiano Juanni, Pueyaso muerasu jiiitiana. Seetanujuanaa quia paniyanijia, Pueyaso rupaa quiniuucua coojiajinia. <sup>2</sup> Quiocuara secojoquiaanijia, puetunu quia miishanojuanaa cuaara quiiria maninia. Janiyari quiocuara secojoquiaaaniuhuaaj, maninia quia cuaqueya quiniuria, maja cusosu, taa quiioojia quiya maniniacuaani, Pueyaso tojjijia quia quishacari maninia.

<sup>3</sup> Parta Pueyaso muerasujinijinio pueyari cucua tiuquiquianu quia quijia tiacajiniji. Janiyari jiyanohua shuquiriaatia quiquianuni nojori pohuatasacari quiajanijajiniji. Quiaanaari seetanujuanaa maninia miijia quiquiaa taa pa rootasaaquiaari Jesucristo rupaacuajani. Quiaacuajaari maninia tojjiquiaa seetanu rupaaajanaa, sanajanaa. <sup>4</sup> Jiyanohua timiquiaanijia cua tojjishacari cua muerasuuri maninia miya, taa cua rootaquiaari Jesucristo rupaa nojoricuajani. Naa cua tojjishacaritij, cunoori jiyanohua cua timitiquiaa socua tamonu casaajiniji.

<sup>5</sup> Sanajanaa, quiaacuajaari maninia miijia, maninia quia miishacari parta Pueyaso muerasu. Quiaa cutaraari maninia miiquiaa, quia tiuquitishacari quia tiajinia quia niishishoo tamaquicuajinio Pueyaso muerasu. <sup>6</sup> Pueyaso muerasu rerejosacari niya, Pueyaso rupaa pohuatanura rucoojuacaari canaa niquiara pohuatacanu maninia quia miishanojiniji nojoriria, quia paniniutia nojori. Quiarijiani, nojori quia niquitiore nareja nojori panishano na jiyatajara, socua nojori quianu panishacari cuniquiji. Naa quia miiri quenaaja, Pueyaso quia shuqiritiniuria. <sup>7</sup> Nojoriiri Jesucristojiniji pohuatanura rucoojia. Majaari nojori panishano na masetunu paniniu quiquianu Pueyaso niishiyashijiacajiniji. <sup>8</sup> Naaratej, pajaniya cuaara naacuura jiyano pueya, noo pojori canapuete pa Jiyaniijia rupaa pohuatanura rucoojiyacuajani. Naa pa miiriti Pueyaso rupaa pohuatanu naacunaa pa quiniuriajuhuaj.

### *Sesa Diótfes miishanojiniji pohuatasano*

<sup>9</sup> Janiyari quia quijia tiacajinia Pueyaso pueya maanuucuaara naa naajioquiaarijuhuaj. Janiyari nojori sequequiaarini nojori cuaara Pueyaso Rupaa pohuatanura rucoojuaca naacuura, cuno pojori jiiitanura na panishano. Diótfesri saaja tama na cuaqueyajaaja shuqiritiaaja, Pueyaso pueya maanu jiiitiana na quishacari. Nocuaji cua sequesano ruuretacanuuri. Cua rerequetequiaaarijuhuaj. <sup>10</sup> Naajaa, janiya jaara niaacua quiaareni, janiyari naa sacuaraatia na miiniuucua na nacasunutaniyani. Nojuajaari tamasa niquiara canaa sesacaquiaa na sapojonuta. Naa socua sesa miiquiaaarijuhuaj: majaari na tiuquinitianu quiquiaa Pueyaso Rupaa pohuatanana na tiajinia. Canapuete saniniuujia nojori tiuquitiniu paniquiaa nojori tiajiniani, Diótfesri nojori tenujuquiaa saaja. Canapuete Pueyaso rupaa pohuatanura rucoojuaca tiuquinitianu paniquiaajaa na tiajiniani, Diótfesri puetunu nojori tenujuquiaajanaa, maja socua nojori rerejonura narta Pueyaso muerasuta.

<sup>11</sup> Sanajanaa, majaari quia jiaatianu cuno sesa miiijaacua, quiaa mariqui juhua nojuaja quirijiaariuhuj. Saaja quia jiaatiare cutara maninia miiijaacua, juhua nojuaja quia quiniuria. Cante maninia miiquiaani, cunocua-jaari Pueyaso pueyano. Sesa miiija saniniuujia, nojuajaari Pueyaso ni-ishiyashijia.

*Maninia Demetrio miishanojiniji pohuatasano*

<sup>12</sup> Puetunu pueyajanaari saniniuujia maninia pohuatanuuquiaa Demetriojiniji. Tama Demetrio miiijosanojinijijiaaja, pueyari niishiya Demetrio-oori maninia pueyano. Seetanujuanaa, nojuajaari maninia pueyano, taa tamasaca sequequiaacuajani. Niaacuajaari niishiya canaari seetanujuanaa sequequiaani, naa cana sequesacari Demetriojiniji.

*Naajio puequesacari*

<sup>13</sup> Janiyari queraatia sequenu paniyajaa quiajaniyani. Naajaa, majaari cua sequenu paniniu saaja cua naajiojinia. <sup>14</sup> Janiyacuaja quiocua naque-rejiyani. Jiyacaritij, pocua maninia pocoojore cutarani.

<sup>15</sup> Pueyaso cuara quioojia jiiitaara maninia, juhuajaniya quia quiniuria. Niya pa rupuenaari cua sequeturee cua saruhuatanura quiajaniya. Puetunu cuniqui pa rupuenaajanaa quia saruhuatate canaarajuhuj. Tariucujaja.



## JUDAS NAAJIONEE

### *Judas naajiosano Pueyaso saquiriojosano pueyacuara*

<sup>1</sup> Janiyari Judasni, Jesucristo seru, Jacobo tarajanu. Niaacuara naajiyani-  
jia canapuate pa Que Pueyaso panishano muerasucujani. Nojuajanaari  
nia saquiriojoquiaari nera nia quiniuria. Niajaniyari Neyanu Jesucristo  
cojuasano, nia rupesacari nojuaja. <sup>2</sup> Pueyaso cuaara nia jiuujiaaria. Cuaara  
nioojia cajitiiriajuhuaj. Cuaara paniiria niajanijahuaj. Pueyaso cuaara  
naa miiria jiyanojua niajanijatej.

### *Sapojonuujucajiniji pohuatasano*

<sup>3</sup> Cua panishano pueyanaa, janiyari niaacuara naajionu paniriquiaa  
jiyanohuani, cua pohuatanura niajaniya taa maninia pa miishaanutaniyani,  
Pueyaso saquiriojosano pueya pa quiniucua: niajaniya, canaajuhua.  
Saniniuujia, quiarijiani, socua maninia cutaraari cua naajionura niaacuara,  
cua nacasunura niajaniya seetanujanaa Pueyaso tojijia nia quiniuria.  
Jiyanojua nia tiuuri pueyaracaanu Pueyaso rupaacua, cumueeca Pueyaso  
pueya nia quiniuria. Pueyasocujaaari na rupaa pohuataniquiaari maninia  
pa niquiara. Maja cumaati na jatanishaanu. Cuaara pueyaracaanu  
maninia pohuatasaaaria, taa pa pohuatasaaquiaaricuaani. <sup>4</sup> Naa nia se-  
queyanijia Pueyaso rerequetejaca supuesacari jiyasohua nia tajinia. Tar-  
iucuaaanu Pueyaso Rupaajiniacujaaari cuno sesoriquia pueyajiniji naa-  
jiotasaaquiaaricuaaja. Nojoriniaari quejoosaanutaniya pueyaracaanu sani-  
itiosocoriquiano. Nojoriiri sequequiaa: “Shuquiriaatia juhuajaniya pa  
miiri tama pa cuaqueya miiniu panishanojuaaja, pa jiyanoojia Pueyaso  
quishacari. Paa jaara sesa miirini, naajaa, majaari Pueyaso saniitonu  
quiniutianiya pajaniya”. Nojoriiri naa sequetuquiaa sesatej. Nojoriiri  
pa Jiitianajanaa jiyatequiaa juhua saniitioyashijia, pa Jiyaniijajanaa Jesu-  
cristoni.

<sup>5</sup> Niaari niishiyacuaja, Pueyasoori Israel pueya supuetanaa  
mashiquiquiaari Egipto jiyajiniji, Egipto pueya seya nojori quishacari.  
Socua nia niishitorohuaraj. Na nuhuaji, Pueyasoori na pueyajinijinio  
nocua tiuyashijia puecoquiaari. <sup>6</sup> Naajuhua, Pueyasoori tama na  
seyajaaja nujuatejoquiaari na nujuatejojuajinia, noo pojori canapuate na  
shuriucua quijia quiquiaari jiyocuaaanucujani. Nojoriiri Pueyasora na  
poonijiosano tiujiaquiaari. Nojori poonijiosaqui tiujiatuquiaarijiaarihuaj.  
Cunora, cumayocuata morojosaaquiaariiri, pueyaracaanu ninishiqui nojori  
quiniuria, cuaara quirijiaatijia Pueyaso saniitiojonu juuca cutara. Cuno  
juuca, Pueyasoori puetunu na tojiyashijiacajanaa saniitiojonutaniya. <sup>7</sup> Nia  
niishirijihua Sodoma tiacajinia quijia pueya, Gomorra tiacajinia quijia  
pueyano, nojori tiaca shocua quiniaa pueyajuhua. Puetunu nojorijianaari  
maninia miiniu ruuretaquiaari tama nojori cuaqueya panishanojuaaja  
nojori miiniuria, jiyanojua sacuaraatia. Nojoriiri maajishuriu  
numuetucujuaca quiquiaari. Cayashuriuuri narta maaji numuetucujuaca  
quiquiaarijuhuaj. Pueyasoori maja na shipininiu quiquiaari naa pueya  
quiniuriatej. Naa Pueyaso tojiyashijia nojori quishacaritij, mariyata taa  
tama Pueyaso seyajaaja na tojiyashijia quiquiaaricuaani, Pueyasoori  
nojori quejoquiaari mani quiquiojinia, tii naquiya nojori miishaanura  
pueyaracaanu. Naa nojori saniitiosaanuucuaatej, cunoori quiquiaari

puetunu pueyajanaa niishiniuria maja Pueyaso tojiyashijiaca pa quiniuria taa nojori quiquiaaricuaani.

<sup>8</sup> Cuno pojori, sacuaraatia niishitiojonaa nia tajinia quiyani, nojoricua-jaari Pueyaso saniitionujiniji niishiya. Naajaa, nojoriiri juhuajaniya mi-iquiaa puetunu sesajanaa taa noojiajinia nojori niishiyacuajani. Nojoriiri tama nojori jiuujiacajaaja curuushojoquiaa nojori miishacari tama nojori niquishanojuaaja na maquenujinia. Pa Jiyaniijia sootiyuyaariuhuj. Nojoriiri jiyanohua cumaacaraca quijiaca sesacaquiaajuhuj, jiyocuacaanu quijiacani. <sup>9</sup> Supuetana Moisés shaajesacari, Pueyasoori na seya jiyani-ijia Miguel jiyaroquiaari Moisés quete na jamonura. Sesaacaari Moisés quete paniquiaari juucua. Nocua Miguelta juayonuutaquiaariiri. Miguel cutaraari seetanujuanaa cumaacaraca quijia. Naajaa, majaari na saari-jionu quiquiaari Sesaaca. Na sequeree saajaari: “Pueyasojuanaa cuaara juaaria cutara quiajaniya”. <sup>10</sup> Saniniuuja cuno sesa niishitiojonaa nia tajinia quiyani, nojoriiri na niishishoo cumaacaraca casaa sesacaquiaa. Naajuhuj, nojoriiri tama nojori cuaqueyajaaja sesoquiaa sesa na miishanota, taa nacujiniaacoji casaa miiquiaa sesa juhuajaniyacuaani, maja na niishiniutia. Naaratej, nojoriiri saniitiosocoriquiano puetunurajanaa.

<sup>11</sup> Nojoriiri jiyanohua cocuaatia miiquioquiaa. Nojoriiri narta pueya niquniu paniyaquiquiaa, taa supuetana Caín niquniu paniyaquiquiaari tarajanucuaani. Nojoriiri sesa pueya timitiquiaa casamiriaca nojori quini-uriajuhuaj, naatej, taa supuetana Balaam miiniu paniquiaari juucuacuaani. Nojoriiri mariyata puetunu quejoosaanutaniyajanaa nojori ruuretanuucua Pueyaso, taa supuetana Coré cusoquiaaricuaani na ruuretasacari Moisés. <sup>12</sup> Nia queranacusacari Pueyaso niqiara nia panitioonuta, cuno sacuaraa- tia niishitiojonuujuacaari jiyanohua cararaatia nojori miaquesacari niaata. Majaari nojori paniniu tamasaca. Nojoriiri saaja tama na cuaqueyajaaja shuquiritiniu niishijiaca. Puera miaquenujuaca nojori quishacari, cunoori cararaatia. Jiyano pueyari maja na cumaquiniu niajaniya. Nojoriiri na-juhuana quijiaca, juhua niqutioocuaari tajimiaquiaa paratu piyarojosacari. Majaari maru niniu. Nojoriiri najuhua quiya, juhua muetuhuo naana. Nojoriiri tariucua macu Pueyasora, naatej taa naana sorenocuaani, juhua puetunu na nujuacatajanaa majaratasano. <sup>13</sup> Nojori nuhuaji, pueyari saaja taraatia quiquiaa, cararaatia nojori miishanojiniji. Sesa nojori miishanoori juhua jiyanohua shoniniacu caminia queyocuasacari cushau, curuutuuca. Nojoriiri shanohua niquishiya rupaquijia, juhua rijia tiyano. Na nuhuaji, nojoriiri ninishiqui quiniutianiya pueyaracaanu Pueyasooju. <sup>14</sup> Pa supuetana Adánri coteenujuanaa shipinishano pueyano quiquiaari mijiria. Enocri séptimo jiyaniijia quiquiaari Adán nuhuaji. Enocri Pueyaso niqutishano nojuaja pohuataquiaari taa nio sesa miijiaca pueya miishaanutaniyani. Nojuajaari naa sequequiaaritia: “Janiyari Jiyaniijia niquirii cunocoji niyano jiyanohua queraatia na pueyatani. <sup>15</sup> Nijioriquiaari sesa miijiaca na sani-itionura. Rerequetejacaacua tiutianutaniya puetunu sesa nojori miis- hanojuanaari. Puetunu na sojeacajanaari saniitiosaanutaniya puetunu nojori sesacanuucujanaa pa Jiyaniijia”. <sup>16</sup> Cuno sesa niishitiojonuujuacaari naa miiquioquiaa nia tajinia. Nojoriiri saa juayonuutaquiaajaa. Majaari shuquiriaatia nojori quiniu quiquiaa na jiitiasanota. Nojoriiri tama na cuaqueya panishanojuaaja miiquiaa. Puera pocuajaca quiyajaariuhuj. Nojoriiri na sapojonuta maniniuhuaqueetaquiaa narta pueya, maninia nojori miishaanura. Majaari naa nia quiniu pueyanaa.

*Pueyaso pueyara rootasano*

<sup>17</sup> Cua panishano pueyanaa, nia niishiriohua pa Jiyaniijia Jesucristo jiyaramiquishano pueya sequesano niajaniya. <sup>18</sup> Nojoricuajaari nia pohu-ataquiaari taate quera jiya puequesacari quiniutianiyani. Nojoriiri naa sequetuquiaaritij: “Quera jiya puequesacari, Pueyaso sesacajaca pueyari Pueyaso casaa soojeaca quiniutianiya, na rupaa soojeacajuhuj. Nojoriiri sesa miiniutianiya tama nojori cuaqueyajaaja nojori shuquiritiniuria”. <sup>19</sup> Naa cuno pueya miiniuucuatej, nojoriiri Pueyaso muerasu jiuujia niaquejotequiaa maja rupuetoosano nojori quiniuria. Nojoriiri saaja tama sesa nojori niishishano miiquiaajaacujua, Pueyaso Sohuanuuju nojori quishacari.

<sup>20</sup> Cua panishano Pueyaso muerasunaa, Jesucristo rupaacua nia tiuuri jiyanoehua socua, seetanujuanaa na pueya nia quiniuria maninia. Pueyaso nia secojore Pueyaso Sohuanu cumaacata. <sup>21</sup> Naacuajitij, niocua Pueyaso panishano pueya quiri pueyaracaanu. Juhujaniya nia sashiri pa Jiyaniijia Jesucristo, nojuaja cuara pueyaracaanu quijiacara pa jiyaterejaatijia, shuquiriaatia pa quiniuria na shuriucua pueyaracaanu. Naa pa miiniutianiyari maninia jiyanoojia na quiniuucua.

<sup>22</sup> Canapuate pa Jiyaniijiaacuaji taacanuyajaani, nojori nia niishitijore jacaria, seetanujuanaa nojori tiuuniuria maninia pa Jiyaniijiaacua. <sup>23</sup> Tamasaca nia piriyojorejuhuj Pueyaso pueya nojori quiniuria, nojori mariqui manijinia puetunu quejoosaarejanaari. Tamasacaari jiyanoehua sesa miijiaca. Naajaa, nojori nia naacure, Jesucristo nojori niishiniurijuhuj. Saniniuujia, tama nia cuaqueyajaaja jiyanoehua nia cojuare niaa mariqui sesa miitishaarejaariuhuj nia cojishacari nojori. Jiyano pueyacua nia taraajere. Saniniuujia, puetunu sesa nojori miishanojuanaa nia soore cutara.

*Naajio puequesacari Pueyaso maniniuhuaqueetasaanu*

<sup>24</sup> Pa Que Pueyasoori pa cojuaquiaa maja pa catenura nocuaji. Nojuacuajaari cumaacaraca na tiuquinitianura pajaniya nocua, puetunu tari maniniushitishanojuanaa pa quishacari, shanohua na cumaaca pa shootianura pueyaracaanu. Pa niquishacari nojuaja, paari jiyanoehua na timitianutaniyani.

<sup>25</sup> ¡Jiyanoehua maniniaari pa Que Pueyaso! Nojuajaari niishijiajanaa. Pa jiyatequiaari na muerasuraari pa Jiyaniijia Jesucristo cusonuucua pocuara. ¡Jiyanoehua shanohua na cumaaca! ¡Nojuajaari Jiyaniijiajanaa! ¡Jiyanoehua maninia pa Jiitiana! ¡Nojuajaari puetunu cumaacaracajanaa cutara! ¡Nojuacuajaari pa Que Pueyaso! Jiya shipinishaacarijiyojua, nojuajaari quiji-juhuanajaj. Naa quiyajaari. Naa quiniutianiya pueyaracaanuuri. Taaquiri-irinij, naacuaaquinatejaj.

## JESUCRISTO NIQUITISHANO JUAN

### *Jesucristo niquitishano pajaniyara*

<sup>1</sup> Janiyari Pueyaso seru Juanni. Niya naajiotaa Pueyaso niquitishano Jesucristonijia, saniniuujia nojuaja niishitiniuria na tojitiajaca, taa quiari naataja Pueyaso miiniutianiya mijiria quijiacani. Jesucristoori jiyocua-caanuji na seru jiyaroquiaari cucua, na niishitiojonura janiya taa mijiria quijiaca miishaanutaniyani. <sup>2</sup> Janiyari puetunu na niquitishanojuanaa camini-ujia niajaniya seetanujuanaani. Niocuaajaari seetanujuanaa Pueyaso rupaa, Jesucristojiniji cua caminiujiushano niaara.

<sup>3</sup> Shuquiriaatia quijiaca cutaraari noo pojori, canapueete nio cua caminiu-jiushano Pueyasojinijini serojonutaniya Pueyaso pueya maapue niquiarani. Na tojitiajacaari shuquiriaatia quijiaca quiniutianiyajuhuaaj, nojori tiuuniu-ucua nio naajiojinia cua pohuatasanoocua. Nio pohuatasano tohuateenu-raari tari catecanoya.

### *Juan naajiosano siete Pueyaso pueya maapueecuara*

<sup>4</sup> Janiyari Juanni. Asia jiyajinia quiniaa siete Pueyaso pueya maapueecuara naajiyaniija. Pueyaso cuara cumaquiiria niajaniya, cuara nioojia cajitiiriajuhuaaj. Pocua niriquiano pa Que Pueyasoori jiyanojia maninia. Nojuajaari pueyaracaanu quijiacuaja. Quiariija quiyajaariuhuaaj. Na Sohuanuuri juhua siete saminio casaa niquishano, puetunu tiqiyocua-janaa quiija na quiniuucua. Nojoriiri Pueyaso cajishaqui tacoji quituiya. <sup>5</sup> Pueyaso Niyanu Jesucristoori seetanujuanaa puera caminiujiunia puetunu na Que Pueyaso Rupajanaa. Nojuajaari quiarinio na cuaqueyata pa coteetaquiaari samiitianuhua macujiniji. Nojuacuajaari puetunu mijiria jiyani-ijianucujanaa Jiyaniija. Nojuacuajaari pa panijia. Tama na nanacajaaja shootequiaariiri sesa pa miiniujiniji na jayonura pajaniya, tojetaarucua-janaa sesa miyashijiacara na jataniniuria pajaniya. <sup>6</sup> Nojuajaari pa jiyate-quiaari jiyaniijianucua pa quiniuria, na Que Pueyaso secojona pa quiniuria pueyacuara, nojuaja pa shuqiritianurajuhuaaj. ¡Pa Jiyaniijaari jiyanojia maninia! ¡Pa Jiyaniija cuara shuqiritiasaaria pueyaracaanu! ¡Nojuacuajaari puetunu cumaacaracajanaa pueyaracaanura! Cuaara naa quiiriatej.

<sup>7</sup> ¡Nia maure! ¡Pa Jiyaniija Cristoori cohujajinia tari cunocojiuhua! Puetunu pueyajanaari na niqiniutianiya, noo pojorijuhuaaj, na mote-naatej. Puetunu mijiria quijiaca pueyapuejanaari nocuaji nujuquenutaniya nojori martenua. Taaquiririnij. Naa quiniutianiyacuaaquiniateja na tiuquishacariuhua.

<sup>8</sup> Pa Jiyaniija Pueyasoori tama nojuajinijiaaja sequeya:

“Janiyacuaajaari puetunu casaajanaa coteetanani, na shaajariquiano-juhuaaj. Puetunu cumaacaracajanaanijia. Janiyacuajaari pueyaracaanu quiijiani. Majaari cua supuenu quiquiaari. Janiyari niaacua tiuquiriquianohuani”.

### *Juan niquishacari Cristo puereeta na shacantuuca cumaacajinia quiyano*

<sup>9</sup> Janiyari niarta Pueyaso pueyano Juanni. Pa Jiyaniija Jesuucua tiuujia cua quiniuucujuhuaaj, janiyari jaarajaaja niaata cojiritiashiya naquiya miiniuni. Naaratej, paari mariyata jiyaniijianucua jiyateso-coriqianoni. Cunora, paari juhujaniya naquiya miiniu rejeretaquiaani Jesucristo cumaquishacari pajaniya. Pueyaso rupaa Jesucristojiniji cua

poojotanuucua, janiyari shoniniacu caminia jiuujiajinia jatasano quiyani jiya tucuaatiajaacua. Nio jiya tucuaatiaja sesaari Patmos. <sup>10</sup> Tamonu juuca, pa Jiyanijia samiitianuhua pa niishiniu juucani, Pueyaso Sohuanuuri cucua niquianu jiyanohua na cumaacata. Janiyari jiyacari rupaa tojirii nacaano cua nijiniarani, juhua trompeta jonenenu. <sup>11</sup> Cua sequeriquiaari:

—Casaa cua niquitiniutianiya quiajaniani, cuno quia naajiotare neque-soreetuneerano. Quiocua na nuhuaji na jiyarore Asia jiyajinia nio siete cua saquiriojosano pueya maapueecua. Nojoriiri Éfeso tiacajinia quiniaa, Esmirna tiacajinia, Pérgamo tiacajinia, Tiyatira tiacajinia, Sardis tiacajinia, Filadelfia tiacajinia, Laodicea tiacajinianio.

<sup>12</sup> Janiyari cua nijiniara tacatequeeni cua niquiniuria cante cucua pocuariquiaani. Cua tacatesacari, janiyari siete samari nujuatacojua niquiriini, orojiniji shipinijosano. <sup>13</sup> Cuno samari nujuatacojua tajiniani, janiyari pueyano niquiriini, juhua Pueyaso Niyanu niquishano. Tucuaque toque cushiriquiaari. Na niohuacaacuma puecariquiaari. Na jiriquia-jinia camarucuteriquiaa orojiniji shipinishano casaari. <sup>14</sup> Pueyaracaanu quijia na quiniuucua, na muezacaari tojetaarucuaajanaa jiyanohua co-huaja quiriquiaa juhua sohuanatuu. Maatia pueya jiuujia niquijia na quiniuucua, na namijiaari juhua mani rimianacuriquiaa. <sup>15</sup> Na niohuacaari nenecuariquiaa juhua jiyanohua naseeca casaajinia mohuaquishano bronze. Naa shacantuuca niquishano quiriquiaari puetunu sesa casaajanaa paracaajia na quiniuucua. Cumaacaraca Jiyanijia na quiniuucua, na pocuasacari, jiyanohua tojishaariquiaari juhua sararajua, jiyocuacaanuji mohuaca tijia. <sup>16</sup> Na miaquetajata siete riya muetujuriquiaari. Naajuhuj, nijiniaquetucuaaja mueruuri na rupaamaji mueranacuriquiaa, na rupaa ru-uretajaca na puecoonura. Na jiquiocoori jiyanohua shacantuuca quiriquiaa juhua jiyanohua pananu jasacari panacari.

<sup>17</sup> Cua niquishacari nojuaja, janiyari cua puerenuta na pajama pojiyaree juhua macuni. Nojuajaari saaja na miaquetaja niaree cucua. Cua sequereeri:

—Maja puerenu. Janiyacuaja Jesuni. Janiyari puetunu casaajanaa co-teetejani, na shaajariquianojuhuaj. <sup>18</sup> Janiyari pueyaracaanu quijiani. Macu quiquiaarinijia. Naajaa, janiyari samiitiaquiaariuhuani pueyaracaanu saminio cua quiniuria. Janiyari macunucua quiquio riatataja camaruni. Naacuajitij, janiyari cumaacaracani cua tojiyashijiaca cua quejoonura macunucua quiquiojinia. <sup>19</sup> Pueya niishishocoriquiano, quia niquishano quia naajiotare Juannaa, taa na quiyacuajani, naajuhuj taa mijiria quijia miishaanutaniya na nuhuajini. <sup>20</sup> Quiarijia quia pohuatareera maatia quia niishiniuria cua niquitishano quiajaniani. Cuno siete riya quia niquishano cua miaquetajata cua muetujusanoni, cunoori siete cua seya. Nojoriiri siete cua saquiriojosano pueya maapue jitianaa. Cuno siete samari nujuatacojua orojiniji shipinijosano quia niquishanojanihuaj, cunoori siete cua saquiriojosano pueya maapue.

## 2

*Éfeso tiacajinia quiniaa Pueyaso pueya maanuucua naajione*

<sup>1</sup> Juhuacatecara naa cua sequereeri:

—Éfeso tiacajinia quijia cua seruucua quia naajiore, Pueyaso pueya maanu jitianani. Naa quia sequere nojuaja: “Nojuaja, cante siete riya cacaa

na miaquetajatacuajani, cante siete samaritiu nujuatacojua tajinia rucuanajojuacuajani, nojuajaari naa quia sequeya: <sup>2</sup> ‘Janiyari puetunu quia miishanojuanaa niishiyani. Quiaari jiyanoehua poonijioquiaa quiria. Naajuhuj, quiaari puetunu casaajanaa rejeretaquiaa juhuajaniya. Janiyari niishiya-juhuj, majaari quia shanacunu quiquiaa sesa miijiaca nia tajinia. Naajuhuj, quiaari cuno sapojonuujua nequesoreecanu, noo pojori canapuede tama sequeriquiaajaajani: “Canaari Jesu jiyaramiquishanoni”. Naa quia nequesoreesacari nojoritij, quiaari niishiquianu nojoriiri sapojonuujua seetanujuanaa. <sup>3</sup> Quiaari puetunujuanaa taraatia quia miiniu rejeretaquiaa, cucua tiuujia quia quiniuucua. Quiaari pueyaracaanu quiria poonijiojua maninia. Quia samareesacari, naajaa, majaari quia tarinitianu quiquiaa. <sup>4</sup> Puetunu naa quia miishanojuanaani, cunoori maninia. Saniniuujia, cua sequesano quia tojiri. Majaari panijia quia quiniu tari, juhua coteenujua. Majaari cuno cua maniniucuanu cutara. <sup>5</sup> Cunora, quia niishiri taa jiyanoehua cua panijia quia quiquiaarini. Quioojia quia tacatorohua cucua, maninia miijia quia quiniuhua, taa quia quiquiaari coteenucuajani. Quiaa jaara quioojia tacatoyaquiri, janiyari quiocua niniutianiyani, Éfeso tiacajiniji cua patanura quia samaritiu nujuataja. <sup>6</sup> Quiaari maniajuhuaj, sacuaratia casaa Nicolás niishitiojosano tojijiaca miishano soojea quia quiniuucua. Janiyari cuno pojori miishano soyajuhuj. Nio cua sequesano quiajaniyani, cunoori puetunu cua pueyarajanaa. <sup>7</sup> Cante numaacani, nojori cuara tojiiria Pueyaso Sohuanu sequesano Pueyaso pueya maapuera. Pueyaso quishaqui, samiitianijia naanaari nujuataa. Cante puetunu sesa casaajanaa nujuataja cumaatiani, janiyari nojori jiyatenutaniya cuno naanajiniji mioojuarani, pueyaracaanu rishijiaca nojori quiniuria’ ”.

*Esmirna tiacajinia quiniaa Pueyaso pueya maanuucua naajione*

<sup>8</sup> Jiyaniijia Jesucristoori naa cua sequerejuhuaj:

—Esmirna tiacajinia quijia cua seruucua quia naajiore, Pueyaso pueya maanu jitianani. Naa quia sequere nojuaja: “Naa sequerari cante puetunu casaajanaa coteetenacuajani, na tucujatani. Nojuacuajaari cusoquiaari, na nuhuaji samiitiaquiaarihuari. Janiyacuajaari nojuajani. <sup>9</sup> Janiyacuajaari niishiyani, quiaari naquiya miishaquiaa. Quiaari casamijiujuhuaj. Naajaa, quiaari jiyanoehua casamiriacaajaja nia cua shurucuanu. Janiyari niishiyajuhuj, cuno Judiocuacaari quia sesacquiaa. Nojoriiri tama sequeriquiaajaacujua nojoriniaari Pueyaso pueya cutara, Judiocuaca nojori quiniuucua. Maja naatej. Nojori cutaraari Satanás pueya maanu. Satanás cuajaari samaruhua jiyaniijia. <sup>10</sup> Quiaari naquiya miishaanutaniya. Naajaa, majaari puerenu. Satanásri noojiaqueya niajanijiniinio nujuatejotenutaniya nujuatejuajinia nia sanishaanura, niaate cucua tiuujia seetanujuanaa. Naajaa, niaari saaja rupaquijia miishaanutaniya naquiya. Quia rejeretariquia saaja. Cua tojijia quia quiriquia pueyaracaanu, quiaa cuara shaajeyarejaatijia. Quiaa jaara naa miiritij, janiyari quia jiyatenutaniya jiyanoehua shuquiriaatia quijia quia quiniuria pueyaracaanuni. Nio cua sequesano quiajaniyani, cunoori puetunu cua pueyarajanaa. <sup>11</sup> Cante numaacani, nojori cuara tojiiria Pueyaso Sohuanu sequesano Pueyaso pueya maapuera. Cante cucua na tiuuniuucua naquiya na miishaanu rejeretaja pueyaracaanuni, nojuaja cutaraari maja quenaaja naquiya na miishaanu quiniutianiya Pueyaso saniitiosacari na ruuretajaca. Na ruuretajaca cutaraari quejoosaanutaniya mani noshijia caminajinia’ ”.

*Pérgamo tiacajinia quiniaa Pueyaso pueya maanuucua naajione*



<sup>12</sup> Jiyaniijia Jesucristoori socua cua sequeree:

—Pérgamo tiacajinia quijia cua seruucuaara quia naajiorejuhuaj, Pueyaso pueya maanu jiiitianani. Naa quia sequere nojuaja: “Nijiniaquetucuaaja mueruu jiiitianaari naa sequeya: <sup>13</sup> ‘Janiyari niishiyani, cuno tiaca quiaa tii quiyani, cunoori Satanás quiquiojuhuaj. Naajaa, quiaari cua tojjia quiquiaa. Majaari cucua quia tiuuniujiniji quia seetanu quiquiaa. Cua seru Antipas cutaraari mosaaquiaari janiyajiniji pohuatanu na tarinitiaaquini-uucua, cuniqui nia tajinia Satanás quishaquini. Naajaa, majaari quenaaja jiyacari quia seetanu quiquiaari cucuaji. Puetunu naa quia miishanojuanaari jiyanoehua maninia. <sup>14</sup> Saniniuujia, maja cutaraari nio cua maniniucuanu: tamasaca niajaniyajinijinioori maja na tarinitianu paniniu sesa na miiijionu. Nojoriiri supuetana Balaam niishitiojosano tojjia quiyajaa. Balaamcuajaari Israel pueya paraca Balac niishitiojoquiaari na pueya cuara shiniujuuria Israel pueya, jaarajaaja Israel pueya miiniuria sesa nojoritia. Naaratej, Balac pueyari Israel pueya mianuutequiaari noo shu, teyanote juaashiquiata shipinijosano casaacuara puecoosano quiquiaaricujani juhua Pueyasooacara. Naa sacuaraatia nojori queranacujacari nojori paraatatej, Israel pueyari cuniquijia cuno taatujuri numuetucujuquiaarijuhuaj. <sup>15</sup> Naajuhuj, majaari nio cua maniniucuanu: noojiaqueya niajaniyajinijinioori maja na tarinitianu paniniu jiyanoehua sacuaraatia casa Nicolás niishitiojosano. <sup>16</sup> Quiaari nareja niquiquiaa sacuaraatia nojori miiijionu. Cunora, quioojia quia tacatorohua cucua, janiya mariqui quiocua quiaareeri cuno sacuaraatia miiijia cua miaquejonura cua rupaamaji mueranacujua mueruuta. <sup>17</sup> Cante numaaracani, nojori cuara tojiiria Pueyaso Sohanu sequesano Pueyaso pueya maapuera. Cante tama na cuaqueya miiniu panishanojuaja rejetejani, janiyari na mianuutenutaniya jiyocuacaanu cua racatasano cua pueyarano cua riuriotacajinijini. Janiyari na niqutionutaniya cohuajajau saajiajuhuaj, teyanocua quiarinio sesa naajiotasano quiniutianiyacujani. Majaari tamonu niishiniu quiniutianiya cuno sesa. Saaja na camaruuri na niishiniutianiya, cana cua niqutionutaniya cuno saajiacujani’ ”.

*Tiyatira tiacajinia quiniaa Pueyaso pueya maanuucuaara naajione*

<sup>18</sup> Jiyaniijia Jesucristoori socua cua pacuterohua sequenuhuaj:

—Tiyatira tiacajinia quijia cua seruucuaara quia naajiore, Pueyaso pueya maanu jiiitianani. Naa quia sequere nojuaja: “Pueyaso Niyanu, juhua mani rimianacuyano namijiaaracani, juhua bronce mohuaquishano shacantuua niohuacaracajuhuj, nojuajaari naa quia sequeya: <sup>19</sup> ‘Janiyari puetunu quia miishanojuanaa niishiyani. Janiyacuajaari niishiyani, quiaari Pueyaso panijia, pueya panijiano. Quiaacuajaari Pueyasooaca tiuujia. Quiaari maninia poonijiona Pueyasora, pueya quia naacunura. Naajuhuj, quiaari juhujaniya rejeretaquiaa quiaa jaara taraatia miishaariquia. Janiyari niishiyajuhuj, puetunujuanaa quia miishano quiria quiarijiani, cunoori socua queraatia coteenu quia miishanojiniji. <sup>20</sup> Saniniuujia, nio cutaraari cua maniniucuaaquishano: cuno Jesabel niaata quiyani, tama na cuaqueyajaaja sequequiaani, nojuajanaari Pueyaso sequesano caminiujunia pueyara. Quiaari juhujaniya na shanacuquiaa saaja, sacuaraatia na niishitiojosanota na sapojonura cua pueya. Naa sacuaraatia na niishitiojosanotatej, cuno maajiiri cua pueya shiniujuquiaa juhujaniya nojori numuetucujunura na camishoo maajipohua. Cua pueya shiniujuquiaaariuhuj nojori miaquenuunura noo shu, teyanote juaashiquiacata shipinijosano taucua pueyasohuacuara puecoosano quiquiaacujani. <sup>21</sup> Janiyacuajaari

tari cuno maaji sashiquianu juucuanu, noojia na tacatonura cucua. Majaari na tarinitianu paniniu paanatu na quiniu. <sup>22</sup> Cunora, cua tojiri. Cua saniitionura nojuaja, janiyari na cusotenutaniyani na maquetujinia na matanura. Naajuhuaaj, na numuetucunujuaca jaara noojia tacatoyaquiri sesa nojori miiniuujiniji, janiyari jiyanojua naquiya miiniutianiya nojorini. <sup>23</sup> Noo maajipohuajuhuaaj, paanatujuuriria quinioni, cuno paanatujuanaa niishitiojonuucua nojori juhua necojorini, janiyari puetunu nojorijianaa puecoonutaniyani. Naacuaajitij, puetunu Pueyaso pueya maapuejanaari niishiniutianiya, janiyari puetunu nojori jiuujiajiniajanaa nojori niishiriojosano niishijiani, nojori panishanoocua nojori jiaatianunio. Naacuaajitij, janiyari maninia miijiaca niajanijajinijinio maninia miiniutianiyani. Nijaniyajinijinio sesa miijiaca saniniuujia, nojoriiri saniitiosaanutaniyacujua. <sup>24</sup> Tiyatira tiacajinia quiniaa noojiaqueya niajanijajinijinio saniniuujia, niaari sacuaraatia cuno maaji niishitiojosano ruuretaquiaa saaja. Naajuhuaaj, majaari nia niishiniu paniniu quijia cuno sacuaraatia casaa jiyasohuaja niishishano, sacuaraatia miijiaca jiyaniquishanoni “jiyajeneta casaa, Satanásjiniji niishishano”. Naa nia ruuretanuucua puetunu cuno sesa niishitiojosanojuanaani, cunoori maniniacuaja. Cunora, majaari socua cua nacasunu quiarjia niajaniya. <sup>25</sup> Saaja tama nia cuaqueyajaaja nia cojuare jiyanojua, maja nia tarinitianura maninia nia miiniu taa nia miiquiaacuajani. Naa nia miiriquia pueyaracaanu, janiya jaara niaacua tiuquiriohuajaajitijia. <sup>26</sup> Cante cua panishano miiquiaa pueyaracaanuni cuara shaa-jeyarejaatijia, janiyari cuno pueyano jiyatenutaniya tamasaca pueyapue jiyaniijia na quiniuriani, taa cua Que jiyatequiaari janiya jiyaniijia cua quiniuriacuani. <sup>27</sup> Jiyaniijianucua cua jiyatesano pueyani, nojoriiri cumaacaraca quiniutianiya na jiiitasano pueya na tojitiniuria nojuaja. Na tojitiaashijia na saniitiosacari saniniuujia, nojori piyonutaniya jacanau-raari, juhua cumamacata pishano conatu. <sup>28</sup> Naajuhuaaj, janiyari joojea na niquitionutaniyani, juhuaquetaja rijiani, shacantuuca quijia na quiniuria juhua janiyajuhuaaj. <sup>29</sup> Cante numaacarani, nojuaja cuara tojiiria Pueyaso Sohuanu sequesano puetunu Pueyaso pueya maapuerajanaa’ ”.

### 3

#### *Sardis tiacajinia quiniaa Pueyaso pueya maanuucua naajione*

<sup>1</sup> Jiyaniijia Jesucristoori socua cua sequeree:

—Sardis tiacajinia quijia cua seruucua quia naajiorejuhuaaj, Pueyaso pueya maanu jiiitianani. Naa quia sequere nojuaja: “Naa sequerari cante Pueyaso Sohuanu jiyaramiquiquiaa cuno siete Pueyaso pueya maapuecuacuajani, nojori jiuujiajinia na poonijionura. Nojuacuajaari cuno siete Pueyaso pueya maapue jiiitianaa Jiiitianajanaa. Janiyacuajaari cunoni. ‘Janiyari puetunu quia miishanojuanaa niishiyani. Pueyari quia jiyaniya quiaari saminio. Janiya cutaraari niishiyani quiaari juhua macu. <sup>2</sup> ¡Quia maquenu quia jatara! ¡Suteja quia quiri! Quia cumaquiri noo pojori canapuate jatarinitiaja rishiyajaani. Quera cusonuyari. Janiyari Pueyasora quia miishano niquiquiaani. Majaari maninia na quiniu cua Pueyasora. <sup>3</sup> Quiaacuajaari maninia niishitiojosaaquiaari Pueyaso rupaa. Taa quia niishitiojosaaquiaaricuajani, cuno quia niishiriohua. Quioojia quia tacatorohua Pueyasocua, seetanujuanaa na rupaa tojjia quia quiniuria. Quiaa jaara suteja quiniu paniyaquiri, janiyari canashiyaquiji quiocua niniutianiya juhua nohuasejojuani, quia jiyanihacari maja naasucua juhuanujuaja cua tiuquiniu quiniutianihua. <sup>4</sup> Quia jiiitasano pueyajinijinio cuniqui

Sardis tiacajiniani, secaja nojorijinijinioori sesa miiniu ruuretajaca saaja. Naa sesa miiniuria nojori na cojiyaquiniuucuatej, nojoriiri juhua curu-ushojiyaquishano janiyara. Naaratej, janiyari nojori cushiyotenutaniya cohuajaqueya toqueni, cuata nojori rucanejonura, cua rupuenaa nojori quiniuucua. Cunoori seetanujuanaa sesa miiniu ruuretajaca nojori quiniuucua, cucua tiuujiaa nojori quishacari. <sup>5</sup> Canapuate naa sesa miiniu ruuretajacani cua tojtiajaca nojori quiniuucua, nojoriiri naa cohuajaqueya toqueya cushiyotesocoriquianojuhuaj. Cunoori quiniutianiya tojetaarucujanaa sesa miyashijiacara cua jiyatesacari nojori. Naajuhuj, majaari cua tuujunu quiniutianiya nojori sesaca cua naajioneejiniji, tee cuniqui pueyaracaanu rishijiacarano cua saquiriojosano pueya sesaca naajiotasano quiyacuajani. Naajuhuj, janiyari nojori jaatianutaniya cua Queecuan, na seya tacojirianio, cua sequenura nojoriiri cua timitiasano pueyanioyua. <sup>6</sup> Cunora, cante numaacani, nojuaja cuaara tojiiria Pueyaso Sohanu sequesano Pueyaso pueya maapuera' ”.

*Filadelfia tiacajinia quiniaa Pueyaso pueya maanuucuaa naajionee*

<sup>7</sup> Jiyaniijia Jesucristoori socua cua sequeree:

—Filadelfia tiacajinia quijia cua seruucuaa quia naajiorejuhuaj, Pueyaso pueya maanu jitianani. Naa quia sequere nojuaja: “Cua tojiri. Janiyacuajaari tojetaarucujanaa maninia miijiani, cua Que tojijia cua quiniuucua. Puetunu cua sequesanojuanaari seetanujuanaa. Jiyaniijiajanaa cua quiniuucua cua supuetana David niti, janiyari cua Que tiotiu riatataja jitianani, cua saquiriojosano pueya cua tiuquinitianura cua Queecua. Janiya jaara cuno tiotiu riatareni, tamonuuri maja na naata na tionuhua. Janiya jaara na tioreni, majaari quenaaja tamonu na naata na riatanuhua. <sup>8</sup> Janiyari puetunu quia miishanojuanaa niishiyani. Naajuhuj, janiyacuajaari juhua tiotiu riatarucuaa quiocuajini, cua rupaa quia poojotanura. Naacuajitij, tamasaari maja na naata tenujunu quiajaniya. Quiaacuajaari saaja secaja cumaacaraca. Naajaa, quiaari cua rootasano tojijiacuaja. Naajuhuj, majaari cua soojeaca pueya niquiara quia tamacanu quiquianu janiya. <sup>9</sup> Naa maninia quia miiniuucua janiyaracuatej, janiyari naa maninia miiniutianiya quiarajuhuj. Janiyari noojiaqueya Satanás pueya maanujinijinio mojuquetanijionutaniya quiocuarani. Cuno pojoriiri tama na cuaqueyajaaja sequeja, nojoriniaari seetanujuanaa Pueyaso pueya, Judiocuaca nojori quiniuucua. Naa nojori sequesacaritij, nojoriiri sapojonuya. Nojoriiri maja Pueyaso pueya. Nojori cutaraari niishiniutianiya janiyari quia panijia cutarani. Quiaacuajaari Pueyaso pueyano, cucua tiuujia quia quiniuucua. <sup>10</sup> Janiyari quia sequequiaarini maja quia tarinitianura quiria poonijionu, quiaa jaara naquiya miishaariquia. Quiaari seetanujuanaa naa miiquianu. Naaratej, Pueyaso saniniujiushacari puetunu mijiria quiniaajanaa puereeta naquiya na miiniutia nojori, janiyacuajaari jiyacari nia cojuanutaniyani. <sup>11</sup> Quia niishiri: janiyari quera tiuquihuani. Majaari quia tarinitianu cua rupaa tojiniu, quiaa mariqui sapojosaareeri cucuaji quia rupatenura. Naacuajitij, quiaa jaara cucuaji catere, majaari Pueyaso niquitionu quiniutianiya quiarano na racatasano. <sup>12</sup> Cante sesa miiniu samiritiaja saajani, cua rupaa tojijia na quiniuucua, janiyari jiyocuacaanu Pueyaso Secojoja tiajinia na nujuatenutaniya juhua morijiuni Pueyaso quishaquijianaa, tii cua Que Pueyaso na shuquiritianura pueyaracaanu. Majaari socua cuniquiji na pootiosaanu quiniutianiya. Naajuhuj, janiyari cuno pueyanocua naajiotanutaniya cua Que Pueyaso sesani, quiarinio cua sesajuhuj, cua Que

Pueyaso tiaca sesanio. Cuno tiacacujaari quiarinio Jerusalén tiaca, jiyocua-caanuji roshinitiasaariquiano. <sup>13</sup> Cante numaacani, nojuaja cuaara tojiiria Pueyaso Sohuanu sequesano Pueyaso pueya maapuera”.

*Laodicea tiacajinia quiniaa Pueyaso pueya maanuucuaa naajionee*

<sup>14</sup> Jiyaniijia Jesucristoori socua naa cua sequeree:

—Laodicea tiacajinia quijia cua seruucuaa quia naajiorejuhuaj, Pueyaso pueya maanu jitianani. Naa quia sequere nojuaja: “Cua tojiri. Naa sequerari noo pueyano cana sequesante seetanu rupaaajanaacujani. Puetunu na caminiujiushanojuanaa Pueyasojiniji quiarani, cunoori seetanujuaanaa. Pueyasoori na shipinitiquiaari puetunu na shipinishano casaajanaa. Cunocujaari janiya. Cunora, cua tojiri. <sup>15</sup> ‘Janiyari puetunu quia miishanojuanaa niishiyani. Quiaari najuhuana quijia, quia miyaquiniucua cua sequesano. Seetanujuaanaa cua tojiyaquiniu panijia quia quishacari, maara socua maninia quiquiaari cutara maja quia niishiniuria janiya. <sup>16</sup> Quiaa jaara cua niishiyashijia quiriquia, janiya maara quiocua taraajereni. Saniniuujia, quiaa jaara seetanujuaanaa cua tojijia quiriquia, janiya maara quia timitiaren. Saniniuujia, najuhuana cua pueyano quia quiniucua, janiyari quia soyani. Naa quia quiniucuatej, janiyari quera quia saniitioyani. <sup>17</sup> Quiaari tama sequequiaajaacujua: ‘Janiyari casamiriacani. Janiyari puetunu cua panishanojuanaa jitiaani maninia miijia cua quiniucua’. Maja cutaraari quia niishiniu quioojiaari cusosu. Janiyara, quiaari tojetaarucujanaa casamiijiu, cariojuaru, juhuasunio. Quiaa jaara na niishiriquia, quiaa maara tama quia cuaqueyajaaja taraajetaja quiriquia. <sup>18</sup> Cunora, janiyari quia numooteyani moseca pueyanonaa, cua rupaa tojijia quia quiri, seetanujuaana casamiriaca quia quiniuria. Naajuhuaaj, maninia miijia quia quiriquia cua cushitiniuria quiajaniya cohuaaque toque, maja cararaatia quia quiniuria juhuasu. Naajuhuaaj, cua niishitiaja quia masere cutara, quioojia namijia riatenura, seetanujuaana maninia niquijia quia quiniuria. <sup>19</sup> Janiyari puetunu cua panishano pueyajanaa nacasujuani, nojori saniitiojuajuhuaaj. Cunora, quioojia quia tacatore cucua. Tama quioojiaajaaja quia shiniujiurijuhuaaj shamaatia cua tojijia quia quiniuria. <sup>20</sup> Cua tojiri. Janiyari quioojia tiotiuujiniji jiiquionuujiyani. Cante cua tojiyani, nojuaja cuaara na tiotiu riataara cucuaji. Janiyacua nocua tiuquiumiani, nata cua miaquenura, shuquiriaatia cua pocoojonura nata. <sup>21</sup> Janiyari cua Paraca shocotaquiaarini cua Que tojijia cua quiniucua. Naaratej, cua Queeri cua cajitiquiaari na shuriucua, Jiyaniijiajanaa cajitijinia. Naajuhuaaj, janiyari Sesaaca shocotajaca cajitijionutaniya cua shuriucua, jiyaniijianucua nojori quiniuriajuhuaj. <sup>22</sup> Cante numaacani, nojuaja cuaara tojiiria Pueyaso Sohuanu sequesano Pueyaso pueya maapuera’ ”.

## 4

*Juan niquishacari Jiyocuaaanu Quijiaari maninuhuaqueetasaariquiaa*

<sup>1</sup> Na nuhuaji, janiyari mauquiaarini. Janiyari saaja jiya cajiniocua tiotiu niquiquiaari riatasanoni. Shushajanaa cua tojishano rupaa juhua trompeta jonenenuni, cuno rupaaajari cua pacutequiaariuhua sequenu. Naa cua sequereeri:

—Miji quia tacama. Janiyari quia niquitiniutianiyani taa nio pa quishacari nuhuaji mijiria quiniaa miishaanutaniyani.

<sup>2</sup> Jiyacaritij, Pueyaso Sohuanuuri cucua niquiaari. Cua sohuanu tacaniquiaari jiyocuaaanuuri. Janiyari jiyacari Jiyaniijiajanaa cajitiu

niquiriini. Pueyanoori tii cajiriquiaa. <sup>3</sup> Nojuajaari shanohua niquishano quiriquiaa, jiyanohua shacantuuca juhua jaspe saajia, jiyanohua naatuu-cajuhuaj, juhua cornalina saajia. Naashiiri na cajitiu caco nujuariquiaa. Jiyanohua shacantuuca quiriquiaari neeruuca, pocojuanaque juhua esmeralda saajia. <sup>4</sup> Janiyari socua veinticuatro cajitiucua niquirii Jiyaniijiajanaa cajitiu shocuani. Tii cajitiuriquiaari veinticuatro niishijiaa jiyaniijianucua. Cohuajaque toqueya cushiyonuuriquiaari, orojiniji shipinijosano nacaqueyano. <sup>5</sup> Jiyaniijiajanaa cajitiujiniji, miacanaari nunujuriquiaa. Jiyanohua majacuriquiaajaariuhuj. Jiyaniijiajanaa cajitiu tacoji, tii noshiquioriquiaari siete samari. Cunocujaari siete Pueyaso Sohuanu, puetunu tiquiyocuajanaa quijia na quiniuucua. <sup>6</sup> Jiyaniijiajanaa cajitiu tacoji, juhua jiyanohua puereetuuca caminiaari quiriquiaajuhuj, juhua cohuaja motiiquio maatia niquishiyari na tamajiria.

Jiyaniijiajanaa cajishaqui, cuatro saminio casaari quiriquiaajuhuj, puetunu na shocuajanaa. Nojoriiri jiyanohua queraatia namijiaraca quiriquiaa, na jiriquiaacumaji, na nijiniaacumajinio. <sup>7</sup> Cuno cuatro saminiucua casaari tamaatia niquishano quiriquiaa tamonujiniji. Niquiriyatuuri juhua juuru sare niquishano quiriquiaa. Tamonuuri juhua seru juunu caya niquishano quiriquiaa. Tamonu casa jiquicoori juhua pueyano jiquico niquishano quiriquiaa. Tamonuuri juhua surohua miooru jaano niquishaariquiaacujua. <sup>8</sup> Puetunu cuno cuatro saminio casaajanaari seis nesuhuaraca quiriquiaa. Puetunu nojori cuaqueyacumajanaa quiriquiaari na namijiaa, nocuaji na niquitiaja, na nijiniara na niquitiajano. Nojoriiri pueyaracaanu Pueyaso maniniuhuaqueetariquiaa, juuca, niucuanio. Majaari nojori tarinitianu quiriquiaa naa na sequetunu:

—Jiyaniijiajanaanaa, quiaari saa maniniaja, jiyanohua maninia, tojetaarucuaajanaa maninia miijia! Quiaacuajaari Pueyaso, puetunu cumaacaracajanaa. Quiaari quijiajuhuanajaj. Majaari quia supueno quiquiaari. Quiaari quia pueyacia tacateriquianohua.

<sup>9</sup> Cuno cuatro saminio casaari naa pueyaracaanu maniniuhuaqueetariquiaa Jiyaniijiajanaa, na cajitiujinia cajiyano, pueyaracaanu Jiyaniijiajanaa quiriquiano na quiniuucua. <sup>10</sup> Naa pueyaracaanu cuno cuatro saminio casa timitiasacari Jiyaniijiajanaacuaatej, cuno veinticuatro niishijiaa jiyaniijianucuaari jaarajaaja mojuquetacoequiaa Jiyaniijiajanaacuara. Nojoriiri na tuhuajaa jartaqueequiaa Jiyaniijiajanaa cajitiu pajama, naa na sequenuta:

<sup>11</sup> —Nioori quiara, Jiyaniijianaa. Quiaa cutaraari Jiyaniijiajanaa, maja canaa. Quiaacuajaari canaa Pueyaso. Quiaa cuara timitiasaaria pueyaracaanu, jiyanohua maninia shacantuuca quijia quia quiniuucua, puetunu cumaacaracajanaa quia quiniuucuaajuhuj. Quiaacuajaari puetunu casaajanaa shipiniquiaari. Tama quia paniniuucuaajaaja, quiaari na shipiniquiaari.

## 5

### *Rupanacujusano naajioneejiniji pohuatasano, Borrego Niquiojuajinjinio*

<sup>1</sup> Na nuhuaji, janiyari Jiyaniijiajanaa cajitiujinia cajinia juaashiquiajinia niquirii naajioneeni. Na miaquetajara na cacariquiaari. Cuno tucuanee naajioneeri jiuniosano quiriquiaa. Naajioori nocua quiriquiaa, na ninia, na jiniacumanio. Cuno naajioneejinia, siete naajioori tii naajiotasano



quiriquiaa. Cuno siete naajio coteejajiniani, juhua roshitia rupanacujutasanoori quiriquiaa. <sup>2</sup> Jiyacaritij, janiyari jiyanoehua cumaacaraca Pueyaso seru niquiriini. Naa nequesoreeriquiaari jiyanoehua na nacanuta:

—¿Cante seetanujuanaa maninia miihia cutarani? Cuno cuaara rupartaara rupanacutasano, na riatanura cuno naajione.

<sup>3</sup> Jiyacaritij, majaari quenaaja maninia miihia quiniu quiquiaari jiyocuacaanu, jiyajinia, jiya cariquimianio na riatanura cuno jiuniocosano naajione. Tojetaarucujanaa shaaqui quiquiaari cuno naajione serojoriquiano. <sup>4</sup> Naaratej, janiyari jiyanoehua nujuqueriquiaani, tojetaarucujanaa shaaqui maninia miihia quiyaquiniuucua cuno naajio na riatanura, na serojonurano. <sup>5</sup> Cua nujuquesacari, tamonu cuno veinticuatro niishijiaca jiyaniijianucujinijiniori cua sequere:

—Maja nujuquenu. Quia cumantare. Quia niquiri. Pa Jiyaniijiajanaacuajaari jiyanoehua cumaacaraca. Tariucuacaanu Pueyaso Rupajinia, nojuacuajaari miriqui sequeshiya Juurunu sareta, Judá niquiohuacujinio supueriquiano, Jiyaniijiajanaa na quiniuria na supuetana David niti. Nojuacuajaari pa paraca Satanás shocotana, tojetaarucujanaa Jiyaniijia Pueyaso tojijia na quiniuucua. Naaratej, nojuaja na naata cuno siete naajio coteja rupanacujutasano rupareetanu na serojosocoriquiano.

<sup>6</sup> Jiyacaritij, janiyari Borrego Niquiojua niquiriini Jiyaniijiajanaa cajitiu tacoji nujuaano, cuno cuatro saminio casaa tajinianio. Cuno veinticuatro niishijiaca jiyaniijianucuaari na shocua quiriquiaajuhuj. Borrego Niquiojuaari seetanujuanaa juhua mosano samiitianohua niquishaariquiaa. Nojuajaari siete jiyaniijia tuhuajaaraca quiriquiaa, puetunu cumaacaracajanaa na quiniuucua. Naajuhuj, siete namijiaaraca quiriquiaari. Cuno na siete namijiaani, cunocuajaari Pueyaso Sohuanu, Pueyaso jiyaramiquishano puetunu mijirijanaa. <sup>7</sup> Cua niquishacari, Borrego Niquiojuaari Jiyaniijiajanaa cajitiujinia cajiyano juaashiquiajiniji jiuniocosano naajione masetaree. <sup>8</sup> Nojuaja jaara cuno naajione cacariquiaa tari, cuno cuatro saminio casaari nocuara mojuquetacoquiaari, cuno veinticuatro niishijiaca jiyaniijianucuanio. Puetunu nojorijianaari taquiniojosano casaa jiitariquiaa. Naajuhuj, orojiniji shipinijosano suhuococua mueetacoriquiaari, mishaja shanohua jaanutajata. Nojori mueetacosano shanohua jaanutajani, cunoori nio jiyajiniji Pueyaso muerasu secojonuusano Pueyaso. <sup>9</sup> Nojoriiri Borrego Niquiojua jaaquequejotariquiaa nio quiarinio jaaquequejosano:

—Saaja quiajaniyari seetanujuanaa maninia miihia. Naaratej, quia naata cuno naajione patanu quia rupareetanura na rupanacujusano. Quiaari jiyanoehua maninia. Naaratej, quiaari jiyajinia quiniaacuara mosaaquiaari. Quiaari quia nanacata pueya masequiaari Pueyasora puetunu tamaatiuucua pueyapuejinijiniojuanaa, puetunu tamaatia rupaa pocuajacajinijiniojuanaa, puetunu tiacajinijiniojuanaajuhuj, puetunu jiyacajinijiniojuanaano. <sup>10</sup> Quiaari nojori jiyatequiaari tama quia pueyarajaaja, puetunu nojorijianaa quiniuria jiyaniijianucua, pueyacuara secojona, pueyaracaanu nojori maninihuaqueetanura pa Pueyaso. Nojoriiri jiyacua jiyaniijianucua quiriquianojuhuj.

<sup>11</sup> Na nuhuaji janiyari tojetaarucujanaa jiyanoehua jiyanoehua queraatia Pueyaso seya niquiriini. Jiyaniijiajanaa cajitiu shocua mariquiaari, cuno cuatro saminio casaa shocujuhuj, niishijiaca jiyaniijianucua shocuanio. Nojoriiri jiyanoehua queraatia quiquiaari, juhua jaaquia, serojiyaquishoo.



Janiyari nojori tojirii pa Jiyaniijia Jesu maniniuhuaqueetaanoni. <sup>12</sup> Nojoriiri naa na sequeturiquiaa na nacanuta:

—¡Pa Jiyaniijiaari jiyanoehua maninia! Pueyacuara mosaaquiaariiri juhua borrego niquiojua. Naaratej, saaja nojuaja cuaara quiiria Jiyaniijiajanaa pueyaracaanura. Saaja nojuaja cuaara jiitiaara puetunu casamijanaa. Saaja nojuajaari tojetaarucujanaa niishijia. Nojuajaari puetunu cumaacaracajanaa. Cuaara naa quiiria pueyaracaanutej. Puetunu quijiaca casaajanaa cuaara tojitiaara pa Jiyaniijia. Saaja nojuaja cuaara quiiria jiyanoehua timitiasano. Puetunu quijiacajanaa cuaara na maniniuhuaqueetaara.

<sup>13</sup> Naajuhuaaj, janiyari puetunu Pueyaso shipinishano saminio casaajanaa tojiriini, jiyocuacaanu quijiaca, jiyajinia quijiaca, jiya cariquimia quijiacajuhuaaj, shoniniacu caminiajinia quijiacanio. Puetunu nojorijianaari jiyanoehua na timiniutia sequeturiquiaa:

—¡Cuno, na shacantuuca cumaacajinia cajiyani, Borrego Niquiojuanio, nojori cuaara maniniuhuaqueetasaaria pueyaracaanu! ¡Puetunu casaajanaa cuaara tojitiaara nojori pueyaracaanu! ¡Nojori cuaara timitiasariajuhuaaj! ¡Saa nojorijia cuaara na cumaaca jiitiaara pueyaracaanura!

<sup>14</sup> Jiyacaritij, cuno cuatro saminio casaari nojori riuhaneriquiaa saniniuujia:

—¡Taaquiririnij! ¡Cuaara naa quiiriatej!

Cuno veinticuatro niishijiaa jiyaniijianucuaari saniniuujia mojuquetacoqueecujua cuno pueyaracaanu Quijiacaacuara, nojori na shuquiritianura.

## 6

### *Jiuniocosano naajioneecua seis rupanacujutasano rupareetasacari*

<sup>1</sup> Na nuhuaji, cua shootiasacari, Borrego Niquiojuaari coteenujanaa cuno naajioneejinia rupanacutasano rupartaree. Naa miiriiri cua niquitishaanura taa mijiria quiniaa miishaanutaniya jiyanoehua naquiyani, quera nio jiya puequesacari. Jiyacaritij, janiyari tamonu cuno cuatro saminio casaajiniijinio tojirii sequeyanoni: “¡Miji!” Na pocuanuuri juhua miacana majanu tojishano quiriquiaa. <sup>2</sup> Naa na sequesacaritij, janiyari cohujahuana caballo niquirii nocua canujiyanoni. Na nijinia cajiniaari balista cacariquiaa. Jiyacaritij, jiyaniijiaari shipinishano nacaque cushitishaareeri. Na nuhuaji, na caballoori na netetaaree jiyocua na quianura, tii na miaquejonura Pueyaso paraa. Majaari quenaaja na nujuatasaanu quiniutianiya.

<sup>3</sup> Na nuhuaji, Borrego Niquiojuaari segundo rupanacutasano rupartaree. Janiyari jiyacari segundo saminio casaajiniijinio tojirii sequeyanoni: “¡Miji!”

<sup>4</sup> Naa na sequesacaritij, naatuhuana caballoori nocua canujumaa. Na nijinia cajiniaari cumaaca niquitiosaare. Naacuajitij, nojuajaari mijiria quijiaca tojetenutaniya tama nojori miaquetoojonurajaaja. Cunora, nojuajaari puereetunee nijinaquetucujaja mueruu niquitiosaaree.

<sup>5</sup> Na nuhuaji, Borrego Niquiojuaari tercero rupanacutasano rupartaree. Janiyari jiyacari tercero cuno saminio casaajiniijinio tojirii sequeyanoni: “¡Miji!” Jiyacaritij, janiyari mueruhuana caballo niquirii nocua canujiyanoni. Na nijinia cajiniaari niiquia shanacujutaja jaasutetariquiaa, mijiria quiniaara miajajau shanacujusaanura nojori serotasaaanura. <sup>6</sup> Jiyacaritij, janiyari cuno cuatro saminio casaajiniijini rupaa tojirii naa sequeyanoni:

—Niquiriyatu juuca poonijionu sami, cuaara niquitiosaaria saaja niquiriyatu kilo trigo jajau. Jaara trigo jajau paniyaquiri, cuaara

niquitiosaaria tres kilo cebada jajau. Saniniuujia, majaari shiyocua shanacujunu cutara, vinonio. Cunocuaajaari queraatia quiniutianiya cutara.

<sup>7</sup> Na nuhuaji, Borrego Niquiojuaari cuarto rupanacutasano rupartaree. Jiyacaritij, janiyari cuarto saminio casaa tojirii naa sequeyanoni: “¡Miji!”  
<sup>8</sup> Janiyari jiyacari tiirihuana caballo niquirii nocua canujiyanoni. Na nijinia cajinia sesaari quiriquiaa “Cusojuana”. Macunucua Quiquioori na neteyotariquiaa, Cusojuana puecoosano na rijionura na miitiasocoriquiano. Nojoriiri cumaaca niquitiosaaree jiyanoehua queraatia pueya na cusojuanura. Naacuajitij, jiyanoehua queraatia pueyari puecoosaanutaniya mi-aquetoosacari. Tamasacaari cusunuutananiya jiyanoehua miaajesacari. Tamasacaari paaqueja casonu cusunuutananiya. Naajuhuaaj, tamasaacari sareya sootesaanutaniya. Sacocua satejosaanutaniyajaariuhuaaj. Naacuajitij, jiyanoehua jiyanoehua queraatia pueyari cusojuasaanutaniya. Na nuhuaji, puetunu macunucujanaa jaara serojosaare, puetunu nojorijianaari na cajiniocua quiniutianiya puetunu mijiria quijiaca pueya cajiniocujinijinijuanaa.

<sup>9</sup> Na nuhuaji, Borrego Niquiojuaari quinto rupanacutasano rupartaree. Jiyacaritij, janiyari Pueyasoocuaa catijiasaqui juhuacutu cariquiaco niquirii Pueyaso pueya sohuanuhuani, noo pojori canapueete puecoosaaquiaaricuaajani Pueyaso Rupaa tojijiaca nojori quiniucua, Jesucristojiniji nojori pohuatanuucuaajuhuaaj. <sup>10</sup> Jiyacaritij, nojoriiri naa jiyanoehua nacaree:

—¡Jiyaniijanaa! ¡Quiaari saa maniniaja! Quiaari quia sequesano miijia seetanujuanaa. ¿Taa quia tarishiniutianiyajaara canaa puecoonaa quia nequesoreenurani, nojori quia naminiuria canaacua saniniuujia?

<sup>11</sup> Jiyacaritij, puetunu nojorijianaari cohuaaque toqueya niquitiojosaree. Nojoriiri naa sequesaree:

—Socua rupaquijia nia samaaterejaara, Pueyaso saquiriojosano niarta Pueyaso pueyajinijinio cuara puecoosaria nia shirijaatijia, taa nia puecoosaaquiaaricuaani.

<sup>12</sup> Na nuhuaji, Borrego Niquiojuaari sexto rupanacutasano rupartaree. Jiyacaritij, rijiaari jiya jiuuquiuiutiaree jiyanoehua. Janiyari na niquiriquiaani. Pananuuri mueruucara quiquii juhua mueruque toque. Racaari naatuucara quiquii juhua nanaca. <sup>13</sup> Riyari jiya cajiniocuaaji totere jiyocua, taa satuna totequiaa jiyanoehua paratucaricuaani. <sup>14</sup> Jiya cajiniocuaari shaajequeejuhuaaj, juhua tucuanee naajioneeri jiuniosaaaree. Shoniacu caminiajia, puetunu jiya tucuaatiajanaa, puetunu tuhuananuhuaajuhuaaj, puetunu cunojuanaari jiyajeetaquee na nujuatusaqui. <sup>15</sup> Nojori puerenuta, mijiria jiyaniijianucuaari raacajinia jamaatiushii, sai tajinia tuhuananuhuaajuhuaaj. Naa jamaatiushiijaariuhua noo pojori: pueyacua paaretajaca na cumaacatej, soldadoehua jiyaniijianucua, jiyanoehua casamiriaca pueya, pueya tojishano pueya, poonitijosano pueyajuhuaaj, puetunu narta pueyajanaano. Puetunu pueyajanaari naa mashiriquiaa juucua. <sup>16</sup> Nojoriiri tuhuananuhua sequeriquiaa, sainio:

—¡Canaacua nia tiyare canaa nia jamonura cunoocuaaji, na cajituijia cajija na shacantuuca cumaacajiniani! ¡Canaa nia jamojore maja na niquiara canaa quiniuria, naajuhuaaj, maja Borrego Niquiojua saniitionura canaa, jiyanoehua na juaashacari! <sup>17</sup> Quiarijiacuajaari Pueyaso saniitionu juuca. Jiyanoehua puereeta. ¿Cante na naata na nujuatanuni? Shaaqui.

## 7

*Pueyaso saquiriojosano pueyajiniji pohuatasano, Israel niquiohuacuajinio supueno pueyajinijinio*

<sup>1</sup> Naa cua niquiniu nuhuajitij, janiyari socua cuatro Pueyaso seya niquirii nio jiya shocua nujuatiuyano tuhuaquini, pananu muetasamaji, na tiuquishocora, na muetasamaji na muenecara, na miaquetajarianio. Nojoriiri na nujuatusaquiiji paratu tenujuriquiaa maja na piyaronjura jiya, shoniniacu caminia, nacuhuanio. <sup>2</sup> Jiyacarijuhuaj, janiyari socua tamonu Pueyaso seru niquirii jiya pajamaji niyanoni. Pueyaso naajio jiriataja casaa cacariquiaari. Nojuajaari narta cuatro Pueyaso seyacua nacaree jiyanoehua, noo pojoriicua canapuete cumaacaraca quiriquiaacuajani nojori sesonura jiya, shoniniacu caminianio. Naa nojori sequereeri:

<sup>3</sup> —¡Cuaara! ¡Maja juhuanajuaja jiya nia sesonu, shoniniacu caminia, nacuhuanio, canaa niojiyaquishacarijia Pueyaso sesa, na pueya jiniji, na niishishaanura nojoriiri Pueyaso pueya!

<sup>4</sup> Janiyari jiyacari tojiriini taa pueyate na jiniji jirioosaareeni. Puetunu supuetana Israel doce niquiohuacuajinio supueno pueyapuejinijinioori ciento cuarenta y cuatro mil pueya jirioosaaree. <sup>5</sup> Naacuajitij, supuetana Judá niquiohuacuajinio supueno pueyajinijinioni, doce mil pueyari jirioosaaree. Supuetana Rubén niquiohuacuajinio supueno pueyajinijinio, doce miljuhuaj. Supuetana Gad niquiohuacuajinio supueno pueyajinijinio, doce miljuhuaj. <sup>6</sup> Supuetana Aser niquiohuacuajinio supueno pueyajinijinio, doce miljuhuaj. Supuetana Neftalí niquiohuacuajinio supueno pueyajinijinio, doce miljuhuaj. Supuetana Manasés niquiohuacuajinio supueno pueyajinijinio, doce miljuhuaj. <sup>7</sup> Supuetana Simeón niquiohuacuajinio supueno pueyajinijinio, doce miljuhuaj. Supuetana Leví niquiohuacuajinio supueno pueyajinijinio, doce miljuhuaj. Supuetana Isacar niquiohuacuajinio supueno pueyajinijinio, doce miljuhuaj. <sup>8</sup> Supuetana Zabulón niquiohuacuajinio supueno pueyajinijinio, doce miljuhuaj. Supuetana José niquiohuacuajinio supueno pueyajinijinio, doce miljuhuaj. Supuetana Benjamín niquiohuacuajinio supueno pueyajinijinio, doce miljuhuaj. Puetunu nio pojorijianaari na jiniji jirioosaaree.

*Cohuajaque toqueya cushitishano pueya maanu*

<sup>9</sup> Naa cua niquitishaanu nuhuajitij, janiyari jiyanoehua queraatia pueya niquirii maanoni juhua tereya. Nojoriiri puetunu nio tiquiyocua jiyacajinijiniojuanaa pueya quiriquiaa, puetunu tamaatiuucua pueyapuejinijiniojuanaano. Quiriquiaajaariuhua puetunu tamaatia rupaaca pocuajacajinijiniojuanaa, puetunu tiquiyocua tiacajinijiniojuanaano. Naa tojetaarucujanaa jiyanoehua queraatia nojori quiniuucuatej, majaari na naata serojosaanu quiriquiaa. Nojoriiri Pueyaso shacantuuca cajitiu tacoji nujuaturiquiaa, Borrego Niquiojua tacojinio. Puetunu nojorijianaari tucuaqueya cohujaque toqueyaraca quiriquiaa. Shuquiriaatia nojori quiniuucua, nojoriiri juhua teruhuanajaquera niquishano mueetacoriquiaa. <sup>10</sup> Puetunu nojorijianaari na mariyata sequeriquiaa na nacanuta:

—¡Jiyanoehua maniniaari pa Que Pueyaso, na shacantuuca cajitijinia cajiyani, Borrego Niquiojuajuhua. Nojoricuajaari pa jiyanooquiaari, tojetaarucujanaa quiariniora jatanishano pa quiniuria!

<sup>11</sup> Naajuhua, puetunu Pueyaso seyajanaa, canapuete shacantuuca cajitiu shocua nujuaturiquiaacuajani, niishijiaca jiyaniijianucua shocujuhua, cuno cuatro saminio casaa shocuanio, nojoriiri Pueyasoocuara jacamaturee nojori timitianura nojuaja. <sup>12</sup> Pueyaso na timitiatuacari, naa sequetureeri:

—¡Taaquiriirini, seetanujuanaacuj! ¡Canaari pueyaracaanu quia manini-uhaaqueetanutaniyani! ¡Quiaacujaari canaa timitiasano! ¡Saaja quia-janiyari seetanujuanaa niishijia cutara! ¡Paacarasho, canaa Pueyasonaa! ¡Quiaa cuaara tojishaaria pueyaracaanu! ¡Quiaari canaa Jiyaniijiajanaa pueyaracaanura! ¡Quiaari puetunu cumaacaracajanaa maninia quia jitianura quia shipinishano! ¡Cuaara naa quiiria pueyaracaanu, pueyaracaanutej!

<sup>13</sup> Jiyacaritij, tamonu cuno veinticuatro niishijiaa jiyaniijianucujinijinoori cua nequesotaree:

—¿Canapuate cuno pojorini, cohuajaque toqueyaracani? ¿Tejenote nojorini?

<sup>14</sup> Janiyari na riucuaaree saajani:

—Quiaa cutara na niishiya, jiyaniijianaa.

Cua sequereeri:

—Nojoricujaari jiyajinijinio pueya. Jiyajinia nojori quishacarijia, nojoriirino cuno jyanohua naquiya miishacari rejeretajaca quiquiaari. Nojori tiuuniucua Borrego Niquiojuaacua, nojoriirino puetunu sesa nojori miishanojiniji juhua nojori toqueya jeequejoquiaari Borrego Niquiojua nanacajinia. Naacuajitij, nojoriirino cohuajaqueya toqueya cushiyonuya. <sup>15</sup> Naa Pueyaso jiyanooshano pueya nojori quiniucuatej, nojoriirino Pueyaso cajishaqui tacoji quijiaca. Nojoriirino pueyaracaanu tii Pueyaso Secojoua tiajinia miiquiaa Pueyaso panishano, juuca, niucuanio, nojori timitiasacari nojuaja. Na shacantuuca cumaacajinia cajijiani, nojuajaari na cumaaca teetenutaniya nojori caco, jatiqui na quiniuria nojoritia pueyaracaanu.

<sup>16</sup> Naacuajitij, majaari socua nojori miaajenu quiniutianiya, jiyamuenunio. Pananuuri maja socua nojori na catijianu quiniutianiya. Naajuhua, majaari socua nasaatia pananu jartanu nojori niishiniu quiniutianiya. <sup>17</sup> Borrego Niquiojuacuajani, Jiyaniijiajanaa cajitiu jiuujiajinia cajijiani, nojuajanaari nojori jitianutaniya juhua tama na borregohuajaaja. Nojuajaari nojori rucanejotanutaniya, nojori na raatenura pueya samiitianijia mohuaca pacartajajiniji, pueyaracaanu shuquiriaatia quijiaca nojori quiniuria. Pueyasojuanaacujaari nojori namijiaaca tujuunutaniya nojori namijiajiniji.

## 8

### *Séptimo rupanacutasanojiniji pohuatasano, shanohua jaanutaja patajajinijino*

<sup>1</sup> Borrego Niquiojua jaara séptimo rupanacutasano rupartaree, cuno naajione saacatanura puetunujuanaa, tojetaarucujanaa sanaacara quiquiirino jiyocuacaanu pueyaracaanura. Maja cua niishiniu, media horaruhua. <sup>2</sup> Na nuhuaji, Pueyaso tacoji, janiyari siete Pueyaso seya niquirino nujuatiyanoni. Nojoriirino jiyacari siete trompeta niquitiojosaaree. <sup>3</sup> Na nuhuaji, socua tamonu Pueyaso seruuri shanohua jaanutaja pataja pamaa, orojiniji shipinishano. Orojiniiji shipinishano Pueyasoocuara catijiaja casaa tacoji nujuaseeri, Jiyaniijiajanaa cajitiu tacoji. Queraatia shanohua jaanutaja niquitiosaareeri Pueyasoocuara na catijianura. Jaanutajaari catijiasaariquiano puetunu Pueyaso pueya secojonuusanotajanaa, Pueyasoocuara na jaanujunura cuno catijiaja casaajiniji. <sup>4</sup> Naacuajitij, Pueyaso seruuri Pueyaso pueya secojosano tacanirino Pueyasoocuara, shanohua jaanujua najacata. <sup>5</sup> Na nuhuaji, cuno Pueyaso seruuri catijiaja casaajiniji na shanohua jaanutaja pataja mishinirino nishiyata. Jyanohua na majiriataree nio jiyacuaari. Miacanaari ritia nunujuquee. Jyanohua majacureeri. Jyanohua cojuatunereeri. Rijaari jiuquiujuutiareejuhua.

### *Trompetaa jonenejosacari*

<sup>6</sup> Cuno siete Pueyaso seya, trompetaa cacariquiaani, nojoriiri jeeceanecoree na trompetaa na jonenenura. <sup>7</sup> Jiyacaritij, niquiriyatu cuno Pueyaso serujiniinööri na trompeta jonenenu coteeree. Jiyacaritij, miacanajaa shiniitiujiaacaari, mariyata mani cojitishano nanacata jiyocua jartasaaree. Jiyari quera na cajiniocua cateree, puetunu na nacuhuatajanaa, na jiyasocuatania.

<sup>8</sup> Segundo Pueyaso seruuri na trompeta jonenerree. Jiyacaritij, casaa juhua puereetuuca tuhuananu noshiyanoori shoniniacu caminiajinia jataaaree. Quera shoniniacu caminia cajiniocuaari nanacara quiqiii. <sup>9</sup> Puetunu shoniniacu caminiajinia quijiaca casaajanaari, quera na cajiniocua cusonuuree. Naajuhuaaj, shoniniacu caminiajinia ruhanetasano puereetuuca buqueyajiniinööri, quera puetunu na cajiniocujanaa sesosaaree.

<sup>10</sup> Tercero Pueyaso seruuri na trompeta jonenerree. Jiyacaritij, puereetuuca rijiaari jiyocuacaanuji tiqiii, jiyanoohua nishitiuucua juhua shucuenaja jaamasu noshitishano. Tiyareeri quera na cajiniocua nio jiyacua moocujinia, mijiria cuariyajiniajuhuaaj. <sup>11</sup> Cuno rijia sesaari quiriquiaa “Piiquia”. Cunora, tee cuno rijia tiyareeni, puetunu cuno mohuacajanaari piiquiara quiqiii. Pueya ratusacari cuno mohuaca, queraatia pueyari saaja cusonuuree.

<sup>12</sup> Cuarto Pueyaso seruuri na trompeta jonenerree. Jiyacaritij, casaari pananuucua pitiaree, racaacua, quera na cajiniocua riyacuanio. Cunora, puetunu mijiria cuhuatajaca casaajanaari quera na cajiniocua sesosano quiqiii. Quera na cajiniocuaari ninishiqui quiriquiaa. Cunora, pananuuri maja na cuhuatanu quiriquiaa quera juuca cajiniocua. Naajuhuaaj, riya, racanio, majaari na cuhuatanu quiriquiaa quera niucua cajiniocujuhuaaj.

<sup>13</sup> Na nuhuaji, janiyari juhua puereetuuca surohua miooru niquirii jiya cajiniocuani. Na jaasacari naa nacariquiaa jiyanohuari:

—¡Puereeta, puereeta, puereeta! Seetanujuanaa jiyanoohua puereeta quiniutianiyari jiyacua quijiaca pueyara, jiuujianaraca cureecono Pueyaso seya jaara jonenerree, canapuete joneneyaquiyajaa juhuanojuajacuajani.

## 9

### *Quinto trompeta jonesacari*

<sup>1</sup> Na nuhuaji, quinto Pueyaso seruuri na trompeta jonenerree. Jiyacaritij, janiyari jiyocuacaanuji jiyocua tinio rijia niquiriini. Cuno rijiaari tiotiu riatataja niqutiosaaree, puequeetuuju raa na riatanura. <sup>2</sup> Na riatasacari, najacaari nojooma juhua puereetuuca cuhuariquia sesacari. Pananu namijia tiomaari. Jiya cajiniocuaari mueruucara quiqiiijuhuaaj. <sup>3</sup> Sequeruuri cuno najacajiniji mueratumaa. Puetunu nio jiyacuajanaa paaquemaari. Sequeruuri cumaaca niqutiosaaree nojuaraca na quiniuria juhua turucuaniniu. <sup>4</sup> Sequeruuri rootasaaree maja nojori miaquenura jiyasocua, nacuhua jaamasujuhuaaj, puetunu moritajaca jaamasunio. Sequeru cutaraari jiyaramiquishaare puetunu pueyapuejanaa na sojonura, canapuete na jiniji jirioyaquishoo quiriquiaa Pueyaso sesatacuajani. <sup>5</sup> Sequeruuri rootasaareejuhuaaj, maja nojori cusojuanura pueya. Cinco raca cuara nojori shocojora cutara, pueyaracaanu sequeru saashi noosacari. Cuno sequeru saashiiri juhua turucuaniniu saashi noonutaniya.

<sup>6</sup> Naa pueya miishacari naquiya na noonutatej, pueyari cusonu paniniutianiya juucua. Saaja cusoyaquiniutianiyari. Jiyanoohua na shaajenu panishacari juucua, nojoriiri saaja rishiniutianiya, jiyanoohua naquiya nojori miishacari.



<sup>7</sup> Sequeruuri puereeta niquishano quiriquiaa juhua miaquetoojonura jeenucuasano caballohua. Sequeruuri casaa jiitariquiaa na nacajinia juhua jiyaniijianucua ora rojiniji shipinijosano nacaqueya. Nojori jiquiocoori juhua pueyano jiquioco niquishano quiriquiaa. <sup>8</sup> Nojori juhua maaji muecacaraca quiriquiaa, tucamuejarujuri. Juhua juurunu sare quiacaraca quiriquiaajaariuhua. <sup>9</sup> Nojori jiriquiaqueeri cumueeca quiriquiaa juhua turtuco. Nojori jaacuatusacari, na nesuhuari jiyanoehua cojuatuneriquiaa juhua caballohua jayotasacari queraatia rucuanejotaruhua, miaquetoojonuucua na netecuatusacari. <sup>10</sup> Cuno sequeruuri juhua turucuanini nojuacaraca quiriquiaa. Jiyanoehua noonacuracajuhua. Jaara nojori saare, cunoori quiquiaari nojori na noonura cinco raca. <sup>11</sup> Cuno sequeruuri jiyaniijiaraca quiriquiaa. Nojuajaari Sesaaca seru. Cuno puereeta puequeetuuru ra camarujaariuhua. Hebreo rupaajinia, na sesaari “Abadón”. Griego rupaajinia saniniuujia “Apolión”. Pueyano rupaajinia saniniuujia, nioori sequeya “Pueya Puecoona”.

<sup>12</sup> Janiyari naa niquitishaareni taa coteenujuanaa naquiya miishaanu quiniutianiyani, cuno jiuujianaraca naquiya miishocoriquianojiniji. Socua caapiquiiri cureyajaa na nuhuajiria.

### *Sexto trompeta jonesacari*

<sup>13</sup> Sexto Pueyaso seruuri na trompeta joneneree. Janiyari jiyacari rupaa tojirii pocuaanoni, shanoehua jaanutaja catijiaja juhuacutu cuatro tuhuajaa tajiniji, Pueyaso tajoji nujuatajani, orojiniji shipinishanoni. <sup>14</sup> Cua tojishano rupaani, noo sexto Pueyaso seru sequereeri, na trompeta cacariquiaani:

—Cuno cuatro Sesaaca seya quia saacarojore, puereetuuca Eufrates moo shuriucua morojosano quiyani.

<sup>15</sup> Jiyacaritij, cuno cuatro Sesaaca seyari samaacarojosaaree jiyanoehua queraatia pueya nojori puecoonura, quera na cajiniocua puetunu mijiria quijiaca pueyajinijuanaa. Cuno Sesaaca seyari tariucuaaanu naa morojosano quiquiaari, jeenucuasano nojori quiniuria namitia jiyacari nojori cartesaanura, cuno hora, cuno juuca, cuno racara, cuno marijia. <sup>16</sup> Janiyari tojiriini cuno cuatro Sesaaca seya soldadohuari, doscientos milones pueya quiriquiaa saa caballohuaracaja.

<sup>17</sup> Janiyari cuno caballohua niquitishaaree juhua cua maquenujiniani, na nijinia cajitiuniaanio. Jiyanoehua tamaatia niquishano quiriquiaari. Puetunu nojori jiriquiacajanaari turtucojiniji shipinijosano casaata mishiquiojosano quiriquiaa. Cuno, nojori naatiyaquishaanuucuaaji nojori cushiyosano turtuconi, cunoori puereeta niquishano quiriquiaa; naatuuca juhua mani, nentuuca juhua jacinto saajia, pocojuanaque juhua azufrejuhaj. Puetunu cuno caballohua nacacajanaari juhua juurunu sare nacaca niquishaariquiaa. Maniiri nojori rupaamaji rimianacuriquiaa. Najacaari nojonuucuariquiaajuhua, azufrenio. <sup>18</sup> Cuno jiuujianaraca puereeta casaata quera na cajiniocua puetunu pueyajinijuanaari cusojuasaaree. <sup>19</sup> Naacuajitij, caballohuari cumaaca jiitariquiaa na rupaama, na pituujiniajuhaj, nojori puecoonura pueya. Na pituucuaari juhua sacocua niquishano quiriquiaa. Juhua sacocua nacacaraca quiriquiaajaariuhua pueya na sajitiajara.

<sup>20</sup> Cureeno pueya, canapuate maja na puecoosaanu quirii cuno jiuujianaraca puereeta casaatani, nojoriiri sesa miiniu tarinitiaaquiriquiaa saaja. Nojoriiri samaruhua secojonu tarinitiaaquiriquiaa. Naajuhua, nojoriiri orojiniji shipinijosano casaa shuquiritiariquiaa Pueyaso niti, platajiniji



shipinishano, broncejiniji, saajiajinijiiuhua, macajinijinio. Puetunu cuno-juanaa, nojori jiyatesano tama na pueyasohuarajaajani, cunoori maja na niquiniu. Majaari na tojiniu. Majaari na rucuanenujuhuaj. <sup>21</sup> Naajuhua, majaari pueya tarinitianu quiriquiaa narta pueya monu, shimiojonujuhuaj. Naajuhua, majaari nojori tarinitianu quiriquiaa na camishoo maajipohua numuetucujunu, maajishuriu numuetucujunujuhuaj. Nohuasejonu tarinitiatuquiriquiaajaariuhua.

## 10

### *Pueyaso seru mueetasano tucuanee naajioneeniyojuajiniji pohuatasano*

<sup>1</sup> Na nuhuaji, janiyari socua tamonu jiyanoehua cumaacaraca Pueyaso seru niquirii jiyocuacaanuji roseyanoni. Cohuaja najacajinia cuhuajaa-tiariquiaari. Na nacaacua camarucuteriquiaa naashiiri. Na jiquiocoori jiyanoehua shacantuuca quiriquiaa juhua pananu. Na cashacucuaari juhua mani niquishano quiriquiaa, naatej, taa mani nujuaa na noshishacaritij. <sup>2</sup> Na miaquetajara mueetariquiaa shiitianiyojua naajioneeri, tariucua riatasano. Nio jiyacua nujuaseeri. Na miaquetajara na niohuaca niaree shoniniacu caminiaacuaari. Tacujua niaree nio jiyacua saniniuuriija. <sup>3</sup> Nocua na nujuasacari, jiyanoehua nacareeri juhua juurunu sare sariyocuanu. Na nacasacari, siete miacanaari jiyacari majacuree, juhua pueyano pocuanu. <sup>4</sup> Cuno siete miacana pocuanu nuhuaji, janiyari na sequesano naajiotanu paniriquiaa tari juucuanu. Jiyacaritij, janiyari tamonu rupaa tojirii jiyocuacaanuji naa cua sequeyano saajani:

—¡Maja pueya niishitiniu cuno siete miacana sequesano! ¡Maja na naajiotanu! Tama quioojiajiniajaaja quia racatare.

<sup>5</sup> Jiyacaritij, Pueyaso seru cua niquishano shoniniacu caminiaacua nujuaanoni, nio jiyacuajuhua, nojuajaari na miaquetajara na juaashiquia shiitioree jiyocuacaanu, seetanujuanaa na sequenura. <sup>6</sup> Naa sequereeri:

—Cuno, pueyaracaanu Quijiani, nojuajaari jiya cajiniocua shipinina, jiya shipinina, shoniniacu caminia shipininajuhuaj, puetunu tii quijiaca casaajanaa shipininiano. Nojuajaari seetanujuanaa naa cua pohuataaniya: “Majaari tari na tarishiniu quiniutianiya. <sup>7</sup> Séptimo Pueyaso seru coteesacari jonenenu na trompeta, cuno juucaja, puetunu jiyasohuaja Pueyaso miiniu panishanojuanaari tari tohuateesano quiniutianiya. Naa quiniutianiyaari taa na pohuataquiaari na sequenu panishano caminiujiuniaa pueyacua-jani”.

<sup>8</sup> Cua tojishano rupaa jiyocuacaanuji pocuaanoni, socua cua pacuterohua naa sequenuuri:

—Pueyaso seruucua quia quiaare, cuno, shoniniacu caminiaacua nujuaanoni, jiyacuanio. Nojuaja quia masetasee cuno riatasano naajioneeniyojua, na mueetaani.

<sup>9</sup> Janiyari Pueyaso seruucua quiaareeni. Janiyari na sequeeseeni na naajioneeniyojua na niquitionura janiya. Cua riucuaareeri:

—Jajaa, quia patare. Quia miaquerenoj. Shoqueeca quiniutianiya quia rupaamaari juhua samiyatu. Quia seecojinia jatanutaniya piiquiara saniniuuriija. Cunoori, pueya na saniitiotaja rupaa na quiniuucua.

<sup>10</sup> Janiyari jiyacari cuno naajioneeniyojua pataree Pueyaso seru juaashiquiajinijini. Janiyari na miaquereeni. Seetanujuanaa shoqueeca quiriquiaari juhua samiyatu. Cua miasacari, cua seecojinia jatasee piiquiaraari. <sup>11</sup> Jiyacaritij, janiyari naa sequesaaareeni:

—Quiocua Pueyaso sequesano caminiujiuriohua pohuatanu queraatia pueyapue niqiuara, queraatia tamaatia jiyacajinia quiniaa niqiuara, queraatia tamaatia rupaaca pocuajaca niqiuarajuhuaaj, queraatia jiyaniijianucua niqiuaranio.

## 11

### *Caapiqui Pueyaso sequesano caminiujiuniaa miishanojiniji pohuatasano*

<sup>1</sup> Na nuhuaji, janiyari tia shanacujutaja naajua niquitiosaareeni, juhua nataca niquishano. Janiyari naa sequesaaareeni:

—Quiarijia cutara quia quiaare Jerusalén tiacajinia. Tii nujuataja Pueyaso Secojojua tia quia shanacujusee quia shanacujutajata, orojiniji shipinishano shanohua jaanutaja catijiajanio. Quia serojorejuhuaj puetunu Pueyaso secojonuujuacajanaa tii. <sup>2</sup> Maja cutaraari quia shanacujunu Secojojua tia carijiniacuma. Cunocuaajaari taucuaca niquitiosaarucuaa tari. Pueyaso soojeaca taucuacaari Pueyaso saquiriojosano na tiacarano jitianutaniya pueyaracaanu, cuarenta y dos raza cuaara na shocojorejaatijia. <sup>3</sup> Janiyari caapiqui cua saquiriojosano pueya jiyaronutaniyani, janiyajiniji nojori pohuatanura pueya niqiuara. Nojoriiri janiyajiniji pohuatanutaniya cuaara shocojorejaatijia mil dosciento sesenta juuca. Nojoriiri cocuaque toqueya cushiniutianiya taa pueya cushiyoquiaacuajani nojori taraajesacari.

<sup>4</sup> Cuno caapiqui janiyajiniji pohuatanaani, nojoriiri cuno caapiqui olivo naana, tariucuacaanu Pueyaso Rupaajinia pohuatashiyacuajani. Naa-juhuaj, nojoriiri cuno caapiqui samari nujuatacojua, Jiyaniijiajanaa tacoji nujuatacojuani. Cuno, nojori Jiyaniijiani, nojuajaari jiya Jiyaniijiajuhuaj. <sup>5</sup> Tamonu jaara sesa miiniu paniri cuno caapiqui pueya, nojoriiri na paraa catijianutaniya nojori rupaamaji mueranacujua manitia, nojori na puecoonura. Nojoriiri saaja naa cusojuanutaniya noo pojori, canapue te nojori miiniu paniya sesa juucuacuajani. <sup>6</sup> Nojori, janiyajiniji pohuatanaani, nojoriiri cumaaca jitianutaniya maja na nitiniuria maru pueyaracaanu mijiria nojori pohuatasacari Pueyaso rupaa. Naajuhuaaj, nojoriiri cumaaca jitianutaniya mohuaca na jataniniuria nanacara. Nojoriiri cumaaca jitianutaniyajuhuaaj nojori sesonura jiya puetunu puereeta tamaatia casaatajanaa. Nojoriiri pueyaracaanu naa miijionutaniya nojori panishacari. <sup>7</sup> Nojori jaara janiyajiniji pohuatanu tucuatate, jiyacaritij, puequeetuuju raamaji tohuatariquiano pueresano sacuaraatia Casaani, cunoori nojori paracaaniutianiya. Nojori shocotanutaniyari. Naacuajitij, nojori puecoonutaniya socuaari. <sup>8</sup> Nojori queteeri cuno puereetuuca niishishano tiaca nuucuaajinia pojoconutaniya, tee nojori Jiyaniijia mosaaquiaari niyacutesanojinia teetesanocuajani. Cuno tiacaari miriqui jiyaniquishiya Sodomata, Egip-totanio. <sup>9</sup> Naacuajitij, jiuujianaraca juuca, socua niquiriyatu juuca cajiniocuanio, queraatia tamaatiuucua pueyari nojori quete shootianutaniya. Naa nojori queteya shootianutaniyari queraatia tiquiyocua tiacajinijinio pueya, tamaatiuucua rupaaca pocuajaca pueyajuhuaaj, queraatia tamonu jiyacajinijinio pueyanio. Nojori paraari maja na shanacunu quiniutianiya nojori jamojosaanura. <sup>10</sup> Puetunu mijiria quiniaajanaari shuquiritiuniutianiya, macunucua cuno caapiqui Pueyaso sequesano caminiujiuniaa quishacari. Pueyari jiyano hua timiquionutaniya, naquiya nojori miitiajaca puecoosaanuucua. Naaratej, mijiria quiijaacaari tama na casamijinijiaaja nareja niqutiojotoonutaniya nojori shuquiriniutia.

<sup>11</sup> Naajaa, jiuujianaraca juuca, socua tamonu juuca cajiniocua nuhuaji, Pueyasoori nojori samiitianijiorohua. ¡Nojoriiri na matusaquiiji saneecuaturohua! Puetunu nojori niquniaajanaari jiyanoehua shiriiquitiurii. <sup>12</sup> Jiyacaritij, cuno caapiqui Jesucristojiniiji pohuatanaari puereetuuca rupaa tojitiurii jiyocuacaanuji pocuaano. Naa nojori sequeriquiaari:

—¡Miji nia tacatama!

¡Jiyacaritij, nojoriiri na paraa niquiara tacataquee cohuajajinia jiyocuacaanura! <sup>13</sup> Na paraa shootiasacari nojori, jiyacaritij, rijiaari jiyanoehua jiuuquiujutiaree. Naa rijia jiuuquiutiasacaritij, Jerusalén tiacajinia queraatia tiacaari niyarequetaquee. Siete mil pueyari tii cusuuree. Cureeno pueyari jiyanoehua jiuujiateree Pueyasooeajii. Nojoriiri jiyacari niishirii jiyocuacaanu Quijiaari seetanujuanaa Pueyaso cutara.

<sup>14</sup> Janiyari naa segundo naquiya miiniu niqutishaareejaaniuhuj, taa na nuhuaji na miishaanutaniyacujani. Tercero naquiya miishacariiri quera ritia cuno nuhuajijia quiniutianiya.

### *Séptimo trompeta jonesacari*

<sup>15</sup> Séptimo Pueyaso seruuri na trompeta joneneree. Jiyacaritij, puereetuuca rupaacaari jiyocuacaanu tojishaaree. Naa sequeturiquiaari:

—¡Quiarrijiani, pa Jiyaniijia Pueyasoori tari jiiitianutaniya puetunu jiyacua jiyaniijianucua jiiitiasanojuanaa! ¡Nojuajaari pa Jiyaniijia Cristota Jiyaniijianucujanaa quiniutianiya! ¡Nojoricuajaari pueyaracaanu Jiyaniijiajanaa quiriquiano!

<sup>16</sup> Jiyacaritij, cuno veinticuatro niishijia jiyaniijianucua, shanohua cajitijini cajituriquiaa Pueyaso tacojini, nojoriiri Pueyasooeajia jacamaturee jiyanoehua na shuquiritianuta nojuaja. <sup>17</sup> Naa sequeturee Pueyasoori:

—¡Paacarasho canaa Jiyaniijianaa! ¡Quiaari puetunu cumaacaracajanaa! ¡Quiaari quijiajuhuanajaj! ¡Quiaari pueyaracaanu quijia! ¡Quiaari tari juhuacatecara quia cumaaca poonijioteree, Jiyaniijiajanaa quia quiniuria pueyaracaanu! <sup>18</sup> Cunora, puetunu jiyacua jiyaniijianucujanaari juaaquioya. Naajaa, quiarijiaari quia juaashacari cutara. Quiarijiaari macunucua quia nequesoreenu juucajuhuaj. Saniniujia, quiaari pueyara quia sequesano caminiujuniaa pueya niqutijonutaniya nojoririano quia riuriotaca, puetunu quia saquiriojosano pueyajanaajuhuj, puetunu quia timitiajaca pueyajanaano, jiyaniijianucua, narejaca pueyano. Naajuhuj, quiaari jiya sesojuaca pueya shaajanutaniya.

<sup>19</sup> Jiyacarijiuhuj, jiyocuacaanu Pueyaso Secojoua tiaari riataaaree. Janiyari Pueyaso Quishaquijianaa niqiriini. Tii matariquiaari Pueyaso caaja, seetanujuanaa na Rupaajanaa na racataja. Cuno na Rupaari na pueya na jiyanoetiaja, na tojiyashijia na saniitotajajuhuj. Jiyacaritij, miacanaari nunujuree. ¡Jiyanoehua majacureeri! ¡Puereetatej, jiyanoehua cojuata! ¡Rijiaari jiyacari jiuuquiutiaree! ¡Jiyanoehua queraatia miacanajaa shiniitijiaacaari juhua maru totereejuhuaj! ¡Jiyanoehua puereetaari quiriquiaa!

## 12

### *Miriqui pohuatasano maajijiniiji, puereetuuca Naaquerujiniijijuhuj, juhua cohuaniquia niquishano*

<sup>1</sup> Na nuhuaji, pueya jiuujiatenura, casaari jiya cajiniocua niquishaaree. Maajiiri quiriquiaa cuno, cua niquishanoni. Juhua toqueta pananujinia cuhuajaatariquiaari. Racaacua nujuariquiaari. Doce riyari na nacaque quiriquiaa. <sup>2</sup> Cuno maajiiri manajaraca quiriquiaa. Nooriquiaari. Cunora

na sariyojotariquiaari quera na ranu panishacari. <sup>3</sup> Jiyacaritij, janiyari socua tamonu casaa niqutishaaree jiya cajiniocuani. ¡Pueereuuca Naaqueruuri quiriquiaa, naatuhuana! Juhua cohuaniquia niquishano quiriquiaari. Siete nacacaracaari quiriquiaa, diez tuhuajaaracanio. Jiyaniijianucuara shipinijosano nacaqueya niqutiacoriquiaari na siete nacacaacua. <sup>4</sup> Cuno naatuhuana Naaqueruuri quera na cajiniocua riyajinijinio nocuara rerecoree jiyocuacaanuji na pitiutia. Nio jiyocua na jacutareeri. Naaqueruuri rariquiano maaji tacoji shanacuriquiaa. ¡Na sashiriquiaari cuaara raara, mueya na mianura jaara rasaare! <sup>5</sup> Maajiiri cayaniyojua raree. Nojuajaari puetunu mijiria quijiaca pueyapuejanaa Jiyaniijiajanaa quiriquiano. Nojuajaari pueyaracaanu na maca mueturiquiano, na tojiyashijiaca na piyotajara. Mueyari na nucua jaariutiasaaree Naaqueruucuaaji. Pueyasoori na shuriucua na ririi, tii na cajitiniuria, Jiyaniijia quiriquianoni. <sup>6</sup> Maajiiri saniniuujia cariiquia jiyajinia mashirii, tee Pueyaso jeenucuaquiaari tari nocuaji na quijiaracuajani, tii na mianuutesaanurajuhuj, cuaara shocojorejaatijia mil doscientos sesenta juuca.

<sup>7</sup> Na nuhuaji, janiyari Pueyaso seya jiyaniijia Miguel niquirii narta Pueyaso seyatani, cuno naatuhuana Naaquerujuhuj puetunu na seyatajanaa. Puetunu nojorijianaari puereeta quiaquetooriquiaa jiyocuacaanu. Cuno Naaqueruuri na seyata jiyanohua quiaqueriquiaa Pueyaso seya juucua. <sup>8</sup> Naajaa, majaari nojori naata quiriquiaa Pueyaso seya shocotanu. Pueyaso seya paracaaniucua jiyanohua nojori, majaari quiquio quiniu quiriquiaa socua nojoriria jiyocuacaanu. <sup>9</sup> Naacuajitij, cuno Naaqueruuri jiyocuacaanuji taanusaaree. Nojuacuajaari cuno tariucuaacaanu Soconu, Eva sapojoquiaarini. Cuno Sesaaca seque sesaari “Satanás”. Nojuajaari puetunu mijiria quiniaajanaa sapojoquiaa. Pueyaso seya shocotanuucua nojuaja, nojuajaari puetunu na seyatajanaa nio jiyacua quejooaaree.

<sup>10</sup> Jiyacaritij, janiyari jiyocuacaanu quijiaca queraatia pueya rupaa tojirini. Juhua niquiriyatu rupaari tojishaariquiaa jatiqui nojori paaretasacari na rupaa. Naa sequeturiquiaari:

—¡Pueyasoori parta Pueyaso pueyacuara Saquiriojotana jatatee tari! Nojuajaari pueyaracaanu Pueyaso saquiriojotaja Pueyaso pueyacuara, juuca, niucuanio. Naa pa Paraca jatasaanuucuatej, Pueyasoori quiarijia tohuateenutaniya puetunu na sequesanojuanaa na jiyanooshano pueyara. ¡Nojuajaari maninia jitianutaniya pajaniya, jiyanohua na cumaacata! ¡Pa Jiyaniijia Cristoori tari jiyatesaaree Jiyaniijiajanaa na quiniuria! Naa na miishaanuni, cunoori na Que saquiriojosano na quiniuucua. <sup>11</sup> ¡Pueyaso Borrego na quiniuucua, nojuajaari na nanaca shootequiaari, tojetaarucuajanaa jiyanooshano pa quiniuria sesa pa miishanojiniji! Naacuajitij, Satanás saquiriojotasacari parta Pueyaso pueyacuara, nojoriiri na sanaajaquiaari nojori tiuuniucua Jesucristoocua. Nojoriiri na shocotaquiaarijianaa, nojori pohuatanucua Jesucristoocua nojori tiuuniujiniji. Nojoriiri maja na puerenu quiija na mosaanura. Nojoriiri seetanujuanaa juhuajaniya tama na cuaqueyajaaja panitiaquiaari nojori mosaanura. <sup>12</sup> ¡Naaratej, jiyocuacaanunaa, shuquiriaatia quia quiri! ¡Naa Sesaaca jatasaanuucuatej, nia timiquiore jiyocuacaanu quijiacanaa! ¡Niajaniya saniniuujia, jiyacua quijiacanaa, shoniniacu caminiajiniya quijiacanio, jiyanohua nia taraajere! ¡Sesaaca niishishacari maja puera Pueyaso tarishiniya quiniutianiya na saniitionura nojuaja, nojuajaari niaacua roseyaruacua jiyanohua na juaaniutia!

<sup>13</sup> Cuno puereeta niquishano Naaqueru niishishacari nojuaja tari jatasaa-ree jiyocua, nojuajaari cuno mueya nucua neteyojotanu coteeree na mi-anura juucua. <sup>14</sup> Cuno maajiiri querajaa puereetuuca nesu niquitiosaa-ree saaja, juhua jiyanohua puereetuuca surohua miooru nesu. Cuno ne-suta, maajiiri na quiquiojiniara jaaree cariiquia jiyajinia, tucuacaanu cuno Naaqueruucua. Tii mianuutesaanutaniya pueyaracaanuuri cuaara na shocojorejaatijia jiuujianaraca marijia, socua seis racanio. <sup>15</sup> Jiyacaritij, Naaqueruuri mohuaca quecaree juhua moo, maaji nuhuaji na saquitiniuria, maaji na jaatinitianura juucua. <sup>16</sup> Jiyari maaji naacutaree. Jiyari juhua na rupaa riataree. Naaqueru rupaamaji pojuaretaano moo raturee saajaari. <sup>17</sup> Naaqueruuri jiyamitia maajiicua macaarii jiyanohua. Quiaareeri maaji-icuajinio supueno pueyata miaquetojonura. Cuno pojoricuajaari Pueyaso rootasano tojitiajaca, canapuete Jesucristoocua nojori tiuuniu seetaashijia-cacuajani.

<sup>18</sup> Naaqueruuri shoniniacu caminia casaqueyaji nujuasee.

## 13

### *Caapiqui puereeta niquishano Casaajiniji pohuatasano*

<sup>1</sup> Na nuhuaji, janiyari puereeta niquishano Casaa niquirii shoniniacu caminiajiniji tacaanoni. Siete nacacaraca quiriquiaari, diez nacajaaracanio. Puetunu na diez nacajaacua jiiitariquiaa jiyaniijianucuaara shipinijosano nacaqueyari. Puetunu na nacacaacujanaa, sesacaari nocua naajiotasano quiriquiaa. Na nacacaacua naajiotasano sesacani, cunoori Pueyaso rereque-teriquiaa, juhua Pueyaso shocotaja na quiniucua. <sup>2</sup> Janiyara, cuno cua niquishano puereeta niquishano Casaani, cunoori juhua marucatuque sare niquishano quiriquiaa. Na niohuacaari juhua oso niohuaca niquishano quiriquiaa, tucuacocua juaashococaraca. Na rupaari juhua juurunu sare rupaa quiriquiaajuhua. Cuno tari cua pohuatasano naatuhuana juhua cohuaniquia niquishano Naaqueruuri na cumaaca na niquitioree. Tama na cajitujiniajaaja na cajitiriiri jiyaniijiajanaa na quiniuria jiyacua. <sup>3</sup> Cuno puereeta niquishano Casaa siete nacacaracani, niquiriyatu na nacacajinijioori pishano quiriquiaa na mosaanura juucua. ¡Cuno puereetuuca piyashi na nacaacua quiriquiaani, saaja cushiriiquiri! Puetunu mijiria quiniaa pueyajanaari jiuujiateree na cushiriishacariuhua. Cunora, puetunu no-jorijianaari cuno puereeta Casaa tojijiacara quirii. <sup>4</sup> Jiyacaritij, mijiria quiniaa pueyari cuno naatuhuana Naaqueruucuaara jacamaturee juhua Pueyasooacara, cuno puereeta niquishano Casaa na jiyatenuucua nojori jiyaniijiajanaa na quiniuria. Pueyari cuno siete nacacaraca puereeta niquis-hano Casaacuaara jacamatureejuhua. Nojoriiri naa sequetooree tamajaaja:

—Maja socua tamonu jiyaniijia quiniu juhua nio pa jiyaniijia. ¿Tamonu jiyaniijiateeri cumaacaraca, nata na miaquetojonura? Shaaqui.

<sup>5</sup> Jiyacaritij, cuno naatuhuana Naaqueruuri cuno siete nacacaraca puereeta niquishano Casaa niishitiojoree sacuaraatia na rimiaaquenura Pueyasooacara, Pueyaso na rerequetenurajuhua. Naa miiriiri na jyanishacari nojuajaari socua maninia quijia Pueyasojiniji. Naajaa, nojuajaari jiyaniijiaara jiyatesaaree saaja cuarenta y dos racara. <sup>6</sup> Naacuajitij, cuno puereeta niquishano Casaari Pueyaso rerequetenu coteeree. Pueya-soocua rimiaaquereeri. Jesuucua tiuujia pueya sesacareejaariuhua, jiyocuaanu Pueyaso quiquionio. <sup>7</sup> Mijiria quijia Pueyaso saquiriojosano pueya paracaatishaareejaariuhua. Cumaquishaareejaariuhua Pueyaso pueya na shocotanura. Cumaaca niquitiosaareejaariuhua jiyaniijiajanaa



na quiniuria, puetunu tamaatiuucua pueyapuejanaa na jiitianura, puetunu tiquiyocua tiacajinijinio pueyajanaa, puetunu tamaatia rupaaca pocuajaca pueyajuhua, puetunu tamonu jiyacajiniajanaa quijiacanio. <sup>8</sup> Naacuajitij, puetunu mijiria quijiaca pueyajanaari cuno puereeta niquishano Casaacuara jacamaturee na shuqiritianura nojuaja, nojori pueyaso na quiniuucua. Cuno pojoriiri maja Pueyaso saquiriojosano pueya. Naaratej, jiya shipinishaanujiniji, nojori sesacaari maja na naajiotasaanu quiquiaari Borrego Niquiojua jiitiasano naajioneejinia, cante pocuara mosaaquiaaricujani. Pueyaso muerasu sesaca cutaraari cuno naajioneejinia naajiotasaquiaari jiya shipinishaacarijiojua, pueyaracaanu rishijiaca pa quiniuria.

<sup>9</sup> Cante numaacarani, nojuaja cuara tojiiria nio: <sup>10</sup> “Cante Pueyaso jiyatesano quiasocoriquianoni, nojuajaari seetanujuanaa quiasano pueyano quiniutianiya. Naajuhua, cante nijiniaquetucujaja mueruuta mosocoriquianoni, seetanujuanaa naa mosaanutaniyari”. Naaratej, Pueyaso pueya cuara puetunu casaajanaa rejeretajaca quiiria, seetanujuanaa nojori tiushacari Pueyasocua.

<sup>11</sup> Na nuhuaji, janiyari tamonu puereeta niquishano Casaa niquirii jiya-jiniji muetaanoni. Caapiqui nacajaraca quiriquiaari, juhua borrego niquiojua nacajaa niquishano. Juhua cumaacaraca jiyaniijia na rupaa paaretariquiaari. <sup>12</sup> Jiyanohua cumaacaraca quiriquiaari, juhua narta puereeta niquishano Casaa, teyano naca pishanotucujaja cushiriiriohuani. Nojuajaari na naca cushiriinohua narta puereeta niquishano Casaa naacuriquiaa. Naacuajitij, nojuajaari puetunu mijiria quiniaa pueyajanaa mojuquetanijioree juhua Pueyasocuara, nojori timitianura na naca pishano cushiriinohua puereeta niquishano Casaa. <sup>13</sup> Naajuhua, nojuajaari na cumaacata miiri jiyajeneta casaa pueya jiuujiatenura nocuaji. Jiyanohua cumaacaraca na quiniuucua, pueya niquiara, nojuajaari mani tinirii jiyocuacaanuji jiyocua. <sup>14</sup> Naa na cumaacata na miiniuucua cuno na naca cushiriinohua puereeta niquishano Casaa tacobitij, puetunu mijiria quiniaa pueyajanaa sajojoreeri. Naacuajitij, nojuajaari pueya shipinitirii casaa. Juhua cuno siete nacacaraca puereeta niquishano Casaari quiriquiaa, teyanote na nacajinia mueruuta pishano na quishacari samiitiarohua saajacujani. <sup>15</sup> Jiyacaritij, nojuajaari cumaaca niquitiosaaree pueya shipinishano Casaa na jiyatenura saminiora, pocujara na quiniuria, nocuara jacamatiuyashijiaca na puecootenurajuhua. <sup>16</sup> Naajuhua, cuno caapiqui nacajaraca puereeta niquishano Casaari na pueya sequeree nojori naajiotanura puetunu pueyacujanaa narta puereeta niquishano Casaa sesa. Naajiotasaareeri nojori miaquetaja juaashiquiaacua. Jaara nojori juaashiquiaacua naajiotaaquishaare, nojori jiniji naajiotasaareeri. Naacuajitij, puetunu mijiria quiniaa pueyacujanaa naa naajiotasaareeri, tojiyaquishoo pueyacua, tojishano pueyacua, casamiriaca pueyacua, casamijiuniucua pueyacua, tama nojoriria poonijionuujuacajaja pueyacujuhua, poonijotesano pueyacuanio. <sup>17</sup> Jiyacaritij, canapute cuno puereeta niquishano Casaa sesa naajiotasano jiitiaquiriquiaa na cuaqueyacuanii, nojoriiri maja na naata na panishano masenu quiriquiaa na cumaneecata. Naajuhua, majaari nojori naata na casami niquitiojonu quiriquiaa na cumaneecara. Pueya jaara cuno puereeta niquishano Casaa sesa jiitiaquiri naajiotasano na cuaqueyacua, na naata na sesa número jiitianu nocua naajiotasano.

<sup>18</sup> Nio niishishaanura maninia, jiyanohua niishitiajaari panishiya cutara. Niishijiaca pueya cuara serojoora puereeta niquishano Casaa sesa número. Na númeroori pueyano sesa número. Cuno númeroori seisciento sesenta y seis.



¡Cunora pueyanaa, tama nia cuaqueyajaaja nia cojuare maja cuno puereeta niquishano Casaa sesa naajiotasaanura niaacujuhujaj!

## 14

### *Borrego Niquiojua cojiniaajiniji pohuatasano*

<sup>1</sup> Na nuhuaji, janiyari Borrego Niquiojua niquiriini, Sión tuhuananuucua nujuaano. Ciento cuarenta y cuatro mil pueyari na cojiriquiaa. Borrego Niquiojua sesaari naajiotasano quiriquiaa puetunu nojori jinijijianaa, na Que Pueyaso sesajuhujaj. <sup>2</sup> Na nuhuaji, janiyari casaa tojirii juhua sararojua cojuatuneyano jiyocuacaanujini, juhua miacana majacuyano, juhua queraatia pueya arpa taquinionuyanohujaj. <sup>3</sup> Cua tojishanoori quiarinio jaaquequejosano quiriquiaa. Jaaquequenuunaari Pueyaso caji-tiu tacoji jaaquequenuuriquiaa, cuno cuatro saminio casaa tacojijuhujaj, cuno veinticuatro niishijiaca jiyaniijianucua tacojinio. Majaari quenaaja tamonu naata quiriquiaa cuno jaaquequejosano niishiniu nojori jaaquequejonurajuhujaj. Saaja cuno ciento cuarenta y cuatro mil pueya cutaraari cuno jaaquequejosano niishiriquiaa. Cuno pojoricuajaari mijiria quiniaajinijinio saquiriojosaaquiaari Pueyaso pueya nojori quiniuria. <sup>4</sup> Nojoriiri tojetaarucuajanaa maaji numuetuqueyashijiaca quiquiaari, saaja pocuaji Tacunaacua jiaatiajaca nojori quiniuucua. Naaratej, tiqiyocua Borrego Niquiojua rucuanesacari, nojoriiri pueyaracaanu na cojiquiaa. Nojoriiri saquiriojosaaquiaari mijiria quiniaa pueyajinijinio, saaja Pueyasora nojori quiniuria, Borrego Niquiojuara nojori quiniurajuhujaj. Nojoriiri socua Pueyaso timitiasano pueya puetunu Pueyaso saquiriojosano pueyajinijiniojuanaa, taa pa shuquiritiaa shushajanaa pa carojosano pa nataujinijicuaani. <sup>5</sup> Nojoriiri tojetaarucuajanaa sapojonu niishiyashijiaca quiquiaari, tojetaarucuajanaa sesa miyashijiaca nojori quiniuucua.

### *Jiuujianaraca Pueyaso seya pohuatasano*

<sup>6</sup> Na nuhuaji, janiyari tamonu Pueyaso seru niquirii jiya cajiniocua jaanoni. Jaariquiaari mijiria quijiaca pueya niquiara na pohuatanura Pueyaso Rupaa, puetunu jiyacajinia quiniaa pueyarajanaa, puetunu tamaatiuucua pueyapuerajanaa, puetunu tamaatia rupaaca pocuajaca pueyarajanaajuhujaj, puetunu tiqiyocua tiacajinia quijiaca pueyarajanaanio. Na pohuatasanoori seetanu rupajanaa pueyaracaanura. <sup>7</sup> Pueyaso seruuri mijiria quiniaa pueyacia nacariquiaa naatej:

—¡Pueyaso puerejaca nia quiriquia! ¡Nojuaja nia maniniuhuaqueetare! ¡Quiarijaari na nequesoreesacari pueya! ¡Nocuara nia mojuquetacore nia shuquiritianura nojuaja! ¡Nojuacuajaari jiyocuacaanu shipinina, nio jiya, puereetuca shoniniacu caminiajuhujaj, puetunu samocua nacaca pacarta-cojuacajanaanio!

<sup>8</sup> Jiyacaritij, tamonu Pueyaso seruuri narta Pueyaso seru nuhuajimiaajuhujaj. Naa miriqui sequeriquiaa Roma tiacajinijiiri:

—¡Babilonia tiaca tari saniitioshiya! ¡Cuno puereetuca tiaca tari saniitioshiya! Babilonia tiacaari puetunu jiyacajinia pueyajanaa niishitiojua, sacuaraatia nojori miiniuria juhua nojuajuhujaj. Babilonia tiacani, nojuajaari puetunu sesa casaa na miijosanotajanaa juhua mashaasequetejoquiaari puetunu mijiria quijiacajanaa. Naacuajitij, puetunu pueyajanaari tama na cuaqueya miiniu panishanojuaja miijiacara quiquiaari, jiyanojua nojori jiaatianuta sacuaraatia casaa na miiniuria, taa Babilonia tiacajinia quiniaa miijioquiaacuaani.

<sup>9</sup> Na nuhuaji, socua tamonu Pueyaso seruuri narta caapiqui na puetanaa Pueyaso seya nuhuajimiaajuhua. Mijiria quiniaa pueyacia nacaree naari:

—¡Jiyanohua puereeta quiniutianiyari noo pojoriria, canapuate cuno puereeta niquishano na naca pishano cushiriinohua Casaacuara mojuquetacojua juhua Pueyasooocarani! ¡Jiyanohua puereeta quiniutianiyari noo pojoririaajuhua, canapuate juhua na naca cushiriinohua niquishano shipinishano Casaacuara jacamatujuacani! ¡Naajuhua, puereeta quiniutianiyari noo pojoriria, canapuate na cuaqueya tarinitiajacani, cuno puereeta niquishano Casaa sesa naajiotasaanura nojori jinijini, nojori juaashiquiaacua soj!  
<sup>10</sup> ¡Pueyasoori puetunu cuno pueyajanaa saniitionutaniya jiyanohua na juaniutia! ¡Majaari quenaaja Pueyaso jiuujiaaniu quiniutianiya nojori! ¡Pueyaso seya niquiara, Borrego Niquiojua niquiarajuhua, nojoriiri pueyaracaanu naquiya miishaanutaniya manitia, azufretanio!  
<sup>11</sup> ¡Naa Pueyaso miitiasacari nojoritij, najacaari pueyaracaanu nojonutaniya! ¡Majaari quenaaja nojori samaraatasaanu quiniutianiya juuca, niucuanio! ¡Naquiya miiniuuri naa nojori miitianutaniya pueyaracaanu! ¡Naa miishaanutaniya cuno pojori, canapuate na naca pishano cushiriinohua puereeta niquishano Casaacuara jacamatujua juhua Pueyasooocarani, juhua nojuaja niquishano shipinishano Casaacuarajuhua! ¡Naa miishaanutaniyajaariuhua noo pojori, canapuate cuno puereeta niquishano Casaa sesa naajiotaniniutianiya tama nocuajajani!

<sup>12</sup> Cunora, Pueyaso saquiriojosano pueyani, canapuate na rootasano tojitiajacani, Jesucua tiuuniu tarinitiaashijiacajuhua, nojori cuara juhujaniya rejeretaara naquiya nojori miishacari.

<sup>13</sup> Jiyacaritij, janiyari rupaa tojirii jiyocuacaanuji naa cua sequeyanoni:

—Nio quia naajiotare: “¡Quiarijiani, jiyanohua shuquiriaatia quiijaca cutaraari cuno macunucua, canapuate tariucua Jiyaniijia Jesucristoocua tiuujaca cusonuunutaniyani!” Pueyaso Sohuanuuri naa sequeyajuhua: “¡Taaquiriirini! Nojoriiri samaateya, pueyaracaanu na Jiyaniijia na poonijionuunu nuhuaji. Maninia nojori miishanocujaaari niyajetaaquishaanutaniya. Cunora, nojoriiri maninia miishaanutaniya”.

*Pueyaso seya senoosacari pueya juhua nataacuaca nio jiyajiniji*

<sup>14</sup> Na nuhuaji, janiyari cohuaja najaca niquiriini. Cuno cohuaja najaca caco cajiniaari juhua Pueyaso Niyanu niquishano quiriqiaa. Jiyaniijia shipinishano nacaque cushitariquiaari, orojiniji shipinishano. Nataacuaca na senootajara shamatucaja jacatunee mueruu mueruquiaari.

<sup>15</sup> Jiyacaritij, tamonu Pueyaso seruuri Pueyaso Quishaquiji tohuatamaa. Cohuaja najaca caco cajianoocua nacaree jiyanohuari. Naa na sequereeri:

—¡Quia mueruuta quia canuujure, nataacuaca quia senoonura! ¡Jiyajinia nataacuacacujaaari tari noshuriujua! ¡Cuara quiarijia senoosaria!

<sup>16</sup> Jiyacaritij, cohuaja najaca caco cajianoori na jacatunee mueruuta canuujuree jiya caco. Nataacuaca senooreeri. Cuno nataacuacaari Pueyaso pueyacuaja. Nojoriiri naa rijiosaanutaniya jiyocuacaanu.

<sup>17</sup> Jiyacaritij, socua tamonu Pueyaso seruuri tohuatamaa jiyocuacaanu Pueyaso Quishaquiji. Nojuajaari shamatucaja jacatunee mueruu mueruquiaajuhua. <sup>18</sup> Na nuhuaji, socua tamonu Pueyaso seruuri tohuatamaa Pueyasooocara catijiaja casaajiniji. Nojuajaari mani camaru. Nojuajaari narta Pueyaso seruucua nacaree, shamatucaja mueruu muetuyanooocua. Na sequereeri:

—¡Quia shamatucaja mueruuta uva quia carojotare, jiyajinia moritiacouni! ¡Tari noshuriujacuaja!

<sup>19</sup> Jiyacaritij, Pueyaso seruuri uva carojotaree na mueruuta, puetunu nio jiyajinia cuhuariquiacajinijijianaa. Uva jaapuejoree saajajinia quejasano puereetuca surocohuamaari. Pueyasoori tii na rapijiotenutaniya jiyanoehua na juaaniutia. Cuno uvani, nojoriiri Pueyaso ruuretajaca pueyacuaja. <sup>20</sup> Cuno uvaari rapijiosaaree tucuaaanu naata tiacajiniji. Uva rapijiosaquiji, nanacaari tojetaarucujanaa jaateriquiaa juhua mohuaca. Jiyanoehua nanaca quiniuucua, cabollohua rupaacuma puecariquiaari. Pueyaso tojiyashijiaca pueya nanacaari jiyanoehua tucuaaanu jaateree juhua moo. Tresciento kilómetro jaatereeri.

## 15

### *Siete Pueyaso seya, siete naquiya miitiaja na mueetacosacari*

<sup>1</sup> Na nuhuaji, janiyari jiya cajiniocua socua niquitishaareni, cua niishinuria taa mijiria quiniaa saniitiosaanu tucuatasaanutaniyani. Cua niquishanoori jiyanoehua puereeta quiriquiaa. Janiyari nocuaji jiuujiatereeni. Janiyari siete Pueyaso seya niquiriini. Siete Pueyaso naquiya miitiaja mueetacoriquiaari. Pueyaso jaara cuno siete casaata naquiya miitiri pueya, nojuajaari cunota na juaaniu tucuatanutaniya puetunujuanaa.

<sup>2</sup> Janiyari casaa niquiriijiaaniuhua juhua puereetuca caminia motiquiojiniji shipinishano. Manitia cojitishanoori quiriquiaa. Pueyari cuno caminia shocua nujuaturiquiaa. Nojoriiri noo pojori quiriquiaacuaja, canapuate na naca pishano cushiriiniohua Casaa shocotaquiaaricujani, juhua nojuaja niquishano shipinishano Casaajuhua. Naajuhua, nojoriiri maja na shanacunu quiquiaari cuno Casaa sesa naajiotasaanura nojoriicua. Puetunu nojorijianaari Pueyaso niquitiojosano arpaa taquinionuuriquiaa.

<sup>3</sup> Nojoriiri Pueyaso seru Moisés jaaquequejosano jaaquequenuuriquiaa, Borrego Niquiojua jaaquequejosanonio. Nojoriiri naa jaaquequenuuriquiaa:

—Jiyaniijianaa, puetunu quia miishanojuanaari jiyanoehua maninia, nocuaji jiuujiatesano. ¡Quiaari seetanujuanaa puetunu cumaacaracajanaa! Casaa quia miishacari, quiaari maninia na miiquiaa. Majaari quenaaja quia jiyajenenu. Quiaacuajaari puetunu jiyacajinia quijiaca pueya Jiyaniijajanaa. <sup>4</sup> ¡Quiaari pueresano, Jiyaniijianaa! ¡Quiaari tojetaarucujanaa maniniuhuaqueetasano seetanujuanaa! ¡Saaja quiajaniya cutaraari tojetaarucujanaa maninia miijia pueyaracaanu! Naaratej, puetunu jiyacajinijinio pueyajanaari quiocua nijionutaniya nojori shuquiritianura quiajaniya, maninia quia saniitiojonuucua quia paraajuhua.

<sup>5</sup> Naa cua tojiniu nuhuajitij, janiyari jiyocuacaanu Pueyaso Quishaquijianaa niquirii riateyanoni, tee cuniqui seetanu Pueyaso rupajanaa racatasano quiyacuajani. <sup>6</sup> Cua niquishacari, cuno siete Pueyaso seyari Pueyaso Quishaquijijianaa tohareetariquiaa, canapuate cuno siete naquiya miitiaja patootariquiaacuajani. Nojoriiri tojetaarucujanaa cohua linojiniji toqueyaraca quiriquiaa, shacantuqueya. Nojoriiri orojiniji shipinijosano casaa na jiriquiacajinia camarucuteriquiaa. <sup>7</sup> Jiyacaritij, niquiriyatu cuno cuatro saminio casaajinijinioori miacojua niquitiojoree puetunu cuno siete Pueyaso seyajanaa. Cuno miacojuaari orojiniji shipinijosano quiriquiaa. Pueyaracaanu rishijia Pueyaso juaaquiacata mishinijosano quiriquiaari. <sup>8</sup> Jiyacaritij, Pueyaso Quishaquijianaari maatia najacata mishiquimaa. Cunora, majaari tamonu na naata Pueyaso Quishaqui tiuquiniu quiriquiaa, cuno siete Pueyaso seya cuara puecaarajaatijia naquiya nojori miitajaca pueya. Cuno najacaari Pueyaso shacantuca cumaacajiniji quiriquiaa, naa na saniitiojosacari na paraa.

## 16

### *Saniitionujiniji pohuatasano*

<sup>1</sup> Jiyacaritij, janiyari tamonu rupaa tojirii Pueyaso Quishaquiji nacaanoni. Naa cuno siete Pueyaso seya sequereeri:

—¡Nia siete miacojuajiniji Pueyaso juaaquiaca nia taroosee jiyocua!

<sup>2</sup> Niquiriyatu Pueyaso seruuri juhuacatecara coteeree. Quiaareeri. Na miacojuajiniji jaapuesee jiyocuaari. Jiyacaritij, jiyanohua nootuuca sapueyari pueyacua supueee. Noo pueyacua supueereeri, canapueete nocua naajiotasano jiitariquiaa na naca pishano cushiriiniohua puereeta niquishano Casaa sesacuajani. Sapueyaraca pueyari cuno puereeta niquishano shipinishano Casaacura jacamatujuaca quiriquiaajuhuaaj. Jiyanohua nootujuaaca sapueyari quiriquiaa.

<sup>3</sup> Segundo Pueyaso seruuri na miacojuajiniji Pueyaso juaaquiaca jaapuesee puereetuca shoniacu caminiajania. Mohuacaari puetunu nanacara quiquiijanaa, juhua shusha mosano pueyano nanaca. Cunora, puetunu shoniacu caminiajania quijia casaajanaari cusuuree.

<sup>4</sup> Tercero Pueyaso seruuri miacojuajiniji Pueyaso juaaquiaca jaapuesee puetunu moocujaniajanaa, puetunu samocua nacaca pacartacojuacajiniajanaano. Jiyacaritij, nanacara jataquee puetunujanaari. <sup>5</sup> Cuno nuhuaji, janiyari mohuaca camaru Pueyaso seru tojirii naa Pueyaso sequeyanoni:

—Pueyasonaa, quiaari quijiajuhuanajaj. Majaari quia supueni quiquiaari.

Quiaari tojetaarucujanaa maninia. Naa quia miitiasacari quia tojitiaashijiacatej, quiaari seetanjuanaa maninia namirii nojori.

<sup>6</sup> Nojoricuajaari quia saquiriojosano pueyajinijinio nanaca shootejoquiaari pueyaracaanu, quia sequesano caminiujuniana nanacanio. Quiarjia saniniuujia, naa miijiaa nojori quiniuucuatej, quiaari nojori raatejoree nanaca. ¡Maniniacuaja Jiyaniijanaa!

<sup>7</sup> Jiyacaritij, janiyari Pueyasocura catijiaja casaa tojirii juhua pueyano pocuaanoni. Naa sequeriquiaa Pueyasoori:

—Taaquiriirini Jiyaniijanaa, puetunu cumaacaracajanaa Pueyasonaa. Quiaacuajaari maninia saniitioree quia tojiyashijiaa, taa quia sequequiaari tariucuaanu nojoricuajani, quiaari quia tojiyashijiaa saniitionutaniya. Quiaari seetanjuanaa sequequiaari quia miishocoriquiano. Quiaari puetunu sesa nojori miishanojuanaa niishijia.

<sup>8</sup> Na nuhuaji, cuarto Pueyaso seruuri miacojuajiniji Pueyaso juaaquiaca jaapuesee pananuucua. Naacuajitij, pananuuri socua jiyanohua naseecara quiqui, pueya na catijianura juhua mani. <sup>9</sup> Naa pananu januuca jiyanohua nasaatiatej, pueyari jiyanohua cateree. Nojoriiri Pueyaso sesacaree saaja, cumaacaraca na quiniuucua, naa nojori na saniitionuucuatej. Majaari quenaaja nojori pishiniu quirii sesa nojori miiniuujiniji, nojori tacatonuhuaa noojia Pueyasocua, nojori jiyaniijara nojori jiyatenura Pueyaso. Pueyaso rerequeteturee saajaari.

<sup>10</sup> Na nuhuaji, quinto Pueyaso seruuri miacojuajiniji Pueyaso juaaquiaca jaapuesee. Na naca pishano cushiriiniohua puereeta niquishano Casaa cajishaqui na jaapueseeeri, tee cuniqui juhua jiyaniijajanaa na cajiriquiaacujani. ¡Jiyacaritij, puetunu na jiitiasano jiyacajanaari ninishiquiria quiqui! Cunora, na pueyari na niti saaquioriquiaa jiyanohua nooeta naquiya na miiquiosacari. <sup>11</sup> Naa Pueyaso saniitiosacari nojoritij, naajaa, majaari nojori pishiniu quiriquiaa sesa nojori miiniuujiniji. Nojori nootunenuucua, nojoriiri jiyocuaanu quijia Pueyaso sesacaree saaja, nootujuaaca sapueyaraca nojori quiniuucujuhuaaj.





# 17

## *Miriqui pohuatasano Roma tiacajiniji, juhua paanatu*

<sup>1</sup> Na nuhuaji, cucua nimiaari niquiriyatu cuno siete Pueyaso seyajinijinio, canapuete siete miacojua patootariquiaacuajani. Cua sequeseeri:

—Miji quia nimia. Janiya quia niquitiniutianiyani taa Pueyaso sanitionutaniya cuno Paanatuni, puetunu jiyajinia mohuacaacuajanaa cajiyan. <sup>2</sup> Mijiria jiyaniijianucuaari cuno Maaji numuetucujujuaca. Sacuaraatia cuno Paanatu niishitiojosanota, nojuajaari juhua mashaasequetejojua puetunu jiyacua quiniaa pueyajanaa. Naacuajitij, nojoriiri sacuaraatia miijiacara quiquiaari, juhua nojuajuhuj.

<sup>3</sup> Pueyaso seru niquitiniuria janiya na niquitiniu panishano, nojuajaari cua sohanu jiyataare cariquia jiyajinia. Janiyari tii niquishii Maajini, naatuhuana puereeta niquishano Casaa nijinia cajiyan. Queraatia sesacaari cuno naatuhuana Casaa cuaqueyacia quiriquiaa, Pueyaso rerequeteja sesaca, juhua Pueyasora na jiyatesacari tama na cuaqueyajaaja. Siete nacacaracaari quiriquiaa, diez tuhujaaaracanio. <sup>4</sup> Cuno Maajiiri shanohua toqueya cushiriquiaa, naatuque, shaaruquejuhuaj, juhua jiyaniijianucua cushishano. Queraatia shanohua maniniushitiaja casaa cushitiriquiaari: orojiniji shipinijosano casaa, shanohua saijiniji shipinijosano tiujiaujuhuj, noturu shipinijosano saijiniji tiujiaunio. Orojiniji shipinishano miacojua mueetariquiaari. Mishaja quiriquiaari puetunu sacuaraatia na miijosano casaatajanaa, numuetucujusaanu porocua na quiniuucua.

<sup>5</sup> Na sesaari miriqui naajiotasano quiriquiaa na jiniji. Naa naajiotasano quiriquiaari: “Janiyari puereetuca Babilonia tiacani. Janiyari paanatu-juri nucuani, puetunu mijiria sacuaraatia miishanojuanaa coretanijiojua nucuano”. <sup>6</sup> Maninia cua niquishacari, cuno Paanatuuri juhua mashaaseca quiriquiaa na puecootesano Pueyaso pueya nanacata. Nojuajaari jiyanojuaa timijia, Jesujiniji pohuataanaa puecoonu porocua na quiniuucua.

Naa cua niquishacari nojuajatej, janiyari jiyanojuaa jiuujiatereeni.

<sup>7</sup> Pueyaso seruuri jiyacari cua sequeree:

—¿Casaara quia jiuujiateya nocuajini? Quiaritia quia pohuatareera quia niquishanojiniji. Cuno puereeta niquishano Casaa, siete nacacaracani, diez nacajaaracanio, Maaji cajitiya na nijiniani, puetunu cunujuanaari miriqui. <sup>8</sup> Cuno puereeta Casaa quia niquishanoni, cunoori tariucuacaanujiniji quijia quiquiaari. Quiaritia saniniuujia, majaari tari na quiniu. Naajaa, quera tacanutaniuhua cuno puequeetuujua raamajiiri, seetanujuanaa puetunujuaanaa na shaajasaanuhua cutara. Pueyaso ruuretajaca pueyari jiyanojuaa shiriiquitiuniutianiya nojori jaara cuno puereeta niquishano Casaa niquiri tacatehuano, teyanote tariucuacaanu quijia quiquiaaricuajani, quiaritia saniniuujia majaari na quiniu. Jiya shipiniyaquishacarijia, cuno pueya sesacacuajaaari Pueyaso saquiriojosano pueya sesaca naajiotasaqui naajiotasoo quiquiaari.

<sup>9</sup> Cante niishijiani, nojuaja cuara niishiiria cua pohuatasano. Cuno puereeta niquishano Casaa, na siete nacacani, cunoori siete jiyaca jiyaniijianucua, mariyata siete tuhuananuhua, teyanocua cuno Paanatu cajiyaacuajani. <sup>10</sup> Cuno siete jiyaniijianucujinijinioni, cinco nojorijinijinioori tari shaajasaquiiaari. Cuno caapiqui cureenonijinini, niquiriyatuuri jiyaniijia quia quiaritia. Tamonuuri supueyojua. Nojuaja jaara supuere, saaja rupaquijia rishiniutianiyari jiyaniijia na quishacari. <sup>11</sup> Cuno puereeta niquishano Casaa, teyanote tariucuacaanu quijia quiquiaaricuajani, nojuajaari cuno cinco shaajasano jiyaniijianucujinijinio quiquiaaricuaja. Majaari



quiarijia na quiniu. Na nuhuaji supuenutaniuhuari octavo jiyaniijia na quiniuria rupaquijia. Na nuhuaji shaajasaanutaniya cutaraari.

<sup>12</sup> Cuno diez nacajaa quia niquishanojaniuhuaaj, cunoori diez jiyaniijianucuaranocuaaja. Nojoriiri cumaaca niquitiosaanutaniya saaja niquiriyatu hora jiyaniijianucua nojori quiniuria cuno puereeta niquishano Casaata. <sup>13</sup> Cuno diez jiyaniijianucuaari mariyata niishiriojonutaniya nojori cumaquiniuria cuno puereeta niquishano Casaa puetunu nojori cumaacatajanaa, jiyaniijiajanaa cuno puereeta niquishano Casaa quiniuria. <sup>14</sup> Nojoriiri Borrego Niquiojuata miaquetojonutaniya. Borrego Niquiojuuari nojori shocotanutaniya saaja, seetanujuanaa Jiyaniijiajanaa na quiniuucua. ¡Nojuajaari puetunu jiyaniijianucuaajanaa Jiyaniijia! Nata quiniaa pueyari Pueyaso saquiriojosano pueya, Neyanu tojitiajacatuhuaaj.

<sup>15</sup> Pueyaso seruuri socua cua sequeree:

—Quiaacuajaari cuno Paanatu niquirii puetunu mohuacaacuajanaa ca-jiyano. Cuno mohuacacuajaari queraatia tiaca, tamaatiuucua pueyapue, tamaatia rupaaca pocuajacajuhuaaj, tamaatia jiyacajinia quijiaca pueyanio. <sup>16</sup> Cuno puereeta niquishano Casaa quia niquishanoni, na diez nacajaanio, nojoriiri cuno Paanatu niquiniu paniyaquiniutianiya tojetaarucuaajanaa. Na cartetunutaniyari. Tojetaarucuaajanaa juhuasu na tiujiatunutaniyari. Nojoriiri cuno Paanatu miaquenutaniya. Na nuhuaji, na nucuhua cati-jiatunutaniyari. <sup>17</sup> Pueyasojuanaacuajaari cuno Paanatu paraa niishitiniutianiya naa nojori miiniuria cuno Paanatutej, taa Pueyaso paniya na miishaanuracuajani. Naajuhuaaj, Pueyasoori cuno diez jiyaniijianucua niishiriojotenutaniya jatiqúi. Naacuajitij, cuno jiyaniijianucuaari roojotoonutaniya nojori cuaara cumaquiiiria cuno puereeta niquishano Casaa puetunu nojori cumaacatajanaa. Naacuajitij, Pueyaso panishanoori tohuateesaanutaniya taa na sequequiaaricuaajani. <sup>18</sup> Naajuhuaaj, cuno Paanatu quia niquishanoni, nojuajaari cuno puereetuca Roma tiacacuaja, miriqui sequeshiya Babiloniatani. Nojuajaari puetunu mijiria jiyaniijianucuaajanaa tojitiquiaa nojuaja.

## 18

### *Babilonia tiaca catetanujiniji pohuatasano*

<sup>1</sup> Naa Pueyaso seru niquitiniu nuhuaji janiyatej, janiyari socua tamonu Pueyaso seru niquirii jiyocuacaanuji roseyanoni. Jiyanohua cumaacaracaari quiriquiaa. Na shacantuuca cumaacaari jiya cuhuatariquiaa. <sup>2</sup> Jiyocuacaanuji na rupaa paaretaree jiyanohuari. Seetanujuanaa miishocoriquiano na sequesano quiniuucua, nojuajaari juhua tariucua miishano na nacatariquiaa:

—¡Tari saniitiosaaree Babilonia tiaca! ¡Juhua niyarequetasaareeri cuno puereetuca tiaca! Samaruhua quiqúiora jatanishaaree quiarijia saniniuurijia. Naaquiya quiqúiora quiniutianiyajaariuhuaaj, puetunu pueya soosano pueresano jaacuatujuaca casaajanaa quiqúioranio. <sup>3</sup> Puetunu jiyacajinijiniojuanaa pueyari sapojonuusaaquiaari Babilonia tiacajinijinio niishitiojosanota, juhuajaniya sacuaraatia miijiaca nojori quiniuriajuhuaaj, juhua mashaaseca. Naajuhuaaj, jiyaca jiyaniijianucuaari Babilonia tiacajinia sacuaraatia miiijosano miijoquiaajuhuaaj, cuno paanatu shiniujiuniuucua nojori. Babilonia tiacajinia quiniaa pueyari puetunu na panishano casamijianaa masejoquiaa puetunu jiyacajinijijianaa, saaja tama nojori cuaqueyajaaja nojori shuquiritiniuria. Naacuajitij, cumaneecara na casami niquitiojonuujuaca pueyari jiyanohua cumaneecaraca pueya.

<sup>4</sup> Na nuhuaji, janiyari tamonu rupaa tojirii jiyocuacaanujini. Babilonia tiacajinia quiniaa Pueyaso pueya sequereeri:

—¡Cua muerasunaa, cuno tiacajiniji nia quiojore, niaa mariqui sesa mi-  
ijiacara quiriohuari, cuno sesa miijiaca nia cojinuucua! Nojorijiniji nia  
carajere, niaa mariqui puetunu nojoritijanaa cojiritiasaare naquiya mi-  
iniuuri. Nojoricuajaari quera saniitioshiya. <sup>5</sup> Cuno tiacajinia sacuaraatia  
miishanoori puera jiyanohua caneyaree. Juhua tuhananuuri maashiyaree  
jiyocuacaanura. Pueyasocujaari sacuaraatia nojori miijosano niishiya.  
Majaari socua tari na naata rejeretanu. <sup>6</sup> Babilonia cuaara namishaaria  
taa naquiya na miijioquiaa tamasacacuaani. ¡Nojuaja cuaara saniitionu  
caminiujiushaaria saniniuujia, sesa na miiniuucua tamasaca! Babiloniaari  
juhua pueya raatejoquiaari sacuaraatia na niishishano, sesa miijiaca nojori  
quiniuria juhua nojuajuhuj. Cunora, nojuaja cuaara puetunu Pueyaso  
juaaquiacajanaa raatesaaria, tama na suhucojiniajaaja mishinishanoni.

<sup>7</sup> Naatej, taa tama na cuaqueyajaaja na shuquiritiquiaa sacuaraatia na  
miishacaricuaani, saniniuujia cuaara naa jiyanohua miitiasaariajuhuj.  
¡Jiyanohua tama na cuaqueyajaaja timitiaja na quiniuucujuhuj, cuaara  
saniitiosaaria! Nojuajaari tama sequequiaajaacujua: “Janiyari niya ca-  
jiya shuquiriaatiani, cumaacaraca maaji, pueya tojishano jiyaniijia. Jani-  
yari maja mashiquioni. Majaari quenaaja cua taraajenu quiniutianiya”.  
<sup>8</sup> Cunora, niquiriyatu juucajiniaja, cuno Paanatuuri jiyanohua taraatia  
miitiasaanutaniya. Jiyacaritij, cusuunuuri quiniutianiya, naquiya mi-  
iniu, miaajenujuhuj. Jiyacari catijiatasaanutaniyajaariuhuj. Jiyanohua  
cumaacaraca Jiyaniijia Pueyaso quiniuucua, nojuajaari naa saniitionu-  
taniya cuno Paanatu.

<sup>9</sup> Mijiria jiyaniijianucuaari sacuaraatia miiniuria cojiquiaa cuno Paanatu-  
cujaja, tama nojori cuaqueyajaaja nojori shuquiritiniuria. Cunora, nojoriiri  
jiyanohua nujuquetunutaniya cuno Paanatu jaara saniitiosaare. Nojori  
niquishacari najaca tacaano jiya cajiniocua, Babilonia tiaca catesacari, no-  
joriiri nocua sapiyonuunutaniya. <sup>10</sup> Nojoriiri na puerenuta na shootianu-  
taniya tucuacaanuji, nojori mariqui saniitiosaarejaariuhuj. Nojoriiri jiy-  
acari naa sequenutaniya Babilonia tiaca:

—¡Juhuej! ¡Quiaa taraatia miishiya tiaca maniniuniaa! ¡Quiaari jiyanohua  
cumaacaraca quijia juucua Babilonianaa! ¡Quiaari canashiyaquiji sani-  
itiosaaree!

<sup>11</sup> Puetunu jiyacajiniajanaa, cumaneecara na casami niquitio-  
jonaa pueyari Babilonia tiacaacua nujuquetunutaniya. Nojoriiri  
jiyanohua taraatia quiniutianiya nojori niishishacari, nojoritiucua  
tee na casami niquitiojore na cumaneecarani. <sup>12</sup> Tucuacaanuji

Babilonia tiacajiniara nojori nitiasano casami quijiaari nio: oro,  
plata, jiyanohua panishano saijihuj, noturu shipinijosano sainio.  
Nitiasaaquiaajaariuhua maniniuqui toqueya linojiniji, sedajiniji toqueya,  
shaaruque toqueyjuhuj, juhua jiyaniijia cushishano, naatuque  
toqueyano. Nitiasaaquiaajaariuhua puetunu tamaatia shanohua jaanujua  
juhuana raquiquia, elefante quiaajiniji shipinijosano casamijuhuj,  
shanohua naanajiniji shipinijosano casaminio. Nitiasaaquiaajaariuhua  
broncejiniji shipinijosano casami, cumueeca casaajiniji shipinijosano  
casamijuhuj, shanohua mármol saajajiniji shipinijosano casaminio.

<sup>13</sup> Naajuhuj, nio shanohua jaanujua casami: canela, miesu nunacuhua,  
catijasocoriquiano shanohua jaanujua casaa, mirrajuhuj, cuaqueyacua  
shuquiutiutiasano shanohua jaanutajano. Nitiasaaquiaajaariuhua  
jereca uva caaca, shiyocua, maninia cashojuajuhuj, trigo jajaunio.

Nitiasaaquiaajaariuhua casami niyotesano seya, borregohua, caballohua, caballohua jayotasocoriquiano shipinijosano casaanio, cumaneecara niquitiojosocoriquiano pueyajuhua seya nojori quiniuria. <sup>14</sup> Jiyacaritij, Babilonia tiacaari naa sequesaanutaniya:

—¡Majaari socua quia mioonu quiniutianiya jiyanhua quia maniniucuasano naana jajau, jiyanhua quioojia jiaatiasano nocuani! ¡Puetunu quia timitiasano casaajanaari maja tari na quiniu quiniutianiya quiara, shanhua niquishano casami, jiyanhua cumaneecata quia masesano casaminio!

<sup>15</sup> Puetunu cuno casami niquitiojona pueyajanaari jiyanhua casamiriaca quia Babilonia tiacajinia quinia masejonuucua nojori casami. Maja nojori saniitiosaanurajuhua, cuno pojoriiri tucuacaanuji na puerenuta nocua nujuquetunutaniya. Nojoriiri na sapuenuta naa na sohuarejotanutaniya:

<sup>16</sup>—¡Juhuej! ¡Babiloniaari tiaca maniniu quijia juucua! Jiyanhua shanhua niquishano quijiaari, taa casamiriaca maajicuaani, na cushishacari na maniniushitiaja casa. Naa shanhua niquishiyari juhua maaji linojiniji cohuajaque toqueya cushitishano, shaaruque toqueya, naatuque toqueyano juhua jiyaniija cushishano, orojiniji shipinishano casaata na maniniushishacarijuhua, noturu shipinijosano saitiajuhua, shanhua niquishano saitanio. <sup>17</sup> ¡Jiyanhua queraatia puetunu na jiatiasano casamijianaari canashiyaquiji catijiasaaree juhua sohuanatuu!

Puetunu pueyajanaa, canapuate shoniacu caminiajina poonijionaa na cumaneecaracuajani, nojoriiri tucuacaanuji shootiariquiaa Babilonia tiaca catetasacari. Naa shootiaturiquiaajaariuhua casami jaqueroojuaca tamaquicua tiaca tacatajajinaqueya, ruconaa pueya, buquejina poonijionaa pueyajuhua, nojori camarucuanio. Puetunu cuno pojorijianaari tucuacaanuji shootiariquiaa Babilonia tiaca catetasacari. <sup>18</sup> Nojori niquishacari najaca nujuaano jiya cajiniocuara, nojoriiri na sariyocuatere:

—¿Socua tamonu tiacateeri quia juhua cuno Babilonia tiacajuhua? ¡Shaaquil!

<sup>19</sup> Jiyanhua nojori taraajenuta, nojoriiri jiyojua nanooree na nacaacua. Nojori nujuquenuta, nojoriiri naa sariyocuatere:

—¡Juhuej! ¡Babiloniaari tiaca maniniu quijia juucua! ¡Puetunu shoniacu caminiajina buque jiatianaajanaari jiyanhua casamiriaca quia, jiyanhua casamiriaca Babilonia quiniuucua! ¡Quiarjia saniniuuja, canashiyaquiji puetunujuanaari shaajasaaree!

<sup>20</sup> Jiyacaritij, Pueyaso seruuri naa nacaree:

—¡Nia shuquiriri, jiyocuacaanu quijiacanaa! ¡Babilonia saniitiosaanuucua nia timiquiore, Pueyaso saquiriojosano pueyanaa, Jiyaniija Jesu jiyaramiquishano pueyajuhua, Pueyaso sequesano caminiuuniaanio! ¡Pueyasocuaajaari niaacua namirii Babilonia!

<sup>21</sup> Jiyacaritij, cumueca Pueyaso seruuri jiyanhua puereetuca saajia paree, juhua trigo jajau jacanojotaja saajia. Shoniacu caminiajina na jatasacari, naa sequereeri:

—¡Taa cua jatasano saajia shaajemaa shoniacu caminia queronijiniacuaani, quiaari naa shaajasaanutaniya canashiyaquijijuhua, Babilonia tiacanaa! ¡Majaari socua quia niquishaanu quiniutianiya! <sup>22</sup> ¡Quia nuucuaari tojetaarucuajanaa sanaaca quiniutianiya! ¡Majaari arpa taquiniojonu tojishaanu quiniutianiya socua, turequenaco jonenenuunujuhua, trompeta jonenenuunio! ¡Puetunu tamaatia poonijosano niishijaca

juaashiquiaraca pueyajanaari shaajasaanutaniyajuhuj! ¡Majaari quenaaja niquiriyatu cureenu quiniutianiya quia quishaqui! ¡Naajuhuj, majaari socua riiquiniuuniu tojishaanu quiniutianiya! <sup>23</sup> ¡Majaari quenaaja niquiriyatu samaritiu niquishaanu quiniutianiya noshiyano quia quishaqui! ¡Naajuhuj, majaari camishacari queranacunuunu cojuatunenu tojishaanu quiniutianiya socua! ¡Quiaari naa saniitiosaareequij, jyanohua cumaacaraca quia casami niqutiojonaa pueya quiniucua puetunu jiyacajiniajanaa! ¡Naajuhuj, quiaari puetunu jiyacajinia quijiaca pueyajanaa shimiojona, sapojosano nojori quiniuria puetunu sacuaraatia casaa quia miiijosanotajanaa! <sup>24</sup> ¡Quiarijia saniniuujia, quiocua tiutiashiyari pueyara Pueyaso sequesano caminiujiunaa puecoosaanu, Pueyaso saquiriojosano pueya puecoosaanujuhuj, puetunu jiyacajiniajanaa pueya puecoosaanunio!

## 19

<sup>1</sup> Naa cua tojiniu nuhuajitij, janiyari jiyocuacaanu tojirii queraatia rupaa-cani. Naa sequeturiquiaa jyanohuari:

—¡Jyanohua maninia pa Pueyaso! ¡Nojuaja pa shuquiritiare! ¡Nojuacuajaari pa Jyanoojia! ¡Nojuajaari jyanohua shacantuuca, tojetaarucujanaa maninia miiijia na quiniucua! ¡Puetunu cumaacaracajaariuhuj!

<sup>2</sup> ¡Maninia na niishiniuucua puetunu cuno Paanatu miishano sacuaraatiajanaa, nojuajaari maninia na saniitioree! ¡Cuno Paanatuuri jiyacua quijiaca pueya sesoquiaari tojetaarucujanaa, sacuaraatia na miiijosano na niishitiojosanota! ¡Pueyasoori cunora na saniitioree! ¡Naajuhuj, Babilonia pueconuucua Pueyaso tojitiajaca pueya, Pueyasoori na namiriijuhuaj!

<sup>3</sup> Jiyocuacaanuji rupaaca cua tojishanoni, nojoriiri naa sequerohuacuhuj:

—¡Jyanohua maninia pa Pueyaso! ¡Nojuaja pa timitiariquia pueyaracaanu! ¡Pueyaracaanu cuno Paanatu saniitiosacari, majaari na najaca turetano quiniutianiya quenaaja!

<sup>4</sup> Cuno veinticuatro niishijia jiyaniijianucua, cuno cuatro saminio casaa juhuaj, nojoriiri jiyacari jiyocuara jacamaturee Pueyasoocua. Nojoriiri naa timitiaree Pueyaso, cante na shacantuuca cumaacajinia cajiriquiaacujani. Nojoriiri naa na sequeturiquiaa:

—¡Cuaara naa quiiriatej! ¡Pa Jiyaniijia cuaara timitiasaaria pueyaracaanu!

<sup>5</sup> Jiyacaritij, tamonu rupaari tojishaaree Pueyaso cajishaquijijianaa. Naa sequeriquiaari:

—¡Pa Pueyaso nia timitiariquia, puetunu na tojitiajaca pueyanaa! ¡Nojuaja nia shuquiritiare, tojishano pueyanaa, niajanijuhuj, tojishoo pueyanaa!

### *Borrego Niquiojua camishocoriquiano maaji maniniushishacari*

<sup>6</sup> Jiyacaritij, janiyari queraatia pueya tojirii jyanohua nacaanoni, juhua puereetuuca sararajua, juhua miacana majacunujuhuj. Puetunu nojorijianaari naa sequeriquiaa:

—¡Jyanohua maninia pa Jiyaniijia Pueyaso! ¡Nojuaja pa timitiariquia pueyacaanu! ¡Nojuacuajaari Jiyaniijiajanaa! ¡Puetunu cumaacaracajanaajuhuj! <sup>7</sup> ¡Pa shuquiriri! ¡Pa timiri! ¡Quiarijiacuajaari Borrego Niquiojua caminiu juuca, pueyaracaanu na saquiriojosano pueya rupuenura nojuaja! ¡Cunora, nojuaja pa timitiare jyanohua! Necoranoori tari maniniushirii na caminiuria. <sup>8</sup> Maniniuqui lino toque cushitishareeri, cohuajaque shacantuque. Necoranoni, nojoricuajaari puetunu

nocua tiuujiaa pueyajanaa. Naajuhuaaj, cuno cohuajaque na toqueni, cunocuaajaari puetunu maninia nojori miijosanojuanaa.

<sup>9</sup> Pueyaso seruuri jiyacari cua sequeree:

—Quia naajiotare nio: “Shuquiriaatia quijiaca cutaraari noo pojori, canapueete Borrego Niquiojua camishacari queranacujajiniara masuusanoni”.

Naa cua sequeree socuaari:

—Cua sequesanonni, cunoori seetanu Pueyaso rupaajanaa.

<sup>10</sup> Jiyacaritij, janiyari Pueyaso seruucuaa mojuquetareeni, juhua Pueyaso socuara, nojuaja cua timitianura juucua. Cua sequequee saajaari:

—¡Maja pueyanonaa! ¡Maja naa quia miiniu! Janiyari nareja Pueyaso seruni taa quiajanuyacuaani, juhua quia tapueyocucujuhuaaj, noo pojori canapueete pa Jiyaniijia Jesujiniji pohuatanu tarinitiaashijiacani. ¡Pueyasocuara quia mojuquetare cutara, quia timitianura nojuaja! Puetunu Jesujiniji pohuatasanojuanaani, cunoori Pueyaso Sohuanu niishitishano na pohuatanaa, janiya, niajanuyajuhuaaj.

### *Cohuajohuana caballo nijinia cajiniajiniji pohuatasano*

<sup>11</sup> Na nuhuaji, janiyari jiyocuaaanu Pueyaso quiquio niquirii tariucua ritasanoni. Janiyari tii niquirii cohuajohuana caballoni. Na nijinia cajiniaari caapiqui sesacaraca quiriquiaa. Nioori na sesaca: “Na sequesano miijia”, “Seetanu sequejajanaa”. Naari na sesaca. Tojetaarucujajanaa maninia miijia na quiniucua, puetunu niishijiajanaajuhuaaj, nojuajaari seetanujanaa maninia saniitiojua sesa miijia. Naajuhuaaj, majaari najuhuana na miaquetoojonu na paraata. <sup>12</sup> Puetunu casaajanaa niquijia na quiniucua, na namijiaari juhua mani rimianacuyano niquishaariquiaa. Jiyaniijianucuarano shipinijosano nacaqueya pasacoriquiaa na nacaacuaari. Cunoori seetanujanaa Jiyaniijiajanaa na quiniucua. Tamonu na sesaari naajiotasano quiriquiaajuhuaaj. Cuno sesaari tama na niishishanojuaja cutara.

<sup>13</sup> Na toqueeri nanacatuque quiriquiaa. Nojuajaari tariucuaaanu nio sesaraca quijiacuaja, “Pueyaso Rupaa”. <sup>14</sup> Jiyocuaaanu nata quiniaa na soldadohuari na nuhuaji sacuariquiaa. Puetunu nojorijianaari cohuajohuana caballohua nijinia cajituriquiaa. Naajuhuaaj, nojoriiri linojiniji cohuajajijiasano toqueyaraca quiriquiaa, jiyanojua cohuajaqueya tojetaarucujajanaa. <sup>15</sup> Nojori Jiyaniijiajanaa rupaamaji, nijiniaquetucuaaja mueruuri puereeta mueranacuriquiaa. Cunoori puetunu mijiria jiyacajiniajanaa na tojitiaashijia na puetujutajara. Nojuajaari jiyacari nojori Jiyaniijiajanaa quiniutianiya, nojori na jitianura jiyanojua na cumaacata. Puetunu cumaacaracajanaa Pueyaso juaaquiacata nojori saniitionutaniyari, naatej, taa uva rapijioshiya na caaca shoonuracuaani. <sup>16</sup> Na tucuaque toqueecua, na ruhuajacuucujuhuaaj, naa naajiotasanoori quiriquiaa: “Jiyaniijianucua Jiyaniijiajanaa”, “Camarucua Camarnujanaa”.

<sup>17</sup> Na nuhuaji, janiyari tamonu Pueyaso seru niquirii pananuucua nujuaanoni. Nojuajaari puetunu jiya cajiniocua jaacuatujua casaajanaa jiiquioonuuriquiaa jiyanojua, teyano jaacuatujuaate shu miojonuujuaacuaajani. Naa cuno jaacuatujua casa sequeriquiaari:

—¡Miji, niya nia rerejosee! ¡Pueyasoori nia queranacutenutaniya!

<sup>18</sup> ¡Nojuajaari queraatia shu nia mianuutenutaniya! ¡Cuno shuuri jiyaca jiyaniijianucua shu, soldadohua camarucua shu, jiyanojua cumueeca puereyaquiijia shu, caballohua shu, na nijinia cajitunuaa pueya shujiuhuaaj! ¡Camarucuaaju pueya shuuri quiniutianiyajuhuaaj, poonijiotasano pueya shu, tojishoo pueya shujiuhuaaj, tojishano pueya shunio!



<sup>19</sup> Jiyacaritij, janiyari cuno puereeta niquishano Casaa niquiriini, mijiria jiyaca jiyaniijianucuanio, puetunu nojori soldadohuatajanaa. Puetunu nojorijianaari tariucua rerejonu quiriquiaa na miaquetojonura cohuaajuana caballo nijinia cajiyana, nata quiniaa na soldadohuatanio. <sup>20</sup> Cuno na naca pishano cushiriinohua puereeta niquishano Casaari jiyacari quiasaaree, narta puereeta niquishano Casaanio. Nojuajaari cumaacaraca quiriquiaacuaja mijiria quijiaca pueya na sapojonura na cumaacata na miishanota, nojori na tiutiniuria na naca pishano cushiriinohua Casaacua. Naa na sapojonuucua mijiria quijiaca pueyatej, nojoriiri nojori cuaqueya tarinitiaquiaari na naca pishano cushiriinohua Casaa sesa naajiotasaanura nojoriicua. Naajuhuj, nojoriiri juhua cuno puereeta niquishano shipinishano Casaacuara mojuquetacojua quiquiaari juhua Pueyasooacara. Jiyacaritij, cuno caapiqui puereeta niquishano Casaari azufreta noshiyano mani quiquiojinia quejoosaaree saminiucujaja. Nojoriiri tii pueyaracaanu naquiya miishaanutaniya. <sup>21</sup> Puetunu nojoritia quiniaajanaari saniniuujia puecoosaaree nijiniaquetucujaja mueruuta, teyanote cohuaajuana caballo nijinia cajiyano rupaamaji mueranacuriquiaacuajani. Puetunu jiya cajiniocua jaacuatujua casaajanaari nojori shu tooquioree jiyanohua.

## 20

### *Mil marijara Satanás morosaanujiniji pohuatasano*

<sup>1</sup> Na nuhuaji, janiyari tamonu Pueyaso seru niquirii jiyocuacaanuji roseyanoni. Puequeetuuju raa riatataja patariquiaari, puereetiuyocua cumayocua shipinishano casaanio, Pueyaso Paraca na morotajara. <sup>2</sup> Pueyaso seruuri cuno naatuhuana Naaqueru juhua cohuaniquia niquishano quiasee. Na morojoreeri mil marijara. Nojuacuajaari cuno tariucuaaanu Soconu, samaruhua jiyaniijiajanaatuhuj. Na sesaari "Satanás". <sup>3</sup> Maninia na morojonu nuhuaji, Pueyaso seruuri puequeetuuju raama na jartaree. Raa tiotiu mishiquiorohuari. Tiotiu rupanacureeri, maja na riatasaanura. Sesaacaari naa mishiquiosaareequij mijiria quijiaca pueya na sapojiyaquiniucujaji cuara na shocojorejaatijia mil marijia. Cuno mil marijia jaara na shocojore, rupaquijjara cartesaanutaniuhuari na saniitiosaanuhuarajanaa cutara.

<sup>4</sup> Janiyari jiyacari queraatia pueya niquirii jiyaniijia cajitiucujinia cajitiuyanoni. Nojoriiri nequesoreenaara Pueyaso jiyatesano pueya quiriquiaa, mijiria quijiaca nojori jitianura. Janiyari noo pojori sohuanuhua niquiriijiaaniuhuj, canapue nacaraesaaquiaaricujajani nojori poojotanuucua pa Jiyaniijia Jesujiniji, Pueyaso rupaa tojitiajaca nojori quiniucujajuhuj. Nojori cutaraari cuno na naca pishano cushiriinohua Casaacuara jacamatiuyaquiquiaari tojetaarucujajanaa, juhua nojuaja niquishano shipinishano Casaacuarajuhuj. Naajuhuj, majaari nojori shanacunu quiquiaari cuno puereeta niquishano Casaa sesa naajiotasaanura nojoriicua. ¡Cua niquishacari, nojoriiri cua niquiara samiitiacoquee, jiyaniijianucua nojori jiyatesaanura! Mil marijiaari nojori shocojoree, jiyaniijianucua nojori quishacari pa Jiyaniijia. <sup>5</sup> Saniniuujia, narta macunucuaari maja na samiitianijiosaanu quiriquiaa cuno mil marijia cuara shocojorejaatijia. Nio macunucua samiitianijiosacari cua niquishanoni, cunoori coteenujuanaa Pueyaso samiitianijiosacari pueya. <sup>6</sup> Shuquiriaatia quijiaca cutaraari noo pojori, canapue Pueyaso samiitianijionutaniya coteenujuanaacuajani. Nojoriiri jiyacari tojetaarucujajanaa maninia quijiacara jatanishaanutaniya pueyaracaanu rishijia nojori quiniuria. Naacuajitij, Pueyaso ruuretajaca



pueya jaara puetunu shaajasaarejanaa, jiyacari majaari Pueyaso pueya pacutenu quiniutianihua cusonu. Saniniuujia, nojoriiri pueyaracaanu shamaatia timitianutaniya Pueyaso, Cristonio. Naajuhuaaj, nojoriiri jiyani-ijianucua quiniutianiya Cristota, mijiria quijiaca nojori jiiitasacari cuno mil marijara.

### *Sesaaca saniitiosacarijiana cutara*

<sup>7</sup> Cuno mil marijia shocojonu nuhuaji, Satanásri tohuatesaanutaniuhua na nujuatesaquiji. <sup>8</sup> Nojuaja jaara tohuatesaare, quianutaniyari puetunu jiyacajinia quijiaca pueyajanaa na sapojonura, Gog pueya, Magog pueyano. Nojori na sapojonuta, nojuajaari puetunu jiyaca jiyaniijianucujanaa rerejotenutaniya, puetunu nojori soldadohuatajanaa, nojori miaquetoojonura pa Jiyaniijiaata, puetunu na pueyatajanaano. Nojori soldadohuari jiyanohua queraatia pueya quiniutianiya, juhua shoniniacu caminia shuriuquioco paajia jaaquia. Majaari na naata serojosaanu.

<sup>9</sup> Cua niquishacari, tojetaarucujanaa jiyanohua queraatia pueyari ni-jioriquiaa. Jiya pueturiquiaa puetunujuanaari, juhua tereya nojori quiniucua. Nojoriiri Pueyaso panishano tiaca cosejoree, cuno tiaca shocua quijiaca Pueyaso pueyano. Jiyacaritij, maniiri jiyocuacaanuji tinishaare nojoriicua. Puetunu cuno pueyajanaari catijiasaaree tojetaarucujanaa. <sup>10</sup> Satanás, cante puetunu cuno pueyajanaa sapojoreecuajani, nojuajaari caminiajinia jataaaree tee cuniqui mani noshiya azufretacuajani. Tariucuaaanu tii jaqueroosaaquiaaricuaajari na naca pishano cushiriinohua Casaa, narta puereeta niquishano Casaano. Cunocuaajari mijiria quijiaca pueya sapo-joquiaaricuaaja, na naca cushiriinohua Casaacuaara jacamatujuaca nojori quiniuria. Nojoriiri tii miitiasaanutaniya tojetaarucujanaa pueyaracaanura, juuca, niucuanio.

### *Macunucua nequesoreesacari cohuaja cajitiu tacoji*

<sup>11</sup> Na nuhuaji, janiyari Jiyaniijiajanaa cohuaja puereetuca cajitiu niquiriini, tii cajinianio. Na niquiara, jiyari puetunu shaajequeejanaa, jiya cajiniocuanio. Majaari socua na niquishaanu quiriohua. <sup>12</sup> Jiyacaritij, janiyari puetunu macunucujanaa niquirii nujuatiuyano cuno cohuaja cajitiu tacojini; jiyaniijianucua, tojishoo quijiaca pueyano. Jiyacaritij, na cohuaja cajitiujinia cajiniaari na nequesoreetuneece riataqueree, socua tamonu nequesoreetuneeenio. Cuno nequesoreetuneejinia naajiotasano quiyacuaajari Pueyaso saquiriojosano pueya sesaca, pueyaracaanu rishijiaca nojori quiniuria. Puetunu cuno tariucuaaanu macunucujanaari nequesoreesaaree puetunu nojori miishanojinijijianaa, taa cuno nequesoreetuneecejinia na naajiotasaaquiaaricujani. <sup>13</sup> Cua niquiara, macunucua quiquiojinia racatasano puetunu cusonuuno sohuanuhuaajanaari na cuaqueya rupuete-saarohua, shoniniacu caminiajinia moquecono, jiyacua moquecononio. Puetunu nojorijianaari nequesoreesaaree taa miijiaca nojori quiquiaaricujani. <sup>14</sup> Na nuhuaji, Cusojuana, macunucua Quiquiojuhuaj, nojoriiri mani noshiyano caminiajinia jaqueroosaaree. Canapuete cuno mani noshiyano caminiajinia quejoosocoriquiano pueyacujani, nojoriiri cusonuunu pacuteriquianocuaaja. <sup>15</sup> Naacuajitij, canapuete Pueyaso samiitian-ijosocoriquianohua nequesoreetuneejinia naajiotasoo quiriquiaani, nojoriiri mani noshiyano caminiajinia quejoosaaree pueyaracaanura.

## 21

*Quiarinio jiya cajiniocujajiniji pohuatasano, quiarinio jiyajinijinio*

<sup>1</sup> Na nuhuaji, janiyari quiarinio jiya cajiniocua niquiriini, quiarinio jiyanio. Coteenujuanaa jiya cajiniocuaari tari shaajasano quiriquiaa, jiyanio. Naajuhuj, majaari shoniacu caminia quiniu quiriquiaa tari. <sup>2</sup> Janiyari jiyacari quiarinio Jerusalén tiaca niquirii Pueyaso Quishaquiji roseyanoni. Tojetaarucujanaa shanohua maniniushitishano quiriquiaari, juhua neyacarano camishocoriquiano niyacoo. <sup>3</sup> Naajuhuj, janiyari Jiyani-ijiajanaa cajitiujiniji tojirii jiyanoehua nacanuni. Naa sequeriquiaari:

—¡Pueyaso Quiquioori pueya tajinia quiya tari! ¡Nojuajanaari nojoritia quiniutianiya! ¡Nojoriiri na pueya quiniutianiyajuhuj! ¡Nojuajaari nojori cojiniutianiya, nojori Jiyaniijiajanaa na quiniuria, maninia na jiitianura nojori! <sup>4</sup> ¡Nojuajaari puetunu nojori namijiaacajanaa tuujunutianiya! ¡Jiyacaritij, majaari pueya niishiniu quiniutianiya shaajenu, sapuenu, taraajenu, nootunenunio! ¡Puetunu cuno taraatia miiniucujajaari tari shaajasano quiriquiaa!

<sup>5</sup> Na nuhuaji, Jiyaniijiajanaa cajitiujinia cajiniaari naa sequeree:

—¡Cua tojiri! ¡Janiyari quiariniora miijia puetunu casaajanaani!

Cua sequereejajaariuhuj:

—Cua sequesano quia naajiotare. Seetanujuanaari cua sequesano. Janiyacuajaari cua sequesano tohuateequiaa pueyaracaanuni.

<sup>6</sup> Cua sequerohuariuhuj:

—Cua sequesano cua miishocoriquianoni, janiyari tari na tucuataree miiniuni. Janiyari quijiajuhuanani. Janiyari pueyaracaanu quiriquianojuhuaj. Janiyari puetunu casaajanaa coretanijiani, na shaajajajuhuj. Cante jiyamueyani, janiyari pueyaracaanu pacartaja samo nacajiniji na raatenu-taniyani, na naatanuhua. Cuno samiitianijia mohuacani, cunoori cua Sohuanucujaja. Janiyari nareja na niquitioquiaani. Majaari na sami cua masenu quiquiaa na ratuna. <sup>7</sup> Cante puetunu casaajanaa rejeretaja quijiani, cua tojijia na quiniuucua, nojuajaari puetunu cua jiitiasanojuanaa jiitiana quiniutianiya. Nera, janiyari na Pueyaso quiniutianiyani. Nojuajaari quiyanu quiniutianiyacujua. <sup>8</sup> Sesa pueya saniniuujia, nojoriiri puetunu quejoosaariquianojuanaa azufreta noshiyano mani caminiajinia. Naa quejoosaanutaniyari nio pojori: Pueyaso tojitiaashijiaca pueya, puerejaca nojori quiniuucua, Pueyaso Rupaacua tiuyashijiaca, soosano pueya tama sesa nojori miiniucujajaaja seseno, pueya moojuaca, na camishoo maajipohua numuetucunujuaca, shimiacuri, shipinijosano casaacuara jacamatujuaca juhua Pueyasocuara, puetunu cuaracashijionuujuaca pueyajanaanio. Puetunu cuno pojorijianaa jaara nequesoreesaare, nojoriiri puetunu taanuusaanutaniyajanaa Pueyaso shuriucujaji. Nojoriiri mani noshiyano caminiajinia quejoosaanutaniya, pueyaracaanu naquiya nojori miishaanura tii. Cunocujajaari sequeshiya, “pueya pacutesacariuhua cunu”.

### *Quiarinio Jerusalén tiacajiniji pohuatasano*

<sup>9</sup> Janiyacuajaari tari nia pohuataree cuno siete Pueyaso seyajinijini, canapue te siete miacujua patootanaa quiquiaaricujajani, mishaja Pueyaso sanitiotajata. Niquiriyatu nojorijinijinioori cucua nimiaa. Nojuajaari cua sequesee:

—Miji. Quia niquitiriiria Borrego Niquiojua niquiorano. Nojuacuajaari pa Jiyaniijia pueya, na quiquiojaariuhuj.

<sup>10</sup> Jiyacaritij, nojuajaari cua sohuanu jiyataaree jiyanoehua puereetuca jiyaconaja tuhuananuucua. Tiji cua niquitirii cuno puereetuca quiarinio Jerusalén tiacaari, Pueyaso shuriucujaji roseyano. Tojetaarucujanaa

shanohua maniniushitishano quiriquiaari. <sup>11</sup> Nenecuariquiaari Pueyaso shacantuuca cumaacata. Na nenecuanuuri juhua jiyanoehua panishano saajia nenecuanu quiriquiaa, juhua jaspe saajia. Maatia niquishiyari na tamajiria, juhua cohujaja motiiquio. <sup>12</sup> Cuno tiaca shocua matacaari jiyanoehua puereetuuca quiriquiaa, jiyaconajajuhuj. Tiaca shocua matacaari doce tiotiuhuaraca quiriquiaa. Niquiriyatu Pueyaso seruuri puetunu cuno tiotiujinijijianaa nujuaturiquiaa. Naajuhuj, supuetana Israel doce niquiohuacuajinio supueno doce pueyapue sesacaari puetunu cuno tiotiuhuacuajanaa naajiotasano quiriquiaa. <sup>13</sup> Jiuujianaraca tiotiuhuari pananu muetasamajiria quiriquiaa, cuno tiaca matacaacua. Socua jiuujianaraca tiotiuhuari quiriquiaa pananu muetasamaji miaquetajara. Naajuhuj, socua jiuujianaraca tiotiuhuari pananu muetasamaji muenecara quiriquiaa. Socua jiuujianaraca tiotiuhuari quiriquiaa pananu tiuquishocora. <sup>14</sup> Cuno tiaca matacaari doce puereetujuaaca saicua nujuaturiquiaa. Borrego Niquiojua doce jiyaramiquishano pueya sesacaari cuno doce saicua naajiotasano quiriquiaa.

<sup>15</sup> Cuno Pueyaso seru cuata pocoojoriquiaani, nojuajaari orojiniji shipinishano shanacujutaja maca mueturiquiaa. Na mueturiquiaari nata na shanacujunura cuno tiaca, na tiotiuhua, tiaca shocua matacanio. <sup>16</sup> Cuno tiacaari jiyanoehua tucuhuana quiriquiaa. Na cajiniocuaari mariyata juhua na tucuhuana quiriquiaajuhuj. Maninia tiasano quiriquiaari, maja rimijata. Pueyaso seru shanacujunu nuhuaji puetunu cuno tiacajanaa, mariyata dos mil dosciento kilómetro quiriquiaari na tucuhuana, na jiyaconaja, na cajiniocuanio. <sup>17</sup> Na nuhuaji, tiaca mataca shanacujureejaariuhuj. Setenta y cinco metro jitiariquiriaari. Pueyaso seru shanacujutaja tucuaneri mariyata juhua mijiria pueyano shanacujutaja quiriquiaa. <sup>18</sup> Cuno tiaca matacaari puetunu jaspe saijinijijianaa shipinishano quiriquiaa. Tiacaari saniniuujia saaja orojiniji shipinishano quiriquiaa, maja quenaaja tamonu casaata cojitishano. Naacuajitij, cuno oroori juhua cohujaja motiiquio quiriquiaa. Maatia niquishiyari na tamajiria. <sup>19</sup> Cuno mataca nujuataja doce sairi queraatia tamaatiujiaaca shanohua niquishano saitia maniniushitishano quiriquiaa. Cuno mataca nujuataja doce saijinijinioni, coteenu saajiaari jaspe saitia maniniushitishano quiriquiaa. Jaspe sairi neeruuca cojitishano pocojuanaqueta. Segundo saajiaari zafiro saitia maniniushitishano quiriquiaa. Zafiro sairi nentujuaaca naata. Tercero saajiaari ágata saitia maniniushitishano quiriquiaa. Ágata sairi tejatujuaaca neeruuca. Cuarto saajiaari neeruuca esmeralda saitia maniniushitishano quiriquiaa. <sup>20</sup> Quinto saajiaari ónice saitia maniniushitishano quiriquiaa. Ónice sairi pocojuanaque naatuuca cojitishano. Sexto saajiaari naatuuca cornalina saitia maniniushitishano quiriquiaa. Séptimo saajiaari crisólito saitia maniniushitishano quiriquiaa. Crisólito sairi tiijiaaca. Octavo saajiaari berilo saitia maniniushitishano quiriquiaa. Berilo sairi neerujuaaca juhua naashi. Noveno saajiaari topacio saitia maniniushitishano quiriquiaa. Topacio sairi jiyanoehua pocojuanaque. Décimo saajiaari crisoprasa saitia maniniushitishano quiriquiaa. Crisoprasa sairi jiyanoehua neerujuaaca. Undécimo saajiaari jacinto saitia maniniushitishano quiriquiaa. Jacinto sairi jariya naata naatuuca. Duodécimo saajiaari jiyanoehua nentuuca amatista saitia maniniushitishano quiriquiaa. Puetunu cuno saijianaari jiyanoehua shanohua sai, shacantujuaaca. <sup>21</sup> Tiaca shocua mataca doce tiotiuhuari noturu shipinijosano saijiniji shipinijosano quiriquiaa. Niquiriyatu tiotiuari niquiriyatu noturu saajiajiniji

shipinishano quiriquiaa. Naa shipinijosano quiriquiaari puetunu cuno doce tiotihuajanaa. Tiaca nuucuacaari tojetaarucuajanaa orojiniji shipinishano quiriquiaa. Jyanohua maninia cuno oro quiniuucua, Pueyaso shacantucaari na tohuariquiriquiaa, juhua motiiquio cohuajaco na quiniuucua.

<sup>22</sup> Cuno tiacajinia, majaari cua niquniu quirii Pueyaso Quishaqui, tii pa rupuenura nojuaja. Cuniqii, majaari socua Pueyaso Secojua tia panishaanu. Puetunu cumaacaracajanaa Pueyasojuanaari tii quiyacuaja, Borrego Niquiojuajuhua. Puetunu cuno tiacajanaari nojori quishaquicuaja, pueyaracaanu nojori rupuesano pa quiniuria. <sup>23</sup> Cuno tiacaari maja na paniniu pananu na cuhuatariquiano, racajuhua. Pueyaso shacantuca cumaacacuajaari na cuhuataa. Borrego Niquiojuacuajaari na cuhuatana. <sup>24</sup> Puetunu jiyacajinia quiijaca pueyajanaari cuno tiaca caaniuji quiijaca quiniutianiya. Puetunu jiyaca jiyaniijianucuajanaari socua nojori panishano casami patootanutaniya nojori cuhuatana tiacajiniara, Jiyaniijajanaa nojori niquitiosocoriquiano. <sup>25</sup> Cuno tiaca tiotihuari pueyaracaanu riataquesano quiniutianiya, juuca na quiniuucua pueyaracaanu. Cuniqii, majaari quenaaja niucua niishishaanu quiniutianiya. <sup>26</sup> Jiyajinia quiijaca pueyari socua na panishano casami patootanutaniya cuno tiacajiniara. Cuno tiacaari jyanohua nojori timitiasano quiniutianiya. <sup>27</sup> Saniniuujia, maja cutaraari sesa casaa tiuquinishaanu quiniutianiya cuno tiacajinia. Naajuhua, majaari sesa miijaca tiuquiniu quiniutianiya tii, sapojonuujucanio. Saaja noo pojori cutaraari tii tiuquitianutaniya canapue sesacate pueyaracaanu rishijiacarano Borrego Niquiojua naajioneejinia naajiotasano quiyacuajani.

## 22

<sup>1</sup> Na nuhuaji, Pueyaso seruuri cua niqitirii pueya samiitianijiotaja moo, cohuajanacu tojetaarucuajanaa. Nenecuariquiaari. Cuno mohuacaari Jiyaniijia Pueyaso cajitiujiniji pacartariquiaa, tee Borrego Niquiojua cajija-jaaniuhua. <sup>2</sup> Samiitianijia naanaari tiaca nuu jiuujiaaco nujuaturiquiaa, cuno moo shuriuquiocojuhua, niqijiria, na taquijiriano. Cuno naanaari puetunu racarajanaa muetujuaca. Naacuajitij, puetunu marijarajanaa, doce caminiujiya muetunuuri. Na mucacaari maninia, puetunu jiyacajinia quiijaca pueyajanaa naarajotajara. <sup>3</sup> Cuniqii, majaari socua Pueyaso sesacasano casaa quiniu quiniutianiya. Naacuajitij, Pueyasojuanaa, Borrego Niquiojuajuhua, nojoricuajaari cuno tiacajinia quiijaca quiniutianiya, Jiyaniijajanaa cajitii quiniuucua tii. Nojori tojtiajacaari nojori timitianutaniya pueyaracaanu tii. <sup>4</sup> Nojoriiri Pueyaso jiquioco shootiajaca quiniutianiya. Na sesaari nojori jiniji naajiotasano quiniutianiya. <sup>5</sup> Cuniqii, majaari niucua niishishaanu quiniutianiya. Tii quiijaca pueyari maja na paniniu quiniutianiya samaritiu, pananunio. Jiyaniijia Pueyasojuanaacuajaari nojori cuhuatanutaniya. Nojoriiri jiyaniijianucua quiniutianiyajuhua, puetunu Pueyaso shipinishanojuanaa nojori jitianura pueyaracaanura.

### *Jesucristo quera tiuquiuhua*

<sup>6</sup> Na nuhuaji, Pueyaso seruuri cua sequeree:

—Cua niquitishano quiajaniani, cua sequesanojuhua, puetunu cunojuanaari seetanujuanaa. Puetunujuanaari tohuateeriquiano. Pueyasoori na Sohanuta niishitiquiaa na sequesano caminiujiuniaa pueya, nojori pohuatanura pueya niquiara na niishitiniu panishano. Naajuhua, nojuacuajaari quiarijia na seru jiyaroree, na tojtiajaca na niishitiniuria taa quiari naataja

nojuaja tucuatanutaniya puetunu na sequesanojuanaani. <sup>7</sup> Pa Jiyaniijiacua-jaari naa sequeya: “Janiya quera tiuquihua niaacuani”. Shuquiriaatia quijiaca cutaraari noo pojori, canapuate nio naajioneejinia Pueyasojiniji niishitishano tojiacani.

<sup>8</sup> Janiyajanaacuajaari nio cua naajiotasano niquiniani, na tojiniajuhuaj. Janiya Juanni. Naa cua niquiniu nuhujitij, cua tojinu nuhujijuhuaaj, janiyari Pueyaso seru pajama mojuquetareeni. Janiyari naa mojuquetaree nojuaja cua timitianura juucuanu, juhua Pueyaso. <sup>9</sup> Nojuajaari cua seque-quee saaja:

—¡Maja naa miiniu pueyanonaa! Janiyari Pueyaso serujuhuaaj, juhua quia-janiyajuhuaaj, juhua puetunu quiarta Pueyaso sequesano caminiujiunias pueyajuhuaaj. Naajuhuaaj, nio naajioneejinia naajiotasano tojiacani pueyani, nojoriiri cuarta Pueyaso seyajuhuaaj. ¡Pueyasojuanaa quia timitiare cutara!

<sup>10</sup> Cua sequerejaariuhuaaj:

—Pueyaso niishitishano nio naajioneejinia quia naajiotasanoni, cunoori maja saa quiaraja. Puetunu pueyajanaa cuara na niishiirianoj. Puetunu niya naajiotasanocuajaari quera tohuataya. <sup>11</sup> Naacuajitij, canapuate sesa na miiniu tarinitianu paniyaquiyani, sacuaraatia miijiujuacajuhuaaj, cuara na tarinitiaaquiiriaqui. Saniniuujia, canapuate maninia miijiujuaca cutarani, saaja Pueyasora poonijionuujuacajuhuaaj, nojori cuara tarinitiaaquiiria maninia nojori miiniuujuhuaaj.

<sup>12</sup> Pa Jiyaniijiacuaajaari naa pa sequeya:

—¡Taaquiririnij! ¡Quera tiuquihuanijia! Janiyari cua tojitajaca cua niq-uitiojosocoriquiano casaa tiuquitianutaniuhuanu. Janiyari puetunu no-jorijianaa nareja niqutiojonutaniyani, maninia nojori miiniuucua quiria, nojori miishano jaara maninia quiri. <sup>13</sup> Pueyaso Rupaa cua quiniuucua, janiyari puetunu Pueyaso sequenu panishanojuanaa caminiujiuniani. Janiyari quiijajuhuanani. Majaari cua supueno quiquiaari. Janiyari puetunu casaajanaa coretanijiani, na shaajariquianojuhuaj.

<sup>14</sup> ‘Shuquiriaatia quijiaca cutaraari noo pojori, canapuate juhuacarijia nojori jiuujia jeequecanu Borrego Niquiojua nanacatani. Nojoriiri juhua cohujaque toqueyaraca quiniutianiya cua niquiara. Naacuajitij, no-joriiri tiuquitianishaanutaniya Pueyaso quiija tiacajinia, nojori mioonura pueyaracaanu pueya rishitijia naanajiniji. <sup>15</sup> Saniniuujia, nio pojori-iri Pueyaso tiaca mataca tamajiria jateenutaniya: sacuaraatia casaa mi-ijia, shimiacuri, na camishoo maajipohua numuetucunujuaca, narta pueya puecojuaca, shipinijosano casaacuara jacamatujuaca juhua Pueya-soocuara, cuaracashijionu porocua pueyano.

<sup>16</sup> ‘Janiyacuaajaari cua seru jiyarorucuaa quiocuani, na niishitiniuria quia-janiya puetunu niya quia naajiotasanojuanaa, saniniuujia Pueyaso pueya maapue niquiara na caminiujiushaanura. Janiyacuajaari Jesuni, supuetana David niquiohuacuajinio caneno pueyajinijinio supueno, Jiyaniijiajanaa cua quiniuria David niti. Naajuhuaaj, Pueyaso Niyanu cua quiniuucua, janiyari noo rijiani, joojeatej, taa janiyajiniji naajiotasano quiya tariucuaaanu Pueyaso Rupajiniacuajani.

<sup>17</sup> Pueyaso Sohuanuuri Borrego Niquiojua niquioranota naa sequetiuya: “¡Miji Jiyaniijianaa!” Canapuate naa nio naajioneejinia naajiotasano to-jiyani, nojori cuara naa sequeerajuhuaaj: “¡Miji!” Cante jiyamueyani, nojori cuara niiria, Pueyaso samitianiijiotaja mohuacajiniji nojori ratunura. Na ratunaa pueyari, maja na ratunu sami na cumaneeca mashiniquishaanu.

<sup>18</sup> Cante nio naajioneejinia juhuacarijia Pueyaso niishitishano tojiriini, taa Pueyaso miiniutianiya, janiyajanaari nia numooteyani, majaari quenaaja na pohuatasano nia jataniniu. Cante niya pohuatasano maateya socuani, Pueyasoori na saniitionutaniya nio naajioneejinia na pohuatasano naquiya na miitiaja casaata. <sup>19</sup> Naajuhuj, cante nio naajioneejinia pohuatasano cuaracashitijiani, Pueyasoori cuno pueyano taanuunutaniya, maja na quiija tiacajinia na tiuquiniuria. Naacuajitij, majaari nojori mioonu quiniutianiya cuno tiacajinia naana jajau, pueyaracaanu rishijiaca nojori quiniuria, taa nio naajioneejinia na pohuatashiyacuajani.

<sup>20</sup> Cante nio sequeyacuajani, nojuajaari naa sequeya: “Taaquiririnij, quera tiuquiuhuanijia”.

Jaa, Jiyaniijia Jesunaa. ¡Naacuaaquiniatejaj! ¡Ritia quia nimiohua canaacua!

<sup>21</sup> Pa Jiyaniijia Jesu cuaara puetunu niajanijanaa cumaquiiria na So-huanuta.